

HISTOIRE DE PORTUGAL, CONTENANT LES ENTREPRISES, NAUIGATIONS, ...

Jeronymo Osorio, Fernao
Lopes : de Castanheda, ...







HISTOIRE DE PORTVGAL,

CONTENANT LES ENTREPRISES,
nauigations, & gestes memorables des Portugallois, tant
en la cõqueste des INDES ORIENTALES par eux descou-
uertes, qu'ès guerres d'Afrique & autres exploits, depuis
l'an mil quatre cens nonâte six, iusques à l'an mil cinq cens
septante huit, sous Emmanuel premier, Iean troisiẽsme, &
Sebastian premier du nom.



COMPRINSE EN VINGT LIVRES, DONT LES
douze premiers sont traduits du latin de IEROSME OSORIVS,
Euesque de Sylues en Algarve, les huit suiuians prins de
Lopez de Castagnede & d'autres historiens.

*Nouuellement mise en François, par S. G. S. Avec un discours du fruit qu'on
peut recueillir de la lecture de ceste histoire, & ample Indice des
matieres principales y contenues.*



De l'Imprimerie de François Estienne,
Pour Antoine Chuppin

M. D. LXXXI.





A NICOLAS PITHOV
S' DE CHAM-GOBERT,

S. G. S.



MONSIEUR, le pense bien que ceux qui nous connoissent
trouueront estrange & mal seant de prime face, que i aye mis
la main à ceste histoire, pour la communiquer à nostre nation :
& qu'ayant esté dediee par Oforius à un Prince, se la vous
presente maintenant. Quant à ce premier point, ie ne nie pas
que durant le temps employé à ce labour ie pouuois vacquer à
choses plus serieuses, mieux conuenantes à mes estudes, &
plus propres à ma vocation. le di dauantage, qu'estant sur le
milieu de cest œuvre, i ay desiré le lasser, & procurer en main-
tes sortes qu'un autre achuast plus heureusement ce qui ne se pouuoit bonnement supprimer,
une partie estant ia imprimée, & certains amis me pressans de poursuiure. Les chemins fas-
cheux, que i ay trauezé depuis quelques années m'auoyent (peu de temps auant que tou-
cher à ceste histoire) tellement harassé, que bien souuēt mon esprit courroit par dessus & par-
mi les liures cōme en un desert, ou pluslost, agit d'infinités pensemens, ie voguois sur une mer
perilleuse sans pouuoir tenir ni trouuer route certaine. Et cōbien que de fois à autre, ressi-
lant à la tête, ie visse le port où ie vouloy tendre, neantmoins ma nuyse me portoit cōme à l'a-
uanture, tellement que parmi tū de vents & de vagues i empoignoy la premiere piece qui se
rencoitroit, pour trouuer quelque soulas. Vous entendez ce que ie veux dire, & i espere que
telles secouffes ne serōt pas inutiles, ains me seruirōt pour le reste de ma nauigatiō terrienne.
Donques, estant pressé de diuerses fascheries qui ne me permettoient de goustier la douceur
des saincts liures, comme ie desirois, lisant un iour l'histoire de Portugal, ie prins tel plaisir à
la lecture des douze liures de Ierosme Oforius, tant pour le beau stile qu'à cause des choses
remarquables en l'histoire par lui de scrite, qu'il me print enuie de les faire parler Francois :
& n'eus si tost cōmencé (le chemin me semblant si beau) que ie me sentis incōtinēt bien loin.
Mais ma course fut retardée par nouueaux accidens, & comme i estois sur le point de de-
meurer au milieu, Dieu a permis que i aye veu le bout d'icelle. Mesmes i ay auancé outre
mon esperance, adioustant, pour le paracheuement de l'histoire, ce qui est auenu de plus me-
morable es Indes sous le regne de Iean troisieme, dont Oforius ne fait aucune mention, ayant
coupé le fil de son histoire à la mort d'Emmanuel : & ay suivi entierement Lopez de Casta-
gnede historie n Portugallois, duquel Oforius mesme a tiré ses douze liures. Quant à la guer-
re de Diu contenue au dixneufiesme liure, Damian de Goes gentilhomme de Portugal m'a
conduit es traitez latins qu'il en a faits. Et pour le regard du dernier, les escrits de plusieurs
historiens modernes m'ont aidé, comme la lecture en fera foy, n'ayant rien mis du mien

qu'en la translation & disposition, avec la plus soigneuse fideleité que i'ay peu, laissant (en Castagnede & Goes nommément) quelques repetitions & discours ennuyeux qui n'eussent servi que de remplage, & qui estas obmis n'ostent rien du lustre de l'histoire entiere: n'ayant aussi oublié de rendre raison pourquoy ie n'ay suivi l'histoire par l'ordre des annees, depuis l'an mil cinq cens trente. Car si il eust esté en ma liberté de le faire, i'eusse plus amplement contenté les lecteurs: mais i'espere qu'ils prendront en patience pour le present. Or ouvrir le plaisir, i'ay beaucoup aprins en ceste histoire, y remarquant de beaux traits pour l'instruction de ma vie, & ie m'assure que tout homme de bon iugement confessera qu'il y a en ce volume des exemples & enseignemens notables pour gens de toutes qualitez. Je traite oulque chose de cela au discours suivant, & parmesme moyen ie respon à ceux qui estiment le temps employé à la traduction & lecture de ceste histoire & d'autres semblable estre autant de temps perdu: ce que ie say, non tant pour excuser mon travail tel quel, bien eslongné de la disposition & eloquence des historiens que i'ay exprimez en Francois, que pour maintenir l'honneur & l'utilité des histoires de nostre temps, entre lesquelles ceste ci merite quelque place, selon mon petit avis. Brief, puis que personne ne m'a deuancé, ie ne suis pas mari de presenter à nos compatriottes ces liures en leur langage, afin qu'ils en puissent tirer quelque plaisir honneste & grand profit aussi. Pour le regard de l'autre point: i'ay tousiours estimé qu'il est loisible à chascun d'estre maistre du sien, pour le presenter à qui lon veut, pourueu que celui qui donne & celui qui recoit soyent reiglez par la vertu, ennemy d'avarice, d'ambition, d'ingratitude & de vanité. Autant que nous pouuons appeller nostre ce qui procede de nos efforts en ce monde, ie puis dire mien cest ouurage-ci: & le dedi-ant à l'un de mes meilleurs amis, à un homme bien versé en la lecture des histoires, & qui fueilleter tous les iours celles de nostre temps, ie pise que nous n'auons point outrepassé nos limites, moy en vous offrant ceste histoire, vous en la receuant de bon ail, comme tesmoignage de l'honneur que ie vous porte, & de l'amitié que ie vous prie continuer enuers moy. Quant au reste, ie me contente de vostre faueur, pour supporter tout ce qui me pourra auenir du costé des lecteurs, si d'auenture il s'en rencontre de si mal affectionnez en mon endroit, qu'ils trouuent mauuais que i'aye mis en veüe chose qu'ils receuroyent pour belle & bonne si elle parloit de la main d'un autre. Mais ie ne suis pas tant ami de mes occupations, que ie ne quitte tres-volontiers le pris à quiconque voudra faire mieux, comme il se peut faire: ains ie desire que ceci donne enuie à plusieurs de penser à bon escient aux histoires merueilleuses de ces derniers temps, pour en procurer & auancer la publication, afin que celui à qui toute gloire appartient, soit tant plus glorifié en ses iugemens, que les meschans, en quelque part & de quelque estat qu'ils puissent estre, soyent conuaincus qu'il y a un Dieu au ciel qui gouuerne le monde, & que les gens de bien demeurent entretenus & confermez en l'amour de la vraye vertu, jusques au dernier sousspir de leurs vies. Du bourry de saint Geruais, ce vingtiesme iour d'Octobre

M. D. LXXX.



DIS-



DISCOVRS AV LECTEV^R, du fruiet qu'on peut recueillir de la lectu- re de ceste histoire de Portugal.



CERON parlant en tresbonne part de l'histoire, dit que c'est le tesmoin des temps, la lumiere de verité, la vie de la memoire, la maistresse de la vie, & la messagere de l'ancieneté: tiltres de haute louange, & veritables aussi en toute histoire escrete cōme il appartient. mais en l'histoire Saincte & Ecclesiastique specialement, & plus excellentement sans comparaison qu'es profanes, lesquelles ce pendant en leur rang ont leur part à ce tesmoignage. Ce que nous considerons comme il s'ensuir, specialement en ce que l'histoire est appellee maistresse de la vie. La sagesse & iustice que nous contempons en Dieu, & selon laquelle toutes nos pensees, deliberations, entreprises & actions doiuent estre reiglees, se manifeste es commandemens de la premiere & seconde table de la Loy morale, lesquels sont autant de beaux rayons de la sagesse de Dieu, qui a discerné si bien les choses bonnes d'auec les meschantes: ayant infus quelque clairté de tels rayons es entendemens de tous hommes, & iceux fait paroistre plus à descouuert en la montagne de Sinai, prononçant de sa bouche sacrée ces commandemens, afin de renouveler ce que les tenebres de peché & de nostre corruption tacheent d'enseuelir. Alors donc il s'est monstré aux hommes, pour leur apredre ce qu'ils doyuent à sa haute maiesté & à leurs prochains aussi. Or les histoires, en la pluspart de ce qu'elles contiennent, ne sont sinon des miroirs bien polis qui monstrent, par les diuers exemples que nous y lisons, plusieurs euidens tesmoignages de ceste sagesse & loy de Dieu, au gouvernement des estars du monde, & en la vie des grands & des petis. Quand nous y voyons les meschantes resolutions & executions suiues de grands malheurs, au contraire la pieté, la iustice, brief les vertus recompensees & favorisees de benedictiōs & assistances de Dieu, cela touche & esmeut beaucoup plus nos cœurs à aimer le bien & hair le mal, que si nous n'auions que les simples commandemens ou defenses. C'est donc chose profitable en la lecture de l'histoire d'appliquer les exemples qui nous y sont deserts aux reigles de la vie humaine, dont la premiere est, que nous tenions pour resolu que Dieu est auteur des legitimes vocations, qu'il maintient le monde, est tout puissant & iuste, demande qu'on le craigne & honore, & recompense ses seruiteurs:

qu'il hait & punit l'impieté, l'injuste violence, la tyrannie, l'orgueil, les larrecins, meurtres, paillardises & autres telles meschancetez: & qu'après avoir supporté ceux qui le mesprisent il les frappe tant plus rudement. Mais entre tous ceux qui doiuent auoir l'œil fiché sur l'histoire, les magistrats & gouverneurs de la société humaine, soit en Monarchie, en Aristocratie, ou en Democratie, doyuent estre les premiers, pour remarquer les bons conseils & devoirs des Princes vertueux, item les causes du changement & renuersement des villes & royaumes, les sources des guerres & calamitez publiques. Ils voyent en l'histoire beaucoup d'excellens personnages, qui par iustice, bonté, clemence, magnanimité en guerres nécessaires, patience & moderation en leurs deportemens, de petis sont deuenus tresgrands, ont heureusement gouverné leurs estats, & laissé leurs sujets en toute prosperité: comme à l'opposite, par tyrannie, dissolutions, enuie, orgueil, trop grande confiance sur le bras de la chair, haines & dissensions secretes, les grands royaumes ont souuent esté ruinez, Dieu transportant la domination d'une personne ou d'un peuple à l'autre, à cause de l'injustice, comme en parle le Sage. L'histoire auertit les Princes & Seigneurs de bien considerer les semences & origines des confusions publiques, afin de les fuir soigneusement, cōme le sage pilote se donne garde des escueils & sablōs mouuās, crainte de faire naufrage, & perdre foy mesme avec ses passagers. Et comme les hōmes d'aujourd'hui sont de la mesme paste de ceux de iadis, ainsi void-on au gouuernemēt public & particulier renaistre mesmes affaires, conseils, occasions, euenemens, miseres & malheurs qu'autrefois. Il n'y a que changemēt de personnes, qui comparoissent les vnes apres les autres sur ce grand theatre de la vie humaine, pour prendre l'habit que leurs cōpagnons ont laissé, & iouer mesme roolle en substance, n'y ayāt difference qu'en quelques particularitez, dont la principale est du plus ou du moins: comme les impietez & injustices anciennes se voyent es histoires de nostre temps, plus grandes en quelques particuliers, moindres es autres, mais tousiours conspirans à mesme fin. Autāt en faut il dire des vertus dont l'histoire ancienne & moderne nous presente les exemples. Outre plus il y a en l'histoire des instructions propres à tous estats, pour abhorrer le vice & cherir la vertu en quelque temps que ce soit. Sur tout, les merueilleux effects de la prouidence de Dieu, qui fait teste aux orgueilleux, les renuerse pieds contre-mont, voire les acrauant, nous admonnestent de sentir nostre petitesse & vanité, nous commandent d'estre moderez, humbles, equitables, despouillez de toute fiance de nous mesmes, pour ne remuer ni entreprendre chose que bien à point, & dont nous ne pesions exactement les consequences, afin de ne nous auancer quand il faut demeurer coy, comme au contraire elle nous incite à entreprendre & suiure courageusement ce que requiert nostre vocation, & monstre qu'en bien faisant nous deuons estre paisibles en nos cœurs, encores que souuentefois l'euenemēt soit tout autre que nous n'attendions.

Or pour appliquer ce que dessus à l'histoire presente, il nous faut premierement voir si elle a les marques de vraye histoire, pour en meriter le

nom:

nom : brief, si elle est digne de tenir quelque rang entre celles, qu'on peut appeller maistresses de la vie. Si cela est prouué, i'estime qu'il ne sera pas besoin de disputer si la peine employee à publier telles choses est recommandable. Quelqu'un a sagement dit que la verité est l'œil de l'histoire, à quoy i'adiouste que ce n'est pas assez de dire la verité des choses : mais aussi que telle verité doit valoir la peine qu'on prend à la faire conoistre. Car si chascun vouloit faire des liures du cours de sa vie, & de ce qui auient es villes & maisons, on pourroit dire verité en tout cela, & toutesfois se rendre ridicule, & remplir le monde de discours inutiles ou de bien peu d'usage. Il suffit donc que de tant de cas humains, qui sont de si diuerses formes, quelques hommes doctes choisissent ce qui peut seruir aux autres pour les rendre plus auisez en la conduite des affaires du monde, marquant ce qui se rapporte au plus pres de la prudence, modestie & sagesse, recommandees à toutes personnes. I'estime qu'Oforius sera estimé veritable, & iugé n'auoir rien mis en auant que bien à propos, quand on considerera le rang qu'il tient en Portugal, les moyens qu'il a eus de sauoir la verité des choses, la suite de ses discours, son stile simple, bien ferré, & descourant les choses sans cōtrainte, affecterie, ou desir de faire valoir sa nation. Ses amis aussi lui rendent tesmoignage que c'est vn homme d'esprit posé, qui pense à ce qu'il escrit, & ne se fie aux bruits de ville, tellemēt que s'il n'a trauersé les mers pour marquer de l'œil ce qui se faisoit en Barbarie ou es Indes, il a fait dauantage en son estude, dressant par bon ordre & en bons termes, ce que diuers tesmoins dignes de foy lui ont fait entendre de viue voix & par escrit, entreposant son auis par tout, pour ranger les choses en leur endroit sans trop grande addition ou diminution. Mesmes en ceste histoire il y a cela de particulier, que les Geographes & dresseurs de chartes marines ou terrestres, que les Rois de Portugal enuoyoyēt es Indes avec les nauires qui y faisoient voile tous les ans, ne rapportoyent aucune relation des Viceróis qui ne fust biē signee de plusieurs tesmoins, & scellée de diuers seaux, pour confirmation de verité. Et puis que verité est le fondement de l'histoire, Oforius n'eust pas esté si mal auisé de mettre en auant choses dont mille tesmoins l'eussent peu redarguer, s'il eust prins plaisir à mentir, ou à flatter quelques particuliers de sa nation. Et de penser qu'il ait voulu faire du plaissant, & presenter des comptes pour rire, ce seroit sortir hors des limites de raison, estāt homme d'aage, de grande erudition, & de qualité. Reste de sauoir si ce qu'il propose vaut la peine d'estre escrit & leu. Je suis de ceste opinion, si ie ne voy bien clairement le contraire. Car il raconte les choses auenues briefuement, clairement, librement : descouure leurs commencemēs, progres & issues : sonde & monstre au doigt les conseils & les fondemens des deliberations de part & d'autre, puis ce qui s'en est ensuiui iusques à vne conclusion finale : descriit affaires d'importance en temps de paix & de guerre, fait voir ce qui est receuable ou à cōdamner es actions des grands & petis : par fois en declare aussi ce qu'il en pense, entremellant ses discours qui tienēt le lecteur en goust, & ne le laschent qu'il ne s'en retourne plus à mi de vertu apres la lecture quē deuant. Quant à Castagnede, vray est qu'Oforius le surpasse en

DISCOURS.

fauoit & d'exterité de bien dire : mais en cōteschange il a veu les Indes, & assisté en beaucoup de choses qu'il décrit, comme tefmoin oculaire. Les autres que nous auons fuiuis es deux derniers liures sont de mesme marque qu'Oforius & Castagnede, les vns ayans veu, les autres ayans escrit apres fidele rapport. Mais la verité sera encores conue plus vile si nous considérons les choses diuerses contenues en ceste hystoire, & qui apportēt si doux plaisir & telle instruction, qu'on ne scauroit dire lequell y est le plus grand, ou la consideration des merueilles de Dieu en si grande diuersité d'affaires, ou la doctrine enclose es exēples qui s'y font voir en mille endroits. On y void les coustumes, facons de faire, loix, ceremonies & naturels d'une infinité de nations : leurs isles, pays, villes, haures, forteresses, bastimens & commoditez : leur gouuernement politique & œconomique, leurs gouuerneurs en temps de paix & de guerre, leur façon de combattre, leurs armes, leur religion, & tout ce qui en depēd. Dauantage les sources des dissensiōs & esmeutes y sont demonstrees, les stratagemes, escarmouches, batailles, sieges, assaux, prinſes, rauictuaillemens, secours, coniurations, trahisons, ambassades, harangues militaires, & autres parties d'hystoire sagement descriptes, & si doucement entrelacees qu'elles contraignent le lecteur de sentir diuerses passions en son ame, tant la verité a de puissance sur les cœurs humains. Mais en considerant les autres qualitez requises en vne hystoire receuable, on conoistra encores mieux la valeur de ceste ci. Il faut donc en second lieu, que tout sage historien escriue librement ce qu'il doit dire : pource que s'il veut plaire à ceux ci ou à ceux là, c'est estre flatteur non pas historien : & s'il oublie vne trop expresse verité, il est ignorant, ou craintif, ou passionné : s'il charge trop les vns pour excuser les fautes d'autrui, de flatteur il deuient calomniateur, vice detestable en toutes personnes, sur tout es historiens, desquels le premier & principal but est de dire verité. Combien qu'Oforius semble en quelques endroits pancher vers son pays & fauoriser à son peuple : toutesfois on peut voir en d'autres passages qu'il n'espargne point les Portugallois, ains descouure & condamne les fautes des grands & petis, si expressement que rien plus, comme tous ses liures en font foy : autant en font les autres suiuaus, le tout avec la moderation requise en tels discours : Car en matiere de descouuir les imperfections d'autrui, il ne faut pas s'accommoder aux desirs de plusieurs malins, ni sacrifier à l'enuie de ceux qui sont bien aises de voir degradertout le monde, ne pouuans iamais rire, s'ils ne voyent sauter (par maniere de dire) à deux pieds sur le vētre des plus grands specialement. Vne discrete medioerité est requise en cela, qui n'approche de crainte ni d'audace. Vray est que par fois les iniquitez sont si estranges & execrables, qu'il n'est plus tēps d'espargner personne, cōme les hystoires de tout tēps en font foy : mais en cest endroit ie demāde vn esprit nō passionné, craignāt Dieu, & regardāt à edification, de peur que les escrits ne se changēt en inuectiues ou libelles diffamatoires. Ce pendāt, il ne se faut pas guerres soucier de l'ineptie de ceux qui condamnent tous les traits picquans d'un historien, iūgeans d'autrui selon leur insuffisance. Ils seroyent marris (ce crōy-ie) qu'on les cōtraignist de s'abstenir de sel en leur viure :

viure: pourquoy donc trouuent-ils mauuais qu'un discours soit assaisonné de quelque chose qui lui donne goust, faisant venir aux bons plus grand appetit de la vertu, & contraignant les coupables de rougir en leurs consciences? mais les tigneux craignent le peigne, comme dit le proverbe, & sont fâchez quand on testonne leurs compagnons, craignans que puis apres on les empoigne au collet. Toutesfois quant à ceste histoire, les Portugalois & autres peuples n'auront occasion de mescontentement: au contraire, encores que le royaume de Portugal soit maintenant bien decheu de sa splendeur ancienne, que la vertu de ses habitans soit comme aneantie, & leur estat merueilleusement desfiguré, ceste histoire monstre leur valeur & bonheur, tandis qu'ils ont aimé quelque discipline & honnesteté. En les reprenant, elle leur descouvre tant mieux les remedes au mal d'aujourd'hui, & en les esleuant monstre que l'aduersité ne doit pas aneantir ceux qui iadis ont fait preuve de leur hardiesse & constance en maints endroits. Il est requis aussi que l'historien garde l'ordre des temps, descriue les pays & regions exactement, propose les conseils, exploits & euenemens, y adioustant son auis quelquesfois selon que la chose le requiert, montrant les traits de sagesse ou d'indiscretion en ceux qui ont manié les affaires, se retenant toujours en ses limites afin de ne tomber es fautes de certains estourdis, qui iugent de toutes choses à la volée, & selon la passion qui les maistrise. Adioustons à cela le stile graue, doux, coulant, brief & clair, sans beaucoup de redites ou discours de nulle consequence, & qui peuuent desgouster le lecteur au lieu de le retenir. Tous ces ornemens où la pluspart le trouueront en ceste histoire, en laquelle l'ordre des temps les plus notables pour voir l'estat florissant de Portugal est suivi: les situations des pays ne sont pas oubliées, les côseils & deporttemens sont amplement deduits, & de telle grace, que si i'auois à la dixiesme partie pres aussi bié rencôtré en ma tràslatiô que mes auteurs en leur inuention & disposition, i'oseroi'y mettre ceste histoire au rãg des plus plaisantes & vtils que l'on sauroit fueilletter entre les histories profanes. C'est à vous, lecteur, de iuger de ce que dessus, & voir si les marques d'une vraye histoire paroissent en celle-ci: pour à quoy paruenir encores mieux, considerons si elle nous propose des enseignemens tels que nostre vie en puisse estre réduite meilleure: Emmanuel en plusieurs endroits donne de beaux auertissemens aux Rois & Princes de leur deuoir en temps de guerre & de paix. Ses fautes notées en quelques liures, sont tesmoignages que la grandeur humaine est bien foible, si elle n'est appuyée que sur l'oy-mesme: & nomément cela ne se peut nier que les mariages de ce prince, contractez autrement que la Loy diuine commande, n'ayent attiré sur ses royaumes & suiets beaucoup de confusions: ceci sur tout estant deplorable, que si tost apres la mort de ce Prince, tant illustre & renommé, toute sa race soit perie. Quand il a entrepris quelque chose non nécessaire, nostre historien môstre que la fin n'en a esté que tresmiserable. Cela se descouvre mieux en Sebastian, qui pour s'estre fourré sans droite vocation en la guerre de Barbarie, y est demeuré pour les gages, seruant d'exemple aux plus grands de se contenir en leurs limites, croire bon conseil, ne vouloir s'agrã-

DISCOVRS.

dir par moyens obliques, procurer la paix auant toutes choses, ou manier les armes en si bonne conscience que Dieu & les hommes droits y consentent. La iustice, la discipline militaire, les recompenses des capitaines, gentilshommes & bons soldats, les estats donnez aux hommes doctes, les ambassades & affaires d'importances commises aux principaux & plus experimentez au royaume de Portugal, tandis que les affaires y ont esté bien reglees, apprendront aux grands, qui ont l'esprit encores sain, de fuir toute oppression, de contenir leurs suiets sous vn bon ordre, de n'oublier leurs bons seruiteurs, de n'auancer gens indignes, flatteurs, boufons, macquereaux & maistres de dissolution, aux charges publiques ni aux particulieres. Quant à la religion, Emmanuel & ses successeurs ayans monstré quelque conscience en cela, de la resolution de laquelle nous ne disputôs pour le present, sont assez le procez à ceux qui esleuez es honneurs du monde ne pensent pas tousiours à celui qui les a establis ses lieutenans, pour procurer sa gloire cōme ils deuoyent. Mais ceste fidelité, douceur, humanité, constance, & autres vertus que nous voyons en quelques roitelets & seigneurs Indiens, fait bien le proces à tous hommes de qualité, faisans profession du Christanisme, s'ils ne l'embrassent en leur cœur, pour apprehender non seulement ce qui est de leur salut, ains aussi ce qui touche leur deuoir enuers les hōmes. La vaillance & resolution de plusieurs Princes & capitaines entre ces peuples, doit encourager tous hommes de bon cœur à maintenir le droit & la pieté iusques au dernier soupir. Comme au contraire les pillages, trahisons, fraudes, violences & saccagemens de quelques vns de ces barbares, môstre quelle beste cest que l'homme abandonné à son naturel, & despourueu de la conoissance du vray Dieu. On void en ceste histoire infinis iugemens de Dieu cōtre les tyrans & perfides, contre les rebelles, orgueilleux & ambitieux. Les larrōs, voleurs, meurtriers, faux tesmoins, & autres tels malheureux, y sont flestris en diuers exemples. On y lit les miserables issues des cōseils procedans d'auarice ou d'ambition : comme au contraire la liberalité & promptitude de quelques gens de bien y reluit, pour fortifier les bons à la vertu. Brief nous y voyôs infinis exemples de la droiture soutenue, auancee, & recompensee : mais d'autrepart mille & mille tesmoignages de la confusion des vicieux. Je ne cote point ici les noms des particuliers, laissant au lecteur son iugement entier en cela : mesme ie n'ay marqué les belles sentences qu'on peut recueillir de ceste histoire pour former les mœurs de toutes personnes. Seulement j'adiousteray que combien que les histoires de plusieurs autres peuples & royaumes, spécialement où l'estat de l'Eglise est descrit, presentent diuerses autres belles cōsiderations : que lon peut noter en ces vingt liures plusieurs beaux traits de la sagesse, grandeur, iustice & bonté du Tout-puissant : & que celui qui void tant de merueilleux exploits de nostre temps est plus stupide qu'une pierre, s'il n'apprend à connoistre & craindre celui qui se rend si admirable en ses œuvres, & tant redoutable en ses iugemēs. Sōme, si l'histoire en general merite d'estre nommee maistresse de la vie, ceste particuliere aura ce los, qu'il sera dit de ceux qui l'ont dresse, qu'ils ont offert vn honneste & vtile labeur à la posterité.


Car

DISCOURS.

Car quant à la nue conoissance des choses, le lecteur employe tref-mal le temps, qui pense sauoir beaucoup, s'il peut discourir de ce qui s'est fait deçà & dela la mer: ressemblant à ceux qui pensent auoir prou fait en allât voir des bois, riuieres, terres, môtagnes, villes & villages bien loin, pour aprêdre quelques langages estranges, & retourner puis apres en leurs maisons aussi fots & vicieux qu'ils en sont partis, & par fois mesmes y rapportans des inuentions & complexions meschantes des nations qu'ils ont frequentees. Nous pouuons bien apprendre es histoires à conoistre les mœurs des peuples, sauoir la situatiō de leurs pays, & remarquer tout ce que nous y voyōs de memorable: comme ceux qui voyagent ne sont pas condamnez à cheminer les yeux clos, où estoupper leurs oreilles pour ne voir ni entendre rien. Mais le principal, doit demeurer, cest que nos corps & nos esprits quelque part qu'ils aillent s'auacent tousiours à la vraye vie, afin de ne nous cōtenter d'vne idee & nue apprehension des choses, en danger de deuenir orgueilleux & bauards, ains considerer tellemēt ce qui se presente, que par tout ou nous serons, ce tesmoignage demeure tousiours en nos cœurs, que nous hayssons le mal en nous mesmes & en tous autres, comme à l'opposite nous louons la vertu en quiconque elle se trouue, & desirons l'ensuiure, comme nostre deuoir le nous commande. Quant à ma translation, ie n'en diray autre chose, sinon, que ie m'y suis porté le plus simplement & sincerement que i'ay peu, priant le lecteur d'en iuger en bonne part, & croire qu'en delirant seruir à ceux qui n'entendent la langue latine & autres, esquelles ceste histoire à esté premierement escrite, i'ay desiré faire conoistre vne partie des merueilles de Dieu en ces nauigatiōs & exploits de la nation Portugalloise, & presenter en ceste histoire quelque instruction à ceux qui ont des yeux pour voir & vn cœur pour comprendre. Doncques, lecteur, si vous me sauez gré de ce petit effort, i'en seray ioyeux: sinon, ie me contenteray de ma bonne affection, & lairray faire ceux qui pourront vous presenter choses plus profitables par leurs doctes inuentions ou nouuelles traductions. Au reste, pour vostre soulagement, outre les sommaires mis en teste de chascue liure, nous auons adiousté vn ample indice alphabetique des matieres principales de toute l'histoire, afin que rien ne retarde ceux qui voudront lire & considerer plusieurs fois quelque particulier discours.

* *





REPERTOIRE DES ANNEES DE
CESTE HISTOIRE.

1495	fucillet 3	1513	309
1496	10	1514	341
1497	15	1515	364
1498	21	1516	387
1499	26	1517	405
1500	33	1518	423
1501	38	1519	428
1502	75	1520	442
1503	79	1521	464
1504	97	1522	497
1505	143	1523	530
1506	148	1524	552
1507	172	1525	561
1508	186	1526	615
1509	219	1527	632
1510	244	1528	672
1511	274	1529	706
1512	302		

Le reste des anneex, iusques à Pan 1578, est comprins es dixneuf & vingtiefme liures, qui remarquent les actes plus memo-
rables des Portugallois es Indes & en Barbarie.





LE PREMIER LIVRE.

SOMMAIRE.

BLAISE GAZ
ROMA
VITTIOLI MANE

1. *Jeus seind, Roy de Portugal, tñme Emmanuel son berrier, puis meurt.*
2. *Emmanuel est reçois & déclaré Roy.*
3. *Il prepareit sagement aux affaires du Royaume.*
4. *Estas des Lusis au Royaume de Portugal, & quel traitement leur fit Emmanuel.*
5. *Preparatifs d'Emmanuel pour recommencer la guerre en Afrique.*
6. *Vilaine des Portugallois contre les Mores, sous la conduite de Jean Menez.*
7. *Ordre mis par Emmanuel aux affaires Politiques & Ecclesiastiques de son Royaume.*
8. *Nouveau & estrange traitement fait aux Lusis en Portugal.*
9. *Preparatifs de mariage entre Emmanuel & Isabelle venue d'Alfonse, fils du feu Roy Jean second.*
10. *Discours sur le voyage des Indes Orientales, entrepris par les predecesseurs d'Emmanuel, & continué par luy.*
11. *Preparatifs pour le voyage des Indes.*
12. *Mariage d'Emmanuel & d'Isabelle, couronnez Roys d'Espagne: & mort d'Isabelle.*
13. *Michel fils d'Emmanuel desiert Roy de Castille & d'Aragan.*
14. *Voyages sur l'Ocean, faits par Vespote de Gama Capitaine Portugallois, pour aller aux Indes Orientales.*
15. *Brève description de l'Aiguille marine.*
16. *Continuation des voyages de Gama, & des diuers pays par luy descouverts.*
17. *Son arriuee au Royaume de Melinde, & ce qu'il y fit.*
18. *Sa descente à Calecut, & comme il y fut reçois.*



1. **L**EAN second de ce nom, Roy de Portugal, apres auoir languy long temps d'une maladie lente, se transporta en vn des bouts de son Royaume, vers le Midi, terminé en ce costé par la mer Oceane, nommée Algarve, pour y trouuer remede à son mal, par le moyen des baings qui sont fort salubres en ce quartier là. Les eaux sortent d'un rocher & coulent par vne vallee à trois ou quatre lieues loin de la mer: & sont estimez les meilleurs baings de tout Portugal. Toutesfois l'esprouue de ce remede n'ayant de rien serui, la maladie se renforça de iour à autre: & eut on opinion que le Roy estoit ainsi defailli peu à peu, à cause qu'il auoit esté empoisonné pour mourir en tēps limité. Parquoy voyant la mort approcher, il fit son testament en vne ville d'Algarve nommée Aluor, laquelle aucuns pensent estre le port d'Hannibal, & par iceluy establit son heritier Emmanuel son cousin germain, auquel aussi la couronne escheoit, quand mesmes Iean fust mort sans tester. Car Fernand pere d'Emmanuel estoit frere germain du Roy Alfonse pere de ce Iean, lequel n'ayant aucun fils de femme legitime (d'autant qu'Alfonse fils vniue de luy & de sa femme Eleonor, estant en fleur d'aage auoit esté ietté de son cheual en terre, cōme il couroit en la ville de Saint-arene, & estoit mort de ceste cheute) il falloit qu'Emmanuel vist comme de loin la couronne venant sur sa teste. George fils de Iean en estoit forclos par les

*Presque seruit
d'entre à l'ho-
stie d'Emma-
nnel, choisi
Roy, auant
pour son nar-
rel Royal, que
pour la pro-
chainete de
sang.*

A. j.

loix & coustumes du Royaume, à cause qu'il estoit bastard, combien que sa mere fust de fort noble maison: neantmoins ce qui appartenoit de droit à Emmanuel fut ratifié par l'expresse & derniere volonté de lean, lequel n'aimoit pas tant Emmanuel pour la prochaineté du sang, qu'il l'auoit en grande estime pour vn naturel Royal paroissant en luy, & pourtant il esleuoit la dignité d'Emmanuel par tous les beaux parémès dont il se pouuoit auiser, Dauantage la Roïne Eleonor, princesse douee de la crainte de Dieu, & d'vne pieté & vertu singuliere, estoit seur d'Emmanuel, & aimoit singulierement. Apres auoir fait son testamēt, & disposé aussi de son ame selon les ceremonies acoustumees, il mourut de telle sorte qu'en ceste derniere periode de sa vie, il fit preuue de l'excellēte vertu & pieté qui estoient en luy. Ce fut vn Prince illustre & de grād cœur, ennemi iuré des meschās, ami de iustice, & admirable en toutes sortes de vertus. Outreplus il estoit prompt & hardi, ayant mōstré souuētes fois en guerre sa vaillāce & sa dextérité. Il estoit si magnanime, que combien que son corps fust en Portugal, en son esprit il couroit par tout le mōde, & remuoit & entreprenoit beaucoup d'affaires qui pouuoient le faire renommer entre tous autres, si la mort ne l'eust si tost emporté. Il portoit telle affection aux vaillans hōmes, que quelques vns, pour estre resolus aux armes, effaçoient deuant luy les vices dont ils estoient entachez. Au contraire les couards & paresseux luy desplaioient tant, que mesmes il ne les estimoit pas hommes. Quant à ceux qui pour leurs richesses deuenoyent insolens, il les effrayoit par sa seuerité: & prenoit en sa sauuegarde ceux qui pour leur basse condition estoient exposez aux outrages des autres, tellemēt que les pources viuoient en grande assurance. Vray est qu'il fit mourir plusieurs gentils-hommes, voire mesmes des Princes qui luy estoient alliez, ayant conu qu'ils luy estoient rebelles, ou qu'ils auoyent machiné sa mort: & s'il ne l'eust fait, sa dignité Royale s'aneantissoit, dont qu'il estoit en manifeste danger de sa vie. Il auoit vn bon entendement, & recite-on plusieurs siens propos qui sont de bonne grace, & descourent vn gentil esprit. Il esuentoit d'vne sagesse merueilleuse les deliberatiōs des Roys, de la fidelité desquels il doutoit: & par biēs-faits auoit obligé à son seruice beaucoup des plus notables en diuers Royaumes, & par leurs aduertissemens il descouuroit ce que les Roys machinoyēt contre luy, long temps auant qu'ils luy peussent nuire, afin d'obuiuer à leurs conseils. Ses suiets ne le craignoient pas tant en ce qu'il estoit leur Roy, qu'ils l'aimoyent pource qu'il leur estoit pere: car il pouruoioit à leurs commoditez d'vne affection paternelle. Sur quoy lon a acoustumé de louer, & non sans cause, ce qu'il disoit, qu'en trauaillant quelques vns pour chercher de l'or, il n'auoit autre but sinon de soulager la disette de ses suiets par le moyen de ses richesses. Ayant ouy dire qu'il y a vn oiseau, lequel de son bec deschire sa poiſtrine, afin de redōner par l'effusion de son sang la vie à ses petis morts de morsures des serpens, il fit adiouster le pourtrait de cest oiseau à ses armoiries, pour se monſtrer prest d'espandre son sang pour le salut de son peuple. Mais de toutes les vertus que lon a remarquées en luy, il n'y en auoit point de plus admirable que le zele

ardant

Image d'un
bon Prince.



ardant à la religion. Car iamais il ne fut distraict de procurer ce qui seruoit à l'auancement des choses diuines, tant les affaires de son Royaume fussent embrouillées, ni pour les coniurations brassées contre sa vie, ni pour troubles quelcôques qui soyent auenus. Brief ce fut vn Prince, duquel le nom semble bien meriter louange perpetuelle.

2. L E S nouuelles de sa mort furent incontinent portées à Emmanuel, *Sageſſe d'Emmanuel en aſſemblés les Eſtats des le commencement de ſon regne, afin de gagner le cœur de ſes ſuſſeſ, en ſe montrés equitables, & obſerués luy-meſme les bonnes loix.* qui les receut avec telle abondance de larmes, qu'il apparut aſſez que la tristesse qu'il auoit de la mort d'un si bon prince, & de qui il estoit allié de si pres, surmontoit la ioye de se voir heritier d'un Royaume. Alors Emmanuel estoit aagé de vingtſix ans, & se tenoit en la ville de Lisbonne, où demeuroit aussi pour lors sa ſœur la Roine Eleonor. Selon la coustume & faſçon de faire obseruee en Portugal, Emmanuel fut declaré Roy du cōſentement de tous, avec les solennitez requiſes & acouſtumées. Ayant receu ceste charge il fit estat de s'en acquitter ſoigneuſement: car il estoit de vif eſprit, & enclin aux affaires, ioint qu'il y auoit esté duit & faſonné. Parquoy ayât fait quelques ordonnâces ſalutaires a tout le Royaume, il eſtima que rien ne luy deuoit estre plus en memoire pour l'executer, que d'assembler les Eſtats. Ainſi donc il partit de Lisbonne, & vint à Monte-mayor qui est vne ville ſur vne colline, dela le fleuve Tayo (que les Latins appellent *Tagus*) & est a dix lieux de la ville d'Euora. Il manda les grands Seigneurs, les Prelats, & les deputez des villes du Royaume. Ou luy amena George ſils baſtard du Roy Iean, lors aagé de quatorze ans. Emmanuel le recueillit si amiablement & avec tant de larmes aux yeux, que lon cognut aſſez combien il auoit aimé & honoré le Roy defunct. Entre ceux qui acompagnoyent George, estoit Iacques d'Almeide, grand Commandeur de Portugal, homme vaillant, & de bonne compagnie entre tous autres, & qui auoit eu grand credit vers le Roy Iean, lequel aussi le donna pour gouuerneur à son ſils, afin qu'il aprinſt ſous vn tel maistre les ſciences dignes de la grandeur. Iceluy tenant George par la main droicte, tous deux habillez de dueil, apres auoir fait vne fort grande reuerence au Roy, ſelon la couſtume, luy tint tel langage. Sire, le Roy Iean voſtre couſin de parentage, *Belle harangue au Roy.* & voſtre frere d'amitié, en mourant m'a declaré combien qu'il ſortist de ce monde fort alaigrement, neantmoins vne chose luy peſoit ſur le cœur, & de laiſſer ce ſien ſils orphelin & deſtitué: que cependant il ſe conſoloit & estoit ſoulagé d'un tel penſement, pource qu'il ſe ſouuenoit de voſtre douleur & gracieuſeté, & enſemble du deſir que vous auez d'eſtre orné de toutes vertus digne d'un Roy. En apres il me commanda de vous prier & ſupplier en ſon nom, puis qu'il vous auoit porté autât d'affection qu'à ſon propre ſils, dont les preſens & honneurs qu'auez receus de luy ſont bons teſmoins, il vous pleuſt conſeruer la ſouuenâce de ceste ſienne amitié enuers vous, & rédre la pareille a ceſtuy-ci ſon ſils vnique lequel il laiſſoit deſtitué de tout ſecours & appuy: & que vous péſſiez ce qu'il euſt fait à vos enfans si vous en euſſiez eu, au cas que Dieu vous euſt retiré de ce mode auât luy. Outreplus il me donna charge d'aduertir ſouuent ſon ſils de vous honorer & ſeruir touſiours, ſe rendre obeïſſant à vos commandemens, & mettre

peine d'estre le plus fidele & entier de tous vos seruiteurs & amis: pource
que tant plus il vous attouche de parentage, mieux lui sied-il de surpasser
tous autres en bons deuoirs en vostre endroit, sans permettre qu'aucun
le deuanee en choses qui seruent à l'acroissement de vostre grandeur. C'est
ce qu'il ma commandé de faire. Pour m'acquitter de la charge à moy
donnee, ie vous presente en son nom son fils, ieune, & orphelin d'un tel pe-
re, comme vous voyez, vostre parent de nature & de sang, pupille par ac-
cident pitoyable, qui se recommande humblement à vous, & vous est ser-
uiteur, afin que l'ayant receu en vostre protection vous le fauorifiez & fa-
ciez grand: si que chascun puisse estre tesmoin de vostre cœur Royal à re-
compenser les bien-faits & se souuenir soigneusement des plaisirs receus.
Si vous le faites, comme nous en sommes asseurez, tous vous en loueront
comme Prince gracieux & magnifique: & par vne si belle preuue de bôté
vous obligerez beaucoup plus estroitement vos suiets à vous estre fideles
& obeissans. Ceste harangue d'Almeide resueilla tellement la tristesse
d'Emmanuel, que voulant respondre les larmes & souspirs arrestèrent sa
pensée & sa voix. En fin il declaira en peu de mots qu'il tiendrait George
comme son fils, & luy feroit tant de biens qu'on conoistroit combien il
desiroit que le nom & la memoire du feu Roy demeurassent en leur en-
tier & fussent publiez par tout. Tous les Seigneurs lors presens, fort ioyeux
de la response du Roy, s'approcherent pour le remercier, & luy baiserēt les
mains. Or i'ay pensé que ce discours ne seroit pas impertinent, afin que lon
conust la bonté du Roy Iean, laquelle auoit si bien gagné le cœur de son
heritier au Royaume, qu'il n'y pouuoit pēser sans douleur: & que d'autre-
part lon vist le naturel excellent d'Emmanuel, qui n'a peu s'esleuer en or-
gueil pour tant de richesses à luy escheues & presentées sans y penser, ni ne
s'est despoillē d'humanitē & douceur. Car la cōuoitise enracinee en plu-
sieurs, fait que venans à posseder, par la mort de leurs peres & meres, vn he-
ritage qui ne leur pouuoit faillir, a peine peuent ils masquer la ioye de leur
cœur, encores que pour vn temps ils facent bien les tristes & fachez. Ceste
intemperance se descouure beaucoup mieux, quand il est question d'un
Royaume, pource que les richesses royales sont plus grādes, & ont plus de
force pour reuerfer vn cœur, s'il n'est assis en bon lieu & sous la sauuegarde
d'une vraye vertu. Mais quād quelqu'un, sans y penser, est esleuē au throne
Royal, souuentes fois l'esprit en est tellement ebranlé qu'il perd tout sens
& raison. Or Emmanuel ne pouuoit pas presumer de deuenir Roy, attēdu
qu'il auoit eu des freres viuans plus aagez que luy, & Alфонse fils de Iean
le portoit bien. Iean aussi estoit encores assez ieune pour auoir des enfans:

*Naturel d'un
bon Roy.*

*En la pruden-
ce d'Emmanu-
nel, qui dis-
pose des afai-
res du Roy-
aume par l'a-
uise des Estatz,
lon apperçoit
le deuoir d'un
bon Prince.*

car il n'auoit que quarante ans au iour de son trespas. Cependant tous ceux
là moururent par vne speciale prouidence de Dieu, selon l'aduis de plu-
sieurs, afin qu'Emmanuel regnast.

APRES que les Estats du Royaume furent assemblez, par l'aduis de 3.
tous, le Roy pourueut à quelques affaires necessaires pour l'establissement
du Royaume. De là aussi il despescha son Ambassadeur vers le Roy Fer-
nand & la Roine Isabelle, qui lors gouuernoient avec grande autorité &
louange

louange les Royaumes de Castille & d'Arragon, pour les auertir de son estat. En ce temps Aluar, frere de Fernãd Duc de Corunne, qui pour crime de trahison auoit eu la teste tranchee, demouroit au Royaume de Castille, où il estoit en fort grãd credit pres de Fernand & d'Isabelle, sans qu'au reste il fust aucunement coupable de la faute de son frere: mais le voyant ainsi ignominieusement mis à mort, il s'estoit retiré avec son bien hors des limites de Portugal. Or le Roy Iean luy auoit defendu de s'arrester en Castille en sorte que ce fust: mais la bonté & magnificence de Fernand & d'Isabelle, qui l'auoyent en grande estime à cause de sa vertu & prudence, l'arrestèrent tellement qu'il se confina volontairement en leurs Royaumes. Et pour n'estre contraint d'obeir au mädement du Roy Iean, il laissa en la puissance d'iceluy tous ses biens qui estoient en Portugal. Le Roy Emmanuel conuia doucement par le mesme Ambassadeur ce Seigneur, & les enfans du Duc, lesquels apres la mort de leur pere s'estoyent bannis de leur bõ gré, de reuenir au Royaume: & que s'ils le faisoient, il leur feroit autant de faueurs qu'il seroit possible. Il enuoya vn autre Ambassadeur à Rome, pour faire reconnoissance au Pape Alexandre lors esleué en ceste dignité, tant pour le Roy que pour le Royaume de Portugal. Et pour faite cela avec plus de magnificence, il pria par lettres le Cardinal de Portugal, nommé George Coste, de faire ceste reconnoissance pour lui: ce que fit ce Cardinal, dont le Pape receut grãd contentement, & fit response fort amiable au Roy, le gratifiant de son auenement à la couronne. Ce pendant Emmanuel estoit occupé à l'expeditiõ des affaires du Royaume. En premier lieu il conferma benignement les donations de toutes les choses que le feu Roy auoit donnees peu de temps auant que mourir: combien que plusieurs de ceux à qui il auoit donné, fussent plus dignes du gibet que d'autre chose quelconque. Car il appert assez que ceux qui importunent vn Prince tirant à la mort, de leur donner ceci ou cela, qu'ils n'eussent peu obtenir lors qu'il estoit en plaine santé, n'ont iamais pensé à la fidelité qu'ils doyuent à leur prince, mais seulement à leur profit particulier. Dauantage, eust on trouué plus grande trahison, qu'au temps auquel l'entendement du Prince estoit comme accablé des douleurs de mort, on se seruißt lors de sa foiblesse pour tirer de celui qui leur auoit ia tant fait de faueurs, d'autres nouueaux biens pour satisfaire à leur auarice, & non pour recompenser aucune fidelité qui fust en eux? Mais y a-il plus grande inhumanité que se trouuant en presence d'un Roy qui est aux traits de la mort, on ne puisse estre destourné d'une auarice insatiable, par quelque sentiment d'une iuste douleur, ni par quelcõque respect d'humanité? Il y a plus, c'est qu'un Roy, qui en tel tẽps ne reiette point ces requestes importunes & iniustes, semble faire largesse du bien d'autrui, non pas du sien. Car il donne ce dont il ne se peut plus seruir. En apres, il rend à son successeur les affaires embrouillees & beaucoup plus fascheuses à desineller: pource qu'il espuise les finances, fontaines de la liberalité des Roys. Finalement il donne, sans pouuoir iuger si ceux qui prennent l'ont merité, & sans auoir esgard au droit qu'il faut garder en cela. Car qui est le Prince, qui, ayant ia la veue

*Contre ceux
qui pourchaf-
sent d'auoir
dans & pre-
sents des Rois.*

obscurie, haletant & fouspirant sans cesse, suant de tous costez, & ne pouuant dire trois mots qu'à grande peine, puisse conoistre exactement la valeur des vns & des autres? Ceux donc qui au temps que l'esprit du Prince doit estre fortifié de prieres & saints discours, le vont tempester, molester, presser & comme forcer que d'une voix entrerompue & mourante il espende prodigalement les finances du Royaume, au lieu de recompense meritent d'estre hays & mal-voulus de tout le monde. Toutes-fois Emmanuel, pour n'estre estimé ennemi de son predecesseurs'il rescuivoit les actes de ce bon Prince, conferma non seulement les biens qu'il auoit faits avec discretion, ains aussi ceux qu'on auoit obtenus & tirez de luy par finesse. Cela fait il s'adonna entierement à administrer iustice. Il chastia rigoureusement les iuges qui donnoient des sentences iniques estans corrompus par argent: & reprima plus doucement ceux qui n'estoyent pas coupables de si lourdes fautes. Il recôpensâ ceux qui auoyent gardé leurs mains & consciences nettes, selon la dignité d'un chascun. En apres il augmenta le nombre des iuges, afin que tous proces peussent estre vuidez plus promptement, & leur acceut leurs gaiges, de peur que la pauvreté ne les fist eslongner d'equité. Puis il enuoya par tous les quartiers de son Royaume gens honorables & de bonne reputation, avec mandement authentique pour faire iustice, & arracher, autant que faire se pourroit, les plantes de tous vices. Outreplus il dôna bon ordre aux peages & imposts: car il voyoit que l'estat d'un Royaume ne peut prendre pied ferme, quand les finances s'escoulent par la nonchalance des officiers, ou sont pillées par l'auarice des thresoriers, ou sont espuisées par despeses superflues. Or lon ne sauroit bien faire la guerre, ni la paix, ni administrer iustice, quand les particuliers desrobent, ou quand le Roy despens inutilement les finances du Royaume, qui doyuent estre l'instrumēt de salut de tout le public. Au reste, afin que tous ses suiets se sentissent de sa douceur, il mit les Iuifs en liberté. Et afin de bien entendre cela, il ne viendra point mal à propos de discourir & monstrier plus au long comment ils furent asservis.

FERNAND & Isabelle Roy & Royne de Castille, ayans entendu 4. pour certain, que les Iuifs habitans en leur Royaume auoyent fait des complots fort meschans contre la saincteté de nostre Religion, les bannirent tous. Cela auint l'an mil quatre cens huitante & deux. Mais quelques vns d'entre eux illuminez du saint Esprit se firent Chrestiens. D'autres monstrerent semblant de l'estre, craignans d'estre contrains laisser leurs maisons, heritages & autres biens, ou les vendre en temps mal propre pour eux. Tout le reste fut chassé. Or estans les vns espars deçà, les autres de là, la plus part d'eux obtindrent du Roy Iean de demeurer pour quelque tēps prefix en Portugal sous certaines conditions. Les principales furent: Que chascun d'eux payeroit huit escus au Roy, & dans un certain temps sortiroyēt du Royaume: & si iceluy terminē on les trouuoit en cor en Portugal, ils perdoient leur liberté: & que le Roy donneroit leur moyē de se retirer par mer à ceux qui voudroyēt prendre telle route. Moyennāt cest accord, le Roy Iean amassa de grandes finances, qu'il faisoit soigneusement garder

*Les bñs Roys
administrent
iustice: &
par où ils cō-
mencent.*

garder en son Espagne, afin de pouuoir passer en Afrique. Car l'un de ses plus grands desirs estoit de faire guerre à toute outrance aux Mores : non pas tant pour acquerir renommee, que pour auancer la gloire de Dieu & la Religion chrestienne. Mais il ne peut executer ce dessein à cause des empeschemens que luy donnerent les malheurs dont il fut longuement molesté en son Royaume : & pource que finalement la mort estouffa toutes telles entreprises. Neantmoins durant sa vie, il fut soigneux de garder la foy qu'il auoit promise aux Iuifs. Et pourtant il manda aux gouuerneurs des ports & haures de Portugal, de faire avec les maistres & patrons de nauires, qu'ils menassent les Iuifs a pris raisonnable en tel pays qu'ils voudroyent. Dauantage il defendit de leur faire outrage. Ce qui fut autremēt executé : car les marchans & pilotes qui receuoient les Iuifs en leurs vaisseaux leur faisoient mille maux sur mer : car au lieu de se côterer du pris accordé pour le passage, ils en tiroient beaucoup dauantage par quelque moyē que cē fust, & alongeoient leurs voyages de fait d'auis, tracassans ces pauvres Iuifs çà & là, afin qu'ayans mangé leurs viures ils fussent cōtrains d'en acheter de ces marchans & pilotes, qui les leur vendoyent si chèrement, qu'apres auoir payé, les Iuifs demeuroient destituez & nuds. Outre cela ces gens de marine violoyent les femmes & filles Iuives, & faisoient tant de maux aux maris que c'estoit pitié. Brief, en foulant aux pieds le nom de Chrestien duquel ils faisoient profession, on les voyoit plonger en toutes cruautéz & trahisons. Les Iuifs qui s'estoyent arrestez en Portugal, troublez de frayeur pour des iniures si atroces (car tels actes ne pouuoient estre tellement cachez que le bruit n'en vint aucunement à leurs oreilles) & n'ayans pas le moyen, à cause de la pauvreté, d'acheter en dedans le terme prefix ce qui estoit nécessaire pour s'embarquer & voyager par mer, le temps estant expiré, deuindrent esclaves. Par ainsi celuy qui vouloit auoir vn esclau Iuif le demandoit au Roy, qui en donoit a ceux qu'il conoissoit estre d'un naturel pitoyable & doux, afin que les Iuifs ne fussent acablez de trop dure seruitude. Or cela auint vn peu de temps auant la mort du Roy Iean. Ceux qui conoissoient bien ce prince, estimoient que s'il eust vescu dauantage, les Iuifs eussent esté afranchis avec quelque douce condition. Tel estoit l'Estat des Iuifs en Portugal, lors qu'Emmanuel commença à regner. Iceluy voyant que malgré eux ils estoient demeurez en Portugal apres le terme porté par l'accord fait avec le Roy Iean, les fit tous remettre en liberté : dont ils furent si ioyeux qu'ils luy offrirent vne grande somme de deniers laquelle il refusa : car il auoit delibéré d'attirer par beneficence ces pauvres gens à la Religion chrestienne.

5. APRES auoir commodément & sagement pourueu à cela & à plusieurs autres affaires, il commença à delibérer de la guerre d'Afrique. Car depuis que le Roy Iean premier du nom eut à force d'armes & d'argent conquis Septe, la plus forte ville de Mauritanie, assize sur la cōste de mer du destroit de Gibreale, iamais ses successeurs Roys de Portugal ne laisserent les Mores en repos. Le Roy Alphonse petit fils de Iean premier, & pere de Iean second, emporta de force Tingi & Arzile, qui sont deux villes

*Garder la foy
est vne vertu
requise en
tout, mais es
Princes &
Rois spécia-
lement.*

*Roys de Por-
tugal ennemis
iure des Mo-
res.*

proches l'une de l'autre. Et combien qu'apres la mort d'Alphonse, Iean second se trouuaſt aſſailli de beaucoup de dāgers & enueloppé en pluſieurs & diuerſes difficultez, neantmoins il entretint touſiours ceſte guerre avec vn courage inuincible. Emmanuel ſuiuant leurs traces, embralla ceſte guerre de meſme affectiō. Et poutāt il munit & fortifa les villes de Mauritanie, où il y auoit des ſoudarts Portugallois, les fit auictuallier pour long temps, & commanda qu'on les fourniſt de grand nombre d'armes & machines de guerre. Outreplus il acreut la ſoulde des gens de guerre, & fit de grands preſens aux capitaines, afin qu'eſtans eſmeus par telles largeſſes ils en fuſſent plus hardis & reſolus au cōbat. Conſiderāt auſſi que le principal point pour eſtre heureux en guerre cōſiſte au maintenemēt de la vraye Religion (car c'eſt Dieu qui dōne le cōeur & le bras, inſtrumens pour obtenir victoire, & qui oſte eſprit & force à ceux qu'il veut confondre) outre autres recompens ſaiētes aux gens d'Egliſe qui acompagnoyent ſes gens d'armes en Afrique, il leurs assigna la dixieſme partie de tous les tributs annuels que les Mores ſes alliez luy payoyent. En ces entrefaites le Roy Fernand & la Royne Iſabelle le gratifierēt par Ambaſſadeurs de ſa ſucceſſion au Royaume, & d'auantage le prierent de vouloir eſpouſer leur fille nommee Marie: finalement ils le requirent fort de vouloir reintegrer au pays & en tous leurs biens les ſils de Fernand Duc de Corunne. Emmanuel receut vn grand contentement de ceſte Ambaſſade, & fit reſponſe aux Ambaſſadeurs qu'il n'eũſt ſceu entendre meilleures nouuelles que ceſte connoiſſance d'une ſi bonne volōté de Fernand & d'Iſabelle enuers lui: & quant à ſon mariage, qu'il n'eſtoit deliberé eſpouſer femme que premiere-ment il n'eũſt mis ordre aux affaires de ſon Royaume. Or ne diſoit il pas cela pour eſtime qu'il euſt que ceſte alliance ne lui ſeroit cōmode, mais pource qu'il aimoit mieux prēdre à femme leur fille aiſnee Iſabelle veufue d'Alphonſe ſils de Iean ſecōd. Vray eſt qu'il ne deſcouurit pas lors ce qu'il en penſoit. Quant aux ſils du Duc Fernand, il promit de donner contentement au Roy & à la Royne. Au meſme tēps, il receut nouuelles de la belle victoire obtenue ſur les mores par Iean Menez gouuerneur d'Arzile. Ce qui auint comme ſ'enſuit.

VASQUE Coutin Sieur de Borbe, gouuerneur d'Arzile, ayant eſté chargé de quelque cas vers le Roy Iean, fut contraint de reuenir en Portugal pour s'en purger. Ce pendant il commit en ſa place Roderic Coutin pour pouruoir aux affaires. A lors il y auoit trefue entre les Roys de Portugal & de Fez. Or deux Seigneurs Mores, l'un nommé Barraxa, l'autre Almandarin, fort riches & de grande autorité au pays, n'eſtoyent point tenus d'oſeruer ceſte trefue, à cauſe qu'ils n'eſtoyent pas encore vaſſaux du Roy de Fez. A ceſte cauſe ils dreſſerēt vne armee & vindrent ſur les limites d'Arzile où ils firent vn grand degaſt. Roderic Coutin tire aux champs les troupes qu'il auoit, & reſolument va donner bataille à ceſte armee. Les vns & les autres combaterent vaillammēt: mais en fin Roderic accablé de la multitude des ennemis fut tué ſur le champ avec pluſieurs des ſiens. Le Roy Iean apres auoir entendu ceſte deſſaiēte, deſpeſcha promptement

Iean

lean Menez, gentilhomme sage & vaillant, pour gouverner Arzile, avec charge d'encourager à la venue tous les Portugalois, estans en Afrique. Et pour ce que quelques Mores stipendiaires s'estoyent rebellez à cause de ceste perte auenue aux Portugallois, & ne vouloyét payer le tribut qu'ils deuoyent au Roy lean, suiuant l'alliance faite entre eux, Menez estima que son premier exploit estoit de les reprimer & ramener à deuoir par force d'armes. Pour executer cela plus commodement, il pria par lettres Loup Azeuede gouverneur de Tingi de lui enuoyer quelques gens de cheual au secours. Ce que l'autre fit, & enuoya cinquante cheuaux sous la charge de Pierre Leitan guidon de sa compagnie: lequel fit diligence de se trouuer la nuit au lieu que Menez lui auoit assigné. Menez sortit d'Arzile avec cent cinquante cheuaux, & s'estant ioint à la troupe de Leitan, print le chemin pour aller en vn bourg qui auoit commencé la reuolte. Et afin qu'on ne peust descouurir ceste venue, il dressa tellemēt ses gēs, qu'ils marchoyēt en long & l'un apres l'autre, s'entresuiuans de sorte qu'on ne les pouuoit pas rompre aisément. Comme le iour approchoit, les troupes se trouuerent pres du bourg, pour assaillir les ennemis à l'improuiste. Mais il auint qu'au mesme temps Barraxa & Almandarin, accompagnez de deux autres puissans Seigneurs Mores nommez Muzza & Acob, resolurent de venir conquerir ces bourgades qui appartenoyent aux Portugallois. Ils auoyēt lors deux mille cheuaux & huit cens hommes de pied. Menez ayant entendu leur entreprise, afin de la descouurir tant plus certainement donna charge à quelques Mores, lesquels lui seruoyēt à celà, de surpřendre quelqu'un de la troupe des ennemis, pour scauoir les choses au vray. Ces descouureurs s'acquittent promptemēt de leur charge & ameinēt prisonniers trois Mores à Menez, lequel entend par leur bouche que ce qu'on lui auoit rapporté auparauant estoit veritable. Sur ce il resolut decourir sus à Barraxa, Almandarin & à leurs troupes, combien que plusieurs de la suite fussent de contraire auis: car ses affaires estoyent en tel estat que les Portugallois ne pouuoient reculer qu'avec deshonneur & grand danger de leurs vies. Et pourtant il estima faire beaucoup plus vaillamment & sagement de charger les ennemis qui ne pensoyent à rien moins, que d'estre contrainct de les repousser quand ils le poursuiuroyent chaudemēt. Car assaillir son ennemi quoy quil soit fort, lui donne neantmoins bien à penser, au lieu que s'il le faut auoir sur les bras, son courage acroit, & a-on double peine, l'une à lui faire teste, l'autre à se desuelopper de sa main. Ainsi donc, Menez partit ses gens en trois escadrons. Il en bailla l'un à Pierre Leitan, composé des cinquante cheuaux quil auoit amenez: le second à son neveu Jean fils de Pierre Menez sieur de Cantagnedo avec trente cheuaux: il print le troisiēme pour soy avec le reste des gens de cheual. Apres les auoir encouragez & aduertis de ce qu'il requeroit d'eux, il se met au pas pour aller trouuer les ennemis qui s'esmeruilloient de l'audace des Portugallois, & mesprisoient ce petit nombre. Ce pendant ils dresserent premierement trois bataillons: puis changeans d'auis, & afin d'accabler du premier coup les Portugallois, se ioignirent tous ensemble & commencerent à s'auancer. Le

*Sageſſe d'un
chef de guerre*

Le grãd nombre ne donne point tousiours la victoire.

premier escadron de Menez se voyant assez pres pour attendre l'ennemi, desmarcha furieusement à lances baissées à l'encontre: & les Mores de mesme. Le conflict fut impetueux, & combien que les Portugallois fissent vn grãd deuoir, toutefois à cause de tant d'ennemis qui les assailloyent de tous costez, commencèrent à reculer peu à peu, tant que le ieune Menez avec sa troupe vint charger les Mores en flanc: ce qui redõna courage au premier escadron pour faire teste plus vaillamment qu'ils n'auoyent fait. Lors Menez voyant qu'il ne faloit plus differer, commande a son guidon de marcher, & avec toutes ses troupes court à bride aualee à trauers les Mores qui soustindrent aucunement ceste charge, mais tost apres ils reculerent, & finalement se desbanderent & s'enfuirent à vau de route. Les Portugallois les chasserent quatre lieues loin, & en tuerent grand nombre: puis reuindrent piller leur camp. En ceste rencontre plusieurs Mores demeurerent sur le champ, grãd nõbre de prisonniers, & vn riche butin aux victorieux, qui n'y perdirēt vn seul homme. Cela fait Menez conduit ses troupes vers les bourgs & villages rebelles, qui s'humilierent en demandant pardon, & payerent tout ce qu'ils deuoyent suiuant leur cõpromis. Apres si heureuse expedition, le gouuerneur retourna à Arzile, & reuoya Leitan avec sa part du butin. Du temps de ceste rencontre Emmanuel estoit Roy, à la pieté & iustice duquel plusieurs estimerēt que Dieu auoit donné si belle victoire. Au reste, les Estats estoient encores assemblez, qu'une dangereuse peste enuahit la ville où ils seiournoyēt: au moyen dequoy Emmanuel fut contraint de desloger de là, & reseruer en autre temps plusieurs choses concernant le bien du Royaume.

1496.

Clemente Royale.

Vn an apres, qui fut l'an mil quatre cens nonante six, quelque temps 7. auant Pasques il se trãsporta a Setwal, où ses sœurs Eleonor veufue de Iean, & Isabelle veufue du Duc Fernand l'attendoient. Apres auoir fait ses Pasques selon la coustume, il s'employa comme deuant aux affaires du Royaume. En premier lieu il rappella & remit en leurs premiers honneurs Iacques fils de Fernand, lequel s'estoit banni volontairement de Portugal, apres la mort de son pere, comme dit a esté ci dessus: item Denis son frere, Aluares son oncle, & Sanche son frere de pere, fils d'Alfonse Sieur de Faron: & voulut que ceste Seigneurie de Faron changeast de tiltre, & qu'elle fust appelée la Côte de Demire. Outreplus il fit grace à d'autres, qui pour crime de trahison auoyent esté bannis du temps du Roy Iean: mais specialement il se monstra fort liberal enuers les Seigneurs susnõmez. Et pource que le Roy Iean auoit doné partie de leurs biens à quelques autres siens fideles seruiteurs: Emmanuel ne voulant doner occasion à personne d'eux de se plaindre, leur fit tant d'autres dõs & presens qu'ils souffrirēt volontairement d'estre priuez de la possession de ces biens dont ils auoyēt iouy longuement. Plusieurs condamnoient en diuerses sortes ceste magnificence. Les vns disoyent que c'estoit vne honte de voir faire tant de bien, & restabli aiasi legerement en leurs honneurs les fils de ceux qui auoyēt esté souillez de l'ignominie d'une trahison. Les autres ne blasmoient pas la largesse du Roy, ains seulement requeroient quelque mesure en icelle: alleguans que

Prudence requise pour cõsiller chascun.

que c'estoit incommoder le public d'espuiser en vn moment de temps les finances, qui sont les nerfs d'un Royaume. Nonobstant tous ces bruits le Roy ne desista point de se monstrier liberal. Car il se souuenoit que quelques vns de ceux qui auoyent esté condamnez n'estoyent pas tellement conuaincus que pourtât leur nom deust demeurer tousiours diffamé. Dauantage, que ce n'estoit pas raison que les enfans fussent chastiez pour leurs peres. En apres, le dueil continuel de sa sœur Isabelle le semondoit à se monstrier benin : car il sauoit que ceste vertueuse & excellēte dame auoit croupi en perpetuelle destresse & fâcherie depuis que son mari auoit esté executé à mort, & ses fils chassés du Royaume. Qui plus est, sa mere Beatrix le prioit comme Roy, & en qualité de fils l'admonnestoit, de ne perdre ainsi les parens, ains les remettre en leurs honneurs, ce qui ne se pouuoit faire, si on ne les restablissoit au degré duquel ils estoient decheus. Ce n'est point à vous seul (disoit elle) que la couronne est escheue, mais aussi à vostre mere, à vos sœurs, à vos parens, brief, à tous ceux qui appuyent le bien de leurs affaires sur vous. Si nous sommes fraudez d'un tel espoir, à qui recourons-nous ? qui nous aidera ? Si vous n'avez esgard à nous, selon que nous l'esperons, il faudra que nous vous voyons à contre cœur esleué en la dignité Royale : car quand vous estiez en vostre particulier, il nous estoit loisible seulement de pleurer nostre malheur. Or maintenant outre ces gemissemens y aura cela de pis, que nous lamenterons pour le tort qu'aurez fait à vostre mere & à vos parens. Pourtant, si vous auez la pieté en recommandation, si vous auez souuenance de celle qui vous a enfanté, nourri, & tousiours aimé chèrement, ayez soin de nous tous : rendez la fille à vostre mere, les enfans à vostre sœur, les petis fils à vostre sœur, & moy toute entiere à moy mesme. En ce faisant lon ne vous pourra accuser d'auarice, au contraire vous serez grandement estimé pour vostre bonté & magnificence.

Tels & semblables propos luy tenoit sa mere : sa sœur l'en sollicitoit iournellement les larmes aux yeux : les Roy & Roynie de Castille l'en prioient instammēt par lettres & Ambassades. Et pourtât il fut impossible au Roy, qui estoit d'un naturel benin, de mespriser le desir de sa mere, ou reietter les requestes de sa sœur, ou bouscher l'oreille aux prieres de ces bō Roy & Roynie. Apres cela il fit diuers presens & recompenses à plusieurs gentils hommes, entre autres à Iacques Syluius, personnage de fort bon entendement, qui auoit esté son precepteur. Puis il enuoya Pierre Correa, homme bien estimé pour l'adresse de son esprit, vers le Pape Alexandre, pour solliciter quelques affaires cōcernans l'estat du Royaume, & pour ramener aussi le Cardinal de Portugal. Ce Cardinal, nommé George, estoit de petite maison, mais doué d'un grand cœur & d'un excellent esprit. Il fut en grand credit pres de Caterine fille du Roy Edouard, Princeesse fort vertueuse, & qui ne se voulut iamais marier. Auint qu'il entra en son seruice, & elle ayant conu la bonté & sagesse de ce personnage, luy fit donner force bons benefices, en l'administration desquels il se gouerna tressagement : finalement il fut Euesque, & monta en d'autres degrez d'honneurs, tant que du commun consentement des autres Cardinaux il fut receu de leur nombre

par le Pape . Il se portoit fort dextremét en ceste dignité, & estoit bié voulu & bien venu pres des Papes . Le Roy Iean venant à la Couronne persecuta ce Cardinal, lequel il estimoit luy estre aduersaire: ce neantmoins le Cardinal se maintint en son rang & autorité, quoy que le Roy luy en voulust. Apres la mort de Ieā, Emmanuel le pria par lettres de reuenir en Portugal, & que pour heureusemēt manier les affaires de son Royaume il auoit grand besoin de son conseil. Le Cardinal promit de reuenir. Mais Correa estant arriué à Rome, il changea d'auis, s'excusant sur son aage & sur sa foiblesse: & que le Pape ne luy vouloit permettre d'entreprendre ce chemin. Cependāt il sollicita & fit expedier les affaires du Roy avec grand diligence & fidelité. En ces entrefaites le Royaume de Portugal estoit trauaillé de peste, si que le Roy fut contraint aller d'un pays en autre: & s'estant retiré en vne ville nommee les Tours-vieilles, l'Ambassadeur de Venise l'y vint trouuer, pour le gratifier au nom de la Seigneurie, de la dignité Royale en laquelle il estoit esleué, & pour luy offrir seruice de la part des Seigneurs & du peuple de Venise. Cest Ambassadeur fut magnifiquemēt recueilli, & reçut l'ordre de Cheualerie de la propre main du Roy: puis fut réuoyé avec tant de presens, que par son propre rapport, & par les amiables lettres que le Roy escriuit par luy, toute la Seigneurie de Venise fut beaucoup plus affectionnee enuers le Roy qu'au parauant.

EMMANUEL ayant expedie ce que dessus, entreprint & vint à bout d'une autre besongne que ses predecesseurs auoyent voulu amener à fin, mais n'auoyēt iamais peu . Au temps que la pluspart d'Espagne estoit sous la puissance & domination des Arabes, la guerre s'estant allumee & continuant sans trefues asseurees entre eux & les Chrestiens, quelques gentils-hommes, vaillans & bien affectionnez à la Religion, firent promesse solennelle de combattre toute leur vie pour la gloire de Iesus Christ, sans poser les armes ni donner relasche aux ennemis . Pour executer ceste promesse plus alaigrement, & seruir à Christ plus commodement, ils ne se voulerent point marier, employans le temps au seruice de Dieu & au manieement des armes. Leur zele estoit si seruent qu'ils estimoient bien-heureux ceux qui mouroyent en combatant valeureusement pour la defense du pays & de la Religion chrestienne . Plusieurs ensuyuirent leur exemple, tellement que de là nasquirent plusieurs ordres de religiōs militaires, à qui les Roys donnerent de grans biens, & qui furent aprouuez des Papes . De ces ordres sortirent des vaillans Cheualiers qui maintesfois donnerent la chasse & desfirent les Mores, au grand honneur de la Chrestienté . Ils portoyent tous sur la poictrine vne figure de la croix, partie de drap rouge, partie de verd, cousue sur leurs habillemens . Alors aussi florissoit en Espagne l'ordre des Templiers & des Cheualiers de saint Iean de Ierusalem, où ils auoyent commencé incontinent apres la prinse d'icelle par les Chrestiens sur les Sarasins. Or cōbiē que ces ordres eussent diuers reiglemēs & marques pour estre distinguez les vns d'avec les autres, toutesfois tous s'accordoyēt en cela, que par vœu solennel ils promettoyent à Iesus Christ de n'auoir iamais compaignie de femme, d'estre obeissans au grand Maistre de l'ordre,

l'ordre, & de n'auoir en eux aucune tasche d'auarice. Apres que Philippes le Bel Roy de France y eust aboli l'ordre des Templiers, le Roy de Portugal, lors nommé Denis, establit en son Royaume vn nouuel ordre de Cheualiers, autres que les precedens : & tascha de faire que les Templiers de Portugal (en l'ordre desquels estoient receus tous les vaillans & notables Cheualiers qui s'y venoyent rendre, de quelque pays qu'ils fussent, pourueu qu'ils fussent Chrestiens) ne perdissent leurs biens ni leurs honneurs. Et pourtât il ordonna que les peages & reuenus assignez aux Templiers en Portugal, leur demeureroyent, à condition qu'ils changeroient d'ordre & de nom. Ainsi donc ils furent appelez Cheualiers de Christ, & fut ordonné par luy que les Cheualiers de cest ordre porteroient vne croix blanche enchassée dans vne croix rouge, afin d'estre discernés plus aisément d'avec les autres Cheualiers. Apres cela il requit le Pape, de vouloir confirmer cest ordre, lequel acréut & deuint riche & opulent. Or Emmanuel considerant le danger auquel les Cheualiers tant de cest ordre que des autres pouuoient tomber, (car si contre leur vœu ils venoyent à paillarder, c'estoit se rendre coupables d'une grâde meschâceté, outre ce que les enfans procedans d'eux seroyent diffamez de ceste ignominie qui est commune à tous les bastards, tant nobles pussent estre ceux qui les ont engendrez) pria le Pape Alexandre de deslier de ce vœu de perpetuelle virginité tous les Cheualiers Portugallois, qui de là en auât se rangeroyent à quelqu'un de ces ordres. Quant à ceux qui l'estoyent desia, il ne se pouuoit faire qu'ils obtinssent ce mesme priuilege. Le Pape accorda cela au Roy, & depuis il fut permis à tous Cheualiers de religion, excepté à ceux de l'ordre de Saint Iean de Ierusalem, de se marier. Il y a beaucoup de gens qui louent ceste pouruoyance du Roy, qui coupoit broche aux vices & deliuroit les siens d'un grand danger, & auoir detomber en paillardise. Mais de ma part, ie ne say si ceste pouruoyance à point fait plus grande bresche au mal qu'autrement. Car en premier lieu iamais relasche de discipline ne fut salutaire. Parquoy il faut estreittement serrer les choses qui se laschent, & les ramener au point d'où elles sont decheutes, si nous voulons que ce qui a esté louablement establi, serue & proufite de mieux en mieux. Dauantage, nous voyons que par le soin de mesnage, ceste ardeur au combat que lon remarquoit es anciens Cheualiers est estainte en partie. Car ceux d'aujourd'hui sont plus froids & moins resolus : & apres auoir quelque peu de temps porté les armes, ils se vont donner du bon tēps, beaucoup plus tost & plus volontiers qu'il n'appartient. Dauantage, lors que le mariage leur estoit interdit, il est vray semblable que plusieurs se rendoyent Cheualiers, plus pour zele qu'ils auoyent à la Religion, que pour proufiter qu'ils y pretendissent. Mais maintenant que ceste deuotion est refroidie, & qu'on a osté ce que plusieurs estimoyent trop rigoureux, nous pouuons dire, avec coniecture apparente, que ceux qui se vont ranger à ces ordres, n'ont esgard qu'à se faire riches & grands. Finalement, ceste fenestre de conuoitise & d'ambicion estant plus large aujourd'hui que iamais, les choses sont venues peu à peu à telle extremite, que ce qui estoit bien

*Oforius reu-
que ici en dou-
r la puissance
du Pape.*

*Mais de tel-
les maneres il
s'en faut arre-
ster à ce qu'en
resuult l'Es-
criture Saint-
te. laquelle res-
pond aux dissi-
cultez, & enco-
ueris qui font
ici alleges : &
ce sont des con-
siderations hu-
manes qui ne
peuent abo-
ler l'autorité
de Dieu, ni
les priuileges
qui luy sont
donnez : à
ceux qui n'ont
le don de couri-
nence. Cepen-
dant les vices*

*& meschance-
rez qu'ilz remar-
que en ces or-
dres ne font
que trop veri-
tables aujour-
d'hui.*

fondé est allé par terre. Car nous voyons telles gens mespriser la promesse qu'ils ont faite à Iesus-Christ, violer les choses saintes: il y a des audacieux & meschans qui mangent les biens de l'Eglise: & d'autres qui ne se sont iamais opposez à l'ennemi, regorgent neantmoins de biens destineez à saints vsages, & en abusent à toute intemperance & dissolution. Mais cessons de deplorer ce à quoy nous ne saurions mettre ordre.

A P R E S cela, Emmanuel mit la main à vn affaire, duquel on deuisoit par tout le Royaume, & dont les gens de son cōseil disputerēt diuersemēt. La question estoit, a sauoir si lon deuoit chasser les Iuifs bannis de Castille, selon ce qui auoit esté arresté du temps du feu Roy Iean: ou s'il leur falloit permettre de demeurer en Portugal, où ils s'estoyent arrestez & auoyent esté receus. Le Roy & la Royne d'Espagne admonnestoyent par lettres le Roy Emmanuel, de ne permettre à ceste meschante nation, haye de Dieu & des hommes, de s'arrester en Portugal. Emmanuel mit cest affaire en deliberation, estimant qu'il y falloit penser de pres. Aucuns de son conseil disoyent qu'il n'estoit pas raisonnable de chasser vne nation, que le Pape permettoit habiter à Rome & es autres villes appartenans à l'Eglise de Rome. Qu'à cest exemple, plusieurs Princes Chrestiens en Italie, Alemagne, Hôgrie & autres lieux de l'Europe, laissoyēt les Iuifs demeurer, & trafiquer en leurs pays. Dauantage, qu'en les bannissant d'un quartier, ils ne despoilleroient pas pourtāt leur malice: ains que ceste meschāte natiō laissoit mesmes marques de sa meschāceté par tout où elle mettoit le pied. Que ce n'estoit point fait sagement d'estre plus esmeu du mal cōmis en vn endroit qu'en vn autre. En apres, que si les Iuifs passoyent en Afrique (ce que chascun tenoit pour asseuré, au cas qu'on les fust sortir de Portugal) il ne falloit plus rien esperer de leur conuersion. Que pendant qu'ils conuersoyent parmi les Chrestiens, la hantise, l'exemple de la bonne conuersation des gens de bien en attireroit quelques vns à Iesus Christ: ce qui ne se pouuoit nullemēt faire entre les Mahumetistes. Outre plus, que c'estoit endommager le public de permettre que ceste nation portast aux Mores les deniers dont les particuliers auoyent abondance: & que les Iuifs descouuriroyent aux ennemis diuers moyens qui pourroyēt aucunement nuire aux Portugallois. Les autres alleguoyent au contraire, que ce n'estoit pas sans cause que ce peuple auoit esté chassé de France, de plusieurs lieux d'Alemagne, & des royaumes d'Aragon & de Castille: que les Princes qui auoyēt la pieté plus recommandee que les imposts & tributs auoyent suffisamment conu que les Iuifs essayoyēt à desbaucher de la foy les simples gens, souilloient par vilains outrages le tressainct nom du fils de Dieu: que leur frequentatiō abruuoit plusieurs personnes d'erreurs fort pernicieuses, & que ceste peste gaignoit mesmes les pauvres pay sans. En apres, que c'estoit se hazarder par trop de se fier de chose aucune aux ennemis du nô Chrestien, qui n'ont religio quelcōque qui les retiene de descouurir aux ennemis tout ce qu'ils pourroyent sauoir, & vendre à beaux deniers cōtans la vie de ceux parmi lesquels ils habitoyent. S'il falloit toucher au profit qui pouuoit reuenir de les laisser ou chasser, qu'il y auoit bien plus d'acquest d'enuoyer hors ceste nation

*Disseurs mon-
strant si les
Iuifs sont sup-
portables ou
non entre les
Chrestiens.*

nation née pour tromper les autres, avec les biens qu'elle possédoit lors, & auant qu'elle eust mis la griffe sur les impôts & peages publics, que d'estre en peine de la faire desloger apres qu'elle auroit attrappé tous les deniers du royaume. Qu'en les chassant promptement, ils n'emporteroient que ce qu'ils auoyent apporté d'ailleurs. Mais que s'ils demouroient plus longuement en Portugal, c'estoit chose asseurée que par leurs finesse & meschantes pratiques ils ruineroient vne infinité de gens. Le Roy embrassant ce second auis, ordōna que tous les Iuifs & Mores qui ne se voudroyēt faire Chrestiens, eussent à vuidier hors de Portugal: & assigna vn iour, apres lequel expiré seroyent esclaués tous ceux que lon trouueroit dedans le royaume. Au commencement de l'annee suiuiante, qui fut l'an mil quatre cens nonante sept, le Roy Fernand & la royne Isâbelle, qui estoient bien auant aux mains contre Charles huitiesme Roy de France, enuoyerent leurs ambassadeurs en Portugal pour confermer avec Émmanuel les alliances contractées entre eux & le feu Roy Jean: item pour demander secours à Emmanuel contre Charles. Quant aux alliances elles furent confermees trezvolontiers par le Roy & par tout son conseil. Mais pour le regard du secours, Emmanuel fit responce qu'il estoit en paix avec Charles huitiesme, & que ce seroit vne grand' honte à luy de violer l'alliance qu'ils auoyent ensemble, & courir sus aux François qui ne luy auoyent fait aucun tort, veu mesmes que la guerre estoit esmeue fort loin de là, & que les François n'auoyent pas encor enuahî l'Espagne: ce qu'aduenant, lors il donneroit secours à Fernand & à Isâbelle, pour l'estroite conuiction qu'il auoit avec eux, & que de son costé il employeroit tous ses moyens pour reprimer les François. Ceste responce contenta fort Fernand & Isâbelle, selon qu'ils en monstrerent le semblant. En ces entrefaictes, le terme donné aux Iuifs, qui ne se voudroyent faire Chrestiens, pour sortir de Portugal, approchoit. A l'occasion de quoy tous faisoient leurs aprests en grâde diligence pour s'embarquer. Mais Emmanuel ne pouuant souffrir que tant de milliers d'ames s'allassent precipiter en damnation eternelle: pour garentir de ce danger les enfans des Iuifs, s'auisa d'vn expédient inique & iniuste à executer, & qui procedoit toutesfois d'vne bonne volonté & tendoit à bonne fin. Car il commanda que les enfans mâles Iuifs, qui n'auoyent encor attain l'age de quatorze ans, fussent enleuez, d'entre les mains de leurs peres & meres, pour ne les plus voir, & les faire instruire au Christianisme. Or cela ne se pouuoit faire sans grand trouble: car cestoit pitié de voir arracher les petits enfans du giro de leurs meres, trainer les peres qui les tenoyent embrassez, & à grands coups de baston les contraindre de l'aschet prise: les cris horribles resonans de tous costez, & l'air répli des pleurs & lamentatiōs des fēmes. Il y en eut qui ne pouuans souffrir telle indignité, jéttoient leurs enfans en des puyz profonds. D'autres transportez de cholēte & de rage se tuoyent de leurs propres mains. Et pour accabler dū tout ceste miserable nation, apres les auoir ainsi outragez, encor ne leur voulut on permettre de s'embarquer pour faire voile & passer en Afrique. Car le Roy auoit tel desir que ces Iuifs se fissent Chre-

1497.

*Lesf. ges Prin
ces ne s'enne-
loyent point
es guerre logo
rements, ni ne
faussent la foy
promise.*

*Expedient in-
iuste n'excu-
se point le zele
mésideré, que
lon appelle bō-
ne intention son
mentisier cau-
se de grandes
crimantes.*

stiens qu'il estoit qu'il les y faloit attirer partie par amour, partie par force. Ainsi donc, combien que selon l'accord il falust permettre aux Iuifs de monter sur mer: neantmoins cela se remettoit de iour à autre, afin de leur donner temps pour changer d'avis. Suyuant quoy aussi, au lieu que du commencement on leur auoit assigné trois ports pour se mettre à la voile, le Roy fit defences qu'aucun deux n'eust à s'embarquer en autre port qu'en celuy de Lisbone. Ce qui fit qu'une multitude innombrable de Iuifs se vint rendre là. Mais cependant le iour limité escheut: par ainsi ceux qui n'auoyent eu moyen de desloger, perdirent leur liberté: tellement que plusieurs d'entr'eux, vaincus par rai de maux, aimerent mieux se faire Chrestiens, les vns par quelque bonne intention, les autres par maniere d'acquit & par cautelle, que viure en telle misere. Apres auoir donc declairé qu'ils vouloyent viure comme les autres Chrestiens, & esté baptisez, on leur redit leurs enfans & les remit on en liberté: dauantage le Roy se monstra fort gracieux en leur endroit, leur fit plusieurs presens, & ainsi ils demurerent en Portugal avec assez bonnes commoditez. Mais tout ce traitement fait aux Iuifs n'estoit fondé en loy ni en Religion quele onque. Car est-ce bien fait de contraindre des cœurs rebelles, & qui ne sont tenus par aucune promesse, à croire des choses qu'ils mesprisent & reiettent obstinément? Qui prendra l'autorité d'empescher la franchise de la volonté, & refrener les esprits esgarez? Cela ne se peut faire, & le fils de Dieu n'approuue point telle violence: car il demande des hommes vn sacrifice volontaire, non point contraint ni tiré par rigueur: & ne veut point que lon force les consciences, ains que par douceur & amitié lon attire les cœurs à la vraye Religion. Au reste, qui est l'homme qui s'ose attribuer ce que le Saint Esprit seul fait en l'entendement de ceux qui ne resistent pas obstinément iusqu'au dernier soupir aux gracieux effects d'icelui? Car c'est lui seul qui esclaire, attire & semond les consciences, & qui amene à la conoissance & communion de Christ ceux qui embrassent vn si grand bien avec vn cœur humble & bien affectionné. Finalement, qui ne void combien c'est vne chose indigne de donner comme en garde à gens mal rangez à la Religion les mysteres & signes sacrez d'icelle? bailler inconsiderément occasion de mal à ceux qui se mocquent de la Chrestienté, & qu'en faisant ainsi semblant d'embrasser vne religion on la viole & diffame en toutes sortes? Neantmoins plusieurs cuident la bonne intention du Roy estre digne de louange, alleguans qu'il auoit fait cela par deuotion, & pour amener les Iuifs finalement à salut: mesmes il y auoit certains personnages, qu'on estoit bien doctes & fort religieux, qui soustenoyent vn tel fait estre licite, & que d'autres Princes Chrestiens l'auoyent pratiqué. Mais on a tousiours trouué, & n'y aura iamais faute de gens, qui accommodent leur discours pour se mettre en la bonne grace des Princes. Vray est que de iour en iour de cest acte peu iuste d'Emmanuel on void fortir de beaux fruits. Car les enfans de ceux qu'on soupçonnoit estre Chrestiens par saintise, avec le temps, par vsage, coustume & discipline, ont oublié l'hypocrisie de leurs peres, & sont deuenus bons Chrestiens. Par le moyen sus declairé, vne partie des Iuifs deslogea

Raisons monstrans qu'Emmanuel n'a esté fondé en loy ni religion au cune quand il a contrainct les Iuifs de se faire Chrestiens.

Les Princes n'ont iamais faute de flatteurs pour excuser leurs fautes.

deslogeà de Portugal , ceux qui y restèrent perdirent ce nom. Quant aux Mores, ceux qui ne voulurent point abjurer l'erreur execrable de Mahomet, se retirent en Afrique. Et ne leur fut donné aucun empeschement, comme aux Juifs; de peur que les Chrestiens qui estoient en Afrique ou en Asie, sous la puissance des Sarasins, ne fussent mal traitez à cause de cela.

9. EN la mesme année, le Roy commença à traiter du mariage qu'il desiroit: car, suyuant ce qui a esté touché ci deuant, il portoit affection à Isabelle veufue d'Alfonse fils du feu Roy Iean, & la vouloit à femme, à cause de sa sagesse & vertu. Il communiqua son desir à Aluaro frere du Duc Fernand, lequel auoit grand credit enuers le Roy & la Royne d'Espagne, & qui ayant promis de s'employer en cest affaire, s'achemina en Castille, d'où il escriuit à Emmanuel, l'aduertissant que le Roy & la Royne estoient en assez bonne volonté d'entendre à l'alliance qu'il desiroit. Suyuant cela Emmanuel despescha son grand Chambellan, gentil-homme fort sage, pour aller trouuer le Roy & la Royne d'Espagne, qui le receurent avec vn fort bon visage, & accorderent leur fille au Roy de Portugal. Mais Isabelle qui estoit ieune, ne pouuoit cōdescēdre à cela: car en partie de tristesse qu'elle auoit de la mort de son feu mary, on la voyoit tellement deffaite & abatue qu'à peine se pouuoit elle soutenir: en partie aussi n'estimoit elle bien seant de se marier encor vne fois, & à peine luy pouuoit on persuader de cōdescēdre au vouloir de son pere & de sa mere touchant ce mariage. Mais en fin les admonitions & prieres de son pere & de sa mere, & les exhortations de plusieurs bons & saints personnages, qui luy demonstroyent que ceste alliance maintiendrait l'Espagne en paix, rompirent sa premiere deliberation, tellement qu'elle accorda ce qui plaisoit à ses pere & mere. Or tandis qu'on apprestoit ce qui estoit requis pour l'amener & pour la recevoir en Portugal, le Roy Emmanuel entreprit vn affaire de notable consequence & digne d'estre celebré à iamais. Pour entendre mieux que c'est, il faut prendre le propos de plus haut, & venir à ce qui en a esté la premiere occasion.

10. I E A N premier de ce nom, Roy de Portugal, qui avec grande gloire garantit son Royaume du rauage de tous ennemis sur lesquels il gagna de belles victoires, lors qu'il estoit fort vieil, ne desista pourtant d'entreprendre choses qui augmentassent de plus en plus sa renommee. Et pourtant il fit equipper & armer grand nombre de vaisseaux, par le moyen dequoy il se rendit maistre de Septe, qui est la plus grande, riche, & forte ville de Barbarie, assize à la coste de la mer pres du destroit de Gibraltar. Ceste prinse donna occasion aux Portugallois mis en garnison dans Septe, de voguer plus loin avec leurs armes. Depuis, Henri fils de Iean, qui s'estoit vaillamment porté en la prinse de Septe, voulut acheminer plus loin ceste entreprise, & fit faire quelque nauires pour courir la coste d'Afrique, & molester les pays de Barbarie tendans vers le midi delà le destroit. En apres, de grand desir qu'il auoit de descouurer les pays inconnus, il donna charge aux capitaines des nauires d'aller encores plus auant. Ce desir fuiui de l'industrie de plusieurs vaillans hommes, & de l'euement de diuer-

Par qui, à quelle occasiō & en quel temps les Portugallois eussent enuoyez en l'Afrique, & passerent la ligne equinoxiale finalement, & depuis se hazarderent encores plus auant.

ses tempestes dont leurs vaisseaux se trouuerent agitez, fut cause que les Portugallois conquirent non seulement vne bonne partie de l'Afrique prochaine de l'Ethiopie, ains aussi beaucoup d'Isles en la mer Oceane. Et tant plus les pays où abordoyent les nauires Portugalloises estoient eslongnez, & si lon y trouuoit des choses plus nouuelles qu'ailleurs, plus ce bon Prince desiroit qu'on allast descouurir encore plus loin. Car c'estoit vn Prince de grand cœur & qui craignoit Dieu : aussi n'auoit il pas tant esgard à se faire renommer par telle entreprise, qu'à l'auancement du Royaume de Iesus Christ. Or pensoit-il que le moyen plus propre pour publier le nom de Christ entre les nations barbares eslongnees de l'Europe estoit la navigation. Pour executer cela plus commodement, il se retira au quartier de Portugal, que lon appelle le Royaume d'Algarve, en vne ville nommée Sagres à deux lieues du Cap de Saint Vincent, afin d'enuoyer de là la flotte de ses nauires, pour aller descouurir le chemin aux pays orientaux. Mais la mort l'empescha de paruenir à ce à quoy il aspiroit : & sortit de ce monde l'an mil quatre cens soixante, estant aagé de soixante sept ans. Il ne laissa point d'heritier : car il ne s'estoit point marié, & mesme en tout le cours de sa vie, il se porta tellement qu'il n'eut affaire à aucune femme. Apres sa mort, son neveu Alphonse fils de son frere le Roy Edouard, ne peut, à cause des grâ des guerres qu'il auoit sur les bras, descouurir plus auant en mer qu'auoit fait Henri. Finalement, Jean fils d'Alphonse, estant Roy, s'adonna tellement à ceste entreprise, & employa tant d'argent & de gens apres, que ses nauires descouuriront la plupart de l'Ethiopie, & alleront iusques es pays que les anciens Geographes estimoient estre inaccessibles. Encore ne se contenta il pas de conoistre le pays qui est sous la ligne equinoctiale, (ainsi appellent les Astrologues ceste borne du ciel qui partit le Zodiaque en deux parties esgales : pource que le Soleil estant paruenue a ceste partie du ciel, le iour & la nuit sont esgaux) ains ordonna à ses gens de voguer par dela & d'aller descouurir ces grandes estendues de pays qui sont outre la ligne, où le soleil se retourne de la partie meridionale. Au moyen de quoy ils furent contrains, estans si eslongnez du Septentrion, & ayans perdu de veue le Pole Arctique, marquer d'autres estoilles au ciel meridional, contraires à celles du Septentrional, pour dresser leurs cartes & routes selon icelles. Or apres que lon fut accoustumé à ces voyages, & que chascun taschoit à l'enui de son compagnon de s'auancer toujours plus auant & descouurir nouveaux pays : il auint que les nauires du Roy parvindrent pres d'un promontoire le plus grand qui ait encores esté veu au monde. Car l'un de ses costez qui regarde l'Occident, s'estend si auant vers le Midi, que sa pointe est eslongnée de la ligne equinoctiale d'environ trente cinq degrez. Les Astrologues appellent Degré vne partie de trois cens soixante, en quoy le monde est diuisé par eux. De la ligne equinoctiale iusques au destroit où ce promontoire commence, tirant vers le Septentrion, il y a enuiron quatre degrez. Ces trenteneuf degrez font six cens quatre vingts & deux lieues & demie d'un costé, & autant de l'autre, quand il faut doubler ce promontoire : tellement que ce sont mil trois cens soixante cinq lieues. Voila

*La navigation
moyen propre
pour faire con-
noistre Iesus
Christ aux
peuples barba-
res : mais ce
moyen a esté
mal suuy, &
pirement exé-
cuté, deuant
que l'auarice
& l'ambition
ont possédé
ceux qui en
deliurans les
barbares de
leurs premieres
superstitions,
leur ont
porté infinies
miséricordes,
par lesquelles
ce peu de bon
naturel qui
prouoit estre
en ces pauures
peuples a esté
du tout cor-
rompu.*

*Vn degré con-
tient dixsept
lieues & demie
de chemin,
soit en latitude
ou longitude
de terre &
en mer*

la longueur de ceste pointe de terre. Il est vray que le costé vers Orient est beaucoup plus long. Or en tournoyant ce promontoire, les Portugallois furent tant tormétez & battus des vagues, qu'à tous coups ils n'attendoient que la mort. Au moyen de quoy ils appellerent ce promontoire le Tourmenteux. L'ayans descouuert ils reprenent la route de Portugal, & comme ils monstroyent au Roy Iean l'assiette & longueur de ce promontoire, vne si grande ioye le faisoit qu'il estima auoir trouué le passage pour entrer aux Indes: & comme touché d'une assurance d'heureux succès, commanda que lon appellast ce promontoire le Cap de bonne esperance. Cependant il enuoya en Alexandrie des iuifs & des Chrestiens qu'il connoissoit propres à tel affaire, afin d'aller de là en Ethiopie qui est sous l'Egypte, puis s'embarquer pour aller aux Indes, afin de sauoir de gens experts en la navigation par quel moyen le plus commode ou pourroit de là en auant paruenir aux Indes par ceste route du Cap de bonne esperance. Dauantage il fit equipper des vaisseaux pour aller trouuer ce chemin qu'il auoit si grand affection de descouurir. Mais la mort rompit toutes ces entreprises du Roy Iean, lequel avec la couronne laissa pour heritage à Emmanuel le soin de ceste descouuerte, & le moyen pour se faire beaucoup plus grand Seigneur. Plusieurs d'entre les conseillers d'Emmanuel taschoyent luy oster ceste fantasie de la teste, disans que ceste esperance estoit incertaine, le danger tresgrand & tout euiden, la navigation faulseuse: que l'Inde estoit esloignée de Portugal de plusieurs milliers de lieues, & qu'il ne se pouuoit faire que le proufit d'un si penible trauail peust recompenser les pertes & incommoditez qu'apporteroit un chemin si perilleux. Outreplus, qu'il auroit à combattre le Souldan d'Egypte, prince fort puissant es pays de Leuant. Item, que si les choses succedoyent bien, les autres Princes Chrestiens luy porteroient enuie & luy pourroyent courir sus. Et s'il desiroit acquerir renom, la guerre d'Afrique accroistroit assez sa gloire, s'il y vouloit employer ses moyens. Quant au proufit, il auoit moyen de tirer vne infinité de deniers & de commoditez des prouinces d'Ethiopie, dont les vnes luy estoient suiettes & les autres tributaires. Ces discours & autres semblables ne peurēt destourner le Roy de son entreprise: car il sauoit que ses predecesseurs Henri & Iean n'auoyent esté retardez par tels auis de faire descouurir les chemins de mer dont le royaume de Portugal auoit esté fort acommodé depuis. Il n'ignoroit pas aussi que la desiance acompagne un cœur bas & lasche: qu'au contraire vne grande esperance est ordinairement cōiointe avec vne magnanimité & vertu singuliere. Partant il aima mieux ensuyure les traces des vaillans princes de son sang, que s'acommoder aux volontez de gens trop scrupuleux & craintifs. Ce qui le mouuoit encor outre cela, estoit vne certaine predictiō procedante de l'auis du Roy Iean, qui luy auoit cōseillé, lors qu'il estoit encores ieune, que pour deuise il adiousta à ses armoiries & portaist vne sphere, en laquelle fussent pourtraits les cercles celestes: predictant par cela que sous Emmanuel, qu'il contemploit ia cōme son successeur, les Portugallois descouuriroyent, avec grand gain & renom perpetuel, un nouueau ciel & les pays plus esloignez de

*Cap de bonne
esperance, pour
quoy & par
qui aussi ap-
pellé.*

*L'auarice &
l'ambition, cō-
seillers d'en-
treprises pe-*

*ruineuses, ont
besoin de beau
pretexte.*

nous, tant en Orient qu'en Occident. Pour la conclusion, le grand desir qu'Emmanuel auoit de faire conoistre, & faire receuoir en pays estranges la religion Chrestienne, ne permit qu'il acquirescât à l'auis de ses Conseillers, gens timides & de petit courage.

Ainsi donc il fit venir en cour Fernád Laurent personnage d'autorité ^{11.} & prompt à executer affaires, auquel il commande d'equipper vne flotte de nauires au plustost qu'il seroit possible, & les munir de toutes choses necessaires. Il manda querir aussi Vásque de Gama gentil-homme vaillât & sage, & en qui il se fioit beaucoup, & le fait Capitaine general de ces nauires, avec instructions de sa charge, & par mesme moyen l'exhorta fort amplement de s'acquitter prudemment & courageusement de son deuoir. Ce gentilhomme accepta la charge qui luy estoit commise, remerciant humblement son prince, & le supplia de luy donner pour adioint Paul de Gama son frere, lequel il aimoit vnicquement à cause de sa vertu: ce que le Roy luy accorda fort aisément. En peu de temps les nauires furent armees & fournies de tout ce qui leur falloit pour vne si longue nauigation. Il n'y auoit pas grád nombre d'hommes, pource que ce voyage estoit entrepris plus pour descouurir les pays Orientaux que non pas pour conquerir. Car il n'y auoit que quatre nauires, l'une desquelles n'auoit autre charge que des viures. Vásque de Gama estoit dans la Nauire capitainesse, son frere Paul en la principale d'apres, Nicolas Coeillo en la troisieme, Gonfalue Nonez en la quatrieme qui portoit la fourniture des viures. Au riuage de la mer, à deux lieues loin de Lisbonne, y auoit vn temple basti par le prince Henri sus-nommé, en l'honneur de la vierge Marie, lequel depuis a perdu son nom, à cause d'un autre plus magnifique tēple que le Roy Emmanuel a fait bastir de neuf tout aupres, en l'honneur de la mesme vierge. Vn iour auant que s'embarquer, Vásque de Gama s'en alla trouuer les prestres qui demeuroyēt pres de ce temple, afin de passer la nuit avec eux en prieres & vœux. Le lendemain, vn grád nombre de peuples s'estāt trouué là, tant à cause de luy que des autres qui l'accompagnoient, on les mena dedans les esquifs. Alors non seulement les prestres, mais aussi toutes autres personnes à haute voix & les larmes aux yeux, prioient Dieu qu'il conduisist Gama & les siens en vne si perilleuse nauigation, & qu'apres auoir bien fait leurs besongnes ils retournassent sains & saufs au pais. Or il y en auoit plusieurs qui se lamentoyent ne plus ne moins que s'ils eussent veu porter des corps morts au sepulchre, & tenoyent tel langage: Voyez où l'auarice & l'ambition porte ces miserables! Sauroit on inuēter vne sorte de supplice plus cruel alencontre de ces gens, quand mesmes ils auroient cōmis contre euxmesmes le plus horrible forfait du monde? Il leur faut trauerser la grand' mer, surmonter avec mille trauaux les flots impetueux d'icelle, & se trouuer au dāger de la vie en infinis endroits. Y auroit il pas plus de plaisir d'estre emporté en terre de telle sorte de mort que lon sauroit imaginer, que d'auoir pour tombeau les vagues de l'Ocean, & si loin de son pays? Tels propos & autres semblables estoient mis en auāt, pendant que la peur les contraignoit d'imaginer en leur esprit des dangers & malheurs encores plus

*Dereffaire de
l'ambitiō & de
l'auarice des
Portugallois,
par ceux de
leur propre
pays.*

plus effroyables. Gama ne pouuât quitter ses amis qu'à grand regret & les larmes aux yeux, toutesfois esperant venir à bout de ses desseings, en se re-commandant à Dieu, monta alaiement dans son vaisseau le neufiesme iour de Iuillet, l'an mil quatre cens nonante sept. Ceux qui estoient arrestez au bord de la mer n'en bougerêt, tant que les nauires, qui cingloyent à pleines voiles par le moyen d'un vent propre, ne fussent du tout essongnees de leur veue.

- 12 EN ces entrefaites, le Roy receut nouuelles que les Roy & Roine d'Espagne auoyêt donné ordre à tout ce qui estoit requis pour solennizer les nopces d'Isabelle. Et pourtât il deslogea de la ville de Sintre assize au pied du mô de Lune, où il se tenoit lors, pour venir à Euora, enuoyât lettres aux principaux de son royaume, afin de l'y venir trouuer. D'autrepart la Roine d'Espagne amena sa fille Isabelle à Valence d'Alcantara, sur les frontieres de Portugal. Le Roy Fernand ne s'y peut trouuer à cause de la maladie de Iean Prince d'Espagne, son fils, lequel il faisoit conscience d'abandonner en telle necessité. Ainsi ces Roy & Roine auoyent tellement parti les charges entre eux, que la mere conduisoit sa fille, & le pere demouroit avec son fils à Salamanque : à condition toutesfois que si le Prince recouuroit vne partie de sa santé, Fernad se deuoit trouuer à Valence pour honorer les espousailles de sa fille. Or d'autant que les choses trainoyent en plus de longueur qu'Emmanuel ne desiroit, il escriuit à sa belle mere, que s'il luy sembloit commode que luy allast espouser sa femme à Valence, il iroit volontiers. La Roine en demanda auis à son mari, lequel fit response que ne pouuant lors abandonner son fils, qui estoit fort malade, elle pouoit accorder à leur gendre de venir à Valence : mais qu'elle l'auertist, de n'amener pas grand train, & remettre tous signes de plus grande resiouissance à meilleure commodité. Incontinent elle manda à Emmanuel qu'il pouuoit venir quand bon luy sembleroit. Sur ce il se mit en chemin, & ne fut pas si tost arriué à Valence qu'on apporta nouuelles à la Roine de la mort du Prince son fils, ce qu'elle tint secret, afin de ne contrister son gendre, lequel neantmoins tost apres en sceut aussi la verité : au moyen dequoy il pria sa belle mere luy permettre d'amener sa femme Isabelle en Portugal, auant qu'elle ouist le vent de ceste mort. Ainsi donc il reuint à Euora, où finalement il declaira à la Roine sa femme la mort du Prince son frere : dont elle fut extrêmement affligee. A cause de ceste perte toute l'Espagne fut en dueil, spécialement ceux de Castille & d'Arragon, pour ce qu'il n'y auoit esperance d'auoir un descendant male du Roy Fernad & de la Roine Isabelle, à cause de leur vieillesse. Or n'auoyêt ils autre enfant male que le Prince Iean, lequel auoit espouse Marguerite fille de l'Empereur Maximilian lors Archiduc d'Autriche. Lors que Iean mourut, sa femme estoit enceinte : mais toute l'esperance que lon pouuoit auoir de son acouchement, & que le royaume ne tomberoit en main de Princes estrangers, fut retranchee & abolie peu de iours apres, à cause qu'elle acoucha auant terme, tellement que son fruit n'eut point de vie. Par ce moyen le droit de Iean heritier de la couronne escheut à sa sœur Isabelle, qui estoit

Roy de Portugal marié avec la fille aînée du Roy d'Espagne.

Dieu peut mesler la tristesse parmi les plaisirs des Princes, aussi bien que parmi les passetemps des plus petits du monde.



Notable reiglemẽt d'Emmanuel.

1498.

l'aînée des filles du Roy d'Espagne. Cependant Emmanuel ne cessoit d'auiſer & de pouruoir aux affaires de son royaume. En ce temps il fit que les droits des poſſeſſiõs, les priuileges ottroyez aux peuples ſous certaines cõditions, les cõfins & limites des Prouinces, villes & bourgades, fuſſent couchez par eſcrit, afin d'obuier aux proces, reigler les droits des villes, & aſſeurer les bornes pour l'auenir. Sur la fin de ceſte annee, la Roine eſtant enceinte, ils ſe retirerẽt à Liſbonne, où le Roy & la Roine d'Espagne leur maderẽt les nouuelles de l'auortemẽt de la princeſſe Marguerite, & le prioyẽt de venir en Caſtille, afin d'y receuoir les hommages des peuples, comme legitimes heritiers des Espagnes. Le Roy Emmanuel ſe voyãt preſſẽ de faire ce voyage, aſſembla derechef les Eſtats, où il dreſſa beaucoup de loix ſalutaires à tout ſon royaume. Quelque temps apres, aſauoir le premier iour d'Auril, l'an mil quatre cens nonante huit ils partirent de Liſbonne, acompagnez de trois cens cheuaux: car les Roy & Roine d'Espagne les auoyent priez d'en mener pas grand train, afin d'euiter les querelles qui pourroyẽt ſuruenir entre les Eſpagnols & Portugallois en ceſte entreueue, comme il auient ſouuent & pour legeres occasions. En ceſte troupe eſtoyẽt pluſieurs grands Seigneurs, uommẽment George, baſtard du feu roy Iean, lequel, quoy qu'il fuſt lors encor bien ieune, attiroit à ſoy les yeux de tous, qui en le cõtemplant, ſe ſouuenoyent de ſon pere pour en magnifier la memoire. Tous eſtoyent habillez de noir, pour teſmoigner le dueil de la mort du Prince d'Espagne. Comme ils entroyent en Caſtille, le Duc de Medine-Sidõine, auſſi tout veſtu de noir avec ſa ſuite, les vint recueillir, & à l'approche deſcendit de cheual & leur baiſa les mains: comme firent les Princes, Seigneurs & gentils-hommes qui l'accompagnoyent. Par toutes les villes & bourgades ſe trouuoit vn merueilleux nombre de gẽs pour les receuoir en grand hõneur, & par tout on n'oyoit que cris de ioye pour leur arriuee: les Seigneurs & gens riches n'eſpargnoyent rien pour leur faire des entrees magnifiques en tous lieux. Comme ils approchoyent de Toledẽ, Fernand ſortit de la ville & leur vint au deuant, puis les embrasſa fort amiablement, ſelon qu'une cõiunction tant eſtroite entre eux le requeroit. Les principaux de la ville les attendoyent aux portes, afin de leur teſmoigner par paroles, humbles reuerẽces, & autres ceremonies acouſtumees en l'Espagne, qu'ils eſtoyent leurs ſuiets. De là, pource qu'il eſtoit tard, ils furent menez ſous vn poille de drap d'or au temple, où ils firent leurs deuotions, & de là vindrent au palais, où la Roine Iſabelle leur fit ſi ioyeux accueil qu'elle ſembloit à leur arriuee auoir chaſſẽ toute la triſteſſe cõceue de la mort du Prince ſon fils. Apres cela, Fernand ſ'adreſſa particulieremẽt aux Seigneurs venus de Portugal, & parla fort humainement à chacun d'eux: mais il receuſſit en grand honneur le Prince George. Peu de iours apres, luy & la Roine ſa femme donnerent ordre de faire acõplir ce pourquoy ils auoyẽt fait aſſembler les Eſtats de toute l'Espagne, & mädẽ leur gendre & leur fille. Vn iour de Dimanche ſuiuant leur arriuee, Emmanuel & Iſabelle furent cõduits au temple: Le Duc de Medine, ſuſnommẽ, marchoit à pied à coſtẽ d'Emmanuel, & tenoit la bride de ſon cheual: au coſtẽ gauche marchoit

Eſtats d'Eſpagne aſſemblez pour receuoir leur Roy, & l'ordre tenu en ceſt endroit.

choit le sieur de Frie, qui conduisoit aussi le cheual d'Isabelle. En mesme forte, le Connestable d'Espagne marchoit à costé droit, & le Duc d'Albe à gauche de Fernand & d'Isabelle la mere. L'Archeuesque de Toledé chanta la messe, laquelle finie, & apres quelques autres ceremonies, Fernand & sa femme se leuent, luy prend son gendre par la main & elle sa fille, les meinent seoir en des sieges haut esleuez & parez fort richement: puis eux se vont seoir en d'autres sieges à costé. Les deputez des villes estoient rangez en des chaires, selon l'ordre obserué des long temps en Espagne. Les Princes prindrent place selon que la commodité se presentoit: car Fernand les auoit amiablemēt admonnestez de ne debatre entr'eux de la preface: declairant qu'on luy feroit tort si lon troubloit sans propos ceste action, en laquelle il desiroit que tous se monstrassent entieremēt de bon accord. Lors chascun faisant silence, vn certain docte Iuriscōsulte, hōme eloquēt, se leua, & fit vne longue harangue en laquelle il monstroit la paix, le repos, l'acroiſſement de l'Espagne, & autres commoditez qui dependoyent de la cōiōction d'icelle avec le royaume de Portugal. En apres il exhorta la Noblesse & les villes d'aimer & reuerer à qui mieux mieux Emmanuel & Isabelle, qu'ils voyoyent estre heritiers de Fernand, de leur estre fideles & obeissans suiets en toutes choses, & esperer (puis que les vertus royales ne leur defailloyent aucūement) qu'ils ressembleroyent à Fernand & Isabelle, à qui ils deuoyent succeder au temps ordonné de Dieu. Puis se tournant vers Emmanuel & Isabelle, il les admōnesta de considerer quelle charge leur estoit imposee. Que leur deuoir estoit d'auoir soin des peuples, maintenir les bons, reprimer les meschans, garder chascun, obuier de bonne heure aux dangers, entretenir & augmenter le bien public par tous moyens possibles. Apres ceste harangue vn Euesque se leua, & ouurit vn liure des Euangiles: puis mit vne croix d'or dedans, & s'approchant d'Emmanuel & d'Isabelle leur dit qu'ils touchassent des mains ceste croix. Cela fait, suiuant les paroles que l'Euesque prononçoit ils s'obligerent par serment solennel d'administrer iustice à leurs suiets, conseruer la liberte de la chose publique, & pouruoir soigneusemēt au bien & salut de tous. Incontinent apres, le Connestable print le liure des mains de l'Euesque, & le tenant iura & promit de reconnoistre Emmanuel & Isabelle pour vrais & legitimes successeurs de ses Roy & Roine, & que fidelement il maintiendrait par armes leur grandeur & dignité. Puis il fit obliger par mesme serment les Princes & les deputez des villes. Alors les vns apres les autres vindrent par ordre vers le Roy & la Roine, auxquels ils venoyent de iurer fidelité, & leur baiserent les mains. Ce que toutesfois les deputez de Toledé ne voulurent pas faire en ce lieu là. Mais ce ne sera point chose hors de propos de declairer, pourquoy ils refuserent ce deuoir, afin qu'on puisse entendre qu'il faut peu de chose souuentefois pour troubler les peuples, si lon ne preuient le mal dextremement & de bonne heure. Il y eut iadis en Espagne vn fort grand debat touchant la preface, entre les villes de Toledé & de Burgos, qui estoient les principales: car ceux de Burgos main-

*Deuoir des
Rois.*

*Promesse reci-
proque des
Rois & de
leurs suiets.*

*Ceux de To-
ledé iureux de
leurs princede-
ges.*

de Toledé attribuoient à la leur la principauté d'Espagne. Ce debat ne peut iamais estre appointé, & n'y eut moyen de faire qu'une de ces villes quittast vn seul point de son droit à l'autre. Parquoy lors que les Roys assembloyent les Estats, il y auoit tousiours danger que les deputez de ces deux villes ne vinsent aux mains. Or pour remedier aucunement à cela, le Roy Alfonso, vnzième du nom, tenant les Estats du royaume à Complute, dit en plaine assemblée, & auant que lon eust commencé à parler de ce different: Je scay que ceux de Toledé acquiesceront tresuolontiers à ce qui sera ordonné: Que ceux de Burgos parlent. Ce propos du Roy retint les vns & les autres, chascun s'estimant preferé, a sauoir ceux de Toledé, pour ce que Roy auoit parlé en leur nom premierement: & ceux de Burgos, d'autant qu'ils auoyent dit leur auis les premiers. Depuis, ceste coustume fut gardee par les Roys de Castille, toutes les fois qu'ils tenoyent les Estats. Toutesfois pour euer querelle, ceux de Toledé ne voulurent point faire la reconnoissance en ceste assemblée: mais au sortir du temple, comme le Roy & la Roine alloient dîner en la maison de l'Archeuesque, ils se presenterent en chemin, & apres plusieurs grâdes reuerences baisèrent les mains au Roy & à la Roine. Les deputez des villes s'estans retirez, Fernand & sa femme deliberent de mener leur gendre & leur fille en Aragô, afin de leur faire prester serment de fidelité par les Estats du Royaume, comme auoit esté fait en Castille. En chemin, par tous les lieux où ils passoyent vn nombre infini de peuple leur venoit au deuant avec signes de ioye incroyable: plusieurs Seigneurs & villes fournirēt à suffisance tout ce qui estoit requis pour la despenſe des Roys & Roines, lesquels finalement arriuerent à Saragosse le premier iour de Iuillet, où ils furent receus fort solennellement & avec des ceremonies desmesurees, à la façon du pays.

Louables procederes de ceux d'Aragô qui maintiennent constamment leurs priuileges anciens.

APRES s'estre reposez quelques iours, Fernand ordonna que ceux de Saragosse sans aucun delay feroient hommage à Emmanuel & Isabelle: ce qu'ils dirent ne pouuoir faire que premierement ceux de Valence, & de Barcelonne, qui auoyent en recommandation les priuileges de leurs villes, ne fussent assemblez avec eux. Fernand insistoit au contraire, qu'il n'estoit point besoin d'attendre ceux là, puis qu'on sauoit qu'en temps & lieu ils feroient mesme deuoir: & que ceux de Saragosse ne deuoyent delayer en vn affaire qui estoit hors de doute. Ils repliquēt que l'affaire estoit de telle consequence, qu'il meritoit bien que lon y pensast. Qu'ils n'estoyent point en doutes'il falloit faire hommage ou non: mais du moyen & des conditions: & que pour en resouldre plus meurement, il falloit que leurs associez y fussent, afin qu'une cause commune fust maintenue par le commun auis de tous. Et si Fernand vouloit qu'ils fissent hommage sans attendre les autres, ils le vouloyent bien, pourueu qu'au preallable Emmanuel & Isabelle iurassent, que si tost qu'ils entreroient en possession du royaume, sans delay ni remise quelconque ils remettroyent aux Aragonois les droits & franchises que Fernand leur auoit ostez. Fernand respondit là dessus, qu'il ne souffriroit en sorte que ce fust, que lon rendist aux peuples ce qui leur auoit esté osté à cause de leurs grands forfaits, & d'autant qu'ils en abusoyēt

Il n'y a point de prescriptiō contre les droits & franchises des Peuples.

en toutes façons. Ils furent en ces disputes l'espace de trois mois, dont les Roys estoient merueilleusement irritez : & ce qui les picquoit le plus estoit, que ceux de Saragosse disoyent que le royaume d'Aragon auoit tousiours eu ce priuilege, que iamais il n'estoit tombé en quenouille : & que si le Roy mouroit sans hoir male, il estoit en la liberté des Aragonois d'assembler les Estats du royaume, & eslire vn Roy, qu'ils iugeroyent estre propre pour regner à cause de ses vertus. Outre cela, ceux de Saragosse voulans maintenir leur liberté faisoient secrettement porter des armées en certaines maisons, se fortifioient de toutes parts, conseroyent & consultoyent ensemble de ce qui estoit requis pour leur bien cōmun, & ne laissoient rien en arriere pour conseruer leurs droits. Mais l'acouchemēt de la ieune Roine Isabelle appaisa tous ces troubles : car le vingtcinquieme iour d'Aoust elle acoucha d'un fils qui fut nommé Michel, dont Fernand receut tel contentement, qu'il ne se pouoit contenir de s'esjouir ouuertement avec tous de la naissance de ce petit Prince, heritier de toute l'Espagne. Toutesfois, comme les choses humaines sont caduques & sans arrest, & le plus souuent vne grande ioye a vne douleur extreme pour compagne, ce tant dōux plaisir des Roys, les resiouissances des Princes & du peuple furent en vn instant changez en pitoyable deuil. Car deuant qu'Isabelle acouchast elle estoit affligee de maladie qui croissoit à mesure que le terme de l'enfantement approchoit. Or apres s'estre deliuree de son fils, elle voidatant de sang, que ses forces defaillirent, si qu'en fin elle rendit l'esprit entre les bras de son pere. C'estoit vne Princesse fort modeste, bōne, sage, & donnee de la crainte de Dieu, ce qu'elle monstra bien sur la fin de sa vie, se portant en telle sorte qu'il estoit aisé à voir qu'elle se soucioit peu de ceste miserable terre, & qu'elle auoit le cœur arresté à la vie eternelle. On l'enterra avec le regret & les pleurs de chacun. Emmanuel ayant paracheué les obseques, & fait distribuer les legats qu'elle auoit faits par son testament, print congé de Fernand & d'Isabelle, en grāde angoisse de cœur, pour s'en retourner en Portugal. Ce depart fut accompagné de maintes larmes de part & d'autre, quand Fernand & sa femme se souuenoyent quelle fille ils auoyent perdue, & qu'Emmanuel conoissoit qu'il estoit priué d'une femme ornee de toutes vertus. Il fut conduit iusques en Portugal par plusieurs Princes & grands Seigneurs. Mais comme il estoit en chemin en vne ville nommee Arande, il enuoya ses ambassadeurs vers le Pape Alexandre, pour l'admonester de pourvoir aux affaires de l'Eglise : d'autant que la vie des Chrestiens d'alors estoit fort corrompue, la pieté estainte, la bride laschée à tous vices, les choses saintes & charges Ecclesiastiques vendues à deniers contans à des gens du tout indignes d'icelles. Que la ville de Rome qui auoit esté le domicile de pieté & sainteté, estoit deuenue vne boutique d'impudence & de meschanceté : que l'Eglise Romaine estoit souillée d'ordures estranges, & que les choses estoient en miserable estat. Partant le supplioit & adiuroit, qu'en reuerence de Iesus Christ, qui a espendu son sang pour nous, il remediait au mal, reprimaist l'auarice, arrestast par vne seuer discipline la licence desbordée des Chrestiens, fist honneur à ceste grande

*Peuples coura
geux & enne
mis de seruitu
de.*

*Mort de la
Reyne Isabel
le.*

*Ordres de
l'Eglise Ro
maine discon
uertes & con
damnees par
le Roy Em
manuel.*

charge qui lui auoit esté commise, & par bōs exemples ramenaſt la Chreſtienté à Dieu, duquel elle ſ'eſtoit deſtournee par infinis ſcandales. Les ambassadeurs eſtoyēt Roderic de Caſtres, Henry Coutin & Fernād Coutin, gentils-hommes de grandes maiſons, & bien entendus en affaires. Emmanuel leur enioignit de communiquer de leur legation avec l'ambassadeur que le Roy Fernād deuoit enuoyer à Rome, comme il l'auoit arreſté en la ville de Saragoſſe avec le Roy de Portugal. Ayant deſpeſché ces ambassadeurs, il reuint en aſſez grande diligence en ſon royaume, & arriua à Liſbonne le treizième iour d'Octobre.

*Eſtats de Caſtille & d'Ara-
gō receuyent le
ſils d'Emman-
uel pour leur
Prince & lui
font homma-
ge.*

1499.

*Promeſſes &
obligations re-
ciproques entre
le Prince &
ſes ſuiets.*

ESTANT là, il entendit par les lettres que Fernand & Iſabelle lui eſcri- 13
uient que Michel ſon ſils auoit eſté declaré Prince legitime & heritier de
Caſtille & d'Arragon, du commun conſentement des Eſtats de ces deux
royaumes: & que tous luy auoyent fait hommage. Ils le prioient de dou-
ner ordre que ceux de Portugal fiſſent le meſme, alleguās que cela ſeruoit
de beaucoup pour entretenir ces royaumes en paix. Ainſi dōc, l'an ſuyuāt,
qui fut l'an mil quatre cens nonante neuf, Emmanuel aſſembla les Eſtats
de ſon royaume, pour accomplir cela ſans delay. Les deputez venus, il les
prie de preſter ſerment au prince Michel ſon ſils vnique, & promettre de
luy eſtre fideles ſuiets, quand il ſera paruenu à la couronne. Eux auant que
faire cela, requierent qu'il promette auſſi au nom de ſon ſils, & le conſer-
maſt par ſermēt, de ne bailler iamais en aucun temps, ni pour quelque oc-
caſion que ce fuſt, à autres qu'à gens nez au royaume de Portugal la garde
des places fortes, les iuriſdictions, ni les peages deçà ou delà la mer. Ce que
le Roy leur accorda volontiers. Ainſi donc, eux preſterent le ſerment au
Prince Michel abſent, & Emmanuel ayant ſigné de ſa main les lettres pa-
tentes de ſa promeſſe, pour les rendre authentiques & perpetuelles, les fit
ſceller du grand ſeau. Voila ce qui auint ceſte annee en Portugal. Quant
aux Ambassadeurs enuoyez à Rome, y eſtans arriuez ils communiquerēt
leur charge à l'Ambassadeur d'Eſpagne, cōme il leur auoit eſté comman-
dé. Apres auoir auifé à leurs affaires, tous enſemble vont trouuer le Pape, le
prient, ſupplient & adiurent au nom du Roy, de vouloir eſtindre le feu
de tant de meſchancetez qui auoyent la vogue en la Chreſtienté, par vne
bonne reformation & par vne roide & ſeuere diſcipline. Ils l'en ſollicite-
rent & importunerent librement pluſieurs fois, publians leurs requeſtes
par tout, afin que chaſcun entendift que les Rois d'Eſpagne auoyent fait
tout deuoir pour remettre l'Egliſe au deſſus. Ces ſupplications furent cau-
ſe que le Pape ne fut pas depuis ſi deſbordé en ſon gouuernement qu'il a-
uoit eſté auparauant. Auſſi fit-il ſemblant d'auoir prins en bonne part ceſt
auis. Quelques iours apres il enuoya ſon Legat vers Emmanuel, avec des
preſens conſacrez ſolennellement à Rome, ſelon la couſtume: aſauoir vne
eſpee & vn bonnet. Le Roy ſ'eſtima fort honnoré de tels dons, & renuoya
le Legat avec d'autres riches preſens, & eſcriuit au Pape qu'il lui porteroit
touſiours la reuerence à quoy la Religion l'obligeoit. En ceſte meſme an-
nee, l'onzième iour de Iuillet, le Roy receut les premieres nouuelles de ce
que ſes Capitaines auoyent fait es Indes, qu'ils eſtoient allez deſcouurir
par

*Preſens du Pa-
pe au Roy de
Portugal, reſ-
moins de la re-
formation de
l'Egliſe.*

par son commandement. Mais pour fauoir comme le tout se passa, il faut reprendre le propos des son commencement.

14 VASQUE de Gama estant parti de Lisbonne, print la route des Isles fortunées : puis il descouurit l'Isle de S. Iacques, qui regarde l'Ethiopie. *Diuers voyages & accidens de Gama.* De là, selon qu'il luy auoit esté commandé, il vogua vers l'Est, iusques à ce qu'il descouurit vne terre, vers laquelle il fit tourner la flotte, & estant entré en vn grand bras d'eau, il commanda que lon ployast les voiles & que lon mouillast l'anchre. Puis enuoya Nicolas Coeillo pour descouurir de plus pres ceste terre, & voir s'il y auroit quelque riuere d'eau douce pour en acómoder leurs nauires. Car il y auoit ia trois mois que la tempeste les battoit & portoit au long de ceste coste, avec grande disette debóne eau. Coeillo executant ce qui luy estoit commandé, courut au riuage, & trouua la bouche d'une riuere, dont l'eau estoit douce & les riuages couuerts de belle herbe verte : dont ayant aduertí son General, incontinent on mit la voile au vent, afin que tous peussent puiser de l'eau & couper du bois. Là ils pescherét de grands veaux de mer, dont y auoit foison, & se saoulerét de ceste viande. L'intentió de Gama estoit, en quelque lieu qu'il mist le pied, de conoistre les mœurs & façons des habitans. Pourtant il dóna charge à certains de sa troupe, de faire tát par finesse & par force qu'on eust quelqu'un du pays, de qui il peust s'enquerir & apprendre ce qu'il desiroit fauoir. On luy amena des homes bigarrez de couleurs sur la face & par le corps, ayās les cheueux courts & frisez : mais personne ne pouuoit entédre leur langage, encor que Gama eust des homes qui entendoient plusieurs sortes de langages d'Ethiopie. Nonobstant il leur fit fort doux accueil, les vestit & leur donna des presens auxquels ils prenoient plaisir, afin de les allicher, & de faire qu'ils amenassent de leurs compagnons es nauires. Ces presens estoyét des clochettes, des patenostres de verre, & autres telles choses. Depuis il y eut grande familiarité entre ces Ethiopiens & les Portugallois : car ils leur apportoyent grand' quantité de fruits & de chairs de leur terre, avec autres sortes de viures, en eschange de chemises & choses de petit pris, dont toutesfois ils se brauoyent, & en faisoient grand cas. Or les vns trafiquoyent avec les autres par signes & contenance. Mais par la folie d'un homme ceste frequentation & trafique print fin. Cestui-là estoit deuenu fort familier de ce peuple Ethiopien, pourtant il requit Gama de lui permettre de les aller visiter iusques en leurs logis. Ainsi donc il s'en alla avec eux, & sur le chemin ils tuèrent vn grand veau marin, & luy en dressèrent vn banquet assez magnifique à leur auís. Luy regardát à contre cœúr ceste viande mal propre à son estomach, se met incontinent en voye pour retourner vers les nauires : eux le suiuent avec vne douce & gracieuse cõtenance : mais luy ne pouuoit conoistre s'ils le menoyent au supplice, ou si c'estoit par honneur qu'une si grosse troupe l'accompagnoit. Toutesfois la peur le contraignoit d'interpreter tout en mauuaise part : au moyen dequoy si tost qu'il se vid pres du riuage, ce fut à crier à l'aide, comme si les autres l'eussent trainé prisonnier. Les Portugallois coururent incontinent vers luy, & les autres se retirèrent plus viste que le pas. Gama mit pied en

Riuere de S. Iacques.

Port de Saint Helaine.

*La folie d'un
mot plusieurs
ruses, en peine.*

terre avec les autres capitaines, afin de pouuoir plus aisément cōsiderer en l'Astrolabe la distāce du Soleil de la ligne equinoctiale. Mais les habitāz du pays, qui s'estoyent sauuez dedans vne forest où ils tenoyent leurs armes (ignorans pourquoy les Portugallois estoient abordez là) se tenoyent cachez. Les armes dont ils s'aidoyent le plus, estoient certaines cornes fort aigues attachees à des longs bois, qu'ils dardoient de grand' force, & cela faisoit aussi grand' playe, que si lon eust lancé vn iavelot bien acéré. Cōme donc les Portugallois s'amusoient sur le riuage, sans penser à aucun inconuenient, ces gens sortent en vn instant de leurs cachettes, & acourent fort vistemēt vers la mer, assaillent les Portugallois, en blessent plusieurs, entre autres Gama, lequel fut atteint au pied d'un coup de trait. Les Portugallois furent contraints monter en leurs nauires, & desloger de là plus tost qu'ils ne pensoient. Voila comme la folie d'un d'entr'eux incommoda le rafraischissement de toute la flotte. Ils appellent auioird'hui ce lieu le port de saincte Helaine : & ceste riuere d'eau douce, la riuere de sainct lacques. Car selon que les iours dediez à la memoire des saincts trespassez escheoyent, ainsi imposoyent-ils les noms aux pays, isles, & riuieres qu'ils auoyent descouuertes le iour de tel Sainct ou de telle Saincte.

Grandes difficultés à passer le Cap de bonne esperance, en certain temps de l'annee.

A v desmarer de là, ils prindrēt la route vers le Su, & tāschèt de passer le Cap de bonne esperāce. En ceste nauigatiō, Vasque de Gama fit preuue de sa vertu. Les vagues estoient estrangemēt perilleuses, les vents cōtraires, la pluye fort froide, vn brouillas espais, & la tēpeste cōtinuelle. Ce qui aduiēt d'ordinaire en ceste plage de mer en certains tēps, specialement lors que le Soleil approche le plus pres du Nord : car lors les vagues sont effroyables & tres-dangereuses : cōme aussi elles estonnoyent tellement & pilotes & passagers, qui ne s'estoyent iamais trouuez en si grād' tourmente, que chascun d'eux pensoit estre venu à la fin de ses iours. Car leurs nauires balançoient en telle façon sur les vagues, que par fois elles sembloient vouloir mōter aux nues, puis tout soudain deualer & fondre es abisines profōdes. Mais le pis estoit qu'ils ne pouuoient passer outre : pourtant furent-ils contraints caler la voile, & se laisser maistriser par les vêts, en telle sorte toutefois qu'ils singloyent à la cappe, faisoient diuers tours & retours, pour ne reculer en arriere, ains pour attēdre la fin de la tēpeste au milieu de la tēpeste mesme. Or si tost que l'orage cessoit quelque peu, les Portugallois transis de peur se rangeoyent autour de Gama, le supplians ne vouloir estre cause que ceux qui luy estoient baillez en garde perissent d'une mort si espouuātable : qu'il estoit impossible de pouuoir resister plus long tēps à la fureur des vagues, & qu'il permist qu'on reprinst la route de Portugal, auāt que les nauires coulassent en fond. D'autant qu'il estoit poit l'aureille, & reiettoit cōstamment toutes leurs requestes, plusieurs d'entr'eux cōspirerent de le tuer : dont il fut aduertī par son frere, & se donna soigneusement garde de leurs embusches, puis fit enchaîner les maistres & patrons, & luy mesmes se mit en la place du pilote, cōme il estoit fort experimenté au fait de la marine. Ayant d'un cœur inuincible soustenu les efforts de ceste tempeste, l'espace de plusieurs iours, finalement le temps changea, & les nauires doublerent la

Tempeste dedans les nauires aussi perilleuse que dehors.

pointe

pointe & passerent ce Cap, tellemēt que le vingtiesme iour de Nouembre ils cōmencerent à voguer de l'autre cōstē, avec vne ioye nōmpareille. Car ils s'asseuroyent, qu'estans eschappēz des pattes de ce lion de mē, nē ne les empescheroit de paruenir heureusēmēt au lieu où ils tendoyēt. Au reste, ils dressèrent tellemēt leur route, que iamais ils ne perdoient de veüe la terre dont ils consideroyent la situation & la beauté en grand contentēmēt: car ils voyoyent de grandes forests espaisēs, infinis troupeaux de bestail, & grand nombre d'hōmes de mesme couleur & taille que ceux du port de sainte Helaine. En parlant ces gēs semblēt sanglotter, cheminēt nuds, tiennent leurs parties honteuses enclōsēs en des gaines de bois, s'aident de certaines flūtes qu'il fait assez bō ouir. Leurs maisons sont d'une fōtte de briques cuites au Soleil, ou faites de terre, qu'ils couurent puis apres de chaume & de gazons entassēz sans ordre. Les Portugallois voguerēt cinq iours durant au long d'une des costēs de ce Cap, lequel ils doublerent le vingtcinquiēsme iour de Nouembre, & lors tournerent leurs proues vers Septentrion. Entre la dernière pointe de ce promōtoire, laquelle regarde l'Oriēt, & le goulfe, que les Portugallois appellēt l'aiguade S. Blaise, distans l'un de l'autre de cent dix lieues, la terre est fertile, nourrit de grands Elephans, & quantité de bœufs gras, que ceux du pays bastent & s'en seruēt cōme nous faisons d'asnes, mulets, & d'autres bestes de charge. Au dedās du goulfe y a vne petite Ile où les nauires abordent pour puiser de l'eau. Ils virent là des troupes de veaux marins en nōbre infini, si farouches & cruels qu'ils se lançoient contre les hommes. Aussi virent-ils des oiseaux, que ceux du pays appellent Sotilicāres, gros & grands comme des oisons, sans plumes, avec des ailes pareilles à celles des chauuefouris: ils ne peuēt voler, mais ils estendent ces ailes de peaux, & courent d'une tresgrande viffesse. Apres auoir fait aiguade & achetē quelques chairs, les Portugallois se remirent à la voile. Le huitiesme iour de Decēbre vne tempeste soudaine les effroya fort, & les emporta en haute mer: mais elle ne continua pas, tellemēt que de rechef ils costoyerent la terre: à cause que n'estans accoustumēz encor à la nāigation de ceste mer, ils estimoyent que c'estoit le plus seur de voguer, sans perdre la veüe du riuage. Ils descouurirēt lors des petites Isles distantes d'environ six vingts lieues du goulfe, où ils s'estoyēt rafraischis. Ces Isles estoient fort plaisātes, les arbres hauts, la terre tapissēe de verd, & infinis troupeaux paissans de toutes parts. La mer estoit calme & profonde en ces endroits spēcialement: par ainsi ils pouuoient approcher du bord, & voir à plaisir ce beau pays.

A I N S I, apres auoir descouuert toute ceste coste, le dixiesme iour de Ianuier de l'annee suyuantē, ils apperceurēt en terre grand nōbre d'hōmes & de femmes qui alloiyēt & venoyēt. C'estoyēt gens de couleur brune, cōme les autres de ceste coste, de grande stature, & d'assez belle contēnāce. Gama fit lors tourner les proues celle part, puis enuoya vn trucheman pour saluer de sa part le Roy du pays & luy porter des presens. Ce trucheman fut bien receuilli, & renuoyē avec d'autres presens tels que ceste terre les porte. Les hommes portoyent des poignards qui auoyent

*Quels sont les
Peuples du
Cap de bonne
esperance.*

*Arriuee de Gama en la terre
de saint Raphael, au commencement de
l'an 1498.*

les manches d'estain, assez artistement elabourez, & les gaines d'ivoire. Vaque de Gama fit descendre en ce lieu deux bannis de Portugal, pour y apprendre par le menu les mœurs & coustumes du peuple: car il y auoit en ceste flotte dix criminels condamnés à mort, auxquels on auoit donné la vie, à la charge qu'ils descouueroient les pays, & prendroient garde soigneusement aux façons de faire des gens avec lesquels Gama leur enuioindroit de demeurer. Les Portugallois partirent de là le quinziesme iour de Ianvier, & arriuerent à la bouche d'un grand fleuve, dont les riuages estoient tous couuerts d'arbres chargés de fruits, de branches larges & de grandes feuilles: la terre estoit herbue & plaisante. Ils y mouillèrent l'anchre, afin de voir le lendemain (car le Soleil s'alloit coucher) quel pays c'estoit. Au matin ils apperçoyent plusieurs hommes, presque d'une mesme couleur & façon, qui venoyent vers les nauires dans des barques, desquelles ils sortirent, & sans aucune crainte entrerent franchement es nauires, où ils firent grand chere. Mais personne ne pouoit entendre leur langage, tellement que par les signes qu'ils faisoient il falloit comprendre leur intention. Au bout de trois iours, les quatre principaux du pays vindrent pour saluer Gama & voir les nauires. Ils estoient un peu mieux en point que les autres: aussi Gama leur fit un banquet, & leur donna à chascun une robe de soye, dont ils monstrent semblant d'estre fort ioyeux. Mais les Portugallois ne peurēt entendre d'eux, chose de laquelle ils peussent recueillir s'ils estoient encores pres ou loin des Indes. Toutesfois l'un d'eux dit en langage Arabique tellemēt quellemēt, qu'au pays, d'où il estoit reuenu depuis peu de iours, arriuoient souuentefois des vaisseaux de mesme forme & grandeur que ceux qu'il monstroït lors du doigt: & que ce pays n'estoit pas gueres esloigné de là. Cera rapport fit esperer les Portugallois qu'en brief tēps ils descouueroient l'Inde Orientale. Cela fit que Vaque de Gama appella ce fleuve la riuere des bons signes, & fit planter sur le riuage d'icelle une croix de pierre, en laquelle estoient grauees les armoiries du Roy Emmanuel: comme il faisoit es ports & hautes plus commodés, à la gloire du nom de Iesus Christ, & pour conseruer plus long temps la memoire de son illustre Prince. Au reste, il appella ce pays, la terre de S. Raphaël: & y laissa deux de ceux à qui la vie estoit donnée à la condition descrite ci dessus.

*Riuere des
bons signes.*

*Terre de S.
Raphaël.*

Les nauires ayans esté calfeutrees, & les malades pensés en ce lieu, Gama fit leuer les anchres, dresser les bastons des masts, & teindre les voiles, le vingtquatriesme iour de Feurier: & le premier iour de Mars ils descouurirent quatre isles assez pres l'une del'autre. Coeillo apperceut partir de l'une d'icelle sept carauelles qui venoyent à voile desployée droit aux nauires. Ceux qui estoient dedans ces carauelles remarquerent incontinent la Capitainesse à l'estédart attaché au plus haut du grand mast, parquoy ils tournent leurs proues vers icelle, & estans pres commencent à crier & saluer les Portugallois en Arabie. Lors Gama fit auancer Coeillo qui auoit le plus petit vaisseau de toute la flotte, & luy commanda de tirer vers ceste Isle, d'où il auoit veu partir les carauelles: à quoy Coeillo satisfist, iettāt la sonde deuant, & les autres nauires flotterēt lentement apres. Cependant les carauelles

carauelles entouoyent la flotte, & avec fifres & autres instrumens de musique donnoyer du passetemps aux Portugallois, & leur crioyent à pleine teste qu'ils furent les tresbien venus en ces pays. Or c'estoyent gens bigarrez de coulers, d'assez belle taille, portans des chemises de soye, & des turbans en a teste faits de longues pieces de linge, rayonnees de fil d'or: ils estoient aussi equippez d'un cimenterre pendant au costé, & d'une rondelle liee au bras. Estans entrez es nauires ils saluent les Portugallois en langue Arabique. Ceux qui entendoient bien ceste langue, leur respondirent gracieusement. Gama fait aprester le banquet, ce qu'eux ne refuserent point: & comme ils faisoient bonne chere, Gama leur demande comme s'appelloit ceste Isle, comment on y viuoit, & quel chemin il falloit tenir de la pounllier aux Indes. Eux respondent que l'Isle se nommoit Mozambique: que le peuple estoit idolatre, toutesfois qu'une grande partie d'icelle estoit inhabitee par des marchans Sarafins: que le Roy de Quiloa en estoit Seigneur, y ayant un gouuerneur homme de grande autorité: & que c'estoit un port des plus celebres de tous ces pays: d'autant que de là les nauires voyageroyent en Arabie, es Indes, & en plusieurs autres parties du monde, d'où lon menoit infinies marchandises en ce port. Ils adioustoyent dauantage qu'en ceste coste y auoit un pays nommé Zofala (que les Portugallois auoyent passé) fort abondant en or: puis ils declairerent quelle distance il y auoit de ceste Isle iusques à Calecut. Les Portugallois oyans si bonnes nouuelles commencerent à leuer les mains au ciel, remercier Dieu, & estimer estre au bout de leurs plus grâdes difficultez. Ceste Isle de Mozambique est au pays que les Anciens appelloient Ægesimba, distant de seize degrez de la ligne equinoctiale, en tirant vers le pole antarctique au midi. Les habitans sont noirs, l'air y est gros & mal sain à cause des marests. Ils font des maisons de terre, & les couurent de paille. Toutesfois à cause de la commodité du trafic, les nauires y abordoyent de toutes parts. En ce temps là les Arabes y auoyent grand credit & beaucoup de biens. Ils s'aident d'une sorte de vaisseaux, semblables à un brigantin, dont les timons ne sont point de fer, mais ils passent des pieces de bois rondes en des pertuis, & s'aident decela en lieu de gouuernail. Ils calfeutrent les nauires avec des cordes faites de feuilles de palmiers, qui sont arbres fort hauts, iettés fueilles longues, p.équates & velues, les rameaux estendus, donnans ombre fort gracieuse, & portans des noix fort grosses, que les Portugallois nomment Cocos.

Isle de Mozambique, sa situation & ses habitans.

Zofala ou Cepala pays abondant en or.

- 15 OR ces peuples s'aidoyent deslors en leurs nauigations, de certains instrumens que nos Pilotes appellent Aiguilles marines. L'estime que ce ne sera pas discourir hors de propos d'en représenter ici quelque forme, en faueur de ceux qui sont eslongnez de la mer. Premièrement, il faut considérer une boite de bois, bien aplanie & ronde, de la hauteur de deux ou de trois doigts. Elle a au milieu une pointe fermement attachee & fort aigue par le bout, un peu plus courte que la hauteur de la boite: puis la boite est couuverte d'une reiglette ou platine de fer ingenieusement forgee, & de la porportion de la boite, en telle sorte toutesfois qu'elle ne soit pas du tout

Description de l'aiguille marine, inuentée des plus belles & utiles du monde.

si grande que le diametre d'icelle boîte, & n'en touche pas les bords. Or le bout de ceste pointe, fichée au milieu de la boîte, passe par le milieu de la platine, ayant vne rose esleuee par dessus, & tiét ceste platine tellement en balance & cõtrepois, qu'elle est d'une hauteur esgale en tous les rumbz. Puis elle est couverte d'une verriere retenue fermement avec vn fil de cuiure tout autour, afin de ne bransler, & pancher d'un costé plus ue d'autre. Et d'autant que la propriété de l'aymant est d'attirer non seulement le fer à soy, mais aussi quelvn de ses bouts regarde le Septentrion, l'autre le Midi, & qu'il communique ceste propriété au fer qui le touche: il aient que quand la rose, attachee au dessus de la platine & retenue droit sur l'pointe, est appliquée à l'aymant qui regarde le Septentrion, & frottee d'icelui, elle tire en soy ceste propriété: & estant suspendue tellement qu'elle peut tourner de tous costez, sa languette ou aiguille se tourne par ceste communicatiõ admirable vers le pole Arctique. Cest instrumēt apprenoit aux mariniẽrs; en quelque endroit qu'ils fussent sur l'Océã, quoy que le ciel fust cõvert & embrouillé, de pouoir neãmoins tenir leur route droit au Septentrion. Et pource que cest instrumēt ressembloit à vne aiguille il l'appellerent aiguille marine. Or, cõme il est bien aisé aux esprits humains d'adrouster aux belles inuentions, ils inuenterent vne autre façon d'aiguille, par le moyen de laquelle ils peussent conoistre plus asseurement quel chemin ils tenoyẽt en leur navigation. Car ils font avec des verges de fer vne figure en forme de lozange, dessous & dessus laquelle ils collent vn carton tout rond. Puis agencẽt tellement leur figure par le moyen de l'aymant, que l'vn des pointes regarde le pole Arctique, l'autre l'Antarctique. Il y a deux autres pointes rebouchees dont l'une tend au couchant, l'autre au leuant. Le diametre du rond n'excede point la longueur de la figure. Ce rond a au milieu vn anneau d'airain fait de la mesme forme que celui de l'aiguille sus mentionnée. La pointe d'une verge de fer passe par ce pertuis, & tient ce rond suspendu, lequel sert beaucoup plus que la platine de l'autre aiguille, car on y peut remarquer tous les vents & rumbz, dont la nauire est agitée. Car en la carte de dessus sont descrites les quatre plages du monde, a sçauoir Orient, Occident, Septentrion & Midi. L'aiguille ainsi dressée, restoit vne incommodité, qu'il estoit force, quand les vagues font balancer la nauire, cõme il auient à tous momens, que par fois elle panche vers la proue, puis en poupe, ou de costé, tellement que l'aiguille demeueroit couchée au fond de la boussole, & ne pouoit dresser son mouuemēt libre vers le Septentrion. Afin donc que cela n'auinist, quelques sages Pilotes trouuerent vn moyen fort ingenieux: car la boussole ou boîte est serrée fort estroitement d'une reiglette ou filet de cuiure vn peu endedans du bord. Puis de part & d'autre on fait passer vne vergette d'acier par le pertuis du grand cercle de dehors, distãt vn peu de celui qui est dedans. Ces deux verges sont tellement esgales & opposées, que si des deux lon n'en faisoit qu'une elle contiendrait le diametre de tout le rond. Or le rond de dehors, est balacé sur ces deux vergettes, ou languettes cõme sur vn puiot. Derechef, hors de ce rond de dehors sont tirees deux autres languettes, eslongnees de mesme interualle, au-

tout

tour d'un petit auge rond, dedans lequel ceste machine est enclosée. Aureste, les languettes de dehors sont tellement opposées à celles de dedans, que si deux d'icelles seulement se regardoyent droit, ce seroit pour s'entre-rencontrer & rompre es angles droits. Et d'autant que ceste machine à le bas de cuiure & est pesante, & ne touche à rien, elle est tellement poussée, qu'elle demeure tousiours suspendue au milieu. Aussi comme elle est suspendue & mobile, son contrepoids la fait subsister en telle sorte, que quelque tēpeste qui puisse agiter le vaisseau, elle demeure tousiours tournée vers son compas: par ainsi il auient que rien ne peut empescher l'aiguille d'auoir tousiours son mouuement & sa pointe dressée iustement vers le Nord.

16 C E S Arabes s'aidoyēt deslors de telles aiguilles, & de cartes marines, par le moyen desquelles ils conoissoyent certainement l'assiette des regions maritimes, selon les lignes descrites en ces cartes. Ils obseruoyēt aussi avec des Quadrans les hauteurs du Soleil, & combien de distance il y auoit de chascun pays iusques à la ligne equinoctiale. Brief, ils estoient si bien fournis de ce qui est nécessaire pour la nauigation, que les pilotes de Portugal ne leur eussent sceu gueres apprendre de l'art de nauiguer. Or ce qui les faisoit ainsi deuiser ioyeusement avec les Portugallois, estoit qu'ils les prenoient pour Mahumetistes, & de la coste de Barbarie. Gama leur donna quelque chose, & les renuoya avec presens vers le gouuerneur de l'Isle, nommé Zacoeja, les priant de le saluer de la part de Gama: ce qu'ils firent, & apres que Zacoeja eust entēdu avec quelle douceur & humanité ils auoyent esté receus des Portugallois, & eust veu ce que Gama luy donnoit, il estima son deuoir estre d'aller vers ces estrangers. Et pourtant il se vestit d'une robe semée de fleurs d'or, ceignit vne espee dont la gaine estoit couuerte de pierres precieuses, & vn poignard de mesmes: puis acompagné d'une grande troupe d'hommes, se fit mener vers les nauires, au son des flustes & tabourins, dont la mer retentissoit. Gama sachāt ceste venue, auant que l'autre arriuaſt fit metre à part les malades, commāde à ceux qui estoient sains & dispos de s'armer & se tenir en la chambre haute de sa nauire. Car son opiniō estoit qu'il ne se faloit point fier aux Sarasins, mais dissimuler, & se donner sagemēt garde de leurs embusches & surpriues. Puis il approcha du tillac pour recevoir Zacoeja, lequel estant monté avec les siens salua Gama qui l'embrasse amiablement. Tous s'assēyent, & deuissent ioyeusement les vns avec les autres. On met les viandes sur table, & Gama fait verser du vin: eux mangerent en assez gaye contenance, & la superstition de Mahumet ne les empescha pas d'aualer volontiers plusieurs tasses de vin. Cela fait, Zacoeja demande aux Portugallois s'ils estoient Mores ou Turcs: tenant pour assuré qu'ils estoient Mahumetistes. Item de quelles armes ils s'aidoyent en guerre. Puis, s'ils auoyent point quelques liures de la loy de Mahumet, d'autant qu'il desiroit fort les voir. Gama respondit qu'ils estoient partis d'un pays des derniers de l'Occidēt, que leurs armes estoient celles dont estoient equippez les soldats qui l'environnoyent: & qu'outreplus ils se seruoyent de ces machines (luy monstrant

*Continuation
des voyages
de Gama.*

*Ce qu'il leur ad-
uint en l'Isle
de Mozambi-
que.*

*Sage amis de
Gama.*

l'artillerie) propres à rompre non seulement les armées d'hommes, mais aussi à mettre par terre les forteresses. Quant aux liures de leur loy, il promettoit les monstrer, après qu'ils se seroyent reposez quelques iours. Et puis que leur intention estoit d'aller en Inde, il prioit Zacoeja de luy donner quelques pilotes, par l'adresse desquels il peust arriuer à Calecut: & qu'ils reconoistroyent ce bien fait, en telle sorte que Zacoeja ne se repentiroit point de les auoir gratifiez en cela. Zacoeja promit de le faire, & le lendemain reuint voir Gama, amenât deux pilotes, avec lesquels Gama fit marché, moyennât certaine quantité d'or, qu'ils le meneroyent iusqu'à Calecut.

*Les Portugalois en nou-
ueau danger.*

DURANT ces allees & venues, & par presens des vns aux autres, la familiarité estoit deuenue si grande & ferme, qu'il n'y auoit pas apparence qu'aucun inconuenient deust suruenir pour la troubler. Mais il auint que Zacoeja descourrit que Gama & les siens estoient Chrestiens. Alors toute ceste amitié se tourna en haine tresaspre: & Zacoeja se mit à dresser embusches, machiner des meurtres, & inuenter tout ce qu'il fut possible, pour trouuer les moyens de surprendre les nauires, ou y mettre le feu. Ce pendant on ne fournissoit plus rien aux Portugallois que de mauuaise sorte, le pris des viures & marchandises haussioit d'heure à autre: d'auantage les Insulaires se mutinoyent & preparoyent pour courir sus aux Portugallois. Finalemēt, vn des pilotes amenez par Zacoeja descourrit à Gama les embusches que l'autre lui tendoit: & l'autre pilote estant descendu en terre s'estoit tellement caché qu'on ne l'auoit peu voir depuis. Sur ce il auint que quelques vns des nauires estās allez puiser de l'eau douce & couper du bois furent assaillis par sept barques: mais ils furent secourus par ceux des nauires, qui à coups de trait chasserent ces barques. Apres cela, les Portugallois se retirerent soudainement en vne isle qui estoit à deux lieues de là. Puis ils se mettent à la voile pour aller à Quiloa: mais à cause que le vent leur failloit, ils furent contrains d'anchrer, & sur ce se leua vne tempeste qui les rechaissa en l'Isle d'où ils estoient partis. Là se vint rendre à eux vn Arabe acompagné d'un sien petit fils, & supplia le Capitaine de les recevoir, afin de pouuoir arriuer en quelque haure commode pour s'en retourner à la Mecque son pays. Estant interrogué de quel estat il se mesloit, se dit estre pilote: au moyē de quoy on le receut volontiers, & Gama pēsoit bien qu'avec ses deux pilotes estrangers il poursuuiroit aisēmēt sa route. D'auantage, Paul de Gama auoit enleué, en vne esmeute de ceux de Mozambique contre les Portugallois, vn Insulaire qui sembloit estre expert à la navigation. Alors les Portugallois n'auoyent que trois vaisseaux: car le quatriesme qui portoit les viures, estant vuide fut brulé long temps deuant par le commandement du Capitaine. Or si tost que le vent propre se leua, ils leuent l'anchre & singlent vers Quiloa: mais les nauires n'y peurent surgir, ou pource que les vents estoient contraires, ou pource qu'ils n'auoyent pas bien suivi leur route, ou d'autant que le pilote de Mozambique, qui commença à leur brasser trahison, les auoit frauduleusement esgarez.

*Description
de l'Isle &
ville de Mon-*

AINSI donc, ce pilote leur conseilla d'aller à Mombaze: & pour le leur persuader tāt mieux, il faisoit acroire que la plus part de la ville estoit habitee

habitee de Chrestiens, qu'on ne sauroit trouuer lieu plus propre pour pen-
 ser les malades. En ce temps, vne bonne partie de ceux qui s'estoyent em-
 barquez avec le Capitaine Gama estoient morts de diuerses maladies: ceux
 qui estoient eschappez, à peine se pouuoient soustenir. Or ceste ville est
 assise sur vn haut rocher, dedans vn goulfe, où quand le reflux vient à don-
 ner dans l'emboucheure, les flots qui n'ont assez d'espace viennent reiaillir.
 au pied de la ville, puis au baisser font vn bras & ceignent les deux costez
 de la ville, qui est presque-Isle par ce moyé. Elle auoit au port vne forteref-
 se, munie d'armes, de traits, d'artillerie, où il y auoit forte garnison faisant
 guet nuit & iour. La terre est fertile en fruits, herbes potageres, grains, be-
 stail gros & menu, & en eaux douces. L'air y est fort temperé: & les habi-
 tans y vivent fort delicatement, bastissent à nostre mode, enduisent les pa-
 rois & les paignent de diuerses couleurs. Ce qui fit que les Portugallois al-
 lerent là prendre port, fut afin de s'y rafraischir quelques iours, & remettre
 en appetit les malades par le moyen des fruits nouueaux de l'Isle. A peine
 les matelots auoyent mouillé l'anchre, qu'ils apperçoyuēt vne grande bar-
 que approcher de la nauire Capitainesse, & portoit cent hommes habillez
 à la Turquesque, avec des cimenterres & pauois: entre lesquels y en auoit
 quatre plus richement vestus & de plus grande apparence que les autres.
 Ils vouloyent tous monter en la nauire, mais le Capitaine ne le permit qu'à
 ces quatre, & leur fit poser les armes. Quand ils furent dedās, ils louerent la
 sagesse du Capitaine qui ne laissoit point approcher en armes gēs à luy in-
 conus. Sur ce, Gama leur fit presenter la collation, eux beurent & mange-
 rent, & par beaucoup de signes d'amitié ils tascherent d'attirer les Portu-
 gallois: adioustans pour la fin de leur propos, que quelques iours aupara-
 uāt le Roy de Mombaze auoit esté auerti de leur venue, & desiroit fort les
 conoistre pour leur estre ami. Gama fit response plaine de tesmoignages
 de bonne volonte & sincere affection. Le lendemain vindrent quelques
 autres saluer le Capitaine de la part du Roy, avec quelques presens pro-
 pres pour conforter les soldats encor tous estourdis du branlement des va-
 gues: & dirent avec cela, que le pays estoit fort opulent, & rempli de tou-
 tes les espiceries & marchandises que plusieurs alloient querir es Indes.
 Que le Roy leur portoit si bonne amitié, qu'il ny auoit rien si malaisē qu'il
 ne promist faire, pour leur gratifier. Partant ils prioyent le Capitaine d'ap-
 procher plus pres de la ville, & entrer dedans le port, afin que le Roy qui
 desiroit le voir, en eust plus grande commodité. Ce que Gama promit fai-
 re, & pour les en asseurer comme avec ostages, il enuoya au Roy deux de
 ces bannis, dont a esté parlé ci deuant, auxquels le Roy fit fort bon visage,
 commandant à ses domestiques de leur faire voir l'assiette & les com-
 moditez de la ville. Apres s'estre bien pourmenez, le Roy leur fit monstrier
 diuerses sortes d'espiceries, qu'on a acoustumé d'apporter des Indes, & leur
 en donna quelque peu, afin de les monstrier à leur Capitaine, & luy persua-
 der qu'il feroit beaucoup mieux de trafiquer avec vn Roy son bon ami,
 qu'exposer sa vie à vne si perilleuse nauigation. Les bannis reuiennent avec
 ce mandement vers leur flotte, & Gama entendant leur rapport en fut si

baze, & de ce
 qui aduient
 aux Portuga-
 lois en icelle.

ioyeux, que le lédemain il fait leuer les anchres, afin d'amener les nauires en la rade de Mombaze. Or il auint que la sienne estant esleuee par l'impetuosité d'une maree beaucoup plus haut qu'il ne falloit, luy craignant qu'elle n'eschouast puis apres; en danger de s'ouuir, il commanda tout à l'heure que lon baillast les voiles, & auallast les anchres tant de la nauire que des autres. Ce qu'estant fait, les pilotes de Mozambique saisis d'une peur soudaine, se iettent en la mer, & gaignent à nage quelques almadies (sorte de petits bateaux) qui estoient près de là. Car voyans ietter les anchres ainsi en vn instant & contre leur opinion, ils penserent que la trahison estoit descouuerte: comme de fait les Portugallois sceurent incontinent pour certain que le Roy de Mombaze auoit accordé avec ces pilotes, par l'entremise de ses gens qui alloient & venoient es nauires, qu'ils ameneroient la flotte en tel lieu, qu'on pourroit mettre à fond ou se saisir aisemēt des nauires. Le Capitaine cria apres ceux qui estoient es almadies qu'ils eussent à luy enuoyer ses pilotes: eux au contraire se moquans de luy, les menerent à bord. Alois il conut tant par cela, que par quelque aduertissement que luy donna le pilote Arabe, & par plusieurs autres coniectures, de combien grand danger Dieu l'auoit garanti, & leua les mains au ciel en reconnoissant ceste deliurance. Apres cela, le Roy de Mombaze enuoya gens fort secretemēt en des almadies & esquifs pour couper de nuit les cables des anchres: ce qu'ils eussent fait sans l'industrie & vigilance du Capitaine & des siens, lesquels estoient au danger tout euidēt de leurs vies, s'ils n'eussent preuenu les embusches de ce traistre & meschant Roy.

*Descriptio du
Royaume &
de la ville de
Melinde: &
de ce que les
Portugallois y
firent.*

A v bout de deux iours ils partirent de là, & ne peurēt se desuelopper, 17
plustost, puis firent voile vers Melinde. En chemin ils prindrent vne nauire de Sarafins, dont Gama retint quatorze, & laissa aller les autres. Ayant entendu que l'un des quatorze qui auoit quelque grauité estoit pilote, l'interroqua loingneusement, à quoy l'autre, comme fort sage, respondit veritablement & d'esprit rassis, monstrant avec bonnes raisons la route qu'il falloit tenir. Comme la flotte vogueoit selon l'instruction de ce pilote, le iour de Pasques elle arriua à Melinde. La ville est situee en vne platte campagne, enuironnée de toutes parts de plusieurs beaux iardins. Il y a grande abondance d'arbres, specialement des citrons, qui ont vne odeur fort souueue. Le pays est fertile & gras, abondant en bestail, & en toutes sortes de sauuagine & de volaille domestique & de chasse. Les maisons sont basties de pierres esquarries, enduites, planchees & lambrissees de gentille façon. Le peuple adore certaines idoles qui lui sont particulieres. Ce sont gens noirs, ayans les cheueux crespus, au reste habillez assez proprement. Ils portent à l'en-tour de leurs testes des turbans de lin, & ont la moitié du corps nud, a-fauoir depuis le nombril en haut. De là iusqu'au genouil ils se couurent de drap de soye ou de cotton. Leur armes sont des espees ou glauiues pointus, des boucliers, picques, arcs & fleches: & s'estiment merueilleusemēt propres à la guerre. Le havre n'est pas près de la ville: car la coste d'icelle est ceinte de rochers, & fort suiette aux orages & tempestes, ce qui cōtraignit le Capitaine Gama de mouiller l'anchre vn peu loin de la ville. Or le Sara-fin,

fin, qui auoit esté prins au partir de Mombaze, entendât que Gama se des-
fioit du Roy de Melinde, à cause du tour que celui de Mombaze lui auoit
ioué, il l'exhorta de l'enuoyer à Melinde pour descouurir l'intentiõ du Roy.
Il adioustoit à cela qu'il y auoit au port quatre carauelles Indoïses, dont
les passagers estoÿent Chrestiens, du nombre de ceux qui habitent en Inde,
qui (peut estre) ayant donné ordre à leurs affaires, se preparoyent pour re-
tourner : & que si lon pouuoit faire voile avec eux, la nauigation en seroit
beaucoup plus aisee. Combien que Gama ne se hâst pas en ce Sarasin, tou-
tesfois considerât qu'il n'y auroit pas de mal d'essayer à gagner beaucoup
en perdant peu, il fait descharger ce Sarasin en vne Islette vis à vis de la vil-
le, d'où luy fut incontinent enuoyee vne almadie pour l'amener au Roy,
auquel il fit vn discours à la louange de la courtoisie, fidelité & bonnes
mœurs des Portugallois, le Capitaine desquels desiroit fort auoir amitié a-
uec luy & autres Roys & Seigneurs : & que cela proufiteroit beaucoup au
Roy & à tout le royaume de Melinde de cõtracter alliance avec ces estrã-
gers. Le Roy estoit fort vieil, au demeurant de douce & benigne nature. Il
enuoya donc quelques siens domestiques pour saluer Gama en son nom,
& luy porter des presens necessaires, a sauoir des moutons & diuerfes sortes
de fruits bons à manger. Le Capitaine Gama, qui en toute sa vie à esté tel-
lemēt jaloux de sa liberalité, qu'il ne pouuoit souffrir qu'un autre le surmõ-
tast en cela, fit present aussi au Roy d'autres dõs. Puis il fit approcher la flot-
te plus pres de terre, & enuoya querir les Chrestiens Indiens, qui furent
ioyeux à merueille de voir les Portugallois, & les aduertirent de plusieurs
choses concernant leur vie & la seureté de leur nauigation.

LE Roy desiroit grandement voir les nauires, mais cela luy fut impos-
sible à cause de sa maladie & extreme vieillesse. Son fils, qui manioit desia
toutes les affaires du Royaume, vint aux nauires, suivi d'un grand nombre
de gentils-hommes. Il estoit vestu à la royale, assez proprement : & auoit
en sa troupe force haubois, fifres & tabours qui faisoient tout retentir.
Gama le voulant receuoir plus honorablement se mit en vu esquif : mais
le prince estant aupres n'eut la patience de mōter, ains à l'approcher, se lan-
ça dedans d'un plain saut, & embrassa le Capitaine aussi estroitement que
s'ils eussent esté amis & familiers de long temps. Puis ils assirent & deu-
serent ioyeusement : le Prince monstrant en ses propos qu'il ne sentoit point
son barbare, ains descouuroit vn esprit gentil, rassis & digne du rang qu'il
tenoit. Au reste il regardoit Gama par grand esbahissement, & conside-
roit la forme & composition des nauires. Lors Gama luy fit present de tous
les Sarasins qu'il auoit pris au depart de Mombaze, dont le Prince monstra
signe d'estre merueilleusement content, pria bien fort Gama de venir voir
son pere, & qu'il lairroit pour ostages les propres enfans qui demeure-
roient es nauires. Le Capitaine fit ses excuses : à raison de quoy le Prince re-
quit qu'au moins il luy permist d'emmener deux autres de la flotte : ce qui
luy fut aisément accordé. Le lendemain Gama porté dans vn esquif appro-
cha plus pres de la ville, pour en considerer l'assiette & la beauté, où de re-
chef il fut visité par le Prince, qui n'oublia aucun tesmoignage & signe d'a-

mitié pour assurer les Portugallois de l'affection qu'il auoit de leur faire plaisir. Finalement il leur dōna vn fort bon Pilote, natif de ceste partie des Indes qui est arrousee du fleue Indus: & se fit promettre par le Capitaine qu'il passeroit par Melinde à son retour de Calecut, d'autr que luy vouloit enuoyer vne ambassade en Portugal, pour ratifier par vne sainte alliance l'amitié ferme avec le Roy Emmanuel.

*Poursuire de
la nauigation de
Gama iusques
à son arriuee
en Calecut.*

GAMA partit de Melinde le vingtdeuxiesme iour d'Auril. Or com- 18
bien qu'ils tinssent leur route à l'Est, toutesfois ils gauchissoient au Nord. En peu de iours ils passerent les pays qui sont sous l'Equateur, & derechef virent à grand ioye les estoilles du Nord, lesquelles ils auoyent perdues de veue, tout le temps de leur route vers le Pole Antarctique. Ainsi donc ils contemplerent la grande & petite Ourse & les autres estoilles qui tournent autour du Pole Arctique. Depuis ils voguerēt tousiours avec yents si propres qu'ils trauerserent sans falcher ietoute ceste grande campagne de l'Océan qui laue vers le Septentrion les costes d'une grand' part de l'Ethiopie, Arabie & Caramanie. Finalement, le vingtiesme iour de May ils descouurent vne terre esleuee & fort haute, laquelle le Pilote ne sceut conoistre, à cause du brouillaz qui entreuint incontinent. Mais le deuxiesme iour suivant il vid les montagnes prochaines de Calecut: & lors il acourut vers le Capitaine, demandāt vn present pour si bonnes nouuelles. Gama lui donna vne bonne somme d'argent, puis rendit graces à Dieu, fit deschainer & deliurer les prisonniers, & le monstra fort ioyeux, comme ayant recueilli les fruits de tous les trauaux supportez en si longue & perilleuse nauigation. Ce mesme iour, la flotte alla surgir en vn port à vne lieue pres de Calecut. Incontinent force Almadies vindrent voir que c'estoit: & s'interroguent les vns les autres. Premierement Gama leur fit demander par son trucheman, en quel lieu le Roy estoit lors. Puis il enuoya vn des bannis en la ville. A peine ce banni estoit descendu en terre, qu'une miliaisse de gens l'enuiroune, pour voir vne homme d'autre sorte & autrement vestu que ceux du pays, & l'interroge d'où il venoit, de quel pays il estoit, ce qu'il cherchoit, & quelle tempeste l'auoit poussé là. Mais il ne les entendoit aucunement, ni eux luy. Or ceste multitude le pressoit tellement qu'il estoit poussé tantost d'un costé, tantost d'un autre, comme vn vaisseau agité des flots de la mer: tant qu'à la fin, comme Dieu voulut, il rencōtra deux Marchans natifs de Thunes en Barbarie. Eux conoissans à l'habit que cest homme estoit Espagnol furent fort estonnez. L'un d'eux, nommé Monzaida, luy demande en langue Espagnole, de quel quartier d'Espagne il estoit: de Portugal, respondit-il. Ce qu'entendu, Monzaida le mene en sa maison, luy donne à boire & à manger, disant qu'il auoit eu grande accointance avec les Portugallois du temps que le Roy Ieā enuoyoit ses nauires à Thunes pour en apporter ce qui estoit necessaire pour fournir son arsenal, & qu'il estoit fidelement employé en cela: le priant au reste de le mener vers le Capitaine. Sur ce, ils s'en vōt de compagnie vers les nauires, où Monzaida fait la biēvenue au Capitaine Gama, & parle Espagnol: Gama aussi luy fait fort gracieux acueil. Et apres auoir communiqué quelque temps ensemble, il aduertit

aduertit Gama de plusieurs choses, & respondit tellement à toutes ses demandes, que lon voyoit bié que c'estoit vn hōme sage, & qui auoit l'oreille aux escoutes. Finalement il offrit son seruice au Capitaine, promettant de faire bon deuoir. Dauantage il asseura que l'arriuee des Portugallois seroit agreable au Roy de Calecut, qui estoit fort ioyeux que les estrangers vinsent trafiquer là: car encores qu'il eust vn pays de grande estendue, & que plusieurs Roys fussent ses vassaux: toutesfois son plus cler reuenu procedoit des ports & peages.

Le lendemain Gama enuoya deux de sa suite avec Monzaida vers le Roy, qui lors estoit en vne ville nommee Pandarane à vne lieue de Calecut. Audience leur estant donnee ils dirēt que le Roy de Portugal ayant ouy la renōmee de la dignité & grādeur de celuy de Calecut, auoit enuoyé là vn de ses Capitaines, pour traiter alliance perpetuelle avec luy, & promettre qu'en faueur du Roy de Calecut il feroit volontiers tout ce qui luy seroit possible. *Que* le Capitaine supplioit le Roy luy permettre de l'aller trouuer. Le Roy fit response, qu'il estoit ioyeux de la venue du Capitaine, & qu'il ne vouloit pas estre tel de refuser l'amitié qu'un tant illustre Roy, cōme estoit celuy de Portugal, luy presentoit: qu'il donneroit ordre qu'en brief le Capitaine pourroit parler à luy. Cependant il l'admonnestoit de faire venir la flotte vers Pandarane, d'autant que la rade, où elle auoit ietté l'anchre, estoit fort perilleuse en ceste saison de l'annee. Et afin que cela se peust faire plus commodement, il enuoya au Capitaine vn pilote fort expert en ceste mer là. Quelques iours apres vn homme de grande apparence, que ceux du pays appellent le Catoual, lequel est Iuge de Calecut, vint trouuer le Capitaine pour le mener en grand pompe vers le Roy, qui luy auoit commandé de ce faire. Gama établit son frere Paul general des nauires, luy commandant, & à Nicolas Coeillo, que s'il luy auenoit autre chose qu'à point, ils nes'en souciaissent autrement, ains se remissent à la voile, pour retourner faire leur rapport au Roy Emmanuel de ce qui auoit esté descouuert en leur voyage. *Que* ce n'estoit pas raison qu'en le voulant secourir ils se fissent tous tuer, & que le fruit d'un si long trauail se perdist: quant à luy, s'il vouloit s'acquitter de ce dont son Roy l'auoit enchargé, c'estoit force qu'il parlât à celui de Calecut. *Qu'il* ne se soucioit pas de perir, moyennāt que sa mort peust apporter quelque proufit & contētement au Roy & au royaume de Portugal. Mais afin que les nauires ne demeurassent destituees de soldats, il n'en mena que douze avec soy. Si tost qu'il fut en terre, le Catoual le fit leuer sur vne liētiere à bras, & le Catoual estoit en vne autre: tous ceux de leur suite marchoyent à pied: & estoient enuironnez d'un grand nombre de gentils hommes, qu'ils appellent Naires. Estans venus en la ville, & apres auoir assez bien dīné, ils entrent en des almadies, & furent conduits doucement iusques en vn lieu, où vne grande troupe de valets les attendoit avec d'autres liētières.

De là le Catoual cōduisit le Capitaine & ses douze soldats en vn temple estimé tressaint par ceux du pays: & Gama, qui auoit ouy dire que plusieurs Chrestiens habitoient en ces quartiers, estimoit que ce fust vn tel

Le Roy de Portugal reuerche l'alliance & l'amitié de celui de Calecut.

Catoual, Iuge de Calecut.

Naires gēds hōmes de Calecut.

Temples de ceux de Calecut & leurs ceremonies.

temple que ceux de Portugal : ce qu'il creut encor dauantage voyant la grandeur & magnificence de ce temple, & plusieurs choses qui de prime face sembloient auoir quelque conuenance avec ceux de l'Eglise Romaine. A l'entree ils rencontrent quatre hommes nuds depuis le nombril en haut, & couuerts de là iusques aux genoux d'une piece de cotton. Chascun d'eux portoit trois filets en escharpe, pliez sous le bras gauche, & nouez sur l'espaule droite. Ils arrousent les Portugallois d'eau benite : & baillent à chascun d'iceux de la pouldre de bois de bonne senteur, pour en marquer leurs fronts. Es parois du temple on voyoit plusieurs images peintes : & au milieu d'iceluy estoit vne chapelle haut esleuee, ronde, en laquelle on montoit par plusieurs degrez. La porte estoit d'airain & fort estroite. Au fond de ceste chapelle y auoit vne image : mais les Portugallois ne sceurent discerner de quelle sorte, à cause que le lieu estoit si obscur, & le Soleil y battoit si peu, qu'à peine y entroit-il vn seul rayon de lumiere. On ne voulut nullemēt permettre aux Portugallois d'y entrer : cela n'appartenoit qu'aux Prestres & marguilliers. Ces quatre susmentionnez entrerent assez auant, & monstrans l'image avec le doigt crierēt deux fois, Marie. Le Catoual & tous ceux de la suite se prosternerent soudain contre terre, les mains estendues : puis s'estans releuez font leurs deuotions à la mode du pays. Les Portugallois estimans que ces hommes inuouassent la vierge Marie, se mirēt à genoux, se recommanderent à Dieu, & à la vierge mere de Dieu, selon la coustume de Portugal. Au sortir de là ils entrerent en vn autre temple aussi magnifique, & finalement prennēt le chemin pour aller au palais du Roy. Au reste, il y auoit tant de gens autour d'eux, que sans les Naires, qui marchoyēt deuant & derriere, les espees nues au poing, Gama & les siens n'eussent peu entrer au palais. Cependant tout retentissoit du son des haubois & trompettes.

*Gama intro-
duit au palais
de Calicut, &
parle au Roy.*

ESTANS paruenus à l'entree du palais, quelques seigneurs, qu'ils appellent Caimaes sortirent au deuant de Gama, lequel ils menerent iusqu'à la porte de la salle où le Roy l'attendoit, & lors sortit vn vieillard couuert d'une longue robe de cottō depuis les espaules iusques aux talons, lequel embrassa le Capitaine. Cestoit le grand Brachmane, ou grand Pontife entre eux, lequel a merueilleux credit enuers le Roy. Apres que tous les autres furent entrez les premiers, iceluy entra le dernier, tenāt le Capitaine par la main droite. La salle estoit assez grāde, ayant plusieurs chaires de bois fort artistement elaborees, & attachees tellement aux parois, que les vnes estoient dressees & esleuees sur les autres en forme de theatre. Le plancher estoit couuert de draps de soye : & les parois cachees de tapisserie de soye recamee de fil dor. Le Roy estoit couché sur vn liēt fort magnifiquement paré, & portoit en teste vn bonnet de soye broché d'or & de pierres precieuses, vestu d'une robe de soye qui le ferroit par deuant avec plusieurs agrafes d'or. Il portoit à ses oreilles des perles d'un pris inestimable. On voyoit sortir vne grande clarté des pierres precieuses qu'il portoit es mains & aux pieds. Il estoit grand, ayant vne face liberale, & qui representoit la maiesté d'un Roy. Gama le salua cōme ont acoustumé de faire ceux de

Portugal leurs Roys. Luy le fit approcher, & luy comanda de s'asseoir af-
 fez pres : & voulut aussi que les autres Portugallois s'asseissent. Puis il fit
 aussi apporter de l'eau pour lauer & rafraischir les mains, avec diuerses sor-
 tes de fruits pour cōforter ces estrangers encorés tout recrus du trauail de
 la marine. Finalement il s'enquit soigneusement de la charge que Gama
 auoit du Roy de Portugal, dont Gama ne voulut rien dire s'excusant sur la
 façon de faire de son pays, où la coustume estoit de ne declarer le mande-
 mēt de son Roy à d'autres Roys, en presence de beaucoup d'hōmes. Partāt
 le supplioit de donner congé à ceux qui estoient en la salle, s'il vouloit en-
 tendre ce qu'il auoit à luy dire, & luy prestast audience en presence seule-
 mēt de ses plus secrets conseillers. Le Roy s'accōmodant à sa requeste, le fit
 retirer en vne autre salle parée beaucoup plus richemēt, & le suivit incōti-
 nent avec le grand Brachmane, & petit nombre d'autres. Lors Gama fit sa
 harangue, dont le sommaire fut : Que Emmanuel Roy de Portugal estoit
 vn Prince magnanime, magnifique, desirieux de choses grādes, & qui auoit
 vne singuliere affection en la conoissance de plusieurs choses. Que ce à
 quoy il pensoit le plus estoit d'estre ioint par alliance avec les Roys puis-
 sants & illustres : d'autāt qu'il n'y auoit chose plus propre pour vnir les cœurs,
 que la conformité en vertu : & que cela se monstroit d'vne façon singu-
 liere es Roys, dont la grandeur approchoit le plus pres en ce monde de la
 maiesté diuine. Pourtant qu'apres auoir oui parler souuentefois de la grā-
 deur de l'Inde, & entendu par la renommee volant par tout le monde, au
 grand esbahissēmēt de chascun, que le royaume de Calecut estoit de tref-
 grāde estendue, que le Roy d'iceluy estoit trespouissant en richesses, en peu-
 ples, & de grande autorité par dessus tous autres Rois, il auoit eu vn grand
 desir d'estre de ses amis. Et sur ce auoit enuoyé ceste ambassade, pour prier
 en son nom le Roy de Calecut d'estimer tant l'alliance & l'amitié du
 Roy de Portugal, comme il se deuoit asseurer de la volonté d'iceluy, s'il le
 mettoit au rang de ses amis. Gama adioustoit qu'outre la dignité de ceste
 alliance il s'asseuroit que les deux royaumes en seroyent beaucoup accom-
 modez : & qu'il auoit des lettres d'Emmanuel pour preuue que tout ce
 qu'il mettoit en auant estoit trefveritable. Le Roy dit en peu de mots, que
 celuy estoit chose agreable d'auoir conoissance avec vn si excellent Prin-
 ce, & qu'il feroit volontiers tout ce qui seroit possible pour faire paroistre
 qu'il vouloit tenir Emmanuel comme son propre frere. Apres auoir fait
 ceste responce, il commanda au Catoual d'emmener promptement Gama
 au logis qui luy estoit preparé, & les autres es hoiſtelleries. Gama demeura
 trois iours en son logis, sans en bouger. Mais auant que d'escrire ce qui a-
 uint puis apres : il ne viendra pas mal à propos de dire quelque chose de la
 situation de ce pays là, item des coustumes & de la maniere de viure des
 habitans.

*Harangue de
 Gama au Roy
 de Calecut.*

*Responce du
 Roy de Cale-
 cut.*

FIN DV PREMIER LIVRE.

D. iij.



LE SECOND LIVRE.

SOMMAIRE.

1. *Briefue description des Indes Orientales, & la commodité du royaume de Calcut.*
2. *La Religion des Malabares ou Calcutiens.*
3. *Alimens & costumes diverses des Calcutiens & autres peuples voisins.*
4. *Présens de Gama au Roy de Calcut, & commencement de machinations contre les Portugalois.*
5. *Harangue des Arabes au Roy de Calcut contre Gama & les siens.*
6. *Commencement de querelle entre le Roy de Calcut & Gama.*
7. *Départ de la flotte de Portugal arriere de Calcut & lettres du Capitaine au Roy.*
8. *Arrivée de la flotte près de l'Isle de Goa, & ce qui s'en ensuivit.*
9. *Passage en Melinde, Zamzibar & Mozambique: & retour de Gama en Portugal.*
10. *Nouvelle flotte de treize navires envoyées en Calcut sous la charge de Pierre Alvaro Capral.*
11. *Mort du Prince Michel, & nouveau mariage d'Emmanuel. Item le secours par luy accordé aux Vénitiens contre le Turc.*
12. *Rencontres & divers accidens des Portugalois contre les Mores en Afrique.*
13. *Secours de Portugal envoyé aux Vénitiens, & ce qui en arriva.*
14. *Navigations de Capral pour aller en Calcut, & comme il fut chassé en la terre du Bresil.*
15. *Description de la terre du Bresil, de la maniere de vivre des habitans, & de leurs facons en temps de paix & de guerre.*
16. *Continuation de la navigation de Capral, son arrivée en Quiloa, Melinde & Calcut.*
17. *Negotiation de Capral avec le Roy de Calcut.*
18. *Combats d'un petit vaisseau de Portugal contre une grande navire venant de Cochim.*
19. *Murmures, calomnies, & sédition des Arabes contre les Portugalois, & ce qui s'en ensuivit de part & d'autre.*
20. *Navigation de Capral en Cochim & en Cananor, & son retour en Portugal.*
21. *Second voyage de l'Asse de Gama es Indes Orientales.*
22. *Navigation de Jean Nouvo.*
23. *Deportement d'Emmanuel, & état de Portugal.*
24. *Navigation de Gaspar Cortereal en Septentrion, & ce qui s'en ensuivit.*
25. *Continuation du second voyage de Gama, & ce qu'il fit en Quiloa.*
26. *Commencement de guerre contre le Roy de Calcut.*
27. *Diverses menées du Roy de Calcut pour attraper les Portugalois.*
28. *Alliances de Gama avec les Roys de Cochim & Cananor: & son retour en Portugal.*
29. *Guerres & divers accidens des Portugalois contre les Mores en Afrique.*

Briefue description des Indes Orientales.

1500.



O v s appellons Inde, tout le pays qui a pour confins vers l'Occident les limites des Paropamisadars, d'Arachosie & Gedrosie: vers Orient touche les frontieres du royaume de la China. Au Septentrion il a pour bornes le mont Imaüs qui fait vne partie de Caucase: & au Midi est clos de l'Ocean Indois. Neantmoins, on diuise l'Inde en deux parties. L'une de la le Gange, & s'estend iusques à la China. L'autre est dedans le Gange, c'est à dire, commence aux frontieres d'Arachosie & Gedrosie à l'Occident, & finit au fleuve du Gâge. Toutes fois nous ne prenons pas tousiours ce mot si au large: car nous appellons Inde le pays qui est enclos de deux grandes riuieres, Indus & le Gange. Les habitans appellent ce pays Indostan. Le fleuve Indus coule d'Occident,

cident, & le Gange d'Orient, & tous deux ont leur source en Imaüs, par vne esgale distance du Septentrion. De là ils deualent de viffesse, & apres plusieurs tours & retours dont ils tranchent plusieurs Prouinces, croiffent par le flus de grand nombre de ruisseaux & petites riuieres qui entrêt & se perdent dedans, en telle sorte qu'en approchant de la mer, ils portent de grands vaisseaux, à cause de la profondeur de leur canal. En se deschargeât en la mer Oceane, chacun fleuve fait vn goulse fort grand. La terre s'estend en longueur fort auant vers le Midi, en telle sorte que quelques fois elle s'estroissit, par fois se met vn peu plus au large: puis vient finir au Cap que les Indiens appellent Comori, qui fait vne pointe aigue. Or tout ce pays depuis la bouche du fleuve Indus iusques à ce Cap de Comori a de longueur enuiron neuf cens mille pas, qui font quatre cens cinquante lieues frâçoises. La largeur entre les deux fleuves susnomez est d'enuiron trois cens cinquante lieues, mais elle se restraint & acourcit peu à peu. Ceste pointe du Cap Comorj qui regarde le Midi, est eslongnee de l'Equateur d'environ sept degrez qui moultent enuiron cent dix huit lieues. Les villes & places qui sont à la coste de l'Ocean Oriental & Occidental, sont habitees de diuerfes nations. Toutesfois du temps que Gama & les siens arriuerent en Calecut & autres endroits qui regardent l'Occident, la pluspart estoit habitee par les peuples qu'ils appellent Malabares. Et y auoit plusieurs Roytelets qui reconnoissoient presques tous le Roy de Calecut pour souuerain, & luy estoient tributaires. Cependant le plur cler & riche reuient de ce Roy procedoit des ports & peages: car lors Calecut estoit le plus renommé port des Indes Orientales, où les marchans arriuoient de toutes parts. Aussi le pays abondoit en espiceries & marchandises qui se recueilloient en partie sur iceluy, & en partie estoient apportees d'ailleurs.

2 CE peuple est miserablement superstitieux & idolatre. Ils ont force temples, & portent fort grand honneur à leurs Prestres, qu'ils appellent Brachmanes ou Bramins, qu'ils estiment estre entendus en la science des choses diuines & humaines. On n'eslit point de Roys que ces Prestres n'ayent esleué & enseigné. En temps de guerre ils peuuent aller seurement par tout: car ce seroit, à leur iugement, le plus grand crime du monde, de toucher ces Prestres autrement que ne porte l'opinion qu'on a de leur sainteté. Ils portent trois filets pendans de l'espaule droite sur le costé gauche; pour représenter la trinité des personnes en vne seule nature diuine. Ils croient que Dieu couuert de la forme humaine a conuersé au monde, afin de racheter le genre humain de la mort eternelle. Il est vray semblable qu'ils ont aprins cela des anciens Chrestiens. Ils font profession des Mathematiques & de la Philosophie. Au demeurant, ce sont grands hypocrites, qui sous apparence de sainteté commettent de grandes meschancetez en toute leur vie. Les autres Malabares, enseignez par ces Prestres, adorent des môstres. Tous les ans le vingtdeuxiesme iour d'Aoust, il se fait vne feste solennelle, où les ieunes garçons tirent avec des arcs des fleches fort legeres contre leurs compagnons. Ceux qui sont de plus grand aage, tirét aussi de l'arc, dont plusieurs sont griefuement blesez & meurent. Les autres pensent

*Religion des
Malabares ou
Calecutiens.*

que celui qui meurt ainsi est bien-heureux: car ils tiennent qu'ils s'en est allé au ciel pour viure avec les dieux. Ils sont force anniuersaires, esquels aucuns se font mourir en diuerses sortes, deuant vne grand' troupe, qui les regarde. Ils commencent l'année au mois de Septēbre, mais ils n'ont point de iour certain pour le commencement du mois. La premiere chose qu'ils font en cela, c'est de demander auis aux Astrologues & Augures, & ils cōmencent l'an à l'heure que ces deuins prognostiqueront deuoir estre heureuse & de benin aspect. Ceux qui ont passé quinze ans, voient leur visage ce iour là, & cachent leurs yeux pour ne rien voir. Puis les petis enfans les meinent es temples, où il y a diuerses images des dieux. Lors on les demasque, & tout soudain ils iettent la veue sur ce qui est à vis d'eux. S'ils fichent les yeux du premier coup sur l'image de celui qui est leur patron, ils s'asseurent d'auoir bonne auenture toute l'année.

Privileges & estranges & infames de la noblesse de Castille.

Il est defendu aux gentils-hommes de se marier, afin que rien ne les empesche de s'exercer continuellement aux armes. Mais vn chascun à plusieurs damoiselles à son commandemēt: & estime-on qu'ils ayēt commis vn crime horrible entre les autres, s'ils ont la cōpagnie d'une femme qui ne soit point damoiselle. Ces damoiselles ont aussi autāt de rufiens qu'il leur plait, pourueu que ce soyēt Naires, c'est à dire, gentils-hommes. Les vns ne sont point ialoux des autres, ains suiuent quelque ordre en leurs desordres & ordures. Si vn Naire paillarde avec vne roturiere, ses compagnons le hachēt en pieces. Les femmes nobles aussi qui ont affaire avec autres que Naires sont traittes de mesme. En leurs testamens ils n'instituēt point heritiers leurs fils: d'autant qu'ils ignorent s'ils sont engendrez d'eux: mais ils adoptent les fils de leurs sœurs. Le Roy, donne gages à ces Naires, qui s'exposent sans crainte à tout danger pour son estat. Ils cheminent nuds depuis le nōbril en haut: depuis là iusques au gras des iambes ils sont couuerts de quelques vestemens. Ils ne peuuent s'aider d'armes en guerre, que premieremēt ils n'ayent fait serment au Roy qui leur donne quelques ornemēs militaires. Des leur enfance ils aprenent à manier les armes, & portent grand' honneur aux maistres qui les ont façonnez à cela. Ils sont vaillants & dispos. Si quelque roturier les touche, ils estiment que cela souille leur noblesse: & ne trouuent meilleur expedient de venger ceste grande iniure, que de tuer ces miserables qui se sont approchez vn peu trop pres d'eux. Voila pourquoy, quand ceux qui ne sont pas nobles marchent çà ou là, ils sont contrains de crier à haute voix, cōme pour dire qu'ils sont en chemin. Quand les Naires entendēt à ces cris que les autres s'approchent, ils leur commandent de se tirer à quartier, & par ce moyen les ignobles eurent la mort, & les nobles l'ignominie perpetuelle. En ce lieu la noblesse ne s'obscurcit pour meschanceté que le noble commette, & ne faut pas qu'un roturier pense iamais estre autre, fust-il le plus sage & vertueux de tous les hommes du monde: il faut necessairement que chacun demeure en la condition en laquelle ont esté ses predecesseurs. Les mestiers sont tellement distinguez, que ceux de l'un ne peuuent marier leurs filles à ceux de l'autre. Comme pour exemple les fils d'un cousturier ne peuuent espouser les filles d'un cordonnier,

dounier, ni apprendre autre mestier que celui de leur pere: & font de mesme es autres mestiers par vne coustume obseruee entre eux de tout temps. Ils font vne sorte de vœu en s'alliant quelquesfois les vns avec les autres, & vsent de certaines imprecations, que si l'un d'eux est tué en quelque querelle, tous les autres se feront hacher en pieces ou vengeront sa mort. Cela fait que quand le moindre de leurs compagnons est occis, les survivans sans se soucier de leur vie se iettent au trauers des espees nues, courent par dedans les feux, & se fourrent au milieu d'un millier d'hommes armez, pour saccager ceux qui ont tué leur compagnon, & ne cessent de les poursuivre, iusques à ce qu'ils les ayent mis à mort, ou qu'euxmesmes demeurent estendus sur la place.

EN escriuant-ils ne se seruent de papier ni de parchemin, mais marquent avec un poinçon leurs lettres sur des fueilles d'arbres sauages, qu'ils appellent palmiers, à cause que ces arbres se ressemblent. Or ils ont des liures fort anciens, escripts en ces fueilles. Et couppent vne grande quantité de ces fueilles, en telle sorte qu'elles sont d'une mesme longueur, où ils escriuent leurs Annales & histoires memorables: puis ils percēt ces fueilles par les costez, & aplanissent deux couuercles de bois qu'ils attachent assez proprement à ces fueilles. Alors ils mettent les fueilles par ordre, meslās quelques perits aix, par dedans, les ioignent ensemble avec des petites cordelettes qui serrent cela estroitement: & quand le liure est complet, ce qui reste de ces cordelettes est entortillé & estraint de plusieurs nœuds au log du dos de ce liure. Lon pourroit discourir plus amplement sur les mœurs de ces peuples: mais nous les obmettrons pour le present, afin de reprēdre le fil de nostre histoire.

Maniere d'écriture & relier liures en Calecut.

C A L E C U T est presque au milieu de ceste coste que nous auons descrite cy dessus, qui a le cap de Comori, & n'est pas loin de la mer. Le havre où les nauires sont à couuert n'est pas ioint à la ville. Ceste ville est grande: les maisons ne s'entretouchent pas, ains sont eslongnees les vnes des autres, & ont des iardins & beaux vergers entre-deux. Il n'y a que le Palais du Roy qui soit basti de pierre: les loix defendent aux autres personnes de bastir magnifiquement, tant grands seigneurs puissent-ils estre. Le pays est fertile, abondāt en toutes choses requises pour la vie humaine. En cetemps, le Roy de Calecut estoit le plus riche & puissant entre tous les Roys de ce pays: & tel estoit l'estat de Calecut, lors que les Portugallois y arriuerent.

Situation & commoditez de la ville de Calecut.

- 4 A v bour de trois iours, le Catoual conduisit Gama vers le Roy, auquel il presenta ses lettres avec quelques presens, dont le Roy ne tint pas grand compte: à cause dequoy Gama dit, qu'il ne se falloit esbahir si la maiesté Royale n'auoit receu des presens dignes d'elle; pour autant qu'Emmanuel ne sauoit pas bonnement que ceste nauigation deust si bien succeder. D'auantage, qu'il n'auoit peu lors luy faire present plus riche que l'amitié du Roy de Portugal. Quant au prouffit, il le prioit de considerer quel gain luy reuiendroit, si tous les ans arriuoient en son havre de grands vaisseaux de Portugal chargez de precieuses marchandises. En apres, il le supplia de ne

communiquer aux Sarasins les lettres d'Emmanuel, mais se seruir d'autres truchemans. Car il auoit ia entendu de Monzaida qu'ils luy brassoyent quelque ineschanceté. Apres que les lettres eurent esté leuës & expliquées par Monzaida, le Roy donna congé à Gama, l'admōnestant de se donner soigneusement garde des embusches des Sarasins. Gama le remercia fort humblement de ce conseil, & s'en retourna chez soy, avec resolution de se retirer es nauires au plustost qu'il luy seroit possible. Ce pendant, les Sarasins commencent à parlementer ensemble, complotter contre les Portugallois, aller & venir vers les mignons & domestiques du Roy, les importuner par prieres, les corrompre par presens, & supplier de faire que le Roy ne se laissast trôper par ces meschans. Que Gama estoit vn cruel coursaire, & qu'en toutes les costes de mer où il auoit mis le pied, il y auoit laissé les traces de ses brigādages: & que sous pretexte de trafiquer il estoit venu descouvrir le pays, afin d'y faire puis apres tout le mal qui seroit possible. Que ceci estoit vn petit feu, sur lequel si on ne verfoit bien tost de l'eau pour l'estaindre, il pourroit embraser tout le royaume. Ils battoyēt les oreilles du Roy de tels discours & autres semblables. Car en partie la haine qu'ils portoyent aux Chrestiens, en partie la crainte qu'ils auoyēt d'estre chassez de ces pays à la venue des Portugallois, ou de n'y faire pas si bien leurs besongns comme auparauant, leur faisoit essayer tous moyens pour exterminer leurs ennemis. Aussi attiroyent-ils à eux par presens le Catoual, afin que par faux rapports & autres artifices il ruinaist les Portugallois. Le Roy qui estoit d'un esprit variable & inconstant, tournoit tantost d'un costé, quelquesfois de l'autre. Car s'il faisoit tuer Gama & les siens, ou qu'il les fist emprisonner pour contenter aucunemēt les Sarasins, il craignoit d'estre reputé traistre: & s'il les laissoit aller, il preuoyoit que ces Arabes qui augmentoyent par leur trafic ses ports & peages, s'estrangeroyent de luy. Eux d'autre part, pour ne laisser rien en arriere, s'assembler en bon nôbre, vont trouuer le Roy, auquel le plus hardi & le mieux disant d'entre eux fit (comme plusieurs disent) la harangue qui s'ensuit.

*Harangue au
Roy de Calcut
contre Gama
& les siens.*

S I R E, nous nous sommes môstrez si fideles à vostre seruice, que nous 5.
deuons obtenir paisible audiance de vostre maiesté. Car l'acroiſt de vos
peages par nostre trafic & trauail est si euident, qu'il n'est aucunement be-
soin d'en faire mētiō. Demandez-en à vos Peagers: interrogez les Con-
troleurs: faites examiner leurs liures, & vous conoistrez que nous n'auons
ian̄ais porté dommage à vostre royaume. Ioint que nos predecesseurs
nous ont monstré ce chemin: car il y a long temps qu'ils ont hanté ce pays
comme si c'eust esté le lieu de leur naissance, & ont tousiours grandement
respecté & honoré les Roys de Calcut. Or ces bannis & desesperés, qui
depuis quelques iours sont en vostre havre, feront tant par leurs menees, si
vous ne preueniez leurs complots, qu'ils desnoueront & aboliront du tout
cette amitié tant estroite que nous auons de si long temps avec vos suiets.
Si vous ne vous en doutez pas encores, ce n'est pas de merueilles. Car vn
cœur vrayement royal, iuge des autres selon la rondeur & integrité:
ce qui l'empesche de croire aisément que quelqu'un luy machine du mal.

Dauan-

« Davantage, vous ne sçavez pas qui sont ces gens, que nous conoissons bien
 « pour en auoir fait l'espreuue à nostre grand domage. Aussi ont-ils four-
 « ragé & ruiné plusieurs nations, qui ne leur auoyent fait aucun tort, estans
 « esguillonnez de pure auarice & ambition, & non d'autre chose. Pensez-
 « vous qu'ils soyent venus de si loin, & ayent trauerse tant de perils, pour ve-
 « nir ici trafiquer avec vos suiets? Il n'y en a point d'apparence. Mais ce sont
 « escumeurs de mer, qui veulent abuser de vostre clemence à la ruine de plu-
 « sieurs, & pour y paruenir vous ont présenté des lettres cōtrefaites: ou bien
 « il faut dire que le Roy qui les a enuoyez est extremement ambitieux, &
 « ne les a point fait embarquer pour traiter alliance avec vous, ains pour re-
 « marquer soigneusement le plan de ceste ville. Les Roys de Portugal ont-ils
 « pas empietté grãd nombre de villes en Afrique par ce mesme stratageme?
 « Se sont-ils pas faits maistres d'une bonne portion de l'Ethiopie sous tels
 « pretextes frauduleux? Ignore-on combien de torts ces courfaies ont faits
 « à diuerfes nations en ce voyage. Ont ils pas assailli Mozambique? Ils ont
 « rempli de sang le port de Mombaze: & se sont saisis de plusieurs nauires
 « qu'ils ont pillés & retenu ceux qui estoient dedans. Puis qu'en leur pau-
 « reté ils ne peuuent cacher leur naturel importun & brulant: que feront
 « ils, quand leurs forces & richesses seront plus grandes? Et pourtant, si vous
 « voulez maintenir vostre royaume en sa vigueur, exterminiez ces meschans.
 « S'ils sont pyrates, c'est tresbien fait de les chastier de leurs brigandages. Au
 « contraire, si leur Roy, qu'ils disent estre si puissant, les a enuoyez, il est ex-
 « pedient de couper la gorge à ceux-cy qui sont en vostre puissance, a-
 « fin que leur mort tranche tout desir à leurs patriottes de venir voir ce
 « qu'on fait pardeça. Il est aisé d'attacher le mal qui n'a pas fortes racines:
 « mais quand il est fort & enuicilli, on a beaucoup de peine à l'abolir. Main-
 « tenant donc qu'en auez le moyen, preuenez le mal, raclez par le pied
 « l'ambition, & fortifiez vostre estat. Or comme il n'y a rien qui endompta-
 « ge plus vn royaume que croire de leger: aussi ne sauroit-on trouuer plus
 « seure forteresse pour repousser les dangers, que la prudence & des fiance.
 « Mais quelle marchandise apportent-ils? c'est si peu de cas, à ce qu'on dit,
 « qu'il est aisé de conoistre par là qu'ils sont fort pauvres. Comment donc
 « peut-on esperer que ceux qui n'ont gueres de moyes chez eux puissent en-
 « richir vostre royaume de marchandise de grand pris? Que diray-ie des
 « presents qu'ils vous ont offerts au nom de leur Roy? Pour vray ie ne sau-
 « roy dire, s'ils nous ont plus fait rire, ou dauantage despité. Mais, peut-estre
 « que ce Roy pensoit enuoyer quelque chose de beau à ie ne say quel Roy-
 « telet d'Ethiopie, qui par sa paureté & niaiserie pouuoit estre attiré au file
 « tiffu de ces bagatelles. Faudra-il donc dire que lon se soit ainsi ioué de la
 « grãdeur d'un puissant Roy? que lon ait abusé de sa douceur? mesprisé sa sa-
 « gesse? Mais on pourra repliquer, que nous auons dressé ceste accusatiō à cau-
 « se de la mauuaise affection que nous portōs aux Chrestiens. Je cōfesse que
 « nous sommes tousiours en querelles avec ceste nation contraire & enne-
 « mie de nostre bien. Mais en ce danger qui paroist maintenant, nous e-
 « stimons que vostre estat est plus pres de sa ruine que le nostre. Car si vous

*Naturel des
Portugais.*

traitez alliance avec les Chrestiens, il faudra que nous deslogions d'icy, » pour nous retirer ailleurs où nous puissions trafiquer commodément. Nous » proposerons nos iustes doléances aux autres Roys, que vous aurez preferé » des inconnus à gens bien connus, des estrangers à des domestiques, des suf- » pects à ceux qui estoient feaux : & sommes asseurez que nostre retraite en » leurs pays ne leur sera pas désagréable. Quant à ce qui côcerne nostre prou- » fit particulier, quelque part où nous serons, peut estre que nous y serons » nos besongnes aussi aisément & promptement qu'en ce lieu. Mais pour vo- » stre regard, Sire, si vous ne pouruoyez de bonne heure à vos affaires, ie crain- » (ce que Dieu destournera s'il luy plait) que d'ici à quelques annees vous » ne soyez contraint combattre contre ceste gent trop auare, ambitieuse, & » desesperee à la guerre, non seulement pour l'estat de vostre royaume, mais » aussi pour le salut & conseruation de vostre personne. »

*Commencemēt
de querelles
entre le Roy
de Calecut &
Gama.*

Ces Arabes combatoyent par telles & semblables harangues, faisant 6 instance vers le Roy d'exterminer les Portugallois & se saisir de leurs nauires, si faire se pouuoit. D'autre costé, Gama ayant descouuert cecy & plusieurs autres meschancetez & conspirations contre sa vie : voyant aussi les fraudes & finesses du Catoual, qui le trainoit par le nez, vid bien qu'il ne fa- loit pas séjourner là longuement : tellement que deuant iour il tira vers Pandarane, & se hastata tant qu'il fut possible, de crainte que le Catoual ne l'empeschast. Or auant que descendre en terre, il auoit commandé que tous les iours on tint prests quelques esquifs au riuage de la mer, afin de pou- uoir euitier le mal que les Sarasins luy voudroyent brasser. Les Sarasins d'au- trepart sollicitoyent de pres leur affaire, font amas d'armes, & enuénement contre Gama & les siens tous ceux enuers qui ils auoyent quelque credit : & estoient en telle cholere qu'ils deliberoient se ruer sur les Portugallois. Mais ayans entendu que Gama s'estoit retiré, ils porterent cela fort impa- tiemment, & sollicitèrent le Roy de faire tant qu'il reuinst à Calecut. Le Roy persuadé par leurs harangues, enuoya le Catoual pour retenir Gama : à quoy ce Catoual obeissant, alla en toute diligence à Pandarane, & fit tous ses efforts de retenir Gama, & sous couleur de sa charge taschoit de luy o- ster les moyens de se garantir. Car il disoit que sa plus grande sollicitude e- stoit de procurer que Gama obtinst du Roy ce qu'il voudroit. Que cela ne se pouuoit faire s'il ne leuoit ces defiances que le Roy auoit de luy, qui voudroit entendre avec quelle intention les Portugallois estoient venus en Calecut. Partât qu'il deuoit faire venir la flotte plus pres de terre, & luy bailler en garde des voiles & les gouuernails, afin que ces gages asseurassent le Roy que Gama ne luy vouloit estre traistre. Ce que Gama ne voulut ac- corder en façon que ce fust, encor qu'il deust mourir du plus cruel supplice qu'il seroit possible d'inuenter. De là il escriuit à son frere, l'aduertissant, comme à la premiere fois, que s'il voyoit que ce peuple infidele le detinst trop long temps, il se mist à la voile & remenast la flotte en Portugal, pour faire entendre au Roy comme le chemin des Indes estoit ouuert. Quant à lui il ne lui chaloit plus de viure, & que tout ce qu'il craignoit estoit que le fruit d'un si long trauail perist. Ce pendât il refisoit de tout son pouuoir au Catoual,

*Naturel des
traistres de-
peint au vif en
ce Catoual de
Calecut.*

Catoual, & rabatoit ses coups fort dextrement. Ils furent deux iours à disputer sans aucune resolution. Finalement ils accordent que la marchandise des nauires seroit deschargée en terre avec gens pour la vendre. Apres que la marchandise fut liuree, le Catoual donna congé au Capitaine qui se retira dedans sa nauire, d'où il escriuiit vne lettre au Roy, par laquelle il declairoit le meschant tour que le Catoual luy auoit voulu iouer, & que ses trahisons l'auoyent contrainct de se départir ainsi. Le Roy promit là dessus de conoistre du fait, & que s'il descouuroit quelque faute au Catoual, il le chastieroit de telle sorte, qu'à l'auenir il apprendroit à tenir promesse. Quant aux marchandises, il l'admoneste de les faire amener au port de Calecut, où elles seroyent mieux vendues: ce que Gama trouua bon, & les marchandises furent conduites aux despens du Roy de Calecut. Sur ces entrefaites, & tandis que la flotte estoit pres du port, il enuoyoit tous les iours deux ou trois hommes en la ville, afin d'en faire considerer la situation par chacun de sa troupe. Les habitans du lieu se comportoyent assez paisiblement: & les Portugallois d'autre costé monstroyent tous signes de paix & d'amitié.

*Belles paroles
accrochées
de malice.*

QUELQUE temps apres il pria le Roy par lettres, de luy vouloir permettre pour plus ferme conionction de l'alliance pour l'auenir, de laisser à Calecut vt homme qui seroit faeteur & negocieroit pour le Roy de Portugal. Le Roy qui n'entendoit point à quoy tendoit ceste demeure de faeteur de Portugal en Calecut, ou estimât que Gama s'en voulust aller sans payer le port & peage des marchandises, fut fort irrité, & ne respondit que menaces. Gama voyant la responce toute autre que la requeste ne demandoit, estima qu'il ne falloit plus dire mot de ceste affaire à vn Roy si inconstant. Mais son silence despita tellement le Roy qu'il fit emprisonner les deux Portugallois que Gama auoit enuoyez avec la marchandise au port de Calecut, & commanda que lon serrast toute la marchandise; Le Capitaine requeroit là dessus que tout luy fust rendu: mais le Roy ne s'en soucia. Au moyen dequoy pour l'auoir ce qui estoit sien, le Capitaine iugea qu'il falloit vser de force.

A I N S I donc, il assaillit vne nauire qui vouloit entrer dans le havre, & à force d'armes entra dedans: print six des principaux avec dixhuit seruiteurs, & les emmena prisonniers, laissant aller les autres. Puis il fit haïsser les voiles, en telle sorte toutesfois qu'il ne perdoit point de veüe la terre: car il esperoit que le Roy renuoyeroit les deux Portugallois qu'il detenoit avec la marchandise; afin de rauoir ces quatre & leurs seruiteurs. Mais le Roy luy manda qu'il s'esbahissoit grandement de ce qu'il luy retenoit les gentils-hommes de sa maison sans aucune cause, veu qu'ils ne luy auoyent fait aucun tort. Qu'il n'auoit point voulu lascher les deux qu'il tenoit, que premierement il n'eust escrit au Roy de Portugal son frere, & qu'il les renuoyeroit avec les lettres & la marchandise. Ceste promesse esmeut Gama de ramener sa flotte plus pres de la ville. Le lendemain arriuerent les deux Portugallois avec les lettres adressantes au Roy de Portugal. Vn meslager vint avec eux dire à Gama que s'il vouloit laisser en la ville vn fa-

*Gama prend
prisonniers des
domestiques
du Roy de Ca-
lecut.*

cteur pour son maistre, le Roy de Calecut, donneroit ordre qu'il y auroit grand proufit pour les Portugallois : & que les marchandises n'auoyent point esté renuoyees, pource qu'il esperoit qu'elles se pourroyent vendre avec plus grand proufit par celuy que le Capitaine y establiroit. Gama respondit qu'il auoit changé d'aduis, & ne vouloit laisser personne en la ville : partant qu'on luy renuoyast promptement ses marchandises, si le Roy vouloit auoir ses domestiques. Le lendemain Monzaïda vint aux nauires tout troublé, disant que les Sarafins se mutinoient, dressoient des embusches, enflammoient le Roy contre Gama & les siens, & qu'il s'estoit trouué en grand danger de sa vie pour auoir serui de trucheman, & qu'à peine s'estoit-il peu sauuer de leurs mains. Qu'il luy estoit impossible de se garantir des trahisons de ces meschans, s'il retournoit en Calecut : pourtant supplioit Gama de l'emmener en Portugal, & qu'il ne se soucioit aucunement du bien qu'il laissoit en Calecut, ains ne demandoit qu'à conseruer sa vie. Gama le receut tref-volontiers & luy promit la foy, comme aussi il l'amena en Portugal, où il fut baptisé & en tout le reste de sa vie se porta en chrestien & homme de bien.

*Depart de la
flotte de Por-
tugal, arriere
de Calecut.*

C E mesme iour le Roy enuoya sept almadies dās lesquelles estoient les 7. marchādises que le Capitaine redemādoit. Luy qui aimoit mieux mener ses prisonniers en Portugal, que recouurer telles merceries, dit puis que iusques lors on luy auoit donné tant de trouffes, il ne se fioit plus à personne : qu'il conoissoit qu'on ne luy rendoit pas tout ce qui auoit esté porté à Calecut : qu'il n'auoit pas le loisir de regarder à ce qui defailloit. Partant qu'il ne lascheroit point ces Malabares prisonniers, ains les meneroit en Portugal, afin que son Roy entendist de leur bouche, combien d'outiages le Roy de Calecut auoit faits à son ambassadeur & Capitaine de ses nauires, en faueur de certains meschans Arabes. Sur ce il fait mettre le feu à l'artillerie, afin d'effrayer ceux qui estoient es almadies, & leur donner la chasse. Le Roy de Calecut fut merueilleusemēt despitē d'une telle brauade, mais il ne pouuoit s'en venger, pource que toute son armee de mer estoit lors en terre, à cause de la saison de l'annee. Toutesfois pour ce que le vent estoit foible, & que la flotte de Portugal ne pouuoit voguer de telle viffesse que elle vouloit, & sortir de ceste mer de Calecut : le Roy fit equipper soixante nauires & charger de gēs de guerre pour attrapper Gama & les siens. Mais vne tempeste suruint tout soudain qui escarta ceste flotte de Calecut, & chassa fort loin de leur veuē en vn instant les nauires de Portugal. Au premier havre que le Capitaine aborda, il escriuit des lettres au Roy, esquelles il discouroit sur les trahisons que les Sarafins & le Catoual luy auoyent brassees : que c'estoit ce qui l'auoit contraint de partir sans prendre congé de sa maïesté : neantmoins qu'il luy demeureroit tousiours affectionné seruiteur, & procureroit que le Roy de Portugal feroit volontiers & promptement ce qu'il conoistroit appartenir à la dignité du Roy de Calecut. Quant à ses domestiques, qu'il ne s'en donnast aucune peine : car il promettoit de faire qu'on les rameneroit sains & saufs. Il bailla ces lettres à vn des seruiteurs de ces quatre prisonniers, & le fit mettre en terre, afin

re, afin de les porter.

8. A v. desmarter de ce havre, la flotte fut poussée en quelques petites isles: mais avant que d'en approcher elle fut assaillie de huit fustes de cour-
saires, dont les sept furent mises en fuite, l'autre chargée de viures & de di-
uers fruits fut prinse. C'estoit la flotte d'un certain pyrate nommé Timo-
ja, homme resolu, & qui escumoit tellement ceste mer, que chascun le re-
doutoit. De là, les nauires de Portugal prindrent la route d'une isle nom-
mée Anchiediue, esloignée de terre ferme environ deux lieues, afin de se
reposer un petit apres auoir si long temps branlé sur les vagues. De tous
costez arriuerent gens pour voir les Portugallois, entre autres un person-
nage seruiteur domestique d'un Seigneur de certaine isle prochaine, nom-
mée Goa. Ce Seigneur s'appelloit Zabajo, homme magnanime, grand
guerrier, & qui entretenoit bon nombre de soldats, attirant à soy par grosse
solde tous ceux qu'il fauoir estre hardis & resolu à la guerre. Or ce serui-
teur estant pres de Gama, commence à le saluer honnorablement, & luy
faire les recommandations de son maistre, en langage Italien. Puis il adiou-
sta que Zabajo esneu de la renommée de Gama, estoit prest de luy fournir
tout ce dont il auroit besoin. Qu'il demàst donc des viures, des armes, ou
de l'argent, & que sans doute il obtiendroir tout, selon son desir: d'autant
que Zabajo luy vouloit monstrer qu'il estoit bon Prince & ami des Por-
tugallois. Le Capitaine estonné de voir cest homme parlant si bon Italien,
& tant prompt qu'il respondoit fort à propos sur tout ce dont on l'inter-
roguoit, luy demande d'où il estoit. Ce seruiteur s'auoue né en Italie, &
qu'estant moité sur mer avec son pere & sa mere pour aller en Grece, il fut
pris par des coursaies, & apres plusieurs accidens fut réduit finalement à
ceste extremité où de perdre toute esperance de retour. & estre contraint
de seruir à un Prince Mahumetiste. Apres cela, ce seruiteur commence à se
enquerir d'extremité, & de demander plus curieusement qu'il ne faloit di-
ueres choses, comme sans y penser, puis il sortoit de propos, & y rentroit
incontinent. Le Capitaine se douta que c'estoit un espion, qui n'estoit pas
venu pour le saluer, mais pour le conoistre de pres. Sur ce, soupçon il fait
empoigner & donner la torture à ce seruiteur, lequel ne pouuât porter ceste
question extraordinaire, confessa qu'il estoit Tartare de nation, Iuif de re-
ligion, seruiteur domestique de Zabajo, qui l'auoit enuoyé pour espier la
flotte, & dire bien de soldats il y auoit dedans, & quelles armes ils portoyent:
qu'il celuy se de libéroit assembler gens & mettre en fond les nauires de Por-
tugal. Ce qu'auenduy, Gama fit louer les voiles & partit de là, au plus tost
qu'il fut possible: toutesfoi il ne voulut point laisser aller le Iuif, lequel de-
puis fut baptizé & appelé Gaspar, & fit de notables seruites au Roy. En-
manuel

*Arrivée de la
flotte pres de
l'isle de Goa,
& ce qui leur
y auint.*

9. A v. depart, la flotte prit sa route, en telle sorte toutesfoi que faute de
vent elle ne faisoit pas grand chemin. Ils traverserent ceste grande esten-
due de mer, & commencerent à costoyer l'Ethiopie sur l'Egypte, tirant au
Sud, & arriuerent pres d'une ville nommée Magadare, laquelle estoit possé-
dée des Sarasins: ce qu'auenduy, Gama la fit canonner viuement, abatre la

*Passage en
Melinde, Za-
zibar & Mo-
zambique, &
rennar de Ga-
ma en Portu-
gal.*

pluspart des murailles, enfondrer les vaisseaux qui estoient au port, ou briser la pluspart de leur equipage & les rendre inutiles. S'estant auancé en mer il rencontra huit nauires de Sarasins qui le voulurent inuestir, mais en peu d'heure il les escarta & contraignit de fuir, sans toutesfois les pouuoir suiure, à faute de vent. Finalement il aborda au havre de Melinde, où il fut assez amiablemēt receu du Prince, qui fournit ce qui estoit requis pour restaurer les soldats rompus de maladies & de trauail. Ayant là seiourné cinq iours seulemēt, il se remit à la voile, d'autant qu'il craignoit perdre la commodité de doubler le Cap de bonne esperance à cause de l'hiuer qui estoit prochain. Toutesfois en s'embarquant il emmena l'Ambassadeur que le Prince de Melinde enuoyoit au Roy Emmanuel. Pource aussi que la nauire de Paul de Gama estoit fort vieille, & puisoit trop d'eau en diuers endroits, tellement qu'il n'y auoit pas assez de matelots & soldats pour la conduite & garde des trois nauires, le Capitaine fit mettre le feu en ceste là, & receut son frere en la sienne avec vne partie des matelots & soldats, & les autres furēt bailliez à Nicolas Coeillo. Le vingtneufiesme iour d'Auril ils arriuerent en l'isle de Zamzibar, fertile & grasse, plaisante à cause des belles fontaines & forests espaisles, abondante en bestail, esloignee de terre ferme enuiron douze lieues: en laquelle entre autres choses croissent d'euxmesmes es forests des arbres fort hauts nommez Citrons, des fleurs desquels sort vne si douce douceur qu'elle est portee par fois du vent à ceux qui sont fort eslongnez, qui en ont grand plaisir. Combien que le Prince de l'isle fust Mahumetiste, toutesfois il recueillit benignement la flotte, & leur fournit viures & fruits en abondance. Puis apres ils passerent au long de Mozambique, & aborderent à l'aiguade S. Blaise, où Gama fit puiser de l'eau, couper du bois, & print le plaisir de la chasse. Il estoit deliberé de visiter les ports où il auoit laissé quelques vns des bannis, mais les vents contraires repousserent les nauires, qui doublerent le Cap de bonne esperance le vingtixiesme iour d'Auril. Puis la flotte ayant les vents à souhait arriua en l'isle de saint Iacques. Au desmarer de là, vne tempeste les escarta. Nicolas Coeillo print la route de Lisbonne. Gama print terre en vne isle nommee Tierce, car son frere Paul estoit malade de long temps, & tellement deuenue sec qu'il ne pouuoit plus souffrir l'agitation de la mer. Aussi mourut-il en ceste isle. Vaque de Gama l'ayant fait enterrer, s'embarqua vistement pour paracheuer son voyage, & vint surgir au port de Lisbonne l'an mil quatre cens nonante neuf. Desia auparauant le Roy auoit entendu de Nicolas Coeillo tout ce qui estoit auenu en ceste nauigation & es Indes. Ce pendant il n'y auoit petit ne grand qui ne fust tout rui, & en regardant ceux qui estoient retournez de Calecut, ne pensaist voir des gens refusez. Encores ne reuindrent-ils pas tous, car les deux tiers presques moururent de maladie. La flotte estoit de cent quarante huit hommes avec Gama: il n'en retourna que cinquante cinq, la pluspart demi morts de miseres & de maladies. Le Roy fit grandes caresses à Gama, & luy donna des biens, estats & honneurs pour recompense d'un si braue exploit, comme aussi il en estoit digne. Coeillo ne fut pas oublie, ni les particuliers qui furent

*Deserpien
de l'isle de
Zamzibar.*

*Mort de Paul
de Gama.*

rent

rent recompensez chascun selon sa qualité & son mérite.

10. EN ce temps Emmanuel fit transporter les os du Roy Iean son predecesseur, de Sylues en Algarue, en vne autre ville nommee Bataille, ainsi appelée à cause d'une bataille qui y auoit esté donnée entre Iean premier du nô Roy de Portugal, & Iean fils de Henri, Roy de Castille. Et combien qu'il s'occupast à faire bastir vn magnifique temple à la vierge Marie, & à dresser vn conuent de moines de l'ordre de saint Ierosme, & à telles autres ceremonies: toutesfois il n'oublioit pas les Indes, ains faisoit apprester vne nouvelle flotte de nauires pour y enuoyer. Elle estoit de treize nauites, & auoit quinze cens soldats, bien armee & fournie d'artillerie, de munitions de guerre & de viures. Il fit general de ces vaisseaux vn gentil-homme nommé Pierre Aluarô Capral, sur la suffisance duquel il se reposoit, & luy commanda d'essayer par tous moyens de confermer l'alliance avec le Roy de Calcut, & luy demander permission de bastir vn fort près de la ville, où les Portugallois peussent se conseruer en sreteté contre la rage de leurs ennemis, & negocier sans inconuenient ni dommagé. S'il voyoit le Roy tellement ennemi que de ne vouloir entendre aucunement à ceste alliance, qu'il ne fust difficulté de luy faire la guerre. Outreplus, il luy commanda d'aborder à Melinde, s'il estoit possible, & faire entendre au Roy que son ambassadeur auoit apporté ioyeuses nouuelles à Emmanuel, qui feroit pour luy volontiers à l'auenir tout ce qu'il sauroit luy estre agreable. On fit embarquer aussi avec ceste flotte cinq Cordeliers, pour demeurer en Calcut, si l'alliance se faisoit, afin d'administrer les Sacremens aux Portugallois qui habiteroyent là pour le trafic: & pour instruire en la religion Romaine les Payens qui voudroyent estre Chrestiens. Le principal d'entre eux estoit vn nommé Henri, qui depuis fut esleu Eueque de Septe. Capral & les siens s'embarquerent & firent voile le huitiesme iour de Mars, l'an mil cinq cens. Apres cela, le Roy esleua en nouveaux honneurs George fils du feu Roy Iean, & lui donna pour femme Beatrix dame vertueuse, fille d'Aluar frere du duc de Corunné. Il fit aussi Connestable de Portugal Alфонse fils de son frere Iagues, que le Roy Iean auoit tué de sa propre main. Cest Alфонse estoit bastard: & sa mere, qui estoit vne grand' dame, ayant ouï parler de l'excellente beauté de Iagues qui demouroit lors en Castille, s'en amouracha tellement & fit tant qu'elle eut sa compagnie, dont proceda Alфонse.

11. EN ceste mesme annee mil cinq cens, le Prince Michel, fils d'Emmanuel & d'Isabelle, approchant de l'age de deux ans mourut de maladie. Lors Fernand & Isabelle Roy & Reine d'Espagne, commencerent à pratiquer vne nouvelle alliance, pour ioinde Emmanuel par seconde affinité avec eux: car ils desiroient luy baillez en mariage leur autre fille nommee Marie. Emmanuel ayant entendu ceste volonté, s'y accorda de bone affection. Car il ne pouoit rencontrer patri de plus noble race, plus riche, plus vertueux, illustre & cōuenable que cestui-là: estât Marie vne Princesse fort modeste, douce & de bonnes mœurs. Mais d'autant que l'affinité qui estoit entre eux, à cause du mariage précédent, empeschoit ceste nouvelle

Nouvelle flotte de treize nauires enuoyees en Calcut sous la charge de Capral.

Mort du Prince Michel, & nouveau mariage d'Emmanuel avec sa belle sœur par la despenche du Pape.

alliance, ils demãderent dispense au Pape, afin que la religion ne peust empescher vn mariage qui acommoderoit en tant de sortes les Royaumes d'Espaigne. Le Pape ayant ottroyé la dispense, ce mariage fut consommé. Au reste, combien qu'Emmanuel portast vne singuliere amitié à ceste seconde femme, à cause de ses vertus, toutesfois il ne laissoit de continuer en vne résolution que des long temps il auoit en la pensee : asauoir d'aller en personne faire la guerre aux Mores d'Afrique, comme auoyent fait ses predecesseurs. Plusieurs de ses conseillers taschoyent le destourner de cest atuis. Ils disoyent que ce n'estoit point affaire à vn Roy de mener vne armee, mais commander aux conducteurs d'icelle. Dauantage, qu'il n'auoit pas gens assez pour subiuguer toute la Mauritanie : que pour faire commodement la guerre, les troupes qui estoient sous la charge de ses capitaines suffisoient & faisoient bon deuoir. Que ce seroit preiudicier à sa reputation, si passant en Afrique il n'auoit vne armee entiere pour assuiettir toute la Barbarie, & la ioindre à sa courõne. Joint qu'il n'auoit point de fils qui lui peust succeder, au cas qu'il mourust en ceste guerre : & pourtant ils le prioient de ne mettre son Royaume en danger, à l'appetit de quelque honneur : veu que la gloire eternelle d'un Roy consiste en l'amour qu'il porte à ses suiets, non pas en des guerres entreprises sans qu'aucun proufit en retiennne au public. Outre cela, la Roine sa femme le prioit avec larmes de ne donner, par si soudain depart, occasion à plusieurs d'estimer qu'il seroit allé en Afrique par quelque affectiõ de quitter sa femme, plustost que pour desir d'y faire la guerre. Qu'elle eust esté beaucoup plus contente de n'auoir iamais esté amenee en Portugal, que d'estre si tost laissée seule : & que demeurer en Espagne ne lui eust esté occasiõ de plainte, mais demeurer comme veufue, seroit vn tesmoignage de haine. Elle pria aussi par lettres ses pere & mere de destourner le Roy son mari de ce voyage d'Afrique : declarant qu'elle ne vouloit pas empescher que son mari ne fist la guerre aux Mores, mais elle supplioit que ce ne fust alors. Voila comme les conseillers & la Roine de Portugal taschoyent destourner le Roy de son entrepr̃se : lui au contraire persistoit en sa resolution, & se preparoit à ceste guerre : faisant enrouller soldats en diligence, & equipper les nauires. L'armee estoit de vingt six mil pietons, de six mil cheuaux, & de huit cens hommes d'armes.

En quoy consiste la gloire des Rois.

Secours accordé par le Roy de Portugal aux Venitiens contre le Turc.

OR sur ces entrefaites, & comme tout estoit ia prest, on lui apporta nouuelles de plusieurs endroits, que Baiazet Empereur des Turcs dressoit sur mer vne grãde armee, pour subiuguer & ruiner toutes les isles & villes que les Venitiens tenoyent en Grece. Apres que les Venitiens eurent entendu pour certain que le Turc faisoit vn grand appareil contre eux, & se sentans trop foibles pour soustenir le choc, ils enuoyerent leurs Ambassadeurs demander secours aux Rois Chrestiens, specialement à celui de Portugal : & prièrent le Pape de faire tant pour eux enuers Emmanuel, qu'il secourust leur Republique de son armee de mer, ia toute preste à faire voile. Outre les instructions qu'auoyent les ambassadeurs qui allerent en Portugal, ils porterēt aussi lettres du Pape, par lesquelles il admonestoit

nestoit le Roy d'accorder ce dont les Venitiens le prioient : adioustant que les Chrestiens deuoyent d'un mesme accord ioinde leurs forces ensemble pour repousser vn peril cōmun & qui menaçoit toute la Chrestienté. Qu'il cōsiderast que si l'ennemi iuré du nom de Christ venoit au dessus de ses desseins, avec quel orgueil puis apres il enuahirait l'Italie, la Frâce & l'Espagne. Que lon pouuoit commodement differer la guerre contre les Mores iusques à vn temps : mais que si on laissoit l'occasion de faire teste au Turc, il seroit difficile puis apres de remedier au mal auenu. Que c'estoit vn acte beaucoup plus louable de deliurer ses amis de malheur, que de courir sus à ses ennemis. Que plusieurs Princes d'Italie estoient resolu de secourir les Venitiens : mais que le danger imminent & horrible preuiendrait leurs forces qui n'estoyent pas prestes. Au cōtraire, puis que l'armee d'Immanuel estoit fournie de toutes munitions de guerre, rien n'empeschoit, si tel estoit son plaisir, que luy seul n'emportast l'honneur d'auoir conserué la Republique de Venise. Mais qu'il falloit se haster, ce que les autres ne pouuoient executer, à cause des incommoditez de leurs affaires. Et pourtant qu'il se proposast combien sa renommee seroit magnifique, si en vn danger si grand, luy duquel le Royaume estoit tant eslongné d'Italie secouroit vne Republique abandonnee de ses voisins. Finalement, qu'en se ioignant à ceste guerre, il ne seroit pas seulement preuue d'humanité & de vertu, mais aussi montreroit son zele à la Religion, & en rendroit son nom venerable à iamais. Le Roy persuadé par ces raisons, & esmeu à pitié par les lettres du Pape, fit vne amiable responce aux Ambassadeurs, leur promettant de faire son deuoir. Il ordonna donc qu'en toute diligence on fournist de viures & autres choses necessaires à ceste longue nauigation trente nauires de la grande flotte, laquelle estant afoiblie par ce moyen, la guerre contre les Mores fut differee en autre temps, & arresté de penser au secours qu'on donneroit aux Venitiens.

12. T A N D I S que le Roy pouruoyoit à cela, les affaires d'Afrique estoient en l'estat qui s'ensuit. Apres la victoire que Iean Menez (aucuns l'appellent Iean de Menes) eust contre Barraxa & Almandarin, il reuint en Portugal, suyuant le commandement du Roy. Puis, l'an mil cinq cens & vn fut renuoyé en Arzile avec renfort de cent cinquante cheuaux. Car la guerre contre les Mores se menoit en telle sorte que les rencōtres ne se faisoient guerres à pied : & pourtant la pluspart des forces de Portugal estoient gens de cheual. En ce temps, Roderic de Castre estoit gouuerneur de Tingi. Si tost que Menez fut arriué en Arzile, il ne se reposa pas long temps, ains alla chercher les Mores. Et pource qu'il n'auoit pas forces suffisantes pour executer commodément son entreprinse, il pria Roderic de luy venir tenir compagnie. Leurs troupes iointes par ce moyen, ils s'acheminēt vers quelques grāds villages, & surprēnt les Mores, dont la pluspart effroyez se sauuerent de viffesse. Plusieurs toutesfois, ayans leur honneur en recōmandation, & voyans qu'il y alloit de leurs vies se defendirent vaillamment. Il y en eut grand nombre de tuez, & cent quatre vingts prisonniers. Or il auint que cinq Portugallois à cheual descouurirent sept Mores qui se retiroient

1501.
Rencontres & diuers accidens des Portugallois contre les Mores en Afrique.

à couuert & au grand pas avec cinq femmes: à cause dequoy ils vôt apres. Combien que les Mores fussent à pied, neantmoins ils se disposerent resoluement à faire teste aux assaillans, & y eut vn long & aspre conflict entre eux: car les Morestuerent trois cheuaux & bleferent les cinq Portugallois: finalement ils furent tuez tous sept sur le champ. Comme l'vn de ces Mores combattoit valeureusement en ce peril de sa vie, sa femme, qui estoit en la compagnie des cinq, fut surprinse de telle douleur qu'elle commença à s'escrier d'une haute & piteuse voix, faudra-il donc mon bien aimé, que ie te voye meurtrir cruellement, sans te pouuoir secourir? Au lieu de t'accompagner en la mort, faudra-il que ie te lamente? Quel plaisir auray-ie en ne te voyant plus? disant cela, elle se vint fourrer au milieu des escops, se tue sur vn Portugallois qui combattoit à pied avec son mari, & le ferre si fort, qu'il ne se pouuoit despestrer, & peu s'en salut que le More ne le ruast, à cause qu'il ne se pouuoit aider de son espee: mais les compagnons (qui auoyent tue les autres) acoururent au secours, tellement que le combat finit avec la vie des sept Mores, lesquels iusques au dernier soupir se defendirent & porterent vaillamment. En ceste rencontre y eut grand butin de cheuaux & autre sorte de bestail gros & menu.

OR comme les chefs remenoient leurs troupes es villes d'où ils estoient partis, & estoient ia à deux lieues des villages, le gouuerneur d'une ville forte que les Mores appellent Alcaffarel-quibir, vint donner sur la queue de ces troupes. Les Portugallois marchoyent d'ordre avec leur butin, taschant seulement d'eschapper, & non pas d'assaillir: par ainsi ils se retiroient peu à peu, nonobstant les courtes & escarmouches des Mores. Leur façon de combattre estoit telle. Apres que les Mores auoyent fait vne charge à coups de jaelines ils s'en retournoient au galop vers leur troupe, & se desbandoyent derechef pour venir à vne seconde charge: Les Portugallois soustenoyent le coup sur leurs escus, prenant garde qu'on n'offensast leurs cheuaux: & quand on les pressoit de trop pres, ils chargeoyent aussi l'ennemi de leur costé. Mais d'autant que les Mores continuoient plus viuement, Menez avec vne partie de ses forces donna au trauers, & en fit tomber cinquante sur la place. Les Mores voyans leurs ennemis se retirer peu à peu avec leur butin, resolurent de leur donner bataille. Pourtant ils firent cesser l'escarmouche; & se rangerent pour combattre tous ensemble. Menéz estoit content aussi de venir aux mains: pourtant il fit arrester ses gens, & enuoya dire à Roderic que sa deliberation estoit de combattre. Partant si tel estoit son auis, qu'il se vinst ioindre avec ses troupes, afin que tous ensemble chargeassent l'ennemi: Roderic fit response, qu'un sage chef de guerre, apres auoir executé vne entreprise, ne se hazardoit par sans grande necessité: pour ce que l'insolence des chefs est souuentefois cause que ce qui a esté commencié heureusement finit tresmal. Que les ennemis estoient en trop plus grand nombre: qu'eux ayans si commodite retraite, pouuoient euitier le combat, si bon leur sembloit. Qu'un vaillant Capitaine donnoit bataille à son auantage, non pas au gré de son ennemi. Outreplus, qu'ils auoyent assez bon butin, sans perte d'un seul des leurs:

*Deuoir d'un
sage chef de
guerre.*

leurs : à ceste cause il le prioit de ne gaster & perdre par legereté leur va-leureux exploit. Pendant ceste consultation, les Mores voyans leurs enne-mis ainsi arrestez, estimerent qu'ils se rangeoyent pour combattre: & dau-tant qu'en plusieurs lieux ils auoyent esprouué comment les Portugallois manioyent dextrement les armes apres s'estre resolus au combat, ils se re-tirerent. Alors Menez & Roderic partagerent le butin, & se retirerent saufs en leurs gouuetnemens.

Q V E L Q V E peu de temps apres vn certain espion More auertit le gou-uerneur d'Arzile que le Roy de Fez estoit en campagne pour faire quel-ques courses, surprendre(s'il pouuoit) la ville de Tingj, ou du moins four-rager le plat pays d'alentour, & faire aux Portugallois tout le mal qu'il pourroit. Qu'il estoit suiui de douze mille cheuaux, & marchoit en telle diligēce vers Tingj, que le messager qu'on enuoyeroit pour auertir Rode-ric n'y viendroît iamais à temps, veu mesmes qu'il n'y auoit passage que les ennemis ne tinsent clos. Menez estonné de ces nouuelles, fit descharger l'artillerie, afin que par le bruit Roderic peust entendre le danger qui le menaçoit. Outre cela, il estoit auenu qu'un homme de Tingj estant venu à Arzille en ce temps là y auoit laissé par oubliance vne chienne. Le gou-uerneur com mādā qu'on la prinst, & lui fit attacher au col des lettres bien cachettees contenant ce qu'il auoit entendu de la venue du Roy de Fez : & sur le soir il fit rudement fouetter ceste chienne, & la chasser hors la vil-le au riuage de la mer. La pauvre beste sanglante des coups qu'elle auoit re-ceus ne cessa de courir vers la maison de son maistre, tellement qu'elle se rendit aux portes de Tingj le lendemain deuant iour. Roderic ayāt leu les lettres, fit commandement à tous de prendre les armes. Sur ce, les trou-pes du Roy de Fez commencerent à approcher, & vne grand' part de son armee eut charge d'aller faire le degast, emmener le bestail, & tuer tous les gens qui seroyent trouuez es villages. Roderic sortit pour leur faire te-ste, & les alla charger : mais se trouuant pressé de la multitude des ennemis il se retira non sans grande difficulté dans les fosses de la ville. Auant que d'y pouuoir paruenir, le combat dura plus de deux heures, & y furent tuez le fils de Roderic, & huit autres vaillans hommes de cheual: Roderic mesme fut fort blessé au visage d'un coup de jaucine. Les Mores suiuent leur pointe, & descendent au fossé, pressent les Portugallois, & font tous leurs efforts d'entrer en la ville avec eux. Ce que voyant Roderic, avec vne trou-pes de gens de cheual il enfonce si impetueusement les Mores, que ce pendāt tous ceux qui estoient sortis rentrēt aisément en la ville. Le der-nier estoit appelé Loup Martin, homme vaillant, lequel estant entré ferma la porte à moitié seulemēt : & comme plusieurs criaissent apres luy qu'il la fermast entierement : ie ne feray iamais ceste faute, dit-il, que de flestrir les Portugallois, en faisant penser qu'ils ayent peur. Adioustāt qu'il estoit prest de combattre iusques au dernier soupir de sa vie, pour empescher que per-sonne n'entraist par ceste moitié de porte. Le dire & le faire fut tout vn. Car les Mores estant acourus là pour entrer, il soustint ce premier choc fort vaillamment, iusques à ce que plusieurs le vindrent secourir, au moyen de-

quoy les Mores contrains de prendre autre parti se retirerēt en leur camp. Au voubout de quatre iours, le Roy de Fez descampa pour tirer en diligence contre l'Arzile: dont le gouuerneur auerti par ses espions, apres auoit donné ordre en la ville, sortit avec ses troupes & se rangea en vn lieu nommé Vieille-ville, où il rangea en bataille ses gens de cheual & de pied, leur commandant de demeurer cois, iusques à ce qu'il leur fist signe de sortir, & qu'alors ils se monstraissent. Ce pendant lui acompagné de vingt autres l'atrança iusques vers vne riuere d'eau douce pour descouurir l'armée ennemie: ce qu'ayant fait, il se retira au pas vers la ville. Mais les auantcoureurs & cheuaux legers Mores le vindrent assaillir de si ptes, qu'ils le cōtraignirent de se fourrer parmi eux, assez pres du lieu où il auoit laissé ses troupes. Alors il n'estoit suivi que de quatre hommes: car les seize autres s'estoyent retirez dans Arzile vn peu plus vistemēt qu'il n'appartenoit. Toutefois cinquante de la grosse troupe, voyans leur chef qui se fouroit à trauers tant d'ennemis, acoururent à bride abature, & chargent si furieusement les Mores que plusieurs tomberent sur la place, les autres s'y sauuerent de vistesse. Ceux qui auoyent esté laissez en la Vieille-ville, voyans qu'il le gouuerneur chaussoit les esperons aux fuyards, estimerent qu'il ne faloit plus attendre de signe: pourtant ils marchent apres pour le secourir. Mais au mesme temps les Mores enuoyez en diuers endroits de la campagne, tenoyent tous les passages. Or le Gouverneur apperceuant que le Roy de Fez rafraischissoit ses gens, & enuoyoit renfort de gens de cheual qui arriuoient à la file: estant d'autre part suivi d'un petit nombre, & considerant qu'à la longue il seroit accablé de tant d'ennemis qui luy tomboyēt sur les bras, faisoit tout ce qui estoit possible pour retourner vers ses troupes. Ce qui ne se peut faire qu'à grand peine: & en ce conflict d'angoixes il perdit quelques hommes, plusieurs y furent blessez, & luy mesmes receut vn coup en la cuisse: toutesfois il donna de telle furie à trauers vn regimen qui luy fermoit le passage, & le vouloit attrapper, qu'en fin il se retrouua avec ses gens. Lors tous ensemble chargerent les Mores, qui combatoyent ia dans le fossé, dont ils tuerent grand nombre, les autres furent partie prins, partie blessez & mis en route. Le combat fini, Menez entra dedans la ville. Alors auint vn cas qui appresta à rire, non pas à celuy qui en fut cause: c'est qu'un More vint à cheual du camp en la ville, qu'il estoit auoit esté prin par ses compagnons, & tout ioyeux & delibéré entra par les portes: mais tout soudain les Portugallois luy mirent la main sur le collet, & ainsi paya le plaisir qu'il s'estoit trop tost imaginé.

*Secours de
Portugal en-
uoyé aux Ve-
nisiens & ce
qui en auint.*

TANDIS que ces choses se faisoient en Afrique, le Roy de Portugal donnoit ordre que l'armée de mer qu'il enuoyoit aux Venisiens fust équipée & fournie de tout ce qui estoit requis, au plustost qu'il seroit possible. Il fit general d'icelle Jean Menez fils d'Edouard sieur de Vienne, gentilhomme sage & vaillant contre plusieurs autres. Il fit armer aussi quelques nauires sous la charge du mesme general, esquelles estoient certains soldats qu'on deuoit loger au chasteau de Mazalquibir, si en passant on le pouoit surprendre. Cette forteresse est sur le bord de la mer en la coste de Barba-

rie,

rie, vis à vis de la ville d'Oran. Le Roy auoit cōmandé secretement au general, qu'il ne fist difficulté d'assaillir en quelque sorte ceste place, moyennant que ce fust sans s'arrester beaucoup. Toute la flotte fit voile du port de Lisbonne, le dixseptiesme iour de May, l'an mil cinq cens vn, & avec bon vent paruint bien tost au destroit de Gibraltar. Le general desirant executer le commandement du Roy, tira vers Mazalquibir : mais à cause des vents cōtraires, il lui fut impossible d'arriuer qu'au bout de trois iours, pendant lesquels les Mores ayans eu loisir de conoistre l'intention de ceste flotte, se preparerent à faire teste, & renforcerent la garnison du chasteau. Finalement, les Portugallois mirent pied à terre, assaillent le chasteau, plantent leurs eschelles, montent courageusement, & voyans que personne ne paroissoit sur le rempar estimerent que les Mores s'estoyent cachez de frayeur : & sur ceste fauce opinion commencerent à se pourmener çà & là comme victorieux. Mais les Mores embuschez & attendans ceste occasion, les voyans ainsi escartez, leur coururent sus furieusement, & les font descendre beaucoup plus viste qu'ils n'estoyent montez : tellement qu'en ce conflict vingt Portugallois demeurerent sur la place. Le Gouverneur qui n'auoit pas charge d'employer dauantage de temps à assaillir ceste place, choisit trente nauires de toute la flotte destinees pour le secours des Venitiens, & reprit la premiere route. Finalement, il aborda en l'Isle de Sardagne, où il fut honorablement receu du gouuerneur de l'isle. Apres auoir fourni ses nauires d'eau douce & de viures, il s'embarqua, & comme il approchoit de Thunes il descourit vne grand' nauire marchande & deux de guerre, lesquelles il assaillit, & amena en Sardagne, & fit descharger la marchandise en terre. C'estoyent nauires Geneuoises, qui portoyent à Thunes grand nombre de Turcs, de Mores, de Iuifs & de Chrestiens, avec force marchandises. Il fit rendre aux Geneuois la nauire marchande, avec tout ce qui leur appartenoit, permit aux Chrestiens & aux Iuifs de s'en aller en liberté : retint prisonniers tous les Turcs & Mores, distribuant leurs biens à ses soldats : & retint les deus nauires de guerre pour autant de temps que dureroit la guerre, à cause de laquelle il estoit venu secourir les Venitiens. De là il fit voile vers l'Italie, & ayant passé la Calabre & la Pouille, arriua en Albanie, & de là en l'Isle de Corfou, où la flotte des Venitiens le vint recueillir, monstrant à coups d'artillerie, & au son des trompettes, combien ce secours estoit agreable. Les Portugallois respondirent de mesmes : & d'autant que leurs nauires ne s'aidoyent point de rames, & qu'il y auoit grande bonasse, elles furent menees au port à l'aide des galleres Venitiennes & à force d'auirons. Quoy que les Venitiens priaissent l'Amiral Menez il ne voulut en sorte quelconque abandonner ses nauires : bien permit il à ses Capitaines de descendre ea terre, où ils furēt assez humainemēt receus.

TOUTES FOIS à ce qu'on puisse conoistre, combien la licēce au fait des armes est dangereuse, si elle n'est retenue par vne bonne discipline : il ne viendra pas mal à propos de dire quelque chose du deportement des Portugallois. Les Matelots & soldats de ceste nation gens orgueilleux & insolens de leur naturel, se donnoyent tant d'autorité, & se gouuernoient

*Stratagemme
des Mores.*

*Licēce en guer
re tresdange
reuse : & disci
pline militaire
requise.*

*Naturel des
marelots &
soldats Por-
tugais.*

si dissolument en ceste isle, que les Grecs, assez prompts à la main, ne peurent porter telles façons de faire. La chose en vint finalement à ce point qu'il y eut sedition, des Venitiens & Corsiots contre les Portugallois, en laquelle chacun empoigna les premieres armes offensives que lon rencontra. Les Capitaines Venitiens acourent en diligence pour apaiser ce tumultre. D'autre part, l'Amiral se diligente de prendre terre pour empescher les siens de passer plus outre. A peine les chefs peurent-ils separer ces mutins, tant-ils estoient acharnez. Septante Portugallois pour salaire de leur temerité & insolence futēt tuez en ceste seditiō. Les Venitiens & Corsiots y perdirent aussi grand nombre des leurs. Voila comme les vns qui secouroient les autres, leur porterent grand dommage, par la folie de quelques particuliers. Au reste, il n'y eut bataille ni rencontre avec les Turcs: car Bajazet ayant entendu que les Roys d'Espagne & de Portugal armoient pour secourir les Venitiens, que les places estoient bien munies de viures & de gens, & que son armee de mer dressée avec grands frais lui apporteroit peu de profit, fit reuenir ses vaisseaux à part, & defendit à ses lieutenans & Capitaines de passer outre ni de venir aux mains. Et pourtant le General des galleres Venitiēnes declara à l'Amiral Menez que la Seigneurie de Venise remercioit humblement le Roy qui l'auoit secourue tant au besoin, & l'auoit tellement obligee à soy, que iamais elle n'oublieroit vn tel bien: qu'en brief le Senat & le peuple enuoyeroyēt leurs ambassadeurs, pour faire entendre plus amplement au Roy l'honneur & singuliere affection qu'ils luy portoyēt. Ainsi donc, l'Amiral ayāt pourueu à toutes choses necessaires aux nauires, print la route de Portugal, & apres diuers accidens sur la mer, arriua finalement à Lisbonne, & fit entrer au hayre toute la flotte qu'il auoit menee.

*Nauigation
de Capral
pour aller en
Calecut, &
comme il fut
chassé en la
terre du Bre-
sil.*

CE peudant, Capral qui vogoit vers les Indes, suiuit la route qu'auoit ¹⁴ tenue Gama, iusques à ce qu'il paruint à l'Isle de saint Jacques. Voulant passer outre, vne impetueuse bourrasque dissipa toute la flotte, rompit l'equippage d'une des nauires laquelle reuint à Lisbonne. Ceste tempete apaisée, Capral rassembla toutes les nauires, exceptee celle là, laquelle il attendit l'espace de deux iours, faisant baisser les voiles au dessous du milieu du masts. Et d'autant qu'elle n'apparoissoit point, il fit voile vers l'Oest. Les marins descouvrirent terre le vingtquatriesme iour de May: ce qui refiout fort tous ceux de la flotte. Pas vn d'eux n'eust iamais estimé qu'en ces endroits il y eust terre habitee de gens. Et pourtant Capral fit tourner les prouës vers le riuage, & commanda au maistre de la nauire Capitainesse d'entrer en vn esquif pour approcher plus pres du bord & descendre en terre, afin de considerer soigneusement l'assiette & le naturel du pays. Le maistre ayant executé ce qui luy estoit commandé retourne & dit que c'estoit vn pays fertile, plaisant, couuert de bonnes herbes; belles fleurs, & d'arbres fort hauts, & qui auoit abondance d'eaux douces: Item qu'il auoit veu des hommes bazannez, portans cheueux longs, non crespus, le corps nud, & marchans avec arcs & fleches au long du riuage. Capral non content de ce rapport, fit armer quelques Capitaines & leur comanda d'entrer

d'entrer en des esquifs, pour aller descourir encor plus diligemment ce pays. Eux obeissans promptement retournent vers leur general & conferment le rapport du maistre. Or comme ils estoient à l'anchre, vne horrible tourmente agita tellement les nauires qu'elle les contraignit de costoyer ce pays, & leur fit faire maints tours & retours, iusques à ce qu'elles gaignerent vne fort bonne rade, que Capral fit appeler le port seur.

La flotte arrestee là, quelques Capitaines se mirent en des esquifs pour aller descourir la terre. Ils retournent avec deux pescheurs qu'ils auoyent prins dans vne petite barque. Or d'autant que personne ne pouuoit entendre leur langage, on commença à parler à eux par signes: mais ils estoient si lourds & stupides, qu'ils ne peurent rien comprendre par les signes qu'on leur faisoit. Alors Capral leur fit vestir à chascun vn saye, & dōner des clochettes, des braslelets de laitō & des miroirs, puis commanda qu'on les mist à bord. Eux biē fiers de tels presens s'en courēt en grād' ioye vers leurs gens & leur mōstrent ces ioyaux. A leur rapport vne grande multitude acourut de toutes parts vers les nauires avec des fruits de diuerses sortes, & grand' quantité de farine, eschangeant cela avec quelques menues besongnes des Portugallois. Ils s'esbahissoient fort en voyant leur representation es miroirs, les clochettes leur donnoient vn merueilleux plaisir, ils s'estimoient bien braues avec leurs braslelets, contemploient les Portugallois & ne se pouuoient faouler de voir leurs merceries. Capral voyant la simplesse de ce peuple descēdit en terre & fit dresser vn autel sous vn haut arbre, commandant qu'on y chantast la messe, & qu'on fist quelque sermon. Les Sauuages furent admis à voir la messe, où ils se trouuerent, sans sonner mot, & tous estonnez de voir tant de ceremonies, & d'ouir la chanterrie: au reste ils s'enclinoient & monstroient quelque signe que cela les esmouuoit. Apres ces mysteres acheuez, Capral voulant s'embarquer, ils le suiuirent à grand' ioye iusques au riuage. Les tesmoignages de leur contentement paroissoient en leurs chansons, au son de leurs cornets, aux mouuemens de leurs corps: puis ils tiroient force fleches en l'air, & esleuoient les mains vers le ciel, en quoy ils sembloient rendre graces à Dieu qui auoit mené les Portugallois vers eux. Mais ils estoient si estonnez, qu'on n'eust peu iuger d'eux autre chose, sinon qu'ils estoient hors d'eux mesmes. Car plusieurs d'entre eux entrerent en l'eau iusques à la poitrine pour suyure Capral qui se retiroit en ses nauires: les autres alloient à nage iusques là: aucuns se mettoient en des petites barques, & ne pouuoient quitter la flotte. Tandis que Capral estoit à l'anchre, pour faire aiguade, & pour uoir aux munitions des nauires, la merietta au riuage vn poisson dont les Portugallois s'esmerueillierent grandemēt. Il estoit aussi gros qu'un grand tonneau, & deux fois aussi long, ayant la teste & les yeux comme vn pourceau, les oreilles semblables à celles d'un Elephāt, la peau couuerte de soyes, espaisse d'un doigt, la queue longue de cinq pieds, & n'auoit point de dents. Capral fit appeler ce pays là terre de saincte Croix (aujourd'huy c'est la terre du Bresil) & y planta-on par son commandemēt vne colomne de Marbre, semblable à celles que Gama auoit fait dresser en plusieurs lieux: puis il ren-

*Poisson mer-
ueilleux.*

uooya l'un de ses capitaines nommé Gaspar Leme, porter les nouvelles au Roy de Portugal de la descouuerte & situation de ceste terre, laquelle il ne sera pas impertinent de descrire en quelque sorte, auant que passer plus outre.

*Description
de la terre du
Bresil, de la
maniere de
saure des ha-
bitans, & de
leurs façons
en temps de
paix & de
guerre.*

CE pays est situé vers le midi. Ses limites de grande estendue touchent le Peru, que tient aujourdhuy le Roy d'Espagne. La terre est fertile, plaisante, & si salubre, qu'il n'est gueres besoin d'y user de medecine: car ceux qui meurent sont emportez plustost de vieillesse que de maladie. Il y a beaucoup de grandes riuieres: & infinies fontaines d'eau douce. Les campagnes fort larges produisent de l'herbe à foison. Elle a de bons havres, des rades, descentes, & entrees fort aisees, où les nauires ne peuuent estre agitees des vens ni tourmentees des vagues. La pluspart du pays est distinguee par costaux & petis vallons, les forests sont grandes & espaisées, ayans diuerfes sortes d'arbres inconnus pardeça, entre autres vn, des plus hautes fueil les duquel coupees d'un ferrement decoule vne sorte de baufme. Il y a force bresils, arbres hauts, dont on fait des taintures rouges. Dauantage ceste terre produit des herbes singulieres, entre autres celle que plusieurs appellent la Saincte, car elle guerit les vlcères, remédie à la courte halaïne, aux chancres, à la gangraine engendree de quelque vieille playe: & chasse en peu de iours plusieurs maladies que les medecins ne peuuent guerir. Les habitans sont de couleur brune, ont les cheueux mols, noirs & longs, ne portent point de barbe, ains attachent avec des pincettes le poil de toutes les parties de leur corps. Ils n'ont conoissance de lettres quelconques, viuent sans religion, sans loix, ne s'aident de poids ni mesures, & ne sont suiets à Roy quelconque. Toutesfois s'il suruiuent guerre, ils eslisent pour chef celuy qu'ils tiennent pour le plus vaillant & adroit à conduire les autres. Ils cheminent nuds, exceptez quelques vns des plus apparens qui couurēt vne partie de leurs corps de certain paremēt fait de plumes de perroquets & d'autres oiseaux où lon void plusieurs diuerfes & belles couleurs. Ils portent en leurs testes aussi des bonnets faits de ces plumes, item des brassellets de mesme. S'ils se couurent ce n'est que depuis le nombril iusques aux genoux. Les femmes nourrissent leur cheuelure: les hommes rasent la leur depuis le front iusques au sommet de la teste. Ceux qui veulent paroistre plus braues percent leurs oreilles, narines, leures & ioues, où ils attachent & enchassent des pierres de diuerfes couleurs. Au lieu de ces pierres, les femmes se parent de menues coquilles de mer fort estimees entre elles. Ils s'aident d'ars en guerre, & descochent leurs fleches si dextremēt, qu'ils asseignent l'endroit où il leur plaist viser. Ils s'entretiennent par le moyen de la chasse, & māgent des singes, des Laizards, des couleuures, des souris, sans se degoustet de telles viandes. Leurs barques sont faites de grandes escorces d'arbres, & y en a quelques vnes si amples que trente hommes demeurent à l'aïse dedans. Quand ils veulent pescher, tandis que les vns rament, les autres battent l'eau & esfarouchēt les poissons, qui se viennent rendre au dessus de l'eau: lors ceux qui sont au guet pour cela, ont de grandes courges vuides qu'ils plongent entre deux eaux, & font que les poissons entrēt dedans.

Ils ne

Ils ne sement point de bled, ains font leur pain de la racine d'une herbe grande comme le pourpié. Ceste racine est si venimeuse, que celui qui la mange ctue meurt incontinent. Eux la pilent, & en tirent le ius, tellement qu'il n'y reste aucun suc venimeux. Puis ils la font secher au soleil, la broyēt, & en font de la farine. Les tourteaux de ceste farine sont bons, fort sauoureux & appetissans. Avec icelle & avec graine de millet ils brassent vne sorte de bruuagete l que ceruoise, dont ils s'enyurent, ce qui leur auient souvent: & en faisant leurs beuuettes, tous conspirent & machinent la ruine de leurs ennemis plus que de coustume. Ils sont grands deuins & empoisonneurs: & parmi eux sont en estime certains forciers nommez Pages, ausquels ils demâdent auis en leurs difficultez. Ces Pages portent au bout d'une siefche vne courge qui a figure de face humaine. Quand bon leur semble, ils mettent le feu dans ceste courge, & font vn parfum d'herbes, dont ils tirent la fumee par les narines, iusques à tant qu'ils commencent à chanceler comme yures, tombent par terre & sont ecstatiques: car ces herbes ont autant d'efficace qu'un vin fort, beu outre mesure, cest d'oster la raison. Alors ils commencent à grincer les dens, escumer par la bouche, tourner les yeux, menacer plusieurs de mort, effroyer les assistans par des mouuemens & contenance estranges: car chascun estime que ces estranges paroles ne procedent que de l'inspiration de quelque bon esprit. Si quelqu'un de ceux que cest insensé aura menacez tombe en quelque grief accident, ils rapportent tout son malheur à ceste deuination. Quelque part où les Pages aillent, on les recoit honnorablement, les chemins sont dressez, on leur fait la bienvenue avec chansons au son des fleustes & en danses: & leur baille on pour compagnie les plus belles femmes, soyent mariees ou à marier: car ces pauvres sauuages pensent que toutes choses leur viendront à souhait, si ces Pages leur sont amis. Les peres ne peuent espouser leurs filles, ni les sœurs leurs freres: & n'y a autres degrez pour empescher le mariage, ains prennent telles femmes & en tel nombre que bon leur semble, lesquelles ils repudient si elles les offensent. Celles qu'on surprend en adultere sont tuees ou vendues comme esclaves. Les peres & meres n'ont point de puissance sur leurs filles: ce sont les freres, qui en disposent & les vendent quand il leur plaist. Ceste vente gist en eschange d'autres choses à quoy ils prennent plaisir: d'autant qu'ils n'ont point l'usage d'argent monnoyé. Au reste, ils ne travaillent point de leurs mains, & ne demandent qu'à se donner du passe-temps. S'ils n'ont point de guerre, ils ne font autre chose que banqueter, chanter, danser, sans fin ni mesure. Ils dansent en rond sans bouger d'une place. En leurs chansons ils n'observent point de tons distincts, ains chantent comme d'une teneur. Le contenu d'icelles parle de leurs exploits de guerre, dont ils se vantent à merueilles, rapportans tout à hautlouer la vertu militaire, cependant les uns iouent de leurs fleustes, & les autres accordent le branle de leurs pieds au refrain de la chanson. Il y en a d'autres qui presentent à boire aux danseurs, tellement qu'à la fin tous tombent yures par terre. Leurs maisons sont faites de pieux de bois, couuertes de chaume en monceau, & enuironnees de deux ou trois murailles, à cause des courres

ordinaires de leurs ennemis. Plusieurs demeurent en vne mesme maison, car elles sont fort longues: & s'entr'aident fraternellement, & employent volontiers leur vie à quelque danger que ce soit, pour garantir ceux qui habitent ainsi avec eux.

ILs ne font point la guerre pour garder ou estendre les limites de leur pays, ains pour l'honneur, toutes & quantesfois qu'ils estiment que leurs voisins ou autres peuples eslongnez n'ayent tenu conte d'eux. Alors ils se gouernent par le conseil des vieillards qui se sont portez vaillamment en guerre au temps de leur ieunesse. Auant que deliberer, chascun boit à plaisir & autant que bon lui semble. Tout ce que les vieillards concluent pour la paix ou pour la guerre est executé par les ieunes, sans aucun subterfuge. Ils eslisent pour chef (comme dit a esté ci dessus) celui qu'ils tiennent pour le plus vaillant. S'il monstre signe de couardise en quelque chose que ce soit, ils le dégradent incōtinent, & en establisent vn autre au lieu. Ce chef tournoye autour de leurs loges, & à grāds cris exhorte chascun à la guerre, les aduertit de quoy ils se doyent equipper & munir, discourāt aussi combien il est besoin qu'ils se monstrent vertueux. Outre leurs arcs & fleches, ils s'aident d'espees de bois fort dur, dont ils rompent & despecent leurs ennemis. Ils taschent d'vser de surprinses, & leur principale guerre est d'assuillir à l'improuiste leur ennemi. Ils mangent incōtinent leurs prisonniers de guerre, spécialement les vieillards: & enchainent les autres. Quant à leurs gens tuez au combat, ils font grād dueil en les enterrant, & font des harangues pour magnifier leur hardiesse. Ils nourrissent grassement les prisonniers, & leur donnent des femmes qui couchent avec eux. S'ils veulent faire quelque iour de feste, ils lient de chordes le plus gras de leurs prisonniers. Premièrement son amie pour reconnoissance de faueur lui iette vne chorde au col, & tire son ami au suplice. Puis les hommes l'environnent, lui serrent le ventre, les bras & les iambes, le lient à vn pieu, paignent son corps de couleurs, & l'ornent de diuers plumages. Et pour n'estre estimez trop inhumains, ils le laschent par fois, le font manger & boire ioyeusement & à suffisance. Eux cependant banquettent, & auallent quantité de ce brusage sus mentionné. Puis ils sautent, chantent, dansent, & font durer ce ieu tragique l'espace de trois iours, en fin desquels ils le deslient & le font entrer en vne logette, ou fosse. Les femmes & enfans le tirēt avec vne chorde dont il est ceint par le ventre. Mais les hommes & quelques autres femmes lui iettent des Citrons & diuers fruits, lui recueille ce qu'il peut, & en frappe ceux qui se trouuent au deuant. Ce pendant il boit ioyeusement, ce semble, car on ne lui refuse a boire ni à manger. Au reste, il se monstre fort alaigne: eux d'autre costé se plaissent de lui & lui disent force outrages. Tu seras chastié garnement que tu es, crient-ils, nous espandrons ton sang pour venger la mort de ceux qui ont esté tuez en la guerre. Car nous te massacrerons, despecerons, rostirons & mangerons. Il ne m'en chaut pas, respond il: car ie ne mourray point en vilain & couard. Tousiours ie me suis monstré vaillant. Et bien vous me tuerez, mais i'en ay tué plusieurs d'entre vous en diuers lieux. Si vous me mangez, aussi me suis je souuent

souuent saoulé de la chair de plusieurs des vostres. Dauantage, i'ay des freres & cousins qui vengerôt ma mort. Disant cela il est enclos en la logette, & lors entre avec lui celui qui l'a gardé prisonnier, lequel a le corps peinturé, & la teste parée de belles plumes, portât es mains vne grande espee de bois. Il saute, siffle, & fait quelques tours de son baston, que le prisonnier tâche lui arracher des poings. Mais en se voulant lancer d'un costé, les femmes & enfans le tirent à eux par la chorde qu'ils tiennent, à laquelle il est attaché. S'il veut tourner de l'autre costé, il est empesché & retenu par les mains des femmes: brief il est arresté de telle sorte qu'il ne peut bouger d'une place. Or ce vaillant escrimeur apres l'auoir estonné de son espee, finalement lui casse la teste, & fait tomber la ceruelle par terre. Puis il lui coupe les mains. Alors les femmes approchent, & jettent le corps mort dans vn feu, afin qu'il ne lui reste aucun poil, & qu'elles le puissent lauer plus aisément. Cela fait elles lui fendent le ventre, & en tirent les tripes & boyaux: les autres mettent le corps par pieces: & pour n'alonger dauantage ce propos, tous mangent ceste chair humaine avec grand plaisir. Il y a d'autres sauuages demeurans es montagnes, qui sont tousiours la guerre à ceux qui demeurent es loges, & ne sont pas moins cruels & meschans. Ils ne font punition de peché quelconque que de l'homicide. Car les parens du meurtrier sont contrains le liurer aux amis & alliez du meurtre, lesquels poursuiuent la vengeance de sa mort. Iceux l'estranglent & l'enterrent: puis les parens de l'un & de l'autre pleurent & font le dueil des trespassez, quoy fait le banquet est préparé où ils se reconcilient ensemble. S'il auient que le meurtrier ne puisse estre apprehendé, lors ses filles, sœurs, ou cousines sont liurees pour esclaves aux parens du meurtre, & c'est le moyen qu'ils tiennent pour abolir toute haine & querelle.

16. CAPRAL partit du Bresil le cinquiesme iour de May. Le vingtquatriesme du mesme mois les matelots virent vn brouillaz se leuer soudainement, & le ciel se couvrir d'un nuage espais de tous costez. Or conoissans que la mer s'esmouuoit, & les vagues s'employent, ils comencerent à s'estonner & à baisser les voiles. Mais la bourasque fut si soudaine, qu'auant que la pluspart d'eux se fussent aprestez pour euitier ce naufrage, quatre nauires furent tellement battues & pressées des tourbillons impetueux, qu'elles allerent sous les vagues, & coulerent tellement en fond, qu'ame viuante de de tous ceux qui y estoient n'eschappa. Ce spectacle contrista miserablement ceux qui restoyent es autres nauires, voyans leurs compagnons, compatriottes, parens & amis engloutis par ce gouffre horrible, sans pouuoir secourir en telle calamité ceux qui perissoient d'une mort si estrange. Les autres sept nauires apres plusieurs regrets & lamentations tirerent autre route, & par vne seconde tourmente furent derechef chassées & escartées. Finalement le vingtseptiesme iour de Iuillet, six nauires se retrouvèrent ensemble qui reprindrent leur route. L'autre seule fut poussée des vens si roidement qu'elle alla iusques au goulfe d'Arabie, puis reuint en Portugal avec six hommes seulement: car les maladies, la faim, la soif, infinis dangers & tempestes auoyent fait mourir le reste. Apres que les six nauires eu-

*Continuation
de la navigation
de Capral:
son arriuee en
Quiloa, Molu-
des & Cele-
bes*

rent doublé le Cap de bonne esperance, elles descouurent vn beau pays, chargé d'arbres, abondans en bestail, & arrousé de plusieurs riuieres fort claires. Capral fit incontinent tourner la flotte celle part: mais personne des habitans du pays ne voulut communiquer avec les Portugallois, lesquels auoyent disette de viures: toutesfois voyans qu'il n'y auoit moyé de rien recouurer de ce peuple, ils se remirent à la voile, & costoyerent tousiours ce pays, iusques à ce qu'ils prindrent port en deux isles vis à vis & assez pres de terre ferme. Là y auoit deux nauires à l'anchre: ceux qui y estoient ayans descouuert la flotte de Portugal s'enfuirent incontinent. Capral print ces deux nauires: mais ayant entendu qu'elle appartenoyent à vn Prince nommé Foteima, fort aimé du Roy de Melinde, il les laissa aller avec vne grand' quantité d'or qu'elles apportoyent de Zofala, & quelques marchandises de grand pris. Le vingtvniésme iour de Iuillet il print port à Mozambique, puisa del'eau douce sans aucun empeschemét, acheta des viures, fit marché avec vn pilote pour estre conduit à Quiloa, & se remit incontinent à la voile.

*Description de
l'isle & royaume
de Quiloa.*

OR il costoyoit la terre, & descouuroit plusieurs belles isles habitees, toutes suiuettes au Roy de Quiloa: car son royaume auoit en longueur plus de quatre cens cinquante lieues. Le Roy & tous les habitans de son royaume sont Mahumetás. Ce sont gens les vns noirs, les autres basanez. Ils parlent Arabe & entendent plusieurs autres langages, à cause de leur trafic avec beaucoup de nations qui abordent là. Leurs vestemens ressemblerent à ceux des Turcs & Arabes: & viuent fort somptueusement. Quiloa est distant de Mozambique enuiron deux cens lieues. Ceste isle est separee de terre ferme par vn petit bras de mer. Au reste, il y a force herbes & arbres, des fontaines fresches & viues, abondance de gros & menu bestail: les bois & forests nourrissent quantité de bestes sauuagines. La terre est fertile, & produit diuers fruits, si lon veut tât soit peu la cultiuier. Il y a plusieurs sortes de bons poissons en la mer de ceste isle. La ville est grande, & y a grand' multitude d'habitâs. Quant aux maisons elles sont amples & basties magnifiquement, avec leurs chambres, cabinets planchers & couuertures de mesme, ornees de diuers beaux meubles. Leurs nauires sont comme celles de Mozambique: au lieu de poix on les enduit d'une sorte d'encens bastard. Capral ayant fiché l'anchre au port de ceste ville, s'arresta là, puis enuoya vers le Roy vn nommé Abraheim, pour luy dire que Capral estoit venu en ces quartiers par le commandement du Roy de Portugal, avec lettres & commissions par lesquelles le Roy de Quiloa pourroit entédre quel desir celuy de Portugal auoit de contracter alliance & amitié avec luy. Qu'il ne pouuoit mettre pied à terre, à cause de la defense que son Prince luy en auoit faite, laquelle il ne vouloit outrepasser. Pourtant il prioit le Roy d'assigner quelque lieu cômode où ils peussent cômiquer ensemble. Le Roy recueillit humainemét ces messagers, & réuoya dire par eux à Capral qu'il estoit le bien venu: qu'il auoit oui discourir amplement de la grandeur & des vertus royales d'Emmanuel, encorés quil y eust si longue distance d'un royaume à l'autre: & que ces vertus l'incitoient à faire quelque amiable alliance

alliance ensemble. Puis aussi qu'il ne se pouuoit faire que la declaratiõ de l'ambassade se fist en terre, il s'appresteroit pour parler à Capral le lendemain sur la mer. Cela dit, il enuoya vn de ses domestiques vers Capral avec quelques presens. Le lédemain il entra avec ses gés dans les petites barques agencees & parees pour tel effect. Les vns estoient vestus de robes de drap d'or, les autres d'esclatante, de soye & de cotton, portans au costé des espees & dagues, les poignes desquelles estoient enchassées de pierres precieuses fort luisantes & de grand pris. Pour signe de ioye ils estoient accompagnés de ioueurs de cornets & de flustes qui faisoient tout retétir. Les Portugallois respondoient de leur costé avec le son des trompettes & à coups d'artillerie. Capral commanda à tous les Capitaines de se vestir le plus brauemēt qu'il seroit possible, & descendre en des esquifs: ce que luy fit aussi de sa part. Ainsi ils approchent des barques du Roy, auquel Capral fit la reuerence acoustumée de faire à telles personnes: le Roy fit vne honneste réponse, & receut de la main de Capral les lettres escrites en Arabic, entéd avec vñ visage graue & paisible l'ambassade de Capral: puis donna à entendre qu'il tiédroit tousiours le Roy Emmanuel pour son frere, & feroit que personne ne se monstreroit plus affectionné que luy enuers les Portugallois. En apres fut accordé entre eux, que Capral enuoyeroit le lendemain vn homme vers le Roy pour confermer par alliâce l'amitié encommencee. Celi fait, les marchans Arabes suruindrent qui commencerent à accuser les Portugallois de cruauté & meschanceté, s'estonnans de la simplesse du Roy, qui mettoit son estat & sa dignité entre les mains de ces pirates: & que si lon ne preuenoit de bõne heure leurs embusches, en dedans peu de iours sous couleur de paix ils le feroient le plus pauvre prince du monde. Ces rapports changerent le cœur du Roy, tellement que non seulement l'accord fut rompu, mais aussi ces Arabes irritèrent fort le Roy cõtre les Portugallois. Doncques il commence à faire fortifier la ville, amasser gens de guerre, asseoir corps de garde, & executer tout ce que font les villes maritimes quand les ennemis sont au haure. Homeris, frere du Roy de Melinde suruenant lors en Quiloa, ayant descouuert les entreprises en auertit Capral, lequel sans differer & perdre plus de temps, print la route de Melinde, dont le roy, ayant receu les nouuelles, fut fort ioyeux, & commanda que soudainemēt la flotte fust rafraischie de viures & de fruits que la terre produit.

*Portugallois
mal-voulus des
Arabes.*

CAPRAL remēnoit avec soy l'ambassadeur du Roy de Melinde, à qui Emmanuel auoit fait de grands presens, & portoit quelques choses precieuses à son maistre de la part d'Emmanuel. Le lendemain Capral enuoya le tout au Roy par quelques vns de ses soldats. Or afin que tout le peuple fust tẽmoin de l'honneur que le Roy de Portugal faisoit à celuy de Melinde (comme c'est la coustume des grands, de passer mesure en desirs d'honneur, & faire grand cas des dons que leur enuoyent quelques vns de leurs semblables) le Roy de Melinde fit incontinent acoustrer vn grand cheual richement enharnaché & caparassonné, dont Emmanuel luy auoit fait present entre autres choses, monta dessus, & se mit en chemin vers

la mer, où Capral & ses Capitaines l'attendoient dedans les esquifs. Lors ils s'entr'embrassèrent, & firent de grandes caresses, tellement que c'estoit à qui monsteroit meilleur visage l'un à l'autre. Le Roy fit son possible de retenir Capral quelques iours, mais il demanda congé: toutes fois il laissa en Melinde deux bannis, pour auiser, s'ils pourroyent point aller à pied de là en Éthiopie au dessus d'Égypte, où il y auoit vn Empereur Chrestien, selon le rapport fait au Roy de Portugal: & pour conoistre amplement les mœurs & façons de viure de la nation.

Arrivée de Capral en Calcut, & sa négociation avec le Roy.

Le septiesme iour d'Aoust, Capral partit de Melinde, & ayant vent à souhait, trauersâ la mer, arriuant le vingtdeuxiesme iour en l'isle d'Anchediue, où il sejourna quelques iours afin de faire calfeutrer les nauires, & faire reposer les soldats harassés du travail de la mer. De là il print la route de Calcut, où il arriua en treize iours. Ce qu'estant rapporté au Roy il enuoya deux de ses Naires avec vn marchand qui auoit grand credit en cour, du pays de Cambaja (d'où les habitans sont appelez Guzarates) vers la flotte pour saluer le general en son nom. Capral les renuoya acompagnez de Jean Sala, cheualier de Portugal, qui auoit tenu compagnie à Vaque de Gama, au premier voyage des Indes. Sala menoit avec lui Gaspar Gama, qui estoit luif, seruiteur de Zabajo, qui s'estoit fait Chrestien, & auoit prins le nom de son maistre. Capral enuoya avec eux quatre des Naires que Gama auoit emmenez en Portugal, retenant les autres comme pour ostages. Ces Naires estoient vestus en Portugallois, & restouirent fort le Roy quand il les vid. Apres quelques messages faits de part & d'autre, le Roy ordonna que Capral le viendroit trouuer en vn palais basti assez pres du bord de la mer, où il feroit entendre sa commission. Les chambres de ce palais estoient parées magnifiquement où le Roy vint enuironné de grand nombre de Seigneurs & gentils-hommes. Deuant lui marchoyent quelques gens avec des trompettes d'or & d'argent, faites d'un artifice singulier, qui demonstroyent par ceste harmonie la ioye que le Roy sembloit lors auoir. Capral vint avec quelques Capitaines, & en laissa vn nommé Sance Thoarez, pour gouuerner es nauires en son absence. Si tost qu'il eust mis pied à terre, plusieurs seigneurs & gentils-hommes lui vindrent au deuant, & fut mis dans vne lictiere: tous les autres le suiuirent à pied iusques au palais du Roy. La salle estoit tapissée de draps d'or & de soye: le Roy luisoit de tous costez à cause des pierres precieuses qu'il portoit. Apres que Capral lui eust fait la reuerence, on l'assit en vne chaire d'argé aupres du Roy. Lors on fit approcher Gaspar le trucheman, & pat lui le Roy demanda à Capral ce que les amis ont acoustumé de faire en deuisant familièrement: afauoit come il se portoit, s'il auoit eu bonne nauigatiō, si lors que la flotte partit de Lisbone son frere Emmanuel se portoit bien. Alors les lettres du Roy de Portugal furent leues & expliquées par le trucheman, & commença-on à traiter de l'alliance. Le Roy faisoit de grandes & belles promesses, & accorderoit plus que Capral ne demandoit. Il permit à tous Portugallois de trafiquer librement en Calcut, promettant de faire qu'ils y frequenteroyent sans aucun danger. Dauantage il leur assigna vne assez grande

grâde maison pres du havre, pour y pouuoir demeurer & ferrer leurs marchandises. Et pource que le Sarafin, à qui ceste maison appartenoit, comença à complotter contre les Portugallois, le Roy de Calecut donna à celui de Portugal vne autre plus grande maison, & plus prochaine du port: où tous ses facteurs pourroyent estre plus au large, & pouruoir plus aisément à leurs affaires. Il conferma ceste donatiō en lettres grauees en vne table d'or, pour memoire perpetuelle, mesmes il paya ceste maison à vn fort riche Sarafin nommé Cojebique, lequel aimoit les Portugallois, & depuis à cause de cela perdit tous ses biens. Dauantage il ordonna qu'au faicte de ceste maison seroyent plantees des banderolles aux armoiries du Roy de Portugal, afin que chascun conust à qui elles appartenoyent: declairant au reste qu'il donneroit ordre que ce tesmoignage de l'amitié qu'il portoit au Roy Emmanuel seroit tousiours conserué en Calecut.

18. E N ces entrefaites on rapporta au Roy qu'vne grand' nauire marchade estoit desmaree de Cochim, en laquelle y auoit vn Elephant fort hardi en guerre, & prenoit la route de Cambaja. Sur ce, il enuoya prier Capral que pour l'amitié establie entr'eux il conquist ceste nauire: dautant qu'elle appartenbit à ses ennemis. Or afin de pouuoir conoistre de quelle dexterité & hardiesse les Portugallois inuestiroient les autres, il dōna charge à quelques Sarafins de la maison d'assister au combat. Capral despecha vn petit vaisseau seulement pour cest effect. Le maistre d'icelui s'appelloit Pierre Ataide, acompagné d'Edouard Pacheco, de Vasques Syluerie, & de lean Sala. Le Roy voyāt vn seul petit vaisseau s'eslongner de la flotte bien munie de soldats, d'artillerie, & d'armes, fut fort esbahi: & pourtant il attendit l'issue de ce combat en grand' doute. A peine les Portugallois s'estoyēt mis en equipage, qu'ils descourirent la nauire de Cochim. Lors ils voguerent contre à voiles desployees, non pas pour combattre main à main, crainte d'estre accablez à coups de trait lancez de haut: mais estans eslongnez quelque peu ils l'aschent des boulets de pierre & de fer, & harqueburent viuement, tellement qu'ils blessent & tuent grand nombre d'ennemis, percent la nauire en plusieurs endroits, l'assaillent deuant & derriere, effroyant fort ceux de dedans. Au commencement il sembloit que les ennemis s'en mocquassent, & huassent apres les Portugallois: mais ils changerent d'auis, coururent aux armes, comencerent à se defendre, & l'ascher leurs canons contre le vaisseau de Portugal. Or se sentant endommagez en tant de sortes, ils ne trouuerent meilleur expedient que de gagner le haut. Le petit vaisseau vogue apres, & les contrainst d'entrer sur le soir au port de Cananor, eslongné d'environ vingt lieues loin de Calecut vers le Nord. Il y auoit lors quatre nauirēs d'Arabes à l'anchre en ce port. Les Portugallois estoient au guet craighans que la nauire ne leur eschappast de nuict. Le iour venu, ils voguent apres à voiles desployees, & luy donnent tel alarme, qu'elle fut cōtrainte se separer des autres nauires, au milieu desquelles elle s'estoit retiree, & s'eslargir en plaine mer. Pource que le vaisseau des Portugallois estoit plus leger, il la poursuiuit & costoya tellement à coups de canon, que les ennemis ne vogoient pas à leur plaisir, mais là

*Combat d'un
petit vaisseau
de Portugal,
contre vne
grand' nauire
venant de Co-
chim.*

part qu'ils estoient contrains tourner la proue par les Portugallois qui finalement en vindrent à bout, & contraignirent ceste nauires d'entrer au port de Calecut. Le Roy fut tout estonné, & s'enquit de ceux ausquels il auoit commandé d'estre spectateurs du combat, comme le tout s'estoit passé. Ils respondent n'auoir iamais veu gens plus adroits, plus vaillans, ni plus asseurez à se fourrer à trauers tous dangers. Sur ce le Roy enuoya vers Capral le prier d'enuoyer vers lui ceux qui s'estoyent plus vaillamment portez en ce combat: car il desiroit voir telles gens qui meritoient de tous Rois vne grâde recompense de leur vertu. A quoy Capral obeit: & le Roy leur fit grand acueil & de beaux presens, notamment à Pacheco, lequel s'estoit monsté le plus vaillant, comme les Arabes, qui auoyent tout veu, le rapportoyent.

*Assommes,
calomnies &
seditions des
Arabes contre
les Portugal-
lois, & ce qui
l'en ensuiuit
de part &
d'autre.*

MAIS tant plus il monstroit d'amitié aux Portugallois pour cest exploit, plus se trouuerēt-ils en grand danger par la haine & l'enuie des marchans Arabes: lesquels desirans la ruine des Portugallois à cause de la diuersité de Religion, craignoient fort aussi d'estre chassés de Calecut, si le Roy portoit si grâde amitié aux Portugallois. Pourtāt ils les empeschoyēt au possible d'amasser la quantité de poyure & autres espiceries qu'ils desiroient acheter. Cela leur faisoit inuenter toutes sortes de ruses, ils aigrifoyent l'esprit du Roy par faux rapports, & accusoyent tous les Portugallois d'estre brigands. Dauantage, ils promettoient beaucoup plus grand pris aux marchans espiciers, achetoyent tout en cachette, & le serroyent es magasins, afin que les Portugallois ne peussent rien recouurer. Le Roy faisoit semblant de ne point voir telles pratiques, & rompoit sa foy. Desia auparavant Capral s'en estoit douté, mesmes auant que la maison luy eust esté baillee, pource que les ostages qui estoient en sa nauires s'estoyent iettez en la mer, afin de se sauuer à nage vers leurs gens: aucuns furent reprints, les autres qui se sauuerent ne furent point rendus, & le Roy n'en satisfist point Capral, comme il deuoit. A raison dequoy Capral enuoya vn des siens se plaindre des torts qu'on luy faisoit, & luy remōstrer qu'il auoit promis de faire que les nauires de Portugal auoyent leur charge en dedans vingt iours: cependant trois mois s'estoyent escoulez, & n'y auoit pas vne nauires fournie, combien que deuant ses yeux il eust veu charger celle des Arabes: ce qui estoit contreuenir à l'alliance, en laquelle estoit dit par expres que pour pris quelconque pas vne nation n'auoit aucune quantité de poyure ou de gingembre, que premierement la flotte de Portugal n'en eust suffisante fourniture. Partant il le prioit, d'auoir esgard à sa foy & dignité royale, pource aussi que le réps de partir approchoit, & qu'il ne pouuoit séjourner plus longuement à l'ancre. Le Roy ayant entendu cela fit fort le courroucé de ce retardement, & dit qu'à son desceu quelques trompeurs auoyent commis la faute: & puis que les Sarasins auoyent esté si meschans & audacieux de charger les nauires contre son commandement, il permettoit aux Portugallois d'enleuer les espiceries qui estoient es nauires Arabesques, en payant aux marchâs le pris d'icelle: afin qu'estans vistement fournis ils peussent faire voile en plus grande diligence. Capral oyāt cela

cela craignit qu'il n'y eust de la fraude au cōgé du Roy, aſauoir que ce fuſt vn moyen pour irriter les Arabes, tellement qu'il s'en enſuiuiſt quelque ſedition, en laquelle les Arabes qui eſtoient en plus grand nombre & plus forts pourroyēt couper la gorge aux Portugallois : & que la coulpe du mal retomberoit ou ſur les Portugallois qui auroient commencé la querelle, ou ſur les Arabes, qui contre la parolle du Roy ſe ſeroient mis en deſenſe. A ceſte cauſe Capral ne bougeoit, eſtant en perplexité de ce qui eſtoit expedient de faire. Cependant Arius Correa, qui demeuroit en la maiſon pres du port comme faſteur du Roy de Portugal, requeroit inſtamment Capral de ſe ſeruir de ce cōgé du Roy de Calecut, & oſter par force aux Sarafins ce qu'ils deſtournoyēt par fineſſe. Qu'à faute de ce faire il auientroit que les nauires s'en retourneroyent vuides en Portugal, & que tout le gain ne payeroit pas la deſpenſe ia faite. Et pource que Capral ne ſe reſoluoit point, Correa le preſſoit de plus pres, l'adiurant de ne ſouffrir que ſon nom fuſt ſouillé de laſcheté & couardiſe, ni que le Roy Emmanuel fuſt priué du proufit qui ſe preſentoit. Dauantage, il prenoit des teſmoins, & demandoit acte authentique aux Secretaires, pour monſtrer à tous, qu'il n'auoit point tenu à luy, mais au general, que les affaires de leur Roy ne ſ'eſtoient mieus portees. Ces complaints & proteſtations de Correa eſmeurent Capral, qui reſolut de faire quelque exploit, afin d'euitier aucunemēt le crime qu'on luy pouuoit mettre ſus.

I l y auoit lors vn peu loin du port vne nauire chargee d'eſpicerie, laquelle pretendoit faire voile bien toſt : quand Capral enuoya l'un de ſes ſeruiteurs dire au Pilote & au maistre qu'ils ne bougeaſſent : d'autant que le Roy luy auoit permis d'arreſter toutes les nauires qui eſtoient en ceſte mer. Celuy à qui appartenoit la nauire eſtoit vn fort riche Sarafin, biē aimé & en grand credit entre les ſeigneurs & courtiſans de Calecut. Le Pilote, le maistre & toute leur ſuite ſe mocquent du mandement de Capral, lequel fit armer & partir des eſquifs avec des ſoldats & matelots, pour lier la nauire, & la tirer au port à la rame : ce qui fut incontinent executé. Le Sarafin en ayant entendu les nouvelles, transporté de cholere aſſemble tous ſes parens & aliez, leur donne à entendre l'accident, ſe plaint de l'outrage & iniquité des Portugallois, & amplifie par vne longue harangue l'indignité du fait. Chaſcun des aſſiſtans iette (comme on dit) de l'huile au feu, diſant qu'il valoit mieus mourir que d'endurer telle brauade. Pourtant ils ſ'en vont tous au Roy, crians que c'eſtoit vne grand' honte que des Chreſtiens euſſent la hardieſſe d'aſſaillir dans le Royaume de Calecut ceux qui eſtoient en la ſauuegarde du Roy, & comme s'ils eſtoient à rois, commendaaſſent à baguette, menaaſſent les perſonnes fraîches, emmenaſſent les nauires, & à la barbe du Roy tourmentaſſent ſes ſubiets. Que ſ'il ne chaſtioit biē toſt vne telle audace, ils machineroient plus grande meſchaceté & courroyēt ſus à luy-mefme. Ils adiouſtoient que ſa douceur auoit eſté cauſe que ces eſtrangers, eſloignez de la maniere de viure des Indiens, deſtituez de tout ſupport, meſpriſoient ſa puiſſance, & ſe donnoient l'autorité de commettre ces inſolences en ſon royaume. Le Roy leur fit telle reſponſe qu'ils

contrent bien qu'en executant quelque meschanceté contre les Portugallois, il ne les en rechercheroit pas beaucoup. Et pourtant ils acourent à la foule vers la maison où les Portugallois demouroient par le côté du Roy, ne pensans aucunement la guerre: & attirent avec eux grand nombre de Naires. Correa fait lever haute vne banderolle pour donner à entendre à la flotte en quel danger il estoit. Lors il auoit septante hommes avec soy. Les Sarasins & les Naires se trouuerent au nombre de quatre mil. Capral qui estoit tourmenté d'une fièvre quarte commanda à Sance Tobare de prendre terre vistement avec les esquifs pour aller au secours des assaillis & recueillir les fuyans. D'autre côté les Sarasins faisoient tous leurs efforts d'enfoncer la porte à coups de haches, rompre les murailles avec longues pieces de bois, & assailloient viuement ceux de dedans, taschant les tuer tous auant que le secours fust venu. Les Portugallois se defendoient courageusement, & faisoient du pis qu'il leur estoit possible pour venger leur mort presente. Ce pendant la muraille fut effondree d'un côté à force de huer contre: alors les ennemis enterrent furieusement à la foule, & coupent la gorge à la pluspart des Portugallois. Ceux qui peurent eschapper se serrent ensemble & tirerent vers la mer, où plusieurs de leurs compagnons venus au secours, coururent sus aux ennemis, tellement que les ayant fait reculer quelques pas, ils eurent moyen de faire entrer les eschappez dans les esquifs. Il y eut cinquante Portugallois tuez en ceste esmeute, entre autres Arius Correa. Vingt eschapperent, blessés toutesfois, & la pluspart moururent incōtinent apres de ces playes. Le moine Henry, principal entre les cinq qui y auoyent esté enuoyez, fut blessé en quelques endroits. Arius Correa auoit mené avec soy es Indes un sien fils nommé Antoine aagé de dix ans seulement: lequel au milieu de ce tumulte fut vaillamment preserué par un homme de cheual nommé Nonio Leitan, qui l'emmena sain & sauf iusques au bord de la mer. Or pource qu'il ne pouoit lors passer outre, ni porter l'enfant iusques à l'esquif, un matelot ayant compassion du pauvre orphelin, acourt, le charge sur ses espaules, & au grand danger de sa vie le porte dans l'esquif. Cest Antoine fut depuis un vaillant soldat, & fit de beaux exploits d'armes.

Arabes chassiez de leur sedition & du massacre des Portugallois.

Ce massacre fut executé par les Sarasins le dixseptiesme iour de Decembre, l'an mil cinq cens. Capral en fut extremement contristé, tellement que sa fièvre le travailla beaucoup plus que de coustume, & pleura à chaudes larmes pour la mort de Correa. Toutesfois il ne voulut encor entreprendre aucun acte d'hostilité, attendant que le Roy proposast quelque excuse supportable, & chastiaist les auteurs de la sedition. Mais conoissant par le silence du Roy, que non seulement il sauoit quelque chose d'une si malheureuse entreprinse, mais aussi en estoit cause en partie, le lendemain, par l'avis des Capitaines, il assaillit dix grâdes nauires d'Arabes, lesquelles estoient au port. Le combat fut aspre d'une part & d'autre: toutesfois les Portugallois entrent à viue force dedans les nauires, vengent la mort de Correa & des siens sur plus de six cens hommes de ces nauires, auxquels ils coupent la gorge: puis deschargent les nauires, prennent prisonniers quelques uns

ques vns qui s'estoyent cachez pour les distribuer esgalement, afin de supplier au defaut des matelots. On trouua trois grands Elephans qui furent tuez & salez pour la fourniture des nauires, qui auoyent les viures bien courts. Finalement, sur le soir, ils mirent le feu dans toutes ces nauires, entre lesquelles estoit celle de cest Arabe qui auoit esmeu vn si grand trouble. Il s'appelloit Cogecem Micidie. Cest embrasement esroya tous ceus qui demuroyent en Calecut, ils s'assemblerent de tous costez, font de grandes huees & lamentations pour vne si notable perte, leuant les mains contre le ciel, avec des imprecations horribles contre les Portugallois: sans penser ce pendant à resister ni à se veger. Le Roy mesmes auoit esté spectateur de ce feu. Mais si tost qu'il fut iour la flotte de Portugal se renga pour canonner la ville. le plus furieusement que faire se pourroit: ce qui fut executé, force maisons abatuës; & grand nombre de personnes tues du canon & de la ruine des maisons çà & là. Vn des seruiteurs domestiques du Roy fut tué & mis en menus morceaux d'un coup de boulet: ce qui donna telles affres à ce Roy, qu'il ne trouua meilleur remede que de s'enfuir vistement en lieu plus assuré.

20. A P R E S cela, Capral resolut de prendre la route de Cochim: car il auoit oui dire que le Roy de ce lieu desiroit estre ami des Portugallois. La ville de Cochim est assise vers le Su & eslongnee de Calecut enuiron trente cinq lieues. Elle est arrousee de tous costez par les tours & retours d'un fleuve qui l'environne, & se va rendre au dessous d'icelle en la mer. Le havre est fort bon, & la rade tresasseuree pour les nauires. La terre est maigre & sterile, plaisante toutesfois à cause des arbres verdoyans qu'on y void: & pour l'abondance du poyure. Ce Roy n'estoit pas des plus riches, & tous les ans payoit certains tributs au roy de Calecut. La maniere de viure du peuple s'accorde avec celle des Malabares. Capral ayant ietté l'ancre au port, enuoya vers le Roy vn Indien nommé Michel, pour l'auertir de l'arriuee de la flotte en son royaume; & requerir de leur vendre quelque quantite de poyure & d'autres espiceries à iuste pris, afin de pouoir charger quelques nauires. Ce Michel auoit esté vn homme de merueilleuse abstinence, d'une vaine religion dont font profession certains fantastiques que les Indiens appellent Iogues, lesquels ont apparence exterieure d'auoir entierement renoncé au monde: ils ne possèdent aucunes facultez & richesses, viuent d'aumosnes, courēt çà & là, afin de prescher la sainteté de leur secte à tous ceux qui les veulent escouter. Ils sont grands imposteurs, qui par illusions pipent le simple peuple, & s'engraissent de la bêtise d'icelui. Or ce Michel qui s'estoit rangé à la bonne foy avec ces gés, s'en retira apres auoir descouvert leurs artifices, & presta l'oreille aux Portugallois qui auoyent vne plus pure religion, & persuadé par leurs remonstrances se fit baptiser. Icelui ayant fait la reuerence au Roy de Cochim au nom de Capral, & présenté sa requeste, eut bone response plaine de douceur & de tesmoignage de singuliere affection: rapportant que le Roy estoit fort ioyeux de l'arriuee des nauires, & promettoit de fournir largement & liberalement ce qu'on demandoit. Par consequent l'alliance fut aisément conclue: & suiuant icelle

*Nauigation
de Capral en
Cochim, & en
Canauer: &
son retour en
Portugal.*

*Mines
Indiens.*

Capral enuoya quelques coupes, aiguieres & autre vaisselle d'argent au Roy, par gens qui auoyent charge d'acheter au pris ordinaire les espiceries que lon y pourroit trouuer. Le Roy fit loger ces Portugallois en vne maison assez spacieuse & forte, leur donnant des Naires pour leur garde & feureté. Tandis que toutes choses s'auançoient selon le desir de Capral, par la fidelité du Roy, suruindrent des ambassadeurs du Roy de Cananor & du Roy de Coulam, qui au nom de leurs Roys offroyent amitié aux Portugallois, & les semondoyent à venir trafiquer & charger les nauires en leurs royaumes. Capral les remercia affectueusement, comme il deuoit, alleguât que ce qui l'empeschoit d'accepter ce qu'ils luy offroyent de la part de leur Prince estoit le bon recueil que lui auoit fait le Roy de Cochim avec qui il trafiquoit pour lors : cependant il se sentoît autant obligé à eux, que s'il auoit receu par effect le bien qu'ils presentoyent. Que si la quantité qu'il desiroit acheter ne se trouuoit en Cochim, lors il accepteroit de bon cœur leur volonté. Tandis qu'on chargeoit les nauires en diligence, suruindrent deux Chrestiens Indiens du nombre de ceux qui font profession de suiure la doctrine de l'Apostre saint Thomas, depuis tant d'annees que ce seruiteur de Iesus Christ a presché l'Euangile à Rome, & prierent Capral de les vouloir emmener avec soy, afin que de Portugal ils peussent aller à Rome, en Ierusalem, pour voir ces lieux où Christ & ses Apostres auoyent conuersé : ce que Capral leur accorda volontairement. Ils estoient d'une ville nommée Cranganor eslongnée de dix lieues loin de Cochim. Apres que les nauires furent chargees, le Roy de Cochim fut auerti que celui de Calecut auoit assemblé vne flotte de vingt grandes nauires de guerre, & vn plus grand nombre d'autres moindres vaisseaux, pour venger la mort de ses suiets, & que l'armée de ceste flotte estoit de quinze mil hommes : ce qu'il fit incontinent entendre par ses domestiques à Capral, lequel ayant entendu ces nouuelles tint ses soldats prests, estant resolu de combattre la flotte de Calecut. Ayant donc fait leuer les voiles il vogua à l'encontre : mais à cause des vents contraires il lui fut impossible de l'aborder. Les Calecutiens voyans avec quelle resolution leurs ennemis taschoyent les inuestir, redoutans aussi l'impetuosité & violence de l'artillerie, n'osèrent approcher ni venir aux mains, encores qu'ils eussent vent à gré, qui les portoit contre les nauires de Portugal. Et pourtât Capral resolut, puis qu'il n'auoit plus d'empeschement, de prendre la route de Portugal : & laissa deux hommes à Cochim, l'un nommé Gonçalue Barbose, l'autre Laurent Morene, avec quelques Portugallois, pour manier les affaires de leur Roy.

*Description de
la ville de Ca-
nanor.*

EN passant au long de Cananor, il fut semonds par le Roy d'y charger ce qui lui defailloit pour la fourniture des nauires : ce qu'il ne refusa, & vint surgir au port de ceste ville, l'an mil cinq cens vn. Cananor est vn grande ville, habitée de plusieurs allans & venans. Le goulfe qui flotte iusques dans icelle, est cause qu'il y a vn bon port. Le pays est abondant en tous biens necessaires à la vie humaine : le Roy estoit riche, souverain, se gouuernant au reste presque en la mesme sorte que les autres Rois des Malabares. Capral y acheta certaine quantité de poyure & de canelle. Et pource que le Roy estimait

estima que faute d'argent estoit cause que Capral n'enleuoit pas tout ce qu'on lui presentoit, lui enuoya dire qu'il auoit entendu qu'on l'auoit depouillé de ses biens & moyens au port de Calecut: pourtāt, qu'il feroit plaisir au Roy de Cananor de s'aider des deniers d'icelui, comme s'ils appartenoient au Roy de Portugal: dont il fut remercié par Capral, lequel monstra aux messagers vne grande somme de ducats, afin que le Roy peüst entendre, que ce n'estoit point l'argēt qui le retardoit, mais qu'il n'auoit point voulu acheter dauantage de marchandise, à cause que les nauires estoient assez chargees. Le Roy desirant affermir la paix avec celui de Portugal, enuoya vn ambassade qui entra dedans les nauires. Ils partirēt de là le seiziesme iour de Ianuier. Et comme Capral approchoit du port de Melinde, il print vne grande nauire chargee de marchandise, laquelle appartenoit à vn Sarasin fort riche nomme Milicup, lequel demouroit au royaume de Cābaja, & possedoit vne ville nommee Barochium: ce qu'entendāt Capral il la laissa aller, & dit au Capitaine d'icelle que le Roy de Portugal ne feroit guerre es Indes sinon au Roy de Calecut & à ces Arabes de la Mecque, qui luy auoyent fait de grands torts. En cest endroit vne roide tempeste agita la flotte, & fit eschouer la nauire de laquelle Sance Thoarez estoit Capitaine. Au plustost qu'il fut possible, Capral fit mettre le feu en ceste nauire rompue, afin que les ennemis n'y peussent rien gagner. Toutesfois depuis le Roy de Mombaze fit plonger des nageurs en l'eau, & s'estant aidé de force gens tira l'artillerie hors. Capral n'ayant pas les vents commodes pour aller à Melinde, suiuit la route de Mozambique, où apres auoir calfeutré les nauires, il logea Sance Thoarez en vne autre pour considerer soigneusement l'affiēte de Zofala, & se retirer de là en Portugal. Lui ayant fait aiguade, delibera se retirer sans aucun delay, & apres plusieurs tours & retours de tempeste & de beaultemps sur la mer, il arriua finalement à Lisbonne le dernier iour de Iuillet. Son arriuee esineut diuersement le Roy: car le retour de ceux qui estoient eschappez le resiouissoit autant comme il estoit contristé de la mort de ceux que la mer auoit engloutis, & que les Arabes auoyent tué en Calecut. En la mesme annee le Roy Emmanuel auoit enuoyé vne autre petite flotte es Indes, sous la conduite d'vn vaillant Capitaine nommé Jean Nouio: & y auoit seulement trois nauires. Car il se confioit que les nauires esquelles Capral commādoit embarquees l'an precedent auroyē assez de pouuoir pour faire paix, ou pour faire guerre avec le Roy de Calecut: lors donc il estima que ce supplēmet de trois nauires suffiroit. Mais ayant entendu les embusches esquelles Capral auoit cuidé estre prins, il conut que ce forfait requeroit plus grande armee pour le reprimer & punir.

21. CELA fut cause que l'annee suyuante, qui estoit l'an mil cinq cens & 1501. deux, il enuoya pour la seconde fois Vasque de Gama en Inde avec vne flotte de dix nauires, es neuf desquelles estoient establis vaillans Capitaines & soldats. Il fit encor armer vne autre flotte de cinq nauires, de laquelle estoit general vn braue capitaine nommé Vincent Sodre. Charge lui fut donnee de courir la mer des Indes & faire viuement la guerre aux Sarasins

Seconde navigation de Vasque de Gama es Indes Orientales.

qui trafiquoyēt es Indes. Ces quinze nauires fournies de toutes choses necessaires delmarterent du port de Bethlehem le dixiesme iour de Februrier. Le Roy ne se contentant pas encores de cela, fit armer cinq autres nauires sous la conduite d'Estienne de Gama frere de Vasco, lequel partit de Lisbonne le premier iour d'Auril de la mesme annee & tint la route des autres. Car le Roy qui auoit vn cœur haut, conuoiteux de grandes choses & (qui estoit le principal) fortifié de l'esperance qu'il mettoit en Dieu, estoit qu'il vire des principales parties de sa charge requeroit qu'il prinst les armēs pour conquerir ces pays, exterminer les ennemis des Chrestiens, & planter la religion es Indes Orientales. En la mesme annee, la Roine Marie acoucha à Lisbonne de son premier fils, à la naissance duquel s'esleua vne si terrible tempeste que les plus vieux n'auoyent souuenance d'auoir iamais veu la pareille. Le ciel estoit couuert d'espaissie obscurité: les tonnerres & esclairs si estranges & cōtinuels, que les plus hardis trembloient de frayeur. D'auantage, la foudre tomba en plusieurs endroits: les tourbillons impetueux arrachoyent les arbres: les grandes pluyes qui suruindrent incontinent couurirent les champs, & emplirent plusieurs maisons. Le beau temps estant reuenu, le Roy & toute la ville firent grand' feste de la naissance du petit Prince, lequel fut baptizé au huitiesme iour & nommé Iean. Entre autres compères le Roy voulut auoir Pierre Pascal ambassadeur de Venise, qui estoit venu le remercier au nom de la Seigneurie de la flotte enuoyee par lui contre Baiazet, comme dit a esté: & lui declairer que la Seigneurie & tout le peuple de Venise lui demeureroient obligez à iamais pour ce bien-fait. Le Roy fit cest ambassadeur cheualier de sa main propre, lui en bailla les enseignes, & le renuoya avec beaucoup de presens. Ce qui allecha tellement Pascal, qu'estant à Venise il fit de grands discours sur l'excellente vertu du Roy de Portugal & fut cause que l'amitié encommencee entre le Roy & la Seigneurie fut confirmee par vne alliance plus estroite. Le iour qu'on baptisa le Prince Iean, le feu se print soudainement au palais du Roy: mais par la diligence de grand nombre d'hommes il fut incontinent estaint. En ceste mesme annee le Roy equippa vne autre flotte, pour l'enuoyer au destroit de Gibraltar, afin de brider l'audace des Mores: mais il n'appert point qu'elle fist chose digne de memoire.

*Naissance de
Jean Prince de
Portugal, &
les prodiges en
la naissance
d'icelui.*

*Nauigation
de Iean No-
uio.*

P O U R reuenir à Iean Nouio, ayant le vent à gré, apres auoir passé la ligne equinoctiale il vint surgir au port d'une isle inconnue des Portugallois, laquelle il nomma la Conception. De là il prit la route de Mozambique: mais auant qu'y arriuer, il fit tourner les proues vers terre pour puiser de l'eau en ce lieu qui est appellé l'aiguade S. Blaise. La fut trouuē vn vieux soulier attaché à la branche d'un arbre: ce qu'on pensa n'auoir esté fait sans quelque cause, pourtant il se fit apporter ce soulier, dās lequel estoient certaines lettres escrites de la main de Pierre Ataide, par lesquelles il admonestoit tous capitaines de Portugal qui passeroient par là, de se destourner du havre de Calcut: que le Roy estoit vn meschant & cruel, qui auoit premierement par embusches, puis à force ouuerte machiné la mort des Portugallois. Nouio estant arriuē à Quiloa, trouua l'vn de ces bannis, qu'on

auoit

auoit latitez en diuers lieux: le quel bailla lettres de Capral à Nouio, de mesme teneur que celles d'Ataide. Estant au port de Melinde, il fut auerti par le Roy de toutes les fraudes & embusches que le Roy de Calecut auoit dressées à Capral. De là Nouio fit voile en Anchédiue, pour fournir ses nauires d'eau douce, & de là tira vers Cananor, où il fut tellement receu, que le Roy lui monstra tous les signes d'amitié qu'il est possible de desirer. En ce lieu survint vn Portugallois nommé Gonçalues Peixot, qui lors qu'Aras Correa fut tué estoit demeuré caché à l'aide de Cojebec, pour euitier la mort presente. Depuis, les choses aucunement appaisées, il se monstra, & vint trouuer Nouio par le commandement du Roy de Calecut, pour lui dire que cō tumulte, ou Correa fut tué, auoit esté esmeu par vne multitude enragée: que iamais il ne s'estoit departi de la singuliere affectiō. qu'il portoit au Roy de Portugal: & que Nouio lui feroit grand plaisir, s'il vouloit venir à Calecut, pource qu'il obtiendrait aisément tout ce qu'il voudroit demander. Ayant fait ce rapport au nom du Roy, il adiousta de la part de Cojebec, que Nouio se donnast bien garde de croire le plus desloyal Roy qui fust au monde: pource que ce meschant ne pensoit sinon sous pretexte d'amitié attrapper autant qu'il pourroit de Portugallois, pour les massacrer: & que celui qui se feroit en vn traistre qui n'auoit iamais gardé sa foy, en se faisant tuer à credit receuoit le payement que sa folie meritoit. Nouio ne voulut faire aucune response, & ne permit à Peixot de retourner en Calecut. Or comme il tenoit la route de Cochim, il rencontra vne nauiue de Calecut, laquelle il força, butina ce qui estoit dedans, fit mettre le feu au vaisseau vuide, & vint surgir finalement au port de Cochim. Sa venue esrouit tellement les Portugallois laissez là qu'ils estimoyent lors estre resuscitez de mort à vie: car encor que le Roy les traitast humainement, & leur eust baillé quelques Naires pour garde, si est-ce qu'ils redoutoyent merueilleusement la desloyauté des Arabes qui trafiquoyent presque ordinairement en Cochim. Le Roy monstra à Nouio tous les tesmoignages qu'on peut requerir & attendre d'un homme vertueux & fidele. A cause dequoy Nouio, ayāt fait ses besongnes à souhait, & chargé presque du tout ses nauires, fit voile derechef en Cananor, afin de prendre quelque charges d'autres espiceries: ce qui lui fut liberalement accordé. Comme il vouloit s'embarquer, le Roy de Cananor l'auertit que celui de Calecut auoit armé quatre vingts Almadies, pour assieger l'issue du port, enclorre les quatre nauires & les auoir à force d'armes. Poutant il l'admonnestoit d'approcher plus pres de terre, afin que lui & les siens pussent acceutir au secours. Datant qu'il ne se pourroit pas faire, que Nouio avec si peu de gens & de vaisseaux peust soustenir la flotte des ennemis. Nouio le remercia humblement, & exhorta le Roy de ne se donner peine des Portugallois: qu'il remettoit en Dieu souverain toute esperance de la victoire, & qu'à l'aide de ce Dieu il ne seroit difficulté de combattre vne plus grande flotte. Le lendemain Nouio appereut que les ennemistenoient l'entree du havre. Ils auoyent plus de cent vaisseaux. Nouio disposa ses nauires en telle sorte qu'elles pouuoient s'aider toutes

*Folie de vent
qui se fit aux
traytres.*

*Combat Na-
val de Nouio
contre la flotte
de Calecut.*

de leur artillerie : en apres il auertit tous les Capitaines, que tout l'esperoir de leur sauueté consistoit en ce qu'ils ne se laissassent amener à ce point que de combattre main à main cōtre vne si grande multitude d'ennemis : partant qu'ils donnassent ordre de faire ranger tellemēt leurs pieces, que sans cesse on canonast les Calecutiens : à cause que l'intermission les mettroit en grand danger. Eux executent fort soigneusement ce qui leur estoit cōmandé. Par ce moyen les Portugallois combattirent vaillamment & alaiement depuis le matin iusques au soir. Les ennemis y perdirent (comme on sceut depuis) quatre cens dixsept hommes tuez ; & plusieurs blesez d'arquebusades, & quelques vaisseaux mis au fond : sans que les Portugallois eussent receu aucun dommage. Les ennemis leuerent vne bāderolle en signe de paix. Nouio pensant qu'ils brassoyent quelque trahison, leua au contraire vne enseigne de guerre, & commandā qu'on recommençast à tirer. Eux neantmoins continuent à mōstrer ce signē de paix. Alors Nouio en fit aussi leuer vn. Ils emuoient vn Arabe demander trefues pour ceste nuit : & que le lendemain on pourroit traiter vne paix equitable pour les vns & les autres : Nouio respond qu'il n'accorderoit point les trefues, si premierement ils ne se tiroient arriere de l'entree du port, en lui laissant la mer libre. Eux accordent incontinent ce que Nouio requeroit. Nouio sortit du destroit avec les nauires, & les deux flottes demeurērēt à l'anchre assez pres de l'entree du port, en telle sorte toutesfois qu'il y auoit quelque petite distance de l'vne à l'autre. Les ennemis rompsans leur promesse enuoierēt des nageurs entre deux eaux pour venir couper les cables des anches. Iceux estoient suiuis de quelques basteaux legers, munis de feux artificiels pour les darder dans les nauires, incontinent que les cables seroyent coupez. Ce qu'ils eussent executé sans l'extreme vigilance des Portugallois, lesquels à coups d'arquebusades & de mousquets repoussoyent aisēment ceux qui osoient approcher trop pres. La nuit se passa en tel trauail de part & d'autre. Les ennemis voyans que la force ouuerte & les embusches ne leur auoyent serui, comme ils esperoyent, leuerent les anches, & avec vent propre se retirerent à Calecut. Nouio & les siens deliurez d'vn si grand danger, rendirent graces à Dieu & resolurent de voguer à toutes voiles vers Portugal. Ils n'auoyent pas fait gueres de chemin qu'ils desleuerent vne nauire de Calecut, laquelle fūt incontinent enuoloppēe, prinse, pillēe & bruslēe. De là moyennant les vents propres, il doubla le Cap de bonne esperance, puis arriua en vne petite Isle qu'il appella l'Isle de sainte Helaine, qui est assise au milieu de la mer, où elle semble auoir esté posēe par vne singuliere prouidence de Dieu, afin de donner loisir aux Portugallois retournans des Indes, affligez de la tourmente, & de disette (comme il ne se peut faire autrement en si longue nauigation) de se refaire & rafraichir. Car il y a des riuieres douces, fraisches & continuelles, des forests espaisles & vn air fort doux. Or apres que par l'industrie d'vn personnage, duquel nous parlerons en son endroit propre, ceste Isle commença à estre cultiuee, elle a eū abondance d'herbe & de diuers fruits, avec force pourceaux & moutons. Qui est cause que les Portugallois puissent de l'eau & cueillent du bois

*Isle de sainte
Helaine.*

du bois fort commodemēt en ceste Isle, mesmes ils y fournissent leurs nauires de poisson, sauuagine & volaille. Nouio quitta cest Isle, & singla par si bon vent qu'il vint surgir à Lisbonne, l'onzieme iour du mois de Septembre, l'an mil cinq cens & deux: dont le Roy & toute la ville furent fort ioyeux à cause de l'heureuse nauigation.

23. E N ceste annee le Roy fit vn pelerinage à Sainct Iaques en Gallice. A son arriuee à Condexe de Velle, anciennement Conimbrice, il vid le sepulchre du saint & inuincible Roy Alfonso, par la vertu duquel les Mores auoyent esté chassiez loin des frontieres de Portugal, n'auoir presque point d'apparence: pourtant il le fit abatre, & en edifier vn plus ample & plus magnifique. Semblablement il fit bastir à grands frais en la ville de Portugal le sepulchre de saint Panthaleon martyr, selon l'ordonnance contenue au testament du Roy Jean. Au reste, par tout où il passoit, les veufues & orphelins sentoient sa douceur & equité: il faisoit de beaux dons aux temples, & faisoit griesue iustice des plus gros, qui iusques lors estoient demeurez impunis. Il demeura trois iours à Compostelle, & visita songneusement le sepulchre de S. Iacques, enrichit le temple, & y fit pendre vne lampe d'argent faite d'vn artifice singulier pour y luire tousiours. Il fit beaucoup de presens à toutes les personnes chez lesquelles il logea. Brief ce voyage fut tel, que par tout où il mettoit le pied, il laissoit des traces de pieté, largesse & magnificence royale. Estant de retour à Lisbonne, chascun en reçeut merueilleux contentement, tant sa presence estoit agreable.

*Deportement
d'Emmanuel
& estat de
Portugal.*

*La presence
du Prince ne
doit pas abo-
ler, sans esla-
bler la iustice.*

A v commencement de l'annee suiuiante il remit en deliberation de 1503. cōseil son entreprise de passer en Afrique, pour y faire guerre en personne aux Mores. Pourtant il fit leuer gens, & pouruoir aux munitions de bleds pour les nauires. Mais le degast & changement de temps rompit le coup: car au printemps les pluyes & tempestes continuelles gasterent les bleds. De là suruint vne cherté, puis la famine, dont non seulement les pauvres, mais les riches aussi furent affligez. Plusieurs viuoyent de racines d'herbes & d'autres choses, le goust desquelles ils n'eussent iamais cuidé estre bon. De là s'ensuiuirent des maladies fort dangereuses à cause du mauuais suc des viandes, & de la corruption de l'air. Le Roy voyant ceste calamité laissa pour vn temps tout pensement de guerre, estimant qu'il ne falloit auoir l'œil à autre chose qu'à faire prouision de bleds. Pourtant il donna ordre d'en faire venir grande quantité de France & d'Angleterre. En ceste annee il enuoya six nauires es Indes, trois cōduites par Alfonso Albuquerque, les autres trois par François Albuquerque son frere. En apres il fit equipper vne autre flotte dont il bailla charge à Gonsalue Coeillo, pour aller reconnoistre plus particulièrement la terre du Bresil que Capral auoit descouuerte. Mais pource que la route de ceste nauigation en pays inconnu estoit malaïsee, il auint que Coeillo perdit quatre nauires qui eschouerēt. il emplit les deux autres de bois de Bresil, dont le pays abonde, de perroquets & de singes, & reuint ainsi chargé en Portugal.

*Vn bon Roy se
monstre pere
de ses subiects.*

24. E N ceste mesme annee, le Roy enuoya deux autres nauires es pays qui

*Nauigation
de Gaspar*

*Cortereal en
Septentrion,
& ce qui s'en
ensuiuit.*

qui sont sous le Nord, afin d'essayer s'il on pourroit sauoir nouuelles de la mort ou prison de deux freres gentils-hommes vaillans. Or la chose estoit auenue comme s'ensuit. Gaspar Cortereal gentil-homme de grand cœur, & desireux de faire parler de foy, estima que le vray moyen de laisser son nom memorable à la posterité, il falloit decouurir quelques nouuelles terres. Et pource qu'il voyoit que presques tous les havres, costes, ports & descentes vers le Midi auoyent esté reconus & remarquez par les Portugalois, il resolut de courir & visiter ce qui estoit au Septentrion. Pourtant il equippa vne nauire à ses despens, bien fournie de viures, d'armes, de pilotes, marelots & soldats. Il fit voile de Lisbonne l'an mil cinq cens, & tira vers le Nord: finalement il print terre, laquelle, à cause de sa plaisante beauté, il nomma terre verte. Les gens (comme il le récita depuis) sont barbares & sauvages, de couleur blanche, qui toutesfois se ternit avec l'aage, à cause de la rigueur du froid. Ils sont fort legers du pied, bons archers à merueilles: leurs fleches sont bruslees par le bout, & en trenspécet aussi aisément leurs ennemis que si elles estoient ferrees. Ils se couurent le corps de peaux de bestes, demeurēt en des fosses, ou petites cabanes couuertes de chaume: viuēt sans religion, & neantmoins croient les deuins. Ils espouuent leurs femmes sur la pudicité desquelles ils veillent fort soigneusement: car ils sont soupçonneux de leur naturel. Cortereal estant de retour, & desireux d'en conoistre dauantage, retourna l'an mil cinq cens vn en ce mesme pays, afin de decouurir plus amplement toutes les costes d'icelui, & remarquer particulièrement les mœurs & coustumes des habitans. Mais on ne sceut iamais sauoir depuis ce qui lui estoit auenu, ni de quelle mort lui & les siens estoient peris. Or son frere Michel Cortereal, qui auoit grand credit euers le Roy, equippa deux nauires l'an mil cinq cens & deux, pour aller chercher en ces pays Septentrionaux son frere, à qui il portoit singuliere affection. Mais il ne reuint non plus que l'autre. Le Roy voyant deux gentils-hommes, que plusieurs aimoyent à cause de leur gentillesse, estre ainsi perdus, en fut extrêmement marri: & suiuant le deuoir d'un bon Printe estima qu'il falloit sauoir s'ils estoient morts ou prisonniers. Mais les nauires qui couroyēt toutes ces mers n'en peurent iamais rien entendre. Ainsi perirent ces deux freres, & la terre decouuerte par Gaspar perdit son nom de terre verte, & commença à estre appelée la terre de Cortereal. Or d'autant que leur frere aîné, nommē Vaque Jean Cortereal, grand maistre d'hostel du Roy, auoit encor quelque opinion de la vie de ses freres, il voulut entreprendre le mesme voyage: mais le Roy l'en empescha, de peur que sans aucun fruit il ne tombast au mesme danger qu'eux. En ceste annee que les Albuquerquez auoyent esté enuoyez es Indes, Emmanuel assembla les Estats de tout le Royaume, afin que les peuples fissent (suiuant la coustume d'Espagne) serment au Prince Jean, cōme au legitime heritier de leur Roy. Ce qui fut fait d'un commun consentement de tous. En ces Estats furent faites plusieurs ordonnances proufitables aux peuples qui auoyent requis ceste assemblee. Outreplus le peuple fournit au Roy certaine somme de deniers, pour les frais qu'il falloit faire en la guerre d'Afrique.

Terre de Cortereal.

Estas assemblez à la requeste du peuple.

25. P O V R reuenir à Vafque de Gama, apres auoir doublé le cap de bon-
de eſperance, il partit ſa flotte en deux, & bailla onze nauires à Vincent
Sodre pour aller à Mozambique & l'attendre là: il s'en referua quatre, afin
de prendre la route de Zofala, deſcouvrir la ſituation & façon du pays. Le
Prince le receut humainement, & contracterent amitié enſemble. Com-
me Gama leuoit l'ancre pour fortir du gouſfe, vne de ſes nauires eſchoua,
& fut perdue à l'entree du port. Les hommes & tout l'equippage furent
chargez es autres nauires. Il vint ſurgir de là en Mozambique, & commu-
niqua avec le Prince & gouuerneur de la ville. Car celui qui auoit voulu
ſurprendre les Portugallois au premier voyage de Gama, s'en eſtoit allé, &
vn autre ſubſtitué en ſon lieu, qui fit gracieux accueil au general de la flot-
te. Or Gama auoit donné charge à Vincent Sodre, tandis que lui feroit le
voyage de Zofala, de faire charpenter & dresser au port de Mozambi-
que vne carauelle, pour le baſtiment de laquelle on auoit apporté es na-
uires le bois de Portugal. Ces carauelles ſont faites en la façon que s'en-
ſuit. Elles n'ont point de hunes, ni de bois traueſant le maſt en haut, ains il
eſt attaché en traueſ vn peu au deſſous de la ſommité du maſt. Les voiles
ſont faites en triangle, & leur bout d'embas n'eſt gueres plus haut eſſeué
que les autres fournitures du vaiſſeau. Au plus bas il y a de groſſes pieces de
bois, comme vn maſt, leſquelles ſont vis à vis l'vne de l'autre aux coſtez de
la carauelle, & s'amenuiſent peu à peu contremont. Les Portugallois s'ai-
dent de tels vaiſſeaux en guerre pour aller & venir en plus grande diligen-
ce: car ils ſont tourner fort aiſément, & changēt à l'aiſe quand il leur plaift
ces pieces de bois qui leur ſeruent de maſts: ils laſchent, leuent & ſerrent
aiſément auſſi les voiles, ſelon que leur nauigation le requiert: & comme
le vent ſouffle, ils y tendent incontinent leurs voiles, reçoynent tous vents,
tellement que ſouuentefois quoy que le vent ſoit de coſté, elles ne laiſ-
ſent pas de tenir leur route droite, & ſi elles veulent rebrouſſer chemin, le
meſme vent leur ſert autant qu'il donnoit en poupe. Gama fit donc ba-
ſtir vne de ces carauelles, pour courir toute ceſte coſte, & faire tout le mal
qu'il ſeroit poſſible aux ennemis des Chreſtiens. Il la ioignit à la flotte, puis
vint ſurgir à Quiloa, où ſon frere Eſtienne ſe rêdit toſt apres avec ſes cinq
nauires. Par ainſi la flotte eſtoit de dixneuf nauires. Celle d'Antoine de
Camp, auoit eſté chaffée au loia par les vens, & n'aparoifſoit point.

*Continuation
du ſecond voyage
de Gama,
& ce qu'il fit
en Quiloa.*

*Carauelles de
Portugal.*

H A B R A H E I M Roy de Quiloa, tout eſperdu, ſe vint humilier deuât
Gama, qui à cauſe des outrages faits aux Portugallois le retint prifonnier.
Ayant demandé pardon, il fut relaché à condition de payer tous les ans au
Roy de Portugal certaine quantité d'or. Pour ſeureté de ceſte promeſſe il
donna pour plege Mahumet Ancon, perſonnage de grande autorité, &
qui ſecodoit le Roy en ces quartiers là. Mais Habraheim ſe ſentāt deliuré;
ne paya point l'or qu'il auoit promis: voulant retenir cela & eſtre cauſe de
la mort de Mahumet. Car il eſtimoit que Gama irrité de telle perfidie, fe-
roit vn mauuais parti à Mahumet. Auſſi eſtoit ceſt Habraheim vn meſchāt
& malheureux homme, qui auoit tué traifreuſement le predeceſſeur Roy
pour regner en ſon lieu, haïſſoit & tenoit pour ſuſpects tous les homes ſa-

*Roy de Quiloa
pris prifon-
nier: ſa deli-
uerance & per-
ſide.*

*Naturel des
tyrans.*

ges, vaillans & industrieux. Sur tout il redoutoit ce Mahumet, lequel ayât descouuert ceste delloyauté d'Habraheim, fit entendre à Gama le meschât tour que ce malheureux lui vouloit iouer, & paya l'or promis de son propre bien. Quoy fait Gama le relascha incontînêt. Puis s'embarqua pour aller en Melinde: toutesfoiſ à cause de la vehemence du reflux agité de grâds vents, les nauires n'y peurent aborder, ains furent portez en vn goulfe à quinze lieues loin de Melinde. Estans là le Roy y enuoya vn des bânſ nômé Louys Moure, laissé en ces lieux par Capral, afin de saluer en son nom le Capitaine, & sauoir si lon auoit faute de lui ou de ses moyés. Gama ayant fait aiguade & pourueu aux viures de la flotte en ce lieu, print la route des Indes: & comme il approchoit de terre ferme, il descourrit vne grande nauire, equippee de tout ce qui estoit necessaire pour la guerre. Elle appartenoit au Sultan d'Egypte, estoit partie de Calecut chargee de poyure, gingembre, canelle & autres marchandises de pris, & faisoit voile vers la Mecque, pour y descharger grand nombre de passagers qui y alloient en pelerinage pour voir le corps de Mahumet. Gama la fit incontînêt assaillir. Les Arabes & Egyptiens resisterent beaucoup plus viuement que lon ne sauroit croire: & s'acharnerent tellement les vns contre les autres que le combat dura iusques au lendemain matin, encor qu'une si grande flotte n'eust affaire qu'à vne seule nauire. Car les Portugallois ne la vouloyent pas mettre à fond auant que l'auoir pillée: & les autres voyans qu'on demandoit leur vie, la vouloyent vendre bien cher. Mais finalement ils furent forcez par les Portugallois qui coupperent la gorge à plus de trois cens hommes, sans espargner autres personnes que les petis enfans: pillent ce grand vaisseau & y mettent le feu puis apres. Au desmarer de là, les nauires vindrent surgir à Cananor, où Gama renuoya vers le Roy l'ambassadeur qui estoit venu en Portugal avec les presens qu'Emmanuel lui enuoyoit, dont ce Roy fut extremement ioyeux. Cela fait Gama entreprint d'aller en Calecut: & en ce voyage il print quelques almadies où il y auoit iusques à cinquante Calecutiens, lesquels il fit mettre tous à la chaine. Finalement il arriua au port & y fit ficher l'anchre.

*Combat de la
flotte de Por-
tugal contre
vne nauire du
Sultan d'E-
gypte.*

*Commence-
mens de guer-
re contre le
Roy de Cale-
cut.*

ALORS vint aux nauires vn Arabe vestu en Cordelier, lequel estant 26.
mené vers Gama, reconut franchement qu'il estoit Mahumetiste, & s'estoit desguisé en ceste façon, pource qu'il n'esperoit pas pouoir approcher de la flotte que par ceste ruse. La robbe appartenoit à l'vn des moines qui auoyent esté tuez avec Arius Correa. Or cest Arabe fit entendre à Gama que le Roy de Calecut ne demandoit autre chose que paix & amitié avec le Roy de Portugal: qu'il auoit esté extremement fâché de la sedition esmeuë par les Arabes (qui n'estoyent pas de ses sujets) contre les Portugallois. Gama respond qu'il ne demandoit autre chose que paix: qu'il estoit venu par le commandement du Roy son maistre, pour faire paix avec le Roy de Calecut, s'il estoit possible, & la confermer par certaine alliance. Si le Roy de Calecut vouloit auoir paix, qu'il monstrest quelque tesmoignage de sa volonté, & premierement rendist sans aucun delay tout ce qui auoit esté osté aux Portugallois lors qu'Arius Correa fut tué. Apres plusieurs

plusieurs messages enuoyez de part & d'autre, le Roy n'exécutoit rien à propos. Gama conut bien lors, que tout le fait de ce Roy ne cōsistoit qu'en tromperies, & n'auoit veine qui tendist à establir vne ferme paix. Et pourtant il lui enuoya dire que s'il ne rendoit promptement tout ce qui auoit esté prins, il feroit mourir cruellement en vengeance de la mort de Correa tous les prisonniers qu'il auoit en ses mains. Le Roy ne voulut faire aucune responce à ceste menace, au moyen dequoy Gama fit pēdre tous les prisonniers, & apres leur auoir fait coupper les mains & les pieds, fit mettre les corps en vn des vaisseaux qu'il auoit prins, avec lettres adressantes au Roy, auquel & à tous ses suiets il denonçoit la guerre à feu & à sang. Puis il fit pousser ce vaisseau contre terre à force de rames. Le Roy ayant receu ces lettres trop rudes & estranges pour lui, & voyant ses suiets tuez & mutilz d'une horrible sorte, fut fort troublé, & toute la ville de Calecut se mit à pleurer. Mais le general fit approcher la flotte plus pres de terre, & le lendemain à la pointe du iour commanda aux canonniers de battre viuement la ville. Plusieurs maisons furent abatues, le palais du Roy pres du havre rēuersté, & grand nombre de gens tuez. Cela fait, Gama print la route droit à Cochim, & laissa pres de Calecut Vincent Sodre avec six nauires, pour garder au long de ceste coste. Si tost qu'il fut arriué en Cochim les Portugallois, qui estoient demeurez chez le Roy, le vindrent trouuer incontinent, lui conterent combien bon traitement on leur auoit fait, & avec quelle vigilance ils auoyent esté garantis des embusches des Sarasins. Incontinent le Roy enuoya saluer Gama fort honnorablement de sa part, & ce par vn des principaux de sa maison. Il fut accordé entre eux que le lendemain le Roy choisiroit vn lieu commode, afin qu'eux deux communiquassent ensemble, d'autant qu'il lui vouloit faire entendre ce que le Roy de Portugal l'auoit enchargé de dire. Cependant il lui enuoya au nom d'Emmanuel de la vaiselle d'or & d'argent, item vne courōne d'or. Celuy de Cochim ne se voulant pas monstrier moins magnifique renuoya deux brasselets d'or garnis de pierres precieuses, & vne fort grosse perle, priant Gama de vouloir porter & presenter le tout au Roy de Portugal. Le lendemain ils deuiserent ensemble avec des tesmoignages de grande amitié l'vn enuers l'autre. Quelques iours apres vindrent certains ambassadeurs vers Gama de la part des Chrestiens qui demeurent en Cranganor. Le sommaire de leur legation fut, qu'ils ne sauoient assez remercier nostre Seigneur Iesus Christ pour le grand bien qui leur estoit auenu : car ils auoyent obtenu ce qu'ils n'eussent iamais estimé se pouuoir faire, que de pays si lointains peussent venir en ces quartiers des Chrestiens si gens de bien. Que de là en auant ils vouloyent estre suiets du Roy de Portugal, & ne reconoistre autre seigneur au monde. Partant ils supplioient Gama, de les vouloir tous recevoir en sa protection sous l'autorité de son inuincible Roy. Gama remerciant Dieu, leur donna bonne esperance de meilleure cōdition pour l'auenir, leur promettant de faire que tous les Capitaines Portugallois, que le Roy enuoyeroit de là en auant aux Indes, les deliureroient de la tyrannie des meschās qui dominoient sur eux, & les garentiroient de tous les outrages des Sa-

*Ambassade
des Chrestiens
de Cranganor
vers Vaisque
de Gama.*

rafin. Apres que ces ambassadeurs furent partis, Gama faisoit toute diligence, à ce que les nauïres eussent leur charge.

*Diverses me-
nues du Roy
de Calecut
pour attrap-
per les Portu-
gallois.*

C E pendant vn des Brachmiannes, dont le Roy de Calecut se seruoit 17.
beaucoup, vint trouuer Gama avec deux ieunes enfans, l'un son fils, & l'autre son proche parent. Il prioit Gama de vouloir mener ces enfans en Portugal, afin qu'ils y aprinsent la langue latine, la religion, ceremonies & maniere de viure des Chrestiens. A quoy Gama ne lui donna que bõrne responße. Mais apres s'estre rendu fort familier, lors il fit entendre ouuertement à Gama ce qu'il ne lui auoit osé confesser du cõmentement, a sauoir quẽ le Roy de Calecut l'auoit enuoyé pour tesmoigner que tout son desir estoit de contracter ensemble vne paix asseuree par sainte alliance, estant prest non seulement à rendre les biens des Portugallois, mais aussi à faire tout ce qu'on peut attẽdre de plaisir & seruice d'un ami priant Gama d'oublier les iniures passées, & se contenter de satisfaction. Quant à la charge des espiceries, lon ne pouuoit en trouuer plus grande quãtitẽ, ni à meilleur pris qu'en Calecut. Poutãt s'il y vouloit mener sa flotte, te seroit vn moyen d'executer ses affaires selon son desir. Gama voulut essayer si le Roy se repentoit en quelque sorte des fautes passées: & pource il laissa les nauïres en la garde de son frere Estienne, & le Brachmannẽ pour ostage, puis en toute diligence vogua vers Calecut: Oũ estant arriue il enuoya ces deux ieunes enfans vers le Roy, qui les renuoyoit, & ainsi faisoient les messages de par & d'autre. Ce pendant le Roy dresseoit des embusches: car les Arabes commẽcerent à lui faire des plaintes, & ne cessoyent de l'irriter contre les Portugallois. Lui qui estoit infidele, inconstant, & qui se mocquoit des forces que Gama auoit lors amenees, se laissa persuader par les Arabes, & le plus secrettement qu'il fut possible fit armer trente quatre brigantins pour enueller Gama tout en vn instant: ce qui fut executé en fort grande diligence. Et poutant ils viennent pour enclore Gama, lequel estonné de ce soudain accident, fit coupper les cables des anchres, & tendre la voile incontinent. Il estoit en ce peril euidẽt, quand par la grace de Dieu vn vent d'Est se leua assez fort, & poussa le vaisseau de Gama en haute mer. Neantmoins les brigantins le suiuirent à voiles & à rames. Mais comme ils approchoyent il auint que Vincent Sodre venoit au deuant avec ses nauïres: car Gama ayant par soupçon descouuert quelque chose de ce qu'on lui brasloit, encores qu'il ne pensast qu'on voulust executer vne telle meschancetẽ si soudainement, enuoya vne des nauïres vers Sodre, pour le faire venir à Calecut avec sa flotte. S'estans ioints ensemble, il tourne contre les Calecutiẽs, met en fond les vns, tue bon nombre de leurs soldats, les dissipe & contraint de se sauuer de viffesse. Estant puis apres de retour en Cochim il fit pendre le Brachmannẽ. Les enfans eschapperent, pour ce qu'ils estoient descendus en terre, auant que lon eust aucun soupçon d'une coniuuration si meschante.

*Autres me-
nues & trahis-
sons du Roy
de Calecut.*

LE Roy de Calecut voyant que les finesßes ni la force n'aubyent succedé selon qu'il pensoit, print vn autre conseil pour ruiner les Portugallois: car il enuoya lettrẽs au Roy de Cochim, par lesquelles il le prioit de lui liurer

liurer les Portugallois : lui faisant de belles promesses au cas qu'il fist ce service : au contraire il lui mettoit deuant les yeux le danger où il se trouueroit réduit, & mesme le menaçoit. Mais le Roy de Cochim fit responce qu'il s'esbahissoit fort qu'un Roy tant illustre eust pensé de conseiller les autres Rois à estre perfides. *Que c'estoit vn forfait du tout indigne des Rois de violer leur foy, & trahir ceux qui se foyent en eux : & que comme il n'y auoit vertu plus royale, que constance & fidelité, au contraire la desloyauté estoit ennemie des mœurs & façons véritablement royales : d'autant que la foy engendre gloire, mais la perfidie couure de deshonneur* perpétuel tous ceux qui s'en messent, & flestrit les Rois par dessus tous autres. n'estimant pas Roy celui qui rombroit la foy qui doit estre sainte & inuiolable : pource que ce n'est le grand pays qui fait le Roy, mais la vertu, digne de commander à tout le monde. Quant à lui qu'il ne feroit nullement cela, encores qu'il sceust certainement que pour la fidelité il seroit contraint quitter le royaume, & encourir au peril de la vie : mais qu'il auoit appris de faire plus grand cas de son deuoir que de puissance ni ioye quelcōque qu'il pourroit recevoir en ce monde. Le Roy de Calecut ne laissa de poursuiure sa pointe, & par trois fois escriuit lettres de mesme teneur au Roy de Cochim, l'allechant par promesses & l'estonnant par menaces. Mais le Roy de Cochim ne changea point de resolution : toutesfois durāt ces allees & venues il n'en descouurit rien à Gama, crainte de le troubler & faire entrer en soupçon. Mais apres que toute l'esperance du Roy de Calecut fut renueree, il fit entendre lors à Gama combien d'affaux il auoit soustenus, dont il fut humblement remercié par Gama, & exhorté de n'auoir point peur : d'autant qu'on laisseroit vne flotte es Indes qui pourroit aisément faire teste à la cruauté de ce Roy perfide.

18. A Y A N T fait ceste promesse au Roy de Cochim, il fit voile en Cananorauez treize nauires chargees, afin de faire fournir les autres trois qui estoient à l'anchre au havre de Cananor, & les joindre aux autres. Mais il n'estoit pas à plus de six lieues de Pandaranc, qu'il descouurit vingtneuf nauires que le Roy de Calecut auoit equippees & armées pour l'attrapper. Par l'auis des autres capitaines il resolut de combattre ceste flotte. Il fit voguer deuant Vincent Sodre, Pierre Raphael & Jacques Petreio, pource que leurs nauires estoient les moins chargees. Eux executans de grand courage ce qui leur estoit commandé, s'attachent à deux nauires d'Arabes qui precedoyent les autres. Ceux qui estoient en ces deux nauires, esperdus de peur, auant que Gama fust plus pres, se iettent en mer pour se sauuer à nage. Incontinent les Portugallois sautent en des esquifs, & tuent plus de trois cens hommes parmi les vagues. Les autres nauires de Calecut voyant ces deux prinſes, & les hommes tuez, tournēt en grand frayeur les proues cōtre terre. Gama voulant les suiure de pres ne peut à cause de la charge de ses nauires. En pillant ces deux nauires, ils trouuerent vne image d'or, faite d'une façon monstrueuse. Elle pesoit quarante liures. Au lieu d'yeux elle auoit au front deux esmeraudes de grand pris : aussi auoit elle en la poitrine vne escarboucle fort grosse, luisante comme vn charbon de feu, & estoit

Ceux qui ne gardent point la foy, ne sont pas dignes de commander.

Alliance de Gama avec les Rois de Cochim & Cananor : & son retour en Portugal.

vestue d'un manteau d'or. Apres que ces nauires furent vuides, Gama y fit mettre le feu, afin d'estôner les autres encôres dauâtage. De là il fit voile vers Cananor, & traita alliance avec le Roy, par laquelle estoit dit que iamais le Roy de Cananor ne feroit guerre contre le Roy de Cochim, ni ne coniueroit avec celui de Calecut, ni ne lui enuoiroit secours aucun contre le Roy de Cochim. Puis apres il laissa en sa protection les Portugallois qui deuoyent manier les affaires du Roy de Portugal. Il sortit de là le vingthuitiesme iour du mois de Decembre l'an mil cinq cens deux. Mais Vincent Sodre fut laissé avecques six nauires, & charge de maintenir les Rois allies contre toutes courses, & faire guerre sans cesse aux ennemis: & si le Roy de Calecut vouloit faire guerre à celui de Cochim, qu'il destournaist, autant qu'il pourroit, la guerre loin de Cochim. Mais si l'ennemi n'entreprenoit rien auât le mois de Feurier, que lors il fist voile en la mer d'Arabie, pour y faire la guerre aux Arabes. De là les nauires prindrent la route de Mozâbique, où Gama les fit fournir d'eau douce & de viures. Or comme la flotte approchoit du Cap de bonne esperâce, elle en fut chassée loin par vne tempeste, & la nauire d'Estienne Gama séparée des autres ne peut tenir la mesme route. Finalement la flotte de Gama, qui estoit de douze nauires, vint mouiller l'ancre au port de Lisbonne, le premier iour de Septembre, l'an mil cinq cens & trois: dont le Roy, tous les Seigneurs & tout le royaume furent merueilleusement ioyeux. Six iours apres, Estienne, ayant eu vent à souhait, arriua au mesme port.

*Guerres & di-
uers accidens
des Portugal-
lois contre les
Mores en A-
frique.*

ENVIRON ce mesme temps les affaires d'Afrique estoient en l'estat 29.
qui s'ensuit. Il y a vne ville en Barbarie nommée Caserquibir, assez pres du destroit de Gibraltar, & au long duquel passe le fleuve Lusso, qui n'est pas grand, mais les pluyes l'enflent quelquesfois de telle sorte, qu'il se desborde & entre dedans la ville. On dit que ceste ville fut bastie par Mansor Roy de Maroc qui estoit Roy & Pontife ensemble, comme les autres que les Mahumetans appellent Caliphes. Il n'y a fontaines ni puits en ceste ville, ains seulement l'eau des cisternes & de la riuere: neantmoins elle est fort marchande & frequentee des gentils-hommes. Il y auoit eschole de philosophie & des sciences liberales, tellement que de toutes parts y arriuoient gens pour estudier. Semblablement il y auoit vn grand hospital, où lon pensoit plusieurs pauures & malades tourmentez de diuerses maladies. Le pays estoit couuert d'arbres, & d'herbes potageres, ayant des vergers fort beaux & bié disposez. Le terroir est fertile & gras, tellement que souuêtesfois il rapporte trente pour vn. Apres que le Roy Alphonse cinquiesme eust conquis la ville d'Arzile, le Roy de Fez fit fortifier Caserquibir, y mit grosse garnison & des Capitaines, qui ne cessoyêt de faire des courses iusques aux portes d'Arzile, ce que le Roy Emmanuel portoit fort impatiemment. Pourtant il escriuit à Jean de Menesez ou Menez, gouuerneur d'Arzile, de ne laisser aucunement en repos Caserquibir. Or au temps duquel nous traitons maintenât, Jean Menez, Côte de Tarauce qui auparauant auoit mené la flotte de Portugal au secours des Venitiens contre Bajazet Empereur des Turcs, estoit gouuerneur de Tingi. Pour effectuer plus commodemēt

ce

ce qui lui estoit enioint. Menez gouuerneur d'Arzile escriuit au Conte de Tarauce son cōpagnon (car ils portoyēt mesmes armes & auoyent part à vne mesme seigneurie) le priant se venir ioindre avec lui, pour l'affaire dōc il lui donnoit aduertissement. Le Conte part de Tingj avec deux cens cheuaux & se rendit dans Arzile. Menez mit aux chāps deux cēs cinquāte cheuaux biē resolu. S'estant mis ensemble, ils prennēt le chemin de Caserquibir en grand silence, & ehuiron la minuiēt approchēt d'un pont eslongné quinze lieues loin d'Arzile. Mais ils ne peurent trōper les sentinelles de l'ennemi. Le gouuerneur de Caserquibir ayant oui ces nouuelles, fait sonner à l'arme & monter ses gens à cheual: puis au point du iour se range avec ses troupes en vn costau ptes de la ville, nōmé le costau de plaisir. Il les met en ordre pour combattre attendant les Portugallois. Le Conte de Tarauce enuoya demander au gouuerneur d'Arzile ce qui lui sembloit de la troupe des ennemis. Tout va biē, respōd-il: car nous auōs trouuē ce que nous cerchions. Pourautant donc que les vns & les autres ne demandoient sinon à venir aux mains, les deux Contes disposerēt leurs gens, & commanderent aux enseignes de marcher. Cependant les ennemis se mirent à escarmoucher & faire des courses pour harasser les Portugallois & les cōtraindre de rōpre leurs rangs, auant que de venir ensemble au cōbat. Mais ayant conu que personne ne vouloit se desbander, eux se reioignēt, & commencent à descendre du costau à la file pour combattre en gros. Les Portugallois gagnent le costau, & chargent furieusement les Mores qui se sauuent incontinent à bride aualee. Mais on leur chaussa les esperōs de si pres, que cēt quatre vingts furēt tuez pres des fosses. Ceux de la ville tout esperdus ferment les portes, & ouurirēt tellement à leurs gens, qu'ils ne les laisserēt pas entrer tous: car ils craignoyēt que leurs ennemis estans à dos n'entraissent & prinsfent la ville au mesme instāt. Le desespoir cōseilla ceux qui estoient demeurez dehors de s'vnir ensemble & se fuer à trauers ceux qui les pressoyent. Le cōbat recōmence, plusieurs Portugallois sont blesez, & leurs cheuaux tuez. Edouard Menez fils du Cōte de Tarauce fut blez au visage, Pierre Leitan aussi: mais il n'y eut personne tuē, à cause que ceux qui estoient detriere suruindrēt au secours des blesez. Les chefs furent d'avis de remener leurs trou pes & s'en retourner cōme ils estoient venus. Estans arriuez pres d'un petit pont à vne lieue loin de la ville, ils descourirent le gouuerneur qui les suiuoit avec neuf cēs cheuaux. Ils passent le pont, & se rangēt en la campagne pour soustenir l'ennemi, resolu de l'assaillir si tost qu'une partie auroit passé le pont. Or les Mores craignās cela ne voulurēt passer le pont, sinon quād ils virent les Portugallois fort loin. Ce pendant de toutes parts acouroyent Mores, & en poursuuiāt leur chemin le nombre croissoit: tellement qu'ils commencent à s'auancer plus hardiment & ferrer de pres leurs ennemis, iusques à ce que les vns & les autres furēt pres de l'autre pont. Alors le gouuerneur de Caserquibir estoit acompagné de treize cens cheuaux. Les Mores estimoient que les Chrestiens passeroient le pont en desordre & crainte, qui leur feroit rompre leurs rangs: mais tout le contraire auint: car l'auantgarde ne passa point en meilleur ordre que l'arrieregarde, sur laquelle

les Mores faisoient leurs courfes. Apres auoir paſſé ce pont, les Contes remirent leurs troupes en bataille, donnans le choix à leurs ennemis de combattre ou non. Les Mores n'oſerent paſſer, ains ſe retirerent en la ville & es villages circonuoifins. Il n'y eut pas vn ſeul Portugalloiſtué lors.

*Autre courſe
ſur les Mores
Et ce qui en
auint.*

QV'ELQV'ES iours apres, les deux Contes mirent leurs compagnies aux champs, pour aller ſurprendre vne troupe de Mores demeurans en certains villages ſur vne riuiera aupres de Caſerquibir. Mais ils en furent auertis par vn eſpion Chreſtien renié, Flamen de nation, & ſe retirerent de nuit. Neantmoins les Portugallois en tuerent cinquante, & en emmenerent autres cinquante priſonniers qui n'auoyent pas eſté aſſez habiles. Or comme ils eſtoyēt ſur leur retraite, vn bataillō de Mores les vint aſſailir: eux reculent tellement que par fois ils ſe deſbandoyent en troupe pour charger ceux qui les ſuiuoient de trop pres, & en tuoient pluſieurs. Les Mores d'autrepart ne ceſſoyent d'eſcarmoucher & aſſaillir, endommageāt bien fort les Chreſtiens. En cēſte rencontre Pierre Souſe vaillant capitaine ſe trouua en danger de ſa vie, comme il vouloit rafſembler ſes gens & rompre l'effort des ennemis. Mais combiē que le combat fuſt perilleux à cauſe du grād nombre des Mores, toutesſois il n'y eut que quatre Chreſtiēs tuez. Par ainſi maugré les Mores, ils s'en retournerent en Arzile avec leur butin. En la meſme annee, Menez entendāt qu'en vne montaigne à dix lieues loin d'Arzile, y auoit certain nombre de fort belles femmes gardees par vaillās ſoldats qui les aimoyent ardamēt, reſolut d'y aller, afin d'enleuer ces femmes & les enuoyer à la Roine de Portugal. Mais il auoit à trauerſer pluſieurs villages avec grand danger. Ainſi donc vn ſoir que les tenebres eſtoient fort eſpaisses, & faiſoit vn brouillaz & temps faſcheux, eſtant ſuiui de deux cens cheuaux, il marcha ſi à couuert & ſecrettement que perſonne ne l'apperceut: tellement que ſur les trois heures apres minuit il ſe trouua pres du plus grand village de cēſte montaigne. Auant que les ennemis peuſſent rien ſauoir de ſa venue il fit allumer certains flambeaux de cire portez expres, afin qu'à la clarté d'iceux les Chreſtiēs viſſent ce qu'ils auoyent à faire durant l'effroy des ennemis. Alors le ſon des trōpettes, le cliquetis & bruit des armes eſtonna tellement les Mores demi endormis, que la pluſpart ſe mit ſoudainement en fuite: aucuns toutesſois, ramassez çà & là, combaterent vaillamment en cēſte extremité de leurs vies. Les lamentations & hucces des femmes, & les hauts cris des hommes eſueillerent tous les Mores des villages voiſins. Mais dautant qu'ils ne ſauoyent le nombre des Portugallois, ni quel ou combien grand eſtoit ceſt accident, ſ'imaginans vn danger beaucoup plus grand, & n'ayans aucun chef qui leur commandaſt: au lieu de venir au ſecours, prindrent leurs femmes & enfans, & s'enfuirent au plus reculé de la montaigne, où ſe cacherent dans les bois. De ceux qui eſtoient en armes & firēt teſte, y en eut quatre vingts tuez, ſoixante hommes & femmes prins priſonniers, le village pillé ſans aucune reſiſtance. Entre les femmes priſonnieres eſtoient quelques vnes de celles qu'on priſoit tant, & pour l'amour deſquelles ce perilleux voyage auoit eſté entrepris. Cela fait, Menez ramena ſes troupes, & tāt que la nuit dura

dura personne n'entreprint de courir apres. Or au point du iour il fut assailli d'une grosse troupe de Mores : mais il marchoit en si bon ordre, qu'ils ne lui pouuoient rien faire. Toutesfois en quelques lieux les Portugallois se trouuerent en grande extremite, où y eut aspre conflict, & plusieurs Chrestiens furent fort blesez, quelques cheuaux tuez sous eux. Menez aussi se trouua en fort grand danger de sa vie : ce nonobstant tous les Chrestiens eschaperent, & reuindrent saufs en Arzile avec tout leur butin.

FIN DV SECOND LIVRE.





L E TROISIÈSME LIVRE.

SOMMAIRE.

- | | |
|---|--|
| <ol style="list-style-type: none"> 1. <i>État des Indes : fidélité du Roy de Cochim envers les Portugallois, par qui il est abandonné.</i> 2. <i>Harcas de Nambecadorim au Roy de Calecut, sur le fait de la guerre qu'il entreprenoit contre le Roy de Cochim & les Portugallois.</i> 3. <i>Guerre du Roy de Calecut contre celui de Cochim allié des Portugallois, & les accidens d'icelle.</i> 4. <i>Navigaton de Vincent Sotro en la mer d'Arabie, & sa mort.</i> 5. <i>État des affaires de Portugal.</i> 6. <i>Discours sur les affaires d'Afrique, spécialement de la découverte du pays de Congo, & des choses admirables faites en icelui.</i> 7. <i>Voyage des Albuquerque aux Indes, où ils re-stablissent le Roy de Cochim en son Royaume, font bastir une forteresse en Cochim : leurs combats & victoires.</i> 8. <i>Description de la ville de Coulam, & alliance d'Alfonse Albuquerque avec la Roine de ce lieu.</i> 9. <i>Paix entre les Portugallois & le Roy de Calecut, par qui rompt & comment, & ce qui arriva aux Albuquerque.</i> 10. <i>Navigaton & divers accidens survenus à An-</i> | <ol style="list-style-type: none"> <i>toine Saldagne, & à ses capitaines, spécialement en Zanzibar & Mombasa.</i> 11. <i>Affaires du Royaume de Portugal.</i> 12. <i>Guerres & accidens divers survenus entre les Portugallois & les Mores en Afrique.</i> 13. <i>Guerres du Roy de Calecut contre celui de Cochim & les Portugallois.</i> 14. <i>Victoires admirables & diverses des Portugallois conduits par Edouard Pacheco contre le Roy de Calecut & les siens, tant par mer que par terre.</i> 15. <i>Le Roy de Calecut quitte le Royaume, & Pacheco victorieux demeure renommé & redoutable par toutes les Indes.</i> 16. <i>Navigaton de Lamp Soares : & ce qu'il fit en Calecut & en Cranganor.</i> 17. <i>Guerre de Soares, contre ceux de Cranganor, & l'issue d'icelle.</i> 18. <i>Description de Cranganor, & des mœurs, coutumes & ceremonies des Chrestiens qui y habitent.</i> 19. <i>Discours sur le tombeau de l'Apôtre Saint Thomas à Malipur en Indes : & des miracles par lesquels anciens remarquent l'antiquité des Chrestiens en ces pays là.</i> |
|---|--|

Fidélité du Roy de Cochim envers les Portugallois, remarquable contre la perfidie de plusieurs Chrestiens envers les Chrestiens mesmes.



VRANT ces affaires d'Afrique, le Roy de Cochim, nommé Trimumpara, se trouvoit reduit en grande perplexité. Car le Roy de Calecut delibera de leur gens & faire vne grande armee pour le ruiner & chasser du Royaume de Cochim, à cause de son alliance avec les Portugallois. Il y en auoit plusieurs au cōseil de Trimumpara, qui taschoyent lui persuader de mettre es mains du Roy de Calecut ceux que Gama lui auoit commis en garde, & racheter par la mort d'un petit nombre d'hommes, ennemis de leur religion & façon de viure, la prosperité de lui & de tout son royaume. Mais au lieu de suiure ce conseil, il tança fort asprement ceux qui le lui donnoient : adioustant qu'il n'estimoit pas le Roy de Calecut tant aduerfaire qu'il le voulust despouiller de son Royaume & lui oster la vie : qu'il tenoit pour

pour ennemis ceux qui l'admonnestoyent de rompre la foy. Que le cours de ceste vie est brief, & la possession d'un royaume de petite duree: mais que la fiesstrisure de desloyauté demeure à tousiours. Partant qu'il aimoit mieux estre chassé du royaume, & se trouuer es dâgers de perdre la vie, que d'estre reputé infame, pour auoir failli tant soit peu à tenir sa promesse. Les choses estâs ainsi troubles, Vincent Sodre artiuua en Cochim avec la flotte: & comme il deliberoit de se remettre en mer, Jacques Fernand Correa qui auoit esté laissé en Cochim par Gama pour solliciter & pouruoir aux affaires du Roy de Portugal, pria Sodre de ne vouloir alors abandonner le Roy de Cochim, qui estoit en si grand danger seulement à cause de l'alliâce & amitié qu'il auoit avec les Portugallois. Qu'il auoit esté laissé en ces quartiers avec vne flotte bien armee, spécialement pour garantir les amis de l'effort des ennemis. Dauantage, il le prioit de cōsiderer quel deshonneur ce lui seroit de liurer leurs alliez en la puissance des Calecutiens: & que le nom de traistre ne conuenoit pas seulement à ceux qui contre leur foy machinoyent la ruine de leurs alliez: mais aussi à ceux qui abandonnoyent leurs amis au besoin. Vincent Sodre fit responce que le Roy de Portugal ne lui auoit donné charge sinon de courir sus aux nauires qui iroyent d'Arabie es Indes, & qu'il ne vouloit point laisser en arriere sa cōmission. Sur quoy Correa replique qu'il ne faloit pas tousiours cōsiderer les mots, mais l'intention du Roy. Que les euenemens sont diuers, & que selon la nouveauté des accidens il faut changer de conseil. Que iamais le Roy de Portugal n'auoit entendu que Sodre abandonnast vn Roy son allié ni ses suiets estans en danger: ne qu'il fist guerre, sinon lors que les prochains ennemis ne diroyent mot. Ayant mis en auant plusieurs autres raisons à ce propos, appelé Dieu à tesmoin, & demadé acte public de la requeste, il ne gagna rien pourtant. Car, ou la crainte, ou l'esperance du butin, esmût plus Vincent Sodre que la foy luee ni son deuoir. Tellement qu'il print sa route vers l'Oest, & vint se rendre au destroit de la mer d'Arabie.

Crainte & auarice malheureux conseil.

2. O R Naubeadarim ieune Prince, eloquent, instruit soigneusement par les Brachmannes en toutes leurs sciences, fils de la sœur du Roy de Calecut, & selon les loix du pays vnique heritier du royaume: ne pouuant approuuer l'auis de son oncle touchant la guerre contre le Roy de Cochim & les Portugallois, harangua deuant luy, comme lon assure, en termes dont la substance fut telle.

» COMBIEN que mon aage semble plus propre à receuoir conseil qu'à
 » le donner: toutesfois d'un costé la force d'amitié, de l'autre la grandeur du
 » peril me sollicite de descouurir ma conception en choses si importantes.
 » De nature vous estes mon oncle, Sire, & mon pere bié aimé quant à l'amitié
 » que ie vous porte en mon cœur. Ioint que si par mauuais conseils les re-
 » uenus de vostre royaume amoindrissent, il n'y a homme qui apres vous y
 » perde plus que moy: au contraire, si par bons auis vostre royaume est con-
 » serué, se bien & proufit m'en reuiendra. Et poutât ie vous supplie d'escou-
 » ter patiemment ce que ie veux dire, considerez que vous oyez parler vn
 » homme qui vous touche plus pres que nul autre, de sang, d'amitié, & de

Belle harangue de Naubeadarim.

compagnie au danger. Si ie di quelque chose à propos, mon desir est que vous l'approuviez: mais si ie m'abuse, vous ferez lors ce que vous conoistrez estre plus expedient. Vous faites de grands apprêts pour ruiner Trimumpara. Ce n'est pas chose dont il se faille esbahir, veu que c'est l'ordinaire des Rois de courir sus les vns aux autres. Mais considerons la cause de la guerre: car bien souuent on void finir malheureusement les guerres entreprises sans legitime occasion. Quoy donc? A-il refusé de payer le tribut? S'est-il rué en armes dedans vostre royaume? Y a-il quelque coniuuration de lui contre vous? Rieu moins. Quel pretexte pouuez-vous donc auoir, pour l'aller assaillir si rudement? Vous direz, qu'il ne vous a pas liuré, comme vous le lui comunâdiez, certaines gens à qui il a promis la foy: lesquels vous voulez faire mourir truellemēt à cause de la haine que vous portez aux Portugallois. Ainsi donc, vous estes mari que Trimumpara n'a point voulu violer le droit des gens, ni faucher sa foy. Comment donc vous porterez vous enuers ceux qui cōmettent infinies meschancetez contre le droit diuin & humain, si vous estes tant ennemi de ceux qui n'ont rien en plus grande recommandation que leur foy & deuoir. Ferez vous du bien à ceux qui ont merité le gibet cēt & cent fois? Le ne l'estime pas. Car c'est vne chose royale de faire mourir les traistres, & reculer de tous biens & honneurs les meschans. Vous repliquerez, que Trimumpara fauorise ceux qui vous ont fait grand tort. Ici ie vous supplie, autant qu'il m'est possible, de prendre en bonne part ce que ie diray. C'est raison que tous soyent esmeus & indignez des offenses commises contre vostre maiesté par qui que ce soit. Mais quant aux Portugallois, ils ne font rien, à mon auis, que lon doit ue beaucoup blâmer. Ils se monstrēt vaillans, sentent quand on les blesse, combattent estans assaillis, & se vengent asprement des outrages qu'on leur fait. S'ils auoyent entrepris les premiers quelque chose contre vostre estat, vous auriez raison de les en vouloir chastier: mais ils n'ont rien fait, au contraire pour executer ce que requeriez, ils vous ont donné vn vaisseau avec tout le butin d'icelui par eux subiugué. Quand ceux qui estoient en terre, sous vostre protectiō & sauuegarde, ont esté trahis, pillés & cruellement meurtris sans aucune raison: c'est raison de punir les auteurs de la sedition & de tous les maux auenus depuis, non pas les Portugallois qui se vengent d'une si detestable cruauté. Il y a long temps que nous supportons, les Arabes, nous conoissions leurs fraudes & embusches: nous n'ignorons pas combien ils sont subtils à forger des mensonges. Tout cela estoit au cunement supportable, lors qu'ils estoient encor petis compagnons: mais maintenant les biens qu'ils ont gaignez en vostre royaume les rendent si fiers qu'ils ne permettent qu'on les supporte dauantage. Ils ne sauēt plus que c'est d'obeir, ains taschent de donner loy à vostre puissante maiesté. De quelle audace & fierté les void-on marcher maintenant? Avec quelle assurance trottent-ils où il leur plaît? Combien sont-ils eshontez à s'auancer & insinuer? S'ils veulent obtenir quelque chose de vous, le font-ils pas avec brauades? Brief, ils se sont esleuez iusques là, que si vous leur prestez l'oreille, ce royaume sera gouuerné à leur appetit. Car que demandent-ils? Exterminez

» minez ceste nation qui nous est ennemie. pourquoy donc ? Si on la reçoit,
 » vous chassera-on pour cela ? Nullement. Mais nos yeux ne peuuent voir les
 » Chrestiens. Nous craignons aussi que le gain que lon faisoit auant leur ar-
 » riuée ne diminue. Et pourtant nous ne vous requerons plus, mais selon no-
 » stre droit nous demâdôs que vous cõtentiez nostre œil delicat, & assouuis-
 » siez nostre auarice insatiable par le danger de vostre royaume, & l'infamie
 » de vostre nô. Toutesfois ils alleguēt qu'il importe pour le public que ceste
 » nation tant adroite aux armes soit chassée des Indes. Quoy donc ? Si vous
 » coupez la gorge à quelques hommes logez en Cochim, abolirez-vous
 » pour cela toute la nation Portugalloise ? Non certainement. Qui pis est,
 » vous irriterez dauantage contre vous ceux qui viendront puis apres. Si dôc
 » ils sont si forts que ceux-ci criēt, c'est à faire à vous suiuiāt leurs propres pa-
 » roles de decliner ce mal : & puis que les Arabes vous font peur des armes
 » des Portugallois, il vaut bien mieux, pour le repos de vostre royaume estre
 » ami de telles gens que les auoir pour ennemis. Car il auient souuent que
 » ceux qui sont les plus aspres en guerre, sont les plus fermes & loyaux quād.
 » On s'est revni à eux. L'un & l'autre procede de mesme source de magna-
 » nimité. Or ie crain que les Portugallois n'enrichissent le Roy de Cochim
 » de vos despouilles, & que quand vous ferez le plus foible, plusieurs ne se
 » moquent de vous. Car ie m'assure que vous verrez bien tost ceste mer
 » couuerte de voiles, & que les armées ennemies ne fassent vn merueilleux
 » rauage de ceux qui leur auront fait quelque tort. Et pourtant i'estime ces
 » Arabes vos plus grands ennemis. Premièrement, en ce que par leur auarice
 » & la haine irreconciliable qu'ils portent aux Portugallois, ils veulent abu-
 » ser de vous, Prince tresillustre & digne de cōmander en ce royaume, pour
 » faire que vous rompiez la foy & defailliez à vostre deuoir. En apres, leur
 » orgueil les a tellement enflés qu'ils cuident que vostre royaume doye e-
 » stre gouuerné à leur fantaisie : combien qu'en ce meurtre par eux commis
 » deuant vos yeux, ils ont mis vne indigne tache d'infamie perpetuelle sur
 » vostre nom : car personne ne croira qu'ils ayent osé iamais entreprēdre vn
 » si meschant acte, qu'à vostre auen. Finalement, en ce qu'ils vous conseil-
 » lent, au grād danger de vostre estat, d'estre ennemi de gens vaillans, à l'aide
 » desquels vous pouuez deuenir plus riche & plus puissant. Pourtant suis-ie
 » d'avis que vous laissiez ceste guerre, & faciez vne bonne paix avec ceux de
 » Portugal, qui sont loyaux, equitables, & gardent estroittemēt leur promes-
 » se, à ce que lon dit : & que leur faciez raison des torts qu'ils ont receus des
 » Arabes. Autrement, ie crain, ce que les Dieux ne vueillent, que le conseil
 » de ces garnemens qui veulent troubler vostre royaume, n'attire beaucoup
 » de maux sur ce pays. Quant à moy, mon deuoir me commāde de vous sui-
 » ure par tout, quoy qu'il en auiene : car ie suis prest de perdre la vie pour
 » l'accroissement de vostre grandeur. Toutesfois i'ay estimé que l'obliga-
 » tion que i'ay enuers vous requeroit que ie deschargeasse mon cœur. Or ie
 » prie les Dieux, qu'ils fauorisent ce que vous conoistrez estre bō d'executer.

3. E N C O R E S que Naubeadarim eust souuētesfois repeté le mesme pro-
 pos, toutesfois il lui fut impossible de destourner le Roy de sa deliberatiō,

*Guerre du Roy
 de Calicut cō-
 tre le Roy de*

*Cochim alli-
des Portuga-
lois, & les ac-
tens d'elle.*

D'autre costé Trimumpara leuoit gens, & en toute diligence donnoit ordre à tout ce qui estoit requis pour repousser le danger de la guerre. Mais d'autant que le Roy de Calecut estoit fort riche, & que plusieurs tenoyent celui de Cochim desia pour ruiné, ils se rangeoyent avec le Roy de Calecut, abandonnans l'autre iusques là, que quelques vassaux du Roy de Cochim se reuolterent pour prendre le parti de son aduersaire : entre autres les sieurs de Chirabipile & de Cambala, & le Prince d'une Isle qui est vis à vis de Cochim. Ainsi donc le Roy de Calecut vint avec une grande armee à Repelin, à huit lieues loin de Cochim. Sur ce, les Portugallois viennent trouver le Roy de Cochim, le prient de ne charger sur ses bras à cause deux vn si pesant fardeau de guerre. Qu'ils se retireroient en Cananor, afin d'y attendre la flotte de Portugal. Le Roy fit respõce qu'il s'esbahissoit fort que gens resolu comme eux, & qui estoient ses amis & familiers, en vinssent là de redouter ses ennemis, ou douter de sa fidelité : partant qu'ils demeurassent, & fussent assurez que tous encourroyent vn mesme hazard : qu'à lui, que iusques au dernier soupir de sa vie il combatroit pour le Roy de Portugal. Cela dit, il eslut pour chef de son armee Naramuhim fils de sa sœur, lequel deuoit regner apres lui, & estoit estimé vaillant entre tous autres. Il l'enuoya avec cinq mil cinq cens hommes pour garder le destroit, par où le Roy de Calecut deliberoit passer. Car les deux royaumes sont diuisez par vn grand entredeux de mer. Le lieu par où le Roy de Calecut pensoit entrer en Cochim est tel, qu'apres que la maree est remōtee on le peut passer à gué. Le Roy de Calecut ayant là amené son armee, commanda incontinent à ses auantcoureurs de fonder le gué : mais ils furent tellement repoussez, qu'ils perdirent grand nombre des leurs. Le lendemain y il enuoya le gouuerneur de Repelin avec une bonne troupe de braues soldats, pour chasser Naramuhim, & faire que le reste de l'armee peust passer puis apres sans empeschement. Pour executer cela plus aisément il fait poser nombre de pataches chargees de gens de guerres à l'endroit où le gué estoit plus profond, non pas guerres loin, afin de pouoir secourir leurs gens, & transpercer les ennemis à coups de fleches. Toutesfois ce iour là Naramuhim fit plus grande resistance qu'auparauant, & tua plusieurs des ennemis. En ces combats il s'aidoit principalemēt du conseil de Laurent Morene, homme vaillant, lequel, avec ceste petite troupe de Portugallois restee en Cochim, donnoit vn grand secours. Combien que les ennemis assaillissent souuent le passage, ils furent tousiours repoussez avec la perte de ceux qui s'auançoient des premiers. Finalement ils s'espandirent par les villages appartenans à Trimumpara, & firent tout le mal dont il se peurent auiser. Mais Naramuhim se trouuoit par tout, ou en personne, ou par les Capitaines qu'il y enuoyoit, repoussant ces fourrageurs, & tousiours obtenoit victoire faisant tōber beaucoup d'ennemis sur la place. Le Roy de Calecut voyant que la peau de lyon ne lui seruoit pas comme il auoit pensé, s'auisa d'y couler celle du regnard. Et pourtant il enuoya homme vers le Thresorier de Cochim, qui, selon la coustume du pays, payoit de iour en iour la solde des gens de guerre, & par grands presens & promesses le sollicita de ne point payer

*Traisires en
vendus les au-
tres se vendus
les premiers.*

payer les soldats. Ce thresorier, gaigné par argent, fit semblant d'estre malade, & se retira incontinent à Cochim, aduertissant les soldats de l'y venir trouuer, s'ils vouloyent toucher deniers. A cause de quoy plusieurs se retiroyēt en Cochim, & n'estoit possible à Naramuhim de les retenir. Le thresorier différoit le payemēt de iour en iour. D'autre costé, les ennemis n'approchoyent aucunemēt du gué, afin d'endormir ceux de Cochim. Le Roy de Calecut voyant les soldats escoulez, & que ceux qui restoyent n'estoyēt pas autrement sur leurs gardes, il commande soudainement aux pataches de s'approcher, repousser les ennemis à coups de trait & de canons, passer le gué en toute diligence, & rompre les corps de garde de Naramuhim. Les soldats executent de grand courage en la presence du Roy ce qui leur estoit commandé. Il estoit nuit quand l'assaut commença, & le Roy de Calecut entendit par vn espion & par l'aduertissement du thresorier, que le port estoit desnudé à cause du depart des soldats, & de la nonchalance de ceux qui estoyent restez. Naramuhim acourt au bruit: mais ne pouuant soustenir la multitude & l'impetuosité des ennemis, apres auoir vaillamment combattu quelque temps il fut tué à coups de fleches. Deux ieunes hommes ses parens moururent de mesme sorte avec lui: & auant que tomber par terre, se firent bien sentir à leurs ennemis. Il y eut grand meurtre de part & d'autre: le combat ayant commencé deuant iour, dura iusques au soir: & finalement ceux de Cochim se sauuerent à la fuite. Les Calecutiens courent apres, mais la nuit suruint qui les empescha de passer outre.

*Desfaite de
ceux de Co-
chim.*

TRIMUMPARA ayant oui les nouuelles de ceste desfaite fut effroyé: neantmoins il voulut essayer le dernier remede de la guerre. Et pourtant il assembla autant de gens qu'il put, & vint donner la bataille aux ennemis. Il en auint ce qu'on void succeder es combats où peu de gens afoiblis & esperdus s'attachēt à vne multitude asseuree & acharnee à cause de quelque victoire precedente. Ainsi Trimumpara fut mis en route, & se retira en vne Isle, commandant qu'on y passast les Portugallois qui estoient avec lui, lesquels il conserua aussi fidelemēt parmi ces tempestes, comme si à l'aide d'eux, pour lesquels tant d'inconueniens lui auenoient, il eust esté garanti de toute incommodité. Derechef le Roy de Calecut lui enuoya des ambassadeurs en ceste Isle, promettant de le r'establiir en tous ses biens, pourueu qu'il liurast les Portugallois qui estoient en sa puissance. Trimumpara respond qu'on lui pouuoit oster le royaume & la vie, non pas la foy. Ceste responce irrita tellement le Roy de Calecut, que tout à l'heure il commanda qu'on bruslast la ville de Cochim: puis resolut de conquerir toute l'Isle. Mais la situation est telle, & de nature ceste Isle est si forte, ioint les garnisons qui y estoient, que le Roy de Calecut n'en pouuoit pas aisēmēt venir à bout. Et pourtant lors qu'il voulut l'enuahir, il fut chassé plusieurs fois par la vaillance de ceux qui la gardoyent, & perdit grand nombre d'hommes. Or pource que l'huiuer approchoit il fut contraint leuer le siege, & retourner en Cochim qu'il fit fortifier, & y mit garnison: puis se retira avec resolution de retourner assaillir & conquerir

*Fidelité & ex-
cellēte respon-
se du Roy de
Cochim.*

l'Isle au printemps. Plusieurs considerans la miserable condition de Trimuinpàra apres la mort de Naramuhim, se reuolterent malheureusement de lui & des Portugallois semblablement. Entre autres deux Milannois, qui par la permission du Roy Emmanuel s'estoyent embarquez avec Gama en son second voyage. Iceux oublians la religion, s'enfuirent vers le Roy de Calicut, & firent depuis beaucoup de mal aux Chrestiens. Mais tant plus la perfidie de ceux qui se disoyent Chrestiens estoit detestable, plus apparut excellente la fidelité de ce pauvre Roy barbare, laquelle fut si grande qu'il ne se soucia point d'estre chassé de ses pays, priué de son royaume, & de tous moyens, & reduit en extreme danger de sa vie pour des gens qu'il ne connoissoit que bien peu auparauant, lesquels n'estoyent ses parens ni alliez, de droit ni de religion. Certainement voila vn rare exemple de fidelité & de preudhommie, digne d'estre recommandé à tous ceux qui viuent ci apres.

*Deux Milan
nois se reuol-
tèrent, & quer-
rent le Chrestien-
isme, & adu-
er-
sèrent le Roy de Co-
chin idolatre
garde la foy
promise.*

*Nauigation de
Vincent Sodre
en Arabie, &
sa mort.*

4. Cependant, Vincent Sodre print la route d'Arabie, & faisant voile au long de la coste de Cambaja, il rencontra cinq nauires d'Arabes, chargees de grandes richesses, lesquelles il print, butina & brussa. De là il fut porté en des Isles vn peu eslongnees du Cap de Guardase, assez pres du goulfe de la mer Arabique. On les appelle Curia Muria: où il delibera calfeutrer ses nauires. Ces Isles estoyent habitees de Sarasins, qui recueillirent la flotte benignement, & vendirent à moyen pris les viures dont les Portugallois auoyent fauté. C'estoyent gens de labeur, & qui ne se soucioient aucunement de la guerre. Or voyans qu'on tiroit en terre la nauire de Pierre Ataide, afin de la poisser & calfeutrer (car elle faisoit eau en quantité & estoit fendue en diuers endroits) ces Insulaires acourent & exhorter les Portugallois de ne demeurer pas dauantage en ce lieu: pource qu'au commencement du mois de May suruenoit vn vent de Nord qui brisoit & enfondroit tous les vaisseaux qui se trouuoient en ce havre: & qu'ils ne se pourroyent garantir, s'ils attendoient ce temps. Vincent Sodre ne fit conte de cest aduertissement: & combien qu'iceux le suppliasent, & les autres Capitaines le pressassent, disans qu'il ne falloit pas mespriser vn tel conseil qui se pouuoit aisément executer: que lon pouuoit mener les nauires en vne rade plus seure vers le Su: que le changement se pouroit faire sans danger: que tous ceux du pays iuroient que c'estoit chercher la mort de demeurer plus long temps là. Neantmoins Sodre demeura fiché en son opinion. Pierre Raphael, Fernand Roderic, & Jaques Petreio capitaines de trois nauires, indignez de telle obstination, quitterent Sodre, le dernier iour d'Auril, & se retirèrent en vne autre endroit de l'Isle. Cependant, Vincent Sodre estoit en la nauire à faire bonne chere sans se soucier de rien: mais tout soudain s'esleua du Nord vne tempeste, laquelle ietta & froissa les nauires contre le riuage: & les vagues furent si hautes que presques tous ceux qui estoyent es nauires furent noyez, entre autres Vincent Sodre & Blaise Sodre son frere furent engloutis des ondes, & leurs corps morts iettez à bord avec les autres. On estime que par vn iugement de Dieu il estoit auenu que Vincent Sodre auoit esté chastié de telle sorte, & qu'aussi iamais on ne retrouua vne seule

*Quand Dieu
veut punir les
hommes il leur
osté le sens.*

feule piece de tout son butin. Car apres que les nauires eurent esté brisées, la mer ietta au riuage les cables, l'equippage, les masts, les tonneaux, les aix, & plusieurs autres telles choses: mais on ne trouua iamais l'or butiné, ni chose quelconque de pris, ni aucun coffre où estoient serrez les meubles precieux. Les trois Capitaines qui s'estoyent sauuez de bonne heure arriere de la tempeste, apres qu'elle fut apaisée vindrēt au port où ils auoyēt laissé Vincent Sodre. Ataide eschappa avec ses gens, pource qu'il estoit descēdu en terre. Apres auoir calfeutré son vaisseau, les autres Capitaines l'esleurent general au lieu de Vincent Sodre: & cōsultent de ce qui estoit expedient de faire. Tous d'un accord reconurent que les Sodres auoyent esté chastiez de leur desloyauté. Et pōiūtant qu'ils ne pourroyent faire chose plus à leur honneur ni plus agreable à Dieu, que de retourner en Inde, afin de secourir Trimumpara & les Portugallois qui estoient demeurez avec lui. Pourtant, encores qu'il fust froid, ils ne laisserent de se mettre à la voile & se hazarder à tous dāgers pour effacer ceste tache qui flestrissoit les Portugallois. Mais les tourmentes les repousserent, & contraignirent de tourner en l'Isle Anchediue, où ne pouuans faire mieux ils passerent le reste de l'hiuer, attendant le printemps pour aller en Cochim.

5. EN ceste annee la Roine Marie acoucha d'une fille qui fut nommee Isabelle, mariee depuis à l'Empereur Charles le Quint. Ce fut vne fort belle & vertueuse Princesse, laquelle aspira tousiours à vne haute dignité, tellement qu'elle disoit souuentefois qu'elle n'espouseroit iamais mari s'il n'estoit le plus grand Prince de la Chrestienté. Sur la fin de ceste annee le Roy assemblea en la ville de Tomar, où il y a vn grand & magnifique temple de l'ordre de saint Iean de Ierusalem, les cheualiers de cest ordre: & fit plusieurs bonnes ordonnances pour l'establissemēt de la Religion & la reformation de la discipline. En la mesme annee mourut le Pape Alexandre, auquel succeda Pie qui ne vescu gueres, & lui fut substitué du consentement de tous les Cardinaux vn Geneuois nommé Iules.

6. A v commencement de l'annee suiuite, le Roy enuoya quelque nombre de gens d'Eglise en vn endroit de l'Ethiopie nommé Congo (ou Manicongo) pour instruire ceux du lieu beaucoup mieux qu'ils ne l'auoyent esté du commencement. Ce pays est dela l'Equateur sept degrez vers le Midi. Il est merueilleusement fertile, abondant en diueres sortes de fruits & d'animaux, & arrousé de plusieurs riuieres. C'est vn royaume de grande estendue. Pour entendre comme il fut cōuert à la religion Chrestienne, il faut reprendre les choses de plus haut & à leur commencement, afin qu'on puisse mieux conoistre la droite intention du Roy de Portugal pour faire instruire ceste nation. Le Roy Iean ayant resolu fermement de faire descouurir toute la coste d'Ethiopie, afin de pouoir trouuer vn chemin pour aller en Inde: il auint l'an mil quatre cens quatre vings & quatre, qu'un vaillant cheualier nommé Iacques Canus, qui par le commandement du Roy descouurit ceste coste d'Ethiopie, trouua l'entree d'une riuere profonde & impetueuse. Or cōsiderant la largeur d'icelle, & le naturel des eaux, il conclud en soy-mesme qu'il falloit que ceste riuere fust habitee de part &

Etat de Portugal.

1504.
Discours sur les affaires de Afrique, spécialement de la descouuerte du Royaume de Congo, au Manicongo en Ethiopie, & des choses admirables auues en celuy.

d'autre. Pourtant il entreprint d'entrer dedans, où ayant fait quelque chemin il vid plusieurs hommes de mesme poil & couleur que les autres Ethiopiens qu'il auoit veus souuëtesfois. Iceux, sans auoir crainte ni frayeur des personnes inconnues qui se presentoyent, s'approcherent des Portugallois, & monstroyët signe de grande douceur & amitié. Surce, Canus commanda à ses truchemens, qui entendoient plusieurs langages d'Ethiopie, de les interroguer : mais pas vn d'eux ne pût entendre le langage de ce nouveau peuple. Et pourtant on commença à communiquer avec eux par signes : & ils declairoient qu'il y auoit en ces quartiers vn Roy puissant & riche, qui demouroit en vne sienne ville capitale à quelques iournees de là. Canus entendât cela, les allecha pardons & promesses à ce qu'ils cōduisissent quelques vns de sa cōpagnie iusques là : & par iceux enuoya des dons & presens au Roy, qu'il estimoit lui deuoir estre agreables, donnât terme à ses messagers dedans lequel ils deuoyent retienir apres auoir descouuert le pays. D'autant qu'ils demurerent deux fois dauantage que Canus n'esperoit, il leua l'anchre, emmenant avec soy quatre des Ethiopiës qui le venoyent voir es nauires. C'estoyent gens notables & de bon esprit. En chemin Canus les façonna tellement, qu'estans presentez au Roy ils pouuoÿët ia exprimer plusieurs choses en langage Portugallois. Le Roy print grand plaisir à leur façon de faire, & leur fit des presens, commandant à Canus de retourner sans aucun delay en ce pays avec les quatre hommes vers leur Roy, pour l'admonnester de seruir Iesus Christ Dieu souverain & createur de toutes choses.

*Negotiation
de Canus au
royaume de
Congo.*

CANUS retourna au mesme lieu, & enuoya vn des quatre Ethiopiens vers le Roy, pour le prier de permettre aux Portugallois qui estoyët en son royaume de retourner vers leurs compagnons : & que sans delay on lui renuoyeroit les trois suiets qui estoyët es nauires. Que Canus auoit charge de passer outre, & qu'ayant executé sa comission il retourneroit incontinent vers le Roy de Congo pour lui faire entendre le mandement de Iean Roy de Portugal. Vn des capitaines du Roy ramena incontinent les Portugallois, auquel Canus rendit aussi les trois Ethiopiens avec les presens que le Roy de Portugal leur auoit baillez pour porter à leur Roy. Les presens & le rapport que les hommes firent de la vertu & magnificēce du Roy Iean, lequel ils esleuoient iusques au ciel, cōmença à esmouoir celi de Congo & faire qu'en son cœur il print en grande amitié le Roy de Portugal. Canus, apres auoir soigneusement descouuert les autres costes, reuint au mesme lieu, d'où sans aucun delay il alla trouuer le Roy de Congo qui le receullit tant honnorablement que rien plus : & lui ayant demandé nouuelles de l'estat du Roy Iean, des mœurs, loix & coustumes du peuple de Portugal, il l'interroqua amplement sur le fait de la Religion Chrestienne, & commençoit pest à peu à y encliner. Toutesfois il renuoya Canus, & accorderent ensemble qu'il remeneroit avec lui à Lisbonne vn des quatre du premier voyage nommé Zacut, avec instructions dont la substance estoit qu'il priaist instamment le Roy Iean, & l'adiurast au nom de Dieu qu'il adoroit, d'enuoyer au royaume de Congo quelques gens d'Eglise par les instru-

instructions desquels ce royaume peust estre amené à la conoissance du vray Dieu. Canus s'embarqua avec l'ambassadeur, & quelques ieunes pages, que le Roy enuoyoit en Portugal, afin d'y estre faits Chrestiens, & instruits de bonne heure en la Religion. Ainsi Canus arriua en Portugal, rapportant grande quantité d'yuoire, avec des couuertures de liëz tissues de fucilles de Palmier, qu'il presenta à son maistre de la part du Roy de Cōgo. Vn tel message resioit fort le Roy Iean, pource qu'il voyoit la porte ouuerte pour auancer la religion Chrestienne en ces pays si eslongnez. L'ambassadeur demeura plus de deux ans en Portugal avec les Pages, afin d'apprendre mieux le langage & les ceremonies de la Religion.

APRÈS que tous eurent esté baptisez, le Roy Iean fit equipper trois nauires, desquelles il donna la charge à Gonzale Soufa, gentil-homme de bonne maison, & renuoya l'ambassadeur avec les Pages. Outreplus il fit embarquer avec eux quelques prestres, avec leurs chafubles, surpelijs, calices, messels & autres instrumens de leur religion, pour baptiser les Ethiopiens & les façonner aux ceremonies obseruees entre eux. Or d'autant qu'en ce mesme temps il y auoit vne grand' peste à Lisbonne, aucuns des nauires y porterent la cōtagion, dont ils moururent sur mer, entre autres Gonzale Soufa, au lieu duquel fut esleu du consentement de tous Roderic Soufa son proche parent. Apres que les nauires furent arriuees où elles pretendoyēt, & que tous ceux qui deuoyēt aller vers le Roy furēt descendus en terre, ils furent receus de ceux du pays avec tels chants & autres signes de si grande ioye, qu'il sembloit que les bois & les chāps en fussent esmeus. Le premier qui fut baptisé estoit oncle du Roy, & dominoit sur vn pays de grande estendue, & le nōma-on Emmanuel: car il auoit entendu que Iean Roy de Portugal auoit vn cousin de mesme nom, Prince orné de grandes vertus, & pourtant desira-il d'estre ainsi appelé. Ce Seigneur embrassa la Religio de si grand zele, qu'il apparoissoit que son entendement estoit esclairé des rayōs de la lumiere celeste. Les Capitaines & gouuerneurs du Royaume avec vn nombre infini de personnes disposees par ordre selō leur coustume, vindrent au deuant des Portugallois, par le cōmandement du Roy. Ce pendant tout retentissoit du son destabours & trompettes, & du cry des gens. Estans paruenus iusques au Roy, Soufa lui fit telle reuerence qu'il appartenoit: lui de sa part recueillit Soufa honnorablement à sa mode. Apres auoir entendu l'ambassade de Soufa, il remercia vne infinité de fois le Roy Iean, & requit Soufa, de faire desployer & mettre deuant les yeux de tous les chafubles & autres habillemens des prestres. Alors il cōmença à les visiter les vns apres les autres, avec grand esbahissement, & regardoit attentiuement les prestres. Apres qu'on eust desployé vne croix, & que Soufa & les siens se furent mis à genoux deuant, à leur façon acoustumee, ceux de Congo firent le mesme. Le Roy ne se pouuoit faouler de voir ces choses, & de demander quel en estoit l'vsage: retenant fort bien ce que les prestres lui disoyent, puis le faisoit entendre à la Roine sa femme. Incontinent fut ordonné qu'on bastiroit vn temple: & combien que les pierres fussent amenees de fort loin, touteffois l'affection du Roy, & le grand nombre de

*Nauigation
des Portugallois
en Congo
pour conuerter
le royaume à
la religion Ro-
maine.*

gens qui y mettoient les mains en toute diligence, fut cause que ce temple fut incontinent acheué & nommé sainte Croix.

*Roy de Congo
se fait bapti-
ser, quelle est
la Chrestienté
de ce pays, &
comment elle y
a esté plantée
& auancée.*

EN ces entrefaites, on apporta nouuelles au Roy qu'un certain peuple à lui suiet, habitant en vne Ile située au milieu d'un grand lac procédât d'un fleuve nommé Zair, s'estoit renoulté de son obéissance, & par courses ordinaires endommageoit grandement le pays voisin. Surce le Roy delibera de reprimer l'audace de ce peuple, & le chastier. Mais auant que partir il voulut estre baptisé, & le fut, ensemble la Roine, & quelques seigneurs de son royaume. On le nomma Iean, & la Roine Eleonor, desirans monstrier par ces noms l'affection qu'ils portoyent au Roy & à la Roine de Portugal. Sousa mit es mains de ce Roy un estédart où y auoit un Crucefix, & l'admonnesta de s'asseurer que par la vertu de la Croix il obtiendroient victoire sur ses ennemis. Ce Roy appuyé sur le nom de Iesus Christ, mit en route ses rebelles à la premiere rencontre, & vid la fin de ceste guerre beaucoup plus tost que lon n'eust pensé. Estant de retour, il donna congé à Sousa avec grandes caresses & tesmoignages de bien-vueillance. Or Sousa fit demeurer les prestres en ce royaume, & quelques autres pour visiter & descouurer le pays tant en sa situation que largeur & longueur, spécialement ce lac duquel nous venons de parler, & conoistre les mœurs & la façon de viure des habitans. Apres le depart de Sousa, le fils aîné du Roy reuint de la guerre qu'il estoit allé faire en l'un des bouts du royaume contre des ennemis voisins, puis fut baptisé, & nommé Alphonse, pour l'amour d'Alphonse fils de Iean. Semblablement plusieurs gentils-hommes se firent Chrestiens, & le menu peuple acouroit de toutes parts pour estre baptisé & iouir de la nouvelle lumiere d'une vie celeste. Ceux qui auoyent esté baptisez se monstroyent fort ioyeux, & le nombre croissoit de iour à autre.

*Troubles &
guerres en Cé-
go pour le chas-
tement de Re-
ligion.*

Mais l'ennemi perpetuel du genre humain resista fort à ces commémemens de soudaine & salutaire conuersion: & pour faire mieux ce qu'il desiroit, il poussa un autre fils du Roy nommé Panse Aquitime qui estoit ennemi iuré des Chrestiens, sollicita son pere de quitter la Religion. Il disoit que c'estoit vne honte de quitter la religion du pays & des ancestres, qu'on abatist les images des dieux, & que les temples reputés saints iusques lors fussent polluez. Outre cela le Roy portoit fort impatiemment que les Chrestiens lui eussent defendu d'auoir des concubines, lui permettant la compagnie d'une femme legitime, & non d'autres. Ces concubines aussi se voyans desfauidées, & degradees de l'honneur qu'elles pensoyent auoir eu pres du Roy, sollicitoyent elles mesmes le Roy, & employoyent aussi les Seigneurs du royaume, afin de le desbouter de la Religion. D'autre costé les enchanteurs & deuins, qui sont fort estimez entre ces peuples, menaçoient le royaume de la part de leurs dieux, & annoncoient tout malheur à ceux qui abandonnoient l'ancienne religion. Alphonse fit tous ses efforts de rompre le coup de ces garnemens, lesquels sceurent tant faire qu'ils le mirent du tout en la male grace de son pere, lequel en vint iusques là de croire que son fils auoit machiné sa mort: tellement qu'il le relegua en l'un des bouts du royaume. Et selon la licéce qu'il donnoit à Aquitime,

on

on voyoit diminuer l'affection qu'il portoit au parauāt à la religion Chrestienne. Mais apres que la fraude eust esté descouuerte, le Roy rappella son fils Alfonso, le restablit en son premier degré d'honneur, & lui donna plus grand estat qu'auparauant. Alfonso illuminé du saint Esprit fit vne ordonnance es pays à luy donnez par son Pere, par laquelle il defendoit sur peine de la vie que personne n'eust à tenir en sa maison aucune idole dediee à superstition, ni ne s'enclinast deuant en sorte que ce fust. La publicatiō de ceste ordonnance, fut cause de grosse esmeute, & plusieurs coniurerent cōtre lui avec son frere. Le pere l'appella pour l'admonester de n'estre cause d'aucun trouble, & se deporter de ceste ordonnance: Alfonso s'excusant sur la multitude de ses affaires, ne voulut aller vers son pere ni reskinder aucunement son edit. Par ainsi plusieurs se reuolterēt de l'obeissance d'icelui pour suiure le parti de son frere. Le pere qui estoit vieil, accablé de maladies, s'en alloit tout mourant. Dont plusieurs auertirēt Alfonso, le priās de venir afin de dissiper les troupes que son frere assembloit pour se faire Roy. Alfonso n'osa y aller iusques à ce qu'il eust entendu la mort de son pere. Mais si tost que les nouuelles lui en eurent esté apportees, il entra de nuit en la ville capitale, suiuant l'aduis de sa mere. Le lendemain il assembla les Seigneurs, en qui il se fioit le plus, en vne place qui estoit deuant le palais du Roy, où il leur fit sagement entendre le droit qu'il auoit au royaume, la douceur qu'il estoit deliberé monstrer & faire sentir à ses suiets, & l'obeissance qu'ils lui deuoyent: puis il les admonesta tous de lui estre fideles suiets: Eux avec toute alegresse le saluent incontinent pour leur Prince souuerain, & commencent à crier viue le Roy, acompagnans leur voix du son de diuers instrumens. Aquitime entendāt ces nouuelles, & se voyant acompagné de grand nombre d'hommes, en fit deux armees & marcha droit contre son frere. Alfonso estoit suivi de peu de gens, ausquels toutesfois il donna bon courage, & les exhorta de croire fermement que Dieu leur assisteroit: & qu'un petit nombre aidé de Iesus Christ pouoit aisément rompre & desfaire vne puissante armee. Lors il attendit son frere en ce lieu là, lequel vint de furie lui donner bataille, avec si grād nombre d'archers, que les fleches volantes faisoient ombre cōme vne espede nuee. Or combien qu'Alfonse se defendist vaillamment, toutesfois il n'auoit esperance sinon au secours de Dieu. Pourtant il appelloit Iesus Christ à son aide à plaine voix, & crioit S. Iaques, comme les Espagnols ont acoustumé de faire en guerre. Aussi ne fut-il pas frustré de l'esperance qu'il auoit en Iesus Christ: car les ennemis frappez d'une frayeur soudaine tournerent le dos & s'enfuirent à vau de route. Alfonso, voyant leur auantgarde rompue, donne dedans la bataille laquelle il desir & contraignit se sauuer de viffesse. Aquitime tout esperdu se voulant cacher en des profondes forests tomba dedans vn piège rendu aux bestes sauuages, & y fut prins avec vn Capitaine qu'il auoit ioint à soy, à cause que c'estoit vn homme fort adroit & expert en guerre. Ce capitaine se voyant arresté, enuoya dire au Roy qu'il estoit content de mourir selon ses demerites: toutesfois il le supplioit au nom de ce grand Dieu qu'il adoroit, de ne l'enuoyer au supplice que premierement il

n'eust esté baptizé. Qu'il ne se foucioit plus de ceste courte vie enuironnée de tant de miseres : ains craignoit fort d'estre forclos de cele vie qu'on appelloit eternelle. Outreplus il adiousta que c'estoit chose impossible à la petite troupe d'Alfonse de vaincre les armées d'Aquitime, mais que lui auoit veu parmi la bataille vn grand nombre de gens de cheual, portans des croix en leurs armes, & si resplendissans que personne ne les pouuoit regarder d'un œil ferme : ce qui l'auoit tellemēt effrayé, qu'incontinent il s'estoit enfui. Que cela lui faisoit conoistre certainement qu'il ne faisoit point adorer autre Dieu que celui des Chrestiens. Alfonse lui accorda ce qu'il demandoit, & dauantage lui sauua la vie, & depuis fit de grans seruices au Roy en plusieurs endroits. Mais Aquitime mourut peu de iours apres en partie de despit, en partie à cause des playes qu'il auoit receues : & ce qui fut le plus déplorable, on ne peut iamais le destourner de sa meschanceté & impiété. Alfonse estant demeuré Roy paisible, obtint par la faueur de Dieu plusieurs victoires sur les ennemis des Chrestiens : le monstrant tant affectonné au Christianisme, qu'il n'employoit pas moins de temps à donner ordre que les suiets seruissent Dieu, qu'il faisoit aux autres affaires publiques. Dauantage il faisoit souuent des exhortatiōs à son peuple de la iustice & pieté, de la seuerité du iugement de Dieu, des loyers de la vie eternelle, de la doctrine & vie de Iesus Christ, & des exemples des saincts personages qui l'auoient ensuiui. Brief, tandis qu'il vescu son royaume perseuera en la profession de la religion Chrestienne, & cōrint ses suiets en deuoir, d'equité & d'integrité.

Le Roy Emmanuel voyant vn tel zele en ces peuples, comme desjà part il estoit de nature, d'affection & d'instruction, desirieux des choses saintes, s'employa soigneusement à paracheuer ce qui auoit esté heureusement commencé par son predecesseur. Pour cest effect, l'an mil cinq cens quatre, il enuoya en Congo des hommes doctes aux saintes lettres & religieux : item des maistres pour tenir eschole & instruire la ieunesse, & des ouuiers de diuers mestiers. Il fit porter grād nombre de chappes & chasubles, de drap d'or & de velours, des breuiers, des legendes de Christ & des saintes, des calices, des croix & encensoirs d'argent, brief tout ce qui estoit requis pour façonner ce peuple à la religion catholique Romaine, & à accomplir les ceremonies obseruees en icelle : afin de confermer plus aisément le peuple en la religion qu'il auoit nouuellement receuë. Dauantage, il fit donner vne bōne somme de deniers & force viures aux prestres, & à tous ceux qui eurent charge de visiter soigneusement ce pays. Et combien qu'il fist de grand frais pour auancer cest affaire, neantmoins il ne se foucioit pas tāt du profit qui lui en pourroit reuenir, qu'il regardoit à la recompense eternelle. Or quand les prestres enuoyez de Portugal furent arriuez avec tout leur equippage au royaume de Congo, vne grande multitude les vint enuironner, & quelques vns les vouloyent porter sur leurs espauls. Tous faisoient la reuerence aux prestres, & les regardoyent comme si c'eussent esté des gens tombez du ciel. Le Roy les recueillit gracieusement, & pria Dieu de benir à iamais le Roy de Portugal pour ce bien qu'il faisoit à tout le royaume.

royaume. Les troupes du peuple acouroient de toutes parts pour se faire baptiser, & viure d'autre façon qu'auparuant. Et pource que les prestres n'entendoyent point le langage du pays, ni le peuple celui de Portugal, le Roy seruoit de trucheman, & ce que les prestres lui disoyent, il le recitoit à ses suiets, car il auoit aprins le langage Portugallois. Dauantage, Emmanuel manda au Roy de Congo qu'il enuoyast ses enfans en Portugal, où il les feroit instruire en la langue Latine & es sciences liberales. Cela fit que non seulement les fils du Roy, mais aussi plusieurs ieunes gentils-hommes vindrent à Lisbonne, où ils furent entretenus aux despès du Roy de Portugal, & y proufiterent en la conoissance des sciēces liberales. Quelques vns d'entr'eux, qui s'estoyent adonnez à la Theologie, estans de retour en Ethio pie, par presches & bons exemples amenerēt plusieurs du pays à la conoissance de Iesus Christ. En somme cest œuvre excellent fut acheué par le Roy Emmanuel.

7. OR d'autant qu'il estoit resolu de poursuiure ce qui estoit commencé *Voyage des* es Indes, en ceste annee il fit armer vne grande flotte sous la conduite de *Albuquerquez en Inde,* Loup Soarez. Nous dirons ci apres en son endroit ce qu'il y fit. Maintenant *& ce qu'ils y* il faut descrire ce qui auint aux Albuquerquez. Alphonse partit de Lisbonne *executerent.* huit iours deuant que son frere François peust s'embarquer. Neantmoins François arriua le premier en Inde, & avec ses deux nauires fut porté en l'Isle d'Anchediue. Nicolas Coeillo, à qui vne autre nauire auoit esté commise, aborda avec lui en la mesme Isle. Le troisiēme Capitaine nommé Pierre Vasque Veiga perit miserablement, ou dans la mer, ou par quelque accident: car on n'en a iamais peu sauoir certainement la verité: François ayant entēdu de Pierre Ataide & des autres Capitaines, qui estoient avec lui en Anchediue, comme les deux Sodres auoyent esté noyez, & que le Roy de Cochim auoit esté chassé de son royaume par les forces du Roy de Calecut, en Anchediue, fut d'auis, sans faire plus long seiour, & combien que ce fust en temps d'hiuer, de faire voile en Cananor avec les six nauires: car il ioignit aux deux siennes les quatre qui estoient à l'ancre au port d'Anchediue. Le Roy de Cananor lui raconta plus au long ce qui estoit auenu à Trimumpara, & le pauvre estat où il estoit reduit. A cause de ce, François print la route de Cochim, & arriua en vne Isle qui est vis à vis nommee Vaipin, où Trimumpara estoit encor avec les Portugallois, qui voyans les nauires furent fort ioyeux, comme lon peut penser. Le Roy mesme se print à crier par plusieurs fois Portugal, & embrassa fort affectueusement les Capitaines. Eux d'autre part l'assuerent que bien tost il seroit remis en son premier estat. Les Naires de Calecut logez en garnison dans la ville de Cochim, s'effroyerent incontinent & s'enfuirent. En ce tēps Edouard Pacheco, qui estoit parti de Lisbonne avec la flotte d'Alphonse Albuquerque, arriua aussi en Inde & se ioignit à François.

A PR ÈS que François Albuquerque eust grandement loué la fidelité *La fidelité de* de Trimumpara, & l'eust remercié au nom d'Emmanuel, le voyant sans *Trimumpara* moyens, & en grandes difficultez à faulte d'argent, outre les autres presens *recompense, lui* lui donna dix mille ducats de l'argent du Roy de Portugal. Ceste somme *estant restable* *en son royaume*

*mer, & ses
seus rebelles &
reueltes pu-
ent.*

vint bien à point à Trimumpara réduit en extrême nécessité, & tous les Indiens qui l'entendirent en furent esmerueillez. Car encores que ces Rois des Indes coultumièrement facent les braues, & soyent riches : toutesfois ils vivent escharnement, & sont par trop adonnés à leur prouffit particulier. Ainsi dōc le bruit de ce present estat parueniu aux oreilles des autres Rois les estonna, spécialement celui de Calecut. Le mesme iour François Albuquerque considérant que le delay en l'affaire qui se presentoit estoit dange-reux, remena le Roy en Cochim, & au nom d'Emmanuel le reftablit en possession de la ville & du royaume : & pour ne laisser croupir les gens en oisieté & donner temps aux ennemis de reprēdre courage, il assaillit vne autre Isle opposee à celle de Cochim, le Prince de laquelle s'estoit rangé au parti du Roy de Calecut, surprint les ennemis, les escarta, en tua grād nombre, brulla quelques bourgades & villages, puis s'en reuint à Cochim. Le lendemain il passa en vne autre Isle appartenante à Trimumpara, le gou-uerneur de laquelle s'estoit aussi reuolté. Mais ce gouuerneur auoit trois mille bons soldats, & quelques patachēs ou brigantins de Calecut, armez pour la guerre, qui flottoyent au long de l'Isle, afin de le secourir au besoin. Albuquerque distribua les troupes en telle sorte que Pacheco eut charge d'assaillir par mer : Nicolas Coeillo, Antoine de Camp & Ataide marcherent les premiers pour combattre l'ennēmi. Pacheco inuestit la flotte de Calecut, mit en fond vne partie des vaisseaux, donna la chasle à d'autres, & fit mourir grand nombre de Calecutiens par glauiue & par feu. Les autres Capitaines ayans gaigné terre au premier choc rompent les ennemis, gagnent le fort de la maison du gouuerneur, entrent de violence dedans, tuent ce gouuerneur, brulent la maison, & le mesme iour retournent victorieux à Cochim. De rechef le lendemain, Albuquerque fit approcher les nauires de l'Isle de Repelin, dont le gouuerneur auoit commis mesme faulte que les sus-mentionnez. Craignant donc d'estre chastié comme les autres traistres, il se preparā pour resister, & auoit deux mille Naires en armes : tellement qu'il vint au bord de la mer pour empeschier que les Portugallois ne prinsent terre. Il y eut lors aspre conflict : mais finalement les ennemis furent contrains quitter la place & se sauuer de viffesse. Ils furent pourfuiuis iusques à la plus grande ville de toute l'Isle : alors le gouuerneur se voyant réduit à l'extremité rassembla toutes ses forces, & se mit en campagne, pour combattre plus resoluement que iamais. Ainsi la meslee recommença, auēc vne obstination courageuse des vns contre les autres : neantmoins les ennemis furent rompus & contrains fuir pour la seconde fois. Plusieurs furent tuez sur le champ, les autres precipitez de l'Isle dedans la mer, & l'isle exposee en proye aux gens de guerre de Trimumpara. Cela fait, Albuquerque fit mettre le feu es villes & villages.

*En quel temps
& par qui fut
baste la for-
resse en Co-
chim.*

APRES ces victoires, Albuquerque vint trouuer le Roy tout consolé de tant d'heureux succēs, & lui demanda congé de bastir vne forteresse, par le moyen de laquelle les Portugallois peussent resister aux courses des ennemis, & cōseruer plus aisément l'estat du Roy cōtre la cruauté du Roy de Calecut. Trimumpara condescendit aisément à ceste requeste, conseil-

lant

fant qu'il tenoit du Roy de Portugal, d'Albuquerque, & de la prouesse des Portugallois, sa vie, ses estats & le moyen de subsister à l'auenir contre les efforts de son ennemi mortel. Pourtant que si Albuquerque estoit que les affaires du Roy de Portugal requissent que ceste forteresse fust bastie, lui vouloit fournir tous les frais necessaires. On choisit dōc vn lieu fort cōmode : car il estoit haut & regardoit l'emboucheure de la mer, tellement qu'il estoit aisé aux Portugallois chasser du port les nauires du Roy de Calcut. Les fondemens furent posez le vingtseptiesme iour de Septembre l'an mil cinq cens trois : & depuis il y auoit grand nombre d'hommes qui y trauailloyent d'ordinaire par le commandement du Roy. Quant aux Portugallois, personne d'eux, fust gentil-homme ou vieillard, ne s'exemptoit du trauail, encores que le Roy les priaist de n'y mettre la main. Au bout de quatre iours apres que lon eust commēcé à bastir ceste forteresse, Alphonse Albuquerque arriua au port de Cochim : par ainsi lon augmenta le nombre des ouuriers, tellement que la forteresse fut esleuee & paracheuee.

1503

Les Portugallois en assurant les autres veulent pouruoir à leurs affaires pour l'auenir.

Cela fait, Alphonse Albuquerque ayant consulté de ce qui estoit à faire, se mit en chemin avec les autres capitaines & quelques soldats de Trimumpara, pour aller assaillir les places du seigneur de Repelin, qui s'estoit reuolté de l'obeissance de Trimumpara. L'Isle est distāte de dix lieues loin de Cochim, assez pres de la riue du fleuve qui se desgorge dans le destroit de mer. Les Portugallois gagnent terre avec des esquifs & autres petis vaisseaux, surprennent les ennemis, en tuent bon nombre, mettent en fuite les autres, saccagent & fourragent ce qu'ils rencontrent lors. Le bruit de ceste desfaite paruint incontinent aux oreilles de tous les voisins : car selon la grandeur de leurs cris ils signifient combié le danger est grand. Ceux qui entendent ce cry, pour faire venir les autres au secours font le mesme cry : ce qui fait qu'en partie pargens enuoyez expres, en partie par telles hucées des vns aux autres, en peu de temps ils assemblent vne grande armee. Alors dōc se trouuerent plus de six mille Naires qui acoururent vistement au secours des leurs, & assaillirent furieusement Albuquerque & les siens, qui commencerent à reculer pas à pas. Eux poursuiuent & chargent viuement les Portugallois, combatans non seulement de loin à coups de trait, mais aussi dē pres à glaiues desgainez. Et si les Portugallois ne se fussent tenus biē rengez, ils eussent perdu beaucoup d'hommes alors. Mais dautant que les esquifs n'estoyēt pas loin, & qu'ils se retiroient sans bruit, ils rentrerent tois en leurs vaisseaux, non toutesfois sans trauail & grand danger. Edouard Pacheco ne trouuant pas son esquif, pourautant que ses matelots auoyēt esté si temeraires que de l'emmener arriere du lieu assigné, se trouua en grād danger de sa vie : car les ennemis le vindrent enuironner, pour le desfaire auant que pouuoir estre secouru. Neantmoins estāt homme resolu & courageux, il les arresta par sa vaillance, iusques à ce que les Albuquerque, voyans le danger où il estoit, acoururent pour le secourir. Par ainsi tous se rembarquerent, & retournerēt à Cochim avec huit blesez, sans auoir perdu vn seul homme. Plusieurs Naires y furent tuez, sept de leurs vaisseaux prins, & quinze brisez. La nuit suiuite car les Capitaines estoient si ardans

Comment les Indiens avertissent les uns les autres et dangers.

qu'ils ne donnoient loisir à leurs soldats de reprendre haleine) ils remonterent en leurs esquifs pour aller saccager les autres villages du Seigneur de Repelin. Alphonse Albuquerque voguoit deuant les autres. Mais ils trouuerent les ennemis au guet, qui s'amassèrent ensemble & firent tel effort qu'ils tuerent deux Portugallois & en blefferent vingt. Alphonse arresté inopinément ne sauoit comme faire teste à tant de gens, ni en quelle seurte se tirer en arriere: & pource faisant deuoir de vaillant Capitaine, il résolut de se defendre courageusement, iusques à ce que les autres Capitaines fussent venus à l'aide, & ainsi soustint les ennemis iusques au point du iour. Lors François Albuquerque & les autres Capitaines prindrent terre, & en grande diligence coururent au lieu où Alphonse combattoit, qui voyant venir le secours reprit courage avec les siens: au contraire les ennemis furēt desfaits & mis en route, vne partie taillee en pieces sur le champ, & les villages bruslez. Ce mesme iour ils enuahirent vne autre isle nommee Cambala, où ils tuerent plus de sept cens hommes. Non cōtens de cela ils entrerent en dautres pays appartenans au Roy de Calecut, taillerent en pieces ceux qui leur voulurent resister, & firent de grands rauages. La dessus, suruindrent six millé hommes pour repousser les Portugallois, qui tindrent bon neantmoins, & ne deslogerent de là qu'à toute force. Dautre costé Pacheco combatit trente quatre vaisseaux du Roy de Calecut qui fermoient aux marchans le passage pour venir en Cochim, & les contraignit de gagner le haut.

*Descriptiō de
de la ville de
Coulam, & al-
fonse Albuquerque avec
la Reine de ce
lieu.*

Les ennemis ayans esté trauaillez en tant de sortes, Alphonse Albuquerque fut d'avis de faire vn voyage en Coulam pour y charger trois nauires, pource que les marchans n'osoient amener du poyure ni d'autres espices au port de Cochim. Iadis la ville de Coulam estoit la plus grande & riche de tous ces pays là. Mais depuis que les marchans commencerent à trafiquer en Calecut, & que la ville deuint riche & marchande, la grandeur de Coulam commença à s'abaisser. Elle est à vingt quatre lieues de Cochim vers le Levant. La nauigation est fort seure, au long d'une riuiera, sinō en lieux où elle est estroite, car les ennemis peuuent se cacher au long des riuages & nuire de là. Ceste riuiera est fort profonde, d'autāt qu'elle se mesle avec les eaux de la mer au reflux: & le havre est bon & assuré. Les maisons & temples, la Religion, les coustumes & façons de faire de ceux de Coulam conuiennent avec ce que font les autres Malabares, comme nous l'auons veu ci dessus. Ce peuple est acoustumé aux armes, & a tousiours guerre contre le Roy de Narlingue. Encores que le Royaume de Narlingue occupe la pluspart de la coste Orientale des Indes, si est si large qu'il s'estend iusqu'aux confins du couchant. Pour la pluspart du temps le Roy se tient en des villes qui sont entre deux mers: & met des gouuerneurs en Coulam les plus loyaux qu'il peut trouuer. Le pays est habité de certains Chrestiens qui vivent selon la doctrine, laquelle ils disent auoir receue de l'Apostre saint Thomas, & l'ont tousiours retenue depuis d'une foy & constance inuincible, parmitant de répestes, changemens de royaumes, & aduersitez de toutes sortes. Il y a vn vieil temple en ceste ville de Coulam,

que

*Téple & corps
de S. Thomas,
& les miracles
qu'en estune y
auoir esté faits*

que les Chrestiens disent auoir esté basti par saint Thomas, le corps duquel est enterré en la coste de Narisingue en vn téple fort estimé des Chrestiens, des Sarasins mesmes & des autres peuples idolatres. Car le bruit commun est qu'en faueur de ce saint personnage Dieu a fait plusieurs miracles, & que ceux qui se recommandent à saint Thomas en leurs griefues maladies & grandes afflictions ont esté merueilleusement soulagez & deliurez de leurs maux. Lors qu'Alfonse Albuquerque arriua en Coulam, vne Roine veufue manioit dextremét les affaires du royaume, pour son fils qui n'estoit pas encor en aage de commander. Il fut receu honnorablemēt des principaux de la ville, qui promettoient au nom de la Roine faire tout ce qu'Albuquerque voudroit. Suiuant cela il fit charger les nauires, & traita alliance, laissant en la protection de la Roine quelques Portugallois qui deuoyent demeurer là pour solliciter les affaires du Roy Emmanuel: puis reuint en Cochim.

9. EN ces entrefaites, le Roy de Calecut voyant le danger où les Arabes l'auoyent poussé par leurs mauuais conseils, delibera fort secrettement de pacifier avec les Portugallois, de peur que les Arabes ne se iettassent à la trauersé pour troubler tout. Les continuelles exhortations de Naubeadarim, lequel portoit bonne affection aux Portugallois comme il a esté veu ci dessus, l'incitoient encor dauantage à haster cest affaire. Les conditions furent que toutes les flottes & armées de mer, pour faire la guerre aux Portugallois ou à leurs alliez, seroyent cassées promptement. Que tous les biens du Roy Emmanuel, ravis par les Arabes & leurs complices lors qu'ils tuerent Arius Correa & les siens, seroyēt rendus: ou que pour iceux le Roy de Calecut payeroit en dedās vn terme assigné certaine quāité de poyure. Qu'il ne permettroit aux Sarasins trafiquans en Calecut de nauiguer en Arabie. Dauantage François Albuquerque demandoit que les deux Milanois qui s'estoyent retirez avec le Roy de Calecut lui fussent rendus. Ce fut le seul article que le Roy ne voulut accorder, estimāt que ce seroit se diffamer soy-mesme de trahir ceux qui s'estoyēt mis en sa protectiō: & accorda tout le reste. Les articles aprouuez de part & d'autre, Naubeadarim vint en Cranganor, afin de faire peser & deliurer à Pacheco, qui y estoit venu par le cōmandement de François Albuquerque, la pluspart du poyure promis. Or il auint tādīs que Pacheco faisoit charger les nauires de ce qu'il auoit ia receu, qu'un vaisseau chargé de poyure appartenāt au roy de Calecut tiroit vers Cranganor: ce qu'estant rapporté à laques Fernand Correa, il enuoya gens au desceu d'Albuquerque pour prendre ce vaisseau, & l'emmener en Cochim. Ceux qui estoient dedans, voyant qu'on les arrestoit se plaignent du tort à eux fait, veu qu'il y auoit paix, solennellement accordee entre les Rois de Portugal & Calecut: contre laquelle les Portugallois prenoient prisonniers les Calecutiens & pilloyent le poyure du Roy. Item, qu'on portoit ce poyure en Cranganor, afin d'estre liuré aux Portugallois, & que le Roy de Calecut acōplistrant plustost sa promesse. Pourtāt ils supplioient qu'on ne leur ostast par force & en despitāt leur Roy ce qu'ils vouloyent liurer sans offenser personne. Neantmoins Correa obstiné en la delibera-

*Paix entre le
roy de Calecut
& les Portu-
gallois, par qui
rumpue & cō-
ment & ce qui
auint aux Al-
buquerque.*

*Insolence des
Portugallois.*

tion qu'il auoit prinse de faire ce coup, assaillir & print le vaisseau où il y eut six Naires ruez, & plusieurs blessez. Les Portugallois ne s'en retournerent pas tous si sains qu'ils estoient venus, tellement qu'ils acheterent à pris de sang de bon nombre d'entre eux vn peu de poyure emporté par outrage & violence. Naubeadarim entendant cest effort, requit François Albuquerque de satisfaire au Roy de Calecut, remonstrant que l'alliance auoit esté violee, le Roy griefuement offensé, & occasion donnée à ceux qui desiroyent troubler la paix, d'esmouoir temerairement vne cruelle guerre. Et puis que les Portugallois sembloient auoir eu iuste occasion de faire la guerre au Roy de Calecut, pource qu'il n'auoit point voulu faire iustice de ceux qui auoyent tué Arius Correa & pillé ce qui appartenoit au Roy de Portugal, & recompenser ceste perte: ce n'estoit pas raison qu'Albuquerque laissât impuni le mesme forfait commis par les gens. Qu'il ne deuoit differer de satisfaire au Roy de Calecut, afin de pouuoir appaiser son cœur picqué d'une iniure si atroce: & que ce Roy qui estoit de naturel muable, cholere, affectionné enuers les Sarasins, par l'induction desquels il auoit fait aux Portugallois tout du pis qu'il auoit peu, encores qu'ils ne l'eussent point offensé, ne les lairoit point en paix (comme on pouuoit penser) ayant trespasse occasion de faire la guerre.

*Mesheurs de
portemens de
François Al-
buquerque de-
couuurent de
quelle affection
la plupart des
Portugallois
ont entrepris
ces voyages
d'outremer.*

COMBIEN que Naubeadarim proposast ces choses & plusieurs autres au mesme propos, par beaucoup de messages, François Albuquerque n'en tint compte. Enquoy faisant il obscurcit la gloire & renommée qu'il auoit acquise, ou en rompant la foy qui est vne meschanceté detestable, ou estant si couard qu'il n'osa mettre la main sur cest estourdi qui auoit pillé le poyure du Roy de Calecut, & le chastier comme il auoit mérité. Le Roy grandement irrité, résolut d'armer vne flotte de vaisseaux, & faire leuer gens de guerre, pour assaillir le Roy de Cochim & les Portugallois, par terre & par mer. Trimumpara entendant ces nouvelles, pria instamment François Albuquerque, de lui laisser telles forces qu'il peust repousser arriere des limites de son royaume les courses & assaux des Calecutiens: d'autant que ce seroit vne indignité par trop estrange que les Portugallois (pour lesquels il auoit à soutenir vn si pesant fardeau) l'abandonnassent au besoin. Albuquerque promet d'y donner ordre. Mais il ne tint pas promesse comme il deuoit: car il laissa seulement à Trimumpara vne nauire, deux carauelles, desquelles nous auons descrite la forme ci dessus, & vn autre petit vaisseau avec cent Portugallois. Trimumpara en auoit encor cinquante autres pres de foy, tellement que pour faire teste à si grand nombre d'ennemis on lui laissoit cent cinquante hommes en tout. Leur capitaine estoit Edouard Pacheco, qui accepta tres-volontiers ceste charge, estant prest d'employer & donner sa vie (si besoin estoit) pour la gloire de Iesus Christ & la dignité du Roy Emmanuel. Ce pendant Alphonse Albuquerque reuint de Coulam. Estans ensemble, les deux Albuquerque partirent de Cochim & arriuerent en Cananor, où Alphonse entendit par les lettres de Raphael Reinel, demeuré aupres de Naubeadarim pour receuoir le reste du poyure, que la guerre s'en alloit commencer plus cruelle que iamais. Cojebique, duquel

nous

nous auôs parlé ci deuât, qui fauorifoit beaucoup les Portugallois escriuit le meſme aux Albuquerque. Comme ils vogueyēt au long de la coſte de Calecut, ils enuoyerent prier le Roy de leur enuoyer les Portugallois qu'il retenoit pres de ſoy : mais il n'en voulut rien faire. Pourtant ils partirent de là, & prindrent la route de Portugal. Alfonſe Albuquerque print port à Liſbonne le dixſeptieſme iour de Iuillet, l'an mil cinq cens quatre. Mais on ne ſait que deuindrent François Albuquerque & Nicolas Coeillo : car on ne les a point veus depuis, & perſonne de leur flotte n'eſchappa pour en dire des nouuelles. La nauire de Pierre Ataide s'eſtant eſchouee, il ſe ſauua en terre avec quelques autres qui eſtoient de ſa compagnie, & ſe retira en Mozambique où il mourut. Les autres s'en allerent en Melinde.

*François Albuquerque ar-
reſtē par le iuge-
ment de
Dieu.*

10. ENVIRON le meſme temps que ces choſes auindrent, vn autre capitaine nommé Antoine Saldagne fut agité de diuerſes tourmentes ſur la mer. Il s'eſtoit embarqué par le commandement du Roy de Portugal, peu apres que les Albuquerque deſmarerent de Liſbonne : & auoit trois nauires afin de courir la mer qui eſt entre le dernier promontoire d'Ethiopie nommé Guardafu, & le goulfe de la mer Arabique. Vn des capitaines qui eſtoit ſous lui, nommé Iacques Fernand Pereira, fut ſeparé par la tempeſte d'avec les deux autres & porté en Melinde. De là il ſit voile vers vne Iſle nommee Zacotora iuſques lors inconue aux Europeans, ſeparee d'vn bras de mer de l'entree du deſtroit Arabique, où il delibera paſſer l'hyuer. Quāt à Saldagne, l'ignorance de ſon pilote lui ſit perdre ſa route, & aborda en l'Iſle de ſainct Thomas ſituee ſous l'Equateur. Ayant leué l'anchre de là, vne autre tempeſte ſuruint qui ſepara d'avec lui l'autre nauire en laquelle commādoit Roderic Laurent Rauaſque. Comme Saldagne vouloit doubler le Cap de bonne eſperance, par la faute de ce meſme pilote qui eſtimoit deſia eſtre outre, il fut porté en vn goulfe, où il puiſa de l'eau. Depuis ce lieu fut appellé l'aiguade de Saldagne. Mais Rauaſque paſſa le premier le deſtroit, & tira vers Mozambique, de là il ſit voile vers Quilloa, où il attendit Saldagne, l'eſpace de vingt iours. Voyant qu'il tarδοit trop à venir, il print la route de l'iſle de Zanzibar ſuſmētionnee. Ceſte Iſle eſt diſtāte de quarante lieues loin de Mombaze vers le couchant. Entre ceſte iſle & terre ferme il y a vn bras de mer ſi eſtroit qu'une nauire ne ſauroit paſſer par là, que ceux de l'iſle & de la terre ne la deſcouurent aiſément. Rauaſque roda deux mois autour de ceſte iſle, & à diuerſes fois arreſta vingt nauires chargees de toutes ſortes de marchandises, & ne les voulut onc reſaſcher que ceux à qui elles apartenoyent ne lui euſſent payé raſon. Ce brigādage de Rauaſque irrita ceux de Zanzibar & des autres Iſles, & rendit les Portugallois odieux à beaucoup de gens qui les aimoyent auparauant. Meſmes ceux de l'Iſle leur portoyent bonne affection. Le Prince enuoya dire à Rauaſque qu'il ſeſbahifoit fort pourquoy vn Capitaine des Portugallois, eſti-
mez ſi loyaux, euſt ainſi traité ceux de Zanzibar leurs amis. Qu'il ne ſe ſou-
cioit point de la marchandise pillée : ſeulement qu'on lui rendiſt le canon
& les armes qui eſtoient es nauires, & que les Portugallois gardaſſent le
reſte. Mais Rauaſque, au lieu de ſaſfaire à vne ſi iuſte demāde, ne reſpōdit

*Nauigatiō &
diuers accidēs
d'Antoine
Saldagne &
de ſes Capi-
taines.*

*Rauaſque pil-
le ceux de Zā-
zibar & ce qui
s'en ſuiuit.*

*Inquiert de
Rauaſque.*

qu'iniures & outrages. Le Prince offensé de telles brauades, fit equipper quelques petis vaisseaux pour assaillir Rauasque. Mais son secretaire nommé Gomez Carrasque & Laurent Phajo vaillant soldat furent enuoyez par Rauasque dans vn esquif fourni pour la guerre, pour assaillir les brigantins du Prince de Zanzibar auant qu'ils fussent hors du port: ce qui fut fait, & quatre de ces vaisseaux prins, les autres se sauuerēt. Il y eut quelques hommes tuez, entre autres le fils du Prince. Ice lui voyant que par douceur ne par force il n'auoit peu obtenir son droit, voulut toutefois empescher que son isle ne receust plus de mal, encores qu'il eust esté grandement incommodé, specialement en la mort de son fils: toutesfois il pacifia avec Rauasque, à condition de payer tous les ans certaine somme d'or de tribut au Roy Emmanuel. Apres qu'ils eurent fait ceste paix, Rauasque print la route de Melinde. Alors il y auoit grosse guerre entre les Rois de Melinde & de Mombaze. Rauasque voulant estonner le Roy de Mombaze, vint avec sa nauire au port de Mombaze, où il combatit deux nauires de charge & trois autres moindres vaisseaux, & les print. Entre autres prisonniers, il y auoit douze Arabes fort riches & les principaux de leur ville, laquelle s'appelloit Braua, vingt lieues loin de Mombaze. Ils attendoyent vne autre nauire chargée de beaucoup de marchandise de grand pris. Apres auoir payé rançon, ils rendirent leur ville, & promirent par serment qu'eux & tous les habitans de Braua demureroyent perpetuels subiets du Roy de Portugal. Outre cela, il les rendit tributaires au Roy de tel poids d'or & tribut annuel que bon lui sembla. Cest accord fait, la nauire qu'ils attendoyent arriua, à laquelle Rauasque ne voulut toucher ni souffrir qu'aucun autre portast dommage en sorte que ce fust. D'autre costé Saldagne avec trois nauires conquises en sa nauigation vint mouiller l'anchre à Mombaze. Le Roy voyant ceste petite armee nauale, craignit que les Portugallois ne lui donnassent de la peine: pourtant il accorda avec le Roy de Melinde. De là Saldagne fit voile en Inde, & print port es Isles de Canacane & Anchediue. Nous dirons ci apres en son endroit ce qu'il fit en la continuation de son voyage.

Le battu paye l'amande, & les Portugallois exigent redout de celui qu'ils ont pillé & outragé.

Nouvelle conuersion & exaltation des Portugallois.

Affaires de Portugal.

1504

EN ceste annee mil cinq cens & quatre au mois d'Octobre, Alfonse II. neveu du Roy Emmanuel, & conestable de Portugal, fut surprins d'une grosse maladie dont il mourut en la fleur de sa ieunesse, & laissa vne seule fille, qui depuis fut vne des belles & vertueuses dames de son temps, & fut mariée à Pierre prince de Ville-real, vaillant entre les autres. Presques au mesme temps, Isabelle Roine de Castille mourut, & fut fort regrettee de toute l'Espagne. Car c'estoit vne princesse de si grand cœur, si sage, tant affectionnee enuers Dieu & toutes choses bonnes, que sa memoire merite vn los perpetuel. Le dernier iour de Decembre de la mesme annee la roine Marie acoucha d'une fille de singuliere beauté, & qui fut appelée Beatrix comme son ayeulle. Depuis elle fut mariée à Charles duc de Sauoye, comme il sera dit en son lieu. En ceste annee il y eut de grands & frequens tremblemens de terre, dont plusieurs edifices tomberent bas, la terre s'affaissa en plusieurs endroits, & y eut de grands dommages. Les gens quittoient

toyent leurs maisons, sans toutesfois ofer gagner les montagnes, craignās autant la ruine & confusion d'un costé que d'autre. Ils demeuroyent d'ordinaire en des pavillons fchez es plaines & campagnes.

12. **ENVIRON** le mesme temps, Jean Menez dressa contre les Mores vne entreprise digne de memoire. Il y a en Barbarie vne ville renommee qui s'appelle Larache à dix lieues loin d'Arzile, arrousee du fleuve Zile, lequel se desgorge en la mer Oceane. Les Mores s'estoyent saisis de cinq nauires Portugalloisēs qui estoient lors à l'anchre au port de Larache: dōt Menez fut grandement indigné, si tost qu'on lui en eut apporté nouuelles, & fut sur le point d'aller assaillir le port pour ramener les nauires. Or il y a à l'emboucheure de ce fleuve vne tour forte d'assiette, bien munie de canō & de toutes sortes d'armes, avec guet ordinaire. C'estoit la retraite de tous les pirates qui s'embarquoyent tous les ans en ceste coste de Barbarie, pour aller faire leurs courses & escumer l'Ocean. Menez commence à penser comme il pourroit entrer au haure de Larache, sans encourir danger par le moyen de ceste tour. Ayant deliberé & resolu en soy-mesme ce qu'il auoit à faire, auint vn iour qu'il descouurit cinq fustes & vne gallere à trois rames qui vogueoyent à l'Oest. Surce il despescha incontinent des espions pour aller reconoistre de pres leur route par mer & par terre. Tous rapportēt que ces fustes & la gallere s'estoyēt rédues au port de Larache, & auoyent esté tirees pres de terre, en telle sorte toutesfois que la gallere pouuoit desmarer à l'aise. A ce rapport il fait incontinent equipper quatre carauelles, commande aux plus resolu de ses troupes d'entrer dedans, fait leuer l'anchre de nuict, tire droit vers Larache, & au point du iour se trouue à l'emboucheure du fleuve susnommé. Les Mores courent aux armes, canōnent, & font tout leur possible pour empescher l'entree aux carauelles. Menez attendoit la maree, & comme il la sentit venir assez fort, il fit couourir & armer de toutes parts les costez d'une des carauelles, laquelle il fit voguer droitement à l'opposite de la tour, afin qu'elle receust les coups de canon: les autres estoient à couuert sous ceste là, tellement qu'elles entrerent dedans le port. Cependāt les Mores harquebusoyent, descochoyēt flesches, & à coups de traiēt taschoyent par tous moyens de repousser les carauelles. Mais en despit d'eux Menez entra dedans si auant qu'il voulut avec toute sa flotte. Le fleuve est profond de soy-mesme & à cause du reflux de la mer, tellement que les carauelles pouuoient aisement approcher du riuage: ce qu'ayans fait ceux qui en auoyent la charge mettent promptement pied à terre, & combattent de grand courage afin de pouuoir mettre le feu en la galere. Au contraire, les Mores acourent de toutes parts afin de les empescher. Il y eut aspre conflict, & le combat fut long & fort furieux. Mais finalement après que plusieurs Mores eurent esté tuez, grand nombre de blesez, les autres s'enfuirent sans estre poursuiuis, d'autant que Menez ne le voulut permettre à ses soldats, ains il cōmanda promptemēt suiuiāt sa deliberatiō qu'o mist le feu en ceste galere à trois rames. Les cinq fustes, deux autres galleres & vne des nauires de Portugal furēt incontinēt remenees en mer. Les autres trois nauires ne le peurent estre, pourtant elles

Guerres & accidens dauers suruenus entre les Portugallois & les Mores en Afrique.

Premiere entreprise brauement executee sur les Mores au port de Larache.

furent brulées avec la gallerie. Menez ayant executé son entreprise aperceut vne grosse troupe de Mores qui se disposoyent pour lui donner vne nouuelle charge : pourtāt sans aucune difficulté il se retira avec la merree qui commençoit à baisser : & ne petdit en tous ces combats qu'un homme, remenant douze nauires au port d'Arzile, d'où il estoit parti avec quatre Carauelles seulement. Ceste hardiesse & courageuse entreprise de Menez estonna fort les Mores, voyans que tout d'un coup il estoit entré dedans leur haure, à trauers leurs garnisons & maugré les plus asseutées forces qu'ils eussent, auoit mis le feu aux nauires, & avec quatre Carauelles assailli & endommagé vne si forte ville que Larache. De fait, la mort de leurs gens & la perte des nauires ne les mettoit pas tant en peine que la consideration d'un si braue exploit. Car ils craignoyēt que le succes d'icelui ne fist croistre le cœur aux Portugallois, pour se ietter de nouveau en choses plus hazardeuses. Le Roy ayant receu les nouuelles de ce qui s'estoit passé en fut fort ioyeux, & loua grandement la vertu, l'adresse & l'industrie de son lieutenant, lequel d'autrepart ne voulant perdre aucune occasion pour endommager les Mores, faisoit d'une ruse telle que s'ensuit.

*Autre entre-
prise & stratage-
me de Me-
nez, contre les
Mores.*

IL y a vne montagne nommée Fatobe, que i'estime estre vne partie du petit Atlas, à dix lieues loin d'Arzile. Au pied de ceste montagne coule vne riuere qui s'enfle tellement en hyuer par les pluyes continuelles qu'on ne la fauroit passer à gué. Les Mores s'asseurans là dessus hyuernoyent en toute seureté par les villages qui sont en grand nombre çà & là sur ceste montagne, où ils nourrissoient des grands troupeaux de gros & menu bestail. Or Menez ne voulant estre descouuert fit dresser en sa maison deux flottes ou nasselles quarrées : & personne des charpentiers qu'il mettoit en besongne, & sur la fidelité desquels il se reposoit, ne sceut iamais presumer à quoy ces nasselles deuoyent estre employées. Elles estoient de telle grandeur qu'une forte beste de voiture en pouuoit porter vne. Cela fait, Menez ne fit aucun semblāt de bouger iusques à ce qu'une nuit pluueuse & fort fascheuse suruint. Ayant rencontré le temps à souhait, il fait sonner la sourdine pour monter promptement à cheual. Chascun s'estonne de ce commandement en tel temps, auquel les rauages des pluyes sembloient commander cessation de tous actes d'hostilité : toutesfois on estima que ce sage Capitaine & vieux routier de guerre n'entreprendoit rien sans cause. Ses gens dōc s'arment & le suivent sans delay, & n'y eut personne qui s'enquist de la resolution de leur chef, ni en quelle part il les conduisoit. Il estoit lors suivi de deux cens vingt hommes de cheual : ausquels, quand il estima estre temps, il descouvrit son intention, monstrant combien elle estoit aisée à executer, & ce qu'il vouloit que chascun fist. Cependant il admonnesta ceux qui ne se voudroyent hazarder, de reptēdre le chemin d'Arzile : pour ce qu'il entreprendroit beaucoup plustost l'executiō de ses entreprises avec vne petite troupe de vaillans hommes, qu'estant suivi d'un grand nombre de gens de cœur failli. Mais tous eurent leur honneur en telle recommandation qu'ils ne voulurēt nullemēt tourner bride. Estans paruenus à ceste riuere, lors desbordée, & qui couuroit beaucoup plus de plat pays qu'ils n'auoyent

n'auoyét pensé, Menez fit descharger à la riue les nasselles que des cheuaux portoyent. Lors il commanda a vn de ses domestiques nommé Fernand Freite d'empoigner aux dents le bout d'vne chorde, & passer à nage la riuere, iusques à ce qu'il auroit gaigné vne leuee de terre paroissante dela le canal, où le fil de l'eau estoit plus impetueux. A ceste chorde estoit attachee l'vne des nasselles. Fernand ayât passé la riuere & gaigné ceste leuee, paruint de là à l'autre bord, tirant la nasselle fort aisémēt à soy. A ceste premiere nasselle estoit attachee la seconde d'vne autre chorde, & partant fut tiree sans peine par Fernand. Estans toutes deux fermement retenues par ces chordes, dont l'vne laschoit, l'autre serroit, selon qu'il estoit requis pour passer d'un bord à l'autre, quand vne nasselle se trouuoit à l'un des bords, l'autre nasselle estoit au bord opposite. Alors les soldats dessellent leurs cheuaux, chargent quelques selles sur la nasselle qui estoit vers eux, & aucuns montent dedas, & trauerfent ainsi la riuere, faisant passer à nage leurs cheuaux qu'ils menoyent par la bride. Estans tous arriuez à l'autre bord ils boutent selle & remontent à cheual, marchas toute ceste nuit par des fanges & marets, encor que la pluye impetueuse les cōtraignist par fois d'aller au pas, & que leurs cheuaux fussent en l'eau iusques aux fangles. Menez qui conoissoit tous les destroits & auenes du pays arresta ses gens en vn lieu propre a dresser embusches, aupres de certains villages qu'il estoit resolu de fourrager. Des la pointe du iour, les montaignars descendent en la plaine (car la pluye estoit cessée) les vns pour voir leurs semailles, les autres pour mener leur bestail, & quelques autres pour chasser. Pour cela Menez ne vouloit pas sortir de l'embuscade, iusques à ce que plus de gens fussent assemblez pour leur courir sus & en desfaire plus grand nombre. Mais il auint que deux chasseurs se vindrēt rendre au lieu où les troupes estoient: au moyen dequoy il leur fut force de sortir. Par ainsi ils assaillent furieusement ceux qui se rencontroyent, en tuent plusieurs, prennent prisonniers les autres, font vn grād butin, & se retirent sains & saufs. Estans au bord de la riuere, premierement on contraignit tout le bestail de la passer à nage, puis Menez & ses gens la trauerferent beaucoup plus aisément qu'ils n'auoyent fait de nuit, & sur le soir rentrerent dedans Arzile, au grand esbahissement de ceux qui y estoient demeurez. Car ils estimoient impossible qu'on peust passer la riuere en temps si fascheux, ni se desuelopper du milieu de tant d'ennemis exercez à la guerre: veu que le retour estoit malaisé, & qu'on pouuoit sans grande difficulté fermer le passage en couppant les chordes des nasselles.

13. T E L estoit l'estat de Portugal & d'Afrique, tādīs qu'es Indes Trimumpara & les Portugallois ses associez auoyēt vne pesante guerre sur les bras: car, suiuant ce qui a esté dit ci dessus, le Roy de Calecut faisoit grosse leuee de gens, & aprestoit vne merueilleuse flotte, auant mesmes que les Albuquerque se fussent mis à la voile pour retourner en Portugal. Apres que Pacheco eust prins congé d'eux, il reuint de Cananor en Cochim. Le Roy voyant le petit nombre de soldats qu'on lui auoit laissez, & sachant par beaucoup d'aduertissemens quelles forces auoit son ennemi, item que les

*En la guerra
du Roy de Ca-
lecut contre le
Roy de Co-
chim & les
Portugallois,
on void que
Dieu donne
les bons cap-
sults, la hardi-
esse, la force, &*

*la victoire: cō-
me les valeu-
reux exploits
de Pacheco le
demonstrent.*

Arabes qui faisoient venir des bleds en Cochim, & plusieurs habitans du lieu, ne pensoient qu'à se sauuer ailleurs, & qu'aucuns mesmes se vouloyēt reuolter, conclud que c'estoit fait de lui & de son estat. loint qu'il ne pouuoit se persuader que Pacheco avec vne poignée de gens se voulust fourrer en ceste guerre, veu que s'il entreprenoit faire teste en combat tant mal parti, il faudroit plustost attribuer cela à temerité & folie qu'à vertu. Finalement il tint pour certain que François Albuquerque s'estoit moqué de lui: auttement, que ne lui laissoit il plus de gens, s'il auoit enuie de le secourir? Estimant donc auoir esté circonuenu, & que c'estoit le salaire de sa fidelité & ferme amitié enuers le Roy de Portugal, rout troublé il va trouuer Pacheco, & en pleurant & attestant ses dieux le pria de lui descouurer son cœur, disant que les Portugallois auoyent reçu tant de plaisirs en Cochim, que si mal lui auenoit par leur lâcheté, il pourroit à tousiours se plaindre du tort qu'il auroit reçu d'eux. Maintenant, dit il, que tout est perdu, ie ne vous demande point secours: seulement ie vous prie que ne vous moquiez point de moy. Car si tout à plat vous refusez m'aider, ie trouueray quelque expediēt pour ne perir pas du tout. Mais si sous ombre de quelque esperance, i'oublie à pouruoir de bonne heure à mes affaires, l'occasion de me garantir s'estant enuolee il sera trop tard puis apres de lamenter ma misere. Or ie ne puis presumer que les Albuquerque vous ayent laissé en Inde pour me secourir, ains seulement pour pouruoir aux affaires du Roy de Portugal. Car s'ils eussent désiré mon bien, de tant de nauires & tant de soldars qu'ils auoyent, ne vous seroyent pas baillez en charge trois vaisseaux tels quels, & qui demandent d'estre calfeutrez, avec si petit nombre d'hommes. S'ils vous ont commandé de faire voile en Coulam ou en Cannanor, quand vous me verrez assailli de toutes parts, vous estes assez fort avec vostre flotte & vos gens. Mais si vous auez charge de repousser l'effort de ce puissant Roy mon ennemi, ie voudrois qu'ils eussent esté plus auisez. Pourtant ie vous prie & adiure au nom du Dieu que vous seruez, de ne permettre que ie sois abusé: & me dire franchement si vous m'assisterez en la necessité ou ie suis reduit, ou si vous partirez d'ici pour euitier le malheur qui pend sur ma teste. Ce propos mit Pacheco en grande cholere, tellement qu'il commença à respondre aigrement au Roy, & le tancer du tort qu'il lui faisoit: disant que ce discours partoist d'un cœur reuquant en doute sa fidelité, qui estoit le plus grand outrage que lon sauroit faire à un homme de bien. Que tousiours il auoit eu sa foy en plus grande recommandation que sa propre vie. Que le Roy ne se pouuoit plaindre des Albuquerque, d'autant qu'ils auoyent laissé tel nombre de soldats qu'ils conoissoient suffire pour reprimer l'insolence d'un Roy meschant & orgueilleux. Item que ce n'estoit point l'impetuosité d'une armee estourdie & mal conduite, mais la vigilance & sagesse de peu d'hommes bien resolus qui donnoit la victoire. Dauantage que pour entrer du Royaume de Calecut en celui de Cochim, y auoit un gué estroit, & tel qu'un petit nombre de soldats le pouuoient defendre & garder contre un nombre infini d'assaillans. Finalement, que son Dieu & sauueur Iesus Christ estoit si bon &

*Disputent entre
Trinunpora
& Pacheco
touchant la
guerre.*

& puissant, que d'un clin d'œil il pouuoit chasser l'armée ennemie: & que les moyens humains ne sauroient empescher le bras de Dieu, du secours duquel il estoit tressasseur. A cause de quoy il exhortoit Trimūpara d'auoir bon courage, estant prest de cōbatre iusques au dernier soupir pour maintenir l'estat & dignité d'iceluy. Quant à l'issue de la guerre, Pacheco l'asseuroit qu'en brief le Roy de Calecut seroit non seulement vaincu, mais aussi prins prisonnier, enfermé, & mené en Portugal. Ceste respōse redressa le cœur de Trimūpara, & luy donna bonne esperance pour l'auenir.

APRÈS que Pacheco eust laissé Trimūpara, il fit appeller les principaux & plus riches Arabes, les pria d'auoir bon courage, & ne faire leur résolution de quitter le lieu où ils auoyent vescu si commodement iusques lors: adioustant puis après diuerſes raisons par lesquelles il taschoit leur persuader qu'ils ne deuoient aucunement desesperer de la victoire. Finalement il commença à menacer fort rudement ceux qui quitteroient desloyaument le Roy de Cochim, ou qui par couardise penseroient se retirer ailleurs. Qu'il vouloit faire entendre à tous, que quiconque entreprendroit abandonner la ville, seroit châtié: & que personne n'estimast pouuoir rien gagner par finesse, pource que sa charge estoit de veiller, de preuenir les efforts de tous, & boucher si bien tous les passages, qu'homme viuant ne sauroit s'enfuir par mer ni par terre. Partant que ceux qui aimeroient leur vie se tinssent cois, & detestassent tous conseils deshonestes & infames: autrement, qu'ils fissent leur compte de mourir d'un cruel supplice. Ceste dernière partie de sa harangue, où il vsoit de menaces fut prononcée si asprement & d'une voix forte, que tous trembloient de peur: car ses yeux estincelloient, sa face estoit comme en feu, & apperceuoit on à sa contenance une cholere extraordinaire. Les Arabes promirent par leur réponse de faire bon deuoir, & se porter en telle sorte que le Roy ne les pourroit accuser de desloyauté. Par ce moyen il auint que ceux qui consultoyent souuent ensemble pour abandonner la ville, s'en deporterent, en partie volontairement en partie de crainte. Ce pendant Pacheco alloit & venoit au long du canal, posoit sentinelles, fermoit soigneusement & selon les hommes qu'il auoit toutes les auenues par mer & par terre, afin que personne n'entreprinst de s'en aller sans congé. Or il auint qu'on lui amena quatre pêcheurs qui à son desceu estoient allez pêcher. Lui prenant ce pretexte leur mit sus qu'ils auoyent deliberé s'enfuir: pourtant les fit il garrotter & mener en l'isle, commandant à haute voix qu'ils fussent pēdus & estranglez. Le Roy de Cochim ayant entendu l'affaire, pria Pacheco de pardonner à ces pources prisonniers: à quoy Pacheco fit respōse qu'il se babilloit fort qu'un Roy si sage se monstroit ainsi lasche à châtier tel crime. Qu'il ne falloit point lâcher la bride à la licence des hommes quand l'estat estoit en danger, ains manier les affaires roidement & sans espargner personne. Que le supplice de ces quatre donneroit pied ferme à une bonne discipline: & que si on leur pardonnoit, les autres qui auoyent deliberé s'enfuir en deuiendroyent plus audacieux pour executer leur dessein. Pour son regard, qu'il n'endureroit point que l'inconsiderée douceur du Roy

*Moyen tenu
par Pacheco
pour retenir en
devoir les cou-
ards & trais-
tres.*

mist l'estat & tout le royaume en manifeste danger. Mais d'autre costé par dessous main il fit entendre par homme seur au Roy qu'il ne feroit point mourir ces quatre pefcheurs, ains que toutes ses menaces ne tendoyent qu'à espouuanter & contemir les autres en leur deuoir. Ces quatre qui auoyent esté transportez en l'isle furent ramenez de nuit en la ville de Cochim, & cachez soigneusement en la maison du Roy, afin que personne n'estimast qu'on eust fait seulement semblant de les estonner.

*Courfes & de-
uoyes exploits
de Pacheco.*

A v resté, Pacheco ne se contentoit pas seulement de pouruoir à la seurété de la ville, mais aussi faidoit de toutes occasions pour endommager les ennemis. Pourtant trauersá il plusieurs fois le canal, & fit des courfes sur les terres du seigneur de Repelin & d'autres: brussa plusieurs villages, tua beaucoup d'hommes, & d'une viffesse incroyable surprit & tailla en pieces grand nombre d'ennemis ça & là. Cela fit que le Roy de Calecut se hâta de mettre son armee aux champs, afin de reprimer Pacheco, & s'approcha de Repelin. D'autre part Roderic Reinel (qui estoit detenu d'une grosse maladie en Calecut, dont il deceda tost apres) fit entendre à Pacheco quelles estoient les forces du Roy de Calecut. Vn tel auertissement mit la ville de Cochim en trouble, & par la desloyauté des Arabes plusieurs furent sollicités à se reuolter: toutesfois quoy qu'ils fussent effroyez ils se contindrent redoutans l'ire de Pacheco. Le pays de Cochim vers le Septentrion par où les Calecutiens deuoient venir est entrecoupé de diuerses lagues de mer qui sont plusieurs isles, de l'une desquelles vne armee ne peut aisément passer en l'autre, pource qu'on ne sauroit trauerser les destroits à pied, ni passer avec balsteaux à cause des sables qui se rencontrent à tous coups. C'estoit aussi chose fort malaisée d'enuahir la ville de Cochim avec vne flotte de vaisseaux en large mer, d'autant que l'emboucheure du haure est fort estroite. D'autre part le Roy de Calecut estimoit que c'estoit se hasarder avec perte euidente de vouloir passer au gué qu'il gagna lors que Trimumpara fut chassé de son royaume: car il se souuenoit de la perte qu'il y auoit faite, & craignoit y laisser beaucoup plus grand nombre d'hommes, si les Portugallois acompagnoient les garnisons du Roy de Cochim. Il y a vne isle assez pres de Repelin nommée Cambalam vers le leuant, le seigneur de laquelle auoit quitté le parti de Trimumpara. De ceste isle il estoit aisé d'étré en celle de Cochim, & le gué sembloit n'estre mal aisé à passer. Ce fut là que le Roy de Calecut se rendit avec son armee de mer & de terre, afin qu'ayant gagné le passage, & mis ses troupes de l'autre costé il accablât les ennemis. Mais Pacheco auoit tous ses sens & discours occupez à lui fermer ce passage: & tandis, pour monstrier combien il faisoit peu de cas de tout l'appareil du Roy de Calecut, vne nuit il passa avec ses troupes en l'isle de Repelin, & entrant dans la ville, tua grand nombre d'ennemis dormans ou demi esueillez, & fit mettre le feu es maisons. D'autres logez ailleurs acourent à l'aide, & le suyuent comme il se retiroit: mais ils furent vaillamment soustenus par les Portugallois qui se retirerent saufs en Cochim, exceptez huit d'entre eux qui furent blesez en ceste courfe.

OR pource que le Roy de Calecut s'apprestoït pour venir au gué, Pacheco distribua les troupes comme s'ensuit. Il laissa vingtcing soldats dans la nauire Capitainesse, & leur donna pour chef le maistre pilote nommé Jacques Pereira. Ceste nauire estoit bien equippee & fournie d'armes, d'artillerie & autres munitions de guerre. Leur charge fut de garder la ville & la forteresse contre les courses & assaux des ennemis. Dedans la forteresse furent laissez trenteneuf soldats, dont estoit chef Jacques Fernand Correa. Puis apres il fit entrer vingt six hommes dedans la Caruelle, & leur bailla pour Capitaine Pierre Raphael. Et pource qu'on racoustroit l'autre Caruelle, au lieu d'icelle Pacheco fit equipper deux petis basteaux, de l'un desquels Jacques Petrejo eut la charge avec vingt trois hommes. Pacheco commandoit dedans l'autre à vingt deux soldats, entre lesquels y en auoit vn fort ieune nommé Simon Andrade, qui deslors auoit fait de belles preuues de sa personne au fait de la guerre. Et ainsi toute l'armee nauale en ces trois vaisseaux estoit composee de septante vn hommes seulement. Auant que s'embarquer tous se confesserent & firent leurs Pasques selon la coutume: ce qui leur acrut le courage. Puis ils iurerent les vns aux autres de ne faire chose dont ils peussent auoir reproche, que pour danger quelconque ils ne tourneroyent le dos, s'employeroient iusques au dernier soupir pour s'entrescourir, ne se lairroyent prendre vifs, ni ne quitteroyent la place pour sauuer leur vies: ains mourroyent honnestement ou remporteroient vne belle & glorieuse victoire. S'estant ainsi encouragez & bien resolus, ils entrent es vaisseaux, & approcherent du lieu où le Roy de Cochim les attendoit au riuage. Icelui voyant Pacheco voguer si alaigremet contre tant de milliers d'ennemis, fut espris de grande ioye. Mais considerant tout soudain que toute son esperance estoit fondee sur septante & vn soldats, il comença à se troubler & auoir peur. D'autre part il fut esmeu de compassion & douleur, apperceuant ceste poignée d'hommes courans ainsi à la mort: & plus il les voyoit deliberez & hardis, plus les estimoit il dignes de compassion, estimant chose indigne de laisser perdre ainsi pauurement vne troupe de si braues soldats. Pourtant il pria avec grande abondance de larmes le general Pacheco, de quitter ceste entreprise, disant qu'il auoit perdu toute esperance de pouuoir plus garder son royaume: & qu'il n'estoit besoin agrandir le malheur present & ineuitable par la mort de Pacheco & des autres Portugallois qu'il aimoit comme ses freres. Qu'il se contétoit de leur bonne affection, apperceuant que la mort mesmes ne les auoit peu destourner de la volonté qu'ils auoyent de s'employer pour luy: & qu'il seroit aussi marri de la mort de tels hommes que de la perte de son royaume. Encores que Pacheco fust gentilhomme de grand cœur, si est ce que la harangue du Roy l'attendrit tellement qu'à peine se peut il contenir de pleurer. Toutesfois il le pria d'auoir bon courage, l'admonestant de destourner les yeux de ceste petite flotte de vaisseaux & poignée de soldats pour regarder à Dieu: que de sa part il alloit trouuer les ennemis estant appuyé sur la force de Dieu, & non sur celle des hommes: l'asseurât que Iesus Christ fils de Dieu souverain, que les Chrestiens reconoissent estre

*Ordre tenu
par Pacheco à
distribuer &
conduire ses
troupes.*

seigneur du ciel & de la terre, se trouueroit en ceste guerre, & en vn instât pourroit confondre les ennemis.

*Armée du
Roy de Co-
chin & com-
mencement de
guerres contre
le Roy de Ca-
lecut.*

P V I S apres il fit entendre ce qu'il requeroit du Roy. En ce temps Trimumpara auoit seulement cinq mil hommes de guerre : car les autres voyans les appareils du Roy de Calecut s'estoyent rangez de son costé. Pacheco choisit cinq cens de ce nombre, conduits par Candagore & Frangore estimez vaillans entre les Malabares, & par les seigneurs de Paluole & Darraul, auxquels le Roy commanda d'exécuter sans aucun delay tout ce que Pacheco leur commanderoit. Le seiziesme iours de Mars, l'an mil cinq cens & quatre, Pacheco partit de nuit avec ces troupes, & ayant la marée propre, arriua deuant iour au gué par la riuier qui coule dans le port de Cambalam. Le Roy de Calecut n'estoit pas encores venu : à raison de quoy Pacheco fut d'auis en l'attendant d'aller faire quelque dommage aux confederez d'iceluy. Pour cest effect il tira vers Repelin. Au port de ceste isle estoyent enuiron huit cens archers avec quelques harquebuziers. Ils accoururent pour empescher la descente à Pacheco & aux siens, à coups de fleches & de boulets : mais l'artillerie leur fit quitter la place : tellement que les autres mirent pied à terre. Les fuyards apperceuans les Portugallois loin des nauires se reioignent & les viennent charger fort resoluement. Le conflict fut tresâpre vne demie heure durant : mais en fin les Calécutiens furent repoussez & contrains se sauuer de viffesse, ayans laissé bon nombre de leurs compagnons sur la place. Le lieu où les Portugallois se rencontrerent fut incontinent brulé, & de là ils emmenerent plusieurs bœufs qu'ils tuerent pour fournir leurs vaisseaux, dont les Naires de Cochim s'offenserent grandement : car c'est crime entre eux de tuer vn bœuf, & sacrilege de gouter la chair d'icelui. Les Portugallois au cōtraire redoutâs plus la faim que le despit des Naires les laisserent murmurer avec leur superstitiō. Ce mesme iour le Roy de Cochī enuoya cinq cēs autres soldats à Pacheco, qui de sa part ne se fioit pas beaucoup en telles gēs, aïs auoit toute sa fiance en Iesus Christ, puis en la prouesse de ses soldats.

*Armée du
Roy de Ca-
lecut.*

Le lendemain le Roy de Calecut arriua avec son armée dont le nombre & ordre estoit tel. Bertacorole Roy de Tanor menoit quatre mil hommes. Cantanambare Roy de Bipur & de Cucurram, pays voisins d'une montaigne qui touche le royaume de Narsingue vers Orient, en auoit douze mil. Le Roy de Cotagam vers Septentrion, entre Calecut & Cananor, assez pres des montaignes, conduisoit dix huit mil hommes. Curriuaucuil Roy de Curige, ville située entre Cranganor & Panane, en auoit trois mil. Tous ces Rois, tributaires de celui de Calecut, auoyent leurs troupes & enseignes à part. Les autres soldats conduits par Naubeadarim & par plusieurs autres Seigneurs, montoient à plus de vingt mil, & y auoit grand nombre d'Arabes. Par ainsi ceste armée estoit composée de plus de cinquante sept mil hommes. Mais outre ces troupes qui marchoyent par terre, le Roy de Calecut auoit fait équiper vne flotte de cent soixante vaisseaux à rames, entre lesquels y auoit septante six brigantins, munis de grands sacs & bales de laine par les Milannois, pour recevoir les coups de canon.

Dauanta-

Dauantage, ces Milannois auoyent fondu force artillerie, & fait diuerſes machines de guerre pour ruiner tant plus aiſémēt les Portugallois. Outre-plus ſuiuant leur auis on auoit enchainé enſēble vingt brigantins qui voguoyēt deuāt les autres: & ceux qui cōmandoyent en iceux auoyēt charge d'ineſtir la carauelle, & l'acrocher le plus ſoudainement que faire ſe pourroit. Il y auoit douze mil hommes en ceſte armee nauale, deſquels Naubedarim eſtoit general. Encor outre tout cela le Roy de Calecut, cōſeillé par les Milannois, fit dresser en vne nuit vne leuee de terre en forme de bouleuart, & vne tour, vis à vis du corps de garde des Portugallois, afin que les ſoldats logez en ceſte tour peußēt offenſer a coups de fleſches & autres traits ceux qui oſeroyēt ſe moſtrer. Mais Pacheco fit lier d'un cable entortillé de chaines de fer (pour ne pouuoir eſtre coupé) la carauelle avec vn baſteau, à quelques pas loin l'un de l'autre: puis on attacha ce baſteau à vn troiſieſme en la meſme façon: par tel moyen il ferma toute la largeur du canal.

C E pendant l'armee de Calecut, qui tenoit la route pour deſcendre en l'isle de Cochim du coſté de Septentrion, approchoit. La multitude des ennemis, la fanfare des trompettes, les grands cris & diuerſes hūes, la lueur des armes & baſtōs de guerre battus des rayons du Soleil, & le bruit des canons qui faiſoyent trembler la terre, effroya tellement les ſoldats de Cochim, que tout ſoudain ils quitterent la place, laiſſans ſeulement Frangore & Candagore leurs capitaines qui demeurerent comme par force, à cauſe qu'ils eſtoient dedans la nauire, & Pacheco les retint pour eſtre ſpectateurs du combat: ſans les vouloir employer à autre choſe. Les ennemis vindrent au combat de grande impetuoſité à coups de traits & de boulets tirez par mer & par terre: tout eſtoit en feu, & la ſumee oſtoit le iour aux combatans. Quant aux Portugallois, ils ne ſauoyent comme reſiſter à l'armee nauale ni euites les coups des traits lancez du haut de la tour: neantmoins ils eſtoient reſolus de ſe defendre courageuſement où de mourir en gens de bien. Car tant plus les ennemis faiſoyēt d'effort, plus ſēbloient ils meſpriſer hardimēt tous dāgers. Et premierement ils rôpirent quelques vaiſſeaux: mais les vingt brigantins enchainez enſēble approcherent plus pres & leur dōnerent beaucoup d'affaires: car ils tiroyēt ſi ſoudainemēt, q̃ les Portugallois n'auoyent pas loisir de reprendre halaine, & eſtoyēt deſia tant las de combattre qu'à peine ſe pouuoient ils tenir debout. Le combat ayant duré quelques heures, Pacheco fit braquer vne des plus groſſes pieces & tirer quelques coups contre ces brigantins, qui furent eſcartez, & quatre d'iceux tellement briſez qu'ils furent contrains ſe tirer arriere. Les autres ſuruiurent en la place & attacherent de rechef le combat: mais Pacheco & les ſiens enfoncerent huit brigantins, donnerent la chaſſe à treize autres: au moyen dequoy ceux qui reſtoient n'eſtoient paſſi eſchaufez à venir aux mains, voyans ce qui eſtoit auenu à leurs compagnons. Sur ce, le Seigneur de Repelin qui leur faiſoit eſpaule vient avec ſes vaiſſeaux aſſailir les Portugallois las & recreus: d'autre part le Roy de Calecut avec ſon armee taſche de paſſer le gué & accabler ceux qui lui vouloyēt faire teſte.

Batailles & victoires admirables des Portugallois.

Alors le conflict fut beaucoup plus aspre que deuant, tellement que l'eau du canal sembloit estre tournee en sang. Le seigneur de Repelin crioit à ses gens qu'ils accrochassent la nauire, & assaillissent viuement ceux qui estoient dedans, faisant tout son possible par exhortations & menaces pour s'en rendre le maistre: toutesfois il perdit ses peines, car l'armee qui combattoit en terre fut mise en route finalement, la flotte des vaisseaux recula, & le combat finit sur le soir au grand estonnement de tous. Il y eut quelques Portugallois blesez, mais pas vn tué. Les ennemis y perdirent plus de treize cens hommes. Brief Dieu besongna ce iour là tout euidentement, comme Pacheco s'en estoit asseuré. Car on vid plusieurs Portugallois frappez de coups d'arquebouse sans en auoir receu autre dommage qu'une petite meurtrisseure: pour monstrier que ceux là sont inuincibles qui sont en la sauuegarde du Tout puissant.

Autres exploits & victoires des Portugallois.

LE Roy de Cochim ayât eu les nouuelles de ceste victoire en fut extremement relioui, & enuoya incontinent le Prince qui lui deuoit succeder au royaume gratifier Pacheco pour l'heureux succes de ceste iournee. Cōbié q̄ les Portugallois fussent cōme rōpus de tant de trauaux, si ne se dōnerent ils pourtant aucune reiasche: car en moins de rien les basteaux furent calefeutrez, & l'autre carauelle refaite à neuf fut iointe aux autres vaisseaux. Au reste, combien que par l'auis des deuins le Roy de Calecut differast de combattre iusques à vn autre iour, Pacheco ne voulut se reposer pour cela, ains passa en Cambalam, coupant les arbres, gastant le plat pays, tuant les personnes, & emmenant force butin, maugré les garnisons de l'ennemi, lesquelles il desfit en plusieurs rencontres. En telles executions il se monstroist industrieux, diligent, & autant aisé que peut estre vn bon capitaine. Quant au Roy de Calecut, encores qu'il ne desirast sinon se venger, toutesfois il n'osa recommencer la guerre, que le iour assigné par les deuins ne fust escheu. Il auint que ce iour estoit celui de Pasques, auquel les Chrestiens renouellent & celebrēt en grande ioye la memoire de la resurrectiō de Iesus Christ. L'armee de mer de Calecut estoit beaucoup plus grande qu'auparauant: car il y auoit cent brigantins, cent galeres, & quatre vingts petis basteaux, parce que de fois à autre on enuoyoit renfort au Roy de Calecut. Le nombre des soldats de ceste armee nauale montoit à plus de quinze mil. Or pour mieux executer son dessein ce Roy enuoya vn de ses capitaines avec septante brigantins en Cochim pour assaillir & mettre en fond la nauire laissée pour la garde de la ville, ou du moins y attirer Pacheco afin de la garantir: estimant mettre plus aisément fin à ceste guerre en separāt les forces des Portugallois. Les brigantins entrerent de nuit par vn destroit de mer dedans le canal, & arriuerent près de Cochim. Ce destroit estoit tel que toute la flotte pouuoit aisément voguer iusques en Cochim: mais le Roy de Calecut ne voulut y entendre, ou pource qu'il n'osoit s'enfermer en ce destroit, ou ne vouloit faire ce tort à la reputation de changer de place, ou plustost pource que par la grace de Dieu, qui eut soin des Portugallois, la prudence lui faillit au besoin. Si tost que les brigantins commencerent à assaillir la nauire, le Roy de Cochim enuoya auertir Pacheco

checo du danger auquel estoient reduites les affaires, dont Pacheco fut fort troublé, sachant bien à quoy tendoit vne telle entreprinse. Toutefois estant contraint d'y pourvoir promptement, il resolut de l'aller secourir: pourtant le plus soudainement qu'il fut possible, ayant mareae propre il vogua vers Cochim avec vn petit bateau & l'vne des carauelles. Si tost que les ennemis le descouurirent, ils se retirerent, & a force de rames gaignerēt Repelin. Luy ne voulut point aller apres, ni entrer en la nauire, ains sans parler à personne, se hastia de retourner aussi vistemment qu'il estoit venu, à quoy lui seruit beaucoup le vent qui estoit tourné, comme il auient souuent quand la mer se retire. Or quand il arriva au destroit de Cambalam, ses gens estoient en extreme danger: car la carauelle restee pour garder le passage estoit percee en plusieurs endroits à coups de canon; tout l'equippage rompu & les bales de cotton esparfes. Semblablement les petis bateaux estoient en peril tout euidēt, à cause que leurs pauois estoient brisez & leurs fournitures mises en pieces: puis les Calecutiens les ceignoient de tous costez tāt par mer que par terre. Neātmoins les Portugallois ainsī pressez n'auoyent faute de bon courage, ains plus on leur couroit sus viuement, plus resoluement faisoient ils teste à l'ennemi. Tel estoit leur estat quand Pacheco reuint à eux, qui vint donner impetueusement à dos aux Calecutiens, lesquels ne l'attendans pas si tost furent merueilleusement effroyez: au contraire les Portugallois qui combatoyent en front reprindrent cœur, & au lieu de se defendre commencerent à assaillir. Ainsī les ennemis ayans à faire deuant & derriere, gaignerent le haut: mais auāt que partir ils perdirent dixueuf brigantins, & pres de trois cens soldats, sans que Pacheco y laissast aucū des siēs, & ce afin que lon conust encores mieux que Dieu auoit besogné d'vne faueur speciale en ce conflict: d'autant que pour certain plusieurs soldats de Pacheco furent frappez à coups de traits, les vns à la teste, les autres à la poitrine, aux bras, & en d'autres endroits du corps, sans mort de personne d'eux, combien que cestraits fussent lancez de telle impetuositē, qu'en tombant des corps contre qui lon les dardoit ils perceassent des boucliers espais, & passassent aisēment à trauers les bales & autres empeschemens qu'on mettoit au deuant.

LE Roy de Calcut ne pouuant porter vne telle honte, fir incontinent rassembler & renger en bataille ses vaisseaux pour assaillir derechef les Portugallois. Ce que Pacheco voyant, il defendit à ses gens de ne tirer, ni faire bruit, que premierement il ne leur eust donné vn certain signal. Les ennemis n'oyans aucun bruit estimerent que les Portugallois estoient tellement blesez & estonnez qu'ils auoyent perdu toute esperance de pouoir plus resister. Pourtant ils commencerent avec grandes huees & d'vne vistesse incroyable, en desordre, à s'approcher des carauelles & bateaux de Pacheco, tant par mer que par terre. Estans assez pres Pacheco fit signe à ses soldats qui se monstrent tout soudain, s'escrient à haute voix, cōbatans à coups de canon, de harquebouzes & autres sortes de traits. Ils enfondrent beaucoup de brigantins, escartent & brisent les autres, ostent la vie à grand nombre d'hommes. Les Calecutiens furent fort estonnez de

Autres batailles & viues d'armes des Portugallois.

voir sains, vigoureux & si aspres au combat ceux qu'ils estimoyent demi hachez en pieces : mais principalemēt le carnage de leurs gens leur ostoit le courage. Et pourtant, encor que le Roy regardast la meslee, il n'y eut honte ni crainte de chastimēt qui les peust retenir qu'ils ne s'enfuissent. Le seigneur de Repelin apperceuant cela, les recueillit, & apres auoir redressé la Botte il vint assaillir de rechef les Portugallois : en telle sorte neâtmoins qu'il ne voulut venir aux mains, ains se contenta de combattre de loin. Le Roy prenant garde à ceste façon de guerroyer, tança rudemēt ce seigneur, l'appellant couard, mesmes l'outrageant par des iniures fort picquantes. Puis il fait venir Naubeadarim, & l'exhorte de se ruer promptement sur les Portugallois, & les presser de telle violēce qu'ils demeurassent accablez à ce coup, considéré qu'il n'y auoit apparence qu'ils peussent subsister plus longuement, ayans esté tant harassez. Naubeadarim acceptant ceste charge, vient au gué & tasche de rompre l'empeschemēt que lui faisoient Pacheco & les siens, lesquels se porterent si vaillamment qu'outre ce qu'ils soustindrent tous les efforts des Calecutiens ils les contraignirent de tourner le dos, leur donnerent la chasse viuement, & les endommagerent fort alors : car ils mirent à fond vingt brigantins, & tuerent six cens hommes. Le Roy ayant perdu toute esperance de pouuoir gagner ce passage, fit desmonter les canōs bracqués en la tour, & leuer le camp. Pacheco poursuinit assez loin l'armee nauale, puis ayant prins terre mit le feu en deux grands villages. Cela fait il reuint au gué sur les dix heures. La bataille auoit commencé au point du iour, & dura iusques enuiron ce tēps. Apres s'estre rafraischi quelque peu, Pacheco entendit de ses espions qu'assez pres de là y auoit vne bourgade bien peuplee, mais pour lors mal fournie de gens. Il y alla promptement, assaillit à l'impourueue ceux de dedans, en tua la pluspart, & mit le feu dedans les maisons. Comme il se vouloit retirer les ennemis espars se reioignent, & lui courent sus : lui en fait tomber grād nombre sur la place, blesse plusieurs des autres, & les contraint de sauuer de vistesse. En quoy ie ne suis pastant esbahi de ses victoires, que ie m'estonne de son trauail, de sa diligēce & vistesse. Car il s'endurcissoit à la peine, il n'y auoit difficulté qui l'arrestast & ne faignoit de fourrer là teste à trauers tout danger pour donner la chasse à ses ennemis. Estant donc de retour au gué, il trouua plusieurs seruiteurs & domestiques du Roy de Cochim, avec force viandes & fruits que l'isle porte, qui lui furent presentez pour le soulagement de lui & de ses soldats.

Le Roy de Calecut las de la guerre, y est pouffé de rechef par mauuais conseil.

EN ce temps, le Roy de Calecut commençoit à se repentir d'auoir esmeu ceste guerre, & desiroit se retirer en sa ville, ayant pour cest effect cassé la pluspart de ses troupes. Naubeadarim estoit entierement de cest auis. Mais le seigneur de Repelin, ces Arabes qui estoient au conseil, & les deux Milannois soustenoyent au contraire que le Roy ne pouuoit bonnement laisser les choses ainsi, veu qu'il y alloit non seulement de son hōneur, mais aussi de la conseruation de ses estats. Dautant que s'il retournoit à Calecut laissant la place aux ennemis, outre l'ignominie dont il se flectiroit, ses ennemis en deuiendroyēt plus aspres & insolens, tellement qu'il auroit puis apres

apres toutes les peines du monde à les chasser arriere des limites de son royaume. Qu'il pouuoit s'abstenir de commencer ceste guerre sans autrement preiudicier à sa dignité: mais que de quitter ainsi les affaires, il ne pourroit sinon encourir la mocquerie des grands & des petis. Dauantage qu'il ne faloit pas tenir pour chose impossible le traieçt en l'isle de Cochim, veu qu'il y auoit d'autres passages encores à sonder, par où l'armee pourroit entrer plus aisément. Pres du destroit où les batailles precedentes furent donnees y auoit vn autre gué nommé Palignare, si fangeux, que celui qui le vouloit traueser y estant entré ne s'en pouuoit retirer qu'avec indicible peine. Le riuage du costé de Calecut estoit couuert de buissons & brosaïlles espais. Neantmoins ils se persuadoient pouuoir passer en cest endroit, pource que les nauires de Pacheco ne pouuoient y entrer, à cause que les eaux y estoient trop basses. De là ils faisoient leur compte de gagner le destroit par où le Roy estoit passé lors qu'il cōquit l'isle de Cochim sur Trimumpara: & s'asseuroyēt d'entrer par là si promptement que Pacheco ne viendroit iamais d'heure au secours. Mesmes ils cuidoyent que Pacheco s'endormiroit, & n'assembleroit aucunes forces pour empescher l'execution de ceste entreprinse, laquelle ayant esté ainsi resolue, ils descamperent. Du commencement, les descouureurs de Cochim estimerent que le Roy de Calecut auoit perdu toute esperance de venir au dessus de son entreprise, & s'en retournoit en son pays. Mais apperceuans qu'il se redoit au gué de Palignare, sur l'heure ils en donnerent aduertissement à Pacheco, lequel fut auerti par d'autres espions qu'en l'isle d'Arrol estoient descendus cinq cens soldats Calecutiens, qui en grande allegresse abbatoyent les arbres d'une forest, qui est vne coustume obseruee par ces peuples quand ils s'assurent d'obtenir quelque victoire. Or pource que l'isle n'estoit gueres eslongnee, Pacheco partit en diligence pour y aller avec deux cens hommes de Cochim (car plusieurs estoient reuenus, & auoyēt obtenu pardō de leur reuolte) & quelques Portugallois. Il diuise ses troupes en deux bandes, de l'une desquelles il donna charge à Pierre Raphaël, & lui conduisit l'autre. Les ennemis furēt taillez en pieces pour la pluspart, d'autāt qu'ils voulurent faire teste: outre plus cinquante demurerent prisonniers & les amena-on au Roy de Cochim.

Il n'estoit pas besoin que Pacheco demeurast plus lōg temps à garder le passage du gué, & d'autrepart la grandeur du danger ne lui permettoit de laisser vne entree libre à l'ennemi, il fit tourner les nauires tout à point vers vn autre destroit propre pour entrer en Cochim, nommé Palurce, à vne lieue loin du gué de Palignare. Estant à l'anchre en ce lieu, il entendit que le Roy de Calecut s'estoit resolu de passer le gué le lendemain qui estoit le premier iour de May. Lots il delibera y aller avec les basteaux, & laisser les Nauires avec quelques capitaines au destroit de Palurce: tenant comme pour certain que l'ennemi s'essayeroit de forcer l'un & l'autre passage. Mais auant que partir il fit couper & brusler les arbres qui estoient en l'isle à l'opposite des nauires, afin que les ennemis ne s'y peussent loger à couuert, & s'en seruir de rempar pour euitier la furie du canon des nauires,

Pouruyance notable de Pacheco aux affaires de la guerre.

lesquelles il dispose en telle sorte qu'elles estoient quelque peu esloignées, & neantmoins attachees & retenues avec des cables afin de se pouuoir entresecourir & occuper tout le destroit. En ces difficultez il apperceuoit vne commodité, que lon ne pouuoit forcer les deux guez en vn mesme instât. Car quand la maree montoit, le gué de Palignare se remplissoit tellement qu'il estoit impossible le passer à pied : & quant aux grands vaisseaux ils ne pouuoient y entrer ni au venir ni au departir de la maree. Pour le regard du gué de Palurce où estoient les nauires, les grands vaisseaux le trauefsoient aisément quand le flot de mer se haussait, mais s'estant abaissé ils estoient contrains de reprendre le large. Ainsi lors que les pietons pouuoient franchir le gué de Palignare, la flotte ne pouuoit trauefser celui de Palurce : & au contraire la roideur du reflux au gué de Palignare empeschoit le passage à l'armee, lors que presques à pié sec il estoit aisé d'entrer en Cochim par le destroit de Palurce. Ce que Pacheco descouurit, & pourtant fit estat d'empescher les ennemis en tous les deux endroits en diuers temps, gardant Palurce quand la mer hausseroit, & Palignare lors qu'elle baisseroit.

*Harangue de
Pacheco à
ses capitaines
& soldats.*

A Y A N T donc deliberé de se rendre au gué de Palignare il fit entendre aux Capitaines commis à la garde du destroit de Palurce ce qu'ils auoient à faire, & leur monstra quel signal ils auroient à lui donner pour venir à leur secours si la necessité le pressoit. Lors il les exhorta d'auoir l'honneur de Dieu & le leur en recommandation, declarant que la bataille à laquelle ils s'apprestoyent seroit beaucoup plus furieuse que les precedentes. Qu'il fauoit bien que ceux à qui sa parole s'adressoit estoient gens resolus cõtre tous dâgers : mais que le cœur leur deuoit croistre d'autât plus que le peril ineuitable en apparence approchoit de leurs testes. Au reste il les prioit de s'asseurer que comme nostre Seigneur leur auoit assisté es autres combats, il ne les abandonneroit non plus en cestui ci : d'autant que le bras du Tout puisât ne peut estre referré en quelques limites, & n'y a force humaine ni multitude tant grande soit elle qui lui puisse resister. Cela dit, il les admonnesta de boire & manger, adioustant qu'il se doutoit bien qu'ils ne feroient le lendemain autre repas que celui que leur prouesse leur apresteroit. Eux suiuant cela banquetter ensemble, & apres auoir posé les sentinelles se reposent, n'oubliâs pas à se recõmander de bõ cœur à Dieu. Des la pointe du iour Pacheco se rendit au gué, & descouurit au riuage le Prince de Cochim enuoyé de par le Roy avec six cēs soldats pour faire teste aux ennemis. Or Pacheco attendoit que le Roy de Calecut se vinst ietter au destroit. mais apperceuant qu'icelui n'entreprenoit rien, & que le flus de la mer remplissoit & gardoit le passage, il vogua en diligence vers les nauires, & de là commença à assaillir en diuers endroits les Calecutiens selon que la commodité se presentoit : se conduisant au reste de telle sorte, que fust de iour, de nuit, en beaultemps ou durant la tempeste, on le voyoit tousiours au gué de Palignare quand la maree reculoit, & en celuy de Palurce lors qu'elle approchoit : sans toutesfois laisser ces passages du tout desnuez : car il auoit fait anchrer les nauires au gué de Palurce qui est plus profond,

profond, & les basteaux en celui de Palignare.

S V R C E ayant entendu par le rapport de ceux qui estoient allez decouvrir que le Roy de Calecut auoit deliberé d'employer toutes ses forces le lendemain pour forcer le destroit de Palurce: il pourueut promptement à tout ce qui estoit requis pour la defense de ce passage. Cristofle Iufarte & Simon Andrade, qui auoyent esté laissez avec deux petis vaisseaux au gué de Paliguare, le vindrent trouuer auant iour pour estre en la bataille, disans puis que la mer auoit rempli le gué, ce seroit vne grand' honte à eux de perdre vne si belle occasion que la vertu & l'honneur presentoyent: & qu'ils retourneroyent au gué de Palignare, si tost qu'ils apperceuroyent la marée s'abaisser. Incontinent que le iour apparut, les ennemis qui estoient ia venus, commencereut à canonnér viuement contre les vaisseaux des Portugallois. La flotte de Calecut commença aussi à se monstrier, estant composee de deux cens cinquante voiles. Mais dautant qu'elle estoit encores loin, Pacheco fut d'auis de faire quelque coup de pédant, afin d'auoir moins de besongne durant le combat. Pourtant il fit voguer promptement quelques esquifs vers le riuage, & commanda aux soldats chargez dedans de mettre pied à terre, & avec eux courut à l'artillerie des enuemis qui du commencement combataient de grãd courage: mais en fin les vns furent tuez sur la place, les autres contrains de la quitter & se sauuer de viffesse. Or pource qu'il n'estoit pas possible de traîner les pieces dedans les nauires, afin que l'ennemi ne s'en peust aider puis apres, elles furent enclouées. Cela ayant esté executé en peu d'heures, Pacheco reuint trouuer ses gens tout soudain. Alors la flotte de Calecut approchoit, canonnant sans cesse les Portugallois, & faisant tout retentir du cliquetis de toutes sortes d'armes. Pacheco commanda lors à tous ses soldats, de se coucher sur le ventre, sans faire aucun bruit, iusques à ce qu'il leur feroit signe de combattre. Les ennemis presumoyent que cela procedoit de crainte & de desesperoir. En premier rang vogueoyent quarante brigantins attachez ensemble pour enueller & accabler la petite flotte de Portugal. Quand Pacheco vid l'occasion, il leua le signal: alors le cri des soldats le son des trompettes & le tonnerre des canons monstra de quelle resolution les Chrestiens venoyent au combat. Et dautant que l'artillerie iouoit de part & d'autre, la fumee de la poudre causa vne obscurité si espaisse, que lon ne voyoit ni ciel, ni mer, ni terre, ains seulement vn feu espouuentable sortant de la bouche d'infinies pieces de canon. Les brigantins de Calecut receurent les premiers coups, au moyen dequoy ils furent escartez & brifez. Mais le seigneur de Repelin en enuoya d'autres entiers incontinent. Les choses estoient en grand branle, & les ennemis approchoient, tellement qu'outre les coups de canon & d'autres bastos de canon, ils tiroient leurs fiesches, lançoient des dards & toute autre sorte de traits: Toutesfois à cause que pas vn des Portugallois n'estoit encor tombé, & qu'au contraire ils auoyent tué grand nombre de Calcutiens, si que l'eau du canal estoit tainte de sang, les ennemis commencerent à reculer. Le seigneur de Repelin voulant faire quelque beau coup en la presence du Roy

Bataille navale entre Pacheco & le Roy de Calecut.

pour acquerir la bonne grace d'icelui, fit tous ses efforts par deux fois de passer le gué: mais il fut repoussé avec sa courte honte & grande perte d'hommes.

Nouvelle victoire de Pacheco.

EN ces entrefaites, Candagore vint apporter nouvelles à Pacheco que les affaires estoient en grand danger: pource que Naubeadarim accompagné d'une bonne troupe marchoit en diligence vers le gué de Palignare & le Roy apres lui, pour trauffer ce destroit à quelque pris que ce fust. Pacheco rassura Candagore, disant que l'eau estoit encores assez haute au gué pour arrester l'impetuosité des ennemis: que de sa part il iroit au secours à temps. Et pourtant il continua le combat tandis qu'il estima que l'eau empescheroit le passage de Palignare. Mais connoissant qu'elle baïssoit fort, il tourna vers cest endroit pour faire teste à Naubeadarim, où il reprima de telle prouesse l'effort des ennemis, que Naubeadarim, qui combattoit en presence du Roy pour gagner ce pas, fut contraint reculer, encor que le Roy encourageast lui mesmes ses gens à faire leur deuoir. Alors le Roy commença à s'attacher à Naubeadarim, lui disant outrage, qu'il n'estoit pas digne d'estre prince, ains ressembloit en couardise & faute de cœur au seigneur de Repelin: attendu que l'un & l'autre auoyent en sa presence quitté la place aux Portugallois, & s'estoyent honteusement departis de la meslée. Naubeadarim extremement irrité des propos picquans de son oncle, résolut d'effacer au pris de sa vie ceste tache de deshonneur qu'on lui vouloit mettre sus. Ainsi donc il reuint pour passer le gué avec plus de douze mil hommes. Le combat fut tresaspre, & les uns & les autres se porterent vaillamment: mais en fin les Calecutiens se sentirent tant desavantagez qu'ils tournerent le dos. On ne fait pas bonnement combien le Roy perdit de vaisseaux & de gens es batailles donnees en ces deux destroits. Pour certain le nombre fut grand: d'autrepart aussi les nauires des Portugallois furent percees de plusieurs coups, l'equippage rompu, & y eut quelques soldats blessez.

Vigilance de Pacheco & mort aux apogres du Roy de Calecut pour une nouvelle bataille.

C'EST pendant la peste se vint fourrer au camp des ennemis & en estouffa grand nombre, qui empescha le Roy de poursuiure ceste guerre si malheureusemēt entreprise, iusques à ce que le mal cessast: accident qui vint bien à propos aux Portugallois, car ils racoustrent leurs nauires, firent nouvelle prouision d'armes & de traits, & donnerent bon ordre à tout pour faire la guerre plus viuement qu'ils n'auoyent encores fait. Au parauant Pacheco auoit fait ficher des pieux, ferrez au bout, dans la boue du gué, pour enfermer les ennemis qui voudroyēt trauffer à pied ce destroit. Mais d'autant que la fange estoit trop molle les pointes entrerēt si profond que les ennemis n'en furent point endommagez. De nouueau donc, apres la retraite de la mer, Pacheco fit planter dedans la boue des pieux bruslez & aguisez par le bout, les faisant attacher ensemble par bas, pour n'estre point esbranlez: & ce afin d'incommoder tant plus les ennemis, & les garder de prendre terre, ni auancer ou reculer. Ce pendant le Roy de Calecut enuoye querir les Brachmannes & les exhorte de demander conseil aux dieux, & sauoir en quel iour il deuroit donner bataille pour chastier

ses

ses ennemis de tant de torts qu'il auoit receus d'eux. Les Brachmannes estoient fort offensez des maudissons & paroles outrageuses que le Roy auoit profetees contre eux, les ayant appelez menteurs & meschans entre tous autres. Car ils lui auoyent promis la victoire, au lieu dequoy il auoit esté batu & rebatu. Pour excuse ils alleguerēt que les dieux estoient irritez cōtre lui, & que mal sur mal lui auendroit, si premierement il ne se reconcilioit à eux. Qu'il leur faloit dōc bastir vn turcol, c'est à dire vne chapelle, où quelques religieux feroient le seruice. Le Roy ayant voué de bastir ce turcol, les Brachmannes lui promettent la victoire au nom de leurs dieux, & assignent le iour de la bataille. D'une autre part plusieurs de ceux qui auoyent quitté le parti de Trimumpara, s'y vindrent reioindre, à cause de l'heureux succès de ses affaires, & obtindrent pardon maugré Pacheco. Le Roy de Calecut ne voulant pas estre priué du bien qui lui deuoit auenir au iour assigné par la prediſtion des Brachmannes, satisfit de point en point à son vœu. Or pour assaillir les Portugallois il tint l'ordre que s'ensuit. Premierement marchoyent trois mil hommes qui gardoyent trente canons montez sur roues. L'auantgarde les suiuiot sous la conduite de Naubeadarim, composée de douze mil hommes. Le Seigneur de Repelin menoit la bataille où y auoit mesme nombre. Il y auoit quinze mil hommes en l'arrieregarde où le Roy marchoit en personne.

EN ce temps Pacheco estoit au gué de Palignare avec deux basteaux & quarante soldats seulement, où il attendoit ceste grande armee. Les trois mil Calecutiens qui marchoyēt les premiers braquēt leurs pieces en vn endroit vis à vis des basteaux, & lâchent de gros boulets pour faire desloger Pacheco. Mais lui se cōtint quelque peu de tēps, afin de ne les esfaroucher: puis tout soudain fit approcher les basteaux plus pres de terre, & canonner furieusement ce bataillon des ennemis: ce qui fut executé si promptement & dextrement que de frayeur ils se retirerent dedans vne espaisse forest. La bataille estant ainsi commēcée, Naubeadarim entra dedans le gué, & fit tout deuoir de passer outre. Les Portugallois resistoyēt à coups de harquebouze, & bleſsoyēt griefuement plusieurs de leurs ennemis par le moyen de certaines pieces de fer quarrées qu'ils mesloyent avec la poudre dedās leur artillerie, les boulets de laquelle tuoyent aussi grand nombre de gens. La marce baïssoit encor, à cause dequoy Pacheco craignant que son basteau ne demeurast embourbé, remonta quelque peu, commandant à Christofle Iufarte qui auoit vn basteau plus court & propre pour l'eau basse, de demeurer là autant qu'il lui seroit possible: & quār à lui qu'il reuiendroit avec le flot de la mer. Ce pendant il ne laissa pas de combattre vaillamment, & empescha les ennemis d'entrer au gué avec non moindre effort que Iufarte. Le Roy de Cochim auoit enuoyé en certain endroit fort d'assistance & bien remparé quelques soldats pour repousser l'ennemi, si d'auanture il gaignoit le passage. Eux voyans les troupes de Calecut dedans le gué, quittent tout & s'enfuyent. Alors le Prince de Cochim estoit absent, & Pacheco l'auoit enuoyé querir par vn Brachmanne, par la meschanceté duquel estoit auenu que le Prince n'estoit peu venir à temps: car il ne lui

Batailles & victoires admirables des Portugallois.

Il faut maintenant se fier en gens qui n'ont point de foy.

voulut rien declarer sinon apres auoir veu les affaires du Roy de Calecut acheminees, comme il le desiroit. La plupart de ces fuyards de Cochim estoÿet conduits par vn des traistres qui auoit quitté le partl de Trimumpara, & depuis s'estoit remis en grace. A l'occalion dequoy, Pacheco qui ne se fioit point en telles gens, voulut donner auertissement au Prince de la baraille qui se deuoit donner, afin qu'il amenast vn plus asseuré secours. Car le Prince estoit retourné en la ville de Cochim lors que les ennemis cesserent de guerroyer. Iusarte cria à haute voix pour faire entendre à Pacheco la lascheté des traistres: mais il y auoit vn tel bruit d'armes, & si grande huee des combatans que Pacheco n'en entendit rien.

SVR ces entrefaites le seigneur de Repelin qui suiuoit Naubeadarim se trouua au gué. Le Roy qui marchoit apres faisoit tous ses efforts de gagner ce passage. Pacheco le recognoissant à ses accoustremens royaux, fit braquer droit à ce Roy vne piece dont le boulet escarbouilla deux de ses plus familiers, ce qui le troubla & fit reculer, exhortant sans cesse Naubeadarim & le seigneur de Repelin d'enfoncer ses ennemis. Pour à quoy paruenir ils chassoyent leurs gens à coups de baston, afin de gagner le bord, les menaçoient aigrement l'espee au poing s'ils n'executoyent resoluement ce qui leur estoit commandé, mesmes ils en blessèrent quelques vns. Ainsi les vns poussoyent les autres & s'entr'empeschoyent. Mais quand ils furent arriuez aux pieux susmentionnez, plusieurs griefuement blesez sous le pied tomberent à plat: lors ce fut à gemir & lamenter, tellement que tout retentissoit de cris & de plaintes: & les derniers venus tomboyent sur les premiers. Ce pendant l'artillerie disposée es basteaux faisoit vn terrible eschec donnant à trauers ceste multitude ainsi empestree. De là sensuiuit vne grande confusion entre les ennemis: car plusieurs ainsi blesez desirans tourner en arriere ne pouuoient: les autres estonnez voulans faire le mesme estoient contrains de passer vistemment outre. Les choses estans en cest estat, grand nombre de Calecutiens entrét au gué par l'autre endroit qu'ils trauerlent sans empeschemét, & à coups de haches tranchent la palissade, puis se saisissent du fort que les soldats de Cochim auoyent abandonné. Pacheco ayant apperceu cela, estima tout perdu: toutesfois il n'en fit aucun semblant, ains approcha du basteau de Iusarte & se lança dedans, commendant à Iusarte d'entrer au sien: & ainsi en approchant plus pres du gué, il resolut de repousser l'ennemi à coups de canon & d'autres traits. Mais Naubeadarim suruint qui recommença le combat aussi furieusement que sil n'eust fait que commencer. Les Calecutiens sauauçoient hardiment, & se ramassoyent pour enclorre de tous costez les Portugallois: mesmes plusieurs d'entre eux empoignoient les auirons du basteau, tellement qu'il ne se pouuoit remuer. Lors Pacheco se voyant perdu, commence à implorer le secours de Dieu à haute voix, & tout à l'instât conut que la main du Tout puissant combattoit pour lui: car la marée commençoit à s'enfler & couvrir le gué. Au moyen dequoy les Portugallois prennent courage, & taschent de pousser le basteau à force d'auirons. Ils combatoyét à coups de dards, de picques, de pieux & bastôs
brûlez

La main de Dieu se monstre es extremes dangers.

bruslez par le bout. Mais tant plus le gué se remplissoit d'eau, plus Pacheco & les siens se monstroyent aspres au combat, talschās avec vne impetuosité incroyable se retirer du milieu des ennemis qui les auoyent enclos. Finalement, pource que le flus de la mer couuroit le passage, ceste bataille (la plus furieuse de toutes les precedentes) prit fin. Ainsi Pacheco deliuré de la multitude de ses ennemis reuint trouuer Iusarte qui fit de braues exploits en ce combat. Et pource qu'alors les basteaux voguoient à l'aïse, l'aïse des deux chefs fut de faire iouer l'artillerie: car ils ne vouloyent perdre l'occasion quand elle se presentoit. A ceste cause ils commencent à tirer contre les ennemis qui estoÿt en terre pres du gué, en tuent bon nombre, & contraignent les autres de se sauuer dedans la forest.

Le Roy de Calecut desespéré ce iour là, se plaignoit amèrement de son mal-heur, en ce qu'avec tant de forces il n'auoit peu forcer quarante hommes seulement. Or comme il se retiroit, estant porté en lictiere, & approchant d'un lieu non gueres eslongné de l'endroit où le gué estoit plus profond, Pierre Raphael fit delascher vn coup de canon, dont le boulet esmorcella aux pieds de ce Roy trois de ses seruiteurs domestiques, mesmes il fut artoué de leur sang qui rejaillit sur luy: ce qui luy donna telles afres que tout soudain il sauta en terre, & s'enfuit vistemēt à pied arriere de là. Ceste dernière bataille ayant commencé au point du iour dura iusques à neuf heures du matin. Le Roy de Calecut y perdit plus d'hommes & de vaisseaux qu'il n'auoit fait en pas vn des combats precedés contre les Portugallois, qui resterent tous en vie, encores que leurs ennemis combatans desesperémēt leur eussent tiré infinis coups de fleches, de dards & d'autres traits. Qui monstre assez que toute ceste guerre fut menee & la victoire acquise par la force de celui qui peut en moins de rien renuerfer les ennemis de son saint nom, & qui n'abandonne iamais les siens au besoin. Si quel-qu'un estime cela incroyable, il n'oste rien aux homes, mais il rauit la gloire à Dieu, & monstre ne sauoir combien la vraye religion a grāde efficace. Ceux qui ont quelque crainte de Dieu, & qui ont senti sa faueur en diuers accidens de leur vie, confesseront franchement que ceux qui s'appuyent fermement sur le bras de Iesus Christ, peuuent executer encor plus grandes choses que les susmentionnees, sur tout quand il est question de maintenir la gloire d'icelai. Or il estoit requis que cela auinst ainsi lors, à cause que ces peuples ne sauoyent que c'estoit de Iesus Christ, & que les Portugallois n'auoyent encor le pied ferme es Indes: afin que tels miracles attirassent plus aisément ces peuples à la conoissance de Dieu, & que les Portugallois festans fortifiez posassent les fondemens d'une domination, par le moyen de laquelle la lumiere celeste vinst à esclairer les nations du Leuant: ce qui auint depuis comme nous le voyons, & esperons que ceste lumiere apparoitra encor plus clairement cy apres.

PACHECO se voyant deliuré d'un si grand danger, & les ennemis en route, rendit graces à Dieu avec grande deuotion. Sur ce, le Prince de Cochim suruint, auquel Pacheco tourna le dos, n'estimant pas chose seante à sa dignité de parler à vn couard, deserteur & perfide: dōt le Prince fut fort

*Retraite du
Roy de Cale-
cut & ce qu'il
faut estimer
des combats
precedents.*

*Pierre pruden-
ce & bñ ami
de Pacheco.*

indigné, proposa ses excuses, iurant que c'estoit par la faute du meschant Brachmane, & non par la sienne, qu'il ne s'estoit point trouué en la bataille. & que ce Brachmanne auoit resolu ne l'appeller, sinon apres que le Roy de Calecut auroit exterminé les Portugallois. Ceste excuse contenta Pacheco qui dit que le Roy de Cochim, oncle du Prince, estoit cause de tout le mal, pource qu'il auoit receu en sa protection ces garnemens qui puis apres le trahissoient. Qu'un homme sage ne se fiera iamais en celuy qui aura vne fois rompu sa foy. On sauoit que les premiers soldats qui se desbanderent pour fuir en la ville de Cochim estoient aux gaiges du prince de Mangate, lequel au parauant auoit laschement quitté le parti du Roy de Cochim. Au depart du prince, Pacheco se retira en ses nauires, où le Roy le vint visiter, & avec tesmoignage de grande ioye le gratifia de la belle victoire qu'il auoit obtenue. Pacheco se plaignant lors de la fuite & trahison des soldats, en reietta toute la coulpe sur le prince de Mâgate, & admonesta le Roy d'vser de son autorité, en faisant mourir, ou du moins bannissant ce mal-heureux homme, afin qu'il allast seruir le Roy de Calecut. Dautant qu'il n'y auoit danger tant à craindre que celui qu'un traistre peut brasser: cela estant vn mal couuert qui tue auant qu'on le puisse conoistre pour s'en donner garde. Que le secours des meschans n'auance iamais les affaires des Roys, au contraire les recule & renuerse bien souuent. Qu'il desiroit fort que le Roy de Calecut fust secouru de telles gens, afin de pouuoir estre tât plus tost ruiné, & chastié de ses meschancetez. Apres auoir passé vne partie du iour en tels & autres propos, le Roy se retira en la ville, & Pacheco se rafraichit & reposa avec les siens de tant de trauaux precedens.

Premieux efforts du sieur de Repelin s'aidant de la peau du renard, celle du lyon n'ayant de ruse serui, en quoy il rencontre mal, Dieu detestant la fraude auant que l'aniuise violence.

M A I S le Roy de Calecut ne faisoit qu'outrager & maudire ses capitaines & soldats, disant que leur couardise auoit esté cause que les Portugallois estoient encores en vie. Le seigneur de Repelin voulant en quelque sorte appaiser ceste cholere, delibera d'exterminer les Portugallois par quelque finesse, puis que par force lon n'en auoit peu venir a bout. Premièrement donc il corrompit par argêt quelques gens de Cochim afin d'empoisonner les fontaines où Pacheco & les siens puisoyent l'eau. En apres il tascha par tous moyes que lon mellaist de la poison parmi leur pain. Dont Pacheco ayant ouy nouuelles, donna ordre que tous les iours on fouist des puis dont les Portugallois buoyent l'eau: car la terre de Cochim est basse & abondante en eaux, cōme sont presque toutes terres proches de la mer. Il pourueut aussi soigneusement que pas vn des siens n'achetast viures que l'on conques que le vendeur n'en goustast premierement. Ce seigneur de Repelin sentât toutes ses mines esuentees, en voulut dresser vne autre, a sauoir mener la flotté de Calecut en Cochim durant quelque nuit fort obscure, afin qu'une partie des vaisseaux prenant terre on mist le feu en la ville, & que l'autre partie surprinst & deslist les Portugallois. Mais la vigilance de Pacheco preuint & rompit tels frauduleux desseins. Cependant Pacheco fortifioit le gué, faisant creuser aupres vn fossé, dressoit des forts, preparoit diuers engins, menaçant d'exterminer bien tost le Roy de Calecut. Il donnoit souuent l'alarme aux ennemis, passoit en terre ferme, où il faisoit de
grands

grands rauages. Aussi couroit-il au long des goulfes & riuieres: meſmes il print quelques nauires munies d'artillerie, leſquelles il donna au Roy de Cochim. Et afin que lon pēſaſt qu'il ne s'eſlongneroit pas ſi toſt de ce gué, il ſe fit baſtir vne maiſon aupres, enuironnee d'un foſſé, rempli puis apres de l'eau du canal. Le Roy de Calecut fut tellement irrité de tels deportemens, qu'il reſolut de ſonder derechef le gué. Cependant il enuoya quelques vaiſſeaux pour endommager ceux de Cochim: mais ils trouuoient touſiours en teſte les Portugallois qui les cōtraignoient de ſe retirer avec perte. Vne fois Pacheco voulāt aſſaillir dixhuiēt Brigantins, ſe trouua inopinémēt enuēloppé de trente quatre embuſchez pour le ſurprendre: ce qui l'eſtonna fort, car il s'eſtoit legerement auancé auant qu'auoir deſcouuert le nombre des vaiſſeaux de l'ennemi. En ce danger les Portugallois monſtrèrent tout ce qu'ils auoient d'adreſſe & de vaillance, tant que les ennemis furent contrains gaigner le haut: & ainſi retournerent victorieux au gué, ayans conquis quatre vaiſſeaux, pluſieurs canons, & diuers butin. Or combien que le Roy de Calecut euſt deſſors bōne enuie de courir ſus aux Portugallois, & les moleſter pis que deuant avec plus grandes forces que iamais, neantmoins il fut contraint de differer en autre temps à cauſe de la peſte qui ſe ralluma en ſon royaume. Ce ne nobſtāt il faiſoit tout ſon poſſible de ruiner Pacheco ou par armes deſcouuertes, ou par trahiſons: mais ce vaillant & ſage Capitaine preuenoit les embuſches par l'adreſſe de ſon eſprit, & par ſa proueſſe repouſſoit l'effort des ennemis, ſur leſquels il emporroit pluſieurs victoires nauales.

FINALEMēt arriua le temps que le Roy de Calecut ſ'eſtoit reſolu marcher derechef contre les Portugallois avec plus grandes forces que deuant. Le ſeigneur de Repelin menoit l'auantgarde, en laquelle y auoit grand nōbre de pionniers avec hoyaux, coignes & autres ferremens pour aplanir les chemins, creuſer des foſſez, faire des rampars, afin de placer l'artillerie à couuert, & empêcher que les Portugallois ne la peuſſent endommager. Le Roy marchoit apres avec trente mil hommes, & force pieces de batterie. Il auoit fait porter par eau de gros fardeaux d'eſtouppe entortillee & poiſſee pour y mettre le feu & bruler les vaiſſeaux de Pacheco, quand il en ſeroit temps. Puis vogueyent cent & dix paraus ou brigantins biē equippez, partie enchainez les vns aux autres, partie ſeparez. Ils eſtoyēt ſuiuiz de cēt galeres & de quatre vingt barques de paſſage. Or ce qui hauſſoit le cœur au Roy de Calecut eſtoyēt certaines tourelles dreſſees par l'induſtrie d'un more de Repelin, homme qui auoit hanté les guerres & veu beaucoup de pays, en la ſorte que ſ'enſuit. Deux brigantins deſpouillez de tout leur equippage, eſtoyent eſlongnez l'un de l'autre la longueur d'une moyenne pique. Puis ceſt ingenieur fit ioindre les prouës par le moyen d'un gros cheuron de bois, traueſant un autre cheuron de poupe en poupe, qui retenoit ſi fermemēt ces deux brigantins qu'on ne les pouuoit ſeparer. Sur ces deux cheurons on en poſoit quelques autres en traueſ: & l'eſpace entre les deux eſtoit tellemēt rempli d'autres pieces, que le tout enſemble reſſembloit à un plancher. Tous ces cheurons eſtoyent clouez & atta-

*Renouelle-
ment de guerre.*

*Derniere guerre
et bataille
du Roy de Ca-
lechou contre Pa-
checo & les
ſiens, avec di-
uers notables
accidents de ru-
ſe et de proues-
ſe.*

chez fermement en trois endroits. En chascque costé de ceste charpenterie faite en quarré, estoit planté vn rang de cheurons de quatorze pieds de haut, faisant comme vne muraille. Le tout fut affermi de tenons & iointures si bien cheuilles & ferrees, qu'il n'y auoit pas apparéce qu'on les peust rompre. Puis les poultries attachees dessus les cheurons rendoyent la charpenterie beaucoup plus forte. En apres il y auoit au haut des fortes clayes & longues perches: & en ce plancher d'enhaut de la plus haute tourelle on pouuoit loger quarante soldats pour combattre, & se remuer à l'aïse. Ainsi furent basties huict autres moindres tourelles sur seize brigantins. Ces engins furent dressez, a ce que quand la mer se seroit tetiree les vaisseaux de Calecut estās auancez & pres de ceux de Portugal, les tourelles eussent tellement le dessus que les soldats y logez peussent aisémēt lancer leurs traits & le feu. Les Calecutiens ayans veutels engins s'assurerent tous de la victoire. Mais Pacheco se fortifia contre ceste inuention comme s'en suit. Il fit attacher fermement ensemble a gros crochets de fer des masts de nauire ayans quatre vingts pieds de long, & les disposa en quarré, ayans autant en longueur qu'en largeur. Puis il commanda qu'on posast ceste machine deuant les nauires vn peu loin des prouës, & les fit retenir de six anchres selon le naturel du reflux, asauoir que quand la maree montoit trois anchres arrestoyent la machine, & les trois autres faisoient le mesme, lors que la maree baïssoit. Or cela fut ainsi dressé afin d'empescher q̄ quand les carenes des vaisseaux de Calecut voudroyēt approcher, ils ne peussent faire ioindre leurs tourelles aux nauires de Pacheco. D'autre costé Pierre Raphael fit couper quelques masts qui furent acoustrez en forme de colonnes & plantez sur le plâcher des nauires: & aux faïstes on dressa des chapiteaux ou cabinets qui pouuoient contenir six soldats pour resister à ceux des tourelles: car la hauteur de chascque chapiteau esgaloit la hauteur des tourellés portees es brigantins de Calecut, selon que Pacheco auoit descouuert entierement & par le menu par le moyen de ses espions le nombre des soldats de l'ennemi, toutes les sortes de ses machines de guerre, la mesure d'icelles, & tous les desseins du Roy de Calecut. L'armee de terre faisoit vn merueilleux bruit tant à cause des huees de diuers son, que du froïssis & cliquetis des armes: ce qui eust peu faire fondre le cœur à gēs nō experimenter en guerre. Mais tandis qu'ils iettoient ces cris en l'air, Pacheco donnoit ordre de les estonner à bon escient: car ayant mis pied à terre en vn endroit de l'isle d'Arraul, assez pres duquel ses nauires pouuoient flotter à l'aide du reflux, il fit vne course sur l'auantgarde ennemie: toutefois pour n'estre enuveloppé de ceste grande multitude, apres en auoir fait tōber quelques vns par terre, il print le chemin pour retourner en ses vaisseaux, sans perte d'aucun des siens. Le Roy de Calecut ayant entendu combien Pacheco s'estoit hardiment auancé en ceste course, commença à s'eschauffer de cholere & de despit: faisant conoistre qu'il ne lui estoit plus possible de porter tant de brauades, specialement celle là. Pourtant il commanda a ses capitaines de lui amener Pacheco pieds & poings liez, afin de le gehenner & faire mourir cruellement. Ils marchent incontinent en diligence,

gence, & font tous leurs efforts d'exécuter ce commandement: mais au lieu de prendre Pacheco, ils furent chassés, & plusieurs des leurs tuez sur le champ.

EN ces entrefaites, le soleil se leua. Or la marée venât lors à baisser pouf-foit la flotte de Calecut contre les vaisseaux de Portugal. Les fardeaux d'estouppes estans allumés & jettés rencontrèrent les mâts que Pacheco auoit fait retenir par six anchres, comme dit a esté ci dessus, & s'arrestèrent tout soudain, tellement qu'au lieu de nuire, ils soulageoyent grandement les Portugallois: car tandis que le feu dura les ennemis n'osèrent approcher plus pres. Ce vain espouuantail consommé, leur flotte s'auança. Mais leur plus grande tourelle ayant rencontré les mâts & ne pouuant passer outre, fut contrainte de s'arrestér, & tirer de là contre Pacheco & les siens, qui de leur part canonnoyent furieusement les brigantins prochains de ceste tourelle, & en brisèrent quelques vns. Sur ce, Pacheco fit braquer & lâcher vne de ses plus grosses pieces, nommée le chameau, contre ceste tourelle, laquelle demeura entiere, encor que le coup fust fort violent. Durant ces canonnades, les ennemis voyans leur tourelle se maintenir ferme commencerent à presser plus hardiment les Portugallois & faire des huées & cris de grande ioye. Les autres tourelles voyans cela, voguerent fort résolument vers ce mesme endroit. En après les ennemis commencerent à lancer tant de traits que lon ne voyoit & sentoît qu'une nuée de fleches & vne pluye de boulets de fer & de plomb parmi l'horrible embrasement & l'espaisse fumée des canons & harquebuses. Lors Pacheco effroyé leua les yeux au ciel, & commence à dire si haut que ses soldats l'entendoyent, O Dieu souverain, ie confesse auoir commis des pechez qui meritent vn tres-grief chastimēt. Toutesfois ie te supplie de tout mon cœur que tu en differes la vengeance à vn autre temps, où il ne sera point question de l'honneur & de la gloire de ton saint nom. Ayant fait ceste priere il fit braquer & lâcher derechef le chameau, ce qui fut exécuté si dextrement que le boulet rôpit vne grande partie de la tourelle, fit tomber les soldats en la mer. Lors Pacheco & les siens commencent à leuer les mains au ciel, en remerciant le Seigneur, duquel ils apperceuoyent la puissance à leur secours, & font teste aux ennemis plus courageusement que iamais. Finalement ceste tourelle fut du tout abatue moyennāt quelques autres volées de canon. Toutesfois les autres demeuroyent en place, & les soldats logés dedās faisoient vn merueilleux deuoir pour accabler les Portugallois: & pource qu'ils ne pouoyent ioindre de plus pres, ils descochoyent incessamment vn nombre infini de fleches & d'autres traits. Pacheco & les siens ne tiroient pas vn seul coup à faulte: car plusieurs des ennemis furent tuez, grand nombre de brigantins mis à fond ou brisés.

DURANT ce cōbat naval le Roy de Calecut entre au gué avec toutes ses forces, & tâche de gaigner le bord pour entrer en Cochim. Mais Christofle Iufarte & Simon Andrade commandās es basteaux, & Laurent Morènes brigatins de Cochim, lui resisterent vaillamment. D'autre part le Prince de Cochim avec mille soldats fit bien son deuoir à garder le pas-

sage ce iour là. Brief tous se porterent tellement qu'ils empêcherent les ennemis de passer outre, & les endommagerent en beaucoup de sorte. On a sceu pour certain que ceste bataille fut plus cruelle & sanglante que les précédentes : & qu'en icelle les ennemis perdirent grand nombre d'hommes & de vaisseaux. Elle commença au point du iour, & dura iusques au soir que le flus de la mer venant à remplir le destroit, de grande violence il repoussa en arriere les tourelles : & par ainsi les vns & les autres furent contrains de laisser le combat. Plusieurs soldats de Pacheco furēt blesez, mais pas vn tué. Depuis il y eut cessation d'armes pour quelque iours, durant lesquels le Roy de Cochim vint caresser Pacheco, le louant & remerciant beaucoup de fois : puis il fit porter des viures & fruits de l'isle pour rafraichir les soldats. Quant au Roy de Calecut, encor qu'il n'esperast plus obtenir victoire, & ne demandast qu'à reprendre le chemin en soy royaume, toutesfois estant importuné par plusieurs d'assaillir de rechef les Portugallois, & tenter le dernier hazard de la guerre encores pour ce coup, les vint retrouver apres auoir esté batu & desfait tant de fois. Or la victoire auoit tellement haussé le cœur à ses ennemis, qu'ils estoient plus aspres au combat que iamais : au contraire les Calecutiens estonnez des coups receus es batailles précédentes, marchoyent trop laschemēt, & n'osoient venir aux mains : à cause dequoy ils prenoient incōtinent la fuite, & leur flotte apres auoir esté fort endommagée de l'artillerie de Pacheco ne voulut plus combattre. Le Roy de Calecut extremement despitē contre ses Brachmannes, qui l'auoyent tant assuré au nom de leurs dieux qu'il emporteroit la victoire, & detestant leurs tromperies, se retira avec son armee. Toutesfois il ne cessa pas de dresser embusches pour faire mourir Pacheco : mais telles pratiques ayans esté descouuertes, ceux qui s'en mesloyent furent rudemēt chastiez à coups de baston, puis menez au gibet. Or d'autant que plusieurs Naires de Cochim suruindrent la dessus, supplians instammēt Pacheco de sauuer la vie à ces traistres, il les enuoya au Roy, pour en disposer selon que bon luy sembleroit.

LE Roy de Calecut voyant tous ses desseins rompus, despitē d'auoir re- 15.
ceū vne telle honte, & fasché de viure, quitta le royaume, establisant Nubadarim pour son successeur : puis il se retira en vn turcol & lieu de deuotion, afin d'y passer le reste de ses iours au service de ses dieux. Toutefois sa merē, femme de grand cœur, l'incitoit par lettres & par messages à recommēcer la guerre. Qu'il n'y auoit point d'ordre de quitter ainsi tout, sans se venger : & valoit mieux mourir mille fois que laisser vne telle tache sur son honneur. Que ce pretexte de religion ne procedoit point de pietē, ains de couardise. Pourtant s'il vouloit estre renommē & restabli en la dignité qu'il auoit perdue, il falloit recommencer & faire sentir aux ennemis qu'il n'y auoit perte quelconque qui le peust troubler. Ces discours le picquerent tellement qu'il sortit de son cloistre pour recommēcer la guerre : mais tous les rois & princes qui l'auoyent suiui, voyans les affaires si mal en point l'estoyent retirez, & ne leur pouuoit on faire reprendre les armes. Mesmes plusieurs d'entre eux auoyent fait paix avec Trimumpara & Pacheco.

Le Roy de Calecut quitte le royaume, & Pacheco vult riens demeurer renommē & restabli par toutes les Indes.

checo. Qui fut cause que de desespoir il se cacha derechef en son turcol. Ceste guerre dura cinq mois, en laquelle Pacheco trauailla beaucoup, mais l'issue fut à son tres-grand honneur, & l'ennemi y perdit dixneuf mil hommes tant de maladie qu'es rencontres & batailles, puis vn grãd nombre de vaisseaux. Ceste guerre acheuee, & la paix faite avec plusieurs Princes, Pacheco fut auerti qu'il y auoit eu du tumulte en la ville de Coulam, & que les Sarasins estimans que les Portugallois ne pourroyēt eschapper des mains du Roy de Calecut, auoyent coniué la mort de ceux qui restoyent en Coulam, comme de fait ils en tuerēt vn. A ceste occasion Pacheco y alla, mais il ne toucha point aux meutriers, de peur d'esmouuoir quelque sedition en la ville, où lui & les siens se fussent trouuez en dāger. Seulemēt il requit les principaux de garder l'alliāce par eux faite avec le Roy de Portugal, en laquelle estoit accordé que nulle nauire ne pourroit se charger d'espiceries auant celles des Portugallois: au contraire ie voy, disoit-il, les nauires des Sarasins chargees & prestes à desmarer, & celles du Roy Emmanuel vuides. Les gouuerneurs de Coulam respondent que cela ne s'estoit point fait de leur consentement, mais par l'audace & importunite des Sarasins, ce qu'ils n'auoyent peu empeschier à cause des grands moyens d'iceux. Sur cela, du consentement des gouuerneurs, Pacheco fit descharger les nauires des Sarasins, leur paya les espiceries, & les fit mettre promptement es nauires du roy: puis se mit à la voile, & courut avec sa flotte bien equippee toute ceste coste des Indes, print quelques vaisseaux, & fit bon butin. Sa sagesse & vaillance lui auoyent acquis tel renom, & le rendoyent si redouté des rois, princes, & pirates mesmes, que personne n'osoit lui faire teste. Il executa tout ce que nous auons veu cy dessus en l'espace de quelques mois, iusques au commencement de Septembre de l'an mil cinq cens & quatre.

*Tumulte en
Coulam, &
l'ordre que Pa
checo y mit.*

16. E N ces temps, Loup Soarez, dont a esté parlé ci deuant arriua en Inde avec vne flotte de treize nauires. Il auoit entēdu par les lettres que Pierre Ataide auoit escrites & laissees auāt son trespas en la ville de Mozambique, les preparatifs du roy de Calecut pour faire la guerre. Lors qu'il vint mouiller l'auchre au port de Melinde, le Roy lui auoit declairé le mesme. Pour ceste cause il s'estoit hasté en ceste nauigation, tant qu'à la fin il vint surgir en l'isle d'Anchediue, où il trouua Antoine Saldagne & Roderic Laurent qui auoyent hyuerné. Or d'autant que le printemps commençoit en ces pays là, il print la route de Cananor, où il aprint du Roy mesmes, & de Gonzale Barbose facteur du Roy de Portugal, ce que Pacheco auoit fait contre le Roy de Calecut. Lelendemain de son pourparler avec le Roy de Cananor, qui luy auoit fait fort gracieux acueil, vint vers lui vn Arabe acompagné d'vn ieune garson de Portugal, avec lettres des Portugallois qui auoyent esté prins prisonniers du temps de Capral. Le sommaire de ces lettres estoit, que le Roy de Calecut n'auoit plus de moyēs de faire la guerre, & qu'apres tant de pertes par lui faites, grãds & petis condamnoyent son entrepryse, comme c'est l'ordinaire de gens non experimentez de pouuoir à leur affaires seulement apres auoir esté chastez de leur folie.

*Nauigation
de Loup Soa
rez, & ce qu'il
fit en Calecut
& en Cranga
nor.*

Que les principaux de Calecut les auoyent auertis d'escrhe & faire sauoir aux capitaines Portugallois que s'ils vouloyent faire paix avec le Roy de Calecut, ils ne sauroyent desirer temps plus propre qu'alors : d'autant que le Roy, qui estoit d'un naturel benin & fidele en les promesses, auoit tousiours condaniné ceste guerre. Sur la fin des lettres ils prioyēt & supplioyēt Soarez de ne refuser vn bon accord : veu que ce seroit vn moyen de les affranchir de la miserable seruitude où ils estoient, outre le proufit qui reuiendroient de cest accord aux Portugallois. Apres que ces lettres eurent esté lēues, Soarez voulut renuoyer l'Arabe & retenir le garçon : mais cest enfant ne voulut aucunemēt s'y accorder, disant que iamais il ne se feroit ce tort, d'estre cause, en sauçant la foy & demeurant es nauires, de la mort cruelle des prisonniers Chrestiens, qu'on tueroit infailliblemēt, si pour crainte de seruitude ou d'autre danger il differoit de retourner. Soarez les ayant renuoyez delibera de faire voile vers Calecut, où estant arriué au haure, les principaux de la ville lui enuoyent incontinent plusieurs sortes de viandes & de fruits, en signe d'amitié. Mais il ne voulut rien recevoir, protestāt n'accepter chose quelconque venant d'eux, que premieremēt ils ne fissent paix ensemble : d'autant que le present d'un ennemi ne presageoit iamais rien de bon à celui qui le receuoit. Puis apres Cojebique, duquel nous auons fait mention cy dessus, & qui depuis fit de grands seruices aux Portugallois, le viint trouuer, accompagné des deux prisonniers du temps de Calpilors ils commencerent à traiter de la paix. Ceux de Calecut prioyent Soarez d'attendre la venue du Roy qui deuoit estre en la ville dans quatre iours. Il fit responce qu'il n'accorderoit point la paix si premierement on ne lui rendoit les prisonniers de Portugal & les deux Milanois ; perseuerant en ceste demande. Quant aux prisonniers, ceux de Calecut les lui rendoyent sans aucune difficulté : mais ils ne pouoyent consentir à la reddition des deux Milanois, pource qu'ils estimoyēt que c'eust esté commettre vne grande meschanceté de trahir & liurer à la mort ceux qu'ils auoyēt receu en leur protection & sous leur foy. Or cōme ils se portoyent en gens de bien en cest endroit, l'estime Soarez tant plus accusable qui faisoit plus grands cas d'attrapper deux estrangers pour les faire mourir cruellement, que de racheter & auouer vn grand nombre d'hommes de sa nation. Outre cela il se monstroient vilainement couard en persistant avec telle opiniastrēte en ceste demande : cōmme si deux hommes eussent peu beaucoup nuire aux Portugallois, & auancer les affaires des ennemis qui auoyent receu tant de bastonnades. Dauantage, cōmment se peut accorder cela, que ceux qui sont d'avis de chastier les perfides conseillent les personnes avec lesquelles ils veulent traiter quelque accord, de violer la foy promise ? Brief puis, q's on ne doit courir sus aux ennemis que pour maintenir les amis : il faut estre beaucoup plus soigneux de la conseruation des vns que de la ruine des autres. Sentez ne considérant pas cela, sans se soucier de la vie des Portugallois, ni de Cojebique, qui pour l'amour d'eux estoit en danger de mort, fit tirer force coups de canōn contre la ville de Calecut, & mit par terre grand nombre de maisons, sous pretexte de ce qu'on ne luy accordoit sa requeste.

*Obstinatio de
Soarez & fide
lui de ceux de
Calecut.*

la requeste. De là il print la route de Cochim, visita le Roy, & au nom de celui de Portugal le loua grandement de sa fidelité, lui portant des presens assez riches de la part d'Emmanuel. Cela fait, il despescha deux capitaines, aſauoir Pierre Médoze & Vasque de Carual, pour courir avec leurs nauires toute ceste coste iusques au port de Calecut, la rendre asseuree aux amis & confederéz, & n'y laisser les ennemis en repos. Puis il donna charge à Alfouſe Coſte, à Pierre Alfonſe, à Lyonel Coutin, & à Roderic Abrey de faire voile en Coulam, afin de receuoir des mains du faſteur & charger leurs nauires des espiceries là amassees par la diligence de Pacheco, lequel ayant donné ordre à tout, se retira en Cochim, où il fut recueilli de Soarez avec l'honneur dont il estoit digne au iugement de chascun.

- 17 E S T A N S en celieu, Soarez entendit que la ville de Cranganor, qui auoit tousiours tenu le parti du Roy de Calecut, estoit en armes : que tous les habitans se preparoyent à la guerre, que leur capitaine nommé Maimame auoit équipé huitante brigantins & cinq nauires : que Naubeadarim auoit mis en campagne vne grosse armee, laquelle se renforçoit de iour en iour. Que l'intention des ennemis estoit de surprendre & ruiner le Roy de Cochim, si tost que la flotte de Portugal seroit desmarrée de Cochim. Pour executer cela ils faisoient leur compte de passer vn destroit nommé le gué de Paliport, qu'ils estimoient leur estre beaucoup plus commode que les autres. Soarez ayât descouuert telles entreprises, resolut par l'avis des autres capitaines d'aller assaillir prôptement Cranganor, pour rôpre le coup aux ennemis qui n'attendoient rien moins que cela. Suyuât cela ils s'embarquèt de nuit avec quinze esquifs, vingt cinq brigantins & vne Carauelle, sans bruit quelconque, emmenans mille soldats Portugallois & mille de Cochim. Le prince de Cochim gardoit le passage du gué de Paliport avec huit cens hommes, demeurant en terre, & les autres voguans en mer fort alaigrement & tout asseurez d'executer leur dessein. Soarez mit deuant la flotte Tristan de la Forest, Antoine Saldagne, Pierre Alfonſe, Vasque de Carual & Alfonſe Coſte avec leurs vaisseaux. Alors le capitaine Maimame estoit en garde avec ses deux fils en deux grandes nauires fermement iointes ensemble avec quelques fortes chaines, bien fournies d'artillerie, de viures, de toutes sortes d'armes, & de grand nombre de gens de guerre prests à combattre quâd il en seroit besoin. Ces cinq capitaines qui faisoient la pointe viennent à inuestir ces deux nauires, Maimame & ses deux fils les reçoquent & soustienent d'un courage incroyable : & leur vaillance fut caule que le combat dura plus long temps que lon n'eust pensé. Finalement Maimame & ses fils ayans esté tuez, les soldats & matelots se jetterent dans la mer par vn autre endroit des nauires. Les autres capitaines Portugallois ayans assailli les brigantins les mirent incontinent en fuite, apres quelques legeres escarmouches. Apres ceste desfaite de l'armee de mer, les capitaines mirent leurs troupes en terre : & le prince de Cochim se vint ioindre avec eux. L'armee de Naubeadarim marcha contre eux, & à l'instant ils vindrent aux mains, ou les vns & les autres combattirent fort resoluement : toutesfois les ennemis voyans tomber leurs gens à monceaux, commencerent

Guerre de Soarez, entre ceux de Cranganor & ce qui en auint.

à s'effroyer de telle sorte, qu'ils se sauuerent dedans Cranganor, sans toute-
fois prendre auis d'y tenir bon: au contraire comme ils estoient entrez de
grande vistesse par vne porte, ils sortirent de mesme tout soudain par l'au-
tre. Les Portugallois qui les talonnoient entrèrent de furie & en troupe
dans Cranganor, & y mirent le feu. La plupart des maisons sont de bois,
couuertes de grands tas de fueilles de palmiers, qui sont allumettes propres
à recevoir le feu. Comme le feu gaignoit presque toute la ville, quelques
habitans Chrestiens, qui se tenoyent cachez aupaauant pour la crainte des
enemis, acourent, & prient les Portugallois de faire estaindre le feu, de
peur que les temples où ils auoyent l'exercice de leur religion ne fussent
bruslez. Encores que lon taschast de pouruoir à cela en diligence, toutef-
fois il fut impossible d'empescher que le feu ne consumast plusieurs mai-
sons appartenantes aux Chrestiens, auant qu'on le peust estaindre. Les mai-
sons des Arabes & Iuifs non attaintes du feu furent incontinent pillées. On
mit aussi le feu aux nauires & brigantins, apres auoir transporté l'artillerie,
les armes & autres munitions es nauires de Portugal. Cela executé, Soarez
acompañné des autres capitaines reprit la route de Cochim.

*Descriptiõ de
Cranganor, a-
uec les mœurs
& ceremonies
des Chrestiens
qui y habitent.*

OR pource que mention a esté faite de Cranganor par plusieurs fois, il
faut discourir quelque peu sur sa situation & grandeur, sur la multitude des
habitans, & sur les coustumes & ceremonies des Chrestiens qui y habitoyent.
Nous auons dit ci dessus que Cranganor est à huit lieues de Cochim vers
le Septentrion. Elle est arrousee par diuers tours & retours d'une riuiera
qui coule au long & se desgorge en la mer. C'estoit vne grande ville fort
hantee de plusieurs nations, à cause du trafic qui y estoit grand & renommé.
Au reste, la ville estoit fraîche, gouvernee par quelques magistrats creez par
les suffrages du peuple. Le Roy de Calcut en estoit protecteur, le parti du-
quel ceste ville embrassoit sans cõtredit, quand quelque guerre suruenoit.
Toutesfois elle le quitta, ayant veu ses affaires mal succeder contre les Por-
tugallois. Outre ses citoyens, elle est habitee de plusieurs estrangers Arabes
& autres qui se sont accommodez en ce lieu à cause du trafic. Les estrangers
idolâtres viuent à la coustume des autres Malabares. Les Chrestiens ont des
temples qui ne sont pas des mieux bastis du monde: car aussi n'ont-ils pas
grands moyens en ce lieu là. Ils s'assemblent tous les dimanches en leur tem-
ple, pour y assister au seruice diuin & ouir les predications. Leur grãd Pon-
tife a son siege en certaines montagnes vers le Septentrion, fort esloignées
de la mer, & appellé ce pays Chaldee. Or ce Pontife a vn conseil compo-
sé de douze Cardinaux, deux Patriarches & plusieurs Euesques, avec les-
quels il dispose de tout ce qui concerne la Religion. Tous les Chrestiens
qui demeurent es pays de Leuant lui obeissent. Les prestres ont leur cou-
rone de telle sorte, qu'au lieu de la rotondité, elle est faite en croix. Ils se ser-
uent en leurs ceremonies de vin fait de raisins de passe. Tous indifferem-
ment communiquent au sacrement de l'Eucharistie sous les deux especes
de pain & de vin: mais auant qu'approcher de ce saint banquet ils font
confession de leurs pechez. On ne baptise point les petis enfans qu'ils ne
ayent quarante iours, sinon qu'il leur suruiene quelque maladie & danger
de mort.

de mort. Quand quelqu'un est à l'extremité, vn prestre le visite: & les malades tienēt pour certain que les prieres qu'icelui fait les soulagent. A l'entree du temple ils s'arrousent d'eau benite, cōme on fait en diuers endroits de l'Europe. Ils obseruent mesmes ceremonies à l'enterrement des morts. Puis les parens & alliez font vn banquet, & demeurent huit iours à faire bonne chere pour l'amour des mors, dont ils celebrent la memoire, prians Iesus Christ pour le salut eternel d'iceux. Les vesues, qui se marient auant que l'an entier apres la mort de leurs maris soit expiré, perdēt leur douaire. Ils gardent fort soigneusement la Bible escrite en langue Syriaque, qu'ils appellent Chaldaïque, & sont bien instruire ceux qui la doyent exposer au peuple en public. Quant aux iusnes qu'on appelle de l'Aduent & du Quaresme, ils les obseruent assez estroitement: & sont fort deuotieux & ceremonieux à fester les iours solēnels cōme ont fait en l'Europe. Ils retienēt aussi diligemment le mesme calendrier que nous auons, avec le iour de bissext de quatre en quatre ans. Le premier iour de Iuillet, non seulement les Chrestiens, mais aussi les estrangers iuifs, ou Mahumetistes & Payens, font feste en l'honneur de sainct Thomas. Ils ont entr'eux des couuens de moines & de nonnains aussi, qui se contienent en grande chasteté, pieté, abstinence & religion. Les prestres y sont mariez: toutesfois si leur premiere femme meurt, il leur est defendu de conuoler en secondes nopces. Le mariage des autres particuliers ne peut estre rompu ni separé que par mort de l'une ou de l'autre partie. On dit que les Chrestiens qui demeurent en Inde ont tousiours fidelement obserué ceste religion & façon de viure, non seulement au pays de Cranganor, mais en plusieurs autres aussi, depuis le temps de l'Apostre sainct Thomas, premier docteur de ces peuples pour les attirer à la conoissance de Iesus Christ, & ont continué iusques à nostre temps.

19. LE corps de ce sainct personnage est enterré en vne ville nommee Malipur, au royaume de Narsingue, & est renommé à cause de plusieurs miracles. Du temps que Martin Alfonse de Suse, braue capitaine, estoit lieutenant es Indes pour le Roy Iean troisieme, on lui apporta vn tableau de cuiure; dans lequel estoient engraues certaines lettres si vfees de vieillesse que personne ne les pouuoit lire. Finalement, il fit venir vn Iuif qui entendoit diuerses langues, & bien versé es choses concernantes l'antiquité, lequel apres auoir trauaillé apres ceste escriture ancienne & de l'âge mal aisé à comprendre (à cause qu'il estoit composé de mots ramassez de langues differentes) en vint à bout & le lēut. Ces lettres contenoient en somme la donation que le Roy (qui viuoit du temps de sainct Thomas) auoit faite à l'Apostre de certaine estēdue de terre pour y bastir vn temple. Mais puis que nous sommes entrez en propos de ce Sainct personnage: i'estime que ce ne sera nous esloigner de nostre intention, de mettre ici en auant vn autre tesmoignage de l'antiquité, pour souuenance de sainct Thomas. Lan mil cinq cens soixante deux, l'Euesque de Cochim enuoya à Henri Cardinal de Portugal vn tesmoignage authentique bien scellé, lequel contenoit vne histoire digne de recit. En ceste ville autresfois nommee Mali-

*Discours sur
le tombeau de
l'Apostre S.
Thomas es In
des: & des mi
racles par les
quels aucuns re
marquent l'an
tiquité des
Chrestiens en
ces pays là.*

pur, & qui a esté appelée Saint Thomas, depuis que les Portugallois ont commencé à y trahquer, y auoit vne chapelle sur vn costau. Ceux du pays tenoyēt que l'Apostre fut tué en ce lieu par les ennemis de la Religio Chrestienne. Or la coustume est que tous les ans, huit iours deuant la feste de la natiuité de Iesus Christ, tous les Chrestiens s'assembloyent en ceste chapelle pour y celebrier le seruice Diuin. Semblablement enuiron l'an mil cinq cens. quarante huit, on auoit trouué sur ce costau vne croix taillee en pierre, au sommet de laquelle estoit la figure d'un pigeon, la base estant plantee sur vne apparence d'herbes qui sembloient s'espandre au long & au large. Ce sommet, la base, & les bras auoyent les bouts taillez en façon de fleurs de lis. Puis il y auoit vne arcade de la mesme pierre, qui enuironnoit la croix de toutes parts. En cest arc estoient grauees des lettres que personne ne pouuoit lire. Toutes ces pierres assez pesantes furent esleuees sur l'autel de ceste chapelle, à force d'hommes. Il y auoit quelques marques de sang fort apparentes en la croix. Auint au iour que les Chrestiens s'assembloyent en la chapelle pour solennizer la feste de l'annonciation, comme le prestre qui faisoit le seruice commença à lire l'Euangile, la croix deuint noire, & en sortit de l'eau en abondance incroyable: puis la couleur noire se changea en bleüe. Es endroits où estoient les taches apparut vne splendeur de couleur de roses. Les anneés suivantes, cela auenoit au mesme iour; & ne voyoit on ce miracle en la croix es autres iours, dont chascun s'esmerueilloit. Toutesfois il y eut quelque intermission, & le miracle ne continua pas infalliblement tous les ans. Il auint l'an mil cinq cens soixante vn, comme les Chrestiens estoient assemblez en ceste chapelle en la maniere & avec les solennitez & ceremonies acoustumees, au iour que la croix auoit acoustumé de ietter certaine liqueur: le prestre commençant à lire l'Euangile (car ce miracle ne comméçoit sinon alors) la croix fut tout soudain marquée de taches noires & luisantes, ce qui continua tant que peu à peu elle deuint toute noire. Elle luisoit cōme si on l'eust frottee d'huile. Les gouttes comencerent à distiller comme si c'eust esté rousee, puis elles s'enfermerent tellement que la croix fut mouillée de toutes parts. Le prestre acheua son office avec force larmes & souspirs. Cela fait il monta sur l'autel, & l'essuya avec les linges desquels il s'estoit serui à l'autel. Incontinēt les linges furent taints de taches rouges comme sang. Le gouuerneur de la ville & tout le peuple là assemblé commencerent à leuer les mains au ciel, criēt Iesus, misericorde, & tomber en merueilleuse deuotion. Apres que la croix eust longuement pleuré, elle deuint plus luisante que deuant, & la couleur de sang apparut encore mieux. Ce miracle esmut le gouuerneur & le principal prestre de s'enquerir diligemment qui pourroit interpreter les lettres grauees en l'arcade. Les habitans du pays respondent qu'il y auoit au royaume de Narsingue vn Brachmanne fort docte entre les autres, & qui auoit cōnoissance de diuerses langues. Soudain on l'enuoya querir, & lui fut demandé sil conoissoit ces lettres: à quoy il respondit que c'estoyent lettres antiques, dont s'aidoyent les sages du temps passé, & que la conoissance d'icelles estoit abolie par la nonchalance de ceux qui estoient venus depuis

depuis:mesmes que le langage auquel elles estoient descrites n'estoit entendu que de fort peu de gens. Ils prient le Brachmanne de monter sur l'autel, ce qu'il refusa faire, disant que ce seroit se rendre coupable d'un grand forfait de fouler aux pieds vne chose sacree. Toutesfois on l'importuna tant qu'il y monta, & leur les lettres, qui auoyent telle proprieté (selon son dire) qu'une en exprimoit dix, quinze, & vingt autres. Ce qu'elles vouloyent dire contenoit en somme, que Thomas homme de Dieu auoit esté enuoyé en ces pays du temps du Roy Sagan, par le Fils de Dieu, duquel il estoit disciple, pour prescher l'Euangile aux Indiens. Qu'il auoit basti vn temple en ce lieu & fait beaucoup de miracles: & que comme il prioit Dieu à genoux contre ceste croix, vn Brachmanne le trāsperça d'un coup de picque: que la croix arrousee du sang de ce tres-sainct personnage auoit esté lailsee debout pour memoire eternelle de sa vertu. Tel estoit le contenu de ces lettres: ce qui fut receu & creu tant plus asseurément qu'un autre Brachmanne estant appellé d'un autre lieu, qui estoit fort vieil, & de grande reputation à cause de son sauior, donna la mesme interpretation. l'ayriere moy le pourtrait de ceste croix taillé en mesme bois dont ceste chapelle est bastie, avec lettres authentiques signees de plusieurs temoins: & la certitude des choses apparut lors en tant de sortes, que nul ne peut douter des enseignemens que ce pays a du saint Apostre: ce que j'ay estimé deuoir estre ici adjousté, afin qu'on conoisse tant mieux, combien est grande entre les Chrestiens qui habitent es Indes, la renommee de ce fidele seruiteur de Dieu.

FIN DV TROISIESME LIVRE.





LE QUATRIESME LIVRE.

SOMMAIRE.

1. François Almeida envoyé pour estre Viceroy es Indes.
2. Ambassade du Sultan d'Egypte au Pape contre le Roy de Portugal.
3. Responce d'Emmanuel aux lettres du Pape, contre le Sultan d'Egypte.
4. Recépissé de Pacheco eslé de retour en Portugal.
5. Estats des affaires en Afrique.
6. Sedition estrange & horrible à Lisbonne contre les Juifs, massacrés en grand nombre, & ce qui s'en ensuyuit.
7. Navigation de François Almeida, & ce qu'il fit en Quilao.
8. Guerre contre le Roy de Mombaza, & le succès d'icelle.
9. Continuation de la navigation d'Almeida, & ce qu'il fit en Melinde & en l'isle d'Anchobang.
10. Traité de paix entre Almeida & le Roy d'Omy, rüpy par la perfidie de ce Roy, la guerre qui en prouint, & quelle en fut la fin.
11. Ce qui auint entre les Arabes ancrez, au port de Coulam & les Portugallois.
12. Description du royaume de Narsingue, avec autres particularitez.
13. Ambassade du Roy de Narsingue vers Almeida, & sa responce, ensemble ce qui s'est traicté avec le Roy de Cananor.
14. Sedition des Arabes en Coulam contre les Portugallois & ce qui en auint.
15. Arrüve de François Almeida en Cockum, & ce qui se passa entre luy & le Roy.
16. Premier abord de huit nauces Portugalloises en l'isle de Madagascar, auourd'uy appellee l'isle de Sainct Laurent.
17. Navigation de François Gnaye en Zofala, & des choses qu'il y fit iusques au iour de sa mort.
18. Description du royaume de Zofala & des deux Ethioques, & des mœurs des habitans d'icelles.
19. Particuliere description du riche royaume de Remontapa en Ethiope, & de quelques particularitez remarquables au gouuernement de ce royaume.
20. Des isles de Maldiner, ample description de l'isle nommee Zeilan & des singularitez d'icelle, & ce que Laurent Almeida y fit au nom du Roy de Portugal.
21. Discours sur la venue de Loys Vuartman de Baillongne vers Laurent Almeida, & ce qui auint aux deux Molanous qui auoyent suivi le parti du Roy de Calecut.
22. Bataille nauale entre la flotte de Calecut & celle de Portugal, & quelle en fut l'issue.
23. Effray d'Espagne & de Portugal, & les poursuües d'Emmanuel pour procurer la paix entre les Princes Chrestiens.
24. Divers deportemens des Portugallois es Indes, & la croüanté d'un de leurs capitaines.
25. Entrepröses du Roy de Cananor contre les Portugallois, & des particularitez notables suruenues en la guerre qu'il leur fit.

Nouuelle flotte
enuee es
Indes pour
affirmer la
domination du
Roy de Por-
tugal.



OMME les choses sus mentionnees se passoyent, le Roy de Portugal faisoit equipper vne grande flotte pour les Indes, de laquelle il establiß general François Almeida, gentil-homme sage & vaillät, avec toute charge & autorité, pour estre Viceroy es pays de Leuant. Car pource qu'Emmanuel vouloit poser quelque fondement de domination es Indes, afin que ses facteurs y peussent negocier seurement, & que les Roys ses allies ne reçeussent aucun domage pour les plaisirs qu'ils faisoient aux Portugallois, il trouua expediet d'auoir vn Viceroy en Leuät, pour procurer ces choses fidelemēt, foigneu-

soigneusement & dextrement. En la mesme annee, que lon contoit mil cinq cens & cinq, il enuoya à Rome Iacques de Soufe Euesque de Portugal & Iacques Pacheco docte & eloquent Iuriconsulte, pour faire submission de sa part & en son nom à Iules second nouuellement esleu Pape du cōmun consentement des Cardinaux, & pour le prier, puis que la guerre d'Afrique ne se pouuoit continuer sans grands frais, de vouloir otroyer des pardons à ceux qui eslargiroient quelque chose de leurs biens pour la poursuite de ceste guerre.

2. PRESQVES au mesme temps vint en Portugal vn Cordelier fort estimé entre les siens, general des moines du mont de Sinaj, nommé Maurus. L'occasion de son voyage estoit telle. Le Sultan d'Egypte & de Syrie fort irrité du dommage que les Portugallois luy auoyent faits en diuers lieux, enuoya lettres au Pape Iules par ce Cordelier, qu'il estima homme propre, afin que par la profession & autorité du messager il peust obtenir plus aisément du Pape ce qu'il pretendoit. Ces lettres contenoient que les Roys d'Espagne auoyent fait de grāds torts au Sultan: car Fernād Roy d'Artaagon s'estoit ietté en armes dās le royaume de Grenade & d'Andalousie, où il auoit fait mourir cruellement vne partie des Mores qui y habitoient, banni les autres & cōfiské leurs biens, tyrānisant apres d'une façon estrāge ceux qui estoient demeurez au pays: qui pis est, il les auoit forcez de faire professiō du Christianisme. Qu'il n'estoit loisible entre les Chrestiens, ni entre les Mahumetans, de cōtraindre par violēce quelqu'un à renōcer la religion en laquelle il auroit esté instruit dēs son enfance: & qu'il ne pouuoit dissimuler cest outrage qui mettoit en mauuais mesnage les vns contre les autres, nuisoit à tous, & cōdamnoit la religion des vns. Dauātage, qu'Emmanuel Roy de Portugal incommodoit avec ses vaisseaux la mer & les pays des Indes, ayant fait de grans torts à ceux qui y voyageoyent d'Egypte & d'Arabie, mesmes iusques à auoir prins, butiné & bruslé les propres nauires du Sultan. Que tels deportemens n'estoyent fondez en droit aucun, attendu qu'il n'auoit iamais offensé les Portugallois, qui neantmoins par leurs courses & rauages lui ostoyent vne grand' part de ses peages & tributs. Que de sa part iusqu'à lors il auoit donné bon ordre que les Chrestiens habitans ou trafiquans en Egypte & Syrie, ou visistans le sepulchre de Christ, ne fussent aucunement molestez. Mais que si les Roys d'Espagne continuoient à tourmenter ainsi les Mahumetistes, lors il seroit contrainct de machiner la ruine des Chrestiens, & feroit aspre vengeance des maux par lui soufferts: car il donneroit ordre que tous les Chrestiens qu'on trouueroit sur ses terres auroient la gorge couppee, que leurs temples & saint Sepulchre seroyent desmolis, brief qu'en tous les pays de son obeissance on n'orroit plus nouuelles des Chrestiens. Outreplus que pour venger les torts receus, son intention estoit d'armer vn bon nombre de vaisseaux, & faire à la pluspart del'Europe tous les maux qui lui seroyent possibles. Finalement il admonestoit le Pape de procurer que le Roy de Portugal n'enuoyast plus de nauires es Indes, si lon vouloit sauuer de mort cruelle vn grād nombre de Chrestiens, voir debout les temples qui estoient en Asie & en Egy-

*Plaines du
Sultan d'Egy-
pte au Pape,
cōtre les Roys
d'Espagne &
de Portugal.*

pte, contregarder le sepulchre de Iesus Christ, & destourner le saccagemēt de plusieurs ports & costes de l'Europe, laquelle ne pouuoit faillir de receuoir vne grand' plaie, si Emmanuel continuoit ses nauigations. Le Pape ayant receu de Maurus ces lettres du Sultan d'Egypte en enuoya copie aux Roys d'Espagne & de Portugal, par la main du mesme messager, les priant de lui mander quelle responce eux vouloyēt qu'il fist au Sultan. Je n'ay peu sauoir ce que le Roy d'Espagne rescriuit au Pape. Mais quāt à celui de Portugal sa responce fut telle que s'ensuit.

*Responce du
Roy de Portu-
gal aux let-
tres du Pape
& du Sultan
d'Egypte.*

TRES-SAINCT Pere, J'ay veu vos lettres apportees par Maurus, & ay 3.
aussi receu le double de celles que le Sultan d'Egypte vous a enuoyees, es-
quelles il se plaint aigrement des torts que le Roy Fernand (lequel i'ayme
& honnore comme mon tres-cher pere) a fait aux Mores demeurans au
royaume de Grenade: ensemble des dommages que mes gens ont portez
aux Sarasins en Inde. En quoy maugré lui il donne lustre à nostre nom, en
monstrant combien chascun de nous deux est ennemi des Mahumetistes.
Car que sauroyent mieux & plus proprement faire les Princes Chrestiens
pour acquerir vn perpetuel renom, que d'employer tous leurs moyēs à ex-
terminer la meschāte & cruelle superstition de Mahumet, & abolir la me-
moire de ce mal-heureux brigand? Il menasse, & fait du braue & de l'insol-
ent, presumant que les Chrestiens s'estonnent de paroles arrogantes, & se
deportent par tels espouuentails de poursuiure leurs sainctes entreprin-
ses pour le soustenement de la vraye Religion. Mon beau pere Fernand, Roy
inuiucible, fera responce digne de sa sagesse & vertu & de ses valeureux ex-
ploits. Vne chose say-ie bien: c'est que iamais les brauades d'un ennemi in-
fidele ne le feront repentir d'auoir acquis vne gloire eternelle ayant de-
liuré l'Espagne de la tyrānie des Mores. Pour mon regard, tres-sainct Pere,
ie vous puis protester qu'un de mes plus grands regrets est que ce tyran n'a
plus grande occasion de se plaindre, afin qu'en sa cholere il peust auer plus
grands outrages de paroles auoir sa reuanche des dommages qu'il auroit
receus, en s'essayant vainement d'effroyer de parole ceux desquels il n'au-
roit peu venir à bout par la force des armes. Car lors que nous auons deli-
beré d'ouurir le chemin à nos nauires pour entrer es Indes, & descouurir les
pays inconnus à nos predecesseurs, nostre intention a esté de suffoquer l'he-
resie de Mahumet, dont tant de maux sont sortis pour se desborder cōme
vn deluge sur le monde, par l'artifice du diable ennemi de nostre salut: &
par la prouesse des Portugallois prendre & raser iusques aux fondemens la
Meque ville d'Arabie, où est le sepulchre de Mahumet. Nous sommes biē
marris que cela n'a point encor esté executé selon nostre desir. Toutesfois
nous esperons, moyennant l'aide de Dieu, que cela se fera quelque iour,
comme les proiets en sont desia avancez par l'adresse & vaillance des Por-
tugallois. Quād dōc ce cruel & importun ennemi verra par pieces le sepul-
chre de Mahumet, quand le pays qui a nourri vn monstre si execrable sera
ruiné, & que les adherans de ce faux prophete serōt raclez du monde, qu'il
fremisse & menasse lors, non pas maintenant qu'il n'a esté touché sinon au
bout du doigt. Quant à ce qu'il menace de massacrer les Chrestiens, ruiner
le saint

le saint sepulchre, mettre l'Europe à feu & à sang, il n'y a apparence pourquoy personne se doye estonner de ce bruit. Car cest ennemi, qui est auaire, ne laissera pas diminuer les tribus qu'il amasse de la deuotion des Chrestiens, & qui lui auientroit s'il faisoit raser le saint sepulchre & autres lieux que les Chrestiens visitent au proufit de sa bourse: & n'est pas si beste de vouloir par vne iniure faite à toute la Chrestienté s'exposer à la haine de tous, & procurer qu'ils s'accordent pour lui courir sus d'un mutuel consentement, afin de l'accabler de tous costez. Car vn outrage fait en commun à tous, conioint les cœurs auparauant desunis, & les incite à se venger de l'ennemi qui les offense. Les Chrestiens n'ont pas tant mis sous le pied le zele qu'ils ont enuers leur Religion & la recommandation de leur honneur, qu'ils voulussent laisser impunie la meschanceté de ce tyran. Je m'assure donc que si le Sultan fait ce massacre, tous les Chrestiens tant vieux que ieunes s'amasseront de toutes parts, pour chastier vn forfait si execrable. Et veu qu'il n'ignore pas cela, il aura assez de sens pour eslongner de sa personne & de ses biens vn malheur qu'il ne pourroit euitier s'il s'oublloit iusques là. Cependât il me fâche bien que ce tyran soit monté en tel orgueil par le moyen des diuisions qui sont entre les Princes Chrestiens, que de leur monstrier le poing si audacieusement, veu qu'eux pourroyent raser en moins de rien & lui & toute sa puissance. Et pourtant, tres-saint Pere, non seulement ie vous exhorte & admoneste, mais aussi ie vous supplie, que vous preniez en main cest affaire digne de vostre vertu, pieté, sagesse, dignité, grandeur & sainteté: a sauoir que vous employez vostre autorité sainte pour reuoir les Princes Chrestiens ainsi diuisez, afin que, d'un bon accord, ils meinēt leurs armées en Afrique & en Asie pour exterminer vn ennemi lequel est haut monté, non point sur sa force, mais sur la nonchalance & stupidité des Chrestiens, & donnent ordre d'effacer entierement de la memoire des hommes le nom de Mahumet. Si vous le faites, outre ce que vous aplanirez vn beau chemin à vostre ame au ciel, vous ferez aussi que vostre nom sera immortel en ce monde. Quelques Princes Chrestiens ont fait vne fois grande instance de cela enuers le Pape Alexandre, à qui vous auez succédé. Mais peut estre que cela n'a esté lors executé, pource que Dieu reseruoit à vous seul ceste occasion de gloire & louange perdurable. Or quant à ce que vous demandez que nous vous declairions par lettres la responce que voulons que faciez au Sultan, nous reconoiſsons en cela vostre bonne volonté & grande affection enuers nous, qui nous obligera à vous honorer & reuerer en tout le temps de nostre vie. Toutesfois ce n'est pas à nous de prescrire à vostre sagesse, ou au prudent college de messieurs les Cardinaux, ce qu'il faut respondre à l'ennemi, ains seulement descouurer nostre intention. Afin dōc de vous monstrier ce que j'ay sur le cœur, ie suis celui que toutes les menaces, espouuantes & difficultez du monde ne peuuent empescher de mettre la main à l'execution de mes desseins: & suis delibéré d'employer tous mes sens, afin de renuerser & briser de mon pouuoir l'orgueil de ce cruel ennemi, & prie Dieu que par son saint esprit il confirme vostre cœur, afin que vous puissiez tousiours gouverner son E-

glise (comme vous faites) à la grande gloire de vostre sainteté. Le Roy de Portugal ayant fait quelques presens a Mautus le renvoyâ avec ses lettres, & icelui en receut d'autres du Roy d'Espagne, puis s'en alla à Rome, où ayant prins les lettres du Pape, il retourna vers le Sultan, lequel entendit par la responce, qu'il ne faisoit point menasser les Portugallois; ains vint aux mains avec eux, pour en voir le bout. A ceste occasion il équippa un grand nombre de voiles pour les chasser des Indes, dont nous parlerons cy apres.

*Comment la
vertu de Pa-
checo fut reco-
nnue & recom-
pensée en Por-
tugal.*

En ceste année, Loup Soares arriva à Lisbonne, où, cobien que le Roy & toute la Cour lui fissent grand recueil, toutesfois chascun avoit les yeux fichez avec grand esbahissement sur Edouard Pacheco, trouvant infiniment sa promptitude & diligence aux hazards de guerre, sa magnanimité en dangers, sa patience à porter les travaux, & son bon heur en toutes rencontres. Le Roy ordonna que lon feroit vne procession solennelle en faveur d'icelui, & marcha avec ses gens en grande solennité depuis le grand temple, jusques à celui de Saint Dominique. Pacheco estoit à costé du Roy, afin que tous regardassent comme le Roy honoroit la vertu de ce gentil homme. Estans venus au temple, Jacques Oris Evêque de Viseu, Theologien, tres-docte & fort eloquent fit vne belle & longue harangue, en laquelle il esleua hautement les prouesses & œuvres admirables de Pacheco, en telle sorte toutesfois qu'il rapportoit le tout à la gloire de Dieu. Le Roy ne se contentant pas de cest honneur fait à Pacheco, escrivit presque à tous les Princes Chrestiens, magnifiant en beaucoup de sortes la vaillance & les beaux exploits de Pacheco, afin que la gloire & renommée d'icelui volast par toute la Chrestienté. Or afin que chascun voye, combien les esperances humaines sont decevables, il est bon de conoistre quelle recompense receut en fin ce vaillant personnage. Le Roy ayant entendu que Pacheco estoit pauvre (car il avoit despendu tout son bien en la guerre) ne rapportant des Indes pour son butin sinon vne belle louange d'avoir vaillamment & heureusement parachevé vne guerre si dangereuse, il le fit gouverneur d'une ville d'Ethiopie, nommée Saint George, où lon a acoustumé de charger l'or pour l'apporter en Portugal: afin qu'en ce gouvernement il peüst s'entretenir avec sa famille en quelque honneur. Mais d'autant que la vertu estoit fort eüiée, il fut calomnié & accusé par ses ennemis d'avoir desrobé au Roy vne grande quantité d'or, & commis plusieurs autres meschancetez. Sur ce rapport le Roy le fit arrester, & amener pieds & poings liez en Portugal, où il fut serré en prison fort long temps & traité tres-indignement, jusques à ce que les choses ayans esté bien examinées, on trouva que ce qui lui estoit mis sus n'avoit aucune apparence; ou n'estoit tel qu'il s'y falust arrester. Alors il fut eslargi, & remis en ses estats & honneurs: mais on ne recompensa pas sa vertu comme ellé le meritoit, tellement qu'il vescu & mourut pauvre. Tant sont pernicieux les rapports des meschans à l'oreille des bons Princes, qu'ils les destournent de se monstrier libéraux envers ceux qui le meritent, choses toutesfois la plus requise es Roys & Princes pour estre estimez vrayement magnifiques. En la mesme année le Roy adjoüsta plusieurs nouvelles ordonnances aux anciennes, lesquelles

quelles il reforma, & establit vn reiglemēt propre pour l'amplification de les peages & reuenus : donnant ordre de pres à faire limiter exactement les heritages appartenans aux hospitaux & aux maladeries. Presques au mesme temps, par sa permission, vn gentil-homme nommé Jean Siqueire bastit vn fort en vn quartier d'Ethiopie appellé Gandanabar, pres du cap de Guer: mais ne le pouuant defendre, il le mit entre les mains du Roy, qui le recompensa fort amplement de ses frais & de sa peine. Au mois d'Octobre la peste le fourra dedans Lisbonne, & emporta grand nombre de gens, ce qui contraignit le Roy de se retirer à Almerin.

5. E N ce temps il y auoit vn vaillant Capitaine dans Arzile nommé Francisque Percire, qui desia par plusieurs fois auoit fait preuue de sa hardiesse & suffisance. Icelui obtint du gouuerneur septante cheuaux pour aller faire butin en vn village assis sur vne haute montagne. Ainsi donc estant deslogé de nuict, il posa son embusche assez pres du lieu. Des la pointe du iour les villageois mettent hors leur bestail & haras au pasturage. Francisque leur court sus à l'impourueue, & emmene tous les troupeaux vers Arzile. Mais les Mores, suiuant leur façon, commencerent à crier & donner quelque signal, au moyen dequoy ils esueillerent le voisinage. Plusieurs hommes de cheual s'assemblent & vont apres Francisque, lequel soustenoit leurs escarmouches faisant sa retraite au pas, & quelquesfois il les chargeoit viuement, afin de rabatre leur cholere. Estant à mi-chemin, pource que ses ennemis le pressoyent, il fit monter ses gens sur vn costau. Les Mores estimans qu'il y eust quelque embusche derriere, s'arrestent court: au moyen dequoy les Portugallois voyoyent le chemin ouuert pour se retirer seuremēt. Il y auoit en la troupe vn braue cheualier nommé Iacques de Viegas, qui à plaine teste commença à appeller ses compagnons, afin de donner à toute bride à trauers la troupe qui les suiuit. Chargeons les, dit-il, assurez vous qu'ils ne sont pas gens pour nous faire teste. Le capitaine Francisque qui estoit d'un naturel rebarbatif, commence à se fâcher & tancer rudement Viegas: & entre autres paroles se mocqua de la cazaque de grosse toile dont il estoit couuert. Encores (lui dit-il) estes vous si mal auisé de donner tel conseil à vn homme qui fait que c'est de la guerre. Lors Viegas se fouriant, lui respond, Seigneur Francisque, ie vous feray voir que ma cazaque vaut vn corselet à l'espreuue. Cela mit du tout en cholere le capitaine, lequel repliqua, Si vous estes si vaillant, ie desire le conoistre maintenant à l'effect. Sus donc compagnons, à l'ennemi. Alors ils descochent roidemēt tous à trauers le bataillon des Mores, lesquels estonnez d'une si furieuse charge furent rompus & mis à vau de route: laissant quatre vingts des leurs tuez sur le champ, & trente prisonniers. Durant le combat, Francisque iette la vue sur Veigas qui combattoit de telle force, que le capitaine en demeura comme raui. Pourtant apres que les ennemis eurent quitté la place, il s'adresse la teste nue à Veigas, & d'une humble parole lui dit, Braue cheualier, supportez mon indiscretion, ou, s'il vous plait, prenez le baston & me chastiez: car j'ay bien meritè cela, ayant ainsi mesprisè vostre vertu. Certainement, si j'auois six tels cheualiers en ma compagnie, ie ne ferois

*Esne des asai
res d'Afrique.*

difficulté d'entrer en Constantinople, pour saisir le grand Turc, & le faire mon prisonnier. Ainsi deuifans ioyeulement & de bon accord, ils reuindrent en Arzile avec vn assez riche butin.

Effet de Portugal.

1506.

PENDANT ces choses la peste s'enflamoit en Portugal, & s'estant espandue iusques à Sanctaren, plusieurs craignâs qu'elle ne gaignast iusques à la Cour qui estoit pres de là, le Roy fut contraint d'en delloger soudainemēt, & se retira en vne ville assise sur vn costau deça le Tayo, appellee Abrâtes. La Royne estoit prestee d'acoucher & se deliura d'un enfant masle, le troiesime iour de Mars, l'an mil cinq cēs & six, lequel au baptesme fut appelé Louys, qui en son viuant se monstra fort vertueux, ingenieux, humain, & craignant Dieu: brief, doué de tant de vertus, que chascun l'estimoit digne de gouuerner tout vn monde. Or combien qu'il eust esté façonné excellemment en la discipline militaire, & eust aussi toutes les parties requises pour manier affaires d'estat en temps de paix: tout cela neantmoins n'estoit comme rien au pris de la pieté qui reluisoit en lui, & l'enflammoit de telle sorte que de la prison de ce corps son ame voloit & cōuerfoit presques ordinairement au ciel. En la mesme annee le Roy fit equipper vne flotte pour les Indes, dont Tristan de Cugne estoit general.

Sedition esfrange, montrant quels sont les fruits d'un zele sans science.

PRESQVES au mesme temps, il y eut sedition esmeue à Lisbone par la folie & forcenerie de la populace: qui fut vn deluge lequel emporta presques tous les Iuifs qui s'estoyent faits Chrestiens. La chose auint comme s'en suit. La pluspart de ceux de la ville estoient absens à cause de la peste. Auint en ces iours là que plusieurs François, Flamens & Alemans arriuerēt au port de Lisbonne avec leurs marchandises. Le dixneufiesme iour d'Auril, plusieurs de ceux qui estoient restez dans la ville se trouuerent au temple de Saint Dominique, pour y ouir messē. Au costé gauche du temple y a vne chapelle fort reuerree de ceux du pays, & appellee la chapelle de Iesus. Sur l'autel d'icelle y a vn crucefix, la playe du costé duquel estoit couuerte d'une verriere. Quelques vns par deuotiō iettâs les yeux sur ceste ouuerture, il leur fut auis que certaine clairté en sortoit. Alors ce fut à crier miracle, & dire que Dieu monstroit des tesmoignages de sa presence. Vn Iuif, nagueres deuenue Chrestien, se trouuant là, nia tout haut qu'il y eust aucun miracle, & qu'il n'estoit pas vraysemblable que d'un bois sec sortist tel le splendeur. Or combien que bon nombre des assistans doutassent de la verité de ce miracle, toutesfois il n'estoit pas temps, ni ne conuenoit à vne telle personne de tenir ce langage, pour perdre sa peine à vouloir arracher de l'entendement de tant de gens vn erreur qui y estoit du tout & tres-ferrēmēt planté. La populace donc, qui est d'un naturel impetueux & farouche, & tauie sous pretexte de religion, oyant vn Iuif nier le miracle, commença à murmurer, appellant cest homme traistre, meschāt, apostat, ennemi detestable de Iesus Christ, & digne de cruel supplice. Apres que plusieurs l'eurent bien outragé de paroles, toute la multitude escumāt de cholere se jette sur lui, lui arrache la barbe & les cheveux, le saboule, & le traine en la place deuant le temple, l'assomme & deschire en pieces, & allume vn grand feu, où le corps mort est ietté. Tout le reste du peuple acourt à ceste mutinerie.

mutinerie. Là vn certain moine, qui auoit la parole en main, fit vn sermon, où il enflamma viuement les auditeurs à faire la vengeance de l'iniure qu'auoit receu nostre Seigneur. La populace qui de soy-mesme estoit assez enragée, fut iettée du tout hors des gonds par vne telle harangue. Outreplus deux autres moines empoignerent & esleuerent en haut vne croix, crians tout haut vengeance, & exhortans le peuple à effusion de sang. A chaque mot ils s'escrioyent, heresie, heresie, reprenez la meschante heresie, exterminiez la meschante nation. Les François & Alemans sautent de leurs nauires en terre, & se ioignent aux Portugallois qui auoyent ia commencé le massacre. Ils estoient cinq cens en l'execution des cruautés suiuiantes. D'vne fureur & meschanceté desesperee ils se ruent comme dogues affamez sur les miserables Iuifs, couppent la gorge à vn grand nombre, & les traient mi-morts dedans le feu. Et pour besongner plus commodément on auoit allumé diuers feux en la place où le Iuif qui mesdit du miracle fut brûlé. Les valets, crocheteurs, & mariniers, apportoyēt alaiquemēt le bois de toutes parts, afin que la flainme fust suffisante pour executer leur rage. Les huées des femmes, les supplications des hommes, & les cris de tous estoient si pitoyables que c'estoit assez pour fleschir à compassion la cruauté mesme. Toutesfois les massacreurs estoient tellement desnaturez & depouillez d'humanité, que, sans aucun esgard d'age ni de sexe, ils meurtrissoient hommes, femmes, enfans: tellement que ce iour là ils tuerēt & brûlerēt plus de cinq cens personnes Iuifues. Le lendemain, pource que le bruit de ceste sanglante boucherie vola de tous costez, plus de mille pay sans acoururent comme enragez dedans Lisböhne, & s'assemblerent avec les meurtriers du iour precedent. Lors ce fut à recommencer. Et d'autant que les Iuifs esperdus de frayeur s'estoyent enfermez en leurs maisons, ces mutins enfoncent les portes, esgorgent cruellement homes, femmes, & filles, escarbouillent les testes des petis enfans contre les parois, traînent les corps morts, ou encorés respirans, pour les ietter au feu. Plusieurs blessez de diuerses playes, & neantmoins encor viuans estoient brûlez. Ce iour là miserable nation Iuifue auoit receu si grand coup de marteau sur la teste, qu'ils ne pouuoient se lamenter d'vn tel rauage ni deplorer leur misere. Ceux qui estoient cachez n'osoyent ietter vn soupir, encor qu'ils vissent traîner leurs peres où leurs enfans au supplice: & la peur leur auoit tellement trasi les cœurs, que les viuans sembloient estre morts. Cependāt on saccegeoit les maisons. Les meurtriers amassoient l'or, l'argent, & les meubles plus precieus. Les François emportoient la marchandise en leurs nauires: & ces pillages furent cause que plusieurs Iuifs eschapperent ce iour là. Au reste, la fureur de ces brigands les transporta iusques là que d'oser entrer insollement es Eglises, pour arracher de là les petis enfans, les vieillards & les ieunes filles, qui empoignoyēt les autels, les croix, & les images des saints, en criant misericorde: puis les massacroyent tout à l'heure, ou les iettoyēt dedans le feu. Plusieurs qui auoyent le port & apparence de Iuifs se trouuerent lors en extreme danger, & mesmes quelques vns furent tuez: d'autres blessez en diuers endroits de leur corps, auant que pouuoir verifier qu'ils

*Cruautés de
cinq cens mar-
tins.*

n'auoyent aucune acointance avec les Iuifs. Aucuns qui portoyent inimitié à d'autres, en les rencontrant ne faisoient que crier au Iuif, & lors ils estoient sacmentez, sans qu'on leur donnast le loisir de respondre à la calomnie. Les magistrats n'auoyent pas la hardiesse de s'opposer à la fureur de ceste populace. Neantmoins beaucoup de gens de bien sauuerent la vie aux Iuifs, qui se retirèrent chez eux, & les garderent comme eux mesmes, leur donnans moyen d'eschapper & aller en lieu seur ailleurs. Toutesfois ce deuxiesme iour le nombre de tuez monta à plus de mille. Au troisieme iour, les massacreurs alterez apres le sang humain se mirēt en rue pour continuer; mais ils ne trouuoyēt plus de gorges à couper. Car le reste des Iuifs, & ceux qui leur atouchoyent, s'estoyēt sauuez hors de la ville, ou demouroient cachez es maisons de quelques gens de bien. Et toutesfois il y eut encoir quelques meurtres. En ces trois iours les meurtriers massacrerent enuiron deux mille personnes Iuifues. Sur le soir du troisieme iour Arius Syluius, & Aluar de Castres, gentils-hommes, & chefs de la iustice, vindrent à main armee dedans Lisbonne, & firent cesser l'esmotion. A l'heure mesmes les François & Alemans se retirèrent en leurs nauires avec force pillage, & haussans les voiles, prennent vistemēt la route de leurs pays. Le Roy ayāt receu les nouuelles de ceste horrible sedition, en fut extremement indigné, & tout soudain enuoya à Lisbonne deux des principaux de la cour, a sauoir Iacques Almeide & Iacques Lopes, avec plain pouuoir de faire punition de tant de forfaits. Ils firent mourir publiquement vn grand nombre des sedicieux, qui furent punis de leurs fureurs & cruautez. Les moines qui auoyent esleué la croix & exhorté la populace à massacrer, furent degradez, puis estranglez & bruslez. Les iuges & magistrats qui auoyent este pareseux à reprimier ceste rage populaire furent partie priuez de leurs estats, partie condamnēz en grosses amendes, & la ville mesme fut despouillee de plusieurs priueleges & honneurs.

*Nauigation
d'Almeide,
ses difficultez,
& ce qui lui
arriua en Qui-
loa.*

DURANT ces tempestes de Portugal, François Almeide tenoit la route des Indes. Mais quelquesfois les bourasques, d'autres fois la bonasse par trop longue, retardoyent sa course, tellement qu'il eut beaucoup d'affaires àuant que pouuoir commodément doubler le Cap de bonne esperance. Car lors il estoit huiuer es pays Meridionaux, & les nauires estoient rudement hantuez des vents & des vagues. Dauantage, les maistres & matelots ayans perdu leur route, se laisserent porter vers le Su beaucoup plus loin qu'il ne faisoit, où les iours estoient fort courts alors à cause du Soleil qui lors estoit le plus esloigné du pole Antarctique, & faisoit sa course vers l'Arctique. Et ce qui redou les iours encores plus brieves estoit le brouillaz espais, la pluye imperueuse & continuelle, les neiges ordinaires, qui gelayent presques les Portugallois. Finalement le vingtiesme iour de Iuin ils passerent le Cap: quoy fait, Almeide fit tourner la flotte plus pres de terre. Mais le second iour de Iuillet vne tourmenre soudaine agita merueilleusement les vaisseaux; & icelle appaisée, la flotte ayāt costoyé l'Ethiopie Meridionale, vint surgir au port de Quiloa. Soudain Almeide enuoya gēs pour saluer le Roy de la part; mais ce Roy troublé de sa meschante conscience, sortit de nuit hors

hors la ville. Mahumet Ancon, duquel a esté parlé ci deuant, denieura. Les soldats qui y estoient en garnison, se retirerent vers lui, afin que sous sa conduite ils soustinsissent l'assaut des Portugallois. Almeide voyant que le Roy ne venoit point vers lui, ni ne rendoit raison de sa loqueur, soupçonna que ce mauvais homme machinoit quelque trahison. Or comme le refus frayaist desia le pied des maisons de la ville, Almeide descendit en terre avec cinq-cens hommes des plus vailhans de sa flotte, & marche apres avec les autres trois cens. Mais alors Mahumet s'en estoit aussi fui, tellement qu'Almeide resta aisément, & d'autant que personne ne s'opposoit à lui, il craignoit qu'on n'eust dressé quelque embusche pour surprendre ses gens lorsqu'ils seroyent escartez & amusez au butin. Pourtant il s'arresta, commandant à son fils de marcher au pas, & auoir l'œil par tout, sans permettre à pas vn des siens de se desbander. Il n'y auoit presque personne en la ville, & ceux qui estoient restez, en fort petit nombre, estoient tant esperdus qu'ils ne sauoient fuir ni demeurer cachez en leurs maisons. Almeide fit apporter tout le pillage en vne maison assez spacieuse, puis le distribua avec grand exultation entre les soldats, & ne retint pour soy qu'une fiesche. Cela fait il delibera de bastir vn fort pres du riuage, en lieu assez commode pour repousser les assauts de l'ennemi. Tandis qu'on traualloit à cela, il enuoya honte expresse à Mahumet Ancon & aux habitans de Quiloa, leur dire qu'ils auoyent occasion de remercier Dieu, en ce qu'il par la force & benignité d'un tres-bon & tres-puissant Roy Emmanuel ils estoient deliurez de la seruitude d'un vasseloyal & cruel tyrā, pour recouurer leur liberte. Il les admonestoit aussi de se ramenteuoir les traheries, embusches, iniures & meschancetés qu'il leur auoit faits. Que par vn changement contraire il auendroit de la en auant qu'on les traiteroit avec toute douceur, & chascun d'eux pourroit se maintenir cōtre la fureur & malignité de ce perfide. Outreplus qu'il donneroit ordre que moyennant les armes des Portugallois ils pourroyent aisément repousser les efforts de tous ceux qui leur voudroyent faire tort. Et à ce qu'ils en fussent plus assurez, il leur declara son intention estre de leur donner Mahumet pour Roy, veu que c'estoit vn personnage, la fidelité, & prou d'honneur & prudence, duquel ils auoyent esprouuee en plusieurs endroits. Et pourtant, il les exhortoit de reuenir, pour faire alliance avec gens qui leur vouloyent estre bons amis, & rentrassent avec toute liberte en possession de leurs biens. Ce message les resiouit grandement, & ayans fait monter Mahumet sur vn cheual bien équipé, marchent apres avec cris d'allégresse. Almeide le nomma Roy au nom d'Emmanuel Roy de Portugal, lui mit sur la teste vne couronne d'or, lui imposant vn tribut annuel montant à petite somme. Mahumet iura solennellement qu'il demeureroit à tousiours fidele vassal d'Emmanuel. Sur ces entrefaites, deux pilotes, l'un nommé Gonzale Pains, l'autre Fernand Bermude, vindrent trouuer Almeide qui les auoit enuoyez à Mozambique pour sentir quelle affectiō le gouuerneur de l'isle portoit aux Portugallois, & si l'on pourroit entendre par lettres, que quelques vns y auoyent peu laisser en passant, en quel estat

estoyent les affaires des Indes. Eux rapportēt que tout estoit paisible à Mozambique, & apportent lettres que François Albuquerque & Loup Soarez auoyent laissees es mains du gouuerneur de l'isle sur leur retour de Calecut en Portugal, lesquelles ne contenoient que bonnes nouuelles. Il auint puis apres que le nouveau Roy Mahumet vint saluer à sa façon le Viceroy Almeide; & le pria humblement de vouloir laseher tous les Arabes qui estoient deuenus prisonniers: ce qu'Almeide lui accorda volontairement. Et comme Mahumet le remercioit de cela, il fit vne autre requeste beaucoup plus notable. L'ay eu (dit-il) grāde intelligēce, amitié & estroite alliance avec le Roy Alfudail, que ce tyran, par vous dechassé du royaume, ruaitraistreusement. Si Alfudail viuoit, ie lui quitterois sceptre & courōne: car ie ne suis pas celui qui vueille preferer les richesses & pompes royales à la fidelité & au respect que ie dois porter à mon superieur. Mais puis que ce Prince est mort, ie vous prie & supplie, autant qu'il m'est possible, me permettre de faire venir pres de moy le fils d'icelui; pour succeder apres moy au royaume. Vray est que i'ay des enfans, qui ne sont pas du tout indignes d'un tel honneur. Toutesfois si ie les auance pour regner apres moy, & que i'en frustre les enfans du defunct, ie me deshonoreray à iamais, & ceste tache ne souillera pas seulement ma reputation, ains aussi diffamera toute ma race. Pourtant i'aime mieux laisser par testamēt à mes fils vn exēple de fidelité & honesteté, qu'un riche patrimoine. Ceste requeste rauit en esbahissement les Portugallois voyans vn Mahumetiste se monstrier si fidele ami, & mespriser si genereusement les richesses du royaume, que de preferer de son bon gré son deuoir enuers vn ami trespassé à l'amitie paternelle. Et pour ceste cause fut il grandement estimé de tous, & iugé digne de regner sur beaucoup plus de pays, pour auoir ainsi transporté au fils d'Alfudail ce qui appartenoit aux siens. Suiuāt cela on fit venir ce fils du Roy defunct, auquel tous ceux de Quiloa presterent serment de fidelité du consentement d'Almeide, promettans de le recevoir pour Roy.

Les choses ayans esté ainsi disposées, Almeide ordonna pour la garde du fort Pierre Ferreire de Fogaze, lequel il instruisit bien particulierement de tout ce qui estoit requis pour la seureté de ceste place: & s'estāt embarqué, arriua en dedans le quatriesme iour suivant à l'emboucheure du haur de Mombaze. Lors il enuoya deuant Gonzale Paiua pour sonder la profondeur du port. Paiua menoit quant & soy deux patrons Arabes qui sauoient fort bien l'entree de ce port. En executāt ce qui lui estoit commandé il arriua pres d'une tour, dont ceux qui la gardoyent commencerent à tirer force coups contre le vaisseau de Paiua, qui de son costé s'apprestoit pour les canonner viuement. Auint qu'un coup de boulet vint donner en ceste tour ou dans de la pouldre ou à trauers quelque autre matiere propre à receuoir le feu, tellement qu'à l'heure mesme il en sortit vne flamme, laquelle effroya tant les soldats qu'ils abandonnerent la tour & se retirerent en la ville. Paiua ayant entierement descouuert & sondé la profondeur du golfe, vint trouuer Almeide, l'asseurāt qu'il n'y auoit rien à craindre pour ce deslois. Ainsi donc Almeide entre dedans & s'approche avec sa flotte assez

Grande fidelité d'un Roy Mahumetiste, condānant l'ambition & desloyauté de plusieurs Princes qui s'appellent Chrestiens.

Guerre d'Almeide en Mombaze, & diuers accidens d'icelle.

assez pres de la ville. Puis enuoye vn des pilotes de sa nauire auertir le Roy qu'il n'estoit point abordé là pour faire la guerre, ains pour procurer tout ce qui appartiendroit à la dignité & conseruation d'icelui. Que la puissance & douceur du Roy de Portugal estoit telle, que ses vassaux & suiets viuoient en beaucoup meilleure condition, que s'ils n'estoyent sous la domination d'aucun Prince qui fust fort pour les garentir: pource qu'en se gouuernât eux mesmes, ils pourroyent estre cōtrains d'auoir tous seuls à porter, avec peril euident, le faix d'une guerre contre qui les vouldroit assaillir. Mais que s'ils se mettoient en la protection & sauuegarde d'un bon Roy, cela leur doneroit moyen de repousser aisément l'effort de leurs ennemis. Dauantage, que le Roy de Mombaze ne feroit rien cōtre son honneur, d'estre vassal d'un autre, à qui plusieurs grands Roys de l'Inde & de l'Afrique obeissoient volontairement. S'il le faisoit qu'il seroit tousiours réputé par Almeide Prince loyal & confederé du Roy Emmanuel, lequel s'employeroit à le maintenir en sa dignité. Et pour la fin Almeide adioustoit que si le Roy de Mombaze refusoit de se soumettre à la domination de celui de Portugal, pour viure plus heureusement sous un tel souverain, il seroit contraint l'amener par force à ce point. Le messager partit avec ce mandement: mais ceux de Mombaze ne lui voulurent permettre de sortir de son esquif. Si tu mets pied à terre, nous te deschirerons par pieces, lui dirent-ils. Desloge d'ici promptement, & va dire à ce Portugallois; que ci deuant il a fait la guerre aux femmes de Quiloa, & que maintenant il a affaire avec des hommes vaillans & bien resolu. S'il en veut venir à l'espreuue, on lui fera bien tost sentir qu'à la mal'heure sa flotte est arriuee en ce port. Almeide ayant entendu ces nouuelles commanda à Iean Nouio & à un autre pilote de faire tant la nuit prochaine que prendre & lui amener un des habitans de Mombaze, afin de descouurir l'intention du Roy, & quelles forces il auoit. Eux partent & descendent fort cōyement en terre, faissent soudainement le premier qu'ils rencontrent & l'ameinēt à Almeide. Icelui estoit l'un des domestiques & familiers du Roy. On l'intimida tellemēt par menaces qu'il confessa que ce Roy ayant entendu la prise de Quiloa, auoit (outre les soldats) fait vne leuee de quatre mil homes des peuples voisins, & en attendoit deux autres mille. Qu'outre cela il estoit bien muni d'artillerie & de toutes choses pour la guerre: au moyen dequoy il esperoit soutenir & repousser au loin vne armee beaucoup plus puissante que celle de Portugal. Nonobstant cela, Almeide delibera d'assaillir la ville: suyuant quoy il enuoya deuant son fils avec quelques autres capitaines, afin de gagner terre en toute diligence, & mettre le feu au quartier de la ville, lequel touchoit au bord de la mer. Laurent & les autres capitaines executent le tout si promptement, que premier que les ennemis s'y peussent opposer le feu auoit ia enuahi grand nombre de maisons. Toutesfois ils acourent à la foule & assaillent les Portugallois, qui les soustienent courageusement. Lors il y eut cruelle meslee, en laquelle ceux de Mombaze perdirent septate hommes, & les Portugallois deux seulement. Cependant le feu s'enflammoit & gaignoit les maisons, faisant que les habitans auoyent double sol-

licitude: car il falloit faire teste à ceux que leur couroyent sus, & estaindre le feu, de peur qu'il ne ruinaſt & miſt toute la ville en cendre. A quoy ils ne ſceurent ſi bien pouruoir que la chaleur de ce grand embrasement ne contraigniſt les Portugallois meſmes de ſe retirer: & pourtant il rentrent viſtement en leurs eſquifs. Le lendemain auant iour, Almeida deſcendit au riuage avec ſes troupes, ayât par la lueur du feu, qui n'eſtoit pas encores eſtaint, apperceu que perſonne n'eſtoit pres de la mer pour l'empêcher de prendre terre. Neantmoins craignant quelque embuſche, il ne voulut point aſſailir la ville auant iour: puis il enioignit à ſon fils d'aller commencer par vn autre endroit. Il n'y auoit muraille quelconque qui empêchaſt leur aſſault. Ils entrent donc es rues plaines d'ennemis, leſquelles eſtoient fort eſtroites, les maiſons haut eſleuees, droites & plattes au deſſus, tellement que les pierres & les dards plouuoient de tous coſtez ſur les Portugallois, ce qui les incommodoit de telle ſorte qu'ils ne pouuoÿt ſuiure les ennemis qui reculoient: meſmes il leur eſtoit comme impoſſible de ſ'aider de leurs harquebouzes & autres baſtons à feu. Aucuns d'eux enfoncent les portes des maiſons, montent par les degrez en haut, & à la foule au grand danger de leur vie aſſailent ceux qui eſtoÿt ſur les toits: & pource que ces toits ſ'entretenoyent, les maiſons eſtans iointes l'une à l'autre, ils chaſſent tous ceux qui les endommageoyent de là, & ainſi donnent libre paſſage à leurs compagnons en rue. D'autre coſté les ennemis firent tomber les murailles d'une maiſon, tellement que ceſte ruine rompit l'ordre des ſoldats d'Almeide, le fils duquel marchoit le premier, ayant apres lui Jean Nouio qui faiſoit eſpaule. Or le monceau des pierres les ſeparoit tellement, qu'ils ne ſe pouuoient entreſecourir. Lors les traits voloyent des toits & fenestres en telle abondance, que les Portugallois ne ſauoyent où ſe ranger: & pour ſe garantir furēt contrains d'enfoncer les portes d'une autre maiſon, & d'icelle paſſer ſus les autres, où ayâs taillé en pieces vne multitude d'ennemis, precipité pluſieurs du haut en bas, ils eurent loiſir de reprendre halaine. Laurent Almeida preuoyant que Nouio & les ſiens pouuoient eſtre en grand danger, deſcend en rue pour les ſecourir: mais ils eſtoient les maiſtres. Et pourtant ils ſe ioignent tous enſemble pour aller vers le palais du Roy. Là ils trouuēt Pierre Bermude, à qui le Viceroy Almeida auoit laiſſé la garde de ceſte place. Icelui leur raconte avec quelle proueſſe Almeida auoit repouſſé les ennemis, & qu'en fin il auoit gaigné le palais, à l'occaſion de quoy le Roy tout eſperdu ſ'eſtoit ſauué hors de la ville. Laurent marche en diligence pour trouuer ſon pere, le quel il récōrra en vne rue attaché au combat avec vne groſſe troupe d'ennemis, leſquels Laurent chargea de telle furie qu'ils ſe ſauuerent de viſteſſe en vne eſpaiſſe foreſt, où le Roy ſ'eſtoit allé cacher. Les Portugallois ſe reprindrent & repoſerent vn petit, puis ſaccagent la ville. Il n'y auoit pas grand butin: car les ennemis auoyent emporté dehors le plus beau & le meilleur. Toutesfois on y trouua force fleſches, dards & autres traits, avec des baſtons à feu de diuerſes ſortes. En ce ſac de ville, il y mourut quinze cens hômes de Mombaze, & y eut dix mille priſonniers, dont Almeida ne retint que deux cens des principaux, & quelques

quelques femmes d'apparence, relaschât tous les autres, pour aller où bon leur sembleroit. Les Portugallois n'y perdirent que cinq hommes, l'un desquels estoit Fernand Decio, braue gentil-homme, qui fut blessé au pied d'une fieschie enuénimée dont il mourut. Il y eut grand nombre de blesez. Almeide commanda qu'on remist le feu en diuers endroits de la ville.

9. **C O M M E** Almeide estoit occupé à ceste guerre, vn de ses capitaines nommé Vasque Gomeze d'Abrey, la nauire duquel auoit esté separée de la flotte par vne tourmente, vint surgir au port de Mombaze. Ils desinèrent de la tous ensemble, prenaient la route de Melinde: mais vn reflux tres-vehement les repoussa de telle sorte qu'ils furent portez en vn golfe à douze lieues loin de Melinde. Là Almeide trouua deux nauires qui y auoyent esté iettés des vens & des vagues. Loup Chanoque estoit capitaine de l'vne, & Jean Lhomme, sage & vaillant capitaine commandoit en l'autre: combien qu'il fust plus propre à exécuter de la main, qu'à conduire & manier par conseil: Almeide desiroit saluer le Roy, mais estant retenu par le mauuais temps il demeura avec la flotte. Toutesfois il enuoya gens lui faire la reuerence en son nom, & lui porter des présents de la part du Roy Emmanuel. Le Roy despescha vn sieur vers Almeide avec force viures & quelques présents item pour luy dire que ce lui estoit vn grand desplaisir qu'ils ne pouuoient s'entre-voir. Au departir de là, ils vindrent mouiller l'ancre en l'isle d'Anchediue, le trezième iour de Septembre de ceste année là, que lon contoit mil cinq cens & cinq. Gonzale Gilles Barbose, y laissa des lettres lesquelles il commandoit estre baillées au premier capitaine qui y arriueroit de Portugal: & par icelles auertissoit auoir ia amassé grande quantité d'espiceries, dont lon pourroit aisément charger plusieurs vaisseaux: dauantage, que lon attendoit trois nauires Arabesques, chargées de plusieurs marchandises, lesquelles seroyent arrestées & prises sans aucune difficulté, si Almeide vouloit laisser quelques gens au guet en ceste isle pour tout le mois de Septembre. Ces nouuelles firent que Almeide enuoya Jean Lhomme en Cochim, Cananor & Coulam, pour y faire entendre la venue de la flotte, & dire aux facteurs du Roy qu'ils donnassent ordre de faire porter près du riuage les fardeaux que lon deuoit mettre es nauires. Puis il donna charge à Loup Chanoque & à Gonzale Paima, de courir soigneusement avec leurs nauires, toutes ces estendues de mer, afin que les trois que lon attendoit peussent estre attrappées. Quant à lui, tout promptement il commença à faire bastir vn fort assez pres de la mer, & en creusant la terre furent trouuez quelques masures & pierres rompies marquées de croix rouges & noires en plusieurs endroits: ce qui faisoit presumer que ceste isle auoit esté autresfois habitée par des Chrestiens. En peu de jours ce fort fut esleué haut, à cause de la multitude de ceux qui trauiilloient apres, & n'y auoit gentil-homme, capitaine, ni autre, pour charge quelconque qu'il eust, qui en fut exempt. Cependant arriua Manuel Pazagne, lequel Almeide auoit fait chef d'une partie des nauires, auant qu'auoir doublé le Cap de bonne esperance. Il estoit acompagné d'Antoine Vascio. Gonzale Vascio de Goes auoit prins terre en Quiloa, par le commandement

*Continuation
de la naviga-
tion d'Almei-
de, & ce qui il
fit en Melin-
de & en l'isle
d'Anchediue.*

d'Almeide & Luc de Fonseca hyuernoit en Mozambique. Loup Sance fut englouti des vagues de l'Océan avec ceux de sa nauire, exceptez cinq pilotes que Pietre Bartet receut à demi morts en la nauire. C'estoyt les pilotes qui au paratant auoyent esté sous la charge de Pazagne, par l'ordonance d'Almeide, auquel Pazagne raconta que le tyran Habraem, priué du royaume de Quiloa par Almeida, auoit pratiqué de faire tuer en trahison le Roy Mahumet : & pour executer cela mit en besongne vn vaillant soldat, qui s'estant retiré en la Cour de Mahumet, & deuenu fort familier d'icelui sous couleur d'amitié, lui perça vn iour le bras d'un coup de poignard. Mais que la playe n'estoit pas mortelle, & que le trahistre ayant esté empoigné, auoit esté chastié de ce meschant acte par vn cruel supplice. Peu de iours apres Chanoque & Paiua retournent avec quelques bastiaux par eux prins, chargez de bon nombre d'Arabes. Il y auoit aussi parmi eux vne carauelle Indienne, en laquelle vogoit vn Portugallois enuoyé par Barbofe vers Almeida, avec lettres par lesquelles il l'aduertissoit que l'une des trois nauires qui venoyent d'Arabie, estoit desia arriuee au haure de Calecut : & que l'on y attendoit les deux autres. Qu'en celle là qui estoit à port y auoit quatre Venitiens enuoyez par le Sultan d'Egypte, pour fonder de l'artillerie au Roy de Calecut, qui les auoit enuoyé demander au Sultan pour tel effect. Adioustant dauantage, que ce Sultan equippoit vn grand nombre de voiles contre les Portugallois, & qu'à Calecut aussi l'on faisoit vn grand apprest pour la guerre. Ces nouuelles furent cause qu'Almeide, renuoya Chanoque & Paiua, leur commandant de tenir la mer & auoir l'œil par tout, à ce que les deux autres nauires venans d'Arabie ne peussent eschapper. De son costé il mit les prisonniers Arabes, amenez par Chanoque, dedans vne galere (pour le bastiment de laquelle il auoit apporté les matieres necessaires du pays de Portugal) pour y tirer à la rame, & en donna la conduite à Jean Serran. Outreplus il lui bailla deux carauelles, pour brider les courtes des ennemis sur ceste mer. En l'une commandoit le capitaine Simon Martin, & en l'autre Jacques Diaze.

*Traité de
paix entre Al
meide & le
Roy d'Onor,
rompu par la
perfidie de ce
Roy: la guerre
qui en prouint
& quelle en
fut la fin.*

Ce fut en ce lieu que Merlaë Roy d'Onor (qui est vne ville à seize lieues 10. loin de l'isle Anchediue) enuoya quelques gens vers Almeida, lui demander la paix. Le Pirate Timoia, duquel a esté parlé ci deuant, estoit lors en Onor, desirant aussi faire alliance avec Almeida, & s'estoit accordé avec le Roy d'Onor pour ceste requeste. Ils furent receus tous deux, & Almeida entendit par leur rapport qu'à assez pres de là y auoit vne forteresse bien munie nommee Zincatura, appartenant au Roy de Dacam : toutesfois celui qui y commandoit estoit à la solde de Zabajo Prince de Goa, contre lequel le Roy d'Onor auoit guerre presque ordinairement. Almeida commanda à son fils Laurent d'aller sonder la profondeur du port. Icelui approchant avec ses capitaines de l'emboucheure du fleuue qui coule au long de la forteresse, trouua trente pieds de profond, & cinquante plus auant. Puis il descouure la forteresse bastie sur vn costau. Si tost que les soldats de la garnison apperceurent les esquifs, ils vindrent incontinent au riuage de l'eau, estans environ mille en fort bon equippage. Huit d'entr'eux seule-
ment

ment estoient à cheual, & l'un de ces huit estoit gouverneur de ceste forteresse. Les Portugallois leuerēt vne banderolle monstrāt qu'ils cerchoyēt amitié: au moyen dequoy le gouverneur vint incontīnēt trouuer Laurent Almeida, & fit paix avec lui: pour confirmation de laquelle il lui enuoya des presens & assez bonne quantité de viures & fruits de la terre pour rafraischir les soldats. Puis au bout de neuf iours, ses deputez vindrent trouuer le Viceroy Almeida, avec qui la paix fut confirmee en grandes solennitez. Comme Almeida seiournoit encor en l'isle d'Anchediue, on descouurit vn grand vaisseau qui portoit des cheuaux de Perse. Les Portugallois entrent soudain en des esquifs & vont au deuant: dont les Perses & Arabes logez en ce vaisseau eurent telle apprehension, qu'ils sautent dans leur esquif, & gagnent terre viftement. Or le vaisseau estoit tellement eschoué, qu'on ne le pouuoit retirer à force de rames. Lors s'esleua tout soudain vne tourmente qui mit les esquifs de Portugal en grand danger. De dixneuf cheuaux Persians qui estoient au vaisseau, lon en auoit ia mis neuf es esquifs, lesquels ne pouuans plus subsister furent contrains prendre bord. Les Arabes habitans du pays acourēt de tous costez pour voir que c'estoit: lors ils furent priez de garder les cheuaux, iusqu'au retour, apres que ceste tourmēte seroit appaisée: ce que les Arabes promettēt. Les Portugallois se retirēt avec grand dāger en Anchediue, & apres que la tourmēte fut cessée, retournent pour emmener leurs cheuaux: alors ces Arabes firent responce que le Roy d'Onor les auoit. Almeida l'enuoya auertir de garder plus soigneusement l'alliance, & de rendre promptement les cheuaux. Mais la responce du Roy fut telle, que lon en pouuoit recueillir que ceste sorte de gens ne garde ce qu'elle promet pour fidelité qu'elle ait, ains seulement pour son proufit particulier, en consideration duquel elle oublie souuentefois le danger qui lui peut auenir pour auoir faussé sa foy. Ceste responce fut cause qu'Almeide ayāt laissé Manuel Pazagne au fort d'Anchediue avec quelque garnison, se mit à la voile pour aller en Onor. Estant arriué à l'embouchure du fleuve qui coule au long de la ville, il delibera de fourrager le pays & mettre le feu aux nauires qui estoient au port. Mais les Arabes qui estoient embarquez en icelles promirent de faire tant que le Roy d'Onor satisferoit à Almeida, lequel à cause de ceste promesse attendit vn iour entier. Cependant tous les habitans de la ville se retirerent de nuit es montagnes voisines, avec tout ce qu'ils peurent emporter. Le Roy sy estoit retiré aussi. Sur ce Almeida enuoya son fils afin de brusler promptemēt toutes les nauires qui estoient au port: ce qu'aperceuant le Roy, & le danger euidēt de ces nauires, il enuoya quatre mil hommes au secours. Or le feu allumé, partie es nauires partie en la ville, sembraoit ia viuement. Almeida voulant empêcher que les ennemis ne le peussent estaindre commanda à son fils de courir sus à tous ceux qui y voudroyent mettre la main. Les ennemis marchoyent en tel ordre & equippage qu'il n'estoit pas aisé de les repousser. Car ceux qui marchoyent les premiers portoyent de grandes targes, & derriere eux estoient les archers qui descochoyent seurement leurs fleches dont les Portugallois estoient blesez. Il sembloit que le com-

bat fust bien parti. Mais en fin les Portugallois, donnans à trauers de pied & de teste, mirèt ces barbares à vau de route. Almeide voyât ses soldats courir apres trop chaudement, fit sonner la retraite. Les ennemis estimans que la crainte fust cause de cela, se r'allient, & reuiennent au combat plus eschaufez que deuât. Ils furēt soustenus des Portugallois sans troubler leurs rangs ni faire grand bruit. En ceste meslee fut tué bon nombre des ennemis, quatorze nauires furent bruslees, & le feu merueilleusement furieux consuma presques toute la ville. Les Portugallois ne perdirent qu'un homme : & Almeide fut blessé au poulce de la main droite. Incontinent le Roy enuoya gens pour demandet pardon & paix : à quoy Almeide fit responce qu'il n'auoit pas loisir pour lors de confermer l'alliance, mais qu'il enuoyeroit bien tost son fils pour la ratifier avec plus fermes conditions. Cela fait, il print la route de Cananor.

*Ce qui auant
entre les Ara-
bes anchrez
au port de
Coulam & les
Portugallois.*

Cependant, Jean Lhomme, suivant le commandement d'Almeide fit 11.
entendre à tous & par tout où il estoit besoin la venue & le pouuoir d'icelui. Puis estant arriué en Coulam, il entendit d'Antoine Sala facteur du Roy que par l'importunité des Arabes on refusoit de liurer aux nauires de Portugal la chatge d'espiceries qui deuoyēt estre fournies, selō la teneur de l'alliance. Car il y auoit au port trêtequatre nauires Arabesques qui auoyēt tel credit que de prendre telle charge que bon sembloit aux maistres d'icelles, auant que les nauires de Portugal en receussent aucune quantité : comme bien que l'alliance portast que les Arabes n'en auroyent pas vne liure que premierement les nauires de Portugal ne fussent fournies. Jean Lhomme qui estoit haut à la main, & iamais ne sestonnoit, osta aux Arabes tout l'equippage de leurs nauires, & en commit la garde à Antoine Sala. Ce sera maintenant, dit-il, que vous pourrez seurement charger les nauires du Roy : & ne rendrez voiles ni gouuernails à ces traistres, sinon apres que nos nauires auront leur fourniture entière. Ce qu'Antoine Sala promit faire. Jean Lhomme estant parti de là, en poursuiuant son voyage print deux nauires d'Arabes, & enferma estroitement les prisonniers en la sentine de ces nauires, puis logea en chascune d'icelles trois de ses matelots : car il ne pouuoit pas faire dauantage, & le vent estoit à gré, tellement qu'il estimoit que par le moyen de ces trois matelots elles pourroyent estre amenees seurement. Desia il festoit mostté à Almeide, & commēçoit à entrer dedans le port, quand tout soudain les Arabes, emprisonnez en l'une de ces deux nauires, trouuent moyen de se deliurer, puis tuent les matelots, & changeans de voile, gagnēt le haut & se sauuent. Almeide fut extremement indigné de cest accident, estimant que Jean Lhomme auoit meritē d'estre priué de son estat : mais il fut empesché de le lui oster, par l'intercession de plusieurs. Or auant que partir de là, il atresta, suivant l'avis de Gonzale Gilles Barbose, de faire bastir vn fort en ce lieu. Car Gonzale lui ramentut la desloyauté des Mahumetans, qui faidoient de tant de moyēs pour chasser les Portugallois, que quand le Roy de Cananor voudroit, encores ne pourroit-il les garentir. Pourtant Almeide fit estat de ne bouger de ce lieu que le fort entrepris ne fust en defense. Il entendit alors que l'ambassadeur du Roy de Nat-

de Narfingue estoit arriué pour le saluer au nom de son maistre. Mais auât que parler de ceste legation, il ne sera pas mauuais de dire quelque chose de la situation & estendue du royaume de Narfingue.

12. C'è royaume est en la partie de l'Inde Orientale enfermee du Gange, fleue renommé, vers l'Orient. Il regarde aussi l'Occident, & du costé de terre affronte aux pays cōioints au royaume de Goa : & est en guerre continue avec les habitâs de ces pays. Au reste, il est de fort grâde estendue, orné de grand nombre de villes, arrousé de plusieurs riuieres, fort gras & fertile, abondant en poissons, sauuagine, volaille, menu bestail & haras de grosses bestes. Les habitans sont estrangement superstitieux & idolâtres: neâtmoins ils auouent & reconoissent vn seul Dieu, confessans qu'il a puissance souueraine sur toutes choses. Leurs temples sont bastis superbement: mais comme es autres temples Indiens on n'y void autre choses que des images de monstres & choses effroyables, qu'ils adorent. Ils ont des Brachmannes tant femmes qu'hommes, qui ont charge de tout le seruice, & sont fort honnorez de chascun. Il y a vne autre sorte de religieux, estimez comme saincts en cè royaume, & appelez Baneans: lesquels ont pèdue au col vne pierre de la grandeur & grosseur d'un œuf percee par le milieu, dont sortent trois filets, & disent que ceste pierre represente leur grand Dieu, à cause dequoy ceux qui la portent sont reuez de tous. Ceste pierre tant estimée se nomme Tambarane. Les Baneans ne mangent chair ni poisson, & ne se marient qu'une fois en leur vie. Apres leur mort on enterre leurs veufues toutes viues aupres d'eux. Les autres fêmes, apres le decez de leurs maris sont portees en grande compagnie de leurs parens & amis, avec chansons de resiouissance & de louange, pres d'un feu ardent, dedâs lequel on les iette viues. Ils font feste le septiesme iour, à sauoir le cinquiesme de nostre sepmaine, lequel nous appellôs Vendredi. Outre lequel, ils ont plusieurs autres iours de feste au long de l'annee, qu'ils celebrent avec cantiques, seruices & ceremonies à leur mode. Ils croyent que l'ame est immortelle, & qu'apres ceste vie la iustice Diuine a presté recompense aux bons & des supplices aux meschans. Ils se paignent la face, s'habillent brauement, sont adônez à paillardise, à cause dequoy il y a beaucoup de querelles entr'eux. Celui qui desfie vn autre au combat à outrance, demande place au Roy, en laquelle il puisse seurement combattre son aduersaire. Si c'est quelque homme de marque, le Roy se trouue là en personne, & donne vne petite chaine d'or au vainqueur, qui la doit garder tout le temps de sa vie, autrement il perd tout l'honneur qu'il auoit acquis. Et est loisible à tout homme de leuer les armes contre lui seul à seul, pour essayer qui emportera la chaine, laquelle demeure au plus fort, & lui est ostee s'il se laisse vaincre puis apres par vn encores plus vaillant que lui. Et non seulement les gens de guerre, mais aussi les artisans voident à coups d'espee les debats suruenans entr'eux pour sauoir qui est le plus excellent ouurier. La plus grande ville du royaume s'appelle Bisnaga, ayant plus de quatre mille pas de tour, plusieurs murailles, les maisons spacieuses, les temples fort magnifiques, & habitee d'un tres-grand nombre de personnes. Elle est plaine de diuerfes mar-

Descriptiõ du royaume de Narfingue, avec autres particularitez, notables de la religion & des mœurs des habitans.

chandises qu'on y apporte de toutes parts. Les marchans qui amènent par mer des cheuaux de Perse ou d'Arabie ne payent aucun tribut : mais il n'y a point d'exemption pour les autres marchandises. Le Roy achete tous les cheuaux des marchans, puis retient ceux qui lui plaisent, & vend ou donne les autres. Son palais est fort grand & basti à grands frais, orné de tres-plaisans iardins & de viuiers plains d'une infinité de poissons. Ce Roy ne marche iamais que bien acompagné d'une grosse garde de soldats, & est grandement respecté & presque adoré de ses sujets. Il se nourrit de viandes exquisés & delicates au possible, son corps est poli de parfums & liqueurs precieuses, & en approchant on le void resplendissant de toutes parts, à cause de l'or & des pierres precieuses qu'il porte. Entre ses femmes, il en a une laquelle est la plus excellente & fauorisée. Mais encor il a un haras de concubines, qui sont toutes princesses. Quand il meurt, on allume un feu de bois odoriferans, & met-on le corps sur le bucher. Lors on lui baille pour compagnie toutes ses concubines, tous ses mignons, ses domestiques & seruiteurs qui sont bruslez avec ce corps. Or ils acourent frailegrement à ce feu, qu'on void manifestement qu'ils estiment que le plus grand honneur qu'ils pourroyent iamais acquerir consiste à estre compagnons de leur Roy en sa mort. Les Roys de Narfingue sont bons iusticiers. Les marchans y trafiquent en toute seureté. Il y a plusieurs seigneurs subaltemes en ce royaume, lesquels le Roy fait mourir ou du moins chastier à coups de baston s'ils font tort à quelque particulier: tellement que nul ne se peut promettre impunité, tant riche puisse-il estre. Les Roys amassent de grands thresors, & euident que ce seroit tres-mal fait de toucher à ceux que leurs ancestres ont laissez, sinon en cas d'extreme necessité. Cela fait qu'ils ont un gros amas d'or, d'argent & de pierres precieuses : entre autres ils serrent en leurs thresors des diamans fort grâds & pesans, que lon taille en ce pays là. Ils entretiennent bon nombre de gens de guerre, & les fournissent de cheuaux qui sont nourris en l'escuierie du Roy, & les maistres ont bouche à cour. Ceux qui lui ont une fois presté serment ne peuuent en sorte que ce soit sortir du royaume sans le commandement du Roy. Pour le present i'obmet plusieurs autres choses des coustumes du royaume de Narfingue, de la richesse du Roy, de ses despenfes & magnificences: afin de n'estre point plus long que le discours de ceste histoire le requiert.

LE Roy de Narfingue, en l'an mil cinq cés & cinq, esmeu de la renommée des choses executées par les Portugallois es Indes Orientales, delibera d'auoir amitié & traiter alliance avec le Viceroy. Pourtant il lui manda lettres & presens pour estre enuoyez de sa part au Roy Emmanuel. L'ambassadeur fut receu assez honnorablement par Almeida, auquel suiuant sa creance il fit ample discours de sa legation, laquelle portoit en substance, Que le Roy de Narfingue desiroit grandement contracter alliance avec celui de Portugal: d'autant que le bruit des vertus admirables dont Emmanuel estoit orné, l'auoyent si viuement esguillonné qu'il ne desiroit rien tant que d'estre conioint par estroite amitié avec un Prince tant accompli. Quant à lui qu'il ne demandoit autre tesmoignage de ce renom que les
faits.

faits admirables des Portugallois es Indes, depuis quelques années. Car il cōduoit à part soy que le Prince estoit excellentement vertueux, & tref-digne d'estre aimé & fauorisé à l'enui par tous les Roys du monde, qui auoit des suiets si vaillans. Pourtant, declairoit estre prest d'executer promptement tout ce qui pourroit seruir à l'acroissement de la grandeur du Roy de Portugal : l'asseurant que nul autre Roy ne le deuanceroit en ce point de porter plus d'amitié & de bonne affection à Emmanuel que lui. Et si l'alliance de mariage lui plaisoit, il donnoit volontiers pour femme au fils du Roy de Portugal vne sienne fille fort belle Princeesse, avec douaire tref-riche : afin que par telle vnion leur alliée fust de plus en plus affermie. Telle estoit la créace de cest ambassadeur, lequel apporta de la part de son maistre deux colliers garnis de fines perles fort luisantes, des anneaux garnis de pierres de grand pris, des robbes de drap d'or & de soye, desirant que le tout fust enuoyé au Roy de Portugal à la premiere commodité. Almeide fut fort ioyeux de tel ambassade, fit de beaux presens à l'ambassadeur, & rescriuit au nom de son Roy à celui de Narsingue fort honnorablement, avec promesse solennelle d'enuoyer ses presens en Portugal, & faire entendre au Roy Einmahuel qu'il ne s'en estoit point trouués Indes qui eust recetché son amitié de meilleure affection que celui de Narsingue. L'ambassadeur ayant eu congé, Almeide entra en vn esquif & print terre, commandant qu'on dressast son pauillon dessous des palmiers auprès du riuage : où le Roy de Cananor le vint voir. Et apres beaucoup de propos amiables tenus entr'eux, Almeide pria le Roy lui vouloir permettre de bastir vn fort pour garantir les Portugallois de la multitude des Sarasins, & pour rendre ce lieu plus assuré pour le Roy contre les courtes & assaux de ses ennemis. Le Roy accorda ceste requeste, suivant quoy lon mit la main au bastiment de ce fort en telle diligence, qu'en peu de iours il fut acheué ; car long temps au parauant Gilles Barbose en auoit posé les fondemens, & toutesfois ne disoit pas que c'estoyent les proiets d'un fort, ains seulement d'une maison spacieuse, pour y habiter plus à l'aise : car il craignoit du commencement que ce nom de fort ou citadelle ne lui nuisist, remettât cela à meilleure opportunité, qu'Almeide en feroit lui mesmes instance au Roy. Ceste place fut appellée le fort Saint Ange, où fut establi gouuerneur Loup Britio avec cent cinquante Portugallois.

*Sous pretexte de garder an-
truy, les Portu-
galles empen-
sant, & assu-
rēt leur domi-
nium en pays
estrange.*

14. COMME on estoit apres cela, nouuelles vindrēt à Almeide de la mort d'Antoine Salaisa, eueque du Roy de Portugal en Coulam, comme nous l'auons monsté ci dessus. Apres que Jean Lhomme (plus hardi que sage en ce fait) eust osté aux Arabes de Coulam les gouuernails & voiles de leurs nauires, & baillé le tout à Antoine Sala, tandis qu'on chargeroit les nauires de Portugal, il partit pour aller trouuer Almeide. En son absence les Arabes irrités de telle brauerie, desgoigerent plus furieusement le maltalent par eux conceu de longue main contre les Portugallois. Et pour executer plus aisément leur conspiration, tacherent d'attirer à leur parti ceux de la ville. Mais voirement, attendez (disoyent-ils) que ces ambitieux & outrecuidés, apres auoir rempli leurs bourses & leurs coffres, fauorisent vostre liberté,

*Sedition des
Arabes de
Coulam cōtre
les Portuga-
lois, & ce qui
en resulte.*

& gardent la foy qu'ils vous ont promise. Vous voyez vne poignée de gés esloignez du secours des leurs, estre si audacieux que d'oser en vostre ville, à vostre barbe, oster les voiles & gouuernails à nous qui sommes vos amis & alliez de long temps : outrageans vilainement les bons marchans desquels vous tirez vn beau proufit toutes les annees : & comme s'ils estoient desia Roys, abusent de vostre patience pour tyranniser les autres. Car qu'ont-ils exécuté en nous faisant tel tort, sinon se moquer de nous tous, & triôphér comme estans nos seigneurs & maîtres ? Eux qui ne sont que cinq ou six, en pays estrange, sur les terres d'un excellent Prince, parmi vn monde de gens, ont commis ce que le Roy mesmes n'eust iamais voulu attenter. Et pourtât ce n'est point à nous, mais à vous que ces glorieux se sont attachez : & ce qu'ils font maintenant n'est pas tât pour nous molester que pour tenter vostre patience : & si vous laissez passer telle insolence, ils vous osteront vostre liberté & vos biens aussi. Tels propos, esmeurent le peuple qui s'armassa pour courir sus à Sala, lequel acompagné de douze autres (car ils n'estoyent pas dauâtage en ce lieu) se retire dans vne chapelle dediee à la vierge Marie. Lors ils se preparent pour resister courageusement, & repoussent de telle sorte l'impetuositè des ennemis, qu'il estoit mal-aisé de les forcer. Ce que veu par les ennemis, & qu'ils ne pourroyent entrer en ceste chapelle qu'avec grande perte de leurs gens, ils l'environnent de bois, puis y mettent le feu, qui fussoqua tous les Portugallois. Alors Pierre Raphael estoit au port, & ne peut secourir ses compagnons en vn accident si soudain & precipité. Toutesfois pour venger ce meurtre il brulla cinq nauires que les ennemis auoyent lors à l'ancre : puis priat la route de Cochim, où il trouua Almeide, & lui conta l'auanture. Lors Almeide despescha promptement son fils, avec commandement de faire voile en Coulam le plus tost qu'il seroit possible, & brusser toutes les nauires qu'il trouueroit au port. Cela fut exécuté de telle viffesse, qu'auant que les Arabes se peussent douter de rien, on descouurit la flotte de Portugal, laquelle mit le feu en vingtsept nauires ennemies. D'autrepart Jean L'homme fut priué de son estat de capitaine par Almeide, pour chastiment de sa temerité.

Arrivée de François Almeide en Cochim, & ce qui se passa entre lui & le Roy.

• A P R È S cela, Almeide descédit en terre & fut recueilli en grād hōneur, par le Roy de Cochim. Trimūmpara, lequel s'estoit exposé au hazard de perdre son royaume & sa vie pour conseruer les Portugallois, ne regnoit plus lors : ains par deuotiō auoit quitté le maniēmēt des affaires, s'estant retiré en vn turcol, lieu estimé sainct par ceux du pays, pour vacquer au seruice de ses dieux : & de son franc vouloir auoit laissé le royaume à Nambardare fils de sa sœur, à qui la courōne escheoit, selō la coustume obseruee entre ces peuples. Almeide estimāt chose superflue de presēter quelque chose à vn Roy qui auoit hazardé sans crainte ses biens & estats, delibera de faire vn present au ieune Roy propre à la fidelité & amitié que son hōcle auoit mōstrée aux Portugallois. Et pourtât il fit dresser vn haut d'aix moyennement esleué, couuert & tapissé richement, & mit le Roy en vn siege, tellement qu'il pouuoit estre veu de tous : puis fit vne harangue pour asseurer ce Roy pour l'auenir d'vne condition plus heureuse que iamais. Car il dit

il dit que le Roy Emmanuel se souuenant des excellens merites, & de la singuliere fidelité du Roy Trimumpara, auoit tousiours desiré l'acroiſſement de ſa dignité, & non ſeulement l'appeller, ains auſſi le tenir pour ſon confederé & bon ami. Mais puis que bon lui auoit ſemblé de renoncer des ſon viuant aux choſes que les autres hommes eſtiment tant: c'eſtoit raiſon que ce qui lui eſtoit deu fuſt tranſporté à ſon ſucceſſeur. Pourtant il dōnoit à Nambeadare vne couronne d'or au nom du Roy Emmanuel, lequel pat promeſſe ſolennelle receuoit Nambeadare en ſa proteſtion, l'aſſurant ſur ſa foy de repouſſer les efforts de tous ſes ennemis. Dauantage il lui permettoit de faire battre monnoye d'or, d'argent & cuire: ordonnant qu'il demeureroit ſouuerain, & poſſederait le royaume avec ce tiltre, afin de conſeruer ſes biens par tels moyens. Nambeadare remercia bien affectueuſement le Roy de Portugal, & promit ſolennellement d'eſtre tousiours preſt à receuoir ſes commandemens, & d'entrer en toutes guerres pour l'acroiſſement de ſa dignité. Lors Almeide lui mit ſur la teſte vne couronne d'or qu'il tenoit en ſes mains. Ceſte harāgue fut ſuiuie d'vne longue fanfare de trompettes, & le Roy s'en retourna fort content en ſon palais, avec ſa couronne & les autres preſens qui lui auoyent eſté faits. Surce Almeide donna promptement ordre de faire charger huit nauires qui ſe deuoient mettre à la voile pour retourner en Portugal.

16. **L**ES capitaines de ces huit nauires s'eſtans embarquez, prindrent leur routte de telle ſorte que le premier iour de Feurier l'an mil cinq cens & ſix, ils furent portez en vne terre neuue, de fort grande eſtendue, chargée de pluſieurs eſpaisses foreſts, & abondante en beſtail. Puis ils deſcouurent dix barquerolles, chargées d'hommes nuds, bigarrez de diuerſes couleurs, les cheueux ſrizez, avec arcs & fleſches: ils s'adreſſent à la nauire de Fernand Soarez, & mōtent dedās iuſques au nōbre de vingt cinq, où ils furēt receus tres-volontiers, & leur donna-on quelques habillemens & à manger. Perſonne n'entendoit leur langage, & ſe faiſoyent entendre par ſignes. Ils s'en retournerent fort contens, & ſembloit: mais eſtans vn peu eſloignez, ils delibererent payer leur eſcot à coups de fleſches: ceux des nauires reſpōdent & les chaſſent à coups de canon. Fernand Soarez voyant approcher quelques autres de la nauire en laquelle commādoit Roderic Freirio, l'admonēſta de ſe ſaiſir de ces barbares: & ainſi lon en print vingthuit. De là ils coſtoient ce pays, & trouuēt vne riuere d'eau douce, où ils firēt aiguade. Les habitans de ce lieu s'eſtans amassez en troupe leur courent ſus: eux ſe retirerent en leur eſquif, puis de leurs nauires tirēt quelques coups de canon, dōt ils tuent aucuns de ces barbares, en bleſſent grieuement d'autres, & contraignent le reſte de ſe ſauuer à la fuite. Ces deportemens firent conoiſtre aux Portugallois que le peuple de ceſte coſtē n'eſtoit pas acoitable. Du commencement ils ne penſoyent pas que ce fuſt vne ille. Apres auoir vogué au long de toutes ſes coſtes, ils doublerent les promontoires d'icelle: lors ils conurent tout euidemment, que c'eſtoit l'ille iadis nommee Madagaſcar, & par nous aujour d'hui l'ille de ſainct Laurent. Elle eſt à l'oppoſite du royaume d'Ægeſimba, & eſt aſſiſe vers l'Orient. La flotte arriua à Liſ-

Premier abord de huit nauires Portugaliſes en l'ille de Madagaſcar, aujour d'hui appellee l'ille de ſainct Laurent.

1506.

bonne le vingtquatriesme iour de May, l'an mil cinq cens & six.

*Nauirens
de François
Gnaye en Zo-
fala, & des cho-
ses qu'il y fit
iufques au port
de sa mort.*

D'v n autre costé, ce qui s'ensuit auint en vn quartier d'Ethiopie, nom- 17.
mé Zofala, faisant portion du royaume d'Ægesimba. L'an mil cinq cens
& cinq, apres qu'Almeide fut parti de Lisbonne, le Roy fit equipper vne
autre flotte de six nauires, de laquelle il donna la cōduite à François Gnaye.
L'vn des pilotes nommé Jean de Laiet, voguant au long del'Ethiopie, vou-
lant percer d'vn coup de traict certain gros poisson, tomba dedans la mer,
& ne fut point veu depuis. Vn autre pilote, descendu en terre trop auant
pour auichuiller de chair son vaisseau, fut tué avec quelques siens compa-
gnons par les habitans du pays. Autres ayans esté ordonnez en leurs places,
la flotte s'auance & prend la route du Cap de bonne esperâce: mais ils s'en
essouyent tant vers le pole Antarctique, qu'ils trouuerent l'eau gelee, &
surent quit battus de neige, de gresle & de froid, qu'ils en estoient roides
& en tel estat qu'à peine se pouuoient-ils remuer d'vne place. Finalement
s'estans esleuez au Séptentrion & ayans doublé le cap, ils vindrent mouil-
ler l'ancre en la cōste de Zofala. Or poutee que les deux grandes nauires
ne pouuoient entrer au port, Gnaye avec quatre moindres vaisseaux arri-
ua tout dedans le golfe de Zofala. Le Roy de ce pays estoit aagé de septan-
te ans, & auégle. Il auoit esté fort estimé pour ses vaillances, premier que
cest accident lui auinst. La ville n'estoit pas grande, niles maisons gueres
magnifiques, mais tapissées de quelques draps de soye, & fortifiées au de-
hors de hayes & huissons espais. Ce Roy nommé Zuse receut Gnaye fort hu-
mainement, & lui promit de faire tout ce qu'il pourroit pour le Roy de
Portugal. Il auoit vne grosse garde de soldats Mores, bigarrez de couleurs,
nuds iusques au nombril, & portans au costé des simeterres à poignées d'y-
roire, le reste du corps couuert de draps de soye & de coton, & de hauts
turbans en leurs testes. Apres plusieurs demonstrations d'amitié, Gnaye
pria le Roy lui permettre de bastir vn fort, esperant que le Roy en receuroit
grande commodité: ce qui lui fut accordé promptement. Gnaye s'estant
retiré, vn Ethiopien nommé Acote, qui auoit grand credit enuers le Roy,
gatta en son ouïllance & ferme amitié avec Gnaye, auquel il donna de bons
auertissemens touchant le naturel du pays, & la façon de viure des habi-
tans. Incontinent Gnaye mit la main à l'œuvre & diligenta de telle sorte,
qu'au bout de quelques mois son fort fut bien auancé. Puis il enuoya quel-
ques vns de ses gens en Inde & en Quiloa, & lui demeura avec les troupes
qu'il lui pleut retenir & pour paracheuer ce fort, ceux du pays mesmes
lui aidoyent volontiers. Plusieurs Mores indignez de ceste entreprise vont
trouuer le Roy, & l'admonesterent de se donner garde des embusches de
ces meschans estrangers qui faignoient l'aimer, cependant machinoient
la ruine de son estat. A quelle fin, disoyent-ils, est basti ce fort dedans vo-
stre pays, sinon à ce que s'estans rendus les plus forts ils vous chassent d'ici,
& vous despouillent de tous vos biens. Est-ce point par tels artifices qu'ils
ont chassé le Roy de Quiloa? Ont-ils par ruine avec vne trahison, insigné
plusieurs Princes Indiens? Quelque part où ils mettent le pied, y laissent-ils
pas des profondes traces de fraude & de brigandage? Si donc vous estes
sage,

sage, vous les desferez auant qu'ils soyent plus fotts, de peur que ci apres il ne soit trop tard de destourner vne telle peste arriere de vous & de vos suiets. Ce roytelet enflammé par tels discours, amasse secrettement quelques gens, & assigne iour pour couper la gorge aux Portugallois. Acote descourrit la conspiration à Gnaye, lequel se tint prest pour repousser viuement les ennemis, qui selon ce qui auoit esté resolu, vindrēt assaillir furieusement le fort, iettent des lances à feu, & font tous leurs efforts pour entrer dedans. Acote voulant secourir les assaillis entre dedans le fort avecques cent hommes. Lors y eut aspre meslee: mais en fin les assaillans furent repoussez à coups de fleches & d'harquebouzes. Estans en route, les Portugallois fortēt dessus, & ne leur dōnent loisir de se rassurer ni r'allier. Pourtant ils les talonnent de pres & les chassent iusques en la ville où se tenoit leur Roy, & enuahissent le palais d'icelui. Il s'estoit retiré en sa chambre: & comme les Portugallois fussent paruenus iusques là, tout vieillard & aueugle qu'il estoit, se voyant en peril euident de sa vie, au lieu de perdre courage, commence à lancer puissamment des iauelots contre ceux qui l'assailloyent: & poutce qu'ils entroyent à la foule, il ne iettoit iauelot qui n'assénast, & en blessa plusieurs, notamment Gnaye, qui receut vn coup de trait au col. Ce que veu par Manuel Fernand, facteur du Roy de Portugal en ces quartiers, se ietta sur ce vieillard aueugle, & luy trancha la teste. Apres ce coup, Gnaye defendit à ses gens de plus toucher à personne, voulant qu'on espargnast le peuple, & l'attiret à soy par tel tesmoignage de douceur, afin qu'en voyant ces exemples de vertu ils fussent participas de quelque rayon de misericorde lors que tout sembloit estre perdu pour eux. Il lui sembla donc qu'il faloit asseurer cest estat, & que Acote qui s'estoit bien porté en ce tumulte meritoit bonne recompense. Pourtant il le ctea Roy au nom de celui de Portugal, & fit que les habitans promirent de lui estre fideles suiets. Acote s'obligea d'accomplir à tousiours sans delay ni refus tout ce que le Roy Emmanuel & ses capitaines requerroient de lui. En ces entrefaites, dautant que l'air de ce pays estoit contraire aux Portugallois, & en infectoit plusieurs à cause des brouees & exhalations humides que le Soleil tres-ardant attiroit des lieux marescageux de la region, auint que les Portugallois qui seiurnoyent là comencèrent à languir, tomber malades & mourir de peste, du nombre desquels fut Gnaye leur general. Ceux qui suruecurent lui substituerent d'un commun accord Manuel Fernand. Au mesme téps Almeida eut nouuelles par Cidebarbute & Manuel Corefine, pilotes enuoyez par le Roy de Portugal, que Gnaye estoit mort dauantage qu'il y auoit de la seditiō en Quiloa, à cause du Roy Mahumet tué en trahison par les menees de Tirendiconde parent de Habraheim. Voila ce qu'ils auoyent aprins en leur voyage, ayans esté enuoyez du Roy pour sauoir si François Albuquerque & Pierre Meadoze, qui auoyent fait naufrage, se seroyent point sauuez en quelque endroit de ceste coste. Incontinent Almeida despescha Nonio Vasque pour allet en Zofala commander dedans le fort, & en passant appaiser ce tumulte suruenu en Quiloa à cause du meurtre de Mahumet, chastiant les auteurs de

ce mal, si faire se pouuoit.

*Description de
Zofala & des
deux Ethio-
pies: item des
mœurs de
ceux qui y
habitent.*

Ce n'est pas chose hors de propos de descrire ici la situation de Zofa- 18.
la & del'Ethiopie. Il appert que des le temps du poëte Homere, ceste par-
tie d'Afrique que les Grecs appellent Ethiopie estoit distinguee en deux:
l'une (suiuant ce qu'en dit Homere mesmes) regardant l'Occident; l'autre
l'Orient: & que les derniers confins de ces deux Ethiopies s'estendans fort
auant vers le Midi estoÿt bornez de la mer Oceane. L'Ethiopie Occiden-
tale est iointe avec ceste partie d'Afrique qui aboutit au destroit de Gi-
braltar, & s'estend de là vers le Midi iusques à cinq degrez au deça de
l'Equateur, & lors elle resflechit vers l'Orient, & s'allonge d'un fort long es-
pace iusques à la pointe du promontoire de bonne esperance. De là elle
s'auance tellement vers le Midi, qu'elle passe outre l'Equateur vers le Pole
Antarctique: enuiron trentecinq degrez: puis remontant à l'Orient, elle
retrouue là ligne Equinoctiale, & s'esleue au Septentrion, tât qu'elle par-
uiuent à la mer d'Arabie & au cap de Mozambique. Là elle regarde l'Ara-
bie au Leuant. Or l'Ethiopie cōtient plus que la moitié de toute l'Afrique.
Le pays est fertile en plusieurs endroits, & abonde en fruiçts, sauuagine &
bestail, estant arrousé de plusieurs riuieres. Il y a d'autres quartiers deserts
& du tout steriles & inhabitez. Semblablement il y a grande difference de
langage & de mœurs. Car quelques vns des habitans sont doux, asables &
humains: les autres farouches & cruels. Quant à ceste part d'Ethiopie qui
regarde l'Orient, elle commence à la pointe de ce grand promontoire, &
s'estend de là par diuers goulfes & retours iusques à l'Ethiopie qui est sous
l'Egypte. Au reste, il y a force elephans en ce pays lequel fournit grande
quantité d'iuoiré aux marchans qui le portent puis apres es autres regiōs.
En plusieurs aussi lon y trouue plusieurs mines d'or, d'argent, de cuiure &
d'autres mineraux. Toutesfois les chaleurs y sont si extremes & facheuses
aux Europeens, que les fièvres mortelles qui s'en ensuiuent empeschent la
cōmodité du trahe, & la crainte du danger priue les marchans des grands
proufits qu'ils y pourroyēt faire. Neāmoins l'auarice domine bien souuēt
en telle sorte sur les personnes, qu'elle leur fait perdre tout apprehension de
danger & de mort.

*Particuliere
description du
riche royaume
de Benemota-
pa en Ethio-
pie: & de quel-
ques choses re-
marquables
au gouuernement
de ce royaume.*

EN ceste partie d'Ethiopie qui est delà le promontoire de bonne espe- 19.
rance; & a pour bornes l'Ocean meridional, y a vn royaume de fort grāde
estendue nommé Benemotapa: au Roy duquel (auant la nauigation des
Portugallois) tous les seigneurs & roitelets de ceste coste redoyēt volōtai-
re obeissance. Il y a de l'or en merueilleuse abondāce: car mesme on le tire
des lacs & des riuieres: & plusieurs seigneurs payoyēt tous les ans au Roy
vn tribut d'or. Les habitans du pays n'adorent aucunes images, ains reco-
noissent vn Dieu createur du ciel & de la terre. En leurs façons de viures &
de vestemens ils s'accordent avec les autres peuples de l'Ethiopie. Ils portēt
vne reuerence incroyable à leur Roy, lequel porte ordinairement deux en-
seignes de sa maiesté royale. L'une est vn certain petit hoyau ayant le man-
che d'iuoiré: l'autre sont deux iauelots assez courts. Par l'une il exhorte ses
suiets à labourer la terre, de peur que par oisiveté ils ne la laissent tomber
en friche,

en friche, & que la faim ne les face deuenir brigāds. L'vn des jaelots monstre qu'il veut faire iustice dedans son royaume: & l'autre declare qu'il repoussera les ennemis par les armes. Ce Roy tient en sa cour pres de soy les fils des autres Roys & Princes ses vassaux: tant afin que par le moyen de ceste nourriture ils taschent d'aimer leur souuerain & lui estre fideles, que pour contenir leurs peres en son obeissance, ayant tels ostages de leur part. Il est tousiours acompagné d'une puissante armee, encor qu'il soit en paix & ferme alliance avec tous les peuples circonuoiſins. Estimant qu'il n'aura occasion de craindre la guerre, si en temps de paix lon presume tousiours que de sa part il est comme sur le point d'enuahir les estats des autres Roys. Tous les ans il enuoye de ses domestiques & familiers porter de sa part aux Roys & Princes ses vassaux du feu nouveau, auquel les autres suiets vont pour en auoir leur part: ce qui fait comme s'ensuit. Quand l'ambassadeur arriue à la maison de l'vn de ces Princes, qui qu'il soit, on estaint le feu. Puis l'ambassadeur en rallume de nouveau, & lors tous vienēt en prendre là pour l'emporter en leurs maisons. Qui refuse cela est estimé traistre & rebelle, & le fait-on mourir comme criminel de lese maiesté: & si il est besoin, on leue vne armee contre lui pour l'attrapper & exterminer cruellement comme vn perfide & deserteur. Voila quant à l'Ethiopie, au circuit de laquelle est aussi comprins l'isle de Zofala.

20. **Q**UANT à l'estat des Indes, le Viceroy Almeida, ne voulāt laisser couler le temps inutilement enuoya son fils avec vne flotte de neuf nauires aux isles de Maldiuar, qui sont en fort grand nombre, separees l'vne de l'autre par petis destroits, à septante lieues loin de Cochim ou enuiron: & lui com manda d'espier les nauires des Sarasins cinglās de l'Oriēt à l'Occidēt, pour les prendre & amener en Cochim. Or l'impetuositē du reflux estoit telle que Laurent fut entierement chassē hors de sa route, & porté en vne isle assez proche du Cap de Comori. Aucuns estiment que c'est la Taprobane: mais ceux qui suiuent l'auis de Ptolemee tiennent que la Taprobane appelee Samatra de ses habitans, est à l'opposite de Malaca. Ptolemee appelle Cori celle dont nous parlons, du nom de cē cap des Indes, vis à vis duquel elle est situee. Ceux qui y demeurent l'appellent Zeilan. Elle a en longitude du Septentrion au Midi enuiron six vingts & cinq lieues, & en sa plus grande latitude septantecinq lieues. C'est vne isle merueilleusement fertile, abondante en diuerſes sortes de fruits, & tapissée d'herbes & de plantes de soueue odeur, lesquelles y croiſēt d'elles mesmes sans aucun labourage. Il y a des forests epaisses de citrons, & diuers fruits de flair & goust fort plaisant. Dauantage il y a de la cannelle à foison, force pierres precieuses que lon tire es mines des rochers, & des perles en nombre incroyable, de tref belle couleur & splendeur. Item, des Elephants par grosses troupes. Toute l'isle estoit diuisee en sept royaumes, l'vn desquels estoit beaucoup plus excellent que les autres, à cause de son estendue & de ses richesses. Le Roy se iourmoit en vne grande ville nommee Colombo qui est la capitale de ce plus riche royaume. Au milieu de l'isle se void vne haute montagne enuironnee de plusieurs estangs. Et au sommet de ceste montagne y a vne pe-

Des isles de Maldiuar, avec ample description de l'isle nommee Zeilan & des singularitez d'icelle: & ce que Laurent Almeida y fit au nom du Roy de Portugal.

tite pointe du milieu de laquelle sortent d'un lac qui y est des eaux douces & coulantes sans cesse. Pres de ce lac y a vne grande pierre, sur laquelle lon void empreinte la trace d'un corps humain. Les habitans tiennent vne opinion de pere en fils, que c'est la trace d'Adam nostre premier pere, lequel ils disent auoir esté enléué de là au ciel. Vn peu arriere de là se void vne chapelle, où lon va visiter deux sepulchres par fort grãde superstition: car ils estiment que là ont esté enterrez les corps d'Adam & d'Eue, desquels est descendu tout le genre humain. Ceste opinion du tout enracinee en l'entendement de ces insulaires, fait que plusieurs Sarasins & autres idolatres viennent là en pelerinage. La pente de ce costau est si roide, qu'il ne leur est pas possible de grimper iusques au haut avec les mains, ains faut qu'ils y montent avec des eschelles & chaines accommodees à cela. Laurent Almeide estant atriué avec sa flotte en ceste isle, alla mouiller l'anchre en vn port nommé Gabalicam: ce qu'entendu par le Roy, qui n'estoit pas loin de ce lieu, il enuoya incontinent vn ambassade vers Almeide avec presens, afin de demander la paix. Laurent receut l'ambassadeur fort humainement, & lui donna quelques besongnes qu'il estimoit lui deuoir estre agreables: & pour ratifier l'accord, despescha vn gentil-homme de sa suite nommé Pelage de Soufe, lequel estã conduit au palais trouua le Roy en magnifique appareil: car encor qu'il fust iour, toutesfois les pierres precieuses qu'il portoit sur soy, & les torches de cire allumees faisoÿent vn autre iour: & ce Roy estimoit que ceste clarté donnoit lustre à sa maiesté royale. Pelage de Soufe fut honnórament recueilli avec toute sa troupe, & l'alliance passée sans aucune difficulté. Les conditions furent que le Roy payeroit tous les ans à celui de Portugal deux cens cinquante mille liures de cannelle: & le Roy Emmanuel le receuroit en sa protection & sauuegarde, & commanderoit à ses capitaines de garder les ports & villes maritimes d'icelui des courses & assaux de tous ennemis. Laurent accorda ceste alliance pourueu que son pere y consentist. Neantmoins le Roy fit liurer au Portugallois les charges de cannelle: tant il estoit saisi de frayeur, que ses gens ne pouuoÿent assez faire à son gré pour confermer cest accord. De son consentement le fils d'Almeide fit planter en terre vne colône de marbre, avec les armoiries du Roy Emmanuel, pour signifier qu'il auoit prins possession de ceste isle au nom du Roy de Portugal. Cela executé il vint retrouver son pere en Cochim, lequel l'enuoya en Anchediue, pour auictualier le fort, & courir toute ceste coste de mer. Manuel Pazagne fut aussi despesché pour aller en Cananor afin d'aider Laurent Britio à bastir & munir la forteresse qui y estoit commencee.

*Disons sur
la venue de
Louys Wartoman
Boulognois
vers Laurent
Almeide: &
ce qui auant
aux deux: Mais
l'histoire qui a-
uoyent suivi le
parti du Roy
de Calecut.*

TANDIS qu'on estoit apres ces affaires, vn Italien natif de Bologne, 21.
nommé Louys wartoman, lequel auoit voyagé en diuerſes parties du monde pour contenter sa curiosité, & finalement habillé en marchand Arabe estoit venu à Calecut, vint trouuer Laurent Almeide. La cause estoit, que durãt son ſejour en Calecut, comme on deuiſoit des Portugallois presque par toute la ville, lui ſaignant ne ſauoir quelles gens c'estoyent, s'enquit de leur voyage es Indes, de leurs mœurs & religion. Les Mahumetistes lui di-
ſent

sent que c'estoit vne meschante & cruelle nation, qui ne s'adonnoit qu'à rapines, brigādages & saccagemés: & leur auoit ia fait beaucoup de maux en ces quartiers là. Sur ce discours wartoman fait du courroucé, disant que c'estoit vne honte de supporter si long temps l'audace & les courses de ces escumeurs de mer, lesquels deussent estre raclez du monde des long temps au parauant. Quelques iours apres s'estant rendu familier de ceux qui auoyent credit autour du Roy, il descourrit les conseils d'icelui, & à quelle fin il armoit vn grād nombre de vaisseaux, & de quel secours il se fortifioit pour ruiner les Portugallois. Cependant il entra en quelque esperance d'estre bien tost deliuré de la detestable compagnie & frequentation des Mahumetistes, à l'aide des Portugallois. Au reste, il communiqua sa deliberation aux Milannois, les exhortant de sortir de Calecut, & se retirer avec les Portugallois. Eux respondent qu'ils estoient Chrestiens: mais que les maux qu'ils auoyent cōmis les empeschoyēt de recourir aux Portugallois. wartoman leur donne courage, & promet de faire tant que les forfaits passez ne leur seroyent point imputez. Apres cela, dès la premiere occasion qui s'offrit, wartoman deslogea, & vint trouver Almeida. Estant sur mer il rencontra Laurent, auquel il fit entendre ce que le Roy de Calecut prepaioit tant par mer que par terre: adioustant que les deux Milannois estoient fort desplaisans de leur faute, & que si on la leur pardonnoit, ils euiendroyent volontiers en la compagnie des Portugallois: & supplia Laurent de les receuoir promptement en grace, d'autant que le Roy de Calecut leur faisoit fondre force artillerie, & plusieurs Malabares aprenoyent le mestier, au grand regret de ces Milannois. Laurent sceut fort bon gré à wartoman, lui fit quelques presens, beaucoup de promesses, & commanda qu'on le menast au Viceroy, lequel manda incontinent à son fils qu'il s'aprestast pour combattre les ennemis. Puis il l'enuoya wartoman en Calecut, afin de donner la foy aux deux Milannois, & les amener en Cochim. Tel message fut tres-agreable à ces deux miserables: mais comme ils vouloyent trousser bagage pour s'enfuir, leur entreprinse ayant esté esuentee, ils furent empoignez & executez à mort d'un fort cruel supplice. Louys wartoman fut habile à se sauuer, & sans cela il passoit le pas avec les deux autres.

21. C E pendant l'armee nauale de Calecut se fournisoit en diligence de tout ce qui estoit requis auant que faire voile. Il y auoit quatre vingts nauires, & six vingts quatre brigantins: bien munis d'armes, de soldats, d'artillerie & de viures. Laurent Almeida vogua contre avec sa flotte d'onze nauires, esquelles estoient huit cens Portugallois, vaillans hommes & bien equippez. Il auoit outre cela quelques soldats Indiens, mais c'estoit peu de chose. Les deux flottes se rencontrerent au long de Cananor. Et apres que les grandes huees de part & d'autre, le son bruyāt des trompettes, & le tonnerre des canons eurent fait bransler la mer & la terre, finalement les nauires s'accrocherent & vindrent aux mains. Laurent Almeida ayant choisi la nauire capitainesse, s'y adressa, & apres auoir ietté par plusieurs fois les crocs pour l'arrester, en fin elle demeura court, & y eut rude conflict de part &

Bataille nauale entre la flotte de Calecut & de Portugal: & ce qui en auut.

d'autre. Toutesfois Laurent futa dedans, fuiui de Philippe Roderic, Jean Lhomme, Fernand Petrejo d'Andrade, Vincent Pereire, Roderic Pereire, & d'autres braues soldats. Il y auoit six cens hommes en ceste nauire, qui se voyans reduits à l'extremité, tascherent de vendre leur peau. Mais apres quelque resistance ils firent partie tuez, partie prins; quelques vns se ietterent en l'eau pour se sauuer à nage. Apres ceste prinse, Laurent alla tout à point secourir Nonno Vasque Pereire, lequel ayant la cōduite d'un moyen vaisseau s'estoit attaché à vne grande nauire des ennemis. Mais peu s'en fallut que son vaisseau ne fust enfondré à coups de canon; dauantage on descoehout tant de fleches & de dards contre lui; & les siens, qu'ils estimoyent estre au bout de leurs iours quelque resistance qu'ils fissent. Mais à l'arriuee d'Almeide ceste nauire des ennemis fut gaignee, & de cinq cens soldats qui estoient dedans ne se sauua pas vn, sinon ceux qui eschapperent à force de nager. Au nombre des nauires de Calecut y en auoit plusieurs marchandes qui se conspyent en la force & multitude des autres. Mais ces marchans voyans les deux nauires prinse, commencerent à douter de l'euuenement de ce combat. Or tandis que les Portugallois estoient enuolopez & contrains de se defendre de toutes parts, tellemēt qu'ils n'auoyent pas loisir de courir çà où là, les marchans cinglent à toutes voiles, & les vns gaignent le haure de Calecut, les autres prennent telle route que bon leur sembloit. Les autres nauires resistoyent vaillamment à coups de canon, de traits, & en chocquant contre celles des Portugallois: & en plusieurs combatoient main à main avecques picques & cineterres. Quant aux Portugallois ils estoient fort presse:z pource qu'une de leurs nauires estoit enuironnée de plusieurs ennemies. Les vns & les autres firent merueilleux deuoir assez longue espace; mais finalement les Calecutiens furent desfaits & contrains de gaigner le haut. Ils y perdirent trois mille hommes, & dix nauires avec plusieurs brigantins mis en fond, deux enseignes & neuf grandes nauires prinse, avec vn fort riche butin. Les Portugallois ne perdirent en ceste bataille que six hommes.

APRES vn si heureux exploit, Laurent alla surgir en Cananor, où il fut receilli du Roy, avec grands signes de resiouissance, & merueilleux esbahissement de sa vertu. En ces entrefaites, Zabajo Prince de Goa ayant entendu que le Roy de Calecut auoit équipé vne grosse flotte, & que les Portugallois auoyent fait voile de la forteresse d'Anchediue pour combatre ceste flotte, il ne voulut pas perdre ceste occasion de bien faire ses besongnes, ce lui sembloit. Ainsi donc, par l'auis d'un certain Portugallois qui auoit abiuré le Christianisme & estoit du nombre des bannis qui auoyent esté condampnez à mort, & deliurez à condition de descouurir les terres inconues, il enuoya vne armee de soixante voiles en Anchediue, pour s'emparer de la forteresse, & establir ce Portugallois general des nauires. Icelui s'appelloit Antoine Fernand, charpentier de son estat, & qui seruoit aux Portugallois à calfeutrer & refaire leurs vaisseaux. En quittant la religion il auoit changé de nom, & s'appelloit Abedella. Estât approché d'Anchediue, il resolut d'assiéger la forteresse. Manuel Pazagne qui commandoit dedans,

dedans, garda si bien la place que les assaillans n'y gaignerēt que des coups: au moyen dequoy ce mal-heureux fut cōtraint de leuer le siege, & reprint la route de Goa avec sa courte honte & grande perte d'hommes. Toutefois Almeida voyant que ceste forteresse ne seruoit de rien, & que lon ne tiroit ni pouuoit tirer aucū reuenu de l'isle, à cause qu'elle estoit trop loin de Cochim, sinon qu'on voulust employer beaucoup d'argent, & y hazarder des soldats: item, qu'il n'auoit pas nombre d'hommes, & n'estoit besoïn les escarter, par l'auis de tous ses capitaines il fit ruiner ceste forteresse, & enuoya pour cest effect son fils en Auchediuë, lequel, suivant la commission à lui donnee, chargea dedans les nauires Pazagne & ses soldats: puis ayant fait raser la forteresse se retira en Cochim.

23. P R E S Q U E S au mesme temps que ces choses se faisoient en Iude, le Roy Philippe fils de l'Empereur Maximilian, gendre de Fernand & d'Isabelle, passa de Flandres en Espagne. Il auoit espousé Ieanne fille de Fernand & d'Isabelle, qui estoit heritiere de l'Espagne apres la mort de Iean & d'une autre Isabelle mariee premierement à Alphonse fils du Roy Iean, & en secondes nopces à Emmanuel. Or Philippe & sa femme ayans entendu que la Roïne leur mere estoit decedee, s'embarquerent pour venir en Espagne, pour prendre possession du royaume. Emmanuel sachant qu'ils estoient en chemin, & ja paruenus à vn port du royaume de Gallice nommé Fin de terre, print occasion du parētage & voisinage d'enuoyer ses ambassadeurs leur faire la bien venue de leur heureuse arriuee en Espagne, promettāt de faire deuoir de bon frere en toutes choses qui concerneroyent leur dignité & contentement. Le chef de ceste ambassade estoit Iacques Lopes Seigneur d'Aluite, lequel fut honnorablement receu du Roy & de la Roïne, & emporta responce fort amiable & plaine d'offres de leur part. En la mesme saison Emmanuel entreprint vne chose digne de memoire eternelle, encores qu'il n'en vinst pas à bout comme il le desiroit. Voyant que les Princes Chrestiens estoient en grandes picques & sanglantes guerres les vns cōtre les autres, dont s'ensuiuiot la ruine de toutes choses: que la Chrestienté s'en alloit en pieces, les forces de l'Europe s'afoblissoient, & que de iout à autre les moyens des ennemis accroissoient à veue d'œil par la folie & fureur des Chrestiens: craignit que ce mal ne gaignast, & amenaist les affaires à vne irremediable confusion, si lon n'y mettoit ordre de bonne heure. Pensant à ces choses, il estoit angoissé aussi en son esprit de ce que les Mahumetistes occupoyent le Sainct sepulchre, & que les Princes Chrestiens ne s'en donnoient aucune peine. Or il estimoit que tous les maux dont la Chrestienté estoit agitée procedoyent de ceste nonchalance; & pensoit que la Religion violee par discord & trop grande lascheté, deuoit estre remise en honneur par force d'armes. Sur ces pensées il enuoya vers le Pape vn de ses conseillers nommé Edoard Galuam, Le sommaire de la legation fut tel qu'il s'ensuit. Les Princes Chrestiens s'entrebattent à qui aura tel ou tel pays, & mettent en danger toute la Chrestienté. Ce pendant le Turc & le Sultan d'Egypte se fortifient, & les affaires des Chrestiens diminueent. Nul de ces Princes ne pense à tel inconuenient, encores que leur de-

Estat d'Espagne & de Portugal: & les poursuites d'Emmanuel pour procurer la paix entre les Princes Chrestiens.

uoir fust, aux despens mesmes de leur vie, garantir les Chrestiens de la rage de leurs ennemis. Si l'ambition sollicitoit les Princes à faire la guerre, quel plus grand honneur sauroient-ils desirer qui fust comparable à celui des conquestes de la terre sainte? Si l'avarice les esguillonnoit, que ne iettēt-ils l'œil sur l'Asie & l'Egypte pays fertiles & pleins de grandes richesses? Ainsi dōc il supplioit le Pape au nom de Dieu, d'employer tout son esprit, ses pensées & affectious à oster le discord, establir vne paix asseuree, & inciter les Princes Chrestiens à racler du monde le nom & la memoire de Mahumet, afin de s'acquérir par tel moyen vn honneur & renom immortel. De sa part il offroit tous les moyēs de son royaume, & s'exposoit à tous dangers, voire de sa propre vie, pour l'execution d'une si belle entreprinse. Voila ce qu'Emmanuel pourchassoit par lettres & ambassades: mais il perdit ses peines, & n'obtint chose quelconque: car les Princes estoient comme forcenez, & à cause de leurs differens pensoient si peu au mal qui les menassoit d'ailleurs, que non seulement ils mespriserent ceste poursuite du Roy de Portugal, ains aussi s'en moquerent. En la mesme annee le Roy fit bastir vne forteresse en Afrique, hors le destroit de Gilbratar, en la coste Meridionale, afin que de là lon peust faire courses sur les Mores habitās en ces quartiers: & donna charge de la besongne à Jacques Azambuge, diligent, sage & vaillant personnage. Les Portugallois eurent beaucoup de peine à paracheuer ceste œuvre: car les Mores s'amassoient de toutes parts pour y donner empeschement, au moyen dequoy les Portugallois estoient contrains bastir d'une main, & combattre de l'autre.

Diuers deportemēts des Portugallois es Indes.

1507.

L'AN suiuant, que lon contoit mil cinq cens & sept, le Roy fit equipper 24. quatorze nauires, qui desmarerent du port de Lisbonne en diuers temps: car à mesure que l'une estoit armee & munie, incontinent elle haussait les voiles: toutesfois pas vne d'icelles n'arriua es Indes ceste annee là. Vn des capitaines nommé Vasque Gomeze d'Abrey estoit enuoyé pour commander en la forteresse de Zofala. Comme il costoyoit l'Ethiopie il commanda que la carauelle de Iean Chanoque voguast deuant pour monstrier la route aux autres: mais par la nonchalance de Chanoque ce vaisseau se rompit: toutesfois les gens gaignerent le bord. Vne partie d'iceux tomba es mains de quelques barbares, qui les retindrent prisonniers, & depuis furent rachetez par leurs compagnons voguans au long de ceste coste. Quāt à Roderic Soarez, qui auoit charge d'une nauire, il en rencontra vne qui venoit d'Arabie, en laquelle y auoit cinq cens personnes, auxquels il s'attacha, & finalement entra dedans, taillant en pieces tous les Sarasins. Trois autres nauires de Portugal perirent par la tourmente avec leurs pilotes & conducteurs. Celles qui estoient eschapees, gaignerent des rades propres pour hyuerner. Or quand lon conut en Inde qu'il ne venoit aucun secours de Portugal, les ennemis reprindrēt cœur, estimās auoir trouué les moyēs d'exterminer à ce coup le nom des Portugallois. Et pourtant ils admonnestent & exhortent le Roy de Calecut de ne laisser escouler l'occasion que les dieux lui presentoyent de faire vn acte digne de memoire. Les Augures & deuins prognostiquoyent qu'il obtiendrait vne grāde victoire ceste

annee

annee là: comme aussi les prestres & Brachmannes, pouffez (ce sembloit) par les oracles de leurs idoles, faisoient diuers rapports pour donner esperance au Roy de quelque heureux succès. Luy de sa part donnoit soigneusement ordre à tout ce qui estoit requis pour les affaires de la guerre. Le Viceroy Almèide entendoit par le menu toutes choses par le moyen de ses espions, & de gens qui se venoyent rendre à lui. Or afin de faire conoistre aux ennemis qu'il n'auoit besoin de nouveau secours, il arma promptemēt deux flottes, ordonnant l'une pour garder les nauires faisant voile de Cochim vers le Cap de Comori, & en icelle y auoit deux galleres, deux nauires de charge & vn brigantin, dont Manuel Pazagne fut general: l'autre pour asséurer toute ceste coste, où il y auoit onze nauires, desquelles Laurent son fils estoit general. En ceste flotte y auoit vn capitaine nommé Gonsalue Vascio de Goes qui ayant faute de viures, cingla vers Cananor pour trouuer du pain: puis reuint en diligence pour se ioinde à la flotte. En ceste route il rencontra vne nauire Arabesque venant de Cananor, laquelle il assaillit. Les Sarasins ne firent point de résistance, car ils se disoyent confederer, & en monstrerent lettres de Laurent Brittio gouverneur de la forteresse de Cananor: les choses estans ainsi reiglees depuis que les Portugallois ont commencé à bastir des citadelles es Indes, qu'il n'est loisible à personne de voguer sur l'Ocean Oriental s'il n'a passeport de quelque Portugallois capitaine de nauire, ou gouverneur de forteresse, lequel air premierement esprouué la fidelité de celui qui se veut embarquer, & lui donne certificat de confederation. Moyennant quoy celui qui le porte s'embarque & vogue seurement: autrement les Capitaines Portugallois peuuent arrester ces vaisseaux, piller tout, tuer ou rendre esclaves ceux qui sont dedans. Alors, comme les Arabes monstroyent leur sauf-conduit, en vertu duquel ils estoient montez sur mer, Gonsalue aueuglé d'auarice, ou guidé de passion cruelle & barbare, ou transporté de cholere cōtre ceste nation, commença à crier que ces lettres auoyent esté frauduleusement pratiquées, qu'il conoïssoit que ces passagers estoient ennemis des Chrestiens, & machinoient traistreusement & meschamment la ruine des Portugallois: & pourtant seroyent chastiez à cause de si mal-heureux actes. A l'instant il pille ceste nauire, fait couldre ces miserables dedās les voiles: & apres que le vaisseau fut vuide le fit percer à coups d'artillerie & couler en fond. Cest acte estoit non seulement inhumain, entrepris & meschamment executé en despit du droit des gens, contre toute raison & humanité: mais aussi il y auoit de la temerité & de la fureur en Gonsalue de faire ce coup en vn temps si dangereux. Veu que la domination des Portugallois n'auoit encores prins pied: & puis qu'ils n'auoyent pas grādes forces sur la mer, c'estoit raison qu'ils obtinssent par renom de fidelité & de douceur ce que la force des armes ne leur pouuoit donner. Car puis qu'il n'y-a plus seur appuy de nostre vie que la foy, c'estoit lors qu'il falloit fonder en la reputation de preud'homme & integrité la puissance que lon ne pouuoit acquerir autrement, attendu que les forces n'estoyent pas suffisantes. Et comme l'excellent nom de fidelité & benignité attire doucement les cœurs de tous

Droit que les Portugallois se soient attribué, & comme l'on de leurs Capitaines en use.

hommes : au contraire la desloyauté infame allume haine , desir de vengeance, & cruauté. Ce qui n'apparut que trop par effect en ce temps là : d'autant qu'un tel acte fit que les Indiens commencerent à s'enuenimer contre les Portugallois. Quant à Almeida, il en fut fort indigné, de voir la Gonsalve de son estat de capitaine, & depuis ce iour ne lui monstra plus bon visage.

*Entreprises
du Roy de Cananor contre les
Portugallois,
& des parties
lointaines, notables
survenues
en la guerre
qu'il leur fit.*

En ce temps le Roy de Cananor estoit decedé, au lieu duquel succeda 25.
un autre qui haïssoit mortellement les Portugallois : car il estoit paruenue à ceste dignité par le moyen du Roy de Calecut. Il y auoit en Cananor un Arabe nommé Mameles, le plus appaqué & riche de tous ceux de sa nation habitans en ces quartiers là. Or le pilote de la nauiue que Gonsalve de Goëz auoit enfondree estoit son neueu. Icelui voyant sa marchandise pillée, le vaisseau perdu, son parent cruellement noyé avec les autres, outré de douleur il s'en va trouuer Laurent Britio, & comméce à se plaindre tout haut du tort qui lui estoit fait. Tu nous as trahis, lui dit-il, tu nous as trompez : c'est par ta perfidie & meschanceté que j'ay perdu ma nauiue, mes biens & mon neueu. Autrement, si ton certificat eust esté escrit & dressé de bonne foy, comment se fust-il peu faire qu'un Portugallois, capitaine de nauiue, nous eust si cruellement traitez, & fait un tel outrage à si grand nombre de nos compagnons ? Là dessus Britio iura qu'il n'y auoit point de fraude de son costé. Mais l'Arabe ne se contentant de cela, tout espleuré & ardent de cholere, s'en alla presenter au Roy, accompagné des femmes, enfans & parents de ceux qui auoyent esté si cruellement mis à mort. Lors ils commencerent avec grands cris, les mains tendues vers le Roy, à lui demander iustice, & le supplier de faire vengeance des maux commis par ceste meschante nation de Portugal. Lui monstra qu'il vouloit accorder leur requeste : & lors tira à part Mameles, auquel il fit entendre que ce lui seroit chose fort agreable, si Mameles & les siens trouuoient moyen d'attraper les Portugallois afin de les chastier. Incontinent Mameles escriuit aux Arabes qui trafiquoyent en Calecut lettres par lesquelles il les auertissoit de cest outrage. Eux en font le rapport au Roy, lequel tout sur l'heure despescha homme expres vers le Roy de Cananor pour l'enflammer à la guerre, & lui promettre de sa part aide & secours pour opprimer les Portugallois, desquels ils pourroyent nettoier les Indes, s'ils ioignoyent leurs forces ensemble. Le Roy de Cananor ayant receu ce message, tourna toutes ses pensées à trouuer les moyens de ruiner ses ennemis : & premierement il tint son entreprise fort secrette. Cependant il fit creuser un large fossé depuis un des bouts du riuage iusques à l'autre : ce fossé separant la ville d'avec la forteresse assise en un coing entourné de la mer. Il faignoit faire cela pour la fortification de la ville. Or assez pres de la forteresse y auoit un puis, duquel les Portugallois puisoyent de l'eau pour leur usage. L'ennemi faisoit son conte de leur boucher & oster ceste commodité : car du fossé iusques au puis y auoit une sente fort estroite, que le Roy vouloit munir de boulevards & bastions, afin d'empescher les Portugallois d'en approcher, & les faire mourir de soif. Ceste deliberation fut decelee à Laurent Britio gouuerneur de la forteresse par le Prince qui deuoit succeder au royaume, lequel

quel fit entendre aussi qu'outre les autres provisions de guerre le Roy de Calecut auoit secrettemēt enuoyé à celui de Cananor vingt quatre pieces d'artillerie pour battre la forteresse, & promis d'enuoyer trente mil hommes au secours. Laurent remercia le Prince, promettāt de faire que ce bon seruiue seroit deuēment reconu. Et pourtāt il retint ses gens pres de soy, de peur qu'au danger de leurs personnes ils ne s'allassent pourmener en vne ville ennemie. Puis il enuoya messāger vers Almeide pour l'auertir du danger auquel lui & les siens estoient. Almeide enuoya son fils pour munir la forteresse de viures, d'armes & de soldats, à ce que lon peult soustenir vn siege plus aisément : ce qui fut diligemment executé. Brittio voyant que si lon bouschoit le passage du puis, il faudroit mourir de soif, fortifia d'vn fossé & d'vn boulevard l'entre-deux de terre depuis la forteresse iusques au puis, & enferma les deux riuages en ceste fortification. En apres il dressa vn pôt de bois pour aller du boulevard au puis : & dressa diuers bastions, sur lesquels furēt disposez quelques fauconneaux pour repousser l'ennemi, s'il vouloit empeschier qu'on puisast de l'eau.

Le Roy voyant cela conut que ses embusches estoient descouuertes, à cause dequoy estimant que dissimuler plus long temps c'estoit perdre sa peine, il resolut d'assaillir la forteresse. Il auoit lors en son armee quarante mil hommes, partie de ses suiets, partie de ceux qui estoient ja venus de Calecut. Ainsy donc il rangea ses troupes, & en vn instant vint pour se rendre maistre du boulevard. Les Portugallois soustindrēt la charge vaillamment. Mais le fort de la meslee estoit pour l'eau : les vns taschans oster du tout ceste commodité, les autres s'exposans à tout hazards pour s'en conseruer l'vsage. Voila comme ceux qui desiroient boire de l'eau estoient contrains l'acheter au pris de leur sang. Or par l'auis d'vn excellent ingenieux, nommé Thomas Fernand, les Portugallois minerent de dessous la forteresse iusques au puis : ce qui fut fait avec si peu de bruit, que iamais les ennemis ne s'en apperceurent. En apres, vn peu au dessus de la porte de ceste mine se venant rendre au milieu du puis, il assit des soliveaux, & les recourrit d'autres en trauers, & mit dessus diuers materiaux qui cachoyent tellement l'eau que les ennemis n'y pouuoient ietter de la poison. En apres, ayant rompu la gueule du puis par enhaut, il amassa force terre dessus, afin q'lon ne peust tirer les materiaux qui couuroyēt les pieces de bois. Par tel moyen ceux de la forteresse auoyent de l'eau à commandemēt en despit de leurs ennemis. Le Roy se voyant frustré de ceste esperance delibera d'assaillir le boulevard plus viuemēt qu'il n'auoit encores fait. Mais dautāt qu'il y perdoit beaucoup d'hommes, afin de besongner au plus seur, il fit emplir des grands sacs de laine & d'autres matieres pour les opposer aux coups de canon. Tandis qu'on trauailloit à cela, son camp se tira plus loin, & defendit à ses gens de dōner assaut. Brittio conoissant qu'il y auoit quelque nouuelle deliberation, s'auisa d'vn moyen pour la descouurir. Par son cōmandement vn charpentier dressa vn piege pres du boulevard du costé qui regardoit la porte, & le couurit de terre & matiere legere. Incontinent Brittio fit sortir quarante soldats avec semblant d'aller vers la ville. Estans

Guerre mouerte entre le Roy de Cananor & les Portugallois, avec diuers stratagemes.

descouuerts ils furent chargez par les ennemis : lors ils se retirent au pas, ce qui donna occasion aux autres de pourſuiure : tellement que leur capitaine marchant le premier tomba dedans le piege. Quoy fait les Portugallois commencent à tourner viſage & combattre vaillamment : puis il en ſort d'autres du ruelin qui ſe ioignent à eux, & repouſſent les ennemis eſtonnez de ceſt accident inopiné, les chasſent aſſez loin, & à leur retraite deſpeſtrent du piege leur prifonnier, & l'ameinēt à Brittio, lequel entendit de lui l'occaſiō pourquoy la guerre ceſſoit. Dauātage le Prince qui deuoit ſucceder au Roy deſcouurit l'intention d'icelui, par vn de ſes gens qu'il enuoya en la fortereſſe dedās vn eſquif chargé de viures. Cela fit que les Portugallois ſe preparerent à ſouſtenir l'aſſaut.

APRES que le Roy euſt donné ordre à ce qui eſtoit requis pour aſſailir, ſoudain il diſpoſa ſes troupes en l'ordre que ſ'enſuit. Premièrement les ſçes eſtoyēt tellemēt rangez, qu'ils ſeruoient cōme de boulevard à ce que les ſoldats peuſſent ſeulement approcher de celui des Portugallois. En apres marchoit vn bataillon compoſé d'archers, de harquebouziers & autres equippez de diuerſes ſortes d'armes. Le Roy eſtoit en l'arriere-garde avec la plus groſſe & meilleure troupe. Combien que l'artillerie de la fortereſſe vomit des boulets de fer & de pierre fort gros, cela ne nuifoit de rien aux ennemis, à cauſe des balles de laine qui rompoient le coup. Ce qui donna tel courage aux aſſaillans que penſans auoir ja le deſſus ils commencerent à crier de ioye. Le iour ſuiuant, l'aſſaut fut plus impetueux que deuant : & lors il ſouuint à Brittio de ſ'aider d'vne piece laquelle eſtoit iuſques lors demeurée inutile, & qu'il ſauoit de laſcher de plus grāde roideur que les autres. Le canonnier y ayant mis le feu elle tranſperça les balles, & apres quelques coups eſparpilla tout ce qui eſtoit au deuant. Ainſi les groſſes pieces venans à donner à trauers les ennemis deſcouuerts, avec vne ſcopeterie continuelle, il y eut grand meurtre d'hommes. La nuit ſuiuante vn gentil-homme Caſtillan, nommé Guadilaire, demanda à Brittio qu'il lui permiſt de choiſir cent cinquante hommes, pour aller donner l'alarme aux ennemis. Ce que lui ayant eſté accordé, ſur les trois heures apres minuit, le temps eſtāt fort pluuiex & couuert, lui & les ſiens viennent aſſailir le camp qui ne penſoit à rien moins qu'à cela, à cauſe du petit nombre des aſſiegez, & au ſon des trompettes & hucées de toutes parts donnent l'alarme fort chaude, eſgorgent quelques vns des plus endormis, ſaccagent d'autres à demi eſueillez, & mettent le reſte en fuite. S'eſtans rendus maîtres du camp ſur le point du iour, ils emmenent vn grand butin dedans la fortereſſe. Mais ceſt heureux exploit fut diſformé par vne meſauenture qui ſuruint toſt apres. Il y auoit ioignant la fortereſſe pluſieurs maiſons que les ſoldats aſſiegez garantiſſoyent des courſes & aſſaux des ennemis. Lon auoit ferré en icelles force marchandises, meubles precieux, & des viures dont les ſoldats eſtoyent nourris durant le ſiege. Auint, par la nonchalance d'vn goujat qui ſ'allāt coucher laiffa la chandelle allumee, que ceſte chandelle tomba ſur quelque matiere ſeiche, laquelle print le feu incontinent & embrāſa la maiſon. Or pource qu'icelle & toutes les autres eſtoyent de
bois,

bois, couuertes de fucilles de palmier, & proches les vnes des autres, elles furent toutes bruslees: ce qui fut cause d'une grãde perte, dont Brittiotoutesfois ne se fãchoit pas tant que de la disette de viures, lesquels le feu auoit consumez pour la plupart: & n'y auoit pas esperance, que durant l'hiver on peust auicquailier la forteresse d'ailleurs.

COMME donc la faim pressoit les Portugallois, premierement ils se ruèrent sur les chats, puis sur les rats & laizards. Brittio estimant qu'il falloit se hazarder en quelque façon, fit sortir vn sien parent avec trente soldats des plus resolos, pour surprendre l'ennemi, & voir s'il y auroit point moyen d'enleuer quelques viures du camp qui estoit assez mal gardé. Mais les ennemis qui estoient au guet blessèrent plusieurs de ces soldats, entre autres le parent de Brittio qui receut quelques coups en la face & aux cuisses, tellement qu'il ne pouuoit marcher, & ne s'en salut rien qu'il ne demeurast prisonnier: mais par la vaillance d'un ieune soldat aagé de vingt cinq ans, nommé Iean Gregoire, il fut retiré du milieu des ennemis, & ramené en la forteresse. Quatre Portugallois furent tuez en ceste escarmouche. Ce pendant le Roy fut auerti par quelques esclauues, qui s'estoyent sauuez de la forteresse, que la famine assailloit de pres les assiegez: pourtãt estima-il que le temps de venir à bout de ses desseins approchoit, & falloit s'aider de l'occasion presente. Et sur ce il dressa vne embusche en lieu assez propre, & fit chasser deux vaches assez pres du ruelin. Les assiegez voyãs ceste proye sortent à l'instant sans congé d'autre capitaine que de la faim qui leur commandoit: & lors ils se virent assaillis de ceux qui estoient cachez. Neantmoins ils resisterent si courageusement qu'auant que plus grand nombre d'ennemis peust arriuer, maugré ceux qui les enuironnoyent, ils emmenerent les deux vaches, & s'entretindrẽt de la chair d'icelles l'espace de quelques iours, en fin desquels il falloit se rendre ou mourir de faim. Mais en ceste extremité Dieu les secourut miraculeusement: car la mer commença à estre tourmentee, & poussa au riuage vn nombre infini de petis poissons nommez sauterelles de mer, dont les Portugallois rassasierent leur faim, & les malades entr'eux commencerent à se refaire. Et par ce moyen ils soustindrent le siege tout au long de l'hiver.

Famine entre les Portugallois.

LE prin-temps approchant, on attendoit secours si tost que la mer seroit nauigable: ce que sachant bien le Roy de Cananor, il delibera employer toutes ses forces pour se rendre maistre du boulevard & de la forteresse, auant que le secours fust arriué de Cochim. Pourtant il arma bon nombre de vaisseaux, & fit dresser sur quelques vns d'iceux deux tourelles semblables à celles dont le Roy de Calecut s'estoit aidé contre Pacheco. Le Prince de Cananor auertit incontinent Brittio de tout cest appareil, & l'admonnesta de bien prendre garde à la forteresse du costé de la mer. Alors le Roy auoit en son armee cinquante mil hommes, tãt de ses suiets, que de gens amassez d'ailleurs. Tout son equippage estant prest, voulant assaillir les Portugallois par mer & par terre, aussi en mesme temps ses vaisseaux voguerent contre la fortetesse, & les grosses troupes qui estoient en campagne marcherent droit au boulevard. Mais ils furent repoussez de

L'issue de la guerre entre les Portugallois & le Roy de Cananor.

tous les deux costez avec grand' perte de vaisseaux & d'hommes. La merlee fut sanglante, & dura depuis le leuer iusques au coucher du Soléil : en quoy Dieu se monstra manifestement fauorable aux Portugallois, qui ne perdirét pas vn des leurs, & au cōtraire firent mourir vn merueilleux nombre d'ennemis. Le lendemain Britio fit trainer la pluspart de l'artillerie disposée en la forteresse sur le boulevard, & de là commença vne furieuse batterie dans la ville. Plusieurs maisons en furent ruinees, notamment vne mosquee où plusieurs Mahumetistes s'estoyent assemblez pour supplier leur faux prophete de venir au secours. Or les habitans & les estrangers qui estoyent en Cananor se donnerent telle frayeur, que tous importunerent le Roy de traiter quelque accord avec les Portugallois : autrement ils deslogeroient tous arriere de là. Ce qui les sollicita encor dauantage fut l'arriuee des nauires desquelles Tristan de Cugne estoit general, qui lors approchoit pour secourir les assiegez, s'ils eussent esté en plus grand danger. Ainsi donc la paix fut faite sous certaines

conditions, & moyennant que le Viceroy Almeida les voulust ratifier. Quant à ce que Tristan de Cugne fit en son voyage auant qu'aborder en Cananor, nous en ferons mention ci apres.



FIN DV QVATRIESME LIVRE.





L E CINQVIESME LIVRE.

SOMMAIRE.

1. *Estas d'Afrique & les choses memorables antiques en la ville de Safin entre les Portugallois, & les Indes.*
2. *Asaires de Portugal: embarquement de quelques Portugallois pour aller es Indes, & leurs aventures.*
3. *Nauigation & divers accidens de Tristau de Cugne, particulièrement en l'isle de saint Laurent.*
4. *Description de ceste isle appellee par ceux du pays, Madagascar.*
5. *Continuation du voyage de Tristau de Cugne, & quelques exploits de guerre.*
6. *Arrivee de Tristau de Cugne en l'isle de Zaccaria: des Chrestiens qui y habitent & de leurs mœurs, ensemble la guerre que Tristau y fit pour les deliurer de seruitude.*
7. *Bataille navale entre François Almeida & les Calcutiens: l'embarquement de Panane, & le retour de Tristau de Cugne en Portugal.*
8. *Armee de mer de Campson, Sultan d'Egypte, contre les Portugallois: & de leur rencontre au port de Chaul.*
9. *Desfaite des Portugallois par la flotte du Roy de*

- Cabac jointe avec celle du Sultan d'Egypte: la mort de Lourenço Almeida avec plusieurs autres.*
10. *Guerre d'Azamor en Afrique, & les divers accidens d'icelle.*
11. *Supp. d'Arzile prise par les Mores, le chasteau assiege & secouru, & Arzile reprise par les Portugallois, avec diverses particularitez.*
12. *Diligence du Roy de Portugal à pourvoir aux affaires d'Afrique, & quel conseil on donna sur la poursuite de la guerre en ce quartier.*
13. *Destruccion de l'isle & de la valle d'Ormau: des mœurs des habitants, & de la puissance de ce royaume.*
14. *Divers exploits de guerre d'Alfonse Albuquerque contre plusieurs ports de mer appartenans au Roy d'Ormau.*
15. *Negociation d'Albuquerque avec le Roy d'Ormau: la guerre & sanglante bataille qui s'en ensuyvit.*
16. *Ambassade du Roy d'Ormau vers Albuquerque pour avoir la paix, laquelle est finalement accordee, & une citadelle bastie par les Portugallois en Ormau.*

1. **AND** IS qu'on se battoit ainsi es Indes, les affaires d'Afrique estoient en l'estat qui s'ensuit. Il y a vne ville en Barbarie nommee Safin, assize delà le destroit de Gibraltar vers le Midi, & qui est au bord de l'Ocean Atlantique. Elle estoit lors fort grãde, riche & marchande. Le pays est fertile, abondant en fruits & en bestail. Ceste ville a esté long temps sujette au Roy de Marroc qui dominoit sur la plupart de Barbarie. Mais finalement certains gentils-hommes, sur-nommez les Farhoms, se reuolterent, & par le moyen de leurs richesses & de la faueur du peuple se firent seigneurs de ceste ville. Finalement vn des principaux de ceste maison nommé Abdear Rhaman, homme de grand cœur & extrêmement ambitieux, desirant estre maistre, fit mourir meschamment vn sien oncle nommé Hamedie, le plus riche & puissant de tout leur lignage. Puis, sous ombre de liberalité & de gracieuseté, gaigna si bien le cœur du peuple, qu'il se conserva aisément la

Choses memorables antiques à Safin en Barbarie.

domination en ceste cité. Or il auoit vne belle fille, aimée par vn beau ieune gentil-homme nommé Haliadux, lequel iouissoit d'elle, du consentement de la mere. Rhaman ayant ouy quelque bruit de ceste hantise, fut griefuement picqué d'un tel opprobre fait à sa maison, & delibera de tuer le ieune homme: dont la mere & la fille se doutans l'en auertirent. Haliadux voulant preuenir Rhaman machina de le faire mourir: & ayant communiqué son entreprinse à vn sien ami, appelé Iehabentafuf, en la fidelité & prouesse duquel il se confioit, la resolution fut d'executer au plus tost qu'il seroit possible. Or vn iour de feste solennelle entre les Mores, Rhaman s'en alla en leur mosquee, & enuoya semondre Haliadux de se trouver aux ceremonies qui s'y faisoient: adioustant qu'apres icelles il auoit à lui communiquer chose de grande importance. Haliadux entendit bien par tel message que l'heure estoit venue qu'il falloit tuer Rhaman, ou estre tué de lui. Ainsi donc il appelle Iehabentafuf, & eux deux acompagnez de dix des plus vaillans de leurs parens & domestiques vont droit en la mosquee, & y massacrent Rhaman. Ceux qui estoient venus là avecques Rhaman commencent à se remuer pour courir sus aux autres: mais voyans douze gentils-hommes bien resolu, ayans les glaiues desgainez & prests à charger: estimans aussi que le peuple fauorisast vne si hardie entreprinse, & que leur chef estant atterré ils n'auroient aucun support ni secours, à l'instant ils s'enfuyent hors de la mosquee. Mais Haliadux & Iehabentafuf se transportent sur la place de la ville, & ayans fait venir le peuple, Haliadux fit vne harangue, en laquelle il monstra auoir eu iuste occasion de tuer le tyran qui machinoit sa mort: & que ceux de la ville lui estoient grandement tenus, en ce qu'il les auoit deliurez d'un meschant parricide: pource que de là en auant leurs affaires floriroyent beaucoup plus sous vne domination gracieuse & moderee. Lors du consentement du peuple (comme cela est ordinaire à gens legers & volages, de se laisser mener comme on veut) Haliadux & Iehabentafuf furent esleus seigneurs & gouuerneurs de la ville.

*Ce qui auant
apres la mort
de Rhaman
seigneur de
Safin.*

EN ce temps, Iacques Azambuge (duquel a esté parlé au liure precedé) commandoit en la forteresse par lui bastie, suiuant le commandement du Roy Emmanuel, assez pres de Safin. Tandis que les affaires estoient ainsi troubles & confuses en la ville, treze Espagnols qui y estoient prisonniers trouuent moyen de gagner vn esquip, & se sauuent vers Azambuge auquel ils font entendre ce que dessus. Deux iours apres, Haliadux voyant que les parens & amis de Rhaman, qui auoyent grand credit en la ville, machinoient la ruine de lui & de ses compagnons, alla trouuer Azambuge, l'exhortant d'empoigner l'occasion que Dieu lui presentoit: que de sa part il feroit que la ville receuroit volôtiers le Roy de Portugal pour seigneur: & que ce pendant il estoit besoin que ceux qui auoyent ceste volonté fussent soutenus des Portugallois pour resister aux pratiques de leurs ennemis. Combien qu'Azambuge conust tresbien la perfidie de ceste nation, toutesfois voyant que parmi ces mutineries les affaires estoient en tel point qu'il estoit expedient de tenir promesse à Haliadux & à ses confederes, ne refusa

refusa point ceste condition. Et pourtant il entra dedans Safin avec douze gentils-hommes, où ayant sejourne huit iours, il proposa quelques conditions de paix, & fit alliance avec Haliadux & les siens au nom du Roy Emmanuel. Or il entendit sur ces entrefaites par le raport d'un Iuif nommé Abraham, qu'on lui dressoit quelque embuscche: ce qui le fit retirer en sa forteresse, mais quatre gentils-hommes Mores, dont Haliadux estoit le principal, allerent apres: & ce pendant Ichabentafuf demeura en la ville pour y commander. Par l'alliance il estoit dit que les Mores assigneroyent à Azambuge vne place au quartier où la mer laue le pied des murailles de la ville, pour y bastir vne grande maison, & lui lairroyent vne tour aboutant aux murailles, & la porte qui regarde la mer, afin de rendre son logis plus spacieux & plus magnifique. Cela ainsi accordé, Azambuge fit voile en Portugal avec les quatre Mores susmentionnez, & fit entendre au Roy toute sa negociation, ensemble la grâdeur de la ville, & la commodité du lieu pour faire la guerre aux pays de terre ferme en Afrique. Le Roy fut fort content de ces nouvelles, & renuoya Azambuge en Barbarie: puis afin d'acheminer mieux ceste entreprinse, il enuoya lettres à Garsie Melio qui gardoit avec vne flotte de nauires le destroit de Gibraltar, pour empêcher la nauigation aux Mores, par lesquelles lui estoit commandé de se joindre avec Azambuge. Combien que Melio fust lors fort malade, toutesfois il executa promptement ce qui lui estoit enioint: & cingla iusques au port de Safin, où Azambuge estoit ia arriué: mais ils trouuerent tout changé. Car la ville estoit en armes, sans plus se soucier de l'accord précédent, & la populace disoit tout haut qu'elle ne s'assuiettiroit en sorte quelconque à la domination des Chrestiens: brief tout y estoit en troubles. Haliadux, lequel estoit lors de retour en la ville, & Ichabentafuf fermoient les yeux à vne telle perfidie, & sans plus se souuenir de l'alliance, conspiroyent ensemble contre les Portugallois.

ALORS Azambuge & Melio s'aussent de semer dextrement quelque discord entre Haliadux & Ichabentafuf, afin qu'ayât desioint leurs forces, eux peussent plus aisément se rendre maistres de la place. Le moyen d'excuter ce stratageme fut tel. Melio estoit tousiours malade: & pourtât il enuoya querir vn medecin Iuif en la ville pour le venir p̄ser. Ils corrompirent ce Iuif à force d'argent, & lui persuaderent de porter lettres aux deux gouuerneurs, en telle sorte que l'un ne peust sentir qu'on eust escrit à l'autre. Elles estoient escrites de la part de Melio, lequel en celles enuoyees à Haliadux l'admonnestoit de se tenir sur ses gardes: pource que lui sauoit de bonne part qu'il estoit en grand danger de sa vie. Pour obuier à vn tel inconuenient, Melio promettoit de s'employer, assurant l'autre qu'il estoit prest à lui faire seruiçe: & ce pendant l'aduertissoit qu'il n'y auoit embuscches qu'il deust redouter dauantage, que celles qui lui estoient dressées à cause qu'il estoit compagnon d'un autre en ce gouvernement. Car puis que iamais ceste association n'auoit esté ferme & fidele, il seroit tant plus aisément ruiné, que ceux avec lesquels il estoit ioint en charge n'estoyent point soupçonnez ni redoutez par lui. Autant en escriuit-on à Ichabentafuf, en l'ex-

*Stratageme
des Portuga-
lois pour se ren-
dre maistres
de Safin.*

hoyant d'asseurer sa vie contre les pratiques & menees d'Haliadux. Toutes & quâtes fois que le medecin venoit voir Melio, il mettoit la main dessous la couuerture du lietz, comme pour taster si la yehemence de la fievre estoit point moderee: & là prenoit les lettres, à ce que personne ne peust rien descouurir de ceste fourbe. D'autre costé Haliadux & Ichabentafuf, au desceu l'un de l'autre remercioyent affectueusement Melio, promettans se soumettre au Roy de Portugal: & le supplians instamment de ne permettre que l'un ruinaist ainsi l'autre. Ceste partie subtilement dressée contre la plus cauteleuse nation du monde, fit que chascun des deux gouverneurs se desiant l'un de l'autre, estima que pour se maintenir contre son compagnon il se falloit fortifier du secours des Portugallois. L'un & l'autre donc, au desceu de son compagnon, prie Azambuge & Melio de venir en la ville, les asseurant que bien tost il la mettra es mains du Roy Emmanuel. Cela fit qu'eux acompagnez de cinquante soldats entrerent dedans Safin, & choisirēt pour leur demeure la maison de Rhaman, pource qu'elle sembloit spacieuse, forte, & plus pres de la mer que les autres maisons. Puis ils y firent apporter secrettement des armes de toutes sortes, enfermées en des coffres & tonneaux. Les Mores, qui ne sont pas seulement desloyaux, mais aussi fort soupçonneux, touchez de quelque sinistre opinion, ne pressumoyent rien de bon de toutes ces allées & venues des Portugallois: les deux gouverneurs commençoient à se repentir de leur legereté, & brasloyent secrettement, de telle sorte qu'il estoit aisé à voir qu'après tāt de desguisemens il y autoit des coups ruez. Azambuge fit incontinent entendre au Roy de Portugal comme les choses alloient, lequel sans delay leur enuoya un bon secours, ayant fait armer en diligence quatre nauires, desquelles Gonçalue Mendese de Zacote, gentil-homme qui auoit hanté toute sa vie les guerres d'Afrique, eut la charge. Icelui estant venu surgir au port de Safin, entendit qu'Azambuge & Melio estoient reduits en grandes difficultez par l'artifice des Mores, lesquels au lieu de maintenir l'alliance, empeschoyēt la fortification d'Azambuge, denians outre ce qui estoit requis pour icelle les viures mesmes: & paroissoit en beaucoup de sortes qu'ils n'auoyent faute que de courage pour executer quelque meschanceté, attendu qu'ils estoient poussez d'une tres-mauuaise volonté. Quand les Portugallois se plaignoyent de l'un des gouverneurs, icelui en attribuoit toute la faute à son cōpagnon. Mais la venue de Zacote fortifia les Portugallois, & les fit aller & venir plus hardimēt par la ville. Alors ils declarerent aux gouverneurs, que lon n'endureroit plus qu'eux deux ensemble maniasent les affaires de la ville; attendu qu'ils ne s'accordoient pas bien ensemble, & que l'un complotoit cōtre l'autre. Qu'ils auisassent lequel d'eux deux gouverneroit la ville au nom du Roy Emmanuel. Haliadux & Ichabentafuf voyans que force estoit que l'un de eux quittaist la place, auiserent ensemble paisiblement au plus expedient: & avec une merueilleuse moderation (ce qui pourroit sembler incroyable à qui considerera leurs mœurs) l'un deseroit le gouvernement à l'autre. Finalement Haliadux obtint que Ichabentafuf demurerait gouverneur,

Q V A N D Iehabentafuf se vid fans competeur, il commença à machiner beaucoup plus hardiment contre les Portugallois, & talchoit par tous moyens d'empêcher la fortification d'Azambuge. Par ses menées nul n'osoit porter des pierres, de la chaux, ni autre matiere pour bastir: mésmes il menaçoit aigrement les ouuriers, secrettement quelques iours, puis apres tout ouuertement & avec audace. Ce qu'entendu par Azambuge il enuoya querir Haliadux (lequel il sauoit se repétir de sa modestie, en ce qu'il auoit laissé le gouuernement à son compagnon) & l'admonnesta d'amasser quelque troupe de ses gens, assaillir à l'improuiste Iehabentafuf, & lui couper la gorge: promettant de le secourir s'il estoit besoin, & faire que le gouuernement de la ville reuiendroit à lui seul. Iehabentafuf se voyant en danger à cause des forces qu'auoit Haliadux qui le cherchoit, & ignorant que cela se maniait par l'auis d'Azambuge, s'enfuit en la maison de Rhaman, où lon bastissoit la citadelle. Jacques Mirande petit fils d'Azambuge, demouroit lors en ceste maison, & ne sachant pas aussi que Iehabentafuf eust esté poussé en ceste extremité par les menées de son ayeul, le receut en sa sauuegarde, & le garentit de la main de son ennemi. Azambuge estoit delibéré de faire mourir Iehabentafuf: mais ce More (homme de grand esprit, & qui auoit la parole à commandement) ayant proposé plusieurs raisons pour monstrier qu'il n'estoit nullement expedient pour le bien des affaires du Roy Emmanuel, qu'on lui ostant la vie pour lors, obtint congé d'Azambuge pour aller en Portugal, afin de se liurer soy-mesme es mains du Roy, s'obliger estroittement à lui par vne bonne alliance, que iusques à la mort il s'employeroit fidelement pour l'auancement de la dignité & grandeur d'icelui. Que si le Roy ne vouloit accorder cela, lors il seroit en sa puissance d'ordonner de quel supplice on lui feroit finir ses iours. Finalement il obtint d'Azambuge, qu'on le meneroit prisonnier en Portugal, où il obtint pardon du Roy, lequel lui donna vne compagnie de cheuaux legers pour faire la guerre autour de Safin. Ceste douteur & gracieuseté du Roy gagna tellement le cœur de Iehabentafuf, que depuis il fit de grands seruices en la guerre: & se porta tellement qu'on apperceut tousiours qu'il auoit la foy & l'honneur en recommandation.

Q V A N T à Haliadux, auquel Azambuge auoit laissé le gouuernement de Safin, il se porta tout autrement en ceste charge que lon n'auoit estimé, & s'opposoit plus insolemment aux Portugallois que n'auoit fait Iehabentafuf. Ce à quoy il s'estudioit le plus, estoit d'empêcher le paracheuement de la citadelle. Il en destournoit les charpétiers & massons par grosses menasses, defendant à peine de grief supplice d'y porter aucune matiere, & monstroir tout ouuertement sa mauuaise volonté. Toutesfois l'œuvre s'auançoit peu à peu. Ce pendant Azambuge nioit qu'il bastist vne citadelle: c'est seulement (dit-il) vne grande maison que ie fay bastir, afin que les marchans Chrestiens y puissent retirer commodément leurs marchandises. Il auoit bousché de terre & d'autre matiere les fenestres où se deuoyent placer les pieces de batterie, & auoit enduit le dessus avec de la chaux, afin que les ennemis ne peussent descouurir ses desseins. Outre-plus de nuit il fit per-

*Ruses de Iehabentafuf gou-
uerneur de Sa-
fin contre les
Portugallois,
& quelle en
fut l'issue.*

*Departement
de Haliadux
enuers les Por-
tugallois, &
de ce qui en
auint.*

cer la muraille, afin que ceux qui estoient es nauires peussent entrer aisément en la forteresse: puis il fit deux leuees de terre de costé & d'autre pour fortifier le passage du chemin iusques à ceste ouuerture. Au reste, la citadelle estoit ja en defense, & fort haute & leuee. Le lendemain Azambuge enuoya homme expres vers Haliadux, se plaindre, de ce qu'au lieu de garder l'alliance il violoit meschamment sa foy, & ne tenoit aucun compte de son serment: attendu qu'il auoit iuré sur l'Alcoran de Mahumet de fournir liberalement & suffisamment tout ce qui estoit necessaire pour le bastiment de la maison: qu'au lieu de tenir promesse, il monstroït par effect vne haine violente & cruelle. Il le prioit donc de garder sa foy, de craindre Dieu, & pour son honneur entre les hommes se deporter de mal faire. Haliadux respond qu'il s'esbahissoit fort de la folie d'Azambuge, qui ne considere pas que les viures lui defaudoient incontinent, si le gouuerneur de Safin ne lui en donne: & nonobstant il faisoit du braue, autant que s'il auoit abondance de tout ce qui estoit requis pour l'entretienement de lui & des siens. Azambuge replica à cela, qu'il estoit fort aisé aux Portugallois de souler leur faim & rassasier leur soif de la chair & du sang de leurs ennemis. Haliadux oyant ce propos mordit son doigt, qui est vn signe entre ces peuples de quelque horrible vengeance qu'ils deliberent faire: aussi qu'ad Azambuge en entédit les nouvelles, il conut que l'affaire ne demandoit plus de delay, autrement Haliadux assembleroit grosse troupe des lieux d'alentour, auxquels il seroit impossible faire teste. Mais afin qu'il ne semblast fauçon la foy promise, s'il commençoit la meslee, il s'auisa du stratageme qui s'ensuit.

*De quel moyē
s'aida Azam-
buge pour a-
uoir occisi de
mettre en tren-
bie & subuer-
guer ceux de
Safin.*

Vn certain More, boucher de son estat, auoit en plaine boucherie donné vn soufflet à quelque Portugallois de la maison du Roy. Cest homme s'estant plaint à Azambuge du tort à lui fait, fut pour l'heure exhorté de patienter, attendu qu'il n'estoit pas temps d'en quereler. Or ayant receu de Haliadux vne response si audacieuse, il appella ce Portugallois, & lui conseilla de tuer le More qui l'auoit souffleté: & pour faire ce coup plus promptement il lui bailla pour compagnon l'un de ses seruiteurs. Ces deux s'en vont de ce pas en la place de Safin, où ils rencontrent le More, & le despeschent à coups d'espee. Incontinent on commence à s'esmouuoir & crier au meurtre & à l'arme. Les Mores s'amassent de tous costez, & assaillent les deux Portugallois qui se defendent vaillamment, & en reculant peu à peu gagnent finalement à toute peine leur citadelle. Azambuge ne voulut permettre à pas vn des siens de sortir. Sur ce les Mores enuironnent la citadelle, & taschent à coups de dards, de jaelots & autres traits d'endommager ceux de dedans. Finalement ils amènent quelques pieces, & commencent à battre la place. Quant aux Portugallois ils estoient en armes, & se tenoient sur leurs gardes, sans toutesfois tirer aucun coup: car Azambuge leur auoit expressement commandé de se tenir cois. Toute la nuit les ennemis firent leur possible de forcer la citadelle: mais ils perdirent leur temps. Si tost que le iour apparut, il ordonna à tous de se recômander humblement à Dieu, puis il exhorta ses gens d'auoir bon cœur, & prendre leur repas.

Ayans

Ayans fait l'un & l'autre, il disposa ses troupes sans aucun bruit, & se fit amener un cheual blanc pour soy: car lui estoit ja fort vieil & boiteux, d'un coup receu en la cuisse au siege d'une ville nommee Alegret, que Iean second fils du Roy Alphonse assaillit durant la guerre d'Alphonse contre Fernad Roy de Castille & d'Arragon. Donques Azambuge fut seul à cheual ce jour là: ses capitaines & soldats combattirent à pied. Tout estant prest, Azambuge sortit enuiron midi, & donna un merueilleux alarme aux ennemis qui ne l'attendoyent pas, & ne pouuoient penser qu'une poignée d'hommes, qu'ils tenoyent pour demi-morts de peur, deussent se fourrer à trauers une si grande multitude d'ennemis. Pourtant ils reculent & se retirent en une mosquee, où ils furent viuement poursuiuis des Portugallois, & quelques uns tuez. Mais ayans reprins leurs esprits, le combat recommença: toutes fois pource que les Mores perdoient beaucoup de gens, ils se sauuerent de vifesse par une autre porte de ceste mosquee. Plusieurs s'enfermerent dans le chasteau de la ville, où ils tenoyent garnison, & de là endormagerent fort par le moyen d'une grosse piece de batterie la citadelle d'Azambuge. Ce qu'aperceuant un canonnier bien expert nommé Sebastian Roderic, il braqua vis à vis de ceste piece une des siennes, & visa si droit que la balle de la sienne donna dans la bouche de la piece des ennemis, & rompit icelle piece, & esmorcella celui qui la gouuernoit. En fin les Mores ne sachans plus de quel bras se defendre, gaignerent au pied, & Haliadux se retira en une ville nommee Targam. Ceux qui ne bougerent de Safin demanderent la paix à Azambuge, laquelle il leur accorda sous certaines conditions, & notamment d'un tribut annuel qu'il leur imposa. Or combien que le nombre des ennemis tuez fust incertain, si est-ce qu'il en demeura beaucoup en diuers endroits: les Portugallois n'ayans perdu qu'un seul homme de la maison d'Azambuge, lequel fut tué d'un coup de trait au pres de son maistre. Au reste, Melio & Azambuge ne s'accordoyent pas bien ensemble, car ils estoient de diuerse opinion sur les moyens de garder la ville de Safin: & leur different s'eschaufa de telle sorte, que Melio monta sur mer, & par despit reuint en Portugal, laissant Azambuge seul gouuerneur pour le Roy Emmanuel. Neantmoins apres la prinse d'icelle, les Mores demeurans par les villages ne cessoyent de faire des courses: mais l'auantage demouroit aux Portugallois qui leur donnoient tousiours la chasse. Voila comme par l'adresse & vaillance d'un petit nombre d'hommes fauorisez du bonheur d'Emmanuel, ceste ville riche, forte & bien pourueue de tout ce qui estoit requis pour la guerre, lui fut assuiettie. Presques au mesmes temps, & un peu auant la prinse de Safin, le Roy estât en la ville d'Abrantes, à cause de la peste de Lisbonne, la Royne Marie acoucha d'un fils le cinquiesme iour de Iuin l'an mil cinq cens & sept, lequel fut appellé Fernand, Prince de gentil esprit, fort curieux à rechercher les choses antiques, desireux de grandes entreprinse, & doué de plusieurs vertus seantes aux personnes de sa qualité: toutesfois il mourut en la fleur de sa ieunesse.

2. P O U R reuenir aux affaires des Indes, le Roy (qui ne pensoit presques à autre chose) fit equipper seize nauires pour y enuoyer. Il en bailla quatre à

*Afaires
Portugal*

Embarquement de quelques Capitaines

*nes Portugal-
lis pour aller
es Indes, &
leurs quantu-
res.*

1508.

Iacques Siqueire, lui commandant de faire voile iusques delà le Gange, voguer iusques en la Cherfonese d'or, auioird'hui nommee Malaca, & par quelques vns Iapan & Zipagri, & reconoistre l'assiette de Malaca ville tres-riche & renomée, pour estre l'un des plus notables lieux des foires de l'Orient. Outre-plus il lui enioignit de descourir amplemēt en ceste route, l'isle de saint Laurent, laquelle il entendoit estre fort grande & riche. Siqueire partit de Lisbonne avec ses nauires le cinquiesme iour d'Auril l'an mil cinq cens & huit. Les douze autres nauires furent laissées en la charge de George Aquilaire, auquel fut commandé qu'avec cinq d'icelles il descourist le Cap de Guardafu, du costé où il tourne du Midi au Septentrion au golfe de la mer d'Arabie, & courust toutes ces mers là, afin d'arrester toutes les nauires qui feroiēt voile d'Arabie en Inde. Les autres sept nauires furent distribuees à certains Capitaines, l'un desquels, nommé Francisque Pereire, eut le gouuernement de la forteresse de Quiloa. Le Roy commanda à un autre nommé Tristan de Silues, de faire voile avec deux galeres de l'Inde au Cap de Guardafu, puis se joindre avec Aquilaire. Ceste derniere flotte desinara du port de Lisbonne au mesme mois, & cinq iours apres la premiere. Mais vne soudaine tourmente escarta les nauires, rompit le mast de celle de Pereire, & despeça tout l'equippage, tellement qu'il fut contraint reuenir à Lisbonne. Ayant racoustré son vaisseau il se remit à la voile le dixneufiesme iour de May: mais à cause de l'hiuer il lui fut impossible de gaigner Quiloa, ains il hiurna es isles situes autour de Mozambique. Les capitaines qui deuoyent aller en Inde, apres auoir esté agitez en diuerses sortes, finalement vindrent surgir au port de Cochim. Quant à Aquilaire il fit naufrage & fut englouti des vagues. Un sien parent & capitaine de nauire nommé Edouard de Leme, estât arriué avec la flotte au haur de Mozambique, n'en voulut partir que premierement il n'eust nouuelles de la vie ou de la mort d'Aquilaire. Mais ayant conu par plusieurs coniectures que le vaisseau d'icelui auoit esté fracassé & mis en fond par la tourmente (car mesmes en ceste route lon voyoit flotter des aiz avec des tonneaux & diuerses pieces d'equippage des matelots) il fut arresté du commun consentement de tous les capitaines, que Leme lui succederait. Et pourtant, si tost que la saison fut commode, Francisque Pereire, qui s'estoit aussi venu rendre en Mozambique, cingla droit en Quiloa. Le general Leme s'embarqua en la nauire d'icelui, baillant la sienne à Vasque de Sylueire, & ainsi ils prindrent la route du Cap de Guardafu. Pierre Ferreire de Fogaze, capitaine de la forteresse de Quiloa, s'en alla en Melinde, suiuar la commission du Roy de Portugal, & y demeura à l'ancre, attendant le temps propre pour se remettre en mer: & si tost que la commodité s'en presenta, il se joignit à Leme, lequel avec vne flotte de sept nauires fit voile vers Zacotora: tournoyāt au long des pays tributaires au Roy, où il recueillit ce qui estoit deu, & contraignant par armes au payement ceux qui en faisoient quelque refus. Comme il vouloit assieger Magadaxo, ayant consulté avec les capitaines il s'en deporta, pource que c'estoit vne ville forte d'assiette, bien munie, dont le port estoit fort perilleux pour les nauires, & l'encouleur du

destroir

destroit pour entrer de la mer en la ville fort mal aisé. Estât à l'ancre pres de ce lieu, auint par la nonchalance de ceux qui faisoient la garde, que lon coupa les cables des anchres du vaisseau dans lequel George Quadre commandoit. Sur ce le flus de la mer lors tres-vehement emporta ce vaisse aussi loing, que quand les soldats & matelots s'esueillèrent ils ne sceurēt iamais conoistre en quelle plage de mer ils estoient lors. Pourtant ils retindrent leur vaisseau avec les rames, iusques au leuer du Soleil: mais entendās aussi peu lors en quel endroit ils pouuoient estre, force leur fut de s'abandonner aux vents. Ainsi furent-ils emportez iusques au port de Zeilan ville assez proche du goulfe de la mer Arabique, & touchâr à l'Ethiopie: au moyē dequoy auint qu'ils tomberent tous entre les mains des Arabes habitans en ce lieu, qui les retindrent prisonniers. Edouard de Leme destourné de l'entreprinse par lui faite sur Magadaxo, vint à Zacotora, & y laissa Pierre de Fogaze pour commander en la forteresse. Nous descrirons en vn autre endroit ci apres ce qui lui auint depuis.

3. **M A I N T E N A N T** il nous faut discourir sur ce que Tristan de Cugne fit en son voyage. Il auoit vne flotte d'onze nauires. Dauantage, le Roy en fit equipper cinq autres pour Alфонse Albuquerque, ordonné Viceroy des Indes, apres que la commission d'Almeide seroit expirée. De Cugne avec sa flotte arriua en Mozambique au mois de Decembre, où il fut contrainct sejourner à cause de l'hier. Toutesfois quelques nauires, separees de la sienne par les tourmentes, ne se rendirent pas en ce port quant & lui. Car Alфонse Lopes de Coste estoit abordé en Zofala: Lionel Coutin auoit gagné le haure de Quiloa: Aluar Tellio fut emporté avec grand danger iusques au Cap de Guardafu, d'où, apres s'estre vn peu remis sus, il auoit destrouffé quelques vaisseaux d'Arabes, dont lui & ses soldats se firent riches. Puis apres il se remit à la voile, & print la route de Zacotora pour se ioindre à Tristan de Cugne. Roderic Pereire Coutin ayant esté aussi batu d'vne bourasque entra dans vn goulfe de l'isle de saint Laurent, lequel il appella beau port, à cause de sa beauté: & ce nom lui est demeuré iusques à present. Là dixhuit ieunes hommes de l'isle venans à lui dans vne barque furēt benignement receus, & leur donna des habillemens: puis il en retint deux à force de dons, lesquels il mena à Tristan de Cugne en Mozambique. Le general ayant entendu plusieurs discours de la grandeur de ceste isle, & voyant que le temps n'estoit pas propre pour aller à Zacotora, apres auoir communiqué premierement avec Alфонse Albuquerque, resolut de faire voile vers ceste isle, afin d'y conoistre en quelque sorte les mœurs du peuple, l'estendue & fertilité du pays. Il mena avec soy Alфонse Albuquerque, Manuel Tellez, Antoine de Camp, Francisque de Touar, Jean Gomeze d'Abrey, Roderic Pereire, & Tristan Aluar. Les autres capitaines demeurèrent au port de Mozambique avec leurs vaisseaux. Or estant venu surgir en quelques ports, comme il vouloit prendre terre, les habitans des lieux l'en empeschoyent: mais il leur donnoit la chasse à coups de canon, & en tuoit grand nombre. Puis il descourrit toute ceste isle du costé qui regarde l'Ethiopie: & comme il doubloit la pointe qui tire à l'Occident, & de-

Nauigatio & diuers accidēti de Tristan de Cugne, spécialement en l'isle de saint Laurent.

siroit faire le tour de l'isle, afin de reconnoistre aussi la partie tendant au Midy, vne tourmente s'esleua qui rompit son dessein : & fit rompre le vaisseau de Roderic Pereire, tellement qu'il enfondra avec perte de la pluspart de ceux qui estoient dedans. Le general ne voulut passer outre, ains retourna en Mozambique. Or lors que ceste tourmente suruint, Iean Gomeze d'Abrey auoit ja passé le Promontoire : & comme il voguoit au long de la coste Australe, il descouurit l'emboucheure d'un fleuve qui est au pays que ceux de l'isle appellent Matarane. Il resolut de mouiller l'ancre là, pour faire aiguade : & lors en moins de rien apparurent force gens en des petits bateaux qui vindrent autour de sa nauire, en le saluant courtoisement, & lui presentant des poissons fraichement peüchez, des racines dont ce peuple fait de la farine, & des cannes desquelles ils tirent du sucre : monstrans au reste tous signes de bienueillance & d'humanité. Ceste debonnaireté esmeut tellement le capitaine, qu'il commanda à son pilote (qui entendoit diuers langages) de descendre en un esquif, pour voir s'il pourroit entendre & communiquer avec ces gens, l'admonnestant de faire tant par presens, qu'il peust en amener quelques uns avec soy. Mais si tost qu'eux eurent le pilote, ils ramerent de telle viffesse, qu'en moins de rien Gomeze les perdit de veue. Cela estant auenu si soudainement, il entra dans un esquif fourni d'artillerie, & avec vingt quatre soldats, suiuit les bateaux des insulaires : mais comme il approchoit de terre, il descouure ces mesmes bateaux r'amenans le pilote, & voguans vers lui en toute assurance. Le pilote faisoit signe que lon n'entreprinst aucun acte d'hostilité : & que c'estoit un peuple benin & fort charitable enuers les estrangers. Estant paruenü à l'esquif il conta que ces gens l'auoyent mené vers le Seigneur du pays, qui lui auoit monstré fort bon visage, & donné vne chaine, des bracelets & anneaux d'argent, avec charge de venir trouuer le capitaine, & le prier en son nom de vouloir visiter un Seigneur qui desiroit grandement communiquer avecques lui. Le capitaine inuité & poussé d'un si bon rapport, descendit en terre : où il trouua au huiage ce Seigneur, lequel fit tout son possible de l'attirer à son amitié. Il y eut un bâquet apresté selon la coustume du pays, & fourni de toutes sortes de biens que ceste terre produisoit, & plusieurs propos ioyeux tenus de part & d'autre. Le Soleil comméçoit à se coucher, & le capitaine retournoit vers son esquif, quand voicy s'esleuer vne furieuse tourmête, & l'air s'obscurcir d'un nuage espais, tellement qu'on ne voyoit goutte, la mer ronfloit & escumoit de façon estrange, tellement que le capitaine ne peut retourner vers sa nauire : & ceste bourasque dura quatre iours au long de la coste, combien que la haute mer fust bonasse. Ceux qui estoient demeurez en la nauire presumoyent que le capitaine estoit allé assaillir le peuple pour r'auoir son pilote, & qu'il auoit esté tué au combat : car (disoyent-ils) comment se pourroit-il faire qu'il demeurast si long tēps en pays inconnu ? à quel propos lairroit-il ses gens en soucy continuel de son sejour ? Quelle bonne chere lui pourroyent faire ces sauuages & barbares pour le retenir ? Mais leur ayant redemandé son pilote, & eux le refusans, il en aura voulu auoir raison par force, & il sera auenu que la foule des ennemis

nemis aura esté si grande qu'il y sera demeuré mort. Que ferons nous d'oc? Attendrons nous que quelque nouvelle tourmente chasse la nauire au riuage, & la brise contre vn escueil, & que nous perissions pauurement, engloutis des vagues de la mer, ou deschirez en pieces par ces barbares sans pitié? Sur tels discours ils hausserét les voiles. Le capitaine ayant couru toute la coste avec son esquif, & ne trouuant plus sa nauire, reuint trouuer ce Seigneur, lequel lui fit le meilleur acueil du monde, & tascha par tous moyens de le resiouir, & destourner de la tristesse, dont il le voyoit laisi. Mais ce fut en vain: car le capitaine se voyant comme confiné en ce grãd pays, & priué d'espoir de retourner iamais en Portugal, les viandes & façons de faire de ceste ille ne lui estãs propres, ne vouloit se resiouir en sorte que ce fust, ne faisant que pleurer & lamenter, tant qu'à la fin il mourut de tristesse. Huit de ses soldats accablez de regret, trespasserent tost apres. Les suruiuans apres auoir racoustré leur esquif, s'embarquerent au grãd regret du Seigneur de ce pays, & prindrent la route de Mozambique, & auant qu'y arriuer rencontrèrent la nauire dont Luc de Fonseque estoit capitaine, qui les chargea dedans, & les mena en Mozambique.

4. IL est requis en ceste endroit de dire quelque chose de la situation de l'isle de saint Laurent, & decrire les coustumes des diuers habitans d'icelle, ensemble le naturel du terroir. Les Europeans lui ont donné ce nom, pour ce qu'elle fut descouuerte par les Portugallois le dixiesme d'Aoust, iour consacré à saint Laurent par l'Eglise Romaine. Elle a en longueur enuiron six cens lieues, & en largeur deux cens quarante: distinguees en diuers royaumes. Ceux qui habitent au milieu & auant en pays, sont fort idolatres: les habitans des costes sont Mahumetistes pour la pluspart, partie noits, partie marquez de couleurs, les cheveux courts & crespus. Les plus riches portent quelques robbes de coton: les pauures couurent les parties honteuses seulement. Il leur est loisible d'espouser autant de femmes que bon leur semble. Le pays est fort fertile, arrousé de grand nombre de fontaines & de belles riuieres d'eau douce, couuert de bois & forests espaisies, abondant en poisson, grosse venaison, volaille, & fruits qu'il produit sans grãd labourage: & porte diuerses sortes de racines, dont les habitans vsent, comme nous faisons de pain. Il y a des citrons & autres arbres odoriferans à merueilles: & y croist vn nombre infini de roseaux, dont le succe prouient naturellement, ou est exprimé artificiellement. Le gingembre y croist de tous costez: ils le mangent verd, & n'ont l'adresse de le garder sec. Ils ont force mines d'argent. Ce peuple est simple, & d'un naturel fort humain: & lors ne sauoyent que c'estoit de nauiger, s'aidans seulement de petis bateaux legers pour la pesche du poisson. En leurs guerres ils ne s'aidoyent d'autres baltons que de jaelots bien foibles: mais par la hantise des Portugallois, ils se sont façonnez à plus fortes armes, & marchét vn peu mieux equippez pour le cōbat. L'estime que cela suffira pour le present, pour faire conoistre la situation de ceste ille, le naturel du terroir, & les mœurs de ceux qui y habitent.

*Descriptiõ de
l'isle de saint
Laurent, appel-
lee Madaga-
scar par ses ha-
bitans.*

5. OR Tristan de Cugne partant de Mozambique fit voile & alla surgir

Continuation

*du voyage de
Tristan de Cu-
gne, & quel-
ques exploits
de guerre.*

au port de Melinde, où apres auoir deuisé familièrement avec le Roy, il lui liura les presens, & fit les recommandations du Roy de Portugal : puis lui laissa trois hommes, l'un Portugallois, nommé Fernand Gomeze de Sarde, l'autre More de nation, depuis baptisé, & nommé Iean Sancho : le troisieme estoit vn More de Tunes, appellé Mahumet. Ces trois alloient avec lettres d'Emmanuel vers le Roy d'Ethiopie, que lon appelle assez improprement le prestre Iean. Le Roy de Melinde les receut en sa protection, afin que sous sa fidelité ils fussent conduits en Ethiopie. De Cugne ayant donné ordre à cela, print la route de Hoje, qui est vne ville à quarante lieues loin de là, laquelle guerroyoit contre le Roy de Melinde, & la print, sacca-gea & brula, & y tua grand nombre de Mores. Il alla puis apres en vne autre ville à trente lieues de là, laquelle ne fit resistance, ains se rendit volontairement au Roy de Portugal, au nom duquel fut imposé sur les habitans vn tribut annuel de certaine quantité d'or. En apres il tira vers vne autre ville, bien forte, & la plus marchande de tous ces quartiers & haures, nommée Braua : & estât avec sa flotte venu mouiller l'anchre au port, il enuoya Lionel Coutin aux principaux de la ville, offrit la paix au nom du Roy de Portugal, & les pria de faire alliance ensemble. Eux monstroyent semblant de desirer le mesme, toutesfois ils remettoient l'affaire du iour au lendemain : attendans vn vent & tourbillon impetueux, lequel s'esleue d'ordinaire en ces temps que de Cugne y arriua, & qui apres auoir bié agité les vaisseaux qui se trouuent lors au port, finalement les brisa & met en pieces. De Cugne ayant descouuert ceste finesse malicieuse, resolut d'assaillir la ville. Au point du iour il mit ses trouppes en terre, & en fit deux bandes : la premiere, de quatre cens soldats conduits par Alphonse Albuquerque : la seconde de six cens auxquels lui mesmes commandoit. Il y auoit garnison de quatre mil hommes en la ville. Deux mille sortent incontinent, & viennent attaquer le combat. Il y eut aspre conflict, mais les Portugallois chatgerent si viuement les autres, qu'ils les contraignirent de reculer. Eux se retirèrent en la ville, sans se desbander ni rompre leurs rangs, & sans s'effrayer fermèrent les portes, & empeschent les Portugallois de passer plus auant. Les quatre cens qui marchoyent les premiers se partirent en deux trouppes, & courent çà & là, pour trouuer quelque bresche, afin d'entrer plus à l'aïse. Cependant on lançoit sur eux de dessus les murailles des traits & engins de feu pour les empescher. Finalement Albuquerque ayant trouué vn endroit propre, où la muraille trop vieille estoit par terre, entra dans la ville. Les ennemis coururent à la foule vers ce quartier, & se voyans reduits à telle extremité, résistèrent vaillamment : tellement que le combat estoit comme esgal, iusques à la venue de Cugne, car lors les assaillis quitterent la place, se sauuant où ils pouuoient. Les Portugallois vouloyent poursuiure leur victoire, mais leur chef les retint : commandant qu'on pillast la ville, de laquelle on emporta vn merueilleux butin es nauires. Les ennemis y perdirent beaucoup d'hommes : le nombre des prisonniers fut grand, toutesfois on en relascha la plus part. Les Portugallois y perdirent cinquante hommes, & plusieurs furent fort blesez. Dixneuf autres auenglez d'auarice porterent tant de pillage
dans

dans vn esquif, qu'il enfonça en la mer, & tous furēt noyez; puis l'esquif s'estât deschargé de ces meschâs fardeaux reuint au dessus. Quelques soldats furent si cruels, que pour butiner plus à l'aise ils coupoyent les doigts & poings à plusieurs femmes, afin d'auoir bien tost leurs anneaux & brasselets. Mais le capitaine fit publier que personne ne continuast dauantage, à peine de la vie. Au reste, la ville fut consummee de feu en presence de ses habitans qui s'en estoient fuis, & regardoyent ce miserable spectacle de loin. Puis la flotte tira vers Magadaxo, où Lionel Coutin fut enuoyé pour offrir paix & alliance comme lon auoit fait à ceux de Braua. Il y auoit des gens de cheual bien armez qui couroyent çà & là au long de la mer, les murailles estoient bordees de gensdarmes, les autres se pourmenoyent hors la ville avec leurs armes: brief chascun d'eux se preparoit à la guerre. Auant que Coutin prinst bord, il fit descendre en terre vn de ceux qui auoyēt esté prins au sac de Braua, afin de faire entendre qu'il n'estoit venu là que pour traiter quelque accord. Mais eux deschirent par pieces ce prisonnier en la presence de Coutin, le menaçans de pareil traitement, au cas qu'il fust si temeraire de sortir de la mer. Coutin retourne vers le general, & lui fait entendre les menaces & la cruauté des ennemis. Le general y voulut aller les combattre, mais par l'avis des capitaines & pilotes ils'en deporta. Car outre ce que l'issue d'une telle guerre estoit fort incertaine, le seiour facheux & perilleux pour la flotte, la ville bien fortifiée, & munie de gens ressolus pour la guerre, l'huiuer approchoit, le temps de la nauigation s'escouloit: tellement que si la ville n'eust esté emportee au premier assault, les nauires estoient en grand danger, & toute l'armee se perdoit, au grād deshonneur du general.

6. AINSI donc il print la route de Zacotora, en laquelle la flotte vint surgir sans aucun empeschement, & en peu de iours. Plusieurs estiment que ceste isle est celle que les anciens appelloient Dioscoride, laquelle regarde le Promontoire de Mozambique. Elle est montagneuse, abondante en herbes, & fruits de diuerses sortes. Les habitans sont bigarrez de couleurs, & se disent Chrestiens. Ils ont des temples & des autels, comme lon void en Europe. Les autels ne sont parez que de croix, & n'ont point d'autres images. Es iours de iusnes, qu'ils obseruent fort estroitement, ils s'abstiēnt fort seueremēt de manger chose aucune. Ils n'espousent qu'une femme. Ils ont les mesmes festes, & en mesmes iours que les Europeans, mesmes celles des saincts: payent entièrement à leurs prestres les dismes des grains & des fruits: ne sauent que c'est de nauires, & sont si ignorans, encores qu'ils fassent profession de Chrestienté, qu'ils n'entendēt vn seul mot de religion Chrestienne. Ce sont gens paresseux & de lasche courage, tellement hebetes & stupides, qu'une petite troupe de Mores leur commande & les gouuerne; sans qu'ils se hazardēt en sorte quelconque pour s'affranchir, encores qu'ils soyent rudement tyrannisez. Au tēps que Tristan de Cugne y arriua, le Roy de Caxem (qui est vne portion de l'Arabie heureuse, bornee de l'Ocean) dominoit sur ceste isle en fort grande rigueur, & pour oster aux insulaires tout espoir de recouurer leur liberté, il auoit fait bastir vn fort af-

*Arriuee de
Tristan de Cugne en l'isle de
Zacotora, des
Chrestiens qui y
habitoient, & de
leurs mœurs:
ensemble de la
guerre que Tri-
stan y fit pour
les deliurer de
seruitude.*

sez pres de la mer, lequel estoit bien muni d'armes & de forte garnison, à laquelle son fils encores ieune, mais fort vaillant, commandoit. De Cugne resolut d'assaillir ce fort, afin de deliurer les Chrestiens de telle tyrannie. Toutesfois il enuoya premierement vn ambassadeur vers ce ieune Prince nommé Abraheim, l'exhortant de quitter le pais, enuahi de force & sans aucun droit par son pere, & liurer promptement le fort vuide de garnison entre ses mains. Abraheim respond qu'il respectoit le commandement de son pere, & ne se soucioit de l'autorité des autres Princes: & pourtant il pouuoit venir aux mains si bon lui sembloit, d'autant que la guerre ne se doit point faire de paroles. Sur quoy le general pourueut promptement à tout ce qui estoit requis pour l'assault, sondât la profondeur de l'eau vers l'endroit qui sembloit plus propre pour descendre en terre. Mais la nuit mesme Abraheim fortifia ceste descête, & y logea vn corps de garde, pour repousser ceux qui voudroyent approcher trop pres. De Cugne partit ses troupes en deux, & au point du jour approcha du riuage. Il menoit la premiere troupe, & Albuquerque l'autre. Or Albuquerque voyant qu'il y auoit vne autre descente plus pres de la forteresse, qui sembloit fort dangereuse le iour precedêt, à cause que la mer estoit esmeue, & lors estoit coye: pour occuper l'eunemi en deux endroits, il fit tourner ses esquifs à force de rames vers ce costé, & ainsi sans aucun empeschement lui & les siens mirent pied à terre. De Cugne n'aperceuant pas cela, tira droit vers vn lieu couuert de palmiers, où estoit le corps de garde d'Abraheim, lequel voyant cela sortit vistement de la forteresse pour venir au secours de ses soldats. Mais ayant descouuert la troupe que conduisoit Albuquerque, il alla au deuant, pource que le danger estoit plus grand de ceste part. Albuquerque bien armé delibera lui courir sus: lors Alfonse Norogne l'un de ses capitaines desmarche le premier, & vient charger Abraheim, contraignant les ennemis de reculer. Sur ce, Abraheim voulant que ses gens se retirassent seulement en la forteresse, demeura sur la queue où il soustenoit vaillamment les Portugallois, se monstrant adroit & braue capitaine: finalement il fut abandoné de tous les siens excepté de huit. Toutesfois pour vendre sa vie, il fit lors merueilles, ce que voyant Norogne, acourut pour le combattre seul à seul. Alors il y eut vne terrible escrime entre ces deux capitaines, laquelle finit par la mort d'Abraheim, & de ses compagnons aussi, qui furent enuironnez des Portugallois, & nonobstant leur resîstance, & qu'ils en blessassent plusieurs, finalement hachez en pieces. De Cugne estant arriué au bord qu'il auoit remarqué de l'œil, & voulant descendre, trouua de la resistance en ce corps de garde, dont a esté parlé. Mais les ennemis ayans esté viuement repoussez, tascherent de gagner la forteresse, où ils furent suivis de pres. Comme ils approchoyent, la troupe d'Albuquerque les effraya & escarta: toutesfois quelques vns en petit nombre gagnerent ceste retraite, & quant à ceux qui se sauuerent ailleurs, De Cugne ne voulut point aller apres, ains fut d'avis d'assaillir promptement la forteresse: tellement que ses soldats à sa parole approcherent pour enfoncer les portes, estimans que les ennemis estonnez de peur ne feroient pas grand resîstance. Mais il en

auint

auint tout autrement: car les ennemis bleſſoyent les Portugallois à coups de pierres & de traits lancez des tours en bas, & eſtourdirent ſi fort Albuquerque d'un coup de pierre, qu'il demeura long temps comme mort. De Cugne apperceuant telle reſiſtance, fit ſonner la retraite, amener vn canon des nauires & apporter des eſchelles. Les portes ayans eſté rompues à coups de boulet, il fit planter les eſchelles au pied des murailles: ce que veu par les ennemis, & qu'ils ne pourroyent (à cauſe de leur petit nombre) ſouſtenir l'effort des Portugallois qui ſe preparoyent pour venir à l'aſſaut, ſe retirerent en vne forte tour de la fortereffe, en laquelle entrerent les aſſailans & ſe ſaiſirent d'une autre tour, puis approcherent de celle où ſ'eſtoyent enfermez les ennemis qui ſe defendirēt lors plus reſoluemēt qu'ils n'auoyent encore fait, ſe voyans en manifeſte peſil de leurs vies, & faiſoyēt tel deuoir, que le general eſtoit mari que ſi vaillans hommes ſe perdiſſent: pourtant il leur fit dire par vn trucheman, qu'il leur donneroit volontiers la vie & congé de ſe retirer ailleurs, ſ'ils ſe vouloyēt rendre. Mais eux prefererent la mort honneſte à vne compoſition qu'ils eſtimoyent honteuſe. Et par ainſi la tour fut emportee d'aſſaut finalement, & tous les ſoldats tuez, excepté vn qui eſtoit fort bon pilote. De Cugne y perdit huit de ſiens, & vn grād nombre de bleſſez. Apres la prinſe de-ceſte fortereffe, Triſtan de Cugne fit entēdre aux habitans de la ville qu'il eſtoit venu là par le commandement du Roy de Portugal pour les mettre en liberté: & que ce treſilluſtre Prince auoit eſtimé que c'eſtoit choſe inſupportable qu'un peuple Chreſtien demeurat ſi long temps ſous le ioug tyrannique des Mahumetiſtes. Les Inſulaires commencerent à le remercier, tendre les mains au ciel, ſ'eſcrier de ioye, & prier pour la proſperité du roy Emmanuel. Cela fait, de Cugne & tous les ſiens allerent en vn temple, où les Mahumetiſtes ſ'aſſembloyent pour leurs ceremonies & ſuperſtitious, lequel ayant eſté repurgé il y fit chanter meſſe. Puis ayant reparé & mis en meilleure deſenſe que iamais la fortereffe, il y eſtablit capitaine Alſonſe Norogne, ſuiuant l'intention du Roy. Puis il ſ'embarqua le deuxieſme iour d'Aouſt, l'an mil cinq cens ſept pour gagner l'Inde, où eſtant arriué au port de Cananor, comme il en a eſté parlé ſur la fin du liure precedent, la paix fut faite avec le Roy de Cananor. Eſtant porté de là en Cochim, il fut aſſez honorablemēt recueilli & careſſé du Viceroy Almeida.

7. QUELQUES iours apres les nouuelles vindrēt qu'au port de Panane (qui eſt vne grande ville appartenāte au Roy de Calecut, à vingt cinq lieues de Cochim vers le Septentrion) y auoit quelques nauires d'Arabes & la flotte de Calecut equippee d'armes & d'hommes, ſous la charge d'un vaillant & ruſé capitaine nommé Cutial pour garder ces nauires: ce qu'entendu Almeida reſolut de les aller combattre, acompagné de Triſtan de Cugne qui promit ſ'y employer de tout ſon pouuoir. Et pourtant il partit avec douze nauires & prit la route de Panane, où il entendit par le rapport de quelques Indiens prins aupres du haure, que les nauires des Arabes n'eſtoyent point encōres en haute mer, ains demeuroyent anchrees au long de la riuiera, que Cutial auoit fortifié l'emboucheure du port de leues

*Bataille nāuē
le entre les
Calecutiens:
l'embraſēmēt
de Panane, &
le retour de
Triſtā de Cu-
gne en Portu-
gal.*

de terre de part & d'autre, & disposé des pieces d'artillerie dessus avec bon nombre de soldats: que la ville estoit fortifiée de murailles & de gens: & qu'outre cela Cutial auoit vne armee de quatre mille braues soldats, partie d'Arabes, partie de Naires stipendiés du roy de Calecut. Almeide n'auoit que sept cens Portugallois, lesquels il disposa commes'ensuit, pour eoutir sus aux ennemis. Il enuoya deuant en vn esquif (à cause que les grands vaisseaux ne pouuoient entrer en la riuere, pource que la mer s'estoit retirée) vn capitaine nommé Pierre Barret avec trente soldats pour attirer les Calecutiens au combat. Il estoit suivi de Iacques Petrejo avec trente autres soldats, pour assaillir ceux qui gardoyent l'entree de la riuere, où estoit le plus grand danger. Laurent Almeide & Nonio de Cugne fils de Tristan les suiuyoient en deux autres esquifs, & consequemment les autres capitaines. Puis Almeide & Tristan de Cugne estoient à dos avec deux galeres. Le lendemain au point du jour ils assaillirent les ennemis selon cest ordre: toutesfois Almeide & de Cugne demurerent à l'emboucheure de la riuere, attendant le flot de la mer. Les ennemis tiroient force coups de canó & de lances à feu. Neantmoins les Portugallois passerent assez hardiment à trauers les feux & les boulets. Barret approcha des nauites, comme il luy auoit esté enioint, & voulant prendre terre fut assailli de trente Mores qui auoient la teste & la barbe rasée, qui estoit vn signe de certain vœu, par lequel ils s'estoient condamnez avec horribles execrations à mourir plustost que de quitter la place. Or comme lon entendit depuis, il y auoit lors fort grand nombre de ces voueurs, ausquels ceste necessité estoit imposée ou de se faire tuer ou de demeurer victorieux. Cela fut cause de rendre le combat fort perilleux encor que la troupe des combatans fust petite. Semblablement Iacques Petrejo voulant donner au lieu qui lui estoit assigné fut assailli de mesme sorte de gens. Cutial enuoyoit renfort par tout où il estoit besoin, tellement que la meslee deuenoit plus aspre d'heure à autre. Estans ainsi aux prises les vns contre les autres, Laurent Almeide arriua avec ses soldats & print terre maugré les ennemis, en telle sorte toutesfois que plusieurs de ses soldats y furent fort blesez. Les Portugallois ayans reprins courage contrainquirent les Calecutiens de reculer peu à peu. Laurent combattoit avec vne hache dont il tua en moins de rien six soldats de Cutial, à l'occasion dequoy chascun commença à le regarder par grád esbahissement: aussi estoit il fort puissant homme, de belle taille, adroit & vaillant entre tous autres, tellement que les ennemis n'osoient subsister deuant lui. Toutesfois vn de ces rasez le vint attaquer, & le blessa au bras: mais il fut tué comme ses autres compagnons. Nonio de Cugne en suivant Barret fit vn merueilleux deuoir, & mit le feu en dixhuit nauires. Le combat estant ainsi eschauffé, la marée suruenante donna moyen aux galeres de voguer à l'aise: par ainsi Almeide descendit en terre avec son enseigne (laissant Tristan de Cugne malade es galeres) afin de secourir ses gens. A sa venue les ennemis furent mis en route: mais il les poursuiuit iusques en Panane, & fit incontinent mettre le feu par tout, ce qui contrista fort les ennemis, & despita aussi les soldats Portugallois, d'autant que c'estoit vne ville riche, de laquelle ils

pou-

pouuoient emporter vn bon butin. La vaillance des soldats (disoyent ils) ne fera elle iamais recompensee? Cest homme ci n'est pas prest de donner du sien à ceux qui ont fait leur deuoir, puis qu'il ne leur permet pas mesmes de gagner quelque chose sur leurs ennemis. Sait il pas bien que telles reconnoissances rendent les hommes plus courageux, & que la chicheté les asadir & leur oste le cœur? Qui le voudra plus suiure, quand on verra belistres ceux par la prouesse desquels ils se font renommer par tout le monde à cause de les victoires? Telles estoient les plaintes des soldats. Mais Almeide ne s'arrestoit pas beaucoup à tels desirs, ains se conduisoit par raison & meur auis. Il voyoit le danger present, attendu que les ennemis n'estoient pas loin, qui romproient aisément les Portugallois, s'ils les chargeoyent à l'improuiste, car ils les trouueroient escartez & empeschez à cause de leur butin. Outreplus reconnoissoit que les ennemis se pouuoient ramasser en plus grosse troupe que deuant, veu que tous les soldats qui estoient emparez de tout ce pays là, estoient gens fort prompts aux courses & executiōs soudaines: & par tel moyen le fruit de la victoire seroit aneanti, & seroit en hazard de perdre tout. Les ennemis perdirent en la rencontre susmentionnee enuiron trois cens hommes, car on ne les osa pas poursuiure plus loin, crainte de quelques embusches. Des soldats d'Almeide il y en demeura dixneuf, sans les blesez. Toutes les pieces que Cūtal auoit placees ça & là furent prinſes & mises dans les nauires. Ces choses si heureusement executees, Almeide se retira en Cananor, & renuoya de là Tristan de Cugne en Portugal avec cinq nauires chargees.

8. A v commencement de l'annee suiuiante, Almeide ne voulant reposer en place pour empescher ses soldats de s'amolir, & les ennemis de reprendre courage, despescha son fils Laurent avec vne flotte de huit nauires, pour courir toute ceste coste, & molester sans cesse les Mores. Laurent se mit à la voile, assaillit beaucoup de ports, brusta plusieurs nauires d'ennemis, & finalement se rendit avec sa flotte au port de Chaul, afin d'y attendre les nauires qui deuoyent partir de Cochim & qu'il auoit prinſes enſa garde. Chaul est vne riche ville assize vers le Septentrion & proche du royaume de Cambaje, à trauers duquel passe le fleuue Indus. Ainsi que Laurent demouroit à l'anchre en ce port, il entēdit que Campſon Sultan d'Egypte auoit enuoyé vne puissante armee nauale en Inde, afin d'exterminer les Portugallois, & par ce moyen venger non seulement les torts qu'ils lui auoyent faits, mais aussi pour faire plaisir aux rois de Cambaje & de Calecut. De fait ces rois estoient ses allies, & l'auoyent prié par lettres de venir combatre & ruiner vne troupe de gens ennemie des ceremonies & coustumes des Mahumetistes, & qui vouloit vsurper vne domination tyrannique sur les Indiens. Qu'il seroit aisé d'executer telle entreprise: car outre ce que le Sultan estoit riche Prince, & auoit de vaillans hommes pour la guerre: eux feroient deuoir de leur part, & ioignans leurs forces avec les siennes, racleroyent du monde ces gens qui auoyent fait tant de maux es Indes. Le Sultan fit equipper vne flotte qu'il estimoit suffire pour ruiner les Portugallois, & en icelle enuoya plusieurs de ceux qui iadis (& lors que la Sultanie d'Egypte estoit,

Armees de mer de Campſon Sultan d'Egypte contre les Portugallois, & de leur rencontre au port de Chaul.

en vigueur) on appelloit Mammeluchs, lesquels ayās esté enleuez par force des leur enfance de la maison de leurs peres & meres Chrestiens, & instruits en la superstition Mahumetane, & faconnez aux armes, estoient fort vaillans & adroits à la guerre. Entre les Indiens ils estoient nommez Rumes, cest a dire Romains: car ayās aprins de quelques vieux enseigne-mens cōbien l'Empire Romain auoit esté excellent par dessus tous autres peuples au fait des armes, lors que les Mâmeluchs vindrent premierement es Indes, & qu'on les apperceut si industrieux & magnanimes es combats, ils surēt estimez Romains. Cōme puis apres, quād ils virēt les Portugallois se gouverner presque de la mesme façon en leurs guerres, ils les appelloyēt François. Car depuis que Ierusalē fut prinse par Godefroy de Bouillon, la renommee des François vola par tous les pays de Leuant, où ils estoient fort estimez & redoutez. Ainsi donc ceste flotte & la vaillance des soldats qui y estoient faisoit discourir les Indiens en diueres facons. Ceux qui haïssoient les Portugallois conceuoient vne certaine esperance de les voir ruiner à ce coup: les partisans d'Almeide estoient au contraire troublez de peur & fort esbranlez. Almeida escriuit à son fils qu'il ne laissast passer plus auant l'ennemi de peur de plus grand remuement en Inde, ains allast au deuant, & à la premiere commodité lui donnast bataille. Suiuant cela Laurent fit ses aprests, pour aller à Diu, ville autresfois suiette au royaume de Cambaje: mais la flotte d'Egypte n'attendit pas tant, ains auoit prins sa route pour venir combatre les Portugallois au port de Chaul. Le general d'icelle s'appelloit Mirhocem, vaillant & sage capitaine, accompagné de six galeres, d'une nauires de guerre & de quatre autres. Melichiaz gouverneur en la ville de Diu pour le roy de Cambaje s'estoit ioint à ceste flotte avec trente quatre nauires bien equippees d'armes, de canons & de soldats. Les galeres & barques conduites à force de rames se cachoyent au long de la coste. Cinq autres nauires estans poussees d'un vent propre en haute mer, de premiere veue firent penser aux Portugallois que c'estoit Alfonso Albuquerque, lequel on attendoit, & qui lors faisoit la guerre au goulfe de Perse. Cela fut cause qu'ils ne bougerent. Mirhocem ayant la marée à propos, laquelle bat les murailles de la ville de Chaul, passa deuant les nauires de Portugal, les saluant à grands coups de canon & autres traits, dont quelques vns furēt fort blessez & un gentilhomme nommé Roderic Perreire tué: mais on lui rendit la pareille, & perdit aussi plusieurs des siens. Les ennemis s'auancerent & vindrent mouiller l'ancre plus pres de la ville. Quant à Melichiaz il demeura ce iour hors l'emboucheure du port. Laurent Almeida estimant qu'il ne falloir plus differer fit leuer les anchres, afin d'assaillir promptement la nauires capitaineſſe de Mirhocem, lequel se sentant trop foible, à cause que Melichiaz n'estoit pas encor entré avec sa flotte dedans le port, ne voulut point venir aux mains: & de peur qu'on ne l'y contrainst, il despescha quelques galeres pour empescher les brigantins de leuer les anchres: tellement que les nauires ne desmarent point ce iour là. Le lendemain Laurent ayant leué les anchres vint inuestir la nauires de Mirhocem, mais il n'en peut approcher à cause de la mer qui remontoit: seule-

*Le nom des
François re-
nommé es In-
des, & en tous
les pays de Le-
uant.*

ment ils combattirent de loïn à coups de canon & autres traits. Or dautant que la nauire de Mirhocem estoit fort haute, tous les traits qui en estoÿent lancez tomboyent à plomb sur les Portugallois, dont plusieurs furent bleffez, entre autres Laurent Almeida qui receut vn coup de fiesche. Ceux qui estoÿent autour de lui l'admonnestent & prient, puis que le vent ne dōnoit point, & que la marée estoit cōtraire, tellement qu'il n'estoit pas possible de ioinde de plus pres la nauire des ennemis, il permist que son vaisseau remontast plus auant en mer. Mais il reietta cest auis fort brusquement, ayant opinion que s'il reculoit, son honneur estoit perdu. Estans en ceste perplexite, & ne sachans quel conseil prendre parmi telles tempestes, voici vn autre coup de fiesche qui bleffa bien fort Laurent Almeida au visage. Neantmoins lui & Pierre Barret s'auancerent pour combatre de plus pres, en telle sorte toutesfois qu'ils ne pouuoÿent agripper ceste nauire. La guet re se faisoit à coups de canon avec perte de costé & d'autre, plusieurs bleffez estans contrains de se tirer à l'escart pour penser leurs playes. Les galeres & carauelles de Portugal qui pouuoÿent, nonobstant le reflux contraire, aborder les nauires de Mirhocem, faisoÿent vn merueilleux deuoir. Pelage de Soufe fut le premier qui sauta de son vaisseau dans celui des ennemis, estant suiui d'Ambroise Pazagne, de Fernand Petrejo d'Andrade & de plusieurs autres, marris d'estre les derniers pour auoir part à l'honneur: & ainsi cestui là fut conquis, & ceux qui estoÿent dedans tuez & iettez en la mer. Jacques Petrejo capitaine d'une autre nauire, & deux autres capitaines en prindrent trois des ennemis, le reste se sauua à toutes voiles. Durant ce con flict vn More estimé sainct personnage entre les siens, s'estoit enfermé en la chambre d'une des nauires, où il demandoit secours de bon cœur à Mahumet: mais comme il estoit occupé à cela, vn coup de boulet vint dōner là dedans, & le mit en morceaux. Or comme la marée se haussoit, Pelage de Soufe & Jacques Petrejo tirerent les nauires conquises vers celle de Laurent Almeida: lors voyans que lui & la plupart de ses gens estoÿent tellement bleffez qu'ils seroÿent inutiles pour lors, ils l'exhortent de laisser en paix la nauire capitainesse des ennemis, & se contenter de la battre de loïn & les autres aussi à coups d'artillerie. Laurent reietta ce conseil, disant que les nauires des ennemis estoÿent grandes & bien equippees: qu'il valoit beaucoup mieux s'en saisir (comme il esperoit) que de les mettre en fond.

9. L E lendemain, Melichiaz, lequel estoit demeuré hors l'emboucheure du fleuve, ayant le vent propre & la marée à propos se vint ioinde avec sa flotte à celle de Mirhocem. Tel reuifort donna courage aux ennemis & troubla les Portugallois qui n'auoyent point encores descouuert Melichiaz. Ceux de Chaulen firent de grands cris & signes de ioye, monstrans assez qu'ils ne cerchoÿent ni souhaitoyent autre chose que la mort d'Almeida & des siens. Les capitaines s'assemblerent vers la minuiet pres de leur general pour auiser à ce qui estoit expedient: & d'un commun accord estimerent que ce seroit vne grande temerité d'arrester plus longuement en ce port, veu que la plupart des soldats Portugallois estoÿent naurez, & par trop harassez des combats du iour precedent, que leur general estoit bleffé

*Desfais de
Portugallois
par la flotte de
Cambise vain-
te avec celle
d'Egypte: la
mort de Lau-
rent Almeida
& de plusieurs
autres.*

en deux endroits de son corps, les nauires percees en diuers lieux & en grãd danger, les ennemis terribles & furieux à cause du secours qui leur estoit venu, les habitans de Chaul ennemis mortels des Portugallois. Et pourtãt qu'il falloit attendre que la maree remontast, & que le vent fust leuë pour hausser les voiles, & s'elargir en mer. Estans de meurez de cest arrest, apres minuiet ils font voile, mais ce ne peut estre si coyemët que les ennemis n'en sentissent quelque chose : tellement qu'ils suiuent promptement la flotte de Portugal, & arrestent à coups de traits la nauire d'Almeide qui voguoit derriere les autres, & finalement la vienent inuestir : puis l'ayans percee d'un coup de canon, elle commença à puiser force eau en la sentine, tellement qu'il n'estoit plus possible que le pilote la peust gouverner : & en fin elle demeura arrestee en des engins de pescheurs cachez en l'eau. Pelage de Souse apperceuãt cela, attache sa galere avec vn cable à ceste nauire, & fait tirer avec auiros le plus roidemët qu'il estoit possible : mais elle demeroit tellement arrestee, qu'on ne la pouuoit remuer de là. Melichiaz voyant qu'elle estoit en sa puissance la laissa pour enuolopper la galere de Souse. Ceux de dedans se sentans trauaillez de leurs blesseures, combats & mesais-ses, tellement qu'ils ne pourroyent faire teste, sans en dire rien à Pelage de Souse coupent le cable : quoy fait le flot de la mer emporta la galere de telle viffesse, que Pelage n'y sceut donner ordre, quoy qu'il tempestast contre ses gens. Finalement il se vint ioindre à Pierre Barret, Edouard Melio, Jacques Petrejo & autres capitaines qui s'estoyent arrestez à leur grand regret, ne pouuans approcher de leur general pour combattre avec lui, à cause de l'impetuositë du reflux. Laurent Almeida fut admonnestë par ses soldats d'entrer en vn brigantin fort leger que lon auoit apprestë pour cest effect, afin de se retirer pres de ses capitaines. Ce conseil l'irrita, & menaca fort asprement ceux qui lui tenoyent tell langage, disant que ce lui seroit deshonneur de fuir vn danger où ses compagnons demeureroient. Qu'il ne craignoit point la mort, ains les reproches : & dauantage qu'il s'asseuroit qu'avec ses soldats il pourroit garder son vaisseau, en attendant que la maree donnast moyen aux autres capitaines de venir au secours. Il auoit lors cent hommes avec soy, dont les septante estoient blessez, & n'en restoit que trëte qui peussent manier les armes. Il les disposa en trois bandes, donnant la charge de l'une à Manuel Pazagne pour defendre le tillac, l'autre à Francisque Nabaise pour garder le chastelet de la prouë : & retint la troisiëme pour demeurer en poupe. Les ennemis voyans avec quelle resolution les Portugallois se disposoyent au cõbat, ne voulurent point venir aux mains avec gens, courageux, vaillans, & reduits à l'extremité, en laquelle il auient que les plus timides ne voyans plus d'esperance s'eschaufent tellement qu'ils font merueilles & estonnent ceux qui les assaillent. Ils se contenterent donc de frapper de loin, & n'oyoit on autre chose que coups d'artillerie, si que la fumee espaisse des canons obscurcissoit la clartë du iour. Les Portugallois canonnoyent furieusement de leur costé. Laurent assistoit & encourageoit les siens, faisant deuoir de braue capitaine. Mais ayant eu la cuisse brisee d'un coup de trait, il se fit asseoir dãs vne chaire pres du masts de la

nauire

nauires, & de là cōmandoit à ses soldats, les exhortant de faire preuue de leur magnanimité. Cōme il parloit tout haut vn autre coup lui dona dās la poitrine, & lui osta vie & voix ensemble. La nauires estoit lors desnuee de la plus part de son equippage, & couuerte, faisoit eau en plusieurs endroits. Au moyē de quoy les ennemis approchent de tous costez pour sauter dedans, dont ils furēt viuemēt repoussez par trois fois. Mais en fin pource que les Portugallois n'en pouuoient plus ils entrēt dedans, & tuent ce qu'ils rencōtrēt, où derechet il y eut grāde resistāce, pource que les soldats de Laurēt voyās que c'estoit fait de leurs vies se defendoyēt de tout ce qui leur restoit de viueut. Melichiaz considerant que ce seroit dōmage de perdre des hōmes si vaillans, sauua la vie à vingt qui restoyent, tous les autres ayans esté mis à mort au nōbre de quatre vingts, & de septante es autres vaisseaux: au nombre desquels y auoit plusieurs braues gentilshommes & capitaines. Les autres qui n'auoyent peu donner secours à cause du reflux, & voyans la nauires prinse & mise en fond ne voulurent s'auancer inutilement: ains gagnans le haut à plaines voyles prindrent la route de Cananor, d'où ils enuoyerēt Pierre Gnaye en Cochim auertir le viceroy de la mort de son fils. Ce message contrista & fit pleurer à chaudes larmes tous les Portugallois: car aussi Laurēt Almeida estoit vaillāt entre tous autres, & si gracieux qu'il gaignoit les cœurs de chascun, si entier & rōd en tous ses deportemēs que l'on aperceuoit qu'il se cōformoit à l'exemple de son pere: tellement que il fut merueilleusement plaint & regretté de tous ceux qui l'auoyent connu. Le Roy de Cochim troublé d'vn tel accident alla inconrinent trouver Almeida pour se douloir avec lui & le consoler le plus doucement qu'il seroit possible. Encor qu'Almeida eust monstré auparauāt en diuers lieux sa constance & grādeur de courage, elle n'apparut iamais mieux qu'alors: car quoy qu'il eust perdu son fils vnique, vertueux d'esprit & de corps, toutesfoi il se contint si constamment que tous confesserent qu'il n'estoit point besoin de le conforter. Au contraire il admonnestoit les autres de ne pleurer point, disant qu'il n'auoit point prié Dieu de donner longue vie à son fils, ains l'amour de pieté & iustice: que le cours de la vie humaine estoit brief, & eternal le loyer de vertu: rapportāt & attribuāt à la prouidence de Dieu tout ce qui estoit auenu, & lui rendāt graces de ce qu'il lui auoit pleu terminer la vie de son fils d'vne mort honneste: s'assurant aussi qu'il auoit part aux biēs qui ne petissent iamais. Il adioustoit, Que celui qui a aimé autrefois mon fils, mostre par armes & nō par larmes, ceste affection: car ie delibere venger sa mort, & celui qui se montrera le plus volontaire en tel exploit sera estimé de moy le meilleur ami que mon fils ait eu de son viuant. Disant cela & autres telles choses, plus il se rendoit admirable, plus contraignoit il la compagnie de deplorer l'accident de son fils. Car selon que son cœur se monstrois haut & constant, moins l'estimoit on meriter telle visitation.

10. C O M M E ces choses passoyent en Inde, le roy de Portugal auoit aussi la pensée tournée aux affaires d'Afrique. Il y a vne ville en Barbarie nommée Azamor, en la coste de l'Océan, comme Safin, dont elle est eslongnée

Guerre d'Azamor en Afrique & les diuers accidens d'icelle.

de quarãte lieues vers Septentrion, arrousee d'un grãd fleuve, qu'aucuns estiment estre Asama, lequel passe à trauers la ville. Le roy Emmanuel desiroit fort se rendre maistre de ceste place, & se persuada de la pouuoir aisement emporter par la venue d'un certain Prince more nommé Zejam, seigneur de Mequineze, ville assize en terre ferme, non gueres loin de Fez, & qui cõmandoit à plusieurs bourgades & villages d'alentour. Icelui estoit frere de par pere de Mahumet autresfois roy de Fez, qui auoit espousé aussi la sœur de Zejam. Nazzare frere de Mahumet & son successeur au royaume de Fez, aussi fidele que les autres Mores, eut si peu d'esgard à l'alliãce affermie par parentage & affinité qu'il chassa Zejam de ses pays. Icelui despouruillé de sa dignité & de ses biens se retire en Azamor, estimant que ceux de la ville le feroient leur seigneur, pour l'honneur qu'ils luy portoyent. Mais ils n'y voulurent pas entendre pour lors, à cause de quoy Zejam frustré de son attente, vint trouuer le Roy Emmanuel, & lui iura fidelité, promettant lui conquerir Azamor & plusieurs autres villes, moyennant quelque nombre de nauires pour l'execution certaine de ces entreprises. Adioustant qu'il auoit plusieurs parens, allies, amis & seruiteurs dans Azamor, dequels il s'asseuroit qu'ils liureroient tresvolontiers ceste place, estans irrités des torts qu'on leur faisoit, & incitez, par le bruit du doux traitement que le Roy de Portugal faisoit à diuerses nations qui se rangeoyent à son obeissance, de se mettre en sa protectiõ. Emmanuel adiousta foy aux paroles de ce More, voyãt que c'estoit un roy, chassé indignement par un autre, esmeu de iuste douleur, & qui ne voudroit mentir, attendu qu'aucun profit ne lui en reuenoit ioint aussi (qui est le principal) que de nostre naturel nous tenons aisément pour desia fait ce que nous desirons voir executé. Pourtant il fit promptement equipper vne petite flotte sous la charge de Jean de Menefez, qui fit voile de Lisbone le vingtsixiesme iour de Iuillet l'an mil cinq cens & huit. L'armee estoit de quatre cens cheuaux & deux mille hommes de pied. Finalement la flotte arriva à l'emboucheure du fleuve, & de nuict, ayant la marée propre, le general Menefez fit couler ses vaisseaux iusques pres des murailles d'Azamor, & commença à assaillir la ville. Les habitans courent incontinent aux armes, se defendent courageusement, lancent toutes sortes de traits, s'aident de torches ardantes, & notamment ils dardoyent par engins des pieces de bois poissées & embrasées contre les vaisseaux de Portugal afin d'y mettre le feu. Dauãtage, ils sortirent en grosses troupes hors des portes, courans ça & là, pour empescher l'entree aux assaillans. Menefez attendoit secours de Zejam, lequel s'estoit auparavant retiré de Portugal en Azamor. Mais comme les hommes, sur tout les Mores, sont inconstans & legers, icelui ne se souciant plus de sa promesse, du commencement amusoit Menefez, le paissant de belles paroles: puis en fin il vient à machiner tout ouuertement contre les Portugallois. Car il s'accorda tresbien avec ceux d'Azamor, amassa seize mille hommes de guerre, avec lesquels il faisoit des sorties en la campagne au long du fleuve, pensant à tous moyens possibles pour endommager la flotte. Il y auoit huit mille soldats en garnison dedans la ville pour repousser les
assaux

assaux des Portugallois. Ce nonobstant Menefez print terre & se campa avec ses troupes. Or dautant que ces lieux là sont propres à dresser embusches, les Mores posèrent certaines bandes de soldats en trois endroits bocageux entre la ville & le bord de la mer: puis sortirēt avec le reste de leurs troupes en campagne, & vont trouuer les Portugallois qui les receurent. Menefez partit la petite armee en trois bataillōs, le premier ayāt cent cheuaux conduits par le gouuerneur de Tentugal, le second de cent cinquante cheuaux, sous la charge de Iean Mascaregne: lui commandoit au troisieme compose de deux cens cinquante cheuaux. Au milieu de ces trois bataillons estoient les gens de pied bien couuerts & asseurez. Lors il charge viuement les ennemis, qui ne pouuans soustenir la violence de ce choc se retirerent dans la ville beaucoup plus vistement qu'ils n'auoyent delibere. Car leur intention estoit de reculer au petit pas, iusques à ce qu'ils eussent attiré Menefez dedans l'embusche, afin de l'enclorre de toutes parts & tailler en pieces lui & ses troupes. Les habitans d'Azamor craignans que les Portugallois qui touchoient aux espauls des Mores n'entraissent pêle melle dās la place avec eux, fermerēt les portes. Alors les ennemis cōtraints de tourner visage, iouans à tout perdre, recommencent le combat, où les vns & les autres se monstrerent merueilleusement resolu. Ceux qui estoient embuschez debusquent soudainement, & donnent d'estrange furie à trauers les troupes de Portugal. Le gouuerneur de Tentugal & Mascaregne demeurez derriere par le commandement de Menefez, soustindrent vaillamment ceste charge. Sur ce Zejam approche avec vn gros bataillon pour secourir ses gens, & des villages voisins accouroient à la file force gens de cheual pour attrapper & racler tous les Portugallois. Ce que considéré par leur general, il fit la retraite en tel ordre & si dextrement que pas vn de ses soldats ne bransla pour quitter son rang. Les forces disposees pour le rafraichissement, oyans sonner la retraite, mirent en route les Mores sortis des embusches, & Menefez demeuré en l'arrieregarde faisoit teste aux plus eschauffez d'Azamor, battant ceux qui s'approchoient trop pres. Par ce moyen il regaigna le lieu où il s'estoit campé, & de là se retira es nauires. Il perdit seize hommes de cheual en ce conflict, entre lesquels estoient quelques gentilshommes & braves capitaines. On sceut quelque temps apres que les ennemis y auoyent laissé mil trois cens soixante cinq des leurs tuez sur le champ. Iean Roderic de Menefez estāt tombé par terre, pource que son cheual fut tué entre ses jambes, se trouua en extreme danger de sa vie, les ennemis l'assaillans de tous costez: mais deux vaillans capitaines, à fauoir Iean l'Homme, retourné des Indes en Portugal, & Iaques Fernand de Far escarterent les assaillans à force d'armes, & le tirerēt de la presse, le faisant monter sur le cheual d'un capitaine More, qui auoit abatu d'un coup detrait le cheual de Roderic, & lequel fut tué au combat de la main de Fernand. Menefez pensant la dessus à la perfidie & trahison de Zejam, considerant aussi qu'Azamor estoit forte & bien gardee, tellement que ce seroit tenter vne chose impossible de pēser se rendre maistre d'une telle place, resolut de ne s'arrester pas plus long temps deuant. Pourtant il fait leuer

les anchres & mettre la voile au vent. Or dautant que le reflux estoit foible à cause du decours de la Luné, tellement que le fleuve ne pouuoit soustenir les nauires sur son courant, ce qui descourageoit les pilotes & matelots de desfanchrer & se mettre à la voile, il auint que quelques petis vaisseaux eschouerent & coulerent en fond : mesmes les ennemis vindrent enceindre vne nauire de charge qui estoit asablee, & occirēt trente forçats, lesquels auant mourir tuerēt dixhuit Mores. Ceste nauire fut bruslee par ceux d'Azamor. Quant aux autres, Menefez ayant gaigné la mer print la route du destroit de Gibraltar. Plusieurs estimerent depuis, & tres sagement, que ceste guerre auoit esté conduite plus par vne singuliere prouidence de Dieu, que par le conseil des hommes. Et sembloit bien que Dieu, voulant alors espar gner les Portugallois, s'estoit serui de la mauuaise conscience de Zejam & de la legereté d'Emmanuel en armant ceste flotte pour assaillir hors de saison avec vne poignée de gēs ceste ville si puissante. Car si les affaires eussent prins vn autre train, les Portugallois ne pouuoient faillir d'estre exterminés ou de receuoir vne fort grande honte, auāt que le Roy eust eu moyen de les secourir à temps. Menefez elloigné d'Azamor, conquist au destroit quelques nauires ennemies, & par le commandemēt du Roy establī Jean Roderic de Menefez gouuerneur de la ville d'Alcassar, où il y auoit ia vne garnison de Portugallois.

Siege d'Arzile. prise par les Mores, le chasteau assiegé & secouru, & Arzile reprise par les Portugallois: avec plusieurs notables euenemens.

EN ces entrefaites, nouuelles vindrent que le Roy de Fez marchoit avec vne puissante armee pour venir assieger Arzile. Ses troupes auoyent esté si dextrement amassees, que personne n'en descouurit rien, si nō quand on les apperceut en cāpagne, equippees de toutes munitiōs & machines de guerre. Il auoit vingt mille cheuaux, & six vingts mille pietons. Vafque Coutin gouuerneur de Borbe commādoit lors dedans Arzile, lequel à l'approcher de l'armee ennemie donna ordre de faire surprendre quelques Mores, pour sauoir d'eux où estoit le Roy de Fez. Cela fut executé, & entendit on le dessein de ce Roy, le grand nombre de ses troupes, & autres choses dignes d'estre sceues en tel accidēt. Pourtant Coutin escriuit prōptement à Edouard de Menefez gouuerneur de Tingi & à Jean de Menefez qui costoyoit la Barbarie avec quelques nauires, à ce qu'ils sceussent en quel danger estoit Arzile. Le dixneufiesme iour d'Octobre, l'an mil cinq cens huit, le Roy de Fez se campā avec toutes ses forces deuant ceste place là. Et le lēdemain fit dresser la batterie, assaillir les assiegez d'vne infinité de flesches, preparer des mantelets & eschelles, & raser les murailles. Il n'y auoit lors que quatre cēs soldats pour garnison dans la ville, lesquels resistoyent vaillammēt, & souffrirent l'ennemi tout ce iour iusques à la nuict. Au matin du iour suiuant ils voyent la ville assiegee, les corps de garde posez, les tranchees de l'ennemi, son artillerie placee, & ses troupes rangees pour combattre. D'auantage, pour empescher l'entree du port aux nauires, les assiegeās auoyent logé plusieurs compaignies çā & là sur le bord de la mer, dressé des gabios, rempli de terre & de sable force tonneaux opposez au canon des assiegez, disposé leur artillerie pour battre & mettre en fond les vaisseaux qui voudroyēt amener secours. Plusieurs autres avec arcs, arbalestes & harquebou-

zes de ce temps là visoyent droit à ceux qui se monstroyēt sur les murailles, descochans & tirāns aussi soudain que quelqu'un se descouvroit tant soit peu, tellement que personne n'osoit se presenter sur le rempar. Outreplus, apres auoir auancé certains mantelets & autres tels engins, ils commencerent à sapper les murailles, de telle vistesse (à cause que gens frais venoyent de moment en autre soulager les trauaillans, & qu'ils ne cessoyent tant peu que ce fust) que le mesme iour la pluspart des murailles fut renuersée par terre. Ayans fait bresche raisonnable & commode, ils viennent à l'assaut. Mais Coutin estant sorti sur eux avec cinquante cheuaux, retint leur impetuositē, iusques à ce qu'ayant eu le bras percé d'un coup de fiesche il se retira au chasteau, laissant derriere George Barret son gēdre pour faire tēte aux ennemis, iusques à ce que son bras fust pēlé. Surce il auint que les assiegez accablés de la multitude des Mores, & entendans la retraite de leur chef, se retirerent au grand pas vers le chasteau. C'estoit pitié d'ouir les cris des femmes, de voir l'irresolution des soldats, & l'estrange confusion où la ville fut lors reduite, n'y ayāt personne qui prinst parti en vne si soudaine calamité, ou de demeurer, ou de fuir, ou de viure & mourir vaillammēt. Les ennemis taillerent en pieces tout ce qui se trouua deuant eux, escarbouillās les testes des enfāçons contre le paué & les parois, & n'oublierēt sorte quelconque de cruauté qu'ils ne fissent sentir aux vieilles & ieunes gēs, aux filles & femmes, sans respect d'age ni de sexe. Comme chascun fuyoit de tous endroits vers le chasteau, & les vns empeschoyēt les autres d'entrer, il s'esleua vne pitieuse huce & lamentation de ceux qui demeuroyent derriere, specialemēt des femmes avec leurs petis enfāns en leurs bras, demandans à hauts cris & chaudes larmes qu'on eust au moins cōpassion de leurs petis: ce qui faisoit mourir d'ennuy ceux du chasteau, lesquels desiroyent bien donner entree à ces miserables, mais c'estoit chose impossible. Or dauāt que les ennemis poursuuioyent impetueusement les fuyards, & taschoyēt d'entrer avec eux dans le chasteau, les portes furent fermées à toute peine, & plusieurs laissez à la merci de l'ennemi qui les esgorgea cruellement. Puis la ville exposée au pillage fut saccagée.

Les nouvelles de ceste prinse furēt incontīnēt portées à Menesēz qui diligentoit pour se ietter dās Arzile, ayāt fait venir renfort de vaisseaux & de capitaines. Estāt au port il voulut soudain prēdre tette: mais la tēpeste & agitatiō de la mer l'en empescha. Car ce port est tresdāgereux & perilleux à cause des bācs, sur tout en tēps de tourmēte. Outre cela il ne fauoit si le chasteau estoit en la puissance des ennemis, ce qui le mettoit en perplexité: à cause que si ainsi eust esté, on ne le pouuoit tenir que pour vn estourdi de gaigner le bord avec si petite troupe pour cōbatre oquerremēt à son desauātage vne si puissante armee. Par ainsi il demoura trois iours à l'ancre, ne sachant bonnement voir ce qui estoit meilleur de faire en ce brouillis d'affaires. Finalemēt il enuoye deux soldats de qui il se fioit, dās vn esquiv biē équipé & vogaūt en diligēce, pour fendre les vagues, & approcher du chasteau regardāt sur la mer. Ces deux, au grād hazard de leurs vies, trauerfent les flots impetueux, les coups de canon & d'autres traits gressans contre

eux des corps de garde posez sur le riuage, & se rendent pres du chasteau en despit des ennemis. Ceux qui y estoient enclos les voyans monstrent incontinent par vne fenestre les estendarts portans les armoiries du Roy, crians souuent & à haute voix Portugal, Portugal. Les femmes leur presentoyent force petits enfans pendans au col des meres, afin d'esmouuoir tant plus ceux de dehors à leur assister en ceste pitoyable extremité. Dauantage, Vasque Coutin enuoya quelques robustes & experts nageurs auec lettres enuolopees de circ vers Menesez, auquel il faisoit entendre le danger pendant sur les testes des assiegez, l'instruisant au reste du meilleur moyen qu'il pourroit tenir pour faire entrer nouuelles forces au chasteau, & notamment des viures, qui y estoient fort courts alors. Menesez fait embarquer nombre de soldats en des vaisseaux propres à subsister au port ainsi fascheux, & fait publier à son de trompe que tous les forçats qui pour leurs forfaits estoient condânez à demeurer en galeres perpetuelles, ou qui y demeuroient pour vn temps seroyent deliurez, pourueu que le lendemain ils fissent leur deuoir de bien combattre en terre: promettant au reste à celui qui descendroit le premier la somme de cinq cens escus pour recognoissance & loyer de sa prouesse. Cela fait, il suiuit à l'heure assignee le flux de la mer, auançant sa flotte à force de rames. Vasque Coutin qui les regardoit du chasteau, fit incontinent sortir par vne fauce porte, suiuant ce qui estoit arresté entre lui & Menesez, trente hommes à cheual, & le reste des autres gens d'ordonnance à pied, afin de donner secours à ceux qui descendoient des nauires en terre. C'estoyent les plus asseurez soldats qui fussent au chasteau: & Menesez estoit auerti par ce signal, auaoir par leur sortic, de mettre ses troupes en terre. Pourtant il fait promptement mettre le feu à toutes les pieces, & canonne furieusement les ennemis, qui grandement estonnez de la mort de plusieurs des leurs se retirerent en grand trouble & desordre assez loin du riuage. Alors chascun de ceux qui estoient es nauires fait tous ses efforts d'estre le premier à bord, l'un desirant gagner les escus promis, l'autre racheter son bannissement, mais la plupart alloit à teste baissée à trauers le danger pour acquerir honneur. Le premier qui mit pied à terre fut Tristan de Menesez porté dans l'esquif de Jean Roderic, qui le secôda, & fut suivi de Henri de Menesez. Jean l'Homme aussi voguant en vn esquif fit le quatriesme. Quant aux principaux chefs des troupes, Jean Mascaregne Colonel des cheuaux legers fut le premier en terre. Si tost que les Chrestiens se furent emparez du riuage, les ennemis acourrent & commencent la charge, où les vns & les autres ne s'espargnerent nullement. Plusieurs demeurerent estendus sur la place, & y en eut tât de blesez qu'ils furent contraincts se retirer. Les Portugallois fausserent le plus prochain corps de garde, & en tout ce conflict ceux qui estoient sortis du chasteau se porterent vaillamment entre tous autres. Ils trainerent dans le chasteau six couleurines cōquises en ce corps de garde, & par mesme moyen Jean Mascaregne y mena deux cēs soldats avec quelques charges de pouldre, d'armes, de viures, & munitions de guerre. Ce secours remit sus les assiegez & les encouragea du tout à tenir bon, au lieu qu'auant telle auanture

re ils ne ſauoyent que faire eſtans deſtituez de toutes choſes neceſſaires pour ſouſtenir vn ſiege. Dauantage, les ſoldats auoyent tant enduré de faim & de ſoiſ, tant trauaillé, veillé, & combatu aux deſpens de leur ſang, qu'à peine ſ'en fuſt-il trouué vn pour aſſener vn bon coup. Le gouuerneur de Tentugal fut ſi griefuement bleſſé d'un coup de boulet à la deſcente, que ſans pouuoir ſubſiſter dauantage il ſe fit reporter dans Tingi, d'où il ſ'eſtoit embarqué. Manuel Coutin, Jean de Pimente & quelques autres braues ſoldats, qui ſ'eſtoient vaillamment portez ce iour là furent tuez ſur le champ. Mais combien que ceux du chaſteau euſſent eſté ainſi ſoulagez par la ſageſſe & vaillance de Menefeſ, ſi ne furent ils pas deliurez du tout. Car au lieu qu'ils eſtimoyēt que cela feroit deſcāper l'armee du Roy de Fez, le contraire auint: tellement qu'ils ſe retrouuerent à la guerre plus que iamais, leurs ennemis eſtans deuenus comme enragez d'une telle deliurance. Pourtant auſſi le Roy de Fez cōmanda que la baterie fuſt recommencee avec plus grande impetuoſité qu'au parauant, & pour accomoder ceſte baterie ſes gens ſe retrancherent de telle ſorte qu'il eſtoit impoſſible de les endommager du chaſteau. Ce qui mit en nouuelle peine les aſſiegez, leſquels neantmoins prenans courage en telle neceſſité reſiſtoyēt en toutes ſortes. Toutefois à la lōgue ils y fuſſent demeurez tous, ſ'ils n'eufſent eſté ſecourus d'ailleurs: d'autant qu'il n'eſtoit pas poſſible qu'une poignée de gens haraſſez peuſſent faire teſte longuement à une ſi puiſſante armee, laquelle auoit du tout reſolu de les auoir à quelque pris que ce fuſt: le Roy de Fez preuoyant bien de quelle importance eſtoit le recouurement de ceſte place, qui eſt une des clefs de ceſte coſte de Barbarie, & dont ſi les Portugallois demeuroyent maiſtres abſoluement, les Mores auoyent tōuſiours la guerre ſur les bras & à leur deſauantage, les Portugallois ayans une retraite ſi aſſeuree entre les autres, comme de fait il en auint ainſi puis apres. Mais il fut fruſtré de ſon deſir, & contraint faire place au bon heur des Portugallois, par le moyen qui ſ'enſuit.

MENESEZ auoit prié par lettres le roy Emmanuel, d'aſſembler ſecours en diligence. Dauantage il auoit enuoyé meſſagers en Andalouzie, pour obtenir quelques cōpagnies. Suiuant quoy Pierre de Nauarre, lors capitaine fort renōmé, auoit amené la flotte d'Eſpagne vers le deſtroit au hure de Gibraltar, ayant eſté inſtāment requis par Menefeſ de venir à l'aide en ceſte neceſſité. Les vns & les autres ſ'appreſtoyent à qui mieux mieux pour paſſer en Barbarie. Ce pendāt les Mores battoyēt furieufemēt le chaſteau, ſans dōner relaſche aux aſſiegez. Le premier qui amena gēs d'Andalouzie fut vn gentilhomme, dont ie n'ay peu trouuer le nom par eſcrit, preſident de Xeres, lequel arriua en Barbarie avec une nauire de guerre merueilleuſement toſt equippee & munie de ſoldats, d'armes, de viures, & de toutes autres choſes neceſſaires. Or pource que les ennemis ſ'eſtoyent ſi bien retranchez que l'artillerie du chaſteau ne les endommageoit aucunement, ce gentilhomme auançant ſon vaiſſeau ſ'arreſta en vn lieu qui deſcouuroit les ennemis. De là il cōmence à les canonner & meurtrir d'eſtrange façon, tellement que tout leur camp en fut troublé: & comme eux

pensoyent auoir leur reuenche, il se retiroit si viftement que c'estoyent poudres & balles perdues de tirer contre lui. Et de rechef il les costoyoit & fouëttoit si rudement, que le roy de Fez fut contraint camper en autre endroit. Pierre de Nauarre, vaillant & prompt à executer, ne tarda gueres avec son secours de six mil cinq cens hommes. Estant arriué, lui & Menefez entrent en deliberation de ce qu'ils auoyent à faire. Leur resolution fut d'assaillir promptement l'armee du Roy de Fez, remettant l'execution au lendemain. Ce Roy voyant vn tel secours pour les assiegez, estima qu'il ne falloit plus demeurer là: pourtant il fit mettre le feu dans la ville. Il auoit en son camp vn gentilhomme que Menefez print prisonnier en certaine escarmouche, & le traita fort humainement quelques iours, en fin desquels estant sorti par rançon, il ne se pouuoit saouler de faire entendre aux autres Mores la vertu & douceur de Menefez, auquel il enuoya messager expres demander sauſconduit pour lui aller faire la reuerence. Ce qu'ayant obtenu il vint droit au camp des Portugallois suiui de vingt cheuaux, & apres que Menefez & lui se furent entreſaluez & entretenus de propos d'amitié quelque espace de temps, finalement le gentilhomme More tint tel langage. Pour certain, seigneur Menefez, vous auez de beaucoup acru le los de vostre illustre nom, quād en tel temps ceste ville a esté secourue par vous contre vn Roy si puissant. Arzile vous en est grandement obligee: car sans vostre presence, le chasteau seroit maintenant en la main de nos gens. Mais vn si braue exploit ne pouuoit estre executé sinon par ceste noble vertu qui est tousiours apparue en vous. Menefez respond incontinent. Si i'ay remedié à la confusion en laquelle ceste ville estoit embrouillee, ceux qui voudront cōsiderer bié le tout, iugeront qu'il ne m'en faut pas attribuer grand' louange: car i'estime que cela ne m'appartient pas tant, qu'il fait à mô Roy, prince tres-excellent, lequel a acoustumé & peut mettre en besongne beaucoup d'autres capitaines plus habiles que ie ne suis. C'est vostre Roy qui a de quoy se glorifier, de ce que non seulement il a assailli l'une des villes du Roy de Portugal, (entreprise qui merite grand honneur) mais aussi s'en est rendu maistre par la force de ses armes. Pourtant i'estime qu'il s'est acquis vn perdurable nom d'auoir abatu les murailles, prins la ville, & battu le chasteau. Mais ie ne puis dire que ce soit chose bien ſeante à sa maieſté d'auoir fait mettre le feu es maisons & bastimens enclos dedans la ville. Chascun a encor les armes au poing. S'il pretend emporter la victoire, pourquoy est-il si mal-aiſé de reduire en cendres vne place dont il espere se rendre bien tost seigneur? Au contraire, s'il se sent foible, que lui sert de descharger sa cholere sur des toits & des maisons? A-il amassé vne si puissante armee pour faire la guerre aux paroïs & ſoliueaux? Nostre Roy n'a point le cœur bas ni failli, replique le More: c'est vn prince magnanime, & qui merite le rang qu'il tient. Il ne s'est point mis en campagne avec tant de soldats pour brusler des maisons, ains pour s'es-prouuer aux armes contre vn autre Roy fort renommé pour ses vertus. S'il n'est venu à bout de ce qu'il pretendoit, on ne l'en peut toutesfois iu-

stemement reprendre. Car le deuoir d'un Roy qui aspire à un renom digne de sa grandeur, giste à entreprendre choses grandes & difficiles. Mais la victoire n'est point en la main des hommes, ains en la deliberation & assistance de Dieu. Quant au feu, ie vous puis asseurer, qu'il a esté mis es maisons au desceu du Roy. Pourtant si tost que ie me trouueray deuant sa maiesté, pour lui faire entendre ce qui est auenu, vous verrez que lon esteindra incontinent le feu. Celadit, le More print congé, & par le commandement du Roy ses gens estaignirent, par grande adresse, tout l'embrasement. Plusieurs estimerent que le Roy de Fez estoit en la compagnie de ce More: car il desiroit fort voir Menefez, lequel estoit fort renommé & prisé de tous les peuples de Barbarie. Au reste, ce Roy voyant qu'il seroit fort malaisé de forcer le chasteau assez bien muni pour lors, & que le secours arriuoit de toutes parts pour le garder item que de là à peu de iours la flotte de Portugal apparoiestroit, & que ceste place estoit de telle importance, à cause qu'elle regarde l'Andalouzie, que si on ne l'emportoit au premier assaut, il y auroit fort grand dâger de tenir un camp plusieurs iours en ce siege: il resolut de ne perdre pas dauantage de temps en ceste guerre. Ainsi dōc il fit desloger son armee la nuict mesme & prendre le chemin d'Alcassarquibir. Le lendemain Menefez entra dans Arzile avec toutes ses troupes, enseignes desployees. Coutin, sa femme, & tous ceux qui s'estoyēt retirez dās le chasteau, lui allerent au deuant en grand ioye, le remerciaient & reconnoissans pour celui de qui ils tenoyent la vie.

42. L O R S que les premieres nouuelles de la venue du roy de Fez vindrent en Portugal, Emmanuel estoit à Euora. Incontinent il delibera de secourir au plustost ceux d'Arzile: suyuant quoy des le mesme iour il escriuit à toutes les villes de son royaume, aux seigneurs & gentilshommes, mandant que chascun eust à le venir trouuer, & despescha promptement quelques compagnies pour entrer es Algarues, afin de passer vistement de là en Afrique. Quatre iours apres il entendit par autres lettres de Menefez, que la ville estoit prinse, le chasteau assiégué & serré de bien pres. Ceste recharge lui fit prendre la poste à l'heure mesme, & sans estre suivi que de huit hommes au plus il se mit en chemin, courant iour & nuict sans prendre le loisir de guerres boire, manger, ni dormir. Car il consideroit qu'en moins de rien les choses tournent à rebours, & sont suiettes à des reuolutions fort estranges: & qu'il y a trop grand danger en affaires de guerre de laisser eschapper l'occasion de faire quelque exploit notable, si elle se presente, d'autāt qu'on ne la peut aisemēt recouurer. Que le fait d'un couard & vau-neant est le lameter en vain d'auoir failli un beau coup: au contraire qu'un capitaine vaillant & experimenté ne perd commodité quelconque d'excuter, ains l'empoigne soudain qu'elle se monstre. Dauantage qu'un Roy cōmet un crime horrible d'abandonner ses vassaux & suiets au besoin, sur tout quand ils sont en manifeste danger de leurs vies pour son seruice. Piqué de tels discours il posta de telle roideur qu'estant es montagnes qui separent les Algarues d'avec le royaume de Portugal, le courfier qui le portoit, rompu de trop grand trauail, fondit tout

*Diligence du
Roy de Portu-
gal à pourueir
aux affaires de
Afrique.*

à plat, & mourut entre les jambes de son maistre. Lors on lui vint dire que le secours estoit pres d'Arzile, que le chasteau auoit esté rafraîchi d'hommes & de viures malgré les ennemis. Pour cela il ne discontinua de courir, craignant que par diuerſes mines conduites par les Mores, ſuiuant l'auis qu'il en auoit receu, le chasteau ne fuſt renuerſé, ſi lon n'y pouruoit de bonne ſorte & bien toſt. Finalement il arriua en vne ville auioird'hui nommee Taire. Ceste ardante volonté, alegreſſe & diligence introyable du roy encouragea tellement les Portugallois que gens de cheual & de pied y acouroient de tous coſtez: tellement que cinq iours apres ſon entree dans Taire, ſ'y trouuerent plus de vingt mil hommes de guerre. Outreplus par ſon commandement, on amena de Liſbone pluſieurs nauires chargees d'artillerie de viures & autres munitions: & lui de ſa part donna ſoigneuſement ordre qu'elles fuſſent fournies de tout ce qui leur defailloit.

*Quel conſeil
on donna au roy
de Portugal
touchant la
guerre d'Afri-
que.*

M A I S comme il vouloit ſ'embarquer, on lui apporta lettres contenant que le ſiege eſtoit leué, & que le roy de Fez voyant que c'eſtoit perdre temps de ſ'arreſter dauantage deuant le chasteau d'Arzile, auoit caſſé ſon armee. Neantmoins Emmanuel faiſoit eſtat de paſſer en Afrique, dont il fut deſtourné par quelques vns eſtimez les plus ſages de ſon conſeil. Si vous voulez (lui diſoyent-ils) chaſſer l'ennemi de deuant Arzile, cela eſt ja fait: & ſi vous penſez ſubiuguer toute l'Afrique, les forces ci aſſemblees ne ſuffiſent pas pour executer ſi grande entrepriſe. Ce n'eſt pas choſe bien ſeante à vn tel roy que vous de mettre la main à vne choſe non neceſſaire, ou dont ne puiſſiez ſortir à voſtre honneur. Voſtre paſſage d'ici en Afrique ſera louable lors que vous ſerez aſſeuré de pouuoir executer à la louange de voſtre nom ce qu'aurez delibéré de faire auant que vous embarquer: car autrement vous n'en rapporterez que conſuſion. Pour ceste heure la gloire acquiſe par vos gens, qui ont braué le plus puiſſant roy d'Afrique, vous appartient à bon droit, & de là chaſcun peut coniecturer quelle opinion lon aura de voſtre vertu ci apres, en ce que vos capitaines & ſoldats ont fait receuoir vne telle honte au roy de Fez, & deliuré les aſſiegez. Or vous maculerez ceste gloire que vos ſuiets vous ont acquiſe, ſi vous faites choſe qui ne reſponde entierement à l'opinion que tout le monde a de vous. Si vous paſſez avec ceste armee en Afrique, n'eſtimez pas que lon ſe cõtente de deux ou trois batailles que vous pourrez donner aux Mores, mais il faudra que vous ſubiuguiez toute la Mauritanie. Si donc vous ne ſatiſſaites à l'eſperance des hommes, voila vne tache ſur voſtre reputation. Pour le preſent vous eſtes trop foible pour vn ſi grand exploit. Retournez en Portugal, appreſtez toutes choſes neceſſaires pour vne telle guerre, lors pourrez-vous entrer hõnorablement en Afrique: autrement on dira que ceux qui auront donné & prins ce conſeil ſont deſtourdiz, & ſi quelque malheur ſuruiet, ce ſera ſeſtir trop auant voſtre honneur. Ces conſeils de gens peu ſoucieux d'acquérir honneur en guerre deſtournerent Emmanuel de ſa deliberation, laquelle le rendoit renommé à iamais, ſ'il y euſt perſeueré: d'autant que les moyens de l'executer ſe preſen-

presentoyēt alors. Les Mores estoient gēs desloyaux, mutins cōtre leurs Rois, sans conscience qui les destournast tant soit peu de leurs vilenies & meschancetez. Ils n'auoyent point d'armes pour la pluspart: & dauantage plusieurs de leurs chefs estoient en grandes picques les vns contre les autres. Les plus forts fouloyent outrageusement les petis, qui pour reuence machinoyent diuerfes trahisons contre les grands. Outreplus, c'estoit chose certaine, que ces peuples remuans & amis de nouveauté ne faudroyēt de descouurir leur inconstance & perfidie à la premiere occasion qui leur seroit presentee: & estoit aisē, avec bien peu d'argent, d'acheter de quelques particuliers leurs Rois & leur pays. Au reste, ceste contree eust fourni à planté les viures d'une armee: car elle est tresfertile, le peuple y est friand d'argent, à cause de quoy chascun fust acouru au camp avec toutes sortes de viures, encor qu'ils eussent veu bruller & fourrager le pays. Er pour certain, si les Portugallois apres la victoire se fussent portez modestement, ces Mores se fussent aisément rangez à l'obeissance d'Emmanuel. Pourtāt, toutes choses venoyent lors à souhait au Roy de Portugal, pour le regard des ennemis: & quant aux Portugallois c'estoyent gens fideles, aimans singulierement leur Prince, qui ne demandoient que la guerre, resolu, hardis & vaillans au possible. Ioint qu'alors ils estoient tellement eschaufez, que presque tous les gentilshommes offroyent de leur part porter les armes à leurs propres despens en si belle entreprise. Si ceste courée du Roy tant aimé de ses suiets, & la diligence qu'il fit d'aller d'un des bouts de son royaume à l'autre, pour donner ordre aux affaires, esmut tellement chascun qu'en peu de iours on vid tant de milliers d'hommes se rendre alaigrement pres de sa personne: qu'eust-ce esté, s'il eust voulu passer à main armee en Afrique? D'autant aussi que le traject est court & aisē, il est certain que grand nombre d'Espagnols d'Andalouzie se fussent embarquez à son secours. Et puis qu'en fait de guerre l'occasion & l'opportunité des choses gouuernent tout, & que lon ne sauroit rencontrer meilleure commodité que celle que la hardiesse des assaillans & la frayeur des assaillis presente: il faut conclure qu'Emmanuel eust exploité avec tout heureux succez alors, s'il se fust aidé de l'ardeur de ses soldats contre les ennemis effrayez de la perte qu'ils auoyent receue. Finalement, & qui est le principal, la pieté & sainte affection de ce bon Prince, entreprenant des guerres en pays lointain contre les infideles, eust esté cause que toutes choses lui fussent venues à souhait. Quoy qu'il en soit, le Roy est digne de grand louange pour auoir pensé à vn si memorable exploit: au contraire i'estime que ceux qui le destournèrent d'un si beau moyen d'estre renommé à iamais, le conseillerent tresmal.

M A I S pour reuenir à nostre premier propos, combien qu'Emmanuel vist son coup rompu par l'auis de ses conseillers, il ne laissa pas de donner bon ordre à tout ce qui estoit de besoin. Car il renforça Arzile de gens & de munirions de guerre en grande abondance, y enuoyant aussi bon nombre de charpentiers & manœuvres pour redresser les maisons & murailles abatues, & rendre le chasteau plus fort. Car en ce temps Arzile estoit

estimee la plus forte place qu'eussent les Portugallois en toute la coste de Barbarie, à cause de sa situation, & pource que le pays d'alentour est commode & fertile. Il enuoya aussi vn present de six mille escus à Pierre de Nauarre, lesquels icelui ne voulut iamais prendre, disant auoir fait la guerre pour obeir au Roy Fernand qui le souldoyoit, & qu'il n'attendoit recôpense de ses trauaux & exploits d'autre que de celui duquel il estoit entre-tenu. Le gouuerneur de Xerez fit mesme response: ce nonobstant Emmanuel reconut amplement puis apres le seruice que ces deux lui auoyent fait.

Or apres qu'Arzile fut munie de viures & de nouuelle garnison, Menesez fit voile en Portugal, où il futh honnorablement & amiablement receu du Roy avec remerciement des bons seruices qu'il auoit faits. En ceste mesme annee Emmanuel & Ieanne fille de Fernand & d'Isabelle eurent debat touchant le limite des pays marqué par le feu Roy Iean & par les Rois de Castille, monstrant iusques où les Rois d'Espagne & de Portugal (sans entreprendre l'un sur l'autre) pouuoient chasser les Mores & s'auancer en pays estrange. Ce different fut appointé fort paisiblement & d'un tresbon accord entre les deux parties, & ainsi Emmanuel quitta vne grand' part de Barbarie, encores qu'elle semblaist estre de son partage, & en laissa la cōqueste aux Rois d'Espagne: d'autrepart Ieanne laissa ce qu'elle pretendoit en Ethiopie, ayant entendu que ce pays là estoit assigné aux Rois de Portugal. Sur la fin de la mesme annee, Emmanuel enuoya en Ethiopie au royaume de Congo grand nombre de prestres & de moines, pour y preschet & enseigner à leur façon les peuples de là, & les amener à la cognoissance d'autre religion que la leur precedente. Voila ce qui auint alors en Afrique & en Portugal.

Exploits d'Alfonse Albuquerque pour l'intelligence desquels le royaume, l'isle & ville d'Ormuz sont decrits: item les mœurs des habitans & la puissance de ce royaume.

Nous auons declairé ci deuant ce que fit Tristã de Cugne en son voya-^{13.} ge de l'Inde, premierement sur la mer, puis quelles villes il assaillit & força: comme il print port à Zacotore, se rendant maistre de la forteresse que le Roy de Zaxem y auoit fait bastir, & y laissant Norogne pour capitaine: & comme au partir de là il print la route des Indes, puis reuint en Portugal. Mais nous n'auons encores peu entamer le discours des exploits d'Alfonse Albuquerque, apres que Tristan l'eut laissé pour courir avec sa flotte la mer qui regarde l'Arabie heureuse, & faire viuement la guerre à tous vaisseaux d'ennemis. Or Alfonso qui estoit homme de grand cœur, estima que ce seroit se denigrer s'il faisoit le mestier des pirates, & resolut d'entreprendre choses plus grandes. Poutât il ietta l'œil sur le royaume d'Ormuz pour s'en rendre maistre. Ormuz est vne isle dans l'emboucheure du goulfe ou mer Persique, non gueres eslongnee de Caramanie, & semble auoir prins son nom d'Armuzé ancienne ville de Caramanie, dont la memoire & le nom se sont esuanouis avec le tēps. Peut estre aussi qu'Ormuz est vne peuplade de ceste ancienne Armuzé, & qu'elle en a retenu le nom. Elle a huit lieues de circuit, estant à six lieues de mer pres de Caramanie, & à vingt de l'Arabie du costé de Caramanie. L'isle est du tout sterile & seche: la terre si maigre, que de soy mesme, ni pour estre cultiuee, elle ne sauroit produire chose qui serue à la vie humaine. Il n'y a point de fontaines, ains seulement

trois

trois puits en toute l'isle, loin de la ville, par ainsi les habitans pour la pluspart s'aident d'eau de cisternes: & comme les Caramaniens, Arabes & autres insulaires voisins leur fournissent des viures, aussi apportent ils de l'eau douce de ces isles en Ormus. Dedans l'isle se void vne petite montagne, contenant en vn des costez grande abondance de soulfre: de l'autre elle fournit des pierres de sel en bon nombre. Il y a deux haures trefasseurez, l'vn à l'orient, l'autre à l'occident, estans separez l'vn de l'autre par vne langue de terre, s'estendant assez auant en mer. Les marchans Indiens, Perfes, Arabes & autres de diuers pays, s'aidans de la commodité de ces haures, commencerēt à frequenter en l'isle au moyen de quoy elle acquit tel bruit, qu'on y bastit vne ville en lieu plat, laquelle par succession de temps est deuenue l'vne des principales de ces quartiers là. Les rues d'icelle sont larges & droites, les maisons magnifiques, ayans plusieurs estages, & enrichies de toictz gentiment façonnez. Le palais du Roy est commode pour loger grand nombre de personnes, fort & bien muni pour resister à la violence des ennemis. Il fait extremement chaud en ceste isle, tellement que les habitans employent toute leur industrie en diuers remedes & moyens pour s'en garentir. Ces habitans sont presque tous Arabes & Perfes, adheras aux superstitions de Mahumet. Ils sont estrangement voluptueux adonnez à paillardise & medifance. Les femmes sont contraintes de voiler leur visage, crainte d'estre veues par autres que par leurs maris. Les hommes sont pour la pluspart d'assez belle representation, aiment fort la musique, & prennent plaisir à s'acoustre pompeusement. Ils s'exercent d'ordinaire aux armes, estudient volontiers, sur tout es histoires, ils tiennent conte des hommes scauans, les honorent, escoutent, & tiennent que c'est vn grand honneur d'estre disciples de telles gēs. L'estat public est gouuerné par quelques loix assez commodēs. Toutes marchandises & autres choses se vendent au poids: & celui qui vse de tromperie en cela est estimé de tous ennemi capital de la societé humaine & de l'equite qui doit entretenir ceste vie. Au reste, combié que l'isle ne produise chose aucune pour la nourriture & entretenement des insulaires: neantmoins il s'y trouue des fruiets, de la viande, & des delices en telle abondance, qu'à peine sauroit on trouuer pays au monde mieux fourni que cestui là pour bien accōmoder la vie des hōmes. Car il n'y a delices en Arabie, ni en Perse, ni en Inde, ni en autre regio quelcōque dōt les nauires puissent aborder à Ormus, qui ne soyēt apportees de toutes parts en ceste isle là. Par ainsi, quoy qu'elle soit sterile, toutesfois on la peut preferer à plusieurs pays trefertiles. Les Rois d'icelle ont amassé de grands thresors du reuenu des ports & peages, & se sont tellement agradis, qu'ils ont commandé finalement à bon nombre d'isles & de villes de Caramagne & Arabie. Iadis ils entretenoyent à leurs despens des armees assez grandes: mais en fin, leurs capitaines & lieutenās deuenus trefriches, & voulans se rendre maistres absolus, les Rois d'autre costé fondus en delices & oisueté, il auint que les Rois n'eurent de leur part que leur nom, & laisserēt le maniemēt de leurs finances & affaires à certains meschās seruiteurs qui gouuernoyent tout le plus mal qu'il est possible de penser.

Divers exploits de guerre des Portugallois contre plusieurs ports de mer du royaume d'Ormus.

TE L estoit l'estat de ce royaume lors qu'Albuquerque se resolut de 14. l'assuettir au Roy de Portugal. Or pour y paruenir, le vingtiesme iour d'Aoust l'an mil cinq cens & sept il fit voile de Zacatora vers le cap de Rozalgate en Arabie, appelee Corodum par les anciens geographes. Il menoit quand & soy six vaillans & renommez capitaines, asauoir Francisque Tauore, Manuel Tellio, Alphonse Lopez de Coste, Nonio Vasque de blâc castel, Antoine de Camp, & lean Nonio, lesquels commandoyent à quatre cens septante soldats en tout. Auec ceste petite flotte il delibera mettre pied à terre pour assaillir le riche & puissant royaume d'Ormus, & apres auoir costoyé & passé outre l'Arabie, approchant de Calaiate, premiere ville de ce royaume, à l'embouchure du goulfe, il offrit la paix aux habitans, moyennant qu'ils voulussent lui fournir des viures. Passant outre pour aller prendre port à vne ville nommee Curiate, les soldats voulans repaistre descoururent le meschant tour qu'on leur auoit ioué: car ceux de Calaiate auoyent rempli d'ordures les tonneaux de munition, & couuert quelque peu le dessus de diuerfes sortes de viandes, pour deceuoir les Portugallois, qui leur vendirent bien cher puis apres vne telle desloyauté. Quant à ceux de Curiate, ils aimerent mieux combatre tout ouuertement qu'vser de finesse. Ils auoyent lors pour gouuerneur de la part du Roy d'Ormus vn vaillant homme qui auoit fortifié le port d'vn bon rempar & d'vne tranchee avec tels corps de garde qu'il s'asseuroit de repouller aisément beaucoup plus grosses troupes que celles d'Albuquerque: & en ceste assurance il refusa la paix qu'Albuquerque lui presentoit. Sur ce refus Albuquerque ayant consulté avec ses capitaines, fait ranger ses gens & prend terre. Les ennemis qui leur vouloyent empescher la descente estoient au nombre de trois mille. Il y eut lors vne terrible meslee: toutesfois les Indiens furēt chafsez, leur tranchee & rempar forcez, & les Portugallois entrent finalement de pied & de teste dans la ville desnuee de secours, laquelle ils saccagent, puis y mettent le feu, ensemble es nauires qui estoient à l'ancre, & à celles aussi qui s'estoyent aucunement essargies en mer. De là les Portugallois aborderent pres de Mascate, qui est vne autre fort grande & riche ville d'Ormus, à vingt lieues de Curiate, assize en lieu plat, & ceinte de deux montagnes qui lui seruent de forteresse de part & d'autre, & s'estendans iusques au haure de la ville, rendent l'entree du port fort estroite. Les habitans auoyent tiré vn fossé bien large du pied d'vne des môagnes à l'autre, & icelui fortifié de leues de terre & d'vn double rempar, & pour s'en aider commodement, ils firent deux chemins fort estroits qui tendoyent de la ville à la mer à l'auantage des habitans. Neantmoins Albuquerque entra dans le port, & accorda avec le gouuerneur qu'il fourniroit viures (comme tributaire) à la flotte de Portugal. Comme on aprestoit le tout, voici arriuer vn des lieutenans du Roy d'Ormus avec renfort de gens, lequel tança fort aigrement le gouuerneur qui auoit promis les viures, & fit mettre toute la ville en armes, tellement qu'il y auoit enuiron quatre mille combatans. Albuquerque conoissant l'intention de ses ennemis fit battre furieusement ceste ville toute la nuit, & esbranler toutes les murailles non seulement pour

pour faire bresche, mais aussi pour effrayer les habitans & les tenir en continuel alarme. Le lendemain il partit ses troupes en trois, l'une desquelles il commit à Francisque Tauore, & lui commanda ensemble à Alphonse de Coste de se rendre maîtres du bout d'un des rempars ioinans à l'une des montagnes. Iean Nonio & Antoine de Camp qui menoyent la seconde troupe eurent charge de donner vers l'autre bout de montagne. Albuquerque & Mauuel Tellio qui commandoyent à la dernière bande resolurent de fausser la forteresse du milieu. Francisque Tauore fut le premier en terre & marcha droit au quartier qui lui estoit assigné : & quoy que les assaillies se defendissent avec une infinité de traits & de fleches, toutesfois ils furent repoussez, & le feu mis en leur tranchée, laquelle ils abandonnerent par contrainte n'y pouuans aucunement subsister. Albuquerque estoit aux mains au lieu qu'il auoit assailli & trouuoit forté partie. Nonio & de Camp assaillirent courageusement ceux qui gardoyent l'autre tranchée : mais en fin les Indiens furent rompus, mis en route & poursuivis, la ville prise, sacquée & bruslée, avec perte de huit Portugallois seulement. Apres que les troupes se furent rafraichies quelques iours, Albuquerque se rembarqua, & alla mouiller l'anchre près d'une autre ville nommée Soar, où il y auoit une bonne forteresse. Neantmoins le gouverneur d'icelle ayant nouuelles du dommage receu par ceux qui auoyent fait teste, se rendit incontinent. De là Albuquerque fit voile vers Orfazam ville forte & bien munie, en laquelle commandoit un brave capitaine, lequel toutesfois ne peut iamais retenir les habitans qu'ils ne deliberaissent de s'enfuir, si tost qu'ils virent ietter les anchres. De fait la nuit d'apres l'arriuee de la flotte de Portugal ils se retirerent à grand haste es montagnes prochaines avec tout ce qu'ils peurent emporter. Le lendemain la ville fut pillée & bruslée. C'estoit la dernière ville d'Arabie vers le Septentrion, des appartenances du royaume d'Ormus. Au desmarer de là Albuquerque print la route de l'isle mesme au haure de laquelle y auoit plusieurs nauires de Sarasins fort bien equippees pour combattre. Lors Albuquerque assembla en sa nauire tous les capitaines, pour auiser aux moyens de faire ceste guerre. Apres plusieurs disputes, finalement lon arresta d'un commun consentement que la ville ne pourroit estre conquise que premierement l'on n'eust mis a fond ou prins ces nauires, d'autant qu'il ne se pourroit faire que les Sarasins, qui tenoyent Ormus pour leur commune patrie, laissassent ainsi perdre la ville deuant leurs yeux : & que ceste flotte de nauires seruoit de forteresse à Ormus plus que toutes les murailles & tempars.

15. S V I V A N T cest auis on iette les anchres, & Albuquerque enuoye promptement faire sauoir au Roy qu'il estoit arriué avec sa flotte pour traiter de paix avec lui, & non pour esmouuoir trouble, pourueu qu'on ne l'empeschast d'establi en ceste coste de mer la domination du Roy de Portugal, sans laquelle condition il falloit se preparer à la guerre. Que le Roy Emmanuel estoit si vertueux & debonnaire Prince qu'il valoit beaucoup mieux pour viure en seureté s'assuiettir à lui, que de commander à plusieurs nations : pour ce aussi qu'une principauté mal reiglee est odieuse & mal voulue,

Negotiation d'Albuquerque avec le Roy d'Ormus, la guerre & sanglante bataille navale qui s'en ensuiuit.

& fuiette à des hazards & euenemens tresdangereux. Que la façon de dominer & la protection du Roy de Portugal estoient vne seure retraite & defense à tous ses suiets: & que si le Roy d'Ormus se rendoit vassal d'icelui, c'estoit le vray moyé de se maintenir cōtre les entreprises & efforts de tous ennemis: autrement, il essayeroit d'obtenir par les armes ce qu'il ne pourroit auoir par douceur. Le Roy effroyé du bruit des exploits d'Albuquerque en ceste course, monstra semblant de ne vouloir sinon la paix: & despescha incontinent vn de ses domestiques avec lettres & presens à Albuquerque, lequel receut bien les lettres, mais il refusa les presens, disant ne vouloir rien prendre que premierement lui & le Roy d'Ormus ne fussent d'accord, à quoy enclinoit la volonté de ce Roy, ce sembloit. Mais il remettoit les affaires du iour au lendemain, iusques a ce que la flotte qu'il attendoit fust dedans le haure. Cependant quelques Portugallois asseurez sur sa parole alloient & venoient par la ville. Mais si tost que les nauires d'Ormus chargees de gens de guerre furent dedans le port, le Roy fit empoigner prisonniers tous les Portugallois qu'on trouua par la ville. Puis il fit arrester & ranger les grands vaisseaux au long de la descente, & commanda que les autres legers s'eslargissent en haute mer, afin que si Albuquerque accrochoit ceux du bord, les autres peussent cingler à toutes voiles & inuestir tellement la flotte de Portugal, que tout demeurast enucloppé à la merci des Indiens. Le lendemain, Albuquerque ayant descouuert cest ordre conut bien que ses ennemis s'approchoient au combat: ce qu'il accepta volontiers. Car il fit leuer les anches, & donna dedans les grands vaisseaux qui gardoyēt le haure. Cojearat qui commandoit de la part du Roy d'Ormus aux esquifs & autres vaisseaux legers qui auoyent prins le haut, tournant voile vers Albuquerque, commença à s'en approcher pour l'enclorre. Alors y auoit tresaspre combat entre les nauires de Portugal & celles qui gardoyēt l'entree d'Ormus, & la fumee de l'artillerie des deux costez ostoit la veue du iour aux vns & aux autres. Ce qui seruit à Cojearat pour approcher seurement, & de telle sorte que ses soldats endommageoyent ceux d'Albuquerque non seulement à coups de canon, ains aussi avec les dards & fleches. Le combat s'eschaufa si asprement qu'il sembloit que la terre deust s'ouurir, & que le ciel eust perdu sa clarté. Le Roy estoit au faiste d'une haute tour, regardant en grande perplexité toute ceste meslee. Plusieurs femmes enceintes, estonnees de l'horrible bruit de l'artillerie, auorterent. Or apres que beaucoup de vaisseaux eurent esté brisez, les autres regaignerent le haut: tellement que les Portugallois deliurez du danger qui les menaçoit de telle part, retournerēt assaillir plus à leur aise les grands vaisseaux anchez au port. Toutesfois ils trouuerent gens qui leur resisterent courageusement: non obstant quoy la nauire en laquelle estoit le Prince de Cambaje, venu peu auparauant à Ormus, & qui se monstra lors fort vaillant, fut mise à fond, ensemble vne autre, dans laquelle commandoit vn nommé Melichiaz. Les autres vaisseaux ayans perdu la plupart de leur equippage par le canon, ne pouuans plus resister, ceux qui estoient dedans se iettent en la mer, afin de se sauuer à nage, voyans tout autre moyen leur defaillir.

Incon-

Incontinent Albuquerque fait embarquer ses soldats en des esquifs & leur commande de tuer ceux qui taschoient d'eschapper eu nageant. Les vaisseaux qui eurent le loisir & l'adresse de s'elargir en mer, se garantirent à force de rames & de voiles. Mais il y en eut vn qui demeura ferme, & qui auoit vn pilote vaillant & resolu au possible. Les Portugallois entrent dedans & ne trouuent personne : car les soldats s'estoyent cachez en la sentine : tellement que les Portugallois estimas que ce vaisseau fust vuide y laissent quelque petit nombre de gens, & se mettent à pourfuiure les autres vaisseaux qui fuyoyent. Ceux qui s'estoyent cachez, sortent soudainement de la sentine, & se ruent sur les Portugallois, qui se voyans en telle extremite commencent à crier à haute voix apres leurs compagnons pour estre secourus, & cependant font teste aux assaillans. Ceux qui venoyent à l'aide dans des esquifs, ne peurent tant diligenter que les assaillis n'eussent esté blesez tous en diuers endroits : mais estans secourus, leurs ennemis furent hachez en pieces pour la pluspart, les autres se lanceret dans la mer où presques tous furent tuez, quelques vns en petit nombre gagnerent le riuage. Or il y eut tel carnage en ceste bataille que la mer sembloit regorger de sang, & les vagues estoyent si vermeilles qu'on auoit horreur de les regarder. C'est chose certaine que les Indiens furent tellement effroyez quand ils apperceurent la victoire tourner du costé des Portugallois, qu'ils se transpercoyēt de leurs propres fiesches, comme on le conut par les corps morts tuez de coups de fiesches lesquels vindrent à bord : car il n'y auoit aucun archer entre les Portugallois. George Barret qui estoit entré dans ce vaisseau pour secourir les soldats assaillis, comme dit a esté, se sentant à l'ancre pres de la ville, & que ce vaisseau estoit bien muni d'artillerie, fit lascher les pieces de grāde furie & par plusieurs fois, pour faire bresche. Les Portugallois ayans ainsi chassé & desfait leurs ennemis, mirent vne partie des vaisseaux à fond, & en bruslerent quelques autres : quoy fait Albuquerque approcha plus pres de la ville, & vint se rendre au deuant du palais du Roy. Combien que ceux qui estoyent là dedans fussent saisis de grande frayeur, neātmoins ils descocherent vne infinité de fiesches pour repousser les Portugallois, tellement qu'Albuquerque, Menefez & quelques autres gentilshommes furent blesez. Albuquerque courut au mesme instant ceste coste, mit le feu en plusieurs nauires, & finalement se rendit pres d'une rade regardant vers Carmagne, en laquelle il trouua cent quatre vingts nauires neufues & que lon n'auoit encor poussees en mer, lesquelles furent bruslees pour la pluspart. Il y auoit vn magnifique temple hors & assez pres de la ville d'Ormus, dedié à Mahomet, lequel fut aussi peu espargné que les nauires : & les soldats d'Albuquerque estoyent si eschaufez au combat, qu'ils ne demandoient que d'assaillir la ville, ce que leur general ne voulut permettre, dauant qu'ils estoyent peu, & trop harasses du travail precedent : au contraire Ormus estoit plaine de gens de guerre. Le combat naual susmentionné dura huit heures. Albuquerque y perdit dix homes, & ramena plus de cinquante blesez, entre autres Gaspar Diazé portenseigne d'une des compagnies, lequel eut la main droite abatue d'un coup d'espee. Les Indiens y laisserent

enuiron deux mille hommes. Ceste desfaite les estonna bien fort : mais la perte des nauires les mettoit presques en desesper, d'autant que sans vaisseaux de mer l'isle ne peut viure ni subsister aucunement, ains faut qu'elle dechee & se ruine soy mesme.

*Ambassade
du Roy d'Or-
mus vers Al-
buquerque
pour auoir la
paix, laquelle
est finalement
accordee, &
vne citadelle
commencee par
les Portuga-
lois en Ormus.*

A I N S I donc le Roy ayant assemblée son conseil, enuoya deux Sarasins 16.
des plus experimentez aux affaires & de grande autorité en son royaume, l'un nommé Cojebeiram, l'autre Abdate natif de Grenade en Espagne, pour supplier Albuquerque de lui pardonner tout le passé & accorder la paix. Ils alleguoient que la ieunesse volage du Roy & le conseil de certains garnemens l'auoyent precipité en ceste guerre. Qu'il auoit esté assez chastié, & que tant de pertes deuoient faire esperer qu'il seroit sage & se contien-droit à l'auenir. Qu'il se rendoit volontairement vassal du Roy Emmanuel, & s'offroit payer le tribut qui lui seroit imposé. Puis il prioit Albuquerque de lui estre pere, promettant lui porter autant de reuerence toute sa vie comme s'il estoit son propre fils. Il l'exhortoit aussi de bien prendre garde à ce qu'il faisoit: puis qu'Ormus estoit de la tenue du Roy de Portugal, ce se-roit perdre vne bonne partie du reuenu d'icelui, si on fourrageoit & sacca-geoit vne telle isle, bien peuplee, riche, & de tel accez en Perse & en Arabie: & que qui en seroit maistre pourroit aisément empieter beaucoup de pays. Que la force de ceste isle consistoit es nauires, tellement qu'icelles bruslees l'isle perdoit toutes ses commoditez, & demeuroidt deserte & destruite en-tiere ment. Car (disoyent ces ambassadeurs à Albuquerque) comme vn ar-bre seche estant couppé par le pied, ainsi Ormus perira en perdant les nau-ires qui la nourrissent & substantent comme les racines font l'arbre. Si donc vous desirez enrichir vostre Roy, il faut que vous conseruiez ceste isle, la-quelle demeurant en son entier lui apportera de grandes commoditez. Da-uantage, puis que par prouesse & valeureux exploits vous ensuiuez ces grands capitaines tant renommez par les histoires: vous deuez aussi auoir deuant les yeux, pour vous y conformer, les exemples de leur douceur qui les a fait autant estimer que leurs victoires. Pour immortalizer leur nom ils n'estimoient rien plus seant que de conseruer benignement ceux qu'ils auoyent abatus par la force de leurs armes. Apres s'estre ainsi fait redouter des ennemis par leur magnanimité, ils attiroient aussi par le bruit de leur clemence tout le monde à les aimer & cherir. Vous auez par vostre vaillā-ce obtenu vne telle victoire que vous meritez d'estre comparé aux plus grands chefs de guerre que lon scauroit trouuer. Reste, que comme vous estes demeuré inuincible ayant les armes au poing, maintenant que la vi-ctoire est vostre, vous ne permettiez que personne vous surmonte en hu-manité & douceur. Puis aussi que nous auons esté assez chastiez de nostre folie, que vostre gracieuseté face que nous puissions respirer apres tant de maux dont nous sommes acablez. C'est le deuoir d'un grand personnage de se souuenir de l'infirmité humaine, lors qu'il est esleué au sommet de sa felicité, & de supporter doucement ceux qu'il void du tout abatus. Nous vous prions donc & supplions par le Dieu que vous adorez, & par ceste vo-stre dextre valeureuse & inuincible, que vous ayez pitié des affligez, & par-donnez

dōniez ceste faute au ieune Roy qui se repent de sa legereté, & permettiez qu'au plustost que faire se pourra lon estaigne le feu. Si vous le faites, outre ce que vous acquerrez la reputatiō de braue capitaine, chascun vous louera comme vn Seigneur doux & misericordieux : dauātage, ce sera le grand proufit du Roy vostre maistre. Albuquerque respondit à cela qu'il estoit trefmatti de ce qu'ils auoyent tant differé à venir faire ce message: dautant que le dommage n'eust pas esté si grand. Et leur permit d'aller sur l'heure faire cesser le feu, promettant qu'on ne les incommoderoit en sorte quelconque quand ils tireroient à sauueté les vaisseaux que le feu n'auoit point encores endommagez : & que puis apres il donneroient responce quant aux conditions de paix. Cojebeiram retourna avec ceste responce vers le Roy, laissant Abdala pour ostage : ce pendant le feu fut estaint sans empeschement par l'adresse & diligence de plusieurs personnes. Le lendemain arriuerent de la part du Roy les principaux d'Ormus, entre lesquels estoit vn nommé Noradin qui estoit lieutenant pour le Roy en la ville. Iceux confermerent la paix avec Albuquerque, aux conditions qui s'ensuiuent. Que Zersadin, deuxiesme de ce nom, Roy d'Ormus, seroit tributaire du Roy Emmanuel, & lui donneroient de tribut par chascun an quinze mille ducats, & cinq mille pour vne fois à Albuquerque pour les frais de ceste guerre. Qu'il assigneroit vne place dās la ville, au choix d'Albuquerque, pour y bastir vne citadelle. Les lettres de cest accord furent grauees en placques d'or en langue Arabesque & Persique: l'exemplaire Persique demeurāt au Roy d'Ormus, & l'Arabesque pour Emmanuel. Cela fait, Zersadin pria Albuquerque de luy enuoyer vn estandart du Roy de Portugal son protecteur, afin que cela estant deuant ses yeux l'admonnestast d'estre fidele au Roy absent duquel il s'estoit rendu vassal, & que tous entendissent qu'il estoit en la sauuegarde de ce Prince si renommé entre tant de nations. L'estandart enuoyé par Albuquerque fut receu en grand honneur & avec cris de ioye par ceux de la ville, comme vn signal de bon heur & repos perpetuel : puis ils le planterent au haut du palais royal. En apres Albuquerque descendit en terre & vint trouuer le Roy en sa chambre tapissée de draps d'or & de fin cotton. Le Roy le recueillit avec grande demonstration d'amitié, & de uiserent longuement ensemble de leur accord lequel fut ratifié par sermēt solennel. Comme Albuquerque remōtoit en ses nauires, le Roy lui enuoya quelques beaux presens, & dignes de la magnificence d'vn tel Prince : aſauoir vn baudrier de ſyn or & enrichi de pierres de fort grand pris, avec vn poignard & la gaine de mesme ouurage & richesse : puis quatre anneaux garnis de pierres luisantes & belles à merueilles, & vn chetial beau par excellence, & courāt viste au possible, fort somptueusement harnaché. Il fit aussi de beaux presens aux capitaines Portugallois. Albuquerque de sa part lui presenta quelques bagues & ioyaux fort dextrement elaborez. Tout ce que dessus persuadoit chascun que ceste paix seroit la plus ferme du monde. Les Portugallois ſuiuant icelle entrerent sans aucune desfiances maisons que le Roy leur auoit assignees. On amena à bord en toute assurance quelques nauires pour les racoustrer. Les fondemens de la citadelle

furent posez incontinent. Albuquerque, qui conoissoit l'humeur des Sarasins, & sauoit combien ils faisoient peu de conscience de tromper autrui, fit bastir vne tour sur vn destroit de terre pres de la mer & de la citadelle, où il fit placer quelques canons, afin de chasser ceux qui voudroyent empescher le paracheuement de son entreprise. Les Portugallois trauailloyent apres à qui mieux mieux, sans distinction de personues, & qui s'employoit le plus estoit estimé & honoré par dessus les autres. Albuquerque hastoit la besongne, pressoit les trauaillans, soulageant leur peine par propos recreatifs & plains de louange : & leur remonstroit souuent que le moyen de prendre pied ferme & subsister là estoit d'acheuer vistement ceste citadelle, afin que si le Roy se repentoit de sa promesse, & qu'il la voulust rompre, on l'en peust empescher par le moyen de ceste forteresse qui tiendrait luy & les siens en bride. Lui mesmes, pour encourager ses gens, trauailloit aussi avec eux bien souuent : le Roy fournissoit en abondance les matieres necessaires. Et pource que par fois il suruenoit quelque mutinerie entre ceux d'Ormuz & les soldats d'Albuquerque, de peur que les Sarasins ne greuassent les Portugallois, le Roy donna pour garde aux Portugallois quatre cens hommes sous la charge de Noradin. Deux fils d'icelui, l'un nommé Delamix, l'autre Xeraf auoyent conspiré de tuer le Roy : mais leur meschâceté fut descouuerte tellement qu'ils se sauuerent de bonne heure, pour euitier le supplice. Pource qu'ils se monstroient fort affectionnez au parti d'Emmanuel, Albuquerque obtint leur grace du Roy & permission de reuenir au pays.

♦ ♦

FIN DV CINQVIESME LIVRE.





LE SIXIESME LIVRE.

SOMMAIRE.

1. Ambassade du Sophi au Roy d'Ormuz, & la braveresponse d'Albuquerque.
2. Conspiration des capitaines Portugallois cõtre Albuquerque.
3. Seconde guerre d'Albuquerque cõtre le Roy d'Ormuz, & les diuers enuennemens d'icelle.
4. Renolte de quelques capiraines Portugallois, & ce que fit Albuquerque iusques à son depart du Royaume d'Ormuz.
5. Guerre d'Albuquerque cõtre ceux de Calaiate, & l'issue d'icelle.
6. Troisieme guerre d'Albuquerque au royaume de Ormuz.
7. François Almeida rappellé en Portugal : & le mal qui auint de la saluente suruenue entre lui & Albuquerque.
8. Dabulriche ville assailie, prinse & saccegee de sa-
çon estrange par Almeida.
9. Diuerfes amantours d'Almeida.
10. Voyage d'Almeida à Dix : sa memorable batail-
le cõtre Melchiaz & Morhocem capiraines
du Roy de Cambis, & ce qui en auint.
11. Paix entre Melchiaz & Almeida.
12. Cruaute d'Almeida. Mutinerie des Portuga-
lois cõtre Albuquerque. grandes querelles
entre lui & Almeida, & l'issue d'icelles.
13. Voyage de Fernand Contin en Inde avec une
flotte de quinze nauires, son arriuee & ses ex-
ploits.
14. Estat des affaires de Portugal.
15. Guerre de Fernand Contin en Calecut, en la-
quelle, apres diuers combats lui & plusieurs ca-
piraines sunt tuez, & Albuquerque se retire à
Cochim.
16. Discours sur la mort d'Almeida tué avec la plus-
part de ses gens par les barbares pres du cap
de bonne esperance.
17. Voyages & exploits notables de Jacques Lopez,
de Siqueira.
18. Description de l'isle de Taprobane, du royaume
de Malata & de Suma.
19. Accord entre Siqueira & le Roy de Ma-
laca.
20. Diuerfes ruses & trahisons de ceux de Mala-
ca cõtre Siqueira, lequel s'en garentis, puis se
retire en Inde.

1.



N C E s entrefaites, deux ambassades arriuerent à Ormuz, pour exiger le tribut que le Roy deuoit par accord fait à Ismael Sophi qui lors estoit Empereur de Perse, & de beaucoup d'autres grãds pays de Leuant, où il auoit plusieurs Rois tributaires. Cest Ismael Sophi estoit vn Prince excellent entre les Sarasins, & par son industrie, sous pretexte de religion premierement, en apres par la grande adresse qu'il auoit monstree au fait de la guerre, s'estoit fait extremement riche, & auoit estendu sa domination au long & au large. Or le Roy d'Ormuz & plusieurs autres luy estoient tributaires par crainte & par force. Comme donc ces Ambassadeurs le sollicitassent de satisfaire, luy ne sachant que respondre, tant il estoit embrouillé en son esprit, fut entendre le tout à Albuquerque, lequel l'exhorta de ne se donner aucune peine. Et incontinēt enuoya vn de ses capitaines faire la bien-venue aux ambassadeurs & leur dire que la ville & le royaume d'Ormuz appartenoyent par droit

*Ambassa-
deurs de Perse
en Ormuz, &
la response que
leur fit Albu-
querque.*

de guerre au Roy de Portugal, sous la protection duquel celui d'Ormus auoit esté receu, tellement que les Portugallois estoient là pour le maintenir contre tous. Et quant au tribut, Albuquerque vouloit le leur payer promptement au nom de Roy. Disant cela le capitaine fit ouuir en presence des ambassadeurs vne quaiße dans laquelle estoit ce tribut, asauoir des boulets de fer, des fiesches, des pointes de picques & halebardes, & des harquebous. Le tout desployé, ce capitaine enuoyé par Albuquerque adiousta, Voici le tribut qu'Emmanuel Roy de Portugal, des Algarues, d'Inde & d'Ormus a acoustumé de payer à ceux qui veulent exiger quelque chose des Rois ses vassaux. Combien que les Ambassadeurs se plainissent que ceste responce touchoit par trop l'honneur d'Ismael si puissant Roy entre tous les autres, si n'eurent ils autre chose, & s'en retournerent à vuide.

*Conspiration
des capitaines
Portugallois
contre Albu-
querque.*

C E pendant la citadelle auoit esté tellement auancee, qu'elle estoit en 2. defenße de soy mesme. Mais les capitaines Portugallois ne pouuoient endurer qu'o les retinst attachez plus longuemēt à ceste besongne: & songeoient iour & nuit au butin qu'ils eussent aisément fait en courant ceste mer au long du goulfe Arabique. Estans ainsi embrasiez d'auarice, ils complotent ensemble d'importuner Albuquerque au nom du Roy de Portugal, à ce qu'il laissast vn capitaine en la citadelle, pour se mettre en mer & s'ellogner de là. Ils dressent & signent ceste requeste, supplians Albuquerque de ne perdre pas dauantage de temps apres ceste citadelle, attendu mesmes qu'il n'auoit aucun mandement du Roy de ce faire. Celui qui auoit escrit la requeste la lui presenta, afin que s'il n'accordoit le contenu d'icelle, on le peust accuser de trahison & maluersation en sa charge. Albuquerque ayant receu ceste requeste ne la voulut point lire, ains la cacha sous vne pierre à l'entree de la forteresse, en lieu tel qu'on n'y pouuoit atteindre. Les capitaines, offensez de ceste brauade, vont trouuer Cojeatar, premier cōseiller du Roy d'Ormus, & lui donnent à entendre que le Roy de Portugal n'auoit commandé à Albuquerque chose quelconque de tout ce qui auoit esté executé contre le Roy d'Ormus: que c'estoit vn homme remuant & ambitieux iusques au bout, qui auoit dit & fait choses qui irriteroyent grādemment Emmanuel, Prince qui ne demandoit que paix, & n'entendoit que ses gens courussent sus aux Rois qui ne leur auoyent fait aucun tort. Cojeatar fut extremement aise d'ouir ce discours, & pensa auoir bien trouué le moyen sans grand danger d'ourdir quelque toile à Albuquerque, lequel il alla trouuer, & apres vne longue trainee de paroles l'admonnesta tout ouuertement de hausser les voiles & tirer ses nauires arriere de là, à cause que les marchans n'osoyent plus trafiquer en Ormus comme auparauant, de crainte qu'ils auoyent de lui, ce qui diminuoit les reuenus du Roy consistans pour la pluspart en ports & peages, tellement qu'il lui seroit malaisé, ayant peu de moyens sans cela, de payer le tribut qu'on lui auoit imposé. Sur ce il promettoit dōner ordre que la citadelle seroit paracheuee & fournie de toutes choses necessaires en l'absence d'Albuquerque, & selon son desir. Mais Albuquerque fit telle responce que Cojeatar entendit bien que c'estoit tēps perdu de le vouloir destourner de parfaire son ouurage. Pour-
tant

tant fust-il question de trouuer autre expedient. Cojeatar corrompit par argent cinq matelots d'Albuquerque, aucuns desquels estoient fondeurs d'artillerie, & les ayant fait passer en terre, commanda qu'on leur fournist amplement ce qui estoit necessaire pour faire des pieces de canon, & qu'ils fussent magnifiquement traitez & salariez. Albuquerque entendant cela fit prier le Roy & Cojeatar de lui rendre incontinent les matelots. Eux respondent qu'on ne les trouuoit point, & que neantmoins on les feroit chercher, pour les lui renvoyer. Trois iours apres vn messager de leur part viét dire à Albuquerque que ces cinq matelots s'estoyent retirez de l'isle en terre ferme, mais qu'on les enuoyeroit prendre là. Ce pendant ces fondeurs ne cessoient de fondre artillerie de fonte & de fer : d'autre costé Cojeatar homme turbulent & cauteleux faisoit apporter des armes, entrer soldats de nuit, afin de n'estre descouuert, s'apprestant à la guerre si finement que Albuquerque (qui autrement estoit fort auisé) n'en pouuoit rien sentir. Finalement vn More nommé Abraheim lui descouurit toute la mençe, & declaira que quelques capitaines Portugallois estoient cause que Cojeatar s'estoit ainsi oublié. Albuquerque tout estonné remercia Dieu, & exhorta le More de descouurir tout ce qu'il pourroit & le lui rapporter sans aucun delay, lui promettant de le bien recompenser & faire gräd. Puis il escriuit au Roy & à Cojeatar, les priant de ne violer l'alliance ratifiée si solennellement, pour fauoniser cinq traistres: de craindre Dieu, ennemi capital des perjurez : & de ne donner occasion de recommencer la guerre en faussant leur promesse. La dessus le Roy & Cojeatar protestent par sermēt qu'ils ne sauoyent en quel lieu les cinq susnommez estoient.

ALBUQUERQUE d'autre part assemble ses capitaines pour auiser aux affaires. La pluspart disoyēt que lui qui estoit sage chef de guerre se deuoit bien garder de hazarder son honneur & sa vie en vne guerre ouuerte, à l'appetit de cinq pendards : qu'eux estoient en petit nombre, rompus des trauaux passez, & auroient sur les bras vne infinité d'ennemis. Que s'il y auoit eu de la faute en la guerre precedente, entreprinse assez legeremēt, ceste seconde recharge seroit tant au desauantage d'Albuquerque qu'elle effaceroit tout l'honneur acquis par la belle victoire qu'il auoit obtenue, pource que chascun diroit que tout ce premier heureux succes auroit esté vn coup dauanture, & qu'en fin Albuquerque en se ruinant monstreroit sa folle temerité. Que les forces de Portugal estans si petites ne deuoyent estre legerement desmembrees & exposees en proye sans gräde occasion. Pourtant ils lui conseilloyent de dissimuler sagement la reuolte des cinq matelots, & n'auoir rien plus recommandé que l'obseruation de la paix : qu'au reste il establist vn lieutenant avec bōne garnison dans la citadelle, & que lui s'embarquast pour tirer ailleurs. Albuquerque ne voulut pas suivre cest auis, qui aussi ne parloit point de cerueaux bien faits, & ne pouruoyoit pas sagement aux affaires de la guerre. Car desia (disoit-il) de toutes parts estoient arriuez gens de guerre bien fournis d'armes, d'artillerie, & de tous autres equippages necessaires : & n'y auoit piece des ennemis qui se souciaist d'entretenir la paix. Lon n'apperceuoit en eux qu'hypocrisie souste-

*Consultation
d'Albuquerque
pour la
guerre.*

nue de mensonge, iniustice & trahison. Que laisser vn capitaine avec garnison en vne place à demi-bastie, & qui n'estoit encor en bonne defenſe, ne s'appelloit pas brider l'ennemi, ains liurer ſes gens à l'ennemi. Que ce feroit vne grand' honte & folie d'abandonner vne forteresse qui auoit tant donné de peine à commencer: car en quittant l'entreprise chascun apperceuroit leur lascheté, & les iugeroit-on insensé s'ils donnoient moyen aux ennemis de se maintenir par ceste citadelle bastie par le trauail & par la diligence des Portugallois, tellement que de là en auant il seroit comme impossible de se rendre maistres de la ville ayant vn tel rempar pour se couvrir. Pourtant Albuquerque n'approuuant l'opinion de ſes capitaines, enuoya derechef gens vers le Roy pour le meſme effect que deſſus. Mais au lieu d'obtenir quelque chose, il fut auerti par le More, qui lui auoit premierement deſcouuert toute la menée, que lon portoit des armes en certain lieu, que ſoldats arriuoyent de toutes parts, que lon fortifioit & garniſſoit les ports, diſpoſant l'artillerie ça & là: à l'occasion de quoy en vne nuit il fit retirer dans les nauires tous les Portugallois avec le plus beau & le meilleur qu'ils euſſent.

Seconde guerre d'Albuquerque que contre le Roy d'Ormuz, & les diuers enuoyemens d'elle.

LE Roy ſachant cela, conut que ſa mine eſtoit eſuentee, & pourtant 3 qu'il falloit beſongner à deſcouuert ſans plus delayer. Ainſi donc on void ſortir gens en armes de toutes parts, les garniſons ſ'asſemblent, on braque tout ouuertement le canon contre la flotte de Portugal, les ſoldats eſchauffez & courans ça & là deſcouurent aſſez leur mauuais courage. Albuquerque eſueillé à ce bruit, fait deſcendre les capitaines en des eſquifs pour approcher plus pres de la ville, laquelle il commanda que lon battiſt de l'artillerie. D'autre coſté Cojeatar fit baiſſer dedans le port les nauires qui eſtoient plus haut à l'ancre, craignant qu'elles fuſſent prinſes & brulées par les Portugallois, leſquels alors approchent incontinent, & iettent le feu dans ces nauires. Cependant Albuquerque ne laiſſoit paſſer iour ſans canonner & faire breſche aux murailles. Mais voyant que cela tiroit trop en loqueux, il ſ'auia d'vn autre moyen pour endommager beaucoup plus ſes ennemis. Ce fut de donner tel ordre aux paſſages de la mer, que perſonne ne peult porter viures dans Ormuz. Manuel Tellio, George Barret, Antoine de Camp & Alfonſe Lopez de Coſte eurent ceste commiſſion, ſuiuant quoy, encores que ce fuſt à regret, ils prindrent quelques barques & les amenerēt à Albuquerque, lequel cōmit lors vn acte cruel & indigne de ſes valeureux exploits: car il fit couper les narines, les oreilles & les maïs à tous les baſteliers & archers: quant aux autres outre les oreilles & narines on leur fendit à chascun vn des pieds par le milieu. Puis il les fit mettre en terre, les admonneſtant d'aller dire à Cojeatar que tous ceux qui entreprendroyent de mener viures en la ville ſeroient ainſi traittez. Ceux d'Ormuz eſtoient fort eſtonnez, la diſette les preſſoit, le peuple commençoit à ſe mutiner à faute de viures: tellement que pluſieurs ſ'allerent preſenter au Roy, ſe plaignēt tout haut du mal-heur qui les preſſoit, le prient, en menaçant, de remedier à leurs maux par accord avec ſes ennemis ou par quelque autre moyen: autrement ils auiferoient à ſe deſpeſtrer de tant

de

Cruauté barbare d'Albuquerque.

de miseres. Cojeatar fit respõse à cela pour le Roy (suyuant ce qui est acoustumé entre les Barbares, lesquels estiment que ce soit chose bien seante aux Rois de parler par trucheman, & penser que leur grauité consiste à estre enfans) que quant à la disette d'eau, les cisternes de la ville, & les puits qui estoient à deux lieues de là en vn lieu nommé Terumbaquen, suffiroient à tous les habitans. Qu'au reste il y auoit assez de viures en la ville pour soustenir le faix de ceste guerre, iusques à ce que la grosse flotte fournie de toutes choses necessaires, & qu'on attendoit de iour en iour, fust arriuee. Puis il les prioit d'auoir bon courage, pource qu'il attrapperoit rous ces Portugallois, afin de les chastier de leur meschanceté & trahison. Voila comme par belles paroles la violence & fureur du peuple fut arrestee. Mais à la verité il n'y auoit point d'eau es cisternes ni es puits pour vn si grand nombre de personnes, & les viures estoient tant courts que rié plus. Albuquerque voulant encores ferrer de plus pres ses ennemis, & les reduire plus viftement à l'extremité, delibera de combler & estoupper les puits de Terumbaquen. Pourtant donna il ceste charge à George Barret & à Alfonse Lopez de Coste, lesquels costoyent le riuage dans des esquifs avec quatre vingts soldats. Barret mit en terre six gentilshommes bien refo- lus pour faire en sorte qu'ils peussent empoigner quelque homme qui leur sceust dire s'il y auoit gardes autour des puits. Iceux attrappent dauanture deux du pays, desquels ils entendent qu'un capitaine nommé Cidehamer avec vingt cinq cheuaux & deux cens archers gardoyent les puits: ce qu'estant rapporté à Barret, il se diligenta de gagner terre auât iour afin de surprendre & tailler en pieces ceste garnison, ce qu'il executa: car les gardes ayans esté trouuez dormans, le capitaine & presques tous ses gens furent esgorgez, & les puits comblez de charongnes d'hommes & de cheuaux: & de peur qu'on ne les en tirast, Albuquerque commit vn braue gentilhomme Castillan nommé Laurent de Sylues avec vingt soldats pour garder les puits. Icelui eut incontinent des troupes d'ennemis sur les bras, à cause de quoy, Albuquerque, qui n'estoit pas loin & auoit l'œil par tout, acourut au secours avec cent cinquante hommes. Le Roy d'Ormus estoit en personne là, & encourageoit ses gens, comme faisoit aussi Cojeatar de son costé, remonstrant aux siens qu'il y alloit de leur vie & de celle de leurs compagnons. Les ennemis en fort grand nombre viennent à teste baissée à trauers les Portugallois qui chargez si lourdement furent contrains reculer, & se sentirent poursuiuis de pres, & plusieurs d'entre eux blesez: sur tout Albuquerque estoit celui à qui lon en vouloit & qui fut assailli de toutes parts, tellement qu'il fut en tresgrand danger de sa vie ce iour là. Delamixa pour qui Albuquerque auoit obtenu grace & permission de rentrer au pays, faisoit plus de mal que nul autre aux Portugallois, & eust continué sans vn coup d'arquebuzade dont il fut tellement blessé, qu'il cessa de frapper & poursuiure les autres. Ils se battoyent assez pres du riuage, qui fut cause que tous les Portugallois, excepté l'un des domestiques d'Albuquerque tué sur le champ, eschapperent, s'en retournās blesez pour la plupart. Ce nonobstant ils faisoient si bon guet sur mer que lon ne pouuoit mener viures en

*Stratageme
de tyrant.*

Ormus, tellement que le peuple commença à prier le Roy d'auoir pitié d'eux, & qu'ils ne pouuoient plus porter vne telle necessité de viures : que ce n'estoit raison de faire mourir ainsi miserablement toute vne ville à l'appetit de quelques particuliers. Telles plaintes estoient acompagnees de crieries, menasses, pleurs & lamentations fort grandes, à quoy Cojeatar s'esforçoit d'appliquer quelque remede, quelques fois par douces paroles, & par fois avec menasses, les chassant au loin & empeschât qu'ils ne parlassent au Roy. Neantmoins le mal croissoit tellement qu'il falloit rendre la ville par composition pour mettre fin à la misere qui pressoit les habitans.

M A I S comme les choses estoient en cest estat, il auint vn cas digne de memoire à la confusion & honte eternelle de ceux qui en furent cause. Car Manuel Tellio, Alfonse Lopez de Coste & Antoine de Camp gentilshommes de bon lieu & capitaines excellens, commencerent à se despiter contre leur general: & comme la guerre commençoit à prendre fin, sans auoir esgard ni à leur noblesse ni à leur serment, abandonnent tout soudain Albuquerque, haussent la voile & prenent la route de l'Inde. Albuquerque se voyant afoibli d'autant, & qu'il ne pourroit pas plus longuement soutenir le faix de ceste guerre, quitta tout : & partit de là en extreme cholere, de ce que les siens propres, & non point ses ennemis, lui auoyent arraché la victoire d'entre les mains. Il y a non gueres loin d'Ormus vne isle des appartenances de ce royaume, nommee Queixume, en laquelle Albuquerque estant arriué, il assaillit vne place nommee Arbez, tua le capitaine avec plusieurs soldats, & emporta vn fort grand butin de ce lieu en ses nauires. On lui apporta lors nouuelles certaines que la forteresse de Zacotora estoit reduite en grande extremite de viures & serree de bien pres par les ennemis qui n'y laissoient rien entrer. Par mesme moyen il entendit qu'une flotte, de septante vaisseaux desmats d'un port de Perse pour venir secourir Ormus, approchoit. Ne voulant donc heurter contre vne telle puissance, & desirât secourir les Portugallois de Zacotora, il resolut de quitter Ormus: toutes fois auant que partir il assaillit encore vne autre place de ceste isle de Queixume, nommee Homeal, où il y auoit grosse garnison qui fit grande resistance, mais en fin la place fut forcee, saccee, les capitaines qui commandoyent dedans & la plupart des soldats taillez en pieces. Albuquerque n'y perdit qu'un matelot & deux Mores qu'il auoit prins à sa solde. Iean Nouio y fut blessé, & laissé en Inde pour guerir ses playes : cependant Albuquerque print tetre en Zacotora, & son arriuee mit fin à la guerre, car les ennemis estonnez de le sentir si pres se retirerent plus viste que le pas, & mesmes demanderent la paix qui leur fut accordee à condition que la forteresse seroit auictuaillee d'un certain nombre de bœufs & de moutons. Puis il enuoya Francisque Tauore en Melinde pour y acheter des bleds: lui fit voile vers le cap de Guardafu. Comme Tauore executoit sa commission en Melinde, Iacques Melie, & Martin Coeillo qui auoyent hiberné en Mozambique, arriuerent au port où il estoit à l'ancre. Ceux qui auoyent esté laissez en Melinde, pour estre menez en Ethiopie vers le prestre Iean, n'estoyent encores partis, pource que le Roy de Melinde n'auoit encor trouué gens propres

*Reuente de
quelques Ca-
pitaines Por-
tugallois, &
ce que fit Al-
buquerque ins-
guer à son de-
part hors du
royaume d'Or-
mus.*

propres & feaux pour les guider: & par ainſi ils furent receus & logez dans les nauires. Or ces trois capitaines, aſc auoir Tauore & les deux autres, prindrent leur route vers Albuquerque, & ſur icelle attrapperent vn vaiſſeau qu'ils pillerent premierement, puis y mirent le feu. Albuquerque qui en auoit conquis vn autre fut fort reſioui de l'arriuee de ces trois capitaines. En ce vaiſſeau gaigné par Albuquerque, il y auoit vn Arabe, homme de grande experience, qui auoit long temps hanté la court de Preſte Iean, & connoiſſoit le naturel des Ethiopiens & toutes les couſtumes & façons de faire de ces pays là. Albuquerque enuoya ce perſonnage en Portugal, afin que le Roy entendift de lui par le menu ce qu'il deſiroit ſauoir de ces choſes. Et quant aux trois qui deuoyent aller en Ethiopie, Albuquerque les fit deſcendre en vne ville aſſez pres du cap de Guardafu, d'où ils pourſuiuirent & paracheuerent leur voyage aſſez commodement. Celui qui lors eſtoit grand Negus ou Empereur d'Ethiopie, que nous appellôs d'ordinaire Preſte Ieã, s'appelloit David, & ſa mere Helaine, regente de l'Empire pour la grande opinion que lon auoit de ſa ſuffiſance, & à cauſe que ſon fils eſtoit encore fort ieune. Helaine & ſon conſeil ayans receu les lettres du Roy de Portugal, monſtrèrent en eſtre treſioyeux, & deſpeſcherent vn ambaffadeur, de la commiſſion duquel nous parlerons en vn autre endroit.

5. **Q**UANT à Albuquerque, eſtant parti de Guardafu, il ſe retira en Zacotore pour y paſſer l'hüer: puis ſe remit à la voile incontinent que le temps fut propre, & le vingtieſme iour d'Aouſt print ſa route droit à Calajate, afin d'entendre ce qui ſ'eſtoit paſſé à Ormus en ſon abſence, & chaſtier ceux de Calajate du mauuais tour qu'ils lui auoyent ioué. Les habitans du lieu ayans deſcouuert la flotte, enuoyerent en vn petit baſteau deux des principaux & plus riches d'entre eux, leſquels monterent aſſeurément en la nauire capitaineſſe: car ils eſtimoyent que ceſte flotte fuſt nouuellement partie de Portugal, & ignoraſt ce qui eſtoit auenu en Ormus: auſſi deſiroyent ils ſauoir ce qu'Emmanuel auoit reſolu touchant les affaires de l'Inde. Mais voyans Albuquerque, & entendans la trahiſon braſſee par le gouuerneur de Calajate, ils demeurerēt tous eſperdus, & ſupplierent qu'on leur ſauuaſt la vie, ce qui leur fut promis moyennant qu'ils decelaſſent ce qu'Albuquerque deſiroit ſauoir. Eux donc declarerent toutes les forces & commoditez d'Ormus, & que ce gouuerneur qui auoit voulu attrapper les Portugallois commandoit dedans Calajate. Albuquerque ſachant cela, tire vers le port pour gaigner terre: ceux de la ville acourent incontinent avec leur gouuerneur pour l'empêcher, mais apres quelque legere eſcarmouche il furent challez de là, & ſ'enſuiurent en vn temple prochain du riuage, d'où ils furēt contrains ſortir pour ſe ſauuer en la ville. Les Portugallois allerent apres iuſques aux portes, & vouloyent entrer dedans, ſi Albuquerque ne les euſt retenus: car la nuit approchoit, les chemins eſtoient eſtroits, les maiſons haut eſleuees, dont les ennemis pouuoient ietter pierres & traits, ce qu'auenant en tenebres les aſſaillans eſtoient en grand danger. Ainſi donc ils paſſerent la nuit dans ce temple: & au point du iour donnerent l'aſſaut à la ville que les habitans auoyent abandonnee tant ils eſtoient effroyez. Les

Guerre d'Albuquerque contre ceux de Calajate & l'issue d'icelle

Portugallois se ruent incontinent sur le butin, & ayās seioumé là quelques iours, vn capitaine nommé Zafaradin, fuiui de mille Iudiens d'élite vint sur la minuiet leur donner vne charge pensant les surprendre, enquoy il se trompa: car Albuquerque donnoit tousiours tel ordre à ses affaires qu'il estoit presque impossible de l'attirer en accident qu'il ne l'eust preueu auparavant. Et pourtant ce capitaine & les siens furent repoussez avec grand honte & dommage. Derechef Albuquerque despité contre la nation, commença la mesme cruauté qu'il auoit auparavant exercee en Ormus: car il fit couper le nez & les oreilles à tous les prisonniers, & mettre le feu en la ville & au tēple fort magnifiquement basti, & en vingt sept nauires qui estoient au port. Puis il s'embarqua, & apres auoir fait aiguade avec grand peril, il fit voile vers Ormus, afin de descouurir lui mesme l'estat & forteresse de la ville, & essayer de nuire en quelque sorte aux habitans.

Nauuelle cruauté d'Albuquerque.

Troisième guerre d'Albuquerque au royaume d'Ormuz.

6. E S T A N T arriué assez pres il vid la citadelle par lui fondée bien fournie d'artillerie & haussée de deux estages. Ce nonobstant il fit battre la ville, & print quelques nauires, montrant en toutes sortes à lui possibles la haine qu'il portoit en son cœur à Cojeatar & aux autres à cause de leur desloyauté. Mais Cojeatar lui enuoya lettres d'Almeide qui escriuoit à Cojeatar qu'Albuquerque auoit fait guerre à ceux d'Ormuz sans aucune commission du Roy de Portugal, & que le tort fait à Ormuz lui desplaisoit grandement: que volontiers au nom du Roy Emmanuel, de qui il estoit lieutenant en toute l'Inde Orientale, il traiteroit alliance & feroit amy avec le Roy d'Ormuz. Ces lettres fascherent fort Albuquerque, neantmoins il fit du pis qu'il peut à la ville d'Ormuz, & à quelques autres places qui en dependoyent: & ayāt prins terre, il mit le feu en vne bourgade nommée Habande, d'où on portoit l'eau douce en l'isle, & afin de priuer les insulaires de ceste commodité il combla de terre tous les puits. Apres cela, il se mit en campagne & alla au deuant de deux capitaines d'Ismael Sophi qui amenoyent grande quantité de viures & diuerses marchandises aux marchans d'Ormuz. Il les chargea de telle furie qu'ils demeurèrent sur la place avec la pluspart de leurs troupes qui estoient de cinq cens hommes, les suruiuans s'estans sauuez de viflesse. Cela fait il donna charge à Jacques Melio d'aller en vne isle nommée Lara pour y estoupper quelques autres puits d'eau douce: car son intention estoit de tuer de soit ceux d'Ormuz. Melio desirant faire de soy mesme quelque braue exploit pour entrer en credit, se laissa surprendre & enuveloper par quelques vaisseaux de Mores, contre lesquels il combatit vaillamment, mais en fin lui & neuf autres furent tuez, & leurs cōpagnons avec vent à point se sauuerent à toutes voiles. Toutes ces choses ainsi exēcutées, Albuquerque print la route de l'Inde, & arriua en Cananor le troisieme iour de Novembre l'an mil cinq cens & huit, apres que Laurent Almeida, comme dit a esté ci deuant, eust esté tué en vne bataille nauale contre les Capitaines du Sultan.

Melio tue.

François Almeida rappelle en Portugal, & le mal qui

7. E N V I R O N ce mesme temps François Almeida receut lettres du Roy qui le rappelloit en Portugal, avec commandement de laisser sa charge à Albuquerque. Or Almeida estoit du tout attētif à rassembler & equipper sa

la flotte pour courir sus à Mirhocem, & venger la mort de son fils. Toutesfois auant que s'embarquer, il équippa de toutes choses necessaires sept nauires qui deuoyent partir pour retourner en Portugal, deux desquelles perirent en haute mer, les autres cinq arriuerent sauues à Lisbonne. Quant à lui, il print la route de Cananor avec sa flotte, & comme il faisoit ses ap- prests pour la guerre, Albuquerque y arriua, lequel Almeide recueillit avec grandes caresses & signes d'amitié. Le lendemain apres auoir doigné à dîner à Albuquerque, il lui monstra les lettres du Roy qui le rappelloit en Portugal, & donnoit la charge des affaires à Albuquerque, auquel Almeide declara bien amplement qu'il estoit tout prest d'obeir au commandement du Roy, mais que cela ne se pouuoit acóplir ceste année là, pour ce qu'à grâds frais & trauaux il auoit armé ceste flotte, avec laquelle il vouloit courir sus à Mirhocem & aux Calecutiens ses associez: que la raison vouloit que lui qui auoit dressé & acheminé vne telle entreprise, la conduisist à fin, & ne baillast pas à vn autre la charge de véger la perte qu'il auoit faite en la mort de son fils. Albuquerque respondit qu'Almeide s'oublioit grandement s'il contreuenoit au vouloir de son Prince: & quant aux ennemis, que lui les poursuuiroit si viuement, pourueu qu'on lui mist en main la flotte ia prest, qu'Almeide ne se repentiroit point de lui en auoir laissé la charge. Almeide refusa ce faire, au moyen dequoy ils commencerent à se regarder de trauers, & leurs gens furent bandez en deux parts, les vns suiuaus le parti d'Almeide, les autres d'Albuquerque, tellement que chascun visant à ce but d'entretenir querelle entre ces deux braues seigneurs, les choses en vindrent à tel point que tous leurs soldats estoient ennemis l'un de l'autre. Eux deux aussi qui estoient assez ambitieux, & ne desiroient sinon d'emporter l'honneur d'auoir mis fin à ceste guerre, ne pouuoient souffrir qu'autre quel qu'il fust leur leuast ceste reputation. Cependant leur debat estoit tel que iamais ils n'en vindrent aux outrages de paroles ou de fait. Mesmes, lors qu'Almeide fut prest à s'embarquer pour courir sus à ses ennemis, Albuquerque s'offrit à lui faire seruice, & le fit prier par amis communs qu'il le menast en ceste guerre. Almeide le remercia bien fort, adioustant que ce n'estoit pas raison que Albuquerque se mist en telle peine, ains falloit qu'il se reposast ayant esté trauaillé de tant de combats & agité en tant de fortes sur les vagues de la mer: qu'il se donnast vn peu de bon temps, & se tint prest pour entrer en des autres guerres autant dangereuses pour le moins que les precedentes, lesquelles il auroit à soutenir, puis qu'il estoit viceroy. Albuquerque se voyant du tout rebouté de ce voyage, se retira en Cochina, où il seiourna, digerant assez mal le tort qu'il pretendoit lui auoir esté fait.

8. Q V A N T À Almeide, il fit voile avec sa flotte de dixneuf nauires le douzième du mois de Decembre en la mesme année. Il y auoit treize cens soldats Portugallois en ceste armee nauale, & quatre cens homes de Cochim. En ceste route, comme il passoit la coste de Comori, il fit mettre le feu en quelques nauires de Calecut qui estoient au port, ce qui ne se peut exécuter sans grande effusion de sang de part & d'autre. Estant allé de là faire ai-

*auant de la id-
leuse suru-
me entre lui
& Albuquer-
que.*

*Dabul ville
riche & assai-
prise & sacce-
gee de saou
estrange par
Almeide.*

guade en Anchediue, il tira de là au port de Dabul, ville appartenâte à Zabajo seigneur de Goa, lequel s'estoit ligué avec Mirhocem, le Roy de Calcut & autres ennemis des Portugallois, & par lettres auoit sollicité le Sultā à leur courir sus. Cela fut cause qu'Almeide resolut de saccager ceste ville là, s'il lui estoit possible. Au reste l'un de ses capitaines nommé Pelage de Soule s'estant escarté de la flotte pour se rafraischir d'eau douce & de quelques viures, descendit en terre, où ses soldats se porterent si insolemment à l'endroit des habitans du pays, que les communes d'alentour appellees par leurs voisins qui ne pouoyent plus porter tāt d'outrages, s'amasserēt, coururent sus aux Portugallois, tuērēt ce capitaine, lequel veu mort le reste de ses soldats se sauuerent de viffesse. Plusieurs disoyent que Pelage auoit esté chastié de sa folie, ayant sans occasion vrgente, & sans auen de son general esté si hardi que de prēdre terre: ioint qu'il n'estoit pas en telle disette qu'il ne peust bien attendre le cōmandement d'Almeide. Pour reuenir à la flotte, Almeida se voyant pres du haure de Dabul enuoya de nuiēt quelques matelots pour sonder au vray la profondeur de l'eau pres du port. Dabul est assise au pied d'un mont fort plaisant: elle est grande, enrichie de beaux bastimens, en la plaine, & lors estoit munie d'une forte garnison. Zabajo y auoit establi gouuerneur un braue capitaine More commandant à six mille hōmes, entre lesquels y auoit cinq cens Turcs. Dedans le port on voyoit bon nombre de vaisseaux bien fournis d'artillerie, d'armes & de soldats. Ce capitaine aussi s'asseuroit tant en la prouesse de lui & de ses troupes, qu'il fit venir en la ville la mieux aimée de diuerfes femmes qu'il auoit, & tous les payfāns d'alentour, afin de leur donner le passetemps de la victoire qu'il se promettoit. Le iour suiuant, comme le flus de la mer approchoit, la flotte de Portugal ayāt vent en poupe, Almeida fit leuer les anchres, & à voiles deployees entra dedās le haure. Les galeres faisoient la premiere pointe, estās suiuiues des carauelles puis les grandes nauires estoient derriere pour enclorre la flotte, & lui seruir d'appui. Les esquifs estoient prests pour porter les soldats quand l'occasion se presenteroit, afin de prēdre terre soudainemēt & charger ceux qui leur y voudroyent faire teste. Les ennemis ne pouuans empescher la descente à Almeida qui vogueoit en si bon ordre, lui laisserent gagner le bord avec ses troupes, & enseignes deployees. Ainsi qu'il s'apprestoient pour assaillir une forte tour, le gouuerneur de Dabul avec toutes ses forces armées à la coustume du pays lui vint au deuant. Les Portugallois de leur part donnent de telle roideur à trauers leurs ennemis, qu'ils les rompent à la premiere charge, tuent le gouuerneur & plusieurs des plus apparens de son armée, mettent le reste à vau de route, & les talonnent de si pres qu'ils entrēt pelle melle dans la ville. Les vaincus furent lors traitez à toute rigueur, sans espargner sexe ni aage, tellemēt que les femmes avec leurs petis enfans qu'elles portoyent pendus au col passoyent au trenchant de l'espee, & ne voulut on receuoir personne à rançon, quoy que plusieurs avec larmes & lamentations estranges offrisent grandes sommes d'or & d'argent, force perles & meubles precieux: tellement que la tuerie cōtinua iusques à la nuiēt. Almeida craignāt que ses soldats escartez çā & là pour piller

&

& esgorger ne fussent enuolopez de quelque peril, comme il auient souuent en tels rauages & mespris de la discipline militaire, fit sonner la retraite, & ramassa toutes ses troupes dans vn temple assez grand, où il passa cheualiers quelques vns, qui entre autres s'estoyent portez valeureusement ce iour là. Le lendemain il donna le pillage aux soldats, qui trouuoient tant à butiner, qu'on ne les pouuoit tirer des maisons, & qui esmut Almeide d'enuoyer gens secretement mettre le feu en vn quartier de la ville: tellement que la flamme ayât gaigné les edifices qui s'entretenoyent, Dabul, les temples, mutailles & grandes richesses qui y restoyent encor furent mises en cendre avec plusieurs des habitans cachez çà & là, & tous les vaisseaux aussi qui estoyent au port. Brief de tout le peuple qui s'estoit venu rendre dans ceste ville, outre les gens de guerre, il n'en eschappa que bien petit nombre qui se sauuerent es montagnes. Les Portugallois y perdirent seize hommes, & remmenerēt deux cens blesez es nauires. Almeide non contēt, mena ses troupes aux mōtagnes, brussa plusieurs petits forts & maisons champpestres, tailla en piecēs quelques gens qui lui firent teste, rompit & chassa les autres, & amena du bestail à corne & à poil pour auictuailier sa flotte, en laquelle il se retira apres auoir ainsi fracassé ses ennemis.

2. C O M M E il se rafraischissoit, on luy presēta lettres de Melichiaz & des prisonniers Portugallois. Celles de Melichiaz estoyent fort gracieuses, car il declairoit quāt à la rançon des Portugallois qu'il s'en remettrait volontiers à ce qu'Almeide en ordonneroit. Les prisonniers faisoient entendre aussi que Melichiaz les traitoit humainement: toutesfois ils supplioient qu'on accordast de leur rançon avec Melichiaz tandis qu'il se monstroient ainsi doux & maniable: de peur que s'il falloir puis apres negocier avec vn autre, il ne fust beaucoup plus mal aisé de les tirer de captiuité. Mais on sceut puis apres que Melichiaz homme cauteleux n'auoit pas enuoyé ces lettres pour desir qu'il eust d'estre ami d'Almeide, ains pour descouurir ce qu'il faisoit en la flotte de Portugal. Almeide ne voulut dōner aucune response par escrit à telles lettres, ains delibera parler par effect comme sa dignité aussi le requeroit: & pourtant apres auoir fait charger es nauires le canon & le butin de Dabul, il desmara de ce port le cinquiesme iour de Ianuier, l'an mil cinq cens & neuf, & costoyāt les pays voisins recueillit les tributs que deuoient quelques vns, selon la teneur de leurs alliances avec le Roy de Portugal. Finalement il fut porté en vne riuierē qui apres auoir trauersé le royaume de Cambaje se descharge en la mer, & s'appelle Maim. Il vid en vne ville fort ancienne de ces quartiers-là vn tres-precieux temple & vne campagne de grande estendue, où il y auoit vne infinité de sepulchres. S'estant enquis des habitans du lieu que vouloyent dire tant de tombeaux, les plus notables respōdirēt que leurs vieux registres & papiers portoyent qu'Hercules estoit entré iusques en Inde avec vne grosse armée, qu'en ceste campagne il auoit eu deux batailles contre vn certain Roy fort puissant, esquelles il auoit esté mis en route, & que pour perpetuer à iamais la souuenance d'un accident si memorable, leurs ancestres auoyēt ordonné que ceste place, où les soldats d'Hercules estoyent demeurez morts, se-

Diverses auisures d'Almeide.

roit solennellement consacrée, & qu'on ne toucheroit nullement à ces tombeaux. Voyla ce qu'ils en disoyent, de quoy le lecteur qui en voudra iuger pourra croire ce que bon luy semblera.

Voyage d'Almeide à Diu, & sa mémorable bataille contre Melichiaz, & Mirhocem qui furent desfaits avec tres grande perte.

ALMEIDE au partir de ces sepulchres commanda que lon prinst la route de Diu, où estoit Mirhocem deliberé de faire prédre large à sa flotte, & combattre Almeida en plaine mer, suiuant quoy, & cōtre l'avis de Melichiaz, il fit quitter à tous les capitaines les ports & destroits où ils s'estoyent retirez. En son armee nauale y auoit trois grandes nauires couuertes, trois autres becues & armées d'esperons, six galeres, quatre nauires de Cambaje & les Roberges ou longues nauires de Melichiaz, dōt a esté parlé ci dessus, & grand nombre de brigantins de Calcut: brief il y auoit plus de cēt vaisseaux en ceste flotte. Les soldars de Mirhocem bien armez & resolos au combat, s'affeuoyēt desia de la victoire: ceux des natiōs estrāges joints avec eux estoyent en mesme pensee. L'esperoir & le despit les inuitoit fort de cōseruer leur liberté & exterminer les Portugallois leurs ennemis mortels. Or le pis fut, qu'en ceste mesme flotte il y auoit des Chrestiens autāt desireux de venir aux mains cōtre les Portugallois que les ennemis manifestes de la Chrestienté. Les vns estoyent Venitiens, les autres Sclauons, qui conduisoient les galeres. Aureste, les deux generaux n'oublierent pas à bien encourager leurs gens. Mirhocem remonstroit aux siens leurs braues exploits, l'estēdue de leur domination, la liberté de tous les Mahumetistes, la ruine des Chrestiens, les biens & recōpenses que ceste seule bataille leur presentoit. Qu'ils considerassent que leurs compagnons qui marchoyent en terre regarderoient ce combat, la victoire duquel leur acquerroit vne louange immortelle, & qu'au contraire, s'ils estoyent vaincus, ils ne remporteroient que deshonneur & confusion à iamais. Qu'en l'issue de ceste iournee consistoit l'Empire de l'Inde, la sauueté & liberté de tous les peuples associez aux Indiens, & la gloire perpetuelle de ceux qui feroient deuoir de bien combattre. Quant à Almeida il proposoit aux siens le nom de Iesus Christ, la sainteté de la religion Chrestienne, les vilenies de la secte de Mahumet, l'esperance d'estre bien recompensez en ce monde & en l'autre aussi: adioustant qu'en leur vaillance & resolution consistoit leur seureté. Qu'ils considerassent qu'en perdant la victoire ils estoyēt enclos d'un million d'ennemis qui ne demandoient autre chose qu'à executer toutes sortes de cruautez contre les Chrestiens, le nom desquels ils racleroient entierement de tous ces pays là, s'ils auoyent le dessus en ceste bataille. Que le secours estoit loin, & les ennemis espandus tout à l'entour, tellement qu'apres la desfaite il n'y auroit aucune retraite: que ceux qui se monstroyent lors amis pourroient tourner le dos, & rompre bien tost la foy promise. Poutant il les prioit de penser, comme braues & bons soldars qu'ils estoyēt, qu'il falloit gagner la victoire honorablement, ou mourir les armes au poing. Il leur ramēteuoit aussi la mort de Laurēt Almeida son fils bien aimé, ce qui eschafoit merueilleusement tous ceux qui auoyent conu ce personnage, à venger ceste mort. Au reste il les exhortoit de s'affeurir que Iesus Christ, pour la gloire duquel ils combaroyent, leur assisteroit. Par tels & semblables propos Almeida aiguisoit les cœurs des Portugallois desia assez animez au comba-

Ses harangues finies, il fait desployer les voiles: mais d'autant que le vêt baïsoit, & que les ennemis s'estoyent arrestez, lui aussi demeura coy, iusques à ce qu'il sentit le vent se renforcer au retour de la maree. Or pour ce que le vent commença à souffler plus fort & plus tost qu'on n'auoit cuidoé, Almeide fit hausser les voiles des trinquets, & ayant donné le signal à toute la flotte approcha des ennemis, tellement toutesfois qu'il y auoit si long espace entre les deux armées qu'elles ne pouuoient combattre qu'à coups de canon. La cause fut que la maree n'estoit encor de retour, & Almeide craignoit d'eschouer au gué qui separoit vne flotte de l'autre. Il y auoit force d'artillerie bien braquée sur les rempars de Diu & en la tour qui regardoit la mer: tellement que les vns & les autres estans assez pres de là, toutes les pieces des rempars, de la tour, & des vaisseaux ennemis commencerent à iouer sans cesse. Les Portugallois de leur part respondoient à grands coups de canon. Mais ceste tēpeste cessa par le moyen de la nuit. Almeide auoit delibéré de voguer des premiers & acrocher son Amirale à celle de Mirhocem: mais les capitaines le prierent tant qu'ils lui firent changer d'avis: car ils alleguoient que si quelque mal lui auenoit, la flotte effroyee de l'accident de son chef & combattant sans ordre ou commandement, vogueroit incontinent en confus pour l'aller secourir. Il les creut, mais maugré soy, voyant que ses affaires le requeroient ainsi. Cependant il donna charge à Nonio Vasque Pereire d'assaillir l'Amirale de Mirhocem, & lui bailla des plus vaillans de l'armée pour executer ceste entreprise. Durant ceste nuit les capitaines rengerent leurs troupes, les disposans en quatre endroits de chascun vaisseau, comme la necessité requeroit, à la poue, en poupe, & aux costez, avec gens pour y commander aux soldats.

MIRHOCHEM voyant Almeide si resolu de venir aux mains, delibera de suiure le cōseil de Melichiaz, dont il n'auoit tenu cōpte au parauant. Au lieu donc de passer le gué, il fit relascher vers la ville, afin d'auoir le secours d'icelle pour combattre les Portugallois à son auātage: car il s'asseroit que l'artillerie des rempars le fapouriserait grandement, & qu'on lui pourroit enuoyer secours au besoin. Sur ce il ordonna ses vaisseaux, cōme s'ensuit. Premierement il mit en front ses six nauires, & les fit attacher deux à deux avec chaînes de fer, tellement que les six estoient distantes aucunement & en trois endroits ainsi ioinctes pour secourir l'une l'autre. Lui se mit au milieu de la flotte avec son Amirale. En apres il disposa à dos de ces nauires, les galeres, longues nauires & brigantins, pour secourir au besoin, & de fois à autre donner tellement à trauers la flotte de Portugal, qu'au besoin ils peussent regaigner l'espaule des plus grāds vaisseaux. Quant aux nauires de Cambaje il leur commanda de demeurer pres du gué au long du riuage, pour soutenir la premiere charge. Le lendemain, apres qu'Almeide eust donné le signal à son armée, Nonio Vasque Peteire se mit le premier à la voile, suiuant la charge qui luy en auoit esté donnée: apres lequel vogua d'assez loin George Melio, par la nonchalance de son pilote. Tous les autres capitaines le suiuirent de pres en leur rang assigné. Melichiaz les ayant descouverts fit iouer l'artillerie des rempars & de la tour contre ceste flotte, telle-

ment que d'une volée de canon furent emportez dix hommes qui ferroyent la grãd' voile du vaisseau de Pereire, afin de lui donner commodité de cueillir plus de vent. Nonobstant cela Pereire s'avance & accroche l'Amirale de Mirhocẽ lequel fit lascher la navire qu'il retenoit attachee, afin qu'elle ceignist Pereire par derriere, & qu'ayant à combattre en front & à dos, il fust desfait plus aisément. Pereire conoissant ceste ruse, fit tourner vne grosse piece de baterie qui tiroit à fleur d'eau, droit à ceste navire destachee, & le boulet dóna si à propos que ceste navire fut percee par bas de part en part. Les ennemis craignans que leur navire ne prinst eau s'avancent incontínẽt vers l'ouverture faite la derniere, & taschèt en la chargeant de quelque bagage faire qu'elle panchast, afin de destourner, ce leur sembloit, le dāger de la premiere brisee & ouverture. Mais d'autant que ce costé sur lequel ils panchoyent n'estoit gueres moins entr'ouvert (ce qu'eux ignoroyent) il auint que la navire coula soudainement en fond. Jacques Petrejo qui commandoit en vne galere, vogueoit devant Pereire, suivant le commandemẽt d'Almeide, pour prendre hauteur: mais ayant descouvert l'avantage que les ennemis auoyent par le moyen du gué, il fit signe à Pereire de ne s'avancer pas plus avant: au moyen dequoy Pereire fit abatre les voiles & s'aresta. Ce qu'apperceuant Mirhocem il le vint assaillir de grande furie, & ainsi leuts vaisseaux estans actoches, il y eut vn cruel combat de part & d'autre. Toutesfois les soldats de Pereire entrerent dans l'Amirale de Mirhocem, & contraignirent ses gens de combattre, & alors fut tué Henri Machiade, vaillant entre les Portugallois. C'estoit sur le tillac qu'ils combatoyent ainsi: mais ils estoient aussi aux mains & en partie forte sur les chables & cordages entrelassez & tendus de proue en poupe. Car les Portugalois y estoient grimpez avec beaucoup de peine, & auoyent les ennemis en teste & sur les bras. Cepẽdant vne des navires becues de Mirhocem separee des autres, vint pour heurter vn autre costé de celle des Portugallois, qui eurent lors plus à faire que jamais, & se trouverent en extreme danger. Pereire voyant cela faisoit tout ce qui lui estoit possible, tant pour soutenir l'ennemi où l'effort estoit plus grãd, que pour aller & venir es autres endroits: mais en voulant hausser la visiere de son armet pour prendre quelque relasche, on lui descocha soudainemẽt vn coup de fiesche dont il eut le gosier percé tout outre. Ce nonobstant la victoire ne pāchoit de costé ni d'autre. Or Francisque Tauore apperceuant le danger qui menaçoit les soldats de Pereire, vint s'attacher promptemẽt à l'Amirale de Mirhocẽ, & d'un des flācs enuoya quelques ges pour grimper sur les cordages: mais ils y mōterẽt en tel nōbre que cest entrelaz de chordes estant rōpu ceux qui combatoyẽt d'enhaut tōberent sur le tillac. Alors la meslee recōmença plus furieuse que deuant, d'ot l'issue fut qu'une partie des ennemis ayant esté taillee en pieces, le reste se ietta hors le bord. Ceux qui estoỹẽt en la navire becue iointe à l'Amirale de Mirhocẽ, voyās la plus part de leurs soldats & matelors tuez, leur vaisseau brisẽ en diuers endroits, & l'equippage dissippé, se sauuerẽt cōme ils peurẽt, & quoy qu'ils n'eussẽt personne propre à gouverner leur vaisseau, toutesfois par l'ipetuositẽ du reflux ils furẽt poussez au riuage.

EN ces entrefaites, les autres capitaines Portugallois trauailloyent de leur part, tellement que Pierre Barret gaigna à force d'armes vne des nauires de Mirhocem: Antoine de Camp força l'vne des becues. Quant à George Melio, si tost qu'il se sentit vn peu au large, il vogua contre les nauires de Cambaje. Pierre Canus assaillit vne autre nauire becue, & auât que l'acrocher, monta avec trente huit soldats sur le cordage, où il se trouua en merueilleuse peine, car les ennemis estâs dessus le tillac blessoyent ses gens, qui ne pouuoÿt s'aider de leurs armes à cause des cordages entrelassez qui les retenoyêt. Canus voyant cela, resolut de sauter en bas afin de cōbatre main à main sur le tillac, & comme il baïssoit la teste pour entrer par la porte, vn des ennemis lui auala la teste d'vn coup d'espee. Sur cela vne autre nauire vint à voiles desployees secourir les soldats de Canus reduits à l'extremiré, lesquels elle deliura, entrât de force en la nauire des ennemis qui furêt tous ruez. Almeida estoit spectateur du combat, ordonnant à ses capitaines ce qu'ils auoyent à faire: & cependant son artillerie tonnoit si furieusement, qu'elle mit en fond vne des grandes nauires de Mirhocem & quelques longues avec bon nombre de brigantins. Quant à Melichiaz il enuoyoit de fois à autre gens frais pour soulager ceux qui estoient recreus & faire que ses troupes continuassent tousiours le combat. Dauantage il alloit & venoit l'espee au poing au long du riuage, tuant ou blessant les fuyards, & cōtraignant les autres de retourner en la meslee, les menaçant de la mort s'ils differoyent. Mais finalement les Portugallois eurent le dessus & firent tel carnage, que les ondes de la mer estoient taintes en rouge. Les Calecutiês furent les premiers qui se tirerent de la presse & gagnerêt le haut. Mais les longues nauires de Melichiaz & les galeres de Mirhocem baissèrent dâs le port, & se rendirent à l'emboucheure du fleuue. Roderic Soarez qui cōmandoit en vne carauelle, voyant deux galeres ennemies iointes ensemble, print sa route droit entre la distance d'entre deux, & les ayant acostees, fit ietter les crochets des deux costez de sa carauelle: au moyen dequoy ayant ainsi arresté ces galeres, desfit vne partie de ceux qui estoient dedâs, contraignit les autres se sauuer à nage, & amena les galeres à Almeida. Restoit vne nauire entiere, laquelle estoit la plus haute & mieux equippee de toutes, reuestue de cuir cru de toutes parts, afin d'oster la cōmodité de pouuoir grimper dedâs, & poure mpescher aussi les effects de tout feu naturel ou artificiel que lon voudroit darder cōtre. Elle estoit plaine de soldats bié armez, des plus experimentez & resolut de l'armee: ayant au reste les costes si fermes & epaisles que le canon n'y pouuoit aisement faire ouuerture. Apres que les nauires d'Almeide l'eurent marchandee & battue assez long temps, & de grande furie, elle commença à puiser, tellement que ceux de dedans se ietterent en l'eau: mais ils furent poursuiuis par des fustes, & tuez pour la pluspart dans les vagues, le nombre estant fort petit de ceux qui eschapperent.

La bataille dura depuis la nuit iusques au soir, en laquelle les ennemis perdirent quatre mille hommes, entre lesquels y auoit huit cens Mammeluchs du Sultan d'Egypte, dont il n'eschappa que vingt & deux. Mirhocem

craignant que la fortune ne fist changer de volôté à Melichiaz, qui le pourroit mettre entre les mains d'Almeide, s'eufuit de grande viftesse vers le Roy de Cambaje. Il perdit en ceste bataille trois grandes nauires, avec plusieurs brigantins & longs vaisseaux qui coulerent en fond, sans deux nauires becuës, quatre autres grandes & deux galeres prinſes par les Portugallois, dans lesquelles y auoit grande quantité d'armes & d'artillerie, forces or & argent monnoyé, des tapis de drap d'or, de foye & de cotton, fort artistement faits. Le butin fut partagé entre les soldats, sans qu'Almeide en vouluſt toucher chose quelconque. Il y eut trente deux Portugallois tuez, & trois cens bleſsez. Leurs nauires furent despecees & rompues en tant d'endroits, qu'il falloit necessairement employer vn long temps à les equipper & remettre en leur premier estat. Au reste, ils obtindrent alors vne tresbelle victoire, de laquelle toutesfois Paul Ioue n'a dit mot en ses histoires, encores qu'il ait discouru sur ceste armee nauale de Sultan en Inde cõtre les Portugallois. Mais il estoit despité de ce que s'estant offert au Roy Iean troisieme d'escrire l'histoire de Portugal, en bien payant, ce bon Prince ne luy enuoya point de presens des Indes pour l'induire à coucher par escrit les conquestes des Portugallois. Mais pour reuenir à Mirhocem, son armee estoit composee de tant de nations diuerſes, qu'es nauires prinſes lon trouua plusieurs liures en langue Latine, Italienne, Sclauonne, Frãçoise & Espagnole. Outre ce que dessus le Sultan y perdit trois estendarts.

COMBIEN qu'Almeide eust toutes choses à souhait, toutesfois craignant que sa flotte ne receust quelque dommage de nuit, il la fit eslogner du port. Mais le lendemain Melichiaz enuoya par lettres demãder la paix, deschargeãt toute sa foute sur la fortune, par la rigueur de laquelle il estoit tombé en cest accessoire. Puis il demandoit pardon humblement, & promettoit de faire si bon deuoir, & se monſtrer à l'auenir si loyal à l'endroit des Portugallois, qu'on ne trouueroit point son semblable. Qu'il auoit assez esprouuë leur vaillance, & entendu par le rapport de plusieurs qu'ils tenoyent promesse à leurs alliez : pourtant auoit il conclu de n'estre plus si mal apris de vouloir essaye à sa honte & perte leur prouesse, ainsi aimoit mieux sentir leur feaulté à son honneur & prouſit. Il monſtroit en apres quel bien reuiendroit aux Portugallois de l'amitié qu'il offroit auoir avec eux, s'ils la vouloyent accepter. Ces lettres furent apportees par vn More nommé Cidialle, natif du royaume de Grenade, & bien conu d'Almeide des le temps qu'il y estoit en la guerre que fit le Roy Fernand en ce pays là. Almeide fit responce qu'il n'accorderoit aucune paix si Melichiaz ne lui liuroit les Portugallois qu'il detenoit prisonniers, ensemble Mirhocem, les soldats du Sultan, & les vaisseaux ennemis qui s'estoyent sauuez de la defaite. Melichiaz repliqua, par ce meſme More renuoyé pour cest effect, qu'il rendroit promptemẽt les Portugallois & les vaisseaux, mais que Mirhocem s'en estoit fuy, sans qu'on sceust où. Que quãd il le tiendrait en sa puissance, toutesfois ne feroit iamais ce tort à sa reputation, ni ne commettrait vn si meschant acte, de liurer à vn ennemi ceux qu'il auoit prins en sa protection: & que ce n'estoit le fait d'un homme nourri aux armes, qui aime

*L'ambition
auarice de
Paul Ioue ra-
xee.*

*Paix entre
Melichiaz &
Almeide.*

*Parole grant
d'un barbare
qui fait le pro-
ces à plusieurs
Chrestiens.*

me mieux vne mort honneste qu'une vie honteuse. Almeida accepta volontiers l'offre de Melichiaz, tellement que les Portugallois & les vaisseaux des ennemis furent liurez à Almeida, lequel fit promptement brusler les galeres, n'ayant pas alors des soldats, matelots & gens de rame pour fournir tant de vaisseaux. La paix estant conclue, Almeida enuoya de ce lieu Antoine Norogne avec deux nauires bien fournies en Zacotora pour auietuailler & renforcer la citadelle: puis laissa au port de Diu Trifan Agao avec deux nauires de la conqueste, commandant de les charger de viures, artillerie & autres munitions de guerre, puis prendre la route de Cochim. Quant à lui, partant de là, il courut tellement toute la coste entre Diu & Cochim, qu'il imposa tribut à tous les seigneurs & gouverneurs de ces quartiers, chastia les desloyaux, & les remit sous la domination & protection du Roy de Portugal. Il laissa aussi quelques nauires à Pierre Barret, à Garfie de Soufe & à Martin Coeillo, pour courir sus aux Mahumetistes en toute ceste mer.

12. D E L A il se vint rendre en Cananor, où il commit vn acte barbare & cruel deuant la forteresse, ternissant par telle faute (au dire des gens de bien) la plupart du lustre de ses exploits: car il fit pendre & deschirer par tortures les soldats du Sultan, prisonniers de bonne guerre, & qui lui estoient tellement esclaves, que ce pendant il en deuoit estre le protecteur. Apres auoir seiourné là pour rafraischir ses gens, & donner ordre aux affaires de la ville, au bout de quelques iours il s'en alla en Cochim, où le Roy & tous les Portugallois le recueillirent en grand ioye. Cependant il auint par les pratiques de quelques meschans garnemens, que les semences de haine commencée entre Almeida & Albuquerque commencerent à croistre. Car les partisans d'Almeida l'exhortoyent de ne bailler le gouuernement des Indes à vn estourdi & furieux: disans qu'Albuquerque estoit trop violent, & que par sa fureur les Portugallois verroyent escouler de leurs mains tout ce qu'ils tenoyent de conqueste. Mais ceux qui auoyent abandonné Albuquerque deuant la guerre d'Ormus, voulans en le blasmant indignement couvrir la faute d'un autre, disoyent qu'Albuquerque auoit commencé vne guerre mal à propos & avec grand danger, s'estoit armé pour ruiner vne nation qui ne lui auoit fait tort quelconque: que sans auis ni conduite de raison il auoit avec sa petite flotte combattu vne trespuissante armee nauale, & hazardé lors l'honneur de son Prince, & la vie des soldats auxquels il commandoit. Et quoy que par la grace de Dieu la flotte de Portugal fust eschappée du danger où la temerité d'Albuquerque l'auoit reduite, neantmoins on pouoit dire que de sa part il auoit mené à la mort tous ceux qui estoient alors en ceste flotte. Qu'il ne falloit pas iuger de la sagesse ou indiscretion d'un chef d'armee par l'euénement, ains par le conseil selon lequel les affaires sont conduites: & que si tel precepte estoit pratiqué, pour certain Albuquerque seroit trouué indigne de la charge que le Roy lui commettoit. Ils disoyent outre plus à Almeida, Si vous craignez l'indignatiō du Roy, vous deuez encores plus apprehender la faute que ferez en remettant entre les mains d'un homme si mal propre le gouuernement d'un pays qui a coûté

*Cruauté
d'Almeida
condamner
ce qui auoit
entre luy &
Albuquerque
par les rap-
ports des flat-
teurs.*

tant de sang, & lequel ce nouveau gouuerneur renuerfera incontinent de fond en comble. Si vous en escriuez au Roy, il faut presumer qu'il aprouuera vostre auis. Et s'il ne le fait, vous auriez trop peu de cœur de redouter dauantage l'iniuste indignation d'un Roy que la mort honteuse de tant de Portugallois coniointe avec le dommage & deshonneur du Roy. Outre ce que dessus tels rapporteurs accusoyent la rigueur d'Albuquerque qui travailloit excessiuelement ses soldats, entremellant avec cela des traits de ruse & autres attaches contre celui qui n'estoit pas present pour leur respondre. Neantmoins il y auoit d'autres esprits nez à semer noïses qui lui en portoyent nouuelles, & taxoyent sa lascheté, disans que ce lui estoit vne hôte de souffrir qu'on l'outrageast ainsi, sans toutesfois s'en formalizer, & qu'il deuoit faire tous ses efforts d'entrer en possession de son droit. Que ses braues exploits faisoient enragier tels enuieux, qui en venoyent iusques là de mespriser le mandement du Roy, pour machiner vne trahison contre les loix & coustumes de Portugal & contre la reuerence deue à la maiesté Royale. Partant qu'il deuoit aller vers Almeida, le sommer en presence de tous, prendre Dieu & les hommes à tesmoins, pour suiure son droit en toutes sortes, voire avec les armes, si la necessité le requeroit, & chasser hors des Indes Almeida qui y vouloit commander par force. Albuquerque picqué de tels discours alla trouuer Almeida, lequel en se retirant dans la citadelle le pria d'y venir banquetter, ce qu'Albuquerque refusa fierement, & au contraire requit tout haut que la citadelle fust mise entre ses mains, demandant acte deuant notaires signé de plusieurs tesmoins, pour l'enuoyer en Portugal, au cas qu'Almeida refusast d'obeir aux lettres patentes du Roy. Almeida apres auoir respondu qu'il estoit prest de se desmettre du gouuernement, & taché de moderer la cholere d'Albuquerque, voyant que c'estoit peine perdue, pour empescher sedition fit empoigner & mener Albuquerque dans la citadelle de Cananor, commandant qu'il fust seurement gardé, & neantmoins traité avec tout le respect & honneur que sa personne le meritoit.

Voyage de Fernand Coutin en Inde avec une flotte de quinze nauires: son arriuee & ses exploits.

M A I S pour reuenir au Roy de Portugal, il ne pensoit rien plus, sinon 13.
aux moyens de bien garder ce qu'il auoit conquis en l'Inde. Ayant donc oui nouuelles de l'armee du Sultā Campson, de la mauuaise volonté d'icelui enuers les Chrestiens, & du secours que le Roy de Calecut lui donnoit par paroles & par effects, il dressa vne flotte de vaisseaux bié equippez pour renforcer les garnisons de l'Inde. Ainsi donc furent armees & munitionnees quinze nauires portans mille cinq cens soldats Portugallois, desquels estoit general Fernand Coutin gentilhomme fort estimé, & mareschal de camp du royaume. Le Roy lui donna charge de mettre Albuquerque en possession du gouuernement, & de faire reuenir Almeida en Portugal. Coutin desmara de Lisbonne le douziemes iour de Mars, l'an mil cinq cens neuf, & arriua en Inde au port de Cananor au mois d'Octobre, dont Albuquerque fut extremement aise: car ils estoient parens & fort grands amis. Puis Coutin remonta incontinent en mer & mena Albuquerque quant & soy en Cochim, où Almeida le recueillit honorablement & avec signes de grande amitié. Alors Coutin fit tant qu'il recōcilia Albuquerque & Almeida,

meide, ce qui ne lui fut pas trop malaisé, car les mauuais conseillers ayans esté chassés attiere de l'un & de l'autre, il ne se pouuoit faire que ces gentilshômes qui estoient tous deux fort vertueux & redoyent à mesme but, encor que ce fust par diuers chemins, n'appointassent incôtiement & de bô cœur tous les differēs qu'ils auoyēt ensemble. Er pourtant apres auoir equippé les nauires qui deuoyēt reuenir en Portugal, Almeide se desmit du gouuernemēt entre les mains d'Albuquerque, & môta sur mer sans plus vouloir descēdre en terre. Albuquerque de sa part lui fournit soigneusement & de bon cœur tout ce qui estoit requis pour acômoder son voyage. Almeide s'estant ainsi embarqué, Coutin rendit à Albuquerque les lettres du Roy lequel leur enioignoit de ioindre leurs forces ensemble pour ruiner le Roy de Calecut & raser la ville, mandant à Albuquerque de suivre en ce fait l'avis de Coutin. Sur quoy Albuquerque promit de s'employer fidelement, exhortant Coutin d'acheminer ceste entreprise, & se seruir de lui aussi hardiment que d'un simple soldat. Lors ils consulterent ensemble de ceste guerre avec le Roy de Cochim, & leur premier avis fut de faire venir secrettement Cojebique, More tenant le parti des Portugallois & residant en Calecut, pour sauoir de lui en quel estat les affaires du pays estoient alors. Il leur fit entēdre que le Roy de Calecut estoit absent, & occuppé en guerre cōtre vn autre Roy voisin: mais que la ville estoit bien fournie d'armes & de braues soldats. Or comme ils estoient apres à faire leurs preparatifs, arriua Vasque de Sylueire apportant lettres de Leme qui courroit avec quelques vaisseaux la mer d'Arabie, & prioit le Vicetoy de lui enuoyer rēfort de gens & de nauires, dautant que ses troupes estoient fort amoindries, & ses vaisseaux brisez de diuers naufrages & accidens. Albuquerque promit y donner ordre à son retour de Calecut, & cependant receut de bon œil Sylueire pour lui aider en ceste guerre: aussi estoit ce Sylueire vn fort vaillant capitaine, & qui auoit executé des choses memorables en diuers endroits.

14. ENVIRON ce temps la Roine Marie acoucha d'un fils en la ville d'E-
uora, lequel on nomma Alphonse, & fut depuis chargé de tresriches bene-
fices & fait Cardinal: Prince fort deuotieux, de bon naturel, & tresmagnifi-
que. En ceste mesme annee, vn certain coursaire François appelé Mondra-
gon s'estant saisi d'un vaisseau qui retouroit des Indes, le Roy de Portugal
s'en plaignit par son ambassadeur au Roy de France, demādant que le vais-
seau & tout ce qui estoit dedans luy fust rendu. Mais voyant que telle solli-
citation ne seruoit de rien, il fit equipper quatre nauires sous la charge d'E-
douard Pacheco, qui en toute diligence alla apres Mondragon, lequel
il descouurit en la coste de Gallice, pres du cap nommé fin de terre. Mondra-
gon ne fit difficulté de venir aux mains, & y eut vne sanglāte meslee: mais
en fin Pacheco mit en fond l'un des vaisseaux du coursaire, en print trois &
le coursaire mesme, lequel il amena prisonnier en Portugal. Or apres qu'i-
celui eust rédu ce qu'il auoit prins, promis d'estre humble seruiteur d'Em-
manuel de là en auant, & de ne faire plus tort quelcōque aux Portugallois,
il fut relasché & se retira en son pays.

*Estas des a-
faires de Por-
tugal.*

Guerre de Fernand Coutin en Calcut, en laquelle apres divers combats lui & plusieurs capitaines furent tuez, & Albuquerque se retira en Cochim.

QUANT aux affaires de l'Inde, la flotte de Cochim ayât esté equippee 15. & munie avec vne diligence & adresse singuliere, Coutin & Albuquerque prindrent la route de Calcut avec deux mille soldats Portugallois, fix cés Indiens: puis vñt mouiller l'anchre au port, & consulent de ce qui estoit à executer. Lors Coutin pria Albuquerque de lui donner la conduite de l'auantgarde, adioustant ces mots, Vous qui deuez demeurer longuement parmi ces nations barbares, auez beau moyen de vous faire valoir & acquerir honneur: mais quant à moy, puis que ie dois incontinent prendre la route de Portugal, permettez moy què i'entame ceste guerre pour en emporter quelque louange. Vous n'auiez occasion de me porter enuie de cela, veu nostre alliance & ferme amitié, au contraire ce que l'un desire, l'autre s'y doit accommoder. Albuquerque permit à Coutin de faire ce qu'il demandoit, encor que ce ne fust pas de bon cœur: car il sauoit que Coutin, autrement vaillant & resolu en guerre, estoit homme bouillant, & de peu d'auis pour preuoir ce qui pouuoit suruenir en l'execution de quelque entreprise d'importance. Toutes choses estans prestes pour sortir, le lendemain à la pointe du iour Albuquerque & Coutin taschent de prendre terre avec leurs troupes, mais ils trouuent resistance, car les Calcutiens auoyent renforcé les corps de garde des meilleurs soldats qu'ils eussent, & rempli de canon, de traits, & de gensdarmes vne maison du Roy entre la ville & le riuage. D'icelle & des corps de garde les bales d'harquebouze & de traits de toutes sortes pluuoyent dru & menu sur les Portugallois: ce que voyant Albuquerque, il auertit Coutin que ce seroit se hazarder par trop de descendre ensemble ainsi en foule, attendu qu'en voulant fausser les corps de garde, on ne s'ireroit iamais à coup perdu à trauers tant de gens, & qu'il valoit mieux se parir en deux, afin de gagner le bord avec ses troupes es endroits qu'on estimeroit les plus propres. Coutin aprouua cest auis & se retirerent l'un de l'autre pour considerer le lieu plus commode à la descente. Albuquerque se sentant à deliure fit haster les esquifs & brigantins, & gagnant le bord qu'il auoit marqué de l'œil, dōna de furie à trauers ceux qui le vouloyent empescher de prendre terre, tellement qu'apres vn aspre combat, il mit les Calcutiens à vau de route, & maugré le feu & les flammes faussa le corps de garde & la tranchee deuant lui, contraignant les ennemis de se retirer viftement & en grand desordre dans la maison du Roy. Il les poursuit, & lors recommença la meslee plus cruelle que deuant, où lon ne voyoit que gens tomber par terre & vne infinité de blesez. En fin Albuquerque demeuré le maistre, entre de force dans la maison, & y met le feu qui la réduisit en cendre. Mais Coutin qui nes'estoit pas tant hasté, estant en terre, apres auoir gagné la tranchee qui estoit deuant lui, entendit bien par le tonnerre de l'artillerie & par le grad feu qu'il voyoit luire qu'Albuquerque estoit attaché au combat avec l'ennemi: dont il fut extremement passionné. Lors tout bouillant de despit & de cholere, il commença à dire tous les maux du monde d'Albuquerque, l'appellant traistre à chasque mot, pource qu'il auoit esté le premier à la charge. Albuquerque ayant ouï le vent de cela, vint droit à Coutin, & se iustifia le plus honnestement qu'il lui fut

fut possible, disant qu'en plusieurs endroits la guerre se faisoit à l'œil & selon que les occurrences le requeroient, plustost que par fait d'avis. Qu'il n'auoit peu retenir ses soldats ni les empêcher de prendre en main l'occasion qui se presentoit, & charger si à propos les ennemis. Que s'ils se fussent arrestez en vn lieu, les Calecutiens eussent prins courage pësans que la peur en fust cause, tellement que lui & les siens eussent eu beaucoup plus à faire. Dauantage que ce n'estoit pas encores fait: que c'estoit seulement vne escarmouche, non pas vne iournee entiere. Que le plus fort de la guerre restoit, ou Coutin pourroit acquerir de l'honneur assez. Albuquerque adioustoit que se confessant estre du tout à Coutin, il n'estoit pas seant d'estimer qu'il voulust preiudicier à celui qui lui auoit fait beaucoup de biens, & lesquels aussi il desiroit reconoistre: protestant que de sa part il faisoit plus de cas d'un bon ami que d'une victoire. Mais Coutin auëuglé de courroux ne voulut se contenter de l'excuse d'Albuquerque, ni mesmes se deporter de lui dire iniure en face: puis appellant tout haut son trucheman nommé Gaspar, meine moy, dit-il, en Calecut iusques au palais du Roy, où ie mettray le feu, pour descourir à tout le mode la vanité de ceux qui, afin qu'on estime d'eux qu'ils sont habiles gens, content merueilles des richesses & de la puissance des Rois de l'Inde. Quant à moy, ie ne demande qu'à combattre des hommes au beau milieu de la ville: car ie ne puis croire que ceux là ayent esté hommes qui se sont laissez rompre en si peu de tēps. Albuquerque porta patiemment ces outrages, & ne voulut faire teste à vne telle presumption, ains suiuit Coutin, non pas qu'il aprouuast la deliberation d'ice-lui, mais dautant qu'il ne le pouuoit abandonner qu'il n'eust fait tort à soy-mesme. Au reste, lon pouuoit ruiner Calecut par autre moyen, attendu que la ville n'estoit point close de murailles, & estoit aisé de s'en redre maistre, en coupant premierement les arbres, l'espaisseur desquels nuisoit grandement aux Portugallois: ioint qu'il falloit prealablement faire le degast à l'entour de la ville, & ne mener pas ainsi les troupes à la foule, ains apres auoir descouverts s'il y auoit embusches dressees ou non. Toutesfois Coutin, sans demander auis à pas vn des vieux capitaines, fit charier & marcher deuant ses troupes deux canons, puis commanda que lon mist les enseignes au vêt, & enuoya auertir Albuquerque qu'il auoit resolu d'entrer en Calecut & brusler le palais du Roy, permettant à Albuquerque de faire ce que bō lui sembleroit. Coutin conduisoit huit cens Portugallois & quelques Indiens de Cochim. Albuquerque voyant que cest homme se perdoit, se mit à le suiure avec six cēs hommes, encores qu'il preuist le malheur, & laissa quelques forces sur le riuage, sous la charge d'Antoine Norogne. Outreplus il fit mettre le feu aux vaisseaux de Calecut qui estoient à l'ancre, & aux forts dressez par les ennemis, & emporter dans ses nauires les canons & engins de guerre qu'on trouua: commandant au reste que lon fist soigneuse garde des esquifs & brigantins. Ce pendant Coutin conduit par son trucheman, apres diuers combats se rendit pres du palais royal, où il trouua les Naires amassez qui lui couroyent sus fort courageusement & se retiroient de tresgrande vistesse, puis se rassembloyent pour venir combattre

*Orgueil de
Coutin sans
de honte &
confusion.*

comme deuant , & quand ils se sentoient trop foibles, se garantiffoyent à bien courir:& quoy qu'on en tuaſt pluſieurs, ils ne laiſſoyēt de bleſſer quelques Portugallois. Mais la meſlee fut encores plus d'agereuſe dans le palais, car beaucoup d'hommes y eſtoient acourus afin d'y viure & mourir pour maintenir l'honneur de leur Roy , lequel ils ont en ſinguliere reuerence, garder les grandes richelſſes qui eſtoient leans , & pour le bien de toute la ville qui ſembloit enclous en la conſeruacion de ceſte place. Ce nonobſtant le palais fut gaigné, tellement que les ſoldats ſe mirent incontinent à butiner. Manuel Pazagne vieux & ſage capitaine, voyant que le pillage eſcartoit les ſoldats, auertit Coutin de donner ordre qu'ils fuſſent promptement raiſſemblez & rangez en bataille, d'autant que le danger eſtoit beaucoup plus grand que lon ne penſoit, & que les ennemis n'auoyent quitté le palais, ſinō afin de ſe ruer ſur les ſoldats chargez de butin, & ſ'en deſfaire plus aiſément. Coutin reſpond qu'il conoiſſoit que les Mores habitans en Calcut ni les ſoldats Calcutiens qui ſembloyent n'auoir iamais fait autre choſe que porter les armes, n'auoyent cœur ni bras quelcouque: & qu'il vouloit ſ'arreſter pour reprendre vn peu ſes eſprits. Ce pendant les Portugallois oublians tout ordre & diſcipline deſpouilloient & poſoyēt les armes pour entrer dans les maiſons, & en emporter ce qu'ils pouuoient, rodans çà & là par les rues, comme ſi tout euſt eſté à eux. Mais les ennemis ſ'amaiſſoyent de toutes parts autour du palais: quand Albuquerque ſuruint, lequel ne voulut pas entrer dedans. Toutesfois il enuoya prier Coutin de faire ſonner la retraite & l'auertir qu'il auoit plus d'ennemis ſur les bras qu' auparauant. Coutin lui enioignit de raiſſembler les ſoldats & marcher deuiāt, promettāt le ſuiure ſi toſt qu'il verroit le palais embraſé, comme il auoit commandé qu'on y miſt le feu. Mais Albuquerque eſtoit deſia aux mains avec les ennemis qui l'auoyent inueſti de toutes parts, & pluſieurs des ſiens auoyent eſté bleſſez, tellement qu'il print parti de ſ'etirer au riuage avec ſes trouppes, faiſant pour ceſt effect marcher premieremēt les bleſſez, auxquels il faiſoit eſpaule avec les plus diſpos. Coutin ayant ſeiourné deux heures au palais, & voyāt le feu attaché par tout, ſort en place. Alors les ennemis ſe partiſſent en deux bandes, dont l'une pouſſuit Albuquerque, l'autre ſe rue ſus Coutin, bleſſe & tue bon nombre de ſes gens à coups de trait & de main, & finalement vient enclorre Coutin, lequel en ceſt extreme danger de ſa vie repouſſoit vaillamment ſes ennemis. Albuquerque vouloit à toute force aller en ceſte preſſe: mais ſes ſoldats effroyez ne voulurent y entendre, ioint que le paſſage eſtoit clos, à cauſe du grand nombre de gens amaiſſez autour de Coutin & des ſiens. Ainſi donc apres que Coutin euſt eſté grieuſement bleſſé en vne des cuiſſes, il tomba mort finalement avec Manuel Pazagne & pluſieurs autres, leſquels auant que rendre l'ame, & combatās à genoux, bleſſerent pluſieurs aſſailans & en tuerent quelques vns. Beaucoup de gentilshommes furent tuez avec Coutin, entre autres Vaſque de Sylueire, lequel ayant quitté vne tranchee pour courir au ſecours, fut terraiſſé de pluſieurs coups, en telle ſorte toutesfois qu'auant mourir il deſpeſcha trois de ceux qui l'ailloyent de trop pres. Quant à Albuquerque il ſe retiroit avec

ceux

ceux qui fuyrēt vers lui après l'accident de Coutin, mais le chemin n'estoit gueres large, à cause des iardins & champs fermez de chaussees, qui donnoient moyen aux ennemis de descocher à plaisir sur les Portugallois, tellemēt qu'il ne tomboit gueres de fleches & autres traits en terre, qui fut cause que plusieurs demeurerēt sur la place çà & là. Albuquerque fut grièvement blessé au dessous du bras gauche, & d'un coup de fleche qu'il receut au chignon du col à peu qu'il ne demeura avec les autres. Pour la troisième rechange, vt Calecutien lui ietta vn tel coup de pierre à la poitrine, qu'il tomba par terre tout esvanouy. Toutesfois il fut incontinent enleué, & porté sur vne targe avec grand' difficulté iusques au bord de la mer, où le secours par lui assigné attendoit son retour, & par le moyen dequoy les ennemis furent repoussez, & les Portugallois receus à sauueté. Ils perdirent en tout ce conflit septante huit soldats, entre lesquels y auoit plusieurs braves gentilshommes. Les ennemis acheterent la place bien cher, car onze cens & trente des leurs y finirent leur iours, non cōprins cinq cens septante autres que le feu deuota. Albuquerque ayant repris vigueur, retourna en Cochim, où il fut tellement traité des medecins, lesquels au commencement n'esperoyent rien de sa vie, qu'il recouura sa premiere santé. Puis il arma & freta soigneusement les deux flottes qui deuoyent se mettre à la voile pour reuenir en Portugal, & dressa quelques articles pour la discipline militaire.

16. T E L L E fut l'issue de l'entreprise de Coutin homme de grand courage, mais de petit esprit. Almeida perit encor d'une façon plus miserable. Car auant qu'auoir doublé le cap de bonne esperance, & comme ses nauites en approchoyent il delibera faire aiguade. Quelqu'un de ses gens, descendu en terre, s'acosta si priuément de ceux du pays qu'il alla avec eux iusques en leur village à deux lieues loin de la mer. Après lui auoir fait bonne chere ils le renuoyerent, & en signe d'amitié lui firent present d'un grand belier. Cest homme rapporte à Almeida que ce peuple estoit fort humain, simple, & riche en bestail: au moyen dequoy Almeida le renuoya au village avec douze autres, afin d'acheter brebis & bœufs pour la fourmiture des nauites, & entrer en amitié & communication avec ces barbares en leur donnant quelques menus ptesens dont toutesfois ils font grand cōpte. Les barbares aprestèrent vn banquet aux treize, leur presenterent des fruits de la terre, les renuoyerent & conduisirent gracieusement avec le bestail qu'ils auoyent acheté. Estans en chemin ils tencontrerent vn payfan qui menoit des moutons pour les changer aux mereeries des Portugallois, comme auoyent fait les autres. Lors vn de la compagnie dit aux autres, Emmenons par force ce galand-ci à nostre general, afin qu'après auoir esté bien abreuvé & vestu il retourne en porter les nouuelles à ses gés, & que par ce moyen nous ayons plus d'acces & de familiarité avec eux: & que ceux qui viendront faire aiguade en ce lieu se puissent rafraischir seurement & à leur auantage. Cest auis agreea à toute la compagnie, & sur l'heure ils se ruērēt sur le payfan, lequel commence à s'escrier à gorge desployee: incontinent les autres payfans acourent à l'aide, attachent leur cōpagnon d'entre les mains

*Discours fait
la mort d'Almeida tout
avec la plus
part de ses gés
par les barbares
pres du
cap de bonne
esperance.*

des Portugallois, aufquels il dōnent la chaffe à coups de pierres, en blessent quelques vns, & reprenent leur bestail. Les fuyards ayans gaigné leurs nauires, pour faire leur cause bonne compterent l'afaire à Almeide autremēt qu'il n'en alloit. Plusieurs furent d'opinion que cest acte meritoit qu'on y pensast, alleguant que si telles gens demeuroient impunis, nulle nauire ne pourroit aborder là pour s'y acommoder d'eau, qu'on ne la contraignist prendre incontinent le haut: que ce peuple farouche ne conoistroit iamais son deuoir que par tudeffe & violence: que partāt il faloit vĕger vn tel outrage, & chastier viuement ces mutins, afin qu'ils ne fussent plus si insolens à l'auenir que d'entreprendre telle chose. Au contraire quelques vns alleguoyent que c'estoit se hazarder trop legerement en s'attachant ainsi à vn peuple inconnu: que le tort fait estoit de petite cōsequece, & meritoit pluſtoſt d'estre tourné en risée que prins de si haute lutte. Que la victoire n'apporterait honneur ni prouit: & que lon ne sauroit si peu perdre là qu'il n'y allast de l'honneur en beaucoup de sortes. Dauantage qu'on n'estoit pas resolu par la faute de qui estoit auenu ce dont les treize se plaignoyent, & que c'estoit chose vray-semblable que les paysans, prouuez par l'insolence & temerité des treize, qui auoyent commencé le debat, s'estoyent contentez de les reſbuser. Les autres persistoient en leur auis, comme si en la mort ou blesseure de quelques barbares eust esté enclōse la vie & reputation de la nation Portugalloise. Brief les choses en vindrent là qu'ils contraignirent Almeide, gentilhomme de marque, aagé de soixante ans, de prendre les armes sans apparence de raison contre vn peuple farouche & brutal au possible. Ainsi donc Almeide estant descendu de nuit avec cent cinquante hommes dans des esquifs print incontinent terre. Pierre & George Barret qui marchoyent les premiers arriuerent au village auant iour, & par ceste surprinse effroyerent fort les habitans, qui de leur part commencerent de crier à l'aide. Incontinent leurs compagnons acourent de diuers autres villages avec des sacs de cuir pleins de cailloux pour lapider les Portugallois qui s'en retournoient avec leur butin. Outre ces sacs ils portoyent vne infinité de petits iauelots ayans des pointes longues de demi pied en forme de hameçons qu'ils dardoyent de merueilleuse roideur, & blessoient bien fort les Portugallois. Ce ſont gēs noirs, portans les cheveux crespes & comme bruslez à la façon des autres Ethiopiens, de laid visage, & monstrans en guerre vne trongne estrangement farouche, afin d'estre plus redoutez. Alors aussi par leur regard cruel, par contenance effroyable & hurlemens entremeslez de diuers tons ils taschoyent à se faire craindre, comme de fait les Portugallois estonnez de chose non iamais veue cōmencerent à reculer, & se retirent vers Almeide qui marchoit vers le village avec la banniere royale desployee. Voyant qu'il ne faloit pas differer plus longuement, il reprit le chemin de la mer. Or les esquifs auoyent changé de place en vne rade plus cōye, & dont l'acces n'estoit pas si malaisé qu'au parauant. Le bestail que les Portugallois emmenoyent estoit au milieu des troupes, & ceux qui menoyent l'arriere-garde soustenoyent les barbares tellement qu'ellement. Vray est que du commen-

*Tel se pense
venger qui a
croyé sa bourse.*

commencement ces barbares ne combatoyent que par maniere d'acquit, mais se voyans en bon nombre par le secours qui acouroit de toutes parts, ils se prenent à faire vn certain cri par lequel ils attirerent ensemble tout le bestail des Portugallois. Car ils acoustument tellement toute sorte de bestes à laine ou à corne, qu'en criant elles marchent, ou s'arrestent, ou courent là où ces peuples veulent. Par ainsi le bestail demeura tout court, sans vouloir aller auant ni arriere, & mesme empeschoit les Portugallois de gaigner chemin. Les barbares se sentans asseurez de leur bestail s'approchent lors de grande furie, chargent l'arriere garde & rōpent les rangs. Almeida voyant plusieurs de ses soldats occupez à chasser le bestail, leur commande de laisser tout, & mesme le chasser du milieu des troupes, lesquelles il ioignit ensemble estimant soustenir plus aisement les ennemis. Mais il en auint autrement : car pource que les Portugallois (qui ne faisoient aucun cas de ce peuple) ne s'estoyent point armez que de leurs dagues & espees, les ennemis ne dardoyent iauelots ni cailloux a trauers vne si grosse troupe qu'ils n'en blessassent tousiours quelques vns, sans que toutesfois on les peust offenser, à cause qu'ils estoient si dispos, qu'en vn instant ils euitoyent les coups en gaignant au pied, & retournant à la charge aussi soudain que s'ils n'eussent oncques quitté leur place. Les Portugallois se sentoyent du tout recreus, car le Soleil les brusloit, & s'estoyent desia tant remuez, qu'à peine pouuoient ils tirer les pieds du sablon cuisant de chaleur : & la plupart auoyent si peu de vigileur qu'il leur estoit impossible de demeurer debout. Plusieurs surpris de frayeur commencerent à se desbâder. Alors l'vn des capitaines nommé George Melio, lequel auoit suivi le parti d'Albuquerque en Inde, s'adressant à Almeida, Je voudrois, dit-il, que ceux qui vous promettoient merueilles en Inde monstrassent ici l'amour qu'ils faignoient vous porter, & exposassent leurs vies pour sauuer la vostre, sans calōnier les innocens. Cela ne vient pas à propos maintenant, respond Almeida : que ne parlez vous de ce qui se presente, en faisant deuoir de garder la banniere royale, de peur que si ces bestes farouches ci s'en saisissent, le nom de nostre Prince ne soit exposé en risée? Quant à moy, ie suis chargé de tant d'annees & de tant de vices, que s'il faut que ie meure en ce combat, on ne peut dire que ie sois trop tost sorti de ce monde, ni que i'auois merité vne plus douce mort. Disant cela il mit la banniere es mains de Melio, & comme il vouloit soustenir vne nouvelle charge des ennemis, l'vn d'entre eux lui perça le col d'vn coup de trait, ce qui le naura tellement que sa force commença à deffaillir, & tomba en terre sur ses genoux, tendant les yeux & les mains au ciel, & en monstrant par ce tesmoignage exterieur au dernier soupir sa pieté à ceux qui estoient autour de lui, rendit l'esprit. Ce fut vn gentilhomme de bōnne nature, liberal, & qui a acquis vn los immortel par ses valeureux exploits : en telle sorte neantmoins que par quelques fautes treshonteuses (chose du tout deplorable) il souilla les beaux actes de sa vie passée, notamment à ceste fois, quand à la suscitation de quelques estourdis il se fourra en vn danger, duquel, quand mesmes il fust eschappé, il ne pouuoit pretendre honneur pour soy, ni prouffit pour sa patrie. Ainsi donc, il fut ru-

Mort d'Almeida ressemblant à la fragilité des plus habiles du monde.

dement châtié de sa legereté, & cest exemple apprend chascun de considérer sa foiblesse, à ce que lon ne s'appuye par trop sur la felicité presente, veu qu'on apperceoit celui qui auoit acquis tant de renom par sa prouesse en la guerre de Grenade, qui auoit mis en route tant d'armees d'Indiens, qui auoit afoibli & brisé la puissance de Campson Sultan d'Egypte, qui auoit bridé tant de Rois, estre occis & foulé aux pieds par vne poignée de barbares nō exercez aux armes ni à discipline quelcōque, desarmez, nuds, & approchans du naturel des bestes farouches. Les Portugallois voyans Almeida de mort cōmencerent à fuir. Toutesfois Laurent Brittio & Martin Coeillo aimerent mieux mourir sur le champ, que laisser le corps d'Almeide à l'abandon. Ils commencerent à crier apres les fuyards, Ingrats & poltrons que vous estes, disoyent ils, quel compte rendrez vous en Portugal de vostre capitaine: vous auez amené & abandonné au danger celui qui vous auoit fait tant de biens, & maintenant vous le laissez sans sepulture! Mais voyant que c'estoyent paroles perdues ils tournerent visage aux barbares, qui les enferrent, & à coups de pierres, de iauelots & de leuiers les firent demeurer estendus sur la place. Soixante cinq Portugallois furent tuez en ceste malheureuse rencontre, entre lesquels y auoit onze capitaines, gens de fait, & bien exercez aux affaires de la guerre, lesquels ayans en despit des feux, des glauiues, des bales, fleisches & infinis coups de trait, passé hardiment sur le vêtre d'un milliō d'ennemis, sur lesquels ils auoyēt obtenu des victoires fort remarquables, furent lors tuez & despouillez par vne bādo d'hōmes desarmez & nuds. On a estimé qu'ils auoyent esté punis de ceste sorte par
 " vn iuste iugement de Dieu, pour ce qu'ils s'estoyēt monstrez trop insolens
 " en prosperité, & n'auoyent pas tousiours tenu mesure apres leurs victoires,
 " ains s'estoyent par fois diffamez de cruauté à l'endroit des vaincus. Les suruiuans gaignerent leurs esquifs avec grandes difficultez. George Barrer & George Melio, apres auoir descouuert la retraite des barbares, descendirēt en terre, pour enterrer les morts, lesquels ils trouuerent tous nuds: & cest enterrement n'eût autres solennitez que de larmes. Ce piteux accident auint le premier iour de Mars, l'an mil cinq cens dix. La flotte faisant voile de là arriua sauue à Lisbonne, portant la nouuelle de ceste desfaite, dont le Roy & toute la noblesse furent grandement contristez.

1510.

*Voyages & exploits
 plus notables
 de Jacques
 Lopez de Si-
 queire.*

MAINTENANT il faut discourir sur ce qui auint en ces mesmes tēps 17.
 à Jacques Lopez de Siqueire. Il s'estoit embarqué à Lisbonne, ayant charge de quatre nauires, le cinquiesme iour d'Auril mil cinq cens huit, & aborda en l'isle de saint Laurent le quatriesme iour d'Aoust, & costoya l'isle en la partie meridionale, où il trouua quelques matelots qui auoyent esté au seruice de Iean Gomeze d'Abrey, desquels il entēdit, comme dit a esté ci dessus, que leur maistre estoit mort de dueil & de regret. De là il alla surgir en Cochim, où il fut honorablemēt & amiablement receu d'Almeide qui estoit encores viceroy, & lequel lui bailla, pour acroistre sa petite flotte, vne nauire avec soixante hommes, en laquelle Garfie de Soule commandoit. Siqueire paruint avec ses cinq nauires en l'isle iadis nommee Taprobane, & aujour d'hui Zamatra.

18. CESTE isle est sous l'Equateur à l'opposite de la Chersonese d'or vers le Su. Elle a plus de quatre cens cinquante lieues de long, & enuiron six vingts de large. Le pays est merueilleusement fertile, diuisé en plusieurs royaumes, & fréquenté de diuers peuples, ayât presques chascun les coustumes & ceremonies particulieres. Car les vns sont Mahumetistes, les autres sont du tout adonné aux idoles. Il y en a de si farouches & bestiaux qu'ils ne viuent que de chair humaine. D'autres au cōtraire ont des facons de faire assez ciuiles, & mōstrent quelque douceur en leurs cōtenances. L'isle abōde en or, à l'occasiō dequoy les marchans y vont de tous les quartiers du monde. Siqueire ayant esté porté en ceste isle, mouilla l'anchre en vn port du royaume de Pedir, & par son ambassadeur traita alliāce avec le Roy. Il fit le mesme en vne autre ville nommee Pacem, à quarante lieues de là. Puis il passa outre iusques en Malaca qui est en terre ferme vers le Nord, pour l'amour dequoy il auoit entreprius sa nauigation par le commandement d'Emmanuel. Malaca est en la Chersonese d'or, assise sur la bouche d'une petite riuere. Ceste ville auoit lors le plus renommé trafic de tout l'orient & cōtenoit quatre mille pas de lōgueur, & fort peu de largeur, riche d'arbres & de diuers fruits: mais on lui ameine d'ailleurs les graines & autres viures. La riuere partit la ville en deux, en telle sorte que les deux parts s'entretienēt par le moyen d'un pont. Les maisons & murailles estoient proprement & magnifiquement basties. Le peuple est de couleur bazanee, au reste assez ciuil & doux en sa conuersation. Quant au langage il est estimé si beau que tous ceux des regions & isles circonuoisines, qui trafiquent en Malaca, pensent estre beaucoup plus honnestes & gentils s'ils peuuent apprendre ce langage. Ce peuple prend plaisir aussi à se vestir & acoustrer proprement, aime la musique: est neantmoins vaillant en guerre, & ne fait difficulté de perdre la vie pour conseruer & acquerir honneur. La ville dependoit iadis du grand & riche royaume de Siam, & le Prince de Malaca estoit tributaire du Roy de Siam. Mais quand ce Prince se vid riche à cause des grands deniers qu'il tiroit des ports & peages, il s'assura tellement en ses moyens qu'il se retira de l'obeissance de l'autre, & depuis maintint sa liberté tant par armes, resistant brauement à ceux qui lui couroyent sus, que par presens qu'il faisoit aux conseillers du Roy de Siam pour le destourner de la guerre. Celui qui regnoit lors estoit Mahumetiste, & nommé Mahumet, tellement que le nom conuenoit avec la secte. Siqueire estant arriué au port, trouua en la rade quatre nauires de la China, les passagers desquelles allerent incontinent trouuer Siqueire, & cōmuniquerent si priuement avec lui que Siqueire espris de leur honnesteté & gentillesse, deuint leur grād ami, iusques à entrer en leurs nauires, & leur faire toutes caresses propres pour les asseurer de la singuliere affection qu'il leur portoit.

*Description de
l'isle de Tapra-
bane, & de ses
habitans.*

*Du royaume
de Malaca.*

*Du royaume
de Siam.*

19. LE ROY enuoya lors les gabeliers & receueurs des ports sauoir quelles gens estoient les Portugallois, & pour quelle occasion ils auoyent fait voile en ce haure. Siqueire fit responce qu'un Roy fort renommé l'auoit enuoyé d'un des bouts de l'Occidēt, afin de traiter alliance avec le Roy de Malaca, de la grandeur duquel il auoit oui parler bien amplement: & qu'il

*Accord entre
Siqueire & le
Roy de Ma-
laca.*

s'asseuroit que telle alliance setuiroit à l'un & à l'autre. Selô qu'on pouuoit coniecturer par l'exterieur, le Roy & son oncle, qui estoit regent du royaume, furent tresioyeux de l'offre de Siqueire: car ils estimoient que c'estoit vn grand honneur à eux d'auoir alliâce avec des Rois tant esloignez d'eux, & que leur nom volast avec honneur iusques en Occident: ioint que le trafic des Portugallois enrichiroit le Roy & le royaume de Malaca. Et pourtât le Roy enuoya des principaux de sa cour vers Siqueire, lesquels l'asseurerent de la part du Roy qu'on le traiteroit selon que la commodité & dignité de son maistre le requeroit. Puis apes il fut accordé que Siqueire entreroit en la ville, afin de parler plus commodement de la paix avec le Roy mesme: ce que Siqueire executa, & fut receu du Roy avec plusieurs signes d'amitié, & recueilli magnifiquement selon les manieres de faire de la nation. Ils accorderent lors que pour conclure la paix, leurs deputez confereroyent ensemble des articles, lesquels furent passez finalement, & ceste paix ratifiée par serment solennel, puis on liura promptement vne facturetie à Roderic Arauge qui deuoit negocier en ce lieu pour le Roy de Portugal: ce qui fit que les Portugallois commencerent à se pourmener en toute asseurance çà & là par les places & rues de la ville. Mais les capitaines de la China voyans vne telle confiance auertirent Siqueire de ne se fier pas tant aux Malacans, d'autant que c'estoit vn peuple double & trompeur, qui faisoit mestier de mentir & trahir, qui apres auoir pipé & endormi les Portugallois se rueroit sur eux & les extermineroit sans remissiô. Que le deuoir d'un bon chef estoit de penser que la vie de ses soldats depend de sa vigilance, non pas de la fidelité d'autrui: & que les Malacans tiendroyent promesse tandis qu'ils ne verroyent point le moyen de nuire aux Portugallois, mais que quand l'occasion se presenteroit de iouer quelque meschant tour, ils ne la lairoient pas eschapper. Que la debonnaireté est louable, & la trop grande confiance chez autrui blasmable, fut tout quâd on adiousté foy à des gens cōhîs en fraudes & mensonges. Tels estoient les auertissemens que ces capitaines donnoient à Siqueire, à ce qu'il se tint sur ses gardes: mais l'alliance solennelle, & l'apparence d'amitié que les Malacans monstroyent, ioint que de nostre naturel nous presumons mal-aisément qu'une bonne fortune se puisse changer en mauuaise, empescherent Siqueire de faire son proufit de tels auis, au contraire il permit à ses gens d'aller & venir en la ville, & aux Malacans de trafiquer en ses vaisseaux avec plus grande liberté qu' auparauant.

Bons auertissemens sont ordinairement méprisés.

Diverses ruses & trahisons de ceux de Malaca cōtre Siqueire, lequel se retire en Inde. Ce pendant le naturel des Portugallois est en peu de lignes de peins au vif.

Ce pendant les marchans des isles Meridionales, & de l'Inde haute firent tant qu'ils desbournèrent le Roy de l'affection qu'il portoit aux Portugallois, lesquels aussi, pour en parler au vray, il craignoit plus qu'il ne les aimoit. Doncques ces marchans alleguoient que Siqueire & ses semblables estoient coursaîres ennemis & hays de toutes nations: que sous vn beau semblant ils ne machinoyent que tromperies, pour ruiner ceux avec qui ils contractoyent alliance. Qu'ils auoyent ruiné beaucoup de villes, raié les biens & la liberté à plusieurs peuples, & guerroyé à toute outrâce ceux qui ne leur vouloyent permettre de bastir des citadelles dans les villes. Que ces

cita-

citadelles n'estoyent dressées sinon pour asseoir ceux qui donnoient entree à tels bastisseurs, & pour les piller malheureusement puis apres. Brief qu'il n'y auoit nation si enragée après le pillage, si cruelle & farouche, qui ne fust surmontée par l'auarice & cruauté des Portugallois. Que pour connoistre cela, il ne s'en faloit point rapporter aux paroles, ains à la pratique: & que si le Roy vouloit s'enquerir de tous les marchans, il entendroit les maux commis par les Portugallois en Inde, en Arabie & en Perse. Que le deuoir d'un sage Prince requeroit qu'il aprinst aux despès d'autrui, afin de ne tomber en semblables inconueniens: & que le seul remede au danger present estoit de racler ces escumeurs auant qu'ils fussent plus forts, autrement on se plaindroit trop tard d'auoir laissé perdre la commodité, & méprité le moyen de viure en repostandis qu'il se presentoit. Pouttant ils lui conseilloyét de faire couper la gorge à Siqueire & aux siés, afin que la despêche de ce petit nombre de gés fermast la porte du royaume à leurs semblables. Tels propos osterent aisément au ieune Roy, d'ailleurs assez estourdi, instruit en dissimulation, & fort contraire au Christianisme, l'affection qu'il portoit aux Portugallois. Les principaux auteurs de ce conseil furent deux des plus riches, & puissans marchans qui trafiquassent en Malaca, l'un nommé Nahodabegue de Cambaje, & Vtetimutaraja de la grande laue, bien veus & mieux voulus entre les Malacans. Iceux gaignerent aussi plus par grands presens que par belles paroles Bendara oncle du Roy & regent du royaume, tellement qu'il rōpit la foy, & la fit rōpre à son neveu. Mais Lāsamān, Amiral du royaume, s'opposoit viuement à tels cōseils, disant que

- le plus grand mal que lon sauroit attirer sur tout vn estat est le periure. Que
- Dieu, à qui toutes choses sont descouuertes, feroit vengeance du serment
- violé, & de son nom prins en vain. Dauantage, que c'estoit vne grād' hon-
- te & vilenie d'estre traistre & menteur: & que lon ne sauroit imaginer cri-
- me plus detestable que cestui là pour flestrir à iamais le nom d'un Roy. Et
- quant aux Portugallois qu'il sauoit qu'en toutes leurs guerres ils auoyent
- eu bon droit, & n'auoyent chastié sinon les periures: que c'estoyét gés qui
- tenoyent fermement leur promesse, & se monstroyent tresapres à courir
- sus aux perfides pour les punir selon l'enormité de leur forfait. Qu'il valoit
- donc mieux ensuiure ceux par le moyen desquels il estoit aisé de repousser
- tous ennemis, que les autres qui, en cōtreuenāt à leur deuoir, se poussoyent
- eux-mesmes en tresuiste ruine. Ce discours de Lamfaman ne peut aucu-
- nēt destourner le Roy du mauuais auis qu'il auoit prins: & pouttant il re-
- solut de faire tuer Siqueire & les autres capitaines.

P O U R executer cela plus commodément il fit bastir vne grande mai-
son de bois pres du pont, & semondit Siqueire à vn banquet qu'il auoit fait
apresté en ceste maison, ce que Siqueire ne refusa point voyant que le Roy
lui monstroir vn si bon visage. Il y auoit lors en Malaca vne Perliene Ma-
humetiste, qui faisoit estat de loger pensionnaires. Vn cousturier Portuga-
lois qui parloit bon Persan estoit l'un de ses hostes, & à cause qu'ils s'enten-
doient l'un l'autre, il deuint fort familier de ceste femme. Elle ayāt enten-
du quelque chose de l'entreprinse du Roy de Malaca par le rapport d'un

*Plus vn mou-
ni monstre
beau visage;
plus est il à
craindre.*

quidam qui l'entretenoit, fit prier Siqueire par ce cordonnier de permettre qu'elle parlât à lui seul touchant certain affaire, concernant l'honneur & la vie d'icelui. Siqueire se mocqua de tel auertissement, nonobstant quoy elle le fit prier par deux & trois fois de cela: mais voyant que cestoit temps perdu, fermât les yeux à tout ce qui en pourroit auenir, elle descourrit au cordonnier toute la menee. Icelui en auertit par le menu Siqueire, lequel fit le malade lors qu'on l'appella pour aller au banquet, & par ce moyen euita le danger. Ceste mine ayant esté ainsi esuentee, ils en dresserent vne autre. Siqueire se plaignoit de ce qu'on différoit à lui liurer pour argêt comme aux autres marchans les espiceries & autres marchādises qu'il vouloit charger. Le Roy protestoit que cela estoit auenu par l'importunité des marchans, & qu'il donroit ordre de satisfaire àmplement le lendemain à ce que Siqueire requeroit, l'admonnestant de tenir prests ses esquifs au bord de la mer. Ce pendant il fit emplir quelques barques d'armes sous lesquelles y auoit diuerſes sortes de viures & munitions de guerre, & commanda à des soldats bien armez d'entrer en ces barques, & s'habiller en marchans, auquel equippage ils deuoyent entrer dans les nauires des Pourtugallois comme pout vendre des viures, en attendant qu'on leur donneroit quelque signal de la ville (ce qui se deuoit faire par certaine fumee) pour surprendre & tuer les capitaines. Au reste, ils auoyent arresté de ne dōner le signal que premieremēt les esquifs ne fussent arriuez & arrestez à bord pour charger: afin qu'en mesme instāt ils peussent assaillir les nauires vuides, & les esquifs qui attendoyēt sans se douter d'aucun mal. Le lēdemain, ces marchans desguisez, voyant que tous les esquifs, excepté vn, estoient abordez, commēcent à ramer doucement vers les nauires, ayās pour principaux executeurs de telle meschanceté les inuenteurs de la trahison. Estans pres des nauires ils demandent si lon veut acheter des fruits ou des viures, & les offrēt à fort petit pris, ce qui esmeut les Portugallois, qui aussi auoyent besoin de telle marchandise, de laisser entrer ces marchans en leurs nauires. Mais Garſie de Souſe voyant qu'il en entroit trop dedās la siene, leur commanda de descēdre tous, & chassa à coups d'espee ceux qui ſirēt les restifs. Puis enuoya Fernand Magellan en son esquif, seul demeuré de reste, aduertir Siqueire de ne laisser entrer en sa capitaineſſe ceste desloyale nation: le priant se souuenir du banquet des iours precedens, où le Roy auoit deliberé le faire empoisonner. Desia Siqueire estoit enuironné de huit Malacans, qui attendoyent le signal, & iouoit si ardemment aux eschecs qu'il ne quitta point le ieu pour les propos de Magellan. Toutesfois il commanda à l'vn des pilotes de monter au masts, & auiser de la hune si les esquifs retournoyent chargez. Magellan vogue en diligence vers Souſe qui n'auoit pas grand'compagnie, afin de lui assister. Or le pilote descourrit de la hune vn des Malacāns entrez en la capitaineſſe, desgainant vn poignard derriere Siqueire, & vn autre à l'opposite lui disant des yeux qu'il approchast, en attendant le signal. Siquerie & ceux de sa compagnie estoient tellement attachez au ieu qu'ils n'apperceuoient point ces huit hommes autour d'eux. Alors le pilote s'escrie à haute voix apres Siqueire qu'il se gardast du coup qu'on lui vouloit

*Les maytres
n'ont iamais
faute d'inuen-
tions.*

vouloit donner, dont Siqueire tout estonné commence à demander ses
 armes. Ceux qui estoient restez avec lui s'amaissent, dont les Malacans es-
 froyez gaignent vistement leurs barques, comme aussi firent ceux qui a-
 uoyent inuesti les autres nauires. Car ayans delibéré de surprendre les Por-
 tugallois, & n'attendans plus que le signal, quand ils apperceurent chascun
 courir aux armes, ils ne trouuerent plus leur expedient que de s'en retour-
 ner plus viste qu'ils n'estoyent venus. Estans quelque peu eslongnez de la
 flotte, on donna le signal de la ville, dans laquelle furent cruellement trai-
 tez les Portugallois qu'on y peut attraper. Vingt seulement se sauuerent en
 la sacellerie de Roderic d'Arauge. François Serran, qui lors estoit dedans
 la ville, trouua moyen de gaigner vn esquip & se tira de la presse. Siqueire
 entra lors en conseil, où les vns furent d'auis de venger promptement vn
 tel outrage, & pour cest effect mettre le feu en tous les vaisseaux qui es-
 toient au haure, exceptez ceux de la China, puis souldroyer à trauers la
 ville à coups de canon. Mais cela ne se pouuoit pas bonnement executer,
 car les ennemis auoyent tué beaucoup de Portugallois, les suruiuans estoient
 en petit nombre, & y auoit deux esquifs retenus. Dauantage il falloit trou-
 uer quelque expedient pour deliurer Roderic d'Arauge & ceux qui estoient
 avec lui. Or Bendara craignant que Siqueire ne deualast au port, alla vers
 Arauge, l'exhorta de ne rien craindre & lui promit sur sa foy qu'on ne fe-
 roit aucun tort à lui ni aux autres Portugallois. Puis le Roy & Bendara en-
 uoyerent messager vers Siqueire lui protester qu'à leur desceu ce desordre
 auoit esté commis par quelques meschans garnemens, lesquels en feroient
 bien chastiez: & que s'il vouloit en voir faire iustice il prinst la peine de ve-
 nir en la ville, où il seroit le tresbien venu, l'asseurant qu'on le traiteroit co-
 me vn des meilleurs amis. Qu'Arauge & les autres Portugallois estoient
 accommodez de tout ce qui leur falloit, & promettoit on les rendre, si Si-
 queire les vouloit aller querir. Siqueire pria pour responce que le Roy luy
 renuoyast sains & saufs les Portugallois, afin qu'un tel gage l'asseurast qu'on
 lui tiendrait promesse en tout le reste. Le Roy n'y voulant point entendre,
 ains au contraire machinant diuerses ruses nouuelles pour attraper Siquei-
 re, & d'autant aussi que le temps de la nauigation s'escouloit, la flotte se mit
 à la voile & tira vers Indostan. En ceste roure Siqueire conquist deux navi-
 res d'ennemis, & mit le feu en l'une des siennes, par faute de matelots & au-
 tres gens pour la conduire. Il en perdit une autre qui eschoua, en telle sorte
 toutesfois que ceux qui estoient dedans se sauuerent tous. Finalement il
 atriua au cap de Cori, où ayant entendu qu'Almeide, duquel il auoit tenu
 le parti, s'estoit embarqué pour retourner en Portugal, & qu'Albuquerque
 estoit viceroy en Inde, craignant l'indignation d'icelui, il prinst la route de
 Portugal.

*Les traistres
 n'ont jamais
 faict d'excus-
 ses & pro-
 missions.*



LE SEPTIESME LIVRE.

SOMMAIRE.

1. Albuquerque entreprend la guerre cōtre Zabaim Daleam Prince de Goa.
2. Description de la ville de Goa & de l'isle aussi.
3. Premiere guerre de Goa, & quelle en fut l'issue.
4. Divers exploits d'Albuquerque apres la redditiō de Goa.
5. Seconde guerre de Goa, & les choses memorables suruenues durant icelle.
6. Goa assailie & prise par Zabaim sur Albuquerque.
7. Divers efforts de Zabaim pour ruiner Albuquerque, & comme le tout succeda.
8. Bataille navale entre la flotte d'Albuquerque & de Zabaim, & les plus remarquables occurrences d'icelle.
9. Estat des affaires en Afrique.
10. Divers aprests du Roy de Portugal pour maintenir sa domination es Indes.
11. Albuquerque se prepare à une troisieme guerre contre Zabaim.
12. Mort du Roy de Cochim, la coustume du pays en la successiō royale, guerre en Cochim & son issue.
13. Troisieme guerre en Goa, peu de la ville avec notables faits d'armes de part & d'autre. L'ordre qui Albuquerque y establit.
14. Comparaison d'Albuquerque avec Almirante au gouvernement des Indes.
15. Siege de Sasin en la coste de Barbarie.
16. Diverses victoires des Portugallois sur les Mores de ceste coste de Barbarie.
17. Navigation & exploits d'Edouard de Leme en Ormus & ailleurs, jusques à son retour en Portugal.
18. Ce qu'Albuquerque fit pour maintenir son autorité es Indes.
19. Preparatifs d'Albuquerque pour aller faire la guerre en Malaca, & ce qui lui avint durant le voyage.
20. Traité de paix & d'alliance entre le Roy de Pacem & Albuquerque.
21. Arrivée d'Albuquerque en Malaca: diverses ruses du Roy & les commencemens de la guerre.
22. Prise de Malaca, & des merueilleux accidens d'icelle la ville bruslee en partie, & enterrement pilee apres la desfaite & fuite du Roy.
23. Quel ordre Albuquerque establi en Malaca.
24. Description du royaume de Siam. Ambassade du Roy de Siam & d'autres Rois vers Albuquerque pour passer & se rendre tributaires du Roy de Portugal.

Albuquerque
ciseillé de faire
la guerre au
Prince de
Goa.



ALBUQUERQUE ayant delibéré d'aller en Ormus, arma vne flotte de vingtrois vaisseaux portans deux mille Portugallois & quelque réfort de soldats Indieps. Or cōme il arriuoit en Batticala, ce coursair, duquel a esté parlé ci deuant, nommé Timoja, qui lors tenoit le parti des Portugallois, & demouroit en vne petite isle à l'opposite d'Onor, le vint trouver, & le destourna de son entreprise: disant qu'il s'esmerueillloit qu'un si fage capitaine eust fait telle resolutiō & aimast mieux entreprendre guerre tant loin avec grand hazard & peu de profit, que de s'arrestier pres, avec beaucoup plus grand loyer de ses travaux. Davantage que c'estoit vne manifeste indiscretion de laisser en arriere vn puissant ennemi avec liberté de courir sus aux Portugallois qui seroyēt desnuez de secours. Qu'Albuquerque deuoit auant qu'entreprendre autre chose, subiuguer Goa, tant à cause de la situation de

de l'isle, richesse de la ville, & pource qu'il en estoit voisin, que pour reprim-
mer l'audace de l'ennemi. Timoja auertit aussi Albuquerque de l'appareil
de guerre que faisoit Zabaimdalcam Prince de Goa, lequel bastissoit viugt
grandes nauires, equippoit quelques galeres, entretenoit mille Turcs fort
vaillans hommes, & souldoyoit beaucoup de gens en diuers lieux, afin
de surprendre & exterminer les Portugallois. Qu'il n'y auoit rien si leur ni
plus honnorable que de preuenir le dessein de l'ennemi, & aller assaillir
promptemēt Goa, deuant que ceste flotte que Zabaim armoit desmarast.
Outre plus il remōstroit que Dieu presentoit à Albuquerque le moyen de
bien faire ses besongnes: dautant que Zabaimdalcam estoit enucloppé en
tresfacheuses guerres apres la mort de son pere Zabajo, & s'estoit traîpor-
té en terre ferme pour dompter les Princes qui s'estoyent reuoltez de son
obeissance. Que cela l'auoit contraint d'y faire passer vne partie de ses for-
ces, pour acheuer tant plustost. En apres Timoja offrit son seruice en ceste
guerre, adioustant qu'il ne desiroit rien tant que d'exposer sa vie au besoin
pour maintenir l'honneur du Roy Emmanuel. Albuquerque esmeu de
telle harangue assembla son conseil, auquel tous aprouerent l'auis de Ti-
moja. Par ainsi, Albuquerque ayant conclud d'assaillir ceste isle, enuoya
Timoja deuant par terre, pour assaillir vne forteresse biē munie de Zabaim
en la ville de Zintacora. Quāt à lui il print la route de Goa, & à peine estoit
il arriué en la coste, que Timoja le vint retrouver, l'auertissant qu'il auoit
brulé & renuersé de fond en comble la forteresse. Or Timoja comman-
doit à quatorze galeres bien fournies d'armes, d'artillerie & de toutes mu-
nitions de guerre.

1. G O A est le nom commun d'une isle & d'une ville. Vn grand fleuve se
partissant en deux & se desgorgeant ainsi en la mer, fait l'isle qui a douze
lieues de circuit ou environ. La ville estoit ceinte de murailles, munie de
tours, & bien garnie de toutes fortes de machines de guerre, ayant les mai-
sons & bastimens bien amples. L'air temperé, le paysage plaisant, le haure
asseuré attiroient plusieurs marchans à y venir demeurer, le trafic y estant
fort frequent & riche. Il y auoit aussi exercice des armes, & garnison de
pied & de cheual entretenue aux despens de Zabaim, lequel, ressemblant
en cela à son pere, attiroit à soy par grosses pensions tous ceux qui sauoit
s'estre portez vaillamment en guerre. L'isle peut nourrir beaucoup plus de
gens qu'il n'y en habite, car elle est couuverte d'arbres fructiers en grande
abondance, fertile en grains, en bestail, en autres diuers biens propres à la
nourriture du corps, & à plusieurs fontaines d'eau viue & douce. Les tem-
ples y estoient magnifiquement bastis à la Mahumetane, avec amples re-
uenus pour l'entretienement des prestres. Or il n'estoit loisible à personne
de mettre le pied en l'isle, que premierement à la descente il n'eust dit son
nom, celui de son pere & de son pays à l'un des secretaires establis en cinq
lieux où la descente en l'isle estoit plus aisée. Ces secretaires mettoient aus-
si par memoire la couleur, stature, & autres marques de celui qui vouloit
entrer. Au reste, il auint apres que l'isle fust subiuguee par Albuquerque,
qu'un certain Portugallois creusant assez profond afin de poser les fonde-

*Descriptiō de
l'isle & ville
de Goa.*

mens d'une maison, trouua vne croix de cuiure, preuue assez certaine, que ceste isle à esté autresfois habitee par des Chrestiens.

Première guerre de Goa, & quelle en fut l'issue.

P O V R reuenir à Albuquerque, il enuoya deuant Antoine Norogné, Simon Andrade & Simon Martin, en des brigantins qui pouuoient voguer en eau fort basse, afin de gagner vne tour qui pouoit endommager les assaillans. Il leur donna pour associé George Fogaze, Ierosime Teixeira, George Sylueire, Jean Nonio, & Garfie de Souze avec leurs esquifs bien equippez: & commanda au maistre pilote de ietter la sonde, & voir si les grands vaisseaux pourroient entrer au port sans danger de naufrage. Il enuignit aussi à Timoja d'aller assaillir vne autre tour en terre ferme assez pres de l'isle, en laquelle y auoit garnison & artillerie. Tous executent courageusement leur commission: car vne partie de ceux qui tenoyent bon dans les tours furent partie tuez, partie contrains se sauuer de viflesse, & le feu mis en ces tours: le maistre pilote rapporta aussi qu'il n'y auoit nul danger pour le regard du gué. De là ils passerent par le commandement d'Albuquerque, pour assaillir vne bourgade nommée Pangin, assez grande & munie de bon nombre de gens de guerre. Les ennemis acourent incontinent pour empêcher la descente, & y eut aspre combat: mais en fin ils furent rompus & mis à vau de route, & la bourgade bruslée. Le lendemain Albuquerque despescha quelques brigantins pour aller se joindre à Antoine Norogné: car la bonace arrestoit les grâds vaisseaux: & quant à lui il entra dans la galere de Iacques Fernâd de Begie, où quelques Sarasins se trouuerent disans qu'ils estoient de Cambaje, & auoyent fait vn voyage pour leur trafic en Goa: qu'au reste ils estoient compris en l'alliance de Melichiaz, pourtant supplioient Albuquerque de les tenir comme allies en sa protection, & auoir esgard selon sa fidelité & benignité acoustumée à l'humble requeste qu'ils lui faisoient. Albuquerque les receut & assoura qu'on ne leur feroit dommage quelconque, puis s'enquit deux en quel estat estoit la ville de Goa. Eux rapportent que les habitans estoient fort estônéz: que les principaux estoient prests à se mutiner les vns contre les autres, d'autant que la pluspart parloyent de se rendre ne se sentans pas assez forts de gens, les autres s'opposoyent fort & ferme à telle deliberation: & qu'au reste ceux ci ni ceux là n'auoyent adresse ni resolution certaine pour se tourner vers ce qui estoit plus expedient. Albuquerque preuoyant que s'il approchoit plus pres, ce seroit contraindre ceux qui estoient diuisez de se rallier: & desirant se voir bien tost maistre de la ville, afin de pouoir executer plus aisément les desseings qu'il proieettoit en son esprit, trouua bõ d'enuoyer en ambassade ces Sarasins vers les principaux de Goa. Le sommaire de leur legation estoit, Qu'Albuquerque estoit abordé là, non point pour ruiner les habitans, mais pour les deliurer d'une tyrannie, & les mettre sous le ioug d'un gouvernement paisible & moderé. S'ils se vouloyent rendre, il promettoit les maintenir en liberté, leur permettant de viure selon leurs coustumes, & ceremonies de leurs peres, sinon qu'ils aimassent mieux embrasser la religion Chrestienne: dauantage leur quitteroit vn tiers des tributs qu'ils payoient à Zabaim, à condition toutesfois qu'ils lui liureroient les gens de guerre,

Prudence d'Albuquerque.

pour

pour en disposer selon son bon plaisir. Les habitans acceptèrent ces conditions, exceptez aucuns qui s'enfuirēt avec quelques soldats. Les choses ainsi accordees, Albuquerque entra dans la ville le iour suiuant, qui estoit le seiziesme iour de Feurier, l'an mil cinq cens dix: print possession d'icelle, de la forteresse; de toutes les armes & munitions: receut le serment des habitans qui promirent d'estre tousiours fideles au Roy de Portugal, & ne se departir iamais de l'obeissance qu'ils iuroyent lui rendre. On trouua sur les rempars & dans les arçenaux quarante doubles canōs de fonte, vn nombre infini de faucōneaux, mousquets & autres petites pieces, force boulets, grāde quantité de pouldre à canon, & telle abondance de routes autres munitions que c'estoit merueilles. Au haure il y auoit quarante nauires de guerre, seize fustes, & plusieurs galeres. Les escuries de Zabaim estoient fournies de cheuaux Persans & Arabesques. Outre ces commoditez la ville estoit garnie de viures de toutes sortes & à foison.

4. ALBUQUERQUE desirant bien garder ceste ville tant renommee, arresta d'y passer l'huiuer, assit des corps de garde sur toutes les auenues, bail- *Diets exploits d'Albuquerque apres la reddition de Goa.*
la ville en garde à Antoine Norogne, la forteresse à Gaspar Payua, & la recepte des deniers du Roy à Francois Coſtuinel. Puis il esleut les prouiseurs & voyers pour auoir l'œil sur les viures, rues & maisons: & polica avec vne singuliere moderation tout cest estat. Il ne voulut point casser, ains laissa en leurs charges les Sarasins & autres commis pour exiger les ports & peages des marchandises estrangeres, iugeant que le temps ne portoit pas que l'on touchast à cela: tint sa promesse exactemēt, & s'estudia biē fort à se faire aimer de tous les habitans: fit soigneusement garder & garantir de l'insolence des soldats les femmes & filles que Zabaim tenoit en son serrail. Cela fait, Albuquerque delibera d'enuoyer vn ambassadeur au Roy de Narsingue, & mettre peine d'attirer à son parti le Roy de Vengapor, vassal de celui de Narsingue, par le royaume duquel l'ambassadeur deuoit passer. Gaspar Chanoque eut ceste commission, & se rendit dans Bisnaga ville fort grāde & trefriche, capitale du royaume de Narsingue & où le Roy demeure le plus du temps, duquel il fut hōnorablement receu. Il y auoit dans Goa quelques amis & seruiteurs domestiques du Roy d'Ormus, lesquels trafiquoyent avec les marchans. Albuquerque leur ayant fait quelques presens leur donna congé: & traita fort humainement les ambassadeurs d'Ismael Roy de Perse venus en Goa pour traiter d'affaires de consequence avec Zabaim. Puis il despescha vn gentilhomme vers Ismael, asauoir Roderic Gomeze Caruaillose, lequel fut empoisonné en Ormus par Cojeatar qui craignoit l'issue de la negociation de ce gentilhomme avec le Persan. En apres Albuquerque fortifia la ville, fit paracheuer les nauires qui estoient encōmencees, deliura au plus offrant (qui fut Timoja) les tributs & peages.

En ces entrefaites, suruint vn nouueau cas qui tailla de la besongne à Albuquerque & l'empescha de prendre loisir de dresser entierement l'estat public de Goa. Car quelques gentilshommes commencerent à se formalizer contre lui, en controllant premierement ses actions, puis le moquerent en derriere de tous ses exploits, & en vindrent iusques là, de vomir

Albuquerque retardi en ses desseins par ceux qui le derouoyent aider.

mille outrages contre lui, soit qu'ils portassent enuie à sa vertu, soit qu'ils fussent agitez de folie ou de fureur: & passant encores oultre, ils vindrent audacieusement protester cōtre lui qu'il auisast de ne point ainsi hazarder les affaires & personnes des Portugallois. Que Goa estoit vne grande ville enuironnee d'une infinité d'ennemis, & qu'on ne la sauroit aucunement garantir pour lors des dāgers dont elle estoit menassée: qu'en hyuer il estoit impossible de tirer secours d'ailleurs, à cause des perils en la nauigation. Zabaim, disoyent-ils, a de grands moyens, tout le peuple circonuoisin voudroit nous auoir tiré à tous le cœur du ventre. La fidelité que ceux de Goa ont iuree n'est pas gueres ferme, attendu qu'on l'a attachée de leurs bouches par menasses. Il faut donc tirer les garnisons hors la ville, & n'exposer pas à la merci des ennemis enragez toutes les troupes de Portugal pour assouuir l'ambirion de qui que ce soit. Ceux là trouuerēt assez de cōpagnons, accuserent Albuquerque enuers la multitude, iusques à prendre acte public contre lui, tellement que par telles menees ils rendirent neuf cens Portugallois contraires & ennemis d'Albuquerque. Ce que lui ayant entendu, il surprint de nuit les auteurs de ce tumulte, assemblez en vne maison pour traiter secrettement de leurs affaires, & les referra estroitement. Eux promettent de lui estre obeissans à l'auenir, ce qu'il accepta, leur pardonnant le passé, d'autant que pour lors il ne se pouuoit pas passer d'eux. Toutesfois il donna congé à quelques vns qui le lui demandèrent, craignant qu'ils ne lui fissent plus de dommage près que loin. Les autres fausserent leur promesse & l'abandonnerent.

Seconde guerre de Goa, & les choses suruenues durant celle.

CE V X du pays n'ignoroyēt pas tels desordres, & Zabaim auoit des espions qui l'aduertissoyēt par lettres de toutes les particularitez. Sur cela, quel que seigneur partisan d'Albuquerque lui escriuit que Zabaim dressoit vne puissante armee, appelloit les princes voisins à son secours, auoit mis fin par cōpositiō passable aux guerres qu'il faisoit à quelques seigneurs ses vassaux, & ruinoit les lieux qui enclinoient tant soit peu au Roy de Portugal. Albuquerque taschoit de secourir ses alliez, mais il auoit tāt d'ennemis sur les bras, que c'estoit temps perdu de penser pouruoir à tant d'affaires en vn coup. C'estoit assez (comme aussi il s'en acquittoit avec extreme diligēce) d'ēpēscher l'entree de l'isle aux ennemis & biē garder la ville. Mais encores estoit-il fort empesché en cela: car il auoit peu de soldats Portugallois, dōt la pluspart mesmes ne l'aimoit gueres, ayans esté destournez par les propos des tumultueux susmentionnez. Quant aux habitans ausquels il auoit octroyé la paix, il s'en deshoit merueilleusement, & non sans cause, veu qu'ils faisoient assez entendre que leur Prince seroit le tresbien venu s'il rentroit en l'isle, laquelle auoit beaucoup d'auenes & descentes assez aisées. Pourtant Albuquerque auoit à veiller de pres en mesme tēps sur ses soldats pour les contenir en deuoir, sur les habitans de Goa qu'ils ne fissent quelque trahison, & sur la multitude des ennemis pour leur resister en diuers endroits. Premieremēt il fit des trāchees en toutes les auenes de l'isle, posa des corps de garde es lieux foibles, & establit en chascun de ces corps de garde vn capitaine des plus vaillans & en qui il se fioit. Il y auoit vn quartier nommé

Benasta-

Benastarim plus fort que les autres, à l'opposite de la terre ferme en laquelle estoit campé Pultecarn lieutenant de Zabaim. Vn gentilhomme nommé Garfie de Souze gardât ce passage par le commandement d'Albuquerque, vid que les ennemis haussioient en leur camp vn estendard blanc lors il commanda qu'on fist le mesme de sa part. C'estoit signe d'assurance à celui qui vouldroit approcher. Incontinent vn homme commença à descendre du costau qui couroit le camp des ennemis, droit au riuage. Or le fleuve est si estroit que ceux qui sont sur les bords peuuent parler & estre aisément entendus l'un de l'autre. Cest homme donc commença à appeller tout haut Souze, disant quant à lui qu'il estoit Portugallois nommé Iean Machiade, & l'un des bannis laissez par Capral en Meliude. Qu'au partir de là il estoit arriué à Diu, où il auoit prins solde de Melichiaz, puis rencôtrant Zabajo Prince de Goa, & pere de Zabaim, qui lui donnoit plus grands gages, & l'estimant Turc, lui auoit donné charge d'une compagnie, il s'estoit rangé à ce parti: & quoy qu'il faignist estre Mahumetiste, qu'à la verité neantmoins, & en sa conscience il n'auoit iamais renoncé la religion Chrestienne, Que l'amour qu'il portoit à ses freres Chrestiens & à sa patrie l'auoyent persuadé de descendre pour admonester les Portugallois d'euitier la mort qui les menaçoit: pource que Zabaim auoit en campagne plus de quarante mil hommes de guerre, & tel nombre de canons & engins, qu'Albuquerque & les siens ne poutroyent longuement soustenir vne si pesante & furieuse charge. Poutant les prioit & exhortoit-il de quitter l'isle auant que l'hyuer leur fermast du tout les passages. Souze remercia cest auertisseur, & fit entendre le tout à Albuquerque, lequel presumant que c'estoit vn stratageme des ennemis pour estourner les gens, ne tint cõpte de cest auertissement, & dit qu'il n'estoit pas digne de sa charge s'il n'essayoit les moyens de garder l'isle auant que d'en sortir. Pultecarn voyant Albuquerque obstiné, auisa comment il pourroit gaigner le passage: pour y paruenir fit attacher ensemble quelques radeaux, & de peur que le canon ne les empeschast de seruir il posa vn corps de garde pres de l'embouchure du fleuve, & le fortifia d'une leuee de terre, d'un fossé, & de bon nombre de soldats. Les Portugallois apperceuans cela firent tout leur possible de rompre ce corps de garde, mais apres auoir perdu leurs peines ils auertirent Albuquerque que c'estoit folie de s'y amuser. Albuquerque y alla incontinent, avec vne troupe de gens de cheual, & ayant veu le retranchement de ennemis, defendit aux capitaines de plus assaillir, mais se contenter seulement de fermer le passage à l'ennemi, que de sa part il retourneroit promptement avec plus grandes forces, & enuoyeroit Norogne en mer avec les esquifs, afin de rompre plus aisément ce corps de garde. Il commanda le mesme aux autres capitaines qui gardoyent les autre auenues, puis estât de retour en la ville, incõtinẽt il fait publier que lon assemble en vn lieu toutes les nacelles dont les habitãs se seruoient à la rame, & qu'ils appellent Gories: mais on les auoit enuoyees secrettement aux ennemis, afin de lui donner moyen de mettre son armee, tant plustost & plus aisément en terre. Albuquerque entendant cela fit sur l'heure couper la gorge à celui qui a-

*Stratageme
des ennemis
auant par la
prudence d'Al-
buquerque.*

s'embarquerent en leurs nauires, encores que plusieurs d'eux eussent esté blessé au combat. Voila comme Albuquerque partit de Goa le trentiesme iour de May, ayant esté maistre d'icelle l'espace de trois mois & demi. De là il fit voile avec vent à souhait en vn autre port nommé Rapandar, où il delibera passer l'hiuer. Alors Francois de Souze ayant machiné en son esprit de se leparer d'Albuquerque, gaigna le haut sans congé: mais la tourmente & les vagues le contraignirent de descendre au port d'où il estoit parti, & lors il fut priué de sa charge, & son vaisseau commis à vn autre.

7. OR Zabaim entendât par ses espions qu'Albuquerque vouloit hiuerner au long du fleue, dressa premièrement vne leuee de terre à l'endroit où les Portugallois venoyent faire aiguade, nommé Bardes, y fit charrier quelques pieces de campagne, & y establit vn corps de garde des meilleurs soldats qu'il eust, sous la charge d'un capitaine nommé Melichicuf Corg, pour ostet l'eau à ses ennemis. Il mit aussi vne bonne garnison dans le chasteau de Pangin sur l'emboucheure du fleue, & fit reparer & munir ceste place de toutes choses necessaires. Et pour ce qu'il y auoit vne colline qui commandoit à ce chasteau, laquelle pouuoit nuire grandement à ceux de dedans, Pultecam eut charge de se camper sur ce costau avec trois mil hommes. Les pieces & mousquetades de ces forts bleffoyent beaucoup des gens d'Albuquerque, tellement qu'il fut contraint desmarer de là, & ancher sa flotte en vn endroit où le reflux s'acoustumé de battre entre vne isle nommée Diuar & la terre ferme. De rechef les ennemis s'assemblerent promptemēt là autour, afin de dresser d'autres forts, & ruiner les Portugallois à coups de trait & de canō. Et combié qu'Albuquerque fist changer de place à ses soldats de fois à autre, si se trouuoient ils tousiours à descouuert. Mais la faim & la soif leur faisoit beaucoup plus rudemēt la guerre: car les viures estoient faillis: Quelques fois neâtmoins ils appaisoyent aucunemēt la faim avec le poisson qu'ils peschoient. Quant à la soif, d'autant que les grosses pluyes enflerent tellement le fleue qui se desgorgeoit en la mer que les ondes d'icelle se sentirent de ceste douceur, ils se soulagerent puisans de l'eau du reflux qui leur vint bien à propos. Ce nonobstāt la famine croissoit de iour en iour: ce qui contraignit Albuquerque d'enuoyer Antoine Norogne avec Menaique (capitaine Indien, qui estoit tousiours demeuré fidele au Roy de Portugal) es isles de Charamé & Diuar non guetes esloignées l'une de l'autre, afin d'enleuer de là quelques viures pour la flotté. Norogne estāt descendu es isles emmena certain nombre de vaches, qui lui coustèrent auant que partir beaucoup de sang de ses soldats. Or la famine continuât, & pressant de plus en plus, sans espoir de soulagement, auint que quelques Portugallois oublierent leur sermēt de fidelité & la religiō Chrestienne, & s'enfuirent à nage vers Zabaim, auquel ils declarerent les difficultez dōt Albuquerque estoit enuéléppé. Alors Machiade auertit Albuquerque que Zabaim bastissoit des machines & engins de merueilleuse hauteur, pour approcher des nauires de Portugal, & y darder le feu. Que ces engins deuoient estre suivis d'une flotte de quatre vingts grands vaisseaux, qui auoyent charge de poursuiure & mettre en fond les nauires escartées, & qui

Divers efforts de Zabaim pour ruiner Albuquerque, & comme le tout succeda.

repousser plus aisément tous assaux. Puis il enuoya vers Albuquerque lean *res & cōment*
Machiade, afin de demander & obtenir la paix. Or Machiade auetit en *se gouverne à*
secret Albuquerque de ne rien accorder qu'avec conditions auantageu- *l'endront des*
ses : car Zabaim auoit receu nouuelles que le Roy de Narlingue avec *ses mēmes*
ne puissante armee approchoit de Tara col, ville assise en terre ferme & *qui se veulent*
dependante du royaume de Narlingue, de laquelle toutesfois Zabaim *maistriser.*
s'estoit emparé. Mais outre cela Zabaim craignoit que la flotte de Por-
tugal ne le frustra de ses reuenus & peages, en tenant les ports d'où il
tiroit de grands deniers, specialement de la descente des cheuaux qui
passent de Perse & d'Arabie en Goa. Albuquerque qui ne vouloit rien pro-
mettre qui l'empeschast d'assaillir Goa derechef avec armes descouuer-
tes si bon lui sembloit, proposa de tels articles de pacification que Za-
baim ne pouoit les signer qu'à son grand deshonneur & dommage.
Ainsi se passa l'hyuer, durant lequel Albuquerque surmōta non seulement
fer ennemis, la fureur de la mer, & la rigueur de la famine, mais souuēt aus-
si l'orgueil & peruersité de ses gēs mēmes : car il auit en ce tēps, que quel-
ques gentilshommes Portugallois s'amouracherent de certaines belles In-
diennes qu'Albuquerque faisoit garder fort songneusement, pour les en-
uoyer en Portugal à la Roine Marie, afin d'estre baptisees & mariees puis a-
pres. Roderic Diaze fils d'un secretaire, qui des lōg temps paillardoit avec
l'une de ces Indiennes, fut celui qui mit le feu aux oreilles de ces gētilshom-
mes, tellement que tous venoyent de nuict en la galere capitainesse trou-
uer ces femmes, sans se soucier de ce qu'Albuquerque en auoit ordonné.
Lui entendant tel desordre commanda que Roderic fust pendu : au con-
traire les gentilshommes, compagnons'en mēmesofait, vont se presen-
ter à Albuquerque, & le supplient de donner la vie à ce pauvre macque-
reau. Albuquerque ayāt reietté leur supplicatiō, eux pēsent gagner dauā-
tage par paroles audacieuses & outrageuses : mais ils ne firēt sinon cōtrain-
dre leur general de les arrester & ferrer prisonniers. Toutesfois voyāt qu'il
ne pouoit pas bonnement se passer d'eux : ayant lors grād'faute de gens, il
les fit relascher. Eux commencent à leuer les cornes, disant que ce pardō ne
pouoit pas compenser le tort qu'on tenoit de tels gētilshommes de mar-
que & de bon lieu, qu'ils ne vouloyent sortir de prison à quelconque con-
dition qu'on leur presentast, ains souffriroyent qu'on les enchainast & en-
uoyast pieds & poings liez en Portugal, pour declairer deuāt le Roy mē-
me ce qu'ils auoyent à dire d'Albuquerque. Tels beaux propos rapportez à
Albuquerque, il fut content que ces estourdis trempassent tout leur saoul
en l'estat auquel ils se plaifoient ainsi, les degrada, & commit leurs charges
& capitaineries à d'autres gentilshommes.

8. C E P E N D A N T Machiade, qui espioit soigneusement tous les depor- *Bataille na-*
temens de l'ennemi, fit entendre à Albuquerque que Zabaim dresseoit vne *uale entre la*
armee nauale de quatre vingts vaisseaux pour l'assaillir au despourueu. Al- *flotte d'Albu-*
buquerque pensa sur cest aduertissemēt qu'il ne falloit pas attendre que ce- *querque & de*
ste flotte fust du tour preste, ains resolut preuenir Zabaim & le surprendre *Zabaim, &*
auant que tous les vaisseaux fussent roulez en mer. Pourtant il despescha *les plus remar-*
quables occor-
rances d'icelle.

Antoine Norogne avec dix fustes bien equippees, lui commandant d'investir ce qu'il pourroit: puis enuoya deux galeres, vne longue nauire & vn brigantin, pour anchrer en certain lieu & costoyer le bord, afin d'attrapper quelqu'un du pays & sauoir quelque chose des desseins de Zabaim. Apres auoir longuement attendu sans descouurir personne, ils s'auancerent pres de la ville de Goa à la portee du canon. Vn des capitaines nommé Jean Gonçalues passa deuant la ville, puis s'en reuint trouuer les galeres, sans perte quelconque, quoy que les ennemis fissent iouer leurs pieces droit à lui. Quant à Norogne, estant approché finalement avec ses fustes & brigantins il descourrit derriere soy trente fregates parties de l'isle de Diuar sous la conduite de Zufalarim, lesquelles venoyent à lui, & d'autre part du costé de la ville quelques barques voguans à force de rames: au moyen dequoy il diuisa la petite flotte en deux. Lors il menoit trois cens soldats des plus resolués que lon eust sceu trouuer, entre lesquels estoient ces gentilshommes qui prenoient plaisir à demeurer en prison, lesquels toutesfois pour l'amour de Norogne se disposerent au combat en qualité de soldats seulement, sans vouloir y accepter aucune charge. Norogne commanda à vne partie de sa flotte d'assaillir les vaisseaux prochains de la ville: lui avec son reste tourna visage contre Zufalarim, lequel vint aux prises fort courageusement, & y eut aspre combat de tous costez longuement, sans que lon peust presumer qui emporteroit la victoire. Mais en fin, pour ce que les ennemis tomboyent en grand nombre sans plus se releuer, Zufalarim fit tourner les proues & mit ses troupes en terre, comme aussi firent les autres capitaines qui s'estoyent trouuez en ceste meslee, & tirerent leurs vaisseaux à bord avec vne viffesse incroyable. Ils estoient lors attachez au combat pres de la ville deuant les yeux de Zabaim. Or il auint que Norogne poursuivit de telle ardeur le vaisseau de Zufalarim qu'icelui eschoua. Lors Simon & Fernand Andrade freres suiuis de trois autres sautēt dedās, & chargent de telle furie qu'ils contraignirent tous ceux qui y estoient de se sauuer promptement en terre. Comme Norogne vouloit entrér dedās ce vaisseau pour secourir ces cinq, en mettāt le pied sur le tillac il eut la cuisse gauche percee d'un coup de fleche descochee de dessus les murailles de Goa: ce qui le fit tōber dans son esquif, lequel par vne telle secousse fut separé de la galere de Norogne. Vn tel accident mit les Portugallois en grand effroy, & tous cōmencerent à tendre vers Norogne pour le tirer de là, sans que personne allast aux cinq qui auoyent cōquis le vaisseau de Zufalarim, duquel les ennemis s'estoyent approchez à l'aise, pource que le flus de la mer s'estoit retiré. Mais les deux Andrades se porterent lors si vaillamment que Zabaim demeuroid tout rauy de leur prouesse: car outre la defense de leurs personnes ils combatoyent brauement pour garentir les trois autres qui les auoyent suiuis. Les esquifs & brigantins ne pouoyent approcher d'eux à cause que le canal n'auoit assez d'eau pour soustenir le moindre vaisseau que lon eust sceu choisir. Or le pilote de la galere de Louys Coutin l'exhorta de faire descharger son esquif, declairāt qu'avec sept matelots il vouloit aller querir les Andrades & les tirer de la presse: ce qui fut promptement executé, & comme le pilote approchoit

approchoit il y trouua vn des Capitaines de Norogne, nommé Begie, qui s'estoit rendu là pour empescher que les ennemis n'endommageassent le pilote & ses matelots. Apres que les Andrades & les trois autres furent entrez dās l'esquif, Begie fit les efforts d'attirer le vaisseau de Zufalarim, mais voyant que c'estoit peine perdue il le laissa dans le sable. Les ennemis perdirent beaucoup de gens en ceste bataille, dont les Portugallois remportoient vne belle victoire sans la mort de Norogne, lequel deceda du coup de fiesche au bout de trois iours, au grand regret des soldats. Son corps fut enterré, & son trespas pleuré non seulement par son oncle Albuquerque, mais aussi par toute l'armee. Car ce personnage outre sa vaillance estoit paré de belles vertus, & entre autres il estoit aimé & cheri de chascun pour la grandeur douceur & de bonnairété de son naturel. Zabaim enuoya gens vers Simon & Fernand Andrade leur declairer qu'il les estimoit des plus vaillans du monde, que tous ses biens & moyens estoient à leur commandement. Que la vertu gaignoit son cœur en quelque personne qu'il la vist reluire: & qu'ayant apperceu les beaux faits d'armes par eux executez en sa presence il ne pouuoit les tenir pour aduersaires ains pour amis. Eux firent responce de mesme gayeté à Zabaim, lequel apres ces choses descendit en terre ferme pour aller au deuant de l'armee du Roy de Narfingue, & de là il despecha quelques truchemans pour parler de la paix: mais lui & Albuquerque ne se peurent accorder. Albuquerque ayant le temps propre fit voile en Anchediue, d'où il delibera se retirer en Cananor, afin de calfeutrer ses vaisseaux, & donner quelque relasche aux malades & blesez pour se guerir de leurs playes & maladies. Mais auant que doubler vne pointe nommee Rama, laquelle depend de la coste de Goa, il descouurit cinq nauires en haute mer, dont les quatre faisoient vne flotte à laquelle commandoit Iacques Mendez de Vasconcel, qui auoit charge du Roy d'aller en Malaca: l'autre nauire estoit de la flotte de Fernand Coutin qui auoit hiberné en Mozambique. Ce renfort de nauires & d'hommes remit le cœur au ventre des Portugallois.

*Comment la
vertu est reco-
nnue par vn
barbare.*

9. **A** D V R A N T ces guerres Indiennes, les affaires d'Afrique passoyent comme s'ensuit. Nonio Fernand Ataide parti d'Arzile avec ses troupes rencontre Benguaneme l'un des capitaines du Roy de Fez, le combat & met en route, tuant vne partie de ses gens, les autres restent prisonniers, Benguaneme mesmes demeure mort sur le champ. Vasque Coutin, Conte de Borbe & gouuerneur d'Arzile, ayant entendu par ses espions que quelques autres capitaines de Fez se reposoyent en campagne sans estre sur leurs gardes, les surprint, tailla en pieces vne partie, emmena des prisonniers avec force bestail. D'autre coste Barraxa & Almādarin (qui estoient lors à la solde du Roy de Fez, & des plus auancez & estimez entre ses capitaines) amasserent avec leurs cōpagnons vne grosse troupe & coururent iusques aux portes d'Arzile: sans aucun exploit memorable toutesfois, ains mesmes ils y perdirent trois hommes de cheual. Le Roy de Fez amassa vne grande armee & reuint deuant Arzile: mais ayant aprins que la place estoit bien munie de gens & de viures il leua le siege. Dereche estoit apres, Barraxa, Almandarin & quelques

*Estat des afai-
res d'Afrique.*

autres capitaines fuiuis de plusieurs cornettes de caualerie se vindrent presenter deuant Arzile. Vn ieune & brave gentilhomme nommé Fernand de Castre fut le premier à cheual pour aller au deuant: mais daurant que le gouuerneur fit fermer les portes, icelui se trouua dehors avec vn sien valet seulement. Les espions & descouureurs au nombre de dix, qui se retiroyēt de viftesse dans la ville, se ioignirent avec Fernand, lequel donnant à toute bride à trauers les ennemis fut enueloppé & tué. Incontinent les portes furent ouuertes & courut on au secours des autres qui rentrerēt fort bleffez, & les portes fermées de rechef, afin de retenir les plus eschaufez, le gouuerneur se contentant que les ennemis eussent esté repoussez. En la mesme annee George Vieire acompagné de trente deux cheuaux fit vne course & recontra Cide-Hamet fils du gouuerneur d'Alcassar Quibir, lequel menoit cent hommes bien montez. La meslee fut tresapre & longue: mais en fin Vieire & plusieurs autres de son costé apres auoir vaillamment combattu tomberent par terre, les autres demeurerent prisonniers, quelques vns en bien petit nombre se sauuerent du danger à course de cheuaux. Francois de Portugal, qui puis apres fut Seigneur de Viminose, fuiui de cinquante cheuaux dont il auoit charge, & de quarante autres de Coutin qui se ioignirēt à lui, donna dedās vn village où il tua force Mores, & print des prisonniers. Mais les ennemis s'estans assemblez sur lui de toutes parts au signal que leurs compagnons auoyent donné, il se trouua en tresgrand danger de sa vie: car ou lui dōna tel coup de pierre qu'il demeroit estendu sur la place, si Aluar de Branche ne l'eust soustenu. Quelques gentilhommes furent tuez sur la place: ce nonobstant Portugal retourna victorieux dans Arzile avec seize prisonniers.

Diuers appareils du Roy de Portugal pour maintenir sa domination en Inde.

En ceste mesme annee le Roy Emmanuel equippa quatre flottes: l'une, dont a esté parlé ci dessus, sous la charge de Iacques Mendeze de Vasconcel, laquelle desmara de Lisbonne le septiesme iour de Mars. La seconde estoit de sept nauires, ayant pour general Gonçalue Siqueire, lequel fit voile de Lisbonne le dixseptiesme iour du mesme mois: & furent ces deux flottes enuoyees en Inde. Quant à la troisieme composée de trois nauires auxquelles commandoit Iean Serran, le Roy leur commanda de prendre terre en l'isle de saint Laurent, pour traiter alliance avec le Roy d'icelle, & se charger des choses de pris que lon y pourroit trouuer. La quatrieme flotte de plus de trente nauires conduites par Nonio Fernand Ataide, qui peu auparavant estoit retourné en Portugal, fut enuoyee en Barbarie, afin de garder pour le Roy la ville de Safin. Nous auons veu ci deuant comme Vascôcel arriua en Inde. Siqueire ayant perdu vne nauire & sauué les hommes d'icelle print terre en Cochim, puis alla en Cananor, entendant qu'Albuquerque faisoit illec sa demeurance. Serran estant abordé en l'isle de saint Laurent apres diuerfes auantures, descouurit toute la coste meridionale, fit alliâce avec quelques Rois, recueillit en ses nauires vn des mariniers qui auoyent esté laissez avec Gomeze d'Abrey, & entendit d'icelui que le tēps qu'il employeroit à courir au long de ceste isle ne lui apporteroit plaisir ni prouffit qui en valust la peine. Pourtant Serran s'effargit en mer nonobstant

les bourasques & print la route de l'Inde. Quāt à Vascōcel, apres auoir gaigné le haur de Goa, il alla faire la reuerence au Viceroy Albuquerque, & presenta les lettres d'Emmanuel qui lui commādoit de fournir à Vascōcel tout ce qui seroit neccessaire pour le voyage de Malaca.

11. A L O R S fut resolu d'un commun auis, qu'il n'y auoit afaire qu'ō deust preferer à la guerre de Goa, & que la presence de Vascōcel y estoit biē requise. Quant à Malaca, c'estoit vne entreprinse de si grād poids & de telle importāce, qu'il faloit plus de quatre nauires pour en venir à bout: & qu'apres la conqueste de Goa, on pourroit acommoder Vascōcel d'un bon nombre de nauires pour acomplir ce voyage si perilleux. Vascōcel suiuit volontiers ceste resolution. De là Albuquerque fit vn tour en Anchediue, & enuoya François Pantoje en Zacotora dans vne nauire de charge plaine de viures, & contremanda vn sien neveu aussi nommé Antoine Norogne, capitaine de la citadelle de Zacotora, pour le venir trouuer. Il escriuit aussi à Leme que la guerre de Goa l'auoit empesché d'entoyer les nauires qu'il lui auoit promises de renfort. D'Anchediue il fit voile en Onor, où Timoja lui vint à l'encōtre avec des fruits & viures. Vascōcel presenta lors à Timoja des lettres fort gracieuses du Roy de Portugal, lequel mandoit à ce coursaire qu'il le remercioit de ses bons & fideles seruices, promettant l'en recompenser si amplement que Timoja ne se repentiroit iamais de s'estre fidelement employé pour vn tel Prince. Ces lettres encouragerent tellement Timoja qu'il promit faire meilleur deuoir que iamais pour l'auancement des affaires du Roy. Albuquerque retourne de là en Cananor parlementa avec le Roy de ceste isle en vn lieu assigné pres du riuage, tellement qu'il conferma plus estroittement que iamais par promesses & gracieuses paroles l'amitié contractee avec ce Prince. De Cananor il enuoya vn capitaine nommé Simon Martin de Caldeire pour garder la coste de Calecut avec trois nauires, & empeschier qu'aucun vaisseau venant d'Arabie entrast au port de Calecut ou sortist d'icelui, sans estre arresté. Il donna la mesme charge à Gaspar de Souze avec trois autres nauires. Gaspar Payua fut despesché avec trois nauires pour faire le mesme en la coste de Goa. Vascōcel fut prié de roder toutes les autres costes de l'Inde avec ses quatre nauires. Tous executerent ce qui leur estoit commādé, & prindrent quelques nauires, en l'une desquelles on trouua deux Iuifs, qui ayans embrassé le Christianisme seruient depuis de truchemans & s'acquitterent tresbien de leur deuoir.

12. E N ces entrefaites, Albuquerque receut nouuelles de la mort du Roy de Cochim, lequel (suiuant ce qu'en auōs discouru ci dessus) auoit inuiolablement gardé l'alliance par lui cōtractee avec les Portugallois, puis quittant toutes affaires & le gouuernemēt du royaume s'estoit retiré en vn turcol pour y passer le reste de sa vie au seruice de ses dieux. Le fils de sa sœur lui auoit succedé selon la coustume du pays. Or il auoit vne loy portāt que si le Roy par deuotion quittoit la couronne pour enployer le demeurant de ses iours à viure solitairement en quelque lieu à l'escart & vacquer aux affaires de sa superstition, incōtinent apres sa mort son successeur seroit contraint laisser le gouuernemēt du royaume, & se retirer en la mesme solitu-

Albuquerque se prepare pour recommencer la guerre contre Zabum.

Mort du Roy de Cochim. La coustume du pays en la succession royale.

de, afin de succeder à son oncle en deuotion (quoy que forcee) aussi bien qu'en dignité royale : & lors celui à qui les loix adiugeoyent la couronne s'emparoit du royaume. Cela se pratiquoit, toutes & quantes fois que quel- que Roy laissoit l'estat de son bon gré pour deuenir moine. Or au temps qu'Edouard Pacheco faisoit la guerre au Roy de Calecut, le Prince qui de- uoit succeder au royaume auoit abandonné son oncle & s'estoit ioint au Roy de Calecut son ennemi: à cause de quoy il fut priué de son droit, & vn autre neveu appellé pour succeder au roy de Cochim, lequel estant dece- dé, celui qui c'estoit ainsi vilainement reuolté & rangé au parti des Calecu- tiens commença à presser son cousin de lui quitter la place & entrer en la moinerie. Le nouveau Roy ayant demandé auis aux Portugallois, qui ne pouuoient souffrir commét que ce fust que ce perfide & malheureux leur ennemi coniuéré prinst possession d'un royaume dont ils estoient prote- cteurs, escondusit tout à plat son cousin, lequel voyant sa superstition mesprisée, & pat ce moyen lui deceu de l'esperance de regner, assembla force gens que lui bailla le Roy de Calecut, puis entra à main armée sur les limites du royaume de Cochim. Albuquerque entendant cela, fit voi- le en Cochim, donna ordre à ce que rien ne defaillit pour l'entretene- ment de la guerre, & laissa au Roy pour sa garde quelques vaillans hom- mes pour faire teste à l'ennemi. Ceste venue d'Albuquerque effroya ce- lui qui querelloit le royaume & le fit retirer : mais quand il sentit Albu- quetque en Cananor, il se remit aux chāps avec ses forces pour guerroyer à bon escient sur la frontiere de Cochim. Nonio Vasque de Blācastel & Laurent Morene allerent au deuant avec quelques troupes, lui donnerent bataille, le deslrent, tuerent vne partie de ses gens, mirent le reste à vau de route, & le Prince mesmes se sauua à toute peine. Enuiron ce temps vint vers Albuquerque vn ambassade du Roy de Cambaje, pour lui faire enten- dre de la part de son maistre que le bruit estoit estoit qu'Albuquerque ar- moit pour entrer en la mer d'Arabie: quoy auenant, ce seroit chose trefa- greable au Roy si Albuquerque alloit mouiller l'āchre en l'un des ports de Cābaje, afin qu'eux deux peussent traiter ensemble des affaires de paix. Ou- tre plus cest ambassade apportoit lettres de cinquante Portugallois que son Roy tenoit prisonniers. Iceux estās partis de Zacotora avec Alfonso Noro- gne, furēt troussés d'une bourasque en la coste de Cābaje, tellemēt que leur vaisseau se rōpit. Norogne & autres qui se ietterēt sur des ais à la merci de la mer auoyent esté engloutis des vagues. Mais ceux qui se tindrēt dās le vai- seau, apres que le plus marin se fust retiré se sauuerent à pied en terre ferme, où ils furent prins des gens du pays & menez au Roy. Ils supplioyēt Albu- quetque d'auiſer à tous moyens possibles pour les tirer de là. Albuquerque fit response propre pour entretenir le Roy en sa bonne volonte, & donna bonne esperance aux prisonniers, ce qui les resioiut en leur misere.

A v. mesme tēps Albuquerque auoit equippé vne flotte de trēte quatre 13. nauires, en laquelle y auoit quinze cēs Portugallois & trois cēs Indiēs. Estāt parti de Cananor il arriua au haure d'Onor, où Timoja le vint trouuer & auertir qu'apres son depart la ville de Goa auoit esté fortifiee de trāchees, fossez,

*Guerre en Co-
chim & son is-
sue.*

*Troisiesme
guerre entre
prise contre
Goa.*

fossez, murailles, répars, bié munie d'artillerie & de gés de guerre, & que la garnison montoit à plus de neuf mille soldats, parmi lesquels y auoit grád nombre de Turcs. Lors Timoja espousoit la fille d'vne certaine Roine de Gozompen laquelle auoit quelque estendue de pays en ces quartiers là. Albuquerque se trouua aux nopces pour faire honneur à l'espoux, puis ils resolurent ensemble que Timoja passeroit à pied de la terre ferme en l'isle : & quant à ses trois nauires il les ioignit à la flotte d'Albuquerque & en donna la lieutenance à vn nommé Melras, sur la vaillance duquel il se reposoit grandement. Melras donnant à toutes voiles dans le port, estonna tellement la garnison de Pangin, qu'ils se retirerét en desordre dedans la ville : toutes-fois aucuns furent attrappez & menez à Albuquerque qui sceut d'eux en quel estat estoient les affaires de Goa. Puis ayât iecté les anchres Albuquerque enuoya deuant Ierosme & Iean Limice freres avec quelques autres capitaines, pour aborder la ville de plus pres. Eux executent en grand danger ce qui leur estoit enioint, & rapportent que la ville estoit bien remparee & munie d'vne tresforte garnison. Ce nonobstant Albuquerque s'appresta pour l'assaillir, & pource que son intention estoit de mettre promptement la main à la besongne, estimant que la victoire consistoit à estre soudain, il resolut faire tous les efforts d'y entrer le lendemain qui fut le vingtiesme de Nouembre. Premièrement il arresta de faucher & rompre les corps de garde disposez çà & là, puis se camper & retrancher : cela executé faire bresche raisonnable, puis donner l'assaut. Mais son entreprise succeda encores mieux qu'il ne l'auoit desseignée du commencement, comme nous le verrons tantost. Ceste nuit il fit voguer deuant les galeres & carauelles, commandant aux capitaines de canonner la ville sans relasche quelcōque, afin d'oster le repos aux ennemis, & les accabler plus aisément le lendemain qu'ils seroyent encotes tout recreus d'auoir tant veillé. Lui sur les trois heures de matin descend en son esquip, comme aussi firent les autres capitaines, & sans bruit mit ses troupes en terre au point du iour, rangeant ses troupes incontinent en bon ordre. Avec cinq cens Portugallois & les trois cens Indiens il tira vers le corps de garde posé au Septentrion. Les autres capitaines assaillirent vne grosse troupe d'ennemis qui gardoit la descète. Ierosme & Iean Limice, Lacerde, Begie & autres capitaines suivis de trois cens hommes donnerent dedans vn corps de garde qui regardoit la ville. Vasconcel & Payua, qui auoyent mesme charge, assaillent furieusement les ennemis qui estoient sur le milieu. Les Andrades, Arias de Sylues & autres chefs prenent la charge de se rendre maistres du quartier qui s'estendoit iusques à vn lieu nommé le canal de Timoja. Les ennemis posez en garde s'efforcerent de chasser les Portugallois à coups de canon : mais ils perdirét peine & pouldre, car ils ne peurent avec leurs bales & boulets leur empêcher l'approche. Il y auoit en l'vne des portes, que les Chrestiens ont depuis appelée de sainte Caterine, vn capitaine de Goa, commis pour auiser où il seroit besoin d'enuoyer secours, & y marcher lui mesme si la necessité le requeroit. Voyant les vns aux mains contre les autres, & de quelle violéce les Portugallois chargeoyent leurs ennemis, il appella des compagnies

nouvelles de la ville, qui acourent en foule, & lors le combat recommença plus aspre & furieux que deuant. Les ennemis estoient en trop plus grand nombre, mais Dieu aida aux Portugallois tellement que le corps de garde que Ierosme & Iean Limice auoyent assailli ayant esté rompu le premier, les autres capitaines eurent mesme heur ailleurs, & contraignirent les ennemis de se sauuer dans la ville. Alors ils les poursuuiurent de si pres qu'ils se meslerent ensemble: de telle façon que quand on voulut serrer les portes, les Portugallois se trouuerent entre deux. Denis Fernand Melio entré le premier, ietta à trauers vne grosse pertuisane, pour tenir la porte entrebaillée. Quelques autres qui le suiuyent firent de mesme. Ce nonobstant les ennemis faisoient tous leurs efforts de fermer la porte, & y eut là vn estrange tumulte, car ceux de la ville voyoyent que leur vie & salut consistoit à empescher l'entree aux Portugallois, lesquels au contraire s'asseuroient d'emporter la victoire si ceste porte demeueroit ouuerte: & ainsi quelques fois les vns la fermoient, puis les autres la rouuroient. Finalement les Portugallois presserent & poussèrent tant qu'en despit des ennemis ils en demeurèrent maistres: treize entre autres qui y auoyent tousiours valeureusement combatu, apres s'estre fait large à coups d'espee entrèrent la teste baissée & merueilleusement eschaufez au combat dedans la ville. Les ennemis reculoient tellement qu'ils ne laissoient de descocher vne infinité de fiesches & autres traits contre ceux qui les poursuuyoyent. Des fenestres & de dessus les toicts on iettoit tant de cailloux que les Portugallois ne sauyent où se tourner, au moyen dequoy les ennemis se rassemblent & les assaillent pour les chasser dehors. Arias de Sylues, Mendeze Alfonso de Tingi, puis Fernand Andrade, Manuel de Cugne & Antoine Garcez suruindrent à point avec vne troupe de soldats qui recommencerent la partie, & mirent les ennemis en route de tous costez. Les vns s'enfuirent au palais de Zabaim, les autres s'escarterēt par diuerses rues, ce qui fut cause que les Portugallois se desbanderent de rechef en les poursuuiuant. Vingt d'entre ceux qui poursuuiurent ceux qui s'estoyent retirez chez Zabaim se trouuerent en grand danger: car les ennemis se rendirent là, leur coururent sus de toutes parts, tuerēt Vaque de Fonsèque & Vaque Cocillo qui les pressoyent de trop pres. Ierosme Limice ayant perdu beaucoup de sang & le souffle lui défaillant tomba par terre. Ses compagnons voyans cela commencerent à reculer. Alors Mendeze Alfonso & Arias de Sylues commencent à crier à haute voix apres les Portugallois pour recommencer le combat, & donnent de telle furie à trauers les ennemis qu'ils réuerfent tout ce qui leur oſa faire teste. Les autres Portugallois entrans par les maisons, furent cause que leurs compagnons demeurèrent beaucoup plus longuement attachez au combat par les places, & salut qu'ils sortissent pour aller au secours. Entre autres Iean Limice, lequel rencontrant son frere par terre respirant encor, vaincu de l'amour fraternelle s'arresta tout court. Mais Ierosme lui dit, passe oultre, mon frere, ce ne te seroit pas honneur de perdre courage maintenant & oublier à faire le deuoir de vaillant homme. Ne te fâche point de ce qui m'est auenu: car auât que mourir i'ay

com-

*Prise de Goa
par les Portu-
gallois avec
notables faits
d'armes de
part & d'autre.*

combattu autant que ma force la peu porter. Combien que Iean fust oultré de douleur, toutesfois picqué par les propos de son frere expirant, auquel il ne pouuoit rendre la vie, entra de pieds & de teste dans la foule des ennemis, de tant plus que le regret de la mort de son frere lui haussioit le courage. Il y auoit deuant l'entree du palais de Zabaim vne plaine & vne petite colline au bout. C'estoit en ceste plaine que les grâds coups se ruoyét: mais en moins de rien on vid sortir force gens de cheual & de pied hors de ce palais fort spacieux, qui enfermerét les Portugallois & les eussent tuez tous, si Vasconcel ne fust suruenu avec ses troupes: car en entrant dans la ville comme en bataille rangee, il poursuuiuoit les fuyards, sans iamais permettre aux siens de se desbander. Ainsi comme il couroit sus aux ennemis ramassez, leurs capitaines recueillirent nouuelles troupes sur le costau, & voyans combien estoit petit le nombre des assaillans, ils reprindrent cœur, donnerent vne charge fort rude aux Portugallois, & les serrent de si pres qu'ils les contraignirét de reculer & monter les degrez baltis en façon de theatre autour du palais de Zabaim. Apres auoir quelque peu repris leur halaine sur ces degrez, & soustenu le choc longuement, ils retournerét au combat comme si de tout le iour ils n'eussent rien fait, & tuerent grand nombre d'ennemis, entre autres vn More fort puissant monté à cheual, lequel tombé par terre vn valet de Manuel Lacerde se saisit du cheual & l'ameine à son maistre qui auoit esté griefuement blessé d'un coup de fiesche en la ioue: le bois de la fiesche estoit tombé & le fer demeuré dans l'os de la machoire, dont sortoit le sang en abondance. Mais ni l'effusion du sang ni la douleur d'une telle playe ne le destournoyent du combat, ains estant monté à cheual, il courut sus de telle impetuosité à huit cheualiers Indiens, qu'il les mit en fuite. Les autres ennemis commencerent lors à se refroidir, se cōtentans seulement de faire teste, puis ils se prindrent à reculer, & finalement se sauuent les vns çà & les autres là, avec telle frayeur que plusieurs se jetterent des murailles en bas.

C E pendant Albuquerque, qui auoit prins vn autre chemin pour gagner vne trāchee & corps de garde assis en vn lieu assez loin de la mer, gagna le dessus d'un costau, d'où entendant la scopeterie des harquebuzades, les hauts & effroyables cris, & les lamétations des femmes, il enuoya quelqu'un de sa compagnie vers la ville pour lui apporter nouuelles de l'estat de ses gens au combat. Mais comme il estoit ardent, impatient, & tousiours au guet apres l'occasion, il n'attédit pas le retour de son homme, ains marcha au grand pas vers la ville, & lors il rencontra vne grosse troupe d'ennemis qui se sauuoient. Le combat recommença aussi aspre que de tout le iour, car les ennemis irritez & en grand nombre, marris & despitez de leur fuite, & ne pouuans esperer de reprendre Goa, estoient comme enragez. Les soldats d'Albuquerque qui n'auoyent eu leur part aux combats dans la ville, & ne voulans estre estimez moins habiles que leurs compagnons, combatoyent d'une ardeur incroyable, si qu'en fin vne partie des ennemis ayant esté mis en pieces, les autres se garentirent à bié courir. Albuquerque entré dedans la ville, rendit premierement graces à Dieu, par la faueur du-

Ville des Portugallois maistres de Goa en peu d'heures.

quel il paroïssoit que ceste place auoit esté conquise. Car quel plus beau témoignage de la présence diuine eust on sceu obtenir que de se voir en dedans six heures maître d'une grande ville pleine d'armes, d'artillerie, de vaillans capitaines & soldats, & d'un merueilleux nombre de peuple, conquise par une poignée de gens? Pour admirer cela encores plus, c'est chose certaine que ce iour quelques ennemis combattirent si obstinément au palais de Zabaim, qu'encores que les Portugallois esmeus de grande compassion leur promissent non seulement la vie & liberté sauue, ains aussi récompense de leur prouesse: neantmoins ils aimerent mieux se faire tuer sur la place que receuoir la vie de leur ennemi, estimâs cela le plus ignominieux du monde. On tient qu'il y eut plus de trois mille hommes occis dedans la ville. Les Portugallois y perdirent quarante des leurs, entre autres Ierosime Limice, Vasque de Fonseca, Cosme Cocillo, Antoine Vogade, Antoine Garcez, Aluar Gomeze, & Pierre Gomeze Limice. Quât aux blesez, le nombre monta à plus de trois cens. Albuquerque craignant que l'ardeur du combat n'emmenast ses gens trop loin, & qu'en poursuivant leurs ennemis ils ne s'escartassent & qu'il ne leur suruinst quelque inconuenient, comme il auient quâd la victoire rend les hommes insolés & leur fait souuent oublier toute discipline, commanda que lon fermast promptement toutes les portes de la ville. Puis tout à loisir, selon qu'il auoit protesté de se venger de la meschanceté des habitâs de Goa, il fit bruiser les faubourgs. Ces choses executees Timoja arriue avec une armee de trois mille hommes & s'excuse de son retardement, dont Albuquerque se contenta. Au reste, quand il n'eust eu autre raison que son retardement, la soudaine prise de Goa le deschargeoit assez de toute mauuaïse presumption. Ce pendant i'estime qu'il y eut une autre cause pourquoy il n'amena ce secours à temps: c'est qu'il ne conuenoit pas que des barbares idolatres eussent part à aucune en la guerre que Dieu vouloit faire, ni honneur quelconque avec les Chrestiens qui s'y employeroient comme nous l'auons veu. Le butin consista en une fort grande quantité d'armes, d'artillerie, de viures, de munitions de guerre & de vaisseaux: car on n'auoit rien laissé en la ville, sinõ ce qui pouuoit seruir pour la defense d'icelle.

*Ordre donné
aux affaires de
Goa apres la
prise d'icelle.*

ALBUQUERQUE chassa tous les Sarasins hors du territoire de Goa, & permit aux autres qui n'estoyent pas Mahumetistes, d'habiter en l'isle, pourueu qu'ils payassent entierement au Roy de Portugal le tribut qu'ils bailloyent à Zabaim. Puis il fit crier à son de trompe que tous marchans pourroyent entrer en Goa avec cheuaux & marchandises, dont il leur donneroït ample sauconduit, promettant solennellement de les y maintenir contre toute violence & iniustice. Il establît Manuel de Cugne capitaine de la citadelle de Cananor, & appella Roderic Rabel qui y commandoit pour le mettre en la forteresse de Goa. Fernand Andrade, Pierre Fonseca de Castre & Antoine Salé eurent charge de courir la mer de Goa pour asseurer la route à tous marchans qui y voudroyent venir trafiquer. Puis il commanda à George Botel & à Simon Alphonse Besagu de roder la mer de Calecut & y faire du pis qu'ils pourroyent. Chascun d'eux executa sa com-

commission. Andrade descourrit vne nauire d'Ormus, ignorant d'où elle estoit la poursuiuit, pource qu'elle ne vouloit pas baisser les voiles, tellemēt qu'elle vint donner dedans le port de Dabul. Le gouuerneur de Dabul tacha de repousser Andrade à coups de canon d'une tour qui commandoit sur le port: mais Andrade ayāt prins terre força ceste tour, la destruisit, prit l'artillerie qui estoit dedans & la fit charger en sa nauire. Botel assaillit vne grande nef de Saralins, & apres l'auoir longuement batue & percee en plusieurs endroits, il la pillā, laissant le vaisseau inutile à la nauigation pour ce que l'equippage estoit tout brisé. Pour le regard d'Albuquerque il donna bon ordre à l'erection des ports & peages, dressa l'estat de la ville & la forme du gouuernement public: puis embrassa vn autre affaire digne d'eternelle memoire, contre l'auis de plusieurs. Mais auant que d'en parler, il ne fera pas impertinent de monstrer en peu de mots enquoy Albuquerque & Almeide se trouuoient de contraire opinion.

14. Ces deux grands capitaines, sages & vaillans entre tous autres, se proposoyent vn mesme but, mais ils n'y visoyent pas d'un mesme œil. L'un & l'autre auoit deliberé employer sa vie à tout hazard & danger, tant grand peust il estre, pour la religion Chrestienne, pour la grādeur du Roy de Portugal, & pour maintenir la reputation d'un bon chef de guerre. Mais l'un differoit de l'autre en ce qu'Almeide estimoit chose mal seure d'assaillir les villes, de peur de separer ses forces & les rendre plus foibles. Pourtant sa deliberation estoit de tenir la mer, iugeāt que le maistre d'icelle estoit Seigneur de toute l'Inde. Voila pourquoy il ne vouloit bouger des nauires, & pourueu qu'il eust vn haure asseuré à son commandement, il ne se donnoit peine quelconque de tout le reste: disant qu'il seroit impossible d'enuoyer tous les ans du royaume de Portugal tāt de soldats qu'il faudroit pour garnir les forteresses & citadelles. Que qui voudroit entreprendre cela, il semeroit çā & là les Portugallois à la merci des ennemis, au lieu qu'estans ioints ensemble ils estoient redoutez de tous les Indiens. Au cōtraire Albuquerque faisi d'une plus haute esperance, que les grands esprits ont acoustumé de conceuoir ordinairement, remuoit souuent en sa pensee les moyens d'asseurer non seulement les affaires des Portugallois pour quelques annees, mais aussi d'y donner pied ferme à leur domination laquelle il s'asseuroit deuoit estre de grande estendue à l'auenir: estimant qu'il ne faloit pas simplement regarder comme tous les ans les nauires retourneroyent chargees de poyure en Portugal, mais plustost en quelle façon on pourroit poser les fondemens de l'empire d'Emmanuel & de ses successeurs en Inde. Et d'autāt plus que le secours estoit loin, plus tenoit il qu'on deuoit estre soigneux d'occuper & peupler diuers ports en Inde, afin de semer la nation Portugalloise en tant de lieux, que lon en peust au besoin leuer vne armee en Inde mesmes. Au reste, il disoit que la mer estoit vne peu seure retraite à ceux qui n'auoyent quand & quand quelque moyen en terre. Qu'une seule tempeste pouuoit engloutir la plus grosse flotte qu'on sauroit desirer: que les commoditez de la terre reparoyent les pertes des nauires, & n'estoit malaisé de reconquerir la domination de la mer. En apres il tenoit pour chose

*Comparaissent
d'Albuquerque
& d'Almeide au gou-
uernement des
Indes.*

tresdangereuse d'enclorre la flotte de Portugal en vn destroit, sur tout où la terre seroit maigre, sterile, & mal propre pour entretenir vne armee durant l'hiuer. Pourtāt estimoit il ceux pouüoir tresmal au temps auenir qui s'asseuroyent pouüoir acommoder les affaires des Portugallois au royaume de Cochim ou de Cananor, parmi vn si grand nombre d'ennemis iurez du nom Chrestien, & qui ne faisoient qu'espier les occasions pour ruiner les Portugallois. Que le lieu qui n'auoit autre defense que de soy mesme n'estoit pas assez asseuré, ains celui auquel on pourroit donner secours de plusieurs autres endroits. Que la domination de la mer n'afoblissoit point ceste occupatiō de places, ains plustost la fauorisoit & acōmodoit: car plus la flotte auroit de haures & de retraites, plus aisēmēt pourroit elle nauiguer, & plusieurs lieuxourniroient plus commodement qu'un seul les materiaux propres pour bastir ou racoustrer les nauires. Finalement, il estoit entierement d'auis que celui qui voudroit se maintenir seigneur des Indes, non point pour la vie d'un homme seulement, ains pour iamais, deuoit bastir vn fort qui se peupleroit de toutes sortes de gens: si qu'en temps de necessité, il ne faudroit pas tousiours attendre apres le secours de Portugal, lequel en si longue & perilleuse nauigation perit pour la pluspart de diuerses maladies, ou se perd es flots de la mer, ou est retenu par la rigueur de l'hiuer, ou est contraint se reposer & quitter les armes, tant les trauaux de la mer l'ont afoibli & rendu inutile. L'issue des affaires a verifié long temps apres la mort d'Albuquerque combien son auis estoit propre & necessaire. Car lors que Solymā Empereur des Tures enuoya le gouuerneur d'Egypte avec vne puissante flotte en Inde pour deposseder les Portugallois, & qu'icelui se vint camper deuant la citadelle de Diu, laquelle il battit furieusement l'espace de plusieurs iours, & fit tous ses efforts de l'emporter: encorē que les assiegez l'endommageassent grandemēt, toutesfois il n'eust pas si tost leuē le siege, s'il n'eust receu nouuelles de la grande flotte qui arriuoit en Goa pour le venir combattre au port de Diu. Et de rechef, quand le Roy de Cambaje avec vn puissant secours de Tures fut campé six mois durant deuant ceste citadelle, il n'eust pas esté si aisēmēt chassé & desfait par Iean de Castre viceroy de Portugal en Inde, si Goa n'eust fourni armes, gens & viures qui hastèrent d'autant la victoire. Car ceste ville est deuenue si grande, qu'on y peut leuer des armees entieres, & equipper des flottes biē puissantes. Albuquerque pesant meurement ce qui est auenu posa si bien les fondemens de l'estat de Goa, qu'il est malaisē de ruiner ce qu'il y a dresse. Mais d'autant qu'il n'y auoit point de femmes Portugalloises, qui estoit le moyen de peupler, il faisoit baptiser les Indiennes prinſes en guerre, & les marioit à ses soldats, auxquels il assignoit quelques possessions en l'isle confiscuees sur les Sarasins, & leur faisoit d'autres faueurs & presens pour les attirer en tels mariages. Par ainsi, comme Romulus bastit Rome, & Theseus fit venir les payſans des villages de l'Attique en Athenes, ou comme quelques autres ont fondé des villes, on peut aussi dire qu'Albuquerque a esté le fondateur de Goa, laquelle il auoit conquis par sa valeur & à la pointe de l'espee.

TANDIS

15. TANDIS que les affaires passoyent ainsi en Inde, ce qui s'ensuit auint en Barbarie. Ataïde gardoit la ville de Safin pour le Roy de Portugal, & par ses courtes tenoit les Mores en continuel alarme, ramenât à tous coups force butin de leurs villages. Entre autres il print vif vn certain More que les autres adoroyēt presques, le tenās pour vn tressainct personnage. Il se tenoit dās vn chasteau bien fortifié & muni d'artillerie & de soldats: mais la place fut forcee par Ataïde, partie de la garnison tuee, les autres emenez prisonniers. Brief Ataïde estōna tellement tout le pays, que les villes, villages, communautēz & chastellenies demanderent la paix, receurent les conditions qu'Ataïde presentoit, & payoyent les tribus à quoy ils estoÿēt taxez. Mais d'autant que ceste nation est desloyale & peu soucieuse de religion, elle creut aisément les autres Mores qui lui persuadoyent de rompre promesse, & se disposa pour faire la guerre ouuerte aux Chrestiens. Incōtinent les Mores s'amassent de tous costez, & se trouuerent cinq mille cheuaux & plus de soixante mil hommes de pied, qui se viennent camper deuant Safin, le treiziesme iour de Decembre l'an mil cinq cens & dix: & dix iours apres ils eurent acheuē leurs retranchemens & d'autres ourages necessaires pour le siege: car ils dresserent plusieurs caualiers, firent des trenchees en bon nombre bien fossoyees & remparees, placerent les pieces pour la batterie en lieux commodēs. Si tost qu'Ataïde eust entendu par ses espions qu'on le vouloit visiter, il escriuit au Roy, & despescha incontinēt vn vaisseau en l'isle de Madere pour amener secours de là. Simon Gonsalue de Camare gouverneur de l'isle estoit lors pres du Roy en Portugal. Sa femme qui auoit vn cœur d'homme, & sauoit l'intention de son mari, gentilhomme vaillant & prompt à faire seruire, leua en diligence incroyable & avec grande despenſe vne compagnie dont Manuel Norogne frere du gouverneur eut charge. Ataïde disposa les corps de garde, & commit chascun d'eux à des gentilshommes qui auoyent commadē es guerres, avec certain nombre de soldats: & n'oublia rien du deuoir d'un bon chef en la fortification de la ville, retenant pres de soy le plus de gens qu'il fut possible pour courir es endroits où le danger paroistroit plus grand. Or afin de mieus conoistre le camp & la contenance des ennemis, il sortit de la ville avec trois cens septante cheuaux, cent pietons, & quelques pieces montees sur roues, & gagna vn petit costau, faisant desployer vne banderolle pour signal de bataille, si les ennemis vouloyent ioindre. Mais d'autant qu'ils ne bougeoient il remena ses troupes en la ville. Le vingttroisiesme iour du mesme mois les ennemis conclurent de donner vn assaut à la ville, ce qu'ils firent avec vne merueilleuse impetuositē, car ils estoÿēt en fort grād nombre. Les gentilshommes & capitaines de leur costē ne se contentoyēt pas seulement d'assister & encourager les soldats, ains aussi regardoyent où il y auoit plus de danger & y couroyēt, taschās de monter les premiers pour encourager les autres à faire comme eux. Ils plātoÿent eschelles, trainoyēt maneleys pour se couvrir en sapant les murailles; & ne cessoyent de descocher fleches & lancer dards pour accabler les assiegez, qui de leur part firent vne estrange boucherie de leurs ennemis à coups de trait, d'arquebu-

zades, de lances & pots à feu:tellemēt que quatre cēs des assiegeans furent tuez en cest assaut. Le lendemain Ataide suiui de huit cheuaux seulement sortit aux champs pour trouuer moyen de surprendre quelqu'vn afin de sauoir nouuelles du dessein des ennemis: mais il ne fit rien pource qu'il fut incontinent descouuert, & pourtant il se retira dans la ville apres auoir tué deux Mores rencōtrez en son chemin. Or les ennemis voyās qu'ils ne pourroyent plus guerres demeurer là à cause de leur multitude qui ne pouuoit estre cōmodement nourrie ni retenue en discipline, delibererent employer toutes leurs forces en vn assaut general pour emporter la ville, si possible estoit. Ainsi donc le trentiesme iour du mesme mois de Decembre ils vindrent à la bresche de telle fureur, & l'assaillirent en tant d'endroits avec tant de coups de trait & de tous engins de guerre, que plusieurs tous esperdus quittoient les places où ils auoyent esté establis. Toutesfois Ataide, se presentant par tout, couroit notamment là part en laquelle les ennemis combatoyent plus asprement, encourageant les vns par viues remonstrances, louant les autres, enuoyant gens de renfort prins de sa troupe es endroits les plus pressez, & combatant lui mesmes de fois à autre en vaillant & experimenté soldat. Mais voyant que les plus grans coups se donnoient en la bresche regardāt la mer, il s'arresta là, pour faire par sa presence que ses soldats repoulassent plus aisément les ennemis, lesquels sans aucune crainte venoyent à l'escalade, taschoyent en d'autres endroits de donner le fault aux murailles avec leurs machines: brieſ s'exposoyent à tous hazards pour se rendre maistres de la ville & mettre en pieces les assiegez. Toutesfois ils furent si gaillardement repoussez que force leur fut de sonner la retraite, apres auoir combatu quatre heures entieres aux bresches, & perdu ce iour plus de six cens hommes. Les suruiuans estonnez leuerent le siege bien à la haste le dernier iour de Decembre & avec tel bruit que leur deslogement meritoit plus le nom de fuite que de retraite. Ataide sort promptement avec quatre cēs cheuaux & cent pietons pour donner sur la queue: il en tue quelques vns, prend des prisonniers, & ne voulut pas les suiure loin, de peur qu'estans les ennemis en si grand nombre ils ne le chargeassent quand ils le sentiroient loin de la ville.

*Diverses vœux
des & voisins
des Portugais
lois en la ceste
de Barbarie.*

APRES ce siege leué, plusieurs Mores d'autour de Safin se rendirēt vassaux du Roy de Portugal. Quant à Ataide, encores qu'il fust ennemi de repos, & eust tousiours en teste quelque entreprise au desauantage des ennemis, neātmoins il se tint quoy iusques à ce que toute ceste armee venue au siege de Safin se fust escoulee. Mais ayant entendu qu'il n'y en auoit plus de bandes en cāpaigne, ains que seulement à deux lieues d'Almedine, l'vne des plus fortes villes de Barbarie à seize lieues de Safin vers le Septētriō, seiournoient cinq cōpagnies d'ennemis, qui ne pēfoient nullemēt à la guerre, & qu'il pourroit surprendre, il partit le second iour de Ianuier l'an mil cinq cēs onze, avec quatre cēs trente hōmes de cheual, & cēt harquebouziars, & arriva de nuit au lieu assigné, où il ne trouua pas ceux qu'il cerchoit. Incōtinēt il despescha ses espions pour descouurir l'endroit de la retraite, qui rapporterent, apres auoir fait diligence, que les ennemis estoient à vne lieue de là,

là, chose acoustumee entre ces peuples qui n'arrestent guerres en vne place. Sur quoy Ataide commanda à Manuel Norogne (lequel, comme dira esté ci dessus, estoit venu de Madere au secours de ceux de Safin) de picquer deuant avec neuf vingts cheuaux pour attaquer & retenir les ennemis. André de Caldeire & Jean Freite capitaines des gens de pied eurent charge de le suiure, afin de le soustenir, s'il en auoit besoin, Mais Norogne qui estoit ieune & bouillant, & ne cherchoit qu'à se faire valoir, ne voulut attendre ce renfort, ains commença à galopper de telle sorte qu'en moins de rien il fut bien loin des pietons. Ataide voyant cela enuoya apres au secours Manuel Ceruaire & trente cheuaux, avec charge de retenir Norogne, car il craignoit que ce ieune gentilhomme ne se fourrast trop auant au danger. Ceruaire ne sceut picquer si roide qu'il ne trouuaft Norogne aux prises avec les ennemis: pourtant enuoya il en diligence vn des siens auertir Ataide que le combat estoit ia fort eschaufé. Ataide oyant ces nouuelles acourt à bride abatue suiui de quinze cheuaux pour donner secours, & laissa la charge à Aluar Ataide d'amener promptement le reste des troupes. Ce pendant la partie estoit assez desauantageuse pour les Portugallois. Vn des principaux d'entre eux, nommé Aluar Roderic d'Azeuede, auoit esté tué d'un coup de lance. Bernard Manuel chambellan du Roy de Portugal, & vaillant entre tous autres, estoit tombé de cheual en terre à cause de sa blessure. Le More qui l'auoit abatu & nauré d'une playe profonde au bras, s'estoit saisi, malgré les Chrestiens acourus au secours, de la hache d'armes de Bernard, & s'en defendoit d'une merueilleuse adresse contre tous. George Mendeze Ataide d'Algarue court à toute bride contre le More, & de telle roideur qu'il renuerse le More par terre, où il fut incontinent mis à mort, & Bernard Manuel, qui estoit demeuré esuanoui pour la douleur de sa playe, releué, remis à cheual & conduit où estoit le gros des troupes. Auant qu'estre ainsi blessé il auoit tué grand nombre de Mores: car quoy qu'il eust le cerueau foible, il ne laissoit d'estre tresapre au combat. Or combien que Norogne eust entamé ceste charge vn peu indiscrettement, toutesfois l'issue en fut assez heureuse: car auant qu'Ataide y suruinst les ennemis furent rompus & contrains se sauuer de viltesse, plusieurs demeurèrent sur la place, & laisserent cent prisonniers avec assez grand butin. Ataide s'estant ioint avec Norogne descourrit assez pres vne grosse troupe, & se doutant de ce qui auint incontinent apres, disposa ses gens qui estoient tous arriuez. Les ennemis estoient en bon equippage & bien deliberez de combattre, au nombre de quatre cens cheuaux & mille pietons. Ils donnent de pied & de teste si furieusement parmi les Portugallois que peu s'en salut qu'ils ne les rompiissent à ceste premiere charge. Le cheual d'Ataide y fut atteint de trois iauelots qui demeurèrent attachez aux endroits des blessures, tellemēt qu'Ataide fut contraint s'escarter pour prendre nouvelle monture. Ce pendant les traits, fleches, cailloux, la course impetueuse des cheuaux faisoient vn terrible bruit, & plusieurs blesez tomboyent par terre. Ataide estant rentré en la meslee apperceut vn sien seruiteur & Jean L'homme, qui s'estoit tousiours bien porté aux guerres, combatans vaillamment à pied bon nombre

d'ennemis qui auoyent tué leurs cheuaux: mais Ataïde fit tant qu'il les tira de la presse. Le combat dura long temps, sans qu'on peust cognoistre qui emporteroit la victoire. En fin, comme Ataïde encourageoit les gës à haute voix, tous reprindrent tel courage, qu'en vn instant ils firent demeurer trois cens Mores sur la place, & mirer les autres à vau de route, lesquels Ataïde ne voulut qu'on poursuiuist, craignant que ces fuyards aidéz de nouuelles forces qui se vindroyent ioindre à eux de toutes parts, selon la coustume de ces peuples, ne se ruaissent sur les Portugallois escartez en la poursuite, & ne les desfissent à leur aise. Pourtant aimâ-il mieux tourner en arriere avec le butin. Mais il estoit loin de sa retraite, & les ennemis rassurez retournerent l'attaquer avec plus grandes forces qu'auparauant. Ataïde & les siens soustenoyent la charge au mieux qu'il leur estoit possible, & de telle sorte que quoy que fissent les ennemis, iamais ils ne furent rompus. Toutesfois Ataïde voyant qu'il ne faloit pas arrester beaucoup, autrement c'estoit fait de ses troupes, quitta tout le butin & le bagage pour se retirer au grand pas. Il perdit en ceste course, notamment au retour, treize hommes, & dix sept cheuaux tuez: il fit tuer trente autres cheuaux qui ne pouuoient plus marcher tant ils estoient foulez, & ne les voulut laisser en la puissance des ennemis, de peur qu'ils s'en seruissent contre lui.

EN ceste mesme année Ataïde sachant qu'à seize lieues de Safin y auoit vingt cinq bandes de Mores, delibera les aller charger. Alors grand nombre de Iuis & d'Africains estoient en la ville avec marchandises & viures pour le trafic: au moyen de quoy Ataïde fit clorre les portes, & y establit gardes, leur defendant de laisser sortir personne sans son congé, afin que les ennemis ne sceussent rien de son entreprise. Le mesme iour qui fut le vingte troisieme du mois d'Octobre, apres soleil couché il sortit en campagne avec quatre cens cheuaux & cinq cens hommes de pied, & marchât au pas se trouua sur le point du iour au lieu où il pretendoit, & surprenant les Mores les mit incontinent en route, fors trois cens tuez sur la place, cinq cens sept prisonniers, & si grand butin de bestail gros & menu & de chameaux, que la terre en estoit couuerte l'espace d'une lieue. Mais pource que le chemin estoit long & pierreux, Ataïde craignant que les ennemis ne se rassemblissent de tous costez & lui donnassent des affaires parmi tant de bestail, laissa la pluspart du butin, & poursuiuit sa retraite avec le reste. Ses espions couroyent deuant qui l'auertirent que d'Almedine estoient sortis trois cens cheuaux delibera de le charger. Lors il fit ranger le bestail & le bagage au milieu de toutes ses troupes, & demeura sur la queue pour soustenir le premier choc. Ainsi les ennemis estans acourus fort impetueusement sur l'arrieregarde, furent si brauement repoussez, que de la en auant ils n'oserent plus approcher de si pres: & Ataïde entra sur la nuict dans Safin avec tout le bestail & bagage sans autre nouuel empeschement. Les Mores d'alentour ayans esté battus si souuent s'auiserent de demander la paix & receuoir le ioug de Portugal: tellement que plusieurs villages des montagnes & de la plaine, quelques chastellenies, villes & communes se rendirent au Roy Emmanuel, promettans payer tous les ans le tribut qui leur fut imposé, a sauoir

vne tresgrande quantité de froment. Les ennemis estoient tellement estonnez que ceux de Maroch mesmes ne sauoient quel parti prendre, & beaucoup d'entre eux se retiroient au haut & au loin pour n'estre resueillez à toutes heures des mauuaises nouvelles de la desfaite de leurs compatriotes. Les confederez & tributaires du Roy de Portugal viuoyent en seureté, iouissans de leurs heritages & reuenus sans aucun empeschement. En tous ces remuemens, soit pour le fait de la guerre, soit pour l'accroissement des tributs du Roy, Ichabentafusse porta fidelement & vaillamment, apres qu'Emmanuel l'eust receu en grace, & honoré de quelques presens pour le retenir en son seruice, en quoy il perseuera iusques au dernier soupir, comme nous le verrons plus amplement ci apres.

17. MAINTENANT c'est bien raison que nous descriuions ce qui auient en ces entrefaites à Edouard de Leme, auant qu'il arriua en Inde: car iusques à present nous n'auons peu commodement entrer en ce discours. Leme ayant fait voile du cap de Guardafu, print la route d'Ormus, & enuoya dire au Roy, qu'il estoit enuoyé là de la part d'Emmanuel pour donner secours à l'isle & faire tout ce qui seroit requis pour maintenir ce Roy en sa dignité: le priant au reste d'oublier tous les torts qu'Albuquerque luy auoit faits, & attendre à l'auenir tous offices & devoirs de bonne amitié des Portugallois. Quant à la conseruation de l'isle on sauoit que plusieurs Princes voisins estoient enuenimez contre le Roy, à qui le secours des Portugallois viendrait bien à point, auxquels partant deuoit estre permis prendre terre & se loger en l'isle, & auoir quelque lieu fort pour garder plus aisément la ville: ce qui estoit plus à l'auantage du Roy que des Portugallois. Il demandoit donc permission de paracheuer la citadelle qu'Albuquerque auoit commencee. Cojearat fit responce que le Roy & lui satisferoyent tresvolontiers à tout ce qu'ils auoyent promis à Albuquerque, mais que quant à la citadelle ils ne permettroient nullement qu'on la paracheuast. Ainsi donc ils fournirent la somme de quinze mille escus suiuant le traité passé avec Albuquerque, prièrent Leme de descendre & se venir reposer en la ville, & receurent humainement tous ceux de sa suite. Leme ne se sentant pas assez fort pour faire la guerre, monstra semblant de trouuer la paix bonne, & apres auoir seiourné deux mois en Ormus, à cause que le temps n'estoit pas propre pour la nauigation, il s'embarqua, & fit voile en Mascate, d'où il enuoya, comme dit a esté ci dessus, Vasque Sylueire en Inde pour demander à Almeide quelques nauires de renfort. De là il paruint en Zacotora, où il tomba malade, & pour recouurer sa santé, (à cause que l'air du pays estoit mal sain, & les exhalations des marests fort facheuses) il se retira en Melinde. Albuquerque, qui estoit desia vice-roy, enuoya querir Alfonso Norogne par Antoine de Nogueire, & escriuit à Leme que pour la perte receue en Calcut il ne pouuoit diminuer le nombre de ses vaisseaux, craignant que plusieurs ne se reuollassent & machinassent quelque chose au preiudice des Portugallois: & qu'apres auoir appaisé les desordres prochains de lui il iroit en personne mener le secours à Leme. Albuquerque faisoit deslors estat d'aller iusques en la mer d'Arabie, pour combatre la flotte

*Nauigations
& exploits
d'Edouard de
Leme en Or-
mus & ailleurs
iufques à son
retour en Por-
tugal.*

du Sultan d'Egypte, laquelle on disoit y deuoir se presenter bien tost : mais ce fut vne fausse nouuelle. Quant à Leme il estoit encor en Melinde. Francisque Pereire Berrede & Alphonse Norogne s'estans embarquez dās le vaisseau de Nogueire coururent la mer ce pendant avec lui pour butiner sur les premiers trouuez. Ils prindrent vne grand' nauire de Cambaje plaine de richesses, ce qui leur haussa tellement le cœur que sans attendre dauantage ils passerent en Inde, & apres auoir trauerse Batticala, vne tourmēte les agita de telle sorte que la nauire de Cambaje gouuernee par vn pilote Arabe, se vint rendre au port de Dabul, où elle fut brisée, & les Portugallois arrestez prisonniers de Zabaim. La mesme tourmente ayant cōtraint Nogueire de tirer au haure d'vne ville de Cambaje nommee Dama, son vaisseau se rompit, & Alphonse Norogne s'estant ietté trop tost avec quelques autres sur des aix pour gagner le bord fut englouti des vagues avec les compagnons, comme dit a esté. Les autres demeurez dedans le vaisseau furēt prins & menez au Roy de Cambaje, ainsi que l'auons touché ci deuant. Fracois Pantoje enuoyé par Albuquerque en Zacotora, apres auoir traitté la mer Indique, print vne grand' nef nommee Meri, en laquelle commandoit vn parent du Roy de Cambaje, & qui poussee de la tourmente sus mentionnee auoit esté contrainte faire iect, & la conduisit en Zacotora, où il trouua Leme retourné de Melinde, qui auoit establi pour gouuerneur de la forteresse Pierre Correa, dautant que le capitaine d'icelle estoit decedé. Quant à la nef prinse par Pantoje en ceste route, quoy qu'il sceust alleguer, Leme se fit croire qu'elle lui appartenoit comme ayant esté prinse es plages de mer à lui assignez pour la guerre: & pourtant il se rendit maistre de la nef & de tout ce qui estoit dedans. De Zacotora Leme cingla en Inde où il fut hōnorablement recueilli d'Albuquerque, qui fit beaucoup de choses en sa faueur, & telles qu'un autre en eust esté fieschi du tout: mais pour tout cela Leme ne sceut iamais se ioinde avec Albuquerque, lequel lui ayāt discouru de son entreprise sur Goa la lui fit trouuer telle que Leme promit s'y trouuer. Ce pendant il auoit mesdit en cachettes d'Albuquerque, & denigré son nom en maintes sortes, disant que Goa estoit imprenable, & que mesmes estant prinse les Portugallois n'en seroyent aucuneinent acommodez. Plusieurs auoyent volontiers presté l'oreille à telles mesdisances, & semoit-on des propos suffisans pour esmouoir des querelles & tumultes estranges, si Albuquerque n'eust resisté au mal qui naissoit, en dissimulant, & en amortissant par douceur & gracieuseté la folie de cest ambitieux & estoutdi. Pour tout cela Leme ne voulut aucunemēt tenir ce qu'il lui auoit promis, ni donner aide quelconque pour la guerre de Goa. Mais vn cas suruint qui coupa broche à tous ces differens: car apres la prinse de Goa arriuerent des nauires de Portugal avec lettres du Roy, qui commandoit à Leme de liurer sa flotte à Albuquerque & reuenir en Portugal. Tandis Albuquerque commença à traiter de la deliurance des prisonniers. En la nef prinse par Pantoje auoit esté arresté le seigneur d'icelle nommé Aleacam, cousin du Roy de Cambaje. Albuquerque s'asscuroit de venir aisement à bout de son desir par l'eschange de ce Prince, & apres lui en auoir tenu pro-

pos,

pos, il enuoya vn marchand en Cambaje pour traiter avec le Roy de la deliurance des prisonniers Portugallois en échange de ce parent sien. Le Roy relascha incontinent Iacques Correa & Francisque Pereire, à condition qu'ils retourneroyent si lui & Albuquerque ne pouuoÿt tóber d'accord, ce qu'eux promirent tenir & accomplir sans aucune fraude. Albuquerque sceut d'eux les particularitez du naufrage & de la mort de son neueu Alfonso Norogne. Quant à Edouard de Leme il reuint en Portugal.

18. A P R E S le depart de Leme, qui ne se pouuoit contenir de reculer en toutes sortes à lui possibles les desseins du viceroy, Albuquerque se sentant allegé d'un lourd fardeau, s'appliqua plus librement à dresser l'estat de Goa, & pouruoir aux charges publiques: & fit toute diligence de marier les soldats Portugallois à des femmes du pays, appellant les soldats ses fils, & leurs femmes ses bruz, lesquelles il menoit en sa maison, faisoit diuers presens à leurs maris, tellemēt qu'on traitoit force mariages en ceste nouuelle ville, contre l'esperance & opinion de tout le mōde en des cōmencemens si petis. Albuquerque ne pouruoyoit pas moins soigneusemēt aux autres choses qui sembloient necessaires pour fortifier, embellir & conseruer la ville. Lors arriuoÿent à lui de diuers lieux les ambassadeurs des Rois & Princes Indiens: les vns pour payer les tribus imposez sur eux, les autres pour demander la paix & cōfermer l'amitié, tous pour offrir leurs moyens afin de maintenir la dignité du Roy de Portugal. Albuquerque ne leur dōnoit pas si tost cōgé, car il leur faisoit voir les forteresses de la ville, les preparatifs de son armee nauale, & la magnificēce des choses ausquelles il occuppoit son esprit, afin qu'estās rauis d'une telle puissāce, ils demeurassent plus fideles pour l'auenir. Eux n'approchoÿent de lui qu'en toute reuerence, les vns admirans sa grauité, les autres prisāns merueilleusement sa debonnaireté. Goa estoit lors tellement frequētee qu'on la pouuoit comparer à la cour de quelque grand Roy. Combien qu'Albuquerque de son naturel eust le cœur fort haut, toutesfois il s'efforçoit de donner lustre à toutes ses entreprises, afin de se faire estimer dauantage, & retenir par vne telle maiesté plus aisément les personnes en deuoir. Dauantage en retenant ainsi les ambassadeurs pour quelque tēps, il gaignoit ce point que l'isle s'éplissoit de soldats de iour en iour, & faisoit mōstre de ses forces à tous ceux qui le venoyent voir. Car Zabaim Dalcam ne cessoit de tenter par tous moyēs à rentrer en l'isle, & son lieutenant Melich Agriaje suiui de plusieurs compagnies tacha d'y prendre terre en ce temps, mais il fut repoussé avec perte de beaucoup des siens.

Ce qu'Albuquerque fit pour maintenir son autorité et les Indes.

A P R E S ces choses Albuquerque despescha Iacques Fernand de Begie avec trois nauires pour aller ruiner la citadelle de Zacatora qui ne seruoit de rien aux Portugallois, & estoit exposée à trop de dangers: lui commandāt de charger en ses nauires les Portugallois qui y estoÿent en garnison. Cependāt Iacques Mendeze de Vasconcel vint trouuer Albuquerque, ramentut ses seruices, & le pria de faire armer la flotte avec laquelle il deuoit aller en Malaca, suiuant la charge que le Roy lui en auoit donnee. Albuquerque lui fit vn long discours pour le destourner de ce voyage, di-

sant que par le commun auis de tous les capitaines auoit esté arresté qu'on ne permettroit point à vn tel personnage que Vasconcel de s'en aller perdre sans aucun fruit : que telle entreprise estoit trop difficile, & ne se pouoit executer qu'avec vne puissante flotte de nauires. Qu'il y auoit trop de danger en ce temps d'entreprendre deux voyages d'agereux : que lui estant sur le point d'aller au deuant de l'armée nauale du Sultan d'Egypte, il estoit impossible d'equipper au mesme instant suffisant nôbre de vaisseaux pour chastier ceux de Malaca des maux qu'ils auoyent faits. Puis Albuquerque pria instamment Vasconcel de s'embarquer avec lui, comme il auoit fait pour la guerre de Goa, afin de se seruir de sa vaillâce pour desfaire tant plustost les ennemis : & qu'après ceste guerre acheuee, il le renuoyeroit en Portugal avec les tesmoignages de faueur & d'honneur qu'il meritoit. Vasconcel irrité de telle responce, commença à se plaindre & dire qu'on l'auoit receu de bayes : & puis que ses seruices estoient si mal reconus, il iroit en Malaca malgré tout le monde, disant n'estre pas venu en Inde pour obeir aux capitaines Portugallois, ains pour executer la commissiõ de son Prince. Albuquerque le voyant du tout fiché en ceste resolution de faire voile en Malaca, defendit à lui & aux capitaines qui l'accompagnoient à peine de bannissement, aux pilotes & matelots à peine de la vie, de desmarrer ni leuer les anchres sans son congé. Ce neantmoins Vasconcel avec ses capitaines haussa les anchres vne nuit & quitta le port. Albuquerque enuoya incontinent après quelques autres capitaines en des galeres & fregates bien equippees pour le poursuiure & ramener : commandant qu'en cas de refus ils missent Vasconcel & ses vaisseaux en fond. Eux suiuant ceste charge rataignent Vasconcel, & pource qu'il ne vouloit obeir, ils commencent à canonner sa nauire, de telle sorte qu'ils brisent le principal mast & tuent deux matelots, menacans de paracheuer s'il ne tournoit incontinent voile vers le port d'où il estoit sorti. Finalement il reuint & fut constitué prisonnier, puis condamné à estre porté en Portugal, & vn capitaine de nauire nommé Ierosme Ceruiche, qui auoit conseillé ce départ, & résisté plus asprement que les autres à la volonté d'Albuquerque iugé à perdre la teste, & les pilotes plus rebelles à estre pendus. Deux d'iceux furent incontinent menez au gibet : les autres alloient faire le mesme fait, sans les ambassadeurs des Rois de Narsingue & de Cambaje, qui sollicitiez par les gentilshommes Portugallois allerent trouver & prier Albuquerque de donner la vie à ces pauures miserables : ce qu'il ottroya, se contentant de les bannir, & oster aux capitaines leurs charges, les renuoyât en Portugal. Voila avec quelle seuerité Albuquerque établit la domination de son prince & sa charge, se monstrant si humain parmi cela que de se seoir en iustice pout faire droit aux parties, & obligeant à soy par grande largesse les ambassadeurs des plus grands Rois d'Orient, comme eux-mesmes l'auouoyent.

*Preparatifs
d'Albuquerque
pour aller
faire la guerre*

A P R E S auoir ainsi range les affaires, & muni la ville d'une forte garnison, il fit voile de Goa suivi d'une flotte de vingt trois nauires, prenant la route à l'Occident pour aller en Arabie : mais vne tourmente le contraignit regagner

gagner le haure de Goa. Et pource que le mesme vent continuoit, & que le temps de nauiguer s'escouloit, ayât consulté avec ses capitaines, il resolut de cingler en Malaca, où le vent le portoit à toutes voiles. Et pourtât il voguea droit en Cochim où il laissa Pierre Fôsecque de Castre, Meneide Alfonso, Simon le vieil & Antoine Sale avec certain nombre de vaisseaux, dont Manuel Lacerde estoit general, leur commandant qu'à l'entree du printemps, qui commence au mois d'Aoust en ce pays là, ils courussent la coste de Calecut, fissent la guerre aux Calecutiens & à leurs associez, & s'estendissent iusques en Goa, de peur qu'en son absence personne n'entreprinst cōtre lui. Puis il crea Amiral Edouard Melio de Serpe, & s'embarqua avec huit cens Portugallois & six cens Indiens en dix neuf nauires. Auant que doubler le cap de Cori il print vne nef de Cambaje : & pour ce que sa flotte estoit lors fort agitee il perdit vne galere, sauuant toutesfois ceux qui estoient dedans. Puis apres il combatit & gagna trois vaisseaux chargez de marchandises de grand pris qui alloient en Malaca, & estant porté en la Taprobane, il mouilla l'ancre au port de Pedir. Incontinent le Roy luy fit present d'une nauire & de quelques Portugallois qui auoyent esté laissez par Siqueire en Malaca, d'où ils s'enfuirent & vindrent se ietter sous la protection du Roy de Pedir. Yn d'entre eux nommé Jean Viegas compta à Albuquerque qu'apres le depart de Siqueire, Bendara oncle du Roy auoit esté executé à mort pour crime de conspiration contre la personne de son neueu. Item que Nahodabegue chef de certains idolatres ennemis iurez de la secte de Mahomet auoit sollicité les Malacans à courir sus aux Portugallois & les exterminer : & qu'icelui estant de la ligue de Bendara, & craignant d'estre saisi estoit sauué de viffesse & retiré au royaume de Pacem, qui est vn membre de l'isle de Malaca, où il demouroit. Albuquerque, apres auoir confirmé la paix & alliance plus estroite que deuant avec le Roy de Pedir, tira vers le royaume de Pacem communiqua avec le Roy, & le pria bien fort de lui liurer Nahodabegue, ce que le Roy promit : mais au lieu de ce faire il auertit l'autre de se retirer promptement. Quant à Albuquerque il remonta incontinent en ses vaisseaux, & au bout de quelques iours ayant descouvert vne grande nef il l'innestit : ceux qui estoient dedans se defendirent courageusement, toutes fois ils perdirent quarante hommes : & comme les Portugallois montoyent à la foule pour entrer dedans, les passagers y allumerent tout soudain vn feu fort aspre qui estonna tellement les assaillās qu'ils quitterent ceste nef & s'en retirerent le plus loin qu'ils peurent. Depuis on sceut que ce feu artificiellement fait ne brusle point, & est aisé à ceux qui l'allument de l'estaindre quand il leur plait. Comme la flotte estoit à l'ancre on descourut vne autre nef qui vogueoit à voiles & à rames & autres instrumens speciaux à ces peuples. Albuquerque despescha soudain deux capitaines avec quelques esquifs pour acrocher ce vaisseau & le tirer à bord. Les matelots effroyez se ietterent en l'eau. Nahodabegue estoit là dedans, & tiroit en Malaca pour annoncer au Roy la venue des Portugallois, esperant obtenir sa grace par ce bon & prompt seruice. Or se voyant prius, & qu'il n'y auoit moyen d'euitier la mort qu'il auoit bien meritee, il

& obligerez à iamais enuers vous vn Prince le quel n'oublie nullement les biens qu'on lui fait. Albuquerque print grand plaisir à cest ambassade, & enuoya premierement Fernand Andrade, puis lui mesme alla faire la reuerence au Roy qui estoit lors mal à son aise. Ils traiterent paix & alliance ensemble, à condition que si Albuquerque reſtabliſſoit Zainal en son royaume il seroit vassal du Roy Emmanuel, & luy payeroit tous les ans de pension & tribut vn certain poids d'or. Cest accord passé selon le desir d'Albuquerque il mena Zainal quant & soy en Malaca, & le premier iour de Iuliet l'an mil cinq cens onze alla surgir en vne petite isle eslongnee de Malaca d'vne portee de couleuline.

21. I l y auoit plusieurs vaisseaux à l'ancre en ceste isle, lesquels en grande frayeur comencerent à tendre les voiles pour se tirer viftement loin de là: mais Albuquerque leua incontinct toute ceste apprehension faisant publier qu'il ne vouloit courir sus sinõ à ceux qui lui seroyent ennemis. Cinq capitaines de nauires de la China, seiournans en ceste isle, le vindrēt trouuer & lui declairerēt que le Roy de Malaca, ayant entēdu long temps auparauāt par lettres & rapport de plusieurs qu'Albuquerque deuoit venir, s'estoit preparē à la guerre en toutes sortes à lui possibles: quoy auenant, dirent ils à Albuquerque, nous sommes prests à vous seruir, adioustans que la meschancetē de ce Roy perfide leur desplaifoit, & que la preudhommie des Portugallois les incitoit à tenir ce langage. Ils alleguerent aussi les plaisirs faits par quelques vns des leurs à Siqueire, afin de monſtrer encores mieux qu'ils auoyent fort bonne enuie d'aider aux Portugallois. Albuquerque les pria au ſouper, où ils firent grand chere & beurent d'autant à la mode de quelques nations de l'Europe. Le lendemain arriua vn ambassade pour ſaluer Albuquerque de la part du Roy de Malaca, & qui auoit charge d'imputer à Bendara tout le tort fait aux Portugallois, à raison de quoy aussi on l'auoit executē à mort. Qu'au reſte le Roy ne demandoit ſinon la paix, & accepteroit volōtiers toutes raisonnables cōditions. Albuquerque reſpōdit qu'il estoit content de pacifier, mais pour conoiſtre que le Roy vouluſt la paix & deſteſtaſt le meschant tour iouē aux Portugallois, il ſaloit premierement qu'il remiſt en libertē ceux qui estoient arreſtez, leur permettant d'aller vers Albuquerque, & rendiſt les biens qui auoyent eſtē pillez. Le Roy fit reſponſe que les Portugallois estoient eſpars en diuers lieux, & qu'aucuns d'eux auoyent embrasſē le Mahumetiſme, partant n'estoit plus loiſible de les liurer aux Chreſtiens. Que les biens n'auoyent point eſtē pillez par son commandemēt, & dauantage que la pluſpart d'iceux auoit eſtē employee pour la nourriture des Portugallois. Voila ce qui ſe traitoit par meſſages enuoyez de part & d'autre, qui monſtroit aſſez que le Roy vouloit aſſiner Albuquerque, afin de le ſurprendre ſous couleur d'accord & le ruiner tout à coup. Albuquerque voyoit bien cela, & entēdit aussi par les lettres d'Araūge & par le rapport de quelques marchans que le Roy attendoit vne grande flotte de nauires, afin de pouuoir deſfaire plus toſt les Portugallois en leur donnant bataille au port & en plaine mer en meſme iour. Il y auoit en la ville neuf mille pieces de canon de fonte & de fer, grand nombre de

Arrivee d'Albuquerque en Malaca.

Diuerſes ruſes du Roy de Malaca.

Il y auoit des corps de garde de costé & d'autre avec garnison & force artillerie dont les bales & boulets pleuuoient de toutes parts assez pour estonner les plus hardis du monde, mais les Portugallois estoient tellement accoustuméz à telles salues, & desitoient tant l'honneur & la victoire qu'ils tenoient ia par la main, avec là faueur de Dieu qui les encourageoit, qu'ils pousserent oultre, & donnerent à teste baissée dedans ces corps de garde, si résoluement, qu'après quelque combat où les ennemis firēt teste assez long temps, la place leur demeura. Albuquerque cōmença, tellement qu'il contraignit les ennemis de quitter le corps de garde qu'il assailloit, & les poursuivit de pres. Simon Andrade eut cest honneur de faire la pointe & entrer le premier dedans. Jean Limice le seconda pour le regard de l'autre fort, duquel les ennemis furent aussi dechassez, & chaudement fuiuis iusques à ce qu'ils trouuerent les troupes du Roy, la presence duquel arresta & assura les fuyards. Le Roy estoit dans vne tourelle avec quelques vns de ses domestiques sur le dos d'un grand elephant, fuiui d'autres elephans bardez & chargez d'hommes, qui descōchoient vne nuée de fleches & d'autres traits du haut de leurs tourelles. Ces elephans auoyent des glaiues attachez aux dents, & marchoyent de telle impetuosité, qu'ils rôpirent les premiers rangs. Neantmoins Fernand Gomeze de Leme, & Vasque Fernand Coutin demeurèrent fermes ne s'estonnans point de telle nouueauté, ains s'estans ouuerts pour faire passage à l'elephāt royal, en passant lui dōnerent de part & d'autre tel coup de picque dans les flancs que combien que ceste beste fust terriblement farouche & cruelle au commencement du combat, toutesfois se sentant blessée, elle vaincue de rage, & à sa façon acoustumee, rebroussa chemin à trauers ceux qui estoient derriere. Ainsi dōc se sentant percée des deux flancs il leue sa trompe, abat en terre celui qui le gouuernoit & le foule aux pieds : & à veuë d'œil commença à defaillir pour l'abōdancedu sang qui couloit de ses deux playes. Le Roy craignāt pis faute incontinent bas, & l'elephant tournant contre les Indiens mesmes mit en effroy les autres elephans qui le suiuoient, & qui commencerent à fuir de peur, sans vouloir plus retourner en la meslee quoy que leurs gouuerneurs les flataissent ou menaçaissent. Les Portugallois despestrez de ceste difficulté recommencerent le combat plus aspre que deuant : & les Malacans qui defendoient leurs familles, leurs maisons, pays & liberté, en presence de leur Roy, se fourtoient parmi les espees sans aucune crainte. Quāt au Roy, ayāt esté griefuement blessé en l'une des mains, il fut contraint sortir de la presse & se retirer en son palais pour se faire penser. Ses gens d'armes voyans cela, gaignerent à la file un petit costau sur lequel ce palais estoit basti. D'un autre costé les choses estoient en grand brāsle, car Albuquerque auoit les ennemis en teste, à dos & sur les bras : au moyen dequoy Jean Limice laissa quelques soldats sur le pont, autant qu'il conust pouuoir suffire pour tenir bon, & courut au secours d'Albuquerque, se mellāt de telle furie parmi les Malacans, que plusieurs se ietterent en l'eau pour garātir leurs vies. Les matelots Portugallois vogaūs en des esquifs ne faisoient autre chose que tuer sans que personne resistast. Albuquerque deliuré d'un manifeste peril parla

venue de Limice, se prend à exhorter ses gens de recommencer le combat, & les refuseille tous par la fanfare des trompettes pour les rendre tant plus dispos, puis court sus à vne grosse troupe de Malacàs qui occupoyēt vn chemin fort large. Cōbien qu'ils eussent vaillamment soustenu la premiere charge, si furent ils à la parfin rompus & mis en route. Lors ayāt gagnē sur les ennemis vn des bouts du pont, il y posa intōtinent vn corps de garde fortifié d'vn fossē & d'vne tranchee avec quelques pieces, dont Nonio Vasque de Blanc Castel & George Leon eurent la charge. Voulant puis apres gagner l'autre bout qui regardoit le temple & le palais, il fut si viuement repoussē par les Malacans, qu'il n'auançoit en rien. Le combat dura depuis le point du iour iusques à midi : lors Albuquerque craignant que les soldats disposez es corps de garde du pont ne fussent endommagez des maisons prochaines fit prōptement mettre le feu de part & d'autre en ces corps de garde. L'embrasement gaigna iusques au temple & au palais, & en brulla vne grand' partie. Alors le soleil commēçoit à se coucher, & les Portugallois estoient extremement trauaillees de la chaleur de ceste iournee & du long combat : au moyen dequoy Albuquerque remena ses gens es nauires, en intention de retourner à la premiere commoditē avec plus grād nombre de soldats en la ville. On n'a peu sauoir le nombre des ennemis tuez en ceste meslee : mais c'est chose certaine que le compte en fut tres-grand. Albuquerque y perdit treize hommes, & en remena septante grieuement blessez : il print cinquante pieces d'artillerie, & y eut beaucoup de maisons sacagees.

EN ceste nuit plusieurs marchans s'enfuirent de la ville, & vn certain seigneur du pays, qui peu de iours auparauant auoit espousē la fille du Roy de Malaca, ne pūt estre retenu de l'amour de sa femme, ains se sauua cōme les autres. Au mesme instāt Vtetimutaraja marchand de laue, demeurāt en Malaca des long temps, & estimē le plus riche entre tous les estrāgers, ayāt veu le cōbat du iour, vint la nuit trouuer Albuquerque avec presens, & le supplia d'estre receu, promettāt rendre fidele obeissance aux capitaines du Roy de Portugal. Albuquerque le recueillit & print amiablemēt en sa protectiō. Les capitaines de la China vindrēt aussi gratifier Albuquerque de sa victoire, priās qu'il leur fust permis de se mettre à la voile : ce qu'Albuquerque leur ottroya, les renuoyant avec presens, & leur bailla vn Portugallois qui auoit esté prins avec Arauge, & parloit bō Malacā, pour aller avec eux & s'atresterau royaume de Siam par où ils deuoyent passer, estimant bon pour la commoditē de ses affaires de saluer le Roy de Siam, & tesmoigner le bō desir qu'il auoit de lui faire seruice, afin d'attirer ce Roy, qui auoit vn royaume riche & de grāde estendue, en amitiē avec Emmanuel. Ce Portugallois enuoyē avec les capitaines de la China s'appelloit Edouard Fernād, & portoit de la part d'Albuquerque au Roy de Siā vne espee qui auoit la poignee & le pōneau de fin or artistement elabourez, esmaillez & grauez richemēt, avec vne ceinture de mesme facon. Pour reuenir aux Portugallois ils employerēt la nuit à acoustrer leurs playes, se rafraischir & fortifier de viāde, & à preparer ce qui estoit necessaire pour retourner au combat.

Malaca brullee en partie.

bat. Quant au Roy de Malaca, il fortifia encores mieux que deuât d'autres corps de garde plus en auant dans la ville pour soustenir les Portugallois qui auoyent ia quelque auantage pour entrer, & fit braquer force artillerie vers l'endroit où ils s'estoyēt fortifiez. Dauâtage il fit semer des pointes d'acier teintes en poison és lieux desquels il estimoit que les Portugallois tascheroyēt s'eparer, afin qu'y mettâr le pied ils s'enferrassent pour tóber & mourir en grâde douleur. Car le venin dont telles pointes furent frottées auoit la propriété qu'en ataignant tât soit peu le sang, il s'espâdoit tout soudain aux entrailles. Mais Albuquerque fut auerti de tout par vn nômé Nînachetuen, qui soustenoit le parti des Portugallois : & conoissant qu'un des plus heureux succes de ceste guerre cōsistoit en la prinse du pôrt, il s'auisa de ce qui s'enfuit. La nauire que le Sultan Zainal auoit abâdonnee vuide en s'enfuyant estoit grande & forte. Albuquerque la fit equipper d'artillerie, de munitiōs de guerre & de viures : puis avec sacs de laine, de cotton & autre telle matiere molle qui preste aux coups de canon, & s'entretient assez contre vne telle violence, il fit reuestir les costez de ceste hauire, laquelle portee par le flux de la mer & approchée du pont, y commandoit comme si c'eust esté quelque citadelle. Mais alors on ne la pouuoit faire ioindre pource que la maree estoit fort lente & basse à cause de la Lune, selon le cours & changement de laquelle le flus enfle & diminue : ce qui a acoustumé d'auenir, selon que la Lune approche ou se recule du Soleil. Or quand elle est au declin, ou qu'elle commence à se faire neuue, lors elle perd de iour en iour ceste vertu qui paroist en son plain. Albuquerque attêdoit ceste commodité, & selon que la maree haussait, les matelots faisoient tous leurs efforts d'auancer la nauire vers le pont. Les Malacans ne se reposoyent pas ce pendant, car ils apprestoyent des engins poissez, huilez, & enduits de matiere propre à faire feu, & entortillez proprement au long du canal, pour les darder contre la nauire, & l'embraser alors que la maree monteroit. Au contraire les Portugallois acouroient promptement au secours dans des barquerolles & esquifs, & avec grands crochets de fer empoignoient ces engins à feu & les iettoient vers l'autre costé de la riuîere. Mais les Malacans aualoyent des longues pieces de bois iour & nuict contre la nauire pour la briser. Antoine d'Abrey cōmandoit en icelle, où ayant esté ataint d'une harquebouzade qui lui perça les deux ioues, Albuquerque lui substitua soudain vn lieutenant : ce qu'entendu par Abrey, l'ay encores (dit-il en cholere) mes deux iambes entieres pour courir, & les bras en la manche pour frapper : i'ay la parole ferme & le langage ne me defaut pour encourager mes soldats, & grâces à Dieu, j'ay de l'entendement assez pour commander. Quand mesmes mes playes me contraindroient demeurer au liêt, encores pourrois-je preuoir & pouuoir aisémēt aux affaires, sans bouger d'un lieu. Et pource, tant que l'ame me battra au corps, ie n'endureray point qu'un autre tiene ma place. Ainsi il réuoya celui qui venoit pour lui succeder, aussi eschaufé à faire sa charge, que s'il n'eust esté blessé en sorte quelconque. Finalement la nauire fut iointe au pont à l'aide de la maree qui estoit fort haute, malgré toute la résistance des ennemis.

*Dernier assaut
donné à Ma-
laca qui est
prise & pillée
après la desfaite
& fuite du
Roy.*

Le lendemain auant iour Albuquerque ayant mis ses forces en terré, assaillit la ville comme au parauant : & y eut beaucoup plus aspre combat qu'à la premiere fois, tellement qu'il en tomboit de part & d'autre, & y auoit grand nombre de blesez. En fin, les Portugallois se rendirent maistres du temple & du palais royal, contraignans les ennemis se sauuer de vistesse. Semblablement, Albuquerque ayant avec ses troupes gagné à toute peine l'autre fort, les Malacans deslogerent de là. Abrey d'autre part chassa la garnison qui defendoit le pont : tellement qu'en mesme temps, lors que la nauire combattoit, & que chascun en son quartier assigné chargeoit l'ennemi, apres auoir longuement balancé les Malacans furent rompus en tous endroits. Or comme ils reculoient, le Roy môt sur vn elephant & acompagné de trois mil hommes marchoit au grand pas pour les soutenir : mais voyant tous les forts saisis il se retira vers sa maison. Les Portugallois ne coururent pas apres lui, à cause qu'ils estoient en trop petit nombre : ains Albuquerque entra dans le temple occupé par ses gens, & en commit la garde à ceux qui y estoient entrez les premiers. De là il retourna sur le pont, & aux deux bouts d'icelui posa des corps de garde enuironnez de forts gabions bien rangez, garnis d'artillerie & de soldats pour la defense. Les ennemis taschoyent d'empescher l'ouurage à coups de trait & de harquebouzades, dont quelques ouuriers furent blesez, au moyē de quoy Albuquerque partit ses troupes en deux & y establit des plus experimētez capitaines, ausquels il commanda d'aller par deux chemins escarter de celui où les Malacans se monstroient, puis leur venir donner à dos, & tailler tout en pieces : ce qui fut executé, tellement que plusieurs des ennemis y laisserent la vie, mais la plupart gagna au pied. En apres Albuquerque choisit deux maisons pres du pont vers l'endroit le plus apparent de la ville duquel il se vouloit emparer, & fit braquer quelques pieces au haut d'icelles maisons qui ne sont pas pointues ains basties en plateforme. Dauantage il disposa des esquifs & autres vaisseaux legers bien garnis de canon en certains endroits propres de la riuere : car il estimoit auoir encor le plus fort à acheuer, & preparoit toutes choses fort soigneusement, comme ayant à combattre plus asprement que iamais, & resolut d'assaillir le palais royal des le lendemain. Mais la nuit deuant, le Roy s'enfuit en terre entre deux mers avec toutes les richesses qu'il pût emporter. Les soldats Portugallois estans courus au palais pour le piller, & n'y trouuans que les murailles, de despit y mirent le feu de tous costez. Il y auoit encor plus de six mil hommes en armes dans Malaca, qui firent quelques escarmouches, mais n'ayans rien gagné que des coups avec nouuelle perte, ils quitterent tout & s'enfuirent. Albuquerque donna le pillage de la ville aux soldats, reseruee la place en laquelle Vtetimuraraja habitoit, & les maisons de Ninachetuen, des marchans de laue, & de quelques autres receus en la protection du Roy de Portugal. Les soldats eurent force butin, & print on plus de trois mille pieces de canon : les arçenaux estoient garnis de diuerses prouisions, munitions & engins de guerre. Tout ce qui fut trouué propre pour reequipper la flotte & fortifier la ville demeura en reserue, sans que les soldats y touchassent : &

neant-

neantmoins le quint du pillage, appartenant au Roy de Portugal, fut estimé valoir deux cens mil escus, encor que les soldats n'eussent représenté l'or & l'argent qu'ils pouuoient auoir caché. Dont il appert que si le Roy & les plus riches marchans de Malaca n'eussent transporté en terre leurs richesses apres le premier cōbat, il y eut eu du butin assez pour assouir l'extreme auarice des gens de guerre. En tous ces conflits furent tuez quatre vingts Portugallois ou enuiron.

23. A P R E S tous ces accidens Albuquerque attira par gracieuses promesses les marchans qui n'auoient porté les armes à retourner en la ville, les remit en leur liberté, & permit qu'ils vescuissent à leur façon acoustumée. Il cōmit Vretimutaraja pour gouuerneur & iuge des Mahumetistes, & Nina chetuen des autres nations qui adheroyent à diuerses idoles, entelle sorte qu'on pourroit appeller de leurs sentences deuant la iustice de Portugal, qui y fut establie pour decider de tous differens en dernier ressort. Albuquerque entendant aussi que le Roy se fortifioit pres de la riuierre qui trauersoit la ville, à quinze lieues de là, fit partir quelques capitaines pour ruiner tout & chasser les ennemis : ce qui fut executé, & gaagnerent force butin avec sept elephans qu'ils prindrent. Cela fait, Albuquerque s'appliqua du tout au bastiment d'une citadelle, prenant pour materiaux les sepulchres des Rois & Princes, les pierres des plus beaux bastimens de la ville, ruinez par le canon durant la guerre. Il y auoit du peuple en nombre suffisant pour seruir les ouuriers : & quant à lui, il sollicitoit tellement la besongne, qu'en peu de temps la citadelle fut esleuee iusques au sommet. Puis au reste par ses douces paroles il attira grande multitude de gens de diuers endroits pour venir peupler la ville : dressa des ordonnances pour la police, fit battre monnoye d'or & d'argent au coin du Roy de Portugal, & en fit forget aussi d'estain, defendant sur grosses peines d'vser d'autre monnoye à l'auenir. Lasaman, Amiral de Malaca, voyant la ville prinse, policee par bonne loix & ordonnances, la dominatiō des Portugallois fermement establie, & son Roy mort de regret, enuoya prier Albuquerque de le receuoir en son seruice, promettants employer aussi courageusement pour la grandeur du Roy Emmanuel qu'il auoit fait en plusieurs lieux pour son Prince decedé. Ceste offre pleut grandement à Albuquerque, qui lui promit la foy, & le pria de venir vers lui : mais quelques enuieux craignans que s'il entroit en Malaca lon ne luy donnast l'une des plus honorables charges, lui escriuirent qu'il se donnast biē garde d'y aller, & qu'Albuquerque auoit delibéré de le faire mourir : ce qui l'estonna & retint.

24. E N ces entrefaites retourna Edouard Fernand enuoyé vers le Roy de Siam avec vn ambassadeur de ce Roy qui auoit humainement recueilli & honoré de presens Edouard. Le sommaire de l'ambassade de ce député de Siam vers Albuquerque fut, Que le Roy estoit fort ioyeux de la victoire obtenue par les Portugallois, desiroit voir agrandir la domination du Roy Emmanuel, prenoit plaisir d'auoir pour voisin vn peuple si vaillant, promettoit faire tout deuoir d'ami, & procurer tout ce qui seroit pour le proufit & honneur d'Albuquerque & des lieutenans du Roy de Portugal. Il enuoya

*Ambassade
du Roy de Siam
& d'autres
Rois vers
Albuquerque*

*Description
du royaume de
Siam.*

aussi à Albuquerque vne coupe d'or, vne espee avec le fourreau d'or, & vn anneau garni d'une pierre de tresgrand pris assez proprement enchassée. Albuquerque fit present par cest ambassadeur de quelques riches ioyaux à la mere du Roy. Or le royaume de Siam comprend presques tous les confins & extremitez de l'Inde Orientale & Septentrionale, estant borné d'un grand bras de mer & du royaume de la China à l'Occident, où il se joint au royaume de Pegu. Autresfois il s'estendoit par de là un promontoire distant de Malaca environ soixante lieues, & commandoit aussi en Malaca. On tient que ce royaume est fourni de douze mil elephants, dont quatre mil sont tousiours equippez & armez pour obuiuer aux soudains accidés de guerre. Albuquerque voulant ratifier solennellement la paix avec ce Roy, lui enuoya Antoine Mirande d'Azeuede & Edouard Coeillo avec riches presens & dignes d'une magnificence royale. Un autre ambassadeur du Roy de Iaue arriua puis apres en Malaca avec presens qui sentoyent leur homme de guerre: car c'estoyent tapisseries de cotton enrichies d'armes & representans les exploits de guerre de ce Roy: item des tabourins d'airain dont la nation se sert pour s'encourager au combat. Les autres Rois voisins, celui de Zamatra, & de Pegu, la domination duquel tirant de là le Gange vers l'Occident est de merueilleuse estendue, enuoyerent leurs ambassadeurs: les uns requerans paix & amitié, les autres offrans estre vassaux du Roy de Portugal. Tous louoyent merueilleusement Albuquerque, & par riches dons monstroyent l'amitié & l'honneur qu'ils lui portoyent, pour la renommee qu'il auoit acquise par sa valeur.

* *
*

FIN DV SEPTIESME LIVRE.





LE HVITIESME LIVRE.

SOMMAIRE.

1. La guerre recommencée en Goa.
2. Tentative entrepris de Rabel gouverneur de Goa, en l'exécution de laquelle il est tué, & l'assassinat établi en son lieu.
3. L'isle de Goa conquise par les ennemis, & la ville réduite à l'extrémité.
4. Apostasie de septante Portugallois. L'acte tragique de Machiade à l'endroit de ses enfans.
5. Ravitaillement de la ville de Goa, renforcée par le secours de plusieurs capitaines d'Albuquerque.
6. État des affaires de Portugal & d'Afrique.
7. Mence d'Victimatarana, qui est emprisonné & decapité en Malaca avec son fils & son gendre.
8. Conspiration de Patecar successeur d'Victimatarana contre les Portugallois & ce qui en suivit.
9. Albuquerque part de Malaca, le danger auquel il fut réduit sur mer, la perte qu'il fit, & l'état des Indes en ce temps.
10. Naissance de Henri Prince de Portugal.
11. Guerre & diverses rencontres de Patecar & des Portugallois en Malaca.
12. Nouvelle flotte de Portugal en Inde, & divers succès de guerre contre Albuquerque.
13. Guerre de Goa & quelle en fut l'issue.
14. Négociations d'Albuquerque avec plusieurs Rois & Princes à l'avantage des affaires de Portugal.
15. Ambassades de l'Empereur d'Ethiopie & du Roy d'Ormou en Portugal, & paix faite avec le Roy de Calcut.
16. État des affaires d'Afrique, & diverses courses des Maures des Isles par Edouard de Meneses.
17. Guerre de Safin & l'issue d'icelle.
18. Guerre d'Almedune, les notables exploits & fin d'icelle.
19. Guerre de Marob & la belle victoire obtenue par le habentisif.
20. Entreprises du Roy de Fet sur Tingo & Arzale, & les succès d'icelles.
21. État du royaume de Congo en Ethiopie.
22. Description de plusieurs isles de l'Inde Orientale, spécialement de la grande & petite lane.
23. Armée navale de Patecar Prince de l'apare: les batailles données entre lui & les Portugallois au port de Malaca où il est défait avec un grand nombre de pertes.
24. La citadelle de Malaca délivrée de la trahison de Maxeliz & les affaires pacifiques.

1.



N CES entrefaites, les affaires de Goa furent réduites à l'extrémité pour les Portugallois; car Zabaim Dalcam envoya Pultecam avec trois mil hommes de guerre, la plupart Turcs, pour reconquêter les places qui auoyent esté saisies en terre ferme pour le Roy de Portugal. Melras & Timoja, qui tenoyent le parti d'Albuquerque, mirent aux champs quatre mille pietons & quarante chevaux, & à la première rencontre mirent Pultecam en route. Or icelui ayant ramassé ses forces courut sus à Melras & Timoja, les surprit de telle viffesse qu'il eut sa reuence & les rompit entièrement. Eux voyans la plupart de leurs soldats en pieces, & qu'il leur estoit impossible de redresser vne autre armée, se retirèrent vers le Roy de Narsingue, lequel à la requeste de Melras pardonna tout le passé à Timoja, puis (selon le bruit qui en

Renouvellement de guerre en Goa.

courut depuis par tout) contre la foy promise il le fit tuer en trahison par quelques siens seruiteuts. Pultecam enflé de sa victoire delibera d'entrer en l'isle, & ptemierement sollicita les habitans à se reuolter : ce qu'eux refuse-
rent. Incontinent Crisne le plus riche & auisé entre les Insulaires, & qui estoit peager, fit sauoir ceste resolution de Pultecam à Rabel gouverneur de la ville de Goa, lequel fortifia les auenues de l'isle, & y mit des garnisons pour en empeschet l'entree aux ennemis. Mais Pultecam choisit vne nuit fort noire, pluuieuse & plaine d'orages, & passa dans certains radeaux, prenant terre en des endroits qu'il sauoit n'estre pas bié gardez. Il surprint deux vaisseaux avec toute l'artillerie d'iceux, & fit tuer les Portugallois qui voulurent se mettre en defense. Les autres garnisons des Insulaires se retirerent promptement dans Goa. Sutce Pultecam commença à songer comme il pourroit attirer hors la ville les gensdarmes Portugallois qui la gardoyent, afin de l'assaillir puis apres quand elle seroit desnuee de sa principale force. Il enuoye vn sien espion vers Cojebique, l'vn des capitaines de l'isle, & qui manioit les deniers des ports & peages, pour lui persuader de mettre aux champs la garnison de la ville. Cest espion, supprimant (comme il lui auoit esté commandé) le nom de Pultecam, s'adresse à Cojebique, & faignant auoir quitté le parti de Pultecā, lui declare que deux cens Turcs estoient allez assaillir vne bourgade nommee la Vieille Goa: que ces Turcs auoyēt esté inuestis par les Insulaires, & taschoyent se desuelopper : que si lon enuoyoit quelque renfort ils seroyent tous taillez en pieces.

*Temeraire en-
treprise de Ra-
bel gouverneur
de Goa, en l'e-
xecution de la-
quelle il est
tué. Et l'as-
sés-
cel establi en
son lieu.*

RABEL auoit enuoyé Iacques Fernand de Far pour descourrir, & des le matin, en attendant le retour de Fernand, auoit rangé ses troupes, afin de courir sus aux ennemis, si la commodité s'en presentoit : mais cest espion de Pultecam suruint qui ietta à la trauerse le propos susmentionné. Lors Rabel demande à Cojebique ce qui lui en sembloit, qui respondit que ce rapporteur lui estoit suspect. Mais Rabel, ieune homme, bouillant & audacieux, plain d'esperance, & enflé de quelques heureux exploits (comme de fait il alloit bien à la guerre, & en maintes rencontres auoit battu ses ennemis) fut aisément attiré dans le piege. Ainsi donc sans attendre le retour de Fernād il sortit en campagne avec trente cinq cheuaux & cinq cens Indis. L'espion de Pultecam apres s'estre descouuert à quelques vns se retira, & les Indiens qui sauoyent toute la fourbe ne voulurent pas quitter la ville: ce dōt Rabel ne s'apperceut iusques à ce qu'il eust gaigné le dessus d'vn costau, car lors il ne vid que treize Indiens autour de foy. Lors il descourrit vne grosse troupe d'ennemis montant en apparence à mil hommes ou enuiron : & y auoit cinq cheualiers qui les rangeoyent en compagnies. De rechef Rabel demande à Cojebique son auis. Tout va mal, dit-il: nostre espiō n'apparoit point: le nōbre des ennemis est beaucoup plus grād qu'il n'auoit rapporté : nos gēs estōnez de peur sont demeurez detriere: il y a apparēce que ce meschāt espion nous a trahis: pourtāt ie serois d'auis que nous retournissiõs en la ville. Toutesfois si vous trouuez meilleur de faire autrement, ie vous suivray fidelemēt par tout où vous irez. Rabel ayāt prié les autres de dire leur opiniō, personne ne respōdoit, craignāt s'ils dōnoyēt bō cōseil qu'õ n'esti-
maſt

maist que la peur, non pas la prudēce les faisoit ainsi parler. Surquoy Rabel reprint le propos & leur dit, Courage, mes amis: c'est aujour d'hui quelō verra qui a plus de volōtē de bien faire. Vn gentilhomme de la troupe, nommē Manuel de Cugne, releuant ceste parole, Voila (dit-il) vne resolution qui me plait entre toutes autres. Incontinent ils descendent tous en la plaine, & se voyans prests des ennemis dōnent dedans à bride abatuē, de telle impetuosité qu'ils les font reculer iusques au riuage, où Pultecā recueilloit d'autres plus grosses troupes qui venoyent de terre ferme. Or les ennemis auoyent esté tellement effarouchez à ceste premiere charge, que plusieurs se iettoient dans la mer, où ils estoient engloutis des vagues: & Pultecā ne pouuoit rassembler le reste. Deux cens Indies Malabares estoient arriuez au secours de Rabel, & apres s'estre ioints aux Portugallois poursuiuirēt les ennemis escartez, tellement qu'il en demeura trois cens tuez en diuers endroits. Il y auoit sur le costau des mazures & pans de muraille de quelques bastimens ruinez. Pultecā se retira leans avec quatre vingts Turcs tant de pied que de cheual ramassez de la fuite. Rabel resolut de les aller desnichier de là, dont Cojebique tascha le destourner, alleguāt que Pultecā y estoit caché, & auoit vne troupe de vaillans hommes avec soy, que la rage & le desespoir redroit inuincibles, si lon s'attachoit à eux: & qu'il estoit plus expedient de les despescher doloīn à coups de fleches, priant qu'on lui dōnast ceste charge. Mais Rabel trop enflē de sa victoīre ne tint conte d'un si sage cōseil, ains avec quatorze cheuaux (car les autres poursuiuoient les fuyards) entra dedās ces ruines, où il fut assailli de deux costez, tellemēt que son cheual ayāt esté abatu à coups de picque, lui mesmes, atterré de pierres & cailloux tōbez d'une muraille, fut tué des ennemis, & Manuel de Cugne semblablement les autres cōtraints se retirer d'ētour ces mazures, sans toutesfoīs estre poursuiuis de Pultecā, qui craignoit qu'en recommēçant le combāt, les siens, encores esperdus, ne fussent causē d'extreme confusion pour lui. Pourtant lui & les siens se contenterent d'auoir tué les deux principaux assaillans & contraint le reste de se retirer. On vid ce iour là combien grande difference il y a entre vn sage capitaine & vn vaillant soldat: car Rabel, qui estoit braue guerrier au possible, fit vn tel tour de ieune homme, que plusieurs trouuoient fort mauuais qu'Albuquerque l'eust esleu gouverneur de Goa. Au cōtraire Cojebique acquit alors la reputation de sage capitaine & bien experimentē, car il combatit vaillamment, & donna si bon conseil, que si Rabel l'eust creu, iamais il ne fust tombē en l'accident où il demeura prins. Apres tout ce que dessus auenu les Portugallois & Malabares se retirerent tous à sauuetē dedans Goa, & d'un commun auis esleurent François Pantoje pour gouverneur, lequel se monstra lors de si lasche courage qu'il refusa ce qu'on lui presentoit, disant que les affaires estoient en tel estat qu'un homme bien auisē ne voudroit pas se charger lors de la garde de la ville. A son refus les gentilhommes & habitans baillerent le gouuernemēt à Jacques Mendez de Vasconcel, lequel l'ayāt acceptee de bon cōeur, mie couragement ordre à tout ce qui estoit requis pour bien defendre vne place, fit apporter dans Goa tous les viures qu'il fut possible recouurer, dres-

la des forts, disposa des sentinelles, ayant l'œil & la main par tout. Cristie l'ayant prié d'estre receu avec ses gens en la ville, y fut receu avec bon visage, & n'y auoit pour la garde que deux cens Portugallois & six cens Indiens confederez, bien petite troupe pour soutenir le faix d'une guerre, & au besoin endurer un siege.

*L'isle de Goa
conquise par
les ennemis &
la ville reduite
à l'extremité.*

QUANT à Pultecarn il s'empara de toute l'isle, & choisit pour l'assiette de son camp Benastarin bourgade située à l'entree de l'isle vers le midi, assez commode pour recueillir les viures apportez de terre ferme, & pour repousser ceux qui veulent entrer en l'isle. Il fit bastir en ce lieu une citadelle fort ample, laquelle il munit de tous engins de guerre & d'une forte garnison, afin de tant tourmenter les Portugallois qu'ils seroyent contrains quitter tout: puis quelques fois tout ouuertement, par fois par embusches, il raschoit s'emparer de la ville, mais Vasconcel le repoussoit tousiours. Ce pendant Francisque Pereire de Berrede se vint ranger dedans la ville avec trente soldats Portugallois, ce qui resioiut grandement Vasconcel, tant il auoit lors faute d'hommes. Or d'autant que la guerre prenoit long trait, Zabaim commença à auoir mauuaise opinion de Pultecarn, & mesmes lorsqu'un rapporta à Zabaim que son lieutenant le trahissoit. A l'occasion dequoy Zabaim depecha un sien beau frere, Turc de nation, nommé Rozalcarn, avec six mille hommes pour aller en Goa, commandant par lettres à Pultecarn de remettre son armee es mains d'icelui. Pultecarn, despité tout outre de la honte qu'on lui vouloit faire recevoir, refusa d'obeir au mandement de Zabaim. Lors Rozalcarn pour se rendre maistre manda à Vasconcel, qu'au desceu de Zabaim Pultecarn auoit empieté le pays de terre ferme appartenant au Roy de Portugal, & prins pied en l'isle: mais que luy estoit enuoyé avec armee pour chastier Pultecarn d'une telle faute, & que si Vasconcel le vouloit secourir, en peu de iours ils chasseroient Pultecarn hors de l'isle. Il donnoit aussi esperance de liberté aux Portugallois que Zabaim auoit arresté prisonniers au port de Dabul, apres le naufrage dont a esté parlé ci deuant. Vasconcel adiousta foy trop legerement à celui qui n'auoit point de foy, tellement qu'il donna secours à Rozalcarn, par le moyé dequoy Pultecarn fut desfait en moins de rien. Mais cela fait tant s'en salut que Rozalcarn tint promesse, qu'au contraire il comença à menacer Vasconcel de lui courir sus & mettre tout à feu & à sang, s'il ne sortoit promptement de la ville. Par ainsi la guerre se ralluma au grand desauantage des Portugallois qui se trouuerent reduits en grande difficulté, & neant moins repousserent tant de fois les ennemis arriere des murailles que finalement ils n'oserent plus en approcher. Ce pendant l'hiver suruint, qui est fort terrible & tempestueux en ceste plage de mer, & par ainsi les passages demurerent clos. D'autre part un grand pan de muraille tomba de soy mesme, qui fit presumer à Rozalcarn qu'il auoit tout gaigné, tellement qu'il amena ses troupes à l'assaut vers ceste breche, où il y eut aspre conflict iusques au soir avec perte de grand nombre d'ennemis, & quant aux Portugallois de quelques uns des leurs, notamment de Cojebique, lequel combatant des premiers & vaillamment au possible fut renuersé d'une harquebouzade dont

*Vasconcel assi-
né par Rozal-
carn.*

dont il mourut sur la bresche. Rozalcam ne pouuant forcer les assiegez fit tous ses efforts de les auoir par finesse: & pour y paruenir les containgnoit d'estre au guet nuit & iour, en apostant des coueurs qui alloient & venoyent incessamment, & des trompettes qui ne cessoient de sonner l'alarme: tellement que les assiegez tomboyent par terre tant ils estoient las de veiller. Iean Machiade, duquel à esté parlé plusieurs fois ci deuant, & qui auoit charge d'une compagnie entre les ennemis qui l'estimoient Turc, dont il auoit l'habit & l'apparence, auertit par lettres Vasconcel de mener ses troupes en vn endroit nommé les deux arbres, si tost que la trompette sonneroit, pource qu'il lui seroit aisé de desfaire vne troupe d'ennemis qui demeuoyent d'ordinaire là avec vn trompette. Cela fut executé de nuit, en telle sorte que plusieurs tomberent sur la place, les autres mis en route, & la bresche refaite en diligence. Ce pendant la famine minoit les assiegez, car l'huiuer empeschoit l'apport des viures par mer, & Zabaim auoit gés sur toutes les auenues, tellement que rien ni pouuoit entrer de terre ferme.

4. DE ceste famine plusieurs prindrent occasion de renoncer le Christianisme, & s'enfuir de nuit vers Rozalcam, auquel ils promettoient de suivre la superstition de Mahumet. Il y eut septante Portugallois qui oublians leur sermēt & religion, & pour paistre leurs corps pour vn peu de tēps, precipiterent malheureusement leurs ames en perdition eternelle: entre autres vn personnage de qualité & d'assez bon lieu nommé Fernand Lopez. Mais Iean Machiade, qui auoit saint d'estre Turc iusques alors, perdoit patience voyant des Chrestiens detester ainsi leur religion, & fut tellement esmeu qu'il delibera mōstrer par œures sa foy en vn temps auquel il sembloit que les Chrestiens fussent accablez de faim, & reduits à toute extremité, & se rāger avec eux, pour participer à leurs trauaux & miseres. Il auoit deux fils d'une Sarafine, lesquels il auoit baptisez de sa main: & les enuoya querir lors afin de les mener quād & soy dans la ville. Mais ne pouuant executer cela, il commit vn acte merueilleusement pitoyable, aimant mieux se monstrier cruel enuers son propre sang que laisser en la puissance des ennemis des petis enfans pour estre empoisonnez des erreurs execrables de Mahumet. Ainsi donc vne nuit il estouffa ses deux enfans, & le lendemain commença à crier & lamenter ce miserable accident, deplorant à chaudes larmes la calamité, & disant que ses enfans auoyent esté estouffez par les enchantemens de quelques forcieres. En apres il fit semblant de vouloir se pourmener par l'isle afin de soulager ses ennuis, & avec quelques prisonniers Portugallois & les autres qui s'estoyent reuoltez si laschement, approcha des murailles de la ville. Lors il fit vne longue harangue de la briefuēt de ceste vie, des supplices perpetuels, de la vie eternelle: & exhorta tous ses compagnons d'aimer mieux languir en ceste miserable & caduque vie, & estre trauaillez pour vn peu de temps, que d'estre tourmentez à tousiours apres la mort. Quant aux apostats, ils ne tindrēt compte de tout ce discours: mais Machiade, qui auoit eu promesse & sauſconduit de Vasconcel auant que rien executer des choses susmentionnees, entra dās la ville avec les prisonniers, ce qui resiouit grandement les Portugallois, & leur fit esperer de-

*Apostasie de
septante Por-
tugallois.*

*Alle tragique
de Machiade
à l'endroit de
ses enfans.*

liurance : car ils croyoient que Dieu par sa prouidence auoit assisté à Machiade & à ses compagnons, pourtant s'asscuroyent ils aussi que le mesme Dieu donneroit bien tost quelque secours à vne troupe d'affligez qui inuouquoit sa puissance. Ce pendât Rozalcam entretenoit le siege, & se vint camper en vn lieu d'où il faisoit iouer ses plus grosses pieces contre la ville : ce qui donna occasion à Vasconcel de sortir avec quatre vingts cheuaux, lesquels chargerent si viuement Rozalcâ & les siens, qu'apres quelques coups donnez de part & d'autre, les ennemis furent mis en route, & les Portugallois se retirerent sains & saufs en la ville, fors quelques vns blesez. Rozalcam troublé de la hardiesse des assiegez, perdit tout espoir d'emporter la ville, & pourtant quitta il tout acte d'hostilité, se contentant de contraindre par famine les assiegez à se rendre. Vasconcel estimant qu'il falloit se hazarder dauantage enuoya Francisque Pereire de Berrede en Baticala, quoy que la nauigation fust tresperilleuse à cause de la rigueur du temps & de la vigilance des ennemis, afin d'y recueillir quelques viures & les amener en la ville. Berrede cinglant en vne galere dont il estoit capitaine, exploita avec telle diligence & adresse, que s'estant embarqué le premier iour de Iuillet il retourna maugré les ennemis en dedans le mesme mois au port de Goa avec vingts brigantins chargez de viures, tellement que la famine deslogea & les assiegez reprindrent leur première vigueur.

T E L L E s estoient les affaires de la guerre en Goa. Mais le capitaine Begie, qui auoit comandement d'Albuquerque d'aller deuant en Zacotora, s'embarqua, & en sa route conquist vn vaisseau, puis attendit son general quelques iours, en fin desquels, coniecturant par la trop longue demeure, que la grand flotte feroit voile en Arabie ceste annee, vint surgir en Zacotora, destruisit la forteresse, chargea les soldats, l'artillerie, les viures & les munitions de guerre en les nauires, puis cingla vers Ormus, pour exiger le tribut qui lui fut payé sans delay avec grand honneur fait à la personne. De là il print la route de l'Inde, & sur la fin du mois d'Aoust vint mouiller l'ancre au port de Goa. Son arriuee remit au dessus tous ceux de la ville : car il menoit cent Portugallois braues soldats & bien disposés. Au commencement du mesme mois estoient aussi arriuez de l'isle de S. Laurent Iean Serran & Pelage Sale, qui auoyent grandement fortifié & resiouy les assiegez. Semblablement Manuel Lacerde, qui avec vne flotte de six nauires auoit couru la mer Indoise & rodé la coste de Calecut, si tost que les vents furent propres, amena toutes sortes de viures & deux cens soldats Portugallois en la ville de Goa, laquelle redressée par tant de secours commença à se mocquer des ennemis. Au mois de Septēbre suiuant, Christofle Brittio parti de Lisbonne le dixneuuesime iour d'Auril, sous la charge de Gasie Norogne, print port en Goa. Ce Norogne, neveu d'Albuquerque, auoit esté enuoyé en Inde par Emmanuel avec six nauires, dont quatre hyuernèrent en Mozambique, les deux autres furent enuoyees en Inde, l'une en laquelle commandoit Arias de Gama fit voile en Cananor, l'autre dont Brittio estoit capitaine print port en Goa, cōme nous le venons de dire. Nonobstāt tout cela Rozalcam faisoit la guerre assez viuement : en fin il y eut bataille donnee,

Goa auantaillee & renforcée par le secours de plusieurs capitaines Portugallois.

nee,

nee, en laquelle Britio menoit l'auantgarde, & où les ennemis eurent du pire, car apres auoir esté rompus & mis à vau de route, ils furent pourſuiuis & taillez en pieces pour la pluspart. Ceste perte ayant rédu Roſalcam plus ſage il delibera ne plus venir aux mains, ſe contentant de loger ſes troupes en diuers endroits de l'isle, & fortifier ſa citadelle, laquelle du tout acheuee fut ſi bié munie de toutes choſes néceſſaires, miſe en ſi forte deſenſe & remplie de tel nombre de ſoldats, que Zabaim n'auoit place forte, quelle qu'elle fuſt, comparable à ceſte citadelle. Cependant arriuerent au haure de Goa deux nauires enuoyees par Melichiaz, chargees de bleds & de riz : car Melichiaz ayant entendu que les aſſiegez eſtoient en grande diſette de viures, deſpeſcha incontinent ces deux nauires pour le ſoulagement de Vaſconcel & des ſiens, promettant par mandemens fort amples de ſ'employer iuſques au bout pour le bien des affaires du Roy de Portugal. On le remercia bien fort, comme il le meritoit, & lui enuoya-on quelques preſens. Puis les aſſiegez commencerent à faire la guerre d'autre façon, car ils couroyent ſouuent iuſques à la fortereſſe de Benaltarin, taſchans par tous moyens de ſ'en rendre maîtres.

6. D V R A N T ces guerres & remuemens en Inde, le Pape Iule ſecond aſſigna vn Concile en la ville de Piſe. Les Rois d'Eſpagne & de Portugal traicterent enſemble par l'entremiſe de leurs ambassadeurs des affaires qui les concernoyent en commun, pour eſtre debatues & vuidees en ce Concile. Il ſuruint là deſſus vn fait d'importance que les ambassadeurs de ces deux princes deuoient deſmeſſer alors, tel que ſ'enſuit. En ce temps il y auoit vn gentilhomme au royaume de Caſtille, nommé Pierre, & ſurnommé le Baſlard, lequel auoit eſté eſtimé l'auteur de quelques differens ſuruenus apres letreſpas de la Roine Iſabelle entre le Roy Fernand & ſon gendre Philippe d'Autriche fils de l'Empereur Maximiliã. Or apres la mort de Philippe, ce gentilhomme tedoutât l'indignation de Fernand, ſe retira au royaume de Fez chez Barraxa (qui lors eſtoit en grande reputation parmi les Mores, à cauſe de ſes richesses & valeureux exploits) duquel il deuint familier amy. Or pour l'amour de Barraxa, qui en eſcriuit amplement, Fernand pardonna tout le paſſé à ce gentilhomme, lequel retourna en Eſpagne avec lettres de Barraxa adreſſantes au Roy. Le ſommaire de ces lettres exhortoit bien au long le Roy Fernand d'entreprendre la guerre au royaume de Fez, en quoy Barraxa promettoit ſ'employer à condition que le royaume de Fez luy fuſt donné, lequel il tiédroit en hommage du Roy d'Eſpagne, & lui en payeroit tribut à ſa volonté. Fernand print plaisir à telles lettres, ce ſembloit : & pourtant il enuoya incontinent ce gentilhomme vers Barraxa, avec inſtructions pour manier ceſt affaire. Pierre ſe transporta en la ville d'Alcaſſar Saguier, lors tenue par les Portugallois, & fut humainement recueilli par Roderic de Souſe qui en eſtoit gouuerneur. Icelui s'eſtât enquis pour quelle occaſion Pierre faiſoit ce voyage, il reſpôdit que par le rapport de quelques malvueillãs, & non pour faute qu'il euſt faite, le Roy Fernand lui vouloit mal de mort, & que pour ſe garantir il ſe retiroit au royaume de Fez. Roderic, ſeigneur fort auisé, deſcouurant quelque incôſtance es propos de

Eſtat des affaires de Portugal & d'Aſſique.

Pierre, & y soupçonant du mal, le retint avec soy iusques à ce qu'il trouua moyen de luy soustraire les lettres qu'il portoit à Barraxa, lesquelles il ourit, & en print copie, les ferma dextremēt, les remit où elles auoyēt esté prinſes, donna cōgé au porteur, & enuoya son extrait au Roy de Portugal, lequel fut fort indigné des desseins de celui d'Espagne, qu'cōtreuenoyent à l'accord fait entre eux touchant le partage des pays, par lequel le royaume de Fez estoit attribué au Roy de Portugal. Afin donc de destourner Fernād d'une telle entreprise, Emmanuel enuoya vn ambassadeur en Castille. Tandis Fernand armoit vne puissante flotte, sans dire à quoy il la vouloit employer, seulement que son intention estoit de faire la guerre aux ennemis de la Chrestienté. Enuiron le mesme temps le Pape Iulc manda à Fernand qu'il s'estoit ligué avec les Venitiés, les Suiſſes & l'empereur Maximilian contre le Roy Louys douzième. Que pour bien acheminer les affaires de ceste guerre il falloit que Fernand entraſt en la ligue. Pourtant il le prioit bien fort d'y vouloir entendre, autremēt il y auoit à craindre que le royaume de Naples ne lui fuſt enleué des mains. Fernand print peu de plaisir à telles nouuelles, toutesfois afin d'asseurer à soy le royaume de Naples, il se rangea à la ligue, & incita Emmanuel à en estre, qui n'y voulut aucunemēt entendre : au contraire estant lors auenu que six galeres Françoises aborderent à Liſbōne, Emmanuel fit bon acueil à leur general, & lui permit d'enleuer des viures pour sa flotte, dont Fernand fut grandement irrité, disoit-on. Mais la bonté & douceur de ces deux princes eſſaça avec le temps toutes ces offenses de part & d'autre. Quant à la flotte que Fernād auoit équipée pour la guerre de Fez, elle fut retenue à cause des troubles d'Italie, tellement qu'Emmanuel fut deliuré des penſées qui le travailloyent pour ce regard. En la mesme annee, Henri Roy d'Angleterre enuoya des ambassadeurs en Portugal, pour declairer la ſinguliere amitié qu'il portoit à Emmanuel, & pour renoueller l'ancienne alliance ſondée ſur le parentage & affinité de leurs deuanciers.

*Menees d'V-
retimutaraja
emprisonné &
decapité en
Malaca avec
son ſils & ſon
gendre.*

TANDIS que ce que deſſus ſe manioit en Europe, Albuquerque par vne ſentēce ſeuere eſtaignit des nouueaux troubles ſuruenus en Malaca. Il a eſté dit ci deuant que ce marchand nommé Vretimutaraja, allié d'Albuquerque, estoit fort riche : mais l'ambition acompagnoit tellement ſes moyens qu'il affectoit à ſe faire Roy. Mesmes auant qu'Albuquerque euſt conquis Malaca, icelui auoit dreſſé embuſches au Roy pour le debouter du throne, & s'y aſſeoir, à quoy toutesfois il n'auoit peu attaindre. Mais il recommença ſes menees du temps d'Albuquerque, eſperant venir plus aiſément au deſſus alors qu'auparauant : car il eſtimoit comme impoſſible que la ville peuſt eſtre gardée par des eſtrangers de ſi lointain pays, & ia tenoit, par vne grande eſperance ou vaine aſſurance qu'il s'estoit forgee, le ſceptre du royaume, ſoir qu'il s'appuyast ſur ſes grands biens, ſoit qu'il ſe confiast en la bonne affection qu'Albuquerque lui portoit, ſoit qu'il ſ'eſtimast aſſez habile hōme pour acheminer ſes deſſeins, comme il estoit couſtumier de ſe fonder ſur ſes propres diſcours. Or voyant qu'Albuquerque poliſſoit la ville, & reigloit l'eſtat & les charges publiques autre-
ment

ment que lui n'auoit penſé, & qu'on baſtiſſoit vne citadelle de ſi bõne forte que ce lui ſeroit choſe malaiſée d'eſfectuer ce qu'il machinoit en ſon eſprit, il conclud de recourir à d'autres artiſices. Nous auons dit au liure precedent que Mahumet Roy de Malaca mourut de regret, apres la priſe de ſa ville. Celui qui lui deuoit ſucceder par droit d'heritage, auoit eſté chaffé. Vtetimutaraja commence à negocier avec icelui par lettres & l'exhorter à prendre les armes, promettant de ſa part employer ſes richesses, ſes adheras & tous autres moyens pour chaffer les Portugallois. Telles menées ne pouuans qu'avec grande difficulté demeurer ſecrettes, ſur tout es lieux où chascun taſche ſ'inſinuer en la bonne grace du vainqueur, auint que les lettres enuoyees de part & d'autre tomberent es mains d'Albuquerque, lequel ne fit aucun ſemblant d'en ſauoir nouuelles, & n'en tint propos à homme viuant fors à Roderic d'Arauge. Or il deſiroit mettre la main ſur le collet d'Vtetimutaraja, ce qui ne ſe pouuoit faire à cauſe du grãd credit d'icelui, ſinon qu'on trouuaſt moyẽ de l'attirer dedãs la citadelle, où Vtetimutaraja ne vouloit aller en ſorte que ce fuſt: car outre ce que ſa meſchante conſcience le tenoit en perpetuelle crainte, il ſauoit bien que pluſieurs faiſoyẽt plaintes de ſes tyranniques deportemens aux oreilles d'Albuquerque. Il auint en ces entrefaites qu'un Perſan ſollicitoit Albuquerque pour obtenir quelque office, lequel fit reſponſe qu'il ne donneroit charge publique à aucun quel qu'il fuſt, ſans l'auis des principaux de la ville: leſquels il permettoit à ce Perſan faire venir, & que lors ſelon ce qu'eux auiferoyẽt, lui ſeroit tresvolontiers tout ce qui ſeroit de raiſon. Le Perſan qui eſtoit grand ami d'Vtetimutaraja, eſtimant que ſ'il le menoit vers Albuquerque ce ſeroit le moyen d'obtenir plus qu'il ne pretendoit, le tira ſans contredit avec ſon fils & ſon gendre participans de ſes conſeils iuſques dans la citadelle: où eux ſe transporterent aſſez volontairement, non tant pour faire plaiſir à ce ſolliciteur, que pour maintenir leur degré en ſe trouuant en vne telle aſſemblée. Mais ſi toſt qu'ils furent dedans on les arreſta prifonniers, & commença-on à faire leur proces, & leur assigner des auocats pour defendre leur cauſe. Les principaux articles, ſur leſquels leur emprifonnement fut fondé, eſtoyẽt: Que Vtetimutaraja auoit ſollicité l'heritier du feu Roy à redemander le royaume avec les armes, à ruiner la citadelle & tuer les Portugallois: deſtourné l'Amiral Laſamã du ſeruice qu'il deſiroit faire au Roy Emmanuel: que par ſon conſeil on auoit machiné la mort de Siqueire, & maſſacré indignement pluſieurs ſoldats d'icelui: que par ſes ruſes, aucuns d'iceux eſchapez du glauiue, & preſſez d'autres grandes miſeres, auoyent quitté le Chriſtianisme: que ſon fils & ſon gendre prifonniers avec lui, induits par ſon autorité, s'eſtoyent rendus compaignons & ſolliciteurs de la meſme trahiſon. Vtetimutaraja nioit quelques articles, mais il demouroit cõuaincu des autres par le teſmoignage de ſa propre main. Pourtant commença-il à ſ'humilier & demander pardon: mais eſtant entierement deſcouuert par teſmoins & indices tresſuffiſans, lui, ſon fils & ſon gendre furent condamnez à mort, & eurent les teſtes tranchees publiquement, leurs maiſons furent demolies & rafées, afin que toutes marques de telles gens fuſſent effacees, & que lon

n'en vist rien en Malaca. Ceste sentence mit Albuquerque en plus grande reputation que deuant entre ces peuples: car ils disoyēt que c'estoit vn personnage qui sauoit vaincre ses ennemis en guerre ouuerte, & en paix ruiner la tyrannie par bonne & roide iustice. Au reste, encor qu'ils fussent bien ioyeux de l'exécution d'Vtetimutaraja & de ses complices, toutesfois ils auoyent tous leur part de la peur, pensans qu'il ne falloit pas broncher deuant Albuquerque, qui releuoit si rudemēt les malauisez, sans se soucier de leurs richesses & grandeurs. La conspiration ayant esté ainsi estainte par le sang des traistres, Albuquerque resolut d'enuoyer aux isles nōmees Moluques, & fit equipper trois nauires dont Antoine d'Abrey eut charge, & partit de Malaca vers la fin du mois de Decembre, l'an mil cinq cens onze, prenant sa route sur le Leuant.

*Conspiration de
Patecatir suc-
cesseur d'Vre-
timutaraja co-
tre les Portu-
gallois & ce
qui en auut.*

Q V A N T à Albuquerque, pource qu'il auoit haste de reuenir en Goa, il g. bailla incontinent l'office d'Vtetimutaraja, a sauoir de iuger les differēs entre les Sarafins, à vn nommé Patecatir estimé le second en biens & autorité apres Vtetimutaraja. Ce nouveau iuge estoit ennemi d'Vtetimutaraja qui ne lui auoit pas voulu dōner sa fille à femme, quoy qu'il eust offert pour l'auoir. Estant entré en l'administration de sa charge, il attira à soy le cœur des Portugallois par vne certaine apparence de bonrē qu'on voyoit en lui. Or la vesue d'Vtetimutaraja desirant venger la mort de son mari, gaigna Patecatir en lui baillant en mariage sa fille qu'il aimoit extremement, & lui fit tant de promesses qu'il entreprit faire la guerre aux Portugallois: car ceste femme l'assura de lui fournir six mille bons soldats, avec lesquels, s'il estoit habile homme, il pourroit sans difficulté surprendre & exterminer les Portugallois. L'amour, l'auarice & l'ambition aueuglerent tellement Patecatir (qui esperoit desia aucunemēt attrapper les richesses du royaume en y employant toutes ses forces) qu'il condescendit aux prieres de sa belle mere. Et pourtant sans differer dauantage, apres auoir solennizé son mariage fort secrettement, il fit mettre le feu en vn quartier le plus habité de toute la ville, & tua plusieurs des habitans. Albuquerque prend incontinent les armes, court au deuant de cest estourdi, le chasse hors de Malaca. Lui se retire en vn lieu nommé Opia, assez pres de la ville, où il demouroit d'ordinaire, le fait fortifier de fosses, tranches & remparts, avec force artillerie & diuerses sortes de traits, engins & instrumens de guerre, donnant puis apres maints alarmes aux Malacans par les courses qu'il faisoit. Mais Albuquerque reprima si dextremēt l'audace de Patecatir, qu'en peu de iours il deuint sage à ses despēs & demeura coy sans plus tourmenter personne. En apres, d'autant qu'Albuquerque se vouloit embarquer, il establit Roderic Britio gouverneur de la ville & citadelle, Roderic d'Arauge thresorier, lui adioignant des secretaires & cōtroleurs, Fernand Andrade Amiral, Ninachetuen iuge des habitans qui n'estoyēt Mahumetistes, & qui appellent en leur langue ce iuge Xabandara. Il disposa les Sarafins en diuers quartiers, & commit vn surintendant en chascun pour y administrer iustice, commandant neantmoins à tous d'obeir à Britio. Ce pendant Zainal enuoya gens prier Albuquerque de lui pardonner sa faute, confessant que par desesper il s'estoit

estoit ainsi reuolté : car il ne pensoit pas, voyant mesmes les affaires prendre long trait, qu'Albuquerque peust s'emparer de Malaca avec la petite flotte. Qu'ayant veu la prouesse des Portugallois il n'estimoit qu'il y eust forteresse au monde qui ne fust ioug sous leurs armes. Il demandoit donc à Albuquerque pardon de tout le passé, & qu'il lui rendist sa main victorieuse, afin que rous entendissent qu'Albuquerque estoit aussi misericordieux qu'aspre & vaillant. Albuquerque lui promit la foy, & le fit venir en Malaca, où estant arriué il supplia derechef d'estre restabli en son royaume, & qu'Albuquerque lui promit faire, mais que le temps s'escouloit tellement que la rigueur de la mer l'arresteroit rour court s'il ne se mettoir à la voile: qu'apres auoir gaigné le port de Goa, & donné ordre aux affaires de la ville, il le remeneroit en son royaume Zainal estimant qu'on le voulust entretenir de paroles sortit secrettement de Malaca avec tout son train.

9. ALBUQUERQUE ayant laissé trois cens Portugallois dans la ville, en emmena deux cens autres, outre les soldats Indiens & quelques Malacans qui s'estoyent tousiours monstrez fideles, & fir voile du port de Malaca avec quatre nauires seulement. Or en cinglant au long de Zamatra, vne tourmente soudaine le contraignit ietter les anchres au premier port que les nauires peurent gagner. Mais les vagues iallissoyét de telle roideur & si haur, que l'on ne pouuoit asseurer la nauire capitaineisse quelques anchres que lon iettaist, si que donnant contre vn roc caché sous les ondes, elle s'outir, & la proue commença incontinent à puiser: la pouppe arrestee sur le roc se mōstrois au dessus, mais en telle sorte que la sentine estoit plaine d'eau, & tout ce qui y estoit fut englouti de la mer: quant aux hommes ils gaignerent le haut de la pouppe, mais ceux de la proue sentans qu'elle enfonçoit empoignerent des aix, & tonneaux, tellement qu'une partie se sauua au riuage de Pacé, les autres perirent. Il estoit nuict, & l'obscurité sembloit plus espaisse que de coustume: les tourbillons, orages, tonnerres, & fouldroyans esclairs estonnoyent tous ceux de la flotte qui ne pensoyent qu'à la mort, & avec vœux, prieres, cris en l'air, singlots & larmes demandoient misericorde pour leurs ames. Albuquerque voyant vn fort ieune garson prest d'estre noyé par les vagues qui entroyent à randon dans la nauire, le chargea & tint sur ses espaulles, iusques à ce qu'on fust venu au secours d'une autre nauire, & dit, l'innocēce de cest enfant m'asseurē que par la grace de Dieu i'eschapperay ce danger. Les choses estans en telle extremité, on detascha vn esquif de la nauire de Pierre Alpoeme, presider en la iustice des Indes, & à force de rames les matelots approcherēt d'Albuquerque & du reste de ses gens, lesquels ils amenerēt en la nauire d'Alpoeme. Gregoire Nonio Lion, capitaine d'une autre nauire, fut emporté au loin par la tourmente. Ceux qui estoient en la nauire de Simon Martin, où il n'y auoit que treize Portugallois (les autres estans de Iaue & Malaca) voyās ces treize desnuez de tout secours se ruerent sur eux & sur leur capitaine griefuement malade alors, & les tuerent. Quatre matelots ayans gaigné vn esquif se sauuerent au riuage de Pacem: & quant à la nauire elle fut poussée d'un tourbillon au port de Timiamen ville assise en ceste coste de Zamatra, où les vagues l'englouti-

Albuquerque part de Malaca: le danger auquel il fut reduit sur mer, & la perte qu'il fit.

rent. La tourmête appaisée Albuquerque reprint sa route: mais le nombre de gens emporté dans la nauire d'Alpoeme estoit grand, tellemēt qu'il y auoit faute de viures. Toutesfois ce qui les affligeoit le plus estoit la soif, dōt ils fussent morts tous, s'ils n'eussent conquis deux vaisseaux rencontrez à la bonne heure pour les Portugallois, & qui portoyent quantité de viures & d'eau douce. Simon Andrade fut establi capitaine de l'une avec quinze soldats, & Albuquerque retint avec soy le capitaine de ce vaisseau avec quelques Sarasins pour ostages. Vn Sarasin pilote de ce vaisseau dās lequel Andrade commandoit, se gouerna tellement que le vaisseau fut porté en vne des isles de Maldiuar pleine de soldats Calcutiens, qui eussent tué tous les Portugallois s'ils n'eussent craint qu'Albuquerque n'eust fait de mesme (cōme le droit de guerre l'eust porté) aux ostages qu'il auoit retenus. Finalement ceux qui peurēt eschapper, apres auoir souffert mille maux, arriuerent finalement en Cochim. Toutes les richesses cōquises en Malaca perirēt en la mer, dont toutesfois Albuquerque ne se soucioit, ains seulement estoit extremement marri de la perte de deux Lions de fer excellēmmēt elabourez, & du brasselet qui arrestoit le sang: car il auoit delibéré d'enuoyer cela avec autres presens au Roy Emmanuel.

*Les Portugal-
lois pillent la
terre pour en-
richir la mer.*

AYANT gagné le port de Cochim au commencement de Feurier l'an mil cinq cens & douze, & receu illec nouuelles des choses auenues en Goa, il despescha promptemēt huit brigantins chargez de gens de guerre pour entrer en l'isle, & ordonna Manuel Lacerde gouuerneur de la ville, l'assurant qu'en peu de iours il iroit le deliurer. Lacerde rescriuit tout soudain qu'il n'estoit besoin qu'Albuquerque se hastast: que la ville estoit bien munie: qu'il falloit attendre la flotte de Portugal, afin qu'avec plus grandes forces il peust se rendre maistre de la citadelle de Benastarin, autrement le viceroy n'auroit point d'honneur de prendre terre en l'isle, s'il n'amenoit tant de gens qu'il peust se rendre maistre de ceste citadelle. Albuquerque trouua bon cest auis, & ce pendant fit iustice des crimes commis par quelques Portugallois en son absence. Vne chose porta-il fort impatiemment, qu'aucuns (qui pour leurs meschancetez auoyent meritē le fouet) par leurs menées firent que Simon Rangel qui les reprenoit de leurs excès fut banni, puis saisi en chemin par les Sarasins qui l'auoyent mené prisonnier en Arabie. En ce temps Pierre Mascaregne, qui estoit parti de Lisbonne avec Garfie Norogne, print port en Cochim, & assēura que Norogne arriueroit bien tost avec le reste de la flotte. Dauantage suruint vn ambassadeur du plus puissant Roy de toutes les isles de Maldiuar, & pria Albuquerque de receuoir ce Roy en sa protection, d'autant qu'il vouloit estre vassal d'Emmanuel, & ne faillir à lui payer tribut tous les ans. Ceste promesse & alliance fut ratifiée avec les ceremonies acoustumées en tel cas, & commandement fait à vn Sarasin nommé Mamelles, qui s'estoit enparé de quelques vnes de ces isles, d'en sortir incontinent, ce qu'il fit sans autre formation.

*Naissance de
Henri Prince,
& encor au-
jourd'hui Car-*

TEL estoit l'estat des Indes, & au mesme temps, auaoir au commencement du mois de Feurier, la Roine Marie acoucha d'un fils ressemblant du tout à Emmanuel, qui fut nommé Henri. Le mesme iour que ce Prince naquit

naquit il cheut de la neige en abondance dedans Lisbonne, ce qui est comme monstrueux en ceste ville là qui est en vn air fort temperé. Plusieurs interpreterent que cela presageoit la candeur d'esprit, la pureté & continence de vie, & la vertu qui reluiroit abondamment & d'une façon miraculeuse en ce prince. Mais sans nous arrester aux presages, c'est chose certaine que le royaume de Portugal est appuyé sur la preud'homme, vertu, religion, constance & bons exemples de ce prince à present Cardinal.

11. M A I S pour reuenir à l'estat des Indes, apres qu'Albuquerque fust parti de Malaca, les habitans de la ville tant Mahumetistes que autres idolatres qui tenoyent le parti des Portugallois alloient & venoyent sans sauoir où, tant la peur les auoit troublez : car ils pensoient estre perdus, n'ayans plus Albuquerque avec eux. Pour les estonner encores dauantage, vn bruit courut que Lasaman approchoit avec grand nombre de vaisseaux pour combattre les Portugallois : tellement qu'Andrade fut d'avis d'aller au deuant pour lui empescher l'entree du haure. Patecatir qui descouuroit tout par le moyen de ses espions, entendât qu'Andrade estoit hors du port & cingloit en haute mer pour donner bataille à Lasaman, entra de huit dans la ville, & surprint vne barque en laquelle commandoit Alфонse Chiaigne vaillant ieune homme lequel fut tué en combatant, & ses soldats emmenez prisonniers. Il y auoit dans ceste barque vne grosse piece d'artillerie, nommee le Chameau, que Patecatir enleua & fit emporter en autre endroit. Andrade n'ayât point trouué la flotte de Lasaman, retourne au port, & delibere donner l'assaut au fort de Patecatir : & pour cest effect il enuoye Alфонse Personne avec mil cinq cens Indiens & quelques Portugallois pour prendre terre & costoyer le riuage, afin d'embesongner Patecatir en mesme instant par mer & par terre. Quant à Andrade il entra dans le canal par le moyen de la maree avec des barquerolles & esquifs, commandant à George Botel qui vogueoit le premier d'assaillir viuement les ennemis : lui suiuit Botel incontinent. Alфонse Personne au mesme instant courut au combat : tellement que le fort fut prins, la garnison mise en fuite, & grand nombre d'ennemis tuez. On y trouua vn gros tronc de bois arrousé de sang fraichement espandu : car le canonniier qui auoit charge du Chameau, ayant esté emmené prisonnier avec les autres Portugallois, fut pressé de tourner sa piece & tirer contre Andrade, avec menace de le faire mourir s'il differoit : mais il refusa de tirer, aimant mieux perdre la vie qued'offenser Dieu & blesser ainsi sa conscience. Ce refus despita tellement Patecatir qu'il fit tout sur l'heure couper la teste au canonniier sur ce tronc de bois. Or tandis que les vns s'amusoient au pillage, les autres à trainer le Chameau. & autres pieces dedas les nauires, les autres à mettre le feu dans le fort, on descourut vne troupe de quatre cens Sarafins bien equippez avec trois grands elephans, chascun desquels portoit vne tourelle garnie de vingt archers. George Botel estant plus pres de ceste troupe que les autres capitaines, donna dedas le premier avec sa compagnie, exhortât ses soldats de faire place au premier elephant, & frapper le conducteur d'icelui. Eux ayans laissé large à la beste, s'adresserent à celui qui la gouuernoit, & à coups de picques dōnez de toutes parts

Guerre & diverses rencontres de Patecatir & des Portugallois en Malaca

le tuerent & ietterent bas. L'elephant destitué de guide s'arresta tout court: alors le canonier de l'esquif de George Botel, frappa d'un boulet cest elephant au cœur, & le fit broncher incontinent par terre. Les autres effroyez du bruit s'enfuyet, & les Sarafins apres. Il y auoit sur la riuere des vaisseaux chargez de marchandise, qui furent pillez tout à l'heure, & les Portugallois retournerent victorieux dans la ville. Patecatir s'estant ellongné à deux lieues de là, fortifia vn autre lieu plus cōmode de nature, & y mit plus grosse garnison qu'es autres endroits. Andrade l'alla assaillir en cel lieu, entra de force & mit le feu au premier corps de garde, & voulāt faucher les trois autres, il se vid sur les bras vne telle multitude de gens enuoyee par celui qui se nommoit Roy de Malaca, que lui & les siens furent contrains reculer. En ceste charge Andrade perdit douze de sa cōpagnie, entre autres Roderic d'Arauge, Christofle Mascaregne, George Garcez, & Antoine d'Azeuede: & fut blessé lui mesme avec Pierre de Far & plusieurs autres.

CESTE victoire haussa tellement le cœur à Patecatir, qu'il commença à dōner esperance certaine au prince qui aspiroit au royaume de Malaca, de l'en rendre bien tost paisible seigneur. Ce prince manda incontinent à Lasaman qu'avec la flotte qu'il auoit toute preste il se ioignist aux vaisseaux du Roy de Darguim (royaume limitrophe de celui de Malaca vers le Midi) lequel lui donnoit secours contre les Portugallois, & assiegeast le port de Malaca. Andrade ayāt descouuert que Lasaman avec sa flotte estoit à l'emboucheure d'une riuere nommee Muar, y vogua en diligence & assaillit Lasamā. Ceste bataille fut tresfapre & dura deux iours, en fin desquels les Portugallois demurerent maistres, les ennemis ayans esté contrains se sauuer apres grosse perte d'hommes & de vaisseaux. En ce mesme temps trois nauires chargees de soldats, de viures & munitions de guerre, & de charpentiers, enuoyees par Albuquerque, aborderent en Malaca, où il y auoit grande disette de viures, à quoy Andrade voulant pouruoir fit voile au goulfe de Cincapur qui separe la terre ferme de bout du royaume vers Midi, & conquit vn grand vaisseau de Patecatir bien garni de victuaille: puis estant de retour en Malaca enuoya Loup d'Azeuede & George Botel au mesme endroit, d'où ils amenerent trois autres vaisseaux de Patecatir tous chargez de viures. Item, George Gomeze de Cugne se rendit au port de Malaca avec vne nauire plaine aussi de viures tirez du royaume de Pegu, le Roy duquel auoit traité paix & alliance avecques Albuquerque. En ces entrefaites arriua semblablement Antoine Mirande, venant de visiter le Roy de Siam, qui l'auoit caressé & honoré de fort riches presents. Roderic Britio ne voulant perdre l'occasion qui se presentoit de faire vn bon coup, arma des nauires & les commit à Andrade, afin de ruiner entierement Patecatir qui commēçoit à baisser l'aile, & ne sauoit où se tourner, pour la necessité qui le pressoit, depuis la prinse de ses viures & munitions. Andrade & les autres capitaines se disposerent incontinent au combat, dont la pointe fut baillée à George Botel & à Pierre Personne, lesquels donnans de pied & de teste dedans le premier fort des ennemis, dont la plupart fut taillee en pieces, en faucherent deux autres

confe-

consequemment , & contraignirent les autres se sauuer de vifteffe. En ce combat Francois Machiade tua vn elephant, & en print on vn autre qui fut emmené en Malaca: deux autres eschapperent. Patecatir du tout abatu de ce coups'enfuit es isles de laue avec sa famille & ses biens. Le pretendu Roy de Malaca fit sa retraite en vne autre isle vers l'Orient nommee Bintam. Quant à Lafaman, n'ayant plus enuie de s'attaquer aux Portugallois il leur laissa la mer libre. Andrade reuint en la ville & deliura les habitans de toute fascherie & sollicitude. En mesme temps Antoinne d'Abrey retourna aussi en Malaca, n'ayant peu descouurir entierement les isles vers lesquelles Albuquerque l'auoit enuoyé, à cause d'une tourmente. Ce nonobstant il fut porté en vne isle appelée Amboin assez prochaine des Molucques, où il chargea quelque quantité de cloux de girofle. De là il fit voile es isles de Bandan, situées en nombre de cinq vers le midi: où croissent en abondance les arbres qui portent les noix muscades, & dit on que ces arbres ressemblent fort aux lauriers, & que les fleurs d'iceux approchent de la forme & couleur de celles du pefchier. Le peuple est lourd & farouche: ils contraignent le Roy de quitter sa dignité quand bon leur semble, & établissent vn conseil des plus anciens pour gouverner les affaires, diuersifiâs ainsi leur estat public. Francisque Serran fut aussi chassé d'une bourasque en vne isle des Molucques nommee Ternate, & y fit naufrage: toutesfois le Roy de ceste isle le receut avec bon visage & lui fit beaucoup de presens.

12. T A N D I S que ces choses passoyent es pays si proches de l'Orient, Albuquerque diligétoit de faire ses apprests pour la guerre. Alors Garfie Norogne, qui auoit hyuerné en Mozambique, comme dit a esté, suruint. Deux autres capitaines, auaoir George Melio Pereire & Garfie de Soufe, partis de Lisbonne en la mesme année, & ayans eu vent à souhait arriuerent aussi avec vne flotte de douze nauires, chargées de deux mille Portugallois & dauantage. Albuquerque arma lors seize nauires, & desmara du port de Cochim. Pierre Mascaregne, qui auoit ia esté établi en charge de capitaine de la citadelle de Cochim, protesta qu'il ne souffriroit iamais que ceste guerre se fist en son absence, & pressa tant que sa capitainerie fut baillee à vn autre, & lui monta es nauires. En ceste course Albuquerque commit George Melio pour garder la forteresse de Cananor, & par bonne iustice appaisa les dissensions suruenues entre les Portugallois & les marchans Sarasins habitans en Cananor: puis estant pres de Batticala il enuoya dire au gouuerneur de la ville, que sachant pour certain qu'en ce port estoit arriué vn vaisseau de Calcut chargé de poyure appartenant au Sarasin qui auoit acheté Simon Rangel, il lui commandoit de la liurer promptement: à quoy le gouuerneur obeit sans aucun delay, tellement que le vaisseau fut mené en Cochim. Alors vn Iuif apporta lettres des Portugallois (qui ayans esté separez par vne tourmente de la flotte de Edouard de Leme, avec leur capitaine George Quadre, firent naufrage, & gagnans le bord à toute peine furent arrestez par des Sarasins) lesquels contenoient que le Sultan d'Egypte faisoit bastir vn fort à l'emboucheure de la mer Arabique, & auoit delibéré se rendre maistre de la ville d'Aden. Estans au dessus d'Onor vn au-

Nouvelle flotte de Portugal en Inde, & deuert apprests de guerre contre Albuquerque.

tre luiſſa apporſa les meſmes nouuelles, adiouſtât qu'Albuquerque pouuoit ſans aucune difficulté ſ'emparer d'Aden, auant que l'armee du Sultân y peuſt venir à temps: que les habitans ſ'eſtoient reuoltez, & craignoyēt de retomber en ſes mains, tellement qu'ils ſ'aſſuiettiroient beaucoup plus volontiers à la domination des Portugallois qui les traitoyent doucement, qu'à la tyrannie du Sultân. Melras vint auſſi trouuer Albuquerque, & l'auertit que Zabaim dreſſoit vne armee de vingt mil hōmes, afin de fortifier Benaltarin & le rendre impreuable: qu'il ſe falloit donc haſter auât que ceſte armee ſe ioigniſt aux troupes qui tenoyent la ville.

*Guerre de
Goa, & quelle
en fut l'issue.*

C'EST auertiſſement fut cauſe qu'Albuquerque, ſans diſſerer dauanta-¹³ ge print la route de Goa, & avec ſa flotte aſſiegea Benaltarin. Ceux de la ville canonnoient furieusement les nauires, & entre autres pieces qui nuiſoyēt fort aux Portugallois ils ſe ſeruyent d'une nōmee le Chameau. Mais par l'adreſſe d'un canonnier qui tira d'une autre piece appellee la Sphere, le boulet dōna dedâs la bouche du Chameau ſi à point qu'il fut tout ſoudain brifé & les Portugallois deliurez de la peur qu'il leur faiſoit. Albuquerque deſcēdit en terre pour aller en la ville de Goa, afin d'amener les forces qui y eſtoient, & enclorre ceux de Benaltarin du coſté de terre, pour les ſerrer dauantage. Rozalcam ſachant cela, le ſuiuit avec deux cens cinquante cheuaux & grand nombre de gens de pied: mais Pierre Maſcaregne, Garſie Norogne, Manuel Lacerde, Loup Vaſque de ſainct Pelage, Jean Fidalgue & Roderic Gonſalue Camigne lui allerent au deuant, & ſe donnerent bataille, en laquelle Rozalcam eut du pire, tellemēt que lui & les ſiens mis en fuite furēt pourſuiuis ſi roidement iuſques aux portes de Benaltarin que les Portugallois taſcherent de gagner la muraille en montât ſur les bouts des picques & halebardes. Vaſque de ſainct Pelage & Pierre Maſcaregne acquirēt l'honneur de ceſte iournee. Ceux de la ville repouſſoyent l'aſſaut à coup de traits de toutes ſortes, tellement qu'ils tuerent quelques aſſaillans & en bleſſerent pluſieurs. Manuel Lacerde receut tel coup de pierre qu'il cheut bas de ſon cheual, & euſt eſté tué ſi Jean Decio ne l'eueſt ſecouru tout à l'heure. Et ſans Albuquerque qui retira ſes gens des murailles, cōtremont leſquelles ils grimpoient comme enragez, les Portugallois euſſent perdu beaucoup dauantage des leurs en ceſt aſſaut: car on ne les pouuoit retenir qu'ils ne montaſſent les vns apres les autres, comme dit a eſté, pour entrer dedans la fortereſſe. Albuquerque, eſtant retourné en Goa, mit aux champs toutes ſes troupes au bout de quelques iours, n'y laiſſant ſinon certaines compagnies ſuffiſantes pour garder la ville. Il auoit lors trois mille Portugallois, & parmi eux quelques bandes d'Indiens. L'artillerie marchoit deuant, avec des machines & engins propres pour l'acommoder, bref Albuquerque auoit tout l'attirail & equippage propre pour aſſieger & aſſaillir vne place. S'eſtans campez ils commencerent à battre la ville & fortereſſe tant par mer que par terre. Mais ils n'auancoyēt pas beaucoup, car la ville eſtoit cloſe de murailles fortes & eſpaïſſes, de pluſieurs bouleuarts, dont les aſſiegez tiroient iour & nuit & tuoient pluſieurs des aſſaillans. Or tant plus les Portugallois ſ'obſtinoyent, plus le danger croiſſoit pour eux, & tous leurs efforts

efforts tournoyent en fumee. Il n'y auoit que la famine qui fist la guerre & pressast fort les assiegez, d'autant qu'Albuquerque auoit donné bon ordre de leur couppet les viures de tous costez, faisant garder soigneusement toutes les auenues: tellement que les assiegez estans en grand nombre auoyent mangé les viures qu'on auoit serré es magazins. Rozalcam contraint par ceste necessité voulut essayer si par vne ^{faulx} il se pourroit afranchir de ce siege: & sur les trois heures apres minuit fit sortir quelques compagnies bien equippees avec les plus vaillans capitaines: lui se tint à la porte pour enuoyer gens de renfort. Ces troupes donnerent viuement dedas le corps de garde de Manuel de Souze lequel fut blessé en combatant, & ses soldats contrains reculer: par ainsi les autres poursuuiuent & entrent en vn autre corps de garde de Garfie Norogné qui acouroit au secours de Manuel. La famine & la rage possedoit tellement les troupes de Rozalcam que Norogné fut chassé plus loin. Pierre Mascaregne approcha lors avec des compagnies bien resolues, rassembla les Portugallois escartez, arrestant tout court les poursuuians: alors le confliet fut si furieux, qu'au lieu de combattre avec les harquebouzes & picques, ils se ioignirent de si pres qu'à coups d'espees & de poignards, voire mesmes en se ruant au col les vus des autres pour lutter, chascū taschoit de vaincre son ennemi. Toutesfois les assiegez, ne se sentans assez forts pour passer outre, se retirerent à sauueté dedans la ville. Albuquerque fit vn fossé plus large, & fortifia bien sa trêchee mieux qu'au parauant, afin que ses ennemis ne peussent plus faire telles sorties: par ainsi l'extreme necessité les contraignit de demander composition, qui leur fut ottroyee aux conditions qui s'ensuiuent. Que les assiegez liureroient à Albuquerque tous les Chrestiens qui s'en estoient fuis vers eux & qui auoyent renoncé le Christianisme: ensemble deux nauires par eux princes en entrât dedans l'isle, en vne descente nommee Noroez: item qu'ils quitteroient la ville & forteresse de Benastarin, avec les cheuaux armes & artillerie qui y estoit, & tous les vaisseaux anchrez en l'isle. Albuquerque promit sur la foy qu'ils se pourroyent retirer avec tous leurs biens, & qu'il ne feroit point mourir les Portugallois qui auoyent abiuré leur religion. Ceste composition fut fidelement obseruee de part & d'autre, tellement que les ennemis deslogerent & passerent en terre ferme: les Portugallois prindrent possession de Benastarin, & Albuquerque retourna dans la ville de Goa. Les Portugallois qui s'estoyent rangez au Mahumetisme ne furent point executez à mort, mais afin que personne n'entreprinist à l'auenir d'auoir le cœur si lasche, il les traita de telle sorte que chascun en fut autant esmeu que si ces miserables eussent esté retranchez du monde: car il leur fit couper à tous les narines, les oreilles, les mains droites, & les poulces des mains gauches. Du nombre d'iceux estoit Fernand Lopez, duquel a esté faite mention ailleurs: icelui ayant esté depuis laissé en l'isle de sainte Helaine par les nauires qui reuenoyent en Portugal, peupla ceste isle de graines d'herbes potageres & medecinales, & d'arbres, par vne adresse & sagesse si remarquable, qu'aujourd'hui les Portugallois à leur retour des Indes allans faire aiguade en ceste isle y sont merueilleusement soulagez. Tout ce que dessus executé, Al-

*Benastarin ré
du à Albu-
querque & cō-
més il chassia
les Portuga-
lois deuenus
Mahumeti-
stes.*

buquerque enuoya Norogne en Cochim pour equipper & tenir preste la flotte qui deuoit reuenir en Portugal, & puis costoyer toute la lisiere de Calcut, afin qu'il ne partist aucū vaisseau hors du goulfe de la mer Arabique, sans estre incontinēt arresté. Il dōna charge d'autres nauires à Garfie de Sou se pour contraindre tous les marchāds venans de Perse avec des cheuaux de venir mouiller l'ancre au port de Goa. Ceux qui y arriuoient estoient humainement recueillis, & leur rabbatoit on quelque chose du peage: au moyen dequoy les marchans deschargeoyent fort volontiers en Goa leurs cheuaux & autres marchandises, qui fit que les reuenus de la douanne encherirent au proufit du Roy Emmanuel.

*Negotiation
d'Albuquerque
avec plu-
sieurs Rois &
Princes à l'a-
uantage des
affaires de Por-
tugal.*

Il y a vne region maritime limitrophe du pays de Zabaim, nommee ^{14.} Vengapor. Le Roy d'icelle enuoya vn ambassadeur vers Albuquerque demander la paix: car le nom de ce capitaine estoit tant estimé par toutes les Indes, que plusieurs pour l'amour de lui desiroient estre suiets du Roy de Portugal, afin que sa protection les garantist de la tyrannie des autres Princes. Cest ambassadeur presenta de la part de son Roy à Albuquerque des felles, colliers, bardes & housses de cheuaux. Sa legation ne contenoit autre chose qu'une declaration du grand desir que ce Prince disoit auoir d'estre ami des Portugallois, auxquels il offroit bailler des viures, & si besoin estoit faire la guerre à Zabaim, brief n'omettre chose quelcōque du deuoir d'hōme fidele & bien affectionné au seruice du Roy de Portugal. Seulement il requeroit lui estre permis d'acheter & tirer tous les ans de Goa le nombre de trois cens cheuaux. Ce qu'il demanda lui fut accordé & l'ambassadeur renuoyé honnorablement vers son maistre. Gaspar Chanoque, qui auoit fait desia vn voyage vers le Roy de Narsingue, y fut renuoyé par Albuquerque avec riches presens, pour lui demander au nom d'Emmanuel vne ville nommee Batticala size en la coste de Malabar, laquelle commence en Cananor & se termine au cap de Cori. Or Batticala appartenoit au royaume de Narsingue, & combien que le terroir soit sterile, & le haure assez mal asseuré, toutesfois vne garnison seruoit bien en ce lieu aux Portugallois pour accomoder leurs affaires. Enuiron le mesme temps Zabaim Dalcam despescha deux ambassadeurs pour prier Albuquerque de pacifier, & lui permettre d'acheter des cheuaux en Goa pour s'en seruir es guerres qu'il auoit contre les nations voisines: ce qui lui fut accordé, & Iacques Fernand de Far esleu pour aller vers lui ratifier sous certaines conditions alliance de paix & d'amitié. Melichiaz manda aussi vn de ses domestiques avec vne nauire chargee de viures & diuers fruits à Albuquerque, pour lui gratifier de la prinse de Malaca, & declarer par vne longue harâgue que Melichiaz demeureroit tousiours humble & obeissant seruiteur d'Albuquerque, lequel de sa part remercia Melichiaz, fit quelques presens à son homme, & recompensa Melichiaz de ses viures par autres riches dons qu'il lui enuoya. Semblablement il donna congé & honnora de ioyaux de grand pris l'ambassadeur du Roy de Cambaje, lequel auoit ramené les Portugallois prisonniers.

Ambassade de

ALBUQUERQUE fut alors auerti que l'ambassade enuoyé par 15.
l'Empe-

l'Empereur d'Ethiopie au Roy de Portugal auoit esté constitué prisonnier par le gouuerneur de Dabul : ce qu'ayant sceu estre certain il manda par homme expres à ce gouuerneur qu'il eust à relascher promptement l'ambassadeur, à quoy l'autre obeit sans aucun delay, & l'ambassadeur améné en Goa, où il fut receu en grande soleinnité, notamment par les prestres Portugallois qui lui allerent au deuât en procession, car il portoit vne croix faite du propre bois sur lequel Iesus Christ createur & sauueur du gêne humain auoit esté crucifié, de laquelle cest Empereur faisoit present au Roy Emmanuel. Tous se monstroyent fort ioyeux de voir en des pays tant éloignez de l'Europe l'ambassadeur d'un Prince Chrestien : ce qui les assureoit qu'un iour lon pourroit voir le Christianisme restabli par tout le monde. Albuquerque renuoya aussi alors un autre ambassadeur qui l'estoit venu trouuer avec lettres & instructions de la part du Roy d'Ormuz. En ces entrefaictes Garfie Norogne executa sa commission, & apres auoir équipé les nauires qui deuoyent partir pour Portugal courut soigneusement toute la mer de Calecut. Naubeadarim heritier du royaume, lequel portoit bonne affection aux Portugallois, cōme dit a esté ci deuant, escriuit à Norogne que, s'il plaisoit à Albuquerque, lui moyēeroit un bon accord entre le Roy son oncle & les Portugallois, & feroit qu'il leur seroit permis de bastir vne citadelle en Calecut. Albuquerque ayant entendu ces nouuelles de Norogne en fut fort ioyeux : car il deliberoit faire voile en la mer Arabique, & pourtāt desiroit laisser les affaires paisibles & bien dressées es Indes. La paix fut faite, & la citadelle commēcée en un lieu où auoit autresfois esté le palais royal, assailli par Albuquerque le premier. Or l'an mil cinq cens treize, 1513. au mois de Mars Albuquerque fit voile de Goa avec sa flotte pour entter en la mer d'Arabie, dequoy nous parlerons au long ci apres.

16. E N ceste mesme annee Barraxa & Almandarin, sortis des limites des villes qu'ils tenoyent en la coste de Barbarie, firent des courses sur les Mores pensionnaires du Roy de Portugal, bruslerent les bleds, & passans iusques au territoire d'Arzile le fourragerent, puis s'auancerent iusques autour de Tingi. Edouard de Menefez, qui en estoit gouuerneur, assemble les capitaines pour auiser à ce qui estoit de faire. Cepēdant les ennemis, qui couroyēt ça & là, mettent le feu aux bleds qui estoient encores en gerbe. La flamme allumee en diuerſes grāges estoit si grande de nuit mesmes que de dessus les murailles de Tingi on voyoit les troupes de Mores marchans par la campagne. Ceux de la ville se tenans sur leurs gardes courent aux armes & pouruoyent à tout ce qui estoit requis pour soustenir un assaut ou un siege. Menefez auoit enuoyé à la descouuerte, & des le point du iour se trouue à cheual aux portes avec ses troupes attendāt le rapport de ses espions, qui dirent que les ennemis s'estoyent arresteſz derriere des costaux, où ils auoyent posé leurs sentinelles, & qu'ils sembloient estre en grād nombre tāt à pied qu'à cheual : que ce ne seroit pas un acte de sage capitaine d'aller avec si petite troupe apres des gens assurez à cause leur multritude & enhardis par tant d'exploits. Alors Menefez menoit seulement deux cens cheuaux & trois cens hommes de pied, neantmoins il resolut passer outre, & ayant gai-

l'Empereur d'Ethiopie en Portugal, & paix faise avec le Roy de Calecut.

Etat des affaires d'Afrique, & diuerſes courſes des Mores desſus par Edouard de Menefez.

gné le dessus d'un costau descourir les ennemis, marquant de l'œil au plus pres qu'il lui fut possible le nombre d'iceux. Ils reculent pour tirer Menefez plus loin de la ville, & Menefez avec les siens marchent apres au petit pas. Apres que les Mores eurent fait environ vne lieue ils s'arrestèrent, & commécerent à huer d'estrange façon. Lors Barraxa dit, Il ne faut point tât crier, mais faut frapper à bon escient: ces gens que vous voyez ne s'estonnent point de huees: c'est en la force du bras, non point au bruit de la bouche, qu'il faut loger & chercher la victoire. Le desire voir maintenât des hommes qui ne crient point en l'air, ains qui chatgent viuement l'ennemi. Cela dit il desbande avec les plus asseurez de ses troupes, & donne à toute bride dans le premier escadron des Portugallois conduits par Pierre Leitan qui menoit soixante cheuaux, & auoit esté enuoyé deuant de nuit. Il soustint ceste premiere charge, mais lui & les siens auoyent trop de gés sur les bras. Pour cela Menefez (qui se fioit grandement au bon sens & en la prouesse de Leitan, & n'estimoit qu'il falut secourir tels gens d'armes sinon au grand besoin, & que les choses n'estoyent pas à l'extremité) ne s'auaçoit qu'au pas, voulât donner à trauers les rangs à demi rompus desia par le combat. Ainsi donc apperceuant l'heure propre, il commanda aux pietons de courir sus aux ennemis sur l'un des flancs, lui chargea brusquement sur l'autre. Ceste meslee fut tres-aspre l'espace d'une heure, en fin de laquelle les Mores commençans à se lasser, & les Portugallois ayans plus de courage qu'au commencement, les Mores commencent à fuir. Almandarin, qui auant la bataille s'estoit moqué de Barraxa, lequel auoit predit qu'il ne faloit point penser vaincre ceste poignée de Portugallois par huees, mais à coups de main, pour verifier le dire de son compagnon se sauua des premiers avec cét cheuaux. Leitan le suiuit, & l'eust attrappé viu, ou tué, si les gens de cheual ne se fussent trop amusez à tailler en pieces les pietons Mores, quoy que Leitan taschast de les attirer apres soy en la poursuite. Barraxa fit vn merueilleux deuoir ceste iournee là: toutes fois voyant les gens estonnez de la lascheté d'Almandarin il commença à reculer, en telle sorte neantmoins qu'il marchoit tousiours en rang. Menefez le suiuit six lieues loin: mais finalement Barraxa fit gaigner à ses tronpes vne montagne par vn sentier estroit, & lors Menefez fit sonner la retraite pour ramasser les soldats qui tuoient les Mores çà & là. Il en demeura ce iour sur le champ plus de six cens, & y en eut deux cens quarante prins prisonniers, entre autres le capitaine du premier escadron d'Almandarin, le guidon de Barraxa, & plusieurs gentilshommes, sans les estendarts, pauillons, & grand butin que les victorieux emporterent. Barraxa fut ce iour bien pres du bout de sa vie, car il tomba de son cheual en terre: mais tout soudain vn de la compagnie lui amena vn autre cheual frais, & par ce moyen il eschappa. Menefez y perdit quatre hommes, & remena vingttrois blesez, puis estant rentré dedans Tingi alla droit au temple avec ses troupes, & rendit graces à Dieu, par la puissance & benediction duquel il auoit obtenu vne si belle victoire.

Mores voisins fussent tributaires du Roy de Portugal, auquel ils auoyent *fin & l'issue d'elle.* obligé leur foy, toutesfois ils refusoient payer, estans sollicités à se rebeller ainsi par quelques Princes qui leur soustenoyent le menton : qui pis est ils persecutoient à toute outrance les autres Mores qui ne leur vouloyent pas ressembler. Ainsi les Portugallois estoient contrains pour dompter ces rebelles, où pour garantir ceux qui perseueroient en leur fidelité de faire diuerses courses. En ceste année donc Nonio Fernand Ataïde enuoya Loup Barrigue brabe gentilhomme & capitaine des cheuaux legers en vn lieu eslongné de Safin enuiron vingt lieues, nommé Dabide, pour secourir les habitans contre ceux de Xiatime qui leur faisoient la guerre. Dabide est située sur vn costau regardant Xiatime, pres d'une riuier qu'ils appellent Aguz. Ceux de Xiatime estoient les plus forts à cause de leur nombre, & faisoient mille maux à leurs voisins, dōt Barrigue les sceut bien chastier alors. S'estant retiré, les Xiatimiens entendirēt que Iehabétasuf avec sest rouples alloit par les chasteaux recueillir les tributs que lon deuoit au Roy de Portugal. Ils appellēt incōtinent à leur aide huit cēs cheuaux, avec lesquels ils s'assurēt de desfaire Iehabétasuf & les siēs qui n'estoyēt que huit vingts en tout logez pour lors en vn fort nommé Mirabelle. Ayant sceu que les Xiatimiens approchoient, il enuoya querir quelques soldats de Dabide, & quoy qu'il eust beaucoup moins de gens, chargea si resoluemēt les Xiatimiens qu'il les mit en route, & les poursuuiuit, ayant tué quelques vns d'eux, & prins prisonniers deux des principaux. En contreschāge vn des premiers de Dabide, nommé Acum, s'acharnant trop à la poursuite des fuyards & eslongné de ses gens fut prins & emmené par ceux de Xiatime. Le nombre des morts en ceste rencontre fut petit, d'autant que les Arabes qui demeurent en Mauritanie sont si auares que pour argent ils sauuent la vie à leurs ennemis, afin de s'enrichir par les rançons qu'ils en tirent, & mesmes font gloire par dessus tous autres d'auoir prins beaucoup de prisonniers en guerre. Or toute ceste efmeute print fin par eschange des prisonniers & renouuellement de l'ancienne alliance : par ainsi le Roy de Portugal fut entierement payé des tributs qui lui appartenoyent. Apres cela Ataïde despescha Barrigue & Iehabentafuf pour aller en vn village nommé Azeze assis au pied de la montagne de Fer, & y chastier quelques rebelles. Ils partēt de nuict & sur le point du iour faucent les barricades & defenses du village, tueut quelques ennemis, en prenent aucuns prisonniers, tandis que les autres gagnent viftement le haut de la montagne. Les victorieux s'en retournent chargez de pillage, & rentrent sains & saufs dedans Safin. Derechef estant auenu que les habitans d'une ville nommee Tazarot liguez avec ceux d'Azeze vindrent courir es enuirs de Safin, Ataïde sortit avec ses troupes en campagne, mit ces coureurs à vau de route, en tua quelques vns, & fit sa retraite sans auoir rien perdu.

18. C E pendant Louys fils de Iean de Meneses seigneur de Tarauce & Aluar Norogne suiuis chascun de cent cheuaux arriuerent à Safin, où le Roy les auoit enuoyez en garnison, avec commandement toutesfois d'obeir alaigrement à Ataïde en tout ce qu'il leur commanderoit. Ataïde voulant

Guerre d'Al-medue: les notables exploits & la fin d'icelle.

exercer ces ieunes gentilshommes, afin qu'ils peussent acquerir quelque honneur auant que retourner en Portugal, delibera les mener en Almedine. C'est vne ville fort peulee & ceinte de murailles: le peuple y est adonné au labourage & à la nourriture du bestail, au moyen dequoy le pays abonde en grains & chaires, & viuent les habitans vn peu plus delicatement que les Arabes qui demeurent au mesme pays. La ville estoit diuisee en deux factions, dont l'une tenoit le parti du Roy de Portugal, l'autre du Roy de Fez, & chascune auoit des chefs: neantmoins tous deuoient tribut selon l'alliance par eux iuree. Alors les partisans du Roy de Fez estoient les plus forts à cause d'une garnison qu'ils auoyent introduite en la ville: qui faisoit que les vns volontairement, les autres par crainte, ne payoyent plus le tribut. Or Ataide suiui de quatre cens cheuaux & d'une compagnie de gens de pied partit de Safin, & sur la pointe du iour se trouua pres des portes d'Almedine. Les ennemis auoyent esté auertis de sa venue par leurs espions, & estoient lors au nombre de six cens hommes de cheual & mille pietons gens de fait, bien armez & resolu au combat. Ataide pensoit les surprétre, & pource estant pres des murailles il fit deux bandes, dont il commit l'une à Aluar Norogne, avec charge de gagner la porte qui meine à Maroch, & retint l'autre pour soy & pour Louys de Menefez, afin de donner à la porte opposite. Les ennemis ouurent eux mesmes les portes & presentérent le combat aux Portugallois. Il fut donc questiō de iouer des cousteaux, où les vns & les autres monstrentent tout ce qu'ils sauoyent faire. Ataide & les siens reculèrent premierement, puis reprenans courage plus que iamais chargerent viuement leurs ennemis: mais combien que la partie eust esté debatue l'espace de plusieurs heures, si ne pouuoit-on coniecturer qui gagneroit. En fin les vns & les autres quitterent le combat volontairement: si que ceux d'Almedine se retirerent dans leur ville ayans perdu vingt homes, & Ataide remena ses gens diminués de trois: mais il y eut grand nombre de blesez des deux partis. Ce nonobstāt Ataide impatient & qui ne pouuoit arrester en place, s'aidant du silence de la nuict delibera de resueiller quelques compagnies campees pres d'Almedine: toutesfois entendant qu'il estoit descouuert & attendu, il se retira quoy qu'il eust desia fait vne bonne parrie du chemin. Au reste, vn Arabe de sa conoissance le vint trouuer, & lui rapporta que le Roy de Maroch tenoit le passage par lequel Ataide deuoit repasser pour le desfaire & se saisir de sa personne. Ataide respondit que ces nouuelles lui estoient tresagreables, & donna quelque chose à cest espion pour sa peine: puis lui dit, le te prie va diré au Roy que ie l'attédray en campagne aujourdhui tout le iour. Mais le passage demeura ouuert, soit que le Roy ne voulust pas venir aux mains, soit qu'il dressast quelque autre entreprise plus commode pour le bien de ses affaires, soit que l'Arabe eust controuué ce rapport: & le Roy s'en alla droit en vne contree qu'on nomme Duecala, & traita vneligue avec vn Prince seigneur des montagnes de ce quartier, afin de joindre leurs forces pour faire teste aux Portugallois. Ataide ayant perdu beaucoup de temps à attendre, entra finalement en la ville avec ses troupes enuiron la minuiet. Presque en ce mesme temps Nonio Masca-

Mascaregne entra dedans Safin acompagné de cent cheuaux : Louys de Menefez & Aluar Norogne furent rappelez en Portugal. Il y auoit lors en ce lieu plus de sept cens hommes de cheual, avec lesquels Ataide battoit les chemins, & attaquoit souuent les ennemis qui ne le pouuoient empêcher d'exiger des tributaires ce qu'ils deuoyent au Roy Emmanuel.

OR comme Ataide desiroit sauoir ce que faisoient les ennemis camppez à six lieues de là, Barrigue s'offrit de les aller reconoistre, & estant monté à cheual avec trente autres par le congé d'Ataide il partit de nuit, & approcha du camp des ennemis comme le iour commençoit à poindre, tua six homes, print quatre prisonniers, executant le tout de telle viflesse, qu'auant que les ennemis se peussent mettre en ordre pour le poursuiure, il se retira sain & sauf. Ataide sceut des prisonniers la deliberation des ennemis, l'ordre des cōpagnies, & avec quelles forces ils vouloyent cōbatre. Qui fut cause que le lendemain il enuoya deuant Barrigue avec cent cinquante cheuaux, suivi de Nonio Mascaregne & de sa compagnie, afin de dresser vne embusche en lieu propre. Ataide marchoit apres avec le reste des forces. Barrigue enuoyé pour escarmoucher surprint les ennemis, en tua cinq, print quatorze prisonniers & emmena force bestail. Tout le camp commença à courir aux armes, les Mores estans despités iusques au bout des algarades de Barrigue qui se glissoit si dextrement parmi eux, puis eschappoit de leurs mains. Tout incontinent donc delmarcherent quatre cens cheuaux qui chargent Barrigue, lequel se retiroit au pas iusques à l'approcher du lieu où Mascaregne estoit embusché. Alors il tourne bride avec ses gens, & Mascaregne sort de l'embusche : puis ils viennent aux mains, avec telle hardiesse & resolution de part & d'autre, qu'on tient que depuis la prise de Safin il n'y a eu récontre en ce pays où pour vn si petit nombre de gens les armes ayent esté plus valeureusement maniees qu'en ceste ci. Car les Mores combatoyent en rang sans se troubler ni desbander: les Portugallois laissez du chemin les soustenoyent de grand courage, & n'y auoit personne qui tournast le dos. Plusieurs furēt blesséz & iettez par terre, mais tous resterent en vie. Finalement les Portugallois commencerent à reculer, iusques à ce qu'ils eurent à dos Ataide qui venoit au secours: au moyen dequoy les Mores s'arresterent. Ataide ne voulut passer outre, voyāt les compagnies de Barrigue & Mascaregne si harassees que rien plus : il craignoit aussi que du camp des ennemis ne suruinist renfort aux autres par le moyen dequoy luy & les siens seroyent acablez. Pourtant laissa-il le butin, afin de marcher mieux en ordre, & se retira dedans sa ville. Quelques iours apres ceux d'Almedine firēt vne course sur les terres de Safin, & s'embuscherēt en deux endroits: mais Ataide les ayant descouverts sortit sur eux, & y eut aspre conflict, en fin duquel les Mores furent rompus & s'enfuirent, laissant quarante huit des leurs sur la place. Ils en eussent perdu dauantage, sans la bōté de leurs esperons & la viflesse de leurs cheuaux, ioint aussi qu'Ataide (qui perdit trois hommes) ne voulut permettre qu'on les poursuiuist, de peur que les siens en s'amusant à tuer çà & là ne fussent enuoloppez de quelque embuscade. Il y auoit sept cens Arabes à cheual qui couroyent par les

Suive de la guerre d'Almedine, avec diverses courtes de part & d'autre.

champs deuant la ville & faisoient le gäst, qui se retirerent tout soudain. Ataïde voyant à leur contenance qu'ils ne pensoient nullement qu'on les deust charger enuoya apres eux Barrigue suivi de huit vingts hommes choisis, & par vne autre porte Nonio. Ceste vaillant capitaine avec vne autre compagnie pour assaillir de tous costez ces coureurs. Nonio chargea le premier, & en ceste meslee les Portugallois se trouuerent en grand danger à cause de la multitude & fureur des Arabes: mais Barrigue & les siens suruindrent si à point que leurs compagnons reprindrent courage, & firent reculer les ennemis, puis les rechargerent si rudemēt qu'ils mirent tout à vau de route, les chasserent deux lieues loin, en occirent grand nombre. Barrigue retourna en la ville avec les principales despoilles, car il tua de sa main le general des ennemis, estimé l'un des plus vaillans de l'Afrique, en telle sorte que ceste victoire lui cousta bien cher, ayant esté griefuement blessé en plusieurs endroits de son corps: mais l'honneur de sa victoire amortissoit la douleur de ses blessures. Ce general s'appelloit Iahomazende. Barrigue gaigna le cheual & trancha la teste de Iahomazende, laquelle il apporta, entrant sur ce cheual dans Safin. La teste fut fichée au bout d'une picque, & plantée sur l'une des portes de la ville. Quelque somme d'argēt que les Arabes voulussent donner pour ceste teste, Ataïde ne la leur voulut iamais rendre. En fin, les Mores habitans d'une contree qu'ils appellent Xerquie, n'en pouuans plus, & ne voyans ressource quelconque en leurs affaires, demanderent la paix à Ataïde, & entre autres conditions, que la teste de Iahomazende leur fust rendue pour l'enterrer, car il estoit grandement respecté de tous les Arabes pour ses beaux exploits en guerre, & n'y auoit pas un des siés qui ne l'estimast par dessus tous autres. Ataïde leur accorda cela, tellement que la paix fut incōtinēt conclue. Les autres Mores incitez par l'exēple de ceux de Xerquie, priērēt Ataïde de pacifier, ce qu'il fit par l'entremise de Iehabētāfuf qui moyēnoit de part & d'autre. Ils ne furēt point cotisēz à plus grosse taille qu'auparauāt: & par ces accords la guerre fut assopie, & toute ceste estēdue de pays assuiettie de rechef au Roy de Portugal avec tribut raisonnable. De ces Mores avec lesquels Ataïdes estoit accordé il en soul doya bō nōbre, afin de faire la guerre d'ordinaire au Roy de Maroch & au Xerif capitaine general des coureurs Arabes de l'Afrique, & par eux estimé pour l'opinion qu'ils auoyent de sa prouesse. Le nom d'Ataïde effroyoit tellement ces deux Princes qu'ils ne pensoyēt iamais trouuer retraite asseuree.

*Guerre contre
le Roy de
Maroch.*

OR quand Ataïde se vid à deliure de ces affaires que les guerres susmen- 19.
tionnees lui auoyent donnez, il delibera s'employer du tout à courir sus au Roy de Maroch & au Xerif: pourtant commanda il à Barrigue d'entrer au royaume de Maroch pour y faire la guerre avec cent cinquante cheuaux Portugallois & le renfort des Arabes confederez qui marchoyent sous la charge de Iehabētāfuf. Mais auant que parler de leurs exploits il faut descrire ce qui auint quelque temps auparauant. Huit iours apres le combat entre Barrigue & Mascaregne contre les quatre cens cheuaux Mores, dont mention a esté faite au chapitre precedent, Ataïde sceut que le Roy de Maroch s'estoit remué & campé au promontoire de Cantim assez pres du lieu où

où le combat susmentionné s'estoit donné. Sur le soir, tandis que le Roy souppoit, Ataïde surprint deux compagnies & saisit les gendarmes d'icelles prisonniers, mit tout le camp en alarme & en grand trouble, puis se retira au grand pas. Les Mores courent apres & l'assaillēt à coups de fleches, de dards & de harquebuzades : mais sur tout il y auoit telle gresle de cailloux d'un costau, (comme aussi leur camp estoit ainsi disposé) que depuis ce lieu là fut nommé le iect des pierres. Nonobstant cela les Portugallois se retirerēt avec leur proye, & furent suivis de pres par les Mores toute la nuict. Ataïde les ayant soustenus vaillamment plusieurs fois rentra sain & sauf avec ses troupes & bon butin dedans la ville. Il y auoit plus de trois cēs prisonniers, grand nombre de chevaux & quelques chameaux. Le Roy gagna vn autre endroit plus fort pour s'y camper, à sauoir vne haute montagne nommée Idenat, au pied duquel se void vne campagne, estroite à cause de quelques costaux estais à l'entree, & qui s'elargit puis apres. Il assit donc son camp en ces destroits : ce qu'Ataïde ayant descouuert monta à cheual vne nuict avec cinq cens hommes, & le regimen de Ichabentafuf, courut au camp des ennemis, les surprint & mit en tel desarroy, que combien que les vns empoignassent ce qui se presentoit à leurs mains pour se defendre, toutes-fois la peur les auoit tellement troublez qu'ils quitterent tout pour se sauuer de vifesse. Le Roy mesme n'attendit pas que son cheual fust prest, ains monta sur le premier rencontré, & s'enfuit à bride abatuë. Il y eut force gēs tuez au camp, grand butin pour les victorieux, & sur tout vne grosse troupe d'hōmes & de femmes emmenez pour estre esclaves. Entre les prisonniers il y en eut vne tresbelle, concubine du Roy, laquelle il aimoit ardemment. Quelques Portugallois furent blesez, notamment Ataïde receut vn coup au visage. Voila ce qui auint alors. Mais pour reuenir à Barrigue, estāt logé avec Ichabentafuf en vn village nommé Duam à vingt quatre lieues de Safin, il entendit qu'en vne assez large campagne nommée Alehauz au pied du mont Atlas, lequel ceux du pays appellent auourd'hui Montes Claros, y auoit neuf compagnies d'ennemis. Ces nouuelles firent diligenter tellement Barrigue, Ichabentafuf & les autres capitaines, qu'ils surprindrent ces neuf compagnies, taillerent presque tout en pieces, tellemēt qu'il en demeura mille estendus sur la campagne, prindrent cent cinquante prisonniers & firent vn merueilleux butin ceste iournee. Passans oultre ils entrerent en la contree de Xiatime, tuerent nombre d'ennemis, & emmenerent cent prisonniers. Le Xerif y vint avec puissantes troupes pour se rēdre seigneur du pays à force d'armes. Plusieurs gens à cheual de son camp vindrent charger Barrigue, lequel auoit receu cent chevaux qu'on lui auoit enuoyez de renfort. Il y eut assez aspre meslee, sans pouuoir conoistre qui emporteroit la victoire. Trois Portugallois & vn Arabe y demurerent : les ennemis perdirent vingt cinq des leurs, entre autres le fils d'un certain seigneur, & voyans qu'ils ne gagneroyent pas beaucoup, ils s'en retournerent en leur camp, sans estre suivis de Barrigue qui craignoit vne plus pelante recharge. Quelques iours apres Barrigue fit vne autre course iusques aux portes d'une ville du territoire de Xiatime nommée Tanli. Les habitans

qui se voyoyent en extreme danger apporterent sur les murailles & mirēt le feu en vne infinité d'exaims d'abeilles dōt le pays est riche: tellement que les Portugallois brullez du feu & picquez viuement de ces mouches furent contrains se retirer, & y en eut qui receurent des coups de main, afin qu'ils ne se plaignissent pas d'auoir esté chassēz par les mouches seulement: Barrigue fut du nōbre. Au mesme tēps Nonio de Cugne fut enuoyé en Safin avec vne compagnie de cent cheuaux, & Mascaregne rappellé en Portugal.

I l y a en la coste de Barbarie tirant vers Safin vne ville nommee Aguz, laquelle auoit esté gardee par vn capitaine Portugallois avec cinquāte archers. Barrigue & Iehabentafuf s'y refraischissans avec leurs troupes receuerēt nouuelles que le Roy de Maroch approchoit avec vne puissāte armee: ce qu'on fit sauoir à Ataide, lequel enuoya promptemēt au secours de ceux d'Aguz Nonio de Cugne. Lors comme quelques vns des ennemis vouloyent donner sur la queue des Portugallois, ils furent repoussēz, & lvn d'eux prins prisonnier, puis enuoyé par Barrigue à Ataide, lequel s'enquerāt de ce que le Roy de Maroch deliberoit faire, fut afiné par ce More qui lui imprima des opiuiōs au cerueau, iusques à lui faire penser que Iehabentafuf vouloit trahir ses confederez: tellement qu'il manda à Barrigue que promptement il fist r'entrer tous les Portugallois en la ville, & demeurast en campagne avec soixante cheuaux seulement, puis trouuaſt quelque pretexte par le moyen dequoy lon estimast qu'il auroit eu iuste occasion de se separer d'avec Iehabentafuf. Barrigue executa ce qui lui estoit cōmandé, & premieremēt renuoya tous les autres, puis dresse (comme dit le prouerbe) vne querelle d'Aleman, & fait si bien du courroucé qu'il sembloit n'auoir peu autrement faire pour son honneur sinon laisser Iehabentafuf à part. Roderic de Castre ne le voulut point abandonner ains lui tint compagnie avec trois seruiteurs. Iehabentafuf bien marri d'estre delaissé au besoin par les Portugallois, fut encor' plus indigné de ce qu'on l'estimoit autre que sa fidelité & ses seruices ne monstroyent, portāt ce tort plus impatiemment que le danger auquel on l'exposoit. Pourtant escriuit-il des lettres par lesquelles il se plaignoit d'vn si grand outrage: protestant toutesfois qu'avec ses troupes il doneroit bataille ce mesme iour au Roy de Maroch, afin que par vne victoire memorable ou par vne mort honneste il fist connoistre à tout le monde combien il auoit esté loyal seruiteur du Roy Emmanuel. Ataide esmeu en lisant telles lettres, rescriuit qu'il lui enuoyeroit incontinent cinq cens cheuaux. Mais quand le porteur, suivi de douze cheuaux seulement, arriua, Iehabentafuf estoit delia meslé dedans l'armee du Roy de Maroch. Ceste bataille fut cruelle entre plusieurs autres, mais Iehabentafuf & ses gens firent merueilles à ceste fois, car ils mirent les ennemis en route, & taillerent en pieces vn fort grand nombre, gaignerent le camp du Roy, & poursuiuirent tellement les fuyards que la pluspart de ceste armee fut tuee par les chāps. Il y eut vn riche butin, car les pauillons estoient garnis de toutes choses requises à la guerre. Le lendemain Ataide suiuit sa promesse enuoya au secours Barrigue & de Cugne avec cinq cens cheuaux: mais auāt leur venue Iehabentafuf auoit ia obtenu la victoire, dont Ataide

*Iehabentafuf
s'opposoit à tort
de trahison, ga-
gne une belle
victoire, sans
Ataide, en qui
lon void com-
me les grands
sont suets à se
laisser trōper
par faulx rap-
ports & bien
loirde ment
quelques fois.*

de fut extremement despit  , de ce qu'une bataille si remarquable s'estoit donnee sans que lui ni pas vn capitaine Portugallois s'y fussent trouuez : & plusieurs taxerent sa legeret   d'auoir ainsi adioust   foy au rapport d'un babillard & tr  peur, iusques l   de ne faire c  science d'abandonner son compaignon en si gr  de necessit  , & se faire estimer periure & homme sans foy. Peu de iours apres Ataide enuoya Barrigue vers vn autre plac   du gouuernement de Xiaticime o   estoient les ennemis, lesquels furent viuement assaillis, & se defendirent de mesmes, tellement que deux gentilhommes & quelques autres Portugallois demurerent sur le champ : mais en fin la place fut prinse, vne partie des ennemis taillee en pieces, aucuns prins prisonniers, les autres eschapperent    bien courir.

10. L'AN mil cinq cens onze le Roy de Fez ayant entendu que Tingi n'estoit pas munie de grosse garnison, & mesmes qu'on la gardoit assez laschement, estima s'en pouuoir ais  ment emparer, s'il l'assailloit au despourueu. Pourtant dressa-il vne puissante armee pour y aller. Mais il y trouua beaucoup plus de resist  ce qu'il ne pensoit. Neantmoins il se campa, tint le siege quelques iours, & fit tous ses efforts d'entrer dedans : toutesfois il fut tousiours repouss   avec grande perte & c  fusion. Or l'annee suiuant, voulant recouurer son honneur il amena son armee pres d'Arzile o   il se campa, & comme ses troupes fussent desc  dues au foss  , ceux de dedans les y allerent attaquer, de telle sorte que Bernard Coutin courant la lance baiss  e c  ntre Adel chef des Mores, lui donna dans la visiere, & lui creua vn   il. Jacques frere de Francisque Coutin Conte de Marialbe fut tu   en c  batant vaillamment. Le nombre des morts de part & d'autre ne fut pas grand, & le Roy voyant que c'estoit temps perdu de s'arrester dauantage    ce siege, se retira chez soy sans autre exploit.

21. QUANT au Roy de Portugal, combi   qu'il eust l'esprit tousiours tendu aux affaires d'Afrique, si pensoit-il aussi    vne autre guerre, de laquelle il receuroit non moindre honneur que des autres. C'estoit vn prince fort desireux d'auancer sa religion, & abatre par armes spirituelles toutes fortresses de superstition contraire. Pourtant il donnoit ordre que les Indiens & Ethiopi  s idolatres fussent induits    embrasser le Christianisme par les enseignemens & exemples de gens religieux. Entre autres, apperceu  t que ce royaume d'Ethiopie nom   Congo auoit ou   quelque peu parler de Chrestient   des le t  ps du Roy Iean second, il s'estudia d'amener ceste   uvre    perfecti  . Pourt  t, c  me dit    est   au troisi  me liure, il auoit enuoy   en ce royaume quelques prestres des plus deuotieux de Portugal, afin d'ap  tre quelque chose du christianisme aux pauures superstitieux qui n'auoyent encor est   baptis  z, & pour instruire vn peu plus au  t ceux qui s'appelloy  t Chrestiens. Enuiron ce t  ps donc il enuoya vn chevalier gentilhomme de sa maison vers le Roy de Congo, & nouveau renfort de prestres, avec leurs chappes, chasubles, surpells, estolles & autre tel equippage pour chanter messe, & attirer dauantage    la religion Romaine ce Roy de Congo, lequel incit   par la b  ne affection que Emmanuel lui monstro  t, enuoya en Portugal son fils nom   Henri avec son frere & quelques ieunes gentilhom-

*Entreprises
du Roy de
Fez sur Tingi
& Arzile, &
le succ  s d'icelles.*

Estat du royaume de Congo en Ethiopie.

mes, pour apredre les langues Portugalloise & Latine, & estre instruits plus auant es ceremonies de la religion qu'il auoit nouuellement receue. Auec eux arriua vn ambassadeur nommé Pierre, homme fort prudent, & qui deuisoit souuentefois auec Emmanuel. Iceui desirant seiourner en Portugal amena quant & soy sa femme, à laquelle la Roine Marie fit beaucoup de presens. Emmanuel, voulant en toute douceur planter sa religiō en ce royaume, commir le frere & le fils du Roy de Congo auec les autres ieunes gentilshommes à des prestres & moines sauans pour leur enseigner le Latin & les facons de faire obseruees en l'eglise Romaine. Puis enuoya vn gentilhomme nommé Simon de Sylues vers le Roy de Congo auec quelques presens, a sauoir des mules & cheuaux brauement harnachez & caparallonnez, des beneiftiers, tableaux de peinture, mittres & semblables paremens pour l'exercice de leur religion: item quelques charpentiers pour bastir des temples & des palais au Roy. Il donna aussi toute autorité à Sylues de retenir en deuoir les Portugallois habitans en ceste partie d'Ethiopie; & si besoyn estoit, punir leurs malefices: dauantage aider au Roy de Congo à administrer iustice à tous les peuples de son Royaume. Pour executer cela plus commodement Sylues mena vn Iurisconsulte quant & soy, suiuant la requeste que le Roy de Congo en auoit faite à celui de Portugal. Outreplus Sylues eut charge que si pendāt son seiour en Ethiopie suruenoit quelque esmotion de guerre, il aidast le Roy de moyens, de conseil & de force: & sur tout l'admōnestast d'enuoyer ambassadeurs à Rome pour reconoistre la puissance & l'autorité du Pape & de l'Eglise Romaine sur les affaires de la religion. Et dautāt que l'ambassadeur nommé Pierre, qui seiournoit en Portugal, sembloit homme fort auisē, Emmanuel estoit d'auis qu'icelui eust entre autres ceste commission, & qu'on deputast quelques gentilshommes pour l'accompagner iusques à Rome, où le Roy de Portugal promettoit le faire conduire & l'en ramener à ses despens. Il prioit aussi celui de Congo d'enuoyer quelques ieunes enfans, des meilleures maisons de son royaume, en Portugal pour estre enseignez auec les autres. De Sylues s'embarquant auec ceste charge, eurent vent à souhait & arriua au royaume de Congo, dont le Roy monstra semblant d'estre fort ioyeux, & promptement despescha vn sien parent des principaux de la cour pour bienueignier Sylues, & l'amener en la ville où le Roy seiournoit, fort loin de la mer, puis lui bailler logis commode. Sylues ayant esté atteint d'une fieure en ce voyage mourut auant que voir le Roy, qui fut grandement contristē de cest accident. Aluar Lopez Amiral de ceste flotte succeda à Simon de Sylues, comme Emmanuel l'auoit ordonné auant qu'ils s'embarquassent, au cas qu'icelui de Sylues decedast auant qu'auoir executē sa commission. Les lettres que Lopez presenta au Roy de Congo ne contenoient sinō vne declaratiō de pietē & de bōne volonté d'Emmanuel auec creāce à ce que Sylues diroit. Iceles ayans esté leues Lopez adiousta quelque chose de bouche pour l'esclaircissement d'icelles & fit desployer en presence du Roy les presens qu'il auoit charge de lui offrir. Ce Roy mania chascune piece l'une apres l'autre, s'estōnant de les voir, prisant beaucoup telles besongnes, & en leuant les mains

au ciel remercia Dieu qui l'auoit tiré des tenebres de superstition pour lui faire voir sa lumiere par le moyē de deux Rois si accomplis en toute vertus : & qu'il se sentoit merueilleusement obligé à Emmanuel qui ne s'estoit pas contenté de lui faire ce bien tant excellent, mais aussi vouloit combler les biens faits passez par autres dons de nouveau. Or d'autant qu'Emmanuel lui enuoyoit les armoiries qu'il deuoit porter de là en auant pour tesmoignage de sa vertu, & pour l'ornement de toute sa posterité, il fit vn edit de cela pour faire sauoir à tous & rendre notoire à iamais l'institution de ces armoiries & que signifioit ceste beneficence royale. En cest edit il racontoit au long comme par l'entremise du Roy Iean le pays de Congo auoit esté appellé à la Religion Chrestienne, & deliuré de la tyrannie du diable, & avec quels artifices cest œuvre tant excellent auoit esté retardé par les ruses de ce vieil serpent qui auoit esté cause de faire chasser nos premiers peres hors de l'heureux seiour où ils estoient. Avec quel soin estude & vigilance Emmanuel Roy inuincible s'estoit parforcé de paracheuer ce que son predecesseur auoit commencé. Il faisoit puis apres vn sommaire du christianisme, puis racontoit par quel moyen son pere miserablement seduit par des garnemens execrables s'estoit meschamment reuolté de la foy Chrestienne dont il auoit fait profession pour quelque tēps, & traité fort rudement son fils aîné Alfonse (qui estoit le Roy parlant en cest edit) pource qu'il refusoit ensuiure ceste reuolte. Apres cela il discouroit sur ce que son pere l'auoit banni, & les fascheries alaigrement portees en son exil pour le nom de Christ: item comme ainsi que son pere mouroit, lui acompagné de trēte six hommes seulement, à l'aide de Christ souuentefois inuouqué, il estoit entré au combat cōtre son frere qui taschoit à grand tort s'emparer du royaume, & qui menoit vne puissante armee : & en quelle maniere, non point avec le bras humain, mais par la force de Dieu, comme les ennemis mesmes le cōfessoient, la guerre auoit esté paracheuee, son frere prins prisonnier comme par miracle, & iustement puni de sa meschanceté desesperée. Puis apres il declairoit pourquoy son cousin Pierre l'vn des trēte six susmentionnez combatans pour lui estoit son ambassadeur en Portugal, & qu'il entendoit par les lettres d'icelui que par le commandement d'Emmanuel on faisoit prieres par tout son royaume pour le salut du Roy & du royaume de Congo, tesmoignage excellent d'vne extreme & ardante charité. Que considerant ces choses il estoit prest de souffrir toutes incommoditez voire la mort mesme pour la religion Chrestienne, pour les lieux saincts & pour les commandemēs de l'Eglise: puis aussi s'exposer à tous hazards pour maintenir la grandeur du Roy Emmanuel. Il adioustoit encores ces mots: Mais afin que ce bon Roy, digne de gloire immortelle, nous obligeast de plus en plus à foy, il nous a enuoyé vn de ses gentilshommes avec dons & ornemens qui monstrent assez la bonne affection qu'il nous porte. Et d'autant que c'est la coustume des Rois Chrestiens de porter des armoiries pour faire conoistre eux & leur race, & illuster leurs maiestez: ce mesme Roy à voulu nous fauoriser & honnorer grandement en cela, nous ayant enuoyé vne escusson marqué du signe de la croix, afin qu'ayons souuenance de la vi-

En celuy discours le lecteur verra vrayement comme sous ombre de deuotion les Portugais ont mis le pied en diuers lieux, pour y faire aller de maistres & de leurs gneres souverains spécialement en Congo se serui de la force des armes & de diuerses ruses ailleurs.

être obtenue par l'Empereur Constantin apres auoir veu le signe de la
 croix au ciel, & que le souuenir d'une semblable victoire à nous donnée de
 Dieu ne s'effaçast iamais de nostre memoire. Et d'autant que l'Apostre
 saint Jacques patron des Espagnols a esté souuent inuocqué par nous du-
 rant le combat, & qu'il est apparu au grand effroy de nos ennemis, le Roy
 Emmanuel a voulu que la figure fust depainte es mesmes armoiries. Dau-
 tage, pour sceller par vn notable tesmoignage l'amitié que nous auons l'un
 avec l'autre il a meslé ses armoiries (qui ont cinq petis escussions disposez
 en forme de croix) avec les nostres. Ces cinq escussions representent les
 playes dont Iesus Christ a esté nauré en la croix pour le salut du genre hu-
 main: car lors que le Roy Alphonse premier du nom fust prest de donner ba-
 taille à cinq Rois payens entrez dans le royaume de Portugal, en regardant
 vers le ciel d'où il attédoit secours il vid des yeux de l'esprit & du corps vne
 semblance de Iesus Christ avec ses playes, ce qui l'encouragea de telle sor-
 te qu'il tua sur le champ vn nombre infini de ses ennemis, & pour souuenir
 ce à la posterité de ceste belle victoire, il print icelles armoiries, lesquelles
 nous ont esté enuoyees afin d'admonester nos successeurs qu'en toutes
 leurs guerres ils s'appuyent sur l'assistance de Iesus Christ, & non sur le bras
 humain. Nous remercions infiniment nostre trescher frere le Roy Emma-
 nuel pour tant de biens faits excellents, & outre ce que nous le reconnoissons
 nostre frere & protecteur, nous sommes prests aussi d'employer nos biens
 & nostre vie pour son seruice. Et quand nous aurions fait tout ce qui est pos-
 sible, encores ne pourrions reconnoistre comme il appartient le moindre des
 biens dont nous lui sommes redevables. Il reste donc, puis que ne pouuons
 rendre la pareille, qu'il plaise à l'eternel Roy des Rois, en l'honneur duquel
 Emmanuel entreprend des choses si grandes & si belles, lui en donner vne
 recompense diuine & perpetuelle. Nous adiurons & admonestons nos
 enfans & successeurs, & suiuant nostre autorité leur commandons de por-
 ter ces armoiries, en orner leurs boucliers, en faire les seaux de leurs lettres
 & leurs estendarts, & se ramenteuoir tousiours ce qui est designé par icel-
 les, afin que cela les entretenant en l'amour de pieté & de iustice, à l'aide de
 Iesus Christ ils emportent la victoire de leurs ennemis. Or d'autant que la
 coustume est que les valeureux faits d'armes soyent anoblis, & que les ho-
 mes qui par leurs merites sont montez en degre d'honneur mostrent à leur
 posterité les marques de leur vertu, le mesme Roy Emmanuel nous a en-
 uoyé d'autres escussions & marques de noblesse pour en honorer la race
 des trente six qui se sont portez vaillamment en la bataille, où, à l'aide de
 Dieu, nous auons brisé l'effort de nostre frere: afin que plusieurs soyent in-
 citez à aimer la vertu par vn tel tesmoignage d'icelle, & que non seulemēt
 nous ayons de quoy resister aux ennemis qui nous courent sus en ce mode,
 ains aussi qu'en la vie auenir nous puissions iouir des biens perdurables à
 iamais. Par ces lettres affichees par tout, & dont copie fut enuoyee à tous
 les grāds du royaume, ce Roy voulut monstrier combien il se sentoit obli-
 gé enuers Emmanuel. Puis suiuant l'exhortation d'icelui il deputa Pierre a-
 uec douze gentilshommes pour aller en ambassade vers le Pape, & enuoya
 à Em-

à Emmanuel grande quantité d'yuoire & autres prefens dont Congo abonde : & fit embarquer avec Pierre douze enfans de noble maison, pour estre esleuez & instruits en Portugal comme les autres qui y estoient venus auparavant. Pierre estant arriué en Portugal, Emmanuel commanda qu'on lui fournist amplement, ensemble à Henri fils du Roy de Congo, & aux autres gentilshommes deputez, tout ce qui estoit requis pour faire leur voyage. Ils furent les bien venus à Rome & benignement receus du Pape & des Cardinaux, puis presenterent les lettres de leur Roy, lequel declairoit que premieremēt par l'adresse du Roy lean second, lui & son royaume auoyēt esté deliurez de la tyrannie du diable, & des tenebres de superstition : puis auancez au christianisme par la bonne volonté du Roy Emmanuel qui n'y auoit rien espargné, tellement qu'il apperceuoit mieux que iamais la laderrie dont il auoit esté infecté, & detestoit plus que deuant sa superstition & folie passées : promettant rendre graces à Dieu pour vne telle grace par le moyē de laquelle il estoit si heureux, & auoit esté esleué en son degre Roy par des miracles manifestes : item qu'il auroit tousiours bonne souuenance de ceste diuine faueur. Mais ayant oui dire que Iesus Christ auoit vn grand vicaire au monde, à qui tous les Princes faisoient hommage, & aux mandemens duquel ils s'affluētissoient comme à ceux de Dieu mesme, lui ne se voulāt pas separer de ce rang, ni eslongner de la deuotion des autres, auoit deliberé enuoyer à Rome son fils Henri desia instruit aux saintes lettres en Portugal, & son cousin Pierre, en la fidelité & pieté duquel il se repositoit, afin qu'en son nom ils baissassent la pantoufle du Pape, & lui offrisent tout le royaume de Congo pour en disposer à son plaisir : promettant de là en apres se monstrier si obeissant fils du siege Romain, que nul autre Prince Chrestien ne le deuanceroit en bonne affection. Le reste estoit vne priere que lon adioustast foy à ses ambassadeurs, & quelque requeste touchant certaines choses appartenantes au fait de la Religion. Ces ambassadeurs furent gracieusement receus, & leur accorda-on ce qu'ils demandoient. Le Pape & ses Cardinaux consideroyent que ceste nation barbare, eslongnee de toute ciuilité & humanité, n'auoit peu quitter sa premiere superstition pour embrasser la religion Romaine, que par vne singuliere faueur de Dieu, & partant qu'il falloit receuoir avec actions de graces ces nouuelles premices d'Ethiopie, qui se presentoyent apres vn si grand laps de temps. Voila ce que le Roy de Portugal designa & executa pour establir sa religion en Ethiopie. Mais enuiron le mesme temps, Pierre de Meneses seigneur d'Alcoutin, & Prince de ville Real, passa la mer, estant enuoyé gouverneur dās la ville de Septe, afin de manier les affaires de la guerre aussi vaillamment & heureusement que ses predecesseurs.

22. P O V R reuenir à l'estat des Indes, apres qu'Albuquerque s'en fust allé de Malaca, les affaires au lieu d'y estre paisibles s'enagrirēt & se disposerēt si mal que les troubles recommencerent plus que iamais. Or afin d'en traicter plus claiement, il faut dire en premier lieu quelque mot de la situation de quelques isles qui se preparoyent à la guerre contre les Malacans. La Ta-
probane, qu'ils appellent Zamatra, est tellemēt opposee au midi à la Cher-

*Description de
plusieurs isles
de l'Inde Orien-
tale. Specula-
mēt de la gran-
de & petite
Inde.*

fonelle d'or, que toutes fois elle s'estend plus loin vers l'Orient. De là vers le Midi il y a grand nombre d'isles, entre autres à l'Occident on en void vne nommee Zunda, fort abondante en poyure, & qui n'est separee de Zamatra que d'un petit bras de mer. Tirant de là au Leuât apparoissent deux autres isles, l'une nommee grãde & l'autre petite Iaue. Ces trois isles ont leurs Rois auxquels elles obeissent. Les deux Iaues sont fertiles & grasses entre autres, produisent grains & fruiçts de diuerſes sortes, entretiennent tres-grand nōbre de gros & menu bestail, enſemble force haraz de cheuaux. Elles foisonnent en veuaifon, volataille & ſauuagine, & la terre produit partout abondance de poyure & autres eſpiceries. Ceux qui demeurent auant en terre ferme ſont grands idolatres: les habitãs des lieux maritimes ſont Mahumetiſtes pour la pluſpart. Quant aux hommes ils cheminent d'ordinaire eſtãs nuds & deſcouverts iuſques au nombril: toutes fois les plus magnifiques portent quelques chemiſes de ſoye ou de cotton. Ils ne peuuent endurer vn poil de barbe, ains l'arrachent, raſent tout le poil du deuant de la teſte, nourrissent & tortillent ſoigneuſement les cheueux qui ſont ſur le derriere, & ne couurent nullement leurs teſtes, eſtimans indigne de l'excellence de l'homme (laquelle ils conſiderent au chef plus qu'en nulle autre partie du corps) cacher ceſte noble partie, comme ſi c'eſtoit choſe deſhonneſte. Si quelqu'un touche à la teſte de ſon compagnon, ils vengent vn tel outrage avec les armes ſans remiſſion. Ce ſont gens hardis à la guerre, & qui ſe ſourent à teſte baiſſee parmi tous dangers: adonnez au reſte à forger & faire avec grand' induſtrie des armes, canons & diuerſes ſortes de traits, & ſont experts à fondre l'airain pour en dreſſer telle piece d'ouurage & d'outil que bon leur ſemble. Ils ne ſont pas moins adroits à baſtir & charpēter nauires, conoiſtre le couſ du ciel & des eſtoilles: ſur tout ce ſont les plus grãds magiciens qu'il eſt poſſible de penſer. On les void ſouuent par les foreſts à la chaſſe avec chiens & eſpieux pour courir le ſanglier & le cerf, & ſ'aident auſſi d'oiſeaux de proye pour la voler. Ils ſont de couleur bazanee: les femmes ne ſont pas laides, & ont aſſez bon eſprit, prennent plaifir à ſe parer, ne danſent pas de trop mauuiſe grace: ſe plaifent fort à la chaſſe & y acompagnent leurs maris, ſe faiſans pour ceſt effect porter dedans des charriots. Ce peuple vit comme les habitans de la China, deſquels il ſe vante eſtre deſcendu.

Armee nouuelle de Pateonouz, prince de Iapare: les batailles donnees entre lui & les Portugallois au port de Malacca, ou il eſt deſſus avec tres-grande perte.

EN l'isle de la grãde Iaue y auoit vn More, nommē Pateonouz, ſeigneur d'une ville nommee Iapare aſſize en la frontiere maritime qui regarde la Taprobane. Deuant qu'Albuquerque ſe fuſt rendu maĩſtre de Malacca Pateonouz & Vtetimutara ſ'eſtoient liguez enſemble pour faire mourir le Roy, duquel Vtetimutara ſe plaignoit fort pour les grands outrages qu'il diſoit en auoir receus, & dont ils'eſtoit reſenti iuſques là de promettre par lettres à Pateonouz qu'il lui liureroit ce Roy entre les mains. Pateonouz cōuoiteux de regner, employa tous ſes ſens à faire valoir l'occafion qui ſe preſentoit: & pourtant commença-il à equipper & armer vn fort grand nombre de vaiſſeaux, & employa ſept ou huit ans à preparer tout ce qui y eſtoit neceſſaire, le tout ſi ſecretemēt de ſa part & du coſtē d'Vtetimutara, que perſonne

personne ne pouuoit coniecturer à quoy deuoyēt seruir tous ces appareils. Cependāt il enuoyoit gens en Malaca, pour y demeurer en qualite de marchans, en attendant le temps de surprendre avec les armes ceux qui ne s'en deshoient pas. Vtetimutaraja receuoit tels marchans en certaines sienes rues, & lors qu'Albuquerque le fit decapiter, il y en auoit grād nombre dedās la ville. Voila comme ceste republique cachoit en ses entrailles sa propre mort, tellement que personne ne se pouuoit douter de la ruine qui pendoit sur sa teste. Apres l'exécution d'Vtetimutaraja, Pateonouz ne laissa pas de cōtinuer en ses desseins. Sa flotte estoit puissante, il auoit de grāds moyens, & n'estimoit pas l'estat de Malaca si asscuré qu'on ne le peust remuer & changer. Pourtant desmara il de lapare avec trois cens voiles bien equippees, ayant en ceste flotte vne armee de gens d'esslite, & apres auoir passé le destroit entre les laues & la Taprobane, il effroya tous les Insulaires voisins. Roderic Brittio, esleu gouuerneur de Malaca, comme dit a esté, entendit ces nouuelles, & despescha soudainement Andrade avec sept nauires pour aller vers ce destroit descouurir quelle route tenoit ceste flotte: mais icelle en auoit ia passé vn autre nommé Saba, pour arriuer plustost en Malaca. Andrade & les autres capitaines n'eurēt loisir que de regagner la ville. Cependāt Brittio delibera de combattre ceste flotte lui seul avec ses forces, dont Andrade fut extremement indigné, alleguant qu'Albuquerque l'auoit esleu Amiral, & que Brittio estoit commis pour garder la ville: qu'il deuoit donc se tenir dans la citadelle, conseruer Malaca, & laisser à Andrade la charge des affaires de mer. Au contraire Brittio soustenoit que le commandement sur mer & sur terre lui appartenoit en ces quartiers là, partant qu'Andrade deuoit sans aucun delay obeir à tout ce que lui ordonneroit pour la manutention de l'estat. Mais Andrade protestoit n'endurer iamais qu'on le despouillast de sa dignité: & sur ce ils commencerēt à tancer & se picquer de paroles iniurieuses si auant que Brittio cōstitua Andrade prisonnier, toutesfois ayāt mis de l'eau en son vin & refroidi la cholere des la nuit suiuite & pensant qu' pour paroles dites (tant fussent elles poignātes) il ne faloit pas en tel temps perdre vn tel capitaine, il enuoya homme vers Andrade pour faire appointemēt & se recōcilier ensemble, l'admonester qu'il s'embarquast, & que Brittio l'attēdoit avec sa flotte, afin qu'il eust part a la victoire. Andrade considerant de son costé que ce lui seroit chose fort mal seante de vouloir s'arrester à vne querelle particuliere, lors que tout le general bransloit, fit promptemēt ce qui lui estoit commādē. Brittio commit Arias Pereire pour garder la citadelle, puis monta en sa capitainesse bien armee & equippee, estant suivi de quinze autres nauires. Outre cela, Ninachetuen voguoit au lōg de la coste dās des nacelles pour garder le riuage & empescher la descente. Le soleil estoit ia leué, quand les ennemis haussērent les voiles, afin d'entrer au haur, & les Portugallois au contraire cinglerent en diligence pour dōner bataille en haute mer, en telle sorte cependāt qu'ils furent estonnez non seulement du grand nōbre de vaisseaux de la flotte de Pateonouz, mais aussi de l'ordre qu'il tenoyēt en leur navigation. George Botel qui commandoit en vn vaisseau merueilleusement bien

Grande prudence de Brittio & d'Andrade, qui en furent par la plupart de ceux qui pensent estre bien habiles.

acommodé de voiles & viste entre tous autres, & precedoit le reste de la flotte, fit voile droit à la capirainesse des ennemis: mais il fut incontinent inuesti de quinze barques, contre lesquelles toutesfois il ne lascha coup de trait quelconque, voulant seulement attacher le combat où il pretendoit. Pierre de Far qui commadoit en vne galere, fit haltet les forçats pour ioindre & secourir Botel, tellement qu'eux commencerent à assaillir ceste capitainesse: mais elle estoit si haute que le chastellet de sa pouppe surpassoit de beaucoup en hauteur la hune du vaisseau de Botel. Ils delibererent donc la battre de loin, en quoy ils proufiterēt aussi peu, car elle estoit si forte & de telle espaisseur que les boulets de canon y mordoyent autant que si elle eust esté reuestue de cailloux. Botel & de Far voyans que ce n'estoyent que pouldres & bales perdues, ioint que les ennemis s'apprestoyēt pour les enclore, se retirerent au gros de la flotte aussi vistement qu'ils s'en estoient eslongnez. Tout ce iour passa en courses & escarmouches, car les ennemis ne vouloyēt pas venir aux mains en haute mer, ains taschoyent approcher de la ville, afin d'y esnouuoir quelque trouble, & s'en emparer avec leurs forces entieres. Les Portugallois commencerent aussi à changer d'avis redoutans le combat en haute mer, à cause de la grand' flotte de Pateonouz qui les pourroit ceindre de toutes parts. Ainsi les ennemis, selon leur desir, vindrent mouiller l'anchre pres du riuage vis à vis de Malaca, le soleil estant ia couché. Quant aux Portugallois, ils s'approcherent aussi tellement du bord qu'ils pouuoient prendre terre en vn instant.

C E S T E nuiēt là Brittio assembla le conseil pour refouldre de l'ordre & des moyens qu'on auroit à suivre pour donner bataille le lendemain. Alors tous les capitaines commencerent à le prier de n'estre en personne en ceste récontre nauale: car si nous sommes desfaits, disoyent ils, vous pourrez estat en la citadelle faire teste aux ennemis, & reparer le dommage receu en nostre perte. D'auantage vous tiendrez la foy iuree, car vous auez promis solennellement & en termes expres au viceroy que vous garderiez la citadelle contre tous ceux qui la voudroyēt assaillir, & n'auiez pas dit que vous feriez la guerre sur mer au hazard de vostre vie & danger tout euident de ceux de Malaca. Ces remonstrances contraignirent Brittio de retourner en la citadelle, tellement que le faix tomba sur Andrade qui s'employa de tout son pouuoir à dresser toutes choses requises pour combattre le lendemain. Or les Mores Iauiens, qui estoient dans Malaca, allerēt ceste nuiēt trouuer Pateonouz, & lui conseillerent de ne combattre point la flotte de Portugal: à cause qu'il auoit vn moyen plus assuré, c'est d'appeller au secours le Roy de Bintan, par le moyen duquel sans difficulté ni perte quelconque il emporteroit la victoire, puis assiegeroit la citadelle, & la cōtraindroit en peu de iours de se rendre, d'autāt qu'elle n'estoit pas fournie de viures pour tenir longuement: & qu'il pourroit retirer ses vaisseaux en vn courant de mer qu'ils appellent Mauris. Cest auis fut trouué bon, tellemēt que des le point du iour Pateonouz fit leuer les anchres & tendre les voiles, ce qu'entendu par Andrade, & ne pouuant presumer à quelle fin, il entre dans vn esquip, va vers toutes les nauires de la flotte, admonnesta les capitaines de

de cingler à voiles desployees & en bon ordre apres les ennemis, en sorte qu'ils ne les ioinissent pas pour combattre à coups de main, ains se contentassent de les saluer à coups de canon & avec des engins à feu pour embraser autant de vaisseaux qu'ils pourroyent. Eux executent ce mandement à qui mieux mieux : ce qu'apperceuant Pateonouz, fit incontinent hausser toutes les voiles de sa capitainesse, commandant à tous les autres vaisseaux de l'ensuiure: ce qui descouragea toute son armee, car ils estimerent que ce vaillant chef de guerre apperceuoit ses affaires aller mal, & qu'au lieu de se preparer à la bataille il ne pensoit qu'à se sauuer. Par ainsi tous commencēt à gagner le haut, mais Andrade & les nauires les suiuent de si pres, qu'à coups d'artillerie ils percerent & mirent plusieurs vaisseaux en fond, en embrasent d'autres avec pots & lances à feu, blessent grand nombre d'ennemis. Le feu s'estant prins en diuers vaisseaux, les ennemis tout esperdus se iettēt dās la mer, où ils demeurerēt, les vns engloutis des vagues, les autres poursuivis par les victorieux & tuez à coups de trait en cuidant eschapper. Andrade voyāt les ennemis en tel desordre que s'il les poursuivoit ce iour auāt que leur donner loisir de reprendre leurs esprits, ceste guerre prendroit fin, & craignant d'autrepart qu'à faute de munitions de guerre il ne fust contraint de laisser la victoire en chemin, il enuoya prier Brittio de donner ordre qu'on charriast promptement suffisante quantité de pouldres & boulets pour estre distribuez aux nauires : ce qui fut executé en grande diligence.

PATEONOUZ apperceuant vne grand' part de la flotte dissippée, ioinit quatre grands nefs à sa capitainesse en telle sorte que lui voguoit tousiours au milieu, & fit entrer dedans toute la fleur de ses soldats. Quant aux autres vaisseaux qui restoyent entiers, il commanda qu'on les rāgeast & ioinist ensemble, afin qu'ils peussent soustenir le choc plus aisément, & leur enioignit de voguer autour des cinq grandes nefs, & se retirer pres d'icelles, cōme d'un bouleuard assuré, toutes les fois qu'on les presseroit trop, pour derechef voguer plus assurément contre les Portugallois. Or c'est auis, par le moyen duquel Pateonouz pensoit tout gagner, fut sa ruine: car premièrement les autres vaisseaux desinuez des meilleurs soldats ne peurent resister longuement: puis estans ainsi attachez les vns aux autres, c'estoit force forcée que tous les coups qu'on leur tiroit portassent, sans tomber à faute. Andrade & les siens s'approchans, & le combat commencé, les vaisseaux ennemis furent partie brisez, partie coulerent en fond: les autres se sauuerent à voiles & à rames : & les affaires en vindrent là par le petit nombre d'iceux vaisseaux que les Portugallois s'auancerent pour acrocher le reste & combattre main à main. Vn capitaine nommé Martin Guede, apres auoir enfondré quelques vaisseaux, en acrocha vn fort grand, monta dedans à viue force, tua vne partie des ennemis, & fit sauter le reste hors le bord. Iean Lopez d'Albin en assaillit vn autre pareil & contraignit ceux de dedans se sauuer ailleurs: puis on mit incontinent le feu en ces deux vaisseaux. Les autres capitaines Portugallois faisans mesme deuoir chascun de son costé tuerent vn merueilleux nombre d'ennemis. Restoyent les cinq grandes nefs, les-

*Pateonouz
mené par ses
propres cōseils.*

quelles ayans vent à point se sauuoyent à voiles desployees. Andrade voulant assaillir plus seurement celle de Pateonouz, tira les meilleurs soldats de sa flotte, & les fit entrer en son Amirale: puis cinglant après fit tout son possible d'en approcher, mais l'autre ayant l'auantage, il accrocha la premiere qu'il rencontra, en laquelle commandoit Temungam, capitaine renommé pour ses richesses & vaillance, & qui apres Pateonouz estoit le principal en ceste flotte. Sa nef fut assaillie en l'un des costez par Andrade qui gaigna le dessus. Francisque Melio entra par la proue & donna dedans. Temungam menoit quand & soy vn sien neveu fort braue soldat, & qui commandoit en l'une des cinq grandes nefes. Iceluy desirant secourir son oncle, aborda l'Amirale d'Andrade, & sauta promptement dedans, car personne ne l'en pouuoit garder, Andrade estant delia aux mains dedans la nef de Temungam. Ce ieune homme monte viftement par la nauire d'Andrade en celle de son oncle, & commence à encourager les gens: tellement que la meslee fut beaucoup plus aspre que lon n'eust osé presumer, les affaires de Pateonouz estans reduites à point. Les ennemis estoient en grand nombre, le desespoir les animoit à combattre, & se soucioient plus de venger leur mort qu'ils n'auoyent peur de mourir. Ce pendant George Botel s'attache à la nef dont le neveu de Temungam estoit capitaine, & grim pant dedans trouua forte partie. Mais en fin les ennemis furent ou taillez en pieces, ou precipitez en mer, & leur nef bruslee, comme aussi le fut celle de Temungam apres que lui & les siens eurent perdu la vie au combat. Ninachetuen, & Tuam Mahumet capitaine d'un grand vaisseau de guerre, qu'eux appellent Ione, acquerirent ceste iournee le nom d'hommes vaillans & bien resolu.

IL ne restoit plus que la nef de Pateonouz avec deux autres, lesquelles Andrade rattaingnit, & delibera les briser à coups de canon: car d'autant qu'elles estoient fort hautes, & bien munies de bons soldats, c'estoit se hazarder trop de l'auantageusement de s'attacher à gens desesperes. Or d'autant que le canon d'Andrade iouoit sans cesse, tout l'equippage de cestrois nefes fut brisé, les chastellets abatus: mais les costez demurerent entiers à cause de leur espaisseur. Le combat ayant commencé des le matin dura iusques à la nuit: & pource que l'obscurité deuint tât espaisse qu'on ne pouuoit entreuoir chose quelconque, Andrade ietta les anchres en intention d'assaillir de nouveau des le point du iour les ennemis qui ne pouuoient non plus que lui bouger de là. Mais vne tourmente se leua tout soudain avec tonnerres & grands tourbillons qui escarta la flotte d'Andrade, & mit les nefes de Pateonouz en extreme danger: car peu s'en salut qu'elles ne s'entre froissassent ou eschouassent. Ceste tourmente appaisée & comme le iour venoit, Botel & Mahumet se virent pres de Pateonouz: lors ils recommencent le combat, & mettent deux nefes en fond, tellement que celle de Pateonouz demeura seule resistant à la furie du canon, comme dit a esté. Neantmoins Botel la fit battre tât que la pouldre & les boulets durerent, puis tourna voile en diligence vers Malaca, pour se charger de munitions & retourner pour suivre la pointe. En sa route il trouua la flotte toute lasse, & quelques vaisseaux

encores

encores escartez & estonnez de ceste tourmente. Passant outre, & s'estant muni de ce qui lui estoit necessaire, il gagne la haute mer : mais Pateonouz avec vn vent à souhait se sauua en la grande laue, ayant perdu en ceste bataille nauale cinquante neuf grands vaisseaux appelez Ioncs, de soixante quil auoit amenez, & vn fort grand nombre de barques, fustes & brigantins mis en fond ou bruslez : huit mil hommes & dauantage despeschez par le feu ou par l'espee. Les Portugallois n'y perdirent que trente des leurs, & y en eut beaucoup de blesez. Andrade & les autres capitaines retournerent en Malaca, au grand esbahissement de tous ceux de la ville, qui n'auoyent iamais ouï parler ni esté spectateurs d'vne bataille plus sanglante. Cela fait, Andrade fit voile en Indostan.

24. A P R E S le depart d'Andrade peu s'en salut que les ennemis ne s'emparaissent de Malaca. Car vn Sarasin nommé Maxeliz, natif de Bengala, homme de mencee & le plus propre du monde à bien tramer quelque trahison, auoit esté semonds par grands presens & belles recompenses de Mahumet Roy de Bintam, de lui liurer la citadelle de Malaca, par tel moye & à quelque pris que ce fust. Pour paruenir à cela, Maxeliz fit tāt qu'il deuiut fort familier de Pierre Personne facteur du Roy & surintendant des douannes & peages : puis il apostā quelques autres Sarasins pour entrer armez dās la citadelle, incōtinent qu'ils verroyēt Pierre Personne tuē, afin de s'emparer de l'endroit le plus fort d'icelle où Pierre faisoit sa demeure, iusques à ce que le secours du Roy de Bintam, qui estoit embusché en armes, & n'attendoit que l'heure pour acourir promptement, fust arriué & entré. Il s'asseuroit d'auoir en cet tumulte de l'aide assez & beaucoup d'autres compagnons de ceux qui haïssoient les Portugallois. Tout estant ainsi dressé, Maxeliz alla voir à l'acoustumee Pierre qui le caressoit comme ami : & apres auoir deuié quelque temps ensemble, comme Pierre s'amusoit à escrire, Maxeliz se rue sur lui sans dire mot & lui donne vn coup mortel. Personne sentant que c'estoit fait de sa vie, & craignant trahison, courut soudainement à la porte, pour la fermer au verrouil, de peur que les autres ennemis n'entraissent dedans, & maugre Maxeliz la ferma de fait auant qu'expirer. Les Sarasins approchent, & commence lon à faire du bruit. Quant aux Portugallois ils acourent aussi aux nouuelles de cest estrange accident, & voyans les ennemis hors de la porte, close par dedans, leur courent sus, & les taillent en pieces nonobstant leur resistance. Puis enfoncēt la porte, & s'attachēt à Maxeliz, qui (auant que mourir) monstra qu'il fauoit escrimer : mais ce furent coups perdus pour lui. Ceste despesche assopit la trahison & cōtraignit le Roy de Bintam de demander la paix, laquelle lui fut accordee à cōditions equitables, selon que le temps le requeroit. Malaca estant ainsi rendue paisible, iouit de ce repos l'espace de quelques annees.

La citadelle de Malaca deliurée de la trahison de Maxeliz, & les affaires pacifiées.



LE NEVFIESME LIVRE.

SOMMAIRE.

1. Navigation d'Albuquerque en Arabie pour se rendre maître de la ville d'Aden, laquelle est brièvement descrite, avec les mœurs de ses habitants.
2. Deportemens du gouverneur d'Aden & des Portugais.
3. Aden assiégée & assaillie par Albuquerque, qui est contraint lever le siège.
4. Second siège d'Aden, dont Albuquerque se retire, & quelle fut l'issue de sa navigation en Arabie.
5. Arrivée de Jean Linsce en Goa. Paux assente avec Nambudaron nouveau Roy de Calicut : & la dangereuse mort de Gassier Percire contre Albuquerque.
6. Etat des affaires d'Afrique, & l'armée navale envoyée contre Zeidan prince d'Azamor.
7. Description de la ville & territoire d'Azamor.
8. Escarmouche devant Azamor, siège d'icelle, assaut donné & la ville prise.
9. Prise de Tise & d'Almedine villes de Barbarie.
10. Nouveaux remuemens en Azamor de quelques uns qui vouloyent que l'on fît la guerre au royaume de Maroch : & la réponse du Duc de Bragance viceroy.
11. Courses & exploits de guerre de Jean de Meneses, contre les Mores.
12. Guerre contre les Rois de Fez & de Mequinez, à qui les Portugallois donnent bataille & emportent la victoire.
13. Nouvelle guerre en Azamor & les divers succès d'icelle.
14. Mort de Jean de Meneses, à qui Pierre de Souze succede en charge.
15. Guerre de Sepre, & ce qui en suivit.
16. Divers peuples de Barbarie se rendent vassaux & tributaires du Roy de Portugal.
17. Tumulte survenu entre les Mores & les cosques de Jacques Lopez, insigne au territoire de Maroch.
18. Ambassade & presents envoyez par le Roy de Portugal au Pape Leon dixiesme.
19. Demandes du Roy de Portugal au Pape, notamment d'une partie des revenus Ecclesiastiques, & discours de l'historien sur cela.
20. Ambassade du grand Negus au dromonaire d'Ethiopie vers le Roy de Portugal, & à quel propos le vulgaire l'a nommé Prestre Jean.
21. Par qui & pour quelle occasion cest ambassade fut envoyé d'Ethiopie en Portugal.
22. Legation & presents de l'ambassadeur d'Ethiopie au Roy Emmanuel.
23. Description de l'esti due des pays sur lesquels domine ce grand seigneur, & les mœurs de ses sujets.
24. De la religion & ceremonies des Ethiopiens.
25. Estat des Indes. Ninnachetuan dessoulié de sa charge en Malaca.
26. Guerre entre les Rois de Bintam & de Capar, en laquelle les Portugallois se mistrent pour secourir celui de Capar, & deslois le Roy de Lungue.
27. Mort tragique de Ninnachetuan, & les memorables particularitez d'icelle.
28. Description du royaume de Cabaie, ensemble de quelques villes d'icelui : l'ambassade d'Albuquerque vers le Roy & la réponse.
29. Navigation de Pierre Albuquerque en Arabie pour y faire la guerre : sa negotiation en Ormus avec ce qui s'en ensuivit, & son retour en Goa vers le viceroy.

Navigation d'Albuquerque en Arabie pour s'emparer d'une ville nommée Aden, brièvement descrite avec les mœurs de ses habitants.



OMME ces choses passoyēt en l'Inde de là le Gan-
ge, Albuquerque armoit deçà vne grande flotte. Il
establit Pierre Mascaregne gouverneur de Goa, fit
Ieā Machiade Amiral en ceste coste de mer, & Ro-
deric Percire capitaine de la citadelle de Benastar-
rin. Sa flotte estoit de vingt nauires, chargees de mil
sept cens Portugallois & de mille Indiens, avec les-
quels il fit voile du port de Goa le dixhuitiesme
iour de Feurier l'an mil cinq cens treize. Estant fort
esloigné

esloigné de là, & ayant employé plus de iours qu'il ne pensoit en sa navigation, il alla surgir en Zacotora pour faire aiguade, & de là reprint sa route vers Aden l'une des plus fortes villes de l'Arabie heureuse. Elle est assise au pied d'une haute montagne qui aboutit par une longue & étroite pointe de terre en mer, & est lavée de rivières de costé & d'autre, tellement que c'est une demi-isle. Ceste montagne est si stérile, qu'il n'y croist arbre ni herbe, à cause que ce sont comme cailloux entassés & roches esleues l'une sur l'autre. Il n'y a point d'eau douce & ne pleut pas souvent en Aden. D'un village fort esloigné de là ils font venir de l'eau par un conduit iusques à deux lieux pres de la ville, où ceux qui en ont faute la vont querir. Tous les vivres y sont aussi apportés d'ailleurs, & néanmoins on y en trouve tousiours à grand foison. Elle est ceinte de murailles, munie de tourions, fortifiée de boulevarts, de belle vue, fort hantée de marchands Indiens, Perses, Ethiopiens, & de diverses côtes de l'Arabie. Les habitants sont Mahumetistes, Mores blancs, & d'assez honneste contenance. Quant aux gentils hommes ils s'exercent ordinairement aux armes, & sont fort conuoiteux d'acquiescer l'honneur en guerre. Le Roy possède des autres villes en terre ferme, souldeoye grand nombre de gens, & au besoin tire de ses pays deux mille hommes de cheval. Il a acoustumé d'establi pour gouverneur en Aden celui duquel il se fie le plus. Alors qu'Albuquerque y arriva, ut Ethiopien, brave capitaine, nommé Miriamirjam, commandoit dedans ceste ville, de laquelle Albuquerque desiroit s'emparer, afin de courir de là toute l'Arabie, & fermer le passage à la flotte du Sultan d'Egypte qui menacoit alors les Portugallois, & maintenant à celle des Turcs qui se veulent emparer des Indes. Car de la ville d'Aden iusques au goulfe de la mer Arabique il n'y a que soixante lieux, tellement qu'au besoin en l'espace d'un iour on peut bouscher, l'entrée avec petit nombre de vaisseaux. Davantage, il estoit aisé, ce sembloit d'aller avec des esquifs & basteaux depuis Aden iusques au port de Suez, où l'on bastit les navires, afin de mettre le feu es ateliers & arcenaux. Quoy fait Albuquerque estimoit que la domination des Portugallois es Indes auroit un fondement assuré pour subsister à jamais, s'il est loisible de penser que les choses humaines soyent de quelque durée. Mais son dessein succeda tres-mal, car en premier lieu il ne trouva pas à point l'occasion qu'il pensoit bien rencontrer, s'estant laissé persuader par un bruit commun : au contraire il trouva la ville bien fortifiée, & assez mal affectonnée au parti des Portugallois, lesquels de leur part, se souvenans peu ou point de la discipline autresfois tant bien pratiquée entre eux, agraurent la haine des Arabes contre toute la nation.

2. OR les affaires furent manies comme s'en suit. La flotte de Portugal ayant ietté les anches s'arresta, quoy que les navires fussent agitées des vagues. Si tost que la tourmente fut apaisée Miriamirjam envoya l'avoit d'Albuquerque à quelle intention il estoit arrivé en ce port. Albuquerque fit réponse qu'ayant entendu par les lettres & rapports de plusieurs que le Sultan armoit en la mer Arabique pour faire la guerre aux Portugallois, il l'avoit voulu relever de peine & acourir la navigation des Egyptiens, ayant

*Departemens
du gouverneur
d'Aden & des
Portugallois.*

prins sa route iusques en Arabie pour y combattre ceste flotte. Pour le regard de la ville d'Aden, il presentoit la paix & non pas les armes, à condition toutesfois que les habitans s'assuierissent au Roy de Portugal, sous la protection duquel ils pourroyent viure trop plus heureusement que sous les autres Princes qui leur auoyent commandé. Miriamirjam fit porter incontinent force presens à Albuquerque, c'est a sauoir des victuailles pour ses nauires, & declairer qu'il se rendroit, volontiers au Roy Emmanuel. Il y auoit trente nefz à l'ancre en la rade, dont les marchans, pilotes & passagers s'estoyent soustraits & ferrez dans la ville, pour la crainte qu'ils eurent des Portugallois. Mais Albuquerque despescha homine expres pour leur aller dire qu'ils s'assuraissent hardiment de lui & remontaissent en leurs nefz. Eux respondent que les paroles ne s'accordoient pas avecques le fait : que ses soldats estoyent entrez en leurs nefz: auoyent pillé & emporté tresinjustement tout ce que bon leur sembloit. Il receut puis apres des lettres de Miriamirjam lequel se plaignoit fort de l'outrage qu'il pretendoit lui estre fait, en ce que les marchans passagers & pilotes susmentionnez auoyent esté auertis de se retirer de la ville, d'autant (disoit il) que leur depart la desgarniroit & afoiblirait d'autant : que cela estoit vne menée d'homme qui faignant apporter la paix machinoit sous le pretexte d'icelle vne malheureuse guerre. Par ces lettres Albuquerque conut que le gouuerneur n'estoit pas ami des Portugallois, comme de premier abord il en monstroient quelque semblant. Sur ces entrefaites vn Chrestien d'Ethiopie, detenu prisonnier en Aden, se sauua & paruint en nageant iusques aux nauires: puis rapporta à Albuquerque que le gouuerneur auoit souldoyé gens, & donné ordre à tout ce qui estoit requis pour garder la ville.

*Aden assaillie
par Albuquerque,
qui est cō-
traire leur le
siège.*

ALBUQUERQUE entendant cela descendit en terre & se campa avec ses troupes, pour assaillir la ville : & apres auoir fait bresche en diuers endroits, il fit planter les eschelles, & si les soldats eussent gardé leurs rangs, la ville eust esté prinse alors. Mais chascun s'efforçant de monter le premier ou avec les premiers, & ne laissant vn seul eschellon vuide, il y eut tel desordre qu'il estoit impossible que l'insolence de tels assaillâs peust estre reprimée par commandement d'aucun capitaine : tellement que les eschelles rompirent sous le faix de ceux qui montoient. Il y auoit lors cent cinquante Portugallois sur les bresches, entre lesquels se trouuerent plusieurs gentilshommes. Garfie de Souze, apres que son eschelle fut rompue, se retint à vn creneau, puis se coula en terre, & voyant ceux qui auoyent si brusquement gaigné la bresche s'effroyer si fort de leur cheute qu'ils ne vouloyent plus remonter, conduisit sa compagnie vers vn quartier de la ville dont le mur estoit assez bas, tellement qu'il gaigna le dessus, & se rédit maistre d'une tour dans laquelle y auoit de l'artillerie. Albuquerque s'y transporta incontinent & fit abatre le reste de la muraille qui auoit esté rompue du canon auparauant. Quoy fait l'enseigne de Manuel Lacerde entra par ceste bresche dedans la ville, suivi d'un prestre qui portoit vne croix, & de bon nombre de braues soldats. Miriamirjam monte sur vn cheual acourut celle part pour les repoussier. George Sylueire & quelques autres combatoyent vaillam-

vaillamment sur la bresche. En cest endroit la muraille estoit plus basse par dedans, tellement qu'un Sarasin venant au long d'icelle pour faire teste à ceux qui vouldroyent passer oultre arracha la picque à Sylueire, ce qui le mit en telle fureur que sautant en bas l'espee au poing il attaqua de si pres le Sarasin delaislé de ses compagnons que sur l'heure il fut mis à mort. Quant à Miriaminjam il faisoit tout son possible pour chasser ceux qui estoient entrez par la bresche. Alors les Portugallois se retirerent au quartier de Garfie de Soufe, leur nombre estant diminué de beaucoup, sans plusieurs grièvement blesez : & alors commencerent ils à perdre courage. Les assiegez au contraire assaillirent l'endroit où de Soufe s'estoit arresté, & combatoyent furieusement les vns contre les autres à coups de picques, en presence d'Albuquerque, qui du riuage de la mer, sur laquelle la tour susmentionnee regarde, contemploit avec vne estrange passion d'esprit le danger de ses gens ausquels il ne pouuoit prester la main. Soufe crie apres lui demandant ce qui estoit de faire : lors Albuquerque fait bailler des chordes à ceux qui combatoyent dans la tour, afin de couler bas par le moyen d'icelles. Le mur estoit fort haut en cest endroit, tellement qu'il falut lier deux picques ensemble pour tendre les chordes aux Portugallois serrez en la tour. Mais Soufe respondit que ce seroit mettre vne tache sur sa race, & denigrer tout le renom qu'il auoit acquis par ses deportemens, si la crainte le faisoit deualer avec vne chorde d'un lieu où sa hardiesse l'auoit fait mōter. Plusieurs de sa compagnie prindrent la mesme resolution, & resistoyent si courageusement que les ennemis n'en osoyent approcher que bien à point : mais les vns ayans esté froissez à coups de pierres, les autres transperceez de dards & iauelots, Soufe receut vn tel coup de fiesche au dessous du front qu'il en rendit l'esprit tost apres : alors les suruiuans se glisserent par les chordes & eschapperent par tel moyen. Les autres entrez dedans la ville faisoient vn metueilleux deuoir : toutesfois voyans qu'à la longue il iroit mal pour eux regaignerent les bresches, & descendirent par les eschelles que Manuel Lacerde & Jean Decio y auoyent fait planter, pouruoyés au retour. Aucuns se hazardans à sauter de la bresche en bas se briserent les cuisses. Apres qu'Albuquerque eust ramassé ses gens eschappez des bresches, il retourna vers les nauires. Vis à vis des murailles d'Aden y auoit vne islette & en icelle vne tour de laquelle l'artillerie battoit incessamment & endommageoit fort toute la flotte. Les capitaines furent appelez en conseil par Albuquerque pour deliberer comment on pourroit raser ceste tour : mais tandis qu'ils en communiquoyent, Aluar Marreire, pilote de la nauire de Lacerde, suiui d'une bāde de matelots, sauta en terre, gaigna la tour, hacha en pieces quelques soldāts qui y estoient logez, puis en tira vingt sept canons de fer : ayāt executé ces choses si soudain, qu'auant que les capitaines eussent conclu tout estoit acheué. Or Albuquerque voyāt que la ville ne pouuoit estre forcee sans grāde perte des siens, & presumant qu'il auroit à cōbattre biē tost la flotte du Sultan, où ce seroit chose trop hazardeuse de mener des gens afoiblis & rōpus en ces assaux d'Aden, ioint aussi qu'il craignoit qu'en perdant sa peine autour d'une si forte place le temps propre à la nauigation ne

s'escolast, fit eslargir ses nauires en haute mer. Mais auant que leuer les anchres, les vaisseaux ennemis qui estoient au port furent saccagez & bruslez par son commandement. De là il entra bien auant en la mer d'Arabie, puis alla surgir en vne isle nommee Camare, à deux lieues ou enuiron de la coste, où il y a force fontaines d'eau douce, des forests espaisles, & du bestail en abondance. Les insulaires craignans quelque esclandre estoient passez en terre ferme: mais la flotte d'Albuquerque demeura sept iours en leur isle pour y puiser de l'eau & amasser des viures par ci par là. Puis se remettant à la voile, ils prindrent leur route vers Iude ville située en la liziere d'Arabie, d'où ils furent chassez par vne tourmente qui les ramena en Camare, tellement qu'Albuquerque delibera y passer l'hier & calfeutrer les nauires, ayant apriuoisé les habitans par tous les signes d'amitié & de douceur qu'il fut possible leur monstrer.

*Second siege
d'Aden, d'où
Albuquerque
se retire, &
quelle fut l'is-
sue de sa nau-
gation en Ara-
bie.*

S V R le printemps Albuquerque s'appresta pour retourner en diligence 4-
ces Indes, d'autant qu'il ne receuoit aucunes nouuelles de l'armee du Sultan ni d'autre. Estât arriué pres d'Adé il voulut encor essayer s'il pourroit la prédre à peu de perte. Mais elle estoit alors mieux fortifiée que iamais pour soustenir & sieges & assaux. Ceux de dedans canonnoient sans cesse & de grand' furie les nauires de Portugal, tât de dessus les murailles, que des tours & de la pente de la montagne. Les Portugallois d'autre part battoient les murs & rempars, & tuoient force Arabes. La tour que Marreire auoit gaignee fut reprise par ceux de la ville, & les soldats qui la gardoyent mis au fil de l'espee. Quinze iours apres (car la tourmente empescha de le faire deuant) Albuquerque fit leuer les anchres & se retira, suivi de toute sa flotte, tellement qu'apres auoir perdu son temps en tout ce voyage, il vint surgir au port de Diu. Melichiaz lui enuoya beaucoup de presens pour se maintenir en sa bonne grace, non pas qu'il se fust beaucoup en Albuquerque: au contraire c'estoit l'un des plus fins & dangereux homme du monde, qui mesurant tous les autres à son aulne n'estimoit rien de bien d'Albuquerque duquel il conoissoit l'esprit, & redoutoit son astuce, n'ignorant pas combien ce viceroy desiroit s'empater de Diu par armes couuertes ou descouuertes. Au bout de six mois Albuquerque partit de là, & fut conduit assez loin par Melichiaz avec quatre vingts vaisseaux bien equippez. Quand ils furent en haute mer Melichiaz monta en la capitainesse d'Albuquerque sous assurance, & avec belles paroles lui offrit tous ses moyens, lequel le recompenfant de mesme monnoye, l'assura d'estre prest à lui faire tout plaisir, & mesmes lui donna quatre prisonniers Arabes: car en ceste nauigation les Portugallois auoyent gaigné cinq nefes Arabesques. Melichiaz print ce present fort à gré, d'autât que ces prisonniers estoient riches & de grande autorité, tellement que pour les auoir remis en liberté il s'asseuroit d'en estre honoré dauantage puis apres. En apres Albuquerque passa tellement toute celle coste qu'il fut salué & honoré en maintes sortes par tous les gouuerneurs des villes, qui lui payerent tribut sans aucun delay ni refus. S'estant arresté au port de Chaul il y trouua Tristan de Gaz lequel auoit esté enuoyé en ambassade vers le Roy de Cambaje, & qui apportoit let-
tres

tres par lesquelles le Roy permettoit à Albuquerque de bastir vne citadelle en la ville de Diu. Et pour confermer de plus en plus l'amitié il enuoyoit vn ambassade vers Albuquerque avec Tristan. Au partir de Chaul, & auant que prendre terre en Goa, il print vne autre nef chargée d'espiceries. Mais aureste ceste flotte qui auoit tât cousté de peine & d'argent à equipper, & dont lon esperoit si grandes choses, à cause du renom acquis par le general & par ses braues soldats, & pour la frayeur que plusieurs nations s'en estoient donnée, ne seruit d'autre chose que d'apprendre aux Portugallois, en flez de leurs victoires & se confians trop en leurs bras, d'estre plus modestes & renoncer à toute temerité & insolence. Ils aprindrent lors que les armes sont journalieres, & qu'ils n'estoyent pas inuincibles: item que l'honneur des victoires par eux obtenues ne leur deuoit pas estre attribué, ains à la faueur de Dieu. Car (comme nous auons dit) les nauires, ayas perdu bon nombre des meilleurs hommes de la flotte, se retrouuerent en Goa, sans auoir fait chose qui vaille le parler. On fit entendre à Albuquerque que deux nefs de celles qu'il auoit prinſes appartenoyent au Roy de Calecut allié des Portugallois: à cause de quoy il les restitua prôprement, encores que la citadelle qui deuoit estre bastie au port de Calecut, selô la teneur de ceste alliance, ne fust encores commencee, l'œuure ayant esté retardé partie par la mauuaise volenté du Roy, partie aussi par l'enuie de quelques Portugallois, qui ne cessoyent de se plaindre que cest estourdi & insensé (parlans d'Albuquerque) ruinoit leur natio en bastissant tant de forteresses. Fernâd Andrade arriua ces mesmes iours, & deduisit bié au lóg deuât Albuquerque toutes les particularitez de l'estat de Malaca & de la victoire obtenue sur Pateonouz, ce qui resioiut grandement Albuquerque.

5. ENVIRON ce temps Jean Souſe de Limice avec deux nauires print port en Goa. Il estoit parti de Lisbonne avec trois nauires: mais l'vne, dont Francisque Correa estoit capitaine, perit en mer. L'ambassadeur du Roy de Narſingue vint aussi pour lors deuers Albuquerque avec nouueaux articles: car il demandoit que tous les cheuaux qui de là en auant seroyent amenez en Goa, lui fuſſent vendus à certain pris raisonnable, & qu'il ne fuſt permis à Zabaim d'en acheter aucuns. Albuquerque refusa ceste demande ne voulant enſraindre l'alliance traitée avec Zabaim. En ces entrefaites le Roy de Calecut vint à mourir tout à point pour les Portugallois, aimez & fauorisez de Naubeadarim ſuccesseur d'icelui: tellement que du mutuel consentement des deux parties la paix fut faite & iuree, avec conditions auantageuſes pour le Roy de Portugal, auquel Naubeadarim enuoya deux ambassadeurs avec grands preſens, & commença-on à bastir la citadelle en Calecut. Les choses ainſi eſtablies, Albuquerque fit voile en Cananor pour redreſſer l'estat troublé par certains remueurs de meſnage, & regagner par douceur & iuſtice les cœurs des habitans, qui commençoient à ſe deſgouſter. Eſtant apres cest affaire il receut vn mauuais coup par les meſchantes pratiques d'vn des ſiens, nommé Gaſpar Pereire ſon ſecretaire, homme qui auoit grand credit à cause de ſa charge. Icelui ſ'eſtoit aſſocié avec les ennemis d'Albuquerque, l'honneur duquel il denigroit de tout ſon pouuoir:

*Arrivée de
Jean Souſe de
Limice en
Goa.*

*Paix aſſeurée
avec Naubea-
darim nou-
veau Roy de
Calecut.*

*Dangereuſe
meſſe de Gaſ-
par Pereire cō-
tre Albuquer-
que.*

mesmes auoit bien osé escrire au Roy Emmanuel qu'il falloit du tout quitter Goa s'il vouloit sèurement garder ce que lon conqueroit es Indes. Que ceste ville là requeroit vne trop puissante garnison : qu'en s'y amusant on quittoit la seigneurie de la mer, & que les soldats enclos dâs le pourpris de Goa demeuroyent exposez à mille perils. Les enuieux discouroyent là dessus avec les vns & les autres, & en la cour de Portugal on ne disputoit presque d'autre chose. Brief ils en rompirent tellemēt les oreilles au Roy qu'ils l'amenerent à ce point de mander en Inde que lon assemblast tous les capitaines & personnages de qualité pour consulter de cest affaire : & que si la pluspart des voix enclinoit à ce que Goa fust abandonnee, la garnison eust à en sortir promptement pour laisser la ville en la puissance des ennemis. Pereire ayât ces lettres en main pensoit auoir desia tout gaigné. Le conseil fut assemblé & apres qu'on eust opiné de part & d'autre, il fut arresté à la pluralité des voix que Goa seroit gardee, & Dieu a monstré depuis qu'il auoit presidé en ce conseil : car il n'y a lieu es Indes Oriëntales plus riche que Goa, ni où il y ait si grand nombre de Chrestiens.

Estude d'affaires d'Afrique, & l'armée navale envoyée contre Zeiam prince d'Azamor.

D V R A N T ces remuemēs lointains, le Roy de Portugal arma vne puissante flotte pour recommencer la guerre en Barbarie. Il a esté dit au cinquieme liure, que le Roy, induit par les belles paroles de Mulei Zeiam, auoit enuoyé leâ de Menefez avec vne armee en Azamor, & que Zeiâ auoit faussé sa foy, tellement que Menefez s'estoit retiré sans rien faire. Depuis Zeiam s'empara de la ville, & se print à tourmenter les habitans : mais afin d'auoir appuy pour les tyrânisier mieux à son aise, il pacifia avec le Roy Emmanuel sous des conditions auantageuses aux Portugallois, & cômodas aussi pour asseurer son estat : car il promit payer certain tribut tous les ans, exempter de toutes charges les Portugallois qui trafiquoyēt en la ville, & fournir gēs au Roy toutes & quantes fois qu'il voudroit faire la guerre à ses ennemis. Le Roy aussi de son costé prenoit Zeiam en sa protection & sauuegarde, s'obligeât d'employer toutes les forces pour repousser ceux qui entreprendroyent quelque chose sur l'estat d'icelui. Mais Zeiam ne tint pas promesse, & les Portugallois trafiquans en Azamor offensés de sa desloyauté se retirèrent incontinent ailleurs. Or le Roy voulant chastier ce perture, & reduire en sa main ceste ville assez riche, équippa vne armee nauale aussi grande, peut estre, que iamais on en ait veu en Portugal : car il y auoit quatre cēs vaisseaux grands & petis, vingt mille pietons, deux mil sept cēs cheuaux, dont cinq cēs estoient bardez. Iacques Duc de Bregents, en la prudence duquelle Roy s'asseuroit beaucoup, fut esleu chef de ceste armee, ayât pour adioint & lieutenant Iean de Menefez. La pluspart des gentilshommes & beaucoup de grands seigneurs marcherent de fort bonne volonté en ceste guerre, tant pour complaire au Roy que pour acquerir honneur. Quant au Duc il menoit à ses despēs trois mil hommes de pied, & cinq cēs cheuaux dont y en auoit cent bardez, qui avec le reste faisoiyēt le nôbre sus declairé. Plusieurs leuoyēt des soldats, & les y menoyēt à leurs propres despēs, entre autres Iean Gonçalue Camare gouuerneur de l'île de Madere s'y rêdit avec vingt nauires, six cēs pietons & deux cēs cheuaux. Le Roy auertit le Duc d'attirer

d'attirer par douceur les gens de marque du parti contraire, quant aux autres ennemis les contraindre par vne bonne discipline de se ranger à leur deuoir:& en general de s'employer si bien que ses exploits se rapportassent à l'esperance que lon auoit conceue de sa vertu : fut tout qu'il s'assurast en Dieu pour obtenir victoire par la faueur & puissance d'icelui. Apres que la flotte fut prestee le Duc s'embarqua & fit voile de Lisbonne le dixseptiesme iour d'Aoust:& pource que l'on n'auançoit gueres, à cause des trauerses du vent, il ne doubla pas le cap de saint Vincent si tost que lon pensoit : mais en fin apres auoir costoyé & passé outre les Algarves il s'arresta au port de Pharoje, assez pres d'Osonobe ville ancienne (qu'aucuns appellent aujour-d'hui Gibraleon, les autres Escobar) afin de ramasser toutes les troupes. Le vingtiesme iour d'Aoust il se remit à la voile, & le vingthuitiesme se redit avec toute sa flotte & armee en la coste d'Azamor: mais il lui fut impossible, à cause du vent contraire, d'entrer dans le fleuve qui passe à trauers la ville. Pourtant il fut contrainct de voguer iusques à vne autre ville nommee Mazagan distante d'une lieue d'Azamor, où il mit toute son armee en terre, & employa trois iours à pouruoir à tout ce qui sembloit necessaire pour le siege. Ce pendant les ennemis faisoient des courses, & donnoient quelquesfois l'alarme bien chaude par tout le camp, tuans tous ceux qui s'escartoyent tant soit peu loin. Finalement ils se presenterent avec cinq mille cheuaux & sept mille pietons pour donner bataille: mais apres auoir consideré l'assiette du camp, le bon ordre mis par tout, le nombre de ceux qui les venoyent assieger, ils se retirerent en Azamor, dont les habitans furent tant estonnez, que sur l'heure ils enuoyerēt dehors les femmes, petis enfans, & gens inutiles à la guerre, avec le plus beau & meilleur de leurs biens, & les firent retirer en lieux d'assurance, ne retenans en la ville sinon ceux qui estoient propres à la garde & deffense d'icelle.

7. O R auant que passer plus oultre, ce ne sera chose impertinente de tout-
cher quelque mot de la situation d'Azamor, ensemble de ses moyens & re-
chesses. En la partie d'Afrique qui regarde l'Occident, & qui dela le destroit
de Gibraltar panche au midi, y a vne prouince tresfertile & grasse, que les
Arabes nomment Duecala, arrousee d'un grand fleuve qu'ils appellent
Omirabith, & que plusieurs estiment estre Alama. Sur le bord de ce fleuve
assez pres de la mer est assize Azamor, qui lors comprenoit plus de cinq
mille maisons dedans l'enclos de ses murailles, le peuple magnifique, les
bastimens spacieux & de belle structure en plusieurs endroits. Elle estoit di-
stribuee en quatre quantons, chascun desquels auoit son gouuerneur, en
telle sorte toutesfois qu'on n'oyoit bruit ni tumulte quelcoque entre eux,
pource qu'il y auoit vn souverain auquel ils obeissoyēt tous. La campagne
est fort large, & cultiuee par des Arabes pour la pluspart, qui pour n'estre en
forte que ce soit delicats, comme ceux de la ville, sont estimez beaucoup
plus robustes & propres à manier les armes. Ils n'ont point de maisons, ains
passent leur vie en des pauillons fort amples, mangent peu & choses de pe-
tite nourriture & de nul appareil, employans presque tout le tēps aux exer-
cices de la guerre. Ceste prouince estoit distribuee en trois parties, chascu-

*Description de
la ville & ter-
ritoire d'Azamor.*

ne ayant prins nom de certaine nation d'Arabes, qui en auoyent chassé les anciens habitans, & s'estoyent campez en leur place. La premiere s'appelloit Xerquie, la seconde Dabide, la troisieme Garabie. En apres chascune d'icelle auoit ses communautéz, & chascque communauté ses paviillons fichez en lieu commode & à part selon la multitude de ceste communauté qui reconoissoit aussi son capitaine & gouverneur à part: en telle sorte toutesfois que ces trois portions de pays estoient liguees ensemble, & au besoyn se donnoient secours les vnes aux autres. Il estoit aisé à ceux d'Azamor de leuer plusieurs compagnies de pied & de cheual en ces villages & communautés.

*Après pour
le siege. & es-
carmouche de-
vant Aza-
mor.*

M A I S pour reuenir à la guerre, le premier iour de Septembre toute l'ar- 8.
mee de Portugal marcha en bataille vers Azamor. Le Duc commanda à Pierre Alfonse Aquilaire, lors Amiral, de faire charger en des fregattes l'artillerie & les viures, puis entrer dans le canal du fleuve. Et d'autant que les ennemis apprestoyent des engins fort grands & pesans, poissez, & enduits d'autre telle matiere propre pour prendre feu, lesquels ils vouloyent pousser dans le fleuve, afin qu'estans portez par le courant d'icelui ils embrasassent les vaisseaux de Portugal: avant que les ennemis eussent executé cela, le Duc commanda qu'on allast briser & brusser ces engins posez sur la rive du fleuve, enuoyât pour cest effect Gasie Melio & Aquilaire avec ses archers. Iceux s'estans approchez de la ville executerent leur commission quoy que les ennemis tâchassent de les chasser à coups de canon. Frâcisque Pedrose qui menoit les auantcoureurs, s'estoit auancé loin deuant l'armee, & fut rudement chargé par vne troupe de caualerie des ennemis, lesquels il foustint vaillamment: mais d'autant que les autres acouroient de toutes parts & pressoyent desia bien fort Pedrose & ses gens, Menesiez conducteur de l'auantgarde y suruint au secours avec les meilleurs hommes de cheual de son bataillon. Toutesfois à cause que presque sans cesse le nombre du parti contraire croissoit, & que les derniers venus se fourroyent résolument au combat, & chargeoyent d'estrange sorte les Portugallois, il falut que le Comte de Borbe & ses gens de cheual y acourussent pour tirer Menesiez du danger. Finalement le Duc mesme doubla le pas avec ses troupes bien rangees & quelques cheuaux pour faire espaule aux premiers. Gaspar Vasquio capitaine fort vaillant conduisoit ces troupes & se mit entre celles de Portugal & des ennemis. Eux faisoient tout leur possible de rompre les rangs, mais voyans que c'estoit en vain ils tournerent bride, & perdirent quelques gens en ceste escarmouche: entre autres vn des plus braues nommé Cidaco, sur la vaillance & adresse duquel les Azamoriens s'appuyoient grandement: & de fait si tost qu'ils le virent par terre, leur retraite commença. Cidaco auoit esté autresfois affectionné seruiteur du Roy Emmanuel, & en plusieurs exploits s'estoit monsté tel: mais depuis il quitta ce parti. L'armee de Portugal marchant en son premier ordre approcha la mesme nuit plus pres d'Azamor, & se campa incontinent au long du fleuve où estoient les vaisseaux. Le lendemain, par le commandement du Duc on descendit des fregattes en terre les canons, engins de batterie & munitions,

Siege d'Azamor.

munitions, & furent toutes choses disposées pour faire bresche. Sur le midi les assiegez firent sortir trois regimens & presenterent le combat. Vaque Coutin Comte de Borbe pria le Duc de lui permettre d'aller le premier à la charge, ce que lui fut refusé, le Duc alleguant que ce seroit vne honte d'employer le temps à des escarmouches, mais qu'il falloir finir ceste guerre par bataille generale, ou par la soudaine prinse d'Azamor. Pourtant fit il dresser ses engins de batterie contre les murailles, & l'artillerie commença à iouer, & furent apportees eschelles en nombre pour monter à la bresche. Jean de Menefez, par l'auid duquel ces choses se conduisoient, assistoit à ceux qui auoyent charge d'executer. Alors il fit marcher Louys de Menefez & George Barret avec les soldats Algaruois, suivis de Jean de Sylues & des forces enuoyees par l'Euesque de Sylues, donnant ordre que tout se maniaist courageusement & par ordre. L'assaut fut tresfurieux: les engins approchez des murailles, & le canon battant d'autre part auoyent fait grande ouuerture. Les assiegez plantez sur le tempar, à coups de fleches, d'autres traits, & de cailloux, repoussoyent viuement les assaillans, & en bleissoient plusieurs fort grieuement: qui plus est ils iettoient des pots à feu & des ruches allumees avec vn nombre infini de mouches à miel, afin de bruller les engins & endommager les Portugallois avec le feu artificiel & par les aiguillons des abeilles. Cide Mázor le plus renommé capitaine entre les Mores, & qui auoit aussi fait mainte preuue de sa suffisance en guerre, commandoit alors dedans Azamor avec grande dexterité, courant çà & là es endroits où il voyoit le combat plus eschauffé & les bresches plus larges, menant le secours & donnant conseil necessaire sur le champ. Outre cela il monstroient exemple à ses soldats de s'acquitter de leur deuoir, combatant lui mesmes vaillamment & les incitant de bien defendre leurs maisons, coustumes & liberte: tellement que tandis qu'il subsista, tous les assiegez repousserent vaillamment le danger qui les menacoit. Mais il auint enuiron soleil couchant qu'un des assaillans tira vn coup de harquebuze à Cide Manzor dont il fut percé d'outre en outre, laissant sur la bresche vie & vaillance ensemble. Les assiegez desperdus à cause d'un tel accident commencerent à crier & braire à gorge desployee, & se descouragerent tellement par la mort de leur chef qu'ils conclurent incontinent d'abandonner la ville, comme de fait la nuit mesme ils s'enfuirēt par les portes, en tel desordre & estonnement que chascun voulant sortir le premier, & les vns empeschans les autres, il y eut plus de quatre vingts personnes estouffées aux portes. Auant que le iour fust venu, vn Iuis, Portugallois de nation, nommé Jacques Adibe, banni de Portugal avec les autres Iuis, comme a esté dit au premier liure, acourut sur la bresche & appella tout haut Jacques Berrio l'un des capitaines de marine, duquel il auoit esté familier autresfois, & le pria d'estre par lui mené promptement vers le Duc, duquel il obtint sauuegarde pour les biens & vies de lui & de tous les Iuis qui estoient restez en Azamor, pour recompense des bonnes nouuelles qu'il apportoit. Le Duc mit alors les genoux en terre, & leuant les mains au ciel rendit graces à Iesus Christ seigneur des armées celestes, par la puissance & faueur duquel ceste grande ville tāt peuplee, riche,

Assaut donné,

*Azamor abā
donnée des
Mores &
prise par les
Portugallois.*

& si bien munie de gens, auoit esté en vn iour subiuguee par les Chrestiens qui n'y auoyent perdu pas vn des leurs, & estoient demeurez maistres de la place en laquelle l'exécrable superstition de Mahumet auoit si long temps infecté les entendemens du pauvre peuple, au lieu dequoy le saint nom de Christ y deuoit estre célébré de là en auant à iamais. Les choses ainsi acheuées, on plâta les enseignes de Portugal sur les murailles, & le Duc entra dans la ville, où il fit incontinent repurger la mosquee des Mores, laquelle fut dediee avec les ceremonies acoustumées en tel cas, & vn autel dressé tout à l'heure, sur lequel fut chantée la messe. D'autre part les soldats coururent au pillage, mais ils ne trouuerent chose qui valust le prendre siuon du bled enabondance.

Prise de Tite & d'Almedine villes abandonnées des habitans.

IL y a vne ville nommée Tite assez pres d'Azamor, laquelle fut abandonnée de tous ses habitans si tost qu'ils eurent les nouvelles de ce qui estoit aduenü. Le Duc y enuoya promptement quelques compagnies en garnison. Pareillement ceux d'Almedine quitterent leur ville, de laquelle le Duc bailla le gouuernement à Ichabentafus, & comit Nonio Fernand Ataide pour entrer dedans, & y loger des forces à suffisance pour la bien garder: commandant à tous deux de rappeler & assembler sur leur foy ceux qui s'en estoient fuis: qu'on ne leur feroit aucun tort s'ils retournoyent habiter es villes, & se rendoyent suiets au Roy de Portugal, lui payans le tribut acoustumé: que par ce moyen ils viuroyent en toute assurance sous la protection d'un si grand prince, & iouiroyent librement de toutes leurs commoditez. Par tel moyen ces deux villes se repeuplerent, & deuiendrent plus riches & puissantes qu' auparauant. Les nouvelles de la prise d'Azamor furent incontinent portées au Roy Emmanuel, qui tout raiui de ioye ordonna quelon en feroit processions publiques pour remercier Dieu, le quel gouuerne par sa prouidence les euenemens des guerres, & les fit faire magnifiquement & en grande deuotion. Il en auertit aussi le Pape Leon dixiesme, qui en celebra vn iour de feste, des processions solennelles, & chanta messe lui-mesme, avec grandes pompes & ceremonies: puis vn prescheur fort eloquent fit vne harangue à la louange du Roy Emmanuel, de ce qu'il entreprenoit la guerre pour la gloire de Dieu & ruinoit les ennemis de la Chrestienté es Indes & en Barbarie, tandis que les autres princes Chrestiens deuenus aduersaires irreconciliables les vns des autres s'entremangeoyent, & par l'entretènement de leurs querelles fortifioyent leurs ennemis communs.

Nouveaux remuements en Azamor de quelques uns qui vouloyent qu'on fist la guerre au royaume de Maroc.

MAIS il suruint en Azamor vn trouble & mescontentement tant parmi le menu peuple qu'entre les principaux, qui voyans ceste ville forte auoir esté conquise des Chrestiens sans perte d'aucun, tenoyent pour assuré que si le Duc de Bregents vouloit entrer avecques son armee au royaume de Maroc, il s'en empareroit entierement à son grand honneur pour le prouffit du Roy Emmanuel. Car puis qu'avec bien petite troupe les capitaines Portugallois donnoyent la chasse au Roy de Maroc, que falloit-il esperer quand on lui courroit sus avec vne armee entiere? loint qu'alors les Mores n'estoyent pas si bien armez, ne dressoyent pas leurs bataillons guerres proprement, & leurs villes auoyent si peu d'appuy, qu'il estoit aisé d'en venir

nir à bout & les ruiner en moins de rien. Les Rois ne manioient pas grands deniers, & ne se liguoyent point ensemble, & pour petite solde on les pouuoit bander & armer les vns contre les autres. Dauantage l'inconstance, & la fraude, vices naturels & familiers à ce peuple acoustumé à fausser sa promesse & ne se soucier de son serment, estoit cause que les vns se deshoient tousiours des autres, & que chacun d'eux iugeant de ses compagnons comme de soy-mesme, les tenoit pour suspects, estimant tousiours d'eux qu'ils lui brassoyent quelque trahison. Quoy auenant on ne sauroit donner pied ferme ni aucune retraïte asseuree à la vie & societé des hommes. Partât c'estoit chose asseuree & qui auendroit necessairement, si lon menoit vne armee entiere auant en pays, que les Mores mesmes qui s'accommodoyent ainsi au tēps & à l'estat des affaires, dresseroient embusches à leurs compagnons, les trahiroyēt, & que leur esprit estoit continuellemēt trauaillé de la crainte que les vns auoyent d'estre vendus par les autres. Et n'y auoit doute que plusieurs ne iouassent quelque meschant tour à leurs princes mesmes pour gaigner la bōne grace des vainqueurs. Mais cōme il y a dāger de vouloir courir sus à vn peuple bien vni & de bon accord : au contraire lon tenoit pour chose faisable de pouuoir renuerser & asseruir des gens diuisez par inimitiez, tromperies & trahisons. Dauantage, que la guerre se feroit de telle sorte qu'il ne seroit besoin mettre la main à la bourse ni frayer chose quelconque, à cause que la campagne estoit fertile, les bleds & fruits de la terre beaux à souhair & foison, le bestail gros & menu en nōbre incroyable, tellement que le camp seroit tousiours fourni de viures à suffisance. Itē, puis que l'opportunité & l'occasion gouerne les affaires de la guerre, plusieurs estimoyēt que iamais il n'y feroit plus beau ni plus seur qu'alors. L'armee de Portugal estoit en son entier & bien cōplette, les soldats resolus, les capitaines vaillans & experimentez, les ennemis esperdus : tellement que chacun s'asseuroit que si les Portugallois poursuiuoient leur pointe, en peu de temps ils auroient victoire entiere & paix asseuree en Barbarie, au grand proufit de leur Roy, & à la gloire de tous les Chrestiens. Tels estoient les discours des vns & des autres par la ville, & y auoit mesmes des courtisans qui en rompoient la teste au Duc : notamment vn Cordelier nommé Frere Jean de Chiaue, depuis fait Euesque de Visen, preschant au grād temple d'Azamor, traita amplement ce point en presence du Duc, & se plaignit en termes fort aspres de ce qu'on laissoit eschapper vne si belle occasion. Le Duc se voyant taxé par tout le monde, fut contraint respondre deuant tous au temple mesmes à ce moine qui l'importunoit de prendre les armes, & dit qu'il sauoit que chascun mesdisoit de lui, mais que raison & bon conseil le gouuernoient nō pas les bruits de ville : qu'il n'auoit rien plus recom-

- mandé que d'estre fidele & obeissant à son Roy, lequel l'auoit enuoyé en
- Afrique pour s'emparer d'Azamor, & non pour entrer au royaume de Ma-
- roch, & qu'outrepassant sa commission ce seroit contreuenir à la volonté
- d'vn tres-sage prince. S'il nous faloit (dit-il) estre encores au siege deuant
- ceste ville & y seiourner plusieurs mois, si nous eussions perdu nos meil-
- leurs soldats auant qu'y entrer, chascun penseroit que la victoire seroit re-

*Responce du
Duc de Brage-
gens à ceux
qui vouloyent
qu'on fist la
guerre au roy-
aume de Ma-
roch,*

marquable, & qu'on ne sauroit plus rien desirer. Maintenant pource qu'il à pleu à Dieu qu'en vn iour & sans perte la ville soit demeuree nostre, on ne tient conte de ceste victoire : comme si c'estoit chose plus belle de couper la gorge aux ennemis que de garâtir nos gens de la mort. Quant à moy i'estime au cōtraire que c'est vn acte beaucoup plus notable & digne de louange perpetuelle de cōseruer vn des nostres que de saccager vn grād nôbre d'aduerlaires. La guerre n'est pas si aisée à faire que plusieurs crient. Cōbien que les Rois barbares soyent desvnis, si est-ce que le peril qui les menacera tous en cōmun les destournera aisēmēt des querelles qu'ils ont à desmesler ensemble, pour les induire à porter la main au mal qui les pressera tous en particulier. Si donc les Rois de Maroch & de Fez, le Xerif & les Princes des montaignes se liguēt & cōioignent leurs forces pour nous faire teste, peut estre que ces mâgeurs de charrettes ferrees, qui par leur discours mutinēt la populace, fonderont de peur, quand ils sentiront les coups. C'est l'ordinaire : quiconque en temps de paix tue ainsi les gens de paroles, & doit faire merueilles, deuient estourdi quand ce vient au fait & au prendre, brief perd sens & raison. Dauantage, tels discoureurs ne considerent pas qu'une grande armee ne viuant que de fourrage ne peut longuement demeurer en pieds. Tant plus donc nous sommes de gens, si les eunemis veulent, en nous couplant les viures, ils nous feront receuoir tant de honte & de dommage que rien plus. Si les grains & fruits estoient encores par les champs, il seroit aisé de pouruoir au pain de munitiō : mais la moisson estant passée, & le bled transporté loin, qui empeschera les ennemis de nous ruiner par famine? Quand nous aurons mangé en peu de mois nos prouisions de bled, comment continuerons nous la guerre, qui ne peut faillir à prendre long trait? Outreplus nous sommes sur la fin de l'asté, l'hiuer suit tost apres qui nous empeschera de voir le bout de la guerre si tost que nos hardis & temeraires conseillers l'imaginent. Il y a encores ce point, que le Roy à reserué pour soy ceste pesante guerre, qu'eux pensent qu'il faille entamer au desceu & sans attendre le commandement d'icelui : mais si nous entreprenons de lui leuer l'honneur qui lui est appareillé, nous mesprisons son commandement, & rompons meschamment la foy donnee à sa maiesté royale. J'ay executé la commission qu'il m'auoit dōnee : s'il faut perdre la vie pour son seruice, ie suis prest de mourir, & moyennant que ie face chose qui lui soit agreable il ne me chaut de ce que les vns & les autres estimeront de moy. Ces controlleurs ne pensent point que quand vn suiet entrepréd vne guerre sans mandement de son Prince il commet vne faute mortelle, & que la victoire qu'il obtient lui acquiert mille mauuaises graces : tellement que celui qui entreprend chose quelcōque sans estre auoué de son souverain s'expose necessairement à vne infinité de calomnies & reproches. Personne ne me sauroit accuser de rien maintenant. Mon deuoir estoit de prendre Azamor, ce que i'ay fait par la grace de Dieu : i'auois charge de mettre fin à la guerre au plustost qu'il seroit possible, ce que i'ay acheué heureusement en vingt quatre heures : il m'est enioint de remener l'armee sauue en Portugal, ie m'en acquitteray fidelemēt au plaisir de Dieu. Puis que cest affaire a esté

expe-

expediât aisément, en si peu de temps, & sans perte, plus sommes nous tenus de reconoistre le bien excellēt que Dieu nous à fait, & vaudroit beau- coup mieulx l'en remercier humblement, que de blesser ainsi par enuie l'hō- neur d'un personnage qui s'est vertueusement acquitté de son deuoir. Le Duc ayant fait ceste responce amortit les deuils qu'on faisoit auparauant, en telle sorte toutesfois qu'encores auourd'hui plusieurs sont biē marris qu'il ait laissé perdre alors vne occasion de rendre sa memoire honorable par dessus tous autres. Mais voila les raisons qui l'induïrent à penser qu'il ne deuoit entreprendre ceste guerre de Maroch. Vne autre incommodité sur- uint qui le contraignit se retirer en Portugal, afin d'auoir vne ensûre en la cuisse gauche dont il estoit tellement trauaillé qu'il ne pouuoit se tenir à cheval. Et pourtant apres auoir remis l'armee entre les mains d'un gentilhomme de grande maison, fort sage seigneur, nommé Francois de Portugal, il se re- tira dans Mazagan, puis trauersa le destroit & vint prédre port en vne ville des Algarues, appelée Bufere: d'illec il se trāsporta en Almeirin où le Roy demouroit, qui le recueillit en grand honneur, comme aussi sa vertu le me- ritoit. Vne grand' part de l'armee repassa en Portugal. Roderic Barret & Jean de Menefez furent laissés dedans Azamor: l'un pour garder la ville, l'autre pour faire la guerre aux peuples circonuoisins. Nonio Fernād Atai- de s'estant retiré dans Safin, continua de tourmenter les Mores à sa manie- re acoustumee. Jean de Menefez & Barret ne laissoient pas eugourdir ni trop reposer leurs compaignies.

11. QVANT à Menefez, ayant entendu que les payfans de Xerquie habi- tans à quinze lieues d'Azamor, trottoient par la campagne en toute seure- té, sortit sur le soir avec Barret suivis de douze cēs cheuaux & mille pietōs, au cōmencement de l'annee mil cinq cens quatorze, & firent douze lieues ceste nuit là. Puis ils gaignerent vne montagne nommee la verde, à cause de sa plaissance, & qu'il y a tousiours force herbes verdoyantes. Au point du iour ils assaillirent le village de Bencafiz situé sur vne montagne dont la pente est aisee, & ronde au sommet. Les habitans furent partie tuez, partie faits prisonniers, les autres precipitez du haut de la roche dās la riuiera qui bat au pied & passe dans Azamor puis le village fut pillé & brulé. Bernard Manuel & Jean de Sylues, que Menefez auoit enuoyez en un autre village nommé Tafuf, donnerent dedans, mais ils n'y trouuerent que le nid, car les ennemis auoyent gaigné au pied. On les poursuit à la trace iusques pres d'une riuiera où ils s'estoyent arrestez, nō pas tous, car les vns ia passiez à na- ge attendoyent les autres qui se preparoyent à les suiure: neantmoins ceux qui restoyent encores en bon nombre se ioignent & soustienent la charge, mais ils furent rompus, mis en route, & contrains se ietter en l'eau, dans la- quelle plusieurs furent transpercez à coups de trait. Bernard retiré de là a- uec du butin se iognit à Menefez, & ainsi tous ensemble euttrerent dans Azamor, emmenans force prisonniers & du bestail en abondance. En la coste de Barbarie tournée au midi & limitrophe du terroir de Safin se void vne prouince que les habitans appellent Hea, en laquelle est comprinse la ville de Tednest assize en vne large & fertile campagne. Dedans ceste vil-

*Coures & ex-
ploits de guer-
re de Mene-
sez, contre les
Mores.*

1514.

le y auoit vne mosquee que les gens du pays honnoroyent par grande deuotion. Le Xerif y estoit accomodé d'un grand palais & de tresbeaux & magnifiques iardins, avec des viuiers, & diuerses fontaines, pour son passe-temps quand il estoit de loisir. Ataide resolut de faire entreprinse sur ceste ville là, & par lettres pria Menefez de lui amener secours, d'autât que la chose valoit bien qu'eux deux ioignissent leurs forces ensemble pour en venir à bout. Mais auât que Menefez fust arriué Ataide sortit en campagne avec quatre cens cheuaux, acompagné de Iehabentafuf qui menoit quâ & soy deux mil hommes à cheual & sept cens à pied. Estans prests de Tednest le Xerif vint à la rencontre suiui de quatre mille cheuaux. Iehabentafuf qui faisoit l'auantgarde sans teculer ni marchander donna à toute bride à trauers les troupes du Xerif, en preséce d'Ataide qui estoit encores derriere conduisant l'arrieregarde, rompt tout ce qu'il trouue deuant soy, met le Xerif à vau de route qui laissa bon nombre des siens tuez sur le champ. Il y eut tant de butin, que depuis le commencement des guerres cõtre les Mores à peine s'est-il donné bataille dont les victorieux remmenassent tant de biens: car outre deux cens mille pieces de bestes à laine & à corne, & trois mille chameaux, ils gaignerēt encor vn merueilleux nombre de cheuaux. Ataide entra tost apres dedans Tednest où il se reposa, & fit entendre d'illec à Menefez, comme tout estoit ia executé. Or il y a d'Azamor à Tednest enuiron quatre vingts lieues, à cause dequoy il ne se pouuoit faire que Menefez se rendist si tost aupres d'Ataide. Menefez conduisoit sept cens cinquante cheuaux & mille pietons. Les capitaines & seigneurs Mores confederz du Roy de Portugal le receuoient honnorablement par tous les lieux où il passoit. Finalement il arriua en vne villette nommee Chiquier, fort frequentee des habitans du pays qui y courent en pellerinage à cause d'une Mosquee de Mahumet qui y a la vogue par dessus toutes les autres: car les prestres d'icelle faisoÿēt actoire à ces pauures superstitieux, que Mahumet lui mesmes l'auoit fait bastir. Menefez auoit picqué iusques en ceste villette pour courir de là iusques à Maroch, qui n'en est qu'à seize ou dixhuit lieues. Toutesfois auant que monter à cheual il escriuit à Ataide, le priant de vouloir estre de la partie. Ataide fit responce que pour l'heure il estoit tant empesché à prescrire les articles de paix & d'alliance avec plusieurs Mores, que ce lui seroit chose impossible de quitter Tednest. Qu'il falloit d'autres forces plus grâdes pour entrer en Maroch, & ne point exposer telle fleur de noblesse à vn danger euidet sans honneur ni auâtage: & pour conclusion il prioit & adiuroit Menefez de se deporter d'une telle entrepri- se. Ce nonobstant Menefez alla trouuer Ataide. En ces entrefaites Alfonso Norogne gendre d'Ataide avec vne troupe de huit cens cheuaux Mores se mit en chemin pour surprendre de nuit vne ville forte à cause de son assiet- te au haut d'une montagne: ce qu'il executa, mais les ennemis sentans sa ve- nue deslogerent de bonne heure, toutesfois il y ea attrappa encores quel- ques vns. Or les compagnies estans lors plus completes que deuant, Me- nefez insista sur l'entreprise de Maroch, s'asseurant qu'ils l'emporteroient à ceste fois, à quoy Ataide ne voulut iamais entendre, craignant (comme le bruit

bruit en courut) que Menefez ne remportast l'honneur d'un si haut exploit: & ainsi ayant refusé tout à plat de passer oultre Menefez & ceux de sa compagnie furent contrains digérer ce morceau à leur grand regret.

12. AINSI donc Menefez deslogeant de Tednest tout despité entendit que les Rois de Fez & de Mequinez marchoyent avec une puissante armee pour assieger Azamor. Cela lui fit incontinct tourner bride en toute diligence, & en chemin il receut lettres de Roderic Barret qui disoyent le mesme, à l'occasion dequoy il conclud de doubler le pas. Toutesfois par l'avis de quelques capitaines, & de peur que les Rois ne le surprinsent en chemin, il escriuit à Bernard Manuel & à quelques autres gentilshommes, demeurez avec Ataide, qu'ils le vinsent trouver, & fit emporter les viures, armes & diuerfes munitions de guerre. Puis il entra dans Almedine, où il fut receu en grand honneur & magnificence par le gouuerneur d'icelle nommé Almeimam, lequel l'auertir de se tenir sur ses gardes, à cause de certains capitaines du Roy de Fez qui pour certain marchoyent deuant lui avec huit cés chevaux & six mil hommes de pied. Au partir d'Almedine Menefez print tellement son chemin par les villes & places confederées, que tousiours ses troupes marchoyent en bataille, comme si à toutes heures elles eussent deu combattre les ennemis. Toutesfois soit que ce bruit eust esté semé par des menteurs, soit que les capitaines du Roy de Fez se fussent oubliez en campagne, Menefez rentra sans empeschement dedans Azamor avec ses gens de pied & de cheual sains & saufs. Là il receut nouuelles assurees que le Roy de Fez auoit despesché deux capitaines avec leurs regimens bié fournis pour aller tenir garnison en la contree de Duecala, & que lon attendoit le Roy de Mequinez (residant en vne ville de son royaume, appelée Nafe) qui amenoit vne puissante armee. Or ce Roy estoit delibéré des'acheminer avec les lieutenans du Roy de Fez deuant Azamor pour l'assieger: ce qu'entendu par Menefez, il estima qu'il ne falloit pas attendre que les ennemis eussent ioint leurs forces ensemble. Et lui ayant esté rapporté que les lieutenans du Roy de Fez se refraischissoient en vne ville assez forte nommée Balbe, il resolut leur donner vne venue auant qu'ils en deslogeassent. Il enuoya incontinct messager expres vers Ataide, l'exhortant par lettres de se trouuer en ceste bataille, afin d'y acquerir honneur & faire seruice agreable au Roy Emmanuel. Du commencement ils furent en dispute du rédez-vous de leurs troupes: en fin ils choisirent vn lieu appelé Sea à douze lieues de Balbe. Ainsi donc Menefez mit aux champs le douziésme iour d'Auril huit cens chevaux & mille hommes de pied, & le lendemain se campèrent en vne plaine pres de certains estangs. Ce mesme iour arriuerent Ataide & Ichabentauf avec quinze cens chevaux de Mores pour la pluspart. Les chefs ayans tenu conseil arressterent que sur les neuf heures du soir le camp partiroit, afin qu'au point du iour ils peussent charger les ennemis à la despourueue. Pour marcher & combattre plus à l'auantage, ils firent cinq bataillons de toutes leurs troupes. Menefez conduisoit le premier, Roderic Barret le second, Iean Gonfalue de Camate le troisieme, accompagné d'Aluarez Caruail & Iean de Sylues pour y commander au besoin, Ataide &

Guerre entre les Rois de Fez & de Mequinez, à qui les Portugallois donnent bataille, & emportent la victoire.

son gendre Alfonse Norogne menoyent le quatriesme, Iehabentafule cinquiesme. Derriere ces cinq bataillons de gens de cheual marchoit toute l'infanterie ayant pour colonnels Pierre Moral & Iean Roderic. Le bagage & quelques pieces de campagne montees sur roues estoient au milieu de l'armee, autour de laquelle Menefez alloit, admonestant tous les chefs de leur deuoir, & les soldats aussi à se porter vaillamment pour acquerir honneur. Le soleil estoit ia leué quand ils approcherent du camp des ennemis posé en vne campagne rase proche d'un mont qui lui commandoit. Menefez ayant couru de l'œil & remarqué en ceste plaine le lieu où il falloit combattre, auertit les colonnels de l'infanterie de ranger leurs soldats en cest endroit au plustost qu'il seroit possible. Il y auoit en l'armee des ennemis plus de quatre mille cheuaux, & tant de pietons qu'on ne les pût compter. A dos ils estoient fermez d'un torrent qui separe la plaine de la montagne: & combien qu'il fust sec alors, toutesfois à cause du canal profond que les rauines d'eau auoyent creusé il pouuoit empescher que les ennemis ne gaignassent la montagne, sinon qu'ils voulussent se mettre en danger. Leurs troupes estoient parties en quatre: en la premiere marchoyent des pietons archers & harquebuziers, afin qu'à coups de fleches & de boulets ils entamassent le premier bataillon des Portugallois. Là dessus Menefez commanda aux trompettes de sonner bataille, & lors, tous crians sainct Iacques à la facon d'Espagne, il desbanda de telle roideur à trauers les ennemis, qu'auant que ceux des premiers rangs peussent l'endommager (ce qui estoit fort à craindre) il les rompit: & rechargeât de plus belle, mit à vau de route trois regimés de caualerie qu'il poursuiuit iusques au torrét, & tua quelques gés en la campagne. Ataïde qui auoit commandemēt de charger vn autre hot de caualerie, ne sceut rien executer: car ceste troupe estoit desmarchee pour aller au secours des autres contre Menefez. Pourtant il donna dessus les gés de pied & en fit vne terrible boucherie. Menefez arriué au torrent arresta ses gens, plusieurs desquels neantmoins, au mespris de son autorité, passerēt oultre. Ce seigneur estoit accompli en toutes les qualitez qu'on peut desirer en vn bon chef de guerre: mais, à cause d'une certaine douceur de nature qui reluisoit en lui, il ne tenoit pas la bride roide aux soldats. A raison de quoy quelques ieunes gentilshommes qui auoyent assez de cœur, mais peu de sens, ne peurent estre retenus par la presence de leur general, ains se fourrerent en peril de leurs vies sans aucun auantage. Menefez leur enuoya vn sien neveu pour les ramener. Icelui courant à bride abatue apres les arresta toutcourt, exhortât chascū deux de tourner bride: à quoy la pluspart obeïsoit, quād Arias Tello, ieune seigneur de grāde maison, extrememēt ambitieux, mais fort esceruellé, cōme on disoit, se print à crier, compagnons il n'est pas temps de s'en retourner: poursuiuons l'espee au poing ces Mores ci iusques à Fez. Ceux qui estoient en train de tourner visāge vers le camp furent tellement esmeus de ce propos, que sans tarder dauantage ils courēt apres les ennemis. Garfie neveu de Menefez voyant ceste resolution, Puis que vous le voulez, dit il, allons donc par dela Fez, & disant cela il se ioignit aux autres. Menefez ayant oui le vent de ceste folie delibera passer le torrét pour

pour recueillir ceux qui reuiendroyent plus viste encor qu'ils n'estoyent passez: car il voyoit desia ce qui deuoit auenir à ces ieunes fols. Etcependant il fit marcher vne compagnie de gens de pied, pour soustenir l'effort des ennemis. Ataïde ne voulut pas faire comme Menefez, craignant de dissiper ses troupes: mais il s'arresta au bord, afin de repousser les Mores qui s'efforceroient passer vers lui. Ichabentafuf ne seruit de rien alors, car les gens qui ne demandoient qu'à butiner l'abandonnerent si tost qu'il virent le camp des ennemis en route. Mais quand ceux qui auoyent gaigné la montagne ne se virent poursuiuis que par vne poignée de gens, ils tournerent visage, & les chargerent de telle furie que les Portugallois furent rompus & contrains se sauuer de viffesse, laissant la plupart de leurs compagnons tuez sur le champ, pour payement de leur temerité, entre autres Arias Tellio & Garfic de Menefez. Les Mores poursuiuant leur pointe, & reprenant leurs esprits, commencerent à sentir tellement leur cœur pour auoir esté les maistres en ceste charge, contre toute esperance, qu'ils allerent attaquer Menefez mesmes de telle vigueur qu'ils le contraignirent de repasser le torrent, ce qui n'auint sans grande effusion de sang, & de fait il perdit cinquante hommes d'armes en ce cōflict, & en emmena plus de cent blesez. Ce iour, comme lon entendit depuis, furent tuez du costé des Mores ennemis deux mil six cens soldats, & l'un des lieutenans du Roy de Fez: l'autre fut abatu de son cheual en terre & reduit en extreme dâger, mais il fut rescous par ses gens. Ils y laisserent aussi sept capitaines, & eurent plus de quatre mille blesez, laissant de prisonniers aux Portugallois deux cens quatre vingts personnes, du nombre desquelles furēt les femmes & enfans des capitaines de Xerquie qui se trouuerent en la bataille. Les Portugallois auoyent obtenu vne victoire memorable, si l'incōsideration de ces ieunes esuentez ne l'eust desfiguree en quelque sorte. Quant les ennemis apperceurent les troupes de Portugal reuies ils n'oserent pas en approcher: par ainsi les victorieux ayans ia partagé le butin s'en retournerent à leurs iournees chascun en sa garnison.

13. LES ROIS de Fez & de Mcquinez n'auoyent encores rien entendu de la desfaite de leur armee quand ils resolurent d'acheminer leur dessein touchant le siege d'Azamor. Suiuāt cela Nazer Roy de Mcquinez sortit de son royaume avec toutes ses forces, & commença à tirer vers Azamor. Mahumet Roy de Fez lui enuoya de renfort bon nombre de gens de pied & de cheual. Lors qu'il fut question de passer la riuere qui traucrse Azamor, les compagnies du Roy de Mcquinez employerent sept iours à cela, tant il y auoit de gens. Menefez estimant qu'Azamor seroit assiegee en escriuit incontinent au Roy de Portugal, qui fit diligence de pouruoir à tout ce qui estoit requis pour fortifier la ville. En ces entrefaïtes Nazer receut nouvelles de la victoire obtenue par Menefez, ce qui lui fit châger d'auis: car il delibera fourrager le territoire d'Almedine, & fit vn estrâge de gâst en la campagne, puis se rendit maistre d'Almedine, mit au fil de l'espee la garnison qui n'auoit pas voulu suiure le gouuerneur Almeimam, lequel s'estoit sauué dedans Safin. Ichabētāfuf n'ayant forces suffisantes pour faire teste à vne

*Nouvelle
guerre en
Azamor, & les
diuers succès
d'elle.*

si grande armee, & le renfort enuoyé par Ataide (qui craignoit vn siege & pourtant ne s'estoit voulu afoiblir) ne le soulageant pas beaucoup, cōclud de se retirer à Safin. Mais auant que partir il fit estoupper quelques puits, fouiller & infecter les autres par des charongnes puantes & fruits pourris qu'on y ietta, afin de tuer de soif l'armee de Nazer. Or en employant le temps à cela, ce Roy gaignoit chemin & l'attaignt, tellement que ne pouuant euitier le combat, il falut ioindre, & y eut vn trefaspre cōflict. Du costé de Iehabentafuf quelques gens de cheual demeurerēt sur le chāp, entre autres vn capitaine fort & vaillant entre tous, nōmé Benamire. Le Roy y perdit cinquante cheualiers & le colonnel des compagnies du Roy de Fez. En ce cōflict Iehabentafuf fit de tels actes de prouesse que plusieurs estoient ravis de le voir : aussi quitta-il tellement la place, que les ennemis ne s'eschaufferent pas fort à courir apres. Cependant il perdit mille chameaux du butin des rencontres precedentes. Ataide lui donna vn quartier ioignāt les murailles de Safin, pour y acommoder son camp. Quant à Nazer, son armee estoit en merueilleuse disette d'eau, pour à quoy pouruoir il fit de nouveau creuser des puits, perdant ainsi le temps à choses de nulle importāce : au moyen dequoy Iehabentafuf entreprit de lui dōner vn alarme de nuit & le forcer en ses pauillons, dont Nazer auerti remua tout soudain son cāp en vn lieu plus fort. Les Mores de Xerquie conoissans par effect le cōur vil de ce Roy, duquel ils se deshoient aussi à cause de son inconstance, commēcerent à le hayr & desdaigner. Ce qui les despitoit dauātage, fut qu'ayāt promis d'assiēger Azamor & Safin, comme son armee si grāde lui en donnoit bien les moyens, il n'auoit osé en faire espreuue, tant il estoit couard. Ils portoyent fort impatiemment aussi que sous esperance de succes fort heureux on les auoit destournez de la suiuetion par eux iuree au Roy Emmanuel. Pour descourrir dōc leur haine, & recouurer par quelque acte notable la bonne grāce d'Emmanuel, de laquelle ils estoient decheus par leur reuolte, ainsi que Nazer Roy de Mequinez & son camp seiurnoyent pres d'une ville nōmée Tazarote, sans se soucier de leur promesse (aussi sont-ce gens qui ne font conscience d'estre traistres & periures) ils entrent de furie au camp, mettent au fil de l'espee ce qu'ils reuontrent, donnent la chasse aux forces du Roy, prennent huit cens cheuaux & les emmenent avec plus de mille personnes pour estre esclaués. Le Roy priué de moyens s'enfuit honteusement & avec grand' perte en des montagnes fort hautes, d'oū il trouua moyen de se retirer en son royaume.

Mort de Jean de Menefez, à qui Pierre de Souze succeda en charge.

D V R A N T cela, Menefez deuint extremement malade, & comme il estoit au liēt, on lui apporta lettres d'Emmanuel qui l'ellesuoit iusques au ciel par vne infinité de louanges, & promettoit le recōpenser amplement pour recompense de ses grands seruices. Il ne fit aucune responce à telles lettres, car alors il se voyoit bien pres du bout de ceste courte & miserable vie, & aspirait ardemment & de tout son cōur à l'eternelle. Pourtant apres auoir communiqué à toutes les ceremonies obseruees à l'endroit des mourans selon la religion Romaine, & monstré des tesmoignages de sa deuotion & de son esperance, son ame deslogea de la prison du corps & s'en

& s'en vola au ciel, par le iugement de tous ceux qui l'ont conu. Car c'estoit vn seigneur non seulement sage & vaillant capitaine, mais aussi de bonnaire & misericordieux, plaissant en sa conuersation & en toutes rencontres, chaste, & droiturier entre tous ceux qui auoyent tousiours fait profession des armes: & quand par fois il lui estoit auenu de porter affectiō à quelque dame, l'issue auoit tousiours monstré qu'il ne cherchoit qu'à passer le temps sans commettre vilenie de fait ni de paroles, ni donner occasion de penser qu'il y eust vn seul trait de meschante volonté en lui. Ses ennemis le redoutoyent autant que la foudre, ses soldats l'aimoyent singulierement: il laissa tous ceux d'Azamor contristez & espleurez vne longue espace de temps pour auoir perdu vn tel personnage. La poesie qu'il composoit en sa langue maternelle à monstré la gentillesse de son esprit, car on ne sauroit lire chose plus aigue ni plus plaissante. Parmi ces vertus il estoit adonné aux predicions & deuinations, & par fois vne certaine melancholie l'agitoit tellement qu'il demouroit comme insensé. Mais ces imperfections estoient estaintes par tant de belles parties, qu'il semble que les plus grands defauts de cest excellent personnage doyuent estre supportez. Pierre de Soufe, depuis Comte des Prez, lui succeda en sa charge, & Roderic Barret retourna en Portugal.

15. EN ceste annee Pierre de Menefez seigneur d'Alcoutin continuant ses courses sur les Mores, sur la fin du mois de juillet se rédit sur les frontieres de Tutua, mit au tranchât de l'espee grand nombre d'ennemis, & enmena les autres prisonniers. Au commencement d'Octobre il receut nouuelles que deux freres du Roy de Fez estoient en campagne avec dix mille cheuaux & force gens de pied pour venir assieger Septe, & qu'ils auoyent vne flotte en mer, afin de serrer & battre la ville par mer & par terre. Iceux assirēt deux embusches en des bocages, & enuoyerent vingt cinq coureurs pour attirer Menefez, lequel fit sortir quinze des siens deuant, & les suiuit de pres acompagné de cent & quinze cheuaux, afin de les soutenir, quand les ennemis (comme il presumoit) fortiroyent de leurs embusches. Ces quinze chargent les vingt cinq qui commencent à reculer iusques à ce qu'ils eurent attiré les poursuiuans pres de l'embuscade. Les autres voyans ce filé tendu retournent à bride abatu etrouuer Menefez, estās poursuiuis par deux cens cinquante cheuaux, apres lesquels marchoit vne grosse troupe de caualerie. Pierre de Menefez se retira soudain dedans le fossé qui ceint la ville. Les deux cens cinquante cheuaux meslez parmi les coureurs de Menefez entrerent dans le fossé, & lors commencerent à chamailler les vns sur les autres de grande furie: mais avec tel desauantage pour les Mores que deux cens des leurs y furent tuez. De ceux de la ville il n'y en eut qu'un, & trente six blesez. Ce pendant les freres du Roy de Fez arriuent pour empêcher que les Portugallois ne gaignassent les portes, & les soldats qui estoient es nauires prenoyent desia terre. Mais alors Menefez & ses troupes estoient rentrez, & auoyent si bien serré les portes que l'effort des ennemis tourna en fumee. Ils font porter leurs morts dans les nauires, pleurans & lamentās telle perte: car c'estoit la fleur de la ieune noblesse du royaume de Fez, &

Guerre de Septe, & ce qui en auut.

dont les vieux capitaines esperoyent le plus pour l'auenir.

*Des pen-
ples de Barba-
rie se rendent
vassaux &
tributaires du
Roy de Portu-
gal.*

EN ce temps les Mores trembloient en oyant seulement parler du Roy de Portugal, & d'autre part sa douceur & equité le recommandoit & faisoit merueilleusement estimer au milieu de tous ces peuples, lesquels se sentans ainsi harassez & en transe continuelle pour les alarmes & courtes des capitaines Portugallois, voyans d'autre part que leurs propres seigneurs les tyrannisoient, commencèrent à tendre les mains à Emmanuel & le supplier de les receuoir en sa protection, en leur imposant tel tribut & baillant tels gouuerneurs que bon lui sembleroit, promettans de combattre pour l'accroissement de sa dignité royale iusques à la dernière goutte de leur sang. Nonseulement les habitans des villes, mais aussi les villageois & montagnars, ayans aprins si long temps le mestier de la guerre & tousiours à leurs despens, aimèrent mieux s'asservir de leur propre mouuement pour se maintenir, qu'estre tousiours sur le point de perdre & biens & vies. Ainsi donc les principaux de Xerquie enuoyez en ambassade vers le Roy, apres auoir obtenu audience, & remis toute la prouince en la main d'icelui, prièrent que Xerquie fust de la en auant vne prouince distincte d'avec Garabie & Dabide, & qu'un nommé Abdaramé fust establi gouuerneur de Xerquie. Mais afin que lon n'estimast qu'ils eussent peur ou fussent ennemis de Iehabentafuf, ils remonstrerent que le pays nommé Duecala, lequel contiét ces trois principales communautéz ou prouinces susnommees, estoit si grand que Iehabentafuf seul ne pourroit suffire à pouruoir aux affaires. Qu'il aueroit assez de charge en son gouuernement de Dabide & Garabie, & qu'il permist que Xerquie fust gouuernée par vn autre. Ils adioustoyent pour contenter Iehabentafuf, qu'Abdaramen estoit de sa maison, & fait de sa main, tellement que chascun tenoit pour certain que le disciple suiuroit tousiours le cōseil du maistre. Qu'en cela cōsistoit la paix du pays, l'administration aisee de iustice, & le proufit du Roy : pource qu'enclinant volontiers à la requeste de ses vassaux, ils se les redroit plus prompts à leur deuoir & exigeroit tant plus aisément le tribut qu'ils vouloyent payer. Ces ambassadeurs furent benigneement receus, & obtindrent du Roy ce qu'ils demandoient, à condition toutesfois, que quand ces trois prouinces de Duecala ioindroient leurs forces ensemble pour la guerre, elles reconnoistroyēt Iehabentafuf pour leur general, & obeiroient sans contredit à ses commandemens. Le Roy defendit aussi que personne n'allast demeurer d'une communauté en l'autre, pour obuier à toute confusion, & de peur que cela n'esmeust quelque trouble dont vne guerre pourroit s'ensuiure. Il eu escriuit à Ataïde & à Pierre de Soufe gouuerneur d'Azamor. quant à Iehabentafuf il approuua sans repliche le partage que le Roy auoit fait.

*Tumulte sur-
ueni entre les
Mores, & les
conuers de Ia-
ques Lopez,
iustices ou ter-
ritoire de Ma-
roch.*

CESTE mesme année Ataïde enuoya vn herault nommé Iacques Lopez en Xerquie pour exiger des paysans le bled qu'ils deuoyent contribuer, & le faire conduire dedans Azamor. Lopez ayant executé sa commission, se mit au retour avec les Mores qui menoyent le bled sur des bestes de voicture. Estant en chemin il rencontra soixante hommes de cheual venans d'Azamor. Les Mores estimans que ces cheuaux fussent en campagne pour
les

les molester, courent incontinent aux armes, & se preparent courageusement au combat. Lopez se met entte deux & fait deuoir de herauld: mais à peine pût il appaier les Mores qui disoyent ne sauoir qui estoit Soufc, & ne reconoistre autre qu'Ataide, avec lequel ils auoyent accordé de porter le bled, non pas avec Soufc. Combien que Lopez taschast de les adoucir, eux ne cessoyent de se plaindre des outrages que Soufc leur auoit faits, depuis qu'il estoit deuenu gouuerneur d'Azamor, & que ces gens de cheual y fissent porter le bled s'ils vouloyent: que de leur part ils n'estoyent pas deliberez de mettre le pied dedans ceste ville là. Neantmoins Lopez les mania si dextremement & doucement que tout fut racointé, & mesmes il leur persuada de faire vne course avecques lui iusques auptes de Maroch. Suiuant quoy il choisit quatre cens vingt trois hommes de cheual des plus asseurez & mieux montez de leurs troupes, avec vingt sept cheuaux Portugallois, & picquant de là iusques au lendemain assaillit quelques compagnies logees à deux lieues de Matoch, tua ceux qui voulurent faire teste, print cinquante trois prisonniers & emmena force bestail & des chameaux. Apres cela ils courent iusques pres de Maroch, & les Mores mesmes apres auoir crié Emmanuel plusieurs fois allerent donner des coups de lance cõtre les portes de la ville. Le Roy de Maroch troublé d'un accident si nouueau, monte à cheual bié suiui pour repousser ces coureurs, qui combattent & tuēt quatre hommes de cheual, puis se retirēt à sauueté avec leur butin au lieu d'où Lopez les auoit emmenez, & ayans partagé la proye les Mores menerent leur parten Xerquie. Lopez retourna dedans Safin conduisant ses prisonniers, dont chascun fut merueilleusement esbahi, estimās incroyable qu'un herauld, homme de petite estoffe, eust osé entreprendre, en si petite troupe & tant suspecte pour la pluspart, entrer en pays où Ataide si vaillāt capitaine, appellé par Menefez pour mesme execution, auoit douté de pouuoir paruenir.

12. S V R la fin de ceste annee le Roy de Portugal enuoya trois ambassadeurs au Pape Leon dixiesme, avec des presens conuenables à la magnificence d'un Roy. Tristan de Cugne estoit le chef de ceste ambassade, accompagné de deux docteurs en loix, gens de grande autorité en Portugal, l'un nommé Iacques Pacheco, l'autre Iean de Far. Ils porterent au Pape des chappes & chasubles de drap d'or, recouuertes & entrichies par artifice singulier de plusieurs pierres precieuses: item des vases de fin or, des pendans & carquās d'or fort pesāns & de grand pris. Tout estoit tellement elabouré que la facon valoit sans comparaisō plus que la matiere trefriche de soy. Outre ces choses il enuoya vn fort haut elephant amené des Indes, lequel non seulement à Rome (où depuis le declin de l'empire personne n'auoit veu vn tel animal) mais aussi par tous autres lieux rauissoit tellement les personnes, qu'on ne pouuoit faire retirer arriere le peuple qui le venoit voir par grand esbahissement. Il enuoya aussi vne Panthere acoustumee à la chasse, present si exquis, que ie ne scay si iamais les Ediles de Rome (qui donnoyent le paisetemps de leuts magnifiques ieux aux citoyens Romains, & y faisoient voir maintes sortes de bestes sauuages & des Pantheres notam-

*Ambassade
& presens en-
uoyez par le
Roy de Portu-
gal au Pape
Leon dixiesme.*

ment) ont eu le moyen d'en faire voir vne telle. Car ceste ci apriuoisee ne combattoit point en vne place publique contre quelques hommes exposez aux bestes, ou qui entreprenoyét de les desfaire, mais courroit à la chasse apres les cerfs & sangliers, donnant beaucoup de plaisir aux Princes qui se plaisent en tel exercice. Elle estoit montee sur la croupe d'un cheual Persan brauemēt harnaché, & gouverné par vn Perse excellent chasseur, que le Roy d'Ormus auoit enuoyé avec la pāthere & le cheual. Tristā de Cugne, seigneur de trefnoble maison & de grande autorité, entreprint ceste ambassade à ses despens, & mena quant & soy ses trois fils, plusieurs de ses parens, & ses domestiques en grand nōbre, tellemēt que son train ressembloit à celui d'un Prince. Garſie de Refende, personnage fort respecté du Roy, estoit secretaire de ceste legatiō. Nicolas de Far maistre de l'equirie menoit vn cheual beau par excellēce, acoustré d'une selle & de tout le reste de son harnois de drap d'or, enrichis de broderie & de pierres precieuses propremēt acōmodees, pour en faire present au Pape. Estās arriuez pres de Rome le douziesme de Mars l'an mil cinq cēs quatorze, ils se disposerēt à faire leur entree, cōme s'enfuir. Tous les domestiques des ambassadeurs marchoyēt les premiers en bel equippage, suiuis de la panthere sur la croupe du cheual Persan & de l'elephant avec leurs gouverneurs. Nicolas de Far monté sur le cheual susmentioné, marchoit vn peu apres l'elephant & fermoit ceste premiere bande. La seconde estoit composée de gentilshommes qui honnoyent de leur compagnie les ambassadeurs, & marchoyent en rang, ayans derriere eux le herauld de Portugal avec sa cotte d'armes. Puis Tristan de Cugne suiuoit estant au milieu des deux autres ambassadeurs. Auāt qu'entrer en la ville ils furent recueillis en grand honneur par les gētilshommes de la maison des Cardinaux, en apres par les ambassadeurs des Princes estrangers, & par beaucoup de grands seigneurs. Comme ils approchoyent des portes, le gouverneur, suiui de certains Euesques & des domestiques du Pape, sortit au deuant d'eux & leur fit vne harangue de la part du Pape, les gratifiant de leur venue, & disant qu'à iamais le Pape se souuiendroit de tous les bons & notables seruices du tresillustre prince Emmanuel Roy de Portugal, lequel combattoit sans cesse pour la foy, & qu'il les auoit pour tresagreables, comme tels seruices le meritoient aussi. Les ambassadeurs firent responce de mesme. Puis les commissaires ordonnez à cest effect vindrent, qui pourueurent à ceste entree, & cependant l'air & la terre retentissoyent du son des fleutes & haubois, & de la fanfare des trompettes. Il n'y eut grād seigneur qui n'honorast les ambassadeurs selon l'ordre assigné par les commissaires. La garde des Suisses marchoit deuāt l'enseigne desployee avec les fifres & tabours. Toutes les rues & places estoient si plaines de gens acourus de toutes parts à ceste entree, qu'on auoit peine, mesmes à coups de baston, d'obtenir large. Estās arriuez pres du chasteau sainct Ange, l'artillerie commença à tonner de telle sorte que toute la ville trembloit. Apres que la fumee se fust esuanouie, le Pape regardant par vne fenestre, voici approcher l'elephant, qui lui fit trois grandes reuerences, flescissant les genoux & baissant le corps par trois fois, dont tous les assistans furent grandement esba-

eſbahis. Puis courbant ſa trompe en vne grande pipe plaine d'eau, il en puiſa quantité dont il en arrouſa quelque peu ceux qui regardoyent par les fenestres, & ſe tournant vers le peuple, afin de leur donner quelque part du paſſetemps, il ne leur eſpargna pas l'eau, ains les en mouilla bien fort. Telle fut l'entree des ambassadeurs que lon conduiſit de là en leurs logis. Le vingtieſme iour du meſme mois il furent menez en meſme cōpagnie, pōpe & ſolennité au palais du Pape, qui les attendoit en ſon pōtificat, reueſtu de ſes acouſtrements acouſtumez en telles receptions, & enuironné de Cardinaux aſſis en leurs chaires. Avant toute autre choſe les trois ambassadeurs baiſerent la pantoufle du Pape, comme firent auſſi tous ceux de leur ſuite, ſelon l'ordre deſigné par les commiſſaires. Cela fait Triſtan de Cugne lui preſenta les lettres du Roy Emmanuel qui furēt leuës tout haut, & ne contenoient autre choſe que la creance des ambassadeurs. Lors Iacques Pacheco fit ſa harangue, compoſant ſa voix & toute ſon action de ſi bonne grace, que ce iour il acquit l'hōneur d'eſtre vn des plus eloquens de ſon aage. Quant au Pape, il fit reſponſe bien au long en bons & beaux termes Latins, avec grauité, loua fort le Roy Emmanuel & la prouëſſe des Portugallois. Le lendemain les ambassadeurs furent menez en vn verger derriere le palais ſur le haut du Vatican, où le Pape les attendoit, & auquel ils offrirent les preſens du Roy, dōt la beututé & l'artifice le rauit lōguemēt. De là il deſcendit incontinent au iardin pour voir l'elephāt & la pāthere : pource que l'elephant ne pouuoit monter à l'aiſe iuſques au ſommet du palais où eſtoit l'entree du verger. Il voulut voir comme la panthere ſauoit chaffer, & fit amener quelques beſtes, contre leſquelles le veneur ayant laſché la panthere, elle leur courut ſus & les eſtrangla tout à l'inſtant.

19. **Q**VELQUES iours apres, Triſtan de Cugne & ſes compagnons propoſerent au Conſiſtoire de Rome les demandes du Roy Emmanuel, dont vne partie concernoit l'eſtat commun de toute la Chreſtienté, le reſte touchoit le proufit & auantage particulier du Roy. Pour le commun il requeroit que le Concile aſſigné fuſt tenu, & les decretſ d'icelui ratifiez : que lon trouuaſt moyen de deſtourner les gēs d'Egliſe de leurs diſſolutions & meſchancetez, pour leur aprendre à viure chaſtement & ſainctement ; qu'on pourueuſt à ce que les Princes Chreſtiens quittatſſent leurs querelles pour s'allier tous enſemble & faire la guerre au Turc. Ces demandes furent reiettees, n'eſtans pas alors temps d'y toucher. Le reſte fut gracieuſement accordé, aſſauoir que le tiers & le dixieſme des reuenus aſſignez pour l'entretienement des Eccleſiaſtiques & du ſeruice diuin fuſſent donnez au Roy, pour les employer aux affaires de la guerre contre les Mores : que la pluſpart des biēs des Eglifes enſemble les reuenus de quelques abbayes & conuents fuſſent aſſignez pour l'entretienement des ſoldats qui iroyent en ceſte guerre : que le Pape fiſt largeſſe de ſes pardōs à ceux qui voudroyēt fournir deniers pour les frais de la guerre meſme. Ceſte largeſſe des biens Eccleſiaſtiques ne ſauroit eſtre excuſée, ains merite grande reprehension, cōme pluſieurs auſſi s'en trouuerent lors bien mal edifiez. Car ils diſoyent que ſi le Roy vaincu par l'importunité de quelques pinſe-mailles auoit fait telle deman-

Demandes du Roy de Portugal au Pape, notamment d'une partie des reuenus Eccleſiaſtiques, & diſcours de l'historien ſur cela.

de, le Pape ne deuoit pas estre si prôpt ni si large à l'accorder: pource que tels reuenus auoyent esté religieusement conseruez non seulement entre ceux qui faisoient profession de seruir au vray Dieu, mais aussi parmi les Grecs, Romains, Egyptiens & autres nations, tellement que quiconque y mettoit la main, estoit estimé coupable d'un si grand forfait qu'il n'y auoit presque aucun moyen de l'en absoudre. Ils adioustoient que la conuoitise des Chrestiens deuoit estre reprimée par autre moyen, à sauoir par saintes admonitions, & qu'on ne deuoit ainsi permettre ce mellinge de choses sacrées & profanes pour assouir la faim enragée de certains auaritieux qui ne pouuoient estre cōtentez en sorte que ce fust. Vray est que du temps des Rois Alfonse neuuesme & onzième, le tiers & le dixiesme des reuenus Ecclesiastiques leur auoyent esté ottroyez pour vn temps prefix: mais leurs tuteurs auoyēt mal mesnagé le domaine, & y auoit iuste occasiō d'employer tous les ornemens & reuenus des Eglises, sans espargner mesmes ni ciboires ni calices, pour fournir aux frais de la guerre & chasser les troupes des Barbares qui se iettoient dedans l'Espagne. Semblablement le Roy Fernand & Isabelle estans espuisez de finances à cause de la guerre de Portugal, & sentans en tomber vne autre sur leurs bras contré les Mores de Greuade, pour la religion, semblent auoir à tresiuste raison obtenu le mesme indult du Pape. Toutesfois le Roy Alfonse premier, qui n'auoit pas grandes commoditez, & qui chassa de Portugal vne puissante armee de Mores riches & puissans, non sans vne lōgue & perilleuse guerre, ne voulut iamais toucher aux biens de l'Eglise: ni son fils Sance non plus, lequel guerroyant les Mores d'Andalouzie, les desfit pres de Seuille, & taignit de leur sang le fleuve Bætis, aujourd'hui nommé Guadalquivir. Iean premier, qui apres auoir mis fin à la guerre contre le Roy de Castille print la ville de Septe: Alfonse cinquiesme conquisteur de Tingi, d'Arzile, & d'Alcassarquibir: Iean second, lequel fit preue de sa vertu admirable es guerres contre le Roy Fernand, & en celle d'Afrique aussi: ces Rois, di-ie, ne s'emparerent onc des reuenus Ecclesiastiques. S'il falloit ensuiure les exēples (puis qu'on estime que ce qui se fait par exēple doit seruir de reigle) il falloit s'arrester beaucoup plustost à ceux des Rois de Portugal que d'autres Rois & princes estrangers. Dauantage, les Rois qui par la permission du Pape mirent la main aux biens de l'Eglise, auoyent lors quelque excuse à cause de leur disette: mais Emmanuel estoit si riche, quand il fit ceste demande, que tous ses predecesseurs n'auoyent possédé aucuns deniers à comparaiſon de lui. Et si ceux qui se graisoient les mains de cest argent sacré eussent employé leurs iours pour la religion, comme on faisoit iadis en la terre & guerre sainte, alors le Roy eust eu droit de demander & le Pape d'accorder ce don. Or le pis fut que par l'entremise des ambassadeurs, qui pretendoyent auoir part au gasteau, on adiousta vne clause aux bulles de Rome, que le Roy pourroit donner l'argent de ces reuenus non seulement aux soldats combatans pour la religion, mais aussi à toutes autres personnes qui auoyent meritē recompēse de seruices par elles faits. Ceste porte ouuerte aux alterez d'argent, il auint que ces reuenus tomberent es pattes de certaines harpyes, c'est à dire de quelques mignons

mignons & damerets qui n'auoyent iamais veu l'ennemi, ains au contraire pallissoient de frayeur au premier propos qu'on leur tenoit de la guerre d'Afrique. Finalement, le Roy ne gaigna pas ce que ses flatteurs lui auoyent soufflé aux oreilles. Il desiroit garder aisément les villes de la coste de Barbarie, obliger de plus en plus à son seruice les gentilshommes, en les bien appointant, & remplir son espargne. Mais apres cest octroy, les affaires de la guerre d'Afrique empirerent pour les Portugallois, la noblesse deuint plus necessiteuse qu'auparauant, & commença à se plaindre dauantage qu'elle n'auoit oncques fait: l'espargne du Roy au lieu de se remplir des grands deniers qu'on y apportoit, s'espuisoit & tarissoit du tout par despenles inutiles, & quelquesfois par accidés deplorables. De ma part i'approuue la despenle des biens Ecclesiastiques, pourueu qu'elle soit mesurée, & fournie à gens qui combattent pour maintenir la religion, & non point à ceux qui se contentent d'en porter le tiltre: mais ie diray franchement qu'on ne deuroit nullement permettre que ie ne scay quels effeminez, qui iamais ne desgainerent espee, s'ingeraissent de receuoir & emporter leurs chapeaux plains de ducats tirez des reuenus del'Eglise. Mais pour reuenir à nostre premier propos, apres que les ambassadeurs eurent acompli leur commission selon leur desir, ils reprindrent le chemin de Portugal avec lettres contenans vn tesmoignage de tresaffectionnee volonré du Pape enuers le Roy Emmanuel, qui relascha aux Ecclesiastiques ce tiers & dixiesme de leurs biens, dont il acquit grande louange, & eux aussi pour reconnoissance d'un tel support, lui firent present de la somme de cent cinquante mille ducats, payable à trois termes. Quant aux pardons du Pape pour ceux qui contribueroient certaine somme applicable aux frais de la guerre d'Afrique, il en prouint d'horribles scandales, par l'auarice & meschanceté de ceux qui portoyent ces pardons. Le Roy en fit chastier quelques vns, & tous furent tellement punis de la main des hommes, ou frappez du iuste iugement de Dieu mesmes, que la fin de leur vie môstra que le iuge iuste & tout puissant estoit irrité de la conuioitise de ceux qui auoyent pratiqué telle inuention pour emplir leurs bourses. L'argent que les Ecclesiastiques deuoient contribuer pour la guerre, & pour les soldats de Iesus Christ (ainsi se faisoient ils appeller) montoit pour l'ordinaire à vingt mille escus. Mais le Roy voulut que cela fust moderé, & premierelement afranchit presques toutes les Abbayes, detenues par la violence de quelques vns qui n'auoyent oncques porté les armes, & neantmoins s'estoyent logez chez les moines sous pretexte de ceste guerre sacree. Pour le regard des autres benefices il establit des iuges equitables, donnant ordre que tout se maniaist doucement. Mais ceux qui ne demandoient qu'à se gorger, trouuerent tant d'inuention que tout alloit de trauers: car ils taxoyent si bas les fruits qui deuoient estre assignez aux soldats, qu'à peine tout le reuenu annuel d'une prebende ou benefice pouuoit suffire pour la pension d'un seulement. Quant aux Ecclesiastiques, ils ne leur laissoient aucuns reuenus, ains reduisoient leur pension en argent, les chassans peu à peu de leurs possessions par tels artifices. Or quand on vendoit les fruits, & que le pris haussioit tous les ans, les gens

darmes s'enrichissoient, au contraire les prestres demeuroient tousiours en mesme pauvreté,

*Ambassade
du grand Ne-
gui en domi-
nateur d'E-
thiopie vers le
Roy de Portu-
gal, & à quel
propos le vul-
gaire nomme
ce grand Ne-
gui le prestre
Iean.*

ENVIRON ce temps futuint vn autre ambassadeur en Portugal, dont le Roy receut fort grand contentement. Nous auons veu ci deuât comme l'Empereur d'Ethiopie de la l'Egypte vers le Midi auoit enuoyé en ambassade vers le Roy Emmanuel vn Armenien nommé Mathieu. Albuquerque le recueillit honnorablement, comme dit a esté au huitiesme liure, & apres lui auoir fait quelques presens l'enuoya en Portugal. Les capitaines qui le conduisoient lui firent rout plain d'outrages, en despit d'Albuquerque, disant que ce Mathieu estoit vn boufon & ioueur de passepasse, & qu'Albuquerque n'auoit pas la teste bien faite d'adiouster foy aux paroles d'un basteleur. En somme ils traiterent cest Armenien, non point en qualité d'ambassadeur, mais comme quelque chetif esclau : à cause dequoy ils furent depuis ferrez en prison pour estre punis selon leurs demerites, mais par l'intercession de cest ambassadeur mesme on les relascha. Or pour entendre quelle fut sa legation, il faut reprendre le propos vn peu de plus haut. Nous auons dit que le Roy Iean second desiroit infiniment descouurir toutes les Indes Orientales. Ayant entendu qu'il y auoit vn certain Empereur Chrestien de fort sainte vie, lequel dominoit es Indes & s'appelloit prestre Ieā, & apres auoir veu plusieurs fois des prestres Ethiopiens venir à Rome, & voyager en France & en Espagne, cela lui fit penser qu'ils venoyent de ce quartier des Indes où regnoit ce prestre Iean, qui (à ce qu'on disoit) estoit Pape en ces pays Orientaux, comme vne partie de l'Europe en reconoit vn deçà. Quand mesmes on interroguoit ces prestres passagers, si leur Roy auoit ainsi vne prestrie souveraine, si on l'appelloit prestre Iean, & si leur pays estoit limité dedans les Indes Orientales, ils ne disoyent pas du cōtraire, pensans si ceste opinion s'imprimoit en l'entendement des Chrestiens de l'Europe, qu'on les y receuroit & traiteroit en plus grande douceur. Alors le monde estoit si ignorant que personne ne l'auoit remarquer la distance qu'il y a entre l'Ethiopie & les Indes Oriētales. Doncques apres que le Roy Iean eust oui conter merueilles de ce prestre Iean, il conclud que ce lui feroit vn grand honneur, & l'auancement du Christianisme, avec vn expedient aisé pour descouurir les Indes, & qu'il ne sauroit desirer dauantage que d'estre allié avec ce prince Chrestien. Et pourtant en diuers temps il offrit grosses pensions à des hommes qui entendoient bien la langue Arabesque, pour aller descouurir ces pays du prestre Iean. Finalement il en trouua deux, l'un nommé Alфонse Payua, & l'autre Iean Petrejo, lesquels partirent de Portugal l'an mil quatre cens quatre vingts & six, habillez en marchans Egyptiens, & arriuerent en Aden, où ayans entendu qu'en l'Ethiopie sous Egypte à l'esgard d'Arabie, y auoit vn prince Chrestien, seigneur d'une merueilleuse estendue de pays, & à qui beaucoup de Princes obeissoient, ils presumerent que ce pouoit estre celui à cause duquel le Roy Iean leur auoit fait entreprendre ce voyage. Mais le nom des Indes les mettoit en perplexité : car ils estoient enuoyez pour parler à vn Empereur Chrestien es Indes Orientales nommé le prestre Iean. Or celui qui domi-

noit en Ethiopie n'auoit ce nom, ni tiltre quelconque d'Empereur ou de prestre. Apres auoir consulté ensemble de leurs affaires, ils reslorent que Petrejo feroit voile en Inde, pour voir, si lon y parloit point de ce prestre Iean, & que Payua l'attendroit à Thebes en Egypte. Il estoit bié vray qu'autresfois y auoit eu vn Prince ainsi nommé, adherant à la secte des Nestoriâs, qui tenoit vn fort grand pays au continent de l'Inde : mais il fut ruiné du tout par les Scythes ou Tartares qui s'emparerent de son royaume, & des long temps on ne faisoit plus aucune mention de lui. Toutesfois il y auoit encores quelques Chrestiens en ces quartiers là, infectez de l'heresie des Nestorians. Petrejo voyât qu'il ne faisoit que perdre temps, reuint en Egypte, afin d'auser avec Payua ce qu'ils auroient à faire. Il trouua deux Iuifs portans lettres du Roy Iean adressantes à lui & à son compagnon, lequel (à ce que lui certifierent les Iuifs) estoit desia mort. Or suiuant la commission du Roy les Iuifs prindrent le chemin d'Ormuz. Petrejo apres auoir beaucoup tracassé, fit le voyage du mont Sina pour visiter le sepulchre de sainte Caterine, puis retournant vers Aden & Zeila, finalement descendit es pays de l'Empereur d'Ethiopie, s'assurant qu'icelui estoit le Prince vers lequel il estoit enuoyé par le Roy de Portugal, puis qu'en tous ces pays Orientaux il ne trouuoit Roy ni Prince Chrestien que cestui là.

21. C E L V I qui regnoit alors en Ethiopie s'appelloit Alexandre, qui fut extrêmement resioi des lettres du Roy Iean, & fit à Petrejo le meilleur traitement qu'il fut possible: mais il mourut quelque temps apres auant que de respondre au Roy de Portugal. Et pource qu'il n'auoit point de fils, son frere, appelé Nau, lui succeda, lequel ne voulut iamais donner congé à Petrejo pour s'en reuenir. Icelui decédé, vn sien fils nommé Dauid fut créé Roy, qui ne voulut oncques permettre (non plus que son pere) que Petrejo sortist des limites de son royaume: car ces Rois, comme il est vray semblable, receuoient tel contentement de la communication qu'ils auoyent avec Petrejo, que c'estoit chose mal aisee de tirer de leurs mains vn personnage de la prudence & adresse duquel ils vouloyent se seruir. Lui aussi n'esperant plus pouuoir regagner le chemin de Portugal, se maria & eut des enfans; estant ainsi arresté maugré foy en Ethiopie. Mais il auint par succession de temps que Vasque de Gama entreprint de trouuer le chemin des Indes & descouurir les regions Orientales : tellement que sa flotte & les autres qui firent voile apres lui, & tant de braues capitaines qui allerent si auant & obtindrent tant de belles victoires, remplirent tout l'Orient du nom des Portugallois: ce qu'estant parueniu iusques aux oreilles de Dauid, auquel Petrejo fit entendre que les Portugallois estoient ceste natiõ de laquelle le Roy l'auoit enuoyé en Ethiopie, il lui suruint incontinent vn merueilleux desir d'enuoyer gens en ambassade vers le Roy de Portugal. Dauid estoit encores enfant, & auoit sa grand' mere nommee Helaine, femme de bon esprit, laquelle manioit les affaires du royaume. Ceci lui ayât esté communiqué, fut cõclu que l'Ethiopie ne sauroit estre plus honorée, ni la religiõ mieux maintenue que quand Dauid & vn si grand & religieux Prince que le Roy de Portugal seroyent alliez ensemble. Pour faire cest ambassade ils chois-

Par qui & pour quelle occasion le grand Negus d'Ethiopie enuoya son ambassadeur en Portugal.

rent ce Matthieu surnommé, natif d'Armenie, faisant profession du Christianisme, homme fort meur, & qui auoit longuement frequenté la cour des Rois d'Ethiopie, leur seruant de conseiller avec grand tesmoignage de prudence & loyauté. Il menoit quand & soy vn ieune seigneur du royaume, pour lui faire aprendre le langage & les facons de faire de Portugal. Ils furent honnorablement recueillis d'Albuquerque, & cruellement traitez de ses capitaines, comme nous l'auons veu ci dessus. Matthieu estant arriué finalement à Lisbonne fut receu de toute la noblesse & du clergé avec grâdes demonstrations d'amitié Chrestienne, & conduit au palais du Roy, lequel monstra bon visage & recut gracieusement cest ambassadeur.

Legation & presens de l'ambassadeur d'Ethiopie au Roy Emmanuel.

TROIS iours apres, Matthieu obtint audience pour declairer sa commission: ce qu'il fit sagement & en bons termes, puis bailla au Roy les lettres de la Roine Helaine cachettees de cinq seaux d'or, & lui presenta de la part de son Prince vne croix faite du propre bois sur lequel Iesus Christ fut crucifié pour le salut du gentre humain. Emmanuel la recut en grande reuerence & les larmes aux yeux, remerciant & louant Dieu qui auoit conserué quelque semence de Christianisme & de pieté en des pays si lointains & autour desquels le diable & ses instrumens auoyent fait tant de rauages. Matthieu tira puis apres d'une canne d'or les lettres que Dauid escriuoit à Emmanuel. Toutes les deux lettres de la mere & du fils estoient escrites en langue Arabesque & Persique, cōtenantes en substance ce qui s'ensuit. Premièrement, apres vne petite preface en laquelle le Roy parloit deuotement de la distinction des trois personnes coniointes en vne seule nature & Deité, il souhaitoit salut & bon heur au Roy de Portugal. En apres il le remercioit des lettres enuoyees aux Rois d'Ethiopie, puis magnifioit les forces & richesses, assurant que par le moyen d'icelles, si Emmanuel vouloit faire la guerre par mer, & lui par terre, ils courroyent sus aux Mahumetistes, racleroyent du monde la memoire du meschant & abominable Mahumet, & reconquesteroient le saint & sepulchre. Il autorisoit & auouoit consequemment Matthieu pour son ambassadeur, assurant que la croix qu'il enuoyoit pour signe d'amitié auoit esté prinse & taillee de dessus le bois auquel Iesus Christ sauueur du monde fut crucifié: inuitant Emmanuel à faire vne ligue offensiue & defensiue, laquelle aussi il offroit ratifier par mariage, disant que celui seroit chose tresagreable que leur amitié & leur accord en religion fussent cōfermez par ce lien sacré de mariage entre leurs enfans. Pour la fin il louoit les exploits des lieutenans d'Emmanuel es Indes, confessant que Iesus Christ y auoit besongné miraculeusement, & exhortoit le Roy de poursuiure iusques au bout ce qu'il auoit entrepris. Ces lettres leues Emmanuel fit conduire Matthieu en vn logis, & lui fournir largement toutes choses necessaires.

Description des l'estendues du pays sur lesquels domine celui que le vulgaire appelle Prestre

Mais ce que nous venons de dire requiert quelque description des pays auxquels ce Prince Chrestien commande. Son royaume est borné de l'Egypte au Septentrion, des montagnes de la lune vers le Midi, & à l'Orient de la mer qui coulant par le goulfe du sein Arabique s'estend iusques au port de Suez. Les limites s'auancent merueilleusement loin vers l'Occident,

car

car il ioint aux Noirs du pays d'Agelymba. Cependant les Arabes tiennent beaucoup de montagnes en ce royaume Chrestien, & ne sont suiets à personne : les autres Roitelets obeissent au grand Roy, & comme vassaux lui payent tous les ans grande somme d'or de tribut. Le Nil sort des montagnes de la Lune, & apres auoir fait plusieurs lacs & illes, il court au trauers de l'Egypte & dans Alexandrie puis se desgorge par plusieurs bouches en la mer Mediterranee. On estime que ce royaume a trois cens cinquante lieues de tour, & contient plusieurs hautes montagnes, presque inaccesibles, & qui n'ont qu'un chemin si estroit, qu'à peine vn homme seul y peut-il monter. Au sommet il y a des plaines belles & spacieuses, des fontaines d'eau douce, des pasturages & herbages trescommodes, des riuieres bien claires, troupeaux de bestail à laine & à corne, ruches de mouches à miel qui en font vne merueilleuse quantité. Le pays d'ebas est fertile & gras pour la pluspart, abondant en mines d'or, d'argent & d'airain, nourrit force bestes cheualines, foisonne en cotton, n'a point de vin, mais au lieu d'icelui les habitans font vne sorte d'hydromel agreable à la bouche & sain au corps. Ils ne se seruent que bien rarement de medecins & de medicaments. Toutesfois la nation est paresseuse iusques au bout, & à cause de sa feterdisse, & qu'il ne se trouue personne qui vueille mettre la main à la besongne, ils ne sauent tirer prouit de la bonté de leur terre. Le Roy est tousiours en guerre avec les peuples circonuoisins, & pourtant il ne demeure iamais en villes, ains passe toute sa vie sous des pavillons en plaine campagne, où il est acompagné d'un tel nombre d'hommes & de tentes, que son camp s'estend enuiron six lieues de long & autant de large : mais en tel ordre, encores qu'ils se remuent souuent, qu'il est aisé à toute personne de descouurir de l'œil les rues du camp, aller droit sans se fourvoyer estentes de ceux qu'il cherche, se presenter à tels seigneurs que bon lui semblera, & frequenter là dedans comme en vne ville bien hantee. Le camp est diuise en sept paroisses, qui ont chascune leurs prestres assignez, qui font le seruice, le profne, entretiennent leurs paroissiens en quelque ordre, ont discipline pour les tete-nir en bride, & les exhortent d'ordinaire à faire leur deuoir & se porter Chrestienement. Les villes du royaume sont petites, les maisons basses, les murailles foibles : neantmoins il y a des temples magnifiques & des moines basties à grands frais. Autresfois le Roy se faisoit adorer cōme Dieu, & ne monstroit sa face aux grands seigneurs mesmes, sinon quelques iours assignez à cela. Si quelques vns vouloyent parler à lui ils ne voyoyent que l'une de ses mains, ou l'un de ses pieds, & pensoient que ce fust un grand peché de le voir tout entier. Voulant respondre il se seruoit de gens interposez, & de derriere quelques rideaux (comme si c'eust esté un oracle) il parloit par ses truchemens. Mais quand les Portugallois secoururent ces peuples (aujourd'hui nommez Abyssins) reduits à l'extremité, qu'ils se mocquerent de leur bestise, monstrans cōme les Rois de l'Europe se comportoyent en tel cas, ceste folle ostentation de ie ne say quoy plus qu'humain s'esuanouit en l'air. Pour le iourd'hui on peut voir, aborder & ouir deuiser les Rois des Abyssins.

*Jean & les
mours de ses
suets, aujour-
d'hui nommez
Abyssins.*

*De la religion
& ceremonies
des Ethiopie
Abyssins.*

QUANT à la religion ils retiennent & obseruent plusieurs ceremonies ²⁴ prinſes des Iuifs. Les maſſes ſont circonciſ au huitieſme iour, & coupe lon meſmes quelque choſe aux femmes, afin qu'elles ſemblent aucunemēt circonciſes : & obseruent cela (diſent-ils) non point pour chercher quelque efficace de ſalut en la circonciſion : mais pour ſe propoſer deuant les yeux l'exemple d'Abraham & des autres ſaincts patriarches, à ce qu'un tel enſeignement les pouſſe plus hardiment & ardemēt à enſuiure tels ſaincts perſonnages. Les maſſes ſont baptiſez quarante iours apres la circonciſion, les femmes au bout de trois mois : & ce meſme iour on adminiſtre aux enfans d'age cōpetant le ſacrement de l'eucharistiē, aſauoir vn morceau de pain. Tous les ans ils ſolennizent le iour auquel Ieſus Chriſt fut baptiſe par ſainct Iean au Iordain, & ſe ſont rebaptiſer ce meſme iour : nonobſtant quoy ils tiennent que les pechez ſont effacez par vn ſeul baptēſme, & que les autres lauemens renouuellez en fin de chaſque annee ſeruent au corps ſeulement, & nē ſont point ſacrements du nettoiyemēt des ames : qu'ils ſont cela pour ſe ramenteuoir tant plus ſouuent le benefice de noſtre Seigneur, qui pour effacer les ordures de nos ames a verſe ſang & eau de ſon coſté. Celles qui ſont acouchees d'un maſſe n'entrent au temple que quarāte iours apres, & ſi c'eſt d'une femelle elles attendent deux fois autant. Les preſtres peuent ſe marier en premieres nopces : ſi leurs femmes meurent, ils ne ſe remariē plus, & paſſent le reſte de leur vie en chaſte vuidité. On les degrade s'ils cōmettent adultere, ou ſi durant leur veufuage ils ſont quelque vilenie. Auant que celebrer leurs ceremonies ils ſ'abſtiennent de leurs femmes quelques iours, ayans opinion d'eſtre plus propres alors à chanter meſſe, & que cela leur eſt vne vraye diſpoſitiō pour biē cōſacrer & immoler plus deuotemēt leur corpus domini. C'eſt vn forfait enorme à vn moine d'eſpouſer femme. Nul n'oſeroit entrer au tēple ſinō à pieds deſchaux, & ſont eſtimez meſchāſ ceux qui y rient, deuſent, qui ſ'y pourmeinent, ou qui y penſent à autres choſes que diuines & celeſtes. En leurs iuſnes ils ne boyuent ni ne māgent qu'apres ſoleil couché. Ils ſ'abſtiennent des viandes defendues en la Loy de Moÿſe : vont ſouuent à cōfeſſe vers leurs preſtres : communiquent à la table du ſeigneur ſous les ſignes du pain & du vin. Les moines ont pour aueur de leur ordre S. Antoine hermite d'Egypte. Quant aux Eueſques le Roy les cree : les moines eſliſent leur Patriarchie qui eſt conſermē par celui d'Alexandrie. En beaucoup de choſes ils ſ'accordēt avec les ceremonies Iudaiques, encores qu'ils afferment deſtouruer leur fiance d'icelles, & ſ'appuyer ſeulement ſur les merites & vertu de Ieſus Chriſt. Ils ſont beaucoup de feſtes, honnorent & inuouent les ſaincts treſpaſſez. Voila les ceremonies & maniere de viure des Chreſtiens d'Ethiopie, le ſeigneur deſquels nommē David enuoya l'ambaffade ſus mentionné au Roy Emmanuel. Or les enuieux & ennemis d'Albuquerque taſchoyent de faire par leurs detractions que le Roy ne ſ'arreſtaſt à la creance de ceſt ambaffade, ſouſtenant qu'il auoit dreſſe lui-meſmes les lettres preſentees & toute ceſte negotiatiō : afin qu'en le rendant ſuſpect, Albuquerque qui l'auoit honoré & recomman-dé per diſt autant de ſa reputation.

25. CESTE mesme annee George Albuquerque fut enuoyé par le Viceroy en Malaca, afin d'y commander en la place de Roderic Brittio, lequel ayant accompli le temps de sa charge fut rappellé en Goa. Apres que George eust passé la Taprobane, il alla surgir au port de Pacem, & entendit que le Roy se preparoit à la guerre contre vn Prince sien vassal qui s'estoit distrait de son obeissance. Pouzce que ce Roy estoit du nombre des confederes, les Portugallois le secoururent, & mirent en route l'armee de ce rebelle: puis reprindrent leur route en Malaca. Quelques mois apres George receut lettres du viceroy Albuquerque, portans commandement de priuer Ninachetue de sa dignité, & la bailler au Roy de Cāpar qui est vn petit royaume vers le Midi. L'estat de Ninachetuen sembloit si excellēt, que le Roy de Campar, quittant son royaume pour obtenir vne telle charge, estimoit estre plus grand seigneur qu'il n'auoit oncques esté. On ne fait pas qui esmut Albuquerque de despouiller ainsi Ninachetuen: sinon qu'il s'y fust mal porté, ou que ceux de sa iurisdiction le mesprisāns à cause qu'il estoit nouueau venu, eussent prié Albuquerque de leur dōner vn autre gouuerneur du sang royal. Soit pour cela, où pour autre occasion Albuquerque desmit Ninachetuen, establisant en son lieu le Roy de Campar affectionné partisan des Portugallois. George enuoya querir ce Roy par le capitaine Botel qui lui estoit familier, & qui partit de Malaca dans vne fregatte pour cest effect.

26. A V mesme temps le Roy de Bintam tenoit celui de Campar assiegé. Botel demanda secours par lettres à George Albuquerque, afin de deliurer leur allié. Francisque Melio fut despesché avec quatre nauires chargees de cent Portugallois & sept cens Malacans pour y aller. Avec ces troupes Botel resolut entrer par la bouche d'une riuere qui trauesse le pays de Cāpar: mais approchant des faubourgs de la ville assiegee il rencontra vn boulevard dressé par le Roy de Lingue, qui auoit prins ceste commission & promis au Roy de Bintam de ruiner celui de Cāpar. Lingue est vne ville & region limitrophe de Cāpar. Or tant plus les Portugallois auancoient plus la riuere s'estroissoit, & partāt le canal estoit profond & les riuies plus hautes, tellement qu'il y auoit danger que les ennemis ayans cest auantage des bords de la riuere surpassans en hauteur les nauires de Botel n'accablāssent les gens à coups de pierres & de traits. Pour ceste cause Botel fut d'auis de faire la guerre autrement, & trouua bon de fermer l'emboucheure de la riuere en mer, afin de couper les viures aux ennemis & les travailler de faim ou les attirer au combat en lieu qui fust plus à son auātage. Ainsi donc il tourna voile en arriere avec sa fregatte, & incontinent fut assailli par quatre vingts voiles & six mille hōmes du Roy de Lingue, lequel voguoit deuant en vn grand vaisseau avec les principaux de son armee: mais Botel en tua bon nombre & esfaroucha fort les autres à coups de trait & de canō. Ce vaisseau panchant d'un costé & à demi rompu se mit de trauers & atterra de telle sorte qu'on ne le pouuoit remuer, bouschant le passage aux autres qui le suiuoient, qui fit que Botel l'acrocha, & sautant dedans, apres quelque resistance tua les vns & ietta les autres en l'eau. Alors le flus de

*Estat des In-
des. Ninachet-
uen despoillié
de son estat
en Malaca.*

*Guerre entre
les Rois de
Bintam & de
Campar, en la
quelle les Por-
tugallois se
meslent pour
secourir celui
de Campar,
& desfont le
Roy de Lin-
gue.*

mer se retiroit, tellement que la flotte du Roy de Lingue empeschée par son vaisseau ne pouuoit s'auancer ni se retirer, n'estât fauorisee du reflux, & ainsi tous ces vaisseaux estoient tellement serrez qu'ils ne bougeoient. Frâcisque Melio gardoit l'emboucheure, & n'auoit rien descouvert de l'assaut donné par le Roy, tant pource que cela estoit suruenu tout soudain, qu'au si à cause des contours de la riuiera & de la hauteur de ses bords. Toutefois entendant le son de l'artillerie & le bruit du cōbat il deuala celle part, & monta dans ce vaisseau du Roy. Estans lors les forces assemblees, les Portugallois sauterent de vaisseaux en autres, apres en auoir chassé les ennemis, & fait carnage d'iceux: tellement que le Roy de Lingue pour sauuer sa vie, se tira de la presse au moins mal qu'il lui fut possible. Quant à celui de Campar il remercia tres affectueusement les capitaines, & fut fort ioyeux des nouuelles de l'office qu'on lui donnoit. Le vaisseau du Roy de Lingue fut retiré & baillé au Roy de Campar par Frâcisque Melio, pour son voyage en Malaca. Il emmena quelques autres vaisseaux des ennemis & mit le feu au reste.

Mort tragique de Ninachetuen, & les memorables particularitez d'elle. OR quand Ninachetuen entendit que le Roy de Campar estoit appelé 27. pour lui succeder en sa charge, il conclud en soy mesme de ne souffrir nullement d'estre degradé. Pourtant il fit dresser vn eschafaut esleué & loguer, appuyé sur quelques colōnes, tapissé, omé de fleurs & parfums en abondance. Cela fait il se vestit d'une robe de drap d'or, & tout couuert de pierres precieuses sortit en rue ainsi équipé, & monta par des degrez sur l'eschafaut. Il y auoit au dessous vn bucher de bois odoriferant bien agencé & allumé. Ceste pompe extraordinaire de Ninachetuen fit leuer les yeux & les oreilles de tout le peuple, ne sachant que vouloit dire tout cest appareil. Ninachetuen commença lors à faire vne pitieuse harangue, & en premier lieu ramentut les seruices que les Portugallois auoyent receus de lui auant la prinse de la ville, & ce qu'il auoit fait depuis en faueur du Roy Emmanuel: combien ils s'estoient monstrez ferme & fidele en son deuoir: avec quelle magnanimité en plusieurs endroits il auoit hazardé sa vie pour preuue de sa loyauté. Que pour recompense de tant de bons deuoirs, la nation Portugalloise vouloit diffamer de telle sorte sa vieillesse, qu'il estoit impossible de trouuer homme ayant son honneur en quelque recommandation qui voulust ni peust digerer cela en aucune sorte: car ils le despoilloient de la charge qu'eux mesmes lui auoyent commise, le degradoient de ses honneurs, le reputans digne d'acheuer ses iours signominieusement, & seruir de fable & de risée à tout le monde. Quant à lui, qu'il auoit tousiours moins estimé sa vie que son honneur, & fait mesmes sa resolution de mourir pour conseruer sa reputation: & pourtant qu'à l'heure presente il changeoit volontiers sa vie à la mort, plustost que de recevoir la honte qu'on lui vouloit faire. Disant ces choses il se ietta dedans le feu, où il rendit l'esprit. Chascun regretta & pleura ce personnage ainsi mort, considerant ce qu'il auoit fait pour les Portugallois, sa fidelité en tous accidens, & la pitieuse fin de sa vieillesse: tellement que les cheueux dressoyent en la teste de plusieurs qui s'estoyent trouuez à ce spectacle.

TANDIS

28. T A N D I S que ceste tragedie se iouoit en Malaca, il fut arresté par Albuquerque d'enuoyer vn ambassadeur vers le Roy de Cambaje: mais auât que passet oultre il faut dire quelque chose de la situation du royaume, de la fertilité du pays, & de la maniere de viure des habitans. Le royaume de Cambaje est le premier quartier de l'Inde close des limites de l'Arachosie. Indus fleuve renommé, dont l'Inde à prins son nom, court au trauers de ce royaume: & plusieurs autres riuieres coulantes d'Orient & d'Occident se perdent dedans ce grand fleuve, qui se desgorge en vn bras de mer que les anciens appellent Canticolpe & les modernes goulfe de Cambaje. On tiét que le pays est si fertile, qu'il ne faut que bien peu d'arspens de terre pour nourrir beaucoup de familles. Il y a force fruits de diuerfes sortes, du sucre à foison, vne infinité de bestail à corne & à laine. La coste de mer est habitée de Mahumetistes pour la pluspart: ceux qui demeurent plus auant en pays sont adonnez aux idoles. Es montagnes habitent certains peuples hardis aux armes, qui se sont gouuernez eux mesmes, depuis que les Rois de Cambaje embrasserent la superstition de Mahumet. Ils s'appellent Resbutz & descendent souuent pour guerroyer contre ces Rois. Les marchans de Cambaje sont fort riches, les reuenus du Roy tresamples, les soldats estrangers estoient attirez en ce royaume par grosses pensions, tellement que Cambaje estoit estimé comme vn pays commun. Diu ville notable d'icelui est assise en vne petite isle separee du continent par vn bien petit destroit, qui pour la commodité de son haure attiroit plusieurs marchans, tellemēt qu'il s'y faisoit vn riche trafic de toutes marchandises. Albuquerque desiroit bastir vne citadelle en ceste isle, & pour obtenir ce priuilege taschoit de gagner le cœur du Roy par tous les moyens dont il se pouuoit auiser, & de fait le Roy s'y accordoit, comme dit a esté ci deuant. Mais au contraire, Melichiaz gouuerneur de Diu, iugeant la liberté & le biē du peuple de Cambaje consister en ce fait, s'opposa au bastiment de ceste citadelle. Entre ceux qui auoyent grand credit pres du Roy estoit vn nōmé Melichigup, lequel Albuquerque tascha de gagner, afin d'obtenir plus aisément par faueur ce qu'il pretendoit. Melichigup lui en donna esperance par quelques lettres & l'exhorta d'enuoyer vn ambassade au Roy. A l'emboucheure du goulfe dedans lequel le fleuve Indus se descharge est assise vne ville nommee Surrate, dont Melichigup estoit seigneur. Le capitaine Begie ambassadeur y estant arriué fut honnorablement receu du gouuerneur & des principaux de la ville, desquels ayant entendu que le Roy ne monstroist gueres bon visage à Melichigup, sur l'avis de qui toute l'entreprise estoit fondée, fut sur le point de s'en retourner, dont toutesfois il fut empesché par ceux de Surrate, la pluspart desquels, par despit de Melichiaz, desiroient que les Portugallois fissent bien leurs affaires. Iceux donc asseurent Begie que tout iroit bien, lui fournissent trente trois chevaux, & des chatiots, pour porter son bagage: le font conduire par des soldats, afin que personne ne lui fist tort en chemin. Quatre iours apres il arriua en vne ville grande & forte nōmee Champanelle, où il trouua Melichigup qui le recueillit assez magnifiquement & humainement, avec aduertissemens de se garder des

Descriptiō du royaume de Cambaje, ensemble de quelques villes d'icelui.

Ambassade d'Albuquerque vers le Roy de Cambaje.

fraudes & embusches du traistre Melichiaz. Ayant fait bonne chere trois iours durant en ce lieu, Melichigup lui fournir viures & gens, l'admonnestant de ne loger sinõ chez celui que lui monstreroit vn capitaine des gardes que Melichigup lui donna, afin d'estre hors de danger, autrement il lui en auendroit grand mal. De là Begie tira à petites iournees vers vne autre ville nommee Mandaue, en laquelle pour lors demouroit le Roy, qui couché sur vn liët receut Begie courtoisement, & fut d'autre part salué d'icelui & de sa suite à la façon de Portugal. Le Roy leur fit dõner à tous des habillemens & de l'argent, puis conduire en des logis, où il leur enuoya beaucoup de presens. Pour le regard de la citadelle il auoit esté tellement destourné de cela par Melichiaz, qu'il ne vouloit en sorte que ce fust ratifier ce qu'il auoit ia ottroyé: disant qu'il dõneroit volontiers congé de bastir la citadelle à Surrate, ou Bombaim, ou Namim, ou Doubez, villes assises en la coste de mer du royaume: mais que pour le regard de Diu il auoit des raisons tresiustes de ne le vouloir permettre. Par ainsi le capitaine Begie s'en retourna sans rien faire, en telle sorte cependant qu'il ne se pouuoit plaindre d'auoir esté autrement que bien veu, bien receu, & honoré de grands presens, ensemble tous ceux qui l'accompagnoient. Mesmes le Roy enuoya des ioyaux de grand pris à Albuquerque. Begie s'estant embarqué avec tout cela & force viures reprint le chemin de Goa, où il se rendit quelque temps apres. Lors Albuquerque armoit vne flotte pour l'Arabie, comme on en faisoit courir le bruit: mais à la verité sa deliberation estoit d'aller en Ormus.

*Reponse du
Roy de Cam-
baze.*

*Nauigatiõ de
Pierre Albu-
querque en A-
rabie: sancto-
tisatiõ en Or-
mus, ce qui s'en
ensuiuit, &
son retour en
Goa vers la
Viceroy.*

OR afin de mieux couvrir sa pensee & leuer toute desfiance au Roy 29.
d'Ormus, il enuoya son neueu Pierre Albuquerque avec quatre nauires au cap de Guardafu, afin de faire la guerre aux Arabes. Pierre ayant passé là vne bonne partie de l'xsté fit de bons butins, entre autres print dix grands vaisseaux Arabesques chargez de grandes richesses de toutes sortes. De ce cap, selon la charge à lui donnee, il fit voile en Ormus, pour demander au Roy lors regnant nommé Terunxa, successeur de son frere Zeisadim ia decedé, le tribut, permission de bastir la citadelle, & faire instance vers ce Roy pour la cõfirmatiõ de l'accord traitté avec feu son frere. Terunxa fournit seulement dix mille escus du tribut, alleguãt que pour les affaires vrgentes il n'en pouuoit lors bailler dauantage, mais qu'il pouruoyeroit au reste en dedans certain terme. Quant à la citadelle il declaira n'en vouloir permettre le bastiment: & que pour le regard de l'alliance il la confermeroit tresvolontiers. Les choses ainsi acheminees, Pierre resolut suiuant le commandemēt de son oncle de cingler iusques en vne isle nommee Baharem, proche de l'Arabie, dedans la mer Persique, & distãte d'environ deux cens lieues de l'endroit où l'Euphrates ia conioint au fleuve Tigris se desgorge en la mer. Le Roy fit son possible de le destourner de ce voyage, disant que la nauigation y estoit dangereuse à cause des bancs, escueils & sablons mouuans: item que les marescages proches de la mer espaisissoient l'air tellement que les corps s'en portoyent tresmal. Ce nonobstant Pierre mit la voile au vent, & cõme il approchoit de l'isle vne tourmēte le chassa
de

de l'autre costé au port d'une ville de Perse nommée Raxel, où ayant trouué vn capitaine d'Ismael Sophi Roy de Perse, nommé Mirbuzaca qui s'estoit faisi de vingt nauires appartenâtes au Roy d'Ormus, il lui enuoya dire que Terunxa estoit tributaire du Roy de Portugal, & que lui comme capitaine Portugallois n'endureroit que lon fist tort à vn des vassaux de son prince: & pourtant le prioit comme ami (comme aussi il s'asseuroit que la force des armes ne seroit employée en chose qu'un message de paroles pouuoit appointer) de lui rendre ces vingt nauires. Soit que Mirbuzaca eust peur, ou que son naturel fust ainsi debonnaire, il accorda ce qui lui fut demandé par Pierre, lequel retourné en Ormus fit présent des nauires au Roy, le destournant par tel artifice de tout soupçon que la flotte de Portugal s'armast cōtre lui. Au partir d'Ormus Pierre print la route de Goa, où il trouue son oncle occuppé apres l'equippage de ses nauires. Mais auant que s'embarquer il enuoya Ieã Gôsalue de Blanccastel vers Zabaim Dalca lui demander quelques places en terre ferme pour y mettre garnison, s'il vouloit de là en auât recouurer des cheuaux à pris raisonnable. Il despescha auf-

si Antoine de Souze vers le Roy de Narlingue pour obtenir en la coste del'Inde qui regarde le couchant vne vil-

le nommée Batticala. Ces ambassadeurs furēt hu-

mainemēt receus & honnorez de riches pre-

sens: mais ils ne firent rien de ce qu'ils

pretendoyent, & ainsi re-

tournèrent en

Goa.

FIN DV NEVFIESME LIVRE.

Hh ij





L E DIXIESME LIVRE.

S O M M A I R E.

1. Navigation d'Albuquerque en Ormus.
2. Articles de la negotiation entre les Rois d'Ormuz & de Portugal & l'issue d'icelle.
3. Discours de la race, maniere de vivre, domination & exploits notables d'Ismael Sophi Roy de Perse.
4. Ambassades d'Ismael Sophi & d'Albuquerque l'un vers l'autre.
5. Albuquerque souverain en Ormus preserue le Roy de la tyrannie de Raix Hamed, trouue moyen d'exterminer ce tyran, & dresse l'estat public pour le repos des Portugallois.
6. Estat des affaires d'Afrique, & course des Portugallois sur les Mers pres de Maroc & du mont Fartobe.
7. Guerre contre le Xerif, & les diuers enuueux d'icelle.
8. Diuers notables exploits du capitaine Barrigue.
9. Guerre de Maroc & quelle en fut l'issue.
10. Courses & ranages des Portugallois au mont Fartobe.
11. De la flotte de Portugal enuoyee en Barbarie pour y baster une citadelle en son propre, afin de brider les Mers, & des malheurs qui en auindrent aux Portugallois.
12. Les ennemis d'Albuquerque pratiquent tellement qu'il est de son de sa charge au conseil de Portugal, & Loup Soares, esleu Viceroy des Indes.
13. Embusches & calomnies dressées par le Roy de Bontā contre son gendre Abedalla Roy de Casapar qui est detapiré en Malaca.
14. Muevements entre les Portugallois par toutes les Indes: machinations du Roy de Bontā contre George Bastel & ce qui en auint.
15. Ordre donné par Albuquerque en Ormus, pour la venir affermer au Roy de Portugal.
16. Maladie mortelle d'Albuquerque, & comment il pouruist à ses affaires.
17. Message apporté à Albuquerque touchant Soares, esleu en sa place: & ce qu'il dit & escriuit sur cela deuant que mourir.
18. Discours sur les mœurs d'Albuquerque & ses merueilles.
19. Mort de Fernand Roy d'Espagne.
20. Premiers altes de Loup Soares, Viceroy es Indes & successeur d'Albuquerque.
21. Estat du Royaume de Congo en Esiopie.
22. Estat de l'Europe, spécialement de Portugal.
23. Guerre d'Arzale, & les plus remarquables enuueux d'icelle.
24. Guerre de Maroc & la violence des Portugallois sur Rab Benxamus.
25. Memorable combat entre Benxamus & les Portugallois, qui sont mis en route avec perte de leurs chefs.
26. Harangue de Iehabentaf au Roy de Portugal.
27. Ordre donné aux affaires de Barbarie par Iehabentaf & Nemie Maficoregne successeur de Atade.
28. Captivité & illustre martyre de Gifaluo Vafcio cruellement traité des Mores pour auoir renoncé au Mahumetisme.
29. Voyages de l'ambassadeur de Portugal pour se rendre en la cour d'Ismael Sophi Roy de Perse.
30. Pour parler entre l'ambassadeur de Portugal & Ismael Sophi.
31. Demandes de l'ambassadeur & réponses du Sophi.
32. Exercices d'Ismael Sophi: son ambassade & ses lettres au Roy de Portugal & à Albuquerque.

*Naviga-
tion
d'Albuquer-
que en Or-
mus.*



Nla mesme annee cinq nauires parties de Lisbonne i. arriuerēt à sauueté au haure de Goa, où suruint aussi l'ambassadeur que le Roy d'Ormuz enuoyoit au Roy de Portugal. Albuquerque fit vn tour en Cochim pour equipper la flotte qui deuoit reuenir à Lisbonne, puis estant de retour en Goa, & apres auoir sagement pourueu à toutes choses pour entretenir en paix l'estat des Indes, fit voile de Goa sur la fin du mois de Feurier l'an mil cinq cens quinze, avec

uec vne flotte de vingt sept nauites, & quelques autres vaisseaux legers chargez d'Indiens. Estant allé mouiller l'anchre au port de Mascate il entendir que les affaires d'Ormus branloyent, tellement qu'il n'y auoit pas grâde asseurance aux promesses du Roy ni des gouuerneurs. Il fit aiguade & provision nouuelle de viures, puis reprint la route d'Ormus. Le Roy estonné de ceste soudaine venue employa tous ses sens à adoucir le cœur d'Albuquerque: & pour cest effect despescha l'un de ses domestiques, qui lui alla faire la reuerence & le gratifier de son arriuee en bonne prosperité, avec charge de lui dire que la ville & tous les biens du royaume d'Ormus appartenoyent au Roy Emmanuel, & prier Albuquerque de s'aider de toutes les commoditez du pays comme s'il estoit en Portugal. La responce d'Albuquerque fut qu'il tiendroir le Roy pour son fils, moyennant que l'effect correspondist aux paroles, autrement il le menaçoit de l'en faire repentir. Ce député parti, Albuquerque commanda que les brigantins & autres petis vaisseaux courussent autour de l'isle pour descouurir si quelques nauires de guerre entreprenoyent point d'entrer au haure de la ville: que si c'estoyent ennemis qui reussent se rendre, on tuast les soldats, & qu'on lui amenaist vifs ceux qui se rendroyent. Ceux qui auoyent telle commission y employèrent deux iours, durant lesquels gens alloient & venoyent, le Roy taschant appaiser Albuquerque par belles paroles, & Albuquerque le menaçant de ruine totale s'il n'obeissoit à ce qui lui estoit commandé. Il enuoya aussi en Ormus l'ambassadeur du Roy retourné avec la flotte de Portugal & respôse d'Emmanuel. Or cest ambassadeur estoit natif de Sicile, d'où il auoit esté enléué des son enfance par certains coursaïres, & instruit en la superstition Mahumetiste. Durant son seiour en Portugal il print goust au Christianisme, abjura la secte de Mahumet, se fit baptiser & nommer Nicolas Ferreire. Albuquerque craignant que le Roy d'Ormus ne traitast cruellement cest homme à cause de la religion, obtint, auât que le laisser sortir des nauires, qu'on ne lui feroit rien pour cela.

2. Les articles que Ferreire presenta de la part du Roy d'Ormus à celui de Portugal contenoient en substance ce qui s'ensuit. Premièrement, que celui d'Ormus demeurast du tout quitte du tribut qu'Emmanuel exigeoit de lui, alleguant qu'il estoit espuisé de finances, à cause que les nauires Portugalloises effrayoyent tellement les marchans qu'ils n'osoyent plus rié amener en Ormus, ce qui aneantissoit les douannes, qui estoient ses plus clers reuenus, & que le reste ne montoit pas à la somme qu'on lui demandoit tous les ans. Secondement, il demandoit permission à ses suiets de nauiger en Inde, & aussi aux nauires Indienes de faire voile en Ormus. Tiercement, que les nauires de Portugal ne tinsent plus la route d'Ormus, & n'en approchassent aucunement, afin de n'esfaroucher les marchans des autres pays, & n'abolir le reuenue des ports & passages. En quatriesme lieu, que le Roy de Portugal (qu'il reconnoissoit pour protecteur & souuerain) lui fit payer selon la taxe raisonnable qui en seroit faire, comme pour quelque autre de ses suiets, les nefes & marchandises qu'on lui auoit prinſes. Finalement, que tous prisonniers Ormusiens fussent relaschez. La responce fut que si le Roy

*Articles de la
negotiation
entre les Rois
d'Ormus & de
Portugal, &
l'issue d'icelle.*

d'Ormus demouroit fidele, & moyennant qu'il laissast bastir vne fortresse en la ville, on lui quitteroit la moitié du tribut annuel. Emmanuel accor-
doit aussi aux Ormusiens & à ceux qui trafiquoyent en Ormus leur nau-
igation libre, à condition qu'ils ne portassent marchandise defendue par les
ordonnances, & ne receussent en leurs vaisseaux aucuns marchans des pays
qui seroyent en guerre contre les Portugallois. Ce qu'il demandoit que les
flottes de Portugal laissassent la route d'Ormus, fut refusé, car c'estoit autat
que debouter Emmanuel de la souueraineté qu'il auoit sur la ville: comme
aussi lon se mocqua de la restitution qu'il vouloit estre faite des choses ac-
quises par droit de guerre sur ceux qui auoyent faulxé leur promesse. Quant
aux prisonniers, Emmanuel commandoit qu'on les laissast aller en liberté.
Deuant qu'Albuquerque laissast descendre Ferreire, il se fit amener poui
ostage vn ieune seigneur des principaux du royaume, neveu de Raix No-
randin. Le Roy d'Ormus estoit deliberé, sans cela, de iouer vn tour de mau-
uais maistre à son ambassadeur Ferreire, qui auoit si solennellemēt detesé
la secte Mahumetane. Toutesfois il receut en main propre & avec grand
respect les lettres d'Emmanuel: mais il ne communiqua pas de bouche a-
uec Ferreire, sinon par grande contrainte, & autant que l'affaire d'alors le
requeroit. Albuquerque enuoya le lendemain vn de ses gens au Roy lui di-
re que s'il vouloit la paix tout à l'heure son conseil assignast la place pour
bastir la citadelle, & dauantage qu'on lui ottroyast vn canton comme de
en la ville pour y habiter avec les soldats, d'autant qu'il estoit resolu de
iourner là huit ou neuf mois. Le Roy, qui auoit belle peur, accorda tout, &
respoudit s'asseurer en la preud'homme d'Albuquerque qu'il le traiteroit
comme vn pere fait son enfant, puis despescha Norandin avec charge de
passer l'alliance selon les solennitez requises. Incōtinent l'accord fut traité,
confirmé par sermēt solennel, & Albuquerque fit present d'vn collier d'or
au Roy & d'vn estédart enrichi des armoiries d'Emmanuel, que ce Roy fit
planter au sommet de son palais, en signe d'alliance & d'amitié, & pour ra-
tification de sa seruitude volontaire. On commença de bastir la citadelle
au mesme endroit où les premiers fondemens auoyent esté posez au-
tresfois.

*Discours de la
race, maniere
de vivre, domi-
nation & ex-
ploits merables
d'Ismael So-
phus Roy de
Perse.*

EN ce temps Ismael Roy de Perse estoit renommé par tout l'Oriēt, tant 3.
pour la valeur de ses armes que sous l'apparence de sa religion. Il se disoit e-
stre descendu de Mahumet & de Alles ou Hali. Plusieurs tiennent que ce
Hali auoit esté frere de pere & gendre de Mahumet, ayant espousé la fille
d'icelui nommee Fatime. Or ayāt succédé à son beau pere en la principau-
té, il changea & corrigea plusieurs articles de la doctrine de ce faux Pro-
phete. Il en racla quelques vns, y en adiousta de nouveaux, ragença telle-
ment les autres par nouuelles interpretations, que le peuple estimoit que ce
fust vne nouuelle loy. De cela il auint que les vns s'appellans Mahumeti-
stes, les autres Halistes, la secte de Mahumet fut diuisée en deux, & par con-
quent les sectaires & disciples bandez, & ennemis mutuels. Car les Persez
adherans à Hali chassoient de leur cōpagnie les autres infectez des erreurs
de Mahumet, comme gens souillez & ignorans la volonté de Dieu. Les
Arabes

Arabes Mahumetistes au contraire detestoyent les Perles comme apostats & corrupteurs de la loy diuine. Hali estant mort, son fils Hocem lui succeda en dignité & fausse religion, puis finit comme son pere: car tous deux furent ruez de poison. Vn sien frere de mesme nom maintint cest erreur iusques au dernier soupir, & eut douze fils que les Perles appellent hommes celestes & les estiment bien aimez de Dieu, pour auoir esté grâds zelateurs de l'opinion de leurs deuanciers. Le plus excellent d'entre ces douze se nommoit Muza Caim. Apres que ceste race fut depeschée, le nom de Hali demeura inconnu & comme enseveli entre la plupart de ces nations: au contraire les preceptes de Homar affectionné disciple & fauteur des resueries de Mahumet eurent le dessus, iusques a ce que Sophi Muza-issu de quelques descendans de Caim attira à son parti grand nombre de gens, pour la bonne estime que lon auoit de sa sagesse & pieté: en apres il se mit en teste de prouuer avec les armes que sa secte estoit la vraye loy de Dieu. Là dessus plusieurs nations lui rendirent les mains, tellement que la gloire de Hali releua la teste plongee de si long temps aux enfers, & son nom aboli par le temps reprit quelque vigueur. Puis au lieu des rurbans de toile dont les Mahumetans euveloppent leurs testes, Sophi ordonna que ses adherans porteroient des bonnets de laine pressée de couleur verte, plissés de part & d'autre comme en six degrez, pour estre eslargis & serrez selon qu'on veut, afin d'estre remarquez aisément d'avec les sectateurs de Mahumet ennemis de Hali. Et par ces douze degrez en chascun bonnet il vouloit conseruer la souuenance des douze fils de Hocé. Du fils de ce Sophi nasquit Aidaim, pere de cest Ismaël de qui nous parlons maintenant, lequel ayant esté esprouué par de terribles trauerses en son ieune aage vint en relle estime de sagesse entre les Perles, & se monstra si ardan à maintenir la doctrine de Hali, que tous s'assuiettissoient tresvolontiers à sa domination. Aussi estoit il magnanime & liberal à merueilles, gaigna plusieurs belles victoires, fit la guerre & donna bataille à Selym Empereur des Turcs: finalement deuint si riche & grand seigneur qu'il ne cedoit en chose quelconque à Selym. Or outre ce que son but estoit de deuenir encores plus puissant, aussi auoit il grand desir d'estendre sa religion bien loin, & par prieres enuers les vns, par menaces vers les autres, il taschoit faire que lon portast le bonnet plissé, que lon receust les reigles de Hali, & que certains formulaires de prieres esrites par cest imposteur passassent en vsage. Pour cest effect il enuoya des ambassadeurs vers le Roy de Cambaje & Zabaim Dalcam, pour les tirer en son opinion, à quoy eux refuserent d'entendre. Ayant sur ces entrefaites sceu par lettres de diuers endroits & par le bruit commun les louanges du vaillant & sage Albuquerque, les exploits memorables d'icelui en Inde & en Ormus, que le nom d'icelui voloit en merueilleuse reputation par toutes les regions de Perse & d'Arabie, il fut esmeu à lui porter amitié, encores qu'Albuquerque eust destourné l'isle & ville d'Ormus de son obeissance. Les Perles ont ce naturel, cōme nous le voyons par les plus anciēnes histoires, qu'en quelcōque personne qu'ils appercouyēt des rayōs de vertu ils en font tel cas, que mesmes ils diront tous les biens du monde des ennemis

ausquels ils feront la guerre à toute outrance.

*Ambassadeur
d'Ismael So-
phi & d'Albu-
querque l'en-
vers Fautre.*

ESTANT doncques avenu qu'Ismael enuoya son ambassadeur en In- 4.
de, comme dit a esté, il l'enchargea expressement de saluer de sa part Albu-
querque, & l'asseurer que le Sophi estoit prest de s'employer à tout ce qui
concerneroit le bien de lui & des Portugallois. Cest ambassadeur, nommé
Cojealeam, fit sa charge de bõne sorte, puis requit Albuquerque d'enuoyer
quelqu'un des siens vers Ismael qui desiroit fort entrer en amitié avec les
Portugallois, desquels il admiroit la vertu. Albuquerque print grãd plaisir
aux caresses & conseil de cest ambassadeur, estimant que par telle alliance
l'estat d'Ormus pourroit aisément prendre pied. Et pourtant il enuoya vers
Ismael vn de ses conseillers nommé Michel Ferreire, lequel fut receu avec
tous les honneurs qu'on sauroit desirer, & preferé à tous les autres ambassa-
deurs estrangers estans pour lors à la suite d'Ismael, qui deuisoit ioyeusement
avec Ferreire, s'enquerant par le menu des mœurs & coustumes de Portu-
gal, du naturel de la nation, de la vertu du Roy Emmanuel, & prenoit sin-
gulier plaisir aux discours de Ferreire homme eloquent & sage. En fin, à la
suaision de Ferreire, Ismael enuoya vers Albuquerque l'un des principaux
de sa cour nommé Bairimbonat, lequel arriua en Ormus avec Ferreire, au
tẽps qu'Albuquerque estoit occupé à faire acheuer sa citadelle. Or Albu-
querque cõsiderat que ceste ambassade auroit vn merueilleux poids pour
confermer l'autorité du Roy de Portugal, & nommément sa domination
en Ormus, delibera de ne donner audience à l'ambassadeur qu'avec vn ap-
pareil magnifique. Pour cela il fit dresser vn haut theatre orné de tapisserie,
& garni de chaires, en la place deuant le palais, afin d'estre veu du Roy d'Or-
mus & de ses courtisans : puis il se vint asseoir en vne des chaires, estant ves-
tu comme sa qualité de viceroy le requeroit, & environné d'une troupe de
gentilshommes. Lors il donna audience à l'ambassadeur, lequel estimant
desia ce viceroy digne de grand honneur pour le renom qu'il auoit acquis,
& voyant lui mesme vne telle grauité, la barbe blanche, le regard arresté
d'Albuquerque, choses qui moustroient son haut courage, fit vne pause, cõ-
me rauy d'estõnement : & tost apres exposa sa charge en bõs termes & avec
ample discours, en fin duquel il exhiba les lettres & presens qu'il apportoit
au Roy Emmanuel & à son lieutenant Albuquerque. Quant aux presens,
Albuquerque les fit incontinent desployer afin que tous les vissent, & dõna
telle responce que l'ambassadeur conut qu'on faisoit à son maistre l'hõneur
qui lui appartenoit, & que ce pendant Albuquerque sauoit bien tenir son
rang. Mais le sommaire de toute ceste legation ne contenoit autre chose
que louange de la vertu & magnificence d'Albuquerque, ensemble des de-
monstrations de grande amitié de la part d'Ismael. Quelques iours apres
l'ambassadeur fut renuoyé, apres auoir esté honnorablement recueilli, ca-
ressé, & honoré de presens. De mesme aussi Albuquerque despescha vers
Ismael avec lettres & dons vn gentilhomme nommé Fernand Gomeze de
Lemie, avec des memoires & creance pour le proufit de toute la natiõ Por-
tugalloise. Nous parletons plus amplement de ceste legation en vn autre
endroit de ce liure.

APRES

APRES le depart des ambassadeurs, Albuquerque s'occupa du tout à faire acheuer sa citadelle & donner pied aux affaires de la ville. Et combien qu'il sentist que plusieurs malcontrens brassoyent quelque meschanceté, qu'il destournoit sagement : neantmoins ses deportemens estoyent tels que lon ne pouuoit aisément presumer de lui qu'il se desfiast de personne. Mais les faiseurs de menees, pressez de leur mauuaise conscience, trembloient & se fortifioient en diueres sortes. Toutesfois il y auoit cela de bien que le Roy Zeifadim & Cojeatar regēt du royaume, ennemis d'Albuquerque, estoyēt morts. Raix Nordin successeur de Cojeatar auoit empoisonné Zeifadim, debouté les enfans d'icelui de la couronne, & establi Roy Terunxa frere de Zeifadim, s'assurant que Terunxa n'auroit que le nom royal, & que lui manieroit routes les affaires du royaume : mais estant ia vieil & caduc, par consequent ami de repos, il remit le tout entre les mains d'un sien neveu nommé Raix Hamed, aagé de trēte cinq ans, homme courageux & de grand esprit, par l'entremise duquel il iouiroit des reuenus du royaume sans bouger de sa maison. Raix Hamed execute sa charge pres du Roy avec telle violence, que le Roy & le royaume lui estoyent asseruis d'une estrange façon. La cour estoit plaine d'espions, tellement que le Roy n'osoit pas bailler, par maniere de dire, de peur qu'en disant quelque mot à la trauesse, dōt Raix Hamed fust offensé, lon ne lui ostant les yeux ou la vie entiere-ment. Neantmoins, apres l'alliance faite il s'enhardit iusques là de se plaindre à Albuquerque des grāds outrages que Raix Hamed lui faisoit : ce que Albuquerque tint secret. Vne autre fois il fut auerti par Alexandre Ataide trucheman que le Roy estoit comme prisonnier, & aguetté de plusieurs, tellement qu'il n'osoit fauoriser les affaires du Roy de Portugal, selon le desir qu'il en auoit, se plaignant de rechef à Albuquerque d'un tel traitemēt. Mais d'autre costé Raix Hamed resistoit secrettement aux Portugallois, empeschant en maintes sortes que leur citadelle se paracheuast, & s'efforçoit de monstrier par effects sa mauuaise volonté voilee de belles paroles. Dauantage pour destourner Terunxa de la foy qu'il auoit promise au Roy de Portugal, il le contraignit de receuoir le bonnet qu'Ismael lui enuoya, ensemble les prieres & articles de la doctrine de Hali, afin de monstrier par tel signe qu'il estoit du tout à la deuotion d'Ismael. Albuquerque entendant la verité de toutes les menees de Raix Hamed, resolut de le tuer : mais cela ne se pouuoit executer bonnement à force ouuerte, de peur d'une grosse guerre ou de quelque sedition, ains faloit y proceder par quelque ruse. Premièrement donc Albuquerque commença à lui monstrier meilleur visage qu'au parauāt, & en toutes sortes possibles taschoit lui complaire afin de l'asseurer. En apres il fit dire au Roy par Alexandre Ataide son trucheman & Pierre Alpoez son secretaire, qu'il faloit s'assembler avec Raix Hamed pour resouldre de quelques affaires secrettes qui concernoyent l'estat d'Ormus & du Roy Emmanuel : le priant au reste de choisir un lieu pour ce pourparler. Sur ce le Roy nōma une grande maison ioignant la citadelle, & fut arresté entre eux qu'Albuquerque y viendrait avec ses capitaines seulement, sans armes, & le Roy aussi acōpagné de certain nombre de gentilshōmes. Seulement fut permis au Roy & à Albuquerque de mener chaf-

*Albuquerque pouruoyant à ses affaires en Ormus, preser-
ue le Roy de la tyrannie de Raix Hamed, trouue
moyē d'exter-
miner ce tyrā
& dresse l'es-
tat public
pour le repos
des Portuga-
lois.*

cun leur escuier avec l'espee. Fut defendu à tous Portugallois & Perſes attendans pres de la mer, & qui ne deuoÿent entrer en la maison, de porter aucunes armes. La nuit precedente le iour determiné pour couper la gorge à Raix Hamed, Albuquerque appella en conseil ſectet ſes capitaines, leur deſcouvrit ſon intention, & les exhorta de porter armes couuertes : puis le lendemain auant iour il deſcendit en terre (car il ſe tenoit d'ordinaire en ſes nauires) & rangea ſes troupes au riuage & leur laiffa quelques capitaines, entrant avec les autres dedans la maison. Nordin diſpoſa auſſi les forces du Roy pres de la mer, & conduiſit le Roy en la maison. Quant à Raix Hamed il eſtoit armé à couuert, en deliberation de tuer Albuquerque, lequel il penſoit bien prendre lors à ſon auantage : & pourtant ſe preſenta il hardiment. Albuquerque lui monſtra beau ſemblant, & ſelon la couſtume des amis lui demâde, côme il ſe portoit, & ſi le Roy deuoit venir bié toſt. Raix Hamed iettant ſoudain ſa veuë ſur les capitaines qui enuironnoyent Albuquerque, imagina incontinent qu'ils eſtoyent armez, encores qu'il n'eult apperceu les armes cachees ſous leurs veſtemens, & troublé du malheur qui pendoit ſur ſa teſte ſortit dehors, admonneſtant le Roy qui vouloit entrer de ne paſſer oultre, pource qu'Albuquerque acompagné de gens armez l'attendoit de pied coy. Neantmoins le Roy entra & contraignit Raix Hamed de marcher deuant à la facon acouſtume. Garſie Norogne fait elorre la porte, tellement que la pluſpart de ceux qui armez à couuert ſuiuoyent Raix Hamed pour lui tenir main forte demeurerent dehors, à cauſe de quoy ils cômencerent à grôder, tempeſter & heuter rudement à la porte, diſans qu'il auoit eſté arreſté, que le lieutenant de Portugal & le Roy d'Ormus entreroyent avec nôbre eſgal de gës de part & d'autre : au preiudice de quoy le lieutenant eſtoit leans avec ſa ſuite, & le Roy n'auoit que quatre hômes, tous les autres eſtans forclos. Ce pendant Albuquerque ſe print à accuſer Raix Hamed de ce qu'il portoit des armes, & lui commanda de les poſer. Raix Hamed ſe conſiant au ſecours des ſiens, qu'il n'eſtimoit pas eſtre enfermez dehors, mit la main au poignard. Mais Albuquerque le ſaiſit fermement au bras, & lors Pierre Albuquerque, Loup Vaſcio de ſainct Pelage & les autres capitaines ſe ruent deſſus Raix Hamed, & lui donnent tant de coups qu'il tombe mort ſur le plancher. Le Roy voyant ce meurtre demeura tout eſperdu de frayeur : au contraire Albuquerque avec vne face riante commença à l'embraffer & prier de n'auoir peur. Juſques à preſent dit il, Sire, vous n'avez eu que le tiltre de Roy, par la meſchanceté de ce tyran, veu qu'à vray dire vous n'eſtiez point en liberté, mais au cōtraire eſclau des volontez de ce gamement. Ci apres vous ſerez maiſtre & ſeigneur, pour vſer touſiours de vos droits. Sur ces entreſaites les Ormuziens ne ceſſoyent de hurter à la porte : mais ayant entendu la mort de Raix Hamed, & qu'o auoit ietté le corps ſur le riuage par vne porte de derriere du logis, eſtimans que lon euſt fait meſme traitement au Roy, ils ſe preparerent à entrer leans à viue force. Les Portugallois laiſſez dehors preſque tous, pour empêcher ce que les troupes du Roy voudroyent entreprendre, acourent avec leurs capitaines, & font reculer ces brifeurs de portes. Nonobſtant cela les

princi-

principaux & le peuple d'Ormus demandoyent qu'on rendist le Roy sain & sauf, menaçans en cas de refus de mettre promptement le feu en ceste maison. Albuquerque prèd le Roy par la main & le meine au plus haut de la maison, d'où chascun le pouuoit voir, & comme de fait il les exhorta tous de s'asseurer de lui. Que les Portugallois au lieu de le molester lui auoyent procuré vn tresgrand bien : pour ce que lors ils l'auoyent affranchi & mis en vraye possession de son royaume, afin de gouuerner ses suiets iustement & doucement. Il fut puis apres defendu, à peine de la vie, à ceux qui estoient armez, de faire aucun acte d'hostilité. Toutes fois Modafar frere de Raix Hamed, apres s'estre tempesté avec force iniures contre les Portugallois & le Roy mesme, eutra dans le palais, fuiui d'une troupe de gens armez, & archers de garde desquels Alli son frere estoit capitaine, & deliberent se fortifier la dedans. Mais apres que le Roy eut protesté de les faire tous mourir cruellement s'ils ne deslogeoyent à l'heure, & qu'Albuquerque les estonnoit aussi, ils obtindrent premierement qu'on ne les recherchoit point dauantage pour vne telle entreprise, puis laisserent la maison vuide, & dans le terme à eux prefix tous ceux de ceste faction deslogerent hors de l'isle & de tout le royaume d'Ormus, avec leurs parens, adherans, familles & biens. Voila comme toute la racaille de gens, amassez de costé & d'autre par les pratiques de ce meschât homme, pour mettre l'estat sans dessus dessous, fut chassée de la ville. Et de fait ce tyran auoit amené des forces peu à peu dedans Ormus, afin d'en chasser les Portugallois, & liurer la place à Ismael Roy de Persée. Albuquerque deschargé d'un si lourd fardeau, donna ordre arresté aux affaires de la ville, receut l'hommage & serment du Roy & du peuple, qu'ils seroyent à iamais sous la puissance & domination du Roy de Portugal.

9. D V R A N T ces remuemens, les capitaines Portugallois faisoient tresbien leur deuoir en Afrique. Pour le premier Iehabentafuf auertit Ataïde qu'il y auoit quelques compagnies d'ennemis cāpees aupres de Maroch, lesquelles on pouuoit aisément attraper. Ataïde y enuoya Loup Barrigue avecques cent cheuaux, ausquels Iehabentafuf ioignit ses forces : mais ces compagnies estoient deslogées pour s'acommoder en vne ville assize pres du mont Atlas. Barrigue manda incontinent à Ataïde qu'il auoit besoin de plus grandes troupes, au moyen dequoy Alonse Norogne gendre d'Ataïde y fut enuoyé pour renfort. Quant à Iehabentafuf il menoit vn bataillon de mille cheuaux. Les ennemis auoyent quarāte enseignes, & outre le grād nombre de pietons, plusieurs troupes de caualerie : & s'estoyent retirez ailleurs, tellement que les Portugallois suiuirent leurs pas. Barrigue cōduisoit l'auantgarde composée de cent cinquante cheuaux, avec lesquels il chargea l'arrierregarde des ennemis, qui firent teste du commencement, mais en fin furent contrains se retirer au gros de leur armee. Lors se sentans auoir l'auantage à cause de leur nombre, ils reuindrent à teste baissée contre les Portugallois. Norogne & Iehabentafuf leur courent au deuant, & y eut vne sanglante meslée, balançant de telle sorte pour vn temps, que lon ne pouuoit iuger qui demeureroit le maistre. Toutes fois apres long combat les enne-

*Essai des afai-
res d'Afrique,
& conques des
Portugallois
sur les Mores
pres de Ma-
rach & du
mont Farrisbe.*

mis quitterent la place, laissant grand nombre de leurs compagnons taillez en pieces, cinq cens prisonniers, vn butin de vingt mille bestes à laine, de mille bœufs & de quatre cens chameaux, que les Portugallois emmenerent. Apres que les ennemis se furēt vn peu rassemblez & rassemblē en aussi grosse troupe qu'auparavant, ils recommencent le combat, où ils gaignerent aussi peu qu'au precedēt. Toutesfois Barrigue y perdit trois des troupes, & se habentauf quelques Mores: les autres retournerent avec le pillage dās la ville. En ce temps lean Coutin fils de Vasque Comte de Borbe. commandoit dedans Arzile au lieu de son pere. C'estoit vn sage & vaillant capitaine entre tous ceux de son temps. Vn iour il entreprint faire vne course iusques au mont Farrobe, & mit aux champs pour cest effect vne troupe de sept vingts cheuaux. Estāt pres de la montagne ses espions lui rapporterent que les gouuerneurs de Laro & de Molei Hamar estoient aux champs avec vn des fils de Barraxa & huit cens cheuaux, pour faire le gast autour d'Arzile & de Tingi. Coutin delibera de les attaquer, & afin qu'ils ne se retirassent sans venir aux mains, il ferma le passage par lequel ils deuoient retourner. Il y eut vn cruel cōflict, la partie estāt forte & esgale, car les ennemis n'auoyent faute de courage, d'adresse, ni de desir d'emporter la victoire. Coutin & les siens d'autrepart conoissoient bien qu'il n'y auoit moyen de partir de là qu'en combatant valeureusement. Aussi firent ils tel deuoir que les ennemis furent mis à vau de route, plus de deux cens tuez, quarante & vn prins prisonniers, entre lesquels y auoit des principaux de leur armee. Les cheuaux & paremens de ces gentils hommes prisonniers seruirent de proye aux victorieux.

*Guerre contre
le Xerif, & les
diuers enne-
mis d'icelle.*

A v mesme temps les Mores de Xiatime, tributaires du Roy de Portugal, demanderēt secours à Ataide, pour chasser de leur pays le Xerif qui leur auoit fait tout plain de maux quelques iours auparavant. Barrigue leur fut enuoyé avec cinquante cheuaux, lequel fuiui de quelques troupes de Xiatimiens passa le mont Farrobe, où il entendit que le Xerif auoit donné dās les pauillons d'vne compagnie de Xiatimiens, tué les vns, mis en fuite le reste, & pillé ce qui y estoit. Incontinent Barrigue double le pas pour charger la queue de l'armee du Xerif, & l'ayant attainit il tailla en pieces les plus paresseux, print vn prisonnier seulement, les autres s'estans retirez au galop, lesquels Barrigue ne voulut point suiure, pource qu'il auoit trop peu de gēs: & de fait, il requit Ataide, par vn homme de cheual qui se retira ayant esté blessé à la rencontre, de lui enuoyer secours. Ataide despescha vn renfort de cinquante cheuaux sous la charge de George Mendeze Ataide. Le Xerif au contraire fit diligence de venir au deuant avec seize cens cheuaux. Loup Barrigue diuisa ses troupes en deux, baillant la premiere à George Mendeze & à Pierre Barrigue: retenant la seconde pour soy. Quant aux Mores confederez ils firent le mesme. Mais le Xerif rangea ses gens en trois escadrons, donnant la cōduite de celui du milieu, où il y auoit sept cens cheuaux, à vn sien cousin nommé Abedelquibir: lui retint l'aile gauche, & laissa la droite à vn capitaine en qui il se fioit beaucoup. Abedelquibir ne se pût commander, ains vint le premier à la charge contre la premiere troupe
des

des Portugallois, qui se trouuerent tellement enuironnez, que force leur fut de cōmbatre en rond. Loup Barrigue courut sus à Abedelquibir lequel enfermoit ainsi ses gens. D'autrepart les Mores confederez soustenoyent courageusement deux escadrons ennemis, & y eut vne terrible escrime l'espace de plusieurs heures. Or auint que Pierre Barrigue courut la lance baissée de telle roideur contre Abedelquibir qui le perça de part en autre. Ice-lui estant tombé mort, son regimen commence à bransler, & poursuui par les Portugallois fut rompu du tout. Loup Barrigue voyant la victoire siene de ce costé, galoppe furieusement droit au bataillon du Xerit, vn des principaux duquel nommé Zerq Bentagogim courut sus à Pelage Roderic qui faisoit merueilles de cōmbatre, & le ietta par terre: mais comme il taschoit de le tuer, Loup Barrigue picque vers Bentagogim & le perce d'un coup de lance. Le fils de Bentagogim acourant là dessus pour secourir son pere fut transpercé de la mesme lance & main de Barrigue, lequel en vne mesme place tua deux principaux ennemis & sauua la vie à l'un de ses compatriotes. Finalement les ennemis furent du tout mis en route, & eurent ce iour des cheuaux si disposés qu'ils eschapperent pour la pluspart, encor que les Portugallois suiussent leur victoire assez loin. Sur le champ il en demeura quelque centaine de morts. Ataïde refueillé par ceste victoire de Barrigue desiroit faire quelque entreprinse memorable, & la prouesse de Jacques Lopez, qui avec vne poignée de gens estoit couru iusques aux portes de Maroch, le sollicitoit d'assaillir ceste ville là. Póurant fit il sauoir aux capitaines des Mores cōfederez, qu'ils eussent à prendre les armes vn tel iour, d'autant qu'il les meneroit en lieu d'où ils retourneroyent avec grãd honneur & riche butin. Mais il ne voulut descouurir son dessein à personne. Loup Barrigue, qui lui seruit à solliciter ces capitaines Mores pour se tenir prests, ayãt oui nouuelles que le Xerif se tenoit en vn chasteau pommé Amagor, demanda secours à Ataïde pour aller surprendre & desfaire le Xerif. Ataïde despescha sur l'heure son neveu Aluar Mendez de Ceruaire avec deux cens cheuaux & cinquante pietons harquebuziers & halebardiers. En dedans huit reposees Ceruaire se ioignit à Barrigue, lequel auoit ia ramassé les troupes des Mores alliez. Le chasteau d'Amagor estoit assis sur vne haute montagne, enceint de rochers, & enclos de deux riuieres qui couloyent au pied deuant & derriere. Quant au territoire, il s'estendoit si loin qu'il contenoit en son tour plus de cent villages. Sur le commencement de la nuict Barrigue & ses troupes se camperent deuant le chasteau, duquel sortirent quelques gens de cheual qui dresserent vne escarmouche contre les Mores confederez, & les firent reculer: mais estans secourus de leurs compagnons, ces escarmoucheurs furent contrains se sauuer dedas le chasteau. Barrigue faisoit son conte d'assieger de pres ce chasteau des le lendemain, mais il fut auerti tout soudain que le Xerif s'en estoit fui: à cause dequoy il monte à cheual & commande à ses troupes de le suiure, & assaut le premier fossé du chasteau. Ceux qui estoient restez en garde se defendēt brauement, & repousserent par deux fois Barrigue & les siens, qui finalement les enfoncerent, taillerent en pieces, ce qui se trouua deuant eux, les enne-

mis se precipitoient des rochers en bas, les vns sebrisans par morceaux, les autres demeurens attachez & percez par des branches d'arbres. Il y en eut de si forcez en ce combat, que se voyans hors d'espoir d'eschapper, & n'ayans enuie de se rendre, ietterét leurs cheuaux du haut des rochers à val, de peur que les Portugallois n'en tiraissent quelque seruice. Il y eut deux cés des assiegez mis au fil de l'espee: plus de mille moururent en ces precipices: le nombre des prisonniers montoit à quatre cens; entre lesquels estoit vn des oncles du Xerif, avec cent cinquante cheuaux, & vn si grand butin que les soldats employèrent trois iours à les porter de la ville au camp. Ce fut vne tresbelle victoire, eu esgard au petit nombre d'hommes, & dont les Portugallois rendirent graces à Dieu, confessans haut & clair qu'ils n'estoyent point demeurez maistres par la force de leurs bras, ains par la grace & puissance de Iesus Christ. Quelques iours apres Barrigue secouru de Iehabentafuf print vn chasteau nommé Algabal, où il y eut force pillage, & par lettres exhorta Ataïde d'assaillir Algel, qui estoit vn autre chasteau où le Xerif s'enfuit au sortir d'Amagor. Suiuant ces lettres Ataïde se mit en campagne avec les forces qu'il pût assembler, & alla iusques à quatre lieues pres de ce chasteau: mais au lieu de passer oultre il tourna bride avec ses gens, sans qu'on ait sceu sauoir pourquoy. Le Xerif estoit deslogé de ce chasteau, où il retourna ayant entendu nouuelles de la retraite d'Ataïde.

Diuers notables exploits du capitaine Barrigue.

DE PUIS, par le commandement d'Ataïde, Barrigue alla assaillir les 8. cauenes entre des grands & hauts rochers, où grand nombre d'ennemis s'estoit mis à couuert durant ces courses: mais Barrigue fut cōtraint descendre bien viste, apres auoir perdu quelques soldats tuez à coups de main, & d'autres iettez en bas. En ces entrefaites il fut tant prié par les Mores confederez, qu'il delibera d'assieger le chasteau d'Algel: mais sur le chemin il ouit vn grand tumulte, & apperceut incontinent quelques vns acourrés vers lui. C'estoyent Mores confederez que les ennemis poursuuiuoient. Barrigue les rassemble, & charge si resoluement les ennemis qu'il les contrainst se sauuer de vistesse, & court apres cinq ou six lieues loin. Estant assez pres du chasteau dont lon vouloit s'emparer, plusieurs soldats, au mespris de son autorité, allerent à la desbandee courir sus aux ennemis qui s'amassent de tous costez & enferment ces assaillans. Barrigue marche incontinēt au secours, & fut la tēcontrefsi dangereuse que seize lanciers Portugallois & plusieurs Alarbes confederez y laisserent la vie: Barrigue mesme fut ietté de cheual par terre, blessé, & prins prisonnier, mais par la vaillance des siens, ou plustost par la grace & assistance speciale de Dieu (comme chascun le confessoit) il trouua moyen d'eschapper & mōter sur vn cheual qui n'auoit point de maistre: & ainsi battu & mal mené il fit sa retraite en ses pauillons. Le lendemain, nonobstant ses blessures, il delibera d'assaillir ce chasteau, & sur le chemin butine çà & là, puis se campe assez pres de la place, & se repose trois iours, pour appaïser la douleur de ses playes. Comme il seiournoit illec, les ennemis qui estoient en grand nombre resolurent de l'assaillir à l'impouruee. Barrigue les receut alaigrement, & des la premiere charge les cōtraignit iouer des esperôs: mais il ne voulut pas courir trop loin apres,

crai-

craignant quelque embuscche. Vn iour apres il remua ses têtes & les fit tendre si pres du chasteau qu'il n'y auoit qu'une colline & vn ruisseau entre deux. Le lendemain ils se donnerent le combat d'une estrange furie. Or auint que les Mores qui alloient à la guerre sous Barrigue leur general reconurent sur le haut d'une montagne vn certain Prince de ces quartiers montueux qui amenoit quelques gens de renfort au chasteau: ce qui les estonna de telle sorte qu'ils se desbandent & gagnent au pied, laissant les Portugallois au siege. Barrigue alla au deuant des ennemis, & les soustint vaillamment en vn destroit. Ces fuyards ayas l'hiuer & vne pluye bien fascheuse sur le dos, sans pauillôs pour se retirer au sec, moururent de froid, estât ceste nation nee au chaud seulement, ioint qu'ils estoient harassés du chemin, & n'auoyent de quoy viure: tellement que ceste nuit le froid en tua plus de cinq cens. Ainsi, la crainte de mourir leur ayant fait abandonner vilainement les tentes où ils pouuoient demeurer à couuert, les poussa en vne fin honteuse acompagnée de deshonneur & marque de lascheté. Le matin venu, Barrigue fit la retraite en rang de bataille, recueillit plusieurs escarez & errans par la campagne, & repoussa tousiours brauement ceux qui le vouloyent desfaire, quoy qu'en diuers endroits & souuent il se vist les ennemis deuant & derriere: tellement qu'exceptez quelques vns qui s'estoyent perdus en quittant leurs rangs, il ramena ses troupes sauues dedans Safin.

9. CE pendant Ataïde agité des pensées d'ot a esté faite mention, s'apprestoit pour le voyage de Maroch, & par son commandement Barrigue auoit semonds les chefs des Mores associez à estre de la partie. Pierre de Soufse gouuerneur d'Azamor y fut aussi appelé par Ataïde, pour auoir sa part du trauail & de l'honneur. Lui, qui estoit vaillant & ambitieux promit estre des premiers, & de fait lui & les autres se trouuerent au rendez-vous: Soufse avec deux cens cheuaux, & Ataïde suiui de trois cens: le gouuerneur de Dabide en menoit six cens, celui de Garabie mille, & celui de Xerquie huit cens. Ils se mirent en chemin du lieu de leur assignation le vingt deuxiesme iour d'Auril l'an mil cinq cens quinze, marchans tousiours en rang, & ne remuans leur camp que par bons aduertissemens. Le pays de soy-mesmes est fertile, plaissant quand on le cultiue, & bien arrousé, tellement qu'il y auoit grand contentement à le courir de l'œil. Finalement Ataïde & ses troupes approchent de Maroch, & apres auoir consulté de ce qui estoit à faire fut arresté d'assaillir la ville par la porte de Fez. Or ils n'auoyent charnié artillerie, engins, munitiôs, ni chose aucune propre pour battre & forcer vne telle ville réplie de gés de guerre: & peut-on voir qu'ils n'estoyent allez là que par brauade, & pour dire qu'ils auoyent mené leurs gens iusques aux portes de Maroch sans empeschement quelcôque, afin que par si hardie entreprise ils estônassent leurs ennemis & môstrassent aux Rois de Portugal le moyé de assuiettir aisément toute la Barbarie. De fait ceux de Maroch furent effroyez, car ils pensoient que ce fussent là seulement les auantcoureurs de quelque puissante armée. Ataïde menoit le bataillon du milieu: ceux de Xerquie & Dabide le fermoient à gauche, & ceux de Garabie à droite. Soufse auoit parties troupes en deux. Les Alarbes dressent incontinent l'escarmouche

*Guerre de
Maroch &
quelle en fut
l'issue.*

& courent iusques aux portes de la ville. Ceux de dedans sortent par la porte de Fez, estans en trop plus grand nombre que les assaillans, mais non pas si resolu : ce neantmoins à cause de leur multitude, & que gens frais venoyent de tous costez pour combatre en la place de leurs cōpagnons trop trauaillees, les Portugallois estoient en grand danger, & auoyent beaucoup à faire à se defendre. Cidemeimam fut griefuemēt blessé, & se sauua à toute peine. Loup Barrigue pour s'estre fourré trop auant fut abatu par terre, en danger de sa vie, si Pierre Barrigue ne fust acouru au secours. Il en tomba de part & d'autre, & l'escarmouche dura quatre heures, en tel estat qu'on n'eust sceu iuger qui deuoit demeurer maistre. Toutesfois Ataïde & Soufse voyās que les ennemis se reforçoient & accroissoient par le rafraichissement qu'on leur donnoit, & que leurs troupes ia lassées ne pourroyent longuement faire teste à vn monde de gens combatans vaillamment en leur propre pays pour la conseruation d'eux-mesmes & des leurs, commencēt à retirer leurs compagnies peu à peu & en rang de bataille, au long d'un gué assez estroit de la riuere qui passe au trauers de Maroch. Sur ce ils furent chargez, mais ils soustenoyent & chassoyent les ennemis, puis assembloyēt & faisoient passer leurs troupes à la file, asauoir deux ou trois au plus ensemble, à cause du destroit. Les ennemis reuindrent à vne seconde charge beaucoup plus furieuse que la premiere, tellement que si Ataïde & Soufse n'eussent contenu leurs gens clos & serrez, ils eussent esté taillez en pieces pour la pluspart. Or Ataïde pria Soufse de se donner soin de ceux qui passoyent en l'auantgarde, afin de les renger en bataille sur le bord du fleuve : lui demeura derriere où il eut fort à faire à soustenir les ennemis. Et ainsi les troupes passerēt, sans perdre pas vn hōme, encor qu'aucuns fussent blesez. Douze Mores confederez y laisserent la vie : car pour faire preuue de leur prouesse deuāt les yeux des Portugallois ils se fourroyēt à teste baissée parmi les lances & glaïues des ennemis. Apres que tous furent passiez & à vne lieuē loin du gué, les Marochiens extremement despitez de la brauade qui leur auoit esté faite au pied de leurs murailles, & aux portes de la ville capitale de Barbarie, par vne poignée de gens, passerent l'eau pour se venger de ceste honte, n'ayans eu moyen de ce faire, tandis que les Portugallois estoient en bataille sur le bord, mais les sentans eslongnez ils coururent apres en grand nombre. Les Mores confederez de Garabie, Dabide & Xerquie, avec quelques Portugallois, vont à la rencōtre, chargent ces poursuuans, & apres quelques coups donnez, dont aucuns ne releuerent plus, entre autres vn certain capitaine de Fez qui menaçoit fort les Portugallois & se fourtoit trop auant en la meslee, les rechasserent vers Maroch : puis tous ensemble continuerent leur retour à petites iournees, & les compassoient en telle sorte que leurs logis se trouuerent tousiours accommodez en villages, bourgades ou villes de leurs alliez : plusieurs acourans de toutes parts au camp avec des viures, s'esfouissant de les voir de retour en bonne santé, autant que s'ils eussent gaigné quelque grande victoire. Mais encor que ceste entreprise fust procedee d'un cœur hardi, si est-ce qu'il y eut faute d'auis sur les moyens de l'executer, & en l'execution mesmes.

10. I L y a, à dix lieues loin d'Arzile, vne montagne nommee Farrobe, fort plaisante, pour estre herbue, couuerte d'arbres à part, & de forests entieres distinguees par quelques entredeux, treshaute, roide à la môtee, & fortifiée de nature en quelques endroits. Sur vne des pentes d'icelle qui regarde Arzile y auoit vn grand village nommé Aljubile, d'où sortoyent des coureurs qui fourrageoyent autour d'Arzile, gastans les bleds, & par fois emmenans du bestail & des personnes aussi. Iean Coutin en vouloit fort à ce village, mais ayant les bras trop courts il requit Edouard de Menefez, gouuerneur de Tingi, de venir à l'aide: ce que Menefez fit, & s'estans ioints se rendirent au pied de la montagne à la pointe du iour. Les ennemis qui descouurirent incontinent ces visiteurs, au lieu de s'estôner, se coulent tout doucemēt par vn sentier estroit, & courent sus aux Portugallois. Menefez caché en vne reculade sous la môtagne, & Coutin, de la riuē d'un torrent où il s'estoit arresté tout expres, chargent ceux qui s'estoyent auancez sur le milieu de leurs troupes, les contraignēt tourner en arriere & mōtent apres eux. Du cōmencēmēt ces fuyards se cōfians en leur multitude, en la difficulté du chemin, & en la forteresse de leur village, se mocquoyent des Portugallois, qui ne laissent de les poursuiure si chaudement qu'en fin ils les rembarrent dans le village mesme, duquel les auenues furent gaignees, & les ennemis cōtrains se sauuer de vistesse par vne autre porte. Les victorieux pillent, saccoient, & bruslent la place, courent par ceste môtagne, mettēt le feu en des hameaux, ruinent maisons, mosques, & diuers bastimens faits à l'antique: brief font tout le degast & rauage qu'ils peurent, & apres auoir ainsi exploité se retirerent en leurs garnisons.

Courees & rauages des Portugallois autour du mont Farrobe.

11. E N ceste mesme annee le Roy Emmanuel ayant enuie de tourmenter plus que iamais les Mores ennemis irreconciliables des Chrestiens, faisoit son compte de tenir en bride toute la coste de mer par le moyen de quelques citadelles, afin de voir de haut les ennemis, & subiuguier plus aisēmēt le royaume de Fez. N'ayant presque autre pensee en teste, il s'enquit de ceux qui auoyent hanté la Barbarie, quel lieu ils y conoissoyent le plus propre pour bastir vne forte citadelle. Eux l'asseurent que ceste commodité se presentoit aupres d'une riuere qu'aucuns appellent Mamora, les anciens Subur, large & profonde, se desgorgeāt en la mer Atlantique par vne bouche enuiron à cinquante lieues d'Arzile: d'autant qu'à l'embouchure de ceste riuere commandoit vn mont, au sommet duquel on pourroit bastir la citadelle, y porter à l'aise viures & munitions necessaires: que les nauires de guerre pouuoient mesmes entrer en la riuere à cause de la profondeur de son canal, & que la rade estoit seure entre toutes autres. Dauantage que de ce lieu lon pouuoit commodement courir & faire la guerre, la ville de Fez n'estant pas gueres loin de l'embouchure de ceste riuere. Le Roy despēcha incontinent gens pour en sonder la hauteur, qui à leur retour aprouuerent l'auis de ceux qui iugeoyent ceste place tant auantageuse, & assseurerēt que les plus grandes nauires pouuoient entrer dedans le canal de la riuere. Alors le Roy fit equipper & armer vne flotte de deux cens voiles, portant huit mil hommes, sans les charpentiers & matelots. Antoi-

De la flotte de Portugal enuoyee en Barbarie pour y bastir vne citadelle en lieu propre afin de brider les Mores, & des malheurs qui en auindrent aux Portugallois.

ne Norogne seigneur de grande maison fut esleu general de ceste armee, & Nonio Mascaregne substitué en sa place, au cas qu'il mourust. Plusieurs gentilshômes les suiurent, qui presques tous estoient si dissolus & desbordez, que le tiltre de noblesse ne seruoit qu'à les rendre extrememēt orgueilleux, & moins corrigibles que la discipline militaire ne requiert. Les soldats pour la pluspart estoient ieunes & nō experimētez encor. Ceste flotte partit de Lisbonne le treziesme iour du mois de Iuin, & arriua dix iours apres à l'embouchure de la riuere. Alors Norogne enuoya le capitaine Berrio dedans la carauelle pour entrer en la riuere, ordonnant à Pierre Bentez de voguer d'un costé avec son vaisseau, & au capitaine Carin de l'autre, & à Antoine Saldagne de les suiure. Les autres capitaines entrerent apres, selon leur ordre. Estans arriuez pres de l'endroit où la citadelle deuoit estre bastie, apres auoir meurement visité ceste place, ils consulterent de ce qui estoit à faire, & d'un commun auis choisirent vn autre lieu qui n'estoit pas tant esloigné de l'embouchure, en laquelle il estoit fort aisé aux nauires d'entrer, & dont lon pourroit charrier incontinēt en la citadelle toutes prouisions, ioint qu'aupres y auoit force fontaines d'eau douce : car au premier endroit l'aiguade eust esté incommode à cause du reflux de la mer, qui rendoit de fois à autre l'eau de la riuere mal plaisante à boire. Donques ils desseignent le plan d'une citadelle en vn lieu que tous estimerent le plus propre, & premierement creuserent vn fossé ayant dix pieds de profond & quinze de large, afin de retenir l'eau du flus marin si bon leur sembloit, & la faire escouler aussi toutes les fois qu'ils voudroyent. Dauantage il y auoit des compagnies en armes pour garder ce lieu, & le camp fut tellement assis qu'il sembloit que les ennemis perdroyent leur temps à s'en approcher. Mais au contraire lon remarquoit vne incommodité, que la montagne commandoit à ce lieu, & ne pouuoit on se saisir du sommet d'icelle, pource qu'elle estoit plus eslongnee de la riuere qu'il ne faloit : & l'endroit que Norogne & les siens auoyent choisi estoit sous vne pente plus haute dont les ennemis pouuoient grandement endōmager les Portugallois, tant à coups de trait qu'avec des pieces de rocher roulees du haut en bas. Outreplus, comme plusieurs en donnerent aduertissement deslors, quand la riuere se desborde par le surcroist des grandes pluyes, elle s'espand & gaigne mesmes le dessus du plan auquel lon auoit commencé de bastir la citadelle, comme les restes de limon & autres ordures trainees par le desbord le monstroyent encor alors. Les ennemis s'estoyent emparez des lieux hauts, & les auoyent bien fortifiez, placé de l'artillerie en diuers lieux, & combatoyent de toutes sortes de traits au grand detrimēt de l'armee Portugalloise. Aussi le Roy de Mequinez suruint avec trois mille cheuaux & trēte mil hōmes de pied. Quāt au Roy de Fez, il y acourut suivi d'une beaucoup plus puissāte armee, car il menoit plus de deux cens mille hommes. Ce pendant les vns assailloyent les autres, mais tousiours les ennemis emportoient le dessus à cause de leur multitude, & de l'auantage du lieu : mesmes en vne seule rencontre les Portugallois perdirent douze cens hommes tuez sur le champ. Vray est que les vaisseaux, ayans la nauigation libre sur la riuere, secouroient leurs

*Le bon heur
des Portugallois
se change,
seulement que
depuis ils n'ont
pas beaucoup
auancé.*

com-

côpagnies posées en terre, & endommageoyent à coups de canon le camp des ennemis, lesquels pour empêcher l'entree à ces vaisseaux dresserent vn fort pres de l'embouchure de la riuere, y establistent vn corps de garde de plusieurs enseignes ensemble, battent si à point & de telle furie les vaisseaux s'efforçans d'entrer, qu'ils les contraignent de tourner en arriere, où les brisent. Norogne pour euitier cest empêchement, s'auise d'armer vne nauire de grosses pieces de bois, auxquelles il fait attacher force balles de laine pour amortir les coups de boulet. Ceste nauire, opposée au fort des ennemis, donnoit passage asseuré aux autres petis vaisseaux: mais elle fut tant canonnée de iour & de nuict, qu'en fin les pieces en volerent de tous costez, ce qui commença à effroyer les Portugallois. Leur armee estoit diminué, leurs viures failloyét, & ne se passoit iour que les ennemis ne tuassent quelques gens: briefles affaires estoient en piteux estat. En ces entrefaites Norogne receut responce aux lettres qu'il auoit écrites en Portugal, par laquelle le Roy mandoit que si lui & les autres capitaines iugeoyét ceste entreprinse inutile, ils s'en deportassent, pour remener la flotte en Portugal auant que perdre dauantage. Or d'autant que la resolution de se retirer ne fut pas tenue si secrette que les ennemis n'en sentissent le vent, ils recommencerent leurs escarmouches plus hardiment. Norogne fit dresser deux bataillons sur vn haut pour soustenir les ennemis. Roderic Melio conduisoit l'vn & Christofle Leitan l'autre. Celui de Melio ayant trop d'ennemis sur les bras fut rompu, tellement que les soldats tomboyent de la roche en bas, les autres en fuyant empêchoient leurs compagnons, tellement que les ennemis firent vne terrible boucherie. Leitan mena ses compagnies bien rengees par vn destour de la montagne, & se rendit pres de la riuere: mais tout le camp estoit si esperdu, que le general ni les capitaines ne pouuoient aucunement rassurer les soldats, ni les garder de fuir les vns çà les autres là, si que la peur en chassa plusieurs dans la riuere, où ils perirent en la fange & parmi les vagues, se precipitans ainsi en vne honteuse fin de leur vie pour euitier vne mort honnesté. Les pilotes & marelots trembloient de telle façon que par leur faute cent vaisseaux eschouerent & se perdirent au riuage: car les vns empêchoient les autres, ou s'entrefroissoient: par ainsi voulans les soldats gagner bord, apres que leurs vaisseaux estoient rōpus, trouuoient l'ennemi qui les esgorgeoit. Neantmoins il se trouua quelques vaillans capitaines, qui se porterent vertueusement en ce desordre, nommément Bernard Manuel entre tous les autres: car il fit teste aux ennemis, les soustint & repoussa, recueillit grand nombre de fuyards, chargea les Mores & en tua plusieurs, brief fut cause que les Portugallois eurent quelque relasche & ne demeurèrent pas tous en ce conflict. Finalement l'armee remonta dans les vaisseaux, mais il y eut des gentilshommes qui empêcherent force gens d'entrer, craignans le danger & que les vaisseaux chargez de trop de gens ne coullassent en fond, s'estans quant à eux sauez par terre moyennant la viffesse de leurs iambes, & sur mer en traitant ainsi cruellement leurs compagnons. On tient que les Portugallois perdirent en ce voyage quatre mil hommes tuez en diuers combats, sans la citadelle, l'artillerie, les munitions

& prisonniers que les ennemis eurent, & toutesfois il ne fut possible à ceux qui gardoyent le fort de fermer le passage aux Portugallois qui gaignerent le large en mer & mirent les voiles au vent. Emmanuel ayant receu nouvelles de ceste honteuse desfaite fut grandement contristé, toutesfois il remercia Dieu de ce qu'il le chastioit de ses pechez en ce monde: car il auoit aprins de se monstrier paisible & sage en l'aduersité comme en la prospérité, remettant toutes choses (comme doit faire tout prince Chrestien) à la prouidence de Dieu. Ce pendant il faut confesser que durant son regne il ne perdit tant pour vne fois qu'à lors, & y en eut plusieurs qui digererent le deshonneur de leur fuite plus doucement peut estre qu'il ne conuenoit à leur deuoir, pource qu'ils ne s'efforcerent pas depuis de faire bié pour effacer ceste tache.

*Les ennemis
d'Albuquerque
que praisquit
tellement qu'il
est desmis de
sa charge au
conseil de Por-
tugal, & Loup
Sorez, esten
Viceroy des
Indes.*

EN la mesme annee, Emmanuel tomba en vn autre malheur, prestant l'oreille aux calomnies de plusieurs enuieux: car ceste peste, qui d'ordinaire exerce sa cruauté sur les gens de bien en la cour des Rois, poussa ce Prince si auant en mauuais conseil, qu'il commença à se desfier d'Albuquerque, lequel alors auoit reduit sous la domination du Roy de Portugal presque toute la coste de la mer Indienne depuis le fleuve Indus iusques au promontoire de Cori, ensemble Malaca, conquis le royaume d'Ormuz, sagement dressé l'estat d'icelui, & fait admirer par tout l'Orient le nom du Roy Emmanuel: d'autant que ces nations ne pouuoient autrement croire que ce Roy ne fust quelque homme diuin qui auoit vn lieutenant doué de tant de belles vertus. Et selon qu'Albuquerque auançoit, plus respectoyent ils la grandeur de son Prince. Quant au Roy, il aimoit fort Albuquerque: mais les enuieux lui rompoient les oreilles, accusans quelquesfois Albuquerque de folie & temerité, par fois d'ambition insupportable, voire mesmes de trahison. Finalement ils imprimerent au cerueau du Roy qu'Albuquerque aspireroit à tyrannie & vouloit s'assuiettir les Indes, ayant l'appuy de ses parens & partisans, la bonne grace des Princes Indiés qui l'estimoient quelque chose. Que ses moyens estoient plus amples que l'estat d'un homme obligé aux loix ne requeroit: & qu'un homme moyennement riche & puissant se laissoit gouverner, mais qu'en deuenant ainsi grand, il n'estoit plus possible de le contenir es bornes d'equité & droiture. Mais que sera-ce, disoyent tels calomniateurs, si ce personnage qui a tant manié d'affaires, & rusé iusques au bout, entre en ligue avec Zabaim Dalcam, ou avec le Roy de Narsingue? Où en ferez vous s'il a intelligence avec les autres Rois Indiens? Ne lui sera-il pas aisé de se reuolter? Pour le moins il enseuelira vostre nom, & fera tant que tous s'assuiettiront trefvolontiers à lui. Combien que le Roy fust souuent importuné de tels discours coulourez d'eloquence & de merueilleux artifices, & qu'Albuquerque appuyé sur son innocence & ses seruites n'ignorast pas que plusieurs le diffamoyent: toutefois il ne fut iamais d'avis de penser comment il pourroit rembarter les fausses accusations de ses aduersaires, tenant pour certain que les actes vertueux font assez reboucher la pointe des langues mesdisantes, & s'assurant que ses exploits & la fidelité qu'on auoit marquée en tous ses deportemens estein-

esteindroyent aisément par le soufle de sa vertu tant esprouuee les flâmes de l'enuie allumee en Portugal contre lui qui en estoit si loin. Mais d'autant que les accusateurs continuoyent leurs coups sans que personne parast ou s'opposast à leurs pernicious desseins, ils amenerent Emmanuel à ce point qu'il ordonna qu'Albuquerque reuiendroient en Portugal, non pas pour le degrader de tous honneurs, mais pour n'être plus Viceroy des Indes, & establir en son lieu Loup Soarez d'Aluarengue. Il donna congé à Matthieu ambassadeur de David Roy d'Ethiopie, pour s'embarquer avec Soarez, & pour confermer plus fermement la paix d'un lien tresestroit avec lui, il lui enuoya en ambassade vn gentilhomme Portugallois, fort sage & de grande experience en affaires d'estat, nommé Edouard Galuan. Soarez fit voile de Lisbonne avec vne flotte de treize nauires & quinze cens Portugallois le septiesme iour d'Auril, & print port en l'isle de Goa le second iour de Septembre, d'où, apres auoir donné ordre aux affaires, il partit pour aller en Cochim, afin de pouruoir aux choses requises pour la flotte qui deuoit reprendre la route de Portugal. Le septiesme iour du mesme mois nasquit vn fils à Emmanuel, & l'appella-on Edouard. Ce fut vn Prince benin & paisible, adonné à la musique & à la chasse, aimé de chascun à cause de sa douceur & humanité. S'il ne fust mort ieune, le royaume esperoit beaucoup de lui, à cause de son naturel debonnaire & sage.

13. EN ceste mesme annee suruint en Malaca vn grief & miserable cas, qui fit perdre la vie à Abedalla Roy de Căpar, lors exerçant l'office de Xabandare. Le Roy de Bintam son beaupere ne demandoit qu'à le faire tuer ou empoisonner. Ne pouuât paruenir à ses pretentes par telles pratiques (dautant qu'Abedalla estoit bien voulu de tous pour sa douceur & rondeur, faisant sa charge avec reputation d'estre fort homme de bien) il resolut de le ruiner par autre moyen. Pourtant il donna charge à quelques capitaines de prendre les premiers vaisseaux qu'ils pourroyent saisir & les amener à Bintam : ce qu'eux executent promptement. Mais il se print lors à les rudoyer de paroles, & les accuser d'auoir interessé ses suiets. Comment, dit-il, sauvez vous pas bien que ie suis Roy de Malaca, & que ceux ci que vous m'amenez prisonniers sont mes vassaux, que j'aime autant que s'ils estoient mes enfans ? l'espere que mon gendre, ou plustost mon fils Abedalla, selon son dessein, me rendra d'ici à peu de iours paisible seigneur de Malaca : & lors ie feray voir quelle difference il y a entre la tyrannie des Portugallois & mon gouuernement moderé : car ie traiteray gracieusement & cōme mes enfans ceux que la violence des estrangers accable pour le iourd'huy. Je say que mon gendre Abedalla est si auisé qu'il ne faudra iamais à me tenir promesse. Ayant semé ces propos il fit banquetter les Malacans, leur donna quelques ioyaux & les reuoya ainsi, leur rēdant tous leurs biēs, avec menaces à ses capitaines de les chastier rudement si à l'auenir ils traitoyent plus de telle façon les habitans de Malaca. Si tost que ces marchans furent arriuez ils commencerent premierement à sacouter aux oreilles des vns & des autres ce qu'ils auoyent oui dire au Roy de Bintam. Le bruit commen-

Embusches & calomnies dressées par le Roy de Bintam contre son gendre Abedalla Roy de Căpar, qui est decapité en Malaca.

ça tost apres à en courir par la ville, & fut rapporté à George Albuquerque gouverneur. Peu de iours auparauât estoit venu d'Indostan en Malaca Barthelemi Perestrel thresorier des guerres, lequel estoit fort familier des fils de Ninachetuen, & faisoit beaucoup en leur faueur. Eux qui ne cerchoyent qu'à venger la mort de leur pere, recueilloient & faisoient valoir ce bruit, adioustans avec serment que par lettres de bonne part & par certains argumens se proueroit qu'Abedalla machinoit de trahir la ville: & que pour cest effect lui & le Roy de Bintam s'estoyent liguez ensemble. Perestrel admonnesta George Albuquerque de preuenir ce dâger si prochain, & se desfaire du traistre, auant qu'icelui peult executer son cōplot. George fit appeller les fils de Ninachetuen qui afferment la chose aller ainsi, & maintienēt qu'il n'y auoit rien plus certain. Cōbien que George fust hōme de bon naturel, si est-ce qu'il commit ceste lourde faute de ne penser qu'en crime capital il ne faut pas adioster trop promptemēt foy au rapport des ennemis: & soit qu'il apprehendast trop vn danger, soit qu'il estimast commettre vn acte digne de memoire de faire mourir vn si grand seigneur, & qui, (quand il n'y eust eu autre cōsideration) portoit nom de Roy, sans delayer dauantage il enuoye querir Abedalla, l'acoulpe de trahison, & lui declare ce que les fils de Ninachetuen deposoyent contre lui. D'autrepart Perestrel recharge, l'accuse & presse plus que nul autre. Surce Abedalla prie George Albuquerque de cōsiderer tout avec vn esprit rassis, & le supplie de n'exposer à la cruauté des ennemis l'innocent, affectionné seruiteur du Roy Emmanuel & des Portugallois, requerant vn delay pour descouurir par tesmoins & preuues suffisantes, sans bouger de prison, les meschantes pratiques du Roy de Bintam, la calomnie de ses ennemis, & son innocence. Outreplus il insistoit humblement vers Albuquerque qu'il se gardast de denigrer si malheureusemēt la nation Portugalloise, & ne susciter beaucoup de personnes à lui vouloir mal, en trempant ainsi ses mains au sang d'un homme iuste. Est-ce (disoit-il) la recompēse des seruices que i'ay faits à vous autres, de vouloir contenter par ma mort la cruauté du Roy de Bintam vostre ennemi iuré, & aprester de quoy rire à ceux qui me portent vne haine irreconciliable, pource que i'ay tousiours esté fidele au Roy Emmanuel? Que demande le Roy de Bintam, sinon qu'ayant failli à me ruer par glaiue, par poison & par autres pratiques de ses seruiteurs, il m'oste ores la vie par la main des Portugallois, pour l'amour desquels i'ay abandonné mes parens, amis & suiets, & irrité ce meschant à me poursuiure si cruellemēt à la mort, & face que ceux entre les bras desquels ie me suis ietté, soyēt executeurs de la sanglante rage qui le transporte ainsi contre moy? Il pretend bien faire deux coups estranges de ceste pierre, l'un que vous soulerez son cœur barbare & felon, l'autre que chascun vous en saura tresmauuais gré, & que maintes nations vous detesteront. Car que diront ceux qui ont veu vos gens me venir tirer de mon royaume, pour auoir charge treshonorable sous vostre autorité, & viure en assurance maugré mes ennemis sous la protection de vos armes, s'ils apperçoient maintenant que vous me degradiez si soudain, & que seruiez de bourreaux à ceux qui me sont deuenus

*Iustes mais
inuides com-
plaintes d'A-
bedalla enuers
vn iuge seduit
par faux tes-
moins.*

deuenus ennemis si tost que i'eus embrassé vostre parti. Pourtant, seigneur Albuquerque, ie vous supplie & adiure par la foy, religion, debonnaireté & vertu dont vous faites profession, de me receuoir en mes iustifications, & me donner terme pour respondre : lors si ie suis conuaincu de trahison, faites de moy tout ce que bon vous semblera. Ces remonstrances & requestes d'Abedalla ne peuvent fleschir pour lors celui qui autrement estoit de benigne nature : au contraire sans attendre dauantage, ce pauvre & innocent Roy fut mené en la place de Malaca, & decapité deuant tout le peuple, au grand regret de plusieurs qui en murmuroient bien fort. En allant au supplice il tendoit les mains au ciel, demandant à Dieu vengeance de ceux qui par leurs fausses accusations estoient cause qu'on le faisoit mourir à tort. Dixsept iours apres Pere Estrel fut emporté de mort soudaine, ce que plusieurs attribuerent à vn iugement de Dieu sur cest accusateur.

14. A v resté, l'exécution d'Abedalla esmut à courroux tant de gens que la plupart des marchans & autres personnes deslogerent de Malaca, destournans par tous les pays où ils alloient les autres marchans de trafiquer ni contrefaire avec les Portugallois qui sont (disoient ils) trahistres & infideles, & qu'apres les auoir fidelement seruis, pour recompense on estoit cruellement mis à mort sans informations ni iustification de l'innocent accusé. Ils ont osté l'estat à Ninachetuen qui leur auoit tousiours esté fidele, & apres tant de seruices l'ont reduit à telle extremité qu'il s'est bruslé soy mesme. Le Roy de Campara iniustement & cruellement perdu la teste. Ayans rempli l'Orient de telles plaintes, auint, pource que les marchans n'osoient plus trafiquer en Malaca, que les ports & peages s'aneantirent, & que la famine & necessité de toutes choses se fourra parmi les Portugallois & Malacans. Mais le capitaine Botel enuoyé par George Albuquerque avec deux nauires, courut par toutes les costes de ceste mer, & pour la familiarité qu'il auoit acquise avec les Rois & Princes de tous les pays voisins de Malaca, il obtint de plusieurs d'eux, sans difficulté, que les marchans trafiqueroient & apporteroient des viures en Malaca, comme ils faisoient auant ces troubles. Tandis que Botel se diligentoit à faire prouision de victuailles, le Roy de Bintam pria par lettres le Roy de Siaca (qui est vn pays vers Midi en la mesme coste de mer, au trauers duquel passe vne riuiera de mesme nom) de lui enuoyer la teste de Botel, promettant donner pour recompense vne siene fille fort belle en mariage. Lors Botel estoit eu Siaca, en danger de sa teste que ce Roy deliberoit chager à la femme qu'on lui offroit en eschange. Mais il auint qu'un de ses domestiques, au parauant prins prisonnier & relasché sans rançon par Botel, entendant ceste trahison, pour reconnoissance du plaisir receu descouurir tout à Botel. Ce pendant le Roy de Bintam equippa douze vaisseaux, & enioignit aux capitaines de lui amener Botel au cas qu'il eschappast, & fust en la route de Malaca. George Albuquerque entendant ces nouuelles, fit armer neuf nauires, sous la charge de Francisque Melio pour aller au secours de Botel : ce que rapporté au Roy de Bintam par ses descouureurs il mit en mer vingt quatre autres vaisseaux de guerre pour se ioindre aux douze, & donner bataille à Melio, ce qui fut fait : mais

Murmures contre les Portugallois par tous les Indes.

Machinations du Roy de Bintam contre George Botel, & ce qui en auint.

apres quelque combat, Melio demeura victorieux, les ennemis ayans fait vne tresgrande perte, il reuint en Malaca, ayant toutesfois perdu en ceste rencontre trente sept Portugallois & grand nombre de Malacans. Quant à Botel il se sauua, & vint surgir avec viures à foison & de diuerſes sortes au port de Malaca, auquel temps George Britio y estoit arriué de la part du Roy Emmanuel, pour commander en la place de George Albuquerque.

*Ordre donné
par Albuquerque
que tu Ormus.*

15. Q V A N T au Viceroy Albuquerque, apres la desfaite de Raix Hamed il auoit tresbien pourueu à l'estat des affaires d'Ormus, gagné le cœur des habitans par courtoisie & douceur, attiré par beaucoup de biens faits le Roy mesmes, & par amiable traitement alleché les nations estrangeres à y venir trafiquer. Plusieurs Rois d'Arabie & de Perse lui enuoyerent ambassadeurs & presens pour traiter de paix avec lui: & quelques grands Seigneurs prendrent bien la peine de venir en Ormus, seulement afin de voir ce personnage tant renommé pour ses vertus. En ces entrefaites vn bruit fut semé que le Sultan arriuoit vne puissante flotte pour s'emparer d'Ormus. Combien qu'Albuquerque ne creust rien de cela, toutesfois il s'en seruit de pretexte pour mieux garnir sa citadelle sans fâcher le Roy, & despoiller la ville de ses armes, afin qu'elle ne peust se reuolter: car il fit entendre au Roy que pour empescher aisément les ennemis d'approcher de la ville il auoit besoin de toute l'artillerie d'Ormus, & fit par ce moyen charrier dans sa citadelle toutes les pieces, pouldres, & munitions qui estoient tant en la ville qu'au palais du Roy: & de peur qu'il ne s'esleuaſt quelque tumulte à cause du grand nombre d'enfans de lignee Royale, il enuoya en Inde quinze Rois d'Ormus, auxquels les gouuerneurs du royaume auoyēt creué les yeux, & les tenoyent enclos au palais avec leurs femmes & enfans, que les Princes & grâds Seigneurs, qui manioyēt à leur plaisir les finances du royaume sous le nom du Roy regnant, nourrissoient en quelques delices. C'estoit le salaire assigné aux Rois & meschans gouuerneurs, quand ils vouloyent vser de leur autorité royale autrement que ne vouloyent leurs surintendans, qui apres s'estre ainsi rendus maistres de la royauté, choisissoient vn enfant de race royale, sous le nom duquel ils tailloyent & rongnoyent de l'estat public à leur fantasie. Si cest enfant ainsi par eux esleué au throne royal entreprenoit quelque chose de son autorité, ils lui creuoyent les yeux, & en prenoyēt vn autre en sa place, pour regner de nom & demeurer suiet à perdre la veuë s'il s'ingeroit de regarder ses affaires vn peu de pres. Ceste occasion de tyrannie insupportable suscitoit de terribles querelles entre tous ces tyrans, dont la ville estoit souuentefois estrangement agitée par les seditions & meurtres qui s'y commettoient. Albuquerque donc voulant abolir la memoire d'vne si execrable meschanceté, & couper broche à toutes dissensions pour l'auenir, donna charge à Garſie Norogne de mener en Inde ces Rois au euglez, commandant qu'ils y fussent nourris & entretenus comme leur estat le requeroit.

Maladie mortelle d'Albuquerque & comment il mourut.

16. M A I S au milieu d'vn si heureux estat & maniement d'affaires, selon le iugement humain, Albuquerque, abatu de vieillesse ou de trop grand travail, fut saisi d'vne fièvre lente qui croissoit de iour en iour. Se sentant pres de la

de la fin, il ordōna capitaine de la citadelle d'Ormus Pierre Albuquerque, ^{meut à ses a-} la vertu & suffisāce duquel il auoit esprouuee en plusieurs endroits, & qu'il ^{faire.} fauoit estre bien voulu du Roy & de tout ce peuple d'Ormus: apres que par vn long propos il l'eut exhorté à se porter fidelemēt, estre soigneux & droiturier. Puis il donna tel ordre à l'estat d'Ormus qu'on ne pouuoit le troubler ni remuer aisément, & pourueut à tout ce qui sembloit propre pour maintenir les affaires des Indes en quelque tranquillité. Cela fait il pensa à ce qui concernoit le salut de son ame, fit son testament, brief n'oublia rien qui appartenist au maintenant de la religion & de ce qui concernoit sa charge. Au reste, il lui print enuie de mourir en Inde, & souhaitoit fort de voir encor vne fois auant que trespasser la ville de Goa, dōt il estoit le fondateur. Il enuoya Pierre Alpoez saluer le Roy d'Ormus de sa part, & l'asseuer qu'Albuquerque lui seroit comme pere tout le temps qui lui restoit à viure, lui recommandant entre tous Pierre Albuquerque laissé capitaine de la ville & citadelle, esperant toutesfois, si Dieu le garantissoit de ceste maladie, retourner en Ormus, afin de monstrier au Roy par bons seruites l'amour qu'il lui portoit. Le Roy pleura de ce depart, & pour responce asscura qu'il honnorerait tousiours Albuquerque comme son propre pere, & seroit en sorte que l'honneur lui demeureroit d'estre le plus fidele seruiteur du Roy Emmanuel, monstrant là dessus receuoir grand soulagement de l'esperance qu'Albuquerque lui donnoit de son retour en Ormus. Apres cest adieu, & pour euiuer toutes autres salutations, Albuquerque, qui ne pēsoit plus au monde, monta dedans sa capitainesse & fit hausser les voiles. Estant à deux lieues d'Ormus, il attendit à l'anchre deux iours durāt les capitaines qui ne s'estoyent peu embarquer si tost que lui. Le Roy d'Ormus lui enuoya quelques vaisseaux chargez de fruits, viures & autres presens. Albuquerque monstra vne contenance fort gaye aux deputez du Roy, & les caressa fort familièrement, puis leur donna congé & quelques ioyaux, monstrant sa liberalité à leurs pilotes & matelots aussi.

17. A Y A N T costoyé l'Inde, vne fregate se vint rendre en sa flotte, en laquelle estoit vn messager enuoyé avec lettres de la part de Cide Hali & d'un ambassadeur du Roy de Perse, escrites à Diu, qui l'auertissoient que Loup Soarez estoit enuoyé par Emmanuel, pour estre viceroi, & renuoyer Albuquerque en Portugal, chose qui leur sembloit si desraisonnable qu'ils lui offroyent tous les moyens de leurs Princes, s'il vouloit demeurer: s'asseurans qu'il pourroit aisément donner la chasie à ceux qui le vouloyēt ainsi desmōter. Albuquerque les remercia, mais il ne tint cōpte de leur offre: ce pendāt tout fāché en son esprit, sachant bien que ceste partie lui auoit esté dressée par ses ennemis, ne peut se cōtenir de tēdre les mains cōtre le ciel, en s'escriant, Mon Dieu, mon Dieu, comment pourray-ie me despēstrier de ces fācheries qui m'ēnuironnent? Si l'obeis au Roy, l'encour la haine des hommes: & si ie m'acommode au desir de ceux là, mon Prince ne sera pas content. Ah! pauvre vieillart, il faut, il faut aller à Dieu. Il repetoit ces mots fort souuent, qui monstroient de combien d'aiguillons son cœur estoit percé. Tost apres, il predict que la fin de ses trauaux estoit prochaine: & ayāt

Messager apporté à Albuquerque touchant Soarez, établi en sa place: & ce qu'il dit & escriuit sur cela deuant que mourir.

reprins ses esprits, certainement, dit-il, ie voy que Dieu donne de bons aduertissemens au Roy, & que c'est de son instinct & mouuement qu'un autre a esté esleu pour succeder en ma charge : car ie m'en vay mourir, & si par l'avis de mon Prince ie n'auois vn successeur ia designé, l'estat des Indes se fust peut estre remué. Ayant tenu tel propos il demeura coy : & dis la maladie se rengregeoit. Sur ce il escriuit vn mot de lettre au Roy Emmanuel, contenant ce qui s'ensuit. *STR E*, le vous enuoye ceste derniere lettre, ne pouuant presque respirer & voyant les signes trescertains de ma mort. Je laisse vn fils vnique, lequel il vous plaira fauoriser de vostre benignité & magnificence, pour les grands seruices que j'ay faits à vostre grandeur & maiesté. L'œuvre tesmoignera quel ouurier j'auray esté. Ces lettres acheuees de sa main tremblante & à grande difficulté, il quitta entierement toute apprehension des choses humaines, s'appliquant à mediter ce qui touchoit son salut & à demander pardon à Dieu : & entre plusieurs sienes occupacions spirituelles il se faisoit lire souuëtesfois l'histoire de la passio de Iesus Christ descrite par l'Euangeliste saint Iean, monstrant par souspirs reiterez & autres tesmoignages qu'une telle lecture le fortifioit grandement. Estant en la coste de Goa, il enuoya l'un de ses domestiques en vn brigantin querir son chapelain en la ville, lequel estât venu ils passerent toute la nuit à deuiser de ce qui appartenoit à la vie eternelle, & vn peu auant iour l'ame d'Albuquerque sortit de la prison du corps. Les nouuelles de sa mort portees en Goa, incontinent les Portugallois commencent à pleurer & lamenter, cōme firent aussi les Sarasins & autres nations idolatres, remplissans les rues de plaintes & gémissemens.

*Mœurs d'Albuquerque & sa vertu
ses funeraillies.*

Ce Seigneur estoit si debonnaire, qu'on ne sauroit bonnement dire, si 18.
sa vertu le faisoit plus respecter ou si sa bonté le rendoit plus aimé. Premièrement il estoit grand iusticier, punisseur tresapre du periure, vengeur des torts faits à qui que ce fust, & de chaste cōuersation. Il ne fut iamais marié, & eut vn fils vnique d'une siene seruante. Au reste il n'auoit son semblable au trauail, tellement qu'il lassoit ordinairement par trop de charge ceux qui estoient pres de lui : toutesfois pour les encourager, au lieu de menaces lui mesmes mettoit la main à la besongne. Les calomniateurs estoient du tout en sa male grace, de sorte que personne n'osoit (à peine de s'en repentir) lui accuser fausement quelqu'un. Son conseil estoit tousiours bien digéré, & sa diligence incroyable pour executer ses desseins. Il aimoit verité, haïssant à mort mensonge & vains propos : patient à souffrir les iniures qu'on lui faisoit, & si par fois la cholere l'emportoit vn peu loïn, en la plus grande ardeur d'icelle il iettoit ordinairement quelque trait à la trauersse (tant il auoit gentil esprit) qui contraignoit ceux qui le redoutoient de se rassurer & rire maugré qu'ils eu eussent. Quant aux bonnes lettres, il en auoit gousté quelque chose, & prenoit plaisir quand les affaires ne le pressoyent, de lire en l'Escripture sainte principalement. On ne sauroit iuger en quel temps ou de paix ou de guerre il s'est monstré plus admirable : car il mania tellement les armes qu'il merite le nom de grand capitaine, & dressa si bien l'estat en plusieurs endroits, qu'on le peut estimer l'un des plus sages

ges politiques du mōde. Aussi tous ceux qui habitoient lors en Goa pleuroyēt son trespas, se plaignās d'estre orphelins d'un pere qui les auoit tēdrement aimez & chers. Son corps fut emporté des nauires en terre avec vne pōpe incroyable & conduit au sepulchre en singuliere magnificence: mais d'autrepart ceux qui assistoyent au cōuoy iettoient tant de larmes que lon pensoit qu'ils deussent expirer en la place. Les nouuelles de son deces cōtristerent toute la coste des Indes, & affligerent grādemēt plusieurs Princes, entre autres Xuranda Roy d'Ormus qui en pleura chaudement & se vestit d'habillemens de deuil: & quāt au Roy de Portugal il en fut extremement marri, & enuoya querir tout sur l'heure le fils d'Albuquerque nomē Blaise, auquel il donna le nom de son pere, commādant que de formāis il fust appellē Alfonso, afin que le nom d'un si grād personage demeurast en la memoire de tous. Puis il fit de grands presens à ce fils, cōme les seruices du pere le meritoient bien, & le maria à vne grande dame.

12. L'AN suiuant toute l'Espagne fut desfigurée par la perte qu'elle receut en la mort de son seigneur le Roy Fernand, prince inuincible, & dont la renommée durera pour iamais à cause de ses actes valeureux. Il estoit fort malade en vn villagenomē Madrigalej au territoire de Trugil, où Emmanuel l'enuoya visiter par Iean Roderic de Meneséz, & sauoir comme il alloit de sa santé. Mais le Roy Fernand deceda le vingttroisiēme iour de Ianuier l'an mil cinq cens seize: ce qu'Emmanuel entendant par les lettres de Meneséz il escriuit incontinent à la Roine vefue nomēe Germaine, à Fernānd fils de Philippe & petit fils de Fernād, & aux Princes de Castille, se cōdoulant avec eux, & monstrant la bonne affection qu'il leur portoit, & enioignit à Meneséz d'acōpagner les lettres de paroles plus amples, lui enuoyant aussi memoires de ce qu'il desiroit negocier avec eux. Il despescha aussi vn paquet à Roderic Fernād Almade, l'un de ses cōseillers, & lors son facteur en Anuers, & lui commandoit de l'auertir de tout ce qui passoit es pays bas & en Allemagne, afin de pouruoir aux affaires de Portugal, selon la necessité du tēps. En apres il resolut d'enuoyer vn ambassadeur à l'Empereur Maximiliā premier ayeul de Charles cinquiesme, fils de Philippe d'Austriche, & heritier du royaume de Castille. Pierre Correa, gentilhomme fort estimē du Roy pour sa prudence, eut ceste commission. Le sommaire d'icelle estoit, que Charles espousast Isābelle fille d'Emmanuel, & qu'Eleonor sœur de Charles fust donnée pour femme à Iean Prince de Portugal. Correa fut receu de bon cōeil par Maximilian qui print grand plaisir aux lettres d'Emmanuel plaines d'offres & d'amitiē: toutesfois pource que le temps n'estoit propre à la decision de telles affaires, Correa reprint le chemin de Portugal, suiuant la permission d'Emmanuel.

20. C O M M E ces choses passoyent, Loup Soarez n'estoit pas en repos, ayant succédé à ce grand Albuquerque, à la valeur duquel il ne pouuoit atteindre. Neantmoins il s'acquittoit soigneusemēt de sa charge. Premierement il despescha vn gentilhomme vers la Roine de Coulam, lors regēte du Royaume, à cause du bas aage de son fils duquel elle estoit tutrice, pour faire paix avec conditions raisonnables, & telles que s'ensuiuent: asauoir qu'elle

Mort de Fernand Roy d'Espagne.

1516.

Premiers ailes de Loup Soarez, Viceroyes Indes & successeur d'Albuquerque.

fist rebastir à ses despens le temple de saint Thomas, que les Sarasins auoyent demoli lors qu'ils tuerent Antoine de Sale: qu'elle rendist les reuenus du temple, payast quatre vingts milliers de poyure pour les biens pillés aux Portugallois: & auant que transiger avec les Sarasins, expediait les nauires de Portugal, vendant sans fraude à chascune d'icelles le poyure dont on les pourroit charger, selon vne taxe equitable & arrestee. Outre cela Soarez fit equipper la flotte qui deuoit faire voile en Portugal, ratifia la paix traictee par Albuquerque avec le Roy de Calecut, appaisa les troubles suruenus en Cananor: & comme il retournoit en Goa vne soudaine tourmente le contraignit de gaigner Anchediue, d'où il enuoya Alexis de Menefez avec huit nauires pour costoyer l'Arabie, & aller de là hyuerner en Ormus. Incontinent apres son arriuee en Goa il assembla le cōseil par commandement du Roy Emmanuel, pour auiser s'il estoit expedient de ruiner la ville & abandonner aux ennemis l'isle desnuée de garnison, ou s'il valoit mieux pour le bien de l'estat de garder tout. Car les ennemis d'Albuquerque ne cessoient de l'accuser apres sa mort cōme en son viuant, soustenans par longues harangues que ceste ville ne seruoit de rien aux Portugallois: mesmes l'espace de plusieurs annees apres le decès d'Albuquerque ils continuerent en leurs mesdisances & abois, disputans çà & là que ce braue capitaine n'auoit fait chose quelconque qu'à l'estourdie & à l'auenture. Toutesfois il fut arresté en ce conseil qu'il falloit renforcer la garnison de l'isle, remparer & bien munir la ville: ce que Soarez aprouua, quand ce vint à dire son auis. Estât retourné en Cochim, il arma quelques vaisseaux pour entrer en la mer d'Arabie, & enuoya promptement Fernand Andrade en la China. Andrade avec trois nauires print la route de l'isle Taprobane, & alla surgir au port de Pacem, où il trouua l'anim Rabelot par lequel il fit auertir le Roy de son arriuee. Rabelot fut benignement receu, logé, & honoré de grāds presens, & la paix arrestee entre le Roy & Andrade stipulant pour Emmanuel, & lieu deligné pour le bastiment d'une citadelle. Cela expedie Andrade refraischit ses nauires de ce qui estoit necessaire, delibérant suiure sa route: mais vne bourrasque le cōtraignit retourner en Malaca, où seiournoit lors Raphael Perestrel nouvellement venu de la China, qui lui fit vn ample discours des mœurs, loix, coustumes & gracieuse façō des Chinois. George Britio gouuerneur de Malaca fit embarquer Henri de Leme pour aller en vn haure du royaume de Pegu, nommé Martaban, afin d'en ramener des victuailles. Pegu est vn pays fertile & de merueilleuse estēdue, assis en l'Inde de la Gange vers l'Occident, d'où il s'estend iusques en Malaca: vers l'Orient il touche à la mer qui borne vne partie de la China. Tandis quil attendoit en ce port, quelques Sarasins, à qui lon auoir prins vne nef, accuserent Leme d'estre vn brigand & cruel coursaire, si que le Roy de Pegu arma vne flotte, & somma Leme de rendre la nef aux Sarasins. Leme soustint le choc des assaillans l'espace de trois iours, mit en fond plusieurs vaisseaux, tua grand nombre d'hommes: mais finalement fa nauire commença à puiser, d'autant qu'elle estoit à demi poutrie, brisee & percee de coups de canon, tellement qu'elle coula en la mer. Quāt à Leme il se sauua
en la

en la Taprobane avec vn esquip & vn brigantin chargez de soixante Portugallois. Mais vne tourmente les chassa de telle furie qu'ils allerent faire naufrage au bord, & vingthuit d'entre eux furent engloutis des vagues, les autres & Leme aussi s'en allerent au royaume de Pedir, où ils furent les bien venus & humainemēt traitez par le Roy. Alexis de Menefez empesché par les vents de costoyer l'Arabie, monta en Ormus, où il executa de point en point la commission que Soarez lui auoit donnee, puis retourna en Inde si tost que la nauigation fut commode.

21. T A N D I S que les Indes estoient ainsi gouuernees, le Roy de Portugal pensoit aussi à l'auancement de sa religion: & entendant que le royaume de Cogo en Ethiopie embrassoit de plus en plus le Christianisme, pour mieux paracheuer ce qui estoit ainsi commence selon son desir, il enuoya vn renfort de prestres au Roy Alphonse, avec des breuiaries, messels, & autres tels prestres, pour rendre ce More plus affectionné que iamais à la nouuelle religion qu'il auoit receue. Lors que ces prestres & les deputez d'Emmanuel entrerent en la riuere de Congo, Alphonse estoit empesché en vne guerre contre aucuns siens vassaux reuoltez de son obeissance: ce pendant quelques vns de ses officiers recueillirent assez benignement les Portugallois en vne bourgade nommee Sono. Ceste guerre acheuee à l'auantage du Roy, il fit grande caresse aux prestres, souhaitât gloire immortelle à Emmanuel qui lui faisoit tant de biens. Les autres prestres haut-ouoyēt merueilleusement les vertus de ce Roy Alphonse: car il estoit aspre à chastier les malficteurs, charitable enuers les pauures, bien auisé à maintenir les reuenus de son royaume, temperé en sa maniere de viure, de chastes mœurs, deuor en sa religion, & si zelé qu'il sembloit auoir tousiours les yeux tendus contre le ciel. Et soit qu'il fist iustice, ou haranguast deuant son peuple, ou consultast des affaire de guerre ou de paix, il se proposoit tousiours Dieu deuant les yeux, rapportant toutes choses à la gloire d'icelui. Il fit dresser des escholes, donnoit grands gages aux regens, afin d'instruire la ieunesse, non seulement es bonnes lettres, ains aussi en la religion. Quant à lui tout le temps que le public lui laissoit estoit employé à l'estude, ayāt tousiours en la bouche vne infinité de sentences des Prophetes & Apostres. Car à force de lire continuellement en la Bible il y estoit des plus exercez, & retenoit fermement ce que les prestres lui disoyent. Souuent il exhortoit ses suiets à recevoir & aimer le Christianisme: & au reste il auoit l'entendement bon, & la memoire asseuree. Apres auoir leu & releu cinq liures des ordonnances de Portugal, il loua fort la sagesse de ceux qui les auoyent dressees, l'ordre & reiglement d'icelles: mais il n'aprouuoit pas beaucoup certaines loix faites pour des choses de neant, tellement que se mocquant vn iour de ceste diligence affectee il demanda aux Portugallois, quel chastiment estoit ordonné à ceux qui mettoient pied à terre en leur pays. Il respectoit si fidelement le Roy Emmanuel, que souuent ces mots lui eschappoyent que iamais il n'auoit plaisir au monde qu'il n'eust fait vn voyage en Portugal, pour se prosterner deuant Emmanuel & se donner du tout à lui, pour reconnoissance de la lumiere celeste dont il estoit esclaire, seruant au vray Dieu, & aspi-

Etat du royaume de Congo en Ethiopie

rant à la vie eternelle par le moyen du Roy Emmanuel, qu'il appelloit tref-illustre & tressainct.

Estat de l'Europe, spécialement de Portugal.

EN la mesme année François de Valois, premier de ce nom, Roy de Frâ-^{22.} ce enuoya vn ambassadeur en Portugal avec lettres fort gracieuses, par lesquelles il prioit Emmanuel de vouloir entrer en la ligue que lui & quelques Princes traitoyent alors pour courir sus à d'autres. La responce d'Emmanuel fut qu'il estoit tresioyeux de la bonne amitié qu'un si puissant Roy lui portoit, & que sauue la religion & le deuoir d'un Roy Chrestien il seroit volontiers pour celui de France tout ce qui lui seroit possible: rutes-fois que son cœur auoit en horreur les guerres que les Princes Chrestiens s'entre faisoient, son intention estant de ruiner les Mahumetistes. Que ce pendant il souhaitoit aux Princes Chrestiens vne bonne conscience & vniou de cœurs avec accroissement de tous biens. Enuiron ce mesme temps trois ieunes seigneurs Polonois firent le voyage de Portugal pour voir le Roy Emmanuel, la renommee duquel voloit au grand esbahissement de chascun iusques en ces pays lointains: car lors que les autres Princes Chrestiens, sans plus se souuenir de cest illustre nom, s'entr'haïssoient ne cerchâs sinon la confusion les vns des autres, & aueuglez de fureur bastissoient sur leurs ruines la puissance de leurs ennemis communs, qui sont au guet pour s'emparer de leurs estats, Emmanuel meritoit d'autant plus de louage, qu'il estoit seul en bon mesnage avec les autres Princes Chrestiens, & n'y auoit persuation quelconque qui le sceust induire à se liguier pour la guerre, ioint le zeile qu'il monstroient ne laissant iamais en repos les ennemis du nom de Christ en Afrique & es Indes. Dauantage, sous l'autorité d'Emmanuel le chemin estoit ouuert pour aller voir les plus eslongnees nations du monde, l'Inde conquise, plusieurs peuples Orientaux subiuguez, les grandes armées d'Arabes, de Perles & d'Egyptiens desconfites, victoires obtenues non point par force ni industrie humaine, ains (comme on peut bien presupposer) par la faueur de Dieu, bataillant pour son seruiteur. Ceste louange du Roy de Portugal ainsi espadue par la bouche des hommes, estoit allee iusques en la cour & aux oreilles du Roy de Pologne affectiôné de mesmes à la guerre contre les Turcs & autres ennemis de la Chrestienté, faisant exercer au reste la noblesse de son royaume aux armes, & les contenant sous bonne discipline. Les trois ieunes Seigneurs susmentionnez furent induits par ce bruit de monter à cheual & venir de si loin pour voir le Roy Emmanuel, & le prier de les vouloir faire cheualiers de la main, d'autant qu'ils s'asseuroient que leurs entreprises en guerre prospereroient, si vn Prince orné de tant d'excellentes vertus les honnoroit de l'ordre de cheualerie. Ils obtindrent leur demande, & apres auoir esté passez cheualiers par les propres mains du Roy, qui leur en donna toutes les marques, & les honnora de plusieurs presens, ils reprindrent le chemin de Pologne, louans grandement par tout où ils passoyent la vertu & magnificence d'Emmanuel.

Guerre d'Arzile & les plus remarquables euenemens d'elle.

D V R A N T ceste année, le Roy de Fez ayant en diuerses courses rauagé le territoire d'Arzile & emmené presques tout le bestail, reduisit la ville en grande disette de chair. Pour reparer ce dommage, Jean Coutin, suui^{23.} de

de deux cens cinquante cheuaux, marcha toute vne nuit, & auant soleil leu   donna dedans vn riche village pres d'Alcassarquibir, o   lon ne se doutoit nullement de lui    cause de la distance du chemin : surprint les ennemis, en arresta prisonniers cinquante cinq seulement, les autres s'estans sauuez    bien courir: emmena mille bœufs ensemble force cheuaux & ieunes poulains, non sans grande difficult  ,    cause des eaux desmesurement enfl  es este nuit l   par vne pluye qui auoit est   fort longue. Il fut incontinent suivi par le gouuerneur d'Alcassarquibir acompagn   de trois c  s cheuaux, mais la pluye destourna le combat : car    peine Coutin eut pass   vn certain pont, que les eaux ia espandues par la campagne le coururent du tour, si que l'ennemi craignant ne pouuoir regagner pays, s'il entroit plus auant, se retira d  s Alcassarquibir. Par telles courses Coutin escatmouchoit les Mores ses voisins, fourrageant la campagne, dont le Roy de Fez fut tellement despit   qu'il assembla vne puissante arm  e, afin d'assi  ger Arzile. Il menoit trente mille hommes de cheual, & plus desep tante mille piet  s, avec force artillerie & munit  s de guerre, puis marcha vers Arzile laquelle il assi  gea, faisant tirer vne tr  chee autour, dresser des forts & placer les pieces. Cela fait la batterie commen  a, & fit on diuetses mines sous terre pour donner le saut aux murailles, brief tous moyens furent employez pour emporter ceste place, auant que les assi  gez peussent estre secourus. Toutesfoi  s Coutin, auerti d'assez bonne heure de ceste venue, auoit escript    Nonio Ribero sollicit  ur des affaires du Roy de Portugal en Andalouzie, & lors resident en la ville de Malaga, qu'il lui enuoyast incontinent plusieurs choses mentionnees aux lettres, & necessaires pour soustenir le siege. Il auoit aussi mand   en Portugal les nouuelles de la deliberation du Roy de Fez. Puis il fit reueue de ses soldats, les distribua par quartiers aux capitaines, munifiant des plus assurez corps de garde les endroits o   le danger paroissoit plus grand, & les encourageant par longue exhortation    se defendre gaillardement. Tous se resolurent de viure & mourir leans avecques lui. Ribero enuoya sans aucun delay en Arzile ce que Coutin lui demandoit. Iean Mascaregne, colonnel des cheuaux legers, arma en bien peu de iours deux nauires sur lesquelles il chargea six vingts h  mes de cheual, & aut  t de pietons qu'il y en p  t entrer, menant avec soy Nonio Mascaregne son frere. Les deux autres,   sauoir Manuel & Antoine, esto  y  t dedans Arzile sous la cornette de Coutin. Alors que les susnommez arriuerent pres d'Arzile, elle estoit assaillie de toutes sortes. Ribero enuoya deux cens soldats de Malaga, sous la charge de deux gentilshommes, qui pour les bons seruices par eux faits au Roy Emmanuel, auoyent est   richement recompensez de lui. Coutin les receut tous fort humainement & avec grandes caresses, leur assignant place pour la defendre    leur honneur : & cependant, de iour & de nuit il faisoit contreminer, reparer, rebastir murailles sur les anciennes ruines. Fr  cisque Dore Geneuois, frere de cest Andr   Dore t  t ren  m   capitaine sur mer, auoit la charge des fortifications, & pour adioint Roderic de Soufe, surnomm   Cide, lesquels firent belle preuue de leur vaillance & industrie en ce siege, tellement que ch  scun auoit l'  il sur eux & parloit

de leur vertu. Les autres capitaines s'acquittoient de leur deuoit, se présentant tefoluement à tous dangers qui se presentoyent. D'autrepart les ennemis ne donnoient aucune relasche aux assiegez. Quant au Roy de Fez, la deliberation estoit, au cas qu'Arzile ne fust emportee d'assaut ou rendue en dedans peu de iours, de leuer le siege, craignant se morfondre là deuant: ce qui l'esguillonnoit à presser asprement & sans cesse les assiegez, tellemēt que les gēs à coups de fleches & harquebouzes taschoient de chasser ceux qui gardoyent le rempar: les autres caionnoient incessammēt pour agrādir la bresche: d'autres conoissans les mines prestes pofoient au pied des murailles des caques de pouldre, & si tost que les vns auoyent quelque peu trauaillé, ils estoient soulagez par gens frais qui prenoient la place, tellement que les choses sembloient reduites à l'extremité. Neantmoins ceux de dedans n'auoyent faute de courage ni d'adresse pour resister: nonobstāt les coups de trait, la pluye des harquebuzades, & la fouldre du caion, ils gardoyent l'endroit qui leur estoit ordonné, faifans tout deuoir de repousser l'ennemi s'il approchoit: en telle sorte toutesfois qu'il en tomboit tousiours nombre de part & d'autre. Tel estoit l'estat d'Arzile quand Roderic Barret parti des Algarves avec douze carauelles y arriua, ce qui rassura si bien les assiegez, qu'ils s'estimerent assez forts pour resister aux ennemis, & les combattre main à main sur la bresche, quand toutes les murailles seroyēt bas, & dedans les mines aussi. En ceste flotte Garfie Melio menoit six cens braues soldats des Algarves, & plusieurs gentilshommes aussi, qui s'employèrent courageusement en telle necessité. Mesmes quelques pilotes & mariniers de ce mesme quartier, hommes non seulement adroits à la voile, mais aussi propres à manier les armes, entrèrent avec leurs vaisseaux dans le port d'Arzile, & firent tresbien en ce siege. Sur ces entrefaites vn More prisonnier trouua moyen de se sauuer au camp des ennemis, & dit au Roy de Fez, que la ville estoit mieux fournie de gens qu'il ne pensoit: ce qui l'estimāt tellement que sans son frere le Roy de Mequinez il vouloit deslors leuer le siege. Ce pendant Iacques Lopez de Siqueire arriua avec vne flotte de trente nauires enuoyees de Portugal: qui fut cause que les Rois descamperent laiffans Arzile en liberté. Coutin mit aux champs tous les hommes de cheual qui se trouuerent dans Arzile, donna sur l'arrieregarde des Mores, en tua quelques vns & emmena des prisonniers. En ce temps Jean Gonçalue de Camare, gouuemeur de l'isle Madere, se plaignoit de certaine iniure qu'il pretendoit lui auoir esté faite par le Roy Emmanuel, & s'en sentoit si offensé qu'il s'apprestoit pour quitter isle, domicile, richesses, reuenus & tout, pour chercher demeure hors de la iurisdiction de Portugal: car il maintenoit que la souueraineté de l'isle donnée à ses predecesseurs lui auoit esté ostee, où (qui valoit autant) trop amoindrie, ce qu'il ne pouuoit supporter. Or comme il fust sorti de l'isle, vne tourmēte le chassa en Algarve, où il entendit qu'Arzile estoit assiegee. Cela lui fit chāger d'avis, car il soudoya à grands gages sept cens hommes, & en toute diligence se rendit dedans Arzile. Mais les Rois Mores auoyent ia leué le siege, en telle sorte que plusieurs presumoyent qu'on reuiendroit à vn deuxiesme siege avec plus grand

grand appareil que deuât. La noblesse lors residente en Arzile estoit espui-
sée d'argent, & n'auoit plus grand haste que de regagner le royaume de
Portugal. Coutin n'y pouuoit donner ordre: ce qu'apperceuant Camare il
promit double paye aux soldats, iurant qu'il demeureroit là tant que bon
sembleroit à Coutin, pour faire tel deuoir que personne ne le pourroit
charger d'auoir defailli enuers Dieu ni le Roy en tel affaire. Par tel exemple
plusieurs gentilshommes furent retenus dedans la ville. J'ay pëse que ce dis-
cours des deportemēs du gouuerneur de Madere ne seroit pas hors de pro-
pos, pour monstrer ce qui prouient des plaintes que les Portugallois font
contre leur Roy. Tout ainsi que les enfans mignards se lamentēt souuent
apres auoir esté fouëttez de la main de leurs peres: ainsi la noblesse de Por-
tugal, irritée par fois pour choses legeres, murmure contre les Princes qui
l'ont esleuee & entretenue. Ce nonobstāt en vn accidēt soudain, & quād la
necessité le requiert, elle expose ses biēs & sa vie à tous hazards pour main-
renir la personne & maiestē royale. Apres que Camare se fust ainsi porté a-
uec grāde reputation, il se retira en Seuille, d'oū Emmanuel le rappella par
gracieuses & amiables lettres.

24. ENVIRON ce mesme temps les Portugallois perdirent beaucoup en la mort d'Ataide braue chef de guerre. Quelques Alarbes demeurās sur les limites du royaume de Maroch en vn quartier nommé Oleidemet, tribu-
taires du Roy de Portugal, se plainquirent à lui de ce que certains de Xer-
quie fourrageoyent leurs possessions, & les traitoyēt cruellement. Or Ata-
ide estoit tenu par les articles de l'alliance de leur assister contre tous ceux
qui voudroyent leur nuire en sorte que ce fust. Ceux de Xerquie contre
lesquels on imploroit le secours d'Ataide estoient gentilshommes vail-
lans, exercez aux armes, qui auoyent payé tribut au Roy de Portugal, puis
s'estoyēt reuoltez, & demeuroyent en leurs pauillōs pres de Maroch, d'oū
ils courroyent sur les terres de leurs voisins, faïsans mille maux à tous les su-
iets du Roy Emmanuel. Ataide les enuoya incontinent descouurir, & ses
espions rapportent qu'iceux s'estoyent campez au pied de la montagne
qu'ils nomment Mōtes claros. Sur quoy Ataide partit de Safin avec quatre
cens trente cheuaux & quelques pietōns, le dixneufiesme iour de May l'an
mil cinq cēs seize, sans que personne peust presumer en quel lieu il preten-
doit se rendre. Ayant fait enuiron quinze lieuës, il rencontra les Mores de
Dabide, aufquels s'estoyēt ioints ceux de Garabie avec leurs forces, qui mar-
cherent de là ensemble, estans sans la troupe d'Ataide au nombre de qua-
tre mille cheuaux. Ils entrèrent incontinēt en vne contrée nommée Alguz,
qui est en plate campagne, fertile à merueilles, & limitrophe, du territoire
de Maroch, à trauers laquelle passe vne riuierē aussi appelée Alguz. Ils lais-
serent là les femmes des Alarbes confederez, & tous ceux qui n'estoyent
propres à la guēre: puis mōtez à cheual sur le soir, arriuerēt deuant iour au
lieu où estoit campé Rah Benxamut, vaillant capitaine, & de grand'estime
entre tous les Alarbes. Majs Ataide assaillit li soudain ses ennemis que per-
sonne d'eux ne se mit en defense, tellement qu'il y eut terrible boucherie:
Benxamut se sauuant avec aucuns en petit nombre. Ataide se mit incon-

*Guerre de
Maroch, &
la victoire des
Portugallois
sur Rah Ben-
xamut.*

tinent au retour avec force butin, conduisant l'arrieregarde, Aluar Ataide portant la banniere Royale, & Loup Barrigue menant l'avantgarde. Estant à deux lieues loin de Maroch, il se reposa quelques heures en vn lieu assez plaissant, pour se soulager de l'ardeur du soleil qui lors estoit extremement violente. Benxamut se presenta tout soudain, premierement avec septante chevaux, puis apres en plus grosse compagnie, pource qu'on acouroit à son secours de plusieurs endroits. Lors il commença à voltiger autour du camp, & criant à plaine teste apres les Alarbes cōfederez des Portugallois, les exhorta de ne perdre la belle occasion qui se presentoit. Si vous coupez la gorge à ces Chrestiens, vous ferez (disoit-il) chose agreable à Mahumet, a-franchirez vostre nation de la tyrannie qui l'accable, effacerez au sang des Portugallois vostre souillure, en ce qu'avez violé la religion, & redrez vostre nom immortel pour vn acte si genereux. Courage mes freres & compagnons, Sabin sera nostre demain, le iour suiuant ne us prendrōs Azamor, la memoire des Portugallois sera raclee de toute nostre Mauritanie, & vostre renommee durera. Tandis qu'il crioit ainsi les Portugallois marchoyēt en rang selon qu'il leur estoit commandé. Les confederez ne lui responderent mot, ains s'auancerent avec leur butin vers l'auâtgarde, afin d'estre plus loin du danger.

*Memorable
combat entre
Benxamut &
les Portugallois
qui sont
mis en route,
pris & enle-
vez en pieces
avec la plus-
part de leurs
chefs.*

A V I N T qu'entre les prisonniers estoit vne des femmes de Benxamut 25.
nommee Hote, belle entre les autres, & qu'il aimoit aussi tout outre. Icele commence à crier tout haut, Benxamut, Bēxamut. Lui s'arreste tout court, & elle ayant obtenu congé des capitaines de pouuoir dire quelques mots à son mari, lui tint ce langage. Benxamut, combien de fois m'avez vous dit que vous exposeriez vostre vie à tout hazard plustost que souffrir qu'on m'emmenast prisonniere? Vous le voyez maintenant, & toutesfois vous l'endurez! Qu'est deuenu l'amour que me portiez? Où est vostre promesse & ceste vaillance dont vous faisiez vos brauades si souuent? Le iour n'est pas passé, respond Benxamut: la victoire gist en la main de Dieu, l'exploit en la force de mon bras. Mais Hote ietta plain sa main de poussiere en l'air, adioustant ce mot, Le vent emporte la fermeté de vos paroles: allez donc, & iouissez à vostre aise d'une autre femme, de laquelle vous faites plus de compte que de moy, à ce que j'en puis conoistre. Cependant, ie me plaindray toute ma vie, ou de vostre desloyauté, ou de vostre couardise, sans que ie puisse dire maintenāt lequel de ces deux vices deshonnore plus vn homme qui doit auoir quelque cœur. Benxamut deschaussa incōtinent l'un de ses souliers, & le ietta droit à Hote, l'assurant par tel signe (acoustumē entre ceste nation) qu'il ne fausseroit point la foy qu'il lui auoit promise: & là dessus se tournant vers ses troupes, tout epleuré leur fit vne harangue pour les fleschir à compassion. Si iamais (dit-il) vous avez porté affection à quelque femme, si l'honneur vous a fait souuēt mespriser la mort, si vous aimez ma vie, remediez au mal que l'amour de ma femme me fait, empeschez que ie ne tombe en ignominie extreme, garantissez moy du danger qui me pend sur la teste: car si ceste femme m'est ostee, il faut que ie meure bien tost de regret & de honte. Pensez aussi combien vous meritez enuers le
grand

grand Prophete Mahumet, si vous combattez pour maintenir sa loy. Ceste exhortation esmut merueilleusement les troupes à suivre Benxamut, lequel courant à teste baissée dans l'arrieregarde des Portugallois, chargea si furieusement qu'ils se trouuoient bien empeschez de parer aux coups. Alfonso Norogne qui estoit sur la queue faisoit vn merueilleux deuoir pour repousser l'ennemi. Lors Ataide suruint, & lui dit en souriant, Ne tuez pas ainsi tous les Mores que j'ay esleuez avec tant de trauaux : c'est raison que nous en gardions quelques vns pour graine. Marchez donc deuant, ie prendray garde derriere. Norogne se partoioit bien enuis de son beaupere, toutesfoi s'osant desobeir il se range en l'auantgarde. Incontinent Ataide monte sur vn cheual frais, pource que le sien estoit tout las, & soustenoit si brauement les Mores qu'il ne permettoit à pas vn des siens de combattre hors de rang : & par fois il amassoit tellement ses troupes que c'estoit pour donner vne charge aux ennemis. Cela ayant esté fait plusieurs fois, Benxamut vid qu'Ataide combattoit ayant le col tout descouuert, d'autant que la cuirasse s'estoit desboulée en cest endroit : lors s'aidant de l'occasion il lâche de toute sa force vn iaelot à Ataide & lui transperce le gosier, ostant la vie tout d'un coup à ce grand capitaine qui auoit tant de fois desfait les Mores. Ceste pette troubla toute l'armee, en laquelle s'esleua vn tumulte qui fut cause de la perte & malheureuse fin des Portugallois : car les vns vouloyét pour chef Norogne, les autres Alfonso Ataide, & y eut tel debat pour cela qu'il y a en quelque estat public quand les compatriottes se mutinent les vns contre les autres. Ainsi, quoy que l'ennemi fust sur leurs bras, ceux là disputerét tellement que peu sen salut que, sans auiser à se defendre de Benxamut, ils ne s'acharnassent les vns contre les autres par vne fureur & rage la plus estrange du monde. Les Mores confederez voyās vn tel desordre, se ioignirent aux ennemis, suiuant l'exhortation de Benxamut, afin d'auoir part au butin : tellement que presques tous les Portugallois furent tuez ou prins prisonniers, le tout par leur propre orgueil, & par la meschante reuolte de leurs alliez. Entre les autres Norogne & plusieurs gentilshommes demurerent morts sur le champ. Ceste victoire haussa fort le cœur aux Mores qui commencerent à s'asseurer de leurs affaires : lès vns quitterét entierement le parti du Roy de Portugal, les autres branloyent en attendant l'issue de ces auantures, & ne pouuoient croire qu'apres la mort d'un si vaillant capitaine lon peust aisémēt trouuer homme qui maintinst si valeureusement le droit d'Emmanuel. Benxamut se retira, emmenant la victoire, l'honneur, le butin, & (ce qu'il estimoit plus que toutes autres choses) sa femme bien aimée : tellement que tous l'admiroyent & esleuoient sa vertu par dessus les cieux. Mais sa femme lui rendit la pareille de ceste grande amitié. Car estant auenu quelque temps apres ceste victoire que le Xerif donna bataille au Roy de Fez, Benxamut fut tué en poursuivant vn des ennemis, qui en tournant visage & à bride abatue le transperça d'un coup de lance. Hote fit les obseques de son mari avec vne infinité de larmes & lamentatiōs, mit le corps en vn sepulchre fort magnifique, puis s'abstint de boire & manger neuf iours durant, ce qui la fit mourir, & luiuant ç

qu'elle auoit ordonné fut enseuelie aupres de son mari, estimant chose indigne d'estre separee par mort du tombeau de celui qu'elle auoit vniquement aimé, & lequel lui portoit de sa part vne singuliere affection. Le Roy de Portugal ayant receu nouuelles de la mort d'Ataide & de la desfaite de ses troupes, nomma pour succeder en sa charge Nonio Mascaregne braue capitaine.

*Harangue de
Lehabentafuf
au Roy de Por-
tugal.*

L O R s que les Portugallois furent ainsi mal accommodez, lehabentafuf estoit en Portugal à solliciter beaucoup d'affaires, & entendant les nouuelles de cest estrange accident, en fut extremement fâché. Ce qui le tourmentoit plus estoit vne apprehension qu'il auoit que le Roy, despité de la perfidie des Mores confederez, ne voulust plus de là en auant se fier à aucun d'eux : quoy auenant il voyoit l'occasion de faire quelque braue exploit s'esuanouir du tout. Donques craignant d'estre desappointé, il supplie le Roy de n'auoir pour suspects tous les Mores pour la desloyauté de quelques vns : & qu'il n'y auoit si fidele natiō au monde de laquelle ne sortissent souuent des hommes meschans & traistres iusques au bout, & discourut deuant le Roy en termes dont la substance fut telle. S I R E, si le forfait de quelques meschans rend suspecte la fidelité des autres hommes, ie ne sçay que deuiendront les Rois, ni quels seruiteurs ils pourrōt auoir. S'ils ne sont aidez de quelques gens, executeront ils entreprise, tant petite qu'elle soit, selon leur desir? Car celui qui ne se fiera en personne ne bailleta charge aucune à cestui ci ni à cestui là. Il faut donc que le Prince qui charge tous ses suiets d'auarice & de trahison, sous couleur qu'il y a quelques perfides entre eux, s'aille cacher dedans les bois & quitte du tout le gouuernement de son estat. Vray est que c'est vne extreme folie de croire trop de leger : mais aussi lō ne sauroit voir vn homme plus miserable que celui qui se desfie de tous les autres. Je confesse que ceux qui ont trahi leurs compagnōs, & qui auenglez du desir de butiner ont cruellement saccagé ceux qu'ils deuoyent secourir, sont meschans tout oultre. Mais tous ne sont pas coupables : car on fait que les chefs ont empesché de tout leur pouuoir que les soldats ne commissent vn si meschant & cruel acte. Dauantage, il y en a eu plusieurs qui ont assez fait paroistre en combatant iusques au dernier soupir pour & avec les Portugallois, combien ils leur estoient fideles & bons amis : signe trescertain de leur sincerité, veu qu'ils ont esté tuez par les ennemis parmi les Portugallois. Et quant aux reuoltez, ce qu'ils ont fait ne fust iamais auenu, s'ils n'eussent presumé, & à bō droit, voyās les Portugallois prests à s'entretuer pour l'election d'un chef, que tous s'en alloit perdu. Ainsi donc, estimans (à leur auis) que c'estoit alors fait de leurs vies, & d'autrepart considerans la grande commodité qu'on leur presentoit, l'apparece de quelque proufit a estouffé la lueur de vertu : tellement qu'ils ont mieux aimé viure en emportant quelque pillage, que de mourir avec reputation de fidelité entiers leur souuerain. Ie n'excuse point le crime, au contraire ie suis d'auis que vous visez de vostre autorité royale, & que faciez punir rigoureusement les coupables. C'est autāt la charge d'un Roy de faire bōne iustice des forfaits, que de reconnoistre & recōpenser les actes vertueux. Mais ie veux dire
que

que tous ne font pas en faute, & que la mutinerie des Portugallois, contes-
tans si mal à propos a donné occasion aux meschans de se descouvrir du
tout. Or i'espere, s'il vous plaît employer les gens de bien, & chastier rude-
ment la folie des coupables, que vous regaignerez sans comparaiſon plus
que vous n'avez perdu. Vous avez en beaucoup d'affaires suffisamment es-
prouué ma fidelité : car pour faire seruice à vostre grandeur ie me suis ren-
du ennemi de mes compatriottes, & n'ay iamais reculé quand il a falu
marcher pour l'augmentation de vostre estat. Pourtât si mes seruiſes vous
sont agreables, ie vous supplie, qu'ayant eu cest honneur d'auoir charge
de beaucoup de vos affaires auât que vous conussiez quel ie pouuois estre,
maintenant il vous plaise vous asseurer sur moy de plus grâdes choses que
les passees, puis que par tant de trauaux & hazards que i'ay franchis, il vous
est assez apparu que i'ay ma foy & mon hõneur en singuliere recõmanda-
tion. Ie m'assure que par mon moyen plus de Mores se ioindrõt à vous que
ne montent ceux qui par crainte ou par conuoitise de gain se sont separez
de vostre seruice pour vn temps.

27. CE discours ayant esté prononcé, & repeté plusieurs fois de tresgrande
affection par Iehabentafuf, le Roy fut gaigné, & lui dôna charge de rassieu-
rer les Mores ainsi effarouchez, & leur donner esperãce que le Roy oubli-
eroit tout le passé. Suiuant cela Iehabentafuf partit avec Pierre Mascaregne
enuoyé en la ville de Safin, où ils arriuerēt sur là fin du mois de Iuillet avec
nouuelle garnison de soldats, armes & munitions de guerre. Tout incont-
inent Iehabentafuf fit sauoir sa venue aux capitaines des cõfederez, lesquels
monstroyent en toutes compagnies par grands signes de ioye le contente-
ment qu'ils receuoient de son retour: aussi estoit ce vn braue seigneur, vail-
lant & heureux en guerre : tellement que tous ceux qui marchoyent sous
lui, chargeoyent aussi resoluement l'ennemi que s'ils eussent ia tenu la vi-
ctoire en main. Plusieurs Mores confederez ayans esté asseurez que pour
la mort d'Ataide (ce qu'ils craignoyent) on ne les recherchoit en sorte
que ce fust, vindrent en Safin, où ils obtindrent pardon de Nonio Masca-
regnelieutenant pour le Roy, qui leur fit de grandes promesses, au moyen
dequoy ils deuindrent plus affectionnez à leur deuoir qu'ils n'auoyent esté
au parauant. On disputa puis apres au conseil du chastiemēt des plus cou-
pables, dont le nombre estoit si grand que c'estoit chose tres difficile de les
punir tous: d'autrepart il y eust eu de l'iniustice de chastier quelques parti-
culiers pour tous les autres, & craignoit on qu'en faisant lors quelque aspre
iustice, il n'en sortist quelques tumultes, & que le Roy ne perdist beaucoup
de gens qui autrement lui demeureroient affectionnez. Par ainsi l'auis fut
que le supplice seroit remis à vn temps plus propre, & que ce pendant on
remarqueroit les coupables pour (sous quelque pretexte) despelcher les vns
apres les autres. En ceste mesme annee la Roine Marie acoucha d'un fils
qui fut nommé Antoine, & mourut incontinet, laissant sa mere en couche
griefuement malade.

28. A v mesme temps vne carauelle voguât du royaume d'Algarve en Ar-
zile fut prinſe par des courſaires Mores, sans que la flotte de Portugal se-

*Ordre donné
aux affaires e e
Barbarie par
Iehabentafuf
& Nonio Ma-
scaregne suc-
cesseur d'A-
taide.*

*Captiuité &
illustre mar-
yre de Gosalue*

*Vasce cruelle-
ment traité
des Mores
pour auoir re-
noué au Ma-
hometisme.*

iournant en la tade lui peust donner secours, à cause que le flux de mer s'estoit retiré. François Soveral, homme courageux, porté en ceste carauelle, fit merueilles de cōbater, mais il fut terrassé de plusieurs coups, & mourut les armes au poing, laissant prisonniers vingt huit tant hōmes que femmes. Quelques iours apres, Gonsalue Vascio, braue soldat, More de natiō, & Mahumetiste en son ieune aage, qui auoit d'assez lōg tēps renōcé la fausse religion, pour se ranger au Christianisme, & seruoit de guide des chemins de Barbarie aux Portugallois, se transporta en la ville de Tingi, afin d'y faire penser par vn trefexpert chirurgien l'vne de ses cuisses rompue en guerre. A peine commençoit il à se biē porter, qu'il mōta dans vne nauire pour retourner en Arzile lieu de sa demeure, & pour voir sa femme & ses enfans : ioint que le patron promettoit le rendre dans trois heures sain & sauf à port. Mais le vent leur faillit, qui enhardit deux fregattes de Mores embuschez en mer d'assailir ceste nauire. Gonsalue, homme fort vaillant, estoit lors sans armes & sans compagnons pour le secourir : voyant donc qu'il ne pourroit eschapper la mort si les Mores l'atrappoyent, il saute dans l'esquif pour se sauuer à la rame. Nonobstant cela il fut prins avec vn sien petit fils, & tous les passagers de la nauire tant hommes que femmes, pour ce qu'il n'y auoit personne de defense, tellement que les Mores entrerent dedans à leur aise, & menerent leurs prisonniers à Tetuam. Les femmes racheterent leur pudicité, & empescherent qu'on ne les violast, par abondance de larmes & promesse de grosse rançon, laquelle ayant esté payee, leurs maris & elles eurent congé de se retirer où bon leur sembla. Quant à Gonsalue Vascio, quoy que plusieurs gentilshommes presentassent grâde somme d'argent pour sa deliurance, & que les Mores soyent extremement auares, on ne le pūt tirer de leurs mains: car ils estoient despittez tout outre contre lui pour auoir quitté les superstitions & impietez Mahumetiques. Pourtant ils deliberent le martyrer aussi cruellement qu'il leur seroit possible: & pour le premier, ils despecerent son fils en sa presence, lequel le pere exhorta de souffrir volontiers ce tourment pour la gloire de Iesus Christ. Apres cela ils attachent Gonsalue par les pieds & mains à deux aix separez & retenus d'vne boucle, deschirent son corps à coups de fouet, leuent des lanieres de sa peau, & pour le boutreler plus longuement le frappoyent à reposees, afin que la mort ne mist si tost fin à ses douleurs. Lui cependant soula geoit les souffrances corporelles par continuelle inuocation du nom de Christ, le remerciant de l'hōneur qu'il lui faisoit, en ce qu'il n'auoit en iour de son aage obtenu ceste faueur de laisser la vie en quelque supplice pour le nom de celui qui auoit tant souffert en la croix pour le salut du genre humain. Outre ce que le tourmēt se mbloit fortifier ce personnage, il imploroit aussi la misericorde de Dieu, lui demandant pardon de ses offenses. Les ennemis troublez d'vne foy si constāte, enduroyēt beaucoup plus en leurs ames que lui en son corps : car ils se despitoyent de voir en fumee tous les efforts par eux pratiquez pour rompre ou afoiblir le courage de Gonsalue. Pourtant escu moyent ils de rage, & plus il se monstroït ferme & enduroit constamment plus s'aigrissoyent ils en inuentant nouuelles cruantez pour l'esbran-

l'esbranler. Finalemēt, voyās qu'il cōtinuoit à louer Iesus Christ au milieu de ses tourmēs, & detestoit le nom & la secte du faux prophete Mahumet, ils lui couperēt la langue : ce nonobstāt avec vne ardeur d'esprit paroissant aux yeux & en tout le visāge il rembarroit leur cruelle impietē, & sans dire mot triōphoit de leur brutalitē farouche plus magnifiquemēt que s'il eust beaucoup parlē, car n'ayāt plus l'vsāge de la langue il deuisoit en son cœur plus haut avecques Dieu, remerciāt Iesus Christ d'vne façō trop plus excelēte, que s'il eust eu toute l'eloquēce du monde pour estonner les ennemis. Il souffrit d'vn courage inuincible leurs cruautēz l'espace de deux iours, en fin desquels l'ame desliēe du corps s'envola au ciel. Gonsalue auoit vn frere, lequel s'estoit aussi rangē au Christianisme, & au bout de quelques annees fut prins des Mores qui le traiterent autant cruellement qu'on sauroit dire, sans toutesfois le pouuoir esbranler, ains mourut fort constamment : & ainsi suiuant les traces de son frere, receut la mēme couronne de gloire au royaume celeste.

29. T A N D I S que les affaires se manioyent ainsi en Portugal & en Barba- *Voyages de l'ambassadeur de Portugal pour se rendre en la cour d'Ismael Sophi Roy de Perse.*
rie, Fernand Gomeſe de Leme despesché par Albuquerque, pour aller en ambassade vers Ismael Sophi Roy de Perse, marchoit avec sa compagnie, ayant esté acommodé de quarante chameaux par les Persāns : & par tout où il passoit courtoisement recueilli des Princes & seigneurs vassaux d'Ismael. Vn capitaine nommé Habraim Bea le conduisit iusques à Carmasa, autresfois ville peuplee & riche, mais lors ruinee par le commandement d'Ismael à cause de rebellion, & y auoit seulemēt vne forteresse gardee par quelques mortepayes. Ismael fit dire à l'ambassadeur qu'il ne bougeast de là, tant qu'il lui seroit autrement cōmandé. Cependant Ismael enuoya querir en vne autre ville quelques cheuaux qu'on lui nourrissoit. Le lendemain par sa permission l'ambassadeur & ses gens entrerēt en vne ville forte nommee Carma, & furēt menez en vn tēple magnifique aupres d'vne riuiera fort large, qui arrouse la campagne par diuers conduits & canaux, & la rēd fertile & plaissante à voir. Par tout où l'ambassadeur passoit, lui & ses gens estoient receus en grand honneur par les gouuerneurs des places, & fournis à planté de toutes sortes de viures. Estans arriuez pres de Caixam, ville merueilleusement forte & riche, Mirabucaca lors Cōnestable de Perse (lequel, comme nous auons veu ci deuant, auoit esté iusques en Goa saluer Albuquerque de la part d'Ismael, alla au deuant d'eux, acompagné des ambassadeurs du Roy de Daquem & de Zabaim, lors suiuiās la cour d'Ismael, & de bon nombre de cheuaux & gens de pied. Ils seiournerent là dix iours pour se reposer & rafraischir, & en dix autres grandes iournees furent conduits finalement es pauillōs d'Ismael, qui lors demouroit en la campagne. Toutesfois deuant qu'en approcher, le grād maistre de Perse, seigneur bien suiui, & riche entre tous autres, leur vint à la rencontre, deuissant familièrement & de propos ioyeux avec l'ambassadeur, en attendant que les chameaux & le bagage fussent venus. Lors il fit tendre les pauillōs de l'ambassadeur pres des siens, & aprestier vn banquet. Ainsi qu'ils se mettoyent à table, on leur apporta force viandes qu'Ismael leur enuoyoit. Depuis leur de-

part iusques en ce lieu l'ambassadeur & ses gés estimoyēt auoir fait plus de cinq cens lieues de chemin par terre. Ismael estoit logé en vne cāpagne enfermee de hautes montagnes toutes couuertes de neige, & tenoit-on qu'il y auoit lors trente cinq mille pauillons, plus de cent mil hommes de cheual, vn tref-grād nombre de femmes, tāt de valets de toutes sortes qu'on ne les eust sceu compter. Le lendemain Ismael alla à la chasse, estant lūiui de huit mille cheuaux, eslongnez quelque peu de sa personne. Ceux qui vouloyent parler à lui s'approchoyent, & ayans declairé ce qu'ils auoyent à dire se retiroyent tout soudain en leur rang. Quant au grand maistre il fut enuoyé pour faire bonne chere à l'ambassadeur. Pour rendre le banquet plus solennel, il inuita les ambassadeurs des autres Rois : & lors outre la bonne chere, qui dura des le commencement du iour iusques au soir, ils eurent la musique des voix & instrumens, & tous les cōiiez au sortir de table eurent chascun vne robe de soye passementee d'or, qui leur fut donnee par le grād maistre. Cependant Ismael retournant de la chasse passa deuant le pauillon où ils banquettoyent. Tous sortirent pour lui faire la reuerēce, & derechef il donna à l'ambassadeur de Portugal nouueaux habillemens & presens.

*Pour parler
entre l'ambas-
sadeur de Por-
tugal & Is-
mael Sophi.*

QUELQUES iours apres l'ambassadeur obtint audiāce pour declai- 30.
rer sa charge. Ismael l'attendoit en vn pauillon de tresbelle façon, reluisant d'or, en vne haute chaire, reuestu de drap d'or, & enuironé des Rois & princes ses vassaux. Lors il receut d'un visage ouuert les lettres qui lui furent presentees, fit seoir l'ambassadeur & les gentilshommes de sa suite, s'enquit assez au long de l'estat & grandeur du Pape & comme il se portoit: item des mœurs, aage, maniere de viure, royaume & nombre d'enfans du Roy de Portugal. En apres il les interroqua bien particulièrement, & d'une contenance fort humaine, touchant Alphonse Albuquerque, de sa vaillance & sagesse en guerre & en paix. Puis il receut les presens que l'ambassadeur lui offrit de la part d'Albuquerque, monstrant par beaucoup de signes que ce lui estoient choses agreables. Ayāt deuisé quelque temps de propos re-creatifs avec l'ambassadeur, il fit dresser & couvrir sa table, & pres d'icelle vne autre pour les ambassadeurs & princes là presens, en telle magnificēce que tous estoient estonnez. Pour ce iour les loix de Mahumet furent mises sous la table, pour le regard du vin qu'il defend : & mesmes c'eust esté lors grand peché de boire le vin trempé, & les vns commencerent à semondre les autres avec plus grādes tasses que de coustume. Vn certain seigneur mettant chascun en train, presse & adiure la cōpagnie par la vie d'Emmanuel, qu'on ne laisse rien en la coupe. Ismael commence à leuer vn grād hanap, & demande s'il estoit assez plain, puis l'auale d'un trait, se glorifiant de cela comme de quelque acte de prouesse, & se vantoit aussi d'auoir autant beu lui seul que tous ceux qui estoient là : puis il enuoyoit aux ambassadeurs vin, viandes & tout ce qui estoit de plus delicieux en sa table. Le banquet se passa ioyeusement, & tous ne tendoyent qu'à chasser melancholie & rire ensemble, sans faire beaucoup de ceremonies ni prefaces d'honneur & autres tels entregens, & demurerēt à table depuis dix heures du matin iusques à soleil couchant. Derechef on donna des presens & habillemens aux ambassa-

ambassadeurs, qui se retirèrent en leurs pavillons. Ce pendant & souuentefois le camp se remuoit, mais on continuoit tousiours la bonne chere & la magnificence.

31. E N fin le Sophi delibera de faire responce à l'ambassadeur de Portugal, la charge duquel contenoit trois chefs. Le premier, qu'Emmanuel desiroit entrer en ligue offensiue & defensiue avec Ismael, tellement qu'ils fussent amis des amis & ennemis des ennemis : offrant donner au Perse tout le secours qu'il pourroit pour faire teste au Turc & au Sultan d'Egypte ses aduersaires. Pour le regard du second chef, que pour confermer ceste amitié & alliance Ismael enuoyast des ambassadeurs vers le Roy de Portugal, lesquels Albuquerque feroit seurement conduire d'Ormus iusques en la cour d'Emmanuel. Le dernier contenoit vne supplication d'Albuquerque, qu'il pleüst à Ismael rappeler les Perses souldoyez par Zabaim Dalcâ pour faire la guerre aux Portugallois, & de là en auant leur defendre de se trouuer en telles guerres. Quât au premier chef, il fut respôdu que l'effect & les paroles ne s'accordoyēt pas, & qu'on trouuoit estrâge que le Roy de Portugal qui recerchoit d'amitié celui de Perse eust permis à ses gens de prendre & garder à force d'armes la ville d'Ormus dôt Ismael estoit souuerain, & laquelle par traité d'alliance lui payoit tribut tous les ans. Touchant les ambassadeurs, la responce fut que le chemin estoit long, perilleux, & qu'il y auoit beaucoup de difficultez : mais que l'annee suiuiante Ismael assaudroit les Turcs, esperant que la renommee de ses exploits en ceste guerre lui seruiroit d'ambassadeurs pour voler iusques en Portugal. Qu'apres auoir acheuë cõtre Selym, il estoit deliberé d'entrer à main armee en l'Arabie, & que pour executer tout cela il n'auoit besoin de secours d'aucun Roy. Si Albuquerque lui vouloit môstrer tour d'ami, qu'il gardast le secours par lui présenté pour la guerre d'Arabie, à l'autre guerre qu'Ismael estoit resolu faire aux villes de Catife & Baharem, assizes au dedans le goulfe Persique, lesquelles s'estoyent reuoltees de son obeissance: pource qu'alors il auroit besoin de l'aide d'Albuquerque à cause de la prochaineté d'Ormus. Pour le fait des Perses souldoyez par Zabaim, il respondit cela n'estre en sa puissance: à cause premierement que les gens de guerre sortans des limites de son royaume pour cercher leurs auantures ailleurs, estoient quittes de l'obeissance de ses loix, & ne pouuoient estre rangez sous son autorité. En apres, que l'alliance qu'il auoit avec Zabaim ne se pouuoit rompre sans grand forfait : que toutesfois il l'exhorteroit par lettres de ne plus faire la guerre aux Portugallois. Finalement qu'il auoit commandé à ses capitaines nauiguâs en la mer Persique, d'honorer Albuquerque par dessus tous autres, & en lieu de lui faire iamais desplaisir, estre prests à s'employer de bon cœur pour lui en tout ce qui leur seroit possible: promettant de mander la reste par lettres, & d'en discourir encores plus amplement avec l'ambassadeur.

32. T E L L E fut lors la responce d'Ismael, qui peu de iours apres remua son camp, & fit ceindre par son armee des montagnes ayans six lieues de tour. Par ce moyen les bestes sauuages estoient ramassées peu à peu de toutes parts, & chassées en vne campagne rase que les montagnes fermoient de

*Demâdes de
l'ambassadeur
de Portugal
& resposés
du Sophi.*

*Exercices d'Is-
mael Sophi,
son ambassadeur
& ses lettres
au Roy de Por-
tugal.*

*ingal & à
Albuquerque.*

tous costez. Alors Ismael fit appeller l'ambassadeur & sa suite, & quelques vns des principaux Seigneurs de Perse, puis à coups de fleches transperça grand nombre de bestes. Cela fait avec vn cimeterre tranchant & bien aigu, il en coupa d'un seul coup plusieurs par le milieu, & mesmes d'un autre seul coup il en trancha vne de long en long : aussi estoit-ce vn Prince merueilleusement vigoureux, & fort adroit aux armes. Estant à la fin tout las de tuer, il permit aux autres de faire comme lui, & ce pendant il entretenoit de propos familiers l'ambassadeur, lui demandant si le Roy de Portugal aimoit la chasse, & cōme il s'y exerçoit. Puis apres il alla à deux lieues loin de la plaine pour auoir le passetemps de la pesche, iettant lui mesme les filez, & presentant d'une face riante force poisson aux Portugallois: brief il taschoit par tous moyens & tesmoignages de douceur les asseurer de sa bonne volonté, sans qu'il y eust dissimulation quelconque en son fait, ains suiuant la bonté de son naturel qui estoit debonnaire, ennemi de chagrin, plaissant & propre à toutes heures & à tout tel propos qu'on vouloit. Au partir de là, il vint en des lieux de plaissance, enrichis de iardins & vergers agencez par vn singulier artifice: car il desiroit faire voir aux Portugallois la beauté de son royaume, afin qu'ils en portassent les nouuelles à leur Roy, & que lui en fust d'autant plus estimé. Or pource que l'ambassadeur pressoit pour obtenir son congé, Ismael le pria de l'aller attendre en Tauris, à cause qu'il vouloit lui dōner pour compagnie son ambassadeur vers Albuquerque. Les Portugallois firent dix iournees auant qu'entrer en Tauris, qui est vne tresbelle ville, renommee pour ses magnifiques bastimens; frequentee de gens, abondance de biens, fertilité & plaissance du pays d'alentour. Il y auoit grand nombre de Chrestiens Armeniens qui visitoient souuent les Portugallois, & leur faisoient tous les seruices qu'on sauroit desirer pour l'amitié qu'ils leur portoyent. Les gouuemeurs & principaux de la ville n'oublioyent rien de bonne chere. & de tesmoignages de bienueillāce enuers l'ambassadeur & ses gēs. Vingt iours apres (pource que l'ambassadeur delegué par Ismael estoit deuenu griefuement malade) il leur fut commandé de partir de Tauris, & furēt menez par vn pays fertile & plaissant en vne autre riche ville nommee Caixa, d'où ils allerent en quinze traites à Ziraz. Il faisoit froid, & les neiges empeschoyent tellement les chemins, qu'il faisoit force gēs pour ouuir les passages. Le gouuerneur de Ziraz avec grosse troupe de cheuaux sortit au deuant de l'ambassadeur, comme auoyent fait les capitaines & gouuerneurs de toutes les villes où les Portugallois estoient entrez. Ils furent courtoisement receus & assez bien traitez en ceste ville, le Prince de laquelle estant suruenu, on fit vne feste solennelle, tellement que les Portugallois redoublerent la bonne chere. L'ambassadeur qu'Ismael enuoyoit vers Albuquerque avec lettres au Roy de Portugal, arriua aussi en Ziraz avec presens de diuerfes sortes, entre autres cinq cheuaux pour Emmanuel harnachez de selles d'or & d'argent avec leurs poitrals, croupieres, sangles, & autre equipage de pierrerie luisante à merueilles, & tous cachez de couuertures de soye: itē vn heaume d'or, & plusieurs vases d'or & d'argent excellemment elaborez. Au partir de Ziraz ils prin-

drent

drent le chemin de Lara, où ils s'embarquerent, & finalement vindrent sur-
 gir en Ormus, quelque temps apres le trespas d'Albuquerque, Soarez estant
 desia es Indes. Les lettres d'Ismac au Roy de Portugal contenoient ce qui
 s'ensuit. Au grand Roy, paré d'une haute couronne, tresgrand honneur &
 ornement des Princes Chrestiens, magnanime, tresheureux appui de Por-
 tugal, salut. Vos exploits sont comparables à la beauté des roses de souefue
 odeur. T'escri ces lettres, afin que vous voyez par icelles que ie vous desire
 autant de felicité & d'acroissement d'estat que si vous estiez mon frere. Sa-
 chez que j'ay enuoyé l'un de mes domestiques en Inde, où seiourne vostre
 grand & renommé lieutenant, que vous auez choisi par tresgrande sagesse
 pour le maniement d'une telle charge. Icelui a benignement recueilli mon
 serviteur & sa compagnie, leur faisant tous les plaisirs dont il s'est peu auis-
 ser, ce que j'ay estimé proceder d'une singuliere affection qu'il me portoit.
 Cela m'a esmeu de lui renuoyer un autre de mes domestiques & conseil-
 lers nommé Soleiman, afin d'afermir dauantage l'amitié si bien commen-
 cee. Je desire donc que par lettres & plaisirs reciproques nous estraignions
 uos cœurs de plus en plus par ce lien d'amitié. Dieu tout puissant maintie-
 ne tousiours en sa garde vostre maiesté, royaume & famille. Es lettres escri-
 tes à Albuquerque il l'appelloit le soubstenement & appui des chefs de guer-
 re, le tresfort lion de la mer, le vaillant entre tous, & lui donnoit tels autres
 tiltres, adioustât ces mots, Côme quand le soleil se leue, sa lueur resiouit les
 yeux, & les odeurs souefues flairent doux aux narines, ainsi vos actes va-
 leureux me chatouillent d'un plaisir nonpareil. Le reste de ses lettres
 estoit paré de tel langage, monstrant l'affectueux desir qu'il a-
 uoit de gratifier Albuquerque, lequel il prioit pour cõ-
 clusion de lui enuoyer des fondeurs d'artillerie.
 Mirabucacá escriuit aussi à Albuquerque,
 discourant au long sur les louanges
 d'icelui & monstrant qu'il lui
 portoit une fort gran-
 de amitié.

* *
 *

FIN DV DIXIESME LIVRE.



LE ONZIESME LIVRE.

SOMMAIRE.

1. *Armet du Sultan d'Egypte pour chasser les Portugallois hors des Indes.*
2. *Aden ville d'importance se veut rendre à Soarez, qui l'ontesfuit la refuse.*
3. *Incommoditez & mesconforts de la flotte de Portugal.*
4. *Zeila ville d'Ethiopie, assailie, prise & pillée par Soarez.*
5. *Impudence de Soarez, qui muse apres avoir refuse: ses malheurs & nouvelles incommoditez.*
6. *Citadelle basse en Coulam par surprise: les complaints faictes contre les Portugallois, & comme tout fut appeise.*
7. *Exploits de quelques lieutenans du gouverneur de Goa.*
8. *Guerre perilleuse en Goa & les occasions d'icelle.*
9. *Le gouverneur de Goas veut venger cuide perdre l'isle & la ville, & ce qui en suivit.*
10. *Mort de Marie Reine de Portugal: & victoire de Selim Turc sur le Sultan d'Egypte.*
11. *Guerre du Xercif contre les Portugallois en Barbarie, & autres choses memorables en ces lieux.*
12. *Tumulte en Malaca par l'ambition de deux capitaines Portugallois.*
13. *Navigacion de Fernand Andrade en la China.*
14. *Description du pays de la China & les moeurs des habitans.*
15. *Religion & police de ceux de la China, mal treupez par Simon Andrade.*
16. *Navigacion de Jean Sylveire en Bengala, & ce qu'il y fit.*
17. *Guerre en Malaca par les menees du Roy de Biriam, & le succès d'icelle.*
18. *Jacques Lopez, de Siqueira envoyé es Indes pour estre vice-roy: & ce que fit Soarez avant que revenir en Portugal.*
19. *Rencontres des Mores & Portugallois en Barbarie.*
20. *Embusches & calomnies dressées contre le Roy Emmanuel.*
21. *Emmanuel fiancé & espousé Eleonor sœur de Charles d'Ansruche, depuis Empereur.*
22. *Flotte de seize navires envoyez en Inde.*
23. *Discours sur le fait de Fernand Magellan gentilhomme Portugallois, & pourquoy il quitta le pays de son Prince pour se ranger à celui d'Espagne.*
24. *Dessin de Magellan pour trouver les isles Moluques, & ample discours sur cela.*
25. *Navigacion hardie & memorable de Magellan aux Moluques, le desiroit qu'il trouva cinquante trois degrez de la l'Eguateur, & le succès de ce voyage.*
26. *Diverses causes & victoires d'Aluar Norego sur les Mores Africains.*
27. *Exploits de Vasque Fernand Casor.*
28. *Autres causes & belles victoires de Norego.*
29. *Causés de Jean Courin & de Manuel Mascaregne.*
30. *Guerre de Nono Mascaregne gouverneur de Sa fin contre les habitans de Garabic reuoltez: les divers accidens, & fin d'icelle.*
31. *Flois des Indes, & les grandes avances de Siqueira.*
32. *Belle histoire de la prouesse de deux freres en combat sur mer pres de Septe en Barbarie.*

Armet du Sultan d'Egypte pour chasser les Portugallois hors des Indes.



ANDIS que ces choses passoyēt, le Sultan d'Egypte armoit sur mer à puissance, pour oster aux Portugallois tout ce qu'ils tenoyēt es Indes, & les chasser de là: à quoy faire il auoit esté induit par lettres de la plupart des Princes Indies qui promettoyent lui aider de tous leurs moyens en ceste guerre. Estât dōc poussé de l'esperāce que les autres lui donoyēt, & marri de la perte des ports & peages, les reuenus desquels lui auoyent esté enleuez par les Portugallois, il équippa vne flotte de vingt sept nauires, portans sept cens Mammeluchs,

luchs, (qui estoient toute la force de ceste armee) trois cens Turcs, & mille Mores de Tunes & de Grenade. Les Rois Indiens lui promettoient vn renfort d'hommes beaucoup plus grand sans comparaiſon. Les nauires estoient fournies de viures & de canons à suffisance, ayans pour general vn capitaine Turc nommé Soleiman, fort expérimenté aux guerres marines, lequel par longue espace de temps auoit esté aux gages de Selym, puis l'abandonnant s'estoit retiré vers le Sultan. Icelui faisant voile de la ville de Suez print la route del'isle Camare, & auant qu'y arriuer perdit vne galere, puis iognit à soy Mirhocem, lequel depuis la desfaite de son armee nauale au port de Diu auoit basti à ses despens deux nefz & vne nauire becue. Ils edifierent vne forteresse en ceste isle, dont le Sultan vouloit que la charge fut commise à Mirhocem, & employent presques vn an à cela: puis remontent sur mer pretendans assaillir la ville d'Aden, pource que le Roy d'icelle despité des torts que Mirhocem lui auoit faits, defendit à peine de la vie que lon ne portast viures quelconques en l'isle de Camare. Soleiman & Mirhocem perdirent beaucoup de temps en ce siege, & mesmes abatirent vne partie des murailles: mais ceux de dedàs les repousserent si courageusement qu'ils furent contrains se retirer en l'isle avec leur courte honte. De là ils tirerent au port de Iude, afin de mieux pouruoir aux viures, specialement à du bled: & en ce port les deux chefs entrèrent en telle querelle, que Mirhocem fut tué par embusches que Soleiman lui dressa. Le Roy de Portugal auerti par lettres enuoyees de Rhodes de l'appareil de ceste armee nauale du Sultan d'Egypte, auoit commandé à Soarez, de n'attendre pas qu'une telle flotte entrast en Inde & se iognist avec celle des Princes Indiens, ains allast au deuant & la combatist dedans le goulfe Persique.

2. S O A R E Z se diligēta pour executer sa commission, & pour cest effect equippa en peu de temps quarante trois vaisseaux, chargez de douze cens Portugallois & mille Indiens, avec lesquels il partit de Goa le huitiesme iour de Feurier l'ā mil cinq cēs dixsept, & tourna voile vers Zacotora pour faire aiguade, & de là print la route d'Aden, où il estimoit trouuer les ennemis à l'ancre: mais ilss'en estoient ia retirez, comme dit a esté au chapitre precedent. La flotte de Portugal entree dedàs le haure, Soarez fit battre la ville de quelques volees de canon. Trois des principaux enuoyez par Miramirjam, qui en estoit encores gouuerneur, vont trouuer Soarez en qualité de supplians, lui presentent les clefs, & le prient de receuoir la ville qui tendoit les mains au Roy Emmanuel, & promettoient les habitans lui estre fideles & viure de là en auant sous son obeissance. Il ne voulut pas prendre ceux qui se venoyent redre volōtiers, alleguans n'auoir charge d'assaillir Aden, ni d'en prendre possession ores que les habitās d'icelle se voulussent d'eu leur bon gré mettre en sa puissance. Mais on ne sauroit acommoder les commissions prefixes aux euenemens incertains, qui sont gouuernez par l'inconstance & muableté des temps. Pource vn chef de guerre a par fois besoin de hardiesse extraordinaire pour changer ses desseins selon la diuersité des accidens: car s'il redoute trop l'indignation de son superieur si esloigné qu'il ne puisse receuoir promptement nouuelle charge, plusieurs occasions

Aden ville d'importace se veut rendre à Soarez, qui neantmoins la refuse.

1517.

s'escolent, lesquelles on regrette en vain puis apres. Voila pourquoy Epaminondas est grandement & à bon droit loué d'auoir retenu sa capitainerie generale deux mois dauantage que les loix ne portoyent, outre la commission qui lui en auoit esté donnee, & combien qu'il sceust que sa Republique condamnaist à mourir ceux qui entreprenoyent telle chose. La cause fut qu'il vouloit desfaire entierement les ennemis : & pourtant il aimia mieux hazarder sa vie, que par trop grande obeissance oublier à garantir sa patrie d'une ruine tout euidente. Si Soarez l'eust ensuiui, le Prince qu'il craignoit tant offenser, au contraire l'eust cheri, honoré & recompensé d'un si valeureux exploit. Or afin que lon pensast qu'il acceptoit aucunement l'offre des Adenois, il leur manda que sa deliberation estoit d'attaquer l'ennemi, & qu'à ceste cause il ne pouuoit s'amuser là dauantage, de peur que Soleiman ne gaignast le haut, tandis que lon articuleroit cest accord: qu'il esperoit estre bien tost de retour, & donner ordre d'establiir alors plus commodement vne paix assée: que pour l'heure il auoit seulement faute de viures & de pilotes. Les Adenois, extremement ioyeux de telle response, monstrerent en beaucoup de sortes le contentement qu'ils receuoient d'estre ainsi laissez en liberté contre toute esperance: & fournirent des munitions en abondance, puis baillerent à Soarez quatre pilotes qui auoyent couru maintesfois toure ceste mer Arabique.

*Incommodité
& mesauantures
de la flotte
de Portugal.*

A v partir de là, Soarez se remit en plaine mer, enuoya deuant Aluar de Castre & Jacques Pereire pour se saisir de quelqu'un duquel ils peussent fauoir au vray, où estoit anchree la flotte des ennemis. Pereire se rendit maître d'une nef, & sceut des prisonniers que Soleiman estoit avec toute son armee au port de Iude, resolu de retourner au siege d'Aden, acheuer la forteresse de Camare, puis faire voile en Inde & donner bataille aux Portugalois. Comme Soarez vouloit entrer au goulfe d'Arabie, vne tourmente soudaine le repoussa si furieusement, que peu s'en falust que toute sa flotte ne coulast en fond. Aluar de Castre auoit vne grande nauire fort chargée (car il auoit prins trois barques, & fourré dans sa nauire tout le butin d'icelles) qui fut engloutie des vagues avec ceux qui estoient dedans, lesquels perirēt tous. La tourmente appaisée Soarez reprit sa route, & auant qu'arriuer à Iude, dixhuit Venitiens (qui parauant seruoient à calfeutrer les vaisseaux de Soleiman & s'en estoient fuis avecques sept Turcs) lui furent amenez, & lui reciterent comme Mirhocem auoit esté tué à cause qu'il vouloit empoisonner Soleiman : que l'armee estoit en terre, Iude foible, mal munie, & gardée par gens de peu d'experience. Ces nouuelles firent haster Soarez, mais vne autre tourmente fort impetueuse le poussa hors de route & à costé opposite, tellement qu'une des nauires avec tout ce qu'elle portoit coula en fond, estant surmontée des flots de la mer estrangement esmuë. Finalement Soarez vint surgir à l'entree du haure de Iude, mais il n'osa voguer plus pres du bord, à cause que la mer y estoit trop basse. Iude est vne ville assise en la coste de la mer Arabique, au milieu d'icelle, apres que lon a passé le goulfe. Le terroir est maigre & sterile : tellement qu'on y apporte d'ailleurs non seulement les viures, mais aussi l'eau douce. Ce lieu commé-

ça d'estre hanté à cause de la folle superstition des Mahumetistes: car il n'y a qu'une iournee de Iude iusques à la Mecque, où ils vont visiter le sepulchre de leur Prophete Mahumet. Dauantage ceste ville, pour estre ainsi posée au milieu de la coste d'Arabie, acommode les marchans qui y deschargent les espiceries & autres marchandises des Indes, lesquelles puis apres on portoit de là par chameaux iusques en Egypte. La rade n'y est gueres bonne, à cause des basses & escueils en grand nombre. Au reste, la ville n'estoit pas forte pour soutenir vn siege, encores qu'elle eust des maisons à plusieurs estages, & assez richement estoïees. Soarez fit commandemēt à Alphonse de Menefez & à Denis Fernand de Melio de sonder la profondeur du port. Eux rapportent que le conduit pour les galeres auoit fort peu de large, & ceste incômodité, à cause des côtours diuers, qu'à tous momēts les vaisseaux seroyent contrains tendre le flanc aux coups de canon. De fait ceux de la ville & de quelques forts dressez au long de la mer pour cest effect saluoient desia la flotte tresrudement. Surce on tint le conseil & fut ordonné, que lon n'assauldroit point la ville avec si grand desauantage, que premierement lon n'eust encloué l'artillerie des forts, à ce que les ennemis ne peussent s'en seruir. Que pour bien executer cela, faloit mettre le feu en deux nauires de charge & vne becue appartenantes à Mirhocem & anchrees au port, afin que les ennemis occupez à estaindre le feu, on peust courir sans danger à leurs pieces & les rendre inutiles. Le feu fut ietté en ces nauires: mais pour cela les ennemis ne quitterēt ni forts ni canons: au moyē dequoy les Portugallois descendus à terre n'oserent les ioindre. Ce pendant la flotte estoit battue & fort endommagée par ceux de la ville & des forts, tellement que Soarez fut contrainct se desgager de là, & print la route de Camare pour dōner ordre aux viures, car ses gens estoient en grād disette de pain & d'eau douce, mesmes plusieurs mouroyent de faim & de soif. Il trouua l'isle abandonnee de ses habitans que la peur auoit chassé en terre ferme: & despescha de ce lieu Francisque Gaz & Laurēt Cosmio pour aller avec leurs vaisseaux en Ethiopie querir des viures, mais ils n'amenerēt rien, si que la famine acrūt & tua grand nombre de gens. Edouard Galuan ambassadeur de Portugal vers le Roy d'Ethiopie mourut de vieillesse & de maladie en ceste isle de Camare.

4. SOAREZ ayant fait demolir la forteresse que les ennemis y auoyent bastie, partit de là, & forti hors du goulfe, fit voile deuers Zeila, qui est vne ville assize hors & assez pres du goulfe de la mer Arabique en la coste d'Ethiopie, peuplee, marchande, & embellie de maisons spacieuses & hautes. Les habitans estoient composez de diuers peuples y trafiquans, tellement qu'on voyoit par les rues des Noirs, des Mores blācs, & d'autres de couleur bazanee. La faim cōtraignoit Soarez de tēdre là pour recouurer des viures. A l'arriuee le menu peuple s'enfuit de la ville, y laissāt en garnison ceux qui pouoyent porter les armes, afin d'en empescher l'entree aux assaillans. Les Portugallois conurēt lorsque pour prieres ni pour argēt on ne leur dōneroit à māger, & pourāt resolurent tous ensemble d'assaillir & forcer la ville, qui n'estoit fermee de murailles, ni fortifiée de bouleuards, ni en defēse quelcō-

*Zeila ville
d'Ethiopie, as-
saillie, prise
& pillée par
Soarez.*

que. Dōcques ils prenēt terte, la premiere troupe estant cōduite par Garſie Coutin & leā Sylueire. Soarez & les autres capitaines menoyēt l'arrieregarde. Les premiers sortis ayās attēdu longuemēt Soarez, qui ne se haſtoit pas beaucoup, s'auācerent, ne pouuās plus porter les outrages de ceux de Zeila, qui les renuoyoyent au ſiege de Iude, & les aſſeuroyent qu'en Zeila on leur feroit pareille feſte qu'auoit fait Soleimā. Gaſpar de Sylues, Arias de Sylues & Antoine Ferreire de Fogaze, qui marchoyent les premiers, & n'auoyent acouſtumé telles brauades, aimans mieux mourir qu'endurer que lon touchaſt ainſi leur honneur, donnent ſoudain de pied & de teſte à trauers les ennemis, qui furēt auſſi chargez par tout le reſte de ceſte premiere bande: mais les aſſaillis ſ'aſſeſſent de tous coſtez & ioints enſemble ſouſtindrent vaillamment ceſte charge. Nonobſtant les Portugallois picquez de faim, d'iniures, & de la honte receue au port de Iude, rechargēt de telle furie qu'ils rompēt les autres, en tuent grād nombre, & mettent le reſte à vau de route. La ville deſnuée par ce moyen de toute garniſon demeura pour proye aux Portugallois. Alors Simon Andrade deſpeſcha vn meſſager à Soarez, qui eſtoit encores en ſa capitaineſſe, l'auertir qu'il pouuoit ſeulement venir en la ville, pource qu'il n'y auoit plus de gens de deſenſe. Soarez print ce propos en beaucoup plus mauuaſe part qu'Andrade ne cuidoit, car il ſe perſuada qu'on l'accuſoit de pareſſe & couardiſe, pource qu'il ne s'eſtoit paſtrouué au combat. Eſtant donc venu en la ville il dit mille iniures à Andrade. Mais au reſte les maiſons furent pillées, où il y auoit force viures, dont toutesfois on n'emporta que bien petite quantité dans les nauires, & mit-on le feu par tout puis apres. Il y auoit dedans les priſons de ce lieu vn Portugallois, patron de la carauelle de George Quadre, lequel par la tourmente qui ſepara la flotte d'Edouard de Leme, fut ietté en ceſte coſte de Zeila, & arreſté priſonnier: mais apres le ſac d'icelle ſes compagnōs le deliurerent.

DE là Soarez remonta vers Aden, où ſon malheur lui ſit entendre ce ſ. qu'il euſt eſté meilleur d'auifer & preuoir par bon cōſeil, qu'il ne faut quitter le bien preſent, ſous eſperance d'une commodité à venir en cloſe en la fidelité de gens qu'on ne conoit point. Car ſe cōſiant au doux viſage & beau parler de Miramirjam il ſit bruſler la pluſpart des viures de Zeila: & puis apres ſe trouua ſi court qu'il conut (mais trop tard) que ſon imprudence l'auoit embarſſé parmi toutes ces difficultez: à cauſe que Miramirjam entendant qu'en ceſte nauigation Soarez n'auoit fait choſe qui valuſt, que ſa flotte eſtoit amoindrie, la pluſpart de ſes troupes eſtrāglee de faim, & d'aillieurs faiſant peu de cas de Soarez, deſlors qu'il refuſa les clefs d'Aden, ſans plus ſe ſouuenir de la liberté qu'o auoit laiſſée à lui & à tous les Adenois, ne voulut poit ſecourir de viures ceſte flotte, & ne fournit ſinō de l'eau, encor fuſt-ce cōme par ſotte & bien eſcharcement. Telle neceſſité rechaffa Soarez en Ethiopie, afin de recouurer quelques victuailles en vne ville nommee Barbone à quarante lieues de Zeila, & y puifer auſſi de l'eau douce. De ce lieu il print la route d'Ormus, où il arriua tout confus, & apres auoir perdu trop de gens & de vaiſſeaux. Car il ne laiſſa garniſon aucune en Aden, ne

deſit

*Imprudēce de
Soarez, qui
miſe apres a-
uoir reſuſt ſes
malheurs &
nouuelles in-
conmoditez.*

desfit l'armee nauale du Sultan, ne pût forcer la ville de Iude, & ne mit en lieu seur de terre ferme Matthieu ambassadeur du Roy d'Ethiopie, côme il en auoit charge bien expresse: au cōtraire il ramena vne flotte deschiree, des soldats eschappez de la fureur des vagues, de la rage des ennemis, de la famine, de la soif, brief trauailliez de toutes sortes de maux. Or auant que surgir en Ormus, il commit à Alexis de Menes la charge d'equipper les nauires qui deuoient retourner en Portugal, & despescha Lopez de Villeloupe en vn briganrin pour aller porter les nouuelles au Roy Emmanuel du malheureux succes de ceste nauigation en Arabie. Pierre Vasque de Vere conducteur de ce brigantin estoit vn des meilleurs pilotes de son tēps. L'arriuee de Lopez raut en estonnement tout le royaume de Portugal, voyant qu'vn si petit vaisseau eust trauerse tant de mers, surmonté tant de vagues & de tourmentes, sous la violence desquelles les plus grandes nauires succombent maintesfois. Soarez ayant donné ordre aux affaires d'Ormus, fit voile en Indostan, où il trouua Antoine Saldagne parti ceste mesme année de Lisbonne avec cinq nauires. Le Roy l'auoit enuoyé afin de prendre encores quelques vaisseaux en Inde, pour courir la mer d'Arabie, & faire viuement la guerre en tous les lieux de la coste: ensemble Fernand Alcafoz pour estre surintendant des douannes & receptes des tributs. Or outre les trauerse susmentionnees, les nauires de Soarez estoient esparsez çà & là: car quelques vnes auoyent esté poussées du vent iusques en Melinde, d'autres en Mozambique: vn capitaine emporté hors du goulfe Arabique en vne ville d'Ethiopie y fut tué par Ierosme Oliueire, lequel se plaignoit de certain outrage à lui fait par ce capitaine. Pour executer ce meurtre plus aisément il attitra vn vaillant soldat nommé Menense Alfonso qui lui tint compagnie. Mais Iean Roderic Pelage braue cheualier, estant au vaisseau de ce capitaine, pour venger telle meschanceté tua sur la place ce soldat, & se contenta de tenir prisonnier Oliueire qui estoit gentilhomme bien aimé de tous, reseruant la conoissance de ce fait au Viceroy. Telle fut l'issue des nauigations de ceste flotte, qui auoit donné tant d'esperance de faire merueilles.

6. IL a esté dit au liure precedent que Soarez pacifiant avec la Roine de Coulam, desiroit bastir vne citadelle en ce lieu: pour lequel effect, auant que sembarquer pour l'Arabie, il despescha Hector Roderic, homme bien entendu, pour aller en Coulam & dire à la Roine que les Portugallois auoyent besoin d'une maison forte, pour estre assurez contre les machinations des Sarasins, de peur qu'il ne leur en prinst autant qu'à Antoine de Sa-
*Citadelle ba-
 stie en Coulam
 & lesPLAIN-
 tes faites con-
 tre les Portuga-
 lois: avec ce
 qui s'en ensui-
 uit.*
- le. La Roine accorda volontiers ceste demande: mais Roderic en faignant bastir vne maison posoit les fondemens d'une citadelle. Les Sarasins apperceuans cela sollicitoyent ceux de la ville à resister de bonne heure à vne telle tyrannie. Que ceste citadelle se dressoit pour les accabler, & que leurs Rois alloient tendre le col sous vn ioug, lequel quand ils voudroient secouer, ce seroit en vain: qu'il falloit obuier aux commencemens, & arracher le mal qui n'auoit encores prins guerres profondes racines, pource qu'il seroit comme impossible d'en venir à bout si on le laissoit croistre. Ils adiou-

estoyent que lon voyoit assez de quel pied marchoyēt les Portugallois: que sous couleur d'alliance & d'amitié ils cerchoyēt à maistriser les autres, dressoyent citadelles desguisees du nom de maisons fortes, rendoyent esclaves & pilloyent les peuples qui ne se donnoyent garde d'eux. De tels propos rompoient ils les oreilles des habitans & de la Roine mesmes, laquelle connoissant les Portugallois estre bōs amis & aspres ennemis, aima mieux subsister en leur bonne grace, que peſir en se rendant leur ennemie. Elle se souuenoit des maux endurez par le Roy de Calecut pour son inconstance & desloyauté: au contraire, que celui de Cochim auoit affermi son estat par sa fidelité enuers ceste nation. Pourtant fut il impossible de lui faire rompre sa promesse. Ce pendant l'ouurage s'auançoit, & la Roine estoit partie de la ville avec son fils pour donner ordre aux affaires d'une guerre esmuē contre le Roy de Trauanzor, voisin du royaume de Coulam. Tandis qu'elle fut absente, les Sarasins importunoyent plus que iamais le peuple à courir sus aux Portugallois, & semoyent des occasions de noises, afin d'esmouuoir quelque tumulte, pour faire cesser les ouuriers. Mais Hector Roderic se porta fort sagement en cest endroit: car il acoustuma ses gens à ne répondre aucune mauuaise parole, quoy qu'on les iniuriaſt, ains aualer doucemēt telles pilules. Dauantage il les retenoit si bien qu'ils n'alloyent point vagabondant par la ville: & qui plus est se rendit tant ami des gouuerneurs & principaux de la ville, qu'eux (suiuans en cela le commandement de la Roine) lui offrirent tous leurs moyens, pour lui assister quand la necessité le requerroit. Sur ces entrefaites la Roine, ayant mis fin à la guerre, retourna en Coulam, & par sa presence estouffa toutes ces menees: au moyen dequoy la citadelle fut acheuee du tout.

*Exploits de
quelques lieutenans du
gouuerneur de
Goa.*

OR tandis que Soarez voguoit en la mer Arabique, Gautier Monroy 7. gouuerneur de Goa fit embarquer son frere Fernand Monroy pour aller es isles de Maldiuar, afin de saisir les nauires venans d'Arabie. Iean Gonſalue de Blanc Castel capitaine d'une galere lui fit compagnie en ce voyage, durant lequel ils prindrent deux nefſ d'un fort riche marchand nommé Cojeque chargees de grands biens. Dauantage Gautier enuoya vn autre sien frere nommé Iean pour courir la coste de Chaul avec cinq nauires, lesquelles estans à l'embouchure de la riuere de Maim prindrent vne nef venant d'Arabie. Le capitaine de la forteresse bastie en ce lieu equippa en moins de riē dix fregattes & assaillit les cinq nauires, tellement qu'il y eut vn dangereux combat naual l'espace de quelques heures: mais ce capitaine fut contraint se retirer apres auoir beaucoup perdu, sans que les Portugallois le suiuiſſent d'autant qu'ils auoyent eu de la peine à demeurer les maistres. Iean Monroy tirant oultre, fit voile vers le port de Chaul. Lors habitoit en terre ferme parmi les Sarasins, vn Portugallois nommé Alfonſe Matureire, qui auoit femme & domicile en Goa, d'où il s'enfuit craignant d'estre saisi au corps pour auoir tué vn autre Portugallois. Il alla trouuer Monroy qui promit lui faire auoir sa grace s'il vouloit retourner en Goa, dont il le remercia beaucoup de fois: mais à cause qu'il s'excusoit ſur l'incōmodité de ses affaires, & ſur son extreme pauureté, fut assisté de tous les Portugallois qui estoient

estoyent en la flotte iusques à la somme de deux cens ducats. Lors il faignit vouloir retourner en terre pour acheter quelques habillemens dont il auoit faute. Mais au lieu de reuenir il fit tout son possible pour ruiner Monroy & les siens, lesquels au desmarer de là monterent au dessus de la bouche d'une riuere qui trauersé la ville de Chaul, & récontrerent quinze fregattes de Melichiaz, qui vindrent aux mains, & combairent de grãd' courage: toutesfois apres que Monroy se fust saisi d'une dont les soldats se ieterent en l'eau, les autres gagnerent le haut. Quant à Madureire, pour reconnaissance de l'argent qu'on lui auoit donné il alla trouuer Mirhal capitaine de Zabaim Dalcã, & l'exhorta de courir sus à Môroy qui n'estoit pas si fort qu'on ne le peust desfaire: ce que Mirhal creut & arma sept fregattes, qui voguerét cõtre Monroy, lequel les enuahit, & en moins de rien les cõtraignit le sauuer, ce qu'elles firent avec telle force de rames, que les Portugallots n'en peurét attrapper aucune, cõbié qu'ils les suiussent à voiles desployees.

8. EN VIRON le mesme temps Goa fut sur le point d'estre perdue pour les Portugallois, par vn accident prouenu d'adultere, esleué par haine & appetit de vengeance, accompli par cruelle effusion de sang humain, dont s'ensuiuirent de grandes pertes, & y eust eu encores plus de mal, si Dieu n'y eust pourueu, lors que tout estoit presques sans dessus dessous. Fernand Caldeire esleué en la maison d'Albuquerque auoit prins femme en la ville de Goa. Il fut accusé enuers le Roy d'estre coursaire, & qu'indifferemment il pilloir amis & ennemis: au moyen dequoy Emmanuel commanda qu'on le lui amenast. Mais Caldeire se iustifia & maintint si bien son honneur en Portugal, que le Roy lui donna quelque recompense & lui permit de retourner franc & libre en Inde, ce qu'il fit, s'embarquant en la flotte de Soarez, dedans la nauire dont Gautier Monroy estoit capitaine. Tandis qu'ils estoyent sur mer, Caldeire estant fort offensé de Monroy lui dit tout plain d'outrages & tels que l'autre s'en tint pour griefuement interessé. Et si tost que la flotte fust arriuee en Mozambique, Caldeire monta en vn vaisseau de loage, puis en toute diligence print la route de Goa. Gautier Monroy ayant demeuré parauant en Goa, s'estoit ingeré de regarder d'œil lascif la femme de Caldeire, à ce qu'on disoit, & vn nommé Henri le Taur auoit fait les messages & serui de macquereau. Ainsi Caldeire fit vne grãd' balafre au visage du Taur, & lui coupa vne iãbe: cela fait il s'enfuit à quatre lieues de Goa en vne bourgade nommee Ponde, tenue par vne garnison de Zabaim, sous la charge d'Ancoftam. Caldeire se voyoit destitué de la protection d'Albuquerque, exposé à la fureur de ses ennemis: il sauoit que Gautier auoit obtenu du Roy le gouuernement de Goa, & que les iniures qu'il lui auoit dites, les blessures du Taur, & autres offenses seroyent cause de sa mort s'il demeueroit en Goa. Monroy qui se vouloit venger pria Ancoftam de lui liuer cest homme qui auoit commis telles indignitez pour en faire iustice, ce qu'Ancoftam ne voulut accorder: tant à cause qu'il connoissoit Caldeire estre homme vaillant, sage, bien entendu, des plus experts aux affaires, & duquel il pretendoit se seruir es guerres, qu'aussi pource qu'il estimoit chose indigne de la qualité d'un homme d'honneur, vouloir

*Occasions de
perilleuse guer
re suruenue en
Goa.*

exposer à la fureur d'un ennemi, un pauvre suppliant refugié & receu en protection. Nonobstant Monroy resolut d'auoir la vie de Caldeire à quelle pris que ce fust, tant afin de venger l'outrage fait au Taur & à lui, que pour iouir plus à son aise de la femme. Pourtant il enuoye à Ponde Ieã Gomeze secretaire de la douanne, homme propre à telles commissions, pour tuer Caldeire, lui faisant beaucoup de promesses pour recompense de ce seruice. Gomeze prend hardiment ceste charge, se retire à Ponde, disant qu'il estoit venu pour passer le reste de ses iours sous la sauuegarde d'Ancoftam, ne pouuât plus subsister en Goa pour les torts & outrages que le meschant Monroy lui auoit faits. Ancoftam qui croyoit cela le receut humainement, & Caldeire le banquetta aussi en sa maison. Or auint qu'Ancoftam voulut aller s'esbatre aux champs, & entre autres mena Gomeze & Caldeire. Estans en campagne Gomeze faignit vouloir communiquer quelque secret à Caldeire, & le tire arriere d'Ancoftam, puis tout soudain le traspierce d'un coup mortel, & tasche se sauuer à force d'esperôs. Mais Ancoftam enuoye apres les gens de cheual qui lui tenoyent compagnie, estant indigné iusques au bout que lon eust si malheureusemēt meurtri un personnage receu sous sa protection. Ses gens rataignent Gomeze, & le lui ayans amené, sans plus long delay Ancoftam desgaina son cimcterre, & lui en tracha la teste sur le champ.

*Le gouuernement
de Goa se voy
leur vider en
de perdre l'isle
& la ville: &
ce qui en auint*

MONROY extremement despité de la mort de son bourreau, delibera 9. contre toute equité de tuer Ancoftam. Pour executer ceste resolutio il faignit vouloir courir la bague, & pour auoir plus de plaisir alla iusques à Benastarin, & passa vn iour entier à cest exercice. Sur le commencement de la nuit il prie ses capitaines de despescher Ancoftam. Eux trouuent mauuais ce conseil, & taschent de destourner Monroy d'une si meschante entreprife. Lui au cōtraire replique que la mort d'Ancoftam doneroit pied ferme à la domination du Roy de Portugal en Goa. Personne n'osant contester dauantage, oyant mettre le nom du Roy en auant, tous s'apprestent pour l'execution, montent en des nacelles pour trauerser le destroit, dessellent leurs cheuaux, les font passer à nage, les conduisant par les resnes. Fernand Monroy conduisoit les gens de cheual, Jean Machiade les pietôs. Machiade estant passé le premier, se saisit de deux payfans, desquels il entendit qu'Ancoftam reposoit en sa bourgade de Ponde, sans se tenir autrement sur ses gardes, comme ne se doutant de rien. Pourtant il exhorta Fernand de lui permettre d'aller au pas, s'assurant qu'il attrapperoit Ancoftam au despourueu. Fernand estimant que ce lui seroit vne honte ne voulut laisser faire Machiade. Tandis qu'ils disputoyent vne partie de la nuit s'escoule, & Fernand ne fit pas telle diligence d'entrer en Ponde que la resolution le requeroit: aussi le hennissement & bruit des cheuaux refueilla la plupart des habitans, de sorte qu'Ancoftam fut incontinent auerti qu'on le venoit charger. Soudain il passe vn pont (d'autant qu'une riuere coule là, & separe quelque peu la terre) & range ses troupes. Fernand entré dedans Ponde n'y trouue ame viuante. Le soleil se leuoit, & par ses rayons auoit descouuert la fraude des Portugallois. Alors Fernand voyant qu'il auoit beaucoup cou-

ru & trauaillé en vain voulut tourner bride, exhortant Machiade de se retirer avec ses gens: mais Ancoſtam repaſſe le pont, & donne à toute bride ſi bruſquement à trauers Monroy & ſa troupe qu'il rompt tout, & en fait tōber grand nombre ſur la place. Les ſuyards faucèrent les rangs de Machiade, & contraignirent les pietons de ſe ſauuer où ils pouuoient. Ancoſtam enuoye incontinent vne partie de ſes gens pour gaigner le deſtroit par où les ſuyards pouuoient eſchapper, tellement que les Portugallois ayans leur ennemi à dos & en teſte furent deſfaits, pluſieurs prins, & la pluſpart taillez en pieces, laiſſans vne belle victoire à Ancoſtam. Machiade combatit valeureuſement, & ht de merueilleux coups de ſa main auant que mourir. Cela fait Ancoſtā auertit Zabaim de tout ce qui eſtoit auenu: que ſ'il vouloit prendre vn peu de peine Goa ſeroit ſienne: que les Portugallois auoyent enſraint l'alliance, & receu le chaſtiment digne de leur deſloyauté: qu'il enuoyast donc troupes ſuffiſantes, afin d'emporter au premier aſſaut la ville de Goa deſnuée de garniſon & eſperdue des nouuelles de ceſte deſfaite. Zabaim commanda incontinent à Zufalarim d'entrer en l'ille avec vne grande armee: ce qui fut executé, l'ille fourragee, la ville eſſroyee d'vn malheur non attendu, reduite à l'extremité, laquelle ſ'en alloit perdue, ſi (cōtre toute eſperance) Iean Sylueire qui auoit hyuerné en Quiloa n'y fuſt arriué. Peu de temps apres Raphael Pereſtreſel, retourné avec grandes richesses de la China, vaillant homme au demeurant, liberal, & qui par diuerſes faueurs auoit nombre de gens à ſon commandement, amena promptement trois baſteaux chargez de ſoldats qui le ſuiuoyent de bon courage. Et ainſi ceſte ville, qui auoit tāt couſté à prendre, gardee & garantie par la ſageſſe d'Albuquerque, & par la hardieſſe des gens de bien, fut lors à vn pas pres de ſa ruine, par la vilenie & audace de ſon gouuerneur, puis deliuree, cōme nous venons de toucher. Zabaim ſe voyant deſcheu de ſon eſperance, redemanda la paix à Gautier Monroy, laquelle lui fut incontinent accordee: tellement qu'ils renouellerent l'alliance, & pour memoire à la poſterité les articles d'icelle furent couchez par eſcrit & ſignez de la main de pluſieurs teſmoins.

10. EN ceſte annee là Roine Marie eſtant deuenue fort malade depuis l'enfantement de ſon dernier ſils, ne pūt iamais ſe remettre. Elle eſtoit fort affligee d'vne vlcere aux inteſtins, qui la minoit de iour à autre, ſans eſpoir d'en reſchapper, comme les medecins l'eſtimoyent. Auſſi rendit elle l'eſprit à Dieu le ſeptieſme iour du mois de Mars, l'an mil cinq cens dixſept, ayant veſcu trente cinq ans, & laiſſa en vie les huit ſils ſuſnōmez. Ce fut vne princeſſe douee de pluſieurs vertus admirables: car elle eſtoit de graue & honorable cōuerſation, gracieuſe & de facile acces, de ſens & de propos ſaſſis, ennemie d'oïſuete, ſans permettre que ſes filles ni ſes damoiſelles de chambre demeuraſſent à rien faire, tellement que de ſes propres mains elle filoit, couſoit, tapiſſoit, & manioit tels autres ourrages de femme, incitant plus par eſſect que par paroles celles qui la ſeruoient de faire le meſmes. Iamais ne ſe meſſa d'affaires d'eſtat, cōſiderant que tout l'hōneur d'vne femme giſt en modeſtie & douceur, & qu'au maniemēt de tāt de charges & affaires pu-

Mort de Marie Roine de Portugal.

blics il n'y auoit que trouble & rōpement de teste. Elle redoutoit l'autorité du Roy son mari, & ne s'efforça onc de le destourner de son deuoir par requestes iniques ou inciuiles. Quant à ses fils elle les contenoit en leur estat enfans par amour maternelle & discipline assez rigoureuse, sans permettre qu'en leurs ieux ils cōmissent aucune chose deshonneste, & ne leur pardontoit iamais vne faute, si tost qu'il y auoit la moindre apparence de meschanceté. Elle craignoit Dieu, & le seruoit deuõremēt, estoit charitable enuers les pauures, se monstroit cordiale & liberale enuers les pauures filles autant que si elle eust esté leur mere, & les marioit honnestement. Comme elle aimoit ardemment le Roy son mari, lui aussi l'aimoit de singuliere affection à cause de sa pieté & droiture. Elle fit bastir quelques tēples, & môstra par beaucoup de tesmoignages la deuotiō & douceur de son esprit: tellement que tout le royaume de Portugal la regretta longuement & non sans cause. Le Roy en fut fort angoissé, & porta long temps le dueil: mais finalement le deuoir de sa charge, sa bonne volonté à l'auancemēt du Christianisme, les affaires du royaume le contraignirent d'essuyer ses larmes, & en se souuenant de celle qu'il auoit tant chérie en son viuant, donner exemple de patience & moderation à ses suiets: & ainsi il se remit peu à peu en son train acoustumé. Ceste mesme année, Selym empereur des Turcs donna bataille en Syrie à Campson Sultan d'Egypte, laquelle il gaigna, puis adioignit à son empire toute la Syrie & l'Egypte. Emmanuel voyant cest ennemi s'agrandir, les Princes Chrestiens s'entreguerroyer d'une haine irreconciliable, les moyens de la Chrestienté defaillir de iour à autre, pria de nouveau le Pape par Michel de Sylues son ambassadeur, comme il auoit fait desia plusieurs fois, que laissant à part toutes autres sollicitudes, il s'employast à pacifier les guerres & dissensions ciuiles, & appointer si bien les Princes Chrestiens qu'ils se ioignissent ensemble pour dompter avec vne puissante armee l'orgueil de cest ennemi redoutable qui menaçoit toute la Chrestienté. De la part il offroit volontiers tous ses moyens, s'estimant bien honoré d'exposer sa vie en vne guerre si excellente. Mais les oreilles du Pape distraites par autres affaires, & abhorrissantes toute paix salutaire, ne donnerent lieu quelconque à telles remonstrances. Dauantage les Princes Chrestiens estoient tellement enuuenimez les vns contre les autres, que quād le Pape se fut du tout entremis de les mettre d'accord, on estime qu'il y eust perdu son temps.

*Guerre du
Xerif contre
les Portuga-
lois en Barba-
rie, & autres
choses memo-
rables en ces
lieux.*

IL y a en la coste meridionale de Barbarie de là le fleuve Diuce vn promontoire nommé Guer, que les anciens nomment le Cap d'Hercule. Le Roy Emmanuel en estoit maistre l'ayāt ceint d'une bourgade & forteresse munie d'une bonne garnison, dont les capitaines ne cessoyent de courir & escarmoucher les Mores qui n'estoyent pas confederez. François de Castre commandoit en ce lieu pour lors, & estant venu en Portugal le Xerif fut auerti de ce depart, à cause dequoy il courut sus aux Mores tributaires de Emmanuel, fit le gast en la cāpagne, mit le feu aux bleds & fourragea tout le pays. Zaide Boagaz vaillant capitaine & partisan du Roy, acompagné de quelques troupes bien equippees alla au deuant du Xerif, & se choque-
rent

rent de telle impetuosité qu'il y eut grād meurtre de part & d'autre, sans fauoir qui auoit esté le plus fort. Le Xerif indigné de voir sō ennemi de bout, appella au secours vn sien frere qui le vint incontinent trouuer avec bonne cōpagnie. Ces deux freres ioints ensemble assaillirent de rechef Boagaz qui fut desfait avec perte notable, mis en route, vne siene bourgade nommee Tuil, ruinee de fond en cōble, & tout le pays voisin saccagé. En la Mauritanie limitrophe du royaume de Fez y a vne ville appelee Targa, à vingt lieues de Septe. Emmanuel desiroit s'en emparer & y mettre forces, afin de guerroyer plus aisément la ville de Fez. Pour cest effect il enuoya Iacques Lopez de Siqueire avec vne flotte de soixante voiles vers le destroit de Gibraltar au mois de Iuillet, lui commandāt de prendre de renfort cinquāte cheuaux de la garnison d'Arzile, & autres cinquante de celle de Tingi, puis aller à Septe & se ioindre avec Pierre de Menefez pour assieger ensemble ceste ville de Targa. Menefez, gentilhomme de grand cōeur, ne fut pas content de telle commission, ains estima que ce lui estoit deshonneur d'auoir vn compaignon qui eust part à la charge, & à la louāge qu'il en acquerroit, les choses succedans selon son desir. Toutesfois, afin de n'estre estimé desobeissant à son Prince il monte à cheual, & acompagne Siqueire pour aller au siege. Mais pource qu'ils ne se pouoyent accorder, leurs troupes reuindrent à Septe sans auoir rien fait. Siqueire ayant renuoyé à Tingi & Arzile les cheuaux qui en estoient sortis, dit à Iean Coutin gouuerneur d'Arzile, qu'ayant fait ce voyage avec tant de vaisseaux & soldats d'eslite, ce seroit vne grand' honte à lui de retourner en Portugal, sans auoir desgainé l'espee ni fait aucun acte memorable: pourtāt il prioit Coutin de le mener à la guerre, afin qu'il peust aller la teste leuee quand il seroit de retour au royaume. Coutin s'acommodant à ce desir, ils entrerent eux deux à main armee en terre d'ennemis, ruinerent quelques villages, emmenerent des prisonniers & force butin. Mais pource que personne ne leur fit teste, ils se retirerent en Arzile, d'où quelques iours apres Siqueire tout fasché reuint en Portugal. Depuis Edouard de Menefez & Iean Coutin avec leurs troupes entrerent au territoire d'Alcassarquibir, tuerent les paysāns, & emmenerent grand nombre de bestail. Le gouuerneur de la ville leur alla au deuant avec ses forces. Eux, pour ne rompre leurs rangs, laisserent la plupart du butin, & gaagnerent pays avec le reste. Les ennemis suiuyent, mais de telle façon qu'ils n'osēt les charger: & ainsi les Portugallois se retirerent saufs en leurs garnisons avec le butin. Ce pendant Nonio Mascaregne, gouuerneur de Safin, ne dormoit pas: car ayāt entēdu que les cōmunes de Ganneme s'estoyēt reuoltees, il leur courut sus à l'improuueue, en desir la plupart, & remit les autres sous le ioug. Puis auerti par certain More, duquel il tenoit le frere prisonnier, que ceux de Dabide auoyent resolu ensemble de se souleuer, & donné licence à chascun de piller à son auantage, pour recompense donna ce prisonnier au rapporteur, & sur le champ despescha son frere Pierre Mascaregne avec François Carnier, suiuis de trois cēs hommes de cheual & autant de pietons, pour aller en Dabide. Ils partirent sur le soir, & firent ceste nuit là douze lieues. Le iour suiuant ils chargerent les

ennemis, en tuerent vne partie, contraignirēt les autres de gagner au pied, puis reprindrent la route de Safin avec leurs prisonniers & le pillage. Sur ces entrefaites vn bruit courut que pour certain le Roy de Fez armoit de tous costez, pour venir assieger & forcer la ville de Safin: ce qu'entēdu par Emmanuel, luiuant les lettres que Mascaregne lui en escriuit, il enuoya vn renfort de gens d'élite en Safin, entre autres Gonçalue Mendeze de Zaconte, braue capitaine parmi tous ceux de son temps, dont Mascaregne & tous les soldats furent fort ioyeux. Mais soit que le Roy de Fez eust d'autres affaires à desmesler, soit que les nouuelles du secours suruenu en Safin l'arrestassent, il quitta ceste premiere deliberation.

Tumulte en Malaca par l'ambition de deux capitaines Portugallois.

TANDIS que les affaires passoyent ainsi en Barbarie & en Portugal, 12. Fernand Andrade, qui faisoit voile en la China, comme dit a esté ci deuant, fut repoussé par vne tourmente en Malaca, d'où il estoit parti. Il trouua la ville troublee par la querelle de deux capitaines, a sauoir Nonio Pereire & Antoine Pacheco, qui debatoyēt apres la mort de George Brittio, decedé de maladie, qui demeureroit gouuerneur. Pereire disoit qu'en presence de plusieurs tescmoins Brittio lui auoit baillé le gouuernement de la ville, & qu'il ne pouuoit quitter ceste charge sans estre traistre au Roy. Au contraire Pacheco soustenoit qu'Albuquerque auoit fait vne ordonnance que l'Amiral succederoit au gouuerneur de Malaca, cas auenant qu'il mourust: & qu'ainsi fut arresté que Fernand Andrade, parauant general sur la mer, commanderait en terre si le gouuerneur decedoit. Que pour lors il tenoit le mesme estat, dont s'ensuiuoit que le mesme droit de succeder lui appartenait. Andrade fit tous ses efforts d'appaier ce different, mais il lui fut impossible. Il n'ay voulu omettre cest accident, afin qu'on voye que c'est par la prouidence & assistance de Dieu, que les Portugallois, transportez d'ambition & non guidez de raison au cas susmentionné & en autres semblables, tiennent avec si petit nombre de gens tant de places en Orient eslongné d'Espagne de plusieurs milliers de lieues. Car si vne sedition, esmue dans vn pays gardé de longue main & de peres en fils, esbranle bien souuent les estats qui semblent trefasseurez, & les renuerse de fond en comble: que faut il estimer d'une domination fondee au bout du monde, enuironnée de tant d'ennemis enragez, maintenue par vne poignée de soldats, si les cœurs pressiez d'ambition viennent à solliciter les personnes?

Nauigation de Fernand Andrade en la China.

L'AN mil cinq cens dixsept, au mois de Iuin, Andrade partit de Malaca 13. avec vne flotte de neuf nauires, & le quinziēme iour d'Aoust suiuant, mouilla l'anchre en vne isle nommee Tamaulabua, à six lieues seulement de terre ferme de la China. Toute ceste mer estoit lors escumee par certains courfaires, tellement que le Roy de la China auoit équipé vne puissante armee nauale, pour asseurer la nauigation aux marchās. Le general de ceste armee fut tout rai de voir la forme des vaisseaux de Portugal, & pensant que ce fussent courfaires fit voile à eux pour les cōbatre. Andrade ne fit aucun semblant de vouloir venir aux mains, ains alla surgir en vne isle nommee Tama, sans rien craindre. Et comme il sejournoit à l'anchre, ce general lui enuoya demander qui il estoit, d'où il venoit, & pourquoy il cingloit

gloit en ceste mer. La response d'Andrade fut qu'il estoit Portugallois, seruiteur d'un puissant Roy lequel commandoit en un pays aux extremités de l'Occident, & qui ayant entendu que le Roy de la China estoit riche & puissant à merueilles, & orné de vertus royales, auoit incontinent désiré de lui estre ami, s'assurant que ceste amitié seroit profitable & honorable à tous deux. Qu'il auoit besoin de pilotes pour conduire sa flotte sans danger de naufrage iusques au port de Cātam, afin que de ce lieu l'ambassadeur de Portugal peust aller iusques en la ville où estoit le Roy de la China, pour communiquer avec lui de la part de son Prince, lui presenter ses lettres, & faire en presence ce qui estoit requis pour l'exécution de sa charge. Le general promit de se rendre en une ville appelée Nantum à trente lieues de Cantam, pour auertir le gouverneur de la venue des Portugallois. Cependant Andrade attendit longuement, & ne pouuant plus durer là, se mit à la voile en deux bastaux & quelques esquifs, prenant la route de Nantum, où il arriua. Le dedans du haur auoit au bout un boulevard de pierre de taille en quarré, au faiste duquel lon montoit par degrez, estant icelui basti en une petite isle, en laquelle les principaux de la ville banquettoient quelquesfois assez magnifiquement les estrangers. Le gouverneur pour lors, nommé Tutam, pria Andrade d'aller faire bonne chere en ceste isle: mais il feignit estre malade, craignant d'estre contraint de manger quelques viandes non acoustumées. Il fit entendre à Tutam & aux autres officiers ce pourquoy il estoit venu, mit en leur charge l'ambassadeur qui deuoit aller vers le Roy du pays, & reprit quant à lui la route de Tama, où il fit sejour l'espace de quatorze mois: car il lui estoit commandé de descouurir la situation de ce grand royaume, considerer les mœurs & façons du peuple, & s'enquerir exactement de toutes les particularitez. Durant ce temps arriuoient là des marchands de diuerses nations, chargez de toutes sortes de marchandises, & d'or principalement. Il les interroguoit de plusieurs choses, tellement qu'il y aprent beaucoup avec grand contentement d'esprit. Outreplus il fit embarquer George Mascaregne pour visiter toute la coste de mer de ce royaume, le mettāt en compagnie des plus asseurez pilotes de la China, afin d'apprendre ce qu'il auroit descouvert de veüe, & entendu des uns & des autres. Mascaregne ayāt esté appelé au bout de quelques mois, à cause que le temps propre à la nauigation approchoit, Andrade fit crier à son de trompe par la ville, que si aucun auoit presté, ou se plaignoit d'auoir receu outrage de fait ou de paroles, ou en secret de quelque Portugallois, il vinst à lui, pource qu'il ne leueroit point les anchres que tous ne fussent satisfaits. Le peuple fut trescontent de ceste publication, non que personne se peust plaindre d'outrage notable: mais pource que ceste façon de faire monstroie à l'œil l'equité, preudhommie, & sagesse des Portugallois. Si tous ceux qui voyagerent depuis en la China eussent fait de mesme, le Roy de Portugal eust estendu sa domination bien auant en ces pays Orientaux. Car aussi d'ordinaire la force ne sert pas tant à affermir l'autorité d'un Prince que la reputation de douceur & fidelité.

14. LE pays de la China est de tresgrande estendue: & lon estime que c'est

*Descriptiō du
pays de la*

*China: & les
mœurs des ha-
bitans.*

la dernière terre ferme vers Oriët: il est borné de l'Inde à l'Occidēt, de l'Océan au Midi, & au Septentrion de treshautes montagnes chargees de neiges & de glaces perpetuelles. Du costé de Septentrion vers l'Occident il voisine les Tartares avec lesquels les Chinois sont tousiours en guerre. Les Tartares ont plus de vigueur de corps: mais les Chinois les surpassent d'esprit & d'adresse, tellement que si les vns surmontent par fois à force ouverte, les autres ont puis apres leur reuēche par finesse & subtilité. Toutesfois les montagnes qui s'estendent du Septentrion au Midi separent les Tartares du pays de la China. Quant aux vallées & plates campagnes les Chinois font des clostures & les ferment de murailles fort espaisſes, tellement qu'ils repoussent aisément l'effort des Tartares. Le pays est tresfertile entre tous autres, abondāt en ce qu'on sauroit desirer de choses necessaires, exquisés & delicieuses. Les habitans Meridionaux sont de couleur bazanee, les Septentrionaux au contraire sont fort blancs. Ils viuēt tous magnifiquement, font grand chere, sauent fort bien aprestē vn banquet, portent habillemens de coron, de laine, de soye passēmentee d'or, & accomodez aux saisons de l'annee. Au plus fort de l'hiuer, sur tous es quartiers tirans au Septentrion, ils s'aident de robbes fourrees de diuerses peaux. Leurs cheuaux sont gentiment harnachez. En la pluspart de leur maniere de viure ils se gouuernent à la façon des François & Alemans, prennent plaisir d'ordinaire à iouer, rire, danser, & boire d'autant. Vray est qu'ils sont par trop adonnez à paillardise. Les damoiselles ne vont par ville sinon en coches ou petis chariots entierement couuerts de drap de soye enrichi d'or artistement agencé. Pour se desennuyer ils s'esbatent à la musique des voix & instrumēs. Ce sont gens adonnez aux deuinations par le vol & cōsideration du mouuement des oiseaux: ils taschent de pēdire par fort les choses auenir, honnorent les magiciens, s'adonnent aux mathematiques, specialement à l'Astronomie. Ont Imprimerie de lettres de fonte pour faire leurs liures, & les conseruer à la posterité: chose si ancienne entre eux, qu'ils ne sauent qui en a esté le premier inuenteur. Leurs maisons sont proprement basties & avec grande despenſe.

*Religion de
ceux de la
China.*

ILs ont des temples bien grands, avec force images & tableaux de plate peinture: & combien qu'ils facent la teuerence à diuerses idoles, toutesfois leur auis est qu'il faut principalement adorer vn seul Dieu createur & gouuerneur de toutes choses, & que c'est celi là specialement qu'il faut inuoker. Outreplus ils honnorent avec les plus grādes ceremonies qu'on sauroit penser l'image d'une femme, nommee entre eux Namman, laquelle ils disent estre aduocate du genre humain enuers Dieu. Ils ont vne autre image de certaine vierge, fille de Roy, laquelle (à leur compte) pour l'amour des choses celestes, & afin de les mediter tour à loisir, quitta la dignité royale. C'est la dame & patrone de toute la nation. Encores avec ce que dessus ils ont vn autre Dieu estimé tressainct, & disent que ce fut vn fort vaillant homme, & doué de tāt de vertus qu'il fit miracles en plusieurs endroits du pays, dont le plus remarquable fut qu'un iour estant tout armé il ietta son espee nue dedans vne riuere large & profonde, laquelle il tra-
uersa

uerfa fut ceste espee, comme en vne nacelle, afin de secourir les gens serrez de pres par leurs ennemis en vne bataille: tellemēt qu'à cause de tels actes & pour ce qu'il estoit grand iusticier, on l'a esleué en cest honneur d'estre adoré de tous. Ils ont grand nombre d'autres saincts, en l'honneur desquels sont ordonnez des iours de festes. Au reste les Chinois sont excellēs ouuriers & bons paintres, bastissent des maisons spacieuses où ils enfermēt leurs moines, & en ont des autres pour les nonnains. Ils estudient, les plus sauans sont auancez aux estats, & s'aident en leurs estudes d'un ancien langage que le vulgaire n'entend pas, comme entre nous, ceux qui s'adonnent aux sciences liberales & hautes, aprenent la langue Grecque ou Latine. On y porte grand honneur à ceux qui estudient en droitciuil. Quant au Roy *Leur police.* ils le reuerent comme Dieu, & ne le voyent que bien rarement. L'estat public est distingué en trois degrez, dont les doctes & Iuriconsultes tiennent le premier, les gens de guerre le secōd, les artisans le dernier. Quāt aux bonnes lettres, les maistres & docteurs examinent & iugēt de la suffisance des escholiers, & y a bō ordre & diuerses promotiōs, tellemēt que si celui qui est d'une basse classe veut monter plus haut, cela se fait par l'avis des plus sauas: & celui qui a le plus de voix est esleué par dessus les autres aux charges publiques. La iustice criminelle y est bien toide. Il n'est permis à qui que ce soit de mendier, pourueu qu'il ne soit infirme, encores qu'il ne vist goutte: car les aueugles gaignent leur vie à tourner les moulins à bras. A peine donnent ils lieu d'habitation aux estrangers en leur ville, craignans de s'acoustumer à la maniere de viure d'autrui, & oublier peu à peu leurs façons ordinaires. Ils prennent fort grand plaisir à iouer des comedies, & sont si lubriques & desbordez que d'inuēter de iour à autre nouuelles formes de pailarder. On les tient pour grands magiciens & inuocateurs de diables. Voila en peu de paroles la religion & police de ceux de la China, ausquels Andrade fit tant de courtoisies qu'ils estimoyent la nation Portugalloise estre seruiable, sage & fidele entre toutes les autres. Estant de retour en Malāca, il y trouua Alexis de Menesez enuoyé par le Viceroy avec plaine puissance d'accorder tous differens, & reigler l'estat de la ville. Andrade lui remit sa flotte en main, cingla en Indostan, de là reuint en Portugal, fit vn ample recit au Roy de la douceur & docilité des Chinois, lui monstrant quelques images & tableaux: ce qui assura le Roy, qu'avec le temps ce peuple embrasseroit le Christianisme. Mais au bout de quelques annees apres, la folie de Simon Andrade vaillant capitaine, mais estourdi iusques au bout, & ne ressemblant pas à son frere, abolir ceste esperance: car estant allé avec vne flotte en la China, apres y auoir fortifié quelques places pour accommoder les affaires des Portugallois, il commença à trancher du Roy, puis deuint brigand tout manifeste, pillant ce qui lui plaisoit, violant toutes les filles qu'il vouloit, brief commettant tant d'insolences à la façon acoustumee, que les Chinois par trop irritez se ruerent sur lui & ses gens, en tuerēt la plus part & emmenerēt les autres prisonniers. Toutesfois il se sauua avec ses pillages. Le Roy de la China auerti de ce desordre chassa l'ambassadeur de Portugal, lequel estant de retour à Cantam fut emprisonné par ceux de la

*Mal traitez
par Simi An-
drade.*

ville, & finit miserablement ses iours en vne basse fosse. Ainsi auient il souuentefois que les audacieux & insensez renuersent ce que les sages auoyent establi. Or i'ay esté contraint de descrire ici sommairement & tout d'un fil l'estat des Chinois, afin de n'entremettre trop de fois ailleurs le discours des autres choses auenues.

*Nauigation
de Jean Syl-
ueire en Ben-
gala, & ce
qui s'y fit.*

Pour le regard des Indes, Soarez ayant receu nouuelles que le Roy des Isles de Maldiuar & celui de Bengala auoyent quitté l'alliance faite avec Emmanuel, pource que depuis la mort d'Albuquerque ils auoyent esté outragez en plusieurs sortes par les capitaines de Portugal, enuoya Jean Sylueire avec quatre nauires, afin de renouer l'amitié avec ces Rois & autres allies. Sylueire cōferma la paix avec le Roy des isles, alla en Cambaje & en fit autāt avec le Roy: puis reuint en Cochim, où il seiourna iusques à ce que ses nauires fussent auictuaillees. De Cochim il fit voile en Bégala, qui est vn grand pays que le Gange traVERSE. Ce fleuue est tresprofond & trellarge, separant l'Inde haute d'avec la basse, puis se desgorge en l'Ocean Indois par deux bouches distantes l'une de l'autre enuiron cent cinquante lieues. L'eau en est douce & saine, mesmes les habitās estiment qu'elle fait miracles tellement que plusieurs s'en lauent fort souuēt, ou pour guerir de certaines maladies corporelles, ou pour effacer leurs pechez. Les campagnes sont incroyablement fertiles. Quant au peuple il est bazané, assez beau & propre en ses façons, aimant les bons morceaux, braue en habits, adonné à la pailardise, gourmandise, brief à toutes sortes de vices: se souciant peu de tenir promesse, faisant gloire de trôperie & trahisons, idolatre pour la pluspart, le reste adonné aux impostures de Mahumet. Sylueire arriuē au port d'une ville nommee Chatingam, auertit le gouuerneur de sa venue, dont l'autre monstra contenāce d'estre bien content, lui enuoya des presens, & promet faire pour l'amour de Sylueire tout ce qui lui plairoit. Or pource qu'il continuoit à babiller & mentir, Sylueire & lui se battirent, mais ceux de Chatingam y perdirent beaucoup, tellement qu'ils entrerent en accord, ratifié par ostages. Depuis ce gouuerneur tint si bonne mine, que Sylueire gentilhomme de bō naturel y fut trompé & rendit les ostages. Alots il brassa vne autre trahison pour ruiner Sylueire: mais ayant perdu vne secōde bataille, il demanda pardon & faignit ne vouloir autre chose que la paix. En fin le gouuerneur d'une autre ville nommee Daraca, escriuit à Sylueire, le priāt de venir mouiller l'anchre en ce port: que le gouuerneur de Chatingā estoit vn meschant homme, & que le Roy auoit resolu de le chastier griefuement pour auoir ainsi machiné cōtre les Portugallois. Et afin que Sylueire donnast plustost dedans le filé, il lui enuoya force presens. Tout cela estoit aposté par la ruse du gouuerneur de Chatingam, afin de surprendre & ruiner entierement Sylueire, lequel croyant tout cela estre vray, tourna voile vers ce port. Comme il entroit dans le canal, le Roy de Bengala incité par son conseil, y enuoya tel nombre de vaisseaux, que peu s'en salut que Sylueire ne donnast du nez à terre pour la dernière fois, si par sa vaillance il n'eust surmonté la fraude de ses ennemis. Ayans esté ainsi finalement reprimez, Sylueire print la route de l'isle de Zeilan avec sa flotte deschiée & diminuée,

nuee, car Iean Fidalgue capitaine d'une des nauires l'auoit abandonné. Antoine Saldagne qui goueroit la mer d'Arabie avec plusieurs voiles, fit quelque butin: & pource que l'hiver approchoit se retira en Inde, sans auoir fait autre exploit memorable. Manuel Lacerde, qui auoit aussi esté enuoyé en Diu, fut honnorablement recueilli par Melichiaz, & confermerent l'accord entre les Rois de Portugal & Cambaje plus fort que iamais.

17. IL a esté dit ci dessus, qu'Alexis de Menefez estoit arriué en Malaca. Lors il menoit trois cens Portugallois, & suiuant l'ordonance du Roy Emmanuel establit Alonse Lopez de Coste capitaine de la citadelle, Edouard Melio Amiral, & tira des prisons Antoine Pacheco, où il auoit esté serré par Pereire, à cause des mescontentemens susmentionnez. Le Roy de Bintani establit vne bonne garnison au fort qui commandoit à la riuiera de Muar, & le remplit d'artillerie, afin d'assaillir de pres & plus souuent par mer & par terre les Portugallois qu'il hayssoit à mort. Menefez enuoya le capitaine Alonse avec trois cens Portugallois, trois mille Malacans & bon nombre de gentilshommes, pour ruiner ce fort. D'autant que la maree estoit remontee, & que le canal ne pouuoit porter le faix des nauires, Alonse attendoit le retour de la mer, afin de pouuoir entrer dedans la riuiera. Tandis on canonnoit avec perte de gens d'un & d'autre costé. A mesure que le flux s'enfloit, l'occasion se presentoit de combattre à l'auantage, si l'audace ne se fust iettée à la trauersse: car il suruint vne grosse querelle entre Alonse & George Mascaregne, tellement que les Portugallois s'en retournerent sans rien faire. Quand le Roy de Bintani conut que la peau du lion ne lui seruoit de rien, il s'auisa d'y coudre celle du renard: & faignant n'auoir rien plus à cœur que la paix, la demanda au gouuerneur Menefez, lequel apperceuant la ville bien à l'estroit à cause des viures l'accorda volontiers. Le Roy arrachoit de l'esprit des Portugallois par plusieurs signes de reconciliation toutes les opinions sinistres qu'ils pouuoient auoir de lui: comme eux de leur part lui faisoient tous seruices de bonne affection. Ainsi ils s'enuoyoient des presens, & y auoit trafic de toutes marchandises au grâd proufit des vns & des autres. Voyant les Portugallois endormis sous ceste couuerture de paix & d'amitié, il fait partir promptement septante vaisseaux qu'il auoit fait equipper secrettement, pour battre la citadelle par mer, & enuoya par terre plus de deux mil hommes, afin qu'en mesme temps ils assaillissent & surprinsissent les Portugallois. Il y a vne isle touchant à Malaca, laquelle ces vaisseaux gaignent, courent sus aux Portugallois endormis, en elgorgent grand nombre, & mettent le feu aux nauires, sans grand effect toutesfois, à cause d'un orage & de quelques grosses pluies qui auoyent trempé le bois assez auant. Menefez esueillé par le bruit des fuyards, enuoya les capitaines en l'isle, où le combat dura iusques à midi, en fin duquel les ennemis furent contrains se retirer. Ceux qui estoient venus par terre, suivis de plusieurs Malacans complices de la trahison, s'apprestent pour assaillir de pres la citadelle. Le Roy y enuoya gens de renfort avec des elephans, tellement que la meslee fut trefapre. Mais lors que les Portugallois qui combatoyent en l'isle furent demeurez les maistres & reuindrent en la ville, les assaillies com-

Guerre en Malaca par les menées du Roy de Bintani & le succès d'icelle.

mençoient à se lasser, puis se prindrent à reculer au pas, finalement à s'enfuir, mais non pas tous, car il y en eut beaucoup de tuez & de prins. Pour cela le Roy ne laissa pas de pourfuiure sa pointe, estant resolu de serrer la citadelle de plus pres & avec plus grosses troupes que deuant. Sept iours durant il ne laissa les assiegez à repos qui de leur part l'endommagerent grandement en diuerses sorties. Or ce qui faisoit viuement la guerre aux Portugallois estoit la necessité de viures, lesquels diminuoyent de iour en iour. Finalement Menefez trouua vn moyen pour ruiner le fort de Muar, ce qui fut executé sans peine ni perte. Vn gentilhomme fort riche se retirant avec sa femme, ses enfans & grande famille, de laue en Malaca, pour y faire sa residence, comme il voguoit au long de la coste fut prins par quelques capitaines & mené au Roy de Bintam, qui le receut benignement, & l'induisit à force de prieres à demeurer en Bintam. Or combien que ce Roy fist semblant en beaucoup de sortes de prendre plaisir à deuiuer avec ce gentilhomme, toutesfois il auoit beaucoup plus de contentement à entretenir la femme d'icelui, qui estoit fort belle. Pour en iouir plus seurement, il enuoye le mari au loing, sous pretexte d'honneur, en le faisant general de quelques nauires. Ce gentilhomme vaillant & expérimenté nuisoit beaucoup aux Portugallois : mais ayât receu aduertissement de ses amis que le Roy le trahissoit vilainement par adultere, il se retira dedans la citadelle de Malaca. Le gouuerneur Menefez lui communique son entreprise, à quoy l'autre promet s'employer, & avec six vingts Portugallois & quelques Malacans, enuoyez par terre & par eau, surprint & esgorgea les ennemis, faussa les trachees, tellement que le fort fut forcé & gagné par les Portugallois qui y firent vn terrible carnage, ayans toutesfois perdu ce gentilhomme de laue tué d'un coup de canon, & quelques Portugallois, nō compris les blesez, entre autres Manuel Faucon colonnel des compagnies par terre, lequel eut la cuisse rompue. On emmena du fort en la citadelle plus de septante pieces d'artillerie. Par ce moyen la guerre cessa pour vn peu de temps, tellemēt que le gouuerneur enuoya Tristan de Menefez pour reconoistre les Molucques, & lui mesmes fit voile en Indostan avec la pluspart des Portugallois. Apres son depart la guerre recommença, tellement que la citadelle demeura assiegee l'espace de dixsept iours, fut batue & assaillie iusques à l'extremité. Les ennemis lancerent le feu en vne galere des Portugallois, & en deux nauires de leurs alliez. Comme chascun couroit pour estaindre le feu, & durant le combat, par ne say quel malheur le feu se print aux pouldres de la nauire du capitaine Gabriel Gague, embrasa si soudain le vaisseau que tous les soldats qui estoient dedans furent noyez, à cause de la pesanteur de leurs armes. Iacques Mendeze capitaine d'une autre nauire fut tué d'une canonnade : ce nonobstant les Portugallois estaignirēt le feu & chasserent les ennemis, qui sentans le dommage receu es sorties des assiegez fidelement secourus par les Malacans sous la conduite de leur Xabandare ou grand preuost, leuerent le siege, & deslors le Roy de Bintam print auis de se deporter de la guerre. En ces combats & rencontres furent tuez dixhuit Portugallois, plus de quatre cens hommes du costé des ennemis, sans les prison-

prisonniers entre lesquels y eut le fils d'un seigneur du royaume de Siam, pour la rançon duquel le père enuoya vne grand' nef chargée de victuailles dont les Portugallois & Malacās furent fort soulagez en la necessité qui les pressoit.

18. CESTE mesme année le Roy enuoya Iacques Lopez de Siqueire es Indes avec vne flotte de dix nauires, pour estre viceroy au lieu de Soarez. Ainsi qu'il doubloit le cap de bonne esperance, vn gros & grand poisson donnant à l'un des costez de la nauire de Iean Limice, la fit pācher de l'autre, & arresta le vaisseau de telle force qu'il estoit impossible le remuer de là. Les soldats & matelots estimoyēt auoir donné cōtre quelque escueil: cependant le poisson se desgagea, laissant flotter la nauire comme auparavant. Siqueire print port en Goa le huitiesme iour de Septembre, auquel temps Soarez bastissoit vne citadelle en l'isle de Zeilan, iouxte le mandement de Emmanuel. Il estoit premierement arriué en vn port de l'isle nommé Columbo, & auoit obtenu congé du Roy de l'isle de commencer ce bastiment. Mais il auint que les Sarasins, à leur maniere acoustumée, destournèrent le Roy de ceste volonté, si que non seulement il denia & empescha l'effect de sa promesse, ains aussi resolut de courir sus aux Portugallois, dressant des forts, disposant des corps de garde, avec des pieces pour chasser au loin Soarez, qui mit toutes ses troupes en terre. Incontinent ils vindrēt aux mains, & en ce combat vn braue gentilhomme nommé Verissime Pacheco & plusieurs soldats Portugallois furent tuez, grand nombre de blesez: ce neantmoins ils firent desloger leurs ennemis arriere de leurs forts avec grand perte. Le Roy demanda pardon & paix, qui lui fut accordée à condition qu'il lairroit bastir la citadelle, & que pour chastiemēt de sa folle rebellion il payeroit tribut annuel au Roy de Portugal, d'auoir certaine quantité de poyure, & plusieurs quintaux de canelle. Au reciproque Soarez promit à ce Roy que le Viceroy Portugallois le tiendrait tousiours en sa sauuegarde, ne lui feroit iamais la guerre, & mesmes que les Portugallois chasseroient tous ennemis hors de l'isle de Zeilam. Ceste alliance fut conclue, iurée, reduite par escrit, signée de la main de Soarez, du Roy & des principaux du Royaume. Puis la citadelle fut acheuée en peu de tēps à l'aide des insulaires, la garde d'icelle commise à Iean Sylueire, & les nauires laissées en la charge d'Antoine Mirāde. Soarez retournāt de là en Cochim y trouua Siqueire, es mains duquel il remit son estat, & s'embarqua pour reuenir en Portugal. Incontinent Siqueire se mit apres les affaires de sa charge, enuoya Christoffe Souze avec quelque flotte en Dabul pour dōpter la ville reuoltée de l'obeissance du Roy de Portugal, enioignit à Alonse de Menezes d'aller faire la guerre en Batticala, fit cōmandemēt à Ieā Gomeze de bastir vne citadelle en Maldiuar, mais ce Gomeze y fut tué par les Sarasins de Cambaje: puis estant en la route de Goa, il s'asleura soigneusement des citadelles de Calecut & de Cananor. Apres qu'il fut arriué en Goa il commit la charge à Antoine Saldagne, qui auoit des vaisseaux de réfort, de costoyer l'Arabie & l'Ethiopie, afin de guerroyer à toute outrāce les Sarasins & Mahumetistes. Simon Andrade fut enuoyé en la China, où par sa folie & vio-

Iacques Lopez de Siqueire enuoyé es Indes pour estre Viceroy: & ce que fit Soarez, auant que reuenir en Portugal.

1518.

lence il mit les Portugallois en la mauuaise grace des habitans. Anroiné Correa eut charge d'aller en ambassade vers le Roy de Pegu afin de traiter paix & amitié avec lui : & Garsie de Sale fut despesché pour nauiger en Malaca, afin de pouruoir aux affaires. Y estant arriué, il trouua abatu de maladie Alfonse Lopez de Coste, lequel desiroit grandement retourner en Goa, esperant s'y trouuer mieux : & de fait il partit laissant Garsie en la citadelle de Malaca, & quelques iours apres estre arriué en Cochim, mourut de ceste maladie.

*Rencontres des
Mores & Por-
tugallois en
Barbarie.*

TANDIS que les affaires estoient ainsi maniees en Inde, Abraheim fils 19.
de Bartaxa entendant que les Portugallois auoyent fait beaucoup de maux aux habitans de Farrobe, Benamare, & à leurs circonuoisins, delibera d'en auoir sa'reuence : & tenant son entreprise fort secrette quelques iours, mit cinq cens cheuaux en campagne, & s'embuscha en certains villages prochains du territoire d'Arzile vers Tingi. De là fut enuoyé par lui vn nommé Aroaz, seruât de guide, pour scauoir le chemin & aller reconoistre iusques en vn endroit appellé le guet d'Alfandiquim. Cest Aroaz estoit estimé homme adroit & propre à telle charge, tellement que Iean Coutin se donnoit soigneuse garde d'estre attrapé par ses ruses, & iamais n'enuoyoit hors de la ville ses espions, qu'il ne fist marcher vne troupe de cheuaux apres pour les secourir au besoin. Auint lors qu'enuoyant à la descouuerte, les gens de cheual sortirent quant & quant : ce qui retint Aroaz, iusques à ce qu'il les vist pres d'Alfandiquim. Incontinent il en auertit Abraheim, lequel sortant bellement de l'embusche s'approchoit au grand pas. Les Portugallois voyans l'auantgarde cōclurent de se retirer : mais Abraheim & les siens s'estans arrestez court, Fernand de Callaix, capitaine de la premiere troupe de cheuaux sortis pour faire espaule aux descouueurs, estimât que la peur eust arresté les Mores, donne dedans à bride abatuë. Les Mores reculoient sans rompre leur rang, iusques à ce qu'ils eurent attiré Fernand & les siens en l'arrieregarde qui demouroit cachee. En ceste place furent tuez dixsept Portugallois de cheual, & les autres contrains se sauuer de viffesse. Ils se trouuerēt comme enclos en vn destroit de marefcages : mais vn brave cheualier nommé Louys Vaillant, les rassoura, & fit teste aux ennemis, sans bouger de sa place que premierement ses compagnons ne fussent tous passez : cela fait il les remit en ordonnance & conduisit si dextrement iusques en leur garnison, qu'il demeura tousiours à la queue pour s'opposer viuement aux ennemis. Comme Abraheim se retiroit il rencontre vn ieune gentilhomme fort adroit aux armes, nommé Antoine Mascaregne & quatre autres, qui furent tous prins : & combien que le Roy de Fez fist bonne chere à Mascaregne, toutesfois ce gentilhomme ne se pût garantir de la mort, car il fut emporté de la peste qui lors estouffoit les Mores à tas. Enuiron ce mesme temps Emmanuel ayant rappellé en Portugal Pierre de Soufe gouuerneur d'Azamor, y enuoya en mesme charge Aluar Norogne, lequel conferma les traitez de paix avec plusieurs Seigneurs Mores, les cottiza raisonnablement, & fit vne infinité de maux à ceux qui s'estoyent rebellez. Entre autres courses, le vingtsixiesme iour d'Auril il fourragea le terri-

territoire de Benemez, tua beaucoup de gens, emmena deux cens cinquante prisonniers & force butin. Au mois de Iuin ſuiuant Vaſque Fernand Ceſar ſurprint & deſit d'autres troupes de Mores, en arreſta huit cens avec vn grand pillage, & fit ſa retraite en Azamor ſans perdre vn ſeul homme de ſes troupes. De rechef au mois d'Aouſt Antoine Gonſalue, enuoyé par Norogne, courut ſus à vne troupe de pietons Mores, qui furent deſfaits apres quelque reſiſtance, & vne partie d'iceux emmenez pour eſtre eſclaués. Au meſme mois certains capitaines des Mores confederez prièrent Norogne de leur donner quelques compagnies pour aſſaillir les Mores d'Enxouie, & tirer de là bonne quantité de bled. Sur ce vne troupe de deux cens Mores ennemis eſtant deſcouuerte, les confederez eſtimerent qu'il y auoit quelque groſſe embuſche, & frappez de ceſte imagination ſe retirerent au premier bataillon. Ceux que Norogne auoit enuoyez pour renfort eſtans derriere ſouſtindrent la charge des ennemis. Mais voyans aucuns de leurs cōpagnons par terre ill's'enfuirent honteuſement vers Azamor, non pas tant par leur faute, que par la couardife de ceux qui les abandonnerent. Si eſt-ce que telle retraite les rendit fort confus l'eſpace de quelques iours.

10. EN cetemps le Roy de Portugal eſtoit agité de tresfacheuſes penſées & merueilleuſement diſtrait en ſoy meſmes. Il ſe voyoit veſue, & deſiroit employer le reſte de ſa vie en choſes notables & dignes de memoire perpetuelle. Pourtant reſolut il ſe retirer en Algarue, & laiſſer le maniement des affaires du royaume à ſon fils Iean & à ſes conſeillers, afin de ne vaquer ſinon à guerroyer les Mores, & auancer de plus en plus ſa religion. Mais il fut deſtourmé de ceſte deliberation par les menées de pluſieurs qu'il deuoit reprimer par rude chaſtiement, & non pas ſimplement changer d'auis. Car ſuiuant la couſtume de ceux qui meſurent les choſes à l'auiſe de leurs deſirs, ſans ſe ſoucier de deuoir ni fidelité quelcōque, ils ſe tiroyēt peu à peu arriere d'Emmanuel le quel ils eſperoyent voir bien toſt porter au ſepulchre, & s'approchant de Iean ſon fils, s'attendās de faire mieux leurs beſongnes autour de lui, ſeduifoient ce ieune Prince, de bō naturel, mais ſuiet à eſtre pipé par leurs ruſes & trahiſes. En premier lieu ils raualoiyēt merueilleuſement Emmanuel, diſans que ce n'eſtoit qu'un baſtiſſeur, qui ne ſe ſoucioit de la dignité royale, ne ſauoit tenir ſa grauité, dōnoit acces à tous, deuiſoit trop familièrement avec le premier rencontré, & ne prenoit plaſir qu'à picquer cheuaux. Dauantage ils l'accuſoyent de prodigalité, requeroient pluſieurs vertus royales en lui, & ſouffloyent aux oreilles du fils que ſ'il vouloit deuenir grand monarque, il lui ſaloit prendre tout autre chemin que ſon pere, & ne ſe laiſſer pas ainſi valetter & meſpriſer. Iean eſtoit vn Prince doux, benin, & religieuz: mais ayant tels pendans à ſes oreilles, leurs meſdiſances eurent telle efficace en ſon endroit, qu'il commença à condamner aucunes façons de faire de ſon pere, encores qu'il ne le hayſt pas, ains l'honorast grandement. Ainſi donc il conclud, pour deuenir bien grand, d'auoir vn tout autre maniement en la conduite de ſes affaires. Et là deſſus il y auoit des iangleurs & marmouſets qui lui chantoient que la ſouueraineté d'un Roy eſtoit de faire tout ce qui lui plaſoit. Que brider ſa volenté c'eſt

*Emmanuel
calomnié
ſes ennemis
le
Roy de Por-
tugal.*

Estoit signe de miserable servitude, & non pas de dignité royale. Emmanuel ayant senti le vent de tels soufflets courtisans, craignit que voulant quitter les affaires, & laissant son fils entre les mains de ces mignons & flatteurs il ne mesprisast son pere, & que le royaume gouverné par meschant conseil ne panchast pour se ruiner du tout. Ceste apprehension le destourna de sa premiere deliberation, tellement qu'il resolut prendre nouvelle alliâce pour se fortifier, maintenir son autorité, & ne viure plus solitai remēt. Pour ceste cause il fit prier l'Empereur Charles de lui accorder à femme sa sœur Eleonor, tresbelle & sage Princeſſe. Au parauāt il en auoit fait la poursuite pour le Prince son fils, & despesché Pierre de Gouea ambassadeur en Allemagne vers l'Empereur Maximilian : mais il changea tellement d'auis, à cause de ce qui a esté dit ci dessus, qu'il aima mieux la prendre pour soy que pour son fils, dont plusieurs parlerent diuerſement, & quelques vns meſmes l'en blaſmoient. A quoy pense ce Prince (disoyēt-ils) qui iusques à present a monſtré ſi bonne affection à ſes ſuiets? maintenant il ruine ſon eſtat en beaucoup de ſortes: car premierement il eſt veufue, aagé de cinquante ans, chargé de huit fils, & ne pourra gaigner le cœur de ceste ieune Princeſſe ſœur de l'Empereur, nourrie en l'eſperāce d'autre mariage, à vouloir eſpouſer vn homme ſi peu ſortable à cause del' aage, & faudra faire vne infinie de deſpenſe auant que paruenir à cela. Son fils euſt peu toucher vn riche mariage en eſpouſant ceste Princeſſe: au contraire le pere ne receura rien, ains meſmes cōtre toute couſtume & bonne façon donnera à ſa femme en douaire le domaine du royaume. Dauantage il faudra (autrement à peine pōurra-il cōtenter ceste ieune femme) que les affaires prenēt pli à l'appetit de la nouuelle Roine. Et puis, que fera-il, ayant deſia huit mailles? Ceſte ci en pourra encores faire auſſi grand nōbre. Le royaume eſt petit: quels biens l'aira-il à tant d'heritiers? de quels reuenus tous ces Princes du ſang pourront-ils entretenir leur eſtat, pour n'eſtre contrains ſe ſourter parmi le cōmun, & viure à l'ordinaire des autres? Il cōuiendra auſſi que le Roy face l'amour, entretienne ſa femme, & ne penſe plus à rēdre ſon nom immortel, ains à complaire ſeulement à ceste belle Princeſſe. Tels eſtoient les diſcours du peuple & de ceux qui ignoroyēt les trauerſes & faſcheries domeſtiques du Roy, lesquels maugré tous tels bruits continua en ſa reſolution, & comme Charles d'Auſtriche fuſt arriué de Flandres en Eſpagne pour voir ſon royaume hereditaire, Emmanuel despescha vers lui Aluar de Coſte ſon grand Chambellan.

*Emmanuel
ſuccede & eſpouſe
Eleonor
d'Auſtriche
ſœur de l'Em
pereur.*

C'EST ambassadeur auoit charge, pour pretexte de ſa commiſſion, d'aller faire la bien-venue à Charles : mais le ſommaire de ſon ambassade eſtoit de negocier le mariage, ce que Coſte executa ſelon le deſir de ſon maiſtre : tellement qu'Eleonor lui fut promiſe, douaire aſſigné par ſon frere, ioyaux de grand pris appreſtez par le Roy pour ſa nouuelle eſpouſe, feſte ſolennelle celebree pour ce mariage, & les fiançailles faites en Saragoſſe (où Charles ſeiournoit lors) au grand plaifir de tous. Or d'autant qu'Emmanuel attouchoit à Charles & à Eleonor tāt par cōſanguinité que par aſſinité en beaucoup de ſortes, tellement que ce mariage eſtoit prohibé par
les

les decrets du Pape, il falut auoir des bulles de Rome, que lon recoura aisément. Emmanuel receut par les nouuelles de ceste alliance vn merueilleux contentement: mais la noblesse & le tiers estat n'en furēt gueres ioyeux, specialement le Prince Iean, non qu'il desirast Eleonor pour femme, ains dautant que ce mariage lui sembloit peu vtile pour le bien de Portugal. Sur ce Emmanuel assembla en conseil tous les grands seigneurs du royaume, & par vn long discours exposa les raisons qui l'auoyent esmeu de se remarier: ce qui cōtenta les seigneurs, ou du moins il en firent semblant, ne voulans offenser le Roy. Ainsi tous l'vn apres l'autre en leur rang & selon la coustume lui baiserent la main, prians Dieu que ce mariage s'accomplist en toute prosperité. Ces solennitez acheuees la peste assaillit & affligea grandement la ville de Lisbonne, & contraignit le Roy de chāger plusieurs fois de demeure. Finalement il se retira en Almeirin, & d'illec se transporta en vne autre ville nommee Crate, assez renommee, & appartenante lors aux cheualiers de Rhodes, afin d'y attendre la Roine, laquelle acompagnée de grand nombre de seigneurs d'Espagne se rendit sur les frontieres des deux royaumes. Beaucoup des principaux seigneurs de Portugal allerent pour la recueillir iusques à vne petite riuierē nommee Seuer qui separe Portugal d'avec Castille. Le Conte de Villeneuve de Portimane en Algarve passa la riuierē, fit vne grandereuerence à la Roine & lui baïsa la main. Autāt en firēt le Conte de Tentugal, l'Euesque de Portugal & l'Archeuesque de Lisbonne, puis la noblesse de Portugal. Cela fait la Roine menée par le Duc d'Alve & l'Euesque de Cordoue passa la riuierē, où le Duc de Bregēs acompagné de deux mille cheuaux assez biē equippez l'attendoit de pied coy. Quand la Roine fut sur les limites de Portugal, le Duc mit pied à terre, afin de receuoir la Roine au nom du Roy Emmanuel. Le Duc d'Alve demanda s'il auoit mandement expres & special pour ce faire: & tout incontinent la cōmission authentique & signee de la main du Roy fut exhibee, leuē à haute voix deuant tous, & bailliee au Duc d'Alve pour tesmoignage d'auoir deuēment accompli ce qui estoit requis en telle cōmission. Alors ce mesme Duc print la chaine d'orentortillee de plusieurs tours au bras de la Roine, laquelle il mena ainsi, la liura & remit en charge au Duc de Bregēs. La Roine ayant esté rendue solennellement, le Duc d'Alve & les autres seigneurs de Castille se retirerent: toutesfois l'Euesque de Cordoue, le gouuerneur de Tregen (qui estoient deputez ambassadeurs) le Prince de Villefranche, le grand Commandeur de Castille & le Conte de Montagu conduisirent la Roine iusques à Crate, où estans arriuez, & la Roine ayant souppé, le Roy l'alla voir, qui fut receu d'elle en grande reuerēce & tesmoignage de singuliere amitié. Le Prince de Portugal lui voulut baïser la main, ce qu'elle refusa, & ne fut possible de la persuader à ce faire: mais pour garder la coustume d'Espagne elle receut le baïse-main de George grād Commandeur de Portugal, bastard du Roy Iean second. En apres l'Archeuesque de Lisbonne espousa solennellement le Roy & la Roine, avec les ceremonies acoustumees en tel cas. Tout ce iour d'espousailles fut employé à toutes sortes de passe temps. De là ils allerent à petites iournees iusques en

Almeirin, & tencontrerent les fils du Roy qui leur venoyent au deuant, & descendirent incontinent de leurs cheuaux, pour baïser la main de la Roïne, ce qu'elle ne voulut souffrir, ains leur monstra en beaucoup de sortes la douceur de son esprit & la bonne amitié qu'elle leur portoit. Les autres Princees & seigneurs qui ne l'auoyent encores veüe lui firent les reuerences requises selon leurs degrez & qualitez. Estās arriuez en la ville d'Almeirin, Isabelle & Beatrix filles d'Emmanuel se presenterent au haut des degrez du palais, & comme elles s'apprestoyēt à descendre, la Roïne se hastā pour les preuenir, & les souleua pource qu'elles s'estoyent iettees à genoux, & les embrassa fort gracieusement. Les autres damoiselles & filles de ces deux princeesses baïserent la main de la Roïne, qui les salua toutes d'un visage debonnaire, gardant neantmoins sa grauité & le rang qu'elle tenoit. Ce seroit chose trop longue de discourir sur les solennitez, ieux & passetemps de ce iour là. Le lendemain apres les solennitez acoustumees le Roy print l'ordre de la toison d'or, institué par le Duc Philippe de Bourgongne, retenu en grande deuotion par ses successeurs, dont Charles d'Autriche estoit alors premier cheualier, & ce à l'instance que Charles lui en fit par ses ambassadeurs. Tout l'hiuer se passa dans Almeirin en grand plaisir, & au printemps le Roy fit sa retraite en la ville d'Euora.

*Flotte de seize
nauires en-
uoyees en In-
de.*

L'AN mil cinq cens dixneuf, le Roy enuoya vne flotte de seize nauires en Inde sous la charge de George Albuquerque. Mais tous ne peurent pas tenir la route: car la nauires du capitaine Jacques Limice fut rechassée d'un vent contaïre iusques à Lisbonne. Celle de Louys Guzman fut emmenée par son maistre, lequel se reuolta, deuint coursaire, & commit beaucoup d'actes indignes de sa race. Manuel de Souze qui commandoit en vne nauires becue, costoyant l'Ethiopie vers Melinde, mouilla l'anchre en vn port nommé Mantoue, pour acheter des viures: mais apres auoir pris terre, lui & quarante Portugallois furent tuez des Sarafins. Quant à la nauires, vn tourbillon la chassa & fit eschouer pres d'une isle non guerés esloignée de Quitra, où les Sarafins la poursuiuirent & pillerent entierement, & couperent la gorge à ceux qui estoient dedans, reserué vn ieune garson à qui le Roy de Zanzibar sauua la vie. George Albuquerque hyuerna en Mozambique avec neuf nauires. Il n'y en eut que quatre qui trauerfassent la mer iusques en Inde. Ce pendant Jacques Lopez de Siqueire donnoit soigneusement ordre à toutes choses requises pour allet faire la guerre aux peuples de l'Arabie. Et pource qu'il n'auoit pas assez de forces, Gonçalues de Loule fut enuoyé dans vn vaisseau propre à repousser & trancher les vagues vers George Albuquerque en Mozambique, lui dire de la part du Viceroy, qu'il fist voile de là au goulfe Arabique, où ils ioindroyent leurs troupes ensemble pour assaillir la ville de Iude. Siqueire conoissant aussi la malice de Melichiaz, & qu'il auoit fait beaucoup de torts aux Portugallois, despescha Christofle de Sale avec trois galeres pour roder toute la coste de Cambaje, ce que Sale fit, & ramena force butin. Semblablement Antoine Saldagne courroit au long du cap de Guardafu, d'où apres auoir pillé beaucoup de vaisseaux il reuint trouuer Siqueire.

ENVIRON

23. ENVIRON ce meſme temps le Roy ayant commis vne legere faute irrita rellement l'vn de ſes ſuiets, qu'oublant toute foy, pieté & religion, il ne ceſſa iuſques à ce que (entant qu'en lui eſtoit) il trahit le Roy qui l'auoit eſleué, le pays de ſa naiſſance, & hazarda ſa vie à de merueilleux dâgers. Sur la fin du ſixieſme liure nous auons parlé de Fernand Magellan. C'eſtoit vn gentilhomme de grand cœur, qui auoit fait preune de ſa vailſſance & adreſſe, tant es guerres des Indes que contre les Mores en Barbarie. Iadis la couſtume eſtoit en Portugal, que les ſeruiteurs domeſtiques du Roy eſtoient nourris à ſes deſpés en ſa maiſon. Or d'autant que le nombre des domeſtiques acrût (à cauſe que les fils des officiers du Roy ſuccedoyent aux places de leurs peres, & que pluſieurs autres eſtoient enroollez avec les domeſtiques à cauſe de leurs bons ſeruices) il ſembloit trop mal aiſé d'appreſter viande pour tant de gens. Cela fut cauſe que les Rois de Portugal donnerēt penſion d'argēt à leurs domeſtiques, afin de n'eſtre plus ſuiets de les nourrir, ains leur permettant de ſe traiter à leur fantaſie. Et ainſi auint que chascun receuoit ſes gages tous les mois. Alors les viures eſtoyēt à ſi vil pris que la ſomme d'argent assigné ſuffiſoit, tant petite fuſt-elle. Maintenant que le mōde eſt acru, & que les viures & autres choſes neceſſaires à la vie humaine ſont enchérées de beaucoup, ceſt argēt dont lon auoit iadis quelque reſte au bout du mois ne fournit pas à la deſpenſe de deux iours. Toutesſois à cauſe que les Portugallois ne s'eſtiment honnorez, ſinon eſtant de la maiſon du Roy, chascun taſchie en toutes ſortes poſſibles de toucher tels gages tous les mois, auſſi ardamment que ſi c'eſtoit quelque grande ſomme de deniers. Et comme ils n'ont ſouhait plus grand pour le monde que d'eſtre couchez en l'eſtat des officiers domeſtiques du Roy, auſſi tiennent-ils que leur honneur croiſt ſelon ſa ſomme qu'ils reçoient. Car il y a diuers officiers, tellement que celui qui eſt en plus haut degré a auſſi plus gros gages. Les gentilshommes ſeruans y ſont en plus grād nombre que nuls autres officiers : neantmoins à cauſe des degrez de nobleſſe, les gages de tous ne ſont pas eſgaux, & ainſi ſelō la valeur d'iceux on iuge de la nobleſſe de chascun, & eſtime-on plus noble celui qui reçoit le plus. Selō que les choſes ſont au monde, ce iugement eſt faux ſouuentesſois, d'autant que pluſieurs obtiennent par habilité & importunité ce qui ne deuroit eſtre attribué qu'à la vertu & vraye nobleſſe. Ce nonobſtant les Portugallois, gens ambitieux, & qui cuidēt que l'acroiſt de quelque poignée d'argent les face plus grāds gentilshommes, ſont grād bruit ſouuent pour ceſte paye, comme ſi de cela dependoit leur vie & leur honneur. Or Magellan maintenoit que ſes ſeruices meritoyent rehaulſſement d'vn demi ducat ſur les gages de chascun mois, ce que le Roy lui refuſa, craignant d'ouurir la porte aux ambitieux : dōt Magellā s'offenſa ſi griefuement qu'il quitta le parti du Roy, fauça toute promeſſe, & mit l'eſtat en extreme dâger. Et combien qu'il nous faille ſupporter les outrages d'vne Republique, aualer doucement les torts que les Rois peres de l'eſtat nous ſont, & que nous ſoyons fedeuables de noſtre vie au pays duquel nous la tenons : ſi eſt-ce que l'audacieux Magellā cōceut vn tel deſpit du refus de ce demi ducat de hauſſe par mois, qu'il fit la guerre au

*Disours ſur
le fait de Fer-
nand Magel-
lan Portuga-
lou & pour-
quoy il quitta
le parti de ſon
Prince pour ſe
ranger à celui
d'Eſpaigne.*

royaume, irrita le Roy qui l'auoit esleué, & tant qu'en lui fut tascha d'aneantir sa patrie, pour laquelle il deuoit volontiers mourir au besoin. Car les cyrotes en vindrent là, que les deux royaumes d'Espagne & de Portugal furent sur le point de s'entrechoquer. Mais le ne say comment ceste meschante coustume s'est glissée es gouuernemens publics, que le mot de trahison soit non seulement odieux & detesté, ains aussi imprime sur la race des traistres vne perpetuelle infamie, & que ce pendant on supporte ceux qui violent leur foy, qui delibèrent molester leurs Rois ou republiques, quittent par lettres & seaux les gages qu'on leur donnoit, faucent toute promesse, renoucent à leur droit de citoyen, laissent au Roy ses deniers par mespris, protestant ne vouloir plus auoir affaire à lui ni à ses suiets, & puis s'efforcent de machiner puis apres la ruine de ceux qu'ils ont ainsi abandonnez. Soit, refusez les presens d'un prince, mesprisez la liberalité de vostre patrie, si bon vous semble: grondez mesmes tout vostre saoul de n'auoir esté salarier selon vos seruites: s'enfuit il de cela qu'il faille rompre sa foy? Le pays n'a grandement offensé. Et quand il vous auroit outragé plus que ne dites, il ne faut pas se venger de ceux qui nous ont engendrez. Iay laissé, dira quelqu'un, tout ce que j'auois receu du pays. Auez vous pas emporté, l'esprit, la science? Vous tenez cela de Dieu premièrement, puis des coustumes, loix & façons de la patrie: & ne sera iamais loisible de combattre nature, ni d'offenser le pays de nostre naissance, ni de rompre la foy, quelques torts qu'on nous y ait faits. Au contraire il faut plustost perdre la vie, & se hazarder à souffrir tous les plus grands tourmens du monde, que de fauer sa promesse ou d'estre traistre à son deuoir. Rompez la foy tant que voudrez, publiez vostre desloyauté par actes publics, laissez à la posterité vne notable memoire de vostre meschanceté: ce n'est pas le moyen d'appaiser l'ire de Dieu, ni d'effacer un opprobre perpetuel.

*Dessein de
Magellan pour
trouuer les is-
les Moluc-
ques, & ample
discours sur
cela.*

Pour reuenir à Magellan, il s'oublia iusques là de penser qu'il lui estoit loisible d'estre periure en quittant par tesmoignage public la fidelité par lui deuë au Roy & à la patrie. Aussi ne fit il difficulté d'exécuter sa pensée, & se retira incontinent vers Charles Roy d'Espagne, lui donnant à entendre que les isles Molucques situées delà la Chersonese d'or appartenoyent au partage du Roy de Castille, & qu'Emmanuel les vsurpoit sur son copartissant. Il mena quāt & foy Roderic Falier, qui faisoit de l'Astrologue, pour ficher mieux ceste opinion en l'entendement de Charles. Aluar de Coste lors ambassadeur en Espagne, se presenta à Charles, lui ramettoit l'alliance des deux Rois, que c'estoit chose mal seante à sa grandeur de prester l'oreille à telles gens, qui controuuoient & faisoient accroire ce que bon leur sembloit, en aussi vaine & meschante conscience qu'ils auoyent abandonné leur Prince. Que tous hommes, sur tout les Rois, deuoient detester & reietter les traistres, & que les fauoriser c'estoit nourrir vne peste assez forte pour arracher le nom & l'autorité royale du cœur des hommes. Charles qui estoit de douce nature commençoit à fermer l'oreille à ces nouueaux trouueurs de Molucques, si les seigneurs d'Espagne ne l'eussent persuadé d'empoigner toutes occasions propres à agrandir son empire. Pourtant ordonna il que

Magel-

Magellan auroit quelques nauires pour aller trouuer vn autre chemin en Orient. Car par l'alliance traitee entre les Rois Iean second & Fernand, lors qu'ils arrestèrent que chascun pourroit sans offenser l'autre descouurir & conquesler tout ce qu'il pourroit, il fut ordonné que les Espagnols ne suiuroient point la route des Portugallois, ains en prendroyent vne du tout opposite: a sauoir que les vns vogueroyent à l'Orient, les autres à l'Occident, pour enuironner le globe des mers & de la terre. Par ce moyen il estoit permis à chascun d'eux, attendu que le contenu de la mer & de la terre n'a de mesure en longitude & latitude que trois cens soixante degrez, de descouurir & subinguer la moitié de ce nombre. Le Meridian seruoit de borne. On appelle Meridian vne ligne imaginee au ciel depuis le pole Arctique iusques à l'Antarctique, laquelle (quand le soleil y entre) monstre aux habitans posez directement sous icelle qu'il est midi: & consideree en sa longueur (qui est l'espace terminé de l'Orient & de l'Occident) est à trente six degrez ou enuiron distant de Lisbonne. Or l'erreur de Magellan & des autres qui l'ont suivi, sur ce qu'ils debatent que les Molucques apartiennent au Roy d'Espagne, est procedé de plusieurs causes. Premièrement c'est vn ordinaire que quand nous ouurons vn chemin non frequenté au parauant, & lequel nous ne pouuons remarquer par certaines montagnes, destours, ou autres tels signes apparens, il semble beaucoup plus long, sur tout en la nauigation, où il est impossible de limiter l'espace de nostre route par monts, vallees, ni par aucunes marques certaines. D'auantage, ceux qui cinglent en mers inconnues, pour se vâter mieux, & faire qu'on les estime beaucoup, alongent les lieues de moitié, afin que chascun les regarde par esbahissement, comme gens reuenus d'un autre monde. Il y a cela encor, que le mariniers & passagers non versez en Astronomie, quoy qu'ils disent, se trompent, pensans tenir la droite route, lors mesmes qu'ils ne font sinõ voguer de rumb en rumb & errer à l'auanture. Pour prouue de cela, lon fait qu'entre les fleuues Indus & le Gange n'y a que dix degrez d'espace, & toutesfois Ptolemee leur en donne trente. Ce personnage, tresdocte Geographe, n'auoit pas veu le pays, ains se contentoit d'escrire ce que quelques hommes dignes de foy, mais peu exercez en telles choses, lui en faisoient entendre. Or eux faisans voile du fleuue Indus vers le promontoire de Corinthe, qui s'estend fort auant vers le Su, puis remontans de là au Gange vers le Nord, mesuroyent l'espace de leur nauigation, comme s'ils eussent tenu leur route droite, ou vn peu panchee vers le Su. Ceux de l'Europe, specialement les Portugallois, furent trompez encor par vn autre moyen: c'est qu'estans de là le cap de bonne esperance, & voulans doubler à voiles desployees vne autre pointe qui s'estend plus doucement au Su, pensoyent auoir beaucoup plus fait de chemin que les nauires agitees çà & là des vagues esmeues n'eussent peu faire: car ceste coste delà le cap de bonne esperance au Su au Nord est de merueilleuse longueur. Les vents qui soufflent de l'Est sont anniuersaires, & fort impetueux en certains temps de l'annee: comme aussi le flux & reflux est vehement à merueilles, à cause de la hauteur de la mer gouvernee par le cours & decours de la Lune. Estant ainsi donc que les

vagues chassées d'incroyable violéce de l'Est ou Oriët à l'Ouest, & repoussées par les costes qui leur sont à l'opposite, roulent au Su, où l'ouuerture est plus aisée, & que de la pointe susmentionnée elles courent plus viste & plus loin de là le cap de bonne esperance, que lon ne pourroit aisémēt croire, cela retarde la nauigation des Portugallois. Du cōmencement & lors que cela n'estoit pas bien conu ils pēsoyent auoir beaucoup plus auācé qu'ils n'auoyēt. Toutes ces causes ont aussi engendré vn autre erreur, c'est que les limites des regions ont esté mal marquez par les Espagnols & Portugallois, qui ont adiousté des fautes à celles de Ptolemee. Si est-ce que le differēt suruenu à cause des Molucques seruit d'vne chose aux Portugallois, c'est qu'ils furēt beaucoup plus diligēs à marquer les distāces, ce qui ne se peut faire cōmodémēt que par les chāgemēs de la Lune. Car puis qu'il faut qu'il y ait certains tēps la Lune décroisse par l'interposition de la terre, on ne sauroit marquer ce cefaut de clarté en mesmes heures: pource qu'il cōuient, la nuit suruenant plustost en Inde, qu'en Portugal qui est plus à l'Occidēt, que le defaut de la Lune qui se fait en mesme temps nous apparoiſſe à diuerſes heures. Doncques la mesure des heures viuide toute ceste dispute, car en chascune heure le Soleil s'auance de quinze degrez. Or des gēs experts, bien instruits & resolu de cela par Pierre Nonio le plus excellent mathematicien de nostre temps, ont remarqué que depuis l'embouchure du fleuve Indus iusques au plan de Lisbone la course du Soleil dure six heures. Depuis le fleuve Indus iusques aux dernieres bornes des isles Molucques, vers Oriët, lon compte quarante deux degrez, lesquels adioustez à nonante feront cent trente deux. Si vous y adioustez encor trētesix degrez d'estendue depuis Lisbonne à l'Occidēt, terminez au meridian posé pour limite aux Rois d'Espagne & de Portugal, vous trouuerez cent soixante huit degrez. Encores selon ce calcul resteront aux Portugallois douze degrez à descourir, & pourront occuper tout ce qui est sous ces douze degrez, sans faire tort à nul Prince Chrestien: tant s'en faut que Magellan ou autre puisse à bon droit adiuger les Molucques aux Rois d'Espagne. Si est-ce qu'une telle dispute troubla l'Espagne entierement, de sorte que les deux Rois, Princes de bon naturel, parens, alliez & bons amis, furent sur le point de s'entreguerroyer, le tout par la mauuaistié de Magellan. Et pour reuenir à lui, le Roy entendant par Coste son ambassadeur ce qui passoit, assembla son conseil pour y auiser: mais on ne conclūd rien. Coste taschoit retenir Magellan par belles promesses, & par fois le cōtraignoit d'estre perplex en son opinion. Toutesfois esperant plus grande recompense, s'il perseueroit en sa reuolte, que demeurant fidele, il ferma l'aureille aux remonstrances & belles parolles de Coste. Ainsi apres auoir negocié a souhait avec le Roy d'Espagne, Magellan & Falier prenēt le chemin de Seuille: mais Falier desplaisant de s'estre ainsi oublié, mourut de tristesse au bout de quelques iours.

*Nauigation
hardie & me-
morable de
Magellā aux
Molucques:*

QUANT à Magellā il s'embarqua avec vne flotte de cinq nauires, ayāt toute puissance de vie & de mort sur les capitaines, soldats, pilotes, & matelots, & fit voile le dixiesme iour d'Aoust, l'an mil cinq cēs dixneuf, pour descourir les pays qu'il n'auoit oncques veus, ni oui hōme qui en fust retourné,

tourné, ains par opinion seulement se persuadoit d'y pouuoir arriuer. Il n'y a chose tant soit difficile qu'un homme de grand cœur & pressé de desespoir n'entreprene. Apres auoir passé le Bresil, il poursuiuit sa route vers le Midi, iusques à passer cinquante trois degrez de là l'Equateur : tellement qu'en l'an mil cinq cēs vingt au mois de Seprēbre il trouue vn destroit, nommé depuis le destroit de Magellan, pour memorial perpetuel de son entreprise. Mais le froid picquoit si asprement les pauures Espagnols, que plusieurs en moururēt en grand' paureté. On dit que ce destroit a vingt lieues de longueur. L'ayans passé il reprint sa route vers l'Equateur, & retrouua l'air plus doux & temperé. Pendant ce voyage il se trouua reduit en beaucoup de dangers : car les capitaines & soldats Espagnols le voulurent quitter, & machinerēt sa mort : à l'occasiō de quoy aucuns d'eux furēt executez, & finalement lui mesmes, ayant aidé à vn certain seigneur qui lui auoit demandé secours, la guerre estant acheuee fut tué traistrefemēt par ce seigneur en vne isle nommee Mata : tellement qu'un traistre en chastia vn autre de ses trahisons. Deux nauires seulement de ceste flotte (car les trois autres estoient peries) arriuerent en Tidore, l'une des cinq isles Moluques. Le huitiesme iour de Septembre l'an mil cinq cens vingt deux, l'une de ces nauires print port à Seuille en Espagne. D'autāt que l'autre estoit fendue & faisoit eau, les Espagnols la tirerent à terre pour la calfeutrer, & apres l'auoir auictuaillee reprindrent leur route vers le Septentrion. Or pource que les viures leur faillirent & que plusieurs mouroyent de froid, ils furent contrains de faire voile en arriere. Estans arriuez aux Moluques, ils entendirēt qu'il y auoit des Portugallois seioumans en l'isle de Ternate, auxquels ils enuoyent promptement vn des leurs, les priant de secourir au besoin ceux qui estoient voisins & de mesme religion. Que leur nauire estoit dissipée & rompue, la pluspart de leurs gens morts, les autres griefuement malades. Antoine Brittio, lequel commandoit alors en ces isles de la part du Roy Emmanuel, enuoya tout soudain Garsie Henriquez avec quelques basteaux, sur lesquels il chargea les compagnons de Magellan, & leur fit fort bonne chere. Leur nauire fut mise en pieces, & eux allerent en Inde, & de là reuindrent en Espagne. Telle fut l'issue de ceste nauigation de Magellan.

26. P O V R reuenir aux affaires de l'an mil cinq cens dixneuf, le neufiesme iour de Feurier Aluar Norogne, gouverneur d'Azamor, acompagné de deux cens trēte cheuaux & cent hommes de pied, fit vne course sur les Mores d'Enxouie, les desfit en plaine campagne, emmena deux cens dix prisonniers. De rechef le vingt cinquiesme iour du mesme mois il fit vne traite de vingt quatre lieues, & donna dedans les pauillons de Nacerbendume, l'un des Seigneurs d'Enxouie, print prisonniers deux de ses fils, deux femmes, vne fille, plusieurs siens parens, & grand nombre d'autres. Sur son retour vn homme d'armes Portugallois commit vn acte cruel & barbare. L'un des fils de Nacerbédume auoit fiancée vne belle More, laquelle portoit aux bras & aux iambes des brasselets d'argent, pelans beaucoup & de grand pris. Cest homme, nommé Antoine Leitan, amoureux de l'argent, pour l'auoir plus aisēmēt, coupa les bras & les iambes à ceste pauvre espou-

Diverses courses & victoires d'Aluar Norogne sur les Mores Africains.

se. Norogne lui dit vne infinité d'outrages à cause de ceste cruauté, lui oste les brassellets, l'emprisonne, & le contraint de s'en retourner tout confus en Portugal. Le vingtiesme iour du mois de May suiuant, Norogne mena ses troupes contre d'autres bandes de Mores en ceste mesme prouince d'Enxouie, print en chemin bon nombre de chameaux chargez de diuerfes choses, monta la pente de la montagne sur le commencement de la nuit, & admonnesta sa guide de le mener par quelque chemin pierreux, afin que les ennemis ne peussent reconnoistre son chemin au trac des cheuaux. Puis s'estant reposé deux heures, apres que tous furent refueillez & prests, il fit trois escadrons, dont le premier fut baillé à Antoine Lopez de Siqueire, le second à Jacques Melio, & lui retint le troisieme où il y auoit plus de soldats. Ils marcherent quelque tēps en grād silence, & d'vne impetuosité soudaine assaillirent les ennemis, & les cōtraignirent de gagner au pied : tellemēt toutesfois qu'il en demeura trois cens quatre vingt & deux prisonniers, avec vn merueilleux butin. Les ennemis ayans haussé quelque signal eurent en peu d'heure tant de gens acourus de tous costez qu'ils firent vne armee entiere, & suiuent les Portugallois qui se retiroyent en rang de bataille. Mais vn braue capitaine des Mores confederez nommé Zali Bembarque, delibere de faire quelque beau coup en presence de Norogne & des autres, alla tout seul se fourrer la lance baissée à trauers les ennemis. Norogne voulant secourir ce capitaine, le suit de pres & donne aussi dedans, de sorte qu'à ceste premiere charge trente des ennemis demurerent sur la place & vn des principaux de leur armee fut prins: dōt les autres esto- nez s'arrestèrent tout court, & ainsi Norogne despestré de cest empeschement, marchoit en ordre vets Azamor avec ses forces. Il falloit passer à gué vne certaine riuere, mais de peur que le bestail butiné ne troublast les rāgs & empeschast le passage, Norogne en donna bonne partie à vn More confederé. Apres auoir passé le gué avec tout le reste du pillage, il demeura coy l'espace de deux heures avec ses gens, & prindrent leur refection en presence des ennemis arrestez de là le gué, attendant qu'ils passassent vers lui pour leur donner le combat. Mais pource qu'ils n'en voulurent pas māger, il ramena ses troupes en Azamor. Quelques iours au parauant, sauoir est le vingtcinquierme de Mars, ayant resolu d'attrapper quelques autres bādes de Mores, il rencontra certains coureurs à la desbandee, & en print prisonniers cinquante: les autres se sauans à la course donnerent l'alarme par toutes les tentes & communes, s'amañs de toutes parts, ce que Norogne voyant se retira dans Azamor avec ses prisonniers, ne voulant venir aux mains contre tant de gēs. Le vingthuitiesme du mesme mois il sortit pour surprendre quelques autres compagnies d'ennemis. Mais ayant rencontré sans y penser leurs auantcoureurs en grand nombre, il fit marcher Lanfarot Freite avec soixante cheuaux pour soustenir la premiere charge, & lui suiuit pour faire espaule avec le reste. Le combat fut sanglant, plusieurs des ennemis demurerent sur la place, soixante prins, & les autres se sauient de viffesse. Entre les prisonniers estoit vn capitaine bien estimé, qu'ils appelloient Arhage, aagé de cent ans, qui alloit encores vaillamment à la guerre,

re, & conduisoit fagement les soldats. Deux iours apres, Norogne ne pouuant demeurer oisif, assaillit à l'impourueue vne villette des Mores nommee Siner, l'emporta d'assaut, emmena trois cens cinquante huit prisonniers en Azamor, & donna le reste du butin aux Mores confederez.

27. CE n'estoit pas Norogne seulement qui molestoit ainsi par ses courtes les ennemis: ains aussi les capitaines trauailloyent d'autre costé par son commandement. Entre autres il donnoit diuerses commissions à Vasque Fernandez Cesar, colonnel des cheuaux legers, sur la vaillance duquel il se reposito, afin de faire aux Mores du pis qu'il seroit possible. Alors donc, Cesar entendât d'un sien prisonnier qu'il y auoit vne compagnie de coureurs en un lieu nommê Fornigno, pour faire le gaste, il y alla promptement, les mit en route, en tua quelques vns, & print leur capitaine. Norogne ayant sceu d'autre part qu'au territoire de Til y auoit grand nombre d'ennemis enuoyez pour fourrager & surprêdre les Portugallois qui voltigeoyent par la campagne, y enuoya le capitaine Cesar, lequel fit toute diligêce: mais les gens de cheual s'estoyent ià retirez, & ne restoyent que les pietons avec lesquels il eut fort à faire, car ils ne voyoyent moyen d'eschapper ni de rataindre les cheuaux, ains faloit combatre vaillamment. Toutesfois apres auoir perdu vne partie de leurs compagnons, les suruiuans se sauuent en vne mosquee bastie pres de là, où ils se ramasserent & firent teste plus resoluement que iamais. Finalement Cesar gagna les degrez, estant suivi de François Vascia, & du secretaire Roderic, puis de tous les autres qui prindrent courage voyans leur capitaine marcher le premier. Estans donc paruenus au plus haut de la mosquee ils assaillent de pres leurs ennemis. Cesar en empoigne un des plus eschauffez & le iette du haut en bas. La meslee fut si furieuse que pas un des Mores n'eschappa: aussi ne se cōtentoyent-ils pas de resister à coups d'espees & poignards, ains aussi embrassoyent les Portugallois, & s'efforçoyent les precipiter en terre. Encores que ceste rencontre ne fust pas grande à cause du petit nombre de soldats, si est-ce que les victorieux en furent grandement estimez: car les ennemis estoyent vaillans, bien deliberez & combatans obstinément d'un lieu auantageux, tellement que quoy qu'ils visissent la mort presente, si est-ce que pas un d'eux ne se voulut redre, & aimerêt mieux demeurer sur la place qu'estre emmenez esclaués. Peu de tēps apres le Roy appella Cesar pour venir garder avec quelques vaisseaux le destroit de Gibraltar.

28. IL y a vne ville au territoire d'Enxouie, en lieu haut, biē fortifiée de murailles, rempars & bouleuards, à quatorze lieux d'Azamor. Au pied de la vallee coule un fleuue, au riuage duquel commence la pente sur laquelle ceste ville est assise. Norogne desiroit fort la pouuoit surprendre. De fait le dixiesme iour d'Auril en la mesme annee mil cinq cens dixneuf il l'assaut, chasse à coups de mousquets ceux qui se monstroyent sur le rempar, fait planter les eschelles, & durant quelques heures tasche par tous moyens d'y entrer: mais les citadins le repousserent viuement. Ainsi Norogne voyant que c'estoit peine perdue de les vouloir attrapper par ce moyen s'en auisa d'un autre, qui fut de choisir les plus vaillans de ses troupes, lesquels tasche-

Exploits de Vasque Fernandez Cesar.

Autres courtes & belles victoires de Norogne.

royent d'enfoncer les portes à coups de coignées, combien qu'ils fussent en danger extreme à cause des murailles. On ne les sceut onques empêcher que maugré les cailloux & traits qu'on leur laschoit ils n'enfonçassent les portes, ayans arraché les gonds auxquels elles estoient pendues, car pour expédier tant plus viste, Norogne leur auoit commandé de couper les gonds au plustost qu'il seroit possible. Incontinent que l'ouverture fut faite, les Portugallois tascherent d'y entrer. Les ennemis amassez ensemble résisterent courageusement & longuement : mais les assaillans emporterent finalement la place avec grand meurtre des ennemis : les autres se glissant à bas & gagnans la riuere, non pas tous, car aucuns se rompirent le col en descendant plus viste qu'ils ne vouloyent. Il y eut grand nombre de morts, & deux cens cinquante six prisonniers : les assaillans ne perdirent personne, & n'eurent que dix blesez. Cela si bien executé Norogne remena ses troupes en Azamor, sans laisser garnison en ceste ville prise, son intention estant d'effroyer les ennemis, & leur faire conoistre qu'ils n'auoyent place, tant forte fust elle, qui fust assuree pour eux. Le huitiesme iour d'Octobre il sortit aux champs pour desfaire la compagnie d'Allimaimon vaillant capitaine More : mais ayant rencontré & prins quelques coureurs, & voyant qu'il ne pourroit surprendre l'ennemi, il se retira. Six iours apres il enuoya descourir & reconoistre où estoient cāpez certains capitaines qui auoyent prins vne troupe de chameaux allés de Safin en Azamor, & emmené pour estre esclauue vn des principaux entre les Mores confederez. Les auantcoureurs prenent trois Mores & les amènent à Norogne, lequel entend d'eux que les ennemis estoient campez à vingt deux lieues de là. Incontinent Norogne partit pour les aller trouuer & marcha toute la nuit : puis le lendemain tout le iour il se tint à couuert, de peur que les ennemis sentissent sa venue, & comme la nuit approchoit, prit le chemin de Tamaroch, ayant sceu que ceux qu'il cerchoit estoient campez assez pres de ce lieu. A l'approcher il partit sa compagnie en trois, & dit aux capitaines ce qu'il vouloit que chascun d'eux fust. Puis d'une vitesse incroyable il chargea si rudement les ennemis prins en desarray, qu'il en mit vne partie au fil de l'espee, les autres en fuite, pillà leur camp, emmenant avec deux cens cinquante prisonniers vn grand butin de bestail à laine & à corne, des chevaux & chameaux. Et craignant que ses soldats trop afriandez au pillage ne s'escartassent, tellement que les ennemis ramassez des lieux voisins pourroyent leur courir sus à l'auantage, il fit sonner la retraite, & estoit la minuit quand ses troupes quitterent le camp des ennemis pour se ranger ensemble. Ce pendant les Mores s'assemblent de tous costez, chascun empoignant le premier baston qu'il rencontroit, & acourent apres Norogne & les siés qu'ils endommagent grandement à coups de pierres, de dards & de leuiers, ceste premiere charge continuant en plaine nuit l'espace de deux heures. Si tost que le iour se monstra, on descourrit le grand nombre des ennemis : & lors Norogne rangea de rechef ses soldats, & leur fit vne harangue pour les encourager à bien combattre, & quitant son cheual recu du travail precedent, monta sur vn autre. Le combat recommença, mais à coups d'espees & de

picques

pieques. Norogne se retiroit en ordre au petit pas, & par fois desbandoit à trauers l'ennemi pour les empescher de suiure si pres. Or comme il couroit à lance baissée contre vn More importun entre les autres, lequel il transperça & abatit de ce coup, en retirant son bois il receut tel coup en la teste, qu'il tombe esuanoui par terre. Le capitaine Cæsar, lors de retour de la flotte à cause de l'incommodité de la saison, acourt à l'aide avec vn autre vaillant homme nommé Martin Gilles & quelques soldats, qui soustindrent les assaillans, iusques à ce que Norogne, secouru de ses gens, eust reprins ses esprits, & fust remonté sur vn cheual que son escuyer lui bailla. Lors il marcha en l'auantgarde avec la bannière royale, laissant Iean Freite & le procureur du Roy sur la queue, où il ne pouuoit estre à cause de sa foiblesse pour faire teste aux ennemis qui escarmouchoient asprement. Les Portugallois de l'arrieregarde firent merueilles ce matin: car outre ce qu'ils portoyent tout le faix du combat ils faisoient aussi tomber beaucoup des ennemis. Apres soleil leué, le combat fut plus aspre qu'au parauant, neâtmoins en despit des poursuiuans les Portugallois emmenerent leur butin dans Azamor, marchans iusques là en rang de bataille. Deux cens Mores ennemis furent tuez en ces escarmouches, & nul des Portugallois: vray est que plusieurs furent blesez, froissez, & aucuns mutilez de leurs membres. Ce fut vn accident memorable, & dont les Mores se trouuetent merueilleusement estonnez: car Aluar Norogne estoit sorti seulement avec deux cens cinquante cheuaux & trente cinq hommes de pied. Les Mores d'Enxouie auoyent mis en campagne cinq cens cheuaux & force pietons. Or d'autant que les ennemis auoyent commencé le combat à coups de pierre, long tēps depuis il fut parlé de l'escarmouche de pierres, & ainsi fut appelée des soldats. Depuis ceste rencontre plusieurs des ennemis demanderēt la paix, & s'assuietirent à la domination du Roy de Portugal.

29. E N V I R O N le mesme temps, Iean Coutin delibera de forcer vn grand village où demeuroient quelques gens de cheual fort braues à la guerre, & pour cest effect demanda secours à Edouard de Menesez, qui lui enuoya cent cheuaux sous la charge d'André Henriquez. Coutin sorti des le soir, ne pūt arriuer au village qu'environ le point du iour, par la malice de celui qui le guidoit. D'autrepart le bruit estant couru par le rapport des coureurs ennemis, qu'il y auoit quelques gens en campagne (comme il fut impossible qu'une si grosse troupe marchast à couuert) & se doutans qu'on leur en vouloit, quitterent le village à Coutin, & se retirerent presques tous en autres endroits. Ceux qui restoyent se defendirent courageusement, toutesfois il y en eut seize tuez & quarante quatre prins prisonniers. Les Portugallois y perdirent trois des leurs, puis diligenterent de retourner avec leur proye par vn autre chemin plus propre. Pierre Lopez d'Azeuede suiui de sept cheuaux marchoit par l'autre voye que Coutin auoit laissée: & descouuert par les ennemis qui acoururent incontinent de toutes parts fut chargé tellement qu'Aluar de Taire fut tué, puis Azeuede mesmes qui couroit pour le secourir, avec vn sien seruiteur qui combattoit pour sauuer son maistre. Gaspar de Cugne fut transpercé de trois iauelots. Com-

*Comptes de
Iean Coutin
sur les Mores.*

me le capitaine des cheuaux legers galoppoit pour venir desgager Azevede, son cheual lui fut tué entre les iambes: il fut donc sur le point de perdre la vie, & son fils receut deux coups de dard qui le blessèrent griefue-
ment. Les ennemis taschoyent de gaigner vn destroit pour couper chemin aux Portugallois. Coutin doubla le pas au chemin qu'il tenoit pour s'emparer le premier de ce passage, & y vint à tēps pour recueillir ceux qui estoient poursuiuis des Mores, ausquels il mit en teste certains archers qui briderent aucunement leur violence, & le destroit fut gaigné avec grand trauail & danger. Ce saut perilleux franchi, les espions rapportent à Coutin qu'une armee d'ennemis approchoit pour l'enclorre. Alors il laissa vne partie du butin & se retira vilement avecques ses troupes. Les ennemis perdirent beaucoup de gens: car les Portugallois en soustenant la charge en abbattoyent tousiours quelques vns: mais ce ne fut pas sans grand danger, car peu s'en salut que Coutin & tous les siens n'y demeurassent. Peu de iours apres Manuel Mascaregne demanda soixante cheuaux à Coutin pour executer vne entrepr̃se qu'il auoit dressée, & tira droit vers la riuier̃e de Benamur, laquelle trauesée lui & les siens gagnetent la montagne, & sur le soir retourna avec force pillage & cinq prisonniers seulement. Mais à l'approcher d'un village assis sur vne longue pointe de la mōtagne & nommé Benamareu, les ennemis s'amassèrent de tous les lieux d'alentour. Mascaregne recula quelque peu, puis s'arresta tout court afin d'attēdre & recueillir ceux qui estoient demeurez derriere. Ce pendāt suruindrēt cēt archers couuerts de targes à la Moresque avec quelques cheuaux qui de pied coy cōmencerēt à descocher force fiesches cōtre les Portugallois. Lors Pierre de Menefez, qui mōstroit le chemin, exhorta Mascaregne de faire marcher vers la riuier̃e le bestail à laine & à corne avec quelques soldats, veu que les ennemis taschoyēt par le moyen de certaines chaussees de clorre le passage. Mascaregne suiuãt cela enuoye dix hommes de cheual avec le butin, & leur donne charge d'empesch̃er que lon ne fist ces leuees de terre: ce qu'apperceue des ennemis ils firent plus d'effort qu' auparauant. A raison dequoy Menefez dit qu'on ne pouuoit euit̃er le cōbat: car il faut (dit-il) iouer ici des cousteaux ou sur le bord de la riuier̃e, & pourtant ie suis d'avis que ce soit plustost en ceste campagne rasē qu'au passage de l'eau. l'en suis d'avis, respond Mascaregne: sus compagnons, courage! frappez hardiment. Disant ces paroles il donne des esperons à son cheual qui l'emporte de telle vistes̃e qu'auant que les siens peussent l'attaindre il auoit ia donné coup de lance, & porté vn des ennemis par terre. Les Mores lui rendirent son change: mais il estoit si bien armé qu'autre mal ne s'en ensuiuit, fors la perte du cheual qui fut tué. Pierre de Menefez, Antoine Coutin & Louys vaillāt picquerent les premiers pour aller au secours de Mascaregne qui estoit fort engagé: & furent tāt bien suiuis, & la charge des Portugallois si furieuse, que les ennemis tournerent le dos, laissant septante six morts & quarante deux prisonniers. Tous les Portugallois s'en retournerēt, mais blesez pour la pluspart. Quelque tēps apres ceste course, le Roy de Fez avec trois mille cheuaux courut au territoire d'Arzile, & n'auint rien de memorable en l'escarmouche qui
fut

*Course de
Manuel
Mascaregne.*

fut dressée, sinon la mort d'un capitaine More nommé Arroaz, contre lequel Manuel Mascaregne auoit desiré s'esprouuer. Icelui estant à costé du general Habraheim, fut renuersé mort d'un coup de boulet tiré par un cordonnier lequel combattoit avec la harquebouze à cheual, & qui receut aussi une harquebuzade des ennemis, dont il mourut, non comme vil artisan, ains en qualité de braue soldat, ayant tué un si grand capitaine qui auoit occis beaucoup de Chrestiens.

30. EN ces entrefaites Nonio Mascaregne, gouuerneur de Safin, s'asseyant que la paix faite avec les Mores de Garabie tiendroit, ne pensoit aucunement à leur courir sus. Mais ayant entendu qu'ils s'estoyent reuoltez, cela lui fit changer d'avis. Or deux de ces Mores vindrent à lui, & promirent de tuer un capitaine du Roy de Fez, lequel auoit sollicité ceste reuolte. Il ne falut pas grand present pour confermer ces Mores en leur deliberation, car ce sont gens à vendre, enclins à faire un meschant coup, tellemēt que pour peu de chose ils seruiron de tueurs à loage. Ainsi donc de leur bon gré & allechez par ce qui leur fut donné ils despescherent ce capitaine. Ceux de Garabie ne faisoient que changer d'habitation, craignans quelque venue : mais le meurtre du capitaine, qui leur seruoit de chef & de bras, les contraignit de demander la paix à Mascaregne, en telle sorte neantmoins qu'ils demandoient argent pour s'estre ainsi rangez sans combat. La response de Mascaregne fut que la liberté qu'ils auoyent de cultiuer leurs terres estoit suffisante recompense de leur deuoir. Eux non contens de ceste response, se liguerent avec un seigneur More nommé Oleidambram, & s'estans campez aupres d'un lieu appellé les Salines, commencerent à guerroyer asprement les confederes de Dabide, lesquels auertissent Mascaregne du iour assigné par ceux de Garabie pour les venir visiter avec toutes leurs forces. Mascaregne y enuoya le colonel de la caualerie legere avec septante cheuaux, suivis de Zaide & d'un bataillon de Mores. Les ennemis entendās que les Portugallois approchoient, & presumans que Mascaregne estoit de la partie, se retirerent craignans venir aux mains contre lui. Ceux de Dabide les chargent, eux au contraire tournent visage, tuent quatre des poursuuans, & contraignent les autres de tourner le dos : mais quelques Portugallois acourans au secours, les ennemis eurent la chassé cōme deuant, & pour lors le combat print fin sans grand perte de part ni d'autre. Apres cela Mascaregne sceut par le rapport de ses espions que toutes les forces de Garabie estoient cāpees aux Salines, ayans non guerres loin de là le cāp d'Oleidambram. Incontinent il monte à cheual avec deux cens cinquante autres, & six vingts pietons harquebuziers & halebardiers, menant aussi sept gēsdarmes de Dabide, pour estre tesmoins de la iustice qu'il pretendoit faire de ceux de Garabie. Le quatriesme iour de Nouembre de cest annee mil cinq cens dixneuf, il partit de Safin apres Midi, & apres auoir marché douze lieues s'arresta, n'estant qu'à six lieues du camp des ennemis. Puis remontré à cheual enuiron la minuit, au point du iour partit sa troupe en deux, baillant l'une au colonel des cheuaux legers, retenant l'autre pour foy, & donne de deux costez si furieusement à trauers les pauillōs, que tout trem-

Guerre de Nonio Mascaregne gouuerneur de Safin contre les habitans de Garabie reuoltez, les diuers accidens & fins d'elle.

bloit & regorgeoit de sang: car plus de trois cens hommes y furent taillez en pieces, & cent septante fix arrestez prisonniers. Ceste bastonnade cōtraignit plusieurs de demander la paix, & payer le tribut comme ils souloyent auparauant. Toutesfois à cause que tous ne vouloyēt pas ioinde, ni s'assuïettir au Roy de Portugal, ains cultiuoyent leurs terres à vingtdeux lieux loin de Safin, sous la protection du Xerif, Mascaregne resolut d'en auoir le bout. Iceux habitoyent en vn endroit nommé Mizquelle. Or craignāt que les confederez, cāpez aupres de Safin, ne se reuollassent & suiussent le parti des ennemis, il attendit vn iour de foire, auquel plusieurs confederez venoyēt en la ville. Ce iour venu, il retint pour ostages en sa maison, sous beau semblant & comme ne pensant à cela, les principaux d'entre les Mores, & leur fit bonne chere: faïlant fermer les portes, afin que lon ne se doutast de rien. Sur le soir il sortit avec deux cens cheuaux & soixāte pietons, & ayant cheminé quatre lieux, enuoya quatre auantcoureurs à la descouuerte, leur assignant le rendez-vous où ils le deuoient retrouver. Puis s'estans tous reposez quelques heures, il fit rescueiller chascun, marchant par montagnes & lieux escartez, de peur qu'aucun ne peust deuiner où il alloit, & gagna vne forest espaisse pres d'une riuïere nommee Iolge, dans laquelle il se tint coy quelque temps avec ses troupes. Apres soleil couché, il reprit son chemin, tant qu'il se vid pres d'une mosquee, qui estoit le rendez-vous des quatre auantcoureurs. Personne n'osa s'endormir lors, à cause du grand nombre de Lyons qui repairēt en ces quartiers là. Enuiron vne heure apres minuiet, les auantcoureurs arriuerent, rapportans que le camp des ennemis estoit à dix lieux de là. Mascaregne laissa dedans ceste mosquee vingt pietons qui ne pouuoient plus marcher, & dix hommes de cheual, desquels il ne s'alleuroit pas trop, & fit charger en croupe des cheuaux les autres gens de pied. Le iour commençoit à poindre, lors qu'ils approcherent du camp. Blaise de Sylues, conducteur de l'auantgarde, descendit en la vallee, suivant l'auis de Mascaregne, avecques cent cheuaux. Il auint là dessus que ces hommes de cheual marchans à la file doubloyent tellement le pas, qu'un de leurs compagnōs des derniers estant tombé par terre quinze autres s'arrestèrent pour l'attendre & lui aider: & voulans puis apres rattaindre Sylues qui estoit desia bien loin, ils prindrent le chemin de la mōtagne. Quant à Mascaregne il les suiuit à la trace, estimant que Sylues auroit prins ceste route, pour auoir (peut estre) entendu que les ennemis se seroyent remuez. Ceux qui estoient montez les premiers en la montagne entendirent incontinent vn merueilleux tintamarre en la vallee, & cependant ne pouuoient se resouldre de ce qu'il faloit faire. L'un d'entre eux enuoyé vers Mascaregne, lui declaire l'erreur commis, & demande quel parti lon deuoit prendre: ce qui fit diligenter Mascaregne, & lors il conut certainement que Sylues combattoit les ennemis en la vallee. Il y auoit trois grosses bandes campees en la montagne, & deux autres en la vallee. Mascaregne estant arriué là craignit qu'en voulant desgager Sylues, les ennemis ne l'enueloppassent lui-mesmes, print autre auis, a sauoir de courir sus aux plus prochains, & apres les auoir rompus, secourir Sylues plus fermement.

rement. Ainsi donc il charge viuement les premiers rencontrez; en taille plusieurs en pieces, prend septante prisonniers, fait couper les iarrets au bestail qui fermoit le chemin, afin que rien ne l'empeschast d'aller à l'aide de ceux qui combatoyent plus auant. Les ennemis-ayans esté ainsi desfaits, Mascaregne double le pas pour gagner la vallee: mais il ne sauoit de quel costé tirer, & les ennemis ramassez & prenans courage escarmouchoyent son arrieregarde & l'empeschoyent de conoistre le pays. Mais les huez de ceux qui combatoyent Sylues, estans paruenues aux oreilles de leurs compagnons poursuuians les dernieres troupes de Mascaregne, iceux commencerent à courir au secours: alors Mascaregne presumant ce qui estoit les suiuit à la trace. Sylues auoit fait desia beaucoup, tué nombre d'ennemis, & gagné force butin. Toutesfois les Mores reprindrent courage, & avec quelques gens de cheual acourus à l'aide, chargerent Sylues. Mascaregne auoit commandé à vingt hommes d'armes, & à cinq autres harquebuziers & archers à cheual de doubler le pas avec le renfort des confederez: ce qu'ils firent, & trouuerent Sylues & ses gens au nombre de soixante cheuaux seulement (car les autres marchoyent deuant avec le butin) enfermez de toutes parts. Alors Sylues estoit ia griefuement blessé en trois endroits, & Garfias Decio de mesme, ensemble son cheual. Quelques gentilshommes, de qu'il on auoit tué les cheuaux, combatoyent à pied en grand danger de leurs vies. Iean fils de Fernand Magellan eut la iambe percee d'un coup de picque. François Nonio estoit blessé à mort: le capitaine des cheuaux legers combattoit encores qu'il eust receu quelques coups. Vn des escuyers de Mascaregne s'adresse à vn vaillant capitaine More qui accepta volōtiers le cōbat, & s'attacherent de si pres, que finalement il vindrent aux prinfes & tours de bras, la lāce & l'espee ne seruās plus de riē: & apres s'estre bien secoux & brāllez sur leurs cheuaux ils tōberent tous deux à terre l'un sur l'autre, sans se vouloir ni pouuoir desuelopper pour vn tēps. Les autres Portugallois estoient ensanglantez de diuerses playes. Brief leurs affaires estoient tresmal en point quand le secours arriua, qui leur remit le cœur au ventre, & fit que les ennemis leur donnerent quelque telasche: tellement qu'ils cōmencerent à s'escrimer vn peu plus au large. Mascaregne les voyāt en tel danger, commence à galopper: mais estāt descouuert par les Mores leurs bras commencerent à s'engourdir. Lors Mascaregne apperceuant le passage libre, remena ses troupes en rang de bataille: & quoy que les ennemis escarmouchassent viuement sur la queue, toutesfois à cause que les Portugallois gardoyent bien leur rang, & demeurerent maistres à toutes les charges qu'ils faisoient en tournant visage, les Mores ne gaignoyent pas beaucoup à crier & tempester en ceste poursuite. Il y auoit vn lieu boca-geux, fort estroit à l'entree, & aguetté de diuers sentiers tortus & pierreux, duquel les ennemis tascherent de se saisir viftement. Quand Mascaregne approcha des destroits, il disposa sur les aisles de ses troupes les archers & harquebuziers, tellement qu'āptes auoir abatu quelques ennemis, les autres se retirerent. Cela fait, Mascaregne donna ordre de faire penser les blesez, & de peur que le trauail du chemin ne les acablast du tout, il marcha au po-

tit pas iufques aupres du fleuve nommé Diuce. Le lendemain fur le soir il entra dedans Safin avec grospillage & les prifonniers. En toutes ces efcarmouches les ennemis perdirent cent cinquante des leurs, & n'en fut tué plus grand nombre, pource que la longueur du chemin empefchoit de courir apres. Francisque Nonio mourut au retour des playes qui lui auoyent esté faites. En toute ceste expedition Mascaregne employa six iours feulement, dont les ennemis furent merueilleufement effroyez, difans que les fortrefses, ni la distance des chemins ne pourroyent les garentir des maux qui les menaçoient iour & nuit: dautant que rien ne pouuoit empefcher ce capitaine Portugallois, hardi, fage, expérimenté & heureux, de tourmenter inceffamment ceux qui ne lui eftoyent amis. Ainfi donc ils demanderēt la paix, se rendans vaffaux d'Emmanuel, baillerent oftages & payerent le tribut fans aucun delay.

Eftat des Indes & les grâdes auantures de Siqueire.

1 5 2 0. T E L estoit l'estat del'Afrique en l'an mil cinq cens dixneuf. En l'annee 31. fuiuante, Iacques Lopez de Siqueire, Viceroy des Indes au lieu de Soarez, equippa vne puiffante flotte, pour entrer en la mer d'Arabie. Il y auoit vingt fix vaiſſeaux de guerre, deux mille Portugallois & mille Indiens, qui hrent voile du port de Goa au mois de Feurier, & fut laiffé Alexis de Menefez en Goa pour gouverner l'Inde baſſe. Antoine Saldagne s'estoit embarqué deuant, pour aller avecques cinq nauires en Zacotora, deſcouurir ce qui ſe faiſoit en ceste mer Arabefque. Siqueire le rencontra pres du cap de Guardafu, où le vint trouuer Pierre Vaſque de Vere que Soarez auoit enuoyé de là vers le Roy, lequel lui commanda de retourner au meſme lieu, eſperant que Siqueire s'y trouueroit, ce qui auint auſſi. Vere portoit lettres du Roy à Siqueire, par leſquelles il l'exhortoit de guerroyer les Arabes. La flotte ayant fait aiguade au port de Mete en la coſte d'Ethiopie, Siqueire print la route de la mer ſuſmentionnee: mais ſa capitaineſſe ſe brifa, tellement qu'exceptez les hommes tout ce qui estoit dedans perit en mer. Siqueire monta dans la nauire de Pierre de Far: & comme il vouloit entrer dedans le gouſſe, vne tourmente l'agita de telle ſorte qu'il lui fut impoſſible de prendre port à Iude où il aſpiroit, ains par l'auis de tous les capitaines alla mouiller l'anchre en vne iſle nommee Mazua. Ceste iſle touche aux riuages plus auancez en l'Ethiopie, & appartenoit au Roy Dauid qui auoit enuoyé Matthieu ſon ambassadeur vers Emmanuel. Les inſulaires nō accouſtumez à voir telle flotte, ſe donnerent ſi grand peur qu'ils ſe retirerent en terre ferme dans vne ville appelee Archique. Siqueire estoit deſcendu en ceste iſle pour ſauoir ſi Matthieu estoit vray ambassadeur du Roy d'Ethiopie, ou ſi c'estoit vn impoſteur & charlatan, comme diſoyent les ennemis d'Albuquerque. Le gouuerneur d'Archique entendant que la flotte de Portugal estoit ſi pres, enuoya des lettres d'amitié à Siqueire, declairant par icelles qu'il rendoit grâces à Dieu lequel accompliſſoit par eſſect les anciennes propheties: car il diſoit que certains perſonnages de grande ſaincteté auoyent predict pluſieurs annees au parauant qu'en ces derniers temps arriueroyent en Ethiopie des vaiſſeaux chargez de Chreſtiens venus de pays fort lointains. Siqueire recueillit gracieuſement les meſſagers, leur donna
quel-

quelques robes de soye, & enuoya au gouuerneur vn estendart de soye subtilement mise en œuvre, & garni d'une croix rouge au milieu. Le gouuerneur entendant qu'on apportoit cest estendart, acourut au riuage, suivi de plus de deux mille personnes, qui voyas la croix se ieterent par terre, crias le nom de Christ fort haut par plusieurs fois, tellement que les Portugallois là presens ne se peurent contenir de pleurer. Finalement le gouuerneur approcha du bord, où Siqueire se fit mener aussi, avec l'ambassadeur Matthieu lequel fut receu des Ethiopiens en grand honneur & signe de grande resiouissance. Apres quelques propos tenus de part & d'autre, Matthieu & Siqueire s'en retournerent en leurs nauires. De là, le president des Indes, homme vertueux & equitable, nommé Pierre Gomeze de Teixeira, alla quelques lieues auant en terre ferme, & paruint en vn grand monastere, où il fut humainement recueilli des moines, de la religion & abstinence desquels il conitoit merueilles. Toutesfois il leur demanda pourquoy ils ne reconoissoient l'Eglise Romaine laquelle auoit primauté par dessus toutes les autres Eglises. Eux respondent qu'ils portoyent grand honneur au Pape, mais que les Turcs & Sarasins les empeschoyent de pouuoir aller libremēt iusques à Rome. Tandis que Siqueire seiourna en l'isle Mazua, il fit vne cheuauchee par tous les quartiers d'icelle, ordonnât les endroits où lon deuoit creuser des cisternes pour conseruer de l'eau douce, & marquant aussi la place commode pour le bastiment d'un fort. Mais il n'y auoit point de lieu propre, & le naufrage suruenu auoit englouti les munitions portees en sa capitainesse pour fournir ceste forteresse. La rade de l'isle est bonne, & le port asseuré, mais la terre ne rapporte presques rien, & y a grande disette d'eau : n'ayant ceste isle tout au plus que huit mille pas de circuit. Au reste le gouuerneur d'Archique escriuit incontinent au Barnagas (ainsi appellēt ils le Prince qui commande en vne grande estendue de pays, & à charge de le garder contre les ennemis, au nom du Roy) l'auertissant de l'arriuee des Portugallois : lui vint les trouuer sans delay, suivi d'un grand nombre de gens de pied & de cheual. Siqueire print terre, rangea ses gens en bataille, puis s'esloignant quelque peu du riuage, attendit le Barnagas, lequel de sa part posa deux cens cheuaux & deux mille pietons en rang à vn trait d'arc loin de soy. Alors ces deux chefs s'entracollerent fort amiablement, & apres auoir deuisé long temps de propos gracieux, plains d'offres & de serui-ce, & promis respectiuement de la part de leurs Rois tous moyens pour se maintenir l'un l'autre, vne partie du iour s'escoula. Puis ils confermerent solennellement la paix, quoy fait le Barnagas se retira en la ville, & Siqueire en ses nauires. Depuis ils s'entrenuoyerent des presens : & finalement Siqueire pria le Barnagas de faire conduire vers le Roy d'Ethiopie l'ambassadeur que celui de Portugal lui enuoyoit. Le gouuerneur d'Archique eut ceste commission. Celui qui alla en la place d'Edouard Galuan s'appelloit Roderic Limice, lequel menoit quand & soy vn prestre nommé Francisque Aluarez, qui a escrit vn grand liure de ceste negotiatio & de toure l'Ethiopie, imprimé en diuerses langues des long temps. Matthieu, ia renomé par tous les pays & royaumes du grand Negus, à cause de sa fidelité, acopagna

Roderic & Alvarez : mais ayant fait environ trente cinq lieues de chemin il mourut en vn monastere nommé Bifam. Apres cela Siqueire alla fourrager & ruiner l'isle Dalaze habitee des Sarasins : puis cingla vers Ormus, & trouua George Albuquerque au port de Calajate, lequel ayât charge de se rendre au cap de Guardafu, & n'y trouuât pas Siqueire, auoit dressé sa route en Ormus. On ne sait pourquoy Siqueire différa d'assaillir la ville de Iude. Mais soit que les vents lui fussent contraires, ou qu'il estimast ceste place ne pouuoir seruir aux Rois de Portugal, c'est chole asseuree que ceste flotte qui auoit tât cousté à equipper ne fit rié sinon s'enquerir si la cômmission de Matthieu estoit authentique, & mettre en terre l'ambassadeur de Portugal pour estre conduit par des Chrestiens iusques au Roy d'Ethiopie. Sur la fin du mois d'Aoult Siqueire fit voile en Inde, print en ceste nauigation deux nefes Arabesques, approcha du port de Diu : mais entendant que la ville estoit pleine de soldats bien equippez, fournie de canons, & voyant ses vaisseaux mal en point, ses troupes diminuees, vne partie de ses gens morts de maladies, ne fut nullement d'avis d'assaillir lors vne si forte place, encores qu'il eust charge de ce faire. Melichiaz estoit absent, & commandoit en son lieu vn sien fils nommé Melichsac, à qui Siqueire enuoya lettres & presens, dôt il fut remercié, & reciproquement honoré d'autres presens. Finalement il arriua en Cochim, où estoit desia George Britio parti de Lisbone ceste mesme annee avec neuf nauires. La flotte de Siqueire perdit deux vaisseaux en sa nauigation, le premier fut la capitainesse, & le second la galere de Ierome de Soufe, laquelle coulant en fond fit perir tout ce qui estoit dedäs, exceptez onze personnes, du nombre desquelles Soufe estoit. Ayäs fait vingt lieues à pied en la coste d'Arabie, en fin ils gagnerent vne bourgade appartenant au Roy d'Ormuz, & furent humainement recueillis, habillez, garnis de quelque somme d'argent par le gouuerneur, & menez à Calajate.

*Belle histoire
de la prouesse
de deux freres
en vn combat
sur mer
pres de Septe
en Barbarie.*

EN la mesme annee se fit pres de Septe en Barbarie vn braue exploit 34.
de guerre, petit en soy si lon considère le nombre des personnes qui s'en meslerent, mais assez grand & fort notable, quand on prendra garde à la valeur de ceux qui l'executerēt. Deux freres, coursfaires, demeuräs à Tetuam, escu-moyēt des quatre ans auparauāt avec deux fregattes le destroit de Gibraltar, & la coste regardāt au Midi. Gomefe de Vasconcel estoit gouuerneur de Septe. Auint qu'vn des coursfaires voulut se cacher en quelques illes vis à vis de Septe, afin d'assaillir & se ruer à l'improuuee sur les premiers passagers qui ne seroyent bien sur leurs gardes. L'autre rodoit cependant çà & là, pour faire signe à son frere quād il en seroit tēps. Vasconcel ayāt decouvert ces coursfaires par quelques espions fit armer soudainement deux brigatins, pour la charge de ses deux fils, l'vn nommé André, l'autre Michel. Septe est assise sur vne langue de terre qui s'auance en mer & fait du costé d'Occident vne plage assez spacieuse, tellemēt qu'elle separe les deux ports de la ville assez loin l'vn de l'autre, car l'vn regarde l'Oriēt l'autre, l'Occidēt. Par le commandement du gouuerneur les brigantins furent armez au port d'Occidēt, & ces deux ieunes capitaines auertis de doubler ceste pointe de terre, puis aller ensemble droit aux coursfaires qui ne les attendoyēt pas. Or il en-

il enioignit à Michel qui estoit le plus ieune de voguer le premier contre les ennemis. Tous deux escoutoyent de si grand desir ce que disoit leur pere, que partrop d'ardeur ils oublièrent à executer son cōseil : car le ieune se hâsta tellement que son frere aîné demeura bien loin derriere, & ne hastoit pas fort ceux qui manioyent les rames. Or donc Michel assaillit courageusement la fregate des coursaïres, qui estans beaucoup plus en nôbre, en vn grand vaisseau contre vn petit, & tous gens de guerre, ayans vn chef expérimenté, hardi & adroit, se mocquoyent de l'effort du brigantin, & mesmes sautèrent dedans, où il y eut vne terrible escrime. En fin, les soldats de Michel perdans courage se vont cacher en la sentine. Le gouuerneur qui voltigeoit au long de la mer avec quelques cheuaux pour voir ce passetemps, apperceuant les ennemis dedans le brigantin crie apres André, & lui fait signe qu'il aille vistement secourir son frere. Mais auant que venir là, Michel à force d'armes fit desloger les ennemis de son brigantin, coupa les attaches qui le tenoyent lié à leur fregate, puis ayant appelé & tancé ceux qui s'estoyent cachez en la sentine leur haussa le courage, & assaillit de rechef les ennemis, tellement que les vaisseaux acrochez ils recommencerent de plus grande furie qu'auparauant. Le maistre du brigantin, son fils & vn sien parent furent tuez à coups de picques. Pierre Vieire fut blessé à mort : alors quatre des ennemis sautent en la prouë du brigantin, mais Michel qui tenoit vne picque au poing en donna tel coup à l'aîné des coursaïres qu'il le renuersa mort, l'ayât par vne faueur speciale de Dieu atteint droit à la gorge. Apres ce coup il empoigne vne autre picque & donne de telle furie à trauers les trois autres, qu'il les contraint regagner leur fregate, & trouue moyen de desgager son brigantin. Puis il court vers la pouppe, criant apres le maistre que c'est qu'il falloit faire : car il ne sauoit que ce maistre eust esté tué. Alors iettât sa veuë sur Pierre Vieire il demeura tour esperdu lui voyât les boyaux hors du ventre. Neantmoins Michel qui estoit plus ieune lui demanda son auis. Allez, dit Vieire, & faites sortir ceux qui se sont cachez : & puis qu'il n'y a plus que vous, gaignez le bord à force de rames. Incontinent il appelle ces caignardiers, ce que veu par les ennemis, & que les plus asseurez soldats de Michel estoient morts ou bien blessez, ils assaillirent de rechef le brigantin. Sur ces entrefaites André Vasconcel se monstra, & lors les ennemis lassez du combat, afoiblis de la perte d'vn de leurs chefs, voyans approcher secours frais, se retirerent. Michel demande derechef auis à Vieire, qui l'exhorte de voguer vers le riuage, afin de pousser la fregate des coursaïres en vn gué : ce qui fut executé, avec si grand estonnement d'iceux qu'avec toutes leurs rames ils voguerent vers le riuage opposite : & se iettans en mer pour gaigner le bord la plupart furent noyez, huit se sauuerent en terre, mais ils furent arrestez par le gouuerneur qui couroit çà & là. Par ainsi auant qu'André Vasconcel approchast, son frere puisné auoit fini la meslee. Je ne say laquelle des deux vertus est plus louable en ce ieune homme, ou la vaillance par laquelle il fit teste si courageusement tout seul, ou avec quelques blessez qui ne le pouuoient seconder, à des ennemis si resolu : ou la modestie, qui lui commanda de ne rien faire en tel

accessoire que par l'avis des plus experimentez. Les ennemis s'estans presentez peu de iours apres deuant Septe, le gouuerneur les mit en route, & les pourfuiuit iusques à vne riuiera qu'ils passerent à nage & à gué, non pas tous, car aucuns des leurs furent taillez en pieces. Or estant auenu qu'un brave gentilhomme nommé Antoine Pereire tomba de cheual en terre, les ennemis, qui n'estoyent encores tous passez, se ruerent sur lui. Incontinent Michel Vasconcel acourut à l'aide avec cinq hommes de cheual. Lors il eut la cuisse percee d'un coup de lance: mais son frere André, Pierre Mendeze, & autres estans suruenus, les ennemis gagnèrent & passerent la riuiera.



FIN DE L'ONZIESME LIVRE.





LE DOVZIESME LIVRE.

SOMMAIRE.

1. *Plaisante histoire de vingt Portugallois, qui estoient nuds à cheual font teste à deux cens cheualiers Mores, & se retirent à sauueté.*
2. *Brave combat d'une caravelle de Portugal, dans laquelle n'y eut que trois hommes de desense, contre une fregate de corsaires: & quelques exploits sur les Mores.*
3. *Description du royaume de Pegu es Indes, & alliance du Roy avec les Portugallois.*
4. *Seditio & guerre au royaume de Pacem, les ennemens & la fin d'icelle.*
5. *Guerre contre le Roy de Bantam.*
6. *Rebellion de ceux de Coulam & ce qui s'en ensuyuit.*
7. *Voyages de George Quadre en Ethiopie, Arabie & Perse.*
8. *Mort de l'Empereur Maximilian premier, auquel Charles cinquiesme succede à l'empire, & le tribut excessif qu'il imposa sur l'Espagne.*
9. *Revolte des Castillans à cause du tribut sur eux imposé: la guerre qui s'en ensuyuit, & la fin d'icelle.*
10. *Guerre de Iehabentafus contre les Mores de Dabide & de Garabie revoltez, de son obissance.*
11. *Batailles navales de Vasco Fernand Casar dits il remporte la victoire.*
12. *Trabysen de Benaduxera contre les Portugallois en Azamor & ailleurs, dont lui & son frere recoinnent leur payement.*
13. *Puissante armee navale de Siqueire pour assieger Diu, & comme cela succede.*
14. *Murmures des soldats contre Siqueire qui n'entreprend rien contre la ville de Diu.*
15. *Goa reduite à l'extremite par les menées de Zabam & par quel moyen deliuree.*
16. *Tumulte en l'isle de Zeilan.*
17. *Guerre de Zeilan, & les accidens notables d'icelle jusques à la paix.*
18. *Conspiration du Roy d'Ormuz & de son conseil contre les Portugallois.*
19. *Siqueire induit par la fraude du Roy d'Ormuz à faire la guerre à Mecha seigneur de la Meeque, & le succés de cela.*
20. *Conspiration contre Iehabentafus, qui est traistrement tué à table.*
21. *Edouard de Meneser, eslu & envoyé Viceroy des Indes: voyage de George Albuquerque en Malaca, & la guerre qu'il fit au royaume de Pacem.*
22. *Arrivée de George Britto en l'isle de Taprobane, où il est desfaict & tué avec les capitaines & principaux de sa flotte, & que devient le reste.*
23. *Bataille navale de Jacques Fernand de Begie pres du port de Diu, & autres exploits en celui de Choul.*
24. *Mariage de Charles duc de Sawaye avec Beatrix fille d'Emmanuel Roy de Portugal.*
25. *Cruelle bataille navale entre Hagamahamed & les Portugallois au port de Choul, & l'issue d'icelle.*
26. *Siqueire quitte le gouvernement à Meneser: & ce qui eut derchief pres de Choul jusques à la paix faite entre Meneser Viceroy & Melichuaz gouverneur de Diu.*
27. *Exploits de George Albuquerque en l'isle de Bantam: & la nauigation d'Antoine Britto vers les Moluques.*
28. *Seditio en Ormuz contre les Portugallois la pluspart tuez, les autres blesez, se sauvent (apres grand combat) dans la citadelle.*
29. *Valoureux faits du capitaine Veigne, & la bataille navale en Ormuz.*
30. *Brave resistance & divers stratagemes de Garfise Contin gouverneur de la citadelle d'Ormuz.*
31. *Fuite du Roy d'Ormuz, estranglé peu apres par le commandement de Xerof son beau pere.*
32. *Couffes des Portugallois & Mores en Barbarie, avec divers evenemens.*
33. *Reucontre & bataille entre Vasco Fernand Casar & une navire Anglaise: ensemble autres accidens divers.*
34. *Maladie, mort & enterrement du Roy Emmanuel, avec un long discours de sa maniere de vivre & de ses faits.*

*Discours fac-
tieux de l'es-
carrouche des
Portugallois
nuds & des
Mores.*



N ceste mesme annee auint vn cas , qui semblant i. tirer apres soy vne sanglante guerre tourna finalement en rísee. Le Roy de Fez Prince belliqueux & ennemi de repos, resolu d'entretenir ses gens en cōtinuel exercice des armes, ne cessoit de faire courses sur les Portugallois. De fait, il fourragea le territoire de Tingi, & emmena quelque butin: puis se voyant maistre de la campagne tira contre Arzile. Il y auoit lors en Arzile vn citadin de bas estat , aimé de tous à cause de sa preud'hommeie , qui de long temps estoit malade & defailloit de iour en iour. Les medecins lui enioignirent d'vser en ses repas de tortues de riuere: ce que ne pouuās recouurer en la ville, il se plaignit à quelques amis d'estre priué du seul remede conuenable à sa guérison. Sur cela vingt hommes de cheual promirent lui en aller querir, moyēnant que Iean Coutin gouuerneur de la ville leur donnast congé de sortir aux champs, ce que Coutin leur accorda volontiers. Eux se mettēt en campagne, se rendent au bord de la plus proche riuere de la ville, desbrident & dessellent leurs cheuaux, les attachent par les licols à quelques arbrisseaux, & fichent leurs lances en terre. Puis sans apprehension d'aucun danger ils se desarment, se despouillēt nuds & se plongent en l'eau. Il faisoit fort chaud, & eux qui aimoyent à se baigner & rafraischir s'esbattoyent à nager, & pescher avec les mains force tortues aquatiles pour leur malade. Auint qu'un espion de l'ennemi nommé Hamelix, descouurit ces vingts cheuaux sortir des portes, & presumant que ce fust quelque grosse troupe, qui courust secrettement pour surprendre l'ennemi, comme c'estoit la coustume de se cheualer ainsi les vns les autres par bois & montagnes: conclud que ce n'estoit que la premiere bande. Pourtant en alla il porter incontinent les nouuelles au Roy de Fez, lequel bailla à cest Hamelix deux cens cheuaux, pour garder le passage par où il estimoit que les Portugallois deussent retourner. Il assigna pareille troupe à Martin oncle d'Abraheim son lieutenant, & Chrestien renié, pour garder vn autre passage de la riuere. Hamelix ayant couru de l'œil toutes les auenues, & ne voyant aucun trac de cheuaux, tira vers la riuere où estoyēt les baigneurs, nommee le Doux. Mais il ne pūt marcher si à couuert qu'il ne fust apperceu des eschauguettes d'Arzile: & par ainsi lon tira vn coup de double canon pour auertir ceux qui estoient dehors de se retirer, & quant aux citadins & autres estans en la ville on sonna incontinent l'alarme. Les nageurs prenoyent tel plaisir à leur ieu que le bruit du canon ne leur seruit de rien pour les tirer: car ils peschoyēt des tortues en abondance, l'un se mocquoit de l'autre, brief ils ne faisoient que huer & rire à gorge desployee: quand voici les ennemis se monstret. Incontinent ces gentils nageurs quittent l'eau, tirent leurs lances de terre, & se iettēt tous nuds à cheual, postās en diligence deuers la ville. Les ennemis courēt apres, tellement que les Portugallois, nuds qu'ils estoyēt, tournent visāge, & arrestent les plus eschaufez au moins mal qu'il leur fut possible.

ble. Toutesfois l'un d'entre ces nuds tombe par terre : mais Antoine Coutin (qui de Mahumetiste s'estoit fait Chrestien) desirant garantir celui qui estoit bas, baïsse la lance & dōne tel coup à vn More lequell courroit deuant les autres, qu'il le desfarçonne, puis tend la main à son compaignō & le charge derriere soy sur vn mesme cheual. Le gouuerneur Coutin, sorti en bonne compagnie pour recueillir les fuyards, voyant ceste troupe nue, se cūda laisser cheoir à force de rire : & comme c'estoit vn des plus facetieux & qui disoit le mot aussi bien qu'homme de son temps, il dōna tant d'attaques & de traits de risée à ces nageurs, que tous recommencerent à rire plus fort que deuant. Quant à la vaillance d'Antoine Coutin il en dit tout le bien du monde : adioustant ces mots, apres qu'ils eurent ri tout leur saoul, de peur que nos compaignons n'offensent leurs dames, si elles les voyoyent en tel equippage, c'est raison que nous leur donnions quelque couuerture auant que rentrer en la ville. Alors chascun quitta vne partie de ses habillemens, pour couvrir les nuds : & ainsi tous se rendirent en la ville, où de rechef les coureurs furent plaisamment brocardez par ceux qui les virent. Hamelix ayant dit les nouuelles de ceste auanture au Roy de Fez, le fit rire de bon cœeur, ensemble les seigneurs & capitaines qui l'accompagnoient. Il recueillit aussi les despouilles, a sauoir des habillemens, boucliers, filez, selles, brides, & vn cheual : & avec ces riches despouilles, le plus puissant Roy de Mauritanie s'en retourna chez soy. Quelques iours apres, par le commandement de ce Roy, Hamelix retourna vers Arzile pour descouurir ce que les Portugallois auoyent en pensee : mais il fut contraint se retirer ayāt perdu quelques gens. Vn autre iour il se remit aux champs & print vn espion qu'il mena au Roy de Fez, duquel on entendit que la ville estoit menie d'armes & de viures, appuyee sur la prouesse des meilleurs soldats du monde, & en la garde d'un gouuerneur vigilant entre tous les autres. Alors le Roy perdant l'esperance d'en pouoir venir à bout cassa son armee ; & tost apres l'espion fut racheté des propres deniers du gouuerneur. En la mesme annee le Roy Emmanuel delibera bastir vne citadelle sur la bouche du fleuve qui trauesse la ville de Tetuam : ce qu'entendu par Charles d'Austriche Roy d'Espagne il escriuit à son beau frere, & l'exhorta de mettre la main à bon escient apres cest ouurage. Car ceste ville de Tetuam est vne retraite de coursaïres qui courent & vont escumant de là les mers Oceane & Mediterraene. Pierre Mascaregne fut enuoyé reconoistre la place, ce qu'il fit & fonda la profondeur du haure, la commodité du lieu, l'aiguade, & conut qu'il seroit tresfaïse de bastir & fortifier ceste citadelle : mais le Roy auoit alors tant d'affaires sur les bras qu'il fut impossible de vaquer à ce bastimēt, encores qu'il en eust grande enuie, & pourtant il remit le tout à vne autre fois. Ce pendāt, Coutin gouuerneur d'Arzile & Pierre Mascaregne firent vne autre course au peril de leurs vies, sur des montagnes fort roides & à trauers des forests espaisces : tellement qu'apres auoir passé de merueilleux destroits, dont les ennemis ne se doutoyent aucunemēt, ils les surprindrent & mirent en route des la premiere charge, puis se retirerent avec des prisonniers & du butin.

*Il y eut combat
d'une caravelle
de Portugal
en laquelle n'y
eurent que trois
hommes de de-
fense, contre
une fregate de
courfaires: &
quelques ex-
ploits sur les
Morts.*

P E V de tēps apres Antoinette d'Azeuede, veufue de Iacques Soueral, 1.
loa vne carauelle pour aller de Tingi en Arzile, estāt acompagnée de deux
freres siens, a sauoir Iean & Arias Cocillo. En la mesme carauelle estoit vn
pescheur nommé Antoine Grimauld, qui ayant esté prins avec quelques
autres de son mestier par des courfaires, s'estoit ietté de leur fregate dedans
la mer & sauué à nage au port de Tingi, où il fit entēdre à Edouard de Me-
neses gouuerneur que les courfaires auoyent prins la route de Tetuam, &
ainsi l'estimoit-il: qui fut cause que les susdōmez se mirent à la voile beau-
coup plustost que la commodité du temps ne le requeroit. Mais ils ne fu-
rent pas si tost en plaine mer que la mesme fregate les vint inuestir. Huit des
ennemis sautent dedans la carauelle: au contraire Iean & Arias Cocillo a-
uec Antoine acourent, & se defendent de telle adresse qu'ils tuent quatre
des assaillans, & contraignent les quatre autres de se retirer plus viste enco-
res qu'ils n'y estoient entrez. Cependant les matelots reprennent tellement
leur route, qu'ils laisserent la fregate loin d'eux. Surce les courfaires enten-
dans des quatre qui estoient elchappez, qu'il n'y auoit que trois comba-
tans en la carauelle, & que le reste n'estoit qu'une troupe de femmes & de
mariniers, commencent à tamer de toute leur force, & viennent de rechef
assaillir & acrocher ceste carauelle: puis seize d'entre eux biē armez entrēt
par la proue dedans la carauelle. Les deux freres leur font teste avec vne
prouesse singuliere. Antoine se ioint avec eux, n'ayāt pour toutes armes que
vne hache en la main droite, & vne chemise de matelot autour du bras
gauche. La meslee fut plus aspre que s'ils eussent esté en nombre esgal de
part & d'autre. En fin les courfaires ayans perdu la pluspart de leurs gens, se
retirent avec le reste en leur fregate. Comme ils estoient ainsi aux mains,
quelques autres de leurs gens sauterent par la poupe, mais ils furēt repouf-
lez par les mariniers. Antoine courut au foyer de la carauelle, print les
charbons & les cendres qu'il jetta dedans la fregate, brussa les vns, & gasta
les yeux aux autres. Ainsi les ennemis furent contrains se descrocher, mais
ils ne laisserent de combattre de loin à coups de fleches & d'autres traits.
Surces entrefaites, deux nefes Angloises qui tenoyent ceste route abati-
rent les voiles, apres auoir descouuert ce combat, & ceux qui estoient de-
dans entrèrent vistemēt en leurs esquifs pour aller au secours, à cause que
leurs nefes pour estre trop grandes ne pouuoient approcher de l'endroit où
flottoyēt la carauelle & la fregate. Mais auant qu'ils arriuaissent, les courfai-
res s'estoit retirez. Les Anglois tirerent la carauelle vers leurs nefes, pēserent
les blessez, & monstrent tous deuoirs d'amitié aux Portugallois. En apres
les blessez furent portez à Tingi par le commandement du gouuerneur: &
la carauelle fauorisee de la presence des Anglois se rendit au port d'Arzile.
Le pescheur Grimauld fut prisē entre tous pour sa vaillance, quoy qu'au re-
ste il fut de bas estat: aussi fut-il fort blēssē en plusieurs endroits. Au mesme
temps François de Castre, gouuerneur d'une ville nomēe le Cap de Gue-
re, ayant seiournē quelques tēps pour ses affaires en la cour de Portugal, &
de retour en Barbarie, fit entreprīse sur Turoquque. C'estoit lors vne ville
riche & de grand trafic, dont les habitans faisoeyēt beaucoup de maux tant

aux Portugallois de la garnison du Cap de Guere qu'aux Mores confederrez. Il mit donc ses forces aux champs, & appella pour second Xeq Melich, seigneur More, fidele partisan du Roy Emmanuel. Estans sortis au soir ils arriuerēt là au point du iour, surprenent les ennemis, gaignent la ville, font horrible carnage des habitans, deliurent les Chrestiens esclaves, emmeinent grand nombre de prisonniers: & combien que les soldats de Castre eussent tué beaucoup de personnes, ce ne fut rien toutesfois au pris de ce que firent les gens de Xeq Melich, lesquels sentans encores les torts receus par les Mores de Turoquque, firent tout du pis qu'ils peurent pour se venger vn bon coup de leurs ennemis iurez.

3. T E L estoit l'estat des affaires en la coste d'Afrique. Quant à celui des Indes, nous auons dit que le Roy de Bintam auoit assiégé Malaca, fait tous ses efforts d'y entrer, & reduit la ville en extreme danger, dont elle fut deliuree par l'arriuee d'Antoine Correa enuoyé par Siqueire en Pegu, avec commandement de secourir ceux de Malaca, si en estoit besoin. Correa voyant la ville deliuree du siege, & bien munie de viures, print la route de Pegu, & à l'aide d'vn bon vent print port à Martabas ville maritime du royaume. Le pays est de grande estendue & tresfertile, abondant en mines d'or & d'argent, & en diuerses sortes de pierres precieuses. Quant aux habitans ils sont de couleur bazanee & vivent somptueusement, fort vicieux & effeminez au reste. Pour la pluspart ils sont grands idolatres, & sacrifient à leurs idoles. Ils portent grand honneur à leurs prestres, ont des moines qui vivent (ce disent ils) en estat plus parfait que les autres, & des nonnains recluses aussi faisant vœu de perpetuelle virginité. Brief ils s'accordent en la pluspart de leurs mœurs & ceremonies avec ceux de la China. Si tost que Correa eust mouillé l'anchre, il despêche Antoine Pazagne vers le Roy sejournant lors en Pegu, duquel Pazagne & ses compagnons furent assez benignement recueillis. Tost apres il fit response, & enuoya avec Pazagne vn des principaux prestres du royaume (appelez Rolines) & vn autre de ses conseillers, à Martabas, avec ample pouuoir de traiter la paix à conditions iustes & equitables: ce qui fut fait, & les articles couchez par escrit, dont Correa bailla lettres signees & scellees à la maniere de Portugal, aux ambassadeurs de Pegu. Eux au nō de leur Roy grauerēt la teneur de ceste paix en vne placque d'or, comme ces Rois Orientaux ont acoustumé de faire en leurs alliances, & la porterent à Correa. Durant ceste negociation ils sa- cointerent & deuindrent si familiers des Portugallois, que Correa & ses gens viuoyent là aussi à leur aise qu'en Portugal, & se pourmenoyent en toute liberté par la ville. Or ayans vn vent de Nord propre à leur nauigation, Correa fit voile avec cinq nauires chargees de victuailles, & print la route de Malaca.

4. T A N D I S qu'il negotioit en Pegu, suruint vn grand tumulte au royaume de Pacem en la Taprobane. Car vn certain seigneur desirant regner, dressa vne telle partie au Roy, qu'apres lui auoir coupé la gorge, il s'empara du sceptre, fit tuer vingt cinq Portugallois habitans en la ville de Pacem, confisca leurs biens, & mōstra par tous moyēs à lui possibles la haine qu'il

Descriptiō du royaume de Pegu: Indes; & alliance du Roy avec les Portugallois.

Sedition & guerre au royaume de Pacem: les enuieusement & la fin d'icelle.

portoit à la nation Portugalloise. Garfie de Sale, lors gouuerneur de Malaca, équippa incontinent vne nauire chargée de bons soldats sous la conduite de Manuel Pacheco, auquel il commanda de courir soigneusement la coste entre Pacem & Axem, pour empescher que lon ne portast viures à Pacem, & que personne ne prinst licence de pescher en mer haute. C'estoit la plus rude guerre que lon pouuoit faire aux insulaires, qui se nourrissent de viures apportez d'ailleurs, & de poisson nommément. L'un & l'autre moyen estant doncques retranché, il falloit que la ville se trouuast en peu de iours combatue de famine. Pacheco s'acquitta diligemment de sa charge. Or il auint qu'il enuoya vn esquif prendre terre assez pres de la ville pour puiser de l'eau fraische dont il desiroit boire. Il n'y auoit dedans cest esquif que cinq soldats avec les matelots qui entrerent en la riuere, & firent aiguade: mais comme ils remontoyent vers leur nauire, voici arriuer les ennemis à la foule sur les riuages de part & d'autre, lesquels avec vne nuee de cailloux & de fiesches cuiderent accabler les soldats & enfondrer l'esquif. Toutesfois les soldats se couurirent si bien de leurs pauois, & les matelots firent tel deuoir de ramer qu'ils se tirent de ceste riuere & gaagnerent le haut. Or pource que le flus de la mer les repoussoit, & qu'ils n'auoyent point de vent, trois fustes fort longues & plaines de gens, appellees Lâcharres par ceux de Pacem, fournies de tout ce qui estoit requis pour la guerre, & qui portoyent bon nombre de gentilshommes du pays, attaignirent l'esquif. Le capitaine de ces fustes estoit de laue, nommé Zudamec. Quant aux Portugallois ils resolurent de mourir plustost que se rendre pour estre esclaués, & apres s'estre recommands à Dieu en qui ils mettoient leur esperance, ils s'apprestèrent au combat. Vn de ces cinq soldats estoit barbier de son estat, home fort & courageux au possible, lequel empoigna de telle vigueur la prouë de la principale fuste qui voguoit deuant les autres, que ses quatre compagnons eurent moyen d'entrer dedans, & lui sauta incontinent apres. Lors ils se ruerent de telle furie à trauers leurs ennemis, que plusieurs d'iceux rroublez de peur se ietterent hors le bord. Zudamec estoit derriere ses gens qu'il poussoit au combat, tenât l'espee nue, avec menaces de tuer celui qui reculeroit. Mais voyant que ses exhortations & menaces ne seruoient de rien il en rua quatre. Les autres ne sauoyent de quel costé retourner: car ceux qui vouloyent faire teste aux Portugallois sentoyent la pesanteur de leurs bras, & ceux qui reculoient ne pouuoient attendre autre chose que la mort par les mains de leur capitaine. Apres donc auoir combattu quelque temps, ils furent tous taillez en pieces ou noyez, estans saisis de telle frayeur qu'ils se précipitoient en la mer, nommément Zudamec, qui apres auoir esté blessé en plusieurs endroits se lança dedans les vagues. Ceste fuste portoit plus de cent cinquante hommes. Les deux autres voyâs l'auenture de leurs compagnons s'arrestèrent fort estonnees: mais alors les cinq Portugallois estoient si las & naurez en tant de parties de leurs corps, qu'ils ne pouuoient remuer bras ni iambes. Or le mesme Dieu qui les auoit fortifiez au combat, pour executer les merueilleux faits d'armes sus mentionnez, espouuanta aussi tellement le reste des ennemis qu'ils n'osèrent les venir

venir attacher. Et ainsi la fuste des ennemis fut tirée auprès de la flotte, puis menée en Malaca, mise en terre & couverte, afin de servir longuement d'un memorial de ce combat miraculeux. Car les idolâtres conurent que ceste guerre n'auoit esté terminée par la force humaine, ains seulement par le secours & faueur presente du Toutpuissant. Et en cela lon peut remarquer beaucoup de merueilles: premierement l'ardant courage & la resolution de cinq soldats aimans mieux mourir que se rendre aux ennemis: en apres l'heureux succès du combat, auquel cent cinquante hommes cruels & acharnez sur les Chrestiens furent occis par cinq soldats, ou tellement effarouchez que de se jetter en leau: finalement ceste frayeur des deux autres fustes qui n'oserent assaillir cinq personnes blessées & du tout recuës de trop grand travail. Siquiere deut aussi apprendre de cest accidēt qu'un chef de guerre ne se doit pas iouer du sang de ses soldats: car ce lui eust esté beaucoup plus grand honneur d'estācher sa soif avec de l'eau puāte, que mettre ses gēs en tel dāger pour satisfaire à son appetit. Les quatre soldats qui se porterēt si vaillāment estoient Jean Almeida, Antoine Pazagne, Antoine de Vere, François Gramaxe: le barbier n'ayāt autre nom entre les soldats, s'est caché soy-mesme pour n'estre pas connu dauantage. Cependant le Roy de Pacem, estonné d'un si estrange accident, demanda la paix, qui fut confirmee, apres qu'il eust payé l'amende.

5. OR le Roy de Bintam pensoit d'autre costé à recommencer la guerre: *Guerre contre le Roy de Buntam.* & au contraire Antoine Correa desiroit s'emparer d'un fort que ce Roy tenoit avec garnison sur le riuage du fleuve de Muar, & d'une ville fortifiée par ce mesme Roy, nommée Pade. Ayant donc communiqué avec Garfie de Sale gouverneur de la ville & capitaine de la citadelle, il obtint de lui une galere, un brigantin, & trente petits bastiaux, chargez de cent cinquante Portugallois & quatre cens Malacās. Avec ceste flotte & troupe de soldats il entre en la riuere de Muar, dōt les riuages sont tousiours couverts de verdure, & vestus d'arbres de tous costez en telle abondance, qu'en plusieurs endroits ils font telle ombre sur la riuere qu'on n'y void point de clarté. Ayans vogué enuiron dix lieues ils rencōtrēt l'emboucheure où le reflux de la mer donnoit. En ce lieu le Roy de Bintam auoit dressé un fort avec double fossé & forte garnison, pour empescher les Portugallois d'assaillir Pade, où il se tenoit pour auiser plus commodement aux affaires de la guerre. Ce fort commandoit au canal estroit, par où il falloit passer necessairement, & occupoit la largeur d'icelui par le moyen de diuers empeschemens mis à trauers: au milieu desquels y auoit une ouuerture en forme de porte pour donner passage & entrée en la riuere à ceux qui venoyent de Pade, & de nuit lon fermoit ceste porte. Dās l'enclos de ce fort le Roy tenoit quelques vaisseaux en reserue, pour repousser au besoin, & quand il n'auroit assez de forces, les soudaines & inopinées courses des Portugallois. Et pour lors ce fort estoit gardé par un vaillant capitaine. Correa enuoye incontinent George Mesurade en une barquerolle pour descouurir, lequel rapporte que le fort estoit couuert de soldats, & que le capitaine les auoit disposez & encouragez au combat, s'assurant qu'ils auroient bien tost à faire aux

Portugallois. Nonobstant ce rapport Correa s'avance, & des le point du iour assaut le fort, & finalement entre dedans avec les autres capitaines. Il y eut vn terrible carnage, & toutesfois la plupart de ceux qui y estoient se sauverent de vistesse vers le Roy de Bintam. Mais Correa ne voulant pas leur donner loisir de se rasseurer, laissa Edouard Melio avec quelques basteaux à l'embouchure du fleuve : lui rôpit les clostures, & entra plus avant. Or pour empêcher que lon ne peust aisément passer oultre, le Roy auoit de bonne heure fait couper des arbres, & iceux ietter de trauers dans la riuiere pour empêcher les basteaux de s'auancer deuers Pade. Les Portugallois & Malacans eurent alors fort affaire : car auant que pouuoir passer oultre, il falut tirer ces arbres qui empêchoient le passage. Mais en fin, tous ces empêchemens leuez, Correa fit tant qu'il approcha de la ville de Pade. Le Roy sortit au deuant avec son armee & ses elephans : mais quelque resistâce que lui & les siens fissent, Correa & ses troupes prindrent terre : & tout soudain donnerent bataille, rompirent les ennemis, & mirent toute leur armee en route. Dautant que les Portugallois s'eschaufoyent trop à poursuivre leur victoire, Correa fit sonner la retraite : car ils ne conoissoient pas les chemins du pays, & il craignoit que ses soldats s'allassent ietter en des lieux escartez, où les ennemis pourroyent se ramasser & combattre à leur auantage. Pade fut incôtinent saccagee & bruslee, ensemble plus d'une centaine de vaisseaux grands & petis. L'on n'a peu sauoir le nombre de ceux qui furent tuez en toutes ces rencontres : mais c'est chose certaine qu'il y en demeura beaucoup. Apres que Correa eust executé son entreprise à souhait, il reprit le chemin de Malaca, emmenant force butin & des prisonniers aussi : & fut receu de tous les Malacans en grand honneur, comme sa vertu le meritoit. Delà il fit voile en l'Inde basse. Quant au Roy de Bintam, se voyant à l'estroit, par faute de gens & de vaisseaux, il se retira tout confus & ruiné en sa ville de Bintam, voyant bien qu'il estoit temps de se reposer.

*Rebellion de
ceux de Cou-
lam & ce qui
s'en ensuyuit.*

Les affaires n'estoyent gueres plus paisibles en Coulam : car les Portu- 6.
gallois ayans prié la Roine de tenir sa promesse, leur faire rendre ce qui leur auoit esté prins lors qu'Antoine de Sale fut tué, & deliurer sans delay les quintaux de poyure deus selon la teneur des articles de pacification, elle (qui du commencement estoit resoluë de garder la foy promise) persuadée & vaincue par les importunes remonstrances des Sarasins, delibera nô seulement de faucher promesse, mais aussi se saisir de la citadelle & faire couper la gorge aux Portugallois. Or pour executer ce dessein, elle commença par finesse : ce qui ne succedant pas, elle arreste d'executer à force ouuerte. En ce quartier des Indes limitrophe de Coulam & borné du promontoire de Cort ou Comori vers le Su, regnoit vne autre Roine, avec qui celle de Coulam se ligua pour exterminer les Portugallois. Ainsi donc ces deux Roines ayant ioint leurs forces sous la conduite de trois freres fort estimez entre tous les Naires, commencerent la guerre au mois de Iuin, qui est le fort de l'hyuer en ces pays là. L'armee estoit de plus de vingt mille hommes. Ils empoisonnerent les puits pour oster l'eau douce aux Portugallois, assie-

assiégerent la citadelle, la presserent de toutes parts, & tuerent quelques Indiens baptisez qui habitoient en la ville. Dedans la citadelle n'y auoit que trente Portugallois, cinq desquels estoient fort malades, & l'huyet empechoit qu'ils ne pouuoient estre aisément secourus par ceux de Cochim. Les viures estoient courts, & n'auoient que fort peu de pouldres à canon. Hector Roderic despesche incontinent vn braue soldar, qui ne fit difficulté de s'embarquer en si perilleuse saison, pour aller auertir Alexis de Menefez, lors seiournant en Cochim, de l'estat des affaires de Coulam. Tout soudain Alexis enuoya au secours son neveu Alphonse de Menefez avec vingt cinq hommes, munitions & viures en vne fregate, laquelle arriva à sauuereté, tellement qu'Alphonse & ce qu'il menoit entrerent en la citadelle. Ce pendant les ennemis faisoient tous leursefforts, mais ils n'auançoient pas beaucoup, ayans à faire à gens bien resolués, & qui par diuerses faillies les escarmouchoient viuement, non seulement à coups d'harquebuzes, mais aussi avec les picques & espees. Aucuns des Portugallois furent tuez, quelques autres griefuement bleffez : les ennemis perdirent grand nombre de gens de leur part. Pour conclusion, les Roines voyans que la citadelle auoit tenu bon ia l'espace de deux mois, & sachans qu'Alexis de Menefez leuoit gens de toutes parts pour venir au secours, delibererent de mettre fin à ceste guerre, & demanderent la paix, qui leur fut accordée, en payant l'amende pour la roughture de l'alliance, à quoy elles satisfirent : tellement que la paix fut ratifiée comme deuant à conditions equitables.

7. EN ceste mesme annee le Roy Emmanuel aprint d'un homme curieux & diligent beaucoup de choses, qui refuseillerent son esprit à penser apres des entreprises plus hautes que les precedentes. Nous auons veu ci deuant, comme la flotte d'Edouard de Leme, en doublant le cap de Guardafu, le brigantin du capitaine George Quadre séparé de la flotte par vne bourasque fut chassé au port de Zeilam, auquel les Portugallois qui estoient dedans furent arrestez, & liurez au Roy d'Aden, qui les fit serrer en des basses fosses, où ils trempèrent long temps en extreme pauureté & disette. Durât ceste captiuité vn certain Roy d'Arabie voisin de celui d'Aden lui fit guerre, & apres l'auoir desfait en plusieurs rencontres, & subiugué la pluspart de son royaume, entre autres choses deliura de prison les Portugallois, & leur permit de se retirer où bon leur sembleroit. Voila comme le capitaine Quadre & cinq de ses soldats (car tous les autres rompus de trauail & abatus de faim estoient trespassez en leurs cachots) furent eslargis avec congé de faire seiour ou de se retirer du pays. Or Quadre desirant voir sans danger diuers pays en ces quartiers de Leuant, & pour cest effect sachant parler bô Arabelque, à quoy ils'estoit estudié durât sa prison, cōtrefit le Sarasin, & se môstra au dehors fort affectionné à la secte de Mahumet, tellement que sous le voile de saincteté & de religion dont il faisoit grād semblât, chascun cōmença à l'auoir en admiration, & par le bruit ainsi acquis il s'insinua fort auant en la bonne grace de ce Roy lequel l'auoit deliuré, & qui estoit Prince fort humain, & adonné aux superstitions de Mahumet. Icelui prenant plaisir à ouir deuifer Quadre ne lui vouloit point donner congé, &

*Voyages de
George Quadre
en Egipte,
Arabie &
Perse.*

s'estant acheminé pour visiter le sepulchre de Mahumet, il mena Quadre quand & soy. Estans arriuez à la Mecque, Quadre entendit que deux iours avant la venue du Roy vne carouanne ou troupe de chameaux s'estoit acheminee vers Damas. Lors il faignit auoir merueilleuse deuotiõ de visiter les sepulchres des neveux de Mahumet au royaume de Perse: & pourceil supplia le Roy de lui permettre d'aller apres & rattaindre ces chameaux, dont le Roy le voulut destourner, tât pource qu'il se fâchoit de perdre telle compagnie, que pour le peu d'apparence qu'il y auoit que Quadre peust accomplir la carouanne. Mais Quadre l'importuna tant, qu'outre son congé il receut de l'argent & des viures autant qu'il en pourroit porter. S'estant ainsi mis aux champs, il voyagea par des larges campagnes & deserts inconnus, sans pouuoir rattaindre les chameaux, ne sachant en quelle part tirer. En peu de iours il vid la fin de ses viures: le Soleil extrêmement chaud le tourmentoit iusques au bout, à peine pouuoit-il tirer les pieds du sable sec & mouuant. Alors se voyant en tel danger il leue les yeux au ciel, & fondant en larmes demanda humblement pardon de toutes ses fautes à Dieu, parla faueur duquel il se rendit pres d'un costau sablonneux, & apres auoir gaigné le haut il apperceut vn homme & vn chameau, vers lesquels il courut tout ioyeux, & cependât apparurent plusieurs autres chameaux approchans de ce lieu, où estoit l'abruuoir. Il approche des conducteurs, leur declaire sa misere, & demande secours. Eux esmeus de compassion, & fieschis par l'apparence de religion que cest hõme auoit en sa contenance & vesture, lui donnerent à manger & à boire, ensemble toutes autres choses dont il auoit besoin. Sous leur conduite il trauersâ tous les deserts, & apres estre sorti de ces solitudes champêtres, il courut diuers pays en habit de moine Mahumetiste, marquât de l'œil & en son esprit beaucoup de particularitez. Ayant ainsi todé parl'Arabie & la Perse, il fut mené par des marchans Sarasins en Ormus, où il despouilla ses habits de Sarasin, & se vestit en Chrestien, comme tousiours il auoit esté tel en son cœur. Cependant il reconut & effaçâ par abondâce de larmes le crime par lui commis en faisant profession exterieure d'une impieté detestable. Garfie Coutin lors gouuerneur d'Ormuz le reuestit, lui donna de l'argent & quelques ioyaux. De là, Quadre fit voile en Inde, & d'Inde en Portugal, où il arriua l'an mil cinq cens vingt, & présenté au Roy, lui fit vn ample discours de ses pelerinages, recherches & obseruations: notamment de ce qu'il auoit voyagé par toute l'Ethiopie qui est au dessous de l'Egypte, & comme il s'estoit rendu pres d'un grand lac, d'où le Nil decoule, puis trauersé l'Egypte: quelles estoient les façons, loix & coustumes des Chrestiens d'Ethiopie, l'assiette d'Egypte, les mœurs des Arabes, la maniere de viure des Perses. Le Roy print singulier plaisir à ce discours, lequel se rapportoit entierement au dessein que le Roy bastissoit sur l'Arabie & l'Ethiopie. Or presumant que lon pourroit passer aisément du royaume de Cõgo iusques à ce lac d'où le Nil sort, il fit de grandes promesses à Quadre, desia tout disposé à tel voyage pour aller decouurir ce chemin. Il l'enuoya donc en Congo avec lettres pour obtenir congé d'aller aux sources du Nil, & de là visiter le grand Negus.

Negus. Estant arriué au port de Congo, & amené au Roy qui le recueillit de bon œil, il ne pût toutesfois obtenir congé de pourſuiure ſon voyage, & ce par la malignité des Portugallois qui lors gouuernoient le Roy de Congo : tellement qu'il fut contraint retourner en Portugal, & trouuât Emmanuel mort, ſe rendit cordelier, & vescu le reſte de ſes iours en ceſt habit, avec apparence de grande ſaincteté. Nous auons traité ce que deſſus vn peu amplement, afin qu'on voye que l'eſprit d'Emmanuel, dont le corps eſtoit enfermé en vn petit royaume de Portugal, voltigeoit par tout le monde, & remuoit touſiours choſes grâdes & trop hautes pour ſes eſpaules : ce qu'il faiſoit, afin de deſcouvrir par le moyen de ſes ſuiets les pays inconus & les derniers bouts du monde. Mais il ne faut qu'une minute d'heure pour aneantir toutes les penſées des hommes.

8. ENVIRON ce temps deceda l'Empereur Maximilian premier du nom. Il y auoit debat entre les Alemans touchant vn ſucceſſeur à l'Empire : car aucuns enclinoient à François de Valois, Roy de France, mais la pluſpart portoyent ſinguliere affection à Charles d'Autriche. Le Roy de France en auoit gagné quelques vns par preſens & grâdes promeſſes. Toutesfois Charles eſtoit plus reſpecté que ſon competeur, encores qu'il fuſt bien loin de l'Alemagne : & ce à cauſe qu'il auoit eſté nourri parmi les Alemans, que l'Autriche heritage de ſes predeceſſeurs eſtoit proche de l'Alemagne, & que pluſieurs Princes lui touchoient d'alliance : tellement que les vns & les autres l'appellerēt par lettres pour venir prendre poſſeſſion de l'Empire, comme ſi celui euſt eſté quelque dignité hereditaire. Auant que partir d'Eſpagne il aſſembla les eſtats, & par l'auis de Guillaume de Crouy, ſeigneur de Cheures, ſon gouuerneur, cottifa les Eſpagnols à vne exceſſiue ſomme de deniers, outre l'argent qu'ils lui auoyent fourni extraordinairement. Enquoy ie ne ſauois accuſer Charles d'auarice ou de temerité, veu que ſon ieune aage d'alors l'excuse : mais i'eſtime ſon gouuerneur s'eſtre alors trefmal porté & en homme de mauuaiſe conſcience. Car vn Prince n'eſt pas eſleué en ſi haut degré pour eſpuifer ſes villes par exactions deſmeſurees, ains pour pouruoir au bien & à la ſeureté d'icelles. S'il fait valoir ſon nom comme il appartient, il eſt pere de la patrie : & doit au beſoin expoſer ſa vie à tous dangers pour le ſalut de l'eſtat public, non pas renuerſer l'eſtat par deſpenſes exceſſiuelement exceſſiues. Il confeſſe que les ſuiets ſont tenus fournir les moyens à leur Prince de maintenir l'eſtat public : car il eſt tenu de porter vne infinité de charges & d'affaires : il adminiſtre iuſtice eſgalement à tous, & quand la neceſſité le requiert garantit par la force des armes l'eſtat public des dâgers qui le menaſſent : reprime les meſchans par aſpres ſuppliques, brief par ſa vigilâce il maintient tout le pays en repos contre les courſes des ennemis eſtraangers & maugré les menées & mauuaiſes pratiques des ſeditieux & ennemis domeſtiques. Il met la main à tel œuvre par eſſect ou par ſes lieutenans, ou lui meſmes quand il en eſt beſoin. Or celui qui eſtime telles choſes ſe pouoir manier ſans frais, s'abuse du tout, & ne ſait que c'eſt du gouuernement de la vie humaine. Pourtant ceſte couſtume, que les Rois ſoyent entretenus aux deſpens du peuple, eſt fondee nō

*Mort de
l'Empereur
Maximilian
premier, au-
quel Charles
cinquieme
ſuccede à l'Em-
pire : & le tri-
but exceſſif
qu'il impoſa
ſur l'Eſpagne.*

seulement sur le droit humain, mais aussi sur le diuin. Cependant le Roy ou Prince doit tenir la mesure sus declairee, de peur que par despêses superflues & dons immenses il n'abuse du public, ou qu'il ne iette es coffres de certains alterez, l'argent que le peuple lui donne à autre fin. Il ne doit donc pas amasser sinâces des pleurs & complaints de ses suiets, ni vider les maisons & bourses des petis pour emplir celles des grâds iusques à regorger: car ce faisant, sous couleur d'acquérir le nom de liberal & magnifique, à fausses enseignes toutesfois: à la verité il deuient iniuste & cruel. Il y auoit encor vne autre raison, qui rendoit ce conseil merueilleusement odieux pour le regard de Charles: pource qu'il auoit esté nourri hors d'Espagne, & n'estoit point son Espagnol, à cause dequoy ce peuple ne l'aimoit gueres, encores que le royaume lui appartinst par droit hereditaire & legitime succession. Pourtant deuoit il au commencement gaigner les Espagnols par douceur & gracieuseté, iusques à ce qu'il se fust entierement infinué en leurs cœurs: & alors falloit plustost rabatre quelque chose des tailles ordinaires, que de charger le peuple de nouueaux impôts. Toutesfois on peut excuser ce ieune Prince, qui par vne modestie naturelle se laissoit manier par son gouuerneur, & ne conoissoit pas bien encore l'humeur des Espagnols. Mais l'auarice du seigneur de Cheures qui commit telle faute sous le nom de Charles, est detestable à bô droit. Car plusieurs prouinces appuyees sur la noblesse, refuserent tout à plat le tribut que Charles demandoit. Encores n'y eust il eu pas tant à redire, si les affaires eussent esté cōduites du commencement avec quelque bône moderatiō. Or dauât qu'un peuple trop ialoux de liberté excessiue ne tient aucune mesure, & ne se laisse guider par conseil ni raison: & que plusieurs gentilshommes, transportez de ie ne say quelle fantasie, se firent chefs du peuple, il auint de cela que beaucoup de villes du royaume de Castille quitterent le parti de Charles.

A v commencement de ce tumulte, Charles estoit hors d'Espagne & sejournoit lors en Flandres. Les villes reuoltees de son obeissance estoient agitees de seditions: car la pluspart des gentilshommes ne se remuoit point, aucuns desirans se faire valoir parmi les petis, fauorisoyent les desseins des peuples, qui auoyent coniuuré de chasser Charles d'Austriche hors d'Espagne, piller & ruiner tous les Princes & seigneurs Espagnols, afin d'estre en entiere liberté, & se cantōner cōme les Suisses: ne cōsiderâs pas que ce que font les Suisses, acoustumez de fort long temps à viure sous l'obeissance des loix de leur patrie, en quoy ils sont admirez de tout le monde, ne pouuoit estre maintenu entre les Espagnols, naturellement orgueilleux & insupportables. Ainsi donc, estant ainsi qu'une populace estourdie ne fait tenir mesure, specialement ces mutins de Castille, qui auoyēt iuré la ruine de Charles, estoient si aueuglez de fureur insensee, qu'ils menaçoient de feu & de sang tous ceux qui adhereroyent aux Princes, comme si ces malauisez eussent desia esté les maistres. Cependant l'Espagne trembloit sous le bruit des armes ciuiles, & s'estoit desia les pillages, meurtres & embrasemēs. Antoine Fonsecque brulla Medine de camp, ville opulente, reuoltee de l'obeissance de Charles, tellement que ce feu deuora de merueilleuses richesses.

*Renleue des
Castillans à
cause du tribut
sur eux
imposé: la guerre
qui s'en ensuiuit,
& l'issue
d'elle.*

chesses. Lors personne n'osoit ouurir la bouche pour donner sage & libre conseil : car si quelqu'un disoit que pour se maintenir en liberté il ne falloit pas guerroyer si cruellemēt contre son Prince legitime, il estoit mis à mort incontinent pour tel forfait. En plusieurs lieux où l'on plaidoit ainsi pour la liberté, nul n'osoit librement soupirer, ni monstrier signe de deplorer telles cōfusions. Les Princes d'Espagne liguez avec les villes non soulleuees, après s'estre efforcez en vain d'appaiser ceste noise, s'apprestèrent pour faire la guerre, pouruoyans à tout ce qui estoit requis pour cest effect, & enuoyerēt leurs deputez vers le Roy Emmanuel demander secours cōtre les rebelles. D'autre part, ceux qui s'estoyēt soustraits de l'obeissance de Charles, se voyās si pres de leur ruine, despescherēt aussi quelques ambassadeurs en Portugal. Le sommaire de leur legatio fut, Qu'ō les auoit tāt oultragez, qu'il leur estoit impossible d'en endurer dauantage. Là dessus ils offroyent liurer au Roy de Portugal leurs villes, forteresses, biens & personnes : le prians de se declairer protecteur d'un royaume si opulent qui lui tendoit les mains, & vouloir venger les torts qu'on leur auoit faits. Emmanuel refusa le present apporté par ces ambassadeurs, & les admonnesta d'apprendre à garder la foy promise à leur Prince, & n'estre pas si outreuidez : adioustant que l'on pouuoit assoppir ce debat du premier coup, à cause de la debonnaireté de Charles, si les principaux & qui deuoient contenir le peuple ne l'eussent fait eux-mesmes soulleuer, en le faisant chefs de part avec vne telle audace. Outreplus il les tança bien asprement de ce qu'au commencement ils disoyent ne s'estre armez que pour maintenir la liberté publique, & tost apres ils faisoient la guerre afin d'establiir vne domination populaire. Neantmoins il promettoit s'employer à la negociation d'une bonne paix & composition amiable, s'ils vouloyent reconnoistre leur faute & demāder pardon à Charles. Quant à la couronne qu'ils lui offroyent, il leur declaira tout net que sa foy & son deuoir lui seroyent tousiours en plus grande recommandation que tout accroissement d'estat qu'on lui faueroit presenter. Mais pour le regard des ambassadeurs que les Princes & villes non soulleuees auoyent enuoyez, il leur respondit plus d'effect que de paroles, enuoyant de l'artillerie, des munitions, & de l'argent pour faire la guerre aux rebelles, lesquels perdirent vne bataille, & furēt prins leurs principaux chefs, a sauoir Iean de Padille, Antoine Euesque de Zamore, Pierre Pimintelle, Francisque Maldonat, & quelques autres gentilshommes, ensemble aucuns de bas estat que le peuple mutiné auoit esleuez aux honneurs. Iceux comme capitaines de la coniuration furent executez à mort, & quant au menu peuple Charles leur pardonna. Ces choses auindrent en l'an mil cinq cens vingt & vn.

10. E N ceste dernière année, Nonio Mascaregne deuint ennemi de Iehabentafuf par les artifices de quelques malvueillans : ce qu'estant venu aux oreilles de ses soldats, notamment des Mores de Dabide & de Garabie, ils quitterent son parti, & mesmes aucuns d'eux le pillerent. Dauantage, Mascaregne l'accusa de trahison, & en escriuit au Roy de Portugal. Iehabentafuf pria Emmanuel, par lettres & deputez enuoyez expres, de

Guerre de Iehabentafuf contre les Mores de Dabide & de Garabie reuoltez de son obissance.

vouloir prendre l'affaire en main, & conoistre la verité des choses, offrant souffrir tel supplice que de raison, s'il estoit trouué auoir cōmis acte reprochable depuis le temps qu'il tenoit le parti des Portugallois. Le Roy satisfit entierement à la demade equitable de lehabentafuf, & enioignit à Mascaregne de conseiller & secourir lehabentafuf, lequel suiuant cela receut de Mascaregne soixante chevaux & quelques pietons pour courir sus aux rebelles. Avec ce réfort (dont il fit courir le bruit par tout, afin que lon sceust que le Roy de Portugal lui assistoit) il se mit en cāpaigne, suiui de ses troupes ordinaires, donna bataille aux ennemis, emporta la victoire, les cōtraignit de faire ioug comme deuant, estaignant par sa vertu & equité tous les troubles suruenus de ceste reuolte.

*Exploit sur
mer du capi-
taine César
& seruis.*

PRESQVES au mesme téps le capitaine Vasque Fernand César cou-
roit avec vn basteau de guerre le destroit de Gibraltar, par commandemēt
expres du Roy Emmanuel, & faisoit mille sâcheries aux ennemis. Auint
que deux fregates de Mores qui auoyēt beaucoup butiné, biē fournies de
soldats, d'artillerie & de munitiōs, qui les rendoyēt plus hardies que de cou-
stume, vindrēt assaillir César, lequel fit incōtinēt tourner vers elles la prouē
de son basteau. Le capitaine del'vne des fregates voyant de quelle asseurā-
ce César venoit aux mains, craignit de ioindre, & tournant voile print vne
autre route. Alors le capitaine de l'autre fregate, se voyant abandonné par
son compagnon, delibera faire mesme retraite, mais César s'y opposa, le
poussant à coups de canon telle part que bon lui sembloit: & le suiuit si ob-
stinēmēt maugré les vagues fort esmeues, qu'il contraignit la fregate d'ap-
procher du riuage. César saute incontinent dans vn esquif lié à la poupe
de son basteau, & qui seruoit à tels accidens, commandant à ceux qui
demeuroyent en la garde du basteau de tirer sans cesse contre la fregate,
iusques a ce qu'ils l'apperceussent mellé au combat contre les ennemis, les-
quels tascherent se sauuer en terre. Il les suit, & attache l'escarmouche, telle-
ment que le confliēt fut trespre, mais les Mores ayās perdu vne partie de
leurs compagnons voulurent se garantir à la course, ce qui ne leur seruit de
guerres, car ils furent tous attrapez & arrestez par Aluarez Carual braue ca-
pitaine & gouuerneur d'Alcassar Seguir, lequel estoit acouru au bruit de
l'artillerie. César print sa part du butin, puis se retira dedans son basteau.
Quelques iours apres, voguant par le destroit, il fut inuesti de six fustes de
Mores. Iceux ne desiroyent rien plus que de saisir le capitaine César, & pen-
sans qu'à ce coup il lui seroit impossible d'eschapper, commencerēt à huer
en signe de ioye: puis à coups de fêlches, de harquebuzes & mousquets,
tascherent l'accabler. Or César les canonnoit viuement pour empescher
qu'ils n'approchassent de son basteau, rabatant leurs coups par diuerfes fa-
çons de voguer, & tousiours tuant quelques vns, au moyen dequoy leur
cholere se refroidit fort. Ce que lui voyant, courut sus à trois de ces fustes
arrestees ensemble, car le vent auoit chassé les trois autres & les empe-
choit d'approcher. Les ennemis lui vienent aussi au deuant: & sur cela Cé-
sar fit delâcher vn gros canon dôt le boulet, donnant en long de prouē en
poupe de l'vne de ces trois fustes, rompit les rames. Les ennemis retirerent
cestq

ceste fustle mutilée entre les deux autres, & la remettent en equippage selo que leurs affaires le permettoient. Lors ils se reioignent & enuahissent de-
rechef Caesar, lequel courant avec vne braue resolution par tout, & encou-
rageant ses soldats à haute voix, canonna de telle sorte les fustes, que les as-
saillans trouuerent beaucoup plus forte partie qu'ils ne pensoient. Finalement vn coup de boulet emporta la plupart des forçats de l'une des fustes:
au moyen dequoy les ennemis desnuez de plusieurs soldats tuez du cano, voyas deux de leurs fustes brisees, & que la prise de Caesar leur cousteroit trop chet, quitterent le combat. Ce capitaine qui estoit d'un naturel tousiours vigoureux, suiuit les fustes: mais à cause qu'elles vogoient à la rame, & son bateau à la voile, & que le vêt lui faillloit, il ne pût les atteindre, mais, selon son desir, alla surgir au port de Malaga, pour faire enterrer les morts de son costé & penser les soldats blesez durant ce combat.

12. EN ces entrefaites les Portugallois de la garnison d'Azamor se trouuerent en grand danger, par les menées d'un seigneur More nommé Benaduxera, l'un des principaux du pays, fort estimé & en grand credit pour sa vaillance, grandeur & richesses. Il entretenoit d'ordinaire un regimen de plus de quinze cens cheuaux, & grand nombre de pietons, avec lesquels il estoit en guerre contre le Roy de Fez duquel il ne vouloit se rendre vassal. Mais ayant esté desfait en vne grosse bataille, il enuoya lettres à Norogne gouverneur d'Azamor, contenans son intention estre de faire toute la vie seruiçe au Roy de Portugal contre ses ennemis. Norogne acceptât la bonne volonte de ce seigneur, le receut en Azamor avec deux cës cheuaux qui l'acõpaignoyent, & lui fit tous honneurs à lui possibles, mesmes le crea general de quelques compagnies de Xerquie, par le consentement des capitaines. Benaduxera voulant asseurer chascun de son affection enuoye vn sien frere nommé Feres avec beaucoup de presens au Roy de Portugal, lequel le receut courtoisemēt en sa protection, lui renuoya d'autres presens, donna quelques ioyaux à Feres, & lui fit de grandes promesses auant qu'il s'embarquast, commandant à Jacques Melio de secourir ces deux freres quand la necessité le requerroit, afin que ioignans leurs forces ensemble ils peussent faire la guerre tant plus viuement. Par ainsi Melio, sans delayer d'auantage, se met à la voile avecques Feres: & au bout de quelques iours ils se ioignent à Benaduxera, menans apres eux septante cinq cheuaux & des pietons en assez bõ nombre. Lors ce seigneur sortit aux champs suiui d'onze cens vingt cinq cheuaux, & arriuez finalement en vn lieu où est la source du fleue Diuce à soixāte lieuës d'Azamor, chargēt trente deux cõpagnies d'ennemis, en tuent grand nombre, emmeinent quatre cens huitante deux prisonniers, & au bout d'un mois retournent en Azamor, trainās apres eux vn merueilleux butin, dont chascun fut extremement ioyeux, car on estoit ces gens perdus obstant leur long seiour. Or Benaduxera, qui ne pensoit sinon aux moyens de rentrer en la bonne grace du Roy de Fez, obrint secrettement à la sollicitation de ses amis tout ce qu'il desiroit, à condition de mener au Roy tous les Chrestiens qu'il pourroit y attirer finement. Norogne soupçonna quelque chose de ceste menée: & pourtant, encores que

Trahison de Benaduxera contre les Portugallois en Azamor & ailleurs, dont lui & son frere regnoient leur pays.

Benaduxera l'importunast souuent de lui bailler pour compaignon lacques Melio, & que cela se faisoit ainsi, il y auroit moyen de donner de beaux coups, iamais il ne s'y voulut accorder, sans toutesfois en descouurir rien à personne, ni en former proces à Benaduxera, lequel il vouloit descouurir dauantage, & en attendât estoit d'auis de ne se fier que bien à point en celui qu'il presumoit, par plusieurs coniectures, estre inconstant & desloyal. Ce pendant, afin de ne l'esfaroucher il s'en desfaisoit par gracieuses excuses: tellement que Benaduxera frustré de ce costé, & craignant d'estre descouuert, fit vn voyage à Mazagan, où ayant communiqué avec Antoine de Laiët gouverneur de la ville, il lui demanda quelques gens de cheual pour executer vne belle entreprise, l'asseurant que Norogne y enuoyeroit vn réfort de caualerie: mais que la guerre qu'il vouloit commencer requeroit plus grandes forces, pour estre tant plus tost acheuee & avec moins de danger. Antoine qui ne sauoit rien de la trahison, estimant Benaduxera homme digne de foy, à cause de ses deportemens precedens, lui bailla quinze hommes de cheual & quelques gens de pied. Benaduxera apres auoir cheminé enuiron trente cinq lieues avec ses troupes & les gens d'armes Chrestiens, descouurit son intention à Feres son frere, disant qu'il auoit regagné la bonne grace du Roy de Fez, aimant mieux seruir à son Prince naturel & de mesme religion, qu'à vn Roy estranger & contraire aux Mahumetistes. Que pour attirer dauantage le cœur de son Prince, il lui vouloit liurer ces Chrestiens emmenez par finesse de la garnison de Mazagan, esperât que tel don effaceroit entierement les offenses passees. A quoy Feres respondit, Si vous auiez veu en face le bon Roy Emmanuel, pour certain vous n'auriez iamais pensé au meschant acte que vous voulez commettre. Où est la foy? qu'est deuenue le sermēt presté en traitât l'alliance? Auez vous oublié la singuliere douceur & magnificēce de ce Roy? Vous a-il recueilli lors qu'estiez chassé, vous a-il enuoyé des presēs, afin que sans occasiō vous entreprissiez de lui iouer vn tel tour? Je ne m'arreste point à disputer si vous ne lui nuisez guere, mais ie considere la mauuaise volōté que vous auez de lui porter dōmage: car en petites choses lon descouure maintesfois vne malice extreme. Puis que vous menez traistreuement en cruelle seruitude quinze cheualiers Portugallois commis à la fidelité que leur devez: c'est chose assuree que vous ruineriez entierement le Roy de Portugal, si le pouuiez faire, encores que vous ayez promis & iuré de lui estre loyal. Mais outre tout cela, vous considerez bien peu que le Roy de Fez ne prendra guerres de plaisir à vous voir. Vous auez quitté sa protection, lui auez fait la guerre: estant vaincu, despouillé & chassé, estes couru en Portugal vers Emmanuel, comme au dernier refuge en vostre misere extreme. Encores maintenant vous abandonnez Emmanuel? Comment cestui ci se fiera il en vous, qui violez meschammēt & tant de fois la foy que deuriez maintenir? On a dit il y a long temps, que les Rois aimēt vne trahison brassée à leur auātage, & pour la commodité de leurs affaires: mais qu'ils hayssent les traistres. Je diray dauantage. Vous rompez la promesse qu'auiez faite au Roy de Portugal, & retournez en la cour de celui de Fez qui vous hait à mort, &

ne se soucie de tenir sa foy . Au moins quittez les marques visibles de vostre lascheté. Portez vous la banniere du Roy Emmanuel, afin que toutes fois & quantes que les gens verront ceste marque de biē-vueillance & d'amitié ils se souuiennent de vostre forfait? Reposez-vous en ce beau pavillon qu'Emmanuel vous donna, afin qu'autant de fois que le ferez dresser, autāt de fois chascun marque de l'œil vostre desloyauté? Menez vous ainsi traistreusement prisonniers ceux que se fient en vous, afin qu'à iamais vostre perfidie demeure empreinte en l'entendement de tout le mōde, qui se souuiendra que ceux-ci estoient sous vostre charge? Faites comme on dit que les Chrestiens font. Quand ils quittent leur Prince, afin de n'estre estimez ingrats & proclamez tels, ils lui renuoyent tout ce qu'il leur a donē, ne voulans emporter aucunes enseignes de leur lascheté. Quittez cest estēdard, de peur qu'il ne descouure vostre meschanceté. Abandonnez ce pavillon qui ne sauroit receler vne perfidie. Laissez aller ces Chrestiens en liberté, afin qu'ils ne prennent le ciel & la terre à tesmoins contre vous. Feres ayant tenu ce langage hardiment & en cholere, irrita iusques au bout son frere, & peu s'en falut qu'ils ne missent les mains aux espees l'un contre l'autre. Toutefois d'autant que Benaduxera estoit plus grand seigneur, & l'aîné aussi, Feres ne sceut rien gagner sur lui sinon qu'il fit reporter la banniere & le pavillon au Roy de Portugal, & permit aux Chrestiens de s'en retourner en leur garnison. Au reste, ces deux freres prindrēt le chemin de Fez & se presenterent au Roy, lequel les receut avec si mauuais visage qu'il leur fit trancher lestestes, craignant, pource qu'ils estoient riches & grands seigneurs, vne seconde reuolte qui le mettroit en nouuelle peine. Il aimā donc mieux s'en desfaire pour vne bonne fois, prenāt pour couleur de ceste execution, que Benaduxera auoit laissé aller les Portugallois avec la banniere & le pavillon, & que Feres son frere l'auoit induit à ce faire.

13. D V R A N T ces remuemens en Afrique, Siqueire equippa vne puissante flotte en Inde pour se rendre maistre de Diu. Melichsac fils de Melichiaz presuma incontinent que ceste armee menaçoit Diu, encores que Siqueire ne decelast son dessein à personne. Afin donc d'amolir Siqueire sous pretexte de modestie, & tāt pour le destourner de la guerre, que pour descouurir son intention, il enuoye vn sien domestique nōmé Camal avec lettres fort gracieuses & quelques presens assez riches. Siqueire monstra de contenance & de paroles que la venue de cest ambassadeur lui estoit agreable, & faignit porter vne singuliere affection à Melichiaz & à Melichsac. Nonobstant ces couuertures Camal qui auoit bon nez sentit quelle route vouloit prendre la flotte de Siqueire, puis auertit Melichsac, & Hagamahamed gouuemeur de Diu, qu'ils missent bonne garnison dans la ville: ce qu'eux executerent promptement & en grande diligence. Apres que Siqueire eust muni de toutes choses necessaires les nauires qui deuoient retourner en Portugal, il assembla en conseil tous les capitaines qui le deuoient accompagner en l'executiō de ses desseins, leur declaira que pour obeir au Roy il auoit armē ceste flotte pour s'empater de Diu, & les exhorta de le suivre pour auoir part à l'honneur de ceste guerre. Eux louent son auis, & se mon-

Puissante armee navale de Siqueire pour assieger Diu, & comment cela succeda.

strent volontaires & tous prests à executer. La flotte estoit de plus de quatre vingts vaisseaux, avec trois mille Portugallois & mille Naires enrrollez, conduits par les plus braues capitaines de Portugal, tellement que iusques alors n'y auoit eu Viceroy es Indes qui eust mieux équipé ni plus armé de vaisseaux. Sur le commencement du mois de Feurier l'an mil cinq cens vingt & vn, Siqueire & sa flotte mouillerent l'anchre en la coste de Diu. Incontinent Melichfac l'enuoye saluer par ambassadeurs expres qui lui portent force presens. Ce pendant, comme s'il eust pensé à autre chose il arreste en qualité d'ostages Martin Euangelo & autres Portugallois trafiquans en la ville de Diu. Siqueire fit semblant de vouloir aller en Ormus pour appaiser quelques troubles, & pria qu'on lui renuoyast Euangelo & tous les autres Portugallois, desquels il disoit auoir affaire pour vacquer aux negoces du Roy de Portugal. A cela Melichfac & Hagamahamed firent réponse que les Portugallois ne sauroient trafiquer avec plus dauantage ni faire meilleure chere qu'au lieu où ils estoient : qu'eux s'accommodoyent aux Portugallois en toutes sortes possibles, afin de monstrier par cela qu'il n'y auoit ville dût le Roy Emmanuel deust esperer plus d'obeissance à l'auenir. Siqueire pria Melichfac de parlementer, à quoy l'autre s'accorda & vint au lieu designé pour cest abouchement, avec Magamahamed & force soldats. Le discours de Siqueire tendoit à ce point qu'il s'estoit embarqué pour aller donner ordre aux affaires d'Ormuz, & que ce pendant il auoit bien voulu s'arrester en la coste de Diu pour visiter ceste ville amie & associee, pour demander aussi permission à Melichiaz d'y bastir vne forteresse, afin que les Portugallois qui y trafiquoyent peussent negotier plus seurement. Melichfac fit réponse que les Portugallois alloient & venoyent par la ville en aussi grande seureté qu'en leur propre pays. Quant à la forteresse, qu'il ne permettroit nullement qu'on y besongnast, sans le cōgé de son pere. Alors Siqueire pria Melichfac de lui rendre les Portugallois : mais sa réponse fut que ce seroit lui faire grand deshonneur, & l'estimer traistre & ennemi, sur tout les choses estās en tel estat, & le port répli de tāt de vaisseaux, de lui demander des gens qui trafiquoyēt commodement en vne ville confederée & obligée en beaucoup de sortes à se porter fidelement. Que s'il faisoit cela, lon pourroit remarquer de la deshāce d'un costé & de la couardise de l'autre : d'autant que si Siqueire ne vouloit croire que les Portugallois pouuoient se pourmener seurement en vne ville qui les cherissoit, il auroit mauuaise opinion de ses confederéz, outrage le plus grand qu'un ami sauroit receuoir de l'autre : & d'autre part si Melichfac satisfaisoit à la demande de Siqueire tandis que l'armee estoit ainsi pres, on ne le pourroit estimer sinon lasche & de cœur failli entre tous autres hommes. Ce pour-parler donc n'eut aucun effect : & Siqueire ayant assemblé depuis ses capitaines, les auis furent diuers, & finalement fut arresté qu'il n'estoit pas temps d'assailir ceste place, forte d'assiete & d'artifice, & pour lors bien munie de soldats : ains faloit remettre le siege à vne autre fois, & n'estre pas inconsiderément cause de la mort de ceux que Melichfac tenoit prisonniers.

14. Les soldats entédans cest auis, cōmencerent à murmurer & maugreer, accusans tout haut le Viceroy & leurs capitaines. Nous voyōs maintenant (disoyent ils) que la prouesse & vertu des Portugallois est amortie. Les capitaines ne pēsent qu'à réplir leurs bourfes & faire leurs charges par maniere d'acquit, sās se soucier beaucoup de leur hōneur & deuoir. Auioird'hui les chefs ne permettēt plus à leurs soldats de faire preuve de la vaillance qui leur est comme naturelle. C'est par la faute du Viceroy que pour le present tous les peuples Oriētaux se mocquēt des Portugallois, le nom desquels les faisoit trēbler autresfois. On dit que la ville est plaine de soldats. Mais quād est-ce que ces gētils capitaines l'ōt sceu? Estoit il temps de s'en enquerir lors qu'il faisoit cōbatre? On en deuoit sauoir la verité auāt que faire voile. Main tenāt qu'une si puissante armee, qui a tāt coulté à venir iusques ici, est preste à cōbatre & que la commodité se presente, on saigne du nez, & couure-on couardise du nō de sagesse. A ce cōte dōc l'audace & l'incōsideratiō auront serui de cōseil, & en l'execution pour excusēt sa laschetē on l'appellera prudence & vertu. De rechef on allegue qu'il faut cōseruer les Portugallois arrestez dedās la ville: comme si au siege & en la prinse d'icelle il n'y eust deu poit demeurer de soldats. Les capitaines ne deuoyēt pas craindre d'assaillir la place sous ombre de vouloir espargner les vies de ceux qui sōt venus pour cōbatre iusques au dernier souspir. Mais ils ne considerent pas que la vie de ceux qui sōt retenus leās cōsiste en nostre vaillāce, nō pas en faute de cōeur: car si les ennemis redoutēt nos armes, ils ne ferōt rien à nos cōpagnons, cōme au cōtraire, s'ils cōmēcēt vne fois à nous mespriser ils dirōt & ferōt tous les outrages du mōde aux Portugallois qu'ils tiennent en leur puissance. De tels discours les soldats, gēs libres, audacieux, & mesdisās, picquoyēt le Viceroy & les principaux de l'armee. Il futint encores vne autre occasion de mal pēser qui despita ces gēs de guerre iusques au bout. Lon auoit permis à Euāgelo d'aller & venir vers la flotte, moyennāt certains autres ostages qui furēt baillez. Or icelui preuoyāt que ses affaires se porteroiyēt mal, à tous les voyages, emportoit es nauires des paquets d'argent & de meubles: ce que faisoiyēt aussi les autres Portugallois ses cōpagnons. Sur cela le bruit courut incontīnēt que Siqueire corrompu par argēt laissoit la ville de Diu en paix, & l'accusoit-on d'auoir receu ces deniers de Melichfac. Quant à Siqueire, voyāt que c'estoir tēps perdu de s'arrestēr là dauātage, il print la route d'Ormus, & designa vn autre endroit assez pres de la ville pour y bastir la citadelle. Auāt que partir il enuoya Alexis de Menefez en Cochim, Albuquerque en Malaca, George Brittio aux isles Molucques, Raphael Perestrel en la China, laissant Iacques Fernand de Begie, Nonio & Mauuel de Maccede en la coste de Diu, afin que sous pretexte d'amasser viures pour Cochim ils se mōstrassēt amis, iusques à ce que les Portugallois estās en la ville de Diu se fussēt retirez es nauires, & qu'alors ils fissent guerre ouuerte à Melichfac. Tout cela ne cousta riē à executer, car apres que la flotte fust desmarée, les gouuerneurs de Diu permirent incontīnēt aux Portugallois d'aller où bon leur sembleroit: & n'estoit pas malaisē à ceux qui voguoyent en plaine mer sans crainte d'aucune rencōtre de denōcer la guerre aux autres. Toutesfois ce conseil meritoit reprehension: car dequoy seruoit de publier

*Murmures
des soldats
contre Siquei-
re lequel n'en-
treprend rien
sur la ville de
Diu.*

la guerre la force des Portugallois estant eslongnee, & les ennemis ne pouuans estre guerres endommagez? Estoit-ce afin d'auertir ceux de Diu qu'ils fortifiassent encores leur ville, & y fissent entrer nouueau réfort de gens de guerre: Il s'ensuiuoit necessairement de cela que Siqueire n'ayant oté esperer de se faire maistre d'une place aucunesmēt forte, à l'aide d'une si puissante armee de mer, n'entreprédroit iamais de la regarder pour l'assaillir, quād elle seroit munie plus qu' auparauāt, & que sa flotte auroit moins de moyens & de force que la premiere fois. Dauantage, lors que la guerre fut denōcée, lon donnoit occasiō à plusieurs de dire que ce n'auoit esté par bon auis, ains par couardise que Siqueire & ses capitaines auoyēt differé de batre & donnet l'assaut à ceux de Diu. Finalement il estoit maluisé d'excuser les Portugallois, qui commençoient la guerre sans occasion, apres auoir amassé des viures & tiré leurs compagnons hors de la ville. Mais il faloit que Siqueire à son retour d'Ormus, comme il auoit iuré de reuenir, trouuant la ville en paix & sans opinion de guerre, inuentaist alors quelque pretexte (ce qui lui eust esté bien aisé) pour faire la guerre plus honnestement, par meilleur auis, & avec les deniers & autres moyens qu'il pouuoit apporter d'Ormus.

Goa en extrême danger par les menées de Zabaim, & par quel moyen deliurer.

ENVIRON ce mesme temps Goa fut reduite en grand danger: car 15. dautāt que Siqueire resolut de faire son armee nauale la plus puissante qu'il seroit possible, il s'ensuiuit que la ville de Goa fut afoiblie d'autāt. Zabaim Dalcam sachant bien telle chose, estima le temps estre venu de recouurer son isle, & pourtant il fit amas de gens d'armes. Là dessus Crisnate Roy de Narfingue, ennemi iuré de Zabaim, craignant que s'il reconquestoit Goa, vt tel surcroit ne l'échardist à machiner quelque autre plus grāde chose, delibera de rompre ce coup par vne guerre ouuerte, dont il eut encores vne autre occasion: c'est que si Zabaim se rédoit seigneur de Goa, tous les cheuaux de Perse & d'Arabie y seroyent arrestez, tellemēt que le royaume de Narfingue en seroit frustré. Or afin de faire la guerre plus viuement & seurement, il voulut s'y trouuer en personne, & manier lui-mesmes ses affaires. Ainsi ces deux Princes se rencontrerent avec leurs armées sur les limites de Goa, & se donnerent vne terrible, sanglante & lōgue bataille: mais le Roy de Narfingue demeura victorieux, print de force plusieurs villes, & adioignit à son royaume diuerses provinces de Zabaim, entre autres celles de Balagate, qui payoyent tous les ans vn grād tribut à Zabaim. Ce Roy, Prince fort riche, estimant moins le reuenue de ces provinces que la commodité de recouurer des cheuaux en Goa, pour gagner la faueur des Portugallois enuoya son ambassadeur vers Roderic Melio gouverneur de la ville, lui declarer que le Roy de Narfingue estoit prest de quitter à celui de Portugal, lequel il aimoit comme son propre frere, la possession des provinces ou gouuernemens de Balagate, n'ayant rien plus à cœur que de faire alliance & cōtracter telle amitié avec Emmanuel, qu'on diroit que iamais deux Princes n'auoyent esté plus estroitement vnis. Qu'au retour de Siqueire il enuoyeroit des ambassadeurs, pour ratifier ceste alliance avec toutes solennitez requises: cependant il exhortoit Melio d'enuoyer promptement des commiss-

commissaires pour s'emparer de ces gouuernemens, & y loger des garnisons. Melio fort ioyeux de telles nouvelles, veu que par main d'autrui le danger imminent estoit repoussé, & le reuenu du Roy de Portugal augmentoit, remercia celui de Narlingue, lui enuoyant force presents : & partit soudain avec deux cens Portugallois à cheual & sept cens pietons Indiens pour entrer au gouuernement de Salsete, où il ne trouua personne. Ayât sejourné là quelques iours & attiré le peuple à trafiquer, dressé quelque forme d'estat public, & logé les garnisons requises, il y établit capitaine & maistre des ports & peages son neuueu Roderic Iusarte Melio. Puis entendât que les gouuernemens de Ponde & de Barde estoient abandonnez, il commanda à Iusarte de s'en emparer. Deux mois apres Iusarte ouit nouuelles que deux lieutenans de Zabaim approchoient avec vne armee pour exterminer les Portugallois, dont il auertit son oncle, lequel alla au secours, & desfit les ennemis en bataille rangée. Puis ayant fait informations contre ceux qui auoyent eu intelligence avec Zabaim, emmena prisonniers en Goa cent trente des principaux, qu'il retint comme pour ostages, tellement que les affaires demeurèrent paisibles quelque temps.

16. EN ceste mesme annee y eut sedition esmeue en l'isle de Zeilan contre les Portugallois, par leur propre faute & maluersation. Nous auons veu ci dessus que Loup Soarez bastit vne citadelle au port de Colombo qui est en la mesme isle. Loup Brittio, capitaine d'icelle apres le depart de Jean Sylueire, la fit rebastir depuis les fondemens iusques au sommet: car la premiere fois (à cause qu'il falloit diligenter, autrement les Portugallois eussent eu beaucoup à souffrir, & pource aussi que l'on ne trouuoit point de chaux) elle auoit esté faite d'argille & de cailloux meslez confusément ensemble. Mais à ceste seconde fois Brittio amassa quatre cens charpentiers & manœuvres, avec tous les materiaux necessaires apportez sur la place. Ceste citadelle paracheuée, les Portugallois commencerent à brauer & outrager les insulaires, comme si c'eust esté quelque acte de noblesse de battre & tourmenter ces pauvres gens. Les Zeilandois irrités de tant de torts coupèrent les viures, ne fournissent rien qu'à contrecœur, blessent de plusieurs playes ceux qu'ils pouuoient attrapper à l'escart, brief font tous actes d'hostilité. Brittio dissimuloit tous les maux que l'on faisoit à ses gens, les contenoit à ce qu'ils ne s'auançassent trop, & enuoyoit prier les gouuerneurs de l'isle d'empescher leurs gens qui faisoient ainsi la guerre. Quant aux Portugallois ils grinçoient les dents, & accusoyent leur capitaine d'estre lasche & couard, endurant les insolences des Zeilandois, & l'importunoient souuent de contraindre à coups d'espee ces barbares d'estre plus sages, & de iour à autre le picquoient de paroles pour l'induire à prendre les armes. Mais Brittio consideroit qu'en commençant la guerre il y auroit du danger pour les vns & pour les autres, que la victoire cousteroit trop cher, qu'en lui coupant les viures ses soldats avec lui seroient reduits à vne merueilleuse extremité, & faudroit se hasarder à quelque mort estrange: neantmoins vaincu par les importunes remonstrances de ses gens, il aima mieux satisfaire à leur temerité, que faire la charge avec raison & moderation. En quoy

Tumulte en l'isle de Zeilan.

lon apperçoit qu'il est beaucoup plus malaisé & notable aussi de mespriser vn fausse opinion d'honneur, que de se fourrer à teste baissée à trauers les glaiues d'un ennemi. Car plusieurs qui ne font difficulté d'exposer leurs vies à tous hazards pour le salut de leur patrie, la ruine & renuersent souuentefois entant qu'en eux est, pour la crainte qu'ils ont d'encourir quelque note d'infamie qui n'est point infame. Dont on peut conclure celui là estre véritablement magnanime, qui non seulement desfie la mort quand elle se presente, ains aussi qui ne tient compte des bruits & vains discours de gens qui babillent sans sauoir dequoy ils parlent.

*Guerre de
Zeilan, & les
accidens d'cel-
le iusques à la
paix.*

P O U R reuenir à Brittio, pour n'estre blasmé de ses soldats qu'il deuoit 17.
viuement reprimer, il fit vn trait d'homme estourdi, & qui merite grande reprehension: Car vn iour apres midi, & lors que les insulaires estoient à repos en leur maison à cause de l'ardante chaleur qui brusloit la terre, sans se douter de rien, il sortit de la citadelle suivi de cent cinquante Portugallois, court sus à des gens de farmez, remplit la bourgade de frayeur & de sang, & contraint les habitans de se sauuer de viffesse. Mais apres s'este rassemblez en campagne, & rassuré l'un l'autre, ils se souindrent d'auoir laissé leurs femmes & enfans destituez de secours: pourtant ils retournent vers leurs maisons, & en troupe se fourrent à teste baissée parmi les Portugallois, qui sentans trop pesant fardeau sur leurs bras, se retirerent avec trente blesez, & n'en fussent pas eschappez à si bon marché, si les insulaires ne se fussent amusez à estaindre le feu que Brittio fit mettre es maisons basties sur le chemin de la citadelle, afin d'auoir moyen de se retirer sans estre pouruiui. Le bruit coutut incontinent par l'isle, que les Portugallois estoient si desbordez & farouches quoy qu'estrangers & en pays lointain, que sans auoir receu tort de personne ils auoyent machiné la ruine de leurs hostes: dont tous les Zeilandois furent tellement irritez, qu'ils delibererent se venger du dernier effort susmentionné. De fait, ils s'amasserent au nombre de plus de vingt mille hommes & coururent assieger la citadelle, foffoyans tout autour, & dressans des leues de terre sur lesquelles ils braquerent quelques pieces, puis commencerent à battre la ciradelle, sans cesser de nuit nō plus que de iour. Ils firent tous efforts de guerre avec vne resolution & hardiesse incroyable pour forcer ceste place. Ce pendant les assiegez qui faisoient braue resistance auoyent à combattre la faim qui lestenoit à la gorge, & demeurerent ainsi enclos l'espace de cinq mois, auant que personne les peust secourir. Alors ces furieux gens d'armes deuenus plus souples se repentoyent de leur folie, & aprenoyent vn peu bien tard que ce n'est pas à faire à vn soldat de prescrire à son capitaine quand, qui, ou & comment il faut combattre, ains doit seulement bien faire ce qui lui est commandé. Brittio enuoya messager expres en Cochim pour auertir que lui & ses gens n'en pouuoient plus. Siqueire voulant auoir vne grosse flotte n'auoit laissé que bien perite garnison en chaque citadelle: neantmoins Alexis de Menesez gouverneur de Cochim enuoya au secours en vne galere cinquante Portugallois sous la charge d'Antoine de Leme. Iceux ne pouuans voguer en diligence à cause des bourasques & tourmentes, arriuerēt tard en la citadelle, & lors Brit-
tio

tio entendit du capitaine Leme qu'il ne falloit plus attendre de gens que Si- queire ne fust de retour. Or il n'y auoit ordre de delayer plus longuement, sinon qu'ils voulussent mourir de faim : pourtant Brittio cōclud de iouer à la desesperée, & cōmanda au capitaine Leme de canonner furieusement de sa galere durât toute la nuit les tourelles & forts des assiegeans. Sur le matin, comme les insulaires estoient apres à se garantir du tonnerre de la galere, sans presumer (comme il n'y en auoit gueres d'apparence) que les assiegez osassent mettre le nez dehors, Brittio sort avec trois cens Portugallois, surprend les ennemis, fauce du premier coup leurs forts & bouleuards, & les effroye tellement qu'ils quittent la place. Mais d'autant qu'ils estoient vne telle multitude, estans entrez en la bourgade, ils furent tancez par les plus experimentez d'entre eux, & encouragez de telle sorte qu'ils retournerent au combat. Outre les gens de pied il y auoit en l'auantgarde cent cinquante hommes à cheual, & vingtcinq elephans avec leurs tourelles, aucuns desquels portoyent des glaiues trenchans à leurs dents crochues, dont ils blesoient les premiers trouuez avec vne merueilleuse adresse. Aucuns Portugallois estonnez de voir tant de gens & sur tout l'impetuosité de ces bestes farouches, vouloyent reculer : mais Brittio auoit laissé le camp & s'auancoit vers la bourgade. Lors il enioignit aux harquebuziers de viser tous à ces elephans, lesquels fâchez d'un bruit d'harquebuzades non acoustumé, & encores plus des playes que les bales leur faisoient, se tournent vers leurs gens mesmes, renuersent & foulent aux pieds les hommes de cheual, rompent entierement le bataillon des pietons, & mettent en route l'armee des insulaires, tellement que les Portugallois n'auoyent personne à combattre : pourtant ils se mirent à la poursuite, firent vne terrible boucherie, chassent toute la garnison de la bourgade, & suiuent les fuyards iusques pres d'une forest de palmiers. Brittio ne trouua pas peur de passer oultre, craignant que les arbres pour estre trop pres l'un de l'autre ne cōtraignissent les gens de marcher à la desbandee, & que cela donast moyen aux ennemis de les endommager. Ainsi donc il fit sonnet la retraite. Le Roy de Zeilan voyant la plupart de sa noblesse tuee en ceste sortie, & que les Sarasins, auteurs de la guerre, s'estoyent sauuez sans combattre : presumant d'autre part que le plus fort restoit à faire, & que tant plus la guerre tireroit en longueur, plus son estat se trouueroit esbranlé : considerant aussi que, tenant la citadelle assiegee encores quelques mois il auroit à combattre vne armee nauale : encores que les Sarasins n'en fussent d'avis il demanda la paix, qui lui fut tres-volontiers accordee, la necessité du temps le requerant ainsi : tellement que l'alliance fut renouvellee, les Portugallois se porterent plus modestement en l'isle que ils n'auoyent fait par le passé, & les Zeilandois d'autre part firent meilleur traitement à leurs hostes, fust de bon cœur ou par faintise : tant y a que les vns entretindrent les autres mieux que par le passé.

18. T A N D I S que lon se battoit en Zeilan, les Portugallois se trouuerent en grand danger dedans Ormus, par les embusches qu'on leur dressa : ce qui print commencement de la debonnaireté du Roy de Portugal, lequel entendait que les Rois d'Ormuz auoyent esté tresindignement traitez par leurs

*Conspiration
du Roy d'Or-
muz & de son
conseil contre
les Portuga-
lois.*

propres suiets, & qu'apres la ville prinse par Albuquerque, qui les auoit deliurez, neantmoins leurs seruiteurs manioient tellement les douannes & gabelles, que la plupart des deniers demeuroit entre les doigts des receueurs, delibera d'y pouruoir, à ce que telle piperie ne se commist plus à l'auenir. Pour cest effect il establi des thresoriers, secretaires & controlleurs des finances, lesquelles il vouloit estre entierement employees à l'entretienement du Roy d'Ormus, & ce iusques à tant que lui-mesmes peust conoistre à cōbien montoit sa despenſe annuelle, & ce qu'on auoit tiré de ses coffres, & que tel calcul lui fist toucher au doigt que toute sa prosperité dependoit de la sauuegarde du Roy de Portugal. Raix Xeraf & autres courtifans, coupables de ce mesme crime de peculat au manient des finances, furent extremement despitez de se voir forclos du moyen de fouiller au thresor public pour emplir leurs bougettes, comme ils faisoient d'ordinaire es autres annees. Se voyans donc ainsi rebutez par l'adrese & fidelité des Portugallois, ils taschent de persuader au Roy, qu'il ne portoit que le nom, & qu'en effect il estoit priué de son droit & domaine: que sous couleur d'amitié on tyrannisoit son royaume tout ouuertement, & que tout le reuenue seruiroit à estancher aucunement l'auarice des Portugallois: qu'il valoit mieux mourir mille fois que d'endurer vn tel outrage. Ces propos repetez à diuerses fois par tels cōseillers pēdus à toutes heures à l'oreille de ce Roy, le changerent entierement & rendirēt ennemi des Portugallois, ausquels autresfois il portoit singuliere affectiō. Apres auoir communiqué l'affaire au beau-pere du Roy, ennemi mortel des Chrestiens, il fut arresté, apres que Siqueire seroit parti d'Ormus, qu'on couperoit la gorge aux Portugallois, & mettroit-on force soldats en la citadelle. Mais il y auoit vne difficulté, au cas que ceste coniuration ne peust estre executée, & que leur dessein fust descouuert, qu'ils n'eussent pour aduerfaire vn Prince nommé Mochri, lequel venant à se ioindre aux Portugallois, pourroit beaucoup nuire aux Ormusiens.

Siqueire induit par la fraude du Roy d'Ormus à faire la guerre au Prince Mochri, & le succès de cela.

L'ISLE nommée aujourd'hui Baharem (qu'aucuns estiment estre celle que les anciens appelloient Ichare) est séparée de l'Arabie par vn petit bras de mer. Elle dependoit du royaume d'Ormus: & toutesfois Mochri gendre du Prince de la Mecque s'en estoit emparé à force d'armes. Non content de cela il auoit armé vne flotte de six vingts voiles, moyennant quoy il ne laissoit gueres en repos le Roy d'Ormus. Auāt donc qu'exécuter la cōspiration sus declarée, ces bons cōseillers resolurent de ruiner premierement Mochri: & pour paruenir à cela, s'auiserent d'vne trahison notable entre les autres, deliberez de desfaire l'ennemi qu'ils redoutoyēt le plus par les mains de ceux ausquels ils pretendoyēt couper la gorge puis apres. C'est aussi l'ordinaire de la plupart des Mahumetistes de s'estimer fort habiles gēs, s'ils peuuent cōmettre quelque insigne acte de desloyauté. Or dōc ceux ci vont trouuer Siqueire, lui font entendre que le Roy de Portugal estoit vray seigneur d'Ormus, & partant deuoit ruiner par la force de ses armes tous ceux qui endommageoyent son nouueau royaume. Qu'il ne fust pas à Mochri de piller les reuenus d'Emmanuel, mais aussi tous les vaisseaux

vaisseaux tenans la route d'Ormus estoient partie par force, & quelques fois sous pretexte d'acommodement, menez au port de Baharem en laquelle il commandoit d'autorité, & que tenât ce passage, la douanne royale estoit fort diminuee. Que le Roy d'Ormus estoit si court de finances qu'il ne pouuoit plus fournir le tribut deu à celui de Portugal. Et pourtant prioyēt Siqueire de pouruoir à l'honneur & dignité de son Prince, affermir sa domination, reprimer vaillamment l'arrogance de ce tyranneau de Baharem, & donner ordre qu'un Roy allié, tributaire, & tresaffectionné seruiteur de celui de Portugal, fust maintenu : afin que chascun entendist que les sujets d'un si braue Prince estoient bien asseurez sous la protection d'icelui. Ils adioustoyent à cela que par vne grande prouidence de Dieu Siqueire estoit lors arriué en Ormus avec vne si belle armee nauale : & qu'il estoit impossible d'imaginer temps plus propre, ni meilleure commodité d'executer ceste haute entreprise à souhait, comme à ce coup. Par tels propos ils induisirent Siqueire de trouuer bonne la guerre cōtre Mochri : toutesfois il en voulut auoir l'avis de ses capitaines, qui enclinerent tous à cela. Suiuānt quoy furent armees sept nauires sous la charge d'Antoine Correa, qui auoit acquis fort grand honneur en la desfaite du Roy de Bintam pres de Malaca. Il fut suiui de quatre cens Portugallois, gentilshommes pour la pluspart, pour aller cōbatre Mochri & les siens. La flotte du Roy d'Ormus, composee de cent cinquante voiles, dont Xeraf estoit general, se loignit aux Portugallois, & y auoit en ces vaisseaux d'Ormus trois mille Sarafins archers, picquiers, & harquebuziers, munis de canons & de toutes choses necessaites à la guerre. Comme ils tenoyent leur route, vne tourmente soudainement leuee escarta les vaisseaux. La mer estāt appaisée, Antoine Correa & Iean Peteire avec leurs nauires arriuerent en l'isle de Baharem, à l'endroit où est assize vne ville de mesme nom, assez grāde, & renommee pour la beauté de ses bastimens & le grand nombre de ceux qui y habitent & trafiquent de tous endroits pour la commodité du commerce. Mochri ayant entendu qu'on le venoit visiter, auoit fortifié ceste ville, disposé force artilleriees endroits necessaires, & souldoyé douze mille Arabes pour la defense d'icelle. Correa attendit à l'ancre, vn peu arriere de Baharem, la flotte d'Ormus, laquelle arriua six iours apres, & tous se rallierent, fors deux nauires Portugalloises, dont l'une fut rechaissée de la tourmente iusques en Ormus, l'autre print port en l'isle de Baharem apres la guerre acheuee. Les troupes ayans prins terre, Correa les rangea incontinent en bataille, puis assaillit la ville de toutes parts : mais à ceste premiere venue les assaillans furent viuement repoussez. De rechef Correa donne à teste baissée dedans deux forts, & lors y eut vn cruel conflict, qui dura longuemēt : toutesfois les assaillans entrerent dedans & contraignirent les ennemis de tourner le dos, ayans laissé morts sur la place trois cens hommes de pied & trente de cheual. Les Portugallois y en perdirent cinq, entre autres George Pereire, & eurent septante blessez, nommēmēt Antoine Correa qui receut vn coup fort dangereux. Son frere Arias, port'en seigne de la compagnie, eut tant de playes, que pour auoir trop perdu de sang il tomba esuanoui, en danger

d'estre acheué par les ennemis, si Alexis de Soufe & Roderic Correa, braues gentilshommes, ne fussent acourus au secours: mais en voulant desgager Arias, ils furent griefuement blesez eux-mesmes. Xeraf se porta sagement alors, car il ne se trouua point en la meslée, & n'emporta de butin en ses nauires que ce qu'on lui laissa prendre. S'il eust voulu suiure les Arabes auec ses troupes entieres, il y eust eu beaucoup plus d'ennemis par terre. Apres cest exploit, Correa se saisit du palais de Mochri, print possession de la ville au nom du Roy Emmanuel, loua ses gens de leur bon deuoir, & fit cheualiers quelques vns qui s'estoyent le plus vaillamment portez au combat: puis ayant prins le serment de Xeraf, representâr la personne du Roy d'Ormus, il lui bailla le gouuernement de la ville, à condition de reconoistre à perpétuité le Roy de Portugal pour souverain. Or Xeraf ayant entendu que Mochri estoit mort trois iours apres la bataille, à cause des playes qu'il y auoit receues, courut, par la permission de Correa, iusques au lieu où ce Prince auoit rendu l'esprit, & coupa la teste au corps mort pour en faire vn agreable present au Roy d'Ormus. Les vaisseaux estans à la rade de Baharem furent bruslez, Hamet neveu de Mochri, gouuerneur d'une autre place nommee Catife, situee en la mesme isle, la quitta, & sous la promesse que Correa lui fit, passa bagues sauues en terre ferme: & ainsi finalement toutel' isle demeura paisible au Roy d'Ormus. Correa de retour en Ormus fut receuilli de Siqueire, cômme sa prouesse le meritoit, & receut beaucoup de presens du Roy: mais la conspiration susmentionnee demeura en suspens, & l'exécution en fut differee iusques à vne autre fois.

Conspiration contre Iehabentafuf qui est trais treusement tué à table.

En ceste mesme année, Iehabentafuf voulant venir au dessus d'une belle entreprise, fut tué en trahison. Il s'estoit resolu de faire la guerre au Xerif & assaillir la ville de Maroch, & pour cest effect demanda secours à Nonio Mascaregne, qui lui fournit trente cheuaux & vingt pietons seulement, conduits par Roderic Norogne. Outre ceux là, Francisque Melio, Alfonse Gomeze, Jean Fernand Prete, & Ignace Nonio, importunerent tant Mascaregne qu'il leur permit d'aller à la guerre auec Iehabentafuf, & furent suivis de vingt autres à cheual & de cinq hommes de pied, sans que Mascaregne en voulust laisser sortir dauantage, car mesmes il fit fermer les portes de Safin, de peur que nul ne s'en allast sans congé. Iehabentafuf appella les Mores de Dabide & de Garabie, ensemble ceux de Ledeihambre auec lesquels il auoit traité accord. Mais ces Mores de Ledeihambre, gens qui n'auoyent aucun tenue, & qui imaginoyent des dangers en l'entreprinse de Iehabentafuf, n'osoyent se mettre aux champs: & d'autre part ils craignoyent que Iehabentafuf ne leur courust sus, s'ils refusoient de le suiure. Là dessus ils complotterent de le surprendre & lui couper la gorge. Pour executer cela seurement, ils faignirent ne desirer rien plus que de lui rendre obeissance, & finalement se rendirent aupres de lui, mais pour lui oster la vie. Enuiron le mesme temps Nacer Roy de Mequinez escriuit à Iehabentafuf, que lui & son frere Hamet Roy de Fez auoyent appointé tous leurs differens, & delibéré de ioindre leurs forces ensemble pour enuolopper Iehabentafuf qui ne leur sauroit iamais faire teste, & n'y auoit moyen de se garentir, s'il

ne

ne faisoit quelque bon coup pour se remettre en la bonne grace du Roy de Fez & effacer toutes les fautes precedentes. Que s'il estoit sage il deuoit attrapper finemēt autant de Chrestiens qu'il lui seroit possible, & les liurer au Roy de Fez : autrement il ne pouoit attendre que ruine & confusion soudaine. Iehabentafuf trouua telles lettres si impertinētes qu'il ne daigna y respondre. Ce pendant on lui vint dire qu'un certain seigneur des montagnes auoit chargé, desfait, & tué un sien capitaine nommé Abraheim, frere d'Azume, estimé vaillant & riche entre les Mores, & emmené prisonniers cinquante hommes de cheual : ce qu'entendu, Iehabentafuf alla visiter Azume pour le consoler, assister au banquet funebre qu'Azume deuoit faire en l'honneur de son frere, selon la coustume du pays, & faire en personne les autres deuoirs & offices de fidele ami. Il auoit laissé tous les Chrestiens & toute sa famille es pauillons, menant trois de ses capitaines, qui lui tindrent compagnie iusques au camp des Mores de Dabide. Or comme il banquettoit à table sans se douter de rien, trois des principaux coniuerez le viennent saisir par derriere, & lui donnent tant de coups de poignard qu'il tombe mort. Les trois capitaines venus avec lui, voulans le secourir, firent deuoir de vaillans hommes en telle necessité : mais ils furent assaillis & taillez en pieces par les autres coniuerez. Incontinent Oleidehabram assaillit le camp de Iehabentafuf. Roderic Norogne & les autres Chrestiens, ralliez avec les Mores de Garabie, prennent le chemin de la ville. Comme ils marchoyent, plusieurs de ces Mores, gens inconstans, traistres, & prests à changer de parti d'heure en heure, complotterent de tuer les Chrestiens, afin d'auoir leurs armes & cheuaux : mais leurs capitaines rompirent ce coup. Sur ces entrefaites arriue un seigneur nommé Allebembeques, ennemi de Iehabentafuf, & cōfederé d'Oleidehabram, lequel enuoya requerir Norogne de parlementer ensemble. Ainsi qu'ils deuisoyent à part, ses gens courent sus à ceux de Norogne, qui n'estoyent pas sur leurs gardes, en tuèrent grand nōbre, & prindrent les autres avec Norogne, puis les emmenerent pour estre esclaués. Quelques uns eschapperent, entre autres un More nommé Bogime, duquel la femme & les enfans demeuroient à Safin, qui ne cessa de courir iusques à ce qu'il fust arriué là, pour compter ces pitieuses nouuelles. Lors Mascaregne monte promptement à cheual, suivi de cent cinquante autres, & doublant le pas, arriua bien tost au camp de ces meurtriers, qui estoyent enuiron à cinq lieues de là. Il donne à bride abatuë à trauers leurs pauillons, en tue cent cinquante, prend plus de six cens cinquante prisonniers, & emmene un merueilleux butin de bestail à laine & à corne dedans Safin, remportant une belle victoire des ennemis, & vengeant en mesme iour un detestable forfait. Ce iour mesmes Frācisque Melio reuint avec six hōmes de cheual eschappez de la main des Mores : & le lendemain arriuerent seize pietons, & deux autres hōmes de cheual, qui auoyent quitté leurs montures pour gagner au pied avec les seize autres. Telle fut la fin de Iehabentafuf, vaillant seigneur More, tresbel exemple de preud'hōmie, rare entre ceux de sa nation : & tresfidele, car iusques au dernier soupir de sa vie il porta les armes heureusement & avec tresgrande reputatiō

pour maintenir l'honneur & la domination du Roy Emmanuel.

*Edouard de
Menezes, vi-
ceroy des In-
des.*

A y commencement de ceste annee mil cinq cens vingt & vn, Emma- 21.
nuel establir Edouard de Menezes Viceroy des Indes, lequel fit voile de
Lisbonne le cinquiesme iour d'Auril avec vne flotte de quinze nauires, &
arriua sans perte ni incommodité aucune au port de Batticala, & incont-
nient prit possession de la charge qui lui estoit commise. En la mesme an-
nee George Albuquerque & George Britio s'embarquerent pour aller l'un
à Malaca, l'autre aux Molucques: mais ils ne rencontrerent pas l'un comme
l'autre en leur navigation. Nous commencerons à deduire ce qui auint à

*Guerre de
George Albu-
querque au
royaume de
Pacem.*

Albuquerque, lequel menoit avec soy vn Prince chassé de son pays, des-
pouillé de ses biens & estats par vn tyran meurtrier du père de ce Prince, &
pretendoit le remettre en possession du royaume de Pacem. Estans arriuez
au port de la ville capitale aussi nommee Pacem, le bruit courut que le fils
du feu Roy estoit en ceste flotte, qui fut cause que plusieurs se retirerent
aux nauires, firent la reuerence à ce ieune Prince, & crierent viue le Roy. Le
tyran appellé Gueinal, auoit fortifié la ville d'un fossé & d'un bon rempar,
disposé des soldats en diuers endroits, brâqué force artillerie, & posé plu-
sieurs corps de garde: car on lui rapporta que le Viceroy des Indes deuoit
enuoyer vne armee pour le chasser du royaume de Pacem. De fait Albu-
querque lui enuoya dire que s'il quittoit au vray successeur du feu Roy la
couronne par lui iniustement & meschamment vsurpee, il iouiroit d'une
meilleure cōdition qu'il ne faisoit auât que s'estre emparé de ce royaume.
Mais le tyran fit respōse que par droit de bōne guerre ils estoit saisi de la cou-
ronne qui lui appartenoit legiriment, & qui lui auoit esté rauie à tort
par le defunct: qu'il estoit prest de faire hommage au Roy de Portugal, &
payer fidelement le tribut qui lui seroit imposé. Là dessus il supplioit Albu-
querque de ne vouloir en faueur de qui que ce fust de posseder contre tou-
te equité vn Roy qui tenoit la couronne à iuste tiltre, & qui remettoit de
bonne affection sa personne & son estat en la protection d'Emmanuel. Ap-
pres beaucoup de prieres & protestations faites en vain de part & d'autre,
il fut arresté qu'on assauldroit la ville. De bon heur Manuel de Gama parti
de Malaca avec vne nauire bien equippee, estoit arriué au port de Pacem.
Outreplus, le Roy de Daru voisin de Pacem, & parēt du ieune Roy (en fa-
ueur duquel il auoit entretenu la guerre contre Gueinal) entendant que les
Portugallois estoient resolu de forcer la ville, assembla soudainement vne
armee de trois mille hommes, vint trouuer Albuquerque, & lui offrit sa
personne & tous ses moyēs. Albuquerque le remercia de sa franche volōté,
disant au reste, qu'il n'auoit besoin de ses forces pour entrer dedans la vil-
le, ains seulement pria ce Roy de regarder le combat, pour iuger des coups,
& conoistre de quel bras les Portugallois fauoyent frapper leurs ennemis.
Mais de peur qu'apres la victoire (qu'il esperoit obtenir à l'aide de Dieu) les
troupes du Roy, meslees parmy celles de Gueinal, ne se trouuassent enue-
loppees au danger, il leur donna pour signal vn chapeau de brâches d'arbre
que les soldats deuoyēt mettre sur leurs testes, afin d'estre reconus d'avec les
autres. Cela fait, Albuquerque disposa ses gēs en trois bandes, baillât la pre-
miere

miere à Sance Henriquez, la secôde à Alfonse de Menefez, la troisieme lui demeura, en laquelle estoient Manuel de Gama, Antoine Mirande d'Azeuede, Garfie de Chaigne, Hector Valladares, Francisque Boucarte & quelques autres gentilshommes, qui auoyent ia fait preuue de leur vaillance en maints endroits. Sance desmarche incontinent pour se rendre maistre du premier fort. Menefez voulant auoir sa part de l'honneur, courut vistemment assaillir le lieu qui lui estoit assigné. Puis Albuquerque les suiuit avec ses gens, encourageant chascun au combat. L'escarmouche dura longuemēt & bien chaude à coups d'harquebuzes, de fleches, & de pots à feu. Il y auoit vn boulevard dont les Portugallois estoient battus avecques blessure de plusieurs. Denis Melio, Gama, Valladares & Boucarte marchēt droit à la porte, l'enfoncent, brisent les gonds & verrouils, puis entrent à teste baissée avec leurs soldats, tellement quē le premier fort leur demeura. L'autre mieux muni se defendoit courageusemēt, si que les soldats eurent beaucoup de peine à le forcer, & s'y trouuerent maintesfois en grād dāger de leurs personnes: car la partie estoit beaucoup plus forte qu'ils ne pensoient, & cōfesserent depuis que Dieu auoit besongné en cest endroit d'une façon speciale pour leur donner victoire. Quatre cens seruiteurs domestiques & amis du tyran Gueinal, ensemble deux mille des soldats entretenus à ses despens, furent lors taillez en pieces. Gueinal mesme fut tué aussi, ses femmes & enfans prins prisonniers. Albuquerque n'auoit mené au combat que deux cens huitante Portugallois, qui reuindrēt tous, exceptez quatre occis en la meslée. Le Prince, heritier du feu Roy, fut mis en possession du royaume par Albuquerque, lequel lui fit prester hommage & serment de fidelité au Roy de Portugal, le cottisa à certain tribut annuel, mit force ouuriers en besongne, & bastit vne citadelle, dont il cōmit la garde à Sance Henriquez avec vne garnison de cent soldats: puis reprint la route de Malaca, & s'y rendit sain & sauf avec toute sa flotte.

22. Q V A N T à George Brittio il mouilla l'āchre avec six nauires en la Taprobane au haure d'une ville nōmee Dachē. Le Roy de ce pays & quartier de l'isle vouloit mal de mort aux Portugallois, depuis le temps qu'Alfonse Albuquerque auoit conquis Malaca: tellement qu'il pilloitt du tout ceux qui par cas d'auenture arriuoient en ce haure. Brittio sachant cela lui enuoye dire qu'il s'esbahissoit fort que tous les Rois de Taprobane fussent amis des Portugallois, & que lui en fust ennemi, iusques à despouiller ainsi ceux qui venoyent surgir là: & sur ce le prioit & exhortoit de vouloir contracter ensemble vne bonne paix, & en signe d'amitié faire rendre tous les biens ostez aux Portugallois. La responce du Roy fut qu'il donneroit ordre de faire chastier les coupables d'un tel crime, & satisferoit au reste de la requeste: mais en lieu de tenir promesse, il fortifioit sa ville plus que iamais. Brittio voyant qu'on le paissoit de paroles, mit en terre ce peu de gēs qu'il auoit, assaillit le fort qui gardoit le haure & y entra de force, commençant la charge à coups de picques & d'espees, pource que les archers & harquebuziers qui deuoient combattre au premier rang, selon la deliberation de Brittio, n'estoyēt encores en terre, à cause d'un vent contrainte qui les re-

Arrivée du Capitaine Brittio en l'isle Taprobane, où il est assailli & tué avec les capitaines & principaux de sa flotte: & que donna le reste.

tenoit. Les ennemis se retiroient en grand' haste, quand voici venir le Roy suivi de plus de mille gentilshommes bien armez, & de six elephans. Brittio attendoit dedans le fort le reste de ses troupes : mais Iean Serran enseigné de la compagnie, sans respecter l'autorité de son capitaine marcha vers les ennemis qui gaignoyent vn costau : & quoy que Brittio le rappellast à haute voix, il fit la sourde oreille, continuant en son audace & forcenerie, tirant beaucoup de ses semblables apres soy, tellement que Brittio ne les pouuant plus arrester fut contraint aller à la queue de ces insensez. A la premiere charge ils desmarcherent si resoluement que les ennemis reculerent dedans la ville. Lors estimans auoir tout gaigné ils'entrèrent apres, afin de ne laisser reprendre halaine aux fuyards : mais ils se trouuerent incontinent bien loin de leur compte, car ils rencontrerent en vne large place les forces du Roy, dont ils furent enveloppez. Ce fut là que les Portugallois firent merueilles voyans qu'il falloit mourir. Iean Serran fut le premier tué. Vn braue capitaine nommé Gaspar Fernand, marchant à teste baissée droit à vn des elephans pour le transpercer d'vn coup de iaueline, fut empoigné par l'elephant qui l'esleua bien haut avec sa trompe, puis le ietta de grande roideur contre terre, & le foula aux pieds, tellement qu'il expira sur le champ. En apres Brittio tomba mort par terre, puis Christofle Pincte, Iean Peréire, Francisque Godize & plusieurs autres. Ceux qui peurent se tirer de la presse gaignerent au pied. Vn des capitaines de nauire, nommé Laurent Godin, mettoit ses soldats en terre, pour se ioindre à Brittio : mais voyant acourir les Portugallois à perte d'halaine il ne les attendit pas pour les recueillir, ni pour arrester l'ennemi qui les suiuoit de pres, ains s'enfuit vilainement : au moyen dequoy les pourfuiuans talonnerent les fuyards iusques au riuage. Tous ne sauoyent pas encores que le general eust esté tué dedans la ville. Ludouic Rapoz & Pierre Villose, capitaines renommez pour leurs braues exploits, entendans au riuage que leur chef estoit mort, conclurent entre eux de ne souffrir ceste tache en leur honneur, de partir d'vne meslée, où le chef estoit demeuré. Pourtant ils entrent de pied & de teste parmi les ennemis, ne cessent de frapper, renuerfer & tuer, iusques à ce qu'eux mesmes, las de combatre & de receuoir des coups, demurerent estendus sur la place. Gaspar Gal, qui deuoit marcher le premier avec ses soldats, harquebuziers pour la pluspart, eut à combatre les vagues & vents contraires. Mais quand il entendit les coups de canon que les ennemis tiroient de leur fort pour repousser les Portugallois, il fit haster sa fregate à force de rames le plus diligemment & courageusement qu'il estoit possible. La roideur de laquelle on poussoit ceste fregate la fit eschouer & l'arresta tout court sur vn monceau de sable caché sous l'eau, tellement qu'on ne la sceut tirer ni avec les rames, ni avec les perches, ni par adresse aucune des matelots, ains salut attendre le reflux qui la retira de danger. Ainsi donc tous les capitaines furent tuez, sinon Gal & Godin qui ne se trouuerent pas en la meslée : l'vn pource qu'il lui fut impossible, l'autre d'autant qu'il ne fit consciéce de s'enfuir comme vn vilain. En ceste desfaite furent tuez enuiron quatre vingts Portugallois, & quant à ceux qui eschapperent, il n'y en eust pas vn qui ne portast

portast les marques du combat pour s'en souuenir le reste de leur vie. Ils leuerent les anchres incontinent, desployent les voiles & gaignent le port de Pedir, où ils trouuerent Antoine frere de George Brittio, lequel par les voix de tous fut esleu pour tenir la place de son frere, suiuant l'intention du Roy qui auoit ordonné que, si George mouroit par quelque accident, Antoine auroit la charge des isles Molucques. Antoine establit des capitaines es nauires, & fit voile en la coste de Pacem, où il trouua George Albuquerque: & tous ensemble prindrent la route de Malaca, où ils furent fort gracieusement recueillis par Gasie de Sale, lequel quitta promptement la capitainerie de la citadelle à George Albuquerque. En ceste mesme année au mois de Iuin, la Roine Eleonor estant à Lisbonne acoucha d'une fille qui fut nommee Marie, laquelle depuis a esté vne princesse de grand esprit, magnanimè, & fort riche: vray est que iusques au iour que nous escriuiôs ceci elle estoit encores à marier.

23. MAINTENANT il nous faut discourir sur ce qui auint en Inde à laques. Fernand de Begie. Lors qu'Antoine Correa fut enuoyé en Baharem par Siqueire, Begie fit voile en Inde avec quatre nauires, assaillit & print en la coste de Cambaje deux nefes chargees de viures, & vne nauire de charge bien munie. Pource que le combat se dôna pres du port de Diu, Melichiaz enuoya au secours dixhuit fustes & fregates sous la charge de Hagamahamed. Mais lors qu'il approcha, le combat estoit fini, & la plupart des ennemis taillez en pieces. Neantmoins il s'attacha viuement aux victorieux, mit en fond la nauire de Gaspar Doutel, au moyē dequoy presques tous ceux qui estoient dedans furent noyez: & peu s'en salut que celle du general Begie ne perist avec l'autre. Nonio Fernand de Macede fut aussi reduit en grand danger, & perdit quatorze soldats. Comme le combat s'eschauffoit avec apparence de confusion extreme pour les Portugallois, suruindrent des pluyes fort grosses acompagnees de tonnerres & de fouldres, si que la mer courroucée separa les combatans. Begie tira vers Chaul pour faire aiguede, recouurer des farines, & calfeutrer ses nauires, où Siqueire arriua n'ayāt plus esperāce de pouuoir bastir vne citadelle à Diu: pource que Melichiaz auoit fortifié le lieu designé pour ce bastiment. Dauantage vn grād vaisseau qui portoit les materiaux de l'edifice auoit esté brulé par les prisonniers Turcs qui estoient dedans, & entreprirent vn terrible acte: car aimans mieux mourir que viure esclaués, ils firent tant avec des cloux de fer frottez l'un contre l'autre, que les estincelles en volerent sur certains caques de pouldre, laquelle brulla vaisseau, Portugallois, prisonniers & tout. Siqueire ayant embrassé d'autres desseins fut contraint de lascher prise à l'arriuee d'Edouard de Menesez. Ce pendant Pierre de Sylues, que Siqueire auoit laissé en Ormus pour expedier quelques affaires, arriua en la coste de Chaul. Hagamahamed voguant à l'encontre avec sa flotte enfondra à coups d'artillerie le vaisseau de Sylues, lequel fut noyé avec la plupart de ses gens: ceux qui se sauuerent à nage furent prins & menez prisonniers à Diu.

24. A v meisme temps fut solēnisé à Lisbonne le mariage de Beatrix fille du

*Bataille man
le de Jacques
Fernand de
Begie pres du
port de Diu.
& autres ex-
plués en celui
de Chaul.*

*Mariage de
Charles Du.*

*de Sauoye a-
uec Beatrix
fille du Roy
de Portugal.*

Roy Emmanuel avec Charles duc de Sauoye. Quelques années auparavant Charles auoit pourchassé ce parti, estimant que ce lui seroit honneur & auancement pour ses affaires d'estre allié d'Emmanuel, ioint qu'on lui auoit fait bon rapport de la beauté & bonté de Beatrix: tellement que pour l'obtenir il enuoya ambassades expres en Portugal. Mais pour la premiere fois le Roy ne conclud rien, toutesfois il recueillit avec bon visage les ambassadeurs, s'excusant sur l'âge de sa fille, encores bien ieune pour estre mariee. Cependant il donna ordre de sauoir sous main par gens propres quel estoit l'estat, le domaine, le pays & la grandeur de ce Duc: ce qu'ayant sceu il estima qu'il ne le falloit esconduire. Dequoy Charles ayant senti quelque chose, renuoya ses ambassadeurs en Portugal, par l'entremise desquels l'accord fut fait, les articles d'icelui couchez par escrit, & la flotte necessaire pour mener Beatrix iusques à Nice, où son pere promettoit la redre, equippee à grands frais. Il y auoit dixhuit nauires les plus grâdes, pour la plupart, que lon eust iamais veues en Portugal: outreplus, quelques galeasses, galeres & fregates. Le Roy ordonna chef & general de ceste flotte vn sage seigneur nommé Martin de Blanc Castel, Côte de Ville-neufue de Portimane. Martin de Coste Archeuesque de Lisbonne equippa magnifiquement vne autre nauire pour acompagner Beatrix. Plusieurs gentilshommes furent deputez pour y aller aussi, en si brave equippage d'habillemens enrichis de pierreries, d'or, & d'autres ornemens, que chascun estoit estonné de les voir. Les nauires estoient dorees & peintes de gentille façon par dedās. Auant que partir on celebra des iours de feste, & des jeux où la noblesse se trouua, avec grand plaisir & signes de ioye de tout le peuple. Outre ces riches vestemens les Portugallois eurent encores plus de soin de leurs armes & de fournir leur flotte d'artillerie. Le neufiesme iour d'Aoust ils hausserent les voiles, & vindrent surgir au port de Nice sur la fin de Septembre ensuiuant: où Beatrix fut receue de Charles en grande pompe & avec tresgrands signes d'amitié, ensemble de tous les seigneurs, gentilshommes & autres qui se trouuerent là.

*Cruelle bataille
le nauale entre
Hagamahamed
& les
Portugallois
au port de
Chaul, & l'issue
d'icelle.*

EN ces entrefaites, les Portugallois qui bastissoyent la citadelle en Chaul, 25.
laquelle n'estoit encores esleuee que iusques au premier estage, se trouuerent fort travaillez & en grand danger: car Hagamahamed faisoit diuerses courses sur Francisque Mendoze & George de Menefez capitaines de deux galeres, & tuoit tousiours quelques vns des leurs à la barbe de Siqueire & des autres capitaines, qui à cause de l'impetuosité du reflux ne pouuoient secourir leurs compagnons: car Hagamahamed, hardi & rusé chef de guerre, espioit le temps auquel les vaisseaux de voile ne lui pouuoient nuire. Siqueire estant contraint de se retirer en Cochim pour d'illec faire voile en Portugal, laissa Henri de Menefez en la citadelle de Chaul, & établit Amiral en ceste mer Jacques Fernand de Begie, lui laissant pour l'execution de sa charge deux nauires, trois galeres, vne fregate & vne fusle: puis se mit à la voile: mais vne bonasse trop grande l'arresta tellement qu'il fut contraint de demeurer en la coste pres de la flotte de Begie. Hagamahamed ne voulant perdre aucune occasion d'endommager les Portugallois, tournoit avec

avec trente fregates autout de leur flotte, la canonnoit sans cesse, se garantissant de viflesse, à force de rames, & par vn mouuement continuel de ses vaisseaux. Siqueire estoit en merueilleuse peine, dautant qu'il ne pouuoit bouger. Begie commanda à André de Soufe de voguer avec sa galere à l'embouchure du fleue qui trauersé Chaul, pour empescher que les ennemis venans par là ne canonnassent la forteresse. Mais Hagamahamed courut sus au capitaine Soufe, & de nuit tira tant de coups contre la galere d'icelui, qu'il la perça en diuers endroits, tua sept soldats, & en blessa griefuement plusieurs. Alexis frere de Soufe y receut vn coup tresdangereux. Finalement Hagamahamed approcha de la galere pour l'acrocher, & d'autre costé George de Menefez vint au secours. Ce nonobstant Hagamahamed faisoit tout son possible de les arrester tous deux: lors Begie en sa capitainesse & Francisque Mendeze avec quatre fustes approcherent, & voyans la galere de Soufe brisée, Begie la fit tirer de là, puis se rendit en la galere de George de Menefez. Ce pendant les nauires demeuroyent immobiles, faute de vent: d'autrepart l'escarmouche s'eschauffoit, & ceux qui estoient es fustes, ne pouuans ou n'osans attendre les ennemis, voguerent en arriere, afin de combatre de la poupe d'une des galeres, lesquelles portoyent tout le faix du combat. Le mast de la galere, en laquelle Begie se retira estoit ia percé, & les costez entamez en beaucoup de lieux: neantmoins Begie faisoit vn merueilleux deuoir, courant par tout, se monstrant capitaine & soldat tout ensemble: brief son exemple pouuoit seruir aux autres de combatre courageusement. Ne voyant point les fustes il courut à la poupe de sa galere, criant à haute voix, Quoy donc, meschans que vous estes, que l'honneur ni la religion ne peuuent induire à bien faire, aimez vous mieux en fuyant laschement estre taillez en pieces par le plus cruel ennemi du monde, que conseruer vos vies en vous defendant comme bons soldats? Disant cela, la bale d'un fauconneau lui donne au costé, brise sa cuirasse, & en fait entrer les esclats dedàs son corps. George de Menefez le voyant par terre, fit couvrir le corps d'un manteau & le tira arriere de la veue des soldats, de peur qu'un tel accident ne leur ostast tout courage. Quant à ceux à qui ce malheur ne pouuoit estre celé, il les exhorta de ne perdre courage pour la mort d'un homme, ains de rendre leur nom honorable en suiuant l'exemple de ce braue capitaine. Lors Menefez, faisant la charge de Begie, se porta en homme vertueux: & combien que la pluspart de leurs canonniers eussent esté tuez des ennemis, toutesfois au lieu de s'effroyer, les soldats braquoyent & laschoyent les pieces selon l'adresse & l'experience qu'ils auoyent en cela. Les forçats, ennemis du Christianisme, comencent à crier aux ennemis en langue non entendue des Portugallois, qu'ils actochassent la galere, laquelle estoit sans defense, pource que tous les soldats estoient ou morts ou bien blessez. Menefez se doutant de ceste trahison, donna quelques bastonnades à sept ou huit de ces forçats, tellement que les autres, craignàs d'en receuoir autant que leurs compagnons, ramerent sans dire mot. Hagamahamed d'autre costé voyant la pluspart de ses gens tuez, plusieurs vaisseaux brisez, se retira de peur d'au-

tre plus grande perte. Menefez voulut lors monſtrer à ceux qui regardoyēt le combat de deſſus le riuage que la victoire eſtoit ſienne, & pourtant il ſui- uoit les ennemis quelque eſpace de temps : puis fit leuer force eſtendarts ſur le chaſteller de la galere qui auoit ſouſtenu preſque tout le faix du combat, commanda qu'on laſchaſt toutes les pieces en ſigne de ioye, dont les habi- tans de Chaul furent merueilleuſement eſtonnez. Dauantage, pour leur fai- re encores mieux confeſſer que la victoire lui eſtoit demeuree, il demeura à l'anchre iuſques au ſoir. En fin, apres les anchres leuees, il ſe rendit en la galere capitaineſſe, remena la galere deſpecee, & mōſtra le roolle des morts au combat.

*Siqueire qui-
te le gouuerne-
ment à Me-
neſez, & ce
qui auint de
rechef pres de
Chaul iuſques
à la paix ſaute
entre Me-
neſez, Viceroy &
Atelichaz,
gouuerneur de
Dia.*

SIQUEIRE ne voulut partir de là que premierement la flotte ne fuſt remiſe au deſſus, & par lettres fit entendre à Edouard de Menefez l'eſtat des affaires : puis ayant equippé la flotte comme au parauant il en laiſſa la charge à Antoine Correa, iuſques à la venue de Ludouic de Menefez frere d'Edouard, que le Roy Emmanuel auoit eſtabli Amiral des Indes. Les choſes ainſi dreſſees, Siqueire print la route de Cochim, afin d'y faire ſes apreſts pour reuenir en Portugal. Mais Hagamahamed arma de rechef trente ſix fregates, & ſe rangeant au port de Chaul, ſe logea en tel lieu que la flotte de Portugal ne pouuoit endommager la ſienne. Quand il vid que Correa ne bougeoit, cela l'enhardit d'approcher, & eſtant à la portee du canon, fit iouer ſes pieces. Correa n'auoit que bien petite prouiſion de pouldres, au moyen dequoy il veilleoit ſoigneuſement ſur les canonniers, à ce qu'ils ne tiraſſent nullement à coup perdu. Les Portugallois auoyent baſti & forti- fié deux tours, l'une ſur le bord entre la mer & le deſgorgement du fleuue, l'autre (qui ſeruoit d'eſchauguette) plus pres de la ville. Hagamahamed voyant du danger pour ſoy ſ'il combattoit de pres, reſolut d'allaillir la tour de l'embouchure du fleuue, gardee par trente Portugallois : & pour ceſt eſ- ſect y enuoye quinze vaiſſeaux ſous la charge d'un capitaine nommé Chi- le, lequel fit deſcendre en terre deux cens de ſes ſoldats, en vn lieu couuert d'une haute roche, d'où ils gaignerēt vn coſtau lequel cōmandoit à la tour. Lors ils commencent des vaiſſeaux à canonner ceſte tour, & à l'allaillir fu- rieuſement par terre. Combien que les aſſiegez euſſent à entendre en deux endroits, ſi ne laiſſerent ils de faire deuoir. Pierre Vaſque de Furme leur ca- pitaine, s'acquittant courageuſemēt de ſa charge, fut tué d'un coup de bou- let, enſemble Simon Ferreire, le principal canonnier avec quelques ſiens ſeruiteurs. Or combien que Correa fut lors empeſché contre Hagamaha- med, toutesſois il enuoya Roderic Pereire avec ſeptante Portugallois en deux brigantins, pour ſecourir les aſſiegez de la tour. Pereire & les ſiés deſ- cendus en terre courent ſus aux ennemis campez au coſtau, les deſlogēt de là, les contraignent ſe ſauuer de viſteſſe, vont apres iuſques au riuage, & en tuent grand nombre. Quant à Hagamahamed, apres auoir longuement combatu, voyant la pluſpart des ſiens deſpeſchez, il donna le ſignal de re- traite aux ſuruians : & lors Correa deſpeſtré des mains de ſon aduerſaire alla en la tour, où il trouua les morts ſuſnommez, & pluſieurs bleſſez. Vn ſoldat nommé Pierre Queiroſe receut dans ſon bouclier vingt ſept coups
de

de fleſches, & Manuel de Cugne vingteinq, qui y eſtoient encores fichees. Les autres mōſtroyēt par diuerſes autres marques leur proueſſe en ceſte deſenſe. Alors que les ennemis furēt repouſſez de l'entree de la tour ils perdirent trente hōmes & ſoixante ſur le bord de la mer, outre ceux que Pereire tailla en pieces. Ceſtoient gentilſhommes pour la pluſpart, comme il paroiſſoit à leurs armes & veſtemens: entre autres Chile & vn Ethiopien colonnel des bandes y demeurerent. Incontinent Correa fit couper les teſtes à tous ces ennemis morts, & les enuoya à Hagamahamed pour vn preſent tel que lon peut pēſer. En apres il repara & reſraiſchit de nouuelle garniſon ceſte tour, y eſtabliſt capitaine Aluarez Brittio. Sur ces entreſaires arriua Ludouic de Menefez, auquel Correa remit l'armee nauale ſās aucun delay, & partit de là pour venir en Cochim. Melichiaz d'autrepart pria Edouard de Menefez Viceroy de traiter appointement, & mit toute la coulpe des guerres paſſees ſur Siqueire, commandant à Hagamahamed de ſe retirer ailleurs avecques ſes vaiſſeaux.

27. T A N D I S que les affaires ſe manioyēt ainſi en l'Inde baſſe, George Albuquerque delibera d'ailleurſe ſe faire une ville forte & biē gardee entre toutes autres. S'eſtāt embarqué pour ceſt effect avec bon nombre de ſoldats, il arriua en l'isle, ſe cāpa deuant la ville, reſolu de chaſſer ceux qui gardoyent les rempars. Mais on n'auoit point apporté d'eſchelles, pource que quelques vns firent entendre à Albuquerque que les rempars eſtoient ſi peu eſleuez que les ſoldats y monteroyent aiſement: ce qui ſe trouua faux, & ſalut que les Portugallois ſe tiraſſent avec leur courte hôte, & perte de gens tuez à coups de trait de ceux de la ville, entre autres de George Melio, lequel s'en alloit aux Moluques avec Antoine Brittio. Il y en eut beaucoup de bleſſez, & ſur leur retraite les ennemis ſortirēt deſſus, en deſpeſcherēt pluſieurs, & les allerent battant iuſques à ce qu'ils gaignerēt leurs eſquifs à toute peine. Laqueiximene Amiral de Bintam pourſuiuant la victoire, & voulant monſtrer qu'Albuquerque auoit eſté vaincu de tous coſtez, ſe mit à la voile avec vingt nauires ſur la route des Portugallois, inueſtit Gilles Simō capitaine d'un brigantin, le tua enſemble tous les ſoldats qui eſtoyēt dedans. Telle fut l'issue de ceſte guerre entrepriſe à l'eſtourdie, comme il auient ordinairement en tels cas. Quant à Antoine Brittio, eſtāt parti de l'isle de Bintam pour aller aux Moluques, il fut porté des vents en la grande Iaue, & mouilla l'anchre au port d'Agacime ville cōfederee des Portugallois, pres de laquelle eſtoit vne iſle nommee Maduram, dont l'eau douce eſtoit fort eſtimee: à riſon de quoy Brittio enuoya le pilote de ſa capitaineſſe pour y faire aiguade. Les iſulaires coururēt ſus aux Portugallois, les arreſterēt enſemble leur brigantin, pource qu'ils auoyēt commencé la noiſe à leur maniere acouſtume, & ne voulurent iamais les rendre que premierement ils n'euffent payé rançō. Or d'autant que l'hyuer auançoit, Brittio ne pūt nauiguer ceſte annee aux Moluques, tellement qu'il hyerna dedās Agacime.

28. E N V I R O N le meſme temps Raix Xeraſtaſcha d'executer en Ormus ce qu'il auoit machiné contre les Portugallois: car incontinent apres que par l'adreſſe & vaillance de Correa il eut reconquis l'isle de Baharem, ſon

*Exploits de
George Albuquerque
en l'isle de Bortam.*

*Sedition en
Ormuz contre
les Portuga-
lois, tuez pour*

*La plupart, les
autres bleffez,
se fontent à
pres grand
combat de dans
la citadelle.*

aidace le transporta de telle sorte, que mettant sous le pied sa promesse & le bon service qu'on lui auoit fait tout de nouveau, tous les moyens furent employez pour ruiner les Portugallois. Personne ne s'opposoit aux desseins de Neraf que le Roy, ami des Portugallois, lequel, quoy que destourné au-cunement par les continuelles calomnies de son beaupere, toutesfois desiroit se monstrier loyal comme au parauant, quand il se representoit le bien qu'il auoit receu des Portugallois en la dernière guerre contre Mochri. Toutesfois esmeu par l'autorité de son beaupere, & vaincu par les importunes remonstrances de ses meschans conseillers, il leur lascha la bride, encores qu'il vist bien telle desloyauté deuoir estre la cause de sa ruine. Le iour assigné pour le massacre, ceux d'Ormus assaillirent la factorerie en laquelle demeuroient les Portugallois, qu'ils surprindrent dormans, en esgorgerent plus de soixante, & bruslerent quelques maisons. Garfie Coutin gouverneur de la citadelle auoit esté auerti de ceste coniuration: mais il fut si paresseux à y remedier, & oublia tant le deuoir de sa charge, que mesmes il ne se soucia pas de faire porter des viures en la citadelle, pour y soutenir le siege au besoin. Or ceste nuit, tout estât en armes, & les choses ain-si cōfuses, il comūce à penser aux affaires, pose les capitaines es lieux propres, fait placer l'artillerie, dresse vne compagnie, pour recueillir les Portugallois qui acouroient de la ville en la citadelle, & pour repousser les ennemis qui voudroyent en approcher. Les soldats & chefs de ceste compagnie sortent, donant à teste baissée parmi vne troupe de Sarasins, en tuent plusieurs, & sauuent quelques Portugallois eschappez du massacre. Comme ils se retiroient en la citadelle, ils trouuerent les ennemis qui tenoyent le passage, & lors y eut vn cruel combat: dautant que la rage & le grand nombre haussioit le cœur aux Ormusiens: les Portugallois au contraire, qui n'estoyent que quarante, eschaufez de despit & de desesperoier, & ne voyās moyen d'eschapper que par vne prouesse extraordinaire, hriēt tant à coups d'espee qu'ils ouurirent le chemin, passans sur le ventre des ennemis qui y perdirent force geus, & gagnerent finalement leur citadelle, mais bleffez tous quarante. Ceste mesme nuit Coutin enuoya messager vers le Vice-roy en Inde l'auertir de ce soulleuement, & du danger auquel la citadelle & les Portugallois estoyent. Or dautant qu'il auoit faute de matiere pour dresser quelques bouleuards, il fit descharger & despecer vne nauire chargée & seiournant à l'anclure, puis on porta toutes les pieces en la citadelle: ce qui ne se peut faire sans combat, bleffeur de plusieurs, & meurtre d'auncuns, car beaucoup de Sarasins, qui s'y vouloyent opposer, furent occis & quelques Portugallois semblablement, entre autres Vasque Vieire, qui fit merueilles en ce combat. En ce temps, Manuel de Soule, qui couroit les mers de Perse & d'Arabie avec quelques vaisseaux, fut emporté d'une tourmente en Mascate, où estoit arriué Tristan Vasque de Veigue, parti de Calajate dans vne nauire. Le gouverneur de Mascate leur conta les nouuelles de la sedition d'Ormus, & du meschant iour ioué aux Portugallois: item, que le Roy d'Ormus lui auoit commandé par lettres, de massacrer sans aucun delay tous les Portugallois qui estoyent en Mascate, & en auoit autant

escrit

escriit au gouuerneur de Calajate, si tost que le capitaine Veigue en fust parti. Toutes les villes de ceste coste de mer appartenoyent au Roy d'Ormus, lequel fut bien obeï du gouuerneur de Calajate: car icelui, pour faire du bon valet, incontinent les lettres veues fit couper la gorge à tous les Portugallois qui peurent estre attrapez. Celui de Mascare, vieil capitaine, expérimenté de longue main aux affaires du monde, preuoyant que ce forfait d'Ormuz apporteroit quelque malheur, s'abstint d'espandre le sang.

29. Q V A N T au capitaine Veigue; c'estoit vn homme estourdi, desbauché & dissolu: mais de tel courage que iamais danger aucun ne l'estonna, à cause dequoy plusieurs l'estimoient insensé & desesperé. Or il survint sur ces nouvelles vn debat entre lui & Soufe, tellement que sans autre resolution il print la route d'Ormuz avec trente Portugallois seulement, & se fourrant à trauers la flotte des ennemis, combatit si vertueusement toute leur puissance, que maugré la pluye des bales du canon, des harquebuzades, des feux artificiels, des coups de fleches & autres traits, apres auoir fait merueilles & des actes surpassans toute force humaine, il passa & se rendit dedans la citadelle. Ce valeureux exploit estōna bien fort les ennemis, & réplit de bonne esperance les assiegez. Soufe arriua tost apres en l'isle de Queixume, située vis à vis de la citadelle. Coutin ayant sceu de Veigue que Soufe auoit peu de vaisseaux assez mal fournis de gens, pria Veigue d'oublier sa querelle particuliere & s'aller reioindre à Soufe: à quoy Veigue s'accorda combien qu'il fust blessé. De rechef donc avec aussi grand hazard qu'à la premiere fois il trauersé la flotte des ennemis, auertit Soufe de l'estat des assiegez, & comme la marée montoit, eux deux avec leurs soldats attachent le combat sur mer qui dura longuement & fut tresfurieux. Les ennemis perdirent dix vaisseaux qui coulerent en fond, grand nombre d'hommes tuez, & plusieurs blessez. Du costé des Portugallois y eut vn soldat tué, quatre vingts blessez: mais maugré la resistance des Ormuziens Soufe & Veigue arriuerent à la porte de la citadelle. Xeraf voyant que du costé de la mer on n'en pourroit venir à bout, à cause de ceste flotte nouvellement venue au secours, fit tourner toutes les forces vers terre, pour assaillir la citadelle du costé de la ville: & par le conseil d'un Turc nommé Mirabdelic, bien exercé aux affaires de la guerre, dressa vn fort au palais du Roy, & vn en l'hospital des Portugallois basti entre le palais & la citadelle, d'où les assiegez estoient battus & grandement molestez, à cause de la prochaineté des places.

30. G A R S I E Coutin enuoye promptement Manuel le Vieil & Roderic Varelle avec quarante soldats vers ce fort de l'hospital, lequel ils assaillent viuement, rompent la muraille, entrent dedans de pied & de teste, taillent en pieces ceux qui le gardoyent, mais ils furent blessez presque tous, & perdirent deux de leurs compagnons. Ce fort ainsi gaigné, Coutin fit amener dedans la citadelle toute l'artillerie qui y estoit. Xeraf de son costé, par le moyen d'un double canon braqué en la basse cour du palais royal, rompit & brisa les portes de la citadelle: mais Coutin les estouppa incontinent avec des materiaux de diuerses sortes & force terre meslec parmi, tellement

*Valeureux
fait d'armes
du capitaine
Veigue & la
bataille navale
en Ormuz.*

*Bonne résistance
& diuers
stratagemes
de Garsie Coutin
gouuerneur
de la citadelle
d'Ormuz.*

que l'entree demeura autant cloſe qu'auparauant. En apres il donna charge d'une piece, eſleuee ſur le clocher du tēple de la citadelle qui regardoit le palais du Roy, à vn canonnier ſi expert, que du premier coup de ceſte piece il mit en eſclats le double canon dont on auoit rompu les portes. Les ennemis furent eſtonnez de ceſt accident, & pour cela toutes fois ne laiſſerēt de pourſuiure leur pointe. Alors les aſſiegez eſtoient preſſez de faim, & encores plus de ſoiſ. Quelques coquins s'enſuiuent de la citadelle ves les ennemis, & rapportèrent à Xeraſ que la ſoiſ contraindroit bien toſt les Portugallois de ſe rendre. Ces nouuelles firent reſoudre Xeraſ d'eſcheller la place, preſumant que la diſette d'eau auroit tellement aſoibli les Portugallois qu'ils ne ſauroient mener les mains. Incontinent vn Saraſin en alla auertir les aſſiegez, ſe retirant avec eux. Pour pouruoir à ceſt aſſaut Coutin apreſta ſur les creneaux des pots à feu, des pieces de bois & de gros cailloux meſlez parmi, pour accabler les aſſaillans, qui approcherent aſſez courageuſemēt, plāterent leurs eſcheſſes pour la pluſpart, & taſchent de monter çà & là ſur les murailles à qui mieux mieux, chaſcū voulāt eſtre le premier ou des premiers au deſſus: quād voici les Portugallois qui roulent les pieces de bois ſur les eſchelles, brisēes par tel moyen, lancent leurs pots à feu dōt vne bōne partie des aſſaillans furent grillez, les autres accablez des gros cailloux & quartiers de pierre qu'on leur iettoit de deſſus les murailles: puis à coups de harquebuzes, qui pleuuoient de tous coſtez, vn autre nombre demeura ſur la place. Xeraſ voyāt ſes ſoldats ſi mal receus fit ſonner la retraite, & recommencer la batterie plus furieuſe que deuant & ſans intermiſſion. En apres il fit ranger au palais vne grande machine de guerre propre à darder ce qu'on veut d'un lieu en autre aſſez loin, & qui euſt fait du mal aux aſſiegez, ſi quelqu'un des ennemis euſt ſceu la mettre en beſongne: mais leur beſtiſe fut cauſe qu'ils perdirent autant de temps, en s'occupant à la dreſſer pour eſtre inutile puis apres. Finalemēt Xeraſ baſtit vne muraille qu'il pretendoit leur ſi haut qu'elle commāderoit à la citadelle, & de là ſes archers deſcocheroyent tant de fleſches ſur les Portugallois, que les murailles de la citadelle demeureroient vuides. Pour obuier à cela, Coutin fit iouer deux canons qui battirēt ceſte muraille iuſques à la percer à iour en pluſieurs endroits: puis les aſſiegez planterent es creneaux des perches de bois & des morions au bout, faiſans monſtre de gens en ſentinelle, ſe prenent à danſer & faire grand bruit de ioye, afin que les ennemis eſtimāſſent quelques gens frais eſtre ſuruenus en la citadelle. La nuit ſuiuante Manuel le vieil & Roderic Varelle furent enuoyez par Coutin avec quelques caques de pouldre vers la muraille dreſſee par Xeraſ & batue comme nous auons dit. Ils s'en approchent fort coyemēt, mettēt leurs pouldres dās les fentes & pertuis de la muraille, puis font vne trainee de là iuſques en la citadelle, où eſtās retirez ils mettēt le feu en la trainee, dōt tout ſoudain les pouldres de la muraille furēt embrasēes, le fort renuerſē & englouti. La flāme gaigne le palais du Roy, & pource que le vēt eſtoit impetueux ceſte nuit-là, il fut impoſſible d'eſtindre le feu, encores que chaſcun ſ'y employaſt, tellemēt que le palais & vne grand' part de la ville furent reduits en cēdre par tel embrasement.

31. Cest stratageme de Coutin mit à neant tous les desseins de Xeraf & du Roy, qui virent la fin de leurs efforts, & pensans que les assiegez eussent receu quelque renfort de gens quitterent vistement la ville, & s'enfuirent bié effroyez en vne isle qui est vis à vis. Or de peur que le feu ne ruinaist toutes les maisons, les Portugallois y coururent & l'estaignirent, charrierēt force viures & de l'eau specialement en leur citadelle. Le Roy, estant en l'isle de Queixume, escriuit à Coutin qu'il se repentait bien fort de ce qui estoit auenu, imputant le tout à Xeraf, & prioit humblement Coutin de faire la paix. Ce pendant arriua en Ormus Gonçalue frere de Coutin enuoyé avec bonnes troupes au secours par le Viceroy : ce qui assura les Portugallois & les mit en plaine liberté, comme au contraire les ennemis perdirent lors toute esperance: tellement que les Portugallois commencerent à aller & venir par la ville, sans qu'on leur sonnast mot, non plus que si la paix eust esté faite. Mais Xeraf, pour combler la mesure de ses forfaits, ayant entendu que le Roy negocioit sous main avec Coutin, donna charge à vn seigneur nommé Xamire, duquel il se seruoit en plusieurs affaires, d'estrangler le Roy : ce que l'autre executa bié tost. Puis apres Xeraf fit Roy Patxa Mahametta fils de Zafardim lequel regnoit lors qu'Albuquerque vint en Ormus : au moyē de quoy Xeraf eut tel credit enuers le nouveau Roy, qu'il mania l'estat du royaume en plus grande insolence & tyrānie qu'il n'auoit oncques fait auparavant.

32. E N ceste annee Jean Coutin, gouuerneur d'Arzile en la coste d'Afrique, sortit en campagne avec deux cens cheuaux, & continua sa course vers Alcazarquibir, marchant de telle sorte, qu'il enuoyoit tousiours deuant quelques couteurs pour prendre langue. Il se rendit en fin à deux lieues de là en vn village nommé Tintan, où il surprit les ennemis, en tua plusieurs, emmena cinquante prisonniers avec plus de deux mille boeufs. Le gouuerneur d'Alcazarquibir va apres avec trois cēs cheuaux & deux cens pietōs. Coutin marchoit au pas, & le plus serré qu'il estoit possible, fortifiant tellement la queue de ses troupes que les ennemis ne la pouuoient entamer. Ayant passé vne riuiera il s'arresta court, presentāt le combat aux ennemis: mais eux n'osans passer la riuiera, il se reposa, beut & mangea, & fit repaistre sa troupe en leur presence: cela fait il entra dedans Arzile avec tout son butin, au grand contentement de tous ceux de la ville, d'autāt que lors l'Espagne & la Barbarie estoient en extreme disette de viures. Hamet Laroze Seigneur d'Alcazarquibir, ne pouuāt digerer ceste brauade de Coutin, qui venu de si loin avec vne poignée de gens auoit tué tant de Mores aupres d'une puissante ville, emmené des prisonniers & tant de bestail, delibera se venger d'un tel deshonneur. Pourtant fit il vne course vers Arzile avec quatre cens cheuaux. C'estoit en vn iour couuert & pluuieux, au moyen de quoy les espions ne peurent descouurer ceste troupe. Plusieurs estoient sortis hardiment de la ville pour aller couper du bois, & descouurans l'ennemi gaignerent la ville sur leurs montures, & donnerēt l'alarme bien chaude. Quelques autres qui se pourmenoyent dehors rentrerent dedans bien vistement. Coutin fit soudain sonner sa trompette & sort aux champs avec

Courses des Portugallois & des Mores de Barbarie, avec diuers enuement.

ses troupes. Entre ceux qui marchoyent deuant avec Fernand Mascaregne capitaine des cheuaux legers, estoit vn ieune gentilhomme nommé Alua- rez Nonio, fils du maistre de la garderobe du Roy de Portugal, suiui de plusieurs mignons, pour ce qu'il estoit liberal & haut en ses armes. Alors l'un de ces flatteurs commence à lui dire, Or sus, monsieur, c'est maintenant que Dieu vous presente le moyen de faire vn acte memorable: ne permettez que personne vous oste l'honneur de ceste iournee. Donnez à l'ennemi, nous vous suiurôs. Ce ieune estourdi, enyuré d'un tel babil courtifan, donne des esperôs à son cheual. Mascaregne tascha le retenir: mais Nonio estimant que ce fust par enuie, picqua plus roidement, pour estre le premier aux prinſes avecques l'ennemi. Il fut suiui de vingt cinq autres qui à bride abatie chargerent si resoluement, que les Mores furent contrains reculer: mais estans soustenus par le renfort que Hamet enuoya promptemêt, Nonio fut enuêloppé, &, auant qu'on y peust venir à temps, tué avec quatre autres, le reste mis en route par les ennemis qui leur chaussèrent les esperôs de bien pres, & iusques à ce qu'ils rencontrèrent Coutin qui leur fit tourner bride plus vîstement. Coutin trouua Nonio encôres respirant, le consola du mieux qu'il pût, & le fit incontinent porter en la ville: mais auant qu'y paruenir il rendit l'ame. Au demeurant, Mascaregne fut enuoyé avec quarante cheuaux pour donner sur la queue des ennemis: ce qu'il executa renuersant ceux qui voulurent faire teste, & print vn prisonnier duquel il sceut que Hamet estoit en la troupe, dont Coutin fut auerti tout à l'heure. Telles nouuelles lui furent fort agreables: car il desiroit fort esprouuer au cōbat la valeur de Hamet, lequel estoit fort estimé entre les capitaines de son tēps: comme Hamet de sa part auoit dit en maintes compagnies qu'il desiroit fort rencontrer Coutin. Mais il changea d'avis alors, voyant Coutin si resolu au combat, & reprit le chemin d'Alcaſarquibir, où Coutin le laissa aller, à cause que la nuict approchoit, & tira vers Arzile, emmenant prisonniers cinq des principaux ennemis avec le bagage & despouilles des morts, & ses troupes entieres, exceptez les cinq susmentionnez qui se perdirent par leur propre temerité. Presques au mesme temps, Héri de Meneséz, frere d'Edouard Viceroy des Indes, gentilhomme fort sauant & gouuerneur de Tingi, ayant fait diuerſes courſes à son auantage sur les Mores, entendit par ses espions que le gouuerneur de Tetuan deuoit amener quelques compagnies de gens d'armes au territoire de Tingi, pour y faire le gaſt & presenter le combat aux Portugallois. Henri alla au deuant, & attendit trois iours au rendez-vous de ce gouuerneur. Au quatriesme iour il reuint en la ville: & tost apres que lui & les siens furent descendus de cheual, le gouuerneur de Tetuan se presêta aux portes. Lors on sonne l'alarme, Héri de Meneséz & ses gēs remettēt le pied à l'estrier, sortēt dehors, chargēt, enfoncēt, mettēt en route & poursuiuent les ennemis iusques au soir, en tuēt grand nombre, ramenant quelques prisonniers, & euſſent obtenu plus grāde victoire, si la nuict n'eust serui de garant aux fuyards. Cest exploit fut notable pour deux raisons: l'une d'autant que le gouuerneur de Tetuan estoit tenu pour vn des plus vaillans de son parti, menoit grandes forces, &

M ene-

Menefez l'auoit hardiment affailli avec peu de gens: l'autre, que les Mores ne pouuoient croire que Menefez, qui presques toute sa vie n'auoit fait qu'estudier, specialemēt en droit canon, fust si braue en fait de guerre.

33. D V R A N T ces courses, Vafque Fernand Cefar gardoit avec petit nombre de soldats, mais vaillamment, le destroit de Gibraltar. Or auint que le capitaine d'une fregate l'auertit que quatre nauires Angloises auoyēt prins vne nauire de Portugal, & l'emmenoyent attachee à la pouppe de leur Amirale. Incontinent Cefar vogue apres, & les descouurit derriete le mont Calpe. L'Amirale estoit assez loin des autres, tellemēt qu'il alla droit à icelle, & estant pres demāda à ceux de dedans, d'oū ils estoyēt. Eux ne responderent rien, ains le menacerent d'enfondrer son vaisseau s'il ne baissoit les voiles. Cefar, non acoustumē d'obeir à tels commandemens, au lieu de caler se monstra tout prest de combattre. Alors l'artillerie commença à iouer de part & d'autre: pendāt quoy ceux de la nauire de Portugal liee à l'Amirale Angloise coupent la corde, sans que les Anglois trop attentifs au combat s'en apperceussent. En ce conflict Cefar perdit sept hommes, non compris plusieurs gtiefuēmēt blessez des esclats & pieces de boucliers que le canon Anglois brisoit. Entre les soldats de Cefar estoit vn Lansquenet gros & grād, bien resolu à la guerre, & ia blesé en quinze endroits de son corps, dont il auoit perdu beaucoup de sang: à cause dequoy Cefar l'exhorta de se retirer pour faire penser ses playes. Il ne bougeray d'ici (dit-il) que ie ne meure ou que ie ne contraigne les ennemis de baissier eux-mesmes. Disant cela il charge vn fauconneau sur son espaule, & commande à l'un de ses compagnons d'y mettre le feu, mirant si à propos qu'il brisa l'equippage de l'Amirale à l'endroit où l'antenne est attachee au mast, & rompit vne piece d'icelui. Puis rechargeant iusques à la troisiēme fois, il estōna fort la partie cōtraire. Vn autre Aleman, deschargeāt vne piece de la proue contre la pouppe des Anglois, en tua plusieurs, & enfondra vne partie d'icelle pouppe: tellement que les Anglois ayās ia perdu vingt des leurs, sans les blessez qui s'estoyent tirez de la presse, baissierent incontinent, ce que firent aussi leurs trois autres nauires, qui ne s'estoyent peu trouuer au combat à cause d'un vent contraire. Cela fait, le capitaine Cefar entra dās vn esquif, & voulut sauoir des Anglois pour quelle cause ils auoyēt prins la nauire des Portugallois. Eux respōdent que pour la garentir de la main des courfaires Mores, qui escumoyent la mer avec quelques fregates, ils l'auoyent ainsi tiree apres eux. Incontinent Cefar leur donne congé, & eux pour se rafraischir font voile au port de Cadiz. Quāt à Cefar il se retira en celui de Septe. Or pour nettoyer le destroit de tous ces escumeurs de mer, le Roy arma vne flotte sous la charge de Simon fils de Tristan de Cugne. En ceste annee, la Barbarie fut trauailliee d'une grāde secheresse, dont s'ensuiuit la famine qui emporta beaucoup de gens. Vne infinie multitude de Mores, ne sachās de quel costé tourner à cause de la disette, enuoyerēt dire au Roy qu'ils estoyēt prests de receuoir le Christianisme, & se rendre esclaves des Chrestiens qui les voudroyent instruire en la religion. Le Roy leur accorda ceste requeste, tāt le mot de religion lui plaisoit, & pouuoit-on sous ce pretexte abuser ce

Rencontre & bataille entre le capitaine Cefar & vne nauire Angloise.

Prince en maintes sortes. Car aussi c'estoit chose aussi clere que le iour que ces suppliâs estoient Chrestiens pour le ventre, lequel estant répli, à la premiere occasion ils retourneroyent en telle conscience à leur Mahumetisme qu'ils s'en estoient departis. Dauantage cela sembloit dangereux de receuoir & loger au milieu de Portugal si grand nombre d'ennemis iurez du royaume: ioint qu'on estimoit qu'ils infecteroyent le pays à cause de la peste qui estoit entre eux. Qui plus est, tout le Portugal estoit en disette; car la secheresse auoit estranglé la pluspart des bleds, puis les pluyes continuellés d'Auril & de May auoyent gasté le reste: tellement que personne ne vouloit receuoir les Mores, encores qu'ils se rendissent esclaves pour leur vie: dont s'ensuiuit que plusieurs moururent pauurement d'extreme disette & necessité. Au mesme temps, les ambassadeurs de Venise arriuerēt avec cinq galeres au port de Lisbonne, ayans pour chef André de Pise, gentilhomme de grande autorité en ceste Republique, de laquelle il estoit commis pour negocier avec le Roy Emmanuel touchant les espiceries des Indes, que les Venitiens demandoient à certain pris, avec proufit notable pour le Roy. Il les receut magnifiquement, leur fit de grands presens, & les accomoda de tout ce qu'ils demandoient, sinon pour le regard des espiceries, dont ils ne peurent s'accorder.

Malade, mort, & enterrement du Roy Emmanuel: avec vn long discours de sa maniere de vivre & de ses faits.

S V R la fin de ceste annee mil cinq cens vingt vn, le Roy Emmanuel, 34. Prince riche, grand seigneur, renommé par tout le monde, de bonne disposition, & en grande vigueur pour durer encores longuement, ce sembloit, deuint soudainement malade, & mourut au bout de neuf iours, le treizeiesme du mois de Decembre. Il estoit lors aagé de cinquante deux ans & demi, dont il auoit regné vingt six ans, vn mois & quinze iours. Sur la fin de sa vie il monstra de grands tesmoignages de sa pieté. En premier lieu il donna ordre aux affaires de ce mode par vne singuliere prudence, se disposa à bien mourir, receuant paisiblement le message de mort: & respondoit aux gens d'Eglise qui l'environnoient prians Dieu pour lui, recitant lui-mesme par cœur plusieurs versets des Pseaumes. Il fut enterré au tēple de Bethlehé par lui fondé, & mis au tōbeau en pōpe royale, presens presques tous les Princes, seigneurs & gentils hommes du royaume, qui par leurs larmes mōstre- rent combien le decés de ce Prince les angoissoit. Or si nous considerons le cours de sa vie, nous l'estimerons heureux, autant qu'il y peut auoit de felicité es choses humaines. Ce Prince, issu de sang royal, auoit passé vne partie de sa ieunesse sans esperer attaindre iamais à la couronne: là dessus tous les autres Princes, plus proches ou plus anciens pour y paruenir, moururent par diuers accidens: tellement que cestui-ci fut Roy, & amplifia le domaine par des moyens merueilleux, adioustant aux royaumes de Portugal & des Algarves celui d'Ormus, vne portion d'Arabie, les Indes deçà & delà le Gange, avec autres pays à l'extremité d'Orient: descouurit & assuiettit des regions inconnues auparauant. Je lui attribue tous les exploits mentionnez es douze liures sus escrits: d'autant qu'il faut rapporter à la louange & gloire d'icelui tout ce que les Portugallois executoyēt par son cōmandement. Et de fait le deuoir d'un Roy ne se monstre en chose aucune si bien qu'au grand

grand nombre de vaillans & sages lieutenans qui entreprenent & accomplissent des actes notables & qui meritent vn los perpetuel. Car celui là est vraiment Roy, & en porte le nom à bonnes enseignes, qui encourage & pousse ses suiets à l'amour de vertu, qui les contraint doucement à se hazarder aux dangers, qui propose honneurs & recompenses de trauaux à chacun, afin que tous fassent leur deuoir à qui mieux mieux. Tout ainsi donc qu'il faut attribuer la prouesse des soldats à la sagesse des capitaines qui les ont dressez, instruits en l'art militaire, rendus volontaires & prompts à exécuter: à tresuiste raison aussi doit on, ce me semble, rapporter aux bons Rois, qui par auancemens aux charges ont incité leurs suiets à bien faire, la louange que les sages & vaillans hommes meritent. Ainsi donc les Rois peuuent s'attribuer l'honneur appartenant à leurs suiets; pour deux raisons: l'une pource qu'ils poussent les hommes de grand esprit à entreprinse hautes & difficiles: l'autre, qu'ils se fauent aider de ceux qu'ils conoissent propres à l'exécution de telles entreprises. Et comme là faineantise & vanité d'une noblesse effeminee deshonnore grandement vn Roy: au contraire les gentilshommes vaillans & sages donnent vn tresbeau lustre à la maiesté de leur Prince: car c'est des Rois, comme d'une source viue, que decoulent sur tout vn public les vertus & les vices aussi. Pour reuenir à Emmanuel, si Vasque de Gama, d'une tant admirable adresse & grandeur de courage, a ouuert le chemin en Orient: si Edouard Pacheco a rabattu l'audace & la fureur du Roy de Calcut, trespuissant en ce temps là: si François Almeide a gagné tant de belles victoires: si Alphonse Albuquerque peut estre comparé, par ses valeureux exploits, avec les plus grands capitaines dont la memoire est celebree par les historiens: tout cela se doit rapporter & attribuer principalement aux vertus des Rois Jean second & Emmanuel premier, de l'escole desquels sont sortis tant de braues hommes. Il en faut dire autant de Jean de Meneses, de Nonio Fernâd Ataide, de Mascaregne, de Coutin, & d'autres capitaines de marque: auoir que par la vertu de leur Roy ils ont fait ce que nous auons descript ci deuant. Parquoy ie tië pour certain que si Emmanuel fust passé lui mesmes en Afrique, toute la Barbarie se fust aisément rangee à son obeissance: mais le temps & le conseil de gens de petit cœur le destournerent de ce voyage. Au reste, les villes prises par son auis & commandement, les citadelles basties & fortifiées à son aueu, monstrent quel desir il auoit d'abolir la memoire du faux Prophete Mahumet. Et par ainsi sa felicité incroyable ne doit estre rapportee au cours de fortune, comme l'estime le vulgaire ignorant, ains à la faueur de Dieu qui benissoit la pieté & iustice de ce Prince. Car il estoit d'un naturel honneste, benin, religieux, debonnaire, humain, d'une grauité plaisante & ioyeuse, de facile acces, diligët à administrer iustice, & à despêcher affaires. Il se leuoit fort matin, & souuentes fois deuant iour, vaquant auant toutes choses au seruice diuin, puis employoit le reste du temps à receuoir & appointer requestes, & donner ordre aux affaires d'estat. C'estoit vn Prince facetieux, qui auoit le mot à commandement, fort liberal, pouruoyant en grande douceur aux necessitez de ses domestiques, payant bien les gens


de guerre, louant & recôpensant par presens & biensfaits ceux qui faisoient quelque acte notable. Les pauvres estoient soulagez grandement de ses richesses, semblablement les conuents de moines & nonnains, auxquels il fournissoit largement & magnifiquement non seulement ce qui estoit requis pour leurs temples, mais aussi pour leur vie & usage particulier. Au reste il estoit grand iusticier, & severe aux criminels, encor' que de nature il enclinast plus à douceur qu'à rigueur. Il prenoit grand plaisir à la musique, sans que cela le destournast du manient des affaires : car en son palais, tandis que les chantres & ioueurs d'instrumens lui donnoient du plaisir, il donoit audience aux thresoriers, maistres des requestes & autres officiers qui lui communiquoyent plusieurs choses d'estat, tellement qu'en passant le temps il expedioit le principal. Quant à sa maniere de viure il y estoit exquis, & sa table couverte de viandes tresdelicates : mais il viuoit fort sobrement, iamaïs ne beut vin, & s'abstenoit precisement de manger es iours de iusne solennel. Il aimoit les bonnes lettres, s'enqueroit par le menu des façons de faire des nations estranges, oyait volontiers lire les histoires, & quand il prenoit son repas en veüe de plusieurs personnes, les mets se trouuoient mieux assaisonnez par discours ioyeux & proufitables que par l'artifice des cuisiniers : car il deuisoit fort priuement & de grande affection avec gens doctes, & avec ceux qui auoyent voyagé en diuers pays. S'il s'esbatoit à quelques ieux, c'estoit en toute honnesteté : s'exerçant au ieu de la paume, à la chasse, à courir la bague, & à iouster en tournoy, selon qu'il auoit le loisir. Mais il y auoit cela d'admirable en lui qu'à peine se donna il iamaïs licée de iouer ou passer le temps si auant, qu'en mesme iour il ne traitast de quelque affaire publique avec ses conseillers : car s'il estoit à la chasse dans la forest, tousiours quelqu'un le suiuiroit pour lui presenter requeste, ou faire autre chose concernant le bien du public : & s'il s'esbatoit en un esquif sur la mer, ses principaux officiers lui tenoyent compagnie pour conferer ensemble des affaires du royaume. De son temps il sembloit que la pauureté fust bannie de Portugal, que la tristesse n'y peust trouuer logis, les lamentations s'y taisoyent, pour faire place aux danses & chansons, à quoy toute la cour passoit le temps bien sotuiuent. Les ieunes gentilshommes s'esbatoient ainsi avec les damoïselles, sans vilenie ni sales propos : & encores qu'ils fissent l'amour d'une façon pudique, & du tout contraire à celle du temps d'aujourd'hui, les damoïselles auoyent ceste coustume de ne monstrer faueur à aucun, que premierement il n'eust fait quelque acte de prouesse en guerre. Et n'estoit loisible aux pages du Roy & des Princes de s'emâciper, qu'apres auoir fait un voyage en Barbarie & esté à la guerre avec quelque honneur au retour de là. Alors aussi la noblesse estoit si bien dressée, que de la cour de ce Roy sortirent des personages aussi excellens qu'il est possible de penser. Il obeissoit alaigrement aux comandemens de l'Eglise Romaine, maintenoit avec grande deuotion les ceremonies establies par icelle, & au temps qu'on y fait memoire de la passion de Iesus Christ il ne bougeoit du temple : comme aussi durant les trois iours que l'hostie de la messe demouroit cachée & comme enseuelie, pour souuenance de la sepulture de nostre Seigneur

gneur, il ne se despouilloit point, & ne partoit de là que pour bien peu de temps, & si le sommeil le prenoit il repoloit en sa place, sans liêt ni paremēt royal. Il remit sus diuerses religiōs de moines, reforma les mœurs dissolues, bastit plusieurs temples tout à neuf, en refit qui estoient presques ruinez, estant si aspre ennemi de la superstition Mahumetique, que pour la ruiner il s'apprestoit à faire la guerre en Asie & en Afrique, afin de ruiner entant qu'en lui seroit la memoire de cest erreur pestilent. Ses heures de deuotion ne le destournoyent point du maniement des affaires publiques, où il auoit l'œil en telle sorte, que ce qui concernoit la guerre estoit le principal point de ses pensees: & passant ses ennuis à la musique ou à la chasse, au milieu de tels plaisirs il se souuenoit de ses suiets. Pourtant en mesme temps il faisoit armer des vaisseaux pour aller en Barbarie, Ethiopie & Orient, enuoyoit garnisons en diuers lieux, presidoit en son conseil, donnant audiāce à chascun, & punissant les crimes: de si doux esprit au demeurant, qu'il se laissoit mener par les conseils de gens nez pour leur proufit, & qui craignoyent tous dangers pour petis qu'ils fussent: ce qui fut cause que plusieurs ietterent les griffes trop auant es deniers procedās des reuenus Ecclesiastiques, & qu'il differra tant de fois son voyage en Afrique, où il auoit si grād desir d'aller. Mais la mort, non attēdue si tost, enseuelit ce Prince avec toutes ses deliberations. Toutesfois, cōbien que selō le cours des affaires de ce mōde il ait fait chose qui semble meriter quelque reprehension: si peut-on dire que c'a esté vn Prince orné de plusieurs vertus royales, & digne de memoire immortelle.

* *
*

FIN DV DOVZIESME LIVRE.








LE TREIZIESME LIVRE.

SOMMAIRE.

1. *État des affaires de Portugal, d'Afrique, d'Ethiopie & des Indes au tour du trépass d'Emmanuel.*
2. *Iean troisiésme du nom, fils d'Emmanuel, succede à son pere, estant le quinziesme Roy de Portugal.*
3. *Brief discours touchant le royaume & les Rois de Portugal, avec la genealogie & les enfans de Iean troisiésme.*
4. *Ordre donné par Edouard de Meneséz, Viceroy aux affaires de Perse & des Indes.*
5. *Ce qui fut Loays de Meneséz en Ormuz.*
6. *Nauigation de Garsie Henriquez es isles de Bondon: la description & les singularitez d'icelles.*
7. *Repetition & ample discours de la nauigation de Fernand Magellan aux isles Moluques: accidens notables d'icelle iusques à la mort de Magellan & au retour en Espagne de la nauire nommée l'Esperance.*
8. *Description des isles Moluques & de leurs singularitez.*
9. *Arrivée d'Antoine Britto & de Garsie Henriquez aux Moluques, & ce qu'ils y firent.*
10. *Nauigation du capitaine Martin Alphonse Melo en la China, d'où il est contrainct se retirer.*
11. *Efforts du Roy de Daeben pour chasser les Portugallois hors de l'isle Taprobane.*
12. *Naufrage d'Edouard Ainaide, & autres accidens des Portugallois sur leur retour d'Ormuz en l'isle de Goa.*
13. *Troubles en Ormuz, & quel ordre y fut donné par le Viceroy.*
14. *Nauigation de Loays de Meneséz, vers le cap de Guardafu & son retour en Ormuz.*
15. *Exploits d'Antoine Falier corsaire Portugallois.*
16. *Guerre de Zababum Dalcam pour recouurer les gouuernemens de Poude & de Salfere, & quelle en fut l'issue.*
17. *Guerre d'Antoine Britto contre le Roy de Tidore, & autres accidens.*
18. *Exploits de guerre de Pierre de Castro & de Jacques Melo en faueur du Roy de Zamboïre.*
19. *Accidens du capitaine Galuan & de Pierre de Castro.*
20. *Negotiation de Baltazar Personne au royaume de Perse & l'issue d'icelle.*

1.  YANS entendu par le discours des liures precedens les choses plus memorables faites par les capitaines Portugallois sous le regne d'Emmanuel, selon que Ierosme Osorius les a sagement descrites: pour continuer quelque peu plus auant, & contenter le desir des lecteurs, j'ay recueilli çà & là vne suite des exploits de la nation Portugalloise, sous vne partie du regne de Iean troisiésme, fils & successeur d'Emmanuel, me contentant de toucher les choses principales: avec esperance toutesfois, si le temps le permet, de presenter quelque iour l'histoire toute entiere. Car pour le present ie me suis arresté à ce qui s'est passé es Indes depuis la mort d'Emmanuel, n'ayant voulu toucher aux guerres d'Afrique, pource que les memoires que nous en auons sont defectueux & peu certains: tellement que j'ay mieux aimé laisser cela en suspens, que paistre les gens de mensonges ou comptes mal-

État des affaires de Portugal, d'Afrique, d'Ethiopie, & des Indes, au tour du trépass d'Emmanuel.

asseurez. Ce nonobstant ie trousseray maintenant en peu de mots l'estat des affaires de Portugal, d'Afrique & d'Ethiopie, au iour du trespas d'Emmanuel, y adioustant aussi celui des Indes, pour faire mieux entendre ce qu'Osorius à deduit en ses douze liures, & ce qui sera discours ci apres. Il semble que les royaumes & principautez du monde ayent leurs aages, naissances, auancemens, accroissemens & declinaisons, comme les Princes & suiets qui y viuent pour vn temps. Quant à celui de Portugal, on peut dire que, sous Emmanuel, il a esté comme seroit vn homme en la fleur & vigueur de son aage: car encores que depuis il se soit entretenu en quelque virilité durant le regne de Ieã troisieme, ce n'a pas esté toutesfois avec tel succès aux affaires qu'auparauãt, & ce qui est auenu sous le regne de Sebastian petit fils & successeur de Ieã troisieme, n'agueres tué en Barbarie, môstre la declinaison de cest estat. Neantmoins comme Dieu scait, quand il lui plait, faire reuoir les personnes en leur vieillesse, il peut nō seulement redresser l'estat de Portugal, mais aussi celui de plusieurs autres royaumes, iadis tresflorissans, & maintenant afoiblis & prochains de leur ruine. Mais laissons cela en ses mains, & desirons ce pendant que les grands & les petis ne sentent les iugemens, ains par iustice & pieté attirent sa faueur, afin de subsister paisiblement en la societé humaine, attendans d'estre recueillis au vray royaume. Les guerres d'Emmanuel en Barbarie & es Indes tenoyent Portugal en paix: & les commoditez de ces nouuelles conquestes & peuplades en Orient encourageoyent les Portugallois à se façonner & acoustumer aux armes & à la nauigation: tellement que leur pays, quoy que de petite estendue, & leur nation qui ne faisoit qu'une poignée de peuple, à comparaison d'autres royaumes, estoient admirez, redoutez & bien voulus en maints endroits de l'Europe. Seulement les Espagnols commençoient à les regarder de trauers, à cause de la descouuerte des Molucques, dont nous parlerons amplement au septiesme chapitre: mais l'alliance d'Emmanuel avec Charles cinquieme retenoit les cœurs en contre poids. Ainsi donc le royaume de Portugal estoit lors en grande paix, redouté de ses ennemis, plain de grandes richesses, de gens de guerre & fideles à leur Prince, briefuement commodé & renommé au possible. Quant aux affaires de Barbarie, les Morres auoyent en teste les gouuerneurs de Safin, d'Arzile, & des autres villes occupees par les Portugallois, tellement qu'Emmanuel y estoit merueilleusement craint & bien obeï, ayant force vassaux & tributaires: & ses ennemis principaux en ces pays là se fussent lassez de la guerre, si ce Prince eust vescu plus long temps: mais sa mort les encouragea tellement que sous le regne de Ieã troisieme & de Sebastian, ils ont recouuré plusieurs places, fait mourir grand nombre de Portugallois en diuerses rencontres, la plupart des tributaires se sont reuoltez, & finalement Sebastian mesmes y a esté tué en bataille, au mois d'Aoust de l'an mil cinq cens septante huit. Le royaume de Congo en Ethiopie estoit lors aussi comme en la puissance des Portugallois, par le moyen de la religion Romaine qu'ils y auoyent plantée, & l'ambassadeur de Portugal estoit en chemin pour aller vers le grand Negus & y negocier comme il fit depuis, & rapporta lettres au Roy

Iean

Iean troisieme, contenant offres d'amitié & d'alliance, selon que le tout a esté amplement descrit en vn liure particulierement par Francisque Alua- rez, dont sera parlé au dixseptiesme liure. Pour le regard des Indes deçà & delà le Gange, & de l'estat de l'Oriét, encores qu'en quelques lieux les Portugallois eussent beaucoup d'affaires, toutesfois ils se maintenoient & auançoient, comme il appert par le liure precedent. Brief on peut dire qu'Emmanuel a esté vn des plus heureux Princes du monde pour le regard de la prosperité temporelle : & que les pertes qu'il a faites çà ou là quelquesfois ne sont rien au pris des belles conquestes & victoires obrenues par les lieutenans.

2. MAINTENANT il faut parler de Ieá troisieme, son fils & successeur, lequel fut proclamé Roy au temple de sainct Dominique à Lisbonne le dimanche vingtiesme iour de Decembre mil cinq cés vingt vn, en presence d'aucuns de ses freres, du Duc de Bregents, du grand Commandeur, des Contes de Tentugal, de Tarauce & d'autres grâds seigneurs du royaume : apres auoir presté le serment requis en tel cas entre les mains de son frere le Cardinal Alfonse, lors fort ieune, a l'auoir de l'aage de douze ans ou enuiron. Iean estoit lors aagé de dixneuf ans cinq mois & seize iours, prince d'assez belle stature, non gueres grand, & qui avec le temps deuint fort replet : au reste de bon & paisible naturel, deuotieux en sa religion, charitable enuers les pauures, grand ami des gens doctes en toutes sortes de sciéces : comme de fait, pour l'embellissement de son royaume il fit dresser l'academie & noble vniuersité de Conimbrice, & fonda le college royal de sainct Paul, avec pensions honnorables pour les professeurs & regés, qu'il attiroit de diuers pays : enquoy il fut suivi depuis par son frere le Cardinal, lequel bastit en la ville d'Euora le college des Iesuites, & vne vniuersité si accomplie que en l'an mil cinq cens soixante deux s'y trouuerent pres de douze, cés escoliers. Pour reuenir à Iean troisieme, le royaume auoit recouuré en lui son feu pere, ce sembloit : mais depuis lon conut que le fils n'auoit pas tât de viuacité que le pere, ains se contenta de garder ce qui estoit conquis, ou si ses lieutenans s'auancerent, ce ne fut pas de telle adresse & felicité que sous Emmanuel. Aussi mania-il ses affaires par autres armes que n'auoir fait son pere : car au lieu qu'Emmanuel s'estoit fait voye en Orient à la pointe de l'espee, Iean s'aida des courtes & voyages des Iesuites, comme nous le verrons en son lieu, sans qu'il soit besoin s'y arrester, attendu que nous voulons suivre l'ordre des anneés, côme es liures precedés, autant qu'il sera possible. Mais au reste, Ieá troisieme fut quinziesme Roy de Portugal, dequoy il faut dire ici quelque chose pour plus grande intelligence de ceste hystoire.

3. LA maison d'Aragon est issue d'un seigneur Goth nommé Ennic, lequel enuiron l'an neuf cens douze desfit en diuerses batailles & chassa les Gots descendus des monts Pyrenees en Aragon & es pays voisins. Or le petit fils de cest Ennic nommé Sance l'aîné avec son fils Fernand conquit les royaumes de Leon & de Castille, en chassa les Mores, puis ayant fait partage à ses fils & neveux, donna les royaumes de Leon & de Castille à Fernad, celui de Nauarre à son fils puîné nommé Garfie, celui d'Aragon à Sance le

Iean troisieme du nom, fils d'Emmanuel succede à son pere, estant le quinziesme Roy de Portugal.

Brief discours touchant les Rois & royaumes de Portugal, avec la genealogie & les enfans de Iean troisieme.

ieune son neveu ou petit fils. De ces trois sortirent trois familles distinctes, a sauoir celle de Castille, d'Aragon, & de Nauarre. La maison de Castille de ceste lignee print fin en Alfonse sixiesme qui mourut sans hoirs males, & maria sa fille aisnee nmöee Vraque à Raimöd Beranger Côte de Thoulouze: la secöde nmöee Tiresie à Héri Côte de Lorraine, petit fils de Guillaume frere de Godefroy de Bouillö Roy de Ierusalë, lui donät pour douaire vne partie de Gallice, qui est auioird'hui le royaume de Portugal. Du mariage de Henri & de Tiresie sortit Alfonse premier, Roy de Portugal, qui print Lisbonne sur les Mores, & pour auoir desfait cinq de leurs Roisen vne bataille, laissa vn escusson à ses successeurs, dedans lequel y en a cinq petis, & les cinq ronds inferez en chascun d'iceux representent (ce disent quelques vns) cinq playes mortelles qu'il receut en ceste bataille, dont toutefois il fut guerri. Cest Alfonse fils de Henri eut vn fils nommé Sance, & surnommé le peupleur, à cause de diuers lieux de ce royaume peuplez par lui. Apres Sance regna Alfonse second, surnommé le gras, puis Sance second: en apres Alfonse troisieme, Denis premier surnommé le bastisseur, Alfonse quatrieme, surnomé le hardi, Pierre premier du nom, surnommé le iusticier, Fernand premier, Iean premier surnommé de bonne memoire, Edouard premier, Alfonse cinquiesme, puis Iean second, surnomé le gräd, lequel succeda à son pere Alfonse sur la fin de l'an mil quatre cens huitante & vn, auquel, decedé sans hoirs males legitimes, succeda son cousin germain Emmanuel, fils de Fernand frere d'Alfonse cinquiesme, l'an mil quatre cens nonante cinq, & regna vingt six ans, durant lesquels ont esté executees les choses memorables contenues es douze liures precedés. La premiere femme d'Emmanuel fut Isäbelle fille de Fernand & d'Isäbelle Roy & Roine de Castille, veufue d'Alfonse fils du feu Roy Iean second, de laquelle il eut vn fils nommé Michel, qui mourut ieune & deux ans apres sa mere. En secödes nopces Emmanuel espousä Marie fille de Fernand & Isäbelle, sœur propre de la defuncte Isäbelle. La dispense du Pape (lequel on estimoit en ce temps là auoir l'autorité de dispenser des loix diuines) pourueut à ceste affinité. De Marie nasquit au mois de Iuin, mil cinq cens deux, Iean depuis Roy, & au mois d'Octobre de l'an suiuant Isäbelle, mariee depuis à son cousin germain Charles cinquiesme petit fils de Fernand: & de ce mariage est issu Philippe à present Roy d'Espagne. Puis apres Marie acoucha l'an mil cinq cens & cinq d'une fille nommee Beatrix, depuis mariee à Charles Duc de Sauoye, & döt est procedé Philebert Emmanuel viuät encöres pour le iourd'hui. Depuis iusques à l'ä mil cinq cēs dixsept elle acoucha de six enfans males à six fois: dont les nös furent Louys, Fernäd, Alfonse, Henri, Edouard & Antoine, qui moururent presques tous auät leur pere. Henri à suruescu tous ses freres & sœurs, voire son petit neveu le Roy Sebastian, mort en bataille comme dit a esté ci dessus. Incontinent apres que Marie se fut deliuree de son dernier fils nommé Antoine, elle deceda. L'an suiuant, Emmanuel print pour troisieme femme Eleonor fille de Philippe d'Autriche & de Ieanne fille de Fernäd Roy de Castille. Par ainsi Eleonor estoit niepce des deux femmes defunctes d'Emmanuel. Il eut de ceste

troi-

troisiesme vne fille nommee Marie, l'an mil cinq cens vingt & vn. Quant au Roy Iean, duquel nous descriuôs l'histoire, l'an mil cinq cens vingt cinq il espousa Catherine sœur de l'Empereur Charles cinquieme, de laquelle font issus plusieurs enfans, a sauoir Alfonso, Marie, Catherine, Beatrix, Manuel, Philippe, Iean & Antoine. Deux des filles moururēt en bas aage. Marie fut mariee à son cousin germain Philippe d'Austriche Roy d'Espagne, & eut vn fils nommé Charles, mort en prison où il estoit reserré par le commandement de son pere. Manuel, Philippe & Antoine decederent ieunes. Reste Iean, qui en l'aage de seize ans fut marié avec Jeanne fille de l'Empereur Charles, aussifa cousine germaine, & ce l'an mil cinq cens cinquante trois. Mais il mourut tost apres, laissant sa femme enceinte d'un fils qui fut nommé Sebastian, successeur de son ayeul Iean troisiesme, & seiziesme Roy, né l'an mil cinq cens cinquante trois. Voila sommairement quant aux Rois de Portugal. Adiouſtons quelque chose de ce royaume. Il est diuisé en trois parties principales, l'une deçà l'autre delà le Tayo, appelé Tagus par les anciens, & la tierce au milieu entre deux riuieres, l'une nommee Duero, l'autre Minio. Ce pays a douze lieues de longueur & autant de large, contenant en ce petit espace, outre les Eueschez notables, plus de cent trente monasteres, enuiron quatorze cens paroisses, & la campagne arrousee & fertile à merueilles. Les autres deux parties sont de grande estendue, comme les chartes en font foy, & ont le royaume d'Algarve adioint, qui est assez ample, mais montueux. Quant aux villes & gouuernement du royaume, d'autant qu'il y a rapport d'icelles & de tout l'estat public à la façon d'une grand' part du reste de l'Europe, il n'est besoin d'en parler dauantage: ce royaume estant clos de la mer à l'Occident & au Midi, du royaume de Castille & de Leon à l'Orient & au Septentrion.

4. IL a esté parlé au liure precedent des machinations de Raix Xeraf en Ormus contre les Portugallois, lesquels il tascha d'executer comme appert par le vingthuitiesme chapitre: à l'occasion dequoy Coutin gouuerneur de la citadelle euoya messagers expres en Inde auertir Edouard de Menefez, lors Viceroy, de ce souleuement des Ormusiens, & du danger auquel la citadelle & les Portugallois estoient. Le Viceroy considerant de quelle consequence estoit cest affaire, se retire incontinent en Goa, & despesche vn gallion avec lettres à son frere Louys de Menefez qui bastissoit vne citadelle pres de Chaul, pour aller promptement en Ormus: & pour recompenser Francisque de Souſe qui commandoit en ce gallion, il lui donna la capitainerie d'une gallere royale, & commission d'aller en Dabul pour estre general de douze fustes & y faire la guerre aux vaisseaux ennemis. Souſe s'estant rendu au port de Chaul, Menefez s'embarqua pour tirer en Ormus, menant quant & foy Roderic Pereire, Manuel de Macede, Henri de Macede, Edouard Ataide, Lopez d'Azeuede, & Pierre Vasque de Trauaze, capitaines de gallions & nauires. Apres leur depart, Martin Alfonso Melio, qui seiournoit aussi en Chaul pour aider à bastir la citadelle, print la route de Goa, d'où il fut enuoyé par le Viceroy au royaume de la China: tellement qu'il se mit incontinent à la voile, ayant pour capitaines sous foy Va-

Ordre donné par Edouard de Menefez, Viceroy aux affaires de Perse & des Indes.

15 2.2.

que Fernand Coutin & Jacques Melio ses freres, avec Pierre L'homme, & Ambroise Dorego qui les attendoit en Cochim, d'où ils partirent, tirans vers Malaca, au mois d'Auril de l'an mil cinq cens vingtdeux. Simon Andrade estoit de retour de la China, & auoit fiancé la bastarde du Viceroy, lequel pour dote de mariage donna à Simon la capitainerie de Chaul: ce que toutesfois il ne pouuoit faire, à cause que Henri de Menefez braue gentilhomme en auoit eu la charge du Viceroy Siqueire, & ne pouuoit on l'en deietter si tost, sinon qu'il fust conuaincu de quelque sinistre deportemēt. Mais la faueur & la force dominerent pour ceste fois: tellemēt qu'Andrade monta sur mer, emmenant douze fustes, avec charge de garder la coste contre les vaisseaux de Diu, & commander comme Amiral aux trois autres generaux, auaoir Francisque de Soufe, Vasque Leme & Martin Correa. Andrade menoit lors deux cens soldats, & en sa route il fut sur le point de donner bataille pres de Dabul à sept mille hommes seioumans à l'ancre, pource que le gouuerneur refusoit lui deliurer deux galeres faites par les Turcs. Mais estant ia descendu es esquifs pour prendre terre, ce gouuerneur fut tellement estonné qu'il lui fit deliurer les deux galeres, & ainsi Andrade reprit sa route vers Chaul, emmenant ces deux galeres de renfort. Estant arriué, Henri de Menefez lui quitta le gouuernement de la citadelle, voyant les lettres du Viceroy, & qu'il ne pouuoit resister, ioint qu'il s'estoit fort endebté pour nourrir ses soldats & faire autres choses pour le seruice du Roy. Incōtinent apres Andrade establit des capitaines es fustes, & enuoya les generaux au long des costes, où ils firent de grands maux. Martin Correa estant entré dans vn fleuve d'eau douce nommé Bettele, descēdit en terre avec vingteinq soldats, & se rendit pres d'une grande maison enuironnee de iardins & vergers, pres de laquelle estoient force Mores, hommes & femmes, qui le saluerent, & dirent qu'en ce lieu habitoit vn grand Seigneur More, lequel despēdoit son bien à l'entretienement des pauvres, leur fournissant du bled, du ris & de l'argent. Sur ces entrefaites ce Seigneur sortit & monstra fort bon visage aux Portugallois, ausquels il donna deux vaches, des poules & fruits en abondance. Enquis pourquoy il estoit si grand aumosnier & quelle recompense il en attendoit, fit responce que son naturel enclinoit à cela, & que le plaisir qu'il prenoit à soulager les pauvres lui faisoit ainsi employer ses moyens. Quelque temps apres en vne autre course les soldats de Correa prindrent vn vieil Bramine, lequel pria Correa qu'on le laissast aller iusques en certain lieu, promettant d'apporter rançon de dix ducats pour le rachept de sa liberté, & iurant par certaines reliques pendues à son col qu'il retourneroit. Correa se souciant aussi peu de perdre que de gagner telle prinse, le laissē aller, pensant que ce Bramine eust inuenté ceste ruse pour eschapper: mais l'autre faisant cas de son iurement retourna bien tost avec huit poules, demandant pardon de ce qu'il auoit seiourné peut estre plus que de raison, & de ce qu'il ne pouuoit fournir que la moitié de l'argent qu'il auoit promis, à cause de sa pauvreté, & que les poules fourniroyent pour le reste. Lors Correa estonné de la fidelité de ce pauvre Barbare qui auoit si estroittement gardé sa promesse, lui

laissa

laissa l'argent, & pour recompense des poules lui donna du drap pour faire vn vestement, avec saufconduit, à ce qu'il peust se retirer en seureté. Depuis les Portugallois, voulās emmener & tuer quelque troupeau de vaches pour auictuailier leurs vaisseaux furent assaillis par huit cens Mores, lesquels ils desfirent, puis se retirerēt en Chaul, où les autres capitaines se rendirēt aussi pour passer l'hüer.

5. Q V A N T à Louys de Menefez, il arriua pres d'Ormus au commencement de May : & pource que le temps du gouuernement de Garfie Coutin estoit expiré, Menefez establit capitaine en la citadelle vn gētilhomme nommé Iean Roderic Norogne à qui le Roy de Portugal en auoit donné charge. Il fut puis apres question de repeupler Ormus, pource que sans cela lon ne pouuoit sublister en la citadelle qui auoit faute de viures, & personne n'en apportoit à cause que les habitans de la ville s'estoyent retirez ailleurs. Or Menefez sachant qu'il ne pourroit rien faire si Raix Xerafne lui tenoit la main, tascha de le gagner, promettant lui pardonner tout le passé, & la mort du feu Roy, pourueu qu'il donnast ordre de faire repeupler Ormus. Mais dautant que Xeraf estoit resolu de ne s'assuiettir aucunement aux Portugallois, encores que ce fust à son grand desauantage, pour la perte des peages & tributs, il ne voulut respondre franchement, ains l'entretenoit de promesses couuertes, presumant que les Portugallois estoient trop peu de gens pour s'enhardir de l'aller combattre en terre ferme. Les capitaines & gētilshōmes Portugallois, sachans bien que Xeraf ne cerchoit que de faire couler le temps, cōseillerent Menefez de ne differer pas dauātage, ains attacher Xeraf, lequel ayant le Roy & le royaume d'Ormus en sa puissance, ne retourneroit qu'à toute force sous le ioug de ceux qui l'auoyent si rudement manié auparauant. Menefez ne voulut suivre cest auis, ni mettre l'affaire en deliberation, ains suiuit vn autre chemin. Voyāt dōc que c'estoyent pas perdus de negotier dauātage avec Xeraf, delibera de le faire tuer : parce qu'icelui mort le Roy d'Ormus ne demanderoit pas mieux que de repeupler sa ville. Pour ceste execution il appelle en secret Xamire qui auoit estranglé le feu Roy, le persuade de despelcher Xeraf, promettāt le faire capitaine d'Ormus : car il fauoit que nonobstant le parentage & la familiarité qui estoit entre Xeraf & Xamire, ce tueur feroit vn meschant coup, pour recompēse plus petite sans cōparaison que la capitainerie d'Ormus. Il en auint aussi, c'est que Xamire accepta volōtiers ceste commissiō, s'excusant toutesfois de ne pouuoir si tost couper la gorge à Xeraf, qui estoit tousiours bien acōpagné & se doutoit des Portugallois, notāment de Menefez. Neantmoins pour assurance de sa promesse il s'en obligea par lettres, tellement que Menefez, comme asseuré de l'auenir, enuoya dire à Xeraf, puis qu'il vouloit changer Ormus à l'isle de Queixume, lui ne s'en foucioit point : dautant qu'outre cela le Roy d'Ormus estoit tenu de payer la pension qu'il deuoit à celui de Portugal, autāt que s'il seiournoit en l'isle d'Ormus. Pourtāt le sommoit-il de payer, ensemble la valeur des meubles & marchādises prinſes sur les Portugallois. Xeraf s'y accorda, & acōplit ce que Menefez requeroit : & combien qu'il ne retournast en Ormus, neant-

*Ce que fit
Louys de Me-
neſez en Or-
mus.*

moins la paix demeura entre les Mores & Portugallois qui redresserent leur trafic ensemble.

*Nauigation de
Garsie Henri-
quez aux isles
de Bandan: la
description
de les singula-
ritez d'icelles.*

D' V N E autre part, George Albuquerque gouuerneur de Malaca voyât 6. que le Roy de Bintam auoit posé les armes, & sembloit se repentir d'auoir fait partie contre les Portugallois, resolut (attendu qu'il auoit gens de relais) d'enuoyer es isles de Bandan vn sien cousin nommé Garsie Hériquez, & lui donna quelques soldats qui estoient lors comme inutiles. Garsie s'embarque sur le commencement de Ianuier en l'an mil cinq ceins vingt deux, & en passant, mouilla l'anchre au port d'Agacime en la grande Iaue, où il trouua encores Antoine Brittio, lequel le suiuit tost apres. Ces isles au nombre de trois, a sauoir Bandan, Mire & Gunuape, dôt Bandan est la plus grande, sont à quatre degrez & demi ou enuiron de l'Equateur, & par cōsequent assez proches des Molucques. Gunuape signifie au lāgage du pays montagne de feu, comme à la verité il y a vne montagne qui ard cōtinuellement, à l'occasion dequoy ceste isle est deshabitee. Auant que les Portugallois eussent nauigé si auant, les habitans de ces isles viuoyent bestialement, leurs maisons estans basses, de bois, mal faites & pirement acommodees. Pour tous habillemens ils auoyent quelques chemises, que les marchā de Cābaje y portoyent pour eschanger à des muscades. Ils marchoyēt au reste pieds nuds, la teste descouuerte, les cheveux longs, la face ronde & de couleur oliuastre, de petite stature, idolatres, & si lourds qu'ils n'auoyent adresse à chose quelconque. Les plus grandes singularitez de Bandan sont trois sortes de perroquets, les vns rouges au bec iaune, les autres bigarrez, les autres blācs: puis les noix muscades, desquelles nous dirōs ce mot, apres ce qu'ē a escrit Garsie d'Orte medecin du Viceroy des Indes, au premier liure de son histoire des espiceries. Il croist (dit il) en l'isle de Bandan vn arbre ressemblant au pescher, mais dont les fueilles sont plus courtes, lequel porte la noix muscade & le macjs qui en est la couuerture, & a cōme vne poire, assez espaisse au commencement, puis deuenāt meure elle se fend de soymesme, & monstre vne peau plus deliée enuironnant la noix muscade. Ceste peau est le macjs laquelle on confit avec sucre, & sert aux maladies du cerueau, du ventre & des nerfs. Quand le macjs est meur il se monstre fort rouge & de beau regard: puis apres il deuiet iaune, & se vend beaucoup plus que la muscade enuelppee dedans. Toutesfois le tout y estoit lors à fort vil pris: mais ces gens pauures & farouches se sont ciuilesez avec le temps, & fauēt faire valoir auioird'hui leurs commoditez mieux qu'autresfois, qu'ils n'obeissoient à leurs gouuerneurs sinon par amitié & autant que bon sembloit à chascun en particulier. Antoine Brittio arriua au port de Bandan sur la fin de Feurier, où il trouua Garsie Henriquez, qui lui dit auoir entendu pour certain que deux nauires d'Espagne estoient arriuees aux Molucques où elles s'estoyent chargees d'espiceries, puis reprins leur route, & laissē douze hommes en l'isle de Tidore pour y negocier.

*Ample dis-
cours de la na-
uigation de
Fernād Ma-*

N O V S auons veu au vingtroisiesme chapitre de l'onziēme liure le dis- 7.
cours sur le fait de Fernand Magellan gentilhomme Portugallois, & qui
l'esmut de quitter le parti de Portugal pour se ranger à celui d'Espagne, en-
semble

semble ce qu'il proposa au conseil de Charles cinquiesme pour trouuer vn nouveau chemin aux Molucques à l'auantage des Espagnols, & comme il s'embarqua, & la fin de ceste nauigation. Mais dautât que ceste nauigation a esté trop sommairement descrite, il ne sera pas impertinent d'en parler maintenant plus au long selon que les plus asseurez historiés en ont discouru, afin de contenter le lecteur, & l'amener de plus en plus à vne viue consideration des grandes merueilles de nostre temps. Magellan partit de Seuille & du port de saint Lucar de Barrameda au mois d'Aoust mil cinq cens dixneuf, menant avec soy deux censrente sept hommes, tant soldats que matelots, entre lesquels y auoit quelques Portugallois, en cinq nauires, dont la capitainesse s'appelloit la Trinité, les autres Victoire, saint Antoine, la Conception & saint Iacques, ayans pour maistre pilote Jean Seran, bien entédu au fait de la nauigation. Apres auoir passé les Canaries, & les isles de Cap verd, estant au cap de saint Augustin il print sa route entre Midi & Occident, avec intention de nauiguer iusques à ce qu'il trouuast le bout, costoyant la terre ferme de plus pres qu'il pouuoit. Ils s'arrestèrent beaucoup de iours es pays situez à vingtdeux ou vingt trois degrez delà l'Equateur, & à la fin de Mars de l'an mil cinq cés vingt arriuerēt à vne plage à quarâte degrez où ils hiuernerent les cinq mois suiuaus iusques en Aoust, pource que le soleil courant lors vers le pole Arctique, le froid & la glace regnent en ce quartier tirant vers l'Antarctique. Cependant quelques Espagnols mirent pied à terre pour aller voir quel pays c'estoit, & porterent des miroirs, sonnettes, & autres menues besongnes pour changer. Les habitants acoururent au riuage, esmerueillez de voir des vaisseaux si grands & des hommes, si petis. Ils ostoyent & retiroient de leur gosier vne fiesche pour estonner les Espagnols, & portoyent les cheveux rongnez en couronne comme les prestres, & entortillez avec vn cordon de fil, auquel mesme sont attachees leurs fiesches quand ils vont à la chasse ou à la guerre, & portoyent fouliers de bergers, & estoyent vestus de peaux de bestes. S'estans fait signe les vns aux autres, en fin sept harquebuziers allerēt iusques à trois lieues dedās le pays en vne maison couuerte de peaux, au milieu d'un bois fort espais. Ceste maison estoit partie en deux, l'une pour les hommes, l'autre pour les femmes & enfans, & y auoit lors cinq geans, & treize autres personnes femmes & enfans, plus noirs que ceux des pays voisins. Ayās traité leurs hostes à la façon du pays, le lendemain trois de ces geans s'acheminèrent avec les Espagnols vers la flotte, & marchoyent aussi viste que vn cheual, & deux d'entr'e eux se retirerent. Le troisiésme tenu de plus court fut mené à Magellan, qui le traita doucement, & lui donna quelques menues besongnes pour l'appriuoiser. Finalement, pour s'en abseuer, on le voulut lier, mais huit Espagnols n'en peurent venir à bout. On l'enchaina, mais depuis il ne fit que braire, & par despit s'abstint de manger, & ainsi mourut. Ces peuples sont appellez Patagones, à cause (disent aucuns) de la deformité de leurs pieds: ils parlent du gosier, mangent beaucoup, selon leur corpulence & à raison de la temperature de l'air, sont mal vestus, au reste bons archers, grands chasseurs, & pre-

*gellan aux is-
les Moluc-
ques: accidens
notables d'i-
celle iusques à
la mort de
Magellan, &
du retour en
Espagne de la
nauire n. mee
Villora.*

nent en leur chasse des austruches, des regnards, des cheures sauvages & autres bestes. Magellan mit pied à terre & fit câper les gens : mais parce qu'il n'y avoit en ce pays ni villages ni personnes qui apparussent, les Espagnols toberent en piteux estat, endurans si grand froid & telle famine qu aucuns en moururēt. Or Magellan mettoit vne estroite reigle aux viures, afin que le pain ne defaillist point, voyant le defect, la necessité & le danger : & que les neiges & le mauuais temps duroyent tousiours. Aparauāt il auoit perdu vn capitaine Espagnol nommé Iean de Solis & soixante soldats que les Canibales auoyent mangez, parce qu'ils s'estoyent fourrez trop auant en terre ferme pour descouurir du pays. Les capitaines & autres de la flotte le prierent de retourner en Espagne, sans les faire mourir si miserablement en cerchāt ce qui n'estoit point, & se cōtenter d'auoir veu des pays ; où iamais Espagnol n'auoit mis le pied. La responce de Magellan fut que ce lui seroit grand honte de s'en retourner pour si peu de traual, les encourageant au reste par beaucoup de remonstrances : ce nonobstant ils ne cessèrent de l'importuner, & le presserent tant que de cholere il commence à leur faire teste, en fit prendre & chastier quelques vns. Cela irrita les soldats, iusques à dire que ce Portugallois les menoit à la mort, pour faire la paix avec son Roy. Estans ainsi diuisez ils s'embarquerēt tous avec Magellan, & des cinq nauires il y en auoit trois qui ne vouloyent point obeir : ce qui l'estonnoit, craignāt qu'ils ne l'assailissent & ruïnassent. Sur ceste peur vne de ces trois nauires repoussées par les flots, de la mer vers la riue, sans que les mariniers y prinsissent garde, parce qu'il estoit nuit, vint se jeter sur la capitainessē de Magellan, ce qui redoubla sa peur, mais aussi tost il conut la faute, & arresta ceste nauire sans coup ferir, & sans s'esmouuoir. Les autres deux voyans ceste là en l'obeissance du general, se vindrent aussi ranger vers lui. Alors il fit pendre deux des plus mutins, & laissa sur terre vn soldat & vn prestre qui incitoiēt chascū à reuolte, leur baillāt pour toutes armes leurs espees & vn petit sac plein de biscuit, pour chastiment de leur conspiratiō : ce qui adoucit fort les autres. Au partir de là, Magellan poursuivit sa route vers le pole antarctique, & contemplant attentiuelement tous les destours des plages qu'il rencontroit, pour voir si ce n'estoyent point quelques passages, il tardoit beaucoup en chascue quartier où il arriuoit. Vn iour estant vis à vis d'une pointe nommee sainte Croix, à l'instant s'esleua vn tourbillon qui poussa cōtre les escueils le plus petit vaisseau des cinq, lequel fut brisé : toutesfois les hōmes & tout ce qui estoit dedans furent sauuez. La peur reprint Magellan, le ciel estant troublé, l'air rempli de tonnerres & tēpestes, la mer enflée, la terre glacée : neantmoins il ne laissa de courir plus bas, & gaigna vn autrē cap qu'il surnomma des Vierges, mesura la hauteur du Soleil, & se trouua à cinquante deux degrez & demi de l'Equateur, & estoit lors la minuit. Cest endroit lui sembla estre vne grāde descēte ou courāte d'eaux, & pensant que ce fust le passage qu'il cerchoit enuoya les nauires pour s'en informer plus au vrāy, cōmandāt aux capitaines qu'au bout de cinq iours ils retournassent en ce mesme lieu. Deux reuindrent, & comme la troisiēme, nommee S. Antoine, tardoit trop, les autres firent voile. Ceste troisiēme

me nauire estant puis apres de retour en ce cap des vierges, & ne trouuant les autres, Aluarez de Mefchire capitaine d'icelle & Estiene Gomeze pilote firent lascher l'artillerie & allumer des feux pour sauoir nouuelles de leurs compagnons, lesquels ils attendirent quelques iours. Aluarez vouloit entrer au destroit, disant que son oncle Magellan auoit prins ce chemin : mais le pilote & les autres pour la pluspart vouloyent retourner en Espagne, & sur ce different Gomeze donna vn coup d'espee à Mefchire, le mit prisonnier, l'accusant d'auoir conseillé Magellan de traiter le soldat & le prestre à la façon sus declairee, & qu'il estoit cause de la mort d'autres Espagnols : puis fit voile vers l'Equateur, emportât en ceste nauire deux geâs Patagones qui moururent sur mer. Ils arriuerent en Espagne huit mois apres s'estre departis de Magellan, qui ce pendant tarda beaucoup à passer le destroit : mais voyant l'autre pointe il redit graces infinies à Dieu, ne pouuant tenir contenance, tant il estoit aise d'auoir trouué vn passage pour aller en la mer de Midi, par laquelle il esperoit arriuer bien tost aux Molucques, dont il esperoit de grands honneurs & proufits. Les deux embouchures de ce passage, aujourd'hui appellé le destroit de Magellan, sont en vne mesme hauteur de cinquante deux degrez & demi. Oforius lui dōne vingt lieues de longueur : aucuns lui en attribuent quatre fois dauantage, le considerans en ses destours. Il va d'Orient en Occidēt, & a quatre lieues de largeur, & en quelques endroits dauantage, fort profond, croissant plus que diminuant, & court vers le Midi, couuert de plusieurs isles, garni de bons ports, ayant les deux costes fort hautes & plaines de rochers. Le pays voisin est sterile, & le froid y dure quasi toute l'annee : la terre estât couuerte d'arbres, & de cedres treshauts. Il y a des austruches & autres grâds oiseaux, avec plusieurs bestes à quatre pieds, d'estrage sorte. La mer est fertile en sardines, arondelles de mer, loups marins, dont les peaux seruent de vesture aux habitans, & de balaines, des os desquelles ils font des barques : comme aussi ils en font d'arbres, & les calfeutrent avec de la fiente d'antas qui est vne sorte d'animal de la grandeur des vaches de l'Europe. Au demeurât le pole Antarctique n'a ses estoilles de la sorte de celles du Pole Arctique : car on les void ensemble, non gueres eslongnees, & vn peu obscures. Au milieu d'icelles il y en a deux, assez petites, & non gueres luisantes, & qui tournent vn peu. Icelles sont le Pole Antarctique. Les Espagnols estans au milieu du destroit virent cinq estoilles fort claires en esgale distance l'vne de l'autre en forme de croix, & non gueres eslongnees des deux autres : tellement aussi que ceste croix est aujourd'hui prinse pour marque du Pole Antarctique à ceux qui de deçà passent l'Equateur. Apres que Magellân eust trauersé le destroit il fit tourner les prouës à main droite, & print la route quasi par derriere le soleil pour regagner l'Equateur, par ce que dessous icelui sont situées les Molucques qu'il cerchoit. Il fut trois mois & demi sans voir terre, sur vne mer paisible, sans aucune tourmente ni fascheuse nauigation : mais ses viures commençoient à faillir, tellement que ses gens n'auoyent qu'vne once de pain par iour, beuoyent l'eau toute corrompue & puante, & faisoient cuire leur ris avec eau marine. Outre tout cela, les machoires leur

enſietent de telle ſorte, que dixneuf Eſpagnols en moururent, & vingt cinq ou trente en furent ſi malades qu'ils ne pouuoient remuer bras ni iambe : le reſte ne valût gueres mieux. Durant ces miſeres ils firēt bien quatre mille lieues en ceſte mer paiſible ſans deſcōurir autre choſe que deux petites iſles deſertes, où ils ne virent que des oiſeaux & des arbres, à l'occaſion de quoy ils les appellerēt infortunees, & ſont à deux cēs lieues ou enuiron l'une de l'autre, l'une à quinze, l'autre à neuf degrez del'Equateur. Si la nauigation euſt eſté perilleuſe, iamais Magellan & ſes gēs n'euffent gagné pays à tēps, ains euſſent ſerui de paſture aux poiſſons. Finalement ils arriuerent à l'ua-gana qu'ils appellerent l'iſle des bons ſignes, où ils ſe repeurent abondamment. Ceſte iſle eſt à onze degrez, & ils y trouuerent du coral blanc. Apres ils rencontrerent tant d'iſles enſemble qu'ils nommerent ceſt endroit de mer l'Archipelague : mais les premieres eurent le nom d'Iſles des larrons, parce que les habitans d'icelles deſrobent auſſi ſubtilement, comme font ces coureurs nommez Bohemiens ou Egyptiens en Europe. Les hommes y ont les dents noires ou rouges par artifice, s'eſtudient à porter les cheveux longs iuſques au nombril : les femmes les portent iuſques aux talons, & les lient à l'entour de leurs corps en forme de ceinture, & portēt des chapeaux de fueilles de palmes, & quelques façons de brayes de meſme matiere pour ſe couurir. D'iſle en iſle les Eſpagnols gaignerent finalement celle de Zebut. Magellan fit dreſſer vn eſtādard en ſigne de paix, laſcher l'artillerie, & deſcendre quelques vns des ſiens en terre pour porter quelques preſents au Roy de ceſte iſle, & de la mercerie pour changer. Le Roy nommé Hamabar print plaifir à telle arriuee & enuoya prier Magellan de venir en l'iſle : ce qu'il fit, & y fut bien receu, meſmes ce Roy & la pluſpart de ſes ſuiets ſe firent baptiſer. Puis à la requeſte de Magellan il enuoya meſſagers aux habitans des iſles voiſines, les priant de venir prendre amitié avec les Eſpagnols, ce que firent quelques vns des petites iſles plus prochaines. Mais ceux de Mata, ou Mauta, qui eſt vne aſſez grāde iſle à huit ou dix lieues de Zebut ne voulurent ou n'oſerent venir pour l'amour de Cilapulapo leur Seigneur, lequel exhorté par Magellan de ſe rendre tributaire de l'Empe-reur Charles cinquieme, fit reſponſe qu'il n'oobeiroit à celui qu'il n'auoit iamais veu, encores moins à Hamabar. Cependant, afin de n'eſtre eſtimé in-humain il enuoya quelque beſtail que les Eſpagnols demandoient. Ma-gellan penſant faire tort à ſa reputation, s'il laiſſoit ainſi Cilapulapo, paſſa avec quarante ſoldats en l'iſle de Mata, où il bruſla quelque petit fort, dont les iſulaires firent ſemblant d'eſtre eſtonnez, & enuoyerent comme en ſecret à Magellan bon nombre de cheures, demandans pardon, & s'excuſans ſur leur Seigneur, auquel ils l'exhortoyent de faire guerre, ou bien qu'il leur enuoyaſt quelques Eſpagnols bien armez pour faire teſte à Cilapula-po, & qu'ils leur liureroient l'iſle. Magellan ne ſe doutant point de la tromperie, s'en retourna, & reuint la nuit avec ſoixante ſoldats bien equippez, en trois barques, amenant auſſi Hamabar qui auoit trente barques plaines de ſes ſuiets. Il euſt bien voulu combattre incontinent : mais d'autāt que par vn traité ſpecial il auoit promis à Cilapulapo, de le deſfier auant que venir

aux

aux mains, si dauanture il lui faisoit guerre, il l'enuoya sommer de se declarer amy ou ennemi. Cilapulapo fit vne responce hardie & plaine d'iniures : puis ausi tost fit sortir trois mil hommes en campagne, partis en trois bandes, lesquelles il rangea pres de l'eau, se tirant à costé pour se garantir de l'artillerie & de la scopeterie des harquebuziers. Ce pendant Magellan sort de ses barques avec cinquante soldats, se iettât en l'eau iusques au genouil, parce que les barques ne pouuoient approcher pres de terre, à raison que la riue estoit toute pierreuse : puis alla pour charger les ennemis qui l'attendoient de pied quoy, sans auoir esté endommagé de l'arquebuzerie ni artillerie. Alors Magellan se iugea perdu, & sans la honte qui le retint il eust tourné le dos : ausi ne s'abusa-il pas en cela, car si tost que ses gens approchoient tant soit peu c'estoit fait d'eux. Il leur commanda donc de se retirer : mais en ceste retraite huit de ses soldats & quelques vns de Zebut furent tuez, lui & vingt autres blesez la pluspart aux iambes avec fiesches enuenimees, les Matanois ayans ceste ruse de ne descocher sinon contre la partie qu'ils voyoyent desarmée. Finalement Magellan fut tué d'un coup de fiesche qu'on lui tira au visage, son casquet étant tombé à coups de pierres & de picques. Il receut deux autres coups, l'un en la iambe, l'autre étant tōbé, & qui le perçoit tout outre, tellement qu'il mourut entre terre & eau, mettant fin à si haute entreprise, sans iouir du bien qu'il eseroit de tant de trauaux. Ceste rencontre auint le vingtséptiesme iour d'Auril, l'an mil cinq cens vingt vn. Apres la mort de Magellan, les Espagnols esleurēt pour leur capitaine Jean Serran grand pilote de l'armee : ce pendant ils s'amusoient à changer avec les habitans de Zebut quelques merceries à de l'or, du sucre, du gingembre, de la chair, du pain & autres choses, pour aller aux Molucques : d'autrepart les blesez se guerissoient & sondoit-on les moyens de conquerir Mata. Et comme pour l'une & l'autre entreprise ils eussent à faire d'un esclaue nommé Henri, trucheman de Magellan, ils le pressoyent de se leuer : mais étant blessé d'un coup de fiesche enuenimee il ne pouuoit bouger pour la grande douleur qu'il sentoit, ou bien ne vouloit, sels qu'aucuns pensoient : tellement que Serran se tempestoit contre lui, Edouard Barboze beau pere de Magellan & Beatrix sa vefue le menaçoient. Cela enaigrit Henri, qui pour se venger & recouurer sa liberté communiqua secrettement avec Hamabar, & lui conseilla, s'il vouloit demeurer seigneur de Zebut, de tuer les Espagnols : disant que c'estoyēt gens auares, qui apres s'estre seruis de lui pour desfaire Cilapulapo, vsurperoyent son isle, faislans ainsi par tout où ils mettoient le pied. Hamabar le creut, & incontinct pria à dîner Serran & tous ceux qui lui vouldroyēt tenir compagnie, disant leur vouloir bailler vn present pour l'Empereur, puis qu'ils s'en vouloyent aller. Ainsi Serran & trente Espagnols s'en allerent au palais d'Hamabar, sans pēser à ce qu'on leur brasloit : & comme ils disnoient, tous furēt tuez à coups de picques & d'espees, excepté Serran qui trouua moyen de se sauuer. On arresta tous les autres qui estoient parmi l'isle, & huit d'iceux furent depuis vendus à des marchans de la China. Les Zebutins mirent ausi par terre les croix & les images que Magellan auoit fait dresser, sans se soucier

de leur Baptisme & nouvelle profession de Chrestienté. Les historiens Portugallois disent que Magellan apres auoir secouru Hamabar & desfait Cissapulapo fut tué en Zebut au banquet susmentionné avec Iean Serran, Edouart Barboze son beupere, & vingt Espagnols. Quoy qu'il en soit, il mourut de mort violente, auant qu'auoir veu les Molucques par lui tât desirées. Ceux qui estoient restez dedans les nauires entendans le massacre qu'on auoit fait de leurs compagnons, par les clameurs de Iean Serran qu'ils laisserent au riuage, sans qu'on ait sceu depuis qu'il deuint, leuerent les anches & les voiles, voguans à l'auanture. Car encores que Iean Carual leur capitaine promist les mener aux Molucques, si ne sauoit-il lors quelle route prendre. Ils estoient lors cent & quinze hommes de reste avec trois nauires, dont ils bruslerent l'une par contrainte, ne leur restât que la Trinité & Victoire, avec lesquelles ils aborderent en vne isle nommee Puloand siette au Roy de Burneo, où ils prindrent deux hommes qui les menerent en Burneo mesmes, & ils enuoyerent prier le Roy de leur permettre la descente pour trafiquer avec ses sujets, ce que leur fut accordé, & apres quelque sejour en la ville, où aucuns d'entre eux furent magnifiquement traitez, ils se remirent à la voile, & en vne autre isle calfeutrerent leurs nauires, puis arriuerent à Mindanao & Sanguin. Au partir de là, apres auoir beaucoup tournoyé, ils rencontrēt vn ionc ou basseau de la China qui alloit aux Molucques, duquel ils emprunterent vn pilote qui les conduisit en Tidore, l'une d'icelles, en laquelle ils aborderent sur la fin du mois d'Octobre l'an mil cinq cens vingt & vn. Le Roy de ceste isle les recueillit avec grand honneur, & eux lui firent quelques presens, & declairerent estre venus là pour trafique & pour le bié du pays, adioustās vn long discours à la louage de l'Empereur Charles cinquieme leur Prince, auquel ce Roy de Tidore promit fidelité, les priant d'attendre encores deux mois pour charger des espiceries nouvelles: mais leur responce fut qu'ils ne pouuoient attendre, pource que leur nauire estoient demi pourries, & falloit necessairement se retirer, mais qu'au bout de deux ans ils retourneroyēt avec vne flotte de cent cinquante vaisseaux chargez de marchandise. Là dessus ils demanderent si les Portugallois trafiquoyent point en ceste isle, & entendans que si, en dirent tous les maux du monde, affermans que tout ce qui estoit depuis Malaca iusques aux Molucques appartenoit au Roy d'Espagne. De rechef ils prierent le Roy de leur faire vendre les espiceries qui se retrouueroyēt en Tidore, encores qu'elles ne fussent fresches: ce qu'ils sollicitoyent fort afin de se retirer d'heure, craignans d'estre surprins & mal traitez des Portugallois qui maintenoient les Molucques estre de leur descouurement & sous leur partage, & les contraindroient de retourner bien viste en Espagne. Or tandis qu'on amassoit les espiceries pour charger ces deux vaisseaux, les Espagnols commencerent à vendre leurs marchandises à l'encan, & d'autre part enuoyerent solliciter d'amitié le Roy de Ternate, & lui firent des presens. Mais pource que quelque annee auparauant il s'estoit allié avec le Roy de Portugal, il escriuit incontinent à George Albuquerque gouverneur de Malaca l'auertissant de ce qui passoit, dont Albuquerque donna

na auertiffemēt au Viceroy & au Roy de Portugal, par homme expres enuoyé de Malaca, afin que lon pourueust à la garde de ces isles en y faisant baltir vne forteresse. Les Espagnols voyans que le Roy de Ternate ne tenoit compte de leur estre ami, assuerent celui de Tidore qu'à leur retour ils côtraindroyēt ceux de Ternate de faire hommage à l'Empereur. Quād le Roy de Tidore les vid resolus des'embarquer, il fit recueillir toutes les espiceries qu'ō pût recueillir en l'isle, & en chargea-on les deux nauires Espagnoles. La plupart de ces espiceries appartenoyēt au Roy de Portugal & aux Portugallois qui l'auoyent amassée en l'an mil cinq cēs vingt, de trois ioncs ou basteaux de Malaca, qui deschargerent en l'isle de Bachian, pource qu'ils n'auoyent la commodité de faire voile iusques en Malaca, & l'vn de ces basteaux appartenoit à vn marchand, qui en auoit la cōmission pour les affaires du Roy de Portugal sous l'autorité de Gaspar Roderic son fa-cteur: mesmes plusieurs sacs de ces espiceries estoient marquez du nom de ceux à qui ils appartenoyent. Mais les Espagnols auoyēt telle haste de charger de peur d'estre chargez par les Portugallois qu'ils achetoyēt la marchā-dise au quadruple. Ayās empli leurs nauires, ils laisserent quelques facteurs en Tidore avec de la mercerie, & promirent au Roy de baltir à leur retour vne forte citadelle, laissant pour gage quarante diuerfes pieces de canon, force arbalestes, harquebuzes & autres armes. Puis ils s'embarquerent & partirent de Tidore au mois de Decembre, l'an mil cinq cens vingt vn. La capitaineſſe nommee la Trinité tiroit grande quantité d'eau: à l'oc-casion de quoy ils accorderent ensemble que Iean Sebastien de Cauo s'en iroit en Espagne dedans le vaisseau nommé Victoire, duquel il estoit pilō-te, par le chemin que font les Portugallois, & que l'autre vaisseau estant ra-billé & calfeutré, de peur d'autre inconuenient, prendroit vne route plus seure & abregee, passant sur le partage de l'Empercur, & s'en iroit surgir à Panama, ou prendre port en la coste de la nouuelle Espagne. Cest accord fait Iean Sebastian partit avec soixante compagnons, & ayant passé par plusieurs isles, comme il chargeoit du sandal blanc en Timor, s'eſleua vn tumulte avec les habitans, tellement que quelques Espagnols furent tuez. L'onzieme iour de Fedurier mil cinq cens vingt deux, Iean Sebastian par-tit de Timor, entrant en la mer Orientale surnommee de Lantchidol, pre-nant sa route entre le Ponant & le Garbin, laissant la Tramontane à main droite, crainte qu'en approchant trop de terre ferme il fust descouuert des Portugallois: & apres auoir passé entre Samatra laissée à gauche, & Pegu, Bengala, Cananor, Goa, Cambaje, le goulfe d'Ormus, & toute la coste de l'Inde Orientale à droite, pour doubler plus seurement le cap de bonne esperance, il descendit iusques au quarante deuxiesme degré vers le pole Antarctique, & demeura sept sepmaines dessous ce cap, vol-tigeant tousiours à voiles hautes, pource qu'il auoit en proue les vents de Ponant & Maistral qui l'empeschoyent d'auancer, tellement qu'il eut à combattre les vents, les vagues & tourmentes, avec merueilleux hazards. Ce cap de bonne esperance est à trente quatre degrez & demi de l'E-quateur vers le pole Antarctique, à seize cens lieues du cap de Malaca,

estant la plus grande & dangereuse pointe de toutes les mers du monde, à l'occasion dequoy on l'appelle le Lion de la mer, pour les courantes impetueuses qui y sont ordinaires, & autres raisons deduites au vingtquatriesme chapitre de l'onzieme liure. Quelques Espagnols sentans la faim & les maladies qui pressoyent presque tous ceux de la nauire, estoient d'avis d'aller motuiller l'ancre au port de Mozambique où les Portugallois auoyent vn fort: mais les autres sachans bien qu'ils y seroyent encores plus mal traitez que sur mer, dirent qu'ils aimoyent mieux mourir que de prendre autre route que celle d'Espagne. Puis reprenans courage ils passerent le cap de bonne esperance, & avec vn vent propre voguerent deux mois entiers sans approcher de terre: tellement que pendant ce temps vingt & vn d'entre eux moururent de disette & maladie. On iettoit les corps en la mer, & à ce que recite Marc Antoine Pigafette, present en toute cestenaugation, dont il a escrit vn liure imprimé, les corps des Chrestiens flottoyent sur l'eau la face dessus, mais ceux des Indiens le visage dessous. Au reste, sans vne speciale assistance de Dieu, Iean Sebastian & tous les suruiuans fussent morts de faim: & comme ils estoient reduits à toute extremié ils approcherent d'une des isles du cap verd, nommee saint Iacques, appartenant au Roy de Portugal. Iean Sebastian fit descendre dans l'esquif treize soldats, pour aller puiser de l'eau, acheter de la chair & du pain, & louer des Negres pour tirer à la pompe, parce que la nauire tiroit force eau, & ceux de dedans estoient presque tous malades. Ils obtindrent quelques mesures de ris, & voulans y retourner pour la seconde fois, le capitaine qui commandoit en l'isle arresta prisonniers ces treize, voulant sauoir où ils s'estoyent chargez de ces espiceries, à cause qu'ils auoyent offert payer en cloux de girofle les viures qu'ils acheteroyent. Il arresta aussi l'esquif, & en vouloit faire autant de la nauire: mais Iean Sebastian fit incontinent leuer les anches & les voiles, & le septiesme iour de Septembre entra au port de saint Lucar de Barra-meda avec dixhuit seulement, les plus desfaits & rompus qu'il estoit possible. Les treize arrestez en l'isle de saint Iacques furent incontinent relaschez par le commandement du Roy de Portugal. Selô le conte tenu de iour en iour durant le téps de leur nauigation, qui dura trois ans moins quatorze iours, ils firent quatorze mil quatre cens soixante lieues, voguans autour du monde d'Orient en Occident, & passerent six fois par dessous la Zone torride. Le huitiesme de Septembre ils entrerét à Seuille, & tous en chemises, nuds pieds & testes nues, avec vne torche en la main, s'en allerent au grand temple remercier Dieu qui les auoit ramenez & deliurez de tant de morts.

*Description
des isles Mo-
lucques & de
leurs singulari-
tez.*

E N T R E ce monde d'isles grandes & petites posees en l'Ocean Orient- 8.
tal ou Archipelague de saint Lazare, les Molucques sont fort renommées à cause des espiceries qu'elles produisent. Il faut donc dire ici quelque chose d'icelles & de leurs singularitez. Ces isles au nombre de cinqs appellent Tidore, Ternate, Motir, Machian & Bachian. Tidore est deçà l'Equateur vers nostre Pole à vingtsept minutes seulement, Ternate à quarante: Motir est iustement sous l'Equateur, Machian à quinze minutes vers l'Antarcti-
que

que & Bachian à vu degré, laquelle est estimée la plus grande des cinq. Elles sont enuironnées des isles de Gilolo, Celebes, Ambon, Burru, & d'autres assez prochaines & tresfertiles. Burneo & Mindanao sont plus loin, l'une à l'Occident, l'autre au Septentrion, tres-riches & bien accomodees. Lors qu'elles furent descouuertes, les insulaires estoient Mahumetistes pour la pluspart, les autres idolatres, adorans ce que bon leur sembloit. Depuis quelques années en çà, par le moyen du trafic des Portugallois, quelques Iesuites y ont fait changer à aucuns insulaires leur vieille religion à celle de l'Eglise Romaine. Mais ces peuples ont peu d'arrest en tel cas, & suivent seulement ce qui leur est plus commode, changeans selon les occurrences du temps. Ils sont bazanez & viuent à la façon des autres Indiens, estans gouuernez par quelques Rois qui prennent plaisir à entretenir grand nombre de femmes & concubines, comme aussi le commun s'en accomode selon les moyès que chascun a en son particulier. Encores qu'ils n'ayent les commoditez de viures des autres nations, toutesfois le trafic de l'espicerie qui y croist en abondance & presques de toutes sortes, fait que les marchans qui y abordent de tous costez portent pour eschange choses propres pour l'entretienement des insulaires, qui auioird'hui sont vn peu civilisez, & viuent en repos, tandis que les Europeans & autres se donnent mille peines pour porter à viure à ces gens, qui autresfois se soucioyent peu des richesses de leurs isles. Leurs maisons sont basses & petites: les femmes y sont laides & vont nues ainsi qu'es autres isles, sauf qu'elles couurent leur honte avec toile faite de certaines escorces d'arbres, qu'elles font longuement tremper en l'eau, & estans amollies les battent d'une piece de bois, les font deuenir aussi longues & larges que bon leur semble, & subtiles comme fine toile de lin, tellement qu'on diroit que c'est tissure. Les hommes sont fort ialoux de leurs femmes, aimans le repos & le seiour de leurs isles. On trouue en Tidore certains oiseaux qu'ils appellent Mamucos, lesquels ont moins de chair que le corps ne demonstre, les iambes longues d'un demi pied, la teste menue, le bec fort long, le plumage d'une couleur singulierement belle, ils n'ont point d'ailes, ains au lieu d'icelles des plumes assez longues & de diuerses couleurs, & ne les void on iamais sur terre que morts, sans se corrompre aucunement, & ne fait on d'où ils sortent, ne où ils s'esleuent, ni quelle est leur nourriture, si ce n'est la rosee & la fleur des especes. On les appelle aussi Manucodiatas, qui signifie autant qu'oiseau de Dieu, & les Portugallois serrent soigneusement les plumes d'iceux pour en faire des pennaches, & les insulaires s'en seruent pour guerir les playes. Toutes ces isles produisent les cloux de girofle, la cannelle, le gingembre & noix muscates: mais chascune isle ne produit pas ces especes esgalement: car l'une porte plus de cloux que l'autre, & une autre plus de gingembre. Motir fournit plus de cannelle que d'autres especes. Il y a force cloux en Tidore & Ternate: & l'arbré qui les produit est grand & gros, ayant sa fucille comme celle du Laurier, & l'escorce semblable à celle d'un Oliuier. Il porte ses cloux par grappes, comme fait l'hierre ou l'espine vinette: au commencement ils sont verds, puis deuiennent incontinent blancs, & en se meurissant

rougissent, & se tournent en noir estant secs. Apres qu'on les a cueillis on les laue en l'eau de la mer, puis ils sont essuyez & gardez es magazins. Cest arbre demande les collines, & engendre au dessus de soy vne & plusieurs fois vne petite vapeur de nuee qui l'environne presques d'ordinaire. Si on le plâte en des vallees il ne proufite point, ou s'il croist c'est sans porter fruit: encores moins s'il est mis en vne plaine. Le gingembre est vne racine qui ressemble à la garâce ou au saffran. La canelle vient d'un arbre qui ressemble fort au grenadier: l'escorce se fend & creue par la force du soleil, puis on l'attache & la nettoye-on au soleil. Quant aux noix muscates nous en auons parlé en faisant mention des isles de Bandan. Au reste, toutes ces isles portent le Camphre, gomme distillant de certain arbre que les Insulaires appellent Capar, lequel est beau, bien feuillu, touffu, & croissant aux montagnes voisines de la mer: ayant le bois leger & les branches menues. Il y a quatre sortes de camphre: l'un se trouue serré entre les veines du bois, fait tout ainsi que petites lames de quelque metal: l'autre sort hors de l'escorce, comme fait la resine par deçà, s'y ioignant contre, comme gomme, semé de petites taches rouges, puis apres il deuient tout blanc, estant meilleur & plus purifié que celui qui croist dedans les veines: le troisieme est moindre, plus noir, & moins estimé que les deux autres: le quatrieme est encores moins prisé, à cause qu'il est chargé des raclures & esclats du bois, où il se tient amassé de la grosseur d'une amende ou d'une feue. Les Moluciens ont, outre les richesses susmentionnées, du ris, des rebis, cheures & poules, figues, amandes, grenades de toutes sortes, asauoir douces & aigres, oranges, citrons, limons, du miel, des roseaux de sucre, huile de dattes, melons, citrouilles, & un fruit fort rafraichissant qu'ils nomment Camulicaj. Leur pain est fait d'une certaine racine, & font du vin du ris, ayans au reste des oiseaux de diuerses sortes, notamment des Perroquets. Quant aux singularitez des autres isles voisines il n'est besoin d'entrer en ce discours, resenié à ceux qui escriuent une histoire vniuerselle ou cosmographie, ioint que selon l'occasion qui s'en pourra presenter en d'autres endroits ci apres nous en toucherons quelque mot. Reprenons maintenant le fil de l'histoire.

Arrivée d'Antoine Brittio & de Gasie Henriquez aux Molucques, & ce qu'ils y firent.

ANTOINE Brittio ayant entendu que les Espagnols estoient arriuez 9. aux Molucques, & y auoyent dressé vne facturerie, dautant qu'il y faisoit voile avec quelques soldats au nom du Roy de Portugal, craignant n'estre assez fort, pria Gasie Henriquez de lui tenir compagnie, afin d'y demeurer les maîtres, & chasser les Espagnols: à quoy Hénriquez s'accorda, encores que celui fust chose fort incommode de laisser Bandan, où Brittio trafiqua & print amitié avec les insulaires, iusques à y planter vne colonne de pierre avec les armoiries de Portugal, à l'occasion de quoy ils eurent différent, & en vindrent aux coups: mais finalement ils demeurèrent amis. Au mois de May, qui est la saison propre pour nauiguer aux Molucques, Brittio & Henriquez s'embarquerent avec leur flotte de huit vaisseaux chargez de trois cens hommes, & allerent surgir en cinq isles à cent lieues de Bandan, entre le Septentrion & le Midi, lesquelles sont proprement les Molucques susmentionnées, esquelles on negocioit peu auparauant, pour-

ce que les marchans de Malaca & d'autres pays se contentoient de trafiquer en l'isle de Bandan, sans s'auancer plus loin : aussi les Moluciensy enuoyoyent partie de leurs espiceries. Mais depuis la descouuerte des Portugallois, ils sont demeurez chez eux, où le trafic est maintenant, & ont aprins aussi d'aller çà & là, parce qu'ils conoissent ce que vaut ce qu'on va querir iusques en leurs maisons. Le menu peuple tient tel conte des Rois de ces isles, encores qu'il ne soyent pas si riches que plusieurs autres, qu'en les voyât il ferme incontinent les yeux, se iette la bouche contre terre, & leur donne des noms magnifiques. De tous ces Rois il n'y en auoit pas qui fust ami des Portugallois, excepté celui de Ternate, qui les auoit recerchez d'amitié, & permis de bastir vne forteresse en son isle : se voulant par tel moyen asseurer contre les Espagnols, auxquels il portoit mauuaise affection. Estans arriuez sur la fin de May en ces isles, Britio sachât que les Espagnols estoient en Tidore avec les deux nauires de reste de la flotte de Magellan, résolut les aller trouuer pour abolir leur facturerie, afin qu'elle ne preiudiciast au Roy de Portugal, & estant arriué là apres auoir donné ordre aux affaires de son maistre, & empesché les Espagnols de passer outre en leur trafic pour l'auenir (en quoy les historiens ne s'accordét pas, car les vns disent qu'il arresta prisonniers les Espagnols, & leur osta beaucoup de marchandises, les autres tienét qu'il les traita gracieusement, & leur permit se retirer, comme nous auons veu ci dessus que l'vne des nauires auoit prins la route de Panama, l'autre, celle d'Espagne) il fit voile en Ternate, où il ne trouua plus le Roy, car peu auparauant il estoit mort, ayât esté (ce disoit-on) empoisonné en vn bâquet par le Roy de Tidore son beaupere, pource qu'il refusoit l'amitié des Espagnols. Sa vesue gouuernoit, pource que son fils n'estoit lors aagé que de sept ans. La Roine entendant l'arriuee de Britio l'enuoya saluer, & auertir qu'elle auoit charge de son mari de lui faire bon acueil, & permettre de bastir vne forteresse, aidant de tous ses moyes pour l'auancer & le secourir. Ceste offre fut acceptee des Portugallois, & Britio enuoya demander congé de descendre enterte pour voir en quel endroit il pourroit commodement cōmencer, ce que la Roine permit, & enuoya ses Mandarins ou gentilshommes le recevoir, ce qu'ils firent en grande solennité. Britio ayant marqué le lieu propre pour sa forteresse, commença à faire vne barriere pour se retirer avec son bagage & l'artillerie, tandis que on bastiroit la forteresse : & auant que rien commencer traitta vn accord avec la Roine & les Sangagins ou barons de l'isle au nom du petit Roy, contenant entre autres choses que les Portugallois pourroyent auoir vne facturerie pres du lieu principal de l'isle pour retirer les espiceries que ceux de Bandan y apportoyent, & qu'on leur fourmiroit en l'isle de Ternate les mesmes marchandises, & autres y prouenantes, sans en vendre à autres estrangers : en payant pour bahar, qui est vn poids de quatre quintaux, trente deux reales d'Espagne seulement. Cest accord fut escrit & signé de part & d'autre : & pource que Britio se deshoit de la Roine, fille du Roy de Tidore, lequel auoit pour suspecte ceste negotiatiō des Portugallois, à cause que il estoit ami des Espagnols, il voulut tirer à son parti quelques vns du pays

pour lui aider & favoriser, au cas que la Roine lui voulust iouer quelque mauuais tour. Ainsi donc il gaigna le cœur d'un nommé Cachil Daroes, bastard du feu Roy de Ternate, & promit le faire gouverneur de l'isle, s'il vouloit tenir la main aux Portugallois. De fait, Brittio pratiqua si bien, que le bastard fut esleu Viceroy, malgré la Roine & ses partisans, lesquels voyans Brittio & le bastard auoir gens à leur commandement, filerent doux pour l'heure & faignirent estre bien ioyeux de ce changement : mais depuis la Roine ne cessa de vouloir mal à Brittio, espiant le temps pour lui faire mal ses besongnes, mesmes & machina secrettement contre les Portugallois avec son pere le Roy de Tidore, despitée iusques au bout de voir le bastard Viceroy & en la place d'elle qui auparauant manioit tout à son plaisir. D'autre part Cachil, appuyé sur Brittio, vouloit se faire Roy & seigneur absolu de toute l'isle, & seruoit à Brittio de tout son possible, lui donnant auis de ce qu'il deuoit faire, & dont il se faisoit donner garde. Sans ce personnage, les Portugallois n'eussent iamais basti leur citadelle, ni subsisté aux Molucques, attendu les guerres & autres affaires qu'ils y eurent depuis. Apres l'election de Cachil, & le paracheuement des barrieres, en l'enclos desquelles Brittio retira tout son bagage & son artillerie, ayant mis en terres ses gens qui estoient au port, il mit la main au bastiment de la citadelle le iour saint Iean au mois de Iuin l'an mil cinq cens vingtdeux : & en la presence du ieune Roy de Ternate suiui de tous ses Sangagins & Mandarins, & d'un grand nombre de peuple, fit ouurer les fondemens, & planta la premiere pierre, faisant descharger l'artillerie & sonner les trompettes en signe de ioye. Le ieune Roy, ses barons, & le Roy de Gilolo, fauorisoyent Brittio & ses gens en beaucoup de sortes : mais les Insulaires, pour n'estre acoustumés à la peine, n'aidoyent aucunement à la besongne, tellement que les Portugallois estoient rompus du travail & de disette, pource qu'ils se trouuoient tout nouueaux aux viures de ces pays Orientaux.

*Nauigation
du capitaine
Martin Al-
fonse Melio
en la China,
d'où il est re-
tenu.*

No v s auons dit ci dessus que Martin Alfonso Melio estoit parti au 10
mois d'Auril l'an mil cinq cens vingtdeux pour aller en Malaca. En suivant
sa route il alla surgir à Pacem, où il laissa André Henriquez pour comman-
der en la citadelle, & se remettant sur mer avec Sance Henriquez entendit
en Malaca nouuelles de ce qui estoit auenu à Simão Andrade & à ses gēs, en-
semble à l'ambassadeur de Portugal au royaume de la China, comme il en
a esté discouru ci deuant au fueillet 419. Cela le fit resouldre à tourner voile
vers la China, acompagné d'Edouard Conil capitaine d'un ioc ou basteau
de Malaca. En chemin ils butinerent & se firent riches du pillage de plu-
sieurs vaisseaux ennemis. Ils aborderent vis à vis & assez pres de ce grand
royaume au mois d'Aoust, où ils furent assaillis d'une tourmente, & icelle
appaïsee apparut l'armee navale des Chinois, ayant grand nombre de ioncs,
de calaluz & autres vaisseaux plains de soldats, qui espioient les Por-
tugallois vogués en ceste coste où ils estoient merueilleusement hays. Auf-
si tost que les Chinois descoururent la flotte de Melio, ils se rangerent pour
combatre, voguans à rames & à voiles, affustans quelques pieces legeres
comme mousquets & faucōneaux, sans espargner les fleches qui voloyēt
de

de toutes parts. Martin Alfonse qui n'ignoroit pas ce que les Chinois fauoyent faire, & ne demandoit que paix avec eux, ne bougeoit, ni ne monstroit volonté de combattre. Ses capitaines estoient d'autre auis, & voyans que les Chinois continuoient en leurs brauades, ils commanderent à certains canonniers de lasher quelques pieces, ce qui fut executé spécialement au vaisseau d'Ambroise de Rege, tellement que plusieurs petits bastaux furent brisez & les soldats tuez, ce qui contraignit l'armée des Chinois de se retirer à cause du canon qui les endommageoit. Ambroise les suit, dont Martin Alfonse fut despité, & encores plus de la perte des Chinois, & enuoya querir Ambroise, lequel il tança fort rudement, sans toutesfois le chastier d'autre sorte pour auoir ainsi commencé sans le commandement de son general. Puis suiuant sa route, il alla mouiller l'ancre en vn canal hors du port de l'isle de Benjaga, où l'armée des Chinois le vint derechef acoster & enclorre, tellement que lui ni les siens ne pouuoient faire voile en auant ni en arriere que par le milieu de ceste armée, laquelle ne cessoit de lasher les mousquets sur les Portugallois, encores qu' auparauant elle eust fait la perte que nous venons de declarer. Melio connoissant lors que les Chinois ne cherchoient que guerre, conclud avec ses capitaines de prendre langue la nuit suiuite, pour descouurir l'intention des ennemis, & trouuer moyen de faire entendre à leur Amiral le desir que les Portugallois auoyent de viure en bonne amitié avec ceux de la China. Or ceste nuit les descouureurs prindrēt cinq payfans qui vogoüyēt au lōg du riuage en vne barquerolle chargée de charbon, & les amenerēt à Melio qui ne peut rien apprendre d'eux: mais il les fit vestir tout à neuf & les enuoya dire de sa part à l'Amiral de la China, que lui & les Portugallois venoient comme amis, avec force marchandise pour trafiquer, & qu'on auoit tort de leur courir sus: pourtant le prioient-ils de leur en mander l'occasion, estans prests de satisfaire selon leur possible, s'il se trouuoit que les Portugallois fussent cause de ceste guerre: & qu'au contraire s'ils auoyent le droit de leur part on cessast de leur courir sus, & que les vns entretenissent paix & amitié avec les autres. Ces payfans allerent faire leur message, mais ils ne retournerent pas: au contraire les Chinois tirerent plus de coups qu' auparauant, ayans charge expresse de leur Roy de ne laisser aborder les Portugallois en lieu quelconque. Melio patienta encores tout ce iour sans rien entreprendre, pensant que ces payfans n'auoyent eu l'esprit de s'acquitter de leur commission: & la nuit suiuite renuoya ses descouureurs qui descendirent en terre, prindrent deux hommes & les lui amenerent. Il entēdit d'eux que le Roy de la China estoit extremement irrité contre les Portugallois, & ce qu'il auoit decreté contre eux: partant qu'il ne falloit point enuoyer gens pour traiter d'accord, pource que la guerre estoit ouuerte. Il leur fit donner quelques habillemens, & les renuoya en terre: puis ayāt receu nouvelles ceste mesme nuit qu'Edouard Conil, demeuré derrière avec son bastau, s'estoit arresté pres d'une pointe de terre, pource qu'ayant descouuert l'armée des Chinois, il auoit peur de tomber en leurs mains, & pourtant il prioit qu'on l'allast enlauer de là, ou qu'il lui fust permis de

s'en retourner. Incontinent Melio lui enuoya deux basteaux bien equippez, mais ils ne peurent passer à cause des mousquetades de l'ennemi, dont plusieurs soldats furent blesez, & quatre tuez, tellement qu'ils se retirerent vers la flotte. Alors Melio, voyant ses gens morts & blesez, delibera de combattre les Chinois, & tint conseil, où la plupart furent d'avis contraire, disans que ce seroit se hazarder par trop de donner bataille pour lors, & qu'il suffiroit de faire aiguade, dont la flotte auoit besoin, & que le temps monsteroit ce qui seroit plus expedient de faire. Suiuant cela, Melio print terre avec quelques basteaux bien armez, afin de se fournir d'eau douce, vn peu à costé de sa flotte: ce que veu par les ennemis, soudain trente de leurs calaluz & lanchars se desbanderent, & vindrent assaillir à coups de mousquets de telle viffesse les basteaux de Melio, qu'à peine eut il loisir de rentrer dedans, & laissa en terre les tonneaux qui y auoyent esté deschargez pour les emplir d'eau douce. Se retirant tout confus il fut suiui & battu de coups de mousquets iusques aupres de sa flotte: mais les ennemis se retirerent, craignans l'artillerie de Portugal qui les foudroyoit si tost qu'ils approchoyent de la portee d'icelle, & n'osans venir aux mains, se contentoient de mener du bruit & faire quelques escarmouches pour donner enuie aux Portugallois de se retirer. Sur cela les capitaines cōseillerēt Melio de faire retraire entierement, ce qui lui estoit assez aisé sans perte, puis qu'il ne pouuoit s'attacher aux Chinois qu'avec peril tout euident. Cest auis fut couché par escrit, & signé de tous pour la descharge de Melio, puis le lendemain on haussa les voiles, & commença on à s'elargir en mer. Les Chinois suiuent Melio avec grādes huees, escarmouchās avec leurs mousquets & vne infinité de fleches. Pierre l'Homme & Iaques Melio qui vogueyent derriere les autres respōdyent à coups de canon. Or il auint que le feu se prit à vn baril de poudre en la nauire de Iaques Melio, & s'alluma de telle furie qu'il fut impossible de l'estaindre, tellement que ce vaisseau commença à pancher pour couler en fond. Pierre l'Homme voyant que la plupart des soldats taschoyent se sauuer à nage, vogua droit celle part pour les tirer dedans son bateau: mais les Chinois le vindrent inuestir avec leurs ioucs, & pource qu'il auoit peu de gens à cause du petit espace de son vaisseau, les ennemis eurent loisir de l'acrocher de tous costez, entrerent dedans, mirent en pieces tous ceux qui y estoient, excepté vn qui se sauua en la hune: puis couperent les testes aux morts, pillerent le bateau, le despouillerent de tout son equippage, & avec grands cris & bruits de certains instrumens qu'ils portent en guerre se retirerent en moins de rien. Celui qui s'estoit sauué en la hune commence à faire signe, & fut tiré de là à toute peine, pource qu'il n'y auoit chordage quelcōque pour deualer d'où il estoit monté: en fin toutesfois il glissa tellement quelle mēt, & apres auoir fait entendre au general ce qui estoit aduenü, le conseil fut assemblé, où nonobstant les remonstrances du general (qui en pensant venger la mort de ses soldats se mettoit en danger de la vie de lui & de tous les siens) les capitaines furent d'avis de mettre à fond ce vaisseau defarmé, & prendre la route de Malaca sans delayer dauantage. Et pour nouuelle descharge de

Melio

Melio fut dressé acte de cest auis souffigné des capitaines, que Melio retint vers soy, & encores qu'il partist contre sa volonté, & fust gentilhomme de grand cœur, neantmoins il fit executer l'arrest du conseil: puis tous se mirent à la voile, & combié qu'ils n'eussent vent propre pour gagner Malaca, sinon en costoyant la China, toutesfois Dieu voulut qu'ils trouuerēt moyē de tirer vers la Taprobane, où Melio delibera surgir, pour voir si la citadelle de Pacem estoit fournie de ce qui luy estoit necessaire.

11. CESTE deliberation vint tout à point aux Portugallois qui gardoyent ceste citadelle: pource que le Roy de Dachen deuint si outrecuidé apres la deffaitte de George Brittio, descrite au douziēme liure, qu'il resolut faire mourir autant de Portugallois qu'il en pourroit attrapper. Et entendant qu'ils estoient en quelque petit nombre avec vn capitaine en la citadelle de Pacem, conclud de les exterminer. Pour cest effect il enuoye promptement deux mille hommes de guerre, & donne charge à son lieutenant de mettre le feu en ceste citadelle, qui estoit faite de bois. Or pource que le chemin estoit court & se faisoit par terre, ceste armee se rendit incontinent autour de la citadelle, qui lors n'auoit que septante soldats pour garde: car les autres auoyent fuiui Sance Henriquez en son voyage de Malaca. Qui pis est, leurs viures estoient courts, mais en recompense ils auoyent bonne artillerie & force munitions de guerre, au moyen de quoy ils soustindrent vaillamment le siege, & empescherent les ennemis d'approcher, comme c'estoit leur intention de bruller la citadelle. Sur tout ils faisoient bon guet de nuict, allumans des feux pour descouurir ceux qui s'ingeroiēt de venir trop pres. Mais comme ils commençoient à se laisser, les viures defaillans, & estans sur le point de quitter tout, voici arriuer Melio avec sa flotte de cinq grosses voiles, qui fut incontinent reconu des ennemis qui leuerent le siege, & se retirerent de viffesse auant que Melio les peust ioindre. Voila comment à quelque chose malheur fut bon, car la route de Melio fut cause, selon les hommes, de la deliurance des Portugallois de Pacem.

12. A PRES que Louys de Menesēz eut donné ordre aux affaires d'Ormus, il despescha trois nauires pour aller en Goa, avec les deniers du tribut & autre argent tiré des marchandises menees là au nom du Roy de Portugal. Er pource que Pierre Trauaze capitaine de l'une des trois nauires se trouua malade, la charge en fut donnee à Manuel le vieil. Ils s'embarquerent donc au port d'Ormus, & allerent se rendre pres de Mazcate en vn lieu nommé l'Aiguade de Cojeatar, pour y puiser de l'eau. C'estoit au mois d'Octobre: & de nuict se leua vn vent de trauerse si furieux & violent qu'il chassa long temps quelques nauires, de Mores d'un costé & d'autre, ruina en terre beaucoup de maisons, & en l'estendue de douze lieues de pays fit dommāge de la valeur de cinquante mille ducats. Outreplus il poussa si rudemēt contre quelques escueils de mer la nauire d'Edouard Ataide, qui n'auoit plus qu'une ancre, qu'elle se brisa, & perirent aucuns de dedans, entre les autres Ataide mesmes, vn sien fils, Vasque Martinez Melio, & Iean Rabel. Dauantage, elle hurta de telle roideur le vaisseau de Lopez d'Azeuede, qu'elle rompit l'esperon d'icelui & la mit en danger de perir, ce

Efforts du Roy de Dachen pour chasser les Portugallois hors de la Taprobane.

Naufrage d'Edouard Ataide, & autres accidens des Portugallois sur leur retour d'Ormus en Goa.

qu'entendu par Manuel le vieil, il monta sur vn baſteau avec quelques ſoldats pour aller au ſecours d'Azeuede, encores que lon ne viſt goutte eſtant nuit: & apres l'auoir mis à ſeureté, il retourna vers ſa capitaineſſe avec grande difficulté à cauſe de la tourmente, & lors il ſe trouua en nouveau danger, car tous ceux de la flotte eſtoient merueilleuſement eſmeus, & cherchoient les moyens de ſe ſauuer, craignans faire naufrage en la coſte. Lors Manuel s'auia d'vne rufe, à ſauoir d'oſter les armes aux particuliers, à ce que ils ne peuſſent lui reſiſter, quand il voudroit les retenir par force, & fit en forte à l'aide de ſes ſeruiteurs qu'il eut les armes: puis il mit chaſcun tellement en beſongne, que finalement ils gagnerent le port de Mazcate, ſitué au deſſous de ceſte aiguade, & furent garatis par tel moyen. Le lendemain fut publié de la part du gouuerneur de Mazcate, ami des Portugallois, qu'à peine de la vie aucun More ne touchaſt aux hardes & marchandises de la nauire briſée: à l'occaſion dequoy tout ce qui eſtoit là dedans appartenant au Roy de Portugal & aux particuliers fut ſauué, moyennât quelques preſens que lon fit à ce gouuerneur. Il y auoit entre autres choſes deux quaiſſes plaines d'or & d'argent de tribut, avec vn poignard & vn cimeterre d'or, que le Roy d'Ormus enuoyoit à celui de Portugal, enſemble quelques autres fort riches ioyaux pour la Roine. Manuel le vieil fut auſſi acertené par le gouuerneur de Mazcate qu'en l'aiguade de Cojeatar y auoit vn capitaine enuoyé par Raix Xeraf avec nombre de gens pour maſſacrer les Portugallois, ſi toſt qu'ils auroient prins terre: à quoy Manuel pourueut ſi dextremēt qu'il attrappa ce capitaine, demeuré ſeul avec ſes matelots tādīs que ſes ſoldats eſtoient deſcendus en terre, & l'amena en Mazcate, où il appointa le different qui eſtoit entre ce capitaine & le gouuerneur, à cauſe de la mort de Raix Delamixe frere de Xeraf & capitaine de Calajate, tué en vne eſcarmouche que ceux de Mazcate lui auoyent dreſſée, & pour vengeance dequoy Xeraf auoit enuoyé ce capitaine afin d'exterminer les Portugallois, pour l'amour deſquels ceſte eſcarmouche auoit eſté dreſſée. Apres cela, Manuel & Azeuede prindrent la route de l'Inde, arriuerent en Goa, & conſignerent es mains des threſoriers tout ce qui appartenoit au Roy.

*Troubles en
Ormus, &
quel ordre y
fut donné par
le Viceroy.*

C E pendant les affaires d'Ormus eſtoient aſſez mal rangees. Les capitaines & gentilshommes eſtans en l'armee de Louys de Menefez, commencerent à ſe faſcher contre lui de ce qu'il ne cōtraignoit Xeraf de retourner en Ormus & la repeupler: que lon ne deuoit pas tant endurer d'vn perſonage qui deſcouuroit ainſi ſa meſchante volonté contre les Portugallois: que Menefez deuoit aller en Queixume, & fourrager le plat pays: que telle entrepriſe deuoit eſtre propoſée au conſeil, pour en reſouldre vn bō coup. Combien que Menefez viſt le fondement de leurs raiſons, toutesfois il ne voulut en prendre auis, ſe contentāt de la promeſſe de Xamire, qui ſ'eſtoit obligé de tuer Xeraf, à la premiere cōmodité qui ſe preſenteroit. Or pour ce qu'il ne vouloit aller à Queixume ni preſter l'oreille aux remonſtrances de perſonne, tous commencerent à ſe mutiner. Mais nonobſtant tout cela, Menefez ſans autre exploit print la route de Diu, & fut chaſſé par vne tourmente au port de Chaul, d'où il fit voile en Goa. Il fut enuoyé de ce lieu en Cochim

Cochim pour faire charger les nauires qui deuoyent partir pour Portugal, & le Viceroy entendant par les lettres de Jean Roderic Norogne, capitaine de la citadelle d'Ormus, l'estat de la ville, delibera d'y faire vn voyage pour remettre les affaires en quelque autre train. Apres le depart de Louys de Menefez, Xeraf fit son conte que le gouuernemēt du royaume lui estoit assure, puis qu'on ne l'auoit voulu forcer à faire contre sa volonte, & presumant que Queixume deuiendroit Ormus, tellemēt qu'alors il seroit maistre, pource que la bride des Portugallois seroit trop loin pour le retenir, il cassa les archers de sa garde, ne se doutant point des Mores, pource qu'il n'auoit point d'ennemis, & que ceux de la cour estoient ses parens, amis, ou seruiteurs, obligez à lui par diuers plaisirs qu'il leur faisoit. Raix Xabadin son cousin faisoit de mesme: ce que voyant Xamire, resolut d'exercer sa promesse, & trouuant Xabadin mieux à descouuert le fit tuer par quelques archers. Il ne voulut pas despescher Xeraf tout d'un train, estimāt en pouoir voir le bout plus aisement puis apres, en quoy il se trompa: car Xeraf voyant son cousin mort reprit incontinent ses gardes, & se donna telle peur, encores qu'il eust deux mille hommes de guerre, & que Xamire n'en eust pas plus de cinq cens, que sans se fier à ses parens, amis, ou seruiteurs, il quitta Queixume, & s'enfuit secrettement ailleurs, puis se retira dedans la citadelle, s'assurant plus en la fidelite des Portugallois qu'en la force & faueur des siens propres. Xamire le sachant là, enuoya incontinent prier Norogne d'arrester ce traistre & tyran, meurtrier de son Roy, qui auoit trouble & despeuple Ormus: à l'occasion de quoy lui, comme seruiteur du Roy de Portugal, auoit promis à Menefez de tuer Xeraf & Xabadin, ce qu'il auoit executé en partie, exhortant Norogne de ferrer Xeraf, puis qu'il le tenoit en la citadelle, afin de lui faire rendre compte des crimes susmentionnez: ce que Norogne fit incontinent. Tost apres le Roy d'Ormus & ses suiets se retirerent en la ville. D'autre part Norogne sachant ce que Menefez auoit promis à Xamire, l'acomplit de sa part, & lui donna la capitainerie d'Ormus: ce qu'entendu par Xeraf il promit grande somme de deniers à Norogne, pour estre mis en liberte & fait capitaine d'Ormus. La chose estant de grande importance, Norogne ne voulut pas passer outre, ains assura Xeraf de faire que le Viceroy lui bailleroit ceste capitainerie, lequel il auertit de l'emprisonnement de Xeraf, du repeuplement d'Ormus, & qu'il estoit besoin d'y venir faire vn tour, mais que pour le bien des affaires du Roy de Portugal, il se gardast d'amener Roderic Varelle & Manuel le vieil. Xeraf estoit auteur de ce conseil, d'autant que ces deux capitaines entendoient bien les affaires d'Ormus, & sauoient tous les meschans tours de Xeraf, lequel craignoit leur venue de peur qu'à leur rapport on ne lui fist son proces, s'assurant de venir à bout de tous les autres, & du Viceroy mesmes: les Portugallois commençā desia à se laisser corrompre. Le Viceroy ayāt receu les lettres de Norogne cōclud d'aller en Ormus, & mit incōrinct ordre à ce qui estoit requis pour son voyage. Quant à Louys de Menefez, ayant gaigné le port de Cochim il fit equipper les nauires qui deuoyent faire voile en Portugal, & expedia

Pierre Laurent Melio pour aller en la China, lieütiant Martin Alfonse avec vn ionc pour lui faire compagnie. André Britio fut enuoyé trafiquer en la coste de Malaca avec vne siene nauire faite & equippee à ses despens. Menefez s'en retourna incontinent vers le viceroy en Goa, d'où il fut renuoyé avec quelques gallions, tât pour courir en ceste coste de mer, que pour aller au port de Mazzuan recueillir Roderic Limice ambassadeur de Portugal en Ethiopie, avec charge d'aller retrouver le viceroy en Ormus, & y passer l'hiuer. Menefez mena quant & soy Nonio Fernand de Macede, Roderic Vasque Pereire, Fernand Gomeze de Leme, Henri de Macede & Lopez de Mezquite, tous capitaines de gallions. Le viceroy ayant donné ordre à ses affaires s'embarqua pour aller en Ormus avec six galeres & quelques autres petits vaisseaux, suivi de Sebastian Norogne, Iean Fogaze, Denis Fernand Melio, Francisque de Mendoze, Vasque de Leme, Francois de Souze & autres. En trauerfant le goulfe ils descourirent vne nef de Mores allant à Diu. Norogne & Fogaze allerent les premiers apres: & pource que la galere de Norogne estoit plus legere que celle de Fogaze, il ataignit les Mores sur le soir, & fit attacher leur nef à la galere, de peur qu'ils ne s'enfuissent de nuict, resolu de les combattre le lendemain matin. Les Mores voyans la nonchalance de Norogne l'en craignirent moins, & tandis que les Portugallois dormoyent sans se douter de rien, lierent la galere à leur nef, de telle sorte qu'elle ne pouuoit eschapper, & l'assaillirent si furieusement que les Portugallois perdirent leur premiere esperance, & leur capitaine se monstra si lasche qu'au lieu de se defendre il s'alla cacher avec la pluspart des siens, & se voyans prests de tombet en la puissance des Mores se ietterent en la mer, où ils eussent esté tous noyez, sans Iean Fogaze qui survint au secours. Le pis fut que Iean Fogaze qui estoit assez fort pour combattre les Mores n'y voulut entendre, ains ealant voile laissa la galere de son compagnon aux Mores qui la menerent au port de Diu, & en firent present à Melichiaz, ensemble de l'artillerie qui y estoit belle & en bon nombre de pieces. Or les autres galeres estoient si loin qu'elles ne peurent secourir celle de Norogne, dont tous les capitaines furent merueilleusement indignez, estimans auoir lors receu vne des plus lourdes bastonnades & hontes qu'on feauroit: comme de fait les Portugallois n'ont receu en Inde perte aucune où ils se soyent monstrez si lasches qu'alors. Le viceroy fit emprisonner Iean Fogaze & Sebastian Norogne, qui furent relaschez deux iours apres. Melichiaz ayant sceu comme la galere auoit esté conquise, prisa si peu le viceroy qu'il ne voulut traiter aucun accord avec lui, & manda ses fustes au lóg de la coste de Cambaje, faisant tirer la galere en terre: & quand quelques estrangers arriuoient à Diu il la leur faisoit monstrez, & raconter comme elle auoit esté prinse. Depuis cela aussi les Portugallois ne furent plus si redoutez en ceste coste des Indes qu'ils estoient auparauant. Pour reuenir au viceroy, son arriuee en Ormus resiouit chascun, estimans qu'il chastieroit Raix Xeraf de tant de maux qu'il auoit faits aux vns & aux autres. Mais il en auint tout autrement: car ayant deuisé par trois fois en la prison avec Xeraf en presence de Norogne capitaine de la citadelle, qui intercedoit pour ce bri-

ce brigand, duquel il auoit touché deniers, ils entrerēt en termes d'appoin-
tement, & Xeraf promit tant d'argent pour auoir le gouuernement d'Or-
mus que le Viceroy assembla vistement le conseil de quelques capitaines,
tandis que son frere Louys de Menefez, ennemi mortel de Xeraf estoit ab-
sent. Alors courrant les fautes passees de Xeraf, le louant d'estre homme
entendu, qui payeroit trois fois autant de douanne que les autres, accusant
Xamire d'estre vn personnage sans conduite ni iugement, mal voulu du
peuple, & qui ne bailloit gueres d'argent, il tira les capitaines à son auis, ex-
cepté Manuel de Soufe general des galeres en la mer d'Ormus, lequel co-
gnoissant de long temps le naturel de Xeraf, l'auoit tousiours veu & tenu
ennemi des Portugallois, lesquels il taschoit de chasser d'Ormus par tous
moyens à lui possibles, comme la sedition derniere & ses autres deportem-
ens en faisoient foy. Il conseilloit donc qu'on fist mourir Xeraf, si l'on vou-
loit asseurer l'estat du pays au Roy de Portugal, autrement ce seroit bien
tost à recommencer. Cest auis fut suiui de Denis Fernād Melio seulement:
mais les autres pancherēt du costé du Viceroy, & suiuaūt leur opinion, souf-
signee de tous, Xeraf fut deliuré, esleu capitaine d'Ormus, d'où Xamire &
Norandin, qui s'estoyent monstrez seruiteurs du Roy de Portugal, furent
chassez & tost apres mis à mort par les menees de Xeraf, sans que les Por-
tugallois se souciaffent de les garentir, dont plusieurs furent fort indignez,
notamment les Mores, qui commencerent à se desfier entieremēt des Por-
tugallois, disant tout haut que quicōque auroit de l'argēt pourroit deme-
urer seurement en Ormus & y commettre toutes les meschancetez du mon-
de. Incontinent que Xeraf fut mis en possession de son estat, il paya au Vi-
ceroy cent mille ducats pour la moitié de sa rançon, soixante autre mille
pour les douannes, & pour le reste de sa rançon bailla vn sien fils en ostage.
Pour satisfaire aussi aux particuliers & recouurer sō credit, il prenoit le ser-
ment de ceux qui auoyent perdu en la ruine d'Ormus, & leur en payoit vn
tiers sur le champ, puis les deux autres à certain terme: tellement que plu-
sieurs pour auoir la conscience large se firent plus riches qu'au parauant. Au
reste, outre les grands presens donnez par Xeraf au Viceroy, il lui faisoit
toutes les sortes de seruice qu'il est possible de penser, lui enuoyant aussi
force confitures, fruits, volaille, sauuagine, poisson & eaux de senteurs, dont
le Viceroy se sceut fort bien acommoder, & passa ainsi ioyeufemēt son hi-
uer en Ormus, mais avec le preiudice de sa reputation, estant taxé de tous
comme auaricieux & trop adonné à ses plaisirs.

14. **Q**UANT à Louys de Menefez son frere, estant parti de Goā avec sa flot-
te, il suiuit la route du cap de Guardafu, & en peu de iours ses capitaines
ptindrēt cinq nauires de Mores. Du cap de Guardafu il tourna voile au port
d'Aden en Arabie, où ayant trouué quatre grādes nefz il les fit brusler, puis
conclud aller iusques à vn autre haure en la mesme coste, cinquante cinq
lieues au dessus d'Adē, & quatorze degrez & vn quart de l'Equateur, en lieu
ou la mer est tousiours haute & agitee, fertile au reste en toute sortes & de
tels biēs & fruits que produit l'Espagne, de grād trafic, principalemēt de che-
uaux & d'encēs. Ce haure, où est assize vne ville nōmee Sael, sert de retraite

aux nauires qui arriuent trop tard & ne peuuent passer plus outre, estans arrestees par vn vent d'Occident qui leur donne en proue, & les contraint d'hyuerner là. Menefez pensoit faire les besongnes à Sael, à cause qu'elle appartient au Roy d'Aden : mais ayant sceu qu'il y auoit grand port, & que l'entree du haure estoit dangereuse à cause des continuelles bourasques, il changea d'avis, à demi desespéré de n'auoir fait chose remarquable en Inde, & ne pouuant auancer beaucoup en Arabie. Là dessus les Arabes le preuindrent, car deuinans aucunement sa pensée, ils viderent la ville de gens, & de la pluspart des biens, tellement que Menefez & ses gens trouuerent presque tout net : sinon que quelques Portugallois butinerent ce que les Arabes n'auoyent eu loisir d'emporter. Comme ils seiournoyent là, la mer se esmût de telle furie que les gallions furent escartez au long de la coste, & contrains de getter vne partie de leur artillerie, ayans perdu l'un de leurs esquifs : mais en fin ils eschapperent, prindrent la route de Mazzuan, mirent le feu en vne grãde nef de Mores, & finalement gaagnerent ce port, d'où par le moyẽ du gouuerneur d'Archique Menefez enuoya messager à Roderic de Leme ambassadeur de Portugal en Ethiopie, pour l'auertir qu'il l'attẽdroit iusques à la fin d'Auril, & que s'il ne venoit en dedans ce temps, lui seroit contraint se remettre à la voile, pour ne perdre la commodité de sa navigation. Mais entendant que Roderic ne pourroit si tost venir il se remit en mer, arriua en vn autre port nomme Dofar, que les Portugallois saccagerent & bruslerent. De Dofar in cingla vers Ormus, où estant arriué, apres auoir sceu comme tout y estoit passé, selon le discours du chapitre precedẽt, il reprint & tança aigrement son frere le Viceroy : & despitẽ de ce qui estoit auenu à Xamire, & à Xeraf qu'il ne pouuoit voir de bon œil, il deslogea incontinent au mois d'Aoust, quittant le Viceroy, & alla surgir au cap de Diu : mais le temps fut si estrange que force lui fut de tourner voile en Ormus, où il attendit quelques iours, & finalement se retira en Inde avec le Viceroy.

*Exploirs de
Antoine Fa-
lier coursaire
Portugallois.*

En ce temps il estoit permis aux Portugallois, qui en demandoyẽ con- 14.
gẽ aux capitaines des fortresses & aux generaux des galeres, de trafiquer en la mer de Leuant, & de courir à leur anantage sur les ennemis. Or auant que Louys de Menefez partist pour faire le voyage sus-mentionné, vn nommé Antoine Falier demanda licence à Francisque Pereire de Peste, capitaine de Goa, d'aller faire vne course vers le cap de Guardafu, afin d'attrapper quelques Mores voguans en vaisseaux legers au long de la coste, & passans de lieu en autre bien chargez d'argent, ce qu'ils faisoient hardimẽt s'asseyrans de n'estre veus des Portugallois, d'autant qu'ils couroyent ainsi pres de terre. Et afin que Pereire le licenciast plus volontiers, il lui promit partie du butin : au moyen dequoy il obtint sa demande, & outreplus quatre canons & vn fauconneau, tirez de l'arsenal de Goa. L'intẽtion de Falier, comme l'effect le monstra depuis, estoit (sous couleur de ce cõgẽ qui ne s'estendoit que contre les ennemis) d'escumer les vns & les autres. C'estoit vn homme courageux, de grand esprit, qui auoit la langue Arabesque, Persique, & autres à commandement. Avec ceste permission de Pereire, les ca-

nons & le fauconneau il équippa vne fuste siene & vn petit carauellon, s'as-
 seurât d'une vingtaine de soldats desualifez, ausquels il promit merueilles,
 leur faisant ouuerture des moyes qu'il deliberoit suiure pour butiner à plai-
 sir. Eux s'asseurans de cela, tirerent à leur cordelle quelques Portugallois
 mariez en Goa, qui auoyent à conduire vn basteau d'Ormuz & vne hurque
 de Cananor chargez de marchandise pour trafiquer en Calajate & en Maz-
 cate, d'où ils deuoyent ramener des cheuaux : & tandis que le basteau & la
 hurque s'apprestoyent acheuans leur charge, enuoyerent François Falier
 dire à ceux de la fuste & du carauellon qu'ils les lassent attendre pres de
 Chaul : ce qui fut fait, & entrans au fleuve de Chaul avec la flotte afin d'y
 puiser de l'eau douce, Simon Andrade capitaine de la citadelle voulut fai-
 re abatre le timon & les voiles, tellement que la fuste se retira incontinent :
 & tost apres Antoine Falier arriué avec le basteau & la hurque, tous de cõ-
 pagnie prindrent la route de l'isle des vaches pour y faire aiguade. Comme
 ils seiurnoyent là, arriuerent deux marchans de Perse en vn grand vais-
 seau qu'ils nommēt Cortie, chargé de marchandises de pris, iusques à la va-
 leur de six mille ducats, & s'en alloyent à Diu, avec passeport suffisant : tou-
 tesfois Antoine Falier les pillâ, & mesmes leur fit donner quelques traits de
 chorde, afin de declairer ce qu'ils pouuoient auoir caché, puis les retint
 pour esclauës, & quant à leurs seruiteurs qui estoient en bõ nombre, ils fu-
 rent mis à la chaîne pour tirer la rame en la fuste & au carauellon. Ayant
 puis apres despouillé & mis en fond ceste Cortie, Falier fit voile avec sa flot-
 te vers l'autre costé, où il fut en danger de perir par plusieurs fois, & estant
 pres de Dofar vn de ses vaisseaux eschoua, tout ce qui estoit dedans fut per-
 du, exceptez neuf hommes, qui apres auoir gaigné terre furent assaillis d'une
 troupe de Mores, mais ils se defendirent si bien que finalement ils gai-
 gnerent Dofar, se retirans vers le gouuerneur du lieu, qui pour l'amour des
 Portugallois, desquels il estoit ami, leur fit bon traitement, & les arresta iuf-
 ques à ce qu'ils trouuassent la commodité de se remettre en mer. Falier co-
 noissant où il estoit, print la route de Calajate, & vendit illec ce qu'il auoit
 prins aux Mores en l'isle des vaches : & quant aux prisonniers ils payerent
 rançon, empruntée de leurs amis. Non content de cela, Falier dit à quel-
 ques vns de ses soldats que le gouuerneur de Calajate refusoit lui payer vne
 certaine somme de deniers bien deuë, & lui auoit fait beaucoup de torts,
 dont il deliberoit auoir sa raison. Eux aussi gens de bien que leur maistre,
 qui inuentoit ceste plainte pour continuer son train encommencé, promet-
 tent s'employer, & lui sans autre procedure commence à plaider à coups
 de canon contre le palais du gouuerneur, basti sur le bord de la mer : telle-
 ment que peur de plus grande ruine, ce gouuerneur enuoya incontinent
 cinq cens ducats, ce qui appaisa le tonnerre & fit retirer ce coursaire, lequel
 continuant son mestier (encores qu'aucuns de sa suite, ayãs horreur de tels
 deportemens, l'eussent abandonné) enuoya François Falier au dessus
 de Dofar, où il le suiuit & se ietta sur vne nef de Mores venans de l'Inde,
 print hommes, femmes & enfans qui estoient dedans, & arriué au port
 de Dofar voulut contraindre le gouuerneur de racheter ceste nef avec les

prisonniers menaçant, qu'à faute de ce faire il mettroit le feu en quatre nauires marchandes anchrées en ce port. Les neuf Portugallois, que le gouverneur auoit si benigneement recueillis, allerent trouuer Antoine Falier, & obtindrent quelque chose pour le bien de Dofar au commencement: tellement que le gouverneur estimant toutes choses paisibles, leur donna congé. Mais eux retournans à leur naturel mirent le feu aux oreilles de Falier, & l'inciterent d'assaillir ces quatre nauires pour y butiner, ce qu'il s'efforça de faire: toutesfois par la diligence & sagesse du gouverneur il fut chassé de là à coups d'artillerie & contraint s'elargir en haute mer. Puis il enuoya vendre en Calajate par Laurent de Soure les Mores qu'il tenoit prisonniers, & les marchandises pillées en leur nef, retenant quelques forçats pour tirer la rame. Depuis, ayant faute d'eau douce, il fut question de jétter au fort pour voir qui iroit en terre: & estant escheut à Alphonse de Veigue & à deux autres de le faire, sur le retour les vns s'eslongnerent des autres, tellement que ces puiſeurs apres auoir beaucoup enduré se sauuerent finalement en Ormus. Quant à Laurent de Soure qui estoit descendu aussi en terre pour les soulager, voulant regagner la coste de Calajate il fut tué par des courſaires Mores & son vaisseau pris. Antoine Falier ayant prins autre chemin & fait nouueaux pillages, se sentât bié gorgé delibera de retourner en Inde, n'osant hyuerner en aucun port des goulſes de Perſe ou d'Arabie, pour y estre trop conu à cause de ses courſes & rançonnemens. Il ne vouloit pas aussi aller en Ormus, pource que le Viceroy ne lui auoit donné licence de se mettre en mer: & auoit encores moins d'enuie d'aborder en Goa, pour ne faire part de son butin à Francisque Pereire, sachant que ce capitaine eust eu par force ce qu'il n'eust peu tirer par amitié. Pourtant alla il surgir en vne isle nommée Dande, située entre Chaul & Dabul, en laquelle il hyuerna, & fit de telle sorte qu'il obtint la grace du Viceroy, sans aucune recompense à tant de personnes interessees: dont les Arabes, amis mesmes des Portugallois, furent si mutinez, qu'ils deuindrent leurs mortels ennemis, & deſlors tascherent s'en venger sur les trois susmentionnez: mais leur effort fut vain pour ceste fois, Falier demeurant pour vn temps, & pour le regard des hommes, impuni de ses malefices.

Il a esté parlé au deuxiesme liure, page 466. des menées de Zabaim Dal-16. cam pour se rendre maistre de Goa, & que pensant recouurer sa perte, le Roy de Narſingue lui auoit osté beaucoup de pays, & donné aux Portugallois quelques gouuernemens de Zabaim, entre autres ceux de Ponde & de Salfete. Depuis Zabaim ne fit qu'espier les occasions pour recouurer ce qui lui auoit esté enleué des mains: & voyant le Viceroy Edouard de Menefez avec son frere Louys hors del'Inde basse, & qu'en Goa ne restoit personne que le capitaine & les mortepayes de la citadelle, il delibera de reprendre possession de Salfete & de Ponde. Suiuant ceste resolution il enuoye vn sien lieutenant avec cinq mil hommes de pied & de cheual, lesquels entrerēt en pays, commencerent à en recueillir les reuenus pour Zabaim, surprindrent & taillerent en pieces quelques Portugallois, dont l'vn s'estant retiré en vn fort où demouroit Fernād de Sottomajor capitaine general

Guerre de Zabaim Dalcam pour recouurer les gouuernemens de Ponde & de Salfete: & quelle en fut l'issue.

neral de ces gouuernemens, acompagné de cent cinquante Portugallois & de trois cens hommes de pied du pays. Fernand, braue gentilhomme, alla soudain au deuant des ennemis, mais il fut desfait à cause du desordre de ses troupes, & fut contraint se retirer avec plusieurs blesez. Les ennemis merueilleusement enfléz de cest auantage suiuirent Fernand, & le tindrent assiegé l'espace de deux iours. En ce temps Francisque Pereire capitaine de la citadelle de Goa entendit en quelle extremité Fernand & les siens estoient reduits : à l'occasion dequoy il despescha incontinent Antoine Correa avec quelques fustes, pour recueillir ceux qui se pourroyent sauuer. L'arriuee de Correa remit le cœur au ventre de Fernand, qui se voyant refraischy d'un secours venu tant à propos, conclud par l'auis de Correa & d'autres d'aller trouuer les ennemis, & leur donner la chasse. Ceux qu'on auoit enuoyez à la descouuerte, rapporterent qu'ils n'auoyent peu rien entendre, sinon que les gens de Zabaim estoient passez à vne lieuë & demie de là, sans que personne peust dire où ils estoient allez. Fernand homme valeureux, s'estimant des plus habiles au fair de la guerre, pensa que la peur eust cōseillé les ennemis de se retirer, & qu'il ne lui faudroit pas beaucoup de gens pour les mettre en route. Pourtant il se mit à la poursuite avec vingt cinq chevaux, six vingts pietons Portugallois, & trois cens Indiens. Le iour suivant sur le soir apres auoir passé vne riuere à gué, trois lieues au dessous du lieu duquel il estoit parti, il les descouurit au bout d'une belle & grãde plaine à vn trait de harquebuzes qui se reposoyent au pied d'un costau. Eux apperceuans les Portugallois se leuerent incontinent en pieds, & se rangeans en long, encores qu'ils ne fussent que cinq mil, paroissoient beaucoup plus, ce qui estonna les Portugallois. Fernand qui voyoit ses gens esbranlez, les arresta, & encouragea de relle sorte, encores que les trois cens Indiens s'en fussent fuis, que les hommes de cheual suiuis des pietons donnerent resolution à trauers ceste armee d'ennemis, faisant tel effort & assistez d'une faueur si speciale de Dieu, qu'apres grand meurtre où demeurerent plus de huit cens des principaux, & notamment leur capitaine, ils mirent tout le reste à vau de route, n'ayans perdu vn seul homme, ains seulement cinq chevaux tuez sous leurs maistres. Toutesfois d'autant qu'ils estoient presque tous griefuement blesez, & Fernand entre les autres, ils ne poursuiuirent les fuyards, ains apres auoir ramassé les despouilles trouuerēt moyë de gagner Goa, où plusieurs des blesez moururent. Or poutce que Francisque Pereire n'auoit pas assez de gens pour enuoyer en terre ferme & chasser les Morres, ils s'emparerent des gouuernemens desnuez de garnison, au grand preiudice du Roy de Portugal qui en retiroit pres de cinquante mille ducats de reuenue annuel : ce qui ne fust auenu, si le Viceroy, au lieu de demeurer en Perse, eust passé l'hiuer en l'isle de Goa, d'où il lui eust esté aisé enuoyer gens pour repousser les ennemis effroyez de la victoire de Fernand. Ainsi donc, estans demeurez maistres à cause de leur nombre, & qu'on ne les poursuiuit pas apres ceste desfaite, Zabaim enuoya vn nouueau lieutenant, lequel fit sa residence ordinaire en Ponde : & pource que ce lieutenant coupoit les viures qu'on menoit de terre ferme en la ville de Goa, Francisque

Pereire appointa avec lui, tellement que les gouuernemens demeurèrent à Zabaim.

Guerre d'Antoine Britio contre le Roy de Tidore, & autres accidens.

A v temps que le capitaine Brittio faisoit bastir la citadelle en Ternate, 17.
 auint qu'un frere du Roy de ceste isle banni d'icelle pour quelque entrepri-
 se, certain temps auparavant, apres auoir entendu la mort de son frere, taf-
 cha de faire abolir son bannissement, & obtenir congé de retourner en l'is-
 le: à quoy Cachil Daroes bastard du feu Roy s'opposoit, craignât que l'au-
 tre ne le despouillast du gouuernement & de la grande autorité qu'il auoit
 en toute l'isle. Ce frere se voyant hors de tout espoir, & entendant que Brit-
 tio auançoit sa citadelle, voulut essayer si à l'aide des Portugallois il pour-
 roit point rentrer en l'isle. Pourtant trouua il moyé de se retirer en vne mos-
 quee de la ville de Ternate, puis enuoya dire à Brittio que son intention es-
 toit de se faire baptiser avec quelques autres, moyennant qu'on leur don-
 nast sauf conduit pour entrer en la ville, pour la desfiance qu'ils auoyent du
 bastard, lequel fut incontînét auerti de ceste menée, & sans autre delay s'en
 alla trouuer Brittio lequel il persuada si bien que l'autre fut renuoyé, Brit-
 tio declairant qu'il ne pourroit lui donner aucun secours: ce qui esmeut
 tellement les insulaires que Brittio eut beaucoup à souffrir tant pour les ap-
 païser que pour acheuer son bastiment & le fournir de choses necessaites.
 Ce fardeau l'eust du tout accablé, si Roderic de Sylues ne fust venu au se-
 cours avec vn basteau de Malaca chargé de besognes propres pour mu-
 nir la citadelle. Il fut suivi de quelques vns de Malaca & de Bādan & d'au-
 tres lieux, qui venoyent au trafic de l'espicerie à leur maniere acoustumee.
 Brittio entendant leur arriuee, resolut de s'opposer à leur deliberatiō, vou-
 lant que toutes les espiceries demeurassent au Roy de Portugal, à l'occasiō
 de quoy aussi la citadelle auoit esté commencee. Pourtant escriuit il aux
 Rois circonuoisins, les priant de ne laisser vendre les espiceries de leurs isles
 à autres marchans qu'au facteur du Roy de Portugal: mais specialement
 il en auertit le Roy de Tidore, ayant sceu que certains basteaux de Bandan
 estoient artuez en ceste isle là, pensans y charger, ce que Brittio ne vou-
 lut souffrir, & pourtant il donna charge à Antoine Tauares qui alloit en
 vne fuste avec vings soldats faire ce message au Roy de Tidore, que si les
 basteaux de Bandan refusoient partir apres qu'ils auroient prié le Roy de
 le leur commander, eux les chassassent du port à coups d'artillerie. Tauares
 trop bouillant à l'exécution de sa charge assaillit incontînent ces basteaux,
 dōt le Roy & ses gens furēt fort indignez: mais pource que Tauares estoit
 en mer avec de l'artillerie, le Roy n'osa l'attacher. Or comme les Portugal-
 lois seiournoient au port pour tenir en halaine ceux de Bandan, & les em-
 pescher de partir avec leur charge, ils furēt assaillis d'une bourrasque qui les
 poussa de telle roideur en la coste, que leur fuste se rōpit, tellement que Ta-
 uares & les siens gaignerent le bord à toute peine: & qui pis fut, les insulai-
 res despitez auparavant contre eux à cause de leurs brauades, les voyant si
 mal accommodez, leur coururent sus à main armee, taillerēt en pieces Ta-
 uares & tous ses soldats, prindrent la fuste & l'artillerie. Les nouuelles
 de cest accident rapportees à Brittio, il fit quelques represailles sur certai-
 nes

nes gens du Roy de Tidore, lui faisant sauoir pourquoy, le priant au reste de lui enuoyer les armes des occis, la fuste, l'artillerie, & les meurtriers pour en faire iustice. Mais le Roy peu soucieux de telle chose ne fit response, à l'occasion dequoy Brittio delibera de lui faire guerre, par le conseil de Cachil Daroes, afin que les Portugallois fussent contrains se seruir de lui plus qu'ils ne faisoient, & qu'il s'entretint par le moyé de leurs armes en son autorité. L'auis donc de Cachil estoit que si Brittio laissoit couler vne telle insolence du Roy de Tidore, sans en auoir raison, tous les iours ce seroit à recommencer, & que la Roine & le petit Roy de Ternate n'oseroient reculer à lui fournir secours: que s'il différoit, la Roine reprendroit ses esprits, & pratiqueroit de faire souleuer tous les insulaires de Ternate à la faueur de son pere le Roy de Tidore, pour ruiner les Portugallois, & qu'elle en machinoit desia quelque chose, laquelle s'excuteroit, si de bõne heure Brittio n'y donnoit ordre. Pourtant le conseilloit-il de serrer la Roine & le ieune Roy dedans la citadelle, l'assurant que ce seroit le moyen de tenir l'isle en paix. Là dessus Brittio assembla le conseil des principaux de sa suite, qui pour la pluspart furent d'auis de ne se desioindre de la Roine ni du ieune Roy par vn moyen si oblique: pource qu'en les retenât dedas la citadelle, le peuple se mutineroit, & seroit impossible à Cachil Daroes d'y mettre ordre: au moyen dequoy falloit procurer soigneusement que la Roine tint le parti de Portugallois. Brittio conseillé par Cachil ne voulut suiure cest auis, mais comme il vouloit se saisir de la Roine, elle en ouit quelque vent & gaigna vne montagne d'où elle se retira pres de son pere. De peur que le ieune Roy n'en fust autant, Brittio l'emmena dedans la citadelle, le traitant au reste selon que sa grandeur le meritoit. Les insulaires voyans leur Roy tellement ferré qu'on ne lui permettoit de mettre le nez dehors, en conceurent vn merueilleux despit, dont s'ensuiuit du tumulte que Cachil appaisa: mais ils se desbanderent tellement d'avec les Portugallois, que Brittio ne pût tirer faueur ni secours d'eux pour faire la guerre au Roy de Tidore, pere de la Roine: ce qui incommodoit fort Brittio, lequel voyoit la pluspart de ses gens malades, sa citadelle impatfaite, & dont il ne se falloit pas guerres eslongner, ni se hazarder à vne guerre. Car il vouloit en assaillant celui de Tidore desfaire celui de Ternate, & les ruiner & deposseder l'un par l'autre. Surce, Cachil lui conseille de faire crier à son de trompe par tous les villages de l'isle, que quiconque apporteroit au capitaine de la citadelle la teste d'un Tidorien, auroit pour recompense vne piece de fin drap. Plusieurs desireux de gaigner telle proye, commencerent incontinent à s'embarquer & faire des courses en l'isle de Tidore, & y auoit tel nombre de coupeurs de testes que le drap ne pouuoit suffire pour les payer. D'autrepart en ces saccagemens & massacres quelques vns de Ternate estoient tuez aussi par les parens & amis des massacrez: tellement que la guerre s'alluma de toutes parts d'une façon extremement cruelle entre les deux isles, ceux de Bachian & de Gilolo se ioignans à ceux de Ternate, afin d'auoir du drap. Or combien qu'ils fussent acharnez contre les Tidoriens, ils n'en aimoyent pas pourtant les Portugallois, à cause du passé. Mais Brittio acheminoit ses desseins par

tels moyens, bastissant sur la ruine des vns & des autres, & Cachil maintenant son autorité par vne guerre si tyrannique. En ces entrefaites, Brittio enuoya descouvrir vne navigation des Molucques à Malaca par l'isle de Burneo : aucuns estimans le chemin plus court que par l'isle de Bandan. Simon de Breu eut ceste commission, & s'embarqua au mois de Iuin, puis surgit en Malaca en Nouembre.

*Exploits de
guerre des Por-
tugallois en fa-
ueur du Roy
de Zanzibar.*

EN ce mesme temps, comme Pierre de Castre & Iacques Melio hyuer- 18.
noyēt en Mozambique, le Roy de Zanzibar & de Pembe enuoya des ambassadeurs au capitaine de la citadelle, demander secours comme allié & tributaire du Roy de Portugal contre les insulaires de Querimba ses vassaux, qui s'estoyent rebellez & mis en la protection du Roy de Mombaze, ayans prins quelques vaisseaux & tué certains hommes de Zanzibar. Le capitaine ayant trop peu de gens pour donner secours, pria Iacques Melio & Pierre de Castre d'y aller pour le seruite du Roy de Portugal. Melio estoit de fort bonne volonté, mais à cause de quelques empeschemens il fut contraint demeurer : toutesfois il aida de conseil, de gens & de moyens Pierre de Castre, lequel partit avec Christofle de Soufe, quelques gentils hommes & soldats Portugallois au nombre de cent, & voguans au long de la coste, arriuerent pres l'une des principales isles de Querimba, où il y auoit vn village de Mores, gardé par le neveu du Roy de Mombaze avec forte garnison. Icelui voyant les Portugallois approcher en armes, fit conduire en lieu seur les femmes, petis enfans, & gens inutiles à la guerre, retenant ceux qui estoient propres au combat. Pierre de Castre mit les siés en deux troupes, dont il conduisoit l'une & Soufe l'autre. Mais ils trouuerent plus forte partie qu'on ne leur auoit donné à entendre, car ce neveu du Roy de Mombaze estoit vn ieune homme merueilleusement courageux, & qui se defendoit brauement avec sa troupe, tellement que les Portugallois furent contrains se partir en plusieurs bandes pour combattre plus à leur aise en diuers endroits du village. Durant la meslee Edouard Galuan, s'escartāt de la troupe de Castre, apperceut huit Portugallois enuironnez d'un grand nombre de Mores, & sur le point d'estre taillez en pieces. Il courut incontinent à l'aide, & se porta si vaillamment avec aucuns de sa suite, que les Mores tournerent le dos : puis il se retira pres de Soufe qui auoit fort affaire autour d'une maison, où il fut blessé, apres auoir tué beaucoup de gens. D'autre part, Castre fit tel deuoir que le neveu du Roy de Mombaze & quelques autres des plus asseurez tomberent par terre : lors les Mores tascherent à se garantir à la course, laissant plusieurs morts parmi le village. Soufe, Gaspar Prete, Nonio Freire, Louys Machiade & autres Portugallois furent blesez, les autres estans disposés, encores que le combat eust duré longuement. Et pource qu'il estoit nuit, Castre se retira dans vne mosquee pres de la mer, où lui & les Portugallois attendirent le iour. Or ayant entendu que sur le matin certains Mores deuoient venir de terre ferme pour secourir ceux de l'isle, & assaillir de rechef les Portugallois, il despescha tout soudain Antoine Galuan & quelques soldats pour aller au deuant de ce secours, n'y pouuāt aller lui mesmes à cause de la sieure qui le pressoit : mais si tost que le iour

appa-

apparut il s'alla ioindre à Galuan, & assaillirent les Mores, dont les vns furent tuez sur la place, les autres mis en route. Puis ils saccagerent le village y trouuans la valeur de deux cens mille ducats de butin, puis mirent le feu es maisons, quelque argent qu'offrissent les Mores à Pierre de Castre pour empêcher cest embrasement : mais il les voulut ainsi chastier afin qu'ils ne s'esleuassent plus contre leur seigneur, sous l'obeissance duquel ils retournerent, comme aussi firent les autres Insulaires reuoltez, apprenans aux despens de leurs compagnons. Mais il auint que les vaisseaux, dans lesquels les Portugallois auoyent chargé la plus grande part de leur proye, se destacherent & coulerent en fond avec tout ce qui estoit dedans, tellemēt que Pierre de Castre & ses gens s'en retournerent à vuide à Mozambique, ayans enuoyé deuant Christofle de Soufe & les autres blesez. Or pource que le basteau de Castre estoit grand & mal aisé à manier, il delibera l'enuoyer en Melinde, où le vent sembloit le pousser. Quāt à lui il se mit dās vn esquif, costoyant la terre sur la route de Mozambique, & donna charge à Antoine Galuan d'aller au basteau. Sur l'apresdinee cōme Castre reposoit, vn sien cousin nommé Christofle & aucuns soldats descēdirēt en terre, où ils rencōtrērent des ennemis qui les chargerēt rudement & contraignirent de regagner l'esquif, estans presque tous blesez. Castre se refueillant au bruit, courut à l'aide, sauua son cousin & les autres, contraignit les poursuiuās de se retirer : mais Christofle mourut des playes receues au cōbat. Antoine Galuan n'estoit pas encores entré dedans le basteau, qui fut cause que Castre le retint avecques lui en l'esquif, & donna la charge de ce basteau à Roch de Castre son frere, puis ils se departirent, l'vntirant vers Mozambique, l'autre à Melinde.

19. C O M M E Galuan & Pierre de Castre voguoyent au long de la coste, ils trouuerent vn brigantin chargé de victuailles, lequel estoit chargé de Portugallois. Lors, pour certaines considerations, Castre s'en alla avec ce brigantin, & laissa Galuan dedans l'esquif. Galuan endura beaucoup de disette en continuant son voyage avec les siens : & comme ils approchoyent de Mozambique ils descourirent à vne lieue loin d'eux en mer vn vaisseau, auquel ils donnerent la chasse de si pres qu'ils le firent tirer en terre, sur la plage d'vn lieu nommé Cotangō, peuplé de Mores ennemis des Portugallois. A l'approcher du riuage, Galuan trouua les habitans occupez à charger le vaisseau, mais ils laisserent tout pour courir sus aux Portugallois qui descendoyēt, & s'attacha entre eux vne braue escarmouche, en laquelle les Portugallois se porterent si bien qu'ils cōtraignirent les Mores de regagner leur village, dans lequel ils mirent le feu. Les Mores quittans le cōbat pour estaindre l'embrasement, donnerent loisir aux Portugallois d'aller au vaisseau qu'ils pillerent, spécialement quant aux viures qui y estoyēt, & prindrēt quelques autres petis basteaux anchtez en ce port. Cela fait, & comme ils se remettoyent en mer, ils descouurent d'vn autre costé de terre vne barque en laquelle y auoit sept hommes qui acōsterēt le vaisseau conquis par Galuan & auquel il estoit. Vn vieillard, du nombre des sept de la barque lui fit present de quelques poules & fruits de la terre, adioustant à

*Accident des
capitaines
Galuan & de
Castre.*

l'aide d'un trucheman vogaît avec lui qu'il estoit de Mozambique, venu là pour conoistre Galuan & sa compagnie: specialement pour voir des hommes qui en si petit nombre auoyent bien osé mettre pied à terre pour combattre tant d'ennemis, auxquels ils auoyent osté un vaisseau, sans rien perdre de leur coûté. Pourtant le prioit il de lui donner ce vaisseau & les autres emmenez du port, à la charge qu'ils seroyent tousiours au commandement des Portugallois. Galuan presuma par ce discours que le vieillard estoit venu là pour lui iouer quelque tour: pourtant faignit il de vouloir l'arrestier prisonnier avec les six autres, lesquels demanderent pardon, & confesserent estre venus voirement pour amuser les Portugallois iusques à ce que d'autres vaisseaux fussent arriuez de toutes parts pour les saisir. Toutesfois Galuan leur pardonna, & promit les relâcher tous, moyennant qu'ils lui vendissent quelques viures, ce que le vieillard promit faire, & laissa ses compagnons en ostage, puis reuint avec plusieurs autres apportans des cheures, œufs, poules, chapons & diuerses victuailles qu'ils donnerent à Galuan, lequel lâcha les ostages, & fut illec deux iours à se rafraischir, durant lesquels il pacifia avec les Mores qui lui fournirent ce dont lui & les siens auoyent faute: aussi pour recompense il leur rendit tous les vaisseaux emmenez du port, & laissant le pays en paix, reprit la route de Mozambique, où il trouua Pierre de Castre & les autres qui passerent l'hyuer tous ensemble en ce lieu. Sur le printemps Castre & Galuan partirent de Mozambique, & allerent surgir au port de Goa enuiron le quinzième iour d'Aoust. Ainsi qu'ils prenoient terre, la mer commença à s'esmouuoir & tourmenter de telle furie que ceux de Goa confesserent n'auoir iamais veu vne si cruelle bourrasque, tellement que le vaisseau de Castre cuida perir plusieurs fois: & quelque secours qu'on luy donnast, ne sceut iamais gagner le bord sans faire iect, tellement que tout ce qu'il auoit butiné çà & là sur terre retourna dans la mer. Il sauua à toute peine quelques hardes & marchandises appartenantes au Roy de Portugal, & quant à lui & ses gens ils prindrent terre apres grand trauail, ayans ainsi fait naufrage à la descente.

*Negociation
de Balibar
Personne au
royaume de
Perse, & l'issue
d'icelle.*

DURANT le seiour du Viceroy en Ormus, Raix Xeraf fut auerti que 20.
aucuns capitaines d'Ismael Roy de Perse ne laissoyent passer les marchands qui alloient trafiquer en Ormus: pource (disoyent ils) que le Roy d'Ormus refusoit payer cinq mille ducats de tribut qu'il deuoit à Ismael. Ces représailles diminuoyent de beaucoup le reuenue du Roy d'Ormus, à l'occasion dequoy Xeraf pria le Viceroy d'interceder enuers Ismael à ce que les marchands eussent leur commerce libre, puis que le Roy d'Ormus estoit suiet de celui de Portugal, ami & allié d'Ismael, offrant au reste celui d'Ormus faire conte avec l'ambassadeur de Perse, & payer ce dont il se trouueroit redeuable. Christofle Personne cheualier de saint Jacques fut député pour y aller avec bonne compagnie, & emmena l'ambassadeur qu'Ismael tenoit d'ordinaire en Ormus. Ayans fait quelque chemin ils arriuerent en vne ville nommée Lara où les Portugallois furent en grand dâger, nommément leur ambassadeur, qui receut un coup de masse sur la teste, & plusieurs de ses gens furent bien blesez, pour s'estre comme moquez du gouuerneur du

du lieu: tellemēt qu'ils n'eurent autre moyen de se garātir que de viftesse, puis s'estans reioints passerent plus modestement les autres villes, entre autres Xiraz & Tabtiz les mieux peuplées de l'Orient. Ils approcherent finalement à vne iournee pres du camp d'Ismael, lequel leur enuoya dire par son grand maistre, que les Perles appellēt Vaquil, qu'ils s'arrestassent là, sans en bouger qu'on ne les en auertist: tellemēt qu'ils y seiournerēt dix ou douze iours, durāt lesquels passa vn nombre infini de gens & de chameaux en tresbel equippage pour se trouuer au camp à vne feste solennelle nommee Nouoruz, c'est à dire la feste du printemps, en laquelle Ismael vouloit tenir cour ouuerte, & traiter à la royale les Seigneurs de son royaume. Balthazar fut incontinent mandé, & estant ptes du camp, quelques capitaines le receurent avec grand honneur. On le logea en pauillons bien acommodés avec tous les gens, & lui fut dit de la part d'Ismael qu'il se reposast & s'assurast d'auoir bonne responce. Au bout de quelques iours ceste feste fut solennisée avec tant de magnificences qu'il n'est possible d'en imaginer dauantage au monde. Ismael fit vn banquet tressomptueux à tous les Seigneurs Persans, où fut conuié l'ambassadeur Portugallois avec ses gentils-hommes, & traité des viandes qui estoient enuoyees par Ismael & de sa table mesmes. Mais comme Balthazar esperoit obtenir vne despêche auantageuse pour le Roy d'Ormus, Ismael, malade des quelque temps aupara- uant d'une epilepsie & d'autres infirmités, en fut du tout abatu, & mourut sans auoir fait responce à Balthazar, lequel fut contraint seiourner en- cores plusieurs iours en la cour du nouueau Roy, nommé Ta- maz fils d'Ismael, âgé de quinze ans. Icelui renuoya l'ambassadeur & les Portugallois, sans leur rien ac- corder de ce qu'ils demandoient, ni faire cō- te d'eux: au moyen dequoy Baltha- zar s'en reuint en Ormus tout mal content & despité.

* *

FIN DV TREIZIESME LIVRE.





L E QVATORZIESME LIVRE.

S O M M A I R E.

1. Retraite du Viceroy Edouard de Menefez, d'Ormuz en Goa, & ce qui auist aux Portugallois en Calcut.
2. Nouveaux efforts du Roy de Dachen contre la citadelle de Pacem: laquelle est finalement abandonnee des Portugallois.
3. Guerre du Roy de Bintam contre les Portugallois en Malaca, & les accidens d'icelle.
4. Prusse de quelques Portugallois au port de Pam, & leur cruel supplice pour n'auoir voulu abjurer le Chrestianisme.
5. André Britto & ses gens desfaits au port de Pam.
6. Desfaite de São Henriquez, & de son frere en ce mesme port.
7. Ordre donné par le Viceroy aux affaires de Malaca.
8. Exploits de guerre des Mores de Bintam contre les Portugallois au port de Malaca.
9. Laqueiximene Amiral de Bintam cōqueste deux caruillons de Gasfia Henriquez.
10. Malaca assiegee par mer & par terre, puis deliuree.
11. Guerre de Martin Alfonso de Sousa contre les Rois de Bintam, de Pam & de Pacem.
12. Commencement de guerre entre Antoine Britto & le Roy de Tidore, & les succès d'icelle.
13. Auanture de Martin Alfonso Melo voulant ruiner quelques insulaires.
14. Desfaite de Francisco de Sousa & de sa compagnie pres de Mariac place principale de Tidore.
15. Prusse de Mariac par Martin Correa.
16. Continuation de la guerre des Portugallois cōtre le Roy de Tidore, sur lequel ils prennent plusieurs places es isles de Machian & de Barochin.
17. Le Roy de Tidore demande la paix, qui lui est refusee par Britto.
18. Entreprises du Roy de Calcut contre les Portugallois, & ce qui s'en ensuiuit.
19. Differens entre le Roy de Portugal & l'Empereur Charles cinquieme sur la conqueste des Moluques.
20. Vaisque de Gama esleu Viceroy des Indes sa navigation, son arriuee en Cochim, & l'ordre qu'il donna aux affaires.
21. Deux grades victoires obtenues par George Telio sur les Calcutiens.
22. Arruee d'Edouard de Menefez, en Cochim, où il se demet de sa charge, suivant la teneur des lettres du Roy de Portugal: & Vaisque de Gama meurt.

*Retraite du
Viceroy en
Goa, & ce qui
auist aux Por-
tugallois en
Calcut.*



I A N D I S que Balthazar Perslone negotioit en Perse, Edouard de Menefez Viceroy partit d'Ormuz, & fit voile en Goa, où peu au parauant estoit arriué Hector de Sylueire enuoyé par le Roy Iean pour estre Amiral des Indes, ayant pour capitaines Manuel de Macede, Simon Sodre, Antoine Almeida, François de Cugne, Pierre de Fonsèque & Vincent Gil. De Goa le Viceroy fit vn voyage en Cochim avec vne puissante flotte, & en passant visita les fortresses de la coste, laquelle estoit conuerte de vaisseaux de Malabares lesquels faceageoyent tous les Portugallois qui s'escartoyent tât soit peu. L'occasion estoit que les Rois & seigneurs Indiens estans paisibles, & les Portugallois non occupez à la guerre comme auparauant, ils trafiquoyent tellement les vns avec les autres, que ce pendant le Viceroy auertissoit

tissoit les gens de se tenir sur leurs gardes, & porter leurs armes, afin de n'estre surprins des Malabares qui ne feroient difficulté de les prendre à leur avantage & les saccager en temps de paix pour reuence des torts receus en guerre. Ceste licence fut cause d'un grand mal, car les Portugallois perdirent tellement toute honte, qu'au lieu de suiure simplement leur trafic, ils demandoient la bourse aux premiers rencontrez, fussent amis ou non, & falloit que les Malabares se sauussent en payant rançon : dont ils commencerent à s'irriter tellement, que ceux de Calecut se plainquirent à leur Roy, successeur de Naubeadarim mort peu de temps auparauât, des torts qu'on leur faisoit. Lui qui vouloit autant de mal aux Portugallois que son predecesseur leur auoit désiré & procuré de bien, voyant ceste rupture de paix, resolut s'en venger, fit armer en tous ses ports, tenir prestes les barques & pataches qui seruoient parauant au trafic, & lascha la bride à ses suiets qui trouuoient moyen assez aisé d'attrapper & esgorger les Portugallois, deuenus si insolens qu'ils ne se tenoyent aucunement sur leurs gardes, pensans que les Malabares fussent tenus obseruer la paix & eux non. Or comme le Viceroy suiuoit sa route, il print port à Calecut, où arriuerent aussi quelques gentils hommes, entre autres Pierre de Castre, lequel vn iour apres dîner sortit de la citadelle, accompagné de six ou sept autres, pour s'aller esbatre en la ville. Les Calecutiens enuainement contre les Portugallois, au sang de plusieurs desquels ils auoyent trempé leurs mains, vindrent incontinent attacher de paroles Castre & sa compagnie. Lui saignant ne les entendre, reprit le chemin de la citadelle : mais il fut poursuui par les Calecutiens qui blesserent quatre de sa troupe, lesquels commencerent à doubler le pas. Sur ces entrefaites voïci venir Antoine Galuan suiui de quatre seruiteurs, lequel descourant ces quatre blessez reconut que c'estoyent des gens de Castre, & tout soudain l'alla trouuer pour le secourir ou mourir avec lui. Ayant marché quelque peu il apperceut vne grosse troupe de gens armez autour de Castre qui talchoit les appaiser & entretenir de douces paroles, ne se sentant pas fort pour leur faire teste. Mais à l'arriuee de Galuan, il eut loisir de se desgager, & entrer en vne rue assez estroite menant droit à la citadelle. Lui & Galuan firent marcher leurs gens deuant, se tenâs sur la queue pour soustenir les Calecutiens qui faisoient bruire leurs boucliers, & lançoient des dards, au grand peril de ceux qui en estoient attaints. Deuant tous marchoit vn More de fort haute stature, suiui de bon nombre des plus hardis, lesquels s'approcha de Castre pour le charger : à quoy Galuan s'opposa, & apres auoir marchandé l'un l'autre quelque temps, par le cōgé de Castre, Galuan desfia le More au combat d'homme à homme, ce que le More n'osa accepter, ains se retira avec ses gens, & ainsi Castre, Galuan & les leurs rentrerent saufs en la citadelle. Le Viceroy auerti de ce fait n'en tint compte, ains se retira en Cochim, emmenant toute l'artillerie qui estoit en ceste coste : dont les Calecutiens deuindrent si fiers qu'ils s'embarquerent, & avec nombre de vaisseaux de guerre passerent deuant Cochim, sans que le Viceroy s'en esmuist. Ceste deuxiesme conuiuece enhardit tellement les ennemis qu'ils entrerent en la riuere de Cochim & donnerent la chasse à

quelques nauires de marchans Portugallois, sans que le Viceroy s'empeschast d'y mettre ordre, disant qu'il vouloit rendre à son successeur toute l'Inde paisible : à l'occasion dequoy les Calecutiens prindrent la hardiesse de tuer autant de Portugallois qu'ils pouuoient attrapper, dont le nombre fut plus grand qu'il n'auoit esté sous aucun precedent Viceroy. A son arriuee en Cochim il despescha Sebastian de Soufe, Martin Correa & Arias Conil, pour nauiguer en l'isle de Bandan avec trois basteaux dont ils eurent charge.

Effort du Roy de Dachen contre la citadelle de Pacem, laquelle est finalement abandonnée des Portugallois.

ON a veu es liures precedens la mauuaise affection que le Roy de Dachen portoit aux Portugallois, auxquels il s'estudioit faire tout le mal à lui possible. Il auoit tascié de forcer la citadelle de Pacem, afin de s'emparer du royaume & de toute la Taprobane, puis aller iusques en Malaca. L'arriuee de Martin Alphonse Melio rompit le coup à tels desseins & contraignit ce Roy de leuer le siege pour la premiere fois. Or sentant le secours vn peu loin, il retourna assieger ceste citadelle gardee par André Henriquez, qui auoit la plupart de ses gens malades, le reste propre à manier les armes estant en bien petit nombre. Comme il estoit apres à trouuer les moyens de s'en rendre maistre, Sebastian de Soufe arriua pres de Pacem avec sa flotte, & vint surgir à la bouche du fleuue, vne lieue au dessous de la citadelle, ne sachant pas qu'elle fust assiegee : & pource qu'il estoit tard, lui & ses gens anchrerent là pour ceste nuit. Le Roy auerti de ce secours qui venoit si mal à point pour ses affaires, resolut de tenter en toutes sortes d'emporter la place, auant que Soufe y peust venir à temps, & de donner vn tel assaut la nuit avec toutes ses troupes que les assiegez ne pourroyent tenir coup. Il commanda donc à ses capitaines d'exhorter leurs soldats à se porter vaillamment, que les murs & bouleuards de la citadelle estoient de bois pourri & rongé de vieillesse, aisez à mettre par terre, qu'alors tout estoit à eux, pource que les assiegez estoient trop peu de gens. Incontinent les ennemis vindrēt à l'assaut, avec haches, coignees, eschelles & engins propres pour se faire entree en la place : mais ils furent recueillis si courageusement par Henriquez & ses gens tant sains que malades, qu'apres long combat en diuers endroits, où toutes sortes de ruses & façons d'assaillir furēt pratiquees, les ennemis furent contrains se retirer avec grand' perte, au grand estonnement de leur Roy, qui ne pensoit nullement que les Portugallois tant harassez au parauant peussent soustenir vn tel choc. Le lendemain, Hénriquez, craignant vne nouuelle recharge, alla des le point du iour visiter les bouleuards & murs de la citadelle, contre lesquels il vid beaucoup d'eschelles appuyees, que les ennemis n'auoyent eu loisir d'emporter, tant ils auoyent eu haste de se retirer. Il les enuoya rompre, & sur ces entrefaites arriuerent Soufe & les autres capitaines de sa flotte qui entrerent avec leurs soldats dedans la citadelle : & apres auoir communiqué avec Henriquez, leur resolution fut (sans que lon ait peu bonnement sauoir surquoy elle estoit fondée, sinon qu'il n'y auoit pas assez de viures, mais il n'y auoit rien à gagner sinon des coups, & le butin des isles de Bandan estoit beaucoup plus friand que le traual de la guerre) ils quitterent la citadelle, voire en si grande diligence

ligence qu'ils y laisserent toute l'artillerie, pource (disoyent-ils) qu'elle leur eust fait trop de peine à trainer en leurs vaisseaux, & n'apporter point aussi les pouldres, ni ne mirent le feu dedans, de peur que les ennemis ne sentissent ceste fuite pour les poursuiure, tât la peur soudaine sans aucune raison les auoit esfarouchez: seulement comme ils furent sur le point de s'embarquer ils mirent le feu à quelques trainees, qui s'alloyent rendre aux pouldres de la citadelle, mais les ennemis coururent au deuant, & estaignirent les trainees auant qu'elles fussent consummées iusques au bout. Et voyans au reste que les Portugallois se retiroient en desordre, ils deschargerēt l'artillerie de la citadelle sur eux avec grâdes huees & mocqueries d'auoir ainsī laschement abandonné la place, de laquelle le Roy de Dachen se trouua paisible seigneur contre son esperance, attendu ce qui estoit auenu la nuit précédente. Ceste retraite rendit les Portugallois fort mesprisez en la Taprobane, & ce Roy deuint si superbe que de là à peu de iours il se fit maître de tout le royaume de Pacem, d'autant que le regent d'icelui voyant les Portugallois s'en aller n'osa demeurer au pays sans eux, ains les suiuit, emmenant aussi le Roy qui estoit encores fort ieune. En apres le Roy de Dachen s'empara du Royaume d'Aru voisin de celui de Pacem, contraignant le Roy d'Aru de s'enfuir en Malaca, où ces deux Rois vescurent depuis en grâde disette. André Henriquez & Sebastian de Souze estās en leur flotte, furent trois iours à l'ancre, puis haussèrent les voiles & se sauuerent en Malaca.

3. D'v n autre costé le Roy de Bintam ennemi mortel des Portugallois ne pensoit qu'aux moyens de les chasser de Malaca, & les exterminer du monde. Pour cest effect il arma huitante cinq lanchars ou basteaux de guerre sous la charge de son Amiral Laqueximene, lui commandant d'approcher de Malaca & guerroyer les Portugallois à toute outrance. Laqueximene se mit incontinent à la voile, & comme il approchoit de Malaca, estant en la coste à huit lieues pres, Edouard Conil, qui couroit ceste plage de mer avec vne fuste pour butiner sur les premiers qu'ils rencontreroit, sachant que ceux de Malaca ne se doutoyēt pas d'vne telle venue, si tost que la nuit apparut print la route de Malaca, où estant arriué fit entendre à George Albuquerque l'occasion de son retour. Le conseil assemblé fut d'auis qu'on deuoit aller promptement combattre ceste armee: pource que si elle demeuroit en son entier, la citadelle auroit fort à souffrir, à faute de viures qui n'y pourroyent estre apportez, ioint aussi que la ville perdrait son trafic. Suiuant ceste resolution, Sance Henriquez Amiral de Malaca monta en vn gallion duquel son frere Antoine estoit capitaine, avec Edouard Conil en la fuste, Manuel Berrede en vne galliote, Henri de Leme, Francisque Fogaze, Iacques Laurent, Fernand Aluarez Cassados, Iean de Sore & Alfonso Louys, en six lanchars. Ils prirent la route du fleue de Muar où Laqueximene les attendoit avec toute son armee. Le gallion, la fuste & la galliote vogueyēt en haute mer, & les lanchars costoyoyēt le riuage. Sur cela, voici vne bouirafque avec vn furieux vēt de nordouest qui cōmence à leur doner en pouppe: ce qui cōtraignit Sance d'assembler les ca-

*Guerre du
Roy de Bin-
tam contre
les Portuga-
lois en Mala-
ca, & les acci-
dens d'icelle.*

pitaines pour auiser à ce qui estoit de faire, & proposa que la tourmente, estant portée d'un tel vent, mettroit les vaisseaux à fond, s'ils alloient s'engouffrer en ce fleuve de Muar, qui estoit fort large & profond, ioint que le iour declinoit, & qu'il lui sembloit plus expedient de baisser en vne autre petite riuere nommee Cazan, plus proche que Muar. Les plus vieux capitaines qui conoissoient le pays & les affaires de la guerre furent tous de ceste opiniõ : mais certains autres nouveau-venus de Portugal, sans auoir encor fait apprentissage d'armes, dirent que ceux qui conseilloyent cela auoyent peur, & qu'il ne faisoit pas interesser ainsi la reputatiõ des Portugallois. D'autant qu'ils estoient en plus grand nombre que les autres, leur auis fut suivi : mais les vieux capitaines leur dirent, qu'à l'approcher des ennemis on verroit qui estoient les plus paoureux. Estans entrez enuiron demi lieue dedans le fleuve de Muar, un tourbillon donna de telle impetuosité à trauers, que le gallion, la fuste & la galliotte furent repoussees contremont, les lâchars chassés à bas, les trois premiers de si grande roideur, qu'ils allerent donner parmi la flotte des ennemis qui les inuestirent en un instant, & tuerent tous ceux qui estoient en ces trois lanchars. Puis avec grandes huez s'approcherent des trois autres, & de leurs rames & autres instrumens propres battoient tellement les vagues qu'ils firent couler en fond les lanchars de Francisque Fogaze & de Henri de Leme, si que tous furent noyez, exceptez Fogaze & trois autres, qui à la faueur de la nuit furent portez d'une vague sur le bord du fleuve, & avec un travail nompereil trouuerent moyen de retirer leur lanchar, sur lequel ils se remirent à l'auanture, & la tourmente estant cessée firent tant qu'ils reprindrent la route pour se ioindre au galliõ de Sance Henriquez. Le lendemain, si tost que le iour apparut, cinq lâchars de Bintam se monstrerent derriere eux, & leur donnerent l'assaut, qui fut si courageusement soustenu par ces quatre Portugallois, qu'ils se desgagerent gaignans le gallion de leur Amiral. L'autre lanchar donna contre terre, & s'embourba de telle sorte qu'il y demeura avec ceux qui estoient dedans. Henriquez pensant estre assez fort pour se venger, sans prendre conseil d'autre teste que de la siene, commanda à Manuel Berrede & au lieutenant de Fogaze de se rendre à la bouche du fleuve, estimans qu'ils seroyent assez forts pour empescher Laqueximene de sortir de là, puis lui & Edouard Conil les suiuroient, afin de fermer du tout le passage. Ce pendant on euuoyeroit querir secours en Malaca pour donner bataille generale. Combien que Manuel & l'autre capitaine conussent bien que Henriquez leur commandoit vne chose du tout desraisonnable, attendu que c'estoit se precipiter à la mort, veu le grand nombre des ennemis à demi victorieux, neantmoins afin qu'on ne les taxast de couardise ils executerent ce qui leur estoit commandé. Mais les ennemis ne leur donnerent pas loisir de se rendre à la bouche du fleuve, ains les preuindrent & attacherent de toutes parts, tellement qu'ils furent tous ou noyez ou tallez en pieces, la galiotte & le lanchar prins. Le nombre des Portugallois tuez & noyez en ceste rencontre estoit de soixante cinq, entre lesquels se trouua Henri de Leme, braue gentilhomme, lequel fut noyé. Quant à Sance Henriquez, les Mores estoient

estoyent tant occupez à desfaire Manuel Berrede & les autres, qu'ils n'asfaillirent ni lui ni Edouard Conil, lesquels firent que sages en se retirant, pource que c'estoit chercher la mort d'aller en si petit nombre, en temps mal propre, combattre des ennemis puissans & enfez de leur victoire. Ainsi donc ils reprindrent la route de Malaca, Laqueximene se contentant de sa victoire: car, selon l'experience que ce vieil capitaine auoit es affaires de la guerre, il n'ignoroit pas que les Portugallois auoyent esté desfaits plus par leur indiscretion que par la vaillance des Bintamois: pourtant ne voulut il agacer ses ennemis, ains estimant auoir assez gaigné pour vn coup fit voile avec son armee vers Bintam.

4. SANCE Henriquez ne fut pas si tost arriué en Malaca qu'il vouloit remonter en son gallion, & emmener quelques autres vaisseaux pour courir sus à Laqueximene: mais entendant que la flotte estoit partie il demeura coy. Sur cela George Albuquerque permit à Antoine de Pine, d'aller avec vn sien ionc ou bateau trafiquer pour son particulier en la grande laue. Pine mena trois autres Portugallois en son bateau, & sur leur retour de laue en Malaca, ils arriuerent au port de Pam, ville assize en la coste & non gueres loin de Malaca. Le Roy de Pam, ami des Portugallois, se banda contre eux à la sollicitation du Roy de Bintam qui lui donna vne siene fille à femme. Ce mariage fut tenu fort secret entre eux, tellemēt que pour vn temps les Portugallois furent mal traitez de ce Roy en diuers affaires, sans s'appercevoir toutesfois que cela procedast de lui. Et ainsi Pine & ses compagnōs aborderent là, pensans estre en terre d'amis, & enuoyerent quelques vns des leurs en la ville pour acheter des viures. Le Roy entendant leur arriuee māda dire à Pine ques'il auoit besoin d'autres choses on les lui fourniroit volontiers, & enuoya diuers presens de fruits & tels rafraichissemens. Mais la nuit suiuite il despescha sept lanchars avec enuiron trois cens hōmes de guerre, sans les pilotes & matelots, lesquels au point du iour enuironerēt de toutes parts & de pres le bateau de Pine, lequel se defendit brauement, cōme aussi firent les trois autres: mais estans las de combattre & tuer, & apres auoir perdu le secretaire & les seruiteurs de leur ionc, finalement ils furent prins ensemble le ionc avec tout ce qui estoit dedans, & menez eux quatre au Roy de Pam, lequel les enuoya tout soudain à son beau pere. Icelui les exhorta d'abiurer le Christianisme pour adherer à l'impietē de Mahumet, ce qu'ils refuserent faire avec vne grande constāce & resolution: au moyē dequoy ils furent attachez separément chascun à la bouche d'vn canon chargé de pouldre, & le feu estant mis aux pieces, ces quatre Portugallois preferans la vie à venir à la presente volerent par morceaux: dont ceux de Malaca ne sceurent rien qu'assez long temps apres.

5. AVANT que George Albuquerque en eust les nouvelles, il commanda à Sance Henriquez de faire vne course en la coste de Patane. Sance mōt au gallion, duquel son frere Antoine auoit charge, mena trente Portugallois, & Ambrosio de Rege trente autres en son bateau. Estans en mer, André Britio vint surgir en Malaca, & pource qu'il portoit vn congé du Viceroy de trafiquer où bon lui sembleroit, il partit du consentement d'Al-

Prise de quelques Portugallois au port de Pam, & leur cruel supplice pour n'auoir voulu abiurer le Christianisme.

André Britio & ses gens desfaits au port de Pam.

buquerque pour aller au royaume de Siam, & en chemin alla mouiller l'ancre au port de Pam, pour fournir son vaisseau de viures. Le Roy auerti de ceste arriuee, enuoya incontinent ses lanchars, qui par vn matin inuestirent les Portugallois, lesquels furent incontinent acrochez : mais comme les Mores vouloyent entrer il y eut vne estrange meslee, car Britio & ses gens firent vne terrible boucherie d'ennemis, courans alaigrement de tous costez pour faire teste aux plus resolus. Mais le nombre des assaillans estoit si grand, que les Portugallois las de frapper, & tuez les vns apres les autres, finalement les Mores entrèrent dedans le vaisseau, n'y restant plus personne de defense qu'un frere de Britio, lequel avec vne espee à deux mains tailla en pieces tant de gens, que les Mores estimoyent que ce fust quelque diable qui aidast aux Portugallois, car il les chassa par deux fois hors du vaisseau : mais se sentant si las qu'il n'en pouuoit plus, & craignant tomber es mains de ceux qui auoyent marchandé si cherement sa peau, il se ietta de vistesse dedans la mer & y perit. Britio auoit vn facteur & trucheman nommé Francisque, lequel ne fut point tué, d'autant qu'il estoit Indien, mais il trouua moyen avec le temps de se tirer des mains de ceux qui l'auoyent prins, & s'en retourna à Malaca, où lon sceut de lui ce que dessus.

*Desfaite de
Sance Henriquez & de son
frere au port
de Pam.*

QUANT à Sance Henriquez & Ambroise de Rege, apres auoir paisiblement accomodé leurs affaires en Patane, ils se mirent au retour vers Malaca : mais vne tourmente soudaine les desvint, tellement qu'Ambroise s'elargit en mer & Sance qui costoyoit la terre alla surgir à Pam, estimant que le Roy fust encores ami des Portugallois, & fit ietter l'ancre attédant que la mer fust plus commode. Le Roy enuoya incontinent sous couleur de visitiō & offre d'amitié, acompagnée de quelques presens, voir quelques gens c'estoyent & leur nombre : puis renuoya de ses domestiques en meilleur equippage que les premiers caresser Sance, lui presenter les moyes du Roy, lequel aussi lui faisoit presens de quelques vaches, buffles & autres viures, qui seruoient d'amorce pour attrapper les Portugallois. Vn peu auparavant Laqueximene estoit arriué pres de ce port pour surprendre les vaisseaux qu'il entendoit y estre venus de Malaca. Il conduisoit trente lanchars qui se serrent à couuert, en attendant l'occasion & l'auis du Roy, lequel leur enuoya dire que les Henriquez y estoient en leur gallion. Soudain les lanchars s'apprestent au combat, & si tost que le iour apparut, estās suiuis de dix autres lanchars du Roy de Pam, & estans en nombre de douze cens hommes de guerre vindrent assaillir les Portugallois qui n'estoyēt quē trente. Sance apperceuant tant d'ennemis prests à tomber sur ses bras, & qu'il n'y auoit moyen d'eschapper que par les armes, dit à ceux de sa troupe, Compagnons, il n'y a remede ici sinon à frapper fort, comme l'espere que Dieu nous fortifiera : ie vous prie au nom d'icelui que vous preferiez vne honorable mort à vne vie ignominieuse. Cela dit, il distribua quatorze soldats sur les deux bords du gallion, asauoir sept de chascue costé, baillant la prouë à son frere Antoine avec huit hommes, & retenant huit autres pour soy en la poupe. Les ennemis, voyans ce petit nombre, commencerent à huer & crier de ioye,

ioye, tenans desia tout gaigné, ce leur sembloit, & enuoyerent seulement quatre lanchars acrocher le gallion en quatre endroits, ce qui fut executé & lors commença vne des plus cruelles mellees que lon sauroit penser. Si les Portugallois n'eussent eu affaire qu'à ces quatre lanchars ils demeuroyēt victorieux & faisoient vn estrange carnage de Mores: mais Laqueximene enuoyoit tant de gens frais pour continuer l'assaut en la place des blesez ou occis, que Sance fut contraint, pour soustenir le choc avec moins d'incommodité, d'amasser le reste de ses soldats ensemble, pour combattre dos à dos, & auoir le moyen de vendre si cheremēt leurs vies que Laqueximene & les siens s'en souuinssent. De fait ils combatirent tant que leur force le permit, & apres auoir esté blesez en diuers endroits, afoiblis par la perte du sang coulāt de leurs playes, ils tomberent mi morts les vns sur les autres, laissant l'entree libre dans le gallion aux ennemis qui les acheuerent de tuer, sans espargner aucun, tant ils estoient despitez du grand nombre de gens que les Portugallois auoyent fait mourir au combat. Puis ils emmenèrent le gallion avec force pieces de bonne artillerie dōt il estoit chargé.

7. AMBROISE de Regeayant esté separé de Sance par la tourmente susmentionnee, arriua d'un autre costé au destroit de Cincapure, où il attēdit Sance l'espace de huit iours: & ne le voyant point estima qu'il auroit gaigné le deuant, & seroit passé de nuict. Quant à lui donc il print la route de Malaca, & n'y oyant nouuelles aucunes de Sance, George Albuquerque & Garfie Henriquez nouuellement arriués des Molucques iugerent Sance & les siens morts ou prisonniers. En ces entrefaites suruindrent Sebastian de Soufe & André Henriquez avec leurs gens partis de Pacem, comme dit a esté au deuxiesme chapitre de ce liure. Leur venue contrista fort les Portugallois & Malacans, qui voyoyent leur affaires empirer de toutes parts & leur ennemis comme au dessus, mesmes que le Roy de Dachen secondoit celui de Bintam, & ne pouuoit-on presumer autre chose sinō que ces deux Princes se ioindroient ensemble & tailleroiyēt biē de la besongne à ceux de Malaca. Albuquerque craignant que le Roy de Bintam n'enuoyast sa flotte voltiger au lōg de Malaca, pour couper les viures & empescher le trafic, commanda au capitaine Garfie Henriquez d'aller à l'embouchure de Bintam, pour empescher Laqueximene de s'elargir en mer, & lui donna quatre basteaux avec deux carauellons. Or pource que le mois de Decembre approchoit, propre à la nauigation de Malaca en l'Inde basse, quelque nef partirēt pour aller en Cōchim. Lors Albuquerque auertit par lettres le Viceroy de l'estat des affaires de l'Inde haute, le besoin qu'il auoit de gēs & de vaisseaux, ensemble ce qui estoit auenu à Malaca & es enuiros: adioutant qu'Antoine Brittio (des lettres duquel il enuoyoit copie) prioit d'estre deschargé de la capitainerie en l'isle de Ternate, s'excusant sur son infirmité & que c'estoit raison qu'un autre portast le faix de la guerre contre le Roy de Tidore. Les nefes armees en Cochim trouuerent le Viceroy occupé à faire ses aprests pour aller en Ormus. Entendant les nouuelles de Malaca, & ce qu'Albuquerque lui escriuoit, il eslut Amiral de Malaca Martin Alfonse de Soufe, lui assignant trois basteaux ronds & quatre fustes avec deux cens

*Ordre donné
aux affaires de
Malaca &
de l'Inde hau-
te & basse.*

Portugallois. Apres auoir expédié ceste flotte, il cingla vers Ormus, delibéré d'y passer l'huiuer pour recouurer les deniers que Raix Xeraf deuoit de reste au Roy de Portugal & à quelques particuliers, menant avec soy vn gallion qui n'eust serui de rien durant son sejour en Ormus, & laissa les vaisseaux de rame necessaires pour la garde de toute la coste, sous la charge de son frere Louys de Menesez, lieutenant en son absence, auquel il commanda de demeurer en Cochim, pour estre plus pres des Calecutiens, presumant, & à bon droit, que le Roy de Calecut machinoit quelque chose cōtre la citadelle, enquoy il ne s'abusa point: mais au lieu de demeurer il se retira trop loin, ce qui enhardit les Malabares à rompre les traitez de l'accord, emmenans les espiceries en Arabie, sans congé des Portugallois, & s'apprestans pour courir sus au Roy de Cochim, ce qu'estant descouuert aucunement à Iean de Leme capitaine de la citadelle & nié par le Roy de Calecut, les vns commencerent à se donner garde des autres, pour s'entresurprēdre à la premiere occasion, comme nous le verrons ci apres.

*Exploits de
guerre des
Mores de Bin
tam contre les
Portugallois
au port de
Malaca.*

P O V R reuenir au Roy de Bintam, pour ce que les Mores voisins de Ma- 8.
laca estoient ses grands amis, le voyans en guetie contre les Portugallois, ils prindrent les armes & cefferent de porter viures en la forteresse. Et quāt à ceux qui y venoyent par mer, la flotte du Roy de Bintam les estonnoit & empeschoit d'aller en Malaca. Pourtant c'estoit chose certaine que si la guerre tiroit en longueur, la victuaille defaudroit incontinent. Au moyen dequoy Albuquerque ne voulant pas attendre l'extremité, & pource que Garfie Henriquez, à qui ceste charge appartenoit, estoit pres de Bintam, pria Garfie Caigne facteur des Portugallois en Malaca, & vaillant homme en guerre, d'entreprendre ce rauictuaillement, ce qu'il accepta volontiers, encotes que le danger fust tout euidant, n'y restant basten quelconque apres son depart fors celui de Simon de Breu arriué des Molucques, & vn ionc qui n'auoit serui de long temps. Il partit dōc avec son basten & toutes les autres barques ou almadies qui se trouuerent au port, acompagné de quelques soldats, & voguans au long de la coste entrerent dans le fleue de Muar, à cinq lieues de Malaca, pour chercher des viures. Comme ils estoient en queste, quatorze lanchars de Bintam surgirent au port de Malaca, le general desquels entendant en quelle necessité estoit la citadelle destituee de gens, de vaisseaux de rame & de guerre, delibera y mettre le feu. Sur le point du iour il entra dans le port, surprenant dormans Simon de Breu & treize Portugallois qui deuoient faire le guet: mais ils auoyent tant veillé les nuits precedentes que pour ceste fois les ennemis ne furent apperceus qu'assez tard. Simon de Breu s'esueillant en sursaut, commence à crier à l'arme, tellement que la peur & le despit encouragerent au double ses soldats qui firent merueilles ce matin. Le general de Bintam voyant qu'à la longue ce petit nombre de Portugallois, bien fournis de pouldres & autres munitions, lui tueroit la plupart de ses gens, s'auisa d'vn stratageme, a sauoir de faire desarmer & despouiller vn ionc ou basten, lequel, sur le decreoist de la maree, il fit pousser aual l'eau droit à celui de Breu, & quelque resistāce que fissent les Portugallois fit attacher fermement l'un à l'autre, & mettre le feu

feu en ce defarmé, en sorte que celui de Breu fut embrasé bien tost apres, lui & ses soldats bruslez pour la pluspart, sans que George Albuquerque (qui voyoit tout du riuage, & qui entageoit de despit, n'ayant pas vn vaisseau, pour y enuoyer à l'aide) peust remedier à ce miserable accident. Vray est que de cholere, & contre l'avis de tous, il commanda à trente Portugallois d'entrer en vne barquerolle qui n'auoit equippage quelconque, pour se hasarder à la deliurance de Breu & des siens: mais ils ne peurent iamais auancer, tellement que les vns furent bruslez tous vifs, les autres se iettâs du feu en l'eau pour gaigner le bord à nage furent tuez à coups de fleches & de harquebouzes. Le feu dura iusques au soir, & consumma entierement ces deux basteaux, au grand contentement des ennemis qui se mocquoyét des Portugallois d'auoir laissé brusler & noyer leurs cōpagnōs, sans les pouuoir aider. C'est ce que gaigna Albuquerque pour auoir enuoyé ses gens au loin, qui ne teuindrent pas assez tost, & Garfie Caigne arriué le dernier m'amenâ des viutes que pour dix iours, sa departie ayant esté cause d'une telle perte.

9. T A N D I S que les affaires des Portugalois alloient de mal en pis de ce costé, Garfie Henriquez voltigeant avec ses basteaux & carauellons en la fosse de Bintam, faisoit mille maux aux ennemis, faissant les vaisseaux qui vouloyent entter ou sortir, & mesmes prenant terre quelquesfois & sacquant le plat pays, dont le Roy fut extremement indigné, estimant ces brauades lui tourner à plus grande honte qu'il n'auoit eu d'honneur en toutes les rencontres passées. S'en estant plaint à Laqueximene, iceluy fit responce que ces basteaux & carauellons n'estoyent pas encores en prinse, qu'il falloit besongner finement en ce fait, d'autant que la force n'y seruiroit de rien, les Portugallois estans si bien faits à la guerre, que les victoires obtenues fut eux ne se deuoient attribuer à la vaillance des Bintamois, ains au hazard des armes iournalieres: mais qu'il penseroit à tous moyens propres pour en attrapper quelques vns. Dellors en auant Laqueximene eut l'œil iour & nuict sur Garfie Henriquez, afin de le surprendre à descouuert, & continua si soigneusement qu'un iour il sceut que Garfie estoit descendu en vne isle, pres la bouche du fleue de Bintam, pour puiser de l'eau douce avecques les basteaux, & que les deux carauellons estoient en garde. Incontinent il sort avec quelques lanchars de sa flotte, & commande à ses capitaines que si d'auenture les catauillons vouloyent s'approcher de eux, ils fissent semblant de fuir, afin de les attirer à l'embouchure, où la flotte estoit à couuert qui les enuahiroit prōptement. Eux s'auançant, & estans descouuerts en petit nōbre par les capitaines des deux carauellons, les Portugallois voguerent contre à voiles desployees, estimans en iouir cōme les autres fois. Les lanchars commencent à voltiger, comme voulans fuir, & les carauellons qui avec vn vent propre cinglent apres, se trouuerent incontinent à l'embouchure où Laqueximene les attendoit, lequel sortit soudain avec toute sa flotte, enuironna les deux carauellons, les accrocha, puis craignant que Garfie ne vinst à temps au secours & luy arrachast ceste proye des mains, il fit tirer des le commencement du combat les deux carauellons dedans le fleue, où les basteaux de Garfie qui e-

Laqueximene Amiral de Bintam conqueist deux carauellons de Garfie Henriquez, & le contrainst se retirer en Malacca.

estoyent de haut bord ne pouuoient entrer à cause des basses, & que le fleuve est reparti en plusieurs bras estroits. D'autrepart les Portugallois des deux carauellons estoient si eschauffez & attentifs au combat, qu'ils ne sentirent point qu'on les trainoit arriere du secours de leurs compagnons, pour les despescher plus aisément puis apres. Aussi cela fut executé si vilement que Garfie & Arias Conil ne peurent iamais venir à tēps. Ils voulurent, maugré leur maistre pilote, entrer dedans le fleuve: mais tout soudain ils reconurent leur folie, car en s'auançant quelque peu dauantage, il leur estoit impossible d'en sortir: & sans leur artillerie Laqueximene les eust attrappez auant qu'ils eussent peu s'elargir en mer. Quant aux deux carauellons ils furent prins, & tous ceux qui estoient dedans, apres longue resistance & grande boucherie d'ennemis, esgorgez & taillez en pieces: dont les Bintamois furent si ioyeux que le Roy en fit celebrer vne feste solennelle. Garfie se voyant desnudé de la meilleure partie de ses forces, & pensant au danger qui lui pourroit auenir, s'il seiournoit là plus lōguement, se retire en Malaca, où les affaires estoient en l'estat mentionné au chapitre precedent.

*Malaca assi-
gee par mer &
par terre, puis
deliuree.*

LE Roy de Bintam voyant que ses entreprises contre les Portugallois succedoyent si heureusement, resolut de leur courir sus par mer & par terre avec vne armee entiere, pour les ruiner du tout, s'assurant d'emporter la citadelle à ceste fois. Pourtant assembla-il vingt mil hommes, dont Laqueximene eut quatre mil pour ses vaisseaux, & seize mil pour assieger par terre Malaca, desquels estoit chef vn Portugallois renié qui se faisoit nommer Auelar. Estans arriuez pres de Malaca, Auelar print terre & fit camper ses gens, Laqueximene demeurant sur mer pour clore le port & empescher l'entree aux basteaux & victuailles. Albuquerque ne pouuoit longuement subsister à faulte de vaisseaux, n'ayant qu'environ quatre vingts Portugallois qu'il vouloit reseruer au besoin, & quelque nombre de pietons Indiens, lesquels furēt distribuez çà & là en garde, en telle sorte que parmi vne centaine de ces Indiens Albuquerque mesloit deux ou trois Portugallois pour les encourager, duire & mener à la guerre. Mais ils ne pouuoient encores fournir toutes les auenues qui auoyent besoin de soldats: tellement que vne bourgade nomme Quelin proche de Malaca demeura sans garnison, pource qu'Albuquerque se sentoit trop foible, ioint aussi qu'elle estoit close de palissades du costé par où les ennemis la pouuoient assaillir, & que les habitans faisoient le guet de nuict. Or apres qu'Auelar eut posé ses corps de garde, il enuoyoit tous les iours faire des courses pour s'eparer de Quelin, & s'attachoit ordinairement vne furieuse escarmouche, où les Portugallois se trouuoient des premiers au grand dommage des ennemis. Mais les veilles & grands traux accabloient les Portugallois desia attenez de faim, car ils n'auoyent autre chose à manger que du ris cuit à l'eau, estans presques tous malades ou blesez: tellement que c'estoit miracle qu'ils peussent si long temps porter les armes & faire teste à si grand nōbre d'ennemis, bien entretenus de toutes choses. Auelar, extremement despité contre ses gēs qui ne pouuoient venir à bout d'une poignée de soldats, delibera d'assaillir

d'assaillir de nuit ceste bourgade de Qnelin, qui estoit comme son entree pour serrer de pres Malaca, & auoit mieùx la raison de ceux de la ville. Il fauoit que les palissades estoient pourries : pourtant fit-il porter force coignes & tels autres instrumens, avec lesquels enuiron la minuit les Binta-mois mirer par terre vn pan de soixâte brasses, sans estre descouverts des sentinelles à cause de l'obscurité, iusques à ce que l'on ouist tomber ceste palissade. Incontinent les assaillans entrent, tuent les premiers récontrez, & se mettent à piller les maisons. Là dessus on donne l'alarme, ou acourut Nicolas de Sauiui de trois harquebuziers Portugallois & d'Ariás Conil, lesquels trouuerent les Indiens aux mains contre les gens d'Auelar, lesquels ils contraignirent de quitter la place & se retirer vistemēt, non pas tous, car ceux qui s'amuserent au pillage furent tuez par les places. Le iour venu Albuquerque fit rectorre la bresche, & les ennemis, qui auoyēt demeuré vn mois autōur de Malaca, entendans que le secours venoit aux Portugallois, leuerent le siege & se retirerent à Bintam, comme fit aussi Laqueximene avec toute sa flotte.

- II. MARTIN Alfonse de Soufe, qui tenoit la route de Malaca avec quelques vaisseaux, y arriua tost apres ce siege leué, trouuant la ville en grande disette : car vne poule s'y vendoit cinquante ducats, & les autres viures à l'equipolent, & sembloit qu'on eust deterré les personnes tant elles estoient descharnees & plus mortes que viues. L'arriuee de Soufe resiouit merueilleusement les Portugallois & Malacans, puis Albuquerque osta à son cousin Garfie Henriquez l'estat d'Amiral, & en pourueut Soufe, lequel lui presenta les lettres du Viceroy, donnant le gouuernement des Moluques à l'un des parens d'Albuquerque. Or pour mettre fin à la guerre & aux machinations du Roy de Bintam, Soufe eut charge d'Albuquerque d'aller avec cinq vaisseaux en la fosse de Bintam, pour n'en laisser sortir Laqueximene, & empêcher l'entree aux viures. Soufe executant sa commission demeura trois mois pres de Bintam, incommodant tout le pays de telle sorte que personne n'alloit ni venoit, & les pêcheurs n'osoient entrer en leurs barques pour pêcher. Quant à Laqueximene, iamais il n'osa venir aux mains contre Soufe, lequel perdit quelques soldats de maladie, & voyant que le trop long seiour en ce quartier ruinerait ses gens non acoustumez à l'air du pays, partit de là pour aller faire la guerre au Roy de Pam & venger les torts faits à la nation Portugalloise. Estant arriué au port il brusta force basteaux de Pam & de Iaue, tua pres de six mille Mores, & en print si grand nombre, que chaque Portugallois auoit pour le moins vne dizaine de prisonniers à sa part. Apres ceste grāde desfaite il print la route de Patane, à cause que le Roy d'icelle estoit deuenu ennemi des Portugallois, trouua quelques iones au port & y mit le feu, notamment en vn arriué nouvellement de Iaue, dans lequel estoit le Roy de Patane avec deux cēs Mores qui pour euitre l'embrasement se precipiterent en la mer, où ils furent tuez à coups de picques par les Portugallois. Ceux de la ville, spectateurs de telle tragedie, craignans en auoir bien tost leur part, abandonnerent la place, emmenans femmes, enfans, & tout ce qu'ils peurent emporter, auant que Soufe

Guerre de Martin Alfonso de Soufe contre les Rois de Bintam, de Pam & de Patane.

fust descendu en terre, lequel ne trouuant personne qui fist resistance brulla toute la ville, n'y laissant rien entier que la campagne où elle auoit esté bastie, & quelques iardins & palmiers plantez à l'entour, avec vn tel memorial du nom des Portugallois en toute la coste, que les habitans trembloient si tost qu'on leur en parloit. Tels exploits acheuez, Soufe tourna voile & reuint en Malaca, laquelle demeura paisible & en grande prosperité pour vn temps.

Nous auons dit ci dessus que Martin Correa & Sebastian de Soufe 12. partirent de Malaca pour aller es isles de Bandan, & arriuerent à Bôrinte, où ils trouuerent Martin Alfonse Melio, lequel des quatre mois auparauât estoit en guerre contre les habitans du pays, des mains desquels il se garantist vaillamment avec sept Portugallois, septante lauans & Chinois seulement. A l'arriuee de Soufe & Correa les ennemis furent contrains laisser en paix Melio, qui se resentant des maux receus de ces barbares pria Soufe de lui aider à auoir sa reuêche, mais Soufe s'excusa, disant auoir affaire ailleurs, dont s'esmut telle picque qu'ils se separerent, & Soufe se retira en vn lieu nommé Dalutatan avec Correa, puis arriuerent à Bandan. Tost apres leur arriuee suruint Gaspar Gal, enuoyé des Molucques en vne carauelle par Antoine Brittio, pour demâder à Martin Alfonse Melio quelques victuailles & autres fournitures pour les soldats de la citadelle de Ternate, qu'il faloit mettre en quelque equippage pour la guerre cõtre le Roy de Tidore. Par mesme moyë Brittio prioit Martin Alfonse de le secourir avec tous les Portugallois de Bandan, l'asseurant qu'ils auroient moyen de se faire tous riches, à cause que l'annee deuoit estre fertile & de grand rapport d'espiceries. Il l'exhortoit aussi d'oster aux marchans de Bandā les victuailles qu'ils pourroyent auoir, lui enuoyant pour cest effect copie de la commission du Roy, lequel lui ottroyoit la souueraineté de l'isle de Bandan. Sur ces entrefaites Gaspar Gal mourut, & suruint debat entre Sebastian de Soufe & Martin Alfonse Melio à qui seroit la carauelle : mais en fin Melio demeura le maistre, & la mena aux Molucques avec deux ioucs de Portugallois, ayant Martin Correa en sa compagnie. Arriuez en l'isle de Ternate ils entendirent de Brittio qu'un ieune gentilhomme Portugallois nommé George Pincte auoit charge d'aller commencer la guerre en Tidore, tandis que lui assembleroit les Rois & Seigneurs qui lui promettoyēt secours. Dautāt que Correa & Pincte estoient cousins, Pincte, qui s'estoit ia embarqué, descendit en terre pour le saluer & l'emmena quant & soy en vn autre vaisseau, ensemble Lionel de Leme qui conduisoit vn bastear & vn calaluz bié armez, pour faire courses au lōg des riuages, y ayant quarāte bōs soldats en ceste petite flotte, avec laquelle ils allerēt surgir au principal port de Tidore, & en peu de tēps firent viuemēt la guerre, pillās les viures, & prenās terre pour faire courses, d'où ils remmenoyēt force prisonniers & bestail domestique. Le Roy despitē de tant de maux, & affligē de la perte des victuailles, à cause du grand peuple qui estoit en necessitē autour de lui, s'auisa d'une ruse pour attrapper Pincte qui faisoit plus de mal que les autres. Il fit poser à couuert, sous vne fueillade d'arbres, bon nombre de barques, dans

le

*Commencement
de guerre entre
Antoine
Brittio & le
Roy de Tidore,
& le succes
d'icelle.*

le canal qui est vn peu à costé de la ville, & de nuict enuoya vne caracore ou barque en mer avec charge de se mōstrer sur le iour en la coste de Gilolo, d'où venoyent souuentefois des viures, afin que Pincte, croyant que la caracore (qui fetoit semblant d'auoir peur) voulust gaigner le canal, la poursuiuiſt, & se vinst frotter en la vase, où il demeureroit à sec, à cause de la pesanteur de son vaisseau chargé d'artillerie, & qu'alors les barques fortiroient de l'embusche & despescheroyent Pincte avec tous ses gens. Il en auint comme ce Roy l'auoit imaginé, car Pincte voyant ceste caracore, & cuidant que ce fust son gibier acoustumé, vogua incontinent apres en vn calaluz, sans auertir Lionel de Leme. Ceux de la caracore s'aignans estre estonnez, virerent la voile pour tourner & fuir, iusques à ce que Pincte fust plus pres, & lors à force de rames se retirerent au canal où estoit l'embusche & entrerent sans eschouer, ayans assez d'eau, pource qu'ils alloient à vuide : mais le calaluz qui demandoit beaucoup plus d'eau, à cause de l'artillerie qu'il portoit, s'arresta tout soudain qu'il fut entré. Alors les Tidoriens sortent de leur embusche, assaillent Pincte de tous costez à coups de fleches & de dards. Lui & les siens se defendent longuemēt, mais ils auoyent tant d'ennemis en teste, à dos & aux flancs, qu'apres auoir receu plusieurs coups ils tomberēt mi-morts en leur calaluz, au secours duquel Lionel de Leme voulut venir, mais apperceuāt que c'estoit se perdre avec ses gens s'il entroit au canal, fut contraint se retirer, ayant toutesfois oublié de canonner les barques des ennemis, lesquels eussent esté contrains quitter tout, & par ce moyen eust peu sauuer quelques Portugallois. Les Tidoriens voyans que ceux du calaluz ne faisoient aucune resistance entrerent dedans, couperent les testes aux Portugallois & à cinquāte Mores de Ternate, dōt ils firēt des trophées à leurs barques, & avec grāds signes de ioye entrerent au port de la cité, où ils furent recueillis & careſſez du Roy comme telle deliurance le meritoit.

13. ANTOINE Brittio ayant receu nouuelles de ceste desfaite, enuoya de cholere commander à Lionel de Leme de ramener la flotte en Ternate, ce qui fut fait : & si alors le secours demandé pour la guerre n'eust esté assemblé, Brittio estoit sur le point de quitter tout : mais ne pouuāt pour son honneur casser les compagnies il poursuiuir la premiere entreprise. Et tandis que Cachil d'Aroes s'embarquoit pour recommencer, fut auisē que Martin Alfonſe Melio iroit surgir avec les vaisseaux de Portugal au deſſus de la fosse de Tidore, ce qu'il executa, menant pour capitaines Lionel de Leme & Martin Correa, & partans au soir du port de Talangane arriuerēt en l'isle de Tidore, & mouillerent l'āchre pres du canal où Pincte & ses gēs auoyent esté desfaits. Or dautant qu'ils auoyent à ne bouger de là iusques à ce que Cachil d'Aroes fust arriué, Melio resolut suiuiā l'auis des capitaines & gentilshommes d'assaillir vn village de Mores, estāt à vne lieue de la flotte au long de la mer, auquel on pourroit aisément mettre le feu. Il partit enuiriō la minuiēt, afin de n'estre descouuert de la ville de Tidore, s'il passoit de iour : mais encores que ses matelots sceussent où il faloit aller, si ne peurent ils tāt faire, pource qu'ils vogueyēt contre vent, que le iour ne cō-

*Auanture de
Martin Al-
fonſe Melio
voulāt rauer
vn village de
Tidore.*

mençast à poindre estâs à l'endroit de Tidore, à raison dequoy les ennemis presumans ce que Melio vouloit faire, allerent au deuant avec quelques barques: mais apres les auoir chassés à coups de canon, il alla surgir au village, où n'y auoit que douze maisonnettes & vne mosquee, les insulaires s'estans retirez depuis le commencement de la guerre en vne haute roche, les chemins de laquelle ils auoyent si bien barrez qu'il estoit fort malaisé d'y mōter. Toutesfois Melio delibera les en desnicher, & à l'aide de Correa fit ouuir les passages, & comme il estoit sur le point d'en voir le bout, vn de ces montagnards lui tira vn tel coup d'harquebuzé dans l'espaule, qu'il en tomba esuanoui par terre, & furent contrains les autres l'emporter es vaisseaux, n'ayans rien fait en ceste course que brusler les cahuettes & la mosquee des insulaires: puis se retirerent à Ternate par le commandemēt de Brittio.

*Desfaite de
Francisque de
Soufe & de sa
compagnie pres
de Mariac
place principa-
le de Tidore.*

OR Brittio voyant que ceste guerre succedoit mal pour lui, la voulut 14.
laisser tout à fait, sans Cachil d'Aroes, qui se doutant de cela requist qu'on lui laissast continuer avec les soldats du pays, & que seulement Brittio y enuoyast vn capitaine & vingt Portugallois, & qu'il vouloit s'emparer de Mariac principale forteresse de l'isle de Tidore. Brittio lui donna Francisque de Soufe & vingt Portugallois qui s'embarquerent avec les Mandarins & l'armee de Cachil, montas en tout au nombre de quinze cens hommes. Ayans gagné terre ils prindrent le chemin de Mariac qui est comme vn chasteau basti en vne planure au faiste d'vne montagne, où les Rois de Tidore demeuroyent anciennemēt, mais depuis pour s'accommoder au peuple & à cause de la mer & du trafic ils vindrent habiter en la ville. Ce chasteau estoit remparé d'vn costé, & auoit quelques fossés de l'autre, estant assez fort pour le pays. Estans pres du lieu, Cachil posa quelques corps de garde pour empescher le secours à ceux de Mariac, & pria Soufe de demeurer coy avec ses gens à vn des costez de la montagne, tandis que lui monteroit par vn chemin couuert, & estant au dessus ses gens crieroyent, qui seroit le signal pour monter au secours. Ayant fait vne partie du chemin, aucuns de sa troupe se descourans par trop, ceux des corps de garde commencerent à crier, comme si c'eust esté quelque renfort d'ennemis. Soufe estimant que ce fust Cachil qui l'appellast, monte incontinent avec ses soldats: mais il trouua ceux du chasteau qui l'attendoyent, & qui sachans que Cachil ne pouuoit estre si tost au dessus, seruirent Soufe & ses gens de tant de cailloux & de fleches, qu'ils furent contrains descendre plus viste qu'ils n'estoyent montez, & en autre estat, a sauoir blesez pour la pluspart, nommément Soufe qui receut vn coup en la cuisse de ce mesme harquebuzier qui auoit frappé Melio. Cachil entendant ces nouuelles quitta sa premiere entreprise pour venir à l'aide, & despité de cest accident iura par ses dieux qu'il ne bougeroit delà que Mariac ne fust pris, & tout soudain escriuit à Brittio, le priant de supporter ceste auanture, & que la guerre se faisoit ainsi: qu'au reste il lui enuoyast vingt Portugallois sous la conduite de Martin Correa, lequel il'estimoit si sage & vaillant capitaine, qu'il s'asseuroit mettre fin à ceste guerre par le moyen d'icelui, & renuoya Francisque de Soufe

Soufe avec les bleffez.

15. BRITIO plus desgousté que iamais par ceste nouuelle bastonnade conclud entierement de n'enuoyer plus de Portugallois en Tidore, ains se tenir en sa citadelle avec six vingts & dix soldats lui restans, attendant le retour des iones de Malaca, & ne voulut commander à Correa d'aller au secours de Cachil, & ne l'eust enuoyé si Cachil ne fust allé en personne le demander. Alors Britio lui permit d'y aller avec vingt Portugallois, & escriuit à Lionel de Leme seiournant lors au port de Tidore, qu'il acompagnast Correa avec tant de soldats qu'il pourroit, sans desgarnir son basteau, adioustant à sa lettre que si Correa vouloit se hasarder en quelque endroit, Lionel l'auertist de la part du Roy de s'en deporter, & lui leust la lettre, s'il s'ingeroit de passer oultre, afin que les soldats ne le suiussent. Suiuât ceste charge, Leme fuiui de quinze Portugallois alla trouuer Correa, lequel voyant si bonne troupe avec ceux de Cachil les sollicita d'aller assaillir Mariac, à quoy plusieurs ne se monstrerent pas fort eschaufez : neantmoins il les esueillâ tellemēt par belles paroles qu'il fut resolu d'y aller, Correa s'assurant que Cachil lui seroit espaule, si tost que l'assaut seroit commencé. Leme entendant ceste deliberation dit à Correa la volonté de Britio, & leut ses lettres aux soldats Portugallois, qui n'oserent le suiure, excepté Iean Mendeze braue cheualier lequel offrit sa personne à Correa, & s'en alla avec. Là dessus Correa fit entendre aux troupes de Cachil qu'il ne vouloit point assaillir Mariac, puis qu'on ne lui vouloit donner secours : mais sur le soir ayant communiqué sa resolution à Iean Mendeze, & arresté ensemble que le lendemain ils assailliroient le chasteau par vn endroit assez foible : suivant cela ils partirent ensemble avec deux seruiteurs & huit Mandarins ou gentilshommes des plus hardis de toute l'armee de Cachil, qui auoyent aposté gens pour venir au secours à temps. Ayans gaigné le dessus de la montagne, ils presumerent qu'au costé qu'ils vouloyent assaillir n'y auoit gueres de gens, pource qu'au dehors tout estoit plain de buissons & brossailles, & au dedans du rempar y auoit vne façon de tour plus esleuee. Comme ils consideroyent l'endroit plus commode pour entrer, apparut sur le rempar vn Mandarin vestu d'un cazaquin d'escarlante, avec vn bonnet de mesme en teste, & vn plumail, lequel fut incontînēt abatu mort d'une harquebuzade que Iean Gomeze luitira. A ce bruit acoururēt quelques hommes en vne tourelle, d'où ils comēcerēt à ietter cailloux, descocher flesches, & espādre tāt de terre que la pouldre empeschoit les vns de voir les autres. Or dautant que ceux qui gardoyent ce costé voyoyēt si peu d'assaillās, il leur sembloit que quād mesmes on les lairoit entrer il y auroit moyē de les pousser aisément dehors, qui fut cause de leur ruine : car au lieu d'appeler leurs compagnons qui gardoyent les autres costez du chasteau ils se contentoyent de ietter cailloux, tirer flesches, & vider laterre sans dire mot, estimans chasser les Portugallois par tel moyen. Mais ceste pouldre seruoit de beaucoup à Correa, le courrant des coups, & donnant loisir à ceux de sa suite de leuer vne large piece de bois de la closture, tellement que Correa, Mendeze & les autres entrerent par là. Ceux de dedans les sentans

Prinse de Mariac par M. de Leme.

si pres cōmencerent à crier apres leurs cōpagnons & donnent l'alarme par tout le chasteau. Lionel de Leme n'estant pas si loin qu'il n'entendist les huees y acourut avec les Portugallois, & entrèrent par la petite porte de Correa avec lequel ils se joignirent, & lors commença vne terrible escarmouche: car tous les Mores de Mariac s'amassèrent à la file & combattrēt vaillāment, iusques à la venue de Cachil qui ne s'estoit gueres hasté, ne pē-
 fāt pas entrer si tost en ceste place. Les soldats estās entrez, les ennemis furēt enclos de toutes parts & mis à mort exceptez cent qui gaignerēt de viffesse le sommet de quelques arbres, d'oū Cachil les vouloit faire abatre à coups de harquebouze: mais Correa leur obtint la vie sauue, bien à contrecœur de Cachil, qui disoit la coustume inuiolable estre qu'en toutes les batailles esquelles les Rois ou leurs lieutenans se trouuoient, on faisoit mourir sans aucune remission tous les ennemis qui auoyent attendu le combat ou l'as-
 faut. En ceste prinse les assaillans ne perdirent pas vn seul des leurs, & quant aux blesez, du nombre desquels estoit Correa, ayant receu vn coup de fief-
 che en la iambe, ils guerirent tous. Quant à ceux de dedans il y eut pres de trois cens hommes tuez, qui estoient tous Mandarins & parens du Roy de Tidore pour la pluspart, car les autres habitans de Mariac s'estoyent retirez ailleurs des le commencement de la guerre, & auoyent emporté tous leurs biens, tellement qu'en ne trouua rien à butiner en ce lieu, sinon les habillemens des morts. Le feu fut mis es maisons tellement qu'il n'y demeura rien d'entier, & par la flamme, qui estoit fort grande, Brittio & ses soldats conurent que Mariac auoit esté pris. Au teste, comme Correa se reposoit reprenant ses esprits apres vn si grand trauail, il vid acourans vers lui vn Mandarin de Ternate, homme assez vieil, & vn autre plus ieune, Comite d'une barque. Ce ieune tenoit par les cheueux deux testes de Mores & fuyoit deuant l'autre qui le lui vouloit oster, & approché plus pres de Correa se plaignit à lui de ce que le vieil vouloit auoir vne de ces testes pour la planter au plus haut d'un vaisseau duquel il estoit capitaine, adioustant que ce n'estoit pas raison de le vouloir frustrer de l'honneur qu'il auoit acquis au hazard de sa vie, pour en faire part à vn Mandarin lequel n'auoit fait que dormir en son basteau, tandis que les autres estoient meslez au combat avec les ennemis. Sur cela le ieune se departit avec les deux testes, & lors Correa sceut que quiconque en ces isles peut porter à son Roy à diuerses fois sept testes d'ennemis tuez en guerre, il est fait cheualier & gentilhomme qu'ils appellent Mandarin: tellement que la noblesse croist selon le nombre des testes qu'ils emportent, estans en ceste barbarie plus supportables sans comparaison que ceux qui se dōnent ou achètent par tref-vilains & detestables moyens ce beau tiltre de noblesse.

*Continuation
 de la guerre
 des Portugais
 contre le
 Roy de Tidore
 sur lequel
 ils prirent plu-
 sieurs places*

APRES la ruine de Mariac, Cachil & Correa resolurent d'aller en-semble en l'isle de Machian, appartenāte par esgale moitié aux Rois de Tidore & de Ternate, afin de s'emparer de la part du Roy de Tidore. Estans arriuez en l'isle pres d'un village ennemi, & comme ils vouloyēt prendre terre, le Zamara ou Amiral de Ternate fit publier si haut que les villageois le pouuoient entendre, qu'en l'armee presente estoit certain nombre de

Portu-

Portugallois, gens vestus de fer, qui menoyent leus barques couuertes de testos de Mandarins Tidoriens : qu'il estoit en la liberté de ceux de Machian de prendre les armes & se venger s'ils pouuoient : mais que s'ils vouloyent rendre obeissance à Cachil Daroes regent de Ternate on ne les traiteroit pas comme ceux de Tidore. A ce cri, tous ceux du village se vindrēt rendre sur la greue, & voyans tant de testes de morts, commencerent à s'estonner, & delibererent se rēdre. ce qui fut fait le lendemain matin, chascun d'eux portant quelque chose qu'il donnoit au regent de franche volonté, non point par obligation, & apres auoir iuré fidelité entre les mains du regent se retirerent en leurs maisons, & de là en auant furent suiets du Roy de Ternate. Avec mesme ceremonie tous les autres villages appartenans au Roy de Tidore en ceste isle se rendirent à Cachil. La raison pourquoy le Zamara fit publier ce que dessus, est, que la coustume du pays porte, que quand les Insulaires veulent faire la guerre à quelques autres, afin que les assaillis ne se plaignent d'auoir esté surprins, ils les enuoyent desfier premierement, & les auertissent des gens qu'ils meinent, descriuans les armes defensiuës & offensiuës qu'ils portent : si les autres se rendēt on ne leur fait aucun desplaisir : mais s'ils font les asseurez, disans n'auoir peur & estre prests à se defendre, delà en auant ils peuuent s'entre-courir sus, & se faire la guerre par tous les moyens de finesse & de trahison dont ils se peuuent auiser, sans en encourir blafme. Quā Brittio vid le hazard de la guerre lui fauoriser, il ne parla plus de repos comme auparauant, ains donna nouuelle charge à Correa suiui de quarante Portugallois, d'aller en l'isle de Batochin, se rendre maistre d'vne forte place que le Roy de Tidore y possedoit. Cachir, le Zamaran & autres leur firent compagnie avec force gens, & arriuerent tous en Batochin pres de ceste place, qui estoit vn village de deux cēs maisons couuertes de roseaux & esleuees sur des grosses pieces de bois, tellement qu'il y falloit monter avec des eschelles, & du haut des maisons les Insulaires combatoyent à coups de pierres, de fiesches, de tifons bruslez, & de crampons de fer attachez à leurs bras qu'ils laschoyent & tiroient à plaisir, tellement que si les assaillās estoient tant soit peu mal auisez, les insulaires enleuoient en l'air vn homme avec ses crampons, puis le traitoyēt comme bon leur sembloit. Leur village estoit ceint d'vn fossē profond que la mer emplissoit quand ils vouloyēt lui donner entree : d'vn autre costē y auoit des canaux & trāchees, tellemēt que l'entree estoit fort difficile. Correa ne voyant autre passage pour y eatter avec sa barque que par dedans le fossē, se mit dedans, mais il n'auança gueres à cause des pieux fichez en terre qui bouschoyent le passage à ce grand vaisseau, lequel estant ainsi engagé fut assailli des Insulaires à coups de fiesches. Pour les attirer plus pres, Correa faignit estre surpris, au moyen dequoy ils l'environnerēt avec leurs nacelles : mais alors lui & ses gens en firent grand meurtre avec leurs harquebuzes, & contraignirent le reste de se retirer vistement. Or les Portugallois voyans qu'il n'y auoit moyen d'entrer par ce costē ni par les canaux, se hazarderent de passer par vn estang fort limonneux & plain de roseaux aigus qui blefferent Correa : neantmoins ils passerent & approchans d'vn

rempat qui estoit entre l'estang & le village, en chasserent les insulaires à coups d'harquebouses, & entrèrent finalement au village, suivis de Cachil & de ses troupes, qui du commencement ne vouloyent y entendre. Incontinent ces insulaires gaignent le haut de leurs maisons, tirent les eschelles après eux, puis combatent à leur maniere acoustumee: mais Correa & ses gens ne leur donoyent gueres de loisir, car ils haussèrent avec leurs piques des paquets de pouldre à canon sur les toits des maisons & y mirèrent le feu, lequel en moins de rien gaigna tellement d'un lieu en autre que tout le village fut embrasé. Ceux qui quittoient le haut pour se sauuer en bas estoient tuez à coups de piques & de harquebuzes, le feu brusloit les autres: neantmoins ils sauuerent la vie à deux cens prisonniers, du nombre desquels estoit le Seigneur de ce village avec toute sa famille. Cela executé, Correa & Cachil s'embarquerent & firent retraite en Ternate, où ils furent recueillis en grand honneur, & Correa fut ordonné par Brittio grand chaste-lain de la citadelle & general des vaisseaux de ceste mer des Molucques.

*Le Roy de Ti
dore demande
la paix que lui
est refusée par
Brittio.*

LA ruine du village susmentionné abatit l'orgueil du Roy de Tidore, 17.
tellement qu'il commença à se repentir de la guerre commencée contre les Portugallois, lesquels il redoutoit tellement, qu'il ne trouuoit aucune place asseuree. Pourtant enuoya il demander la paix à Brittio, offrant recompenser le Roy de Portugal de tous les dommages & interets de ceste guerre, avec restitution de l'artillerie prinse en la desfaite de George Pinçte. Brittio ne voulut rien accorder, alleguant pour réponse qu'il ne s'estoit pas encores assez vengé du Roy de Tidore. Quelques iours ensuiuans les Portugallois prindrent sur mer deux cens hommes suiets de ce Roy, lesquels Brittio fit massacrer cruellement: ce qui estonna non seulement le Roy de Tidore, ains aussi les autres Rois voisins des Molucques, qui rechercherent l'amitié de Brittio. Entre autres ne faut oublier le Roy d'une isle nommée Gramboccanore, lequel enuoya à Brittio dedans une barque douze hommes que ceux du pays appellent Ouras Soangues, c'est à dire hommes diables: pource que par art diabolique ils se rendent inuisibles, & entrent où bon leur semble, faisant une infinité de maux, tellement que chascun les craint & hait mortellement, & quand on les peut attrapper ils sont massacrez sur le champ, autrement ils eschappent. Ce Roy donnoit telles gens à Brittio pour les enuoyer faire des courtes en Tidore, & y tuer force peuple, dont Brittio se mocquoit au commencement. Mais après que ces Ourans Soangues eurent fait cinq ou six voyages en Tidore, d'où ils rapportèrent grand nombre de testes, chascun commença à s'estonner, sur tout les Tidoriens, lesquels ayans trouué moyen de surprendre la barque de ces diables, il leur leur amener un vaisseau de Ternate, & n'en trouua-on sinon onze, le douzième s'estant esuanoui, sans que depuis lon ait peu sauoir qu'il estoit deuenue, dont Brittio se gaudissoit mieux que deuant, encores que Cachil lui iurast que les Ourans se rendoyent inuisibles. Pour en faire l'espreuue, Cachil lui en bailla un auquel on ferra le col en un collier tel qu'il n'y auoit apparence de l'en tirer sans aide d'autre, & le fit garder toute la nuit: mais le matin on ne trouua que le collier, ce qui espouuanta Brit-
tio

no & tous les Portugallois. Or afin que le Roy de Tidore ne se plaignist qu'on lui faisoit la guerre par art diabolique, il defendit aux Ourans Soâgues d'y plus aller, & les renuoya en leur isle, se contentant de cōtinuer avec ses gens, qui donnoient assez d'affaires au Roy de Tidore.

18. T A N D I S que les affaires se manioient ainsi es Molucques, le Roy de Calecut ayât delibéré de courir sus aux Portugallois & ruiner leur citadelle commença à faire ses apprests, comme firent aussi les Malabares, tellement qu'ils assemblerent vne flotte de deux cens voiles en la coste de Malabar, dont vne cinquiesme partie chargee d'espiceries print la route de la Mecque, comme dit a esté ci dessus. Le general de ceste atmee s'appelloit Cutial, homme vaillant & auisé entre tous les Mores. Jean de Leme capitaine de la citadelle d'Orinus fut informé de l'embarquement de Cutial, qui se mit en mer au cōmencement de l'esté, & qu'on auoit entrepris se saisir de la citadelle s'il n'y auoit trop grād empeschemēt, dequoy Leme auertit incontinent Louys de Meneséz qui seiournoit en Cochim, le priāt d'enuoyer quelques vaisseaux pour garder la coste: ce que Louys ne daigna faire ni sortir de Cochim, sinon au mois d'Octobre, voguant au long de Goa, où il attendit le Viceroy retournant d'Ormus. Leme voyant qu'il ne se faloit pas attendre au secours de Cochim, tâcha de mettre la citadelle en estat pour se bien defendre du costé de la mer, & dressa vn boulevard de bois pour courir la porte de sa citadelle: & pour le hausser vistement pria le gouuerneur de Calecut de lui ottroyer des charpentiers, ce qui lui fut refusé. Or Leme estoit si hasté que sans contester dauantage il se mit apres ce boulevard, s'aidant des ingenieurs de la citadelle qui aprindrent la charpenterie à quelques soldats: ce qu'entendu par le gouuerneur, pour oster à Leme toute opinion de guerre, il enuoya des ouuiers, tellement que le boulevard fut incontinent acheué. Tost apres l'atmee de Cutial apparut, & vn des vaisseaux vint pres de terre, pour essayer de surprendre la citadelle: mais Leme le fit saluer d'vn tel coup de canon qu'il enfondra ce vaisseau, & de quelques volees de deux autres canons fit couler en fond d'autres vaisseaux qui s'estoyent trop auancez: ce qui fit retirer Cutial. Aptes cela, Leme enuoya faire plaintes au gouuerneur de Calecut de la peine qu'on lui auoit donnee, disant que si le Roy de Calecut vouloit la guerre il ne faloit que le dire: dequoy le gouuerneur s'excusa. Mais le Roy auerti que son entreprinse estoit descouuette, commanda à vn Naire d'aller en la citadelle & tuer Leme à quelque pris que ce fust: ce que le Naire delibera d'excuter, estans ces Naires fort prompts à tout ce que les Rois leur commandēt. Icelui donc s'aignant auoir à dire quelque chose de la part du Roy à Leme, le trouua assis en la salle basse de la citadelle avec certains gentilshommes Portugallois, & importuna tāt pour auoir permission de s'approcher, que Vâske de Leme soupçonna incontinent que ce Naire estoit venu là pour faire vn meschant coup, & le vouloit tuer: mais Jean de Leme le retint, comandāt aux archers de sa garde de l'arrester, dont le Naire se mit à tempester disant qu'il venoit en ambassade au nom du Roy. Eux lui respondent que cestoit chose controuuee & qu'on sauoit bien l'occasion de sa ve-

*Entreprise du
Roy de Cale-
cut contre les
Portugallois
& ce qui l'en
resulua.*

nue : que lui mesmes auoit bien merit  d'estre hach  en pieces sur la place, mais que pour entretenir paix on lui laissoit la vie, & fut ainsi renuoy  en Calecut. Depuis le Roy enuoya trois autres Naires qui se disoyent deputez du Roy pour negocier avecques Leme : mais ils furent empoignez & mis hors par les gardes, Leme enuoyant dire au Roy que ses ruses ne lui pourroyent nuire : que s'il vouloit la guerre il la declairast, & les Portugallois auiseroient   se bien defendre : & que sans le desir de conseruer la paix, il n'eust tant attendu   lui demander raison des outrages precedens. Encores que les affaires passassent en ceste sorte, les Portugallois & Calecutiens ne laissoient de trafiquer ensemble, ni mesmes les Naires de la douanne ne cessoient de seruir leur quartier : & quant au peuple de Calecut il ne demandoit autre chose que paix & repos. Seulement les Mores troubloyent tout, pour la haine qu'ils portoyent aux Portugallois, & enflammoient le Roy de Calecut   faire la guerre. Au mesme temps ils tuerent Gonfalue Tauares & deux autres que Jean de Leme enuoyoit vers le gouverneur de la ville pour traiter de quelque affaire. Ce gouverneur ne donna aucunement ordre   ceste confusion, encores que Leme enuoyast gens se plaindre del'insolence des Mores. Les gentilshommes, le facteur, le chasteelain de la citadelle & autres voyans ces outrages, & que depuis deux mois auparavant les Mores auoyent saccag  douze Portugallois en vn lieu dependant de Calecut, nomm  Parangale, conseillerent Leme de commencer la guerre   descouuert   celui qui la lui faisoit par dessous terre, disans qu'on ne scauroit l'endommager dauantage qu'en massacrant ainsi ses soldats les vns apres les autres, & qu'en plaine guerre on n'en pourroit faire mourir dauantage : & qu'il n'estoit besoin d'attendre plus grandes occasions que les presentes. Encores que Jean de Leme eust assez de courage pour leuer les armes, toutesfois il ne vouloit pas rompre la paix, & desiroit euit  le siege de la citadelle, suiuant ce qui lui estoit command , tellement qu'  cause de sa charge il auoit toutes ces fascheries. Or le gouverneur & le Catoual de Calecut sachans par le rapport des Naires de la douanne ce que les gentilshommes conseilloyent   Leme, craignans qu'il ne commen ast   cause de quoy tout le pays souffriroit beaucoup, estant ce capitaine estim  vn des plus valeureux de son temps, allerent le visiter pour l'entretenir de belles paroles : & en leut pourparler, Leme ayant commenc    se coudouloir des affaires passees, & eux s'excusans, furent tirez par certains homes de leur part quelques harquebuzades, dont personne ne fut bless  : mais le gouverneur & le Catoual en receurent toute la honte & commencer nt   crier & menasser ces tireurs de faire chastier les coupables, renuoy rent toute leur suite en la ville, & demurerent seuls avec Leme, auquel ils firent de grandes plaintes du pass , promettans y remedier   son contentement, ce qu'il creut. Mais c'estoyent saintes seulement, comme il apparut deux iours apres : car quelques Mores allans   Coulete s'efforcerent de rauir & emmener avec eux des femmes Chrestiennes qui demouroient   Calecut. Elles ne voul s suivre ces barbares, commencerent   crier les Portugallois   leur aide, & fut le bruit si grand qu'il paruint aux oreilles de Jean de Leme,

me, lequel enuoya prier les Mores de ne cōtraindre ces femmes, puis qu'elles estoient Chrestiennes. Iceux continuans en leur mauuaise volonté, Leme en enuoya faire plainte au gouuerneur & au Catoual qui ne se trouuerent point : au moyen dequoy Leme donna charge à aucuns soldats Portugallois d'aller deliurer ces femmes, ce qu'ils firent. Là dessus s'esleua vn bruit par la ville, que les Mores & Naires s'ceurent bien allumer, & pource qu'ils en vouloyent à la citadelle, incontinent ils s'amassent de diuers endroits iusques au nombre de trois cens, harquebuziers pour la pluspart, & s'acheminent de ce costé. Pource qu'ils estoient si peu Leme enuoya au deuant Manuel de Far & vingt cinq harquebuziers : mais les trois cens furent incontinent suiuis de tout le peuple en armes, & avec vn bruit rel que lon peut penser se mettent à courir vers la porte de la citadelle pour s'en emparer. Leme se doutant de leur dessein sort dehors avec bon nombre de soldats pour recueillir Manuel, & fit lascher quelques harquebuzades en l'air, ne voulant offenser personne, tant il aimoit la paix, & desirant aussi estonner les ennemis pour donner moyen à Manuel de se retirer sauf, comme il fit. D'autre part Leme fit vne protestation solennelle deuant vn notaire public, qu'il n'auoit fait tirer ces coups de harquebuzes, sinon pour se defendre, & ne pretendoit nullement enfreindre le traité de paix. Cela fait il se retira dedans la citadelle, mais les assaillans retournerent & se rendirēt tout aupres : ce que lui voyant sortit avec cent soldats, dont Aluarez de Cugne, qui marchoit le premier, conduisoit la moitié, & Leme l'autre. Ils chargerent les ennemis, en blesserent & tuerent quelques vns, puis reuindrent en la citadelle, contre laquelle ceux de dehors ne cesserent de tirer fleches & harquebuzades tout le long du iour. Le lendemain ils se tindrent cois, sans monstrier aucun semblant de guerre. Sur ce vn Naire nommé Punache, cousin du Roy de Calecut, & pensionnaire de celui de Portugal pour maintenir le parti des Portugallois, ausquels il portoit grande amitié, ayant quelque loisir de communiquer avecques Leme s'approcha de la citadelle, & avec vn visage fort abatu pria Leme de ne se fier au Roy de Calecut, pource qu'il estoit entierement resolu de poursuiure les Portugallois à toute ouurance : ce qu'il auoit bien voulu lui faire entendre, estant obligé de procurer le bien du Roy de Portugal. Ce Naire & les autres qui seruoient à la douanne s'en retournerent pleurans à chaudes larmes, apres s'estre iettez à genoux & demandé pardon à Leme de ce qu'ils ne pouuoient lui faire seruiue en ceste guerre, laquelle commença quelque temps apres. Or Leme n'estoit pas en trop grand peine de cela, car l'esté approchoit, au moyē dequoy il s'asseuroit de la venue d'un nouueau Viceroy qui lui donneroit secours. Pourtant il n'auertit de rien Louys de Meneses qui seiournoit d'ordinaire en Cochim. Au reste, d'autant que les ennemis se logeoient entre certaines parois proches de la citadelle, Leme fit quelques sorties à leur desauantage, & vne fois mit le feu en la ville, bruslāt vn rang de maisons : surquoy les ennemis attacherēt vne furieuse escarmouche, en laquelle ils perdirent beaucoup de gens, au cōtraire Leme & les siens se retirerent entiers dedans leur forteresse.

*Differēs entre
le Roy Jean
troisieme &
l'Empereur
Charles cin-
quiesme sur la
conqueste des
Molucques.*

NOUS auōs veu au liure precedēt vn ample discours sur la nauigation 19.
de Magellan, & le retour de Iean Sebastian avec la nauire renommee, &
meritant plus que nulle autre le nom de Victoire, en Espagne au mois de
Septembre, l'an mil cinq cens vingtdeux. L'Empereur receut vn merueil-
leux contentement au recit de ceste nauigation, entendant qu'on pouuoit
aller aux Molucques par ses pays mesmes, & de cē qu'on lui rapporta que
quelques Rois & seigneurs de ces Isles s'estoyent rendus ses tributaires. Il
remercia & recompensa de grands biens Iean Sebastian pour les bonnes
nouuelles qu'il rapportoit. Cela fut incontinent publié par tout, & le diffé-
rent autresfois esmeu, pour le partage que le Pape auoit fait du nouveau
monde, se renouella entre les Portugallois & Espagnols, par les rapports
de Iēa Sebastian qui soustenoit que les Portugallois n'estoyēt point enco-
res entrez aux Molucques. Ceux du conseil des Indes conseillerent l'Empe-
reur de faire continuer la nauigation & trafic de l'espicerie, puis que cela es-
toit sien, & qu'il auoit passage par ses Indes Occidentales, remonstrans que
ce seroit vn moyen de receuoir de grands deniers, & s'asseurer d'un reuenue
inestimable: qu'avec cela ses royaumes & suiets s'enrichissoient sans faire
grande despense. L'Empereur suiuant ce conseil commanda que lon con-
tinuast ce trafic, ce qu'entendu par le Roy de Portugal, & considerant les
maux qui en pouuoient auenir d'une patt & d'autre, pria l'Empereur de
n'enuoyer aucune flotte aux Molucques, que premiere mēt on n'eust dispu-
té du partage & veu à qui elles appartenoyent, autrement ce seroit donner
occasiō aux Espagnols & Portugallois de s'entretuer, quād ils se retrouue-
royēt en ces isles. Apres quelques alleees & venues ils accorderēt que ce dif-
ferent seroit verifié par gens entendus en la Geographie & par pilotes ex-
perts, promettans & iurans auoir pour agreable ce que ceux là en resoul-
droient ensemble. Les deleguez de l'Empereur & du Roy de Portugal se
trouuerent a Vadajoz & Elbes, villes prochaines & sur les frontieres des
1524. deux royaumes, au commencement de l'an mil cinq cens vingtquatre, &
apres auoir perdu du tēps à des ceremonies, pour sauoir où se feroit la pre-
miere entreueüe, & qui parleroit le premier, finalement ils accorderent de
se voir & saluer à Caya, qui est vn ruisseau seruant de borne aux royaumes
de Castille & de Portugal, au milieu du chemin de Vadajoz à Elbes. En a-
pres ils s'assembloyent vn iour à Vadajoz, l'autre à Elbes. Ils furent plusieurs
iours à examiner les globes, chartes marines, & rapports des pilotes: puis
entrerent en dispute du partage, des degrez de lōgitude & latitude, des pre-
miers descouureurs & navigateurs aux Molucques, chascun voulāt faire sa
cause bōne, & dōt leurs historiens ne s'accordēt nullement, cōme il en ap-
pert de ce qu'Oforius en a discours ci deuant, & de ce que Gomara Espagnol
en escrit au troisieme liure de son histoire generale des Indes Occidenta-
les. Ils furent aussi enuiron deux mois sans vouloir rien resouldre: & finale-
ment les deputez Espagnols marquerent la ligne du partage entre les deux
Rois, par le milieu du globe à 1480. mil de sainct Antoine qui est l'isle la
plus occidentale de celles du Cap verd, suiuant la capitulation faite (come
ils disent) entre les Rois d'Espagne & de Portugal: & là dessus pronon-
cerent

cerent sur le bord de Caya leur sentence au proufit de l'Empereur, laquelle ne fut aprouuee des Portugallois, & ainsi se departirent sans auoir rien conclud. Il auint lors vn cas pour rire, & neantmoins qui vaut la peine d'en toucher quelque mot. Comme les deputez de Portugal venoyent à l'assemblée ordinaire & passoyent vn ruisseau nommé Guadiana, vn petit enfant, gardant du linge que sa mere auoit laué & là estendu pour secher, leur demanda si c'estoyent eux qui deuoyent venir pour partager le monde avec l'Empereur. Ayans respondu qu'ouy, l'enfant leua sa chemise, & leur monstra son derriere, disant tout haut, marquez la ligne par le milieu de ce pertuis. Ce trait de risée vola incontinent par tout, dont les vns rioyēt, les autres estimoyent l'enfant auoir esté aposté par quelque particulier pour se mocquer des Portugallois, ou plustost des Espagnols & Portugallois ensemble. Quant à la capitulation sur laquelle les deputez Espagnols fonderent leur sentence pour adiuger les Molucques à l'Empereur, voici ce que Gomara en dit au liure susmentionné. Les Espagnols & Portugallois auoyēt fort contesté ensemble pour la mine d'or descouuerte en Guinee l'an mil quatre cens septante deux, du temps qu'Alfonse cinquiésime estoit Roy de Portugal. Ce trafic estoit d'un merueilleux proufit, d'autant que les Negres pour choses de petite valeur bailloyent de l'or à poignées. Il y auoit encor cela, qu'Alfonse pretendoit le royaume de Portugal estre sien à cause de sa femme nommée Ieāne. Mais ces querelles prindrent fin par la bataille que gaigna Fernand Roy de Castille contre Alfonso à Temulos pres la ville de Toro. Et quant à la mine de Guinee il la quitta, aimant mieux guerroyer les Mores de Grenade que trafiquer avec les Negres. Ainsi le Roy de Portugal demeura seigneur de ceste mine, & de tout ce qu'il pourroit conquerir en l'Afrique: ce qui estoit raisonnable, attendu que le commencement de ces conquestes vint de Henri Prince de Portugal. Le Pape Alexandre sixiésime ayant entendu le descouurement du nouveau monde fait par ces deux Rois, & les debats suruenus entre eux à qui en seroit le maistre, de son propre mouuement & de sa pure volonté (fondée sur le pouuoir que lui & ses predecesseurs se sont attribué sur tous les royaumes & pays du monde) donna aux Rois de Castille les Indes, & aux Rois de Portugal toute la coste d'Afrique, à la charge de conuertir les pauvres barbares à la religion Romaine. Et afin que l'un n'entreprinst riē sur l'autre, il fit tirer sur le globe vne ligne tombant de Septentrion au Midi, qui passeroit vers l'Occident plus de 400. mil loin de l'une des isles de Cap verd, afin qu'elle ne touchast point sur l'Afrique qui appartenoit au Roy de Portugal. Ceste ligne tranchoit en deux tout le mode, & seruoit de borne aux cōquestes de ces deux Rois, la partie Orientale appartenāt aux Portugallois, l'Occidentale aux Espagnols. Le Roy Ieā secōd ayant leu la bulle & donation d'Alexandre, qui auoit ainsi fait ce partage à la requeste des ambassadeurs de Portugal, commença à se plaindre du Roy d'Espagne qui lui coupoit partel moyē le chemin à ses conquestes & richesses. Il appella donc de ceste bulle, demandant qu'outre les 400 mil, la ligne fust mise plus vers l'Occident à 1200. mil, & aussi tost despescha des vaisseaux avec pilotes & geographes des plus

experts, pour costoyer toute l'Afrique, s'il estoit possible. Le Roy d'Espagne voulant viure en paix entendit à appointement: de sorte qu'ils enuoyerent à leurs ambassadeurs amples memoires pour en dresser vn nouuel accord deuant le Pape, consentant celui d'Espagne, qu'outre les 400. mil la ligne seroit mise plus vers Occident à 1080.mil. Ce qui fut confirmé depuis en la ville de Tordefillas le septiesme iour de Iuin, l'an mil quatre cens nonante quatre. Nos Rois (dit Gomara) pensans perdre du pays par l'ottroy qu'ils auoyent fait de ces 1080.mil, gaignerent au contraire les Molucques & plusieurs autres isles tres-riches, & le Roy de Portugal par sa demande se trompa, ou fut deceu par les siens mesmes, qui ne sauoient pas bien encores où estoient situees ces isles. Mais Oforius est de tout autre auis, comme il appert de ce qu'il en discourt ci deuant, page 432. de quoy ie ne veux faire aucune conclusion, laissant en la liberte du lecteur de considerer les globes & chartes, puis prendre le compas, & en estimer puis apres ce qu'il verra plus approcher de la verité. Tant y a que les Espagnols & Portugallois continuerent leurs nauigations aux Molucques, avec les accidés & issues que nous verrons ci apres.

*Vasque de
Gama est le
Viceroy des
Indes: sa na-
uigation son
arriuee en Co-
chim, & l'or-
dre qu'il donna
aux affaires.*

Pour reprendre le propos du gouuernement des Indes Orientales, le 20. Roy lean troisieme desirant rappeler en Portugal Edouard de Menesez, enuoya pour Viceroy Vasque de Gama Conte de Vidgueire & grand Amiral de la mer Indienne, avec vne flotie de quatorze voiles, a sauoir sept nauires, quatre carauelles & trois gallions. Pour adioints il auoit Henri de Menesez ordonné gouuerneur d'Ormuz, & Viceroy, cas auenant que Gama mourut durant le temps de sa charge: Pierre Mascaregne gouuerneur de Malaca, nommé successeur de Menesez: Lopez de Sampajo gouuerneur de Cochim & le troisieme en nominatiō pour la charge de Viceroy. François de Sa, Francisque Brittio, Antoine de Sylueire, George de Menesez, Fernand Monroy & Alphonse Messie y estoient aussi avec charge, ensemble Gaspar Maillorquin, Christofle Rosade & Roderic Gonçalue: tous ces capitaines fuiuis de bons soldats bien equippez, les vaisseaux bien armez & fournis de toutes choses necessaires. Ils s'embarquerēt le neuuiesme iour d'Auril l'an mil cinq cens vingt quatre, & eurent vne nauigation fascheuse & perilleuse, car Frâcisque Brittio, Gaspar Maillorquin & Christofle Rosade se perdirent avec vne nauire & deux carauelles, tellement que depuis ils ne furēt veus. Le gallion de Fernand Monroy fit naufrage pres de Melinde: & quant aux autres vaisseaux, ils perdirent beaucoup de gens par diuerses maladies, & n'allerent iamais de mesme vêt, ains tous l'un d'un costé, l'autre de l'autre. Estans arriuez à Mozambique ils partirent incōtinent pour gaigner l'Inde basse, & approchans de la coste le lixieme de Septembre furent battus d'une furieuse tourmente & sur le point de se perdre tous, mais il en eschapperent finalement. Peu de iours apres ils descouurirēt vne nef de Mores faisant voile d'Aden en Inde, lesquels furent arrestez par le gallion de George de Menesez, & trouua-on en leur nef soixânte mille ducats en deniers & deux cens mil en marchandise, dont le Viceroy se saisit, puis tost apres alla surgir au haure de Chaul, où il declaira sa commission, comme

comme le Roy lui auoit commandé, & fut là trois iours à l'anchre sans descendre en terre, ni perimetre qu'aucun y descendiſt, fors Iean de Soire auditeur general des Indes & Sebastian Louys ſecretaire de Cochim, auxquels le Viceroy commanda d'aller viſiter en ſon nom la fortereſſe de Chaul, & faire publier que tous ſes ſoldats non mariez ni de la garde du lieu euſſent à s'embarquer promptement & ſuiure le nouueau Viceroy à peine de perdre leurs gages, & eſtre priuez de viures. Il commanda auſſi à Chriſtoſle de Souſe capitaine de la citadelle, que ſi Edouard de Menefez parti d'Ormus arriuoit en ce port il ne lui laiſſaſt prendre terre & ne lui fourniſt viures pour plus de quatre iours : ce qui fut executé de point en point. Et comme il ne vouloit permettre à aucun de deſcendre en terre, auſſi defendit il d'y enuoyer ſorte aucune de marchandiſe, dont pluſieurs furēt endomagez ayans commodité de vendre & gagner en ce lieu. Auſſi refuſa il aux malades de ſa flotte le congé qu'ils lui demandoient d'aller en terre ferme pour ſe reſaire en changeant d'air, quelque inſtance qu'ils en fiſſent, ains print la route de Goa. Et pource qu'il lui eſtoit neceſſaire d'aller voir la ville & donner ordre à quelques affaires concernans le ſeruice du Roy, puis aller auſſi en Cochim, il laiſſa pour lieutenant en la flotte George de Menefez. On le receut en Goa avec les ceremonies acouſtumees, & lors pluſieurs ſe plainquirent de Francisque Pereire capitaine de la citadelle, l'accuſans de diuers outrages faits à la pluſpart des citadins, & des grandes debtes qu'il ne vouloit payer. A l'occaſion de telles charges le Viceroy le degrada de ſon eſtat, & le bailla à Henri de Menefez, diſant cela eſtre expedient pour le bien du pays, encores que Menefez fuſt deſigné gouuerneur d'Ormus. Dauantage il fit emprisonner Pereire pour le chaſtier ſelon ſes demerites, & le contraignoit de payer ſes debtes au ſerment des creanciers, ſans autre preuue. Pereire voyant ſa ruine, & que pluſieurs demandoient plus qu'il ne leur eſtoit deu, fit porter tout ſon argent en la maiſon du Viceroy, le ſuppliant de ne faire iurer perſonne ſi Pereire lui deuoit ou non, mais de faire publier à ſon de trompe que qui pretendroit toucher deniers de Pereire les allaſt demander au Viceroy qui les feroit deliurer. Par ce moyen Pereire s'acquitta de ſes debtes par la prudence du Viceroy qui tint la main à ce que chaſcun euſt ſon droit & non plus. Il fit d'autres bonnes ordonnances pour entretenir ſon armee en bon ordre & en paix, pouruoyant à beaucoup de confuſions qui auoyent eneruē la diſcipline militaire par la licence de ſes deuanciers. Durant ſon ſejour en Goa, il deuint malade & continua la maladie iuſques à ſa mort : ce pendant il donna ordre à diuers affaires pour l'entretenement de l'armee, puis arriua en Cochim ſur la fin d'Octobre, où il rangea auſſi toutes choſes à point, mais vn peu trop exactement au gré de pluſieurs, nommément des Indiens, dont la pluſpart quitterent le parti de Portugal & ſerangerent à celui de Calecut, encore que tous tremblaſſent au bruit de la venue de Gama qui les auoit maniez viuement, comme nous l'auons veu es premiers liures de ceſte hiſtoire. Lui voyant de quelle conſequence ces reuoltes eſtoient, afin d'obuier au mal auenir deſpeſcha Ieroſme de Souſe avec trois cens Portugallois pour garder la coſte de Calecut,

& fauoriser par tous moyens ceux de la citadelle. Souſe eſtant au deſſous de Calecut trouua pres du canal quarante barques ſous la charge d'un capitaine More nommé Cutial de Capocate, lequel pilloit les viures qu'on menoit par mer en la citadelle. Incontinent Souſe les aborde & commence à les ſaluer de force canonnades : les Mores reſpondirent de meſmes, & dura ceſte eſcarmouche l'eſpace de deux heures iuſques à la nuit, ſans que les vns euſſent grand auantage ſur les autres. Le lendemain dès le point du iour ils recommencerent, mais finalement les Mores furent mis en route & pourſuiuis iuſques en Cananor, où la pluſpart furent tuez & perirent en la mer avec bon nombre de leurs barques : puis Souſe ſe retira en la coſte viſitant par fois la citadelle de Calecut & la fourniffant de victuailles.

*Deux grandes
victoires obte-
nues par Geo-
rge Tellio ſur
les Calecutiens.*

Or pource que les Calecutiens faiſoyent leurs triumphes ſur mer en ce 21. tēps là, tant ils tenoyent peu de côte des Portugallois, ils ne ſe contentoyēt pas de mener le poiure en Arabie, ains auſſi le transportoyent au royaume de Cambaje, & tous les iours paſſoyent par brauade vis à vis de Goa, ſans que perſonne leur contredift, à cauſe que Louys Machiade, commis pour la garde de ceſte coſte, eſtoit allé avec le Viceroy & pat ſon commandement iuſques en Cochim. Henri de Menefez faſché iuſques au bout de l'inſolence de ces Malabares acheta vne fuſte d'un marchand nouuellement arriué en l'ile de Goa, la fit equipper & fournir d'artillerie de viutes & de gens, ſous la charge de George Tellio ſon neueu, vaillant capitaine entre tous ceux de ſon temps, auquel il commanda d'aller deſcouurir le nombre des barques portans le poiure de Calecut à Cambaje. Tellio qui ne demandoit que guerte, ne ſe contente pas de deſcouurir de loin, ains approche & canonne tellement les barques, qu'il en met les vnes à fond, rompt l'equipage des autres, tue grand nombre de gens, ſe retirant à l'aiſe à cauſe de la viſteſſe de ſa fuſte. Sur ces entrefaites les Mores de Calecut ayant entendu le bruit de ces courſes de George Tellio delibererent l'attrapper, armans pour ceſt effect trente barques chargees de poyure & de ſoldats, deſquels eſtoit chef vn More nommé China Cutial. En ce tēps, Tellio auoit deux fuſtes & trois brigatins, chargez de ſoixante hommes de guerre, harquebuziers pour la pluſpart. En ceſt equippage il donne bataille à Cutial, le deſfait, cōqueſte ſept barques chargees de poyure & d'artillerie, avec deux autres qui demeurerēt arreſtees en la coſte: le reſte gaigna le haut, ſans que Tellio euſt perdu vn ſeul homme. Avec ce butin Tellio fit voile en Goa, d'où apres s'eſtre d'eſchargé il remōta ſur mer en ſa fuſte, & au bout de quelques iours trouua vne nef de Calecut acompagnée de neuf barques bien munies d'artillerie & de gens. Ce nouobſtant Tellio les aſſaillit de telle vigueur qu'il eſcarta ceſte flotte, apres auoir tué la pluſpart des Mores, conquist trois barques pres du riuage, & incontinent ſe ſaiſit de la nef meſme, puis la mena avec les barques en Goa, où il fut recueilli comme ſa vaillance le meritoit, ayant obtenu deux ſi belles victoires ſur les Malabares, qui de là en auant redouterēt les Portugallois plus que de couſtume, & ne furent pas ſi eſtourdis que par le paſſé.

*Arrivée d'E-
douard de*

COMME Vaſque de Gama ſe preparoit pour aller en Calecut, ſa mala- 22.
die

Menefez en Cochim, où il se demet de sa charge, suiuit la reueur des lettres du Roy: & l'af- que de Gama meurt.

die acrut tellement qu'il lui fut impossible de vacquer aux affaires, desquel- les il remit la charge durant ceste difficulté à Lopez de Sampajo capitaine de Cochim, lequel tint la main fort soigneusement à ce que toutes choses demeurassent paisibles durant ceste maladie. Surce, Edouard de Menefez partit d'Ormus, & sans aucune rencôtre vint surgir au port de Chaul: mais il fut empesché par Christofle de Soufe, capitaine de la citadelle, de mettre pied à terre, suiuant la charge que Gama lui auoit donnee. Autant lui en fit Henri de Menefez en Goa, tellement qu'Edouard fut contraint suiure la route d'une traite iusques au port de Cochim. Gama entendât ceste arriuee, enuoya incontinent Lopez de Sampajo vers Edouard lui monstrier les lettres & la charge de Viceroy, & porter celles que le Roy Iean lui escriuoit. Par les lettres d'estat de Gama il estoit commandé à Menefez qu'apres icelles veues il eust à se desmettre de sa charge es mains de Vasque de Gama establi en son lieu, sans faire de là en auant aucun acte de Viceroy, ordonnant à tous Portugallois d'obeir à Gama en ceste qualité, & que toutes les places, armes, munitions de guerre & finances lui fussent consignees, pour en disposer au bien des affaires du Roy. Les lettres adresses à Menefez estoient de mesme substance, soussignées toutes deux de la main du Roy & de son premier secretaire, au mois de Feurier l'an mil cinq cens vingt quatre. Menefez ayant leu ces deux lettres, Lopez lui defendit de la part du Viceroy de mettre pied à terre, dôt Menefez fût si despité, qu'il reprocha à Lopez l'honneur qu'il auoit receu de son pere, & qu'il ne deuoit lui estre aduerfaire, ni s'opposer à ses desseins comme il faisoit en entreprenant telle commission. Lopez s'excusa, disant ne faire rien contre Menefez, ni outre son deuoir, puis que c'estoit pour le seruice du Roy de Portugal, de qui tous deux estoient suiets. Au reste, Menefez ne renonça pas du premier coup au gouvernement des Indes: car sachant que le Viceroy estoit malade, en cas qu'icelui mourust il pensoit demeurer encores en charge. Pourtant ses responses estoient couuertes & ambigues: mais l'Auditeur general, suiuant le deu de sa charge, apres quelques contestations & responses picquantes de part & d'autre, le contraignit de quitter l'estat à Vasque de Gama es mains de Lopez & de l'Auditeur, qui lui en bailla acte public le quatriesme iour de Decembre, en presce de plusieurs capitaines. Apres que cest acte eust esté deliuré à Edouard, Lopez se retira dedans Cochim, ou Louys de Menefez alla aussi sous couleur de donner ordre à ce qui estoit requis pour le voyage de son frere: mais à la verité c'estoit pour remettre le gouvernement des Indes es mains de son frere, si Gama mouroit, comme il y auoit apparence qu'il ne pouuoit plus guerres viute. Lopez ayant oui quelque vent de ceste deliberation, & pensant aux dangers qui s'en pourroyent ensuiure, alla trouuer Louys de Menefez, & en presence de l'Auditeur general & du superintendant des finances le pria doucement de s'embarquer au plustost pour le bien des affaires du Roy. Et pource que Louys refusoit, il lui commada de la part du Roy de Portugal de sortir promptement, & remonter en son vaisseau, autrement il le chasseroit par force: ce qui fut dit en telle autorité que Louys s'embarqua tout à l'heure, & par ce moyen s'appaiserent tous les

bruits qui commençoient delà à s'esmouvoir. Le Viceroy sachant telles menées, & sentant croistre son mal, pour ne laisser apres sa mort aucune occasion de debat, fit venir en sa chambre tous les capitaines & gentilshommes, les priant d'obeir à Lopez de Sampajo, iusques à ce qu'on auroit ouuert les lettres de la succession, pour sauoir quel Seigneur ou capitaine le Roy auoit designé pour succeder & estre Viceroy apres le trespas de Gama. Tous lui promirét faire ce qu'il requeroit, & lors Gama se despouillant de toutes pensées mondaines, apres auoir pourueu à sa conscience avec les ceremonies acoustumées, mourut le vingtquatriesme iour de Decembre, l'an mil cinq cens vingt quatre, & fut enterré avec beaucoup d'honneurs au grand temple de Cochim. Les notables exploits de ce Seigneur, amplement descrits au premier & au second liure, sont bons tesmoins de sa sagesse & vaillance, & recômandent son nom, pour auoir esté le premier qui a ouuert le chemin des Indes Orientales par le cap de bonne esperance.

* *

FIN DV QUATORZIESME LIVRE.





LE QUINZIESME LIVRE.

SOMMAIRE.

1. *Henri de Menefez, déclaré Viceroy apres la mort de Vasque de Gama.*
2. *Ordre donné aux affaires par Menefez, ayant receu nouvelles de la charge qui luy estoit commise.*
3. *Combat de Menefez, contre une flotte de Calicut, & l'exécution à mort de Mantez, en la citadelle de Cananor.*
4. *Exploits de guerre d'Heitor de Sylvaire cõtre les Calicutiens.*
5. *Negotiation de Paix entre le Roy de Calicut & Jean de Leme capitaine de la citadelle.*
6. *Rõponse du Viceroy à la paix que demandoit le Roy de Calicut.*
7. *Ce que le Viceroy fit en Panane au preindice du Roy de Calicut.*
8. *Entreprises des Portugallois contre la ville de Calicut.*
9. *Nauigation des Portugallois au port de Coulece.*
10. *Quel devoit le Viceroy & ses capitaines fõre pour s'emparer de Coulece.*
11. *Bataille par mer & par terre pres de Coulece, & l'issue d'icelle.*
12. *Pour parler entre le Viceroy & le Roy de Cananor: & la rõponse aux lettres du Roy d'Ormu & de Raux Xerãf.*
13. *Combat de Fernand de Leme à l'embouchure du fleuve de Mangalar: & nauigation de Pierre Mascaregne en Malaca.*
14. *Rencontre sur mer entre Simon de Mansfẽz & fauxz barques de Malabares: & ce qui en suivit.*
15. *Bataille navale des Portugallois cõtre les Turcs, & le succes d'icelle.*
16. *Vilõne notable des Portugallois en l'isle de Zeilan.*
17. *Morts desfaits par Antoine de Miranda au cap de Guardafu.*
18. *Ce qui auas à Martin Alfonso Melõ & à Garsie Hinziquez, en l'isle de Bandan.*
19. *Martin Alfonso de Sousa desfait avec sa flotte par Laqueximene Amiral de Bintam.*
20. *Revrãte des Portugallois en Malaca apres leur desfate.*
21. *Exploits de Laqueximene apres sa vilõne.*
22. *Laqueximene & le Roy de Draguan desfaits par la flotte de Portugal venue au secours du Roy de Lingua.*
23. *Recommencement de guerre du Roy de Bintam contre Malaca, & quel en fut le succes.*
24. *Pierre Mascaregne establi gouverneur en Malaca, & ses premiers exploits.*
25. *Arrivee de Garsie Henriquez, aux Malucques, & ce qu'il y fit.*

1.



N iour apres l'enterrement de Vasque de Gama, Lopez de Sampajo, le superintendant des finances, l'auditeur general, tous les gẽtilshommes, capitaines & autres personnes de marque s'assemblerẽt au grand temple de Cochim, pour voir ouurir les lettres du Roy touchant la premiere succession. L'auditeur presenta deuant tous vn paquet clos & seellẽ de cinq seaux, sur lequel ces mots estoient escripts, Que les presentes soyent ouvertes incontinent, au cas que Vasque de Gamagrand Amiral & nostre lieutenant es Indes aille de vie à trespas, ce que Dieu ne vueille. Le dedans de ces lettres fut leu tout haut, & cõtenoit ce qui s'ensuit. Nous Jean Roy de Portugal, faisons sauoir à tous nos capitaines de nauires & forteresses es Indes, & aux capitaines de

Henri de Menefez déclaré Viceroy apres la mort de Vasque de Gama.

tous vaisseaux partans de ce royaume ou y retournans chargez, aux gentilshommes, cheualiers, soldats appointez de par nous es Indes, & à tous autres nos officiers & suiets qui ces presentes lettres verront, que pour la fiance que nous auons en Henri de Menesez gentilhomme de nostre maison, qu'il saura nous bien seruir & rendre bon compte de ses actiōs en tout ce à quoy nous plaira l'employer, voulōs & nous plaît, casauenāt que Vasque de Gama Côte de Vidigueire, grād Amiral de la mer Indique, & nostre lieutenant es Indes, aille de vie à trespas, que ledit Héri lui succede en sa lieutenāce & charge de Viceroy, iouissant de la mesme autorité que nous auōs donnée à son predecesseur. Pourtant nous vous faisons sauoir ceci, vous commandons à tous en general & à chascun en particulier, qu'en ce cas vous l'acceptiez pour vostre general & gouuerneur en tous ces quartiers, lui obeissans, executans ses auis & commādemens, comme d'un Viceroy, & selon qu'estes obligez de faire à l'endroit de nostre capitaine & lieutenant general, & qu'en toutes choses vous le laissiez vsr de mesme autorité & pouuoir que nous auons donnez au Viceroy Gama par nos lettres patentes, sans rien reuoyer en doute ni dispute. Car tel est nostre plaisir: & si vous faites ainsi, comme nous l'esperons, vous ferez vostre deuoir, comme aussi vous y estes obligez, & le tiendrons pour vn des plus grands seruices que nous scauriez faire. Doné à Euora le dixiesme iour de Feurier mil cinq cens vingt quatre. Ces lettres estoient signees du Roy & d'un de ses secretaires. Tous ceux qui se trouuerent à la lecture d'icelles accepterent Henri de Menesez pour Viceroy, & en attendant sa venue, suiuant la requeste de Gama obeirēt à Lopez de Sampajo, lequel enuoya vne galere, deux fustes & deux brigantins pour amener Menesez qui estoit en Goa. Lopez demeura en Cochim pour faire equipper la flotte qui deuoit faire voile en Portugal. Il estoit empestre en beaucoup d'autres difficultez pour tenir Cochim en paix, car il y auoit lors en la ville plus de quatre mil Portugallois, qui n'estoyēt de guerres bō accord à cause des inimitiez suruenues entre Edouard & Louys de Menesez contre Estienne de Gama fils du Viceroy. Il y auoit aussi des gentilshommes adherans aux deux partis contraires, tellement que les choses tendoyent à grande confusion, si Lopez n'y eust soigneusement pourueu. Mais il ne cessoit d'aller iour & nuit par la ville avec l'Auditeur general & force soldats, separant les querelles par gracieuses remōstrances: en quoy l'heur le fauorisa tant que iamais les soldats, quoy qu'en nombre si grand & de contraire humeur, ne vindrent aux mains. Au reste, en attendant la venue du Viceroy Henri de Menesez, Sampajo comme capitaine general commit Simon Sodre pour aller avec quelques vaisseaux es isles de Maldiuar, tant pour butiner sur les ennemis que pour conseruer le trafic & commerce libre. Il enuoya aussi en Ormus quatre nauires chargees de diuerfes marchandises appartenātes au Roy de Portugal, pour estre serrees en la douanne: & donna charge d'une flotte de trois galliōs & d'une carauelle à Antoine Mirande d'Azeuede, pour courir au long du cap de Guardafu, & Fernand Martinez de Soufe en Melinde: suiuant en toutes ces despēches la volōté de Vasque de Gama. Tout ce que dessus expedié, Edouard

de Menefez partit avec cinq nauires pour reuenir en Portugal, & haussa les voiles le vingtiesme iour de Ianuier, l'an mil cinq cens vingt cinq, emmenant son frere Louys de Menefez, lequel se perdit en chemin avec son vaisseau, tellement que depuis on n'en ouit aucunes nouvelles, & quant à Edouard, ainsi qu'il vouloit prendre terre pres de Selimbre en Portugal, la nauire se rompit en la coste: tellement que ce Seigneur fut aussi peu heureux à son retour des Indes, qu'il y auoit esté durant son sejour.

2. HENRI de Menefez ayant receu les nouvelles de la charge qui lui estoit commise, delibera s'acquiter de son deuoir: se plaignant neantmoins de Sampajo & des autres qui auoyent enuoyé les vaisseaux au loin, estant l'Inde basse en grande necessité d'armee nauale, à cause de la guerre de Calicut & d'autres affaires: item de ce que Sampajo neluy enuoyoit toutes les forces de Cochim pour assaillir les Mores qui rodoient au long de ceste coste, car il auoit resolu de leur courir sus, & chastier ces coursaïres de tant de maux qu'ils auoyent commis à l'endroit des Portugallois. Vn peu apres cela, Cidial ambassadeur de Melichiaz gouuerneur de Diu, print port en l'isle de Goa, disant estre enuoyé expres pour scauoir au vray si Menefez estoit Viceroy, comme le bruite courroit par tout: & quand ainsi ne seroit neantmoins il auoit charge de lui dire que Melichiaz estoit prest de faire seruice au Roy de Portugal, desiroit bien fort l'amitié de Menefez, en témoignage dequoy il lui enuoyoit vn present d'armes, des bardes & harnachemens de cheuaux, & autres choses de grand pris. Menefez ayant oui l'ambassade ne voulut receuoir les presens, s'excusant que ce n'estoit à lui qu'ils appartenoyent, promit au reste de faire responce, & se porta dextrement en cela, afin de descouurir l'intention de Melichiaz qui enuoyoit cest espion pour considerer tout le pays. Dauantage Menefez ne vouloit aucun appointement avec Melichiaz, ains desiroit lui courir sus pour se reuenger du tort qu'il auoit receu de Melichiaz sans aucune occasion, du temps de Iaques Lopez de Siqueire: ioint qu'il entendit de deux Portugallois venus avec Cidial, qu'à leur partement de Diu ils auoyent laissé au port deux nauires chargees de bois, que Melichiaz enuoyoit au port de Iude en Arabie, pour refaire certaines galeres Turquesques qui attendoyent là. Ainsi donc, Menefez voulant afiner Melichiaz, delibera par l'auis de Francisque de Sa, Hector de Sylueire & autres gentilshommes, d'entretenir Cidial tant qu'il lui ennuieroit & prendroit enuie de s'en retourner sans responce: sinon, de l'emmener en Cochim. Et pour empescher que les deux nauires qui deuoient porter le bois au port de Iude n'y allassent, il despescha promptement deux vaisseaux, commandant aux capitaines de faire voile en Chaul pour se ioinde à vn gallion & à vne carauelle qui y estoient sous la charge de Manuel de Macede & d'un autre, puis aller ensemble espier les deux nauires de Diu, pour s'en saisir, & priuer les Turcs de ceste commodité. Ces capitaines firent voile incontinent, & Menefez établit Francisque de Sa, gentilhomme de grand sens & experience, gouuerneur de Goa. Puis ayant donné ordre au reste des affaires, print la route de Cochim avec deux galeres & vne galiotte, acompagné de bon nombre de gentilshommes & capi-

*Ordre donné
aux affaires
par Menefez,
ayant receu nou-
uelles de la
charge qui lui
estoit commise.*

taines, item de Ierosme de Soufe general de quelques vaisseaux en la coste de Malabar, lequel fit vne course iusques en Goa, pour asseurer tant plus le voyage du Viceroy. Cidial les suiuit avec six barques que les Indiens nomment Atalajes: mais il ne fit guères de chemin apres eux, car auant qu'arriuer à Batticala, il tira droit vers Diu, sans licence de Menefez, & estant arriué fit entendre à Melichiaz ce qu'il auoit veu, de telle sorte qu'il ne fut plus question de parler de paix.

Cebat du Viceroy couronne fosse de Calcut: & l'exécution de Mamelez en la citadelle de Cananor.

COMME le Viceroy poursuivoit sa route, on ouit lascher quelques coups de canon qui pouuoient estre assez loin. C'estoyent trente barques de Malabares tenans assiegé le gallion de George de Menefez en la fosse de Batticala, pour le mettre à fond: mais il se defendoit brauement, & les soustint iusques à l'arriuee du Viceroy, car alors les Malabares, qui s'estimoient assez forts pour les Portugallois, quitterent le gallion pour faire teste à la flotte entiere, & commencerent à le canonner furieusemēt de part & d'autre, puis vindrent aux mains, & apres long combat les Malabares furent defaits, perdirent dixhuit barques avec force artillerie, & grand nombre d'esclaves que les Portugallois prindrent, sans les autres barques brisées du canon & peries en mer. Les Malabares perdirent la pluspart de leurs gens, & les Portugallois bien peu. Au partir de là le Viceroy rencontre Antoine de Mirande qui faisoit voile au cap de Guardafu, auquel il commāda & à deux autres capitaines de demeurer en Inde pour le seruice du Roy. Quant au capitaine de la carauelle il l'enuoya au cap, afin de commāder aux quatre vaisseaux enuoyez pour espier les deux nauires de Diu dont nous auons ia parlé plusieurs fois: & lui avec toute la flotte alla surgir en Cananor, où il entendit du capitaine que Mamelez More renommé estoit en prison dedans la citadelle à la poursuite du Roy de Cananor, lequel il s'asseuroit estre sur le point de prier qu'on lui donnast Mamelez, pour ce qu'il esperoit tirer grande somme de deniers des autres Mores pour la deliurance d'icelui. Le Viceroy voulant couper broche à telles mauuaises pratiques, & punir Mamelez s'il se trouuoit coupable, fit bailler le proces d'icelui au conseil, & trouua-on tant de crimes en ce More qu'il fut condamné a mort & estranglé dedans la citadelle: ce que le Viceroy commāda afin que le Roy de Cananor ne lui demandast plus Mamelez, & que lui n'eust la peine de disputer si on le liureroit on non. Il craignoit aussi d'estre corrompu par presens, sachant bien que les Mores s'employeroient avec tous leurs biens pour deliurer le plus apparent d'entr'eux, s'asseurant au reste de contenter le Roy de Cananor par belles paroles.

Mescontensmens du Roy de Cananor & exploits de guerre d'Heror de Syluier contre les Calcutiens.

A peine Mamelez estoit expiré que voici venir vn messager de la part du Roy de Cananor pour saluer le Viceroy, & lui dire que le Roy viendroit en personne des le lendemain pour le voir: ce qu'il faisoit ne presumant aucunement que Mamelez fust mort. Le Viceroy tenant bonne mine fit responce qu'il ne scauroit venir de trop bonne heure: mais le Roy, sachant dauantage au retour du messager, enuoya dire que son voyage estoit rompu, puis qu'on auoit fait mourir Mamelez, ne voulāt pas que les autres Mores estimassent qu'il y eust consenti. A quoy Menefez repliqua seuerement qu'il

qu'il s'estbahissoit qu'un tel Prince se formalizast pour la mort d'un meschât More qui auoit fait tant d'outrages au Roy de Portugal son Seigneur, & que chascun scauoit auoir bien merité la mort : qu'il deuoit plustost se resiouir de ce supplice, afin de n'auoir plus les oreilles rompues par les Mores qui l'importunoient de demander Mamelez : qu'à la premiere commodité le Roy conoistroit qu'on ne l'auoit point voulu despiter par telle execution. Par telles paroles gracieuses le Roy fut satisfait, & de là en auant pris beaucoup en son cœur le Viceroy, de ce qu'ayant tenu un si riche prisonnier que Mamelez, duquel lon pouuoit tirer une bien grosse rançon, il auoit eu plus d'esgard au seruice du Roy de Portugal qu'à son interest particulier. Or comme ce Roy Indien conut bien qu'il n'estoit pas temps de faire le mauuais, aussi les Mores furent du tout desferrez & abatus par la mort de Mamelez, voyans qu'il falloit viure autrement que de coustume & charrier droit, pour ce que le Viceroy estoit homme pour ne supporter aucune chose mal faite, ayant son honneur en recommandation, avec le vouloir & les moyens de chastier les fols. Neantmoins ils auertirēt les Calecutiens & ceux de Cochim de ce qui estoit auenu, dont ils furent fort estonnez, & conoissans par cest acte vertueux que le Viceroy n'estoit point corrompu d'auarice, iugerent incontinent que c'estoit un homme de valeur qui leur donneroit de la peine, & autant en estima le Roy de Calecut quand il sceut la mort de Mamelez. Celui de Cananor voyant qu'il n'y auoit plus de remede, voulut se preualoir de l'offre à lui faite par le Viceroy : pourtant le pria il de faire brusler un village de Mores nommé Maranie, assis dela vne riuere qui separoit les royaumes de Calecut & de Cananor, & ce d'autant que les habitans se vouloyent soustraire de l'obeissance du Roy de Cananor, de qui ils auoyent esté suiets. Le Viceroy voulant lui complaire, & afoiblir d'autant le parti du Roy de Calecut, commit ceste entreprise à Hector de Sylueire & à trente soldats, qui s'embarquerent avec deux brigantins & commandement de faire mettre le feu au village, sans descēdre en terre. Hector estant aupres y enuoya des mariniers qui commencerent en quelques maisons : mais sur ces entrefaites les Mores sortirēt en tel nombre & de tant d'endroits qu'ils enuellerēt les boutefeux, & les eussent saccagez sans Hector, qui fut contraint sauter en terre avec tous ses soldats, contre le mandement du Viceroy. Or pource que les Mores se sentoient forts ils voulurent faire teste, & combattirent quelque peu : mais finalement, apres auoir perdu quelques compagnons, force leur fut de gagner au pied, de maniere que leur village & vingtdeux barques attachees au riuage furent bruslees. Cela fait, Sylueire reprit le chemin de Cananor, & le Roy s'appaisa voyant que les Portugallois auoyent executé ce dont il les auoit requis.

5. D V R A N T la guerre du Roy de Calecut contre les Portugallois Jean de Leme capitaine de la citadelle & ses soldats estoient merueilleusement harasséz, car les ennemis, qui estoient en fort grand nombre, assailloyent la citadelle deux fois le iour, afin de brusler la facturerie & les munitions qui estoient dehors : mais à toutes les fois Leme sortoit pour les combattre,

Negotiation de paix entre le Roy de Calecut & Jean de Leme capitaine de la citadelle.

& s'en retournoit tousiours avec perte notable du costé des ennemis. Mais lui & ses gens commençoient à succomber sous le faix, pource que les armes ne bougeoient de dessus leur dos, & de nuit les Calecutiens donoyent tant d'alarmes qu'il leur estoit impossible de reposer tant peu que ce fust. Neantmoins ils estoient bien resolu, & faisoient à qui mieux mieux, sur tous leã de Leme lequel sortoit tousiours le premier au combat, & retroit le dernier, ne se voulant fier de la garde de la citadelle à homme vivant, encores qu'il fust acompagné de plusieurs capitaines ses parens & amis, qui s'estoyent merueilleusement bien portez en tous lieux. Ceste guerre tirant en longueur, le Roy de Calecut, lors absent de la ville, enuoya querir son maistre de cãp, ensemble vn seigneur de quelques montaignes voisines & son neveu, gens de grande conduite & experience, qui amenerent grand nombre de bons soldats, tous Naires & la pluspart harquebuziers: ce qui fit presumer au Roy de Calecut qu'à ceste fois il auroit la citadelle, comme eux aussi se firent forts de l'emporter. Estans arrivez à Calecut, la nuit suivante ils environnent la citadelle, avec vne grãde scoppeterie. Leme fit sonner incontinent les trompettes, & salue les ennemis à coups de canon & de harquebuzes. Apres ceste carelle les trois capitaines Mores, marchans en grande pompe & arrogance, à causes des forces qui les suiuyent, delibererent ietter le feu en la factorerie & en la tour des munitions. Suiuant ceste resolution ils assaillirent tost apres la citadelle avec toutes leurs troupes au nōbre d'environ quinze mil hōmes, contre lesquels Leme sortit avec vingt cinq Portugallois d'un costé, & Vaque de Leme avec pareil nombre d'un autre: & lors commença le cōbat à coups de harquebuzes, de picques & de coustelas. Entre autres actes memorables, le neveu de ce seigneur des montaignes s'estant attaché à Antoine de Sa fut transpercé d'un coup de pique & renuersé mort: ce qui descouragea tellement les ennemis, avec les autres pertes faites au mesme instant, qu'ils se sauuerent de vîtesse, & Leme se retira aussi laissant grand nombre de Mores estendus sur la place, sans auoir perdu pas vn de ses soldats. vray est qu'aucuns furent griefuement blesez, nommément George de Leme, lequel mesmes apres sa blessure ne laissa de cōbatre vaillamment, & tua encores plusieurs ennemis. Quãd le Roy de Calecut vid ses affaires en si mauuais train, Héri de Menesez Viceroy, & ses barques desfaites entre Goa & Cochim, il se repêtit d'auoir cōmencé la guerre, & desira la paix dont il iouissoit auparauãt. Pour la recouurer il enuoye de-mander trefues à lean de Leme, durant lesquelles on negotieroit plus amplement avec le Viceroy. Son cousin Punache, le gouuerneur & le Catoual de Calecut furent deputez pour obrenir ceste trefue. Tous trois parlerent à Leme, lequel respondit estre prest d'accorder la trefue & la paix aussi au nom du Viceroy, moyennant qu'icelui ratifiast le tout: mais à condition qu'on liurast aux Portugallois vn More nommé Patemacar, le plus riche & auacé entre tous ceux de Cochim, lequel depuis ceste guerre encommandee, s'estoit rangé au parti du Roy de Calecut, & avec quelques fustes endommageoit les Portugallois autant qu'il lui estoit possible. Outreplus Leme vouloit qu'on lui rendist toute l'artillerie prinse sur les Portugallois, ensemble

ensemble celle de Calecut, & toutes les barques du royaume: & que le Roy payast tous les dommages & intereſts receus par les Portugallois à l'occafion de ceſte guerre. Punache & les deux autres promirent faire ratifier au Roy toutes les demandes de Leme, & fut dreſſé vn acte ſouſigné des parties, pour la confirmation de la trefue, en attendant le bon plaifir du Viceroy: & lors tous actes d'hoſtilité ceſſerent.

6. ^{Reſponſe de} ^{Menefez Va-} ^{ceroy à la paix} ^{que demande} ^{le Roy de Ca-} ^{lecut.}
 LE Viceroy ſejournant en Cananor entendit qu'en la riuere de Mangalor, entre Cananor & Goa, lon auoit deſcouuert cent barques de Malabares bien equippez, rcuenans de Cambaje où ils auoyēt mené du poyure, & rapportoyent du riz & autres victuailles, & attendoyent que le Viceroy fuſt paſſé pour ſe mettre à la voile derriere lui. Or d'autant que le Viceroy n'auoit la commodité de les aller combattre, & d'autre part ne vouloit permettre qu'ils eſchappaffent, il commanda à Fernand Gomeze de Leme d'aller clore l'embouchure de ceſte riuere, ce qui fut executé avec vn gallion & deux galliottes. Cela fait, le Viceroy ſ'embarqua, laiſſant Hector de Sylueire pour commander en la citadelle de Cananor, & emmena Simon de Menefez, lequel en eſtoit capitaine, & qui fut content partir avec le Viceroy eſperant obtenir bien toſt l'eſtat de grand Amiral des Indes, de quoy il fut reſolu toſt apres contre ſon attente, car le Viceroy declaira tout haut que ce n'eſtoit office à donner: neantmoins Simon ne laiſſa de le ſuivre. Ils arriuerent de nuit pres de Calecut: & lors Jean de Leme vint trouuer le Viceroy auquel il propoſa les conditions propoſées pour l'eſtabliſſement d'une bonne paix, & que ſ'il demeueroit vn iour à l'ancre le gouuerneur de Calecut lui en viendroit dire autant de la part du Roy. Mais le Viceroy qui conoiſſoit l'humeur de ce Roy & des Mores qui ne procedoyēt pas rondement en ce fait, & n'auoyēt autre but que d'aſſoppir la guerre durant l'eſté, pour ſe fortifier l'huiuer ſuiuant, chargea Leme de dire au gouuerneur que le Viceroy n'auoit plus grand haſte que de roder promptement au long de la coſte, pour y faire la guerre à feu & à ſang: que ſi le Roy de Calecut vouloit la paix, il ſatisfiſt des dommages paſſez, & que pour l'execution de ſes promeſſes, il monſtraſt payement, & que lors on parleroit de paix. Et afin que le gouuerneur ne le trouuaſt à l'ancre & ne l'entretinſt de paroles, il fit hauſſer les voiles, ſi toſt que Leme ſe fuſt retiré. Le lendemain, Leme fit entendre la reſponſe du Viceroy au gouuerneur lequel en auertit ſon maiſtre, dont ſ'enſuiuit vn grand deſpit du Roy de Calecut contre les Portugallois: car il voyoit la reſolution du Viceroy, & lui n'en vouloit prendre aucune, à l'occafion des Mores qui l'empeschoyent de ce faire, & l'enflammyent à la guerre. Il ne pretendoit donc autre choſe ſinon d'amuſer le Viceroy, & pouſſer le temps à l'eſpaule, attendant l'huiuer qu'il eſperoit par le moyen de ſes forces ſ'emparer de la citadelle, & attrapper tous ceux qui y eſtoyent. Pour tenir encores mieux au Viceroy le bec en l'eau, comme on dit, il lui enuoya lettres en Cochim, l'auertiſſant que tout eſtoit preſt pour ſatisfaire aux conditions: pourtant le prioit il de venir au pluſtoſt à Calecut, où il trouueroit tout ce qui deuoit eſtre conſigné es mains de Jean de Leme. Aucuns eſtiment que ce Roy parloit à bon eſciant, mais

que les Mores le corrompirent, craignans d'estre chassés de Calecut, si la paix se concludoit.

Ce que le Viceroy fit en Panane au preiudice du Royde Calecut.

LE Viceroy arriué à Cochim fut receu avec toutes les solennitez & ceremonies acoustumées, & mis en possession du gouuernement des Indes. Or d'autant que sa principale pensée estoit de retourner vistement en la coste de Calecut, pour y faire vne guerre cruelle au possible, il ne seiourna dans Cochim que quinze ou seize iours: & laissant plusieurs autres affaires d'importance qu'il auoit en main, il s'embarqua pour aller en ceste guerre, de plus grande consequence (à son auis) que toutes les autres, pour recouurer le credit que les Portugallois auoyent perdu es Indes. Comme il s'apprestoit, on lui apporta les lettres du Roy de Calecut demâdant la paix, & plaines de belles promesses touchant l'obseruation des articles. Pour tesmoignage de cela, au bout de quatre iours le gouuerneur de Panane lui enuoya dire que le Roy auoit commandé que certaines barques arrestees au port lui fussent deliurees, afin que ses deputez allassent cōclurre de tout. Le Viceroy sachant à quelles gens il auoit affaire, voulut s'y trouuer en personne, afin que si on vouloit le paistre de bayes il commençast incontinent la guerre. Il partit donc de Cochim avec vne flotte de cinquante six voiles, auant deux galeres, quatre bassteaux, cinq barques, dixneuf caturs, vingt-six paraus, fustes, & brigantins. Son lieutenant en ceste armee nauale fut Ieā Melio de Sylues, capitaine de Coulam, personnage de grande autorité & experience, ayant pour capitaines Simon de Menesez, Pierre Mascaregne, Roderic Pereire, George Norogne, Ierosime de Souze, Antoine Personne, Roderic Aragne, Alфонse de Menesez, George Tellio, Arias de Cugne, George Capral, Antoine de Sylueire, Gomeze de Sotto-major, Frâcisque Vasconcel, Pierre Vieil, George de Menesez, Antoine d'Azeuede, Jacques de Sylueire, Arias Capral, Nonio Fernand Freire & plusieurs autres. Le vingtcinquiemesme iour de Feurier mil cinq cés vingt cinq ils surgirēt à l'embouchure de Panane, & sur l'heure on enuoya demâder au gouuerneur les paraus ou barques dont il faisoit mention en ses lettres. Le gouuerneur fit vne responce ambigue, ce que veu par le Viceroy, & que l'eau douce commençoit à faillir, delibera de faire aiguade en ceste riuere, n'ayāt lieu plus commode ni si prest. Les habitans du lieu, specialement les Mores, qui sauoient l'intention du Roy n'encliner sinon à la guerre, voyans les Portugallois entrer en la riuere pour se fournir d'eau douce, commencerent à canonner d'un corps de garde bien acommodé, où ils s'estoyent retranchez, en deliberation de battre le Viceroy & l'engarder de prendre terre. Le Viceroy connoissant alors l'extreme impudence des Mores, resolut de leur oster ceste artillerie & ruiner leur fort. Pour cest effect il assembla les capitaines & principaux de la flotte, leur communique son auis lequel fut approuué de tous: & de peur que leurs soldats ne fussent endomagez de l'artillerie s'ils descendoient vis à vis du corps de garde, fut ordonné qu'on prendroit terre à l'endroit d'une pointe entre la riuere au Midi & la riuere au Septentrion, & ce d'autant que le corps de garde estoit au dessous. Le Viceroy & Mascaregne allerēt ensemble avec vne troupe de deux cés soldats

foldats entre la pointe & la riuiera. Simon de Menefez & trois cens foldats, harquebuziers pour la plupart, descendirent en la coste vis à vis du corps de garde, pour fauoriser la descente du Viceroy, & empescher que le canon des ennemis ne iouast. Ce mesme iour, qui estoit le vingtsixiesme de Feurier, le Viceroy & les autres capitaines entrèrent esquis pour approcher du riuage & gagner terre, & ayans donné le signal de leur descente à Simon de Menefez, incontinent il aborda en la coste avec ses gens, au deuant desquels acoururent mil ou douze cens Mores & Naires, faisans monstre de vouloir bien garder leur fort & combattirent vaillamment à coups de pieques, de fiesches & de harquebuzes: mais voyans quelques vns de leurs cōpagnons atterrez ils se retirerent en leur fort, où ils firēt teste à Menefez, lequel les chargea de telle violence qu'ils ne peurent subsister longuement, ains apres auoir perdu grand nombre de gens, furent mis en route, s'enfuirent en grand desordre pour se sauuer en terre, tellement que les Portugallois s'emparerent de la place. La dessus le Viceroy & Mascaregne arriuent, rafraischissent la troupe de Menefez, lequel est renuoyé de l'autre costé de la riuiera, & Mascaregne va à l'endroit où Menefez estoit descendu, pour ce qu'au bout de ces deux plages s'estendoit le village, s'auançant de là vers terre ferme: le Viceroy demeura au milieu pour assaillir ceste place & y mettre le feu, ne voulant pas que les Portugallois y entraissent pour piller, de crainte que le butin ne les arrestast, ains laissa le tout aux Naires associez qui marchoyent deuant, & lui attēdit leur sortie pour puis apres faire abatre les palmiers & embraser les maisons: ce qu'estant executé, & l'artillerie enleuee du fort, le Viceroy se retira en ses vaisseaux.

8. D E là le Viceroy fit voile en Calecut, où il entēdit de Ieā de Leme que le gouuerneur ne s'estoit acquité de ce que le Roy lui auoit promis en Cochim, a fauoir de tenir les vaisseaux & canons prests. Voyant donc que c'estoyent paroles, conclud de mettre la main à l'œuure & brusler vne partie de la ville, pour faire sentir aux Calecutiens qu'il ne redoutoit point leurs armes. Il fit entendre le tout aux capitaines, & fut arresté que lui, la banniere royale & le gros de l'armee demureroyent en la plage, & que Iean de Leme suiui des gens qu'il pouuoit auoir mettroit le feu en la ville sans entrer auant dedans, & se retireroit, quand le feu seroit bien allumé. Ils mirent la main à ceste besongne le iour suiuant, & quelques gentilshommes de Iean de Leme, sortis pour saluer le Viceroy, retournerent & commencerēt ensemble à jetter le feu en quelques maisons: & cōme ils vouloyent poursuivre, le gouuerneur de Calecut suiui d'une troupe de Mores & de Naires harquebuziers leur vint au deuant, mais ils l'enfoncerent à la premiere rencontre, & cōtraignirent de reculer plus auant en la ville, d'ou neantmoins lui & ses Naires continuoyent l'escarmouche pour empescher le feu. Leme & ses gens en tuerent quelques vns, & s'eschaufferent tellement que Leme oubliāt la defense du Viceroy, lequel ne vouloit qu'ils entraissent en la ville, s'y fourrerent si auant qu'au retour ils virent la honte & le danger à leurs talons, pource que toutes les auenues & retraites furent barrees de grosses pieces de bois & de cailloux, & quand les Portugallois vouloyent prendre

*Entreprisē
des Portuga-
lois contre la
ville de Cale-
cut.*

autre chemin, les fleches & harquebuzades pleuoyēt sur eux de tous costez. Là dessus ils approcherent d'une mosquee, où ils descouurirent vn bataillon de mille Naires, harquebuziers pour la pluspart, & qui les attēdoyēt de pied coy. Vaque de Leme, Antoine de Sa, Manuel de Macede & Antoine d'Azeuede, qui marchoyent des premiers, furent incontinent accueillis d'harquebuzades, dōt l'une blessa quelque peu Vaque en la cuisse, & la lui eust percee sans vne tassette de maille qui rompit le coup: mais cela le rendit plus ardent, tellement qu'à coups de picque lui & ses gēs enfoncerēt les Naires: mais cōme ils vouloyent poursuiure, Jean de Leme suruint qui les pria de se retirer, ce qu'ils firent. Les Naires descochoyēt de loin sur eux, & les soldats de Leme respondoient de leur part: tellement que sur la continuation de telles escarmouches, Leme gaigna finalement le bord de la mer, où il trouua le Viceroy qui le reprit aigrement de s'estre tant auancé, quelques excuses que lui & les autres peussent alleguer: & en ceste cholere, le Viceroy remonta sur mer, avec deliberation toutesfoi de continuer ceste guerre contre le Roy de Calecut.

*Nauigation
des Portuga-
lois au port de
Coulete.*

Pour cest effect fut resolu d'aller assaillir Coulete, qui est le principal & plus riche port du royaume, mieux fourni de gēs & de vaisseaux que nul autre. Et pour sauoir au vray quelle estoit la situatiō de ce port, & le nombre des vaisseaux qui y pouoyent estre, le Viceroy y enuoya Jean Melio de Sylues, avec douze catur d'Indiens & cinq barques de Portugallois, lesquels prindrēt incōtinēt la route de Coulete, qui est vne bourgade au port de laquelle se fait vn canal & vne plage sablonneuse. Au bout de ce canal est la bourgade assize assez pres de la riuē, & à costé de ce canal vers Midi y auoit trois bastions, l'un à la pointe, l'autre au dessus, & le tiers au milieu, biē fournis d'artillerie: le port muni de quarante bastiaux de guerre bien equippez, l'armee de terre & de mer mōtant à vingt mille Naires & Mores cōbatans, & qui auoyēt bon nōbre d'harquebuziers, au moyen dequoy ils s'estimoyent assez forts pour receuoir bataille si le Viceroy la leur presentoit. Lui entendant le rapport de Melio, conclud de ruiner Coulete, & renuoya deuant Melio pour descouurir encores de plus pres l'affiete du lieu, & fit voile apres sur le soir. Melio approcha du canal au matin, & incontinent vid sortir les quarante bastiaux en tel estat, & chargez de tant de gens qu'il ne vouloit estre si temeraire que d'attacher l'escarmouche se sentāt par trop foible, ains se retira, canonnāt ceux qui le vouloyent aborder de trop pres, tellement qu'apres s'estre entresaluez de loin, chascun se retira, les Mores s'apprestans au combat sur terre & sur mer avec grand bruit de tabours & d'autres instrumens de guerre, dont le retenissement s'entendoit en la flotte du Viceroy, encores qu'il fust assez loin d'eux.

*Quel deuoir
le Viceroy &
ses capitaines
firent pour s'i-
purer de Cou-
lete.*

Le conseil assemblé pour resouldre de ce qui estoit à faire, il y eut di-
uersité d'opinions, car les vns estoyēt d'auis de dōner bataille par mer, pour
ce que le Viceroy n'auoit guerres de gens, au contraire les ennemis estoyent
forts en terre. Ils adioustoyent que la retraite seroit dangereuse, si on cōba-
toit en terre, tāt pource que leurs ennemis se sentiroyēt forts à cause de leur
armee de mer, que d'autāt qu'il faudroit recommēcer vne bataille nauale,
où

où il y auoit beaucoup à faire, pource que ceux des bateaux voyans leurs compagnons en route reprenroyent courage pour se defendre iusques au bout, ne voyans retraite ni faueur quelconque qu'en leurs vaisseaux. Il en auoit d'autres qui soustenoyent qu'on deuoit prendre terre pour desfaire premierement les plus grandes forces & dompter le reste plus aisément puis apres. Les autres, du nombre desquels fut Mascaregne, estimoyēt qu'il ne falloit se hasarder ainsi, ains recueillir premierement quelques vaisseaux espars çà & là au long de la coste, afin qu'avec des forces entieres on peust comme s'asseurer de la victoire, auant que ioinde & venir aux mains avec vn si puissant & resolu ennemi. Mais le Viceroy fut d'avis d'affaillir les Mores par mer & par terre, fondant son dire sur des raisons si apparentes, & rabbatant si dextrement par vn long discours tout ce qu'on auoit allegué au contraire, que finalement son avis fut suiui, & tous se resolurent au combat, encores que quelques vns, trop arrestez à leur opinion, n'en fussent pas gueres contens, pource qu'ils craignoyent le danger, & ne pouuoient presumer que l'issue en deust estre telle que Dieu la fit voir bien tost apres, suiuant l'esperance du Viceroy qui lors encourageoit tous les capitaines, & l'assurance que Iean Melio leur donna d'une victoire toute certaine, pour auoir reconu les ennemis estonnez, & qu'il eust infalliblement mis en route, si ses forces eussent esté tant soit peu plus grandes.

11. CELA ainsi arresté, le Viceroy fit baisser les galeres le plus pres de terre qu'elles pouuoient, afin que leur artillerie iouast à proufit : & en attendant le matin les Portugallois pourueurent aux affaires de leurs consciences à la maniere acoustumee entre eux : puis commencerent à chanter & sauter de ioye pour despiter leurs ennemis, lesquels d'autre costé ne firent que brui-
re & sonner de leurs instrumens toute la nuit, pensans effroyer les Portugallois, & lascherent aussi quelques volees de canon. Si tost que le iour apparut, les paraus de Couletes s'auancerent en bon equippage, comme firent aussi les Portugallois en leurs bateaux, paraus, catur & brigantins. Pierre Mascaregne & Simon de Menefez voguoyent en l'auantgarde, & le Viceroy conduisoit la bataille, puis se recommandans à Dieu chascun se rangea au lieu qui lui estoit assigné : le Viceroy cinglant droit au fort, Mascaregne à la pointe du canal, & Menefez à la plage. La plus grande furie du canó des ennemis s'adressoit contre la flotte du Viceroy, tellement que quelques capitaines, pour estre plus à couuert, se rangeoyent avec Menefez, qui n'estoit pas en si grand danger. Le Viceroy neantmoins approche courageusement du combat, exhortant ses gens de ne se point desbander. Roderic Aragne capitaine d'un petit catur où bateau Indien, dans lequel n'y auoit que huit Portugallois, fut le premier qui accrocha vn parau des ennemis au nombre de soixante, & malgré eux y entra, suiui de ses huit soldats, combatant à coups de main. Autant en firent cōtre d'autres paraus les capitaines George Norogne, Ierosme de Soufe, Antoine Personne, Tristan Norogne & Alfonso de Menefez. Alors la mellee estoit si grande que les capitaines, escartez de la flotte du Viceroy pour se ranger avec Simon de Menefez, estoient si loin les vns des autres, que le Viceroy ne leur pût faire dire qu'ils descen-

*Bataille par
mer & par ter-
re pres de Can-
leis, & l'issue
d'icelle.*

disſent : car il leur auoit defendu de prendre terre, iuſques à ce qu'il le leur commandaſt, & vouloit qu'ils vogaſſent au long de la plage iuſques aux paraus, afin d'aider par terre à les deſfaire. Simon de Menefez n'oſoit deſcendre, ains attendoit : ce que veu par le Viceroy, print auiſ ſur l'heure faiſant prendre terre à trois hommes qui allerent dire à Menefez qu'il deſcendiſt. Ce qu'ayant fait en moins de rien, les Mores acoururent de tous coſtez pour l'empêcher de paſſer oultre, & lors y eut vn terrible conſlict, où les ennemis auoyent tel auantage, pour leur grand nombre, que Menefez ne pouuoit ſ'auancer iuſques aux paraus, comme le Viceroy auoit commadé. Quelques capitaines du Viceroy, alauiſ Jacques Pereire, Manuel de Gama, Roderic Coſte, Fernand de More, Gomeze de Sottomajor, Jean de Betancour & autres iuſques au nombre de trente, voyans deſcendre les trois hommes enuoyez à Menefez, ne ſe peurent contenir de prendre terre, encores que le Viceroy fuſt d'autre auiſ, voulant qu'ils combatiſſent en mer. Les Mores, qui eſtoient en merueilleux nombre, leur coururent au deuant & les chargent. Eux ſouſtiennent & font ſi bien leur deuiſ qu'ils abatent gēs de tous coſtez, mais avec perte des leurs auſſi : car Jacques Pereire fut tué ſur la place, Coſte, More, & Betancour & cinq ſoldats ſi griefuement bleſez qu'ils en moururēt toſt apres. Manuel de Gama & les autres, ne pouuā plus ſubſiſter, tournerent le dos, ſans eſtre ſecourus de Jean Melio, George Capral & autres deux gentilshommes eſtans au brigantini de Leme, lequel voyant ceſte deſroute, gaigne promptement le riuage ſuiui deſtrois ſuſnōmez & de quelques ſoldats, ſouſtenant & reſraichiſſant le combat : mais les Mores croiſſoyent tellement que force fut au Viceroy de deſcendre avec ſa compagnie, & bien à point, pource qu'alors tout eſtoit en branſle, & le combat tellement meſlé ſur mer & en terre, qu'il y auoit beaucoup de bleſez de part & d'autre. Le Viceroy conut lors que Simon de Menefez ne pouuoit le ſecourir, pour la grande reſiſtance que les ennemis faiſoyent : qu'il ſaloit changer d'auis, & ſ'emparer d'un fort que les Mores tenoyent à la pointe de leurs vaiſſeaux vers la bourgade, à raiſon dequoy quelques gens de renfort lui eſtoient neceſſaires. Pourtant fut il contraint d'enuoyer querir Pierre Maſcaregne avec ſes capitaines qui vindrent incontinent, & acompagnerent le Viceroy à l'aſſaut de ce fort, qui fut aſſez bien defendu au commencement, mais en ſin les Mores ſ'enfuirent quittans la place au Viceroy. Ceux de la mer combatoyent vaillamment & en gens qui ſ'aſſeuroyent d'emporter la victoire, tellement qu'ils ne ſe vouloyent point ſauuer en terre, encores qu'ils euſſent moyen de ce faire : & ſembloit que les Portugallois ne fuſſent pas gens pour eux, tant à cauſe que ceux à qui le Viceroy auoit ordonné de combattre ſur mer, eſtoient deſcendus en terre pour la pluſpart, qu'auſſi ils ne retournoyent point en leurs vaiſſeaux pour recommencer le combat, & n'y auoit perſonne qui fiſt deuiſ ſur mer que Roderic Aragne, George Norogne & autres capitaines ſuſnommez, qui des le commencement auoyent acroché quelques paraus ennemis dedās leſquels il combatoyent main à main. Entre autres Jean Sigurade capitaine d'un catur, apres auoir acroché vn parau, ſaute incontinent dedās, & ſem-

bla que les Naires, qui vogueoyent avec lui, furent si meschans de pacher le catur de telle sorte, que les soldats Portugallois n'eurent moyé de suiure leur capitaine. Par ainsi Sigurade demeuré seul au milieu de tant de Mores estoit reduit à ceste necessité ou de mourir les armes au poing, ou de sauter en l'eau. Il aimia mieux combattre, & commença à escrimer de telle dexterité qu'il chassoit les ennemis de costé & d'autre : finalement ils se ruèrent tous sur lui, firent voler son espee hors des mains: encores pour cela ne quitta-il la place, ains à coups de poing continua la guerre, cassant les machoires à ceux qu'il pouuoit ataindre. Mais ayant receu plusieurs coups, & sur le point d'estre acheué du tout, il fut secouru de Pierre George capitaine d'un autre catur, tellement que les Mores furent partie tuee, partie blesez & contrains se sauuer à nage. Or le Viceroy voyât que ses vaisseaux auoyent besoin de secours, y enuoya quelques capitaines, à l'aide desquels les ennemis furent entierement desfaits, & n'en eschappa que bien peu, car ils aimoyent mieux mourir que se retirer. Les Portugallois qui combatièrent sur mer furent blesez pour la pluspart: mais personne d'eux ne mourut au combat. Autant en print-il à Simon de Menefez, c'est que les Mores se defendirent courageusement, iusques à ce qu'estans rompus par la violence des Portugallois, ils le retirerent en terre ferme, laissant grand nombre de morts, & remenant plusieurs blesez. Le Viceroy ayant rendu graces à Dieu d'une si belle victoire, embrassa Jean Meliô pour son bon cōseil, & qui entre tous les autres fit tresbien son deuoir ce iour là. Les forts & paraus demeurèrent aux Portugallois, & trouua-on deux cens cinquante piéces d'artillerie grosse & menue, force boulets de fer de fonte, grãde quantité de pouldres & d'engins à feu. Le tout fut chargé dās les vaisseaux de la flotte, & quarante paraus amenez. Cependant le Viceroy donna l'ordre de cheualerie à quelques gentilshommes & capitaines: & de la en auant se donna plus de bon temps, à cause que les Mores ne l'agacerent plus comme ils auoyent accoustumé. Il y auoit dix nauires de charge en terre, lesquelles furent brulées: quoy fait le Viceroy se retira paisiblement. Par ainsi les Portugallois recouurerent le credit qu'ils auoyent perdu es Indes, au cōtraire le Roy de Calecut commença à decheoir de la reputation par lui acquise, estant la renommee du Viceroy espandue par toutes les Indes, & son nom redouté des ennemis.

12. DE Coulete le Viceroy fit voile en Cananor, où il arriua l'onzième jour de Mars, trouuant les Mores fort paisibles, mais contristez à cause de la desfaite de leurs compagnons & des Naires qu'ils estimoyent inuincibles, & s'asseuroyent que les Portugallois y seroyent desfaits tout à plat. Ainsi donc voyans tout le contraire, ils faisoient leur compte d'estre bien tost ruinez. Le Roy n'en pensoit pas moins, pource qu'il y auoit quelques paraus de Mores au port de Cananor: & entendant que le Viceroy y estoit arriué, lui enuoya gés pour le gratifier de sa victoire, avec present d'un collier d'or & de certains ioyaux de grand pris, que le Viceroy ne voulut recevoir, mais en fin on le pressa tant qu'il les print, afin que ce Roy ne presumaist qu'on lui en voulust, & que le Viceroy fust indigné contre lui. De fait,

*Pour parler
entre Menefez & le Roy
de Cananor:
& la responce
aux lettres du
Roy d'Ormus
à de Raiz
Xerax.*

incontinent après il donna collier & ioyaux à l'hospital de Cananor, pour le soulagement des malades & autres entretenemens nécessaires, faisant dire au Roy qu'il auoit receu ses presens, afin de l'asseurer qu'il lui estoit seruiteur, & feroit tout ce qu'il pourroit pour lui donner occasion d'entretenir amitié avec le Roy de Portugal son seigneur, estât prest de s'employer en tous affaires pour celui de Cananor, sans dons ni presens: pource que quand on lui donneroit tout le monde, il ne feroit autre chose que ce qui seroit pour le service de son Prince. Le Roy fut bien estonné de ceste response, car auparavant on obtenoit es Indes tout ce qu'on vouloit moyennant qu'on fonçast le poignet aux Viceroyes & à leurs capitaines & lieutenans. Incontinent aussi il alla visiter le Viceroy en la citadelle, ce que iusques alors nul Roy de Cananor n'auoit fait à aucun gouuerneur des Indes, & parlementerent dans vn pauillon tendu dehors la citadelle. Après les salutations accoustumées, les Roy promit de liurer aux Portugallois les paraus qui estoient au port de Cananor, avec toute l'artillerie qui se trouueroit en iceux, promettant à l'auenir de ne fauoriser obliquement ni directement leurs ennemis. En après il monstra au Viceroy vne lettre du Roy de Portugal, lequel lui donnoit les isles de Maldiuar, à la charge de fournir autant de cuirs que les Portugallois en auroient besoin es Indes, au pris qu'ils coustoient es isles de Maldiuar. Le Viceroy offrit de le mettre en possession des isles, moyennant qu'il baillast par an de ces cuirs le poids de mille bahards qui font deux mil huit cens vingt cinq quintaux, disant que les Portugallois auoyent faute de ceste quantité es Indes. Mais le Roy de Cananor ne voulut accepter telle condition, dont le Viceroy fut ioyeux, pource que le Roy Iean y gaignoit encores dauantage: car il scauoit que le quint du riz, que payoyent les nauires qui arriuoient es isles, suffisoit pour acheter les mille bahars de cuir, & pour entretenir quarante soldats y seiournans avec le facteur, qui s'enrichissoient outre cela des arriere-mains & larrecins qu'ils faisoient. Or combien que le Roy de Cananor n'eust accepté les isles, si ne laissa il de protester qu'il estoit seruiteur du Roy de Portugal & ami du Viceroy, auquel il fit deliurer incontinent les paraus qui se trouuerent au port, demandant les autres vaisseaux pour la commodité du trafic, qui lui furent ottroyez par le Viceroy, pourueu qu'ils baillassent leur artillerie aux Portugallois, taillassent les esperons, & ostassent les auirons, ce qui fut fait. Par tel moyen Cananor demeura paisible, & durant ce pour-parler y arriua vn More portant lettres du Roy. d'Ormus & de Raix Xeraf à Vasque de Gama, auquel ils faisoient de grâdes plaintes & le supplioyent de faire vn voyage en Ormus pour leur faire raison des torts qu'ils auoyent receus d'Edouard de Menefez, & qu'ils receuoyent encor de Iacques Melio. Cōbiē que le porteur de ces lettres eust entendu en Chaul le decès de Gama, neantmoins il delibera venir trouuer le nouveau Viceroy, & lui presenta ses lettres, le priant lire le contenu d'icelles, comme à lui adressantes, & faire la iustice qu'un Viceroy estoit tenu de rendre, puis qu'il auoit ceste charge. Il lui presenta grande quantité de perles & des draps de Perse fort precieus. Le Viceroy ne voulut rien prendre, mais finalement il les receut, puis en.

en disposa comme du collier que le Roy de Cananor lui donna, & tint mesme langage sur ce point au More d'Ormus qu'il auoit fait au Roy de Cananor. Puis escriuit à Jacques Melio touchant les doleances des autres, le priant de sa part, & l'exhortant au nom du Roy, de ne faire chose qui contrainst le ieune de chastiet le vieil. Melio estoit lors aagé de soixante ans, & le Viceroy n'en auoit gueres plus de trente. Dauantage, pour empescher Melio de tourmenter le Roy d'Ormus & Xeraf, il commanda à l'Auditeur de la citadelle d'Ormus de lui enuoyer pieds & poings liez vn certain Portugallois, par le conseil duquel lon disoit que Melio faisoit les fautes, desquelles il estoit accusé. Il auertit aussi le Roy d'Ormus & Xeraf de ce qu'il faisoit en leur faueur, protestant d'oster le gouuernement de la citadelle à Melio, s'il ne se conduisoit plus sagement, & ne souffrir qu'on leur fist tort moyennant qu'ils demeurassent fideles au Roy de Portugal. Il s'excusoit aussi sur ses affaires qui l'empeschoyent d'aller lui mesmes en Ormus, & ainsi renuoya le More lequel partit fort content, & bien estonné d'auoir veu vn tel Vice-roy & si peu adonné à son proufit particulier.

13. FERNAND GOMEZE de Leme enuoyé avec quatre vaisseaux, pour clorre le passage à cent paraus des ennemis anchrez dedans le fleue de Mâgalor, arriua à l'embouchure d'icelui, qu'il ferra tellemēt que les ennemis ne pouuoient en sortir: car si tost qu'ils s'auançoient plus que de raison, Fernand & les autres capitaines les battoient & rechassoient à coups de canon. Ainsi donc les vns & les autres demurerent là quelques iours à s'entr'espier: ce pendant arriua vne flotte de Calecut qui alloit en marchandise. Les Malabares apperceuans les Portugallois à la bouche du fleue, dedans lequel ils sauoyent que leurs compagnons estoient enclos, approcherent assez pres, & commencerent à lascher quelques coups. Incontinent ceux de dedans se mettent à voguer pour secourir leurs compagnons & trouuer moyē de se ioindre à eux, tellemēt qu'ils attacherent l'escarmouche deuant & derriere, au grād dāger des Portugallois, specialemēt de la galiotte d'Antoine de Sylue, qui cuida couler en fond plusieurs fois: mais lui, cōme courageux, tint bon iusques à ce que Fernand fit leuer les anchres & desployer les voiles, comme firent aussi les autres capitaines pour aller au deuant des Malabares. Comme ils s'apprestoyent, la pluspart des paraus enserrez dedans le fleue sortirent, & à voiles desployees gaignerent le haut avec la grand' flotte & se sauuerent. Fernand ne les voulut pas suiure, ains se remit à l'entree du fleue pour empescher ceux qui estoient demeurez de faire comme leurs compagnōs, mais ils eschapperent finalement: & le Viceroy entendant le peu de proufit qu'il y auoit en cela, estima la peine mal employee de s'y arrester dauantage: pourtant ne voulut il y renuoyer renfort de gēs, ains vacqua à d'autres affaires plus vrgentes. Pource que le printemps s'auançoit, estant desia la mi-Mars, & que les vaisseaux de Malaca estoient arriuez, où il falloit enuoyer gens avec Pierre Mascaregne, le Viceroy se retira au port de Cochim: & sachant que les citadelles de Cananor, de Calecut & de Cochim auoyent faute de riz, il despescha Simon de Menezes, afin d'aller à Bracelor & Batticala, pour charger de ceste graine quel-

Cibet de Fernand de Leme à l'embouchure du fleue de Mâgalor: & navigation de Pierre Mascaregne en Malaca.

ques basteaux de charge, vne galere, deux galiottes, des catur & paraus legers, lui commandant de mener quand & soy Fernand de Leme & ses quatre vaisseaux qui estoient encorés au guet, & qu'à son retour il laissast à Iean de Leme capitaine de la citadelle de Calecut les soldats dont il auroit faute. Cela fait le Viceroy se retira à Cochim, & donna ordre à ce qui estoit requis pour la nauigation de Mascaregne, lequel s'embarqua le huitiesme iour de May dessus le gallion d'Arias de Cugne qui alloit estre general de Malaca. Il fut suivi d'un bateau venu de Malaca, d'un brigantin & de deux paraus, emmenant trois cens cinquante hommes, pource que le Viceroy estoit auerti que George Albuquerque auoit lors bien peu de gens de guerre.

*Rencontre sur
mer entre Si-
mon de Me-
seze & sixan-
te barques de
Malabares,
& ce qui en
auant.*

SIMON de Menefez ayant executé sa commission, sur son retour de 14.
Batticala en Cananor avec neuf voiles, a sauoir sa galere, le galion de Gomefe Martines de Leme, la galiotte d'Antoine de Sylues, vne autre galiotte, vne carauelle, les deux brigantins d'Antoine Personne & de Domini-que Fernand, & deux petis basteaux, trouua au mont Delin vne flotte de soixante paraus Malabares, qui alloient charger du riz au long des fleuues de Bracelor & Mangalor. Les Mores ne voulurent pas attendre le choc, ains monstrerent les pouppes & se sauuerent à toutes voiles. Menefez les suivit, canonnant les moins habiles, tellement que cinq demeurèrent derriere, & craignans d'estre acrochez, donnerent en terre pres de la coste où ils se briserent : mais ceux de dedans prindrent terre, & gaignerent au pied. Dominique Fernand & Antoine Personne en agraferent deux autres, sauterent dedans, mirent en pieces quelques Mores, les autres sauterent hors le bord, & neantmoins furent tuez en la mer, les paraus demeurés aux Portugallois. Vne partie des fuyards fit voile en haute mer, les autres se coulerent dans le fleuve de Marauie, où Menefez delibera les combattre, & fit entrer soudainement ses soldats en des petis basteaux, esquifs & autres vaisseaux legers de la flotte, lesquels allerent gaigner la bouche du fleuve au son des trompettes & cri de bataille. Ils furent sauez de mesme & de plusieurs volées de canon & de coups de fleches par certains paraus qui n'estoient avec les autres. Ce nonobstant les Portugallois enfez des victoires passées, sans crainte de boulets ni de fleches entrèrent dedans le fleuve, & approchez des ennemis, ietterent des pots de feu artificiel en huit paraus, dôt les Mores furent tellement espouuantez qu'ils se precipiterent incontinent en la mer, laissant brusler leurs vaisseaux qui furent entierement consumez par le feu. Dominique Fernand suivit deux paraus assez auant & y mit le feu : mais d'autant qu'il se hazardoit vn peu trop, Menefez enuoya Gomeze Martines de Leme en vn esquif pour le faire remonter : mais le malheur fut tel que Leme s'alla ietter en des basses, d'ou il ne pouuoit sortir : & là dessus suruindrent tant d'ennemis au riuage qu'ils le tuerent ensemble Michel fils de Alфонse de Leme & quatre soldats. Dominique craignât que son brigantin ne demeurast à sec regaigna la fosse. Or pource que ce fleuve appartenoit au Roy de Cananor, le Roy monstra que la mort des six Portugallois lui pesoit, sur tout quād il sceut que ses suiets en auoyent esté les meurtriers, fauorisans

faucifans l'ennemi & portans les armes contre les Portugallois. Afin d'oc de ne laisser tel acte impuni il fit executer par iustice quelques Naires & Mores des plus coupables, enuoye les corps des six Portugallois à Hector de Sylues afin qu'on les enterrast, & lui fit entendre la punition des autres, disant estre prest à faire dauantage s'il estoit besoin: le tout afin que le Viceroy n'eust aucune mauuaise opinion de lui, & qu'à cause de cest accident il ne lui fist la guerre. Simon de Menesez ayant assemblé ses gens rentra es grands vaisseaux, & durant quelques iours courut toute la coste, afin de descouurir & charger les ennemis qui s'ingereroyent de passer, ce qu'ils n'auoyent encores osé entreprendre à cause des capitaines Portugallois qui gardoyent les passages: tellement qu'ils ne pouuoient se fournir de victuailles, ce qui fit que l'hiuer ensuiuant il y eut grande disette en tout le pays des Malabares, spécialement au royaume de Calecut. Vne telle guerre fut beaucoup plus cruelle pour les Mores que celle des armes, pource qu'ils ne pouuoient subsister sans estre aidez des viures qu'on amenoit par mer des lieux voisins: & si le Viceroy se fust plustost auisé de fermer l'entree du fleuve susnommé, les Calecutiens eussent encores eu plus à souffrir. Menesez voyant quel hiuer approchoit, fit voile vers Cochim, & de là en Cananor, fournit de riz la citadelle, puis alla surgir au port de Calecut, & pourueut aussi la citadelle de la quantité de riz qu'il falloit: mais estant question de laisser gens dont Leme auoit besoin, pource qu'il s'attendoit d'estre assiégé durant l'hiuer, personne de qualité ne voulut demeurer, pource que le Viceroy n'auoit point exprimé le nom d'aucun, & lors chascun commençoit à se laisser des trauaux de la guerre, & suioit celle qui menaçoit Leme & sa citadelle. Quand Menesez vid que les hommes de marque refusoient s'arrester leans, il leua six vingts hommes des moins respectez en sa flotte & les contraignit de demeurer en la citadelle, qui par ce moyen demeura despourueue de gens d'autorité, exceptez ceux qui y estoient auparavant. Depuis la retraite de Menesez à Cochim, les Mores de Calecut se hazarderent, nonobstant la fâcheuse saison, d'aller querir du riz, & en menerent quantité, sans quoy tous fussent morts de faim: & pource que les Mores estoient accusez d'estre cause de ce desordre, les Calecutiens & sur tout les Naires leur vouloyent mal de mort, disans qu'ils ne scauoient faire autre chose qu'irriter les Portugallois, & allumer vne guerre sans la pouuoirestaindre puis apres, ni pouruoir aux necessitez du pays. Ils se plaignoyent d'autre torts, tellement que les Mores se trouuerent bien empechez, spécialement tandis que la disette dura.

15. A L O R S que le Viceroy partit de Goa pour aller prendre possession du gouuernement en la ville de Cochim, il commit à Frâcisque de Sa capitaine de la citadelle de Goa vne flotte de quatre fustes & six brigantins pour garder la coste iusques à Dabul. Christofle Britio fut ordonné general de ces vaisseaux, avec lesquels il fit diuerses courtes & eut des rencontres avec l'armée de Calecut, laquelle il battit plusieurs fois. Continuant ainsi la guerre, il cingla vn iour iusques aupres de Dabul, ce qu'entendu par le gouuerneur il fit embarquer promptement quatre cens Turcs en sept grandes fu-

Bataille navale des Portugallois contre les Turcs & le succès d'icelle.

ftes & vne galiotte bien fournie d'artillerie & de rames, qui fortirēt en deliberation de cōbattre les Portugallois, lesquels au nōbre de cent cinquāte seulement les receurent brauement, & apres auoir fait iouer leurs pieces de part & d'autre, quatre fustes & la galiotte attacherent le combat avec cinq vaisseaux Portugallois, où les vns & les autres se porterēt en gēs de guerre. Durāt le conflict, Britio receut au col deux coups de fiesches qui trāspencerent sa chemise de maille, & le blefferent de telle sorte, qu'il rēdit biē tost l'esprit. Ses capitaines & soldats au lieu de perdre courage, voyās leur general abatu, deuindrent plus furieux, & d'une impetuositē soudaine assaillirēt si brusquement les ennemis qu'ils forcerent les fustes & la galiotte, tuans vne partie de ceux qui y estoient, & iettans les autres hors le bord, la plupart desquels ils harquebusoyent ou transperçoient à coups de pique en l'eau. Les trois autres fustes voyans cest esclandre de leurs compagnies ne voulurent ioindre, ains penserēt à se garantir de la main des Portugallois, & donnerent en la coste de telle roideur qu'elles se briserent. Les quatre fustes & la galiotte demurerent aux Portugallois qui perdirent Britio avec six autres hommes, & remenerēt beaucoup de soldats griefuement blesez. Quant aux Turcs ils y moururēt presques tous. Avec ceste victoire, qui fut notable / considéré l'estat des Portugallois qui n'auoyent aucun credit en toute ceste coste, & l'orgueil des Mores à cause de leur prosperité les capitaines s'en retournerent vers Francisque de Sa lequel auertit le Viceroy de ce qui estoit auenu.

Ville notable des Portugallois en l'isle de Zeilan.

IL a esté parlé au douziesme liure de la guerre des Portugallois en l'isle 16. de Zeilan, où ils auoyent basti vne citadelle, & de la paix qui entreuint. Depuis pour diuerses raisons le Roy de Portugal fit desmolir ceste forteresse par Fernand Gomeze de Leme, qui laissa en l'isle vn facteur, vn secretaire & quinze Portugallois, afin d'y vacquer tous ensemble plus cōmodement au trafic. Fernād de retour en Inde, vn More de Calecut nommé Baleacen capitaine de l'arsenal sceut que la citadelle de Zeilan estoit ruinee, & qu'il y auoit peu de gens pour les affaires du Roy de Portugal : à l'occasion de quoy il s'assura de les attrapper s'il les demandoit au Roy de l'isle, pres duquel ils seiournoient. En ce pensēment il s'embarque menant cinq cens soldats en quatre paraus, & arriué au port de Colombo alla trouuer le Roy & lui dit que l'armee de Calecut auoit desfait en bataille la flotte des Portugallois qui auoyent esté tous mis à mort, tellemēt que les Rois de Cochim, de Cananor, & tous les autres Princes Indiens tenoyent assiegez les Portugallois habitās en leurs pays : & qu'il auoit charge de la part du Roy de Calecut de lui demander les Portugallois qui se trouueroient en l'isle. Le Roy estonné de telles nouvelles, sans toutesfois y adiouster foy, pource qu'il lui sembloit qu'on ne pouuoit les auoir rompus en si peu de temps, demanda quelque delay pour faire responce à telle demande, puis enuoye querir le facteur & le secretaire, ausquels il declaira ce que dessus. Eux responderent que ce qu'alleguoit Baleacen n'estoit pas vray semblable, tant pour le grand nombre des Portugallois estans es Indes, qu'à cause de la sagesse & vaillāce du Viceroy. Là dessus ils prierent le Roy d'enuoyer en Inde sauoir la

la verité, lui permettant puis apres de faire d'eux ce que bon lui sembleroit, au cas que le rapport de Baleacen se trouuast veritable. Cela pleut au Roy, Prince de gentil esprit, & fit response à Baleacen qu'il ne lui liueroit point les Portugallois, que premierement il n'eust la confirmation bien asseuree de son dire. Baleacen estimant que ce fust vne desfaite pour ne point bail-
 ler les Portugallois, lesquels seroyent encores plus fauorisez, quand sa faul-
 seté seroit descouuerte, delibera de les enleuer par force : mais auant qu'il
 peust rien executer le Roy eut nouuelles contraires, au moyen dequoy il
 aida de tous moyens possibles le facteur & ses gens pour se garantir d'une
 telle violence. Eux acompagnez de quelques Zeilandois (qui ne leur don-
 nerent aucun soulagement, pour n'estre gueres exercez aux armes) allerent
 au deuant des cinq cens Mores descendus en l'isle, lesquels ils chargerent
 de telle vigueur qu'apres long combat ils en tuerent cinquante sur la place,
 en blesserent beaucoup dauantage, & contraignirent les suruiuans de se
 sauuer de vistesse en deux paraus : à cause que les deux autres pour estre at-
 tachez au riuage n'eurent loisir de desmarcher, ains demurerent aux Por-
 tugallois. Baleacen s'enfuit confus & accablé de honte comme lon peut
 penser, & le Roy de Zeilan ravi d'estonnement caressa les Portugallois plus
 qu'il n'auoit encores fait, & les Insulaires aussi, nomément ceux qui estoient
 acourus pour butiner apres la victoire, s'entretindrent en plus grande ami-
 tié avec le facteur & ses gens, que par le passé.

17. ANTOINE de Mirande, general de la flotte enuoyee au cap de Guar-
 dasu, tant pour butiner, que pour surprendre les deux nauires chargees de
 bois & enuoyees de Diu au port de Iude en Arabie, cingla tellement qu'il
 se redit au lieu assigné, d'où il fit quelques courses & gagna beaucoup sans
 combattre, pour ce que les vaisseaux ennemis baïssoient incontinent pour
 se rendre à sa merci. Ayant voltigé quelques iours en attendât les deux na-
 uires chargees de bois, elles ne comparurent point : tellement que lui voyant
 que la nauigation se rendroit bien tost perilleuse, resolut de n'attendre pas
 dauantage, & là dessus print la route de Sael, vers laquelle les autres vais-
 seaux faisoient voile par le commandement du Viceroy qui demandoit
 au Roy d'Adel l'artillerie des Portugallois iettée en mer à cause d'une tour-
 mente, comme dit a esté au troisieme liure, page 520, & depuis auoit esté
 tirée à bord par les Arabes. Mirande arriué au port de Sael enuoye deman-
 der ceste artillerie au Roy, lequel n'en tint compte, estant encores despité
 des torts que Louys de Meneséz lui fit, lors que ceste artillerie fut perdue.
 Ce refus fit resouldre Mirande à se véger sur douze nefes de Mores anchrees
 en ce port : de fait il leur courut sus, tua & blessa ceux qui se voulurent met-
 tre en defense, mit le feu en sept d'icelles nefes, en print quatre, la cinquié-
 me eschoua au riuage, & eut un riche butin de marchandises. Or pource
 que le gallion de Manuel de Macedo puisoit, & auoit besoin d'estre tiré en
 terre, Mitande chargea tout le butin en deux nefes & les enuoya sous la
 charge de Macedo au port de Chaul, où tout arriua seurement : & quant
 à Mirande, il se retira avec sa flotte à Mazcate, pour y passer l'hiver.

18. DV RANT la guerre entre Antoine Britio & le Roy de Tidore, dont

C C

*Valliere d'An-
 toine de Miran-
 de sur les
 Mores de
 Sael.*

*Ce qui auint à
 Mazcate.*

*fonse Melio
& à Garfie
Henriquez, en
l'isle de Bandan.*

a esté parlé au liure precedent, Brittio enuoya quatorze ioncs en Malaca sous la charge de Martin Alfonso Melio qui voguoit en vn gallion equipé à ses despens. Il alla surgir à Lutatan, qui est vn port de l'isle de Bandan, dont les Insulaires furent peu ioyeux, à l'occasion de la guerre des Molucques, tellement qu'ils se deshoient des Portugallois, & ne vouloyent trafiquer ni pratiquer avec eux. Sur cela, Melio sceut qu'en l'isle de Mire, qui est l'une des isles de Bandan, y auoit vn ionc de Patane, ville ennemie de Malaca: à l'occasion dequoy il hausse incontinent les voiles pour aller vers ce ionc & y mettre le feu. Les Mores qui estoient dedans se mirent en armes, si tost qu'ils l'eurent descouvert: neantmoins Melio, qui ne menoit que trente ou quarante soldats, approcha resoluement du ionc, lequel fut acroché en peu de temps, & embrasé par le feu artificiel que les Portugallois y lancerent, ce qui contraignit les Mores de sauter en l'eau où quelques vns furent tuez, les autres gagnerent le riuage & se sauuerent, mais le vaisseau fut entierement brulé avec tout son equipage & ce qui estoit dedans. Et dautant que Melio estoit despité contre ceux de Bandan, il entama la guerre, & fit mille maux. Sur ces entrefaites, George Albuquerque voyant les affaires assez paisibles en Malaca, & que Brittio auoit demandé plusieurs fois d'estre deschargé du gouuernement des Molucques, il y enuoya, suiuant l'ordonnance d'Edouard de Menefez Viceroy, vn de ses capitaines nommé Garfie Henriquez, avec charge de se retirer en l'isle de Bandan, & y dresser quelque fort pour asseurer son trafic, tandis qu'il seiourneroit là. Hénriquez partit avec deux basteaux ronds, vn ionc couuert & vne fusle, acompagné de soixante soldats, non compris les mariniers & canóniers, & arriua pres de Bandan sur la fin de Ianuier l'an mil cinq cens vingt cinq, où il trouua Melio en guerre contre les insulaires. Ayans communiqué ensemble ils deliberent d'assaillir Lotir principal village de ceste isle, apres la prinse duquel ils demeuroyent maistres de tout le reste. Pour executer ceste resolution ils descendirent en terre avec cent soldats, lesquels mirent incontinent le feu en certains petis basteaux liez au riuage, & entrans en pays approcherent de Lotir qu'ils trouuerent clos de plusieurs barrieres & gardé par quelques gens de guerre. Henriquez & Melio firent marcher leurs harquebuziers pour gagner les barrieres, lesquels maugré les fiesches, cailloux & dards qu'on leur iettoit, firent retirer les defendans & commencerent à entrer: mais les Insulaires acoururent promptemēt de tous costez en grād nōbre, descochans telle nuee de fiesches que c'estoit horreur, & à coups de dards blesserent Henriquez & autres, à l'occasion dequoy les Portugallois n'ayās gagné que des coups, & peu endommagé leurs ennemis, furent contrains se retirer en leurs vaisseaux, & depuis se contenterent de faire la guerre sur mer, attendans saison propre pour faire voile en Malaca.

Martin Alfonso de Soufe desfaist par La quexime Amiral de Buntan.

LE Roy de Bintam se resentant des maux que Martin Alfonso de Soufe auoit faits en la coste de Pam & de Patane, delibera s'en venger, sur tout apres auoir entendu de ses espions que Garfie Henriquez estoit allé aux isles de Bandan avec vne partie des forces de Malaca, qui n'estoit alors guerresmunie de gens. Pourtant lui sembla-il auoir trouué l'occasion de recommencer,

mencer, & sur l'assurance de sa victoire fit armer vingt grands lanchars chargez de douze cens soldats equippez de toutes sortes d'armes & engins de guerre, sous la charge de Laqueximene, lequel partit si secrettemēt qu'il se rendit pres de Malaca sans estre descouuert, tellement que le vingtcinquieme iour de Mars de grand matin il print terre pres du bourg de Quelin, où ses gens commencerent à piller & saccager. Les habitans se mettent partie en defense comme ils peuuent, partie à grands cris font tel bruit que George Albuquerque, Martin Alonse de Soufe, & autres qui estoient en vn temple assez pres l'entendirent. Soudain Albuquerque enuoye par terre quatre vingts Portugallois & vingt Malacans sous la conduite de Garfie Chaigne. Soufe mōta sur mer avec deux fustes & septante Porrrugallois. Les vns & les autres partirent en mesme heure pour aller au deuant des ennemis. Quand Laqueximene sentit que les Portugallois approchoyent pour le charger, il retira ses gens es lanchars, & afin que l'artillerie de terre ne les peust offenser, estāt assez pres de lui, & que Soufe s'elargist en mer sans lui nuire, faignit d'auoir peur, se retirant nō gueres loin du riuage, sans lascher aucun coup pour attirer Soufe, lequel estimant que Laqueximene n'osāt attendre, le suiuit de grand' ardeur, canonnant les lanchars & les semondāt au combat. Estant à vne lieue loin de Malaca, Laqueximene tourne les proues de ses lanchars, fait iouer toutes les pieces, & se manie si dextremement qu'il inuestit les deux fustes, commence à les canonner sans relasche, puis s'approche & acroche de quatre lanchars chascune fuste. Mais Soufe avec ses capitaines & soldats fit lors vn merueilleux deuoir, empeschant les ennemis d'entrer es fustes, & ce combat dura depuis deux heures apres midi iusques au soir, le plus furieux qui fut oncques donné en ceste coste de mer. Soufe, Arias Conil, Aluar Botel, Francisque Rabel & quarante deux soldats furent tuez, & huit blesez. Les ennemis y perdirent beaucoup de gens meurtris du canō pour la pluspart: & Laqueximene se cōtentant de la venue qu'il auoit donnee aux Malacans se retira en mer, laissant les Portugallois suruiuans pouruoir à leurs affaires comme s'ensuit.

20. A P R E s la retraite de Laqueximene, les Portugallois eschappez d'un si grand danger, cōmencerent à se reprendre & encourager les vns les autres, & delibererent, quoy qu'il fust nuit, de gagner Malaca, craignans que Laqueximene ne les vint retrouver le lēdemain pour les ruiner du tout. Mais les courantes repousserent les fustes à cinq lieues loin, tellement qu'avec toutes les peīnes du monde ils arriuerēt finalement à vne lieue pres de Malaca, par le moyē d'un vent de terre qui les fauorisa grandement. Or ils furēt contrains demeurer là iusques à midi, ne pouuāt auācer à cause que la merree remōtoit, dont toutesfois Laqueximene ne sceut rien, ains estimāt qu'ils eussent gagné Malaca des le soir, fit voile en l'isle de Dupe pour y faire enterrer ses morts. Albuquerque ne pouuoit donner secours aux fustes n'ayant que deux basteaux, où il falloit beaucoup de gens, & craignant la rencontre de Laqueximene. Mais enuiron midi le vent se leua & commencerent ceux des fustes à desployer les voiles, & cinglerent à l'aide du reflux vers le port de Malaca. Par l'auis d'Antoine Caruail qui conduisoit l'une

Retraite des Portugallois en Malaca après leur desfaite.

des fustes, toute l'artillerie fut chargée pour tirer pres du port, à ce que ceux de terre par ce signal de ioye creussent que les Portugallois retournoient victorieux, & qu'à l'occasio de leur desfaite il ne suruinst quelque trouble. De fait estans assez pres toutes les pieces furent laschees: & incontinent George Albuquerque, le chastellain majeur & autres estimans que Soule eust tout gagné acourent vers les fustes. Lors voyans tel nombre de morts, les fustes lardees d'un nôbre infini de fleches, & entédans ce qui estoit aueu, se prindrent à pleurer chaudemēt. Toutesfois de peur que les Malacans s'esfarouchassent, & pour leur faire croire que les Portugallois estoient demeurez maistres, Albuquerque fit laisser les morts es fustes iusques à minuiēt qu'ils furent enleuez & enterrez au temple. Par ainsi la route des Portugallois fut celee par vn long temps, & disoit-on à ceux du pays que Martin Alfonse de Soule & les autres morts, estoient malades, afin d'oster tout soupçon, quand on ne les voyoit plus pourmener, comme ils auoyent accoustumé.

*Exploits de
Laquexime-
ne apres sa vi-
ctoire.*

Q V A N T à Laqueximene, voyant que les Portugallois se tenoyēt clos ^{21.} pour ne plus s'esprouuer cōtre lui, il resolut de leur aller faire vne autre brauade, & se venger de leurs alliez. Pourtant descendit il en la coste de Malaca pres d'un village assez prochain de la ville, nommé Colascar. Les habitans enuironnez de tant d'ennemis, ne voulurent se mettre en defense, se rendirent vies sauues, & furent chargez hommes, femmes, enfans, bestail, viures & meubles dessus les lanchars de Bintam. Vn Chrestien demeurant en ce village courut en dire les nouuelles à George Albuquerque en Malaca, lequel fit partir promptement Garfie Chaigne avec septâte soldats pour dōner sur la queue des troupes de Laqueximene, selon que l'occasio s'y adonneroit, ce qu'il pourroit conoistre estant au bord d'un ruisseau coulant entre Colascar & Malaca. Chaigne parti sur le soir estant pres du ruisseau ne pūt retenir ses soldats qu'ils ne passassent outre, sans attendre qu'on eust descouuert ce que faisoient les ennemis, qui estoient encores au village, acheuans de le piller. Mais quand ils sentirent les Portugallois, craignans qu'Albuquerque n'y fust avec toutes ses forces, ioint que la plupart estoient es lanchars, ils se retirerent vistement pour s'elargir en mer, sans que Chaigne & ses gens en peussent attrapper pas vn, ains trouuerent le village sans habitans, & apres en auoir tiré quelque quātité de riz & vn peu d'autres choses que les ennemis n'auoyent eu loisir d'emporter, ils retournerent à Malaca, estant lors pres de la minuiēt. Laqueximene print la route de Bintam, se contentant pour ce coup des maux que son armee auoit faits aux Portugallois.

*Laqueximene
et le Roy de
Draguin des-
fais par la
flotte de Por-
tugal venue
au secours du
Roy de Lau-
gue.*

A quelques iours de là suruint vn accidēt par le moyen duquel les Por- ^{22.} tugallois se vengerent de leurs pertes. Le Roy de Bintam irrité contre celui de Lingue voisin de Malaca, deuenu ami des Portugallois, ausquels il enuoyoit des viures, delibera lui courir sus: & pour cest effect arma cent septante lanchars sous la conduite du Roy de Draguin son gendre & de Laqueximene, qui menerent en ceste flotte fournie de canons & de toutes munitions de guerre, huit mille hommes bien equippez. Avec ceste armee
ils

ils assiegerent de si pres le Roy de Lingue, que se voyant sans moyens de pouuoir subsister il enuoya demander secours à Albuquerque, lequel promit s'y employer & conclud le faire, encores que cela fust malaisé tant à cause du petit nombre de gens qu'il auoit, blesez pour la pluspart & saouls de la guerre, que pour la peur que chascun auoit de ceste puissante flotte de Bintam en laquelle estoit Laqueximene. Neantmoins Alvarez Britio & Balthazar Roderic Rapoze, l'uiuis de cinquante Portugallois, s'embarquerent en deux basteaux pour entrer en la ville de Lingue, s'il leur estoit possible. Estans arriuez en vne petite isle, qui est à la portee d'un fauconneau pres de Lingue, ils furent contrains mouiller les anchres à cause que la marée se retiroit, mais de peur que les ennemis ne coupassent les gumentes ils attachèrent des chaines de fer aux anchres pour les retenir & leuer à leur commodité. Laqueximene & le Roy de Draguin estimans tenir desia ces deux basteaux en leur puissance commencerent à ranger leurs lanchats, & enuoyer sonder l'eau, pour inuestir les Portugallois, lesquels apperceurent bien qu'on ne les lairroit gueres en repos, pourtant s'apprestèrent au combat avec force engins à feu, tenans leurs harquebuzes & pieces toutes prestes. Et pour empescher d'estre acrochez, ils reuestirent leurs basteaux de nattes de paille fort espaisces & qui aualoient iusques à fleur d'eau, ne laissans que les proues & pouppes descouuertes. Si tost que les ennemis sentirent la marée baisser, ils se partirent en deux flottos avec grand retentissement de tabours & instrumens de guerre qui sonnoient par interualles, & n'auoyent plustost cessé que les soldats se prenoient à crier & chanter vne chanson en langage Malacan à la caderce des rames, dont le refrain estoit, Vous estes prins à ceste heure, comme les poissons au filé. Mais il en auint autrement, car à l'approcher Antoine Caruail deschargea tant à point vn fauconneau qu'il brisa vn lanchar, & soudain iouerent quatre autres pieces qui rompirent onze lanchars & tuerent beaucoup d'ennemis. Laqueximene voulant auoir les deux basteaux entiers & les Portugallois en vie, ne fit lascher ses pieces, ains approcha pour acrocher les basteaux, ce que ses gens ne peurent faire à cause des nattes. Il commença lors à leur dire mille iniures, & eux demi desesperez tiroient flesches enuenimees, dards & zagayes entel nombre que les basteaux sembloient à des herissons, & n'y auoit chordage ni equippage qui fust entier. Ce nonobstant les Portugallois cōbatoyent de grand courage, harquebuzans incessamment & dards leurs engins à feu avec telle dexterité qu'ils ne perdoyent pas vn coup, ioint aussi le grand nombre d'ennemis, à trauers desquels ils desserrèrent vne de leurs plus grosses pieces qui fit vn terrible rauage, & mit à fond quelques vns de leurs lanchars. Neantmoins Laqueximene & le Roy de Draguin recommencerent de plus grande furie qu'auparauant: mais le cœur croissoit aux Portugallois. Sur ce il auint cōme Antoine Caruail aprestoit vn pot de feu artificiel pour le lâcer de la pouppe de son bateau en vn lanchar qui le tenoit assiégué, qu'Alfonse Gilles le pria de lui laisser ceste charge, & comme il estoit prest à faire son coup, vn dard ietté du lanchar des ennemis fit tomber ce pot à ses pieds, & le feu se prenant à Alfonse brus-

la vne partie de ses ennemis & s'espandit incontinent par le basseau. Les ennemis estimans que ce basseau deust brusler, commencent à faire tous leurs efforts d'y entrer par les deux petites portes du timon, ou quelques Portugallois coururent incontinent, avec le canonnier qui marchoit le premier pour mettre le feu à vne piece qui estoit dans l'une de ces portes. Mais dautant que les ennemis estoient desia dessus & autour de ceste piece, il ne pût executer sa volonté, & de despit qu'il eut de se voir ainsi empesché empoigne au poil le premier qui se rencontra, & du pommeau de son espee lui cassa les machoires: ce que voyas les autres ia entrez ou prests à monter se retirerent viftement, si que le canonnier eut loisir de descharger ceste piece & quelques autres, qui firent voler bras, iambes & testes d'une estrange sorte: tellement que les ennemis perdans esprit & force, non obstant les cris de leurs generaux qui les rappelloient au combat, quitterent la partie, laissant grand nombre des leurs au fond de la mer, sans les blesez. Les Portugallois n'y perdirent qu'un homme nommé Louys Perez, & dixsept blesez, qui en guerirent pour la plupart. Apres que Laqueximene eut esté ainsi repoussé, les Portugallois entrerent en grande ioye, & avec fanfare de trôpettes, son de tabours & harquebuzades, au port de Lingue, où ils furent receus du Roy, de son fils & de son gendre, avec infinis remerciemens de leur arriuee & secours: puis ayas pourueu à ce qui estoit requis pour la seureté de ceste place se retirerent avec quelques viures necessaires pour soulager la disette de ceux de Malaca.

Recommencement de guerre du Roy de Bintam contre Malaca & quel en fut le succès.

COMBIEN que le Roy de Bintam eust receu ce coup de baston en la 23. desfaite d'une partie de son armee, si ne desista-il d'en vouloir aux Malacans, estimant faire beaucoup, s'il pouuoit couper les viures aux Portugallois. Et non content d'enuoyer Laqueximene avec vne armee navale, despescha aussi par terre ce renegat nommé Auelar, avec quatre mille hommes, lesquels se camperent à demie lieue pres de Malaca. Ce qui mit Albuquerque en plus grande peine que iamais, dautant qu'il n'auoit pas lors plus de cent Portugallois propres à la guerre, encores y en auoit-il vne partie malades, lesquels il logeoit es forts & corps de garde pour les defendre au moins mal que possible seroit, ayans à combattre de pied ferme en des endroits. Les affaires estans en cest estat, vne nuit les ennemis assaillirent la bourgade de Quelin par vn endroit fermé de palissades pourries de vieille, tellement qu'au premier abord ils en firent tóber par terre la longueur de soixante brasses. Le bruit fut tel que les habitans qui dormoyent s'esueillirent & coururent voir que c'estoit, mais ils trouuerent les ennemis dedans qui tuerent quelques hommes, & en emmenerent d'autres. Les Portugallois suruindrent au cri des echappez, & garderent la bresche iusques au point du iour qu'Albuquerque la fit reparer. Depuis Auelar fit continuer les escarmouches & courses, de telle sorte que les Portugallois, contrains d'estre iour & nuit au guet les armes sur le dos, & mal nourris, commençoient à defaillir du tout: mais Albuquerque & Garfie Chaigne les soulagerent de viures & les encouragerent tellement qu'ils continuerent iusques au bout, tellement qu'Auelar fut contraint se retirer en vn lieu nommé

Penagin

Penagin à sept lieues loin de Malaca, d'où il faisoit quelques courfes. Vn iour il fit vn banquet aux capitaines & principaux de fon cāp, lesquels apres auoir fait grand' chere & beu à outrance firent ferment es mains les vns des autres d'aller en Malaca, & rapporter la teste de Garfie Chaigne qu'ils hayffoyent plus que nul autre Portugallois. Incontinent ils s'embarquerēt avec leurs plus affeurez soldats au nombre de deux cens septante hommes, en douze lanchars, paraus & calaluz. Estans entrez en vn fleueue à deux lieues de Malaca, ils mirent leurs vaisseaux à couuert sous des arbres pres du riuage, & s'auancerent plus pres de la ville, enuoyans quelques coureurs qui alerent tuer des vaches au pastutage. Les Portugallois sortent pour aller apres ces coureurs qui se retirent comme fuyans vers leur embuscade. Garfie Chaigne qui menoit la troupe les ayant perdus de veue se retire avec ses soldats, exceptez six qui se desbanderent & prindrent vn chemin non accoustumé, tellement qu'ils approcherent de l'embuscade, & voyans tant d'ennemis vouloyent se sauuer à la course : mais Frâcisque Correa l'un des six, afoibli de maladie & ne pouuant à peine se soustenir, retint les compagnons, qui se rangerent si dextrement autour de quelques arbres, qu'apres auoir mis par terre à coups d'harquebuzes & de picques onze des plus eschaufez, ils contrainquirent les autres de se retirēr. Eux ayans si bien fait cōtre leur esperance, regaignerent la ville & firent entendre le tout à Albuquerque, lequel renuoya sur l'heure Garfie Chaigne apres les ennemis, qui voyans la resolutiō des Portugallois, cōmencerēt à fuir au long du riuage, afin qu'on n'estimast qu'ils fussent venus en des vaisseaux. Neantmoins les Portugallois cercherent si bien qu'ils trouuerent ceste flotte, dont la plupart fut bruslee, le teste mené à Malaca. Autre chose notable n'auint en ceste guerre, qui dura iusques à l'arriuee de Pierre Mascaregne. Depuis la mort de Martin Alфонse de Souze iusques alors moururent deux cens quarante Portugallois, tant de blessures, que de faim & autres incommoditez, les suruiuans assistez d'Albuquerque & de Chaigne en toutes sortes possibles, comme nous auons dit.

24. PIERRE Mascaregne tenant avec sa flotte la route de Malaca pour y commander, trouua vne nef de Mores de Cambaje, chargee de grandes richesses, qui furent pillées, & Iacques Chaigne, qui alloit en ce voyage pour estre facteur du Roy de Portugal en Malaca, ordōné capitaine de ceste nef, avec laquelle il surgit au port de Malaca. Garfie Chaigne ayant entendu la venue de son frere, monta en vn calaluz avec treize autres, estant vestu si superbement, que son espee, le fourreau, la ceinture & les pendans valoyent deux mille ducats. Au sortir du fleueue le calaluz receut telle secousse d'vne vague, qu'il print eau & coula en fond, tellement que Garfie & tous ceux qui l'accompagnoient furent noyez, excepté vn Malacan, & telle fut la fin de ce personnage qui auoit fait de grands seruices à son Prince. Iacques son frere print possession de tous ses biens. Tost apres arriua Mascaregne, lequel en vertu des lettres patentes du Roy fut receu & establi gouverneur par Albuquerque. La premiere chose qu'il fit fut d'emprisonner Iacques Chaigne, pour s'estre mis en possession des biens de son frere, sans autorité

*Pierre Ma'sca
regne establi
gouverneur de
Malaca & ses
premiers ex-
ploits.*

de iustice, à quoy faire il estoit obligé selon son dettoir & pour l'acquit de sa charge, puis l'enuoya en l'Inde basse, où il mangea toute ceste succession pour recouurer sa liberré. Le Roy de Bintam ayant eu nouuelles de l'arrivée du nouveau gouverneur, ne pouuoit croire qu'il y eust, encor des Portugallois en vie pour ofer lui faire teste: pourtant leua-il vne nouuelle armee pour assieger la citadelle de Malaca. Encores que les Portugallois fussent en petit nombre, harassez du trauail des mois precedens, contrains de veiller & porter les armes iour & nuict, si est-ce qu'ils sortoyent souuent à l'escarmouche, où Mascaregne marchoit des premiers & menoit sagement ses soldats. Vne fois entre autres prisonniers il ramena vn capitaine de Bintam & vn soldat qui s'estoyent bien defendus. Ce capitaine ferré dedans la citadelle trouua moyen de se saisir d'un poignard, & en tuoit Mascaregne sans l'auctissement qu'on lui donna par vn cri soudain: tellement qu'il eut assez affaire de destourner le coup. Mais pour punition d'un tel attentat il fit ietter ce capitaine du haut de la grosse tour de sa citadelle en bas. Le soldat fut attaché à la bouche d'une piece pour estre desmembré en l'air, mais en faisant le coup la piece creua & tua le canonnier. Or comme la guerre continuoit, Mascaregne voulant se mettre vn peu au large, & tailler de la besongne au Roy de Bintam, enioignit à Arias de Cugne Amiral de Malaca d'aller avec son gallion & quelques fustes couper les viures & rompre le trafic de Bintam: ce qui fut executé au grand desauantage des ennemis. Au mesme temps Martin Alfonse Melio ayant hyuerné autour de Bandan arriua au port de Malaca, & fut prié par Mascaregne d'aller faire la guerre au Roy de Patane, lequel s'estoit rebellé, comme nous l'auons veu ci dessus. Quoy que Melio ne fust encores bien guéri de sa blessure, neantmoins il accepta ceste commission, & remonta dans le gallion du capitaine Rapoze, qui eut charge d'un autre vaisseau, & tint compagnie à Melio, ensemble Louys Brandan qui commandoit en vne carauelle, & quatre lanchars, avec deux cens Portugallois. Avec ceste flotte Melio assaillit seize ioncs anchrez au port de Patane, tua la pluspart de ceux qui estoient dedans, & pillà ces ioncs: au moyen dequoy le Roy de Patane fut contraint demander la paix, offrant payer tous les dommages que les Portugallois auoyent receus en ce port, & d'enuoyer en Malaca les viures que lon voudroit tirer de son royaume, à condition que lon rendist les seize ioncs. Cela fut accordé par Melio, lequel fit voile de Patane en Malaca, puis se retira en l'Inde basse.

SUR le commencement de May, saison propre pour nauiguer aux Molucques, Garfie Henriquez partit de Bādan, & suiuanr sa route arriua en l'isle de Ternate, lors qu'Antoine Brittio vouloit enuoyer assaillir vne place appartenante au Roy de Tidore. Ayant mouillé l'anchre à Talangame, qui est le port des ioncs & des nauires à deux lieues loin de la citadelle, il enuoya faire entēdre sa venue à Brittio, & qu'il venoit pour estre gouverneur des Molucques: pourtant demandoit-il que la citadelle lui fust liuree, & n'estoit deliberé de prendre terre que cela ne fust fait. Brittio estonné d'un message si precis, fut sur le point de l'esconduire tout à plat: toutesfois pen-

sant

*Arrivée de
Garfie Hen-
riquez, aux
Molucques,
& ce qu'il y
fit.*

fant vn peu mieux à soy il le fit prier de se desembarquer, promettant de faire tout ce qui seroit pour le seruice du Roy. Garsie refusoit tousiours de quitter ses vaisseaux, que premierement Brittio n'eust consigné la place, craignant que s'il descendoit son competeur ne le depossedaſt de la flotte & de la citadelle tout en vn coup. Neantmoins à la parfin il descendit sur la foy de Brittio qui le recueillit avec fort bon visage, le mena dîner en la citadelle avec le faſteur & le chaſtelain. Apres dîné, Henriquez vouloit montrer ses lettres d'estat à Brittio & demeurer maistre de la citadelle: ce que Brittio refusa du commencement, mais quelques heures apres elles furent leues en presence du chaſtellain & autres officiers du Roy. Ce qu'estant fait, Brittio dit, encor qu'il eust moyen de disputer sur certaines ambiguittez contenues en ces lettres, & tirer les affaires en longueur, neantmoins estoit prest de quitter la place au mois de Ianuier ſuiuant, & non pluſtoſt, pource qu'alors la saison estoit propre pour aller des Molucques à Malaca. Apres quelques conteſtations, ils allongerent le terme iuſques au mois d'Aouſt ſeulement, & fut arreſté que pendant ce temps ils demeureroient enſemble dedans la citadelle, ce qu'ils accepterent, & furent grands amis tout ce temps là, Henriquez eſtant reconnu ſelon la teneur de ſes lettres.

* *

FIN DV QVINZIESME LIVRE.





L E SEIZIESME LIVRE.

S O M M A I R E.

- | | |
|--|---|
| <ol style="list-style-type: none"> 1. Renouuellement de guerre entre le Roy de Calecut & les Portugallois. 2. Citadelle de Calecut ceinte d'un fossé par les ennemis. 3. Exploits de Jean de Leme capitaine de la citadelle pour se défendre contre les Calecutiens. 4. Commencement de siège & batterie de la citadelle. 5. Fortification nouvelle des Calecutiens. 6. Secours demandé au Viceroy par Jean de Leme. 7. Divers efforts des Calecutiens pour emporter la citadelle. 8. Arrivée de Christophe Lusarte au secours de la citadelle, & ce qu'il fit. 9. Autre secours envoyé par le Viceroy à Jean de Leme. 10. Nouveaux engins dressés par les Calecutiens contre la citadelle, & ce qu'il en ensuivit. 11. Fortifications des Portugallois pour leur défense. 12. Inventions admises aux précédentes pour forcer la citadelle, & dequoy servirent. 13. Hectier de Sylveire & Francisque Pereira secoururent Jean de Leme. 14. Combat entre les Portugallois & Calecutiens, & ce | <ol style="list-style-type: none"> qui s'ensuivit puis apres au siège de la citadelle; 15. Césails tenus & moyez suivis par le Viceroy pour secourir les Portugallois & combattre les ennemis. 16. Bataille entre le Viceroy & les Calecutiens campés deuant la citadelle, & quelle en fut l'issue. 17. La citadelle de Calecut desmolue par le commandement du Viceroy. 18. Ce que fit le Roy de Calecut apres le départ des Portugallois. 19. Rencontre & bataille sur mer entre George Albuquerque & le gouverneur de Porquæ. 20. Avantures des capitaines Portugallois partis des Moluques pour aller en l'isle de Celebo. 21. Differens entre Antoine Britto & Garsie Henriquez en la citadelle de Ternate, & ce qui en suivit. 22. Retraits du Viceroy de la coste de Malabar en Cananor. 23. Malabares desfaits par George Tello au sieur de Baccanor. 24. Mort & enterrement de Henri de Meneses Viceroy avec vn brief discours de sa vie & de ses vertus. |
|--|---|

Le Roy de Calecut sous ombre de paix se dispose à vne cruelle guerre contre les Portugallois.



O V R C E que le Roy de Calecut auoit delibéré de se rendre maistre de la citadelle, il s'auiſa d'endormir (s'il estoit possible) ceux qui la gardoyent, afin d'en cheuit plus aisément puis aptes. Pour cest effect il enuoye au Vicetoy qui estoit en Cochim vn espion nommé Lambeamorin, avec lettres de creance, pour traiter de la paix & coucher par eſcrit les articles qu'ils trouueroyent conuenables pour l'entretienement d'icelle. C'estoit afin d'oſter aux Portugallois toute opinion de guerre, & les garder de fournir la citadelle des choses qui y estoient nécessaires pour soustenir vn siege. Lâbeamorin ariua sur la fin de May au port de Cochim, presenta ses lettres de creance, & dit au Viceroy qu'il auoit charge de la part du Roy de Calecut de traiter la paix: ce que le Viceroy fut content de croire, à raison de la guetre qu'il pensoit commencer contre le Roy de Cambaje, & dit à ce député

puté qu'il pacifieroit à condition que lon rendist toute l'artillerie appartenante aux Portugallois, & tous les paraus du royaume de Calecut, autrement c'estoyent paroles perduës de discourir sur les articles de pacificatiõ. Outreplus le Viceroy demandoit qu'on lui liurast certains Mores à la satisfaction desquels on auoit tué quelques Portugallois & brulé le temple de saint Thomas à Cranganor, & qu'ils payassent vne somme raisonnable pour rebâstir cet temple. Lambeamorin s'en retourna avec ceste responce, promettât faire accorder le tout au Roy son maistre, & là dessus dressa des articles soussignez de sa main, lesquels il enuoya de Calecut au Viceroy. Mais c'estoyent promesses en papier & sans aucun effect, car Lambeamorin ne retourna plus, & n'escriuit chose quelconque pour l'execution des articles: dautant que le Roy cuidoit auoir temps propre pour commencer la guerre, l'hiuer estant ia commencé en ce pays là, tellement que Jean de Leme ne pourroit estre secouru il enuoya son lieutenant general avec douze mille hommes, pour ceindre la citadelle d'un fossé depuis vn des bouts où elle regarde la mer iusques à l'autre, puis d'une tranchee, afin de mettre ses gens à couuert & empescher que l'artillerie des Portugallois ne les greuaist. Il despescha par mesme moyen vn Chrestien renié, Sicilien de nation, qui estoit maistre de camp, & grand ingenieur, lequel s'estoit trouué au camp des Turcs au siege de Rhodes, trois ans auant ceste guerre de Calecut. Toute ceste armee descendue en terre alla incontinent se camper autour de la citadelle, pour reconoistre la place, sans espargner les coups de fiesches & de harquebuzes. Mais pource que les pieces de la citadelle iouoyent ils n'osoyent se môstrer, ains tiroient d'entre certaines mazures assez proches de là. Jean de Leme, cheualier sans peur, exhorta incontinent les capitaines qui l'accompagnoient de faire vne sortie sur les Mores pour leur monstrer qu'on ne les redoutoit en sorte que ce fust: ce que les capitaines executerēt avec leurs harquebuziers d'une adresse si brusque & courageuse qu'ils contrainquirent les ennemis de se retirer dedans la ville, puis rentrent tous dedans la citadelle, que Leme auoit fournie de matieres necessaires pour entretenir les pouldres & reparer les bresches au besoin, se doutant bien de ce qui auint tost apres.

2. Le lendemain matin apres ceste escarmouche les gastaours des ennemis commencerent à creuser le fossé qu'ils auoyent aucunement entamé durant la derniere guerre, & vouloyent fermer la citadelle d'un riuage iusques à l'autre. Leme se doutât bien de leur deliberation taschoit de les molester par tous moyens possibles: & combien qu'il n'eust pas plus de trois cens homes de fait & propres à porter les armes, si ne laissoit-il d'attacher tous les iours l'escarmouche, dõt les Portugallois ne reuenoyēt iamais que les ennemis ne perdissent quelques gens. Mais ils estoient en tel nôbre que leur ouurage s'auaçoit, resolu, à quelque pris que ce fust, de paracheuer, si que Leme apperceut qu'on vouloit par tel moyē lui trācher toute esperāce de secours. Pour y remedier, ses capitaines lui conseillerent de dresser depuis la forteresse iusques au riuage vne closture ou terrasse assez large, & dessus vne forte palissade: ce qui fut diligemment executé de nuict &

Les Calcutiens commencerent à faire leurs approches de la citadelle, & avec quel succès.

en peu d'heures. De là en auant il y eut tousiours garde sur ceste terrasse, pour empescher que les ennemis n'y iettassent le feu. Et pource que la factorerie & la tour des munitions estoient hors de la citadelle, en grād danger d'embrasement, Leme fit transporter tout ce qui y estoit en la citadelle : mais ce fut avec grande peine, à cause de la resistance des ennemis qui s'obstinoient au combat, encores qu'ils n'y gaignassent que des coups. Ces maisons vuidées, les Portugallois qui y faisoient garde endommageoient fort les ennemis, à coups de harquebuzades qu'ils tiroient à couuert sur ceux qui s'approchoient trop pres de la citadelle : & sur la retraite Leme faisoit vne sortie courant iusques dedans le fossé, avec force engins à feu dont plusieurs estoient grillez, tellement qu'il les arresta long temps auant qu'ils eussent paracheué ceste entreprinse. Le Sicilien desireux d'auancer la besongne fit dresser des mantelets de bois tellement accommodez que les pionniers trouuoyent tousiours à couuert, & par ainsi l'artillerie ni les engins à feu ne les pouuoient offenser. Pour cela Leme ne discontinua pas ses escarmouches, mais à faute de gens il estoit contraint se retirer quelquefois plustost qu'il n'eust voulu. Au contraire le Sicilien auoit tant d'hommes en main qu'il conduisit sa tranchee fort auant, & commença à faire vne leuee de terre pour y dresser vn trebuchet & engin propre à darder pierres & gros cailloux dedans la citadelle durant la batterie, afin d'empescher les assiegez de remparer. Combié que Leme ne comprinst pas du premier coup le dessein de cest ingenieur, neantmoins il resolut avec ses capitaines d'empescher le paracheuement de ceste leuee, & fit sortir Vasque & George de Leme avec cinquante soldats sur huit cens hommes trouuans à cest ouurage, aucuns desquels furent tuez & les autres mis en route, sans que les Portugallois y eussent rien perdu sinon vn soldat & deux blesez qu'ils remenerent. Depuis cela les ennemis reuindrent & continuoient avec deux fois autant de besongnās : mais Leme leur courut sus de telle impetuosité, & en fit si sanglante boucherie, qu'ils abandonnerent entierelement ceste fortification.

*Exploits de
Jean de Leme
pour se defendre
contre les
Calecutiens.*

C E pendant les Mores de Calecut estoient merueilleusement ioyeux de voir la citadelle assiegee, car c'estoit par leur conseil que le Roy faisoit ceste guerre, lequel aussi ils aidoyent de tous leurs moyens pour forcer ceste place, esperans qu'apres la ruine d'icelle ils recouureroyent leur credit, perdues Indes. Mais ils n'osoyēt en sonner mot deuāt les Naires, qui leur disoyent mille iniures, les accusans d'estre propres à esmouuoir guerre & reduire le Roy au hazard de perdre son estat, & que ceste querelle esmeue contre les Portugallois ostoit la commodité des viures, & feroit mourir de faim grands & petis. Ce nonobstant le Roy de Calecut fauorisoit les Mores à cause de leur bourse assez profonde, de laquelle il tiroit les moyens de entretenir la guerre : car sans cela, & si les Mores eussent quitté le royaume de Calecut, ce Roy demeueroit à sec, de sorte qu'eux pour regagner leur credit presques du tout perdu, pratiquoyent avec lui pour entretenir & poursuivre ceste guerre à leurs despens. Et pource qu'ils fauoyent que sa presence presseroit dauantage la citadelle, ils le prierent d'aller à Calecut, ce qu'il fit

fit avec vne puillante armee & y arriua au commencement de Iuin, acompagné de plusieurs Rois & Seigneurs ses confederes. A la monstre generale se trouuerent nonante mil hommes outre les Mores & les Naires qui faisoient nombre de deux mil harquebuziers, avec de l'artillerie à force pour battre la citadelle. Si tost que le Roy fut descendu il se deguisa & avec bien peu de gens alla reconnoistre la place, & voyant vne si petite forteresse s'estōna de ce que l'on tardoit tāt à prédre ceste poignée de pierres & de bois. A quoy son maistre de camp fit responce que c'estoit chose plus malaisce que le Roy n'estimoit, pource que les Portugallois la gardoyent si biē, que les Calecutiens pourroyent se vanter d'estre venus à bout d'une tresbelle entreprise, s'ils emportoient ceste place en dedans quelques semaines. Le Roy repliqua qu'il s'en feroit maistre, & qu'il n'auoit amenētant de gens que pour cest effect: puis s'en retourna au palais, & ce mesme iour enuoya vne compagnie d'archers autour de la forteresse, lesquels furent chassez à coups d'harquebuzes & de canons, & laisserent cinquante des leurs sur la place. Pour faire despit à Iean de Leme le Sicilien lui fit dire que le Roy estoit arriué, exaltant merueilleusement les forces d'icelui: mais Leme fit telle responce que ce renegat demeura confus. Au reste, encores que les ennemis ne continuassent leurs escarmouches, Leme ne laissoit de sortir presques ordinairement sur ceux qui trauailloyent iour & nuict au fossé, & leur donnoit tant d'alarmes qu'ils s'esbahissoient qu'une si petite troupe de gēs peust faire tant d'efforts. Depuis, Leme voyant que l'escarmouche aux fossés le ruinerait peu à peu, se contenta de loger ses soldats en la facturerie & en la tour des munitions, d'où ils harquebuzoyent par les canonnières & abatoyent tousiours quelques vns. Ce que voyant le general de l'armee, amassa vn iour ses harquebuziers, les faisant tirer par ordre & si dextrement depuis midi iusques au soir, qu'ils rōpirent les canōnières des Portugallois, & sans vne grosse poultre mise en trauers, & à la faueur de laquelle quelques pieces battoient l'ennemi, les Portugallois estoient en danger de mort, car ils eussent esté tuez en ces lieux, ou accablez du grand nombre d'assaillans s'ils fussent sortis en place. Mais leurs pieces iouerent si biē pour eux que les ennemis se retirerent. Incontinent Leme consulta avec ses capitaines, s'il falloit garder ceste facturerie & l'autre maison. La resolution fut qu'on y mettroit le feu pour obuier à plus grāde incommodité: & en mesme heure l'une & l'autre furent embrasées, au grand contentement des ennemis qui auoyent esté tant fouettez de ces deux endroits, & qui s'asseuroient de paracheuer leur fossé plus aisément, quand tous les Portugallois seroyent dedans la citadelle. Leme ayant fait reueue de ses soldats, trouua comprins les gentilshommes & capitaines encores trois cens hommes, dont quelques vns estoient blessez: puis visita les viures & trouua qu'il y auoit de l'eau douce pour vn an, moyennant qu'elle fust mesnagée, à quoy il pourueut, empeschant que les esclauens n'y jettassent quelque poison, & engardoit lui mesmes la clef. On trouua aussi du riz pour vn an, & quelques autres victuailles pour vn mois ou enuiron. Outreplus il establit six corps de garde sous la charge de Vasque de Leme, Antoine de Sa, George

de Leme, Roderic Melio, Jean Rabel, Antoine de Serpe & Manuel de Far, prenant la charge quant à lui avec quelques gêtilshommes de secourir au besoin les plus foibles endroits. Et pource que la citadelle estoit de forme quarrée, les vns pouuoient aisément voir & aider les autres.

*Commencement
du siege &
batterie de la
citadelle.*

LA nuit suiuaute l'embrasement de la facturerie & de l'autre maison, 4- les ennemis besongnerent si diligemment au fossé & en la tranchée, qu'ils acheuerent la besongne, qui auoit vne picque de profond & à vn iect de pierre de la citadelle, & pouuoient cheminer dans le fossé & la tranchée sans pouuoir estre offenzés de l'artillerie des Portugallois. Ils auoyent fait cela pour poser deux corps de garde avec force artillerie aux deux bouts, pour empescher le secours qu'on pourroit dōner du costé de la mer à ceux de la citadelle. Le iour venu ils placerēt du costé de Septentrion deux grosses pieces, & commencerent à les lascher contre la citadelle. En apres ils dresserent vne autre batterie au lieu où les deux maisons sus-mentionnees auoyent esté, & avec vn double canon qu'ils auoyent prins aux Portugallois, & couuert à cause des pluyes d'une couuerture espaisse esleuee proprement. Ce canon battoit la tour où estoyēt les pouldres. Au mesme endroit y auoit vne autre couuerture sous laquelle furent disposez quatre canons, qui tiroient le boulet de fonte assez gros contre le pan de muraille depuis le boulevard de la citadelle iusques à ceste tour des pouldres. Du costé de Midi fut dressée vne autre batterie de sept pieces, dont les quatre portoyēt le boulet de pierre, les trois de fonte, donnans contre la muraille du boulevard. A l'Orient estoyent disposees sept grosses pieces, cinq à boulets de pierre, deux à fonte, & tiroient à vne muraille entre le boulevard & la tour des pouldres, ensemble à ce boulevard & aux deux tours. Il y'auoit encor deux autres batteries au Septentrion & au Midi chascune de six canons sur rouës pout tirer aux vaisseaux qui voudroyent donner secours par mer, & ce pendant battoient la citadelle de ce costé: estans toutes ces batteries à vn iect de pierre de la citadelle. La batterie commēça le treiziesme de Iuin au point du iour, avec vn tel tonnerre & si espaisse fumee qu'on n'oyoit ni ne voyoit rien: mais pat l'ignorance & peu d'experience des canonniers ce furent autant de coups perdus, pource qu'ils donnoient trop bas ou trop haut, ce qui descouragea fort les assaillans, & au contraire encouragea les assiegez plus que deuant.

*Fortification
nouuelle des
Calecutiens.*

L'INTENTION des ennemis estoit de rompre à coups de boulets les 5- pieces de la citadelle: toutesfois ils ne gagnerent pas beaucoup par ce moyen. Vray est qu'un soir ils tirerent vn coup du costé de la ville, lequel rompit quelques bouts de muraille & la cloche qui seruoit à sonner la garde. Incontinent les Portugallois coururent à la bresche & reparent ce dōmage, cōme ils auoyent fait en plusieurs autres endroits auparavant. Or le Sicilien voyant que le Roy de Calecut estoit à demi desespéré à cause de l'insuffisance de ses canonniers, l'assura de dresser vn engin par le moyen duquel on emporteroit la forteresse. C'estoit vne leuee de terre, de cailloux & de fascines meslees ensemble, par l'industrielse diligence des gastadours, pretendans la rendre aussi haute que la forteresse, pour

pour puis apres acabler à coups de pierres ceux de dedans. Au commencement les Portugallois estimoyent que les ennemis voulussent combler les fossez pour eschellér puis après la muraille, & pourtant firent provision de grenades, pots & lances à feu. Leme estoit en merueilleuse perplexité à cause du grand nombre des ennemis qui l'environnoyent de toutes parts, & n'y auoit apparencé que de grande confusion pour lui & les siens s'il faloit combattre main à main. Sur cela il assemble les capitaines par l'auis desquels fut conclud d'enuoyer vers le Viceroy pour obtenir renfort de cent hommes & quelques pouldres, avec vn ample discours de tout le passé. Leme enuoya suiuant ceste resolutiō vn messager expres dedans vne almadie, n'ayant lors aucun autre vaisseau.

6. Les nouuelles de ce siege volerent iusques aux oreilles du Viceroy, lequel attendoit que le Roy de Calecut enuoyast les articles de pacification accordez & signez. Mais entendant tout le contraire il se trouua merueilleusement perplex : car l'hiuer estoit ia auancé, la pluye impetueuse, la nauigation dangereuse, tellement qu'il n'osoit enuoyer secours. Tost apres il sceut plus au vray que Iean de Leme estoit serré de bien pres, & que les ennemis deliberoient d'en voir la fin à quelque pris que ce fust. Pourtant fit il equipper promptemēt deux carauelles, vaisseaux plus propres que nuls autres en nauigatiō fascheuse. En ces entrefaites l'almadie arriva au port de Cochim le dixiesme de Iuillet, ayant passé mille dangers en ce voyage. Alors le Viceroy entendit par le menu en quel estat les affaires se trouuoient reduites, & lors quelques gentilshommes voyans la necessité se presenterēt alaigrement pour aller au secours, entre autres Manuel Cernige, Edouard de Fonseca & Christofle Iufarte, avec lesquels s'embarquerent cent quarante soldats Portugallois es deux carauelles sous la charge de Iufarte. Fonseca alloit dans vne autre carauelle, & partirent tous ensemble en grand hazard hors de la fosse de Cochim le treiziesme de Iuillet, avec commandement de voguer en toute diligence, d'approcher au plus pres de la citadelle, & faire iouer leur artillerie contre les batteries qui seroyent de ce costé. Que durant ces canōnades ils entraissent en deux paraus qu'ils menoyēt attachez à leurs carauelles, & voltigeassent en attendant auis de Iean de Leme, sans quoy leur estoit defendu de prendre terre. Apres le depart de ces carauelles, le Viceroy craignant qu'elles ne courussent fortune de costé ou d'autre à cause de l'inconstance des vens, & ne peussent gagner Calecut à temps, tellement que la citadelle demeureroit despourueue, entoya apres vne galliote avec le plus de gens qu'il fut possible de trouuer, sous la conduite de François Vasconcel, avec charge, si la citadelle n'estoit encores secourue des carauelles d'aller à Cananor dire a Hector de Sylueire que le Viceroy lui cōmandoit secourir Leme, pource que ce luy estoit chose plus aisée qu'au Viceroy. Au mesme instant il despescha vn courrier par terre pour auertir Sylueire de toutes les particularitez de ce siege, & des gens qui y alloient au secours : lui enioignant d'y marcher en personne, & d'y mener autant de soldats, de viures, & munitions de guerre, que possible seroit.

Secours demandé au Viceroy par Iean de Leme.

*Diners efforts
des Calecutiens
pour emporter
la citadelle.*

DEPUIS que Leme eut enuoyé quérir du secours, les Mores n'ayans 7- la patience de voir acheuer leur levée de terre, firent dresser vn trebuchet pour lancer impetueusement en la citadelle des cailloux fort pesans, par le moyen desquels ils brisoient les bouleuards & maisons. Ils commencerent à s'en aider le premier iour d'Aoust, tirans à la tour des pouldres pour la ietter par terre, & dardèrent de telle roideur six cailloux l'un apres l'autre, que la muraille se creua. Leme voyant cest effort, & qu'il y auoit danger pour les pouldres qui estoient en la tour, les fit transporter le mesme iour en vn autre boulevard, avec grand travail & peril de ceux qui s'y employerent. Ce trebuchet ayât foudroyé l'espace de quatre iours, mit par terre vn quartier de la tour, ce qui estonna Leme: mais Jacques Perez maistre canonnier de la citadelle le consola, promettât, à l'aide de Dieu, de faire trebucher ce trebuchet & le mettre en pieces, & la dessus braque vn canon & tira si à point que sa promesse fut accomplie, & outre plus les esclats du trebuchet tuerent plusieurs des ennemis qui estoient aupres pour voir la ruine de la tour. Incontinent Leme & les siens mirent les genoux en terre remerciens Dieu d'une telle faueur, & toute la nuit il fit sonner l'alarme, & enuoya dehors Vasco & George de Leme avec quarante soldats qui fortirent sur les plus proches ennemis, lesquels de là en auant ils contraignirent d'estre encores plus sur leurs gardes que par le passé.

*Arriuee de
Christofle Iusarte
aux secours
de la citadelle:
et ce qui s'en fit.*

LES carauelles patties de Cochim eurent le temps si contraire que ce fut 8- miracle qu'elles ne furent englouties de la mer, tant les vagues estoient impetueuses. Outre ce danger il y en auoit vn non moins ennuyeux dans les carauelles mesmes, a sauoir faure d'eau douce: car les soldats s'estoyent embarquez si soudainement qu'il n'estoit souuenu à personne de donner ordre à cela, pesans (à cause qu'il n'y a que vingt lieues de Cochim à Calecut) que ce qu'il y auoit de provision es carauelles suffiroit, & que, par maniere de dire, ils pourroient acheuer ce voyage sans boire. Mais il y en eut de trompez, car ils furent vingt cinq iours à temporiser & combattre la fureur des vents & des flots, tellement que sans quelques pluies ils fussent morts de soif, encores ceste eau deuenoit tant amere & puante, quand elle auoit esté gardee quelques iours, qu'on n'en pouuoit boire. Finalement ils descouurent Calecut, où Christofle Iusarte arriua le premier sur le soir, & à la faueur d'un vent propre entra soudainement au canal, estant suivi le lendemain par Fonseca, lequel, à faure de vent, demeura dehors en mer. L'arriuee de ces carauelles mit le camp des ennemis en alarme, & ceux qui gardoyent les batteries deuers la mer coururent aux armes pour empêcher la descente aux Portugallois, qui par leur arriuee resiouirent grandement les assiegez. Quand Leme apperceut Christofle Iusarte dans le canal il courut vilement à la porte, & craignant que Iusarte voulust prendre terre luy fit signe de ne bouger encores, pource que ceux qui quitteroyent la mer se hazardoyent tout ouuertement à la mort, ayans à passer au trauers de tant d'ennemis. Il vouloit donc que ceste descente fust differee iusques à la nuit: mais le desir que Iusarte auoit d'entrer en la citadelle, lui fit penser que Leme l'exhortoit de gaigner le riuage, ioint qu'il auoit peur, eu esgard à la faison,

son, que quelque vent de trauersé ne iettast sa carauelle & la brisast contre la coste. Pourtant sans delayer dauantage ni attendre Fonseca, il fit entendre sa resolution à quatre vingts soldats qu'il menoit, dôt les vns estoient frétés difficulté de descēdre & lui proposerēt la volōté du Viceroy: mais lui ne tenant cōpte de leus remonstrances, déclaira qu'il iroit plustost tout seul, que qui le voudroit fuiure sautast promptement dedās le parau, & que les malasseurez demeurassent en la carauelle. Trêtecinq du nombre offrirent l'accompagner: lors ils entrerent au parau, & Iusarte cōmanda à ceux qui restoyēt de tirer incessammēt avec les pieces de la carauelle. Cela dit il saute avec ses soldats, vogue vers le riuage couuert d'archers & d'harquebuziers, attache son enseigne à l'esperon du parau, fait sonner les trompettes de fois à autre, & quand elles cessoyent lui & ses gens crioient à plaine teste, les matelots tirans à la rame de toutes leurs forces droit à la citadelle. Alors l'artillerie des ennemis commença à tonner, & les harquebuzades à plouuoit comme gresle: ce neantmoins Iusarte & ses gens approcherēt du bord, quelque peu à costé de la citadelle. A raison de cela les ennemis eurent loisir de les enuironner, & sans attēdre que les Portugallois fussent descendus, & en despit de leurs efforts, ils entrerent dans l'eau assez auant à teste baissée, & comme bestes farouches arracherēt l'enseigne & les deux trompettes qu'ils emporterent hors du parau, les autres se battoyent à coups de poing cōtre les Portugallois. Nonobstant ceste furie Iusarte & ses soldats chasserent les assaillans d'autour d'eux, & sauterēt tous au bord de l'eau, où ils firent merueilles, & perdirēt alors deux mariniers, avec Iean de Macede & Fernād Siqueire qui furent tuez sur le champ. Tous les autres furēt grieuement blesez, nommément Manuel Cernige, lequel voulant secourir vn siē ami receut vn coup à la iambe dont il mourut quelques iours apres. Or Iusarte se porta si vaillamment, qu'apres auoir passé sur le ventre à tous ses aduersaires, il se rendit à la porte de la citadelle, où Iean & Vasque de Leme avec quatre vingts soldats l'attendoyent. Alors la meslee recommēça plus aspre que deuant, pource que les ennemis, sans aucune apprehension de mort, entroyent à la foule & pesse mesle avec les Portugallois, estimans ne pouuoir regagner vne si propre occasion puis apres. Iē de Leme & les autres se porterent lors aussi vaillamment qu'on sauroit dire, & ce fut comme miracle qu'ils ne demurerēt tous sur la place, veu que les ennemis venoyent entelle multitude & de si grande furie qu'ils sembloient deuoit tout englourir. Neantmoins les Portugallois demurerent maistres de la porte, & Leme entra le dernier, maniant le coustelas de telle force & adresse, que les ennemis se contenterent de lui tirer vne infinixé de flescches sans l'oser joindre, & furent alors blesez quatre soldats qui marchoyent deuant lui. Presques tous les autres eurent leur part des coups, sans mort toutesfois sur le champ que des quatre sus-mentionnez. Au reste, comme Iean de Leme s'estoit trouué en merueilleux danger, ce fut à recommencer dedans: car plusieurs troupes d'ennemis voyans le combat si cruel vers la mer, porterent incontinent des eschelles à vn ravelin du costé de la ville, & commencerent à monter. Ceux qui gar-

doyent ce quartier se mirent en defense, n'espargnans pas les engins à feu : toutesfois les assaillans estoient en si grād nombre qu'en fin ils fussent entrez, si Leme n'y fust couru soudainement. Alors les eschelles furent renuersees, les monteurs si mal traitez, qu'il ne leur print aucune enuie d'y retourner à la seconde fois. Et pource qu'il y auoit dans le fossé beaucoup de morts qui avec le temps eussent par la puanteur de leurs charongnes infecté l'air, Leme fit crier par vn trucheman de dessus la muraille qu'il permettoit aux assaillans de reprendre les corps de leurs compagnons, promettant sur sa foy de ne leur y donner aucun empeschement. Eux y vindrent sur ceste parole, & emporterent les morts, dont les assiegez furent aussi contents que les ennemis eurent d'occasion de lamenter ceste nouuelle perte.

EDOUARD de Fonseca voyant ce qui estoit auenu à Iusarte, attendit que le vent tournast pour entrer le lendemain au canal, & s'approcha de terre le plus pres qu'il lui fut possible. Or pource qu'il auoit vëu le iour precedent en quel danger Iusarte & les siens s'estoyent precipitez, il ne voulut pas se hasarder ainsi sans scauoir premierement la volonté de Jean de Leme, & pour cest effect lon descocha vne fiesche en terre, à laquelle estoit attaché vn billet priant qu'on les auertist de ce qu'il falloit faire. Leme ayant cest escrit assembla ses capitaines, par l'auis desquels fut arresté que Fonseca ne descendroit point, attendu que s'il y auoit moins de cinq cens hommes à la descente le danger estoit tout euidant à cause de l'armee ennemie: ioint que lon ne pouuoit enuoyer secours de la citadelle, presques tous les soldats estans blesez, & ayās besoin de repos pour soustenir les assaux qu'ils attendoient, les ennemis faifans mine de vouloir combler le fossé & paracheuer leur terre-plain. Leme escriuit cela & à Fonseca, & au Viceroy, comme aussi fit Iusarte: & enuoya on les lettres en quelques fiesches tirees iusques à la carauelle: tellement que Fonseca se retira emmenant la carauelle de Iusarte, & trouuant pres de Calecut le capitaine Vascôcel, de qui sachant la resolution du Viceroy, lui bailla l'vne des carauelles pour aller en Cananor, & suiuit sa route en Cochim, où il arriua sur la fin d'Aoust. Le Viceroy ayant receu les lettres des assiegez, fut irrité contre Iusarte qui n'auoit suiui sa commission: neantmoins à cause de l'issue heureuse il lui pardonna ceste faute. Au reste, voyant de quelle importance estoit ceste guerre, qu'il estoit besoin de secourir la citadelle, & d'autrepart le danger qu'il y auoit à la descente, delibera de choisir quelque homme prudent & valeureux pour y donner ordre. Frâcisque Pereire lui sembla propre, car il estoit d'esprit rassis, grand guerrier, & riche, ayât de quoy despèdre & bon moyē de souldoyer gens de sa bourse. Lui ayant remonstré la necessité des affaires, le pria de vouloir mener le secours, ce que Pereire promit faire, encores qu'il eust congé de se retirer en Portugal ceste mesme annee. Qui plus est, il presta au Viceroy & au thresorier des guerres la somme de dix mille ducats, pour subuenir aux frais & necessitez extraordinaires. Incontinent le Viceroy fit vn amas d'environ cinq cens hommes, qui s'embarquerent en la carauelle de Fonseca, au basteau de Pierre Vieil, en vne barque & en deux galliotes, l'vne desquelles ayât esté desnuée d'vne partie de son equip-

page au defmarer, Pereire general de la flotte la laissa pour monter en vn gallion. Mais dautant que les autres vaisseaux voguoyent plus viste, le Viceroy donna la charge d'iceux à Antoine de Sylueire iusques à Calecut, avec commandement de prendre terre avec les soldats, si la commodité se presentoit, sinon d'attendre Pereire qui les suiuiot avec son galliō. Et pour ce que par les lettres de Leme & Iufarte le Viceroy scauoit de quels moyēs & de quelles machines les ennemis s'aidoyent pour ruiner la forteresse, il s'appresta pour aller au secours apres ceste flotte.

10. Les Mores qui auoyent mis ceste guerre en teste au Roy de Calecut estoient confus de honte & de despit voyans tous leurs efforts contre les Portugallois s'esuanouir en fumee. Neantmoins ils s'auiserent d'un nouveau moyen, ascauoir de plâter deux trebuschetz l'un à la facturerie, l'autre en vne maison ou parauant estoit la forge des Portugallois, & vn bastion au deuant de chascun trebuschet, pour empescher que l'artillerie de la citadelle ne les rompiſt comme elle auoit brisé l'autre. Ayans accomodé ces engins ils commencerent à tirer de telle furie & si souuent que les Portugallois n'osoyent aller ni venir par la citadelle, à cause des cailloux qui gresloyent de toutes parts sur eux. Iacques Perez maistre canonier, pour remedier à cela acouſtra des boulets, d'un tel artifice qu'ils faisoient prendre feu à l'endroit où ils frappoyent : puis d'une volée de canon lasché de nuit le quinziesme d'Aoust donna si droit qu'il frappa le bastion de la forge. Le feu gaigna incontinent le trebuschet, & fut impossible aux ennemis de l'estaindre, tant à cause de la promptitude & vehemence d'icelui, que pour les coups de mousquets & charquebuzes qu'on tiroit de la citadelle à trauers de ceux qui se descouuroient à la lueur de l'embrasement. Par despit d'un tel accident, les ennemis canonnerent la citadelle fort long temps, & Leme leur fit respōse de mesmes, avec perte de part & d'autre, mais beaucoup plus grande du costé des ennemis, dont le Roy commença à se fâcher & ennuyer plus qu' auparauant. Or pour estonner les Portugallois, il fit faire monſtre à toute son armee, faisant passer toutes les compagnies deuant la citadelle, d'où ils furent saluez de quelques coups d'artillerie qui en emporta plusieurs des moins adroits. Ce pendant, Leme voulut leur monſtrer combien il se soucioit peu de leurs pourmenades : & fit planter force estédards par tous les endroits esleuez en la citadelle, puis avec vne longue fanfare de trompettes les soldats commencerēt à chanter & crier de ioye : ce qui mit le Roy de Calecut en telle cholere qu'il iura de faire hacher en pieces tous les Portugallois qu'il pourroit attrapper, & en attendant, l'autre trebuschet resté entier continuoit à ietter cailloux dedans la citadelle, & ne fut possible au maistre canonier d'y mettre le feu ni le rendre inutile, comme les precedens. Derechef les Mores craignans que le Roy se degoustast entiere-ment, & les exposast en proye aux Portugallois, ne cessoyent de chercher nouuelles inuentions pour l'entretenir en esperance, & à ceste fin estoient iour & nuit autour du Sicilien, qui leur fournissoit diuers modelles & desſeins. Entre autres, il s'auisa de faire miner les bouleuards de la facturerie dressé vers le Midi, s'assurant de le faire sauter, & donner bresche suffisante

Nouveaux engins dressés par les Calecutiens contre la citadelle & de-quey seruent.

aux assaillans pour entrer en la citadelle. Or d'autant que la terre autour de ceste forteresse estoit sablonneuse, & qu'on n'y pouuoit faire vne mine qu'en creusant bien profond, pour en oster aussi la veuë aux Portugallois & euter la contremine, il dressa vne couuerture sur vn engin à six roues pour cacher les pionniers, & empescher que le sable ne roulast & retardast la besongne. Pour l'acheuer plustost ils cesserēt de trauailler au terre-plain, & coururent tous à la mine, commençans de nuit: mais Dieu voulut que la nuit precedente vn certain Chrestie renié, qui estoit au camp des ennemis, touché de quelque remords en sa conscience approcha du fossé, & cōme en chantant, dit plusieurs fois en langue Portugalloise aux sentinelles, Prenez bien garde au dessous. Leme entendit à demi mot ceste chanson, voyant le lendemain la couuerture & autres engins dont il ne s'estoit donné garde ni auis au parauant. Le conseil resolut qu'on esuenteroit ceste mine, ce qui fut executé, & les ennemis cōtrains quitter tout, dont le Roy cōmença à perdre toute contenance, reprochant aux Mores qu'ils l'auoyent poussé en vn destroit dont il leur seroit malaisé le retirer. Eux au contraire le prioient de patienter encores quelques iours, l'assurans d'emporter la place, n'estant pas possible qu'une si petite poignée de gens peust subsister dauantage. Ils firent encores vne autre mine, laquelle ayant esté rendue inutile comme la premiere, les pionniers furent employez à paracheuer le terre-plain.

*Fortification
des Portuga-
lois pour leur
defense.*

C'EST ouurage, qui s'auançoit d'heure en heure, mit Leme en grand ^{11.} pensee, car il preuoyoit bien que les ennemis vouloyent le ioindre de pres, qui estoit la confusion toute euidente, à cause qu'il auoit trop peu de gens. Or comme il remuoit en son esprit quelque expedient à cela, le Sicilien en approchant de la muraille pour deuiser avec lui, dit en langage Castillan que de là à peu de iours le Roy de Calcut gagneroit la place en despit des Portugallois. Leme prenant ce propos à son auantage, & voulant tirer les vers du nez au Sicilien, fit de l'estonné, & demāde comme cela se pourroit faire. Le Sicilien qui monstroie contenance d'auoir quelque cōpallion des assiegez, dit que ce seroit par le moyē de ceste haute leuee de terre. Mais Leme faignit ne tenir compte de cela, disant sauoir bien pourquoy les ennemis le vouloyent estonner, qu'il auoit veu beaucoup de telles inuentiōs, & tenoit ia le remede prest pour rendre cest effort inutile, comme on le verroit en temps & lieu. Apres la retraite du Sicilien, Leme communiqua l'affaire aux capitaines, & la nuit suiuate commēça à leuer vn répar du costé où les ennemis haussoyent la terre, liāt le tout avec pieces de bois bien crāponnees & trauersees, pour cōmander à l'ouurage des Mores, & les empescher de ioindre. Eux au cōtraire dresserent sur leur leuee des pieces de bois sur lesquelles fut braqué vn double canon qui tira quelques coups la nuit suiuate, & donnant cōtre vne des pieces de bois du rempar en fit voler des esclats, dont Antoine de Sa, Jean & Vasque de Leme furent blesez, & d'un coup de pierre laschee du trebuschet, fut tué vn Portugallois. Au reste les ennemis n'espargnoyēt ni poudres ni boulets, encores qu'ils ne tirassent ordinairement qu'à coups perdus, estans si bestes de penser par tel espouuantail amener

amener les Portugallois à composition. Nonobstant leurs empeschemens, Leme fit acheuer le rempar en la mesme nuit, & y furent placees incontinent certaines pieces d'artillerie à la hauteur du terre-plain des ennemis, duquel les assiegez n'eurent plus d'apprehension, comme ils auoyent auparavant.

12. LA fortification des Portugallois reduisit les Mores presques au desespoir, voyât si mal succeder tous leurs trauaux. Ils demâderent d'oc au Sicilien quelque inuention nouuelle, à quoy il dōna ordre promptemēt, fit dresser deux mantelets de la hauteur des murailles de la citadelle, & de largeur à proportion, faits de planches de l'espaisseur de deux doigts, couuerts de cuir au dehors, & mōtez sur vn trauerlier de cheurons, roulant sur douze rouës. Ils auoyent vn plancher assez haut, sur lequel estoient aucuns harquebuziers, pour tirer par destrous faits propremēt aux soldats qui seroyēt sur la muraille. Derriere ces mantelets deuoit marcher vn gros bataillon à couuert de l'artillerie des assiegez : puis quand les mantelets seroyent au pied de la muraille ils deuoient planter les eschelles, tandis que leurs harquebuziers empescheroient les Portugallois, qui ne pourroyent endommager les mantelets à cause du cuir dont ils estoient reuestus. Comme ces engins estoient fermes, forts, bien dressēz, le nombre des assaillans fort grand, & des assiegez trop petit, il y auoit apparence que la citadelle seroit emportee à ceste fois : mais Leme ayant sceu par celui qui auoit descouuert la mine tout le secret des mantelets, fit vn iour durant battre vne maison derriere laquelle on dressoit ces engins, l'vn desquels estoit parachute. Ceste batterie fit tel effort que les mantelets demeurerent à descouuert, & pour empeschier qu'ils ne s'auāçassent, ceux de dedans cōtinuerēt toute la nuit à lascher leur artillerie, & furent seruis de mesme par ceux de dehors. Au point du iour ils commencerēt à faire rouler vn des mantelets, faisans tous actes d'hostilité pour approcher & entrer, ce qui estoit aisē en apparence, n'estans les Portugallois qu'au nombre de huit vingts combatans, les autres qui y estoient au commencement du siege ayans esté tuez ou griefuement blessez. Là dessus, le canonnier dressa l'vne de ses plus grosses pieces tant à point qu'à la premiere volée il mit le mantelet en pieces, tuant vne partie de ceux qui se cachoyent dedans & du bataillon qui marchoit derriere. Les autres canons contraignirent les ennemis de se retirer bien viste, briserent l'autre mantelet commencé, tellement que les Mores se virēt lors au bout de leur pretente, & le Roy demeura si confus qu'il vouloit leuer le siege, defendant au Sicilien de faire plus aucun engin contre les Portugallois (quoy que les Mores suppliasent qu'il leur permist de poursuiure) & fit cesser le terre-plain, commandant qu'on le couurist de branches de palmes & de nattes de paille. Les Portugallois voyans cela, lascherent toutes leurs pieces, & sonnerent les trōpettes, en signe de ioye, dont les ennemis se donnerent l'alarme, estimans que le secours fust arriué, d'autant que les Mores de Cochim auoyent escrit que le Viceroy s'embarqueroit bien tost pour aller à Calecut. Pourtant resolurent ils, puis que le Roy ne trouuoit bon qu'on dressast nouueaux engins, s'employer en toutes autres façons, pour

*Inuentions ad
infectes aux
precedentes
pour forcer la
citadelle, &
dequoy serui-
rent.*

emporter bien tost la place : tellement que sans cesser ni iour ni nuict ils assaillirent Leme & ses gens par tous moyens possibles. Ceste importunité & necessité extreme contraignoit les Portugallois d'auoir tousiours les armes sur le dos, estans battus de l'artillerie, de coups de harquebuzes, de fleches, de cailloux, dont quelques vns estoient blessez, les autres occis, & les suruiuans si abatus de trauail & de disette (car cinq mois durât ils n'auoyēt vescu d'autre chose, pour la pluspart, que de riz cuit en eau sans sel ; & afin d'y trouuer quelque goust, le cuisoient au soir pour le lendemain, tellement qu'il cueilloit vn peu d'aigreur & de goust) qu'ils ne pouuoient plus guerres subsister. En ces entrefaites, Antoine de Sylueire approcha de Calcut, ayant laissé derriere soy les autres capitaines partis de Cochim quant & lui, & n'auoyent peu passer à cause des tourmentes. Lui entré dans le canal à l'aide d'vn vent propre ietta l'anchete : mais les ennemis d'autre costé enuoyerent cinq cens hommes en vn corps de garde pres du riuage pour tirer sans cesse & empescher la descente. Alors Sylueire voulant scauoir ce qui estoit expedient de faire, enuoya vne lettre a Iean de Leme par vn nageur, qui ne pût prendre terre à cause des harquebuzades que les ennemis tiroient, & dont ils tuerent vn autre messager qui suiuoit le premier. La nuict suiuite fut enuoyé le troisieme qui gaigna le bord & porta sa lettre à Leme, lequel defendit à Sylueire de descendre, mais le prioit d'enuoyer des pouldres, s'il estoit possible. Sylueire en enuoya trois barils qui furent portez de nuict en grand hazard, avec auertissement que le Viceroy ameneroit bien tost secours, ce qui fortifia les assiegez. Or pour ce que Sylueire estoit seul, apres auoir liuré les pouldres il reprint la route de Cochim & rendit raison de sa charge au Viceroy, lui disant l'estat de la citadelle, & retrouua illec les autres capitaines de sa flotte que la mer & les vêts y auoyēt rechassez.

Hector de Sylueire & François Perre secoururent Iean de Leme.

VASCONCEL enuoyé à Cananor, suiuant ce qui a esté declairé ci dessus, y arriua avec grande difficulté, & auertit Hector de Sylueire de l'intention du Viceroy : mais Sylueire, qui estoit prest des quelques iours au parauant, & ne pouuoit partir à faute de vaisseau assez grand, incontinent apres l'arriuee de Vasconcel s'embarqua avec certain nombre de soldats menât la carauelle de Vascôcel, vne galliotte, & cinq paraus legers chargez de viures & pouldres, laissant au chastellain la forteresse encomécée pour la faire continuer. Il arriua sur la fin d'Aoust pres de Calcut, & entré au canal fut auerti par Iean de Leme de ne prendre terre. Le ennemis pensans qu'il s'y voulust hazarder, lui tirerent force coups de canon, & se rangerēt en grand nombre au long du riuage. Hector de Sylueire ne bougea d'vn lieu iusques au soir, & alors fit descharger l'artillerie de la galliotte qui vguoit deuant, & de la carauelle aussi, canonnant les ennemis, à ce qu'ils ne prissent garde aux paraus qui partirent au mesme instant pour gaigner le bord, & se rendirent vis à vis de la porte de la citadelle, ou Leme les attendoit acompagné de quarante soldats. Ces paraus estoient chargez de biscuit, chair salee, poisson, fruiets & autres victuailles, ensemble de pouldres pour les canonniers & harquebuziers. Au reste, Leme, sachant le secours qui

qui lui venoit, & que le Viccroÿ arriueroit bien tost, enuoya dire à Sylueire qu'il n'estoit besoin faire descendre aucun de ses gens, pource que la citadelle en auoit assez iusques à la venue du gouuerneur. Toute ceste nuict fut employee à porter les viures en la citadelle, & à canōner de part & d'autre. Hector de Sylueire voyāt qu'il n'estoit besoin de seiourner plus lōgument en ce canal, s'en reuint le lēdemain en Cananor. D'autre part leā de Leme, pour faire creuer de despit les Calecutiens, semōdit le Chrestieñ renié à venir banquetter, & lui fit ietter du haut des murailles dedans le fossē trois grands pots de chair salee, & trois petis barils de betelle ou salade fraische. Les ennemis estōnez de voir cela conurēt que les Portugallois auoyēt esté auictuaillez, & lors desespererent de pouuoir s'ēparer de la citadelle, pource qu'auparauant ils s'asseuroyent de l'auoir par famine, ayāt sceu des Naires de la facturerie que les Portugallois n'auoyent autre viande que du riz. Apres le depart de Sylueire, Francisque Pereire ayant esté plusieurs fois en danger de perir surgit pres du canal de Calecut sur la fin de Septembre, attendant les autres capitaines: & fut le soir de son arriuee enuoya le parau de son gallion en terre avec victuailles & munitions, estimāt que Leme en eust besoin. Or dautant que la Lune estoit fort claire, Leme alla au deuant, comme aussi firent les ennemis, & sur le desembarquement de ce parau commença vne furieuse escarmouche, en laquelle moururent cinq Portugallois, & Leme fut blessē d'une harquebuzade à la iambe: ce nonobstant le parau fut deschargē, le tout porté en la citadelle, & les ennemis contrains se retirer. Le parau renuoyē vers le gallion, Pereire fut auerti de ne point descēdre, le hazard y estant par trop grand. Sur la retraite Leme sentit le coup qu'il auoit receu, & apres estre entrē fut contrainct se mettre au liēt, laissant la charge de commander à George de Leme qui s'estoit vaillamment porté en ceste escarmouche.

14. T R O I S ou quatre iours apres Francisque Pereire retourna, fit partir le parau vers terre avec plus de victuailles qu'à la premiere fois, & l'enuoya apres disner en la plus grande chaleur du iour, estimant qu'il y auroit lors moins de danger, pource que les ennemis seroyent en leurs logettes sans penser à telle venue. Ceux de la citadelle ne prenoyent aucunement garde à ce parau, ne leur semblant que Pereire leur voulust enuoyer viures à telle heure: mais les ennemis descoururent le parau, & enuoyerent soudainement quelques capitaines & soldats à la descente, afin de se saisir du vaisseau & de ce qui estoit dedans. La sentinelle commence à donner l'alarme, où coururent Vasque & George de Leme avec soixāte Portugallois: mais le parau estoit arriué desia, & sur le champ fut arrestē & pillē des ennemis qui emmenerent les mariniers & tuerent quelques gens qui conduisoient les viures. Alors les vns coururent sus aux autres, & y eut vne telle meslee que Jean de Leme, couchē au liēt, ouit les coups & appella ses valets pour sauoir que c'estoit. Mais il n'y auoit lors personne autour de lui qu'une esclau, laquelle lui compta ce qui se faisoit. Lui se leue de son liēt, & se fait assieoir pres de la fenestre treillissée de fer, d'où il voyoit le cōbat, mais ne pouuant y aller se fit apporter deux harquebuzes, de l'une desquelles il

Combat entre les Portugallois & Calecutiens, & ce qui s'ensuiuit puis apres au siege de la citadelle.

tiroit tandis que l'esclauve chargeoit l'autre, mirant si droit que durant ce conflict il abatit trente Calecutiens, pource qu'ils combatoyent fort pres de la citadelle, & qu'il choisissoit à plaisir ceux qu'il vouloit frapper, estans en telle troupe qu'il ne pouuoit faillir. Durant la meslee, Vasque de Leme trāsperça d'un coup de picque le chef des ennemis, ce qui les mit en route, & lors les Portugallois se retirerent remenans George de Leme blessé d'un coup de harquebuzé à la teste, & qui auoit poussé son casquet si rudement, que le dessus de l'œil estoit tout escorché. Estans rentrez Jean de Leme se recoucha par cōtrainte, pource que son mal estoit empiré par ce dernier effort. Quāt à Frācisque Pereire, il n'enuoya plus de viures en la citadelle à faute de parau, ains se tint coy. Au contraire les ennemis firent grand bruit de la conqueste du parau, & se mirent derechef en teste de pouuoir forcer la citadelle: suiuant quoy ils l'assailirent de nouueau, estimans que Jean de Leme fust mort, pource que le Chrestien renié demandant ou estoit le capitaine, vn soldat respondit qu'il reposoit au liēt à cause de sa blessure. Cela estant rapporté au Roy de Calecut & aux Mores les resiouit pour quelques iours, tenans pour certaine la mort de Leme, & que pour couuerture d'icelle ses gens le faisoient malade seulement. Pour s'en esclaireir encores mieux ils conseilèrent leur espion de demander entree aux assiegez pour visiter leur capitaine. Quand Leme ouit parler de ceste demande, se doutāt de l'intention des ennemis & pour les oster de souci, il fit entrer ce Chrestien renié nommé Sebastian, & lui dit franchement ce qu'il imaginoit de sa visitation, le priant bien fort de lui en dire la verité. Sebastian declaira que le Roy de Calecut haïssoit Leme par dessus tous les autres, à cause de ceste longue resistance, & que pour le grand desir qu'il auoit de sa mort ceste partie s'estoit dressée. Alors Leme pria Sebastian de dire au Roy que la mort d'un capitaine n'auancerait pas beaucoup ses affaires, & que tous ceux qui resteroient apres lui en la citadelle pouuoient commander aussi dextrement que lui, estans façonnez à l'art militaire de telle sorte que les Calecutiens receuroient plus de dommage du premier nouueau capitaine en la citadelle, qu'ils n'auoient encores receu de lui. Et si le Roy desiroit tant la peau de Leme il le prioit de venir en personne donner l'assaut: que sa presēce pourroit faire que les Mores y entreroient & feroient de Leme selon leur volonté: assurant d'autre part ce Roy qu'à la premiere rencōtre ils s'efforceroient le prendre vif, pour l'enuoyer prisonnier en Portugal, afin d'y estre chastié de ses trahisons & meschancetez. Mais à cause qu'il scauoit certainement que ce Roy n'auoit garde d'approcher de la citadelle il le prioit de ne pas fuir en terre ferme, afin qu'on l'allast chercher & battre dedans Calecut à bons coups de canon. Au demeurant Leme exhorta par un ample discours ce Sebastian à reprendre sa premiere religion, promettant le remener en Portugal, & lui faire obtenir pardon de sa reuolte, ce que Sebastian ne voulut accepter, ains se retira apres auoir esté reuestu de neuf par le commandement de Leme. Estant hors de la citadelle il se presente au Roy & lui recite ce que dessus, ce qui alluma la guerre plus impetueuse que deuant, si que les assiegez receuoient tous les iours quelque assaut, &

par

par ce continuel travail estoient tant rompus qu'ils commençoient à défaillir du tout. Vne nuit les ennemis mirent le feu au boulevard de bois, qui les empeschoit d'approcher de la porte de la citadelle. Vafque de Leme, lequel commandoit lors, courut incontinent là pour esteindre le feu, à quoy les ennemis s'opposèrent, & là dessus commença le combat autant furieux qu'on scauroit penser. Jean de Leme qui n'estoit encores guerri, entendant en quel estat estoient les affaires, se fit mener aux boulevards cõtre l'avis detous, & fit soudain amener de la terre à force pour amortir l'embrasement, car l'eau n'y seruoit de rien, & les Portugallois n'auoyent loisir d'y vacquer longuement, à cause que le feu gaignoit & que les ennemis taschoyent d'entrer. Ainli que les Portugallois estoient sur le point de leur ruine, voici arriuer Hector de Sylueire. Il estoit capitaine de Cananor en l'absence de Simon de Meneléz, lequel, ayant eu quelque propos fascheux avec le Viceroy, partit de Cochim, retournant en Cananor à sa charge, que Sylueire exerceoit en son absence. Sylueire se voyant inutile delibera d'aller au port de Calecut, pour aider de ses moyens aux assiegez, & attendre le Viceroy qui estoit sur son embarquement. Il monta donc en la galiotte de Vafconcel, menant aussi la carauelle & quelques paraus. Estât pres du port il vid le feu du boulevard, & conoissant que c'estoit en la citadelle approcha de terre le plus qu'il fut possible, & commença à faire iouer son artillerie. Ce nouveau tonnerre fit penser aux ennemis que le Viceroy n'estoit pas loin, car on leur auoit mandé de Cochim que le Viceroy estoit parti pour venir leuer ce siege. En ce soupçon, & ceux qui estoient autour du boulevard pour empescher que les Portugallois n'estaignissent le feu, & les autres de tous les corps de garde posez en diuers lieux, coururent incontinent au bord de la mer. Alors les Portugallois quittes du combat estoufferent la flamme, & les ennemis furent au guet toute la nuit, pensans que ceux qui estoient en mer deussent prendre terre. Mais ils ne descendirent lors ni depuis, & ce par l'avis de Leme qui leur enuoya vne lettre attachee à vne fiesche. Le lendemain sur le soir, Sylueire fit iouer les pieces de tous ses vaisseaux contre les ennemis, & ce pendant enuoya des viures & pouldres à ceux de la citadelle, qui les enleuerent promptement. Il les auertit aussi que le Viceroy s'apprestoit pour venir au secours, & que pour ceste raison lui ne vouloit sortir du port, ains deliberoit y attēdre l'armee: mais que s'ils auoyent faute de quelques soldats, au premier mandement il descendroit malgré les ennemis. Au bout de quelques iours arriua au mesme port Pierre de Far lequel menoit vne flotte de fustes parties de Goa, esquelles y auoit plusieurs Portugallois mariez & habitez en la ville de Goa, qui estoient venus à ce secours à leurs propres despens. Mesmes si tost qu'il entendirent les nouuelles du siege de la citadelle, encores que ce fust au plus fort de l'hiver en ce pays là, requierent Francisque de Sa de les vouloir conduire, & s'embarquerent enuiron la fin de Iuillet, n'ayans peu surgir plustost au hure de Calecut à cause des bourasques & vêts tourbillonneux. Ceste flotte de Goa avec celle de Sylueire faisoit monstre d'une assez bonne armee de mer: aussi les Mores se sentirent lors du tout desferrez, voyãs qu'il ne faloit

plus rien pretendre sur la citadelle. Les assiegez les semôdoient à l'assaut, se mocquans d'eux, & les saluans de mille coups de canon, comme aussi faisoient ceux de la flotte: ce qui rendoit les ennemis enragez, & les Mores si confus qu'ils n'osoient leuer le nez tant ce siege leur martelloit la teste. Le Roy de Calecut, aussi despité que les autres, inaudissoit les Mores & leur conseil: neantmoins voyant que c'estoit vn faire le faut, il se prepara pour combattre le Viceroy.

*Cesle tenu
de moyens
né par le
ceroy pour
cours les
Portugallois
& echarre les
ennemis.*

P A R plusieurs auertissemens apportez en Cochim le Viceroy fauoit 15. que les assiegez auoyét esté auictuaillez & rafraischis de gens: ce qui le mit en repos, ayant auparauant esté en merueilleuse perplexité pour les diuers bruits qui en couroyent. Ce pédant il resolut d'y aller au secours, si tost que le temps seroit propre, & avec armee conuenable à la grandeur d'un Viceroy des Indes: ce qu'il ne pouuoit executer que la mer ne fust plus paisible, pource qu'en se hazardant au milieu de l'hyuer, outre le danger de naufrage, la flotte seroit harassée & à demi rompue auant qu'estre au port de Calecut. Telle incommodité estoit lors de trop dangereuse conséquence & ne falloit point hausser les voiles à faute, tant pour l'honneur que pour l'auancement des affaires du Roy de Portugal. Ioint que le Roy de Calecut & les Mores estoient si puissans & orgueilleux, que s'ils le voyoyét peu acompagné ils feroient plus de bruit que iamais, au contraire vne armee entiere abatroit leur orgueil & redroit les Portugallois redoutez de tous les Indiens. Ainsi donc il partit au commencement d'Octobre, menant en sa flotte environ deux mille Portugallois, sous la charge de plusieurs capitaines, dont les principaux furent George de Menefez, Tristan Norogne, Alonse de Menefez, George Tellio, Pierre de Blanc castel, Iean Melio de Sylues, Jacques de Leme, Antoine de Sylueire, Manuel de Macede, George de Castre, Henri de Macede, George Capral, Antoine d'Azeuede, Edouard de Fonsèque, Fernand de Leme, Antoine de Sylues, George Vasconcel, Antoine de Leme, Roderic d'Aragne, Antoine Personne & autres, qui arriuerent au port de Calecut environ le quinziesme d'Octobre, & lors fut faite vne salue de toute l'artillerie de la flotte & de la citadelle, avec son de trompettes, fifres & tabours. Le bruit fut tel que les ennemis cuidans que le Viceroy voulust prendre terre acoururét tous au riuage, faisans iouer toutes les piece placees au long de la mer: les Portugallois respondirent de mesmes, tellement que le reste du iour s'escoula en perte de pouldres & boulets. Or le lendemain matin, les ennemis se trouuans avec toutes leurs forces si pres de la citadelle, recommencerent la batterie avec toutes leurs pieces, & du trebuschet nommément. Ceste furie passée, ils firent monstre au riuage de leurs pietons archers, harquebuziers, picquiers & iaueliniers, costoyans la mer en bon ordre & bruit effroyable aux Portugallois qui descouroyent de leurs vaisseaux ceste puissante armee, en laquelle y auoit nonante mille hommes: car encores que plusieurs fussent morts au siege, leurs places auoyét esté incontinent remplies, tellement que le premier nombre demeuroid tousiours entier. Le Viceroy, bien ioyeux de sauoir à combié & à quelles gens il auoit à faire, leur fit tirer quelques volées de canon: mais à mesure

sure qu'ils se retiroient ceux de la citadelle auoyent à se defendre, tellement qu'ils furent molestez toute ceste iournée. Nonobstant leur multitude le Viceroy continua en sa resolution de les combatre, ayant ce naturel que le cœur lui croissoit es plus grands dangers, & plus vne entreprise estoit perilleuse, plus desiroit il d'y mettre la main, estant acompagné du bon heur des chefs de guerre, ascauoir de prudence, sage resolution, hardie execution, adresse prompte, industrieuse vigilance, & allegresse pour tenir les soldats en deuoir, & pouruoyance à toutes les difficultez qui se presentoyent au combat. Il auoit deliberé de donner bataille le dixseptiesme d'Octobre, mais il différa, pource que le Roy de Portugal lui commandoit par lettres expresses de ne donner aucune bataille par mer ou par terre, que premierement il n'eust assemblé tous les capitaines de son armee, pour entendre leurs auis, & suiure la plus grande voix. Suiuant cela, le conseil des capitaines, gentilshommes & principaux de la flotte, fut assemblé, auquel le Viceroy fit vn ample discours de ce que lon voyoit, requerant vne droire opinion & resoluë deliberation. Presques tous furent d'auis de ne donner ni receuoir bataille, parce que les ennemis estoient en tel nombre qu'il seroit impossible aux Portugallois de se desuelopper du milieu de tant de gens: qu'il falloit descendre droit à la bouche de leurs canôs, & que le bord estoit fâcheux, plain de rochers, haut & battu de vagues, de telle sorte qu'il seroit impossible de gagner terre à pied sec, tellement que les Portugallois seroyent tuez auant que pouuoir venir aux mains: que ce seroit perdre en vn iour l'estat du Roy de Portugal es Indes, chose de beaucoup plus grãde importãce que la citadelle de Calecut, & valoit mieux abandonner telle place que se hazarder ainsi. Cest auis fuiui de la pluspart fut reietté par quatre seulement, sauoir est Antoine d'Azeuede, Francisque Pereire, Hector de Sylueire, Manuel de Macede. Ils disoyent pour leurs raisons que l'estat de Portugal es Indes n'auoit iamais esté si pres de sa ruine, à faute de combatre, qu'il estoit pour lors: que si les Portugallois auoyent oncques eu occasion de donner bataille c'estoit à ceste fois: que lon perdrait plus à ne point combattre qu'à combattre, à cause que ce seroit aneantir entierement le credit que les Portugallois auoyent commencé à perdre en toute l'Inde haute & basse: que le Roy de Calecut ne pourroit plus estre retenu en bride, si lon ne le chastioit à ce coup: que les Mores, apres auoir ruiné la citadelle assiegee, en seroyent autant à toutes les autres, & finalement contraindroient les Portugallois de quitter leurs conquestes & trafics: qu'il falloit bien esperer en faisant son deuoir, & se ramenteuoir les belles victoires de Pacheco, qui acompagné de si peu de soldats auoit brisé l'orgueil du Roy de Calecut. Jean de Leme enuoya par escrit son auis & conseilloit au Viceroy de donner bataille. Encores que les raisons de ces cinq capitaines semblassent plus pertinentes, neantmoins le Viceroy ne s'y rangea point, pource que l'autre auis auoit plus de voix sans comparaison. Toutesfois lon ne resolut pas tout à plat de ne point combattre, ains le conseil fut rompu, laissant la conclusion en suspens, & le Viceroy se persuada que la prochaine assemblee suiuiroit l'opinion d'Azeuede: ce qu'il desiroit fort afin de chastier les Mo-

res qui auoyent osé assieger la citadelle durant son gouuernement. Mais à cause de tant de voix contraires il ne pouuoit obtenir cela si aisément, estât tenu de court par le mandement du Roy qui vouloit qu'on se reiglast par la pluralité des auis. Ainsi donc il differoit pour voir si les esprits changeroient point, & tint cinq ou six fois le cōseil, où les capitaines continuoyēt en leur premier dire: & lui remettoit dextremēt les affaires à vne autre fois, sans rien arrester. Ce pendant les ennemis dōnoyent de terribles assaux à la citadelle pour monstrier qu'ils ne se soucioyēt du Viceroy, lequel toutes les nuicts enuoyoit des viures aux assiegez. Vne fois entre autres, George de Meneslez menant vn bastteau chargé de prouision, ne l'eut pas si tost deschargé que les ennemis en grand nombre vindrent le charger à coups de harquebuzes, de fleches & d'engins à feu, chose fort espouuantable durant l'obscurité de la nuict: mesmes plusieurs entroyent en l'eau avec des crochets de fer pour aller retenir le bastteau: mais George se tira de leurs mains apres en auoir tué quelques vns, & remena blesez tous ceux qui estoient au bastteau avecques lui. Antoine d'Azeuede, qui estoit d'auis de combattre, voyant la resistance des autres capitaines, auertit Iean de Leme de ceste cōtrariété d'opiniōs, le priant bien fort, s'il estoit possible, de faire en plain iour vne sortie sur les ennemis, afin qu'iceux estans mis en route (comme il s'en asseuroit) le Viceroy conust que ceux là s'abusoyent qui en leurs auis combattoyent pour ne point combattre, & qu'il faisoit prendre vne autre resolution. Sa lettre fut portee de nuict par vn seruiteur, qui l'attacha a vne cordelette autour de son col, & l'enveloppa de cire, afin que l'eau ne l'endommageast. Ce conseil d'Azeuede resiouit Leme, lequel appella quelques gētilshommes, avec lesquels il delibera de faire vne saillie sur le corps de garde des ennemis posé au Midi, où il y auoit moins de gens qu'es autres, ordonnant à George Vasconcel de sortir le lendemain sur l'apresdisnee avec cinquante harquebuziers pour charger ce corps de garde, puis se retirer aupres de Leme qui lui deuoit faire espaule. Tandis que Vasconcel sortoit, Leme commanda à ceux qui restoyēt en la citadelle de harquebuzer sans cesse les autres corps de garde, pour retenir ceux qui y estoient & les empescher d'ouir la charge de Vasconcel, à ce qu'ils ne courussent au secours de leurs compagnons. Il en auint comme Leme le pensoit: car Vasconcel homme valeureux & ses soldats gens de grand cœur descoucherent de telle roideur à trauers les ennemis, qu'iceux tournerent le dos, abandonans le corps de garde & quelques vns de leurs cōpagnons tuez sur la place. Les Portugallois emmenerent certaines pieces legeres qui estoient là: mais sur leur retraite ils furent chargez par vne grosse troupe ramassée au bruit des fuyards, & lors ce fut à recommencer: tellement que si Leme ne fust suruenu, Vasconcel & ses soldats estoient fort engagez. En ceste meslee Leme receut vn coup de harquebuzes à l'espaule, qui enfonça la cuirasse sans autre mal. George Diaze commissaire des munitions de la citadelle fut tué: ce pendant l'artillerie battoit les autres corps de garde, & parmi ces tempestes, Leme se retira avec ses gens, aucuns desquels furēt blesez. Le Viceroy receut vn merueilleux contentemēt de ceste

ceste entreprise, vid à l'œil qu'il ne falloit pas grande armee pour desfaire les ennemis qui eussent esté rompus tout à fait si Leme eust eu plus de soldats, & lors arresta en soy-mesme de dōner bataille. Ceux qui estoient d'avis contraire se despitoyent, portans impatiemment qu'on aneantist ainsi obliquement la commission du Roy, qui vouloit les choses estre reiglees par la plus grande voix. Neantmoins le Viceroy perseuerant en sa pēsee escriuit secrettement à Jean de Leme, le remerciant de tant de peines qu'il prenoit, avec tous les autres qui se portoyent si vaillamment. Au reste il le prioit de lui mander s'il estoit d'avis que l'armee prinst terre pour cōbattre les forces du Roy de Calecut, & en quel endroit les troupes pourroyēt descendre moins incommodement. Leme fit responce que le Viceroy devoit donner bataille, que iamais il n'auroit autre avis, & enuoya George de Leme porter ce message : mais l'almadie de George fut brisee d'un coup de canon des ennemis, qui tiroient toute la nuit à coups perdus sur la mer pour empescher les paraus d'approcher de la citadelle ou d'aller vers la flotte. George & son marinier se ietterent en la mer, & nagerēt iusques aux premiers vaisseaux où ils furent recueillis, & George porté au gallion du Viceroy, avec lequel il passa vne partie de la nuit à discourir sur les auantures du siege & autres particularitez de ceste guerre, tellement que le Viceroy se resolut à la bataille. Suiuant quoy des le matin il assembla le conseil, non point pour demāder avis, ains pour declarer à tous les capitaines qu'il vouloit descendre & charger les ennemis. Toutesfois afin de contēter ceux qui iusques alors auoyent opiné au contraire, estans tous assemblez il leur dit telles ou semblables paroles. I L auient bien souuent que nostre ingemēt se trompe, estimant faux ce qui est vray, & prenant verité pour mensonge, dauantage, que nous faisons beaucoup de choses tout au rebours de nostre intention : à cause de quoy nous deuons tousiours mettre deuant la volonté de Dieu, à ce que par sa misericorde il guide l'effect de nos entreprises à sa gloire. Pourtant, en tout cest affaire de guerre contre nos ennemis, j'ay rangé mon desir sous la sagesse & volonté de l'Eternel tout puissant, & l'ay prié de conuertir le tout à l'auancement de son seruice. En ceste esperance j'ay attendu quelques iours sans me refouldre si ie deuois me ranger à vostre avis, lequel part d'une prudence & bonne volonté que ie remarque en vous tous. Car ie say non seulement par oui dire, ains pour l'auoir veu moy-mesme, que vostre vaillance s'est monstree en beaucoup d'endroits, avec des eueneemens notables : & ie faisoys difficulté de quitter vostre avis, croyant que ce n'estoit sans grandes considerations que vous me conseiliez de ne donner bataille. D'autrepart, pesant bien vos raisons, il me sembloit qu'il y auoit de l'erreur en cest avis, purement humain : car vous fondant sur ce point que les ennemis sont en trop grand nombre à comparaison de nous, vous sauez que par moins de gens que nous ne sommes, lesquels il n'est besoin vous nommer, les Indes & autres pays ont esté conquis, des batailles gaignees, & victoires memorables obtenues sur les Mores qui estoient aussi braues & bien acompagnez que ceux-ci. Je croy donc, puis que nous auons le droit de nostre costé, que Dieu

nous aidera, comme il a fait par le passé, & qu'ayans assurance en lui la victoire sera nostre. Il faut mettre sous le pied ceste apprehension que nous ferons desfaits, & qu'on hazardera l'estat des Indes. Au contraire, ie tien que le rebours de ce que craignez auiedra, car ayât attédu quelques iours pour conoistre s'il se presenteroit quelque occasion de le presumer, l'ay conu en la fuite de nos ennemis chargez par le capitaine Leme qu'ils sont à nous. Ma raison est, que si peu de soldats à la desbandee ont mis en route beaucoup plus de gens qu'eux, que ferons nous marchans & combattans en ordre? Pourtant, Seigneurs, ie vous prie changer d'auis & trouuer bon que nous donnions bataille, car de ma part ie suis entierement de ceste opinion. Les capitaines commencerent lors tous à dire, puis que bô lui sembloit, que de par Dieu fust, & qu'on allast trouuer les ennemis, dont le Viceroy les remercia bien affectueusement: puis, suiuant ce que Jean de Leme lui auoit escrit, fut arresté que Hector de Sylueire entreroit dans la citadelle avec trois cens hommes d'élite, & que la nuit d'apres ils feroient sortie sur les ennemis vn peu deuant iour, au commencement duquel se feroient quatre feux en la hune du gallion, puis on tireroit vn coup d'artillerie, & feroit on trois autres feux, à quoy ceux de la citadelle conoistroyent que le Viceroy vogueroit alors vers le riuage. Qu'apres les feux estaints lon sonnast la trompette au boulevard de bois, duquel on ouuriroit incontinent la porte à Francisque Morales & à vingt des meilleurs soldats munis d'engins à feu, pour ietter au corps de garde du trebuschet, afin d'embesogner les ennemis & les attirer là. Au mesme instant Sylueire sortiroit avec ses trois cens hommes pour assaillir ceux qui estoient logez es quartiers vers Midi, Jean de Leme donneroit avec ses gens au Septentrion, le Viceroy au Leuant, tandis que l'artillerie de la citadelle canonneroit ceux du Couchant.

*Bataille entre
le Viceroy &
les Calcutis
campez deuant
la citadelle,
& quelle en
fut l'issue.*

C E S T E conclusion arrestee, sur le soir le Viceroy enuoya quelques capitaines, pour approcher du riuage le plus pres qu'il seroit possible & lacher leurs pieces, pour empescher les ennemis d'assaillir Sylueire & ses soldats à la descente. Tâdis que ces pieces iouoyent, Sylueire print terre avec cent cinquante hommes seulement, car le Viceroy ne voulut que pour ceste nuit il en menast dauantage, afin qu'ils entraissent plustost sans danger en la citadelle: ce qu'un plus grand nombre n'eust sceu executer si commodement. Les ennemis sentans ceux qui gaignoyent le riuage, & n'osans aller au deuant à cause de l'artillerie, penserent faire beaucoup à descharger la leur & tirer force harquebuzades: mais ce furent autât de coups perdus, car Sylueire & ses gens entrerent saufs en la citadelle, comme firét aussi la nuit suiuite autres cent cinquante hommes sous la conduite de Jacques de Leme, & par mesme ruse. La nuit d'apres, qui estoit le dernier iour d'Octobre, les Portugallois tant de la citadelle que de la flotte s'appresterent pour la bataille, & apres le signal donné, comme a esté dit au chapitre precedent, le Viceroy fit ramer vers terre avec toute sa flotte où il y auoit seize cens soldats. George de Menesqz & George Tellio, braues capitaines, marchoyent deuant, chascun avec soixante hommes chargez d'engins à feu, pour

pour bruler les premiers qui viendroyent leur empescher la descente, & les arrester par tel moyen. Les autres capitaines & gentilshommes acompagnoyent le Viceroy & la banniere royale. Au second signal de feu qui monstroit que le Viceroy approchoit, Iean de Leme fit sonner vn trompette au bouleuard de bois, à quoy les ennemis ne prindrent garde, pource que toute ceste nuit on n'auoit fait que trompeter dedans la citadelle, & ne pensoyent receuoir autres assaux que les escarmouches acoustumees. Fernand Morales sortit incontinent avec ses vingt hommes, & assaillit vigoureusement le corps de garde du trebuschet, y lanceant les engins de feu contre les ennemis à demi assoppis de veilles & couruees extraordinaires. Mais l'embrasement soudain les contraignit bien de leuer les oreilles, en telle sorte toutesfois qu'au lieu de faire teste ils monstrent les espauls, sur tout quand Sylueire & ses soldats vindrent à les charger. Leme sortit d'un autre costé avec vn estrange bruit d'harquebuzades, tellement que les Calcutiens quitoient leurs corps de garde fuyans de tous costez. Ceux qui estoient dedans le fossé pensans que ce fust vne alarme ordinaire, coururent pour faire retirer Leme : mais les Portugallois qui n'estoyent deliberez de partir que la victoire ne leur demeurast toute entiere commencerent à serer les ennemis de plus pres que de coustume. En ces entrefaites le Viceroy descendit de son gallion en terre, avec tel bruit d'armes & fanfare de tant de trompettes qu'on eust cuidé qu'il auoit vne puissante armee : ce que les Mores creurent aussi, specialement à l'arriuee de Menesez & Tellio qui avec leurs engins à feu firent vn terrible rauage. Et si tost que ce feu artificiel fut allumé, le Viceroy se ioint avec toutes les bandes, & commencerent les harquebuziers à faire leur deuoir, comme aussi les picquiers & autres : tellement qu'en vn instant les ennemis virent comme vn deluge de maux qui les serroit de toutes parts, estans les vns percez de coups de picques & harquebuzes, les autres hachez en pieces avec coustelats, espees à deux mains & cimenterres : les autres fuyans blesez & mutilez, autres acourus au combat, la terre & la mer retentissans & tremblans à cause de la tempeste d'un si cruel conflict, le riuage & tout le pays prochain se remplissant de morts & de naurez. Le nombre des ennemis estoit si grand que les vns empeschoyent les autres tant à combattre qu'à fuir : au contraire les Portugallois bien resolu & conduits par bons capitaines, soit qu'ils combattissent de pied ferme contre les resistans, ou qu'ils poursuiussent les fuyards, ne tiroient coup d'harquebuzes, de picque ou de coustelaz, qui ne portast, sans vne si estrange boucherie que le sang couloit de toutes parts, & ne trouuoit on à mettre le pied que sur des tas de corps despezcez. Le plus grand meurtre fut fait par ceux qui portoyent les espees à deux mains, entre lesquels estoient George & Valque de Leme, Iean de Leme le ieune leur frere, Antoine de Sa, Roderic Melio & autres, qui esclarcissoient les rangs par où ils passoyent, coupans les vns en deux, fendans les autres par la moitié, ou leur aualans testes, bras & iambes, bref fauchans ces corps peu ou point armez, comme s'ils eussent fauché l'herbe des champs. Aussi les ennemis estimans que les Portugallois fussent plustost diables qu'hommes, venus

pour les exterminer totalement du monde, quitterēt tous les corps de garde, & s'enfuirent vers la ville. Comme les Portugallois suiuyēt leur victoire, George de Menefez apperceut dedās le fossé vn soldat escarté de la troupe, & environné de grand nombre de Calecutiens qui l'assailloyēt de tous costez. Il y courut suiui de deux soldats seulement, & d'une espee à deux mains mit bas tant d'ennemis qu'il contraignit les autres de courir bien viste apres leurs compagnons. En retournant vers le gros de l'armee, avec les trois, il fut enuéléppé d'une autre compagnie de Calecutiēs, lesquels le sererent de si pres qu'il fut contraint laisser choir son espee, & s'aider d'un poignard, mais il fut blessé au visage & en vne main, laquelle demeura percluse depuis: deux des soldats l'abandonnerent, mais le troisiēme nommé Balhazar Fernand lui tint bonne compagnie, & fit en sorte qu'il rendit l'espee à Menefez, lequel ne sentant lors ses blessures fit merueilles de combatre, gagnant place si large que les assaillans n'osoyent approcher de la longueur de son espee, & là dessus acoururent quelques Portugallois, tellement qu'on le tira de la presse, & finalement furent chassés du fossé, s'enfuyans en tel desordre, qu'au lieu de se rallier, les vns se sauuerent dedans les forests de palmiers, les autres en la ville, laissant deux mille morts sur le champ, sans les blesez & mutilez qui moururent depuis. Les Portugallois y perdirent quarante des leurs, & eurent deux cens cinquante blesez. Au reste ils estoient si acharnez au combat, qu'ils vouloyent suivre les fuyards & entrer dedans la ville: ce que le Viceroy ne voulut permettre, conoissant bien qu'ils s'amuseroyent à piller les maisons, donneroyent loisir & moyen aux ennemis de se reioindre & leur courir sus, en danger de se perdre tous en pensant gagner. Il rompit donc ceste entreprise, encor qu'en apparence lon ne pouuoit presumer autre chose, sinon que la ville seroit bruslée à ceste fois. Le Viceroy se contentoit d'auoir deliuré la citadelle & rompu ceste puissante armee, qui fut vn des plus beaux exploits de la nation Portugalloise es Indes, atrendu que iamais les ennemis nes'estoyent amassez en tel nombre, ne si bien equippez & deliberez qu'à ceste fois. Ceste desfaite despouilla le Roy de Calecut de tout credit, les Rois Indiens quitterent les isles & lieux maritimes pour se retirer plus auant en terre ferme, afin d'euitier les mains du Viceroy, lequel acquit ce iour vne grande reputation enuers tous: mesmes les nouuelles de ceste victoire allerent iusques aux oreilles des Turcs, dont ils furent fort estonnez, car ils estimoient le Roy de Calecut inuincible, à cause des forces & grans moyens qu'il auoit en ceste guerre.

*La citadelle
de Calecut
desmâtée par
le commandement
du Viceroy.*

A P R E S que le Viceroy eust rendu graces à Dieu d'une si belle victoire, & remercié les chefs de l'armee qui auoyent si brauement combatu, il fit camper ses troupes autour de la citadelle, ayant en fantasie de la faire desmâter & raser, à raison dequoy il vouloit s'arrester quelques iours aupres. Vn si nouueau cōseil estoit fondé sur ce que le Viceroy estimoit inutile pour le bien des affaires du Roy de Portugal d'auoir vne forteresse en Calecut, atrendu que ces Malabares ne cerchoient que guerre, & que les Portugallois seiournans en garnison dans ceste place seroyēt tous les iours

en danger de leurs vies. Outre plus il deliberoit d'aller sur la fin de l'esté au goulfe d'Arabie attendre les Turcs qui estoient sur le point de s'embarquer pour venir aux Indes, où ils pourroyent arriuer le quinziésime de May ou sur la fin d'Auril: sinon ce seroit entre les mois d'Aoust & Septembre, qu'il faisoit son compte d'estre en la coste de Diu pour les combatre auant qu'ils gaignassent le port. Il falloit donc qu'il allast hiuerner à Mazcate, car demeurant en l'Inde basse, il ne pouuoit arriuer à Diu au mois de Septembre, à cause des vents contraires: s'assurant au reste de prendre Diu au cas que les Turcs nes'y trouuassent, & auant la venue des marchans & estrangers qui y trafiquoyent, & pouuoient lui donner grand empeschement. Or tenoit il ceste ville pour ia prinse s'il y pouuoit aborder le premier: & dautant que ce seroit auoir vn grand empeschement derriere, que de laisser la citadelle de Calecut debout, & dedans vne garnison de vaillans hōmes, plus propres ailleurs que là où ils estoient en aussi grand danger pendant la paix que durant la guerre, il conclud de ruiner ceste place, sans toutesfois en dire rien à personne, mais se campa faignant attendre si le Roy de Calecut demanderoit la paix, se fortifiant contre les assaux des Mores qui firent quelques escarmouches, mais ils furent contrains prendre autre parti. Le Roy de Calecut se voyant au bout de toutes entreprises, desnüé de moyens & las de la guerre, enuoya demander la paix au Viceroy, offrant payer les despens & frais faits par les Portugallois en ceste guerre, consigner les paraus & toute l'artillerie du royaume de Calecut. Mais le Viceroy cerchoit des difficultez afin de rompre ceste negociation, & demandoit qu'on lui redist le gouverneur d'une ville nommee Porqua, lequel auoit quitté les Portugallois ses allies pour se ranger avec les Calecutiens durāt ceste guerre. Et pource que le Roy de Calecut refusa cest article, comme contraire au droit des gens & à ses coustumes, le Viceroy ne voulut accorder la paix. Depuis cela, le conseil fut assemblé où le Viceroy proposa puis que le Roy de Calecut refusoit vn bon accord, & qu'il falloit continuer la guerre, le meilleur seroit, à son auis, pour le seruice du Roy de Portugal, de ruiner la citadelle de Calecut, qui ne seruoit de rien, coustoit beaucoup, retenoit gēs & artillerie de plus grand seruice ailleurs, pourtant deuoit estre desmolie. Plusieurs furent de mesme auis: mais Hector de Sylueire, Jean de Leme & quelques autres opinerent au cōtraire, disans que les affaires du Roy de Portugal receuoient grande commodité de ceste citadelle, en ce que durant la guerre contre le Roy de Calecut il y auoit moyē de l'incōmoder, & battre la ville capitale du royaume, où le Roy residoit la pluspart du temps, avec toutes ses forces & richesses. Que la garde d'une telle place en despit d'un si puissant ennemi estoit vn beau resmoignage de la puissance du Roy de Portugal, lequel de nouveau auoit remis au dessus son credit par la victoire obtenue sur les ennemis. Que lon pouuoit aisément garder la citadelle en esté par le secours que l'armee seiournant en la coste lui pourroit donner, puis qu'au plus fort de l'hiuer elle s'estoit maintenue avec vne poignee de gens contre tant d'ennemis si bien pourueus de toutes choses requises pour assieger & forcer vne place. Que cela se pouuoit faire sans grā-

de despenſe puis qu'on ſcauoit le nombre de ſoldats & de canons requis pour la deſenſe, ce qui au parauant auoit eſté conſideré à part de l'armée nauale: & qu'avec ce peu de gens on feroit la guerre ſi viuement que le Roy de Calecut ſuccomberoit ou ſe rendroit à diſcretion, ou ſeroit contraint quitter la ville & planter ſon ſiege ailleurs, entrepriſe la plus importante que lon ſcauroit péſer pour accroître le credit des Portugallois en tout l'Orient, & les faire eſtimer inuincibles, outre le prouſt qu'on en pourroit recueillir, grand en toutes fortes, ſur tout de ce qu'un ſi puiffant Roy eſtant marté, les autres plieroyent le gantelet, & lairroyent baſtir des citadelles par tout où les Portugallois verroyent leur commodité. Dauantage, que pour coſeruer à la poſterité la ſouuenance d'une victoire tât remarquable il eſtoit bõ de laiſſer debout la citadelle, car en la deſmoliffant c'eſtoit abolir tout à fait la memoire de la valeur des Portugallois, & l'ignominie des Mores qui ſe vanteroyent qu'on l'auroit ruinee de peur d'un autre ſiege. Apres ces remonſtrances, Iean de Leme ſ'offrit de la garder avec ſes parens & amis, tandis que la guerre dureroit. Mais le Viceroy autrement reſolu commanda que la citadelle fuſt abatuë, dont les ſoldats ſ'eſbahirent fort, diſans que les ennemis ne pouuoient pis faire s'ils fuſſent demeurez victorieux, & blaſmoyent le Viceroy enſemble tous ceux qui auoyent eſté de ceſt auis. Manuel de Macede fut laiſſé en terre avec bonnes troupes pour miner en certains endroits & faire tóber les murailles & répars en partie. Les mines iouerent, mais non pas de telle violence qu'on eſtimoit, tellement que la groſſe tour & la pluſpart des murailles demeurerēt de bout, au grãd regret des Portugallois qui quittoyēt ce qu'ils auoyēt ſi vaillamment deſendu deuant la bataille, & à raiſon de quoy vne tant belle victoire leur eſtoit demeuree. Apres que le capitaine Macede & ſes gens ſe firent embarquez le Viceroy fit voile en Cochim, permettant à Iean de Leme d'aller en Cananor enleuer quelques coffres & hardes qu'il y auoit, pour ſe remóter, pour ce que durāt le ſiege il n'auoit eſpargné ſon bien pour ſubuenir aux neceſſitez extraordinaires des ſoldats.

LE Viceroy eſtant forti du port de Calecut, les Mores entendirent ce 18. qu'on auoit fait à la citadelle & y coururent voir que c'eſtoit. Lors ils allerent trouuer le Roy, auquel ils attribuerēt tant de louanges, comme s'il euſt eſté cauſe de ceſte deſmolition, qu'il deuint plus fier que iamais. Les autres Rois & Princes Indienſs'enſlerent de meſmes, ayans receu nouuelles que le Viceroy auoit abandonné & ruiné la citadelle de Calecut, concluans de ne donner terre aux Portugallois pour en edifier à l'auenir, & de raſer celles qui eſtoient baſties. Entre autres Zabaim Dalcam ſe fit accroire qu'il pourroit recouurer Goa, ou par le moyen d'une longue guerre contraindre les Portugallois à en deſloger. Il auertit le Roy de Calecut de ceſte entrepriſe, diſant vouloir enſuiure ſon exemple, & le remerciant de ce qu'il auoit fait. Outreplus il le prioit de preſter ſon armée, afin de commencer la guerre par mer, & ioindre les Malabares aux forces dont Melichiaz gouuerneur de Diu l'accommodoit, pour chaſſer les Portugallois hors del'Inde baſſe. Le Roy s'accordant à ceſte demande redreſſa ſon armée, commandant au general

*Ce que fit le
Roy de Cale-
cut apres le de-
part des Portu-
gallois.*

neral d'icelle d'enuoyer les paraus en la coste pour guerroyer à toute ou-
trance les Portugallois. Or comme ils deliberoient executer vne partie de
leurs desseins Zabaim se trouua enucloppé en des guerres contre ses voi-
sins, & fut contraint laisser les Portugallois en quelque repos. Cependant
le Roy de Calecut demeura aussi superbe que iamais, & fit releuer les mu-
railles de la citadelle, afin de pouuoir dire & se vanter que les Portuga-
lois auoyent tant redouté sa puissance, qu'ils estoient deslogez de leur for-
teresse pour la lui laisser. D'autre costé le Viceroy estant à Cochim donna
secrettement ordre sur mer & par terre à tout ce qui estoit requis pour le
siege de Diu, attendant la commodité d'executer ceste entreprise, & fit fai-
re en Goa diuers engins & instrumens de fer & de bois, & prouision d'ar-
mes & de pouldres.

19. I L faut parler maintenât des affaires de l'Inde haute. George Albuquer-
que ayant la saison propre pour venir de Malaca en l'Inde basse, s'embar-
qua en vn ionc qui lui appartenoit, ne voulant (tant il estoit affectionné au
seruice du Roy) emmener aucun vaisseau de Portugal, encores que Mascara-
regne lui en presentast quelques vns de bon cœur, pource qu'il fauoit que
tels vaisseaux estoient necessaires en Malaca. En ce ionc il menoit quaran-
te quatre Portugallois ses amis & seruiteurs, avec lesquels estât pres de Por-
qua il fut assailli du gouuerneur grand ennemi des Portugallois, lequel me-
noit vne flotte de vingt cinq caturus bien equippez, ayant à sa queue tous
ceux du pays en des almadies, car il les auoit semés au pillage de ce ionc.
Albuquerque voyât qu'on lui en vouloit, rangea ses soldats, fit charger les
pieces au nôbre de douze couleuines & vn fauconneau, disposa les hom-
mes & canons en proue, en poupe & aux costez, attendant le gouuerneur
qui sur les neuf heures du matin inuestit le ionc & commence à le canon-
ner de plusieurs pieces, tellement que les balles tomboyent dru & espais
comme gresle. Mais le ionc estoit si fort, & les pieces de l'ennemi si petites,
qu'il ne receut pas grand mal: au contraire les Portugallois brisoient plu-
sieurs caturus & tuerent plus de deux cens cinquante hommes à coups d'ar-
tillerie & d'harquebuzes, au rapport qui en fut fait depuis, chascun faisant
vn merueilleux deuoir, tellement que le gouuerneur & ses gens furēt con-
trains se retirer cōfus d'une telle perte enuiron midi. Albuquerque ne per-
dit qu'un de ses esclaves, mais il despêdit toutes les pouldres & boulets, puis
gaigna le port de Cochim, où le Viceroy estoit encor, qui aprestoit gés pour
enuoyer au deuant de ce ionc, ayant entendu l'empeschement que ce gou-
uerneur de Porqua lui vouloit donner.

20. Q V A N T aux isles Molucques les affaires y estoient lors en l'estat qui
s'ensuit. Durant l'amitié entre Garfie Henriquez gouuerneur des Moluc-
ques & Antoine Brittio, tous deux furent d'avis d'enuoyer en l'isle de Cele-
bo à soixante lieues de Ternate, ayans entendu qu'il y auoit grande abon-
dance d'or. Pour en sauoir la verité ils y enuoyerent quelques capitaines a-
uec vne fuste chargée de draps & autres marchādises, pour trafiquer avec
les insulaires. Estans partis sur le commencement de Iuillet ils arriuerent en
vne isle prochaine de l'autre, où ils furent humainement receus: mais quād

*Rencontre &
bataille sur
mer entre
George Albu-
querque & le
gouuerneur de
Porqua.*

*Auantures
des capitaines
Portugallois
partis des Mo-
lucques pour
aller en l'isle
de Celebo.*

les Insulaires entendirent que l'occasion de la venue estoit pour auoir de l'or, ils craignirēt que cela ne seruist d'amorce aux Portugallois pour s'emparer de l'isle : pourtāt resolurent ils de les saccager tous, & se sauir de la fuste, s'assurans qu'il n'y en viendrait plus d'autres. Vne nuit ils tascherent d'executer ceste deliberation, tandis que les Portugallois dormoyent en la fuste laquelle ils tirerent à bord. Mais au bruit qu'ils firent les Portugallois s'esueillirent en sursaut, & se defendirent si bien qu'ils repousserent les Insulaires. Puis remontans en mer aborderent en vne autre isle, de laquelle ils furent chassez, & surgirent en vne autre où ils furent aussi mal recueillis qu'es precedētes. Se voyās ainsi frustrez, delibererēt de retourner à Ternate, mais les vents estoient si contraires qu'ils voguerent plus auant & se trouuerent entre les isles de Mey, en pas vne desquelles ils ne peurent arriuer, à cause des courantes qui les porterent en plaine mer entre le destroit de Magellan & les Molucques. Or pource que les vents regnoient alors, ils furent poussez à plus de trois cens lieues loin de leur route, & par diuerses fois se virent sur le point de perir, vne nuit entre autres que le timō fut ietté hors de son lieu, sans qu'on le peust remettre, & errerent ainsi iusques au matin qu'ils se trouuerent pres d'une isle qui à trente lieues de tour, où ils prindrent terre, & furent bieu receus des Insulaires, gens de couleur bazannee, biē dispos, & de beau viaire tant hommes que femmes. Les hommes portent la barbe longue & noire, couuerts les vns d'une piece de tissure pēdante iusques sur les genoux, & ceints sur la hanche. Ceste couuerture est d'une sorte de paille plus blanche & deliée que des ions : ayans par dessus vne sorte de manteau qui les couuroit iusques au nombril, & sous cela portoyent des chemises d'autre semblable tissure beaucoup plus fine. La terre couuerte d'arbres & de fruits pareils à ceux des Indes, abondante en cheures, poules, eau douce de bonne saueur, & quelques legumes : l'air y estant si sain que lon n'y voyoit aucū malade ni debile, & y auoit de beaux vieillards. Au reste ils s'aidoyent de nacelles pour la pesche, costoyans leur isle, & coupoient le bois avec des os de poisson. Quelques Portugallois malades de long temps auparauant y recouurerent leur plaine santé : & voyans l'humanité de ces Insulaires, ils seiournerent avec eux l'espace de quatre mois attendans nauigation plus commode. Puis s'embarquerent pour tirer à l'Occident, faisans acroire à leurs hostes bien marris de ce deslogement, qu'ils retourneroyent bien tost d'un voyage par eux entrepris pour decouurir nouveau pays, & arriuerent en Malaca le vingtiesme iour de Ianuier de l'an mil cinq cens vingt six. On peusoit qu'ils fussent morts, tellement que leurs hardes auoyent esté vendues, à cause que pour aller & venir à Celebo il ne faut que six semaines, & ils auoyent arresté plus de six mois.

*Differēs entre
Antoine Brit-
tio & Gaspe
Henriquez, &
ce qui en a-
uut.*

I La esté dit à la fin du quinziesme liure que Brittio & Henriquez se- 22
stoyent accordez de demeurer ensemble iusques au mois d'Aoust, auquel
tēps Brittio deuoit s'embarquer & prédre la route de Malaca. Ce terme es-
cheu, dautāt que Brittio n'auoit encores acheué d'equipper son bateau il
se retira en vn lieu nommé Toloco deux lieues au dessous de la citadelle, Hé-
riquez

riquez demeurant gouverneur entierement. Or dautant que presques tous les Portugallois de la fuite de Brittio estoient saouls de la guerre, & auoyent amassé grãde quãtité d'espicerie, qui leur touchoit de plus pres que le seruice du Roy, ils ne demãdoient qu'à trõusser bagage, & pour cest effect prièrent Brittio de les receuoir & emmener, à quoy il s'accorda. Et sachãt que Henriquez s'y opposeroit si tost qu'on lui en porteroit les nouuelles, & retiendroit les payes qu'il auãçoit, eux tirerent de bõne heure ce qui leur estoit deu, & porterent peu à peu leurs hardes au basteau, faisans entendre que c'estoit le bagage de Brittio, lequel aussi trouua moyen de soustraire les instrumens de la forge de la citadelle, avec tout le fer & le plomb qu'on y trouua, gaignant tous les charpentiers & autres manœuvres pour s'embarquer avec lui, sans oublier les pouldres & boulets: bref tout ce qui lui sembla propre pour son voyage, encores qu'il vist la citadelle auoir grand' faulte de ce qu'il emportoit. Hẽriquez ne scauoit rien de tout ce mauuais menage, à cause que les officiers du Roy qui manioient ces choses estoient meilleurs amis de Brittio que bons seruiteurs de leur maistre, & donnoient à Brittio ce qu'il leur demandoit. Le mois d'Aoust escheu, Brittio mit entierement la forteresse es mains de Henriquez, sans que le mur du costé de la mer fust du tout fermé: les creneaux de la muraille du costé de terre estoient encores à faire ensemble du boulevard en ce mesme endroit. L'autre boulevard n'estoit que cõmencé, & la grosse tour n'auoit que dix brasses de hauteur à deux estages, le reste iusques au toict dressé sur charpenterie sans muraille, & clos de paille: tellement que les cheures & pourceaux pouuoient entrer & sortir leans. Brittio employa trois ans entiers apres ce superbe bastiment, dont Henriquez print possession. Et quand Brittio partit il fut suiui de tous ceux qui s'asseuroient de prendre avec lui la route de Malaca, faignans le vouloir cõuoyer iusques au port seulement pource qu'il auoit esté leur capitaine, & promettans retourner bien tost, ce que Henriquez leur permit, croyant ce qu'ils disoient: mais estans à Tolocco ils oublierent leur promesse, & Brittio se soucia peu de les reuoyer, pource qu'il estoit bien aisé de se mettre à la voile en bonne compagnie. Hẽriquez ayãt attendu ses gens quelques iours, se douta de ce qui estoit auenu, & enuoya messenger & lettres à Brittio le priant de renuoyer les soldats, la presence desquels estoit necessaire à cause de la guerre. Brittio fit response telle quelle & ces messages durerent quelques semaines, en fin desquelles Henriquez voyant que Brittio promettoit tout & ne tenoit rien, fit entendre tout le passé aux officiers de la citadelle, par l'auis desquels fut dressé vn escrit contenant les noms de tous les Portugallois obligez à garder la citadelle, & mandement à Brittio qui les tenoit pres de foy de les renuoyer, à faute dequoy faire y auoit de grandes protestations contre tous. Le secretaire de la facturerie porta cest escrit à Brittio, lequel respondit & fit à sa maniere accoustumee. Lors Henriquez resolut par l'auis des officiers de faire oster le gouuernail, la trompe & les voiles de la nauire nommee sainte Eufemie, sans laquelle ils ne pouuoient se mettre en mer, n'estant le basteau assez grand pour tant de gens. Cela executé, Brittio & ses gẽs arrestez court deli-

berent se faisir de la nauire à force d'armes, esperans puis apres l'acômoder de l'equippage neccessaire. De fait, sans aucun respect d'honneur ni de deuoir ils s'en allerent tous armez vers la citadelle de leur Roy avec des menaces contre Garfie & les siens : puis entretrent audacieusemēt en la nauire criās tout haut qu'ils vouldroyēt voir qui les pourroit retenir de couper la gorge à Henriquez, lequel les ayant veu passer avec telle insolēce fut merueilleusemēt despité, & pour empescher plus grād mal enuoya defendre en qualite de gouuerneur de la citadelle au nom du Roy de Portugal à Brittio & à ses gens d'emmener la nauire, & fit publier ceste defense par vn heraut qui acôpagnoit l'auditeur de la citadelle. Apres la lecture d'icelle les soldats de Brittio se prindrēt biē fort à tire, disāns qu'ils ne reconoissoyēt Henriquez pour gouuerneur, ains Brittio, la charge duquel duroit iusques à son partemēt, qu'ils lui estoyēt soldats & non à autres : que si Hēriquez s'approchoit pour les brauer ils le perceroyēt à coups d'harquebuzes. L'auditeur retourné avec ceste respōse, Henriquez fut cōseillé d'enfondrer la nauire à coups de canon, & pour cest effect le canonnier commença à ranger quelques pieces. Comme les affaires estoient sur le point de tomber en extreme confusion, Cachil Daroes grand ami de Brittio ouit parler de ces dissensions, & vint incontinent trouuer Henriquez auquel il fit de grandes remōstrances, & apres auoir entendu ses raisons alla vers Brittio. Finalement il se voulut meller de faire appointment, qui fut tel que lon apperceut qu'il fauorisoit Brittio, lequel emmena la nauire, avec promesse de renuoyer les soldats, dont il tint cōpte cōme les autres fois. Cachil estoit biē aise que Hēriquez demeurast en petite compagnie, afin que lui & ses gens dependissent de l'autorité de Cachil & fussent ses suiets. Tel appointment engendra de merueilleuses picques par les rapports que les soldats faisoient, car aucuns qui estoient avec Brittio se retirerent en la citadelle, & au contraire certains de la compagnie de Henriquez se rangerent avec Brittio, soufflās tellement aux oreilles de ces deux capitaines qu'un feu de haine irreconciliable s'alluma en leurs cœurs, iusqueslà que Brittio attenta en diuerses sortes sur la vie de Henriquez, & alla lui-mesmes en habit desguisé dedans la citadelle pour le tuer : mais il ne pūt rien executer ni ceste fois ni les autres. Depuis il suiuit d'autres moyens obliques pour auoir prinse sur Henriquez, (qui se môstroit patiēt & peu passioné) toutesfois il perdit son tēps, & apres que ces querelles eurent cōtinué iusques à la fin de l'annee, Brittio s'embarqua sur la fin du mois de Ianuier de l'an nul cinq cens vingtfix, & print la route de Bandan, laissant la citadelle despourueue de soldats & des autres choses sus-mentionnees. Henriquez destitué de moyens enuoya Martin Correa es isles de Bandan pour enleuer gens & meubles tant es ioncs qu'es autres vaisseaux de Malaca qui se trouueroyent en ces lieux : pource qu'on ne se soucioit en Malaca, encotes moins en l'Inde basse, d'enuoyer gens ou fournitures neccessaires aux Portugallois demeurās en ces isles Moluques.

LE Viceroy parti de Cochim pour se retirer en Goa courut la coste iusques à Panane, sans rencontrer aucun parau des ennemis, car ils auoyent leurs sentinelles en terre qui donnoient le signal pour faire retirer leurs gēs dans

dans les fleuves plus prochains où ils se tenoyent cachez iusques à ce que la flotte fust passée. Comme le Viceroy repassoit deuant Calecut il fit brusler quelques vaisseaux tirez en terre, & faisant voile vers Cananor, descouurit quatre paraus Malabares escartez d'une plus grand' flotte qui alloit acheter du riz. Il fut despité de l'audace de ces quatre vaisseaux qui s'approchoyent si pres de lui, n'ignorans pas qu'il estoit en ceste coste: pourtant conclud-il de les chastier, & sur l'heure fit equipper vn basteau, commanda qu'on lui apportast ses armes, puis nonobstant le mal de sa iambe, & cōtre les remōstrances des capitaines, quis'offroyent d'aller inuestir ces paraus, voulut y aller en personne. Ainsi qu'il voguoit, quelques brigantins de sa flotte le deuancerent, & ioignirent les paraus de telle sorte qu'ils prindrent prisonniers tous ceux qui estoient dedans. Ce neantmoins le Viceroy vouloit aller iusques là pour se trouuer aux coups: mais son mal de iambe laquelle s'enfloit desmesurément, s'il s'appuyoit dessus tant soit peu, le cōtraignit de retourner en son gallion, & pource qu'ils s'estoit eschauffé de chole-re & avec les armes sur le dos, la fièvre le saisit sur le soir, qui le contraignit de se retirer en Cananor pour pourvoir à sa santé. Il y arriua au mois de Iā- 1 5 2 6. uier, laissant pour Amiral en ceste coste de Malabar George Tellio, lequel courant au long d'icelle trouua Pierre de Far à la bouche du fleuve de Baccanor, appartenant au Roy de Narfingue, où cent cinquante paraus Malabares se chargeoyent de poyure pour Cambaje, estans bien equippez & fournis de quatre mille harquebuziers. Tellio sachāt ces nouuelles ne voulut assaillir incontinent ceste flotte, pource qu'il auoit peu de gens, ains escriuit au Viceroy, le priant d'enuoyer quelque renfort. Le Viceroy ne sachant pas en quel nombre estoient les ennemis, ne lui enuoya que biē peu de gens sous la charge de George de Menefez, mandant à Tellio que s'il se sentoit assez fort pour aborder les ennemis il leur donnast bataille: sinon qu'il attendist autre nouueau renfort.

23. GEORGE de Menefez ayant rendu les lettres du Viceroy, Tellio dit qu'il estoit impossible de differer le combat, ni d'attēdre gens de Cananor, pource que les ennemis deuoyent partir le lendemain, & faloit leur empêcher l'entree en mer. L'affaire mis en deliberation, les capitaines furent d'auis de donner bataille, encores qu'en tout ils ne fussent pas plus de six cens hommes. Ils se preparerent la nuict, equippans & disposans leurs basteaux, brigantins & catur, pour entrer dans le fleuve, ce qu'ils firent le lendemain avec le flus de la mer, & tost apres trouuerent les ennemis qui montoient par le reflux. Alors les pieces commencerent à tonner & vomir le feu de toutes parts. Les ennemis qui ne s'attendoient pas qu'on les deust assaillir dedans l'embouchure du fleuve, furent si estonnez de voir les Portugallois & d'ouir le canon, qu'ils penserent l'armee estre beaucoup plus grāde qu'elle n'estoit, & de peur commencerent à tourner pour venir au dessus, puis avec la maree qui haussait & à force de rames ils fuyrent de toute leur puissance, estans suivis de Tellio & des siens qui canonnoient furieusement, & endommagerent fort les ennemis iusques à ce que l'eau commença à baisser. Alors les paraus Malabares & les brigantins des Portugallois demeure-

*Desfaite des
Malabares
par George
Tellio au fleu-
ue de Baccanor.*

rent arrestez les vns d'un costé, les autres d'un autre. Ce pendant les Malabares taschoyent de voguer au long du riuage, n'ayans la hardiesse d'attendre le choc. Les plus legers vaisseaux des deux partis ramerent iusques à vn lieu ou le fleuve estoit si peu large qu'on le passoit sur vn pont. Alors ils s'arrestèrent tous. Quant aux Portugallois il n'y auoit là que les deux basteaux de Tellio & de Meneséz avec quatre catur, & si petit nombre de soldats que ce n'estoit rien à comparaison des ennemis, lesquels voyans si peu de gens, prindrent courage & commencerent à tirer coups de canon & de flesches, specialement contre le basteau de Meneséz, lequel se voyant assailli de telle furie tascha de les acoster pour combattre à coups de main. Tellio voyant les ennemis se renforcer, fut dauis de se reioindre aux autres vaisseaux de sa flotte, mais en se retirant il demeura à sec en doublant vne pointe de terre, à cause que l'eau estoit trop basse, & y auoit en ce mesme lieu vingt paraus ennemis arrestez de mesme empeschement. Quand ils virent les Portugallois en telle extremité ils firent iouer certaines pieces qui estoient en terre, sans que Tellio peust se defendre, & de malheur vn boulet donna contre vn baril de pouldre en vn catur & y mit le feu, mais les soldats & matelots sauterent en l'eau & se sauuerent. Cest accident encouragea les ennemis, tellement qu'ils se faisoient à croire que les Portugallois estoient en leurs mains, & recommençans le combat vindrent ioindre Tellio, lequel alors avec Meneséz & les autres fit vn merueilleux effort, tellemēt que le fleuve estoit taint en rougé du sang des occis & blesez du costé des Malabares, qui se retirerent vers terre. Mais apres ceste victoire les Portugallois se trouuerent en plus grand danger qu'auant la bataille, pource que les ennemis recommencerent à tirer du bord de l'eau cōme s'il eussent visé à vn but, les vaisseaux estans à sec, tellement que s'il leur eust falu attendre le retour de la maree, c'estoit fait de Tellio & deses troupes. Or au mesme tēps estoit en ceste coste vn lieutenant du Roy de Narsingue avec trēte mille hommes, pour recueillir les tributs de ceste prouince, & donner ordre aux affaires qui s'y presentoyent. Icelui oyant le bruit de l'artillerie marcha en diligence celle part avec quelques troupes, & à sa venue fit cesser & retirer les Malabares. Tellio sachant qui estoit ce capitaine, lui enuoya remonstrier qu'il ne deuoit permettre que les Malabares assaillissent les Portugallois sur les terres du Roy de Narsingue ami du Roy de Portugal. Le lieutenant s'excusa, tançant les capitaines ennemis, & commanda à toute l'armee des paraus de descendre en terre: tellement que les Portugallois demurerent libres, & trouuerent quarante des leurs tuez en ceste rencontre, en laquelle les ennemis perdirent beaucoup. Tellio voulant venger la mort de ses soldats, se retira vers la bouche du fleuve pour attendre les ennemis au passage, & mit au riuage quelques pieces pour les endōmager de tous costez: puis auertit le Viceroy de ce qui estoit auenu, & entendit de lui ce qu'il auoit affaire puis apres.

Mort & enterrement de Hēri de Meneséz, Viceroy: avec

LO R S que le Viceroy receut ces nouuelles, sa iambe le tourmentoit si asprement qu'il conut sa mort estre prochaine, d'autant qu'il decheoit de iour en iour. Ainsi donc apres auoir donné ordre à ses affaires, il rendit l'esprit

prit à Dieu le second iour de Feurier l'an mil cinq cens vingt six, & fut en-
 terré au temple de Cananor, au grand regret de tous, spécialement des g^{es}
 de bien, à cause des belles parties & grandes vertus qui paroissoient en lui.
 Car il estoit fort consciencieux enuers Dieu & les hommes, liberal, nulle-
 ment auaricieux, comme la fin de sa vie en seruit de preuue, n'ayant en ses
 coffres que cent ducats, sans s'estre soucié de trafiquer ni de penser à ses afai-
 res particulieres, comme faisoient plusieurs autres, encores que sa charge
 & autres precedentes lui eussent présenté moyen de remplir sa bourse. Or
 il pensoit si peu aux biens qu'en partant de Portugal pour aller aux Indes il
 vendit vne partie d'iceux, engagea & bailla à ferme le reste, pour em-
 ployer l'argent quand il seroit en charge. Mais voyât qu'il ne pouuoit vac-
 quer aux affaires publiques & particulieres ensemble, il quitta incontinent
 le souci de son particulier, & despendit ses deniers pour le seruice du Roy,
 sans vouloir faire autre gain, disant que le Roy s'en souuiendroit, pour le
 reconoistre enuers ses enfans. Ce Seigneur de grande maison estoit fort
 vaillant de sa personne, chevalier sans peur, & tel reconu en toutes les ba-
 tailles & rencontres esquelles il s'estoit trouué tant en Afrique qu'es Indes,
 des qu'il commença à porter les armes. Il aimoit les hommes vaillâs, & les
 louoit deuant chascun, les encourageant à contiuuer en mieux par les ri-
 ches presens & beaux estats qu'il leur donnoit. Estant au reste plus ialoux
 de son honneur que nul autre, prompt à faire iustice, sans passion aucune ni
 acception de personnes, à raison dequoy il estoit mal voulu de quelques
 gentilshommes qui disoyent mal de lui, pource qu'il ne les auoit pas espar-
 gnez. En tous affaires il estoit bien auisé à les acheminer, resolu en con-
 seil, prompt & hardi à executer. Son intention estoit de s'emparer
 des villes de Diu & Aden, & de continuer la guerre de Ca-
 lecuc : mais la mort le deliura de tels soucis, & ca-
 cha dans terre avec le corps, tant d'entre-
 prises que l'esprit embrassoit du-
 rant ceste vie mortelle.

* *

FIN DV SEIZIESME LIVRE.





L E
DIX SEPTIÈME LIVRE.
S O M M A I R E.

1. *Lopez de Sampaio déclaré Viceroy apres l'enterrement de Henri de Menefez : ses premiers exploits en ceste charge, & à s Indes qu'en Ormuz.*
2. *Retour de Roderic de Leme ambassadeur de Portugal de la cour du grand Negus d'Ethiopie au port de Mazzagan, sa naufragie en Ormuz, son retour en Portugal, & sommaire de sa legation.*
3. *Troubles en la ville de Din : par quels moyens elle demeura en la puissance du Roy de Cambaie, & l'ordre que les capitaines Portugallous donnerent à leurs affaires.*
4. *Lettres du Roy Jean troisième touchant le gouvernement des Indes cōfirmé à Lopez de Sampaio lequel est déclaré Viceroy.*
5. *Les mescontentemens suruenus entre les Portugallous sur la nomination du Viceroy, & ce qui s'en ensuyuit.*
6. *Estat des affaires en Malaca, & ce que fit Pierre Mascaregne ayant entendu que le gouvernement des Indes lui estoit attribué apres la mort de Henri de Menefez.*
7. *Description de l'isle de Buntam & l'entreprise de Mascaregne sur icelle.*
8. *Armee du Roy de Paon venant au secours des Buntamou desjaue par Mascaregne : & l'Arrival Lazuenimene mis enroue par le capitaine Serran.*
9. *Mascaregne emporte d'assaut la ville de Buntam,*
- dont s'ensuyt la mort du Roy, le successeur duquel fait alliance avec Mascaregne, & se rend tributaire du Roy de Portugal.
10. *Naufragie de Francesque de Sa infiques à Zonde, & ce qui lui auint.*
11. *Armee de Mascaregne au port de Cochim, l'empechement qui lui fut donné & son emprisonnement.*
12. *Les grands troubles suruenus entre les Portugallous à cause de l'emprisonnement de Mascaregne.*
13. *Pratiques de Mascaregne pour se deliurer & faire obcir comme Viceroy, & l'issue d'icelles.*
14. *Estat des isles Moluques : appointement entre le Roy de Tidore & Garsie Henriquez, lequel rompt ce traitté, & ce qui auint depuis.*
15. *Flotte d'Espagne envoyée par l'Empereur Charles cinquiesme aux Moluques, arrivée d'icelle, & ce qui passa entre les Espagnols & Portugallous.*
16. *Continuation du recis des differens entre Sampaio & Mascaregne touchant le gouvernement des Indes.*
17. *Juges deleguez pour vider le proces, d'entre Sampaio & Mascaregne, & leurs considerations sur ce differend.*
18. *Sentence des juges deleguez, au preiudice de Sampaio, & qu'il fut apres auoir esté cōfirmé au gouvernement, & le retour de Mascaregne en Portugal.*

Lopez de Sampaio déclaré Viceroy apres Menefez : ses premiers exploits en ceste charge.



P R E S l'enterrement de Henri de Menefez Viceroy, le gouvernement duquel a esté descript au liure precedent, tous les capitaines, gentilshommes & autres principaux officiers du Roy de Portugal, s'assemblerent au temple de Cananor, où se trouua pour lors Alphonse Messie conseruateur de la faculté royale avec Jean de Soire Auditeur general des Indes : afin d'ouurir le paquet des lettres de la seconde succession au gouuernement de l'Inde haute & basse. Messie en fit ouuerture deuant tous, & se trouua que le Roy n'ômoit pour successeur à Henri de Menefez Pierre Mascaregne capitaine de Malaca. Or pource que Mascaregne estoit absent & qu'il ne pouuoit à cause

cause de la nauigation venir en l'Inde basse auant neuf ou dix mois, tellement qu'il estoit à craindre que tout ne fust alors renuersé, ceux qui se trouuerent à l'ouuerture de ce paquet demeurerent esperdus, d'autât que l'Inde basse auoit besoin de Viceroy, tant pour la guerre contre les Rois de Calicut & de Cambaje, que pource que lon attëdoit l'armee des Turcs en May ou en Septembre. Là dessus Messie & autres entrerent en dispute, s'il falloit eslire vn autre Viceroy en l'absence de Mascaregne : à quoy l'Auditeur general fit response qu'il estoit d'auis qu'on ouurist les lettres de la troisieme succession, & recevoir celui qui y estoit nômé, puis que le Roy se fioit en lui du gouuernement des Indes, & qu'vn tel manieroit les affaires de meilleure sorte quenul autre en l'absence de Mascaregne. Vaque Deze s'opposâ fort & ferme à cest auis, disant qu'incontinent que le troisieme successeur se verroit receu, encores que ce fust par entreposts & iusques à la venue de Mascaregne, on verroit de grands troubles en l'Inde basse, pource que ceux qui sont si haut montez descendent bien enuis puis apres : pourtant ne deuoit on ouurir ceste troisieme succession, & que le Roy n'en seroit pas content. Quelques gentilshommes furent de cest auis : mais Alfonso Messie ne s'y voulut ranger, alleguant qu'on pourroit remedier à tous ces incôueniens, en faisant iurer le troisieme successeur sur le liure des saincts Euangiles, & signer en presence de tesmoins & notaire en instrument authentique, qu'il quitteroit le gouuernement si tost que Mascaregne seroit venu. Que lui conseruateur, l'Auditeur, tous les capitaines & gentilshommes estans en l'Inde basse, promettroyët par serment solennel de contraindre le troisieme successeur à tenir promesse, & que par ce moyen l'affaire demeureroit paisible & assuré. Tous approuuerent cest auis, prestèrent le serment, & soussignerent vn acte public qui en fut dressé par le secretaire Pegade. Cela fait Messie ouurit les lettres de la troisieme succession, qui nommoient Lopez de Sampajo capitaine de Cochim. Lors Messie iura derechef que soudain apres l'arriuee de Mascaregne il donneroit ordre que Sampajo renonceroit au gouuernement des Indes : autant en iurerent tous les autres, & soussignerent vn deuxiesme instrument, minuté par Pegade le troisieme iour de Feurier mil cinq cens vingt six. Puis apres ils allerët en Cochim, où Messie remit le gouuernement es mains de Sampajo iusques à la venue de Mascaregne, côme il le iura & promit obseruer, & signa l'acte que Pegade en fit expres, qui fut soussigné de l'Auditeur general, de Messie, de tous les capitaines & gentilshommes qui s'y trouuerent. Mais l'euénement monstra que Messie s'estoit lourdemët abusé en son discours, ou qu'il estoit vntresmeschant homme, ayant semé la graine d'vne dissension qui cuida ruiner les Portugallois : & qu'il auoit moyen de conseruer l'estat & à Mascaregne son droit, sans chatouiller de si pres les oreilles du troisieme successeur, qui se voyant à cheual fit tant en Portugal & es Indes que celui qui le deuaçoit par ordonnance expresse du Roy perdit neantmoins les estriëfs, & fut renuoyé en Portugal, comme nous le verrons au dernier chapitre de ce liure. Pour reuenir au fait, Sampajo se voyant Viceroy, commença incontinent à tenir la main aux affaires : & premierement

despescha Roderic Pereire pour aller à Bengala, remit son galliô à Manuel Brittio, enuoya George Capral avec quelques paraus butiner es isles de Maldiuar, où il s'achemina promptement. Ceux là expediez, le Viceroy s'appresta pour aller courir la coste de Malabar, afin que le Roy de Calecut entendist que Henri de Menefez auoit laissé gens qui donneroyent de la besongne aux Calecutiens. Il partit le sixiesme iour de Feurier en vne galere bastarde de Vasque de Leme, ayant outre les brigantins & catturs quelques grands vaisseaux, esquels commandoyent lacques de Sylueire, Alfonso de Menefez, Manuel Brittio, Antoine de Sylues, Manuel de Macede, lacques de Mezquite, Henri de Macede & Lopez de Mezquite. Le Viceroy suiuant sa route de Cochim à Cananor ne trouua aucun parau de Calecut, pource que presque tous estoient espars en diuers fleuves, d'où ils n'osoient sortir craignans tomber es mains des Portugallois. Ainsi que le Viceroy seiournoit en Cananor pour auictualier ses vaisseaux, il receut vne lettre de George Tello qui le prioit de venir au fleuve de Baccanor, pource que les ennemis qui y estoient dedans en grand nombre vouloyent partir, ce que lui qui auoit trop peu de gens ne pouuoit empêcher, attendu que les ennemis s'estoient tellement renforcez qu'ils auoyent pres de douze mil hommes. Quand le Viceroy ouit parler d'un si grand nombre de gens, il enuoya querir Christofle de Soufe & Antoine de Sylueire, seiournans lors en la ville de Goa, afin de se venir ioinde avec lui & amener toutes leurs troupes, lui ne se sentant pas assez fort pour execution si importante comme celle qui se presentoit. Or tandis qu'il seiournoit illec à l'occasion des victuailles dont la flotte auoit besoin, il enuoya Manuel de Macede se ioinde à Tello, & le suiuit incontinent apres. Estant arriué pres de ce fleuve il entendit que les Malabaress'estoient fortifiez non seulement d'artillerie au long du riuage, mais aussi d'une palissade courant d'un costé iusques à l'autre, tellement que la flotte des Portugallois ne pouuoit gagner terre sinon à vue force de tous les vaisseaux ensemble : outre ce que tout au long de ceste palissade y auoit de gros chables dedans l'eau, afin que les gallions, brigatins, basteaux & catturs du Viceroy s'entortillassent en tels filez, & ne peussent passer. Ce nonobstant le Viceroy resolut de donner bataille aux Mores & brusler leurs paraus sans trop attendre Soufe & Sylueire. Pour attacher les corps de garde des ennemis il fit armer quatre basteaux couverts chargez de grosse pieces d'artillerie, lesquels vogueyent deuant, estans suiuis des autres voiles. Ayant attendu quelques iours il ne voulut differer dauantage, de peur que les Mores n'imaginassent qu'il eust peur d'eux, & resolu de les assaillir fit mostre de ses gens qui montoient à troiscens homes. Or auant que passer oultre il assembla les capitaines & principaux de la flotte, pour entendre quels moyens on tiendrait pour assaillir les ennemis. Mais la plupart iugerent qu'il ne deuoit point combattre, alleguans que le Viceroy estoit trop foible pour assaillir vne telle armee & si bien fournie de canon, & ne deuoit ainsi auanturer le gouuernement des Indes en vn affaire si perilleux que cestui-la. Presque tous ceux de cest auis vouloyent mal à Sam-pajo, estas marris qu'il eust le gouuernement, pource qu'il n'estoit pas grãd sei-

seigneur: & l'esperance qu'ils auoyēt de voir bien tost Mascaregne les faisoit ainsi reculer, afin que cestui-ci, qu'ils n'estimoient sinon gouuerneur prouisionnel n'emportast l'honneur d'une telle victoire. Lui connoissant leur intention, & qu'ils ne le voyoyēt pas de bon œil, remit ceste deliberation à une autre fois & iusques à ce qu'il auroit reconu le fleuve & la descēte, ce qu'il fit le lendemain matin au clair de la Lune, avec Manuel Brittio & Roderic d'Arauge braues capitaines, qui lui tindrent cōpagnie, & vogueoyent chascun en vn catyr. Les Mores descouurans ces vaisseaux commencerent à canonner, mais en despit d'eux le Viceroy ne laissa de considerer & remarquer ce qu'il desiroit, & en retournāt fit couper par gēs experts, qui se plongerent eu l'eau, les chables traufferans le fleuve pres de la palissade, puis se retira vers la flotte, & exposa ce que dessus aux capitaines & gentilshōmes, leur prouuāt par viues raisons que la victoire estoit aux Portugallois, si lon vouloit assaillir les ennemis. La pluspart fut du premier auis, qu'on ne donna point bataille, tellement que le Viceroy n'osant passer outre tiroit cest afaire en longueur, attendant Souze & Sylueire qui seroyent (ce lui sembloit) d'auis de combatre, comme aussi ils furent & y poussèrent le Viceroy qui y enclinoit entierement. Apres auoir ordōné ce que chascun auoit à faire, le lendemain de grand matin, qui estoit le vingtcinquiēme iour de Feurier, ses vaisseaux esquels y auoit mille hommes de combat commencerent à voguer vers les ennemis qui canonnoyēt furieusement de leur part. Neantmoins Brittio & Arauge qui conduisoient l'auantgarde inuestirent courageusement la palissade, & la rompirent. Lors il y eut vn tresaspre conflict à la descēte: mais à l'approcher du Viceroy les ennemis estonnez quttrēt le riuage pour se sauuer de vistesse en terre ferme, laissant leurs paraus à la merci des victorieux. Incontinent le Viceroy fit sonner la retraite, ne voulant pas que les soldats fourrageassent le plat pays appartenant au Roy de Nansingue ami des Portugallois, & craignant que ce Roy ne s'en vengeast puis apres, comme il en auoit bien les moyens. Les troupes assemblees on mit le feu es paraus qui furent tous bruslez, ensemble vne maison pres du riuage, plaine d'espiceries qu'ils vouloyent charger es paraus. Outreplus on tira dans les vaisseaux de la flotte quatre vingts pieces de bronze prinſes autour de la palissade. Le Viceroy ne perdit que quatre soldats en ceste iournee, & en remena cent blesez: mais les ennemis y laisserent grand nōbre des leurs, cōme qn le sceut depuis par le grād dueil fait à cause d'eux en la ville de Calecut, & non sans cause, attēdu aussi la perte d'environ cent cinquante paraus & de tant de marchandises. Apres ceste victoire le Viceroy print la route de Goa, où il trouua de l'empeschement: car Francisque de Sa gouuerneur de l'isle & de la ville lui enuoya signifier à diuerses fois qu'il perdoit temps de pretendre entrer dans la ville: qu'il ne reconoissoit autre Viceroy es Indes que Pierre Mascaregne nōmé par le Roy Jean troisiēme: que Sampajo auoit esté nōmé par gens qui ne pouuoient dōner ceste charge, pourtant n'estoit il aucunement deliberé de le reconoistre ni lui obeir. Francisque de Sa auoit le conseil d'estat en ceste isle de son costé: ce neantmoins Sampajo vint surgir aupres du quay

où il demoura quelques iours à l'anchre, employant le temps à sommer Francisque de le laisser entrer. Il n'eust rien gagné en cela sans Christofle de Soufe qui sollicita cest affaire, & pour l'amour duquel Francisque fit ouuerture: mais incontinent que Sampajo fut dedans la ville il osta la capitainerie de la citadelle à François de Soufe, pour la donner à Antoine Sylueire son gendre pretendu, & enuoya Francisque de Sa aux Molucques pour bastir vne forteresse à Zunde, ville maritime de la grande Iaué. Car le Roy de Zunde craignant estre chassé par vn autre sien voisin auoit enuoyé prier le Viceroy Edouard de Menefez d'enuoyer gens pour bastir vne forteresse, & qu'il fourniroit du poiure en abondance & à beaucoup meilleur pris que les marchans de Cochim. Or d'autant que le Roy de Portugal craignoit que les Espagnols ne gagnassent le deuant, il commanda que lon y allast dresser vn fort, donnant la charge & gouuernement d'ice-lui à Francisque de Sa, gentilhomme de grand seruice. Sampajo sachant que Francisque auoit ceste commission, print ceste couleur pour le chasser au loin, & lui donna trois cens hommes en vn gallion & deux galliottes. Il enuoya aussi George de Menefez aux Molucques pour y commander, & lui ordonna cent soldats qui s'embarquerent en deux basteaux. Simon de Soufe fut establi Amiral des Indes: & Martin Alфонse Melio despesché avec six voiles pour roder autour des isles de Maldiuar, où il rencontra vne nef Turquesque allant de Tenazarin à Iude en Arabie, chargée de grandes richesses & de trois cens Turcs combatans, auxquels Melio s'attacha & apres auoir combattu deux iours, & tué la plupart des Turcs, il cōquit la nef, laquelle fut menée au port de Goa. Quant aux affaires d'Ormus, nous auons dit ci deuant que Henri de Menefez auoit en faueur du Roy & de Raix Xeraf escrit à Jacques Melio capitaine de la citadelle, le priât de se cōporter en telle douceur que les autres n'eussent plus occasion de se plaindre de lui. Soit que Melio ne tint compte de telles lettres ou pour autres raisons, il constitua Xeraf prisonnier, & le traita rudement, sur tout pour le regard de la bourse, tellement qu'on en fit des chansons en Inde, & taxoit-on Melio d'auoir pincé viuement la bourse de Xeraf, qui l'auoit enduré pour n'estre bourrellé d'autre façon, ayant bien merité le gibet: mais la bourse fut pendue pour lui. Sampajo entendant les nouuelles de ce trouble, joint que Melio le prioit de faire vn voyage en Ormus pour appointer ce different, auât la venue de Pierre Mascaregne, qui eust peut estre chastié Xeraf & Melio ensemble, delibera d'y aller pour complaire aux parties & les mettre d'accord. Cest affaire mis en deliberation, tous conseillèrent à Sampajo de demeurer, tant pour donner ordre à la guerre contre les Turcs & autres affaires, que pour n'aller perdre tēps en voyage de nulle importāce. Mais il ne voulut suiure cest aui, ains ayant laissé le capitaine Mirande avec tous les vaisseaux à rame en la coste de Malabar, il fit voile en Ormus sur la fin du mois de Mars, en vne galere bastarde de Vaque de Leme & menant quatre basteaux de guerre, dont Alфонse de Menefez, Manuel Brittio, Jacques de Sylueire & Manuel de Macede estoient capitaines. Apres beaucoup de difficultez ils arriuerent au port de Calajate, où Sampajo regaigna le gouuerneur

neur au parti des Portugallois duquel il s'estoit destourné à cause des extorsions de Iacques Melio, autāt en fit il à Mazcate : puis ayāt conquis vne nef de Mores qui fut vendue mille ducats, surgit au port d'Ormus, deliura de prison Raix Xeraf, protestant estre venu pour le mettre d'accord avec Melio, & ques'il pretendoit estre greué en demandant iustice elle lui seroit faite, nonobstant le parentage entre lui & Melio. Xeraf entendant cela perdit toute esperance d'obtenir son droit, & respondit à Sampajo qu'il pardonnoit à sa partie tous les outrages dont il se pourroit plaindre : autant en fit le Roy d'Ormus par l'avis de Xeraf. Voila comme les vns & les autres demurerent amis en apparence, & Sampajo apres auoir tancé son parent des fautes commises contre le Roy & Xeraf, passa l'hier en Ormus.

3. HECTOR de Sylueire enuoyé par le Viceroy Menefez l'attendre au cap de Guardafu, d'où il esperoit le mener en la guerre de Diu, voyant que le temps propre à la nauigation s'escouloit, fit voile à Mazzuā, & arriué en l'isle de Dabacca le premier iour d'Auril escriuit incontinent à Roderic de Leme ambassadeur de Portugal vers le graud Negus d'Ethiopie, au royaume duquel il auoit seiourné fort long temps. Par les lettres Sylueire prioit Leme de se retirer au port de Mazzuan où la flotte l'attendoit, & les enuoya on au gouuerneur d'Archique pour les faire tenir au plustost & en main propre. Lors Roderic de Leme & sa troupe reuenu de la cour d'Ethiopie avec sa despesche pour Portugal, estoit arriué à Barua enuiron le quinzieme iour de Ianuier, d'où il despescha incontinēt deux hommes vers la mer pour apporter nouuelles de l'arriuee des vaisseaux qui le deuoient emmener. Ils retournerent le mesme iour que Sylueire surgit en l'isle de Dabacca, tous desesperez & demi morts, disans n'auoir rien trouué, ni oui parler des Portugallois qu'en fort mauuaise part : car le bruit couroit que leur armee auoit esté desfaite es Indes, les citadelles prises. Ces nouuelles furent semées par certains Mores arriuez à Mazzuan avec trois nefes, qui asséuroyēt cela sous couleur de la prinse d'une gallere Portugalloise pres de Diu. Mais le troisieme iour ensuiuant les lettres de Sylueire furent rendues à Leme, ce qui le consola, comme lon peut estimer, & escriuit incontinent à Zagazabo ambassadeur du Negus en Portugal, lequel seiournoit en quelques sienes terres, qu'il ne fist faute de se mettre au plustost en chemin pour se ioindre à Mazzuā, où la flotte de Portugal les deuoit recueillir tous. Quelques iours apres Roderic se mit en chemin avec le Barnagas ou commissaire qui auoit charge du Negus de conduire les Portugallois iusques à leur flotte. Ce Barnagas estoit acompagné de six cens pictons & de deux mil hommes montez sur cheuaux & mules. Depuis Barua iusques à Mazzuan lon ne conte que quinze lieues, toutesfois ils furent six iours à les faire, à cause des chaleurs & diuerses incommoditez du chemin. Ayans gaigné le lieu où ils tendoyent, le Barnagas remit Leme & ses gens es mains de Sylueire, avec grande allegresse & ioye de tous, & lui fit aussi present de cinquante vaches, de plusieurs moutons, poules, chapôs & du poisson en quantité pour la fourniture des vaisseaux. Deux iours apres arriua Zagazabo, que le Barnagas conduisit à Sylueire, & demurerent là quelques iours at-

Retour de Roderic de Leme ambassadeur de Portugal vers le grand Negus d'Ethiopie au port de Mazzuan, sa nauigation en Ormus, son retour en Portugal, & sommaire de sa legation.

tendans la commodité de la mer qui est navigable en ceste coste d'Ethiopie depuis le vingtesptiesme d'Auril iusques au quatriesme de May, & si on laisse escouler ce petit espace de iours, il faut differer l'embarquement iusques au mois d'Aoult. Ce vingtesptiesme d'Auril quatre Calacenes ou messagers du Negus suruindrent à Mazzuan, disans leur maistre auoir esté auerti du costé de Zeila que la flotte de Portugal estoit entree en la mer de Arabie pour les enleuer: & d'autant qu'ils pourroyét estre contristez & incommodez veu le long temps qu'ils estoient partis de sa cour, ces messagers auoyent charge de remercier Leme & ses gens vers le Negus qui leur vouloit donner tant d'or & d'autres commoditez qu'ils retourneroyent en tresgrande ioye vers le Roy de Portugal. Ils adioustoyent qu'on leur auoit cōmandé de faire toute diligence, tellement qu'ils n'auoyent cessé de marcher iour & nuict, changeans leurs montures en diuers lieux, & pressoyent instamment Leme de retourner avec eux. Puis commanderent à Zagazabo d'accompagner Leme vers le Negus, & supplierent Sylueire de les y enuoyer, adioustans que leur Prince seroit fort mal content si l'on n'obeissoit à sa requeste. Mais Sylueire, Leme & les principaux, ne sachans l'occasion d'un tel mandement, firent responce que cela estoit impossible, attēdu que la commodité de s'embarquer pressoit, sans permettre de satisfaire pour ceste fois au desir du Negus. Son ambassadeur fit refus, craignāt s'il retournoit sans les Portugallois, d'estre ietté en quelque fosse aux lions: tellement que les Calacenes s'en retournerēt fort martirs de n'auoir executé leur charge selon le desir de leur Prince. Le lendemain, vingthuitiesme iour d'Auril mil cinq cens vingtsix, la flotte qui estoit de trois grands galliōs & de deux carauelles estant parrie de ce port alla faire aiguade en l'isle de Camaran le premier iour de May, où estoit enterré Edouard Galuā, les os duquel furent transportez secretement par Francisque Aluarez chapellain de Leme, & ferrez en vne quaiſſe au gallion où estoit ce prestre. Puis avec vn bon vent toute la flotte fit voile à l'aïse iusques au dixiesme de May, qu'elle commença à vouloir entrer dedans le goulfe de la mer Arabique. Mais vn vēt d'hyuer qui leur donnoit en prouē s'esmūt de telle furie la nuict du douziesme de May, que les vaisseaux furent escartez & portez fort loin les vns des autres à la merci des vents & des vagues. Le gallion de Leme ayant esté en dāger de naufrage fut poullé finalement pres d'Ormus, & le vingthuitiesme de May print terre au port de Mazcate, où il y trouua vne des carauelles, & l'autre y arriua au bout de trois iours avec le secōd gallion. Restoit celui de Sylueire, les gēs duquel furent biē empeschés quelques iours à tirer à la pōpe l'eau qui entroit, & avec la tourmente qui continuoit fut chassé en la coste de l'Inde vers le goulfe de Cābaje: & pource qu'il ne sauoit où mettre le pied il resolut gagner Ormus, maistrisant la bourasque le plus dextrement qu'il estoit possible, & cinglant de merueilleuse viſtesse par diuers rumbz & chāgemēs de vêts. Ce tēps perilleux cōtinua iusques au septiesme de Iuin, & ce pendant les viures commencerent à faillir, sur tout l'eau douce, dont vne parties estoit espendue durant la furie de la tourmente: tellement qu'ils furent pres de trois iours sans ofer mettre viāde à leur bouche, à faute

à faute d'eau pour boire. Et quant à Sylueire, qui en auoit quelque peu de referue en sa chambre, il s'abstint d'en boire pour en soulager les malades lesquels il consolait benignement : & de peur qu'on ne l'accusast de boire à part il ne voulut entrer en sa chambre, & dormoit ailleurs, encourageant les autres par tel moyen. Or sur le soir du septiesme de Iuin ils descourirēt Mazcate, n'ayans plus vne seule goutte d'eau douce. Et pource que le vent les empeschoit de gagner terre ils furent secourus de deux carauelles, qui leur porterēt à boire & à manger & conduisirent le gallion à bord. Sylueire l'ayāt rauictuallē, fit voile avec toute la flotte en Ormus, où estoit Sampajo qui les alla recueillir sur la plage, & fit bon recueil à tous. Le lēdemain Roderic de Leme presenta à Sampajo vnes lettres du Negus, adressātes à Iaques Lopez de Siqueire Viceroy lors que Leme fut enuoyē en Ethiopie. Il lui fit aüssi present de la part de ce mesme Prince, qui honnoroit ainli le Roy de Portugal en la personne de son lieutenant, d'une robbe de soye avec cinq larges & grōsses plaques d'or massif au deuant, autant par detriere, & vne sur chascue espaule, de la largeur de quatre doigts piece. Sampajo fit present à Leme de deux cēs ducats, & d'autāt à l'ambassadeur du Negus, & ayant fait calfeutēr les vaisseaux de ceste flotte, enuoya Sylueire, Britio & Macede avec quatre gallions & deux carauelles, sur la fin d'Aoust, en la coste de Diu, où ils conquererent trois nefes de Mores & firent si riche butin que le quint du Roy montoit à soixante mille ducats, sans les esclauē qui furent vendus depuis. Delā Sylueire se retira au port de Chaul où estoit Sampajo qui lui fit grand acueil à cause de ce butin, qui vint à propos pour acommoder toute l'armee. Roderic de Leme mouilla l'ancre au port de Goa le vingtcinquiesme iour de Nouēmbre, ayant trois nauires, & de là fit voile en Cochim, puis en Cananor, où il arriua sur la fin de l'annee. En la nauire de Leme estoit l'ambassadeur d'Ethiopie, & pource qu'elle estoit arriuee la premiere à la rade de Cananor, elle fut incōtinēt chargee de gingembre, biscuit & poisson, puis rehaussa les voiles le quatriesme iour de Iāuier l'an mil cinq cens vingt sept, prenāt la route de Portugal: celle d'Antoine Galuan le dixhuitiesme, & la tierce le vingtnuefiesme du mesme, cinglans toutes en haute mer, tellement qu'elles ne s'entreuirent iusques au dixhuitiesme d'Auil, & lors elles se revnirent & firent voile ensemble iusques au vingtnuefiesme. Leme & sa flotte se trouverent lors vis à vis l'isle saincte Helaine, où ils pensoyent se rafraischir d'eau: mais sur le soir vn vēt de terre les vint assaillir de telle violence, qu'il les contraignit de passer outre, à leur grand regret, car l'eau douce commençoit à faillir. Estans en ceste extremite suruint vne pluye qui dura trois iours & trois nuicts sans cesser, au moyen dequoy ils remplirent trente poinçons d'eau, puis reprindrent leur route, iusques aux isles Açores, la nauire de Galuan flottāt la premiere, qui ayant descouuert vne almadie en laquelle on ne voyoit personne, Galuan fit jetter l'esquif & enuoya sauoir que ce pouuoit estre. Ceux de l'esquif trouuerent en ceste almadie neuf hommes, cinq blancs & quatre Mores esclauē, n'ayans autre apparence que de gens morts, car ils estoient immobiles de leurs sens & membres exterieurs. Ils furent amenez & leuez en la

nauires, & si soigneusement traitez que la parole leur reuint, & sceut-on qu'ils auoyent esté enuoyez par les deux autres nauires de Leme en vne isle pour y acheter quelques viures, & qu'ils n'auoyent peu rattraindre la flotte, tellement que la faim & la soif les surprenant ils perissoient si Dieu ne les eust secourus alors. Tost apres les deux nauires arriuerent, & se rafraischirent tous ensemble enuiron quinze iours, & ce pendant enuoyerēt de leurs nouuelles en Portugal: puis rehaussans les voiles eurent le vent si a propos que le vingtequiniesme iour de Iuillet ils approcherent du port de Lisbonne, où vne carauelle leur vint faire defeneses de par le Roy de se desembarquer, à cause que la ville estoit affligee de peste. Ce neantmoins ils furent continēt acostez de plusieurs barques pour descharger leurs besongnes, qui furent transportees à Sanctaren, où ils allerent se rafraischir cinq ou six iours, puis en partirent en vn temps de si extreme chaleur qu'ils n'auoyent senti la pareille en Ethiopie, tellement que deux Mores estoufferent de chauld. De Sanctaren ils allerent trouuer le Roy à Conimbrice où il les attendoit en son palais. L'ambassadeur du grand Negus d'Ethiopie presenta au Roy vne couronne d'or & d'argent en quatre pieces, de la hauteur de deux paumes avec deux lettres en feuilles de parchemin, chascune en trois langues, Abissine, Arabique, & Portugalloise, serrees en deux sachets de drap d'or, dont l'une s'adressoit au feu Roy Emmanuel, l'autre à Iean troisieme. Apres quelque briefue harangue de l'ambassadeur offrant la couronne de la part de son Prince, il fut renuoyé en son logis & traité magnifiquement durant son sejour. Les lettres adreesces à Emmanuel contenoient vn long discours de la bonne affection du Negus enuers le Roy de Portugal, vne confession de Iesus Christ & detestation des erreurs Mahumetiques: en apres il promettoit fournir à Emmanuel pour la guerre contre les Mores, gens, argēt & munitiōs à suffisance, priāt Emmanuel d'estre vni en religion & toutes autres choses avec lui, & pour la fin il demandoit gens experts en diuerses sciences mechaniques, spécialement des Imprimeurs, nommant fort souuent Emmanuel son pere & s'appellant son fils. Es lettres adreesces à Iean troisieme, il faisoit entre autres choses vne protestation de perpetuelle amitié, & requeroit que Ieā l'entretinst par lettres & ambassades, lui faisant offre de ses richesses & moyēs, & demandoit aussi toutes sortes d'ouuriers. Au reste Roderic de Leme rendit compte au Roy bien particulièrement de tout ce qu'il auoit negocié en ceste legation, laquelle avec ce qui a esté continué iusques à present a esté honnorable en quelque sorte, mais peu ou point proufitable aux Rois de Portugal.

*Troubles en la
ville de Diu:
par quels moy-
ens elle demeu-
ra en la posses-
sion du Roy
de Cambaie,
& quel ordre
les capitaines
Portugallois
donnerent à
leurs affaires.*

L A I S S O N s l'ambassadeur d'Ethiopie en Portugal, & repassons l'Océan 3. iusques aux Indes, pour cōsiderer en quel estat estoit la ville de Diu, de laquelle a esté parlé plusieurs fois ci deuant & sera encores sur la fin de ceste histoire. Henri de Menesez auoit entrepris de s'en emparer, comme nous l'auons dit sur la fin du seiziesme liure, mais comme il se preparoit à cela, Dieu le retira du monde. Ce pendant les affaires s'acheminèrent peu à peu pour la conqueste de ceste place, de grande importance pour la commodité des Portugallois en l'Inde haute & basse. Mais auant que declarer la

guerre

guerre que les Turcs y firent, & le succes d'icelle à l'auantage des Portugallois, il faut considerer ce qui preceda. Le quatriesme Roy de Cambaje nommé Madofar eut vn fils nommé Badur, lequel il delibera faire mourir pource que ses deuins predisoient que Badur mettroit vn iour le royaume en proye par son mauuais gouuernement. Ce fils auerti de la mauuaise volonte de son pere s'enfuit, errant en pauvre estat par diuers royaumes & pays, desquels il aprint les langages, estant curieux & ingenieux. Apres auoir tracassé durant quelques annees il se rendit en vne ville nommee Chitor au royaume de Sanga, limitrophe de celui de Cambaje, où il entédit que Madofar & vn sien fils estoient morts, & que le frere de Madofar auoit esté esleu Roy par les seigneurs du royaume. Lui deliberant de s'en faire maistre comme de chose à lui appartenant, se descourut à la Roine de Sanga, laquelle gouernoit les affaires apres la mort de son mari durant le bas aage d'un sien fils, & obtint secours d'elle & du Roy de Mandou, prince voisin: tellement que par leur moyen il conquist le royaume, ayant desfait & tué son competeur en bataille rée. Estant paisible Seigneur de Cambaje, il lui print enuie de se venger de quelques grâds du royaume qui auoient fauorisé le feu Roy. De ce nombre estoit Melichfac fils de Melichiaz gouuerneur de Diu, lequel craignant d'estre attrappé resolut se preualoir de la faueur des Portugallois. Mais estimant qu'il n'y auoit point de Viceroy es Indes il escriuit à Christofle de Soufe & le pria d'enuoyer à Diu quelque homme d'autorité, auquel il vouloit communiquer chose d'importance, & qui auoit besoin de l'appui d'un Viceroy de Portugal, sans rien specifier dauantage, pour ne se descourir si tost. Pource que Sampajo estoit lors à Chaul ceste lettre lui fut rendue, & lors il presuma que Melichfac se vouloit maintenir contre le Roy de Cambaje à l'aide des Portugallois. Il entreprenoit lui mesmes ce voyage pour parlemeter avec Melichfac: mais tous les capitaines s'y opposerent, disans que ce seroit vne honte qu'un Viceroy des Indes courust ainsi à l'auanture, & fut ceste charge commise à Hector de Sylueire, lequel l'accepta & partit incontinct avec la flotte arriuee d'Ormus. Si tost qu'il eust mouillé l'anchre au port de Diu, Melichfac vint en son gallion, lui compta l'inimitié du Roy de Cambaje, auquel il ne se fieroit iamais, attendu que c'estoit vn Prince le plus desloyal du monde, & que pour se venger de lui il liureroit la citadelle de Diu aux Portugallois, moyennant qu'ils lui assistassent quand la necessité le requerroit, & qu'estans maistres de la ville ils lui donnassent la moitié des reuenus de la douanne. Ce pendant il retireroit en vne isle nommee Giaquete toute l'artillerie & les munitions qu'il auoit à Diu, pour se fortifier en ceste isle où il pretendoit demeurer. Ce parlement fut continué entre Melichfac & Sylueire l'espace de quelques iours, mais sans aucun effect, le naturel des Mores estant tardif à se resouldre, desiant & infidele: tellement que cestui ci vint à soupçonner que les Portugallois ne lui tiendroyent promesse. Hagamahamed son parent, duquel a esté parlé au douzieme liure, & qui acompagnoit Melichfac, taschoit de l'entretenir en ceste desfiance: car il haïssoit mortellement la nation Portugalloise, & craignoit que Sylueire ne s'empatast de la

citadelle. Toutesfois pour lors il dissimuloit, disant à Melichsac, que c'estoit bien pouruoir à ses affaires de liurer Diu aux Portugallois, afin des'asseurer contre le Roy de Cambaje: mais quelle asseurâce (adioustoit-il) auez-vous que ceux-ci vous rendent moitié des reuenus de la douanne, qu'ad ils en seront les maistres? Et me semble que deuez aller à Giaquete, tandis queles Portugallois seiournent au port: car ils ne vous aiment que pour leur prouffit particulier, estât à craindre que s'ils sont pres de vous à l'embarquement, ils ne saisisent vostre personne, vos femmes, vos richesses & tout ce qu'emporterez, tellement que vous perdrez ce que tenez desia, & ce que vous espérez tirer ci apres de la douanne. Melichsac homme paouteux & desfiant print pied aux paroles de Hagamahamed, s'assurant que tout ce discours estoit veritable, & deslors commença à songer bien fort à ses affaires, differant sa retraite de iour à autre, sans toutesfois se pouuoir resouldre. Mais Hagamahamed le voyant ainsi en branle poussoit à la roue tantost d'un costé tantost de l'autre, pour finalemēt le ietter du tout hors de la promesse faite à Sylueire. Vous auez promis (disoit-il) de liurer Diu, & le deuez faire pour vous maintenir cōtre le Roy de Cambaje. Mais aussi pour euitier que les Portugallois ne vous iouent le tour dōt ie me doute, ne vous embarquez point avec eux, & dites au capitaine Sylueire qu'il s'en retourne à Chaul, afin qu'ayez meilleur moyen de retirer vos biens à Giaquete, puis retourner à Diu pour y asseurer toutes choses, promettant de l'enuoyer querir, incōtinent qu'il en sera temps. Melichsac creut ce conseil d'un ennemi coniuéré des Portugallois, apres le partemēt desquels il delibera faire que Melichsac rēdroit la place au Roy de Cambaje pour faire sa paix. Pour executer ceste resolution ils commēcerent à delayer l'embarquement de Melichsac, de la part duquel Hagamahamed alla trouuer Sylueire en son gallion, & lui dit que les habitans de Diu commençoient à murmurer voyans ceste flotte tāt de iours au port, & presumās qu'il vouloit trahir la ville commençoient à prendre les armes: pourtant le prioit-il de se retirer à Chaul, afin que ceste multitude s'apaisast, & lors il retourneroit. Sylueire conut biē à ce lāgage que Melichsac se repentoit, & lui enuoya dire que les Portugallois ne se soucioient pas d'un bruit de ville: puis que la citadelle estoit du costé de la mer il se pouuoit embarquer secrettemēt de nuit & entrer en icelle: qu'apres cela lon trouueroit biē moyen de faire demeurer cois ceux qui crioient le plus haut. La responce de Melichsac cōseillé par Hagamahamed fut qu'il ne partiroit sans emporter tous ses meubles & l'artillerie, ce qu'il ne pouuoit executer en si peu de temps: que ce pēdant son entreprise seroit descouuerte à cause du seiour des Portugallois, ce qu'il redoutoit pour beaucoup de raisons: & pourtant conseilloit Sylueire des'en retourner à Chaul, qu'en son absence il enleueroit ses hardes plus secrettement & sans soupçon des habitans qui demeureroient paisibles: puis quand tout seroit à point, il enuoyeroit querir Sylueire, tellement que l'entreprise seroit executee sans hazard ni perte quelcōque. Sylueire ne remarquant riē de certain au dire de Melichsac, tascha de descouurer au vray qui l'esnouuoit à chāger ainsi, & pour le sauoir bāquetta sou-

uét Hagamahamed & autres Mores qui l'accompagnoient, les faifant boire defmeſurement afin de les enyurer, pour puis apres tirer d'eux la certitude & verité de ceſt affaire. Hagamahamed homme d'entendement conut bié toſt où tendoit ceſte bonne chere, & faignit vn iour entre autres d'eſtre bié yure, afin que Sylueire l'interroguast, comme il fit. Lors Hagamahamed qui le guettoit à ce paſſage l'aſſeura que Melichſac ne lui vouloit point donner la citadelle, & qu'il l'entretenoit ainſi finement pour acommoder ſes affaires avec le Roy de Câbaje, auquel il faiſoit parler d'appointement. Sylueire adiouſtant foy à ce rapport conclud que Melichſac ſe repentait de ſa premiere deliberation, & en aduertit Sampajo, le priant d'auifer ce qui eſtoit expedient, pource que ſon ſeiour au port de Diu lui ſembloit inutile. La lettre fut leuë en conſeil, où quelques vns dirent que nul ne ſauroit mieux iuger ce qui eſtoit de faire que Sylueire meſmes, puis qu'il ſe retrouuoit ſur les lieux, & pouuoit voir par les occurrences quelle reſolution ſeroit la meilleure, ſans la demander à ceux qui ne voyoyent goutte en ceſt affaire, & qui pourroyent conſeiller choſe contraire & d'autout preiudiciable à ceſte entrepriſe tant importante à l'honneur & au bien des affaires du Roy de Portugal. Ils concluoyent donc qu'on deuoit remettre la concluſion & l'execution à Sylueire, pour y pouuoir ſelon qu'il iugeroit meilleur. Mais les autres alleguoyent, puis qu'il auoit eſté ſi nonchalant & peu auifé de ne pouuoir ſe reſouldre eſtant ſur les lieux, où le temps deuoit le conſeiller, & demandoit auis à ceux qui ne voyoyent rien, lon ne deuoit point laiſſer choſe de telle conſequence à ſa diſcretion, ains y enuoyer quelque autre plus habile, qui ſauroit voir & executer par meſme moyen. Ces auis eſtans preſques en contrepoids eſgal, Sampajo fut du premier, car il deſiroit attirer Sylueire de ſon coſté pour mieux reſiſter à Mafcaregne, duquel il craignoit la venue, & ne conſideroit pas qu'il eſtoit meilleur d'y enuoyer vn autre, puis que Sylueire ſe laiſſoit tromper ſi lourdement. Voila neantmoins quelle en fut la reſolution, dont Sampajo auertit promptement Sylueire, lequel eſtant ſaoul de demeurer ſi long temps à l'anchre, voyant auſſi que Melichſac continuait en ſa requeſte, aſauoir qu'il ſe retirast au port de Chaul pour quelques iours, il eſtima que c'eſtoit vne deſaite, & ſ'en alla ſans conſiderer plus auant ſi le dire de Melichſac auoit apparence de verité ou de menſonge. Or eſtant arriué à Chaul il fit entendre ce que deſſus à Sampajo, lequel de ſon coſté peſant auſſi peu à l'intention de Melichſac, & laiſſant couler ceſte occaſion, empeſcha que Sylueire ne retournast à Diu, & l'enuoya d'vn autre coſté pour butiner, & que ce pendant il ſe tint preſt pour aller ſi Melichſac donnoit auertiſſement ſur lequel on ſe peult aſſeurer. Au reſte, d'autant que les nouuelles de l'armee des Turcs commençoient à eſtre eſtimees vraies, Sampajo print ceſte occaſion, pour conſermer ſon gouuement, d'eſcrire en Portugal, & y enuoya prôptement François Mendoze, lequel partit au cômencement d'Octobre, afin de pouuoir arriuer en Portugal auât que la nouuelle flotte deſmarast du port de Liſbonne. Il deſpeſcha auſſi Nonio de Blanc-caſtel pour aller à Mozambique, & le ſacteur de la nauire qui

trafiquoit en Cambaje, pour faire voile en Zofala : leur commandant de donner auis en ces quartiers de l'entreprise des Turcs, afin que chascun pen-
 fast à ses affaires. Il en escriuit semblablement à ceux de Goa & des autres
 forteresses, priant les soldats mariez de vouloir s'employer pour le service
 du Roy en certains affaires particulieres, à l'occasion de ceste descente des
 Turcs, & pource aussi qu'il n'y auoit point d'argent pour payer les troupes.
 Eux s'y employerent volontairement, & en Cochim commencerent pro-
 ptemét à faire vn gallion, vne carauelle & vne gallere, puis à rebastir la cita-
 delle en certains endroits. Ceux de Cananor creuserent vn fossé fort pro-
 fond tout autour de la citadelle, & en Goa ils dresserent vn pan de murail-
 le tresespaisse, charpenterent vn gallion, vne galere & vne carauelle, & vne
 gallere aussi à Chaul. Outre cela Fernand Morales fut commis pour por-
 ter des pouldres & autres munitions à la citadelle d'Ormuz ce qu'il exe-
 cuta. Sampajo partit puis apres de Chaul, & emmena (contre l'auis du con-
 seil) Hector de Sylueire, lequel fut bien content d'y aller, au lieu d'atten-
 dre nouuelles de Melichsac : & vne des principales causes fut qu'il se fas-
 choit de n'auoir moyens de trancher du magnifique, & tenir maison ou-
 uerte à tous gentilshommes, comme faisoit Christofle de Soufe : tellement
 que l'indiscretion de l'un & l'ambition de l'autre furent cause que Diu es-
 chappa de la main des Portugallois qui l'eussent eu pour neant alors, au
 lieu qu'elle leur cousta bon puis apres. Car apres le depart de Sylueire
 hors du port de Diu, Melichsac continuant en sa volonté de la liurer
 aux Portugallois, & executer de fait ce qu'il auoit promis de parole, com-
 mence incontinent à trousser bagage & enleuer l'artillerie, enuoyât le tout
 à Giaquete, où il pretendoit se retirer. Mais d'autrepart Hagamahamed
 bien marri que Melichsac poursuuiust ainsi sa pointe, faisoit diuerses prati-
 ques pour fermer la porte aux Portugallois : tellement qu'un iour (tandis
 que Melichsac estoit en vne siene maison aux champs) il se saisit de Diu
 pour le Roy de Cambaje, faisant prendre les armes aux habitans qui ne de-
 mandoyent pas mieux, & se faschoyent tous que Melichsac les abandon-
 nast ainsi. Incontinent Hagamahamed fit entendre au Roy le dessein de
 Melichsac, & lui demanda le gouvernement de Diu, où le Roy vint quel-
 ques iours apres, pour remedier à ce trouble. Melichsac entendant le tour
 que lui iouoit son parent, conut lors où tendoit ce conseil de renuoyer Syl-
 ueire à Chaul, & pensant que Sampajo y feroit encor il despescha homme
 expres pour lui porter nouuelles de ce que dessus, & lui demander secours
 moyennant lequel il esperoit tenir promesse. Christofle de Soufe gouver-
 neur de Chaul n'ayant lors aucune flotte pres de soy enuoya ces lettres en
 Goa, d'ou Sampajo estoit parti pour aller à Cochim. Sylueire les receut &
 incontinent se mit à la voile, prenant la route de Chaul avec bon nombre
 de capitaines & soldats : mais ce fut trop tard, car auât son arriuee à Chaul,
 le Roy de Cambaje entra au port de Diu avec vne puissante armee, & Me-
 lichsac n'eut pas presques le loisir d'entrer en vue fust pour se sauuer viste-
 ment en l'isle de Giaquete. Par ainsi Sylueire apres beaucoup de travaux,
 sans aucun auantage, fut contraint se retirer vers Sampajo qui seiour-
 noir :

noit lors en Cochim.

4. EN ceste mesme année mil cinq cens vingtfix enuiron le mois de May quatre nauires sous la charge de François d'Aguaie, Tristan de Veigue, Antoine de Breuordonné Amiral de Malaca, & Antoine Galuan partirent de Portugal pour aller es Indes, où elles arriuerēt finalement apres auoir trauersé beaucoup de dangers, spécialement celle de Galuan: Sur la fin de la mesme année Veigue & Galuan reuindrent avec Roderic de Leme en Portugal, comme dit a esté ci dessus au second chapitre de ce liure. Estans ces deux arriuez à Cochim ils baillerent deux pacquets de lettres à Alphonse Messie, lequel attendoit cela des long temps, estât ennemi de Mascaregne, au preiudice duquel il pratiqua tellemēt par ses agēts en Portugal, que le cōseil du Roy reuouqua les suecessions précédentes, & en manda vne nouuelle, où il nōmoit Sampaio Viceroy: & pour ne mesconterer du tout Mascaregne braue gentilhomme, on le substituoit au cas que Sampaio mourust auant le temps prefix à sa charge. Ceste nouuelle suecession fut ouuerte par Messie cōtre l'auis de plusieurs gentilshōmes & capitaines, preiuyās le mal qui en pouuōit auenir: mais lui prenoit à foy la charge de rendre raison de ce fait en tēps & lieu. Il y eut grāde dispute de ceste ouuerture de lettres au tēple de Cochim, entre Messie & Valque Deze capitaine de la citadelle, qui auoyēt chascū assez de gēs de leur opiniō. Finalement apres toutes leurs cōtestatiōs la lecture fut acheuee, & acte public dressé par Fernād Nugnez secretaire de la faculté de l'ouuerture de ceste suecessiō nouuelle, lequel fut soussigné de la pluspart des gentilshōmes, capitaines & autres personnes de qualité qui se trouuerent à ceste action, & qui n'osoyent cōtredire à ce dernier mandement du Roy, ignorans en cest endroit les pratiques de Messie, lequel entant qu'en lui fut deslors fit declarer & tenir Sampaio pour Viceroy.

5. TOUTESFOIS & grands & petistrouuoyent fort mauuais que l'on eust ouuert ce dernier paquet, & disoyent que Messie s'estoit tresmal porté en cest affaire, ayant raiui l'honneur à Mascaregne, à qui le gouuernemēt des Indes appartenoit à tresiuste tiltre: que Sampaio ne feroit pas sagement d'accepter la charge d'autrui, & que pour certain l'Inde basse seroit troublée à la venue de Mascaregne, lequel estoit plus aimé que Sampaio. Il y auoit aussi ce point que le Roy de Portugal preiuyant ces diuisions, selon le discours que François Mendoze lui auoit fait de l'estat des Indes & de la mort de Henri de Meneses, auquel Mascaregne estoit substitué, & en l'absence duquel Sampaio gouuernoit, pour obuier à ces tempestes auoit premierement despesché Pierre Iean François en vn basteau, avec lettres cōtenans son intention estre que Mascaregne demeurast Viceroy. Or François se perdit en l'isle de saint Laurent, tellement que le vouloir du Roy fut aneanti, & par lettres subreptices obtenues apres le depart de François & apportées par Tristan de Veigue, le Roy remit cest affaire à ses officiers es Indes, qui en disposerent par l'entremise de Messie qui manioit tout, comme dit a esté au chapitre precedent. Sampaio ayant esté ainsi declaré Viceroy, Messie lui en enuoya incontīnēt lettres, & escriuit aux officiers de Goa, où

Admēt du Roy Iean traisiesme touchāt le gouuernemēt des Indes, efermē à Lopez, de Sampaio, lequel est declaré Viceroy.

Les mesconteremens suruenus entre les Portugallois sur la nominatiō du nouueau Viceroy, & ce qui s'en ensuyui.

Sampaio deuoit se trouuer bien tost, comme les choses estoient passees, & qu'ils eussent à lui obeir. Les nouuelles de ceste election semees en diuers endroits de l'Inde basse esmeurēt tous les Portugallois contre Messie: toutesfois Sampaio fut receu Viceroy, & donna l'Amirauté au capitaine Mirande, & fit Pierre de Far general des galeres en la coste de Goa, ordonnant à Hector de Sylueire d'aller au destroit: puis il se retira à Cochim, où il fut bien recueilli de Messie, & tous iurerent de nouveau de lui obeir comme estant vray gouverneur des Indes. Mais cela n'appaîsa pas les murmures, au contraire les partialitez commencerent, & vindrent les partisans à s'entr'inurier, presenter le cōbat les vns aux autres, & faire de grands desordres en Cochim. Là dessus furent apportees lettres de Mascaregne, par lesquelles on entendit qu'il estoit parti de Malaca pour venir en Inde: à l'occasion dequoy ceux de son parti commencerent à murmurer plus fort que deuant. Sampaio entendant ces nouuelles, pour faire sauoir de bonne heure à Mascaregne qu'il n'estoit point Viceroy, enuoya copie de la successiō nouuelle & de l'acte dressé le iour de sa reception, à Henri Figueire chasteelain maior de Coulā, avec mādēmēt expres qu'auant l'arriuee de Mascaregne au port de Coulā il allast lui monstrier ces actes, & si Mascaregne les acceptoit pour bons on le laissast descendre, mais qu'à faute de ce faire lon se donnast bien garde de le receuoir en la citadelle. Or dautant que Sampaio n'ignoroit pas que plusieurs l'accusoyent publiquemēt qu'il faisoit tort à Mascaregne, pour prouuer le contraire il fit appeller en sa maison le dernier iour de Decembre certains capitaines au nombre de cinq, du nombre desquels Antoine Galuan & Tristan de Veigue estoient (lesquels partirent tost apres avec Roderic de Leme pour reuenir en Portugal comme nous l'auons veu au second chapitre) & les harangua de telle sorte qu'il se fit de nouveau declairer Viceroy, & en eut acte expedie par les mains d'un secretaire. Il passa outre, s'aidant de tous moyens dont il se pouuoit auiser. Le Roy de Portugal auoit enuoyé en l'Inde basse vn moine nommé frere Jean Daro, assez sauant & habile pour vn homme de ce temps & estat. Icelui assura Sampaio d'estre vray Viceroy, & promit le faire sauoir à tous le lendemain

1527. qui estoit le premier iour de l'an, auquel les Chrestiens se souuiennent de la Circoncision de Iesus Christ. Sur la fin du sermon ce moine fit vn gtād discours des murmures & diuisions suruenues entre les partisans de Mascaregne & de Sampaio, declairāt que Sampaio estoit vray gouverneur, & qu'il le soustiendroît en toutes les vniuersitez de Frāce, d'Espagne, & de Portugal: puis il exhortoit Sampaio de chastier seueremēt les premiers auteurs de ce trouble, & les bannir de Cochim, si besoin estoit. Le sermon de ce moine produisit incontinent ses fruits, car Sampaio relegua des le mesme iour Simon Tuscan seruiteur de Mascaregne, duquel il maintenoit la cause fort courageusement. Il confina aussi en Chaul Vincent Pegade, pour ce mesme fait, & chassa quelques autres des plus affectionnez à Mascaregne. Pegade estant à Chaul, pour se venger de Sampaio, besongna de telle sorte, que Christofle de Soufe capitaine de la citadelle, & gentilhomme de grande autorité, assembla le conseil des principaux officiers du Roy de Portugal

Portugal en ce lieu là, lesquels furent de son avis, aſauoir que Sampaio ne procedoit pas en ceſt afaire comme il appartenoit, & que pour empeſcher le mal qui pourroit ſuruenir, à cauſe du differant de ces deux grands capitaines, il leur ſaloit perſuader de ſe ſouſmettre à la ſentēce de quelques iuges, afin que leur querelle fuſt vuidee par le droit & non par les armes: que lonauertiroit Sampaio de ceſte reſolution, laquelle ſ'il n'acceptoit on ne lui obeiroit point, au contraire lon ſauoriſeroit Maſcaregne. Souſe dreſſa les lettres, & les enuoya à Francisque de Soſue, qui les fir tenir à Sampaio lequel ſeiournoit en l'ille de Goa, où lon baſtiſſoit vne fortereſſe à cauſe des Turcs, au deuant deſquels il deliberoit aller. Et ſachāt qu'il y auoit grād nōbre de Portugallois à Chiromandel, il eſcriuit à Ambroſie de Rege facteur du Roy & au chaſtellain, qu'ils declairafſent à ces ſoldats que le Viceroy leur cōmandoit, ſous peine d'eſtre declairez rebelles à leur Prince, de le venir trouuer à Cochim, & qu'il leur pardōnoit toutes les mutineries & querelles pafſees. Mais ils ſe mocquerent de ce mandemēt, diſans que Sampaio n'auoit rien à leur commander: & meſmes aucuns qui eſtoyēt en Cochim ne ſe ſoucioyent de l'aller trouuer, diſans tout haut qu'il ſaignoit d'aller au deuant des Turcs, afin de ne ſe trouuer en Cochim, & ſe ſoumettre à la ſentence de iuſtice, pour la vuidange de ce proces entre lui & Maſcaregne, lequel deuoit venir bien toſt. Sāpajo bien perplex en ces nouuelles difficultez & voulant faire entendre qu'il ſ'ēbarquoit pour cōbatre l'armēe Turqueſque, eſtant vn iour de dimanche à la meſſe, lors que le preſtre commēça à hauſſer ſon corpus domini, il ſe leua debout, & prononça ſi haut que chaſcū le pouuoit entēdre: Je iure par le corps de Ieſus Chriſt qui eſt entre les mains du preſtre, que ie m'en vay en deliberation de dōner bataille aux Turcs, & les empeſcher de venir es Indes. Puis que ie ſuis reſolu de cē faire, ie commāde à rous Portugallois, exceptez ceux de la citadelle, de ſ'embarquer avec moy: & qui ne le fera ſ'afſeure d'eſtre puni grieuement. Ceſte ceremonie eſmūt les Portugallois à monter es vaiſſeaux, eſtimās que Sampaio allaſt droit contre les Turcs. Or auant que ſe mettre à la voile il laiſſa vn eſcrit à Alfonſe Meſſie, auquel il commandoit de chaffer Maſcaregne à force d'armes, ſ'il vouloit deſcendre à Cochim en qualite de Viceroy: & enuoya des lettres bien amples à Maſcaregne pour l'adoucir. Cela expedie il partit en Ianuier l'an mil cinq cens vingt ſept, & arriué à Cananor laiſſa à Simon de Menefeſ vn meſme eſcrit qu'à Alfonſe Meſſie, cōmettant George de Souſe ſur quelques brigantins pour garder la coſte de Calecut. Le premier iour de Feurier il prit la route de Goa, & en chemin trouua Hector de Sylueire qui lui fir vn diſcours des choſes auenues à Diu, & les nouuelles que Chriſtoſte de Souſe auoit receues de l'arriuee des Turcs à Camaran. De Batticala, Sampaio eſcriuit à Chriſtoſte de Souſe, l'auertiffant de la bonne affection qu'il auoit de combattre les Turcs, & le priant d'enuoyer toutes les forces qui eſtoyent à Chaul. Au partir de ce lieu, il trouua ſur mer Francisque Morales qui venoit d'Ormus avec lettres du Roy & de Melio ſe plaignās fort de Xeraſlequel eſtoit priſonnier, & prioyēr qu'on y pourueuſt en le tirant hors de ce lieu, pource qu'il ne celleroit d'y entrete-

nir tousiours des troubles. Sampaio finalement arriué en la ville de Goa, fit appeller tous les capitaines & principaux gentilshommes, avec les patrons & pilotes des vaisseaux, ausquels il proposa la venue des Turcs à Camaran, & que sa deliberation estoit de les choquer. Mais le conseil fut d'auis contraire, monstrant que ce seroit folie à vne si petite flotte que celle de Portugal d'aller assaillir vne puissante armee d'ennemis : qu'il falloit hiuerner en Goa, attendre les nauires que le Roy deuoit enuoyer au printemps, & qu'alors on consulteroit de ce qui seroit le plus expedient. Le secretaire dressa vn acte de cest auis, lequel fut soussigné de tous. Alors les soldats & autres entendans que Sampaio n'alloit pas au deuant des Turcs, commencerent à dire que son intention auoit tousiours esté telle, encores qu'il eust fait la ceremonie susmentionnee pour persuader le contraire : & que ce bruit estoit ainsi espandu pour fuir la lice & empescher que le droit de Mascaregne ne fust conu. Briefs ils accusoyent assez ouuertement Sampaio d'estre vn periure, qui s'estoit mocqué de sa religion & du dieu de la messe pour satisfaire à son ambitio & frauder Mascaregne. Lui se voyant frustré, & son voyage de Camaran rompu, despescha Manuel de Macedo pour aller querir Xeraf & l'amener d'Ormuz à Goa, pour estre chastié selon ses demerites. L'Amiral fut aussi enuoyé à Cochim avec lettres adressantes à Mascaregne pour le faire retourner à Malaca, avec promesse d'acroist de gages, & l'empescher de descendre en l'isle de Goa : car Sampaio ne vouloit point entrer en iustice contre Mascaregne, ni attendre sentence de iuges sur leur different, ains demeurer en la charge que Messie lui auoit pratiquée.

*Etat des afai-
res en Mala-
ca, & ce que fit
Pierre Mascia
regneant en-
tendu que le
gouvernement
des Indes lui
estoit attribué
apres la mort
de Menefez.*

AVANT que declarer plus au long ce qui auint en l'Inde basse durant 6.
cette année mil cinq cens vingt sept, il faut considerer l'estat des affaires de
Malaca & ce que Mascaregne y fit pèdant son seiour, pour puis apres voir
ses procedures & la fin de son proces contre Sampaio. Donques l'année
precedente & quelques iours auant la mort de Henri de Menefez Viceroy,
Mascaregne enuoya en l'Inde basse vn capitaine pour sauoir des nouuel-
les & expedier quelques affaires. Ce capitaine fut acompagné de Gaspar
Machiade, lequel auoit vn ionc chargé de hardes & marchandises à lui ap-
partenantes. Estans pres du cap de Comori ils descouurirent Patemarcas
general de cinquante deux paraus de Calecut, qui tenoit la route de Zei-
lan, pour aller faire guerre au Roy, ami & allié des Portugallois. Lui s'e-
força par tous moyens de les aborder, mais vne tourmente se leua qui le
retint, tellement qu'il n'en pût aprocher qu'à la portee du canon, dont il
tua quelques Portugallois, & Machiade entre autres. Le capitaine & le reste
de ses soldats se sauuerent à toute peine & gaignerent le port de Cochim,
Menefez estant mort quelques iours auparauant. En ce mesme temps George
Capral capitaine d'aucunes fustes pres des isles de Maldiuar, sachant que
Mascaregne estoit nommé Viceroy apres la mort de Menefez, resolut lui
en porter les nouuelles, s'assurant que pour recompense d'un si ioyeux
message Mascaregne lui donneroit la capitainerie de Malaca, qui estoit de
grand proufit : car outre les butins, ce capitaine auoit deux mille ducats
de gages du Roy de Portugal, moitié en deniers contans, & l'autre moitié

en poyure. Suiuant ceste deliberation il partit avec sa fuste, & ayant trouué Mascaregne eut promesse de la capitainerie, lors que Mascaregne se retireroit en l'Inde basse. Tost apres Antoine de Sylues vint avec lettres d'Alfôse Messie, de la teneur de clairiee au premier chapitre, a sauoir que Mascaregne estoit Viceroy : mais qu'en attendât sa venue, la troisieme successiô auoit esté ouuerte, & Sampajo nommé en icelle receu pour manier les affaires par prouision. Il apportoit aussi l'acte dressé touchant cela, & soussigné des gentilshommes & capitaines qui s'estoyent trouuez apres la mort de Meneséz au temple de Cananor. Ces lettres & actes veus par le chasteillon & autres officiers du Roy en ces lieux, Mascaregne fut receu, reconu & obeï comme Viceroy des Indes, où il delibera faire voile au mois d'Aoust, & s'en aller en l'isle de Pulopuar attendre vn vent propre qui se leue ordinairement au mois de Septembre. Auant que partir il tint parole à Capral & le mit en possession du gouuernement de Malaca, nonobstant les remonstrances & protestations d'Arias de Cugne general de la mer, lequel pretendoit ceste charge lui appartenir pour diuerses raisons par lui alleguees. Mais l'autorité de Mascaregne l'emporta, tant pour l'affection qu'il portoit à Capral, que pour faire conoistre qu'il estoit en sa puissance de disposer des principales charges, estant Viceroy des Indes. Comme il vouloit se mettre à la voile, les pilotes le prierent de delayer, attendu qu'il ne pourroit gagner l'Inde basse en telle saison : neantmoins il s'embarqua en vne nauire prenant la route de Pulopuar, aupres de laquelle il fut assailli d'vne tourmente qui rompiست le mast de sa nauire en trois endroits, & fut sur le point de faire naufrage. Ceste bourrasque appaisée il tourna voile vers Malaca pour r'equipper son vaisseau : car autrement il ne pouuoit passer plus outre. Alors Francisque de Sa & sa flotte allant à Zunde pour y bastir vne citadelle estoient au haure de Maluca, ensemble George de Meneséz qui pretendoit se rendre aux Molucques, pour y commander, suiuant la charge que le feu Viceroy lui auoit donnée, & que Mascaregne conferma, lui donnât encor vn vaisseau de renfort avec bon nombre de soldats. Il lui enioignit de suiure la route de Burneo, afin de descourir vne plus courte nauigatiô aux Molucques par ce costé que par les isles de Bandan : ce que Meneséz executa. Au reste, d'autant que Simon de Soufe, ordonné general de la mer des Molucques, entendit que Mascaregne deliberoit d'aller assaillir le Roy de Bintam & forcer sa ville : que ceste charge de general en la mer des Molucques estoit peu de chose, & qu'en cest endroit il ne feroit pas grand seruice au Roy de Portugal : il différa de suiure Meneséz, demeurant à Malaca pour se trouuer à la guerre de Bintam, en laquelle il esperoit acquerir reputation.

7. MASCAREGNE considerant que ce lui estoit force d'attendre saison plus commode pour son voyage en Inde, & voyant ceste belle flotte de Francisque de Sa, resolut s'en seruir pour s'emparer de l'isle & ville de Bintam tant ennemie de Malaca. Son conseil estant de cest auis, il partit avec dixneuf voiles, a sauoir vn galliô, vne galere, quatre barques, deux brigantins, deux basteaux couuerts, quatre calaluz & cinq lanchars :

*Descriptiô de
l'isle de Bintam
& l'entreprin-
se de Mascare-
gne sur icelle.*

ayant pour principaux capitaines Aluarez Brittio, Francisque de Sa, Arias de Cugne, Edouard Conil, Antoine Brittio, Francisque Serran, Simon de Soufe, Iean Pacheco & quelques autres, qui commandoyent à trois cens Portugallois. Outreplus il y auoit six cens Malacans sous la charge de deux seigneurs du pays, l'un nommé Sanaje Raie & l'autre Tuan Mahumer. Ceste armee print la route de l'isle de Bintam, mot qui en langage Malacâ signifie estoille: tiltre fort superbe pour le Roy de ceste isle, qui aussi s'en preualoit par dessus les autres Rois. L'isle de Bintâ est à soixâte lieues de Malaca, pres du destroit de Cincapure, peuplee de Malacâs, & en laquelle s'estoit le Roy de Malaca, apres qu'il eut esté desfait par les Portugallois, & en deposseda le seigneur qui estoit son vassal. S'estât emparé de ceste isle, il fortifia soigneusement la ville aussi nommee Bintam, pour se garantir des Portugallois, desquels il craignoit vne autre venue. La maniere de se fortifier fut telle. Vne riuiera passe dedans la ville par vn canal assez estroit. Il fit au log du canal, qui est assez tortu, planter des gros pieux en telle sorte & si grand nombre qu'une galere ne pouuoit entrer au port. Ferma la ville d'un rempar fait de terre & de gros arbres liez ensemble, avec quelques bouleuards de mesme, & les portes bien fortes, ensemble vn pont de bois qui trauersoit le fleuve pour la commodité de l'isle & de terre ferme, pres de laquelle estoient deux bouleuards à l'opposite l'un de l'autre, le rempar étant garni de trois cens diuerses pieces d'artillerie: & au pied on auoit semé force plâtemalâs & crochets de fer à pointes acérées & enuenimees, tellement acômodez qu'il estoit fort difficile d'approcher de là sans s'offenser griefuement. L'entour de la ville est marecageux, à l'occasion dequoy aussi toutes les maisons estoient leuees sur pilotis & engins de bois, excepté le palais du Roy basti sur vn costau vers terre ferme. Mascaregne eut beaucoup de peine en ce voyage, à cause qu'il faut tousiours nauiguer par des canaux & entre des isles qui sont fort proches les vnes des autres. Finalement il approcha de la fosse de Bintam, & enuoya sonder le canal par Edouard Conil, lequel rapporta estre impossible que la flotte y entraist, si premierement on ne rompoit les pieux: qu'apres cela fait, les Portugallois à l'approcher du rempar se trouueroient en plus grand danger que deuant, à cause de l'artillerie qui pouuoit iouer à l'aise & les choisir à descouuert: dauantage que le rempar estoit si haut que ce seroit grande temerité d'en approcher sans eschelles. Ce rapport fit prendre auis à Mascaregne d'entrer par le pont dont ceux de la ville s'aidoyent pour aller en terre ferme, & qui n'auoit pas tant d'artillerie. Pour s'en asseurer & pouuoir mieux executer ce qu'il pretendoit, il delibera y enuoyer vne barque, & par le moyen d'icelle esbranler & arracher les pieux, afin que la flotte peust entrer puis apres. Francisque Serran braue capitaine eut ceste charge avec cinquante Portugallois, lesquels fortifierent leur barque pour se couvrir contre les coups de trait, & la chargerent aussi de quelques pieces pour saluer leurs ennemis. Ils entrèrent au canal tirans deux calaluz apres eux, & commencerent à besongner de grand courage, & trauaillerent tant l'espace de huit iours qu'ils arracherent la pluspart de ces pieux. Ce pendant ils furent canonnez par ceux de la ville avec telle

furio

furie qu'ils eurent infinies peines à se garantir : & sans la fortification dressée en leur barque, elle eust esté enfondree. Mais tandis qu'ils s'occupoyēt à cela, lon descouvrit en mer vne flotte qui venoit vers la fosse de Bintam, tellement que Mascaregne & les siens eurent à prendre autre auis, puis que ils alioyent nouveaux ennemis en teste.

8. Q V A N D le Roy de Biutam vid l'armee de Malaca & sceut quel homme estoit Mascaregne, ctainant l'issue du siege, il enuoya promptement demander secours au Roy de Pam son gendre & voisin, lequel despescha vne flotte de trente trois lanchars avec deux mil hommes & beaucoup de victuailles. Ceste flotte descouverte par les Portugallois, Mascaregne ne voulut pas attendre qu'elle approchast, craignant que le Roy de Bintam ne sortist avec quelques vaisseaux, & que lui & ses gens ne demeurassent enclos. Il delibera donc de combattre ceste flotte du Roy de Pam, au deuāt de laquelle il enuoya quatre caturs & cinq lanchars sous la charge d'Edouard Conil, qui à vne lieuē de là trouua les ennemis, & les assaillit à coups de canon avec telle furie, qu'en peu d'heure il les mit en route. Dix-neuf de leurs lanchars voguerent vers le riuage, & furent abandonnez de tous ceux qui estoient dedans, & saisis par les Portugallois. Les dix autres voyans le danger si prochain tournerent voile & se retirerent à Pam. Ceux qui auoyent gaigné terre, s'escarterent par l'isle de Bintam. Apres la route de ceste flotte, ceux de la barque du capitaine Serran recommencerent leur besongne avec vn travail incroyable, pour arracher & scier les pieux, enquoy ils employerēt quinze iours, maugré tout l'effort des ennemis, & approcherent du pont. Incontinent le Roy y enuoya Laqueximene avec onze lanchars, lequel fit tel deuoir qu'il acrocha la barque de Serran, en laquelle plusieurs Bintamois entrerent à viue force, & y eut vn terrible combat, où Serran & presques tous ses soldats furent blesez : mais ils se defendoient courageusement, & par le secours que Mascaregne & Conil leur donnerent, Laqueximene fut mis en route, apres auoir perdu beaucoup de gens, bruslez pour la pluspart de feu artificiel, les autres tuez au combat, & quelques vns noyez. Apres ceste retraite de Laqueximene, Serran & ses soldats firent penser leurs playes, sans vouloir partir de là, quelque instâce que Mascaregne fist, disans estre deliberez de mourir ou de paracheuer ce qu'ils auoyent commencé, tellement que Mascaregne & Conil se retirerent pres de la flotte, pour pouruoir au reste, & suiure leur dessein pour la prinse de Bintam.

9. M A S C A R E G N E considerant l'audace des ennemis qui auoyent osé acrocher la barque deuāt ses yeux, craignit qu'avec des pieces de bois embrasees & autres engins à feu ils ne brussassent les vaisseaux : & pourtāt sans plus differer resolut d'assaillir la ville par le costé du pont. Or pource que les ennemis s'en fussent bien tost doutez à cause de la barque proche du pont, & eussēt desployé toutes leurs forces pour resister de ce costé, il s'auisa d'un stratageme, a sauoir de leurs faire croire qu'il vouloit entrer par les pieux, & de ce costé fit dresser de nuiēt quelques gabions & vn retranchement au bord du canal avec trois pieces de canon. Laqueximene qui gardoit ce

Armee du Roy de Pam venāt au secours des Bintamois desfaite par Mascaregne, & Laqueximene mis en route par le capitaine Serran.

Mascaregne emporte d'assaut la ville de Bintam, dont s'ensuit la mors du Roy, le successeur duquel fait alliance avec Mascaregne, & se rend tributaire du Roy de Portugal.

deſtroir ſit auertit le Roy de telle entrepriſe, le priãt enuoyer gens de rēfort ce qui fut fait, tellemēt que ceux qui gardoyēt le coſtē du pōt, ſe rēgerēt autour de Laqueximene, eſtimās auoir tout gaignē, & que le lēdemain la flotte des Portugallois demeureroit à leur merci à cauſe de la difficulté du canal. La nuit venue Maſcaregne enioignit à Sanaje Raie de deſcēdre en terre avec les pietōs Malacans, & quarante Portugallois, & ſe loger derriere le retranchement, auxquels il donna charge, ſi toſt qu'ils verroyent le feu en l'vn des bouleuards du pont, ils fiſſent iouer leurs pieces, ſonnaſſent les trōpettes, & faigniſſent vouloir entrer au canal. Cela fait Maſcaregne deſcendit en terre en des nacelles & barquerolles afin de n'eſtre oui, & à vne lieuē loin du pont, & print ſon chemin vers icelui à trauers la bouē, où lui & ſes gens ſe trouuerent en merueilleux dangers, ſpecialemēt à cauſe des racines de certains atbres qui les arreſtoient & faiſoyent tomber à tous coups. Neantmoins ils prindrent tel courage que finalement tous couuerts de ſang & de ſueur ils approcherent du pont vne heure auant iour, auſſi alaigres que s'ils euſſent dormi toute la nuit, & trouuerent le capitaine Serran avec ſes ſoldats fournis d'engins à feu, moyennant quoy ils embraserent incontinent l'vn des bouleuards à l'entree du pont vers l'iſle. Les Mores qui gardoyent ce boulevard fait de bois & rempli de terre eſtoient endormis tāt à cauſe des veilles paſſees, qu'auſſi pource qu'ils ne s'attendoient pas que Maſcaregne deuſt aſſaillir la ville par ce coſtē. Mais le feu les eſueilla & contraignit de ſe ſauuer bien viſte, pour courir vers vne petite porte qui fermoit le pont, mais elle eſtoit ia rompue par Arias de Cugne & Jean Pacheco, qui apres quelque combat entrerent dedans en deſpit des ennemis, dont les vns commencerēt à fuir vers le palais du Roy, les autres vers la garde de Laqueximene, auquel Sanaje Raie donna l'aſſaut, ſelon l'inſtruction de Maſcaregne. Du commencement Laqueximene eſtimoit que ce feu du boulevard ne ſeroit rien, mais entendant le mal eſtre plus grand, il taſcha (comme courageux qu'il eſtoit) d'y remedier, ce qu'il euſt fait ſi ſes ſoldats euſſent eſté magnanimes, mais il lui fut impoſſible de les retenir, & d'autre part les Portugallois eſtoyēt ſi eſchaufez, ſur tout ſe voyās dans la ville, qu'il eſtoit impoſſible leur faire teſte. Le Roy entendant le cri des fuyards employa toute ſon autorité pour rallier ſes gens, mais voyant tout perdu, ſe fit amener vn elephant, & ſ'en ſuit de viſteſſe hors du palais, & ſe ſentant ſuiui de pres (car Maſcaregne ne deſiroit autre butin) quitta ſa mōture, & ſe cacha dans vn taillis fort eſpais, tellement qu'on le perdit, & furent contrains ceux qui le ſuiuoyent rentrer en la ville, où ils trouuerent Maſcaregne au combat cōtre vn capitaine nommé Laxaraje, lequel ſe defendoit vaillamment avec mille Mores autour d'vn boulevard. La pluſpart furēt taillez en pieces, les autres ſe ſauuerent comme ils peurent avec leur capitaine bleſſé de deux harquebuzades. Voila comme fut priſe ceſte ville qui auoit tant fait de maux aux Portugallois, leſquels cē matin firent vn acte des plus remarquables en toute leur hiſtoire, attēdu meſmes qu'ils ne perdirēt pas vn des leurs en ceſte prinſe: & quant aux bleſſez le nombre n'en fut pas grand. Toſt apres la prinſe de Bintam, trois fort riches marchans eſtrangers qui y habitoyent

habitoyent allerēt trouuer Mascaregne & le supplierent de leur laisser leurs marchandises, puis qu'ils n'estoyēt pas du lieu, ce qu'il leur accorda, moyēnant qu'ils accomodassent l'armée de viures tandis qu'elle seiourneroit là, ce qu'ils promirent & executerent. Puis la ville fut pillée, & y trouua-on de grandes richesses, spécialement au palais du Roy, & ne fut oubliée l'artillerie au nombre de trois cens pieces, entre lesquelles furent reconues celles qui auoyent esté prinſes aux Portugallois en diuerſes rencontres deſcrites es liures precedens. Puis on mit le feu aux bouleuards qui furēt conſumez, tellement que la terre d'iceux s'esbranla, & demurerent inutiles. Mascaregne encores irrité des torts que les Malacans auoyēt receus des Bintamois, & voulant ſe venger encores dauātage du Roy & des Insulaires de Bintam, enuoya ſes capitaines faire des courſes en diuers endroits de l'isle, où ils tuerent quelques Mores, & prindrent à diuerſes fois deux mille priſonniers en l'eſpace de quinze iours, eſtans aidez des troupes du Roy de Lingue qui enuoya dixhuit lanchars & calaluz au ſecours de Mascaregne, mais ils arriuerent apres la prinſe de Bintam. Toutesſois pour recompēſe ils aiderent à ſaccager l'isle, puis ſe retirerent. Le Roy voyant le nombre de ſes ſuiets ſi diminué, & qu'en fin il demeueroit preſques ſeul, ſe retira en vn lieu nommé Vgentane, où il mourut de regret. Les nouuelles de ceſte prinſe de Bintam & de la fuite du Roy entendus du Seigneur de ceſte iſle demeurant en terre ferme, depuis le temps que le Roy de Malaca l'auoit chaffé de Bintam, eſtima le temps eſtre venu qu'il pourroit rentrer en poſſeſſion de ſa ſeigneurie, en ſe rendant tributaire du Roy de Portugal. De fait il alla trouuer Mascaregne par ſauf cōduit, & accorderent enſemble que ce Seigneur demurerait Prince de Bintam, à condition de n'y baſtir aucune forterreſſe, ni auoir armee en terre ou ſur mer, ains ſe remettre aux Portugallois qui le defendroyent contre tous ennemis. Cela fait, Francisque de Sa fut enuoyé à Zunde, pour y baſtir vne citadelle, & mena trois cens Portugallois en ſept vaiſſeaux. Apres ſon embarquement, Mascaregne ſit voile en Malaca, où il fut ſolennellement receu des Portugallois & Malacans, treſioyeux d'eſtre deſkurez de la cruelle guerre que le Roy de Bintam leur auoit faite, à l'aide d'autres Rois ſes allies, qui le voyans ruiné de tout point pacifierent avecques Mascaregne, tellemēt que depuis Malaca demeura paſſible, & deuint l'un des plus riches haures de l'Orient.

10. FRANCISQUE de Sa pourſuiuant ſa route fut aſſailli d'une telle tourmente que ſes vaiſſeaux s'eſcarterent fort loin les vns des autres. Edouard Conila avec ſa nauire, vne galere & vn brigantin qui le ſuiuoient, arriuerent les premiers au port de Zunde, ville entre la Taprobane & la grande Iaue. Les plus aſſeurcz Geographes eſtimēt qu'elle eſt au continent de Iaue, & ſituée à l'opposite de la Taprobane. Autour de ceſte cité croiſt du poyure en abondance, auſſi bō que celui de la coſte de Malabar. L'air du pays eſt ſain, & y a force viures : les habitans ſont Mores, & ont vn Roy. Lors que Conil y arriua, celui qui permettoit aux Portugallois de baſtir vne citadelle n'eſtoit plus Roy, ains vn autre ſiē voiſin qui l'auoit chaffé à force d'armes, & prins poſſeſſion de la ville où il demeueroit avec bonne garniſon, reſoly

Nauigatio de Francisque de Sa à Zunde, & de ce qui ſe auentura.

de faire teste aux Portugallois qu'il attendoit de pied coy, sachans qu'ils estoient appelez au secours de celui qui leur accordoit place pour leur forteresse. Or la tourmente qui chassoit Conil poussa de telle furie le brigantin qu'il se rompit contre la coste, & trente Portugallois qui estoient dedans se sauuerent en terre, où ils furent incontinent attrapez & esgorgez par les Mores qui les hayssoyent mortellement. La nanire & la galere de Conil furent preseruees de naufrage : mais conoissans par le traitement fait à ceux du brigantin qu'ils estoient en terre d'ennemis, auxquels c'estoit folie de s'attacher en si petit nombre, ioint que Francisque de Sa n'apparaissoit point, ils tournerent voile. Le Roy de Zunde ayât descouuert ces deux vaisseaux, & sceu ce que son predecesseur auoit promis aux Portugallois, s'assura de quelque autre visite, & pourtant il pourueut de bonne heure à ses affaires, se fortifiant pour resister à quiconque l'aborderoit de trop pres. Comme il donnoit ordre à cela, Francisque de Sa avecque sa flotte print port en vne ville de l'auue nommee Panaruca, & approchant de Zunde enuoya demander lieu au Roy pour commencer la citadelle, suiuant la permission de son predecesseur. Sur le refus qu'on lui fit, lui & ses troupes decédirent pour obtenir ceste demande par force : mais les Mores estoient si forts qu'ils chasserent les Portugallois & en tuerent quelques vns, tellement que Francisque fut contraint se retirer en ses vaisseaux, & se iugeant trop foible, il reprit la route de Malaca, d'où Mascaregne estoit ia parti pour aller en Inde, tellement que Francisque demeura desnué de moyens de retourner à Zunde, à cause que George Capral gouuerneur de Malaca auoit enuoyé ses forces au mesme temps sous la conduite de Gonzale d'Az euede pour aller secourir ceux des Molucques. Se voyant dōc inutile en ces lieux, il suiuit Mascaregne.

*Arruue de
Mascaregne
au port de Co-
chim, & ce qui
s'en ensuiuit.*

Si tost que la laiso propre de nauiguer en Inde fut venue, Pierre Mascaregne se mit à la voile avec trois gallions chargez de marchandises & conuestes qui appartenoyent au Roy & à lui aussi, & arriué à Coulam fut receu du faeteur & de Henri Figueire chastellain de la citadelle en qualité de Viceroy des Indes, encores que Sampajo leur eust donné aui de faire autrement. Il sceut alors ce qui s'estoit passé en l'Inde basse depuis la mort de Menesez, dont il fut bien estonné, & se conseilla de ce qui estoit de faire avec quelques vns. Simon Caier son auditeur general & Lanzarot de Seix son secretaire lui persuaderent d'aller en Cochim & chastier Alonse Messie qui auoit ouuert la troisieme succession, enquoy il auoit commis vne tressout de faute : mais que tout cela ne preiudicioit en rien à la raison, qui lui adiugeoit le gouuernement, attendu que sa succession auoit esté ouuerte premierement, & estoit fondee en l'autorité du Roy. Suiuant ce conseil il cingla vers Cochim, & y vint mouiller l'ancre le dernier iour de Feurier l'an mil cinq cens vingt sept. Alonse Messie qui auoit gens au guet de tous costez, entendāt l'arruue de Mascaregne lui enuoya intimer par le iuge de Cochim, par le thresorier du trafic, & par le secretaire de la facturerie, la nouuelle succession de Sampajo, & la commission qu'il auoit de nele receuoir en qualité de Viceroy, & leur donna charge de commander de par
le Roy

le Roy à Mascaregne d'obeir à Sampajo, comme estant Viceroy, & tel declaré par lettres patentes de Jean troisieme. Ces officiers ayas executé leur commission, Mascaregne fit responce en grande cholere, disant que ces demieres lettres n'estoyent point soussignées de la main du Roy, qu'il ne les reconoissoit point pour royales, ains pouuoient auoir esté dressées par Messie son ennemi, auquel il n'estoit pas deliberé s'affuuetir, veu mesmes qu'il estoit Viceroy des Indes & legitime possesseur de ce gouuernement par le moyen de Messie, qui meritoit d'estre viuement chastié de son audace, en ce qu'il osoit enuoyer faire des commandemens si temeraires au lieutenant general de son Prince. Simon Caier, comme auditeur general, les tâcha fort aigrement, puis les officiers de Cochim furent renuoyez avec grandes menaces, le thresorier & le secretaire demeurans prisonniers au gallion de Mascaregne, pource qu'ils auoyent plus contesté que les autres, & maintenu tousiours que Sampajo estoit Viceroy. Messie renuoya faire de nouvelles protestations, à quoy (apres plusieurs allees & venues) Mascaregne, par l'avis de son conseil, promit faire responce estant en terre le lendemain matin. Ce qui estonna Messie, & craignant que Mascaregne ne descédist de nuict & n'étrast en la ville qui n'estoit fermee, il appella tout le peuple de Cochim au son de la cloche, & encores que quelques vns fauorisassent Mascaregne, si fit il en sorte par grandes remonstrances, ayant la parole à commandement, que tous prindrent les armes, & passerent la nuict au bord de la mer, pour defendre l'entree à Mascaregne, lequel estimant, s'il ne portoit nulles armes, que Messie n'auroit occasion de quereller, entra de matin en quelques basteaux avec ses officiers & soldats, sans qu'aucun d'eux portast espee. Mais à l'aborder, Messie, armé & monté sur vn courfier, commence à commander aux siens d'entrer en l'eau & charger Mascaregne comme ennemi. Lors Mascaregne & les siens commencent à remonstrer qu'ils estoient Portugallois & Chrestiens, qui cerchoient paix & iustice, prians au nom de Dieu & du Roy qu'on eust patience. Ce nonobstant Messie continuoit en son commandement, & c'estoit vne terrible tragedie de voir les Portugallois prests à tuer leurs compatriottes, mesmes en terre d'ennemis. Or Mascaregne voyant qu'il auoit fait vn pas de clerc d'oublier ses armes, pour se defendre contre vne violence si desbordée, se retira en son gallion ayant receu vn coup d'espee au bras. Son cousin Georgè Mascaregne fut blessé d'un coup de picque, & plusieurs soldats battus & foulez aux pieds des gens de Messie. Apres que Mascaregne se fut retiré il demanda acte de l'outrage qu'on lui auoit fait, & bannit comme traistres les habitans de Cochim, avec menaces de les chastier s'il demouroit gouuerneur des Indes. D'autre costé Messie, qui gardoit tousiours la descente, auertit Sampajo de ce qui estoit auenu. Mascaregne lui escriuit, aussi requerant que leur debat fust vuide par iustice, se monstrant fort moderé en ses procedures, iusques à remettre entre les mains de Messie les trois gallions avec les besongnes & marchandises appartenantes au Roy, & se contentant d'une carauelle pour aller en l'isle de Goa debatre son droit cōtre Sâpajo. Au cōtraire Messie môstra lors son animosité comme deuant : car pource que

ceux qui estoient es trois gallions ne pouuoÿt entrer tous en la carauelle, & qu'ils voyoyent que Mascaregne cherchoit la voye de iustice, ils descèdèrent en terre, où la plupart furēt empoignez & emprisonnez par le cōmandemēt de Messie, notamment George Mascaregne, lequel avec sa blessure fut enuoyé en la citadelle de Coulam, comme ayant griefuement offensé son Roy, de la maison duquel il estoit gentilhomme. Mascaregne estimoit trouuer plus de faueur à l'endroit de Simon de Menefez capitaine de la citadelle de Cananor, l'un de ses plus grands & anciē amis : toutesfois il en auint autrement, car Menefez lui refusa l'entree de la citadelle en qualité de Viceroy, mais qu'y venant comme seigneur notable qu'il estoit, tout seroit à son commandement. Mascaregne ne le voulut presser, ains seulement lui demanda vn catur, pour aller avec moins de soupçon en Goa, d'autant qu'il ne vouloit rien obtenir que par iustice : ce que Menefez lui ottroya, tellement que Mascaregne ne mena que Simon Caier & Lanzaror de Seix avec deux seruiteurs & les matelots. Derechef afin qu'on l'estimast esloigné de toutes mauuaises pratiques, il ne voulut pas aller vers Christofle de Soufe capitaine de Chaul, son grād ami, ains print la route de Goa, s'assurant que Sampajo ne refuseroit d'entrer en examen du droit, & que s'il tergiuerloit, les gentilhommes & capitaines estans pres de lui le contraindroient à y entendre : quoy auenant il se tenoit pour assuré de gagner sa cause. Arias de Cugne qui portoit les lettres de Messie & de Mascaregne à Sampajo se rēdit au port de Goa le quatriesme iour de Mars. Ces lettres receuēs, Sampajo fit en sorte qu'il fut dit qu'on ne lairroit point descendre Mascaregne, ains que commandement lui seroit fait de retourner à Cananor, & ne partir de la citadelle sans licence de Sampajo : qu'en cas de refus on l'y menast pieds & poings liez : s'il se mettoit en defense, qu'on le iettast dedans la mer. Là dessus il escriuit des lettres bien aspres à Mascaregne, l'accusant de tout ce desordre, & le priāt avec menaces d'aller en la citadelle de Cananor, & que de là il escriuist & enuoyast ses remonstrances. Arias de Cugne pour recompense de ses peines fut créé facteur & chastellain de Coulam, au lieu de Hēri Figueire qui en fut debouté, Sampajo l'accusant de trahison pour auoir receu Mascaregne en qualité de Viceroy. Cugne ne trouua point Mascaregne, ni l'Amiral de Goa à qui Sampajo donnoit charge d'executer ce que dessus : pourtant il reuint en Goa. Or pource que la plupart des grands & petis en l'isle & cité de Goa tenoyent Mascaregne pour Viceroy, se resiouissans tout ouuertemēt de sa venue, avec protestation de le fauoriser si tost qu'ils le veroyent, les partialitez recommencerent : tellemēt que par les places & coings des rues on n'oyoit que disputes touchant le droit des deux competeurs. Sampajo bien fasché que lon heurtast ainsi contre lui, & ne voulant perdre l'honneur de ceste charge & le proufit aussi, (ajsuoir dix mille ducats de gages par an, sans les arrièremains & auantages secrets qui montoient six fois autant, & quelquesfois à des sommes presque infinies, à cause des butins & pratiques des douanes) assembla incontinent ses amis, & par leur conseil enuoya Simon Melio son neveu & Antoine de Sylueire son gendre en la fosse de Goa, pour y attendre

attendre Mascaregne, & lui commander de tourner voile en Cananor, sinõ l'y mener eux mesmes, & le remettre prisonnier es mains de Simon de Menefez. Sampajo auoit pour principal conseiller Hector de Sylueire, auquel il donnoit mille ducats de gages tous les ans pour l'arrester de son coste. Il le pria d'aller faire ceste capture, dont Hector s'excusa, disant qu'il estoit conseiller, & non pas executeur, preuoyant bien, s'il le faisoit, de perdre sa reputation parmi tous les gentilshommes Portugallois. Mais ceste excuse ne le iustifia pas, ains depuis & lui & tous ceux qui auoyent tendu la main à Sampajo se repentirent des conseils pernicleux donnez & des violètes procedures tenues contre Mascaregne. Vray est que Hector de Sylueire reconut son deuoir quelque temps apres: mais à ce coup il fut cause d'un grand mal, & entretint le feu, sur lequel voulant mettre le pied avec certains autres de sa suite ils receurent leur payement de Sampajo, lequels auoyent esleu en vne trop grande licence. Simon Melio & Antoine de Sylueire partirent avec vne flotte aussi armee & fournie de gens que s'ils eussent voulu attendre les Turcs, ce qui despita plus que iamais les partisans de Mascaregne, iusques à dire que Sampajo descouuroit assez son intention, & qu'il fuyoit toute voye de raison pour dominer par violence, & en somme ils l'accusoyent d'estre vn tyrã & vlsurpateur, qui ne vouloit estre suiet à loix ni à ordre quelcõques. Mesmes aucuns d'entr'eux en allerent faire leurs plaintes au gardien des Cordeliers de Goa, pour l'exhorter de pouruoir à ces desordres selon le deuoir de sa charge. Mais ce moine tenoit le parti de Sampajo, & leur en toucha quelque mot: ce pendant il promit les en resoudre au sermon qu'il deuoit faire le Dimanche suiuant, à la fin duquel il plaida tout au long ceste cause, en presence de Sampajo & de plusieurs capitaines & gentilshommes, disant iniures à ceux qui soustenoyent Mascaregne estre Viceroy. Sa conclusion fut qu'on scauoit bien qu'il auoit autant acointance avec l'un qu'avec l'autre, & se pouuoit passer d'eux & de tous autres hommes. Que si on l'accusoit d'impudence & de mensonge, il prioit Dieu de le damner en enfer & lui oster promptement la parole, s'il disoit autrement que son cœur ne pensoit, iurant par le Dieu qu'il auoit tenu entre ses mains le matin tout son discours contenir verité. Outreplus il requit que de la part du vicaire general, assistant à ce sermon, tous ceux qui s'opposeroient de fait ou de parole au gouuernement de Sampajo fussent excommuniiez, & payassent dix marcs d'argent applicables à l'Eglise, & ne peussent estre absous que par l'Euesque de Funchiale. Il prioit aussi l'Auditeur general & tous les gentilshommes de bien peser cest affaire de si grande importance, & lors ils conoistroyent que les gardes posees à la fosse de Goa estoient seulement pour empescher que scandale n'auinst, & nõ pas qu'on se doutast de la venue de Mascaregne. Ce fut la fin des propos de ce moine, qui estima auoir assez harangué pour faire croire que Sampajo estoit Viceroy. De fait, soit que la chose fust ainsi apostee ou autrement, Pierre de Far capitaine de Goa demanda les lettres de la succession à Sampajo, puis les bailla & les mit sur sa teste, disant qu'il les tenoit pour valables, & demanda à tous les assistans s'ils estoient pas de son aui, lesquels respondirent

qu'oui, ensemble de ce que le gardien auoit proposé. Incontinent Sampajo se fit expedier acte de ce que dessus, pour s'en preualoir en temps & lieu, commandant à l'Auditeur d'aller par les logis des gentilshommes qui ne s'estoyent point trouuez au sermon, afin qu'ils soussignassent ce playdoyer du moine, ce qu'ils firent au nombre de vingt ou enuiron. Quelques vns qui refuserent, entre autres Vasque & George de Leme, furent arrestez & leur bailla-on leur logis pour prison. Les capitaines & gentilshommes qui gardoyent la fosse de Goa, en pareil nombre de vingt ou enuiron, soussignerent le lendemain, comme firent aussi l'Amiral & tous ses capitaines qui arriuerēt au port de Goa durant ces menees. Quant à Mascaregne, ainsi qu'il continuoit son voyage vers Goa, il rencontra sur mer Gonsalue d'Azeuede, qui lui dit qu'une flotte l'attendoit pour le prendre prisonnier de la part de Sampajo. Mascaregne delibera de supporter tous les torts qu'on lui feroit, & de ne chercher autre chose que son droit par iustice ne tint compte de l'auctissement d'Azeuede, ains passa outre, & si tost qu'il fut descouuert, vn brigantin alla droit à lui & tira vn coup de canon en l'air pour le faire baisser, ce qu'il fit, & fut mené à Antoine de Sylueire, auquel il ne voulut promettre de se retirer dedans la citadelle de Cananor & n'en sortir sans la licence de Sampajo: pourtant on lui mit les fers aux pieds, & fut liuré à Simon Melio pour le mener à Cananor. Simon Caier & Lanzarot de Seix furent menez es prisons de Goa, pieds & poings liez. L'emprisonnement de Mascaregne appaisa les bruits pour vn temps, car chascun craignoit mesme traitement, & les petis iugeoyent bien à propos, que si lon n'auoit point espargné vn si grād capitaine, on leur feroit pire traitement sans comparai-son, s'ils se remuoyent tant fust peu. Ainsi donc les partisans de Mascaregne demurerent aux escoutes, tandis que lui sans changer de contenance ni de paroles perseueroit à maintenir sa cause, demandant que son competeur se soumist à iustice.

*Les troubles
qui suruindrent
entre les Por-
tugallois à
cause de l'em-
prisonnement de
Mascaregne.*

A v mesme temps, Francisque de Soufe apporta lettres de Christofle de 12. Soufe à Sampajo, contenans en substance qu'il s'esbahissoit fort de ce qu'il entretenoit telles partialitez, veu que les Turcs approchoyent avec vne puissante armee contre si petit nōbre de Portugallois, & que nourrir ainsi les diuisions c'estoit commettre vne des plus grandes meschancetez du monde: adioustant que si Sampajo s'estimoit legitime Viceroy, il ne deuoit differer d'en remettre la conoissance aux iuges, quand Mascaregne seroit arriué de Malaca, entendant que ce procez se terminast par le droit des loix, & non par les armes, comme l'intétion de Sampajo sembloit estre telle. Pour la fin apres quelques prieres & protestatiōs, il declairoit à Sampajo que s'il refusoit la voye de iustice, de sa part il ne lui obeiroit point. Ces lettres estonnerent Sampajo, pource que Christofle de Soufe estoit le principal capitaine des Indes, ayant le plus de gens à sa suite, à cause qu'il tenoit meilleure table que Sampajo, mesmes donnoit argent aux pauvres gētilshommes & soldats, estoit familier enuers chascun, tellement que sa maison estoit vne cour royale, tant il auoit grande suite. Sampaio donc estima que Soufe le quitteroit, puis qu'il n'auoit vuidé son different avec Mascaregne

gne que par ruse & violence : & ne sachant comme se resouldre communiqua les lettres à quelques siens amis plus speciaux, lesquels lui conseillerent de declairer à Soufe l'emprisonnement de Mascaregne, auenu sans tumulte, approuué de l'Amiral, du capitaine de Cananor, & de tous les capitaines & gentilshommes de l'Inde basse, qui le reconoiſſoyent lors pour Viceroy. Ce qu'il fit & pria instâment Soufe de ne se desioindre des autres pour entretenir la diuision, & d'escrire à Mascaregne qu'il se deportast de pretendre au gouuernement. Soufe entendant cela fut ioyeux de ce que la diuision ne s'augmentoit, mais il ne laissa de trouuer fort mauuais l'emprisonnement de Mascaregne, & encores pire de ce qu'on lui auoit osté le gouuernemēt qui lui appartenoit, estimât que c'estoit à Mascaregne, & nō à Sampaio, qu'il falloit obeir. Mais considerant d'autre costé que s'il prenoit le parti de Mascaregne la sedition se rallumeroit, & les Portugallois seroyent diuisez, en danger d'estre entierement desfaits par les Turcs, il delibera, par l'auis de son conseil, d'approuer pour le bien de paix l'election de Sampaio & prier Mascaregne de ne plus quereller le gouuernement, & leur en escriuit bien au long à tous deux, ensemble aux principaux de l'Inde basse, dont Sampaio fut tresioyeux pensant tenir Soufe de son costé. Mascaregne accepta de sa part l'intention de Soufe, voyant qu'il n'approuoit l'estat des affaires, sinon pour rompre le coup à vne guerre civile, & procurer que les Portugallois demeurassent vnīs pour faire teste aux Turcs. Il espera donc de nouueau que Sampaio viendroit à raison, pourueu que Simon de Menefez capitaine de Cananor le relaschast, comme il s'en asseuroit aucunement, Menefez lui ayât promis de ce faire sur le commencement de l'hiuer, & mesmes lui demandant pardon de ce traitement, lequel il estoit contraint de continuer quelque temps, pour n'inciter Sampaio à faire pis. Ceste bonne volōté de Menefez enhardit Mascaregne d'enuoyer vn escrit à Sampaio par les mains de Denis Melio notaire public de Cananor, requerant qu'ils eussent à vider leur differant par iustice, & protestant à faute de ce faire de tous despens, dommages & interests. Il intercedoit aussi pour la deliurancē de Caier & Seix detenus es prisons de Goa. Sampaio ayant leu cest escrit le mit en pieces, tellement que Melio se sauua vistement sans attendre responce : & comme Sampaio se retiroit en son logis, en passant pres de la prison de Caier & Seix il les entendit crier qu'on les eslargist pour solliciter le droit de Mascaregne, ce qui le despita tellement qu'il les fit enfermer de nouuelles & plus pesantes chaines, defendant à peine d'estre rudemēt chastié qu'on ne lui presentast riē de la part de Mascaregne, ains à son secretaire, qui feroit responce. Tost apres il fit publier à son de trompe, que quiconque nommeroit Mascaregne Viceroy seroit pēdu & estranglé. Melio estant en Cananor dōna acte à Mascaregne des procédures de Sampaio, & quant à Menefez, entendant ce que dessus il se mit en teste que Sampaio vouloit maistriser par force, à l'occasion dequoy il resolut de ne lui point obeir : toutesfois il retint ceste deliberation en son esprit, & pour lors n'en fit aucun semblant à Mascaregne. Les lettres de Christoffe de Soufe sembloient auoir assopi tout ce differant : mais les a-

faïres prindrent vn autre train, par l'occasion qui s'ensuit. Sur le commencement d'Auril, Hector de Sylueire sollicita Sampaio de lui donner la capitainerie de Goa, & enuoyer Pierre de Far à Malaca, ce que Sampaio ne pût faire, à cause que Far ne voulut bouger, se fondant sur sa commission. Sylueire assez mal content de ce refus, fit demander par Iaques Melio son parent la capitainerie de Malaca, dont il fut esconduit par Sampaio, s'excusant que Capral establi par Mascaregne ne quitteroit la place sinon à force d'armes, & que par tel moyen l'Inde haute se verroit en guerre ciuile. De ces occasions proceda vne alienation de cœurs & vne pratique nouuelle à l'auantage de Mascaregne, car Sylueire se rangea de son parti, & y attira Antoine de Sylueire, Tristan Norogne, George de Castre, Henri Deze, Nonio Fernand Freire, Vasque de Cugne, François de Castre, George de Sylueire, Iacques de Mirande, François Ataide, Arias Capral, George Melio, Simon Sodre, Martin Pacheco, Simon Delgade & plusieurs autres, lesquels tous ensemble escriuient à Mascaregne leur resolution estre de faire vuidier en iustice le different dont estoit question : l'exhortans de procurer sa deliurance, & obtenir de Menefez les moyens de faire voile en l'isle de Goa sur le commencement de l'esté, & que lors ils donneroyent ordre à tout. Mascaregne monstra incontinent ces lettres à Menefez, le priant, puis qu'ils estoient amis, & que rant de gentilshommes lui tendoient la main, de le vouloir eslargir, avec promesses de le faire Amiral, au cas que le gouvernement lui demeurast. Menefez iura qu'il le deliureroit, moyennât que les autres perseueraissent en leur deliberation. Sur ces entrefaites, le conseruateur Messie ayant oui quelque vent de ces pratiques, mit des espions par tout pour retenir les pacquets apportez secretement, & en descouurit vn entre autres escrit de la main de Mascaregne, sans toutesfois pouuoir connoistre à qui ils s'adressoit, & vid bien que Sampaio seroit à recommencer. Pourtant il le lui enuoya, & ce pendant commença de son costé à conteminer, pour faire prendre issue à cest affaire, selon que nous le verrons ci apres. En ce temps, ascauoir au commencement de May, Hector de Sylueire & ceux de son parti cōmencerēt à se retirer de la maison & suite de Sâpajo, lequel tascha de les regagner : mais Sylueire n'y voulut entendre, estât resolu de le faire ioindre à ce que requeroir Mascaregne, lequel ne cessoit de demâder iustice. Finalemēt Sâpajo lui declaira biē expressement qu'il n'entreroit point en ceste voye, pource que ce seroit reuocquer en doute ce que le Roy lui auoit ottroyé en termes si entendibles. Mascaregne auertit incontinent Sylueire de ceste declaration, le priant de contraindre Sampaio, qui s'estoit ainsi descouuert, & que s'il refusoit venir à raison ils l'y amenaissent en lui ostant le gouvernement. Sylueire & les siens ne furēt encores de cest auis, ains conseilèrent à Mascaregne de venir au port de Goa, l'asseurās que sa presence pouruoyeroit à cest affaire. Les officiers de la chābre de Goa furent de mesme auis avec plusieurs habitās de la ville, iusques au nombre de deux cens soixāte qui soussignerēt la lettre escrete à Mascaregne, auquel ils promettoyēt d'employer corps & biens pour maintenir son droit. Tant de signatures rauirent Mascaregne en grand esbahissement, car il ne pēsoit pas auoir

auoir tant d'amis : & les ayant monstrees à Menescz il fit vne autre despesche à Sylueire pour le persuader de se saisir de la personne de Sampaio , au cas qu'il ne voulust promettre de subir iugement de ce debat : & alleguoit beaucoup de raisons pour fortifier cest auis , lequel fut rendu à Sylueire au commencement d'Aoust, & suiuant icelui ceux de la chambre firent leur sommatiō à Sampaio qui n'en tint compte. Sylueire & les autres gentilshommes firent puis apres presenter la leur par Manuel de Macede en presence d'un notaire. Mais Sampaio se despita de telle sorte qu'il fit enfermer & mettre Macede en vne basse fosse, souffleta sur le chāp le notaire, lequel eust esté massacré si les iambes n'eussent sauué le corps. Ces insolences de Sampaio inciterent Sylueire & ses partisans à se rallier de plus pres : mais ils furent preuenus par Pierre de Far capitaine de la citadelle & autres de la faction de Sampaio, tellement que la ville fut incontinent en armes, & les vns prests à courir sus aux autres, Sampaio marchant des premiers. Sylueire voyāt la confusion horrible qui s'ensuiuroit de ce combat, aima mieux se rendre prisonnier que hazarder les vies de tant de Portugallois & ruiner en vn iour l'estat des Indes, faisant place à la violēce de Sampaio, auquel il fit de grandes remōstrances. Iacques de Sylueires'auança beaucoup plus, lors mesmes que tous estoient en armes par les rues : car il cria tout haut d'une fenestre à grand nombre de gentilshommes, Seigneurs, voyez-vous point cest homme qui veut estre gouuerneur par force, & refuse se rāger à la raison ? à quoy Sāpaio repliqua de mesmes, Oui,oui ie le suis, & le seray malgré tous ceux qui s'y opposent. Sylueire & tous les autres capitaines & gentilshommes susmentionnez furent menez en la citadelle, où Sampaio leur fit iurer qu'ils ne sortiroient point sans congé, & en fut dressé acte par escrit. Les officiers de la chambre, outre plusieurs autres, vindrēt se reconcilier à Sampaio, qui leur commanda de respondre à la demande de Mascaregne, ce qu'ils firent, & pour complaire à Sampaio escriuirent à Mascaregne qu'ils n'auoyēt peu requerir Sampaio d'entrer en voye de iustice pour raison du gouuernement, attendu que le Roy l'auoit establi par ses lettres, en vertu desquelles il estoit reconu Viceroy par toutes les Indes, & qu'insister sur cela, pour en attribuer conoissāce à iustice, c'estoit desobeir au Roy à qui seul appartenoit de vuidier ce differant : que sa venue en Goa ne seruiroit que de troubler le peuple, qui deuoit estre laissé en paix à cause des Turcs : & pourtāt le prioyēt de se tenir où il estoit. Le Viceroy escriuit aussi à Mascaregne, & ce pendāt print acte de la resolution de ceux de la chābre. Le messager venu de Cananor fut renuoyé avec ces despesches, & emporta aussi vne lettre des gentilshommes prisonniers, lesquels supplioient Mascaregne de venir, & l'asseuroyēt que tout se porteroit biē. Apres le depart du messager, Sampaio relascha la pluspart de ces gentilshommes, plus pour les attirer à son parti que pour bōne estime qu'il eust d'eux, & ne retint que Hector de Sylueire avec trois autres. Quant à Arias Capral & George Melio, pource qu'il auoyent dit mille maux de lui, il les fit enfermer & mener prisonniers en la citadelle de Benastarim. Sur la fin du mois d'Aoust, craignant que Hector de Sylueire & les trois autres ne lui donnassent quelque

trouffe, & ne fissent venir Mascaregne, il les voulut enuoyer à Cochim: d'ot aucuns estimerent que c'estoit vn pretexte pour les faire noyer, pource que la nauigation estoit perilleuse. Eux donc lui remonstrent viement qu'il se gardast de les enuoyer ainsi à la mort: tellement qu'il changea d'avis, & leur establit bonnes gardes, viuant de son costé en grande crainte, pour la peur qu'il auoit qu'on ne l'empoisonnast, les affaires estant lors si confuses que c'estoit pitié.

*Pratiques de
Mascaregne
pour se deliurer
& faire obeir
côme Viceroy,
& l'issue d'i-
celles.*

IL sembloit que l'emprisonnement de ces gentilshommes donneroit 13.
pied ferme au gouvernement pretendu par Sampajo: mais ce fut presques la ruine. Car Mascaregne entendant ces nouuelles, & ayant receu leur lettre, en laquelle ils declairoient craindre la poison, attendu qu'on auoit ia machiné leur mort en les voulant mettre sur mer en peril tout euidēt, s'enhardit de solliciter Menesez de le deliurer & reconoistre pour Viceroy, quitter le parti de Sampajo, qui vouloit ainsi dominer par tyrannie, emprisonnant ceux qui desiroient iustice, & cherchant leur mort. Simon de Menesez irrité de l'emprisonnement de ces gentilshommes se rangea du costé de Mascaregne, & le mena dedans le temple de la citadelle, où se trouuerēt le facteur, le chastellain majeur, tous les officiers de iustice & de la faculté, quelques gentilshommes, les soldats & habitas de la citadelle & du bourg. Lors furent leues à haute voix la succession de Pierre Mascaregne ouuerte apres la mort de Henri de Menesez, l'acte du gouvernement prouisionnel de Sampajo, les lettres d'Alfonse Messie conseruateur de la faculté royale, ensemble les autres actes & protestations faites depuis. Cela fait Mascaregne print la parole & dit, Seigneurs, ces actes vous ont esté leus, afin que vous voyez qu'on m'a inurié, emprisonné & molesté sans raison ni iustice, & qu'on ne pouuoit pis faire à vn brigand ou traistre qui auroit voulu liurer les Indes aux Mores, qu'on m'a fait. Alfonse Messie est venu me blesser, Sampajo m'a emprisonné, sans auoir esgard à la faueur de mon Roy qui se fioit en moy du gouvernement des Indes, pour recompense des seruices que j'ay faits à sa grandeur & à feu son pere, en diuers lieux, & dernieremēt en ma capitainerie de Malaca, qui est en paix par la ruine du Roy de Bintam. Or estimant veuir prendre possession du salaire de mes peines, j'ay esté vilipendé & outragé comme chascun scait, specialement d'Alfonse Messie, qui pour le deu de sa charge me deuoit aider contre la violence de Sampajo, & entretenir les affaires en paix, comme il le pouuoit bien faire à cause de son autorité: mais il s'est monsté tout à descouuert mon ennemi, a tout renuersé, exposant les lettres du Roy contre l'intention de sa maiesté, & a mis l'Inde en troubles & diuisions, & en danger d'estre perdue. Sampajo y a tenu la main de son costé, ne voulant subir iugement ni connoissance de cause: & pource que ie ne volus condescendre à son desir, il m'a mis les fers aux pieds comme à vn traistre, veut m'oster le gouvernement, dit qu'il le gardera avec les armes au poing, ce qui appert assez quād il emprisonne tous ceux qui le prient de ma part que nostre different soit vuide par iustice. Et afin qu'il en conste encores mieux, il tient aujourd'hui prisonniers les principaux gentilshommes Portugallois, avec autant de ri-
gueur

- gueur que s'ils estoient coupables de la plus grande trahison du monde:
 - & ie tien de bõne part qu'il a deliberé de venir assieger ceste forteresse pour
 - se saisir de moy & du capitaine, sans penser à la venue des Turcs, preuue
 - assez euidente de sa reuolte, & qu'il ne tient compte des commandemens
 - du Roy, veut s'opposer aux Portugallois seiournans en Inde, lesquels (pour
 - la plupart) font laissez & saouls de sa tyrannie. Puis qu'il y procede ainsi,
 - ie vous requier, Seigneurs, de la part du Roy nostre Sire, & vous prie vne,
 - deux & trois fois, considerant l'obstinatiõ de Sampajo, qui ne veut entrer
 - en la voye de iustice, que de vostre part vous m'adiugiez le gouuernement
 - & m'obeissiez comme estant vray Viceroy: afin qu'avec ceste faueur de
 - vous, & d'autres dont ie m'assure, ie le puisse amener à raison, tellemēt que
 - ce qui m'appartiēt me demeure, que les troubles qui ruinerōt l'Inde basse,
 - si les Turcs viennent bien tost, soyent assopis. Protestant en cas de refus
 - d'en faire plaintes au Roy, & de leur imputer les maux qui s'ensuiuroient
 - de cela: & demandant acte de ce que dessus, avec ou sans leur response.
 Tous declairerent qu'ils le receuoient pour Viceroy, pour les raisons con-
 tenues es actes & par lui deduites: & sur l'heure prestrent le serment, & so-
 lennizerent ceste reception de Mascaregne avec grande ioye. Les nouuel-
 les en furent incontinent portees à Cochim, & si tost que le tēps fut propre
 plusieurs gētilshommes & autres gens de qualité allerēt vers Mascaregne à
 Cananor, où arriuerēt aussi quelques capitaines venans de l'Inde haute, &
 se rangerent au parti de Mascaregne, entendans le refus de Sampajo, lequel
 fut afoibli d'autant. Cela fait, Mascaregne enuoya sommer de nouveau
 Sampajo d'accepter la voye de iustice, & Simon de Menescz lui escriuit
 pour la deliurance des prisonniers, ausquels il enuoya lettres de faueur, les
 assurant d'employer corps & biens pour leur deliurance. Sāpajo n'ignorāt
 pas que plusieurs de l'isle & ville de Goa enclinoyent à Mascaregne, donna
 ordre à ses affaires, sur tout pour lui empescher la descente en ceste isle, & fit
 ratifier son gouuernement par Antoine de Breu, Vincent Gilles, Balthazar
 de Sylues, Gaspar Payua, Jean Deze & Francisque Pereire, qui en ce temps
 arriuerent de diuers endroits au port de Goa, prenant acte de leur declara-
 tion & consentement. Au mesme temps Christofle de Soufe receut nou-
 uelles de la mort de Raix Soleiman general de l'armee du Turc, tué en vne
 meslee & mutinerie suruenue entre les Turcs, où il y auoit eu tel meurtre
 que l'armee s'estoit rompue, & les compagnies ramassees à Suez, d'où elles
 ne pouuoient partir ceste annee pour entrer en l'Inde. Incontinent apres
 cela, siruint le capitaine Vasconcel, portant les actes de ce qui s'estoit passé
 au temple de Cananor: ce que veu par Soufe & son conseil, qui entendirēt
 les deportemens de Sampajo, fut resolu qu'on reconoistroit Mascaregne
 pour Viceroy, & qu'il seroit permis à Sampajo d'entrer en voye de iustice
 si bon lui sembloit. Ceste declaration fut enuoyee à Mascaregne, & d'autre-
 part Soufe escriuit à Sampajo, lui rendant raison de ce fait, dont Sāpajo ne
 se cõtenta nullemēt, ains assembla gēs sous la charge d'Antoine de Syluei-
 re son gēdre, pour aller à Chaul demāder à Soufe les soldats qui y estoient,
 & qu'il fortifit de la citadelle, puis que son terme estoit expiré, pour faire

place à Frâcisque Pereire qui auoit obtenu du Roy ceste capitainerie. Sylueite fit voile à Chaul, mais Soufe lui defendit de descendre, pource que Sampajo n'auoit voulu respôdre à ses lettres, puis alla trouuer Sylueire sur mer, estâs chascun en vn brigâtin, & lui dit qu'il ne feroit rien de ce que Sâpajo cômandoit, pource qu'il auoit vne cômision tout au contraire de la part de Mascaregne son general & Viceroy des Indes. Sylueire & Pereire repliquerent & firent de grâdes protestations de leurs dômages & interests à cause de ce refus, dont furent dressez actes: mais ils n'obtinrênt pour lors autre chose, & s'en retournèrent comme ils estoient venus.

*État des isles
Molucques: &
appointement
entre le Roy
de Tidore &
Garsie Henri-
quez, lequel
rompt ce traité
peu de temps
après.*

Nous laissons ces competeurs penser à leurs affaires, pour confide- 14.
rer quel estoit l'estat des isles Molucques alors. Ci dessus a esté dit que Gar-
sie Henriquez, se voyant desnû de moyens en la citadelle de Ternate, par
les pratiques d'Antoine Brittio, lequel auoit enleué les soldats & principa-
les munitions, enuoya es isles de Bandan Martin Correa pour recouurer
quelques commoditez des vaisseaux de Portugal qui y pourroyent estre.
Correa fut assailli d'une tourmente si estrâge qu'il cuida perir plusieurs fois:
mais finalement il surgit au port de Bâdan, où Brittio estoit à l'anchre. Toft
apres y arriua vn basseau de Malaca, duquel estoit capitaine Manuel Fau-
con, enuoyé par Mascaregne avec quelques iôes chargez de marchandise,
sous la conduite de Fernand Baldaje secretaire de la facturerie des Moluc-
ques: ce qui vint bien à propos pour charger le vaisseau de Correa. Or dau-
tant que ceux du pays l'assurerent d'auoir veu passer deux nefes de la factu-
re de Portugal, il conclut incontinent que c'estoyent nauires d'Espagne,
n'y ayant lors apparence qu'il y eust vaisseaux de Portugal en ceste mer. Et
craignant que si c'estoyent Espagnols ils ne fissent voile en Ternate, & sur-
prinsissent la citadelle où il n'y auoit gés ni muniôis, il requit Antoine Brit-
tio & Manuel Faucon d'y aller au secours, ce que Brittio refusa, & Faucon
promit s'y employer, comme de fait avec le plus de soldats qu'il lui fut pos-
sible d'amasser il se ioignit à Correa, & se rendirent en l'isle de Ternate, &
trouuerent Henriquez en termes d'appointement avec le Roy de Tidore.
Cachil Daroes n'en estoit gueres cõtent, car outre la diminution de son au-
torité par le moyen de ceste paix, d'autant que les Portugallois n'auroyent
pas tant affaire de lui que de coustume, il craignoit que le Roy de Tidore le
hst empoisonner, pour vengeance des maux receus en ceste guerre. Enco-
res que Henriquez sceust cela, neantmoins il pacifia avec le Roy de Tido-
re, à condition qu'en dedans six mois icelui rendroit l'artillerie de la fuste,
& tous les esclaves des Portugallois, lesquels s'estoyent sauuez en terre fer-
me, ensemble les hardes & marchandises qui se trouueroient auoir esté
prinſes. Apres que ceste pacification eust esté ratifiée, le Roy de Tidore sa-
chant que Cachil estoit fâché d'un tel accord, il le fit auertir qu'il lui don-
neroit à femme vne siene fille, s'il la vouloit accepter. Il faisoit cela pour se
asseurer de l'amitié de Cachil lequel il redoutoit, s'assurant que pour l'a-
mour d'icelui les Portugallois recommenceroient la guerre, chose qu'il
craignoit merueilleusement, à cause des dommages soufferts par le passé.
Henriquez entendit quelque chose de ce mariage, auquel Cachil preſtoit
l'oreille,

l'oreille, & s'y opposa par diuerſes pratiques, craignāt que telle alliance n'eſclouiſt quelque trahiſon, & que le Roy de Tidore ne vouluſt ſe venger des Portugallois. Mais voyant que ce mariage ſ'en alloit conclud, il reſolut l'empêcher en rompant la paix: & pour monſtrer qu'il auoit iuſte occaſion de ce faire, il enuoya demāder l'artillerie au Roy de Tidore, quoy que le terme de la rendre ne fuſt pas eſcheu. Le Roy eſtoit malade, & promit ſatisfaiſre en brief à ceſte demande, priant bien fort Hériquez de lui enuoyer vn medecin pour lui aſſiſter. Henriquez lui en enuoya promptement vn, qui empoisonna ce Roy en & peu de iours le mit hors du monde. Les nouuelles de ceſte mort apportees à Henriquez, il delibera ſ'emparer de la ville de Tidore, randis que les Inſulaires ſ'amuſoyent à pleurer leur Roy, ſans ſe douter de guerre. Il tint ſon caſ preſt, & pour coulourer ſon fait enuoya demander l'artillerie au gouuerneur de l'isle, ſinon, la paix ſeroit rompue. Or dautāt que le corps du Roy n'eſtoit pas encores enterré, ce gouuerneur fit reſponſe qu'incontinent apres la ſepulture il rendroit cela & le reſte cōtenu en l'accord. Henriquez qui ne cerchoit autre reſponſe fait embarquer ſes troupes, & enuoye declairer la guerre, au cas que l'artillerie & les eſclaves ne fuſſent promptement rendus. Fernand Baldaje qui auoit ceſte commiſſion ne voulut deſcendre en terre, ains y enuoya l'vn de ſes gens en vn eſquiſ. Le gouuerneur & les Mandarins reſpondirēt, qu'au ſortir d'vn conſeil qu'ils eſtoient preſts de tenir pour l'elecſion d'vn autre Roy, Hériquez ſeroit ſatisfait. Mais il eſtoit ia bien pres de l'isle, ſi que deuant iour il ſe rendit au port de la ville de Tidore, les habitāſ de laquelle eſperdus de la mort du Roy, & d'autrepart ſe reſoſāſ ſur l'accord, furent ſurpris, tellement que n'ayans moyen de faire teſte ils ſ'enfuirent çā & là. Les Portugallois entrez en la ville, ne trouuerent reſiſtance ne butin, tellement qu'ils mirent le feu es maiſons, & enleuerent ſeize pieces d'artillerie, ſe retirāſ en leur citadelle apres ce braue exploit, à l'occaſion duquel ils furent extremement hays de tous les Inſulaires des Molucques & autres lieux voiſins, qui les appelloient infideles & traîtres: tellement qu'ils furent forclos de Bachian & d'autres riches iſles, où ils trafiquoient auparauant en grande liberté. Ce pendant, George de Menefez enuoyé de Malaca par Maſcaregne pour eſtre gouuerneur des Molucques ſuiuoit ſa route: mais il fut tant battu des vents & tourmentes que finalement il arriua pres des iſles de Papue, où il fut contraint ſeiourner l'eſpace de ſix mois en grād trauail & miſere, à cauſe que le vent d'Oueſt le retenoit de nauiguer aux Molucques, & ſalut attendre l'Eſt ou vent d'Orient qui commence à ſouffler au mois de May en ces quartiers là.

15. Le retour de la nauire nommee Victoire, ſous la conduite de Iean Sebaſtian capitaine Eſpagnol, qui auoit veu les Molucques, & enleué quantité d'eſpicerie qu'il mena en Eſpagne, donna occaſion à l'Empereur Charles le Quint d'euoyer vne autre flotte de cinq nauires aux Molucques, pour baſtir vne fortereſſe en l'isle de Tidore. Frere Garſie de Loaiſa cheualier de S. Iean fut general de ceſte flotte, & ſ'embarqua au mois de Septembre l'an mil cinq cēs vingt cinq, & paſſa le deſtroit de Magellan avec toute ſa flot-

Flotte d'Eſpagne enuoyee par l'Empereur Charles cinquieſme aux Molucques: l'arriuee d'icelle, & ce qui paſſa entre les Eſpagnols & Portugallois.

te: mais ils se desbanderent tost apres, tellement que le plus petit vaisseau vint surgir en la nouuelle Espagne, deux autres s'escarterent par vne tourmente, dont l'un sous la charge de George Manricho print port en l'isle de Viceya. Le Roy de ceste isle faignant estre ami entra en son vaisseau avec nombre de gens, tua George & Jacques Manricho freres à coups de poignards empoisonnez, & arresta prisonniers tous leurs soldats. L'autre vaisseau perit en vne isle nommee Candiga. Loaisa mourut sur mer au mois de Iuillet l'an mil cinq cens vingt six, laissant charge de sa nauire, nommee Victoire, à vn gentilhomme Biscain, nommé Martin Igniguez, lequel arriua pres des Molucques en Ianuier l'an mil cinq cens vingt sept, avec l'autre vaisseau restant des cinq, entendit que les Portugallois auoyent citadelle & armee en l'isle de Ternate. Pourtāt il recueillit en sa capitainesse les soldats de l'autre vaisseau, lequel il fit bruller, & se trouua acompagné de trois cens Espagnols bien equippez & resolu, avec lesquels il suivit sa route, & arriua incontinent en l'isle de Mor où George de Menefez estoit venu peu au parauant. Apres auoir descouuert que c'estoyent Portugallois, il se ferra au goulfe de Camafo, appartenant au Roy de Tidore: & pource que les habitants conurent que c'estoyent Espagnols alliez de leur Roy, ils leur firent bon accueil: & d'autre part les Espagnols leur promirent venger l'embarquement de Tidore, qu'ils laccageroyent les Portugallois & leurs alliez, tellement que ces Insulaires leur faisoient diuers presens & fournissoyēt ce dont les Espagnols auoyent faute, sans prendre aucun argent ni recōpense d'eux. Garfie Henriquez ayant entendu que lon auoit descouuert deux vaisseaux (qui estoient ceux de George Menefez) prenans la route de Ternate, sans pouuoir dire si c'estoyent Espagnols ou Portugallois, fit embarquer Correa pour aller descouurir que c'estoit. Il entre dedans vn caracore ou barque du pays avec son trucheman & quelques Mandarins, & sceut à Camafo, lieu appartenāt au Roy de Ternate, qu'il y auoit pres de là des Espagnols alliez avec les Insulaires de Tidore. Correa retourné, Henriquez enuoya Manuel Faucon & septante Portugallois en deux basteaux, acompagnez de Cachil Daroes & de ses gens en douze barques. Faucon estant à mi-chemin, enuoya par l'Auditeur de la forteresse vne lettre de Garfie à Martin Igniguez general des Espagnols, auquel cest auditeur la porta, afin que sous ce pretexte il peust voir combien il y auoit d'Espagnols en ceste nauire. Igniguez n'ignorant pas ceste ruse, lui donna loisir de voir & visiter tout ce qu'il voulut, afin que les Portugallois (desquels il scauoit les moyens par le rapport des Insulaires) fussent d'autant plus estonnez: & ne laissa de respondre aux lettres de Garfie, lui offrant beaucoup de plaisirs. L'auditeur estant parti, Igniguez suivit sa route, & arriua en l'isle de Tidore, puis fit dresser à l'embouchure du canal deux bouleuards de pierre, les munit de l'artillerie de sa nauire, afin de garder l'entree du port, la nauire estā en frōt avec quelques pieces, & ressemblant à vn des bouleuards. Faucon ayāt oui le rapport de l'auditeur ne voulut se hasarder au cōbat cōtre les Espagnols, ains s'en retourna vers la citadelle, & rēdit cōpte de sō voyage à Henriquez, à qui au bout de quelques iours vint vn messager de la part de Igniguez, di-

fant

sant estre venu en Tidore par le cōmādemēt de l'Empereur son souuerain, & seigneur des Molucques, qui estoient en son partage, & auoyēt esté descouuertes par Fernand Magellan son lieutenant, qui en auoit prins possession pour son maistre, lequel aussi les auoit obtenues par sentence donnee à son proufit contre le Roy de Portugal. Que depuis la descouuerte de ces isles, on y auoit laissé trente Espagnols & establi vne facturerie, où il y auoit beaucoup de biens & quarāte pieces d'artillerie : mais que les Portugallois auoyent tué les Espagnols, pillé les biens, enleué l'artillerie, & outreplus basti vne citadelle sur les terres de l'Empereur, sans sa permission. Qu'il vouloit donc sauoir qui les auoit espris de ce faire, afin d'en dresser vn proces verbal & l'enuoyer à l'Empereur. Henriquez fit responce, que les Molucques & autres isles voisines n'appartenoyent ni n'auoyent iamais appartenu à l'Empereur : n'estoyent aucunement de son partage : que la sentence donnee à son proufit auoit esté pronōcee par des Espagnols ses suiets, qui n'eussent osé iuger autrement : que les iuges Portugallois auoyent prononcé au contraire, & adiugé les Molucques au Roy de Portugal, tellement que cela ne seruoit de rien : encores moins d'alleguer le voyage de Magellan, veu que plus de dix ans auant sa nauigation, elles auoyent esté descouuertes par Antoine de Breu par commandement d'Alfonse Albuquerque, lors Viceroy des Indes, au veu & sceu de Magellan mesmes, lequel estoit avec de Breu en ce voyage, & toutesfois depuis pour despiter le Roy de Portugal, duquel il estoit suiet naturel, auoit fausement donné à entendre à l'Empereur que les Molucques estoient de son partage, & promis les aller descouurir par vn nouveau chemin, où il auoit finalement receu le salaire de ses trahisons enuers son souuerain seigneur. Qu'à lors que ces isles furēt descouuertes par Antoine de Breu, plusieurs Rois d'icelles deuindrent amis du Roy de Portugal, & se contenterēt que les Portugallois trafiquassent avec leurs suiets, comme ils auoyent continué depuis, & qu'à la requeste du feu Roy de Ternate celui de Portugal auoit fait bastir vne citadelle en l'isle. Qu'Antoine Britto y estant venu pour cest effect, auoit trouué quelques Espagnols en l'isle de Tidore, lesquels il enuoya au Viceroy des Indes, pour ce qu'ils ne monstroyent cōgé du Roy de Portugal de trafiquer es Molucques, lesquelles appartenoyent au Roy Iean troisieme, au nom duquel il commandoit en la citadelle, resolu de la garder iusques à la dernière goutte de son sang contre tous ceux qui s'en voudroyent emparer, & clorre les passages à toutes personnes, tant Espagnols qu'autres, qui voudroyent nauiguer & trafiquer par ces isles, sans sa licence. Pourtant prioit-il Igniguez de venir promptement en la citadelle, & que s'il ne vouloit y loger, on l'acommoderoit d'un lieu à part, où il pourroit habiter seurement : requerrant au reste que les Espagnols n'achetassent point d'espiceries, d'autant qu'elles appartenoyent au Roy. Qu'en cas de refus il les rangeroit à deuoir avec les armes, sans crainte de reprehension, puis que c'estoit pour le seruice du Roy de Portugal son Prince & seigneur souuerain. Le messager fut renuoyé avec ceste responce : ce nonobstant Igniguez perseuera en ses demandes, & contesterent assez long temps par écrit, sans prēdre resolution.

Or quand Henriquez vid que les Espagnols ne bougeoient de Tidore & haussioient le pris des espiceries, il delibera de les en chasser, & sur vn soir s'embarqua avec cent Portugallois & grãd nombre de gens du pays en des coracores & autres vaisseaux. Ils chargerent trois pieces d'artillerie, la plus grosse en vn basteau, les deux autres sur vne fuste & sur vn calaluz, qui ne portoyent que certains capitaines avec les canonniers & matelots. La fuste qui voguoit deuant fut descouuerte par les Espagnols, encores qu'il fust nuit, lesquels commencerent à canonner de l'un des boulevards, avec telle recharge qu'ils tuerent vn matelot, esmorcelerent la main du patron qui tenoit le gouvernail, & endommagerent le gouvernail mesme. D'autre part le capitaine de ceste fuste se print à battre le boulevard, de si grande furie que sa piece creua, & fut contraint se retirer aupres du calaluz, attendant qu'on eust amené vn autre canon de la citadelle, lequel fut braqué vn peu auant iour dedans la fuste. Le matin venu, Henriquez fit iouer toutes ses trois pieces contre les deux boulevards. Au contraire les Espagnols commencerent à desserrer leur artillerie de telle impetuosité, que les Portugallois, pour se garantir, reculerent si loin que leurs boulets donnoient dedans l'eau, dont les Espagnols faisoient des risées & huees estranges. Henriquez n'osoit approcher avec ses caracores, qui estoient si foibles qu'un seul coup de canon les enfondroit. Ceste escarmouche ayant duré iusques à midi, les Portugallois, voyans qu'ils ne faisoient rien que perdre leurs pouldres & boulets, se retirerent avec leur flotte en vn goulfe, enuoyans quelques barques querir des pouldres en la citadelle. En attendant leur retour, Correa, le facteur & quinze autres descendirent en terre, pour aller mettre le feu en vn village assis sur vn costau : mais estãs descouverts par certains Espagnols on les empescha d'aller plus auant, mesmes Correa receut vne coup d'harquebuze sous l'oreille, dont il tomba demi mort par terre, & eurent ses gens assez affaire à l'emporter & gagner vistement leur barque. Henriquez se retira du tout finalement en la citadelle, sans rien entreprendre depuis : & les Espagnols de leur part demurerent cois, à cause que leur nauire commença à s'ouuir & s'emplit d'eau, tellement qu'elle coula en fõnd, sans qu'ils en peussent rien sauuer. La saison venue pour faire voile en Malaca, Henriquez fit ses efforts de charger quelques vaisseaux pour le Roy : mais dautant que les particuliers payoient mieux les espiceries aux Mores, il ne recueillit presques rien : & voulant vser de son autorité, il cuida tout gaster à cause que ses gens aimoyent mieùx leur proufit que celui du Prince : tellement que sur le commencement de Ianuier il enuoya demander secours au gouverneur de Malaca, pour donner ordre aux affaires du Roy de Portugal es Molucques, & faire teste aux Espagnols demeurez es isles de Tidore & Gilolo, où nous les lairrons pour quelque temps, afin de reprendre le discours du different entre Mascaregne & Sampaio.

*Continuation
du récit des
différens entre
Sampaio &*

ANTOINE de Mirande Amiral des Indes partit de Cochim le quin- 16.
ziesme iour de Septembre, tenant avec sa flotte la route de Goa, & portoit
lettres de Messie lequel cõseilloit Sampaio d'euoyer Mascaregne en Por-
tugal,

tugal, ne sachant pas ce qui estoit auenu à Cananor. Mirande arriué pres de Cananor, pour pouruoir à ce qui seroit requis, Mascaregne lui enuoya vn auis par Simô de Menefez, le priant puis que Menefez & Christofle de Soufe avec la pluspart des gentishommes & soldats Portugallois, habitans es Indes l'auoyent accepté pour Viceroy, voyâs que Sampaio refusoit se ranger à raison: ce que lui recerchoit encores de sa part pour le repos de l'Inde, il pleust à Mirande de le reconoistre pour Viceroy, s'assurant que si Sampaio se voyoit sans armee nauale, ce seroit vn moyen pour le pousser en voye de iustice: promettant de sa part estre prest à y entendre, à peine de tous despens, dommages & interests vers qui il appartiendroient. Mirande voyant que Mascaregne auoit esté receu pour Viceroy, & quel malheur ce seroit de voir deux cōpetiteurs en si long debat, fit response que si Sampaio refusoit le moyen & ordre de iustice, il obeiroit à Mascaregne, auquel il en fit vne promesse escrete & signee de sa main le dixseptiesme iour de Septēbre mil cinq censvingtsept. Cela fait Mirande fit voile au port de Goa, où ayant cōmuniqué avec Sampaio ils eurent grandes disputes ensemble touchant ce que dessus: tellement que Sampaio fut cōseillé d'oster l'Amirauté à Mirande, mais il n'en fut d'auis, ains lui donna charge d'aller à Chaul recueillir les troupes qui y estoient, & faire receuoir Francisque Pereire pour commander en la citadelle. Estant arriué pres de Chaul il rencontre Antoine de Sylueire, lequel lui conseilla d'attēdre si Christofle de Soufe obeiroit au commandement de Sampaio, dont Mirande l'auertit. Soufe fit response que si Mirande vouloit communiquer avec lui pour lui faire rendre les soldats & le gouuernement de la citadelle, c'estoit temps perdu de s'y attendre, pource que Mascaregne son general & Viceroy des Indes lui auoit comandé le contraire. Apres quelques allees & venues, Soufe & Mirande parlerent ensemble dedans la citadelle, pour auiser aux moyens de faire que Sampaio se mist en iustice avec Mascaregne pour le repos de l'Inde basse, & que les iuges qui vuideroyent ce proces ne fussent point plus de sept. Ceux qu'ils nommerēt furent Antoine de Mirande, Jean Deze, Francisque Pereire, Balthazar de Sylues, Gaspar Payua, frere Jean Daluin Cordelier, & frere Louys de la Victoire Iacopin. Soufe choisit ces iuges, encores qu'il sceust que (reseruez les deux moines) les cinq capitaines auoyent signé que Sampaio estoit vray Viceroy des Indes: mais de sa part il ne voulut pas estre du nombre, ni souffrir qu'aucun gentilhomme de sa parenté ou partisan de Mascaregne en fust, encores qu'il eust peu estre du nombre, attēdu que Mirande en estoit. Mais il n'auoit autre but que de pacifier l'Inde par composition amiable, estimant en cela faire seruice à Dieu & au Roy, chose qu'il auoit en singuliere recommandation. Ces iuges ainsi nommez entre lui & Mirande, avec promesse bien expresse de tenir le cas secret iusques à ce qu'il fust temps de le manifester, de peur que Mascaregne & Sampaio le sceussent, ils s'assemblerent le lendemain au temple de Chaul avec les officiers du Roy, gentilshommes & autres personnes de qualité: puis firent vn discours des choses passees, monstrans cōmbien il estoit requis pour le repos de l'Inde que Mascaregne & Sampaio voidassent

leur different par iustice, & adioustèrent que d'un commun auis ils auoyēt dressé vn escrit, lequel fut exhibé, afin que par la lecture d'icelui chascū conust & opinast s'il y falloit adiouster ou en oster quelque chose. C'estoyent des articles au nōbre de sept ou huit pour contraindre Sāpajo à ioindre, & pour autorizer Soufe & Mirande en la nominatiō des iuges, deliurāce des prisonniers & vuidāge du proces. Apres la lecture d'iceux, Soufe deduisit les raisons pourquoy cela auoit esté ainsi dressé, & tous promirēt avec Mirande de lui tendre la main & procurer que ceste negotiatiō eust son plain effect, & le iurerent ainsi, remerciens Soufe & Mirande qui prenoyent tāt de peine à remettre tout en son premier estat. De ce que dessus fut dressé proces verbal par Gaspar Alfonse notaire public de la forteresse, & soussigné de tous, le quatriesme iour d'Octobre mil cinq cens vintgsept. Ces articles furent portez par Mirande à Antoine de Sylueire, lequel les accepta plus par contrainte qu'autrement, & tint des propos fascheux à Mirāde qui s'en estoit meslé si auant. On en fit deux copies, l'une pour Mirāde qui s'embarqua le mesme iour, l'autre pour Christofle de Soufe, lequel partit le lendemain, laissant la citadelle en la garde d'Aluarez Pinete chasteelain maieur d'icelle. Estans arriuez ensemble au port de Goa, Mirāde alla trouuer Sampaio, & lui ayant monstré les articles accordez avec Christofle de Soufe, remonstra les raisons qui les auoyent meus à ce faire, le priant d'y acquiescer. Mais Sampaio se mit en cholere & le tança bien rudement, iusques à l'estonner, de sorte que Mirāde au lieu de tenir roide se laissa aller, proposant des excuses, & les choses en vindrent iusques là, que faūçant la promesse iuree entre lui & Soufe de ne declairer à personne les iuges nommez pour la vuidange de ce different, iusques au temps propre, il les nomma tous à Sampaio, lequel ayant obtenu ce point, qui fut le fondement du gain de sa cause, en gagna incontinent vn autre, a sauoir vne promesse signee de la main de Mirāde, qu'il n'y auroit autres iuges ni en plus grand nombre que les sept nommez. Ceste promesse fut dressée tout à l'heure, & soussignée de l'Auditeur general & de son secretaire comme tesmoins. Les articles examinez en presence de l'Auditeur & de Pierre de Far capitaine de la citadelle de Goa, ils conseillerent Sampaio d'y consentir: pource que s'il reculoit, chascun s'esleueroit contre lui. Mais que premierement il les monstraux officiers de la chambre, afin que s'ils les trouuoient raisonnables il y cōsentist, à condition qu'il iroit en qualité de Viceroy iusques en Cananor, que l'honneur d'Alfonse Messie demeureroit sauf, que cas auenant que Mascaregne fust Viceroy, il ne changeroit aucun des officiers qui estoient lors establis. Soufe ayant promis faire ratifier & obseruer ces demandes, Sampaio lascha Hector de Sylueire & les autres prisonniers, donnant saufconduit à Soufe d'entrer en Goa, ce qu'il ne voulut faire, d'autant que ses amis l'auertirent que Sampaio estoit resolu de l'emprisonner avec Mirande, & se venger d'eux. Pour accorder ceste nouuelle difficulté, fut dit qu'on chanteroit vne messe pres de l'aiguade de Goa, & que quand le prestre leueroit son hostie, Mirande & Soufe iureroient en presence de Jean Deze & Antoine Ricco secretaire des Indes, que Sampaio iroit cōme

Viceroy

Viceroy iusqu'à Cananor, & qu'en conscience ils effliroyent pour iuges du different ceux qu'ils conoistroyent plus propres, sans descouvrir ni par eux mesmes ni par autrui ceux qu'ils auroyent choisi: item que l'honneur d'Alföse Messie demurerait en son entier. Soufe requit aussi que Sampaio iurast avec mesme ceremonie, qu'estant arriué à Cananor il se rendroit comme prisonnier en la galere de Mirande: surquoy il y eut quelque estrif. Mais finalement le vingtiesme iour d'Octobre Soufe & Mirande firent ce serment qu'on requeroit d'eux, au lieu & avec les ceremonies mentionnees, & en fut dressé acte signé de plusieurs tesmoins. Le lendemain en presencede Pierre de Far, des officiers de la chambre, de tous les gentilshömes de Goa, du Vicaire general & de tout le clergé, assëblez au conuët des Cordeliers, le gardien tenant son hostie en main, Sampaio estant à genoux dit à haute voix, Vous sauez que par deux & trois fois, du consentement de vous & de plusieurs autres, j'ay esté reconu & proclamé Viceroy des Indes en vertu des lettres du Roy mon Seigneur, lesquelles vous ont esté exhibees. Et pource que j'ay esté obei en ceste qualité, ie n'ay voulu entrer en voye de iustice pour le gouuernement avec Pierre Mascaregne, & ne m'y fusse point rangé, si ie n'apperceuois que Dieu & le Roy y font honnorer. Qu'au reste j'ay esté attiré par force à suiure ce moyen, & me soumettre à ceste necessité, ne pouuant trouuer autre remede. Ce pendant ie iure par ceste hostie sacree de faire ce qui a esté accordé, & qu'estât à Cananor ie quitteray l'autorité de Viceroy pour la consideratiö que chascün scait, protestât me preualoir en tēps & lieu de toutes les procedures passees: & promets de me rēdre cōme prisonnier en la galere d'Antoine Mirāde, & d'observer les articles que lui & Christofle de Soufe ont dresséz & accordez à Chaul, moyennant que l'hōneur du Conseruateur de la faculté demeure sauf, suiuant le compromis. Le capitaine de la citadelle, l'Auditeur general, les officiers de la chambre & autres personnes de qualité, presterent mesme serment: dont fut dressé acte par vn secretaire, & soussigné de tous. Tost apres Sampaio print la route de Cananor en grand appareil, & fut suiui le lendemain par Mirande & Soufe, lesquels arriuerent avec lui le sixiesme de Novembre, & prindrent terre incontinent pour aller vers Mascaregne en la citadelle, auquel ils monstrent les articles afin de iurer l'obseruation d'iceux, ce qu'il fit, declarant n'auoir autre desir que de voir l'Inde en repos: mais qu'il estoit fort offensé d'une lettre de Sampaio à Messie, en laquelle estoient nommez les iuges choisis pour la determination du proces, & qu'il auoit remarqué que frere Iean Daluin estoit du tout à la deuotion de Sampaio, pour beaucoup de raisons contenues en ceste lettre. Mirande & Soufe ayās veu la lettre conurent le dire de Mascaregne estre veritable, & lui promirent de rayer ce moins du nombre des Iuges & d'en establir vn autre. Or Mascaregne desiroit que Soufe fust du nombre, & pourtant le pria d'y entrer, puis que l'occasion se presentoit, mais il en fit refus, sachant que Sampaio lui en vouloit. Finalement, au lieu du moins Daluin ils esleurent cinq autres iuges, a scauoir Lopez d'Azeuede, Antoine Britio, Nonio de Blanc castel, Tristan de Ga, & Sebastian Percz vicaire general de l'Inde basse: ce

que Mirandetrouuabon encores qu'il eust donné vne promesse par escrit à Sampaio qu'il n'y auroit autres iuges que les sept premierement nommez. Neantmoins lui & Soufe y adiousterent ces cinq, avec serment de ne les reueler à personne iusques à ce qu'il en fust temps. Le lendemain Mascaregne, Menefez & autres officiers du Roy aüec plusieurs gētilshommes se trouuerēt au tēple de la citadelle, & en presence de tous, avec les ceremonies obseruees en Goa, Mascaregne promit d'observer de point en point les articles de la capitulatiō, declairāt qu'il n'auoit fait les poursuites & tenu les procedures passees, sinō d'autāt qu'il estoit assuré que le gouvernement lui appartenoit: accordant, au cas que Sampaio obtinst gain de cause, qu'on l'enuoyast prisonnier en Portugal pour y respondre de son fait. Les principaux de ceste assemblee prestērent aussi le serment, & fut le tout couché par escrit: apres quoy Mascaregne monta dans le gallion de Soufe. Il auint sur cela que Mirandes'estant remué de sa galere au gallion nommé sainct Denis, Sāpajo qui y estoit n'en voulut sortir, dont Mascaregne se plaignit à Soufe & à Mirande, disant que Sampaio ne gardoit pas la capitulation & ne se deportoit de la charge de Viceroy puis qu'il demeuroit en ce gallion, dans lequel estoient les plus grandes forces que le Roy de Portugal eust es Indes, & par le moyen desquelles il pouuoit combattre tout le reste de la flotte: dauantage qu'il auoit fait planter la banniere royale à la hune: que cela n'estoit pas se deporter du gouuernement & attēdre la sentence de iustice, ains se monstret Viceroy par effect: requerant qu'ils l'exhortassent de garder ce qu'il auoit promis, dont eux l'admōnesterent, mais icelui ne tint compte de leurs remonstrances. Les gentilshommes voyans vn tel orgueil commencerent à s'esmouuoir, & dire haut & clair que Sampaio rompoit la capitulation & son serment: brief ils l'accusoyent assez ouuertement d'estre vn seditieux & perjure. Soufe voyant qu'il y auoit dāger d'vn grand mal fit tant que Mascaregne & les autres laisserent faire Sāpajo. Apres que Mascaregne se fut embarqué, lon tira vn coup de double canon, & lors les gallions esquels estoient les deux comperiteurs (qui firēt de part & d'autre leurs protestations auant que venir en haute mer) se mirent à la voile, Mascaregne estant conduit par Soufe, & Sampaio par Mirande, tenans la route de Cochim, où ils arriuerent le quinziēme iour de Decembre. Incontinent Mirande alla trouver le conseruateur Messie, pour lui faire prester le serment comme aux autres. Mais il n'en voulut rien faire, disant Mirande n'auoir peu manier afaire de telle importance sans en communiquer avec lui, seconde personne es Indes apres le Viceroy, & menaça Mirande, Soufe & autres, de leur en faire rendre compte au conseil de Portugal. Mascaregne & les gentilshommes de sa suite voyans ceste nouuelle encloueure & les mauuaises pratiques cachees sous icelle, prierent Soufe & Mirande, puis que Messie faisoit le restif & descouuoir par trop son animosité, que le proces se iugeast à Coulam, à vne iournee pres de Cochim, afin d'obuiet à toutes menees. Soufe conoissant que Sampaio ne consentiroit iamais à cela (pource que Messie estoit sa seule esperance, lequel auoit fait des sollicitations & instances bien grādes de tous costez pour le main-

tenit, &

tenir, & le maintiendroient en ce dernier effort par tous moyens à lui possibles) & pour empêcher que ce proces ne se voidast à coups d'espee, moyēna tellement avec Mascaregne & les siens qu'ils accorderent que la sentence seroit dressée & prononcée en la ville de Cochim. Suiuāt cela lui & Mirande prindrent terre & entrerent au temple de saint Antoine pour nommer les iuges. Lors Soufe voulut que le moine Daluin fust osté du nombre, & qu'en son lieu fussent mis les cinq nommez ci deuant: à quoy Mirande s'opposa, à cause de l'escriit qu'il auoit baillé à Sampajo, auquel il en faloit rendre compte, & sauoir sa volonté. Sampajo entendant cela fut extrêmement despitē, tenant pour suspects les cinq iuges de renfort: tellement qu'il ne les voulut recevoir, disant auoir trop enduré, qu'il ne s'estonnoit pas trop que Mirande l'eust abusé & mené ainsi par le nez depuis Goa: qu'il estoit coupable de tout le mal, mais qu'il auoit ourdi ceste toile contre soy-mesmes. Adioustant outreplus que telles menées ne l'estonnoient point, pource que Mirande & tous les autres demeureroient prins en vn mesme piege, & qu'il allast leur aider à se perdre: que s'ils refusoient de tenir la capitulation, il ne vouloit aussi ni iuges ni iugement, & les combatroit tous avec son galliō de saint Denis, lors la fortune esleueroit le plus fort: que au reste Mirande demeureroit obligé à rēdre compte de tout, puis qu'il en estoit la cause. Mirande respōdit qu'il n'estoit trompeur ni moqueur, ains s'acquittoit de sa charge, & qu'en ce cas il estimoit estre bon seruiteur de Dieu & du Roy, auquel il seroit plainte des iniures & outrages de Sāpajo. Plusieurs autres propos fascheux & estranges furent lors iettez de part & d'autre, sans qu'on les peust bien remarquer à cause du bruit de ceux qui se mirēt entred'eux. Sur cela Mirāde sortit tout bouillāt de cholere, & s'en alla au galliō de Mascaregne, lequel ayāt entendu ce que dessus declia, puis que Sāpajo ne vouloit accepter les iuges nōmez par Soufe & Mirande, lesquels il aprouuoit de sa part, on deuoit suiuant la teneur des articles le recevoir pour Viceroy, sans autre consideration, requerāt que Soufe & Mirande le reconussent tel. Mirande ayant esgard à la capitulation, & encores indigné des paroles outrageuses de Sampajo, attira pres de soy autāt de vaisseaux qu'il put & les remit en la puissance de Mascaregne, asauoir la galere bastarde d'Hector de Sylueire, le bastean de Nonio de Blacastel, les deux carauelles de Vincent Pegade & de Jean de Sa, le gallion de Simon Melio lors absent, vne galliotte & quelque brigantin. Sampajo eut de reste trois gallions, nommez saint Denis, saint Louys & le Zamorin, item les deux galeres de Roderic Pereire & d'Antoine de Sylueire, outre plusieurs fustes qui estoient au port de Cochim, tellement qu'il estoit plus fort que Mascaregne. Neantmoins les vns & les autres commencerent à se disposer au combat, acomodans leur artillerie, pour se donner bataille, par l'obstination de Sampajo. Les soldats de Mascaregne crioient, guerre, guerre, disans que Mascaregne ne deuoit se monstrier ainsi double que Sampajo, & que la commodité se presentoit en ses mains pour chastier ceux qui lui auoyent fait tant de torts. Les Portugallois furēt lors sur le point de perdre tout ce qu'ils tenoyent es Indes: car la partie estoit forte, & si les vns fussent

venus aux mains contre les autres, il y eut eu vn terrible carnage, tellement que le victorieux fust demeuré si foible qu'il lui eust esté impossible de soustenir le choc du Roy de Calecut, lequel auoit vne puissante armee navale preste pour assaillir les Portugallois eschappez de leur bataille ciuile. Tous les autres Princes & Seigneurs Indiens tenoyent l'œil ouuert sur ceste flotte, afin de se remuer en temps propre, saisir les citadelles, & secouer entierement le ioug, s'asseurans à ce coup de nettoyer l'Inde basse de la domination estrangere. Ce qui fut infailliblement auenu, si ces mutineries eussent continué. Mais on estime que Mirande ayant mis de l'eau en son vin, & considerant que son escrit demeuré entre les mains de Sampaio estoit cause en partie de toute la tempeste, promit à Sampaio de s'employer pour luy en la vuidange du proces, eustât l'un des iuges d'iceluy. Quoy qu'il en soit, Sampaio changea incontinct d'aûs & accepta les onze iuges, apres quelques aduertissemens à lui donnez par Messie & autres. Son consentement signifié par toute la flotte, Mascaregne requit qu'il eust à changer de gallion, tellement que Mirande le fit remuer en vn autre vaisseau où il y auoit peu de gens, & le mit es mains d'Antoine de Sylueire son gendre. Mascaregne fut logé en vn autre sous la charge de Iacques de Sylueire, & ces deux capitaines iurerent de représenter les deux competeurs, quâd besoin seroit.

Iuges deleguez pour vider le proces de Sampaio & de Mascaregne.

Le lendemain, qui fut le dixneuuesme de Decébre, Christofle de Soufe, 17.
Antoine de Mirande, l'auditeur genetal & le secretaire des Indes, descendirent en terre, & allerent au conuēt de saint Antoine, où se trouuerent la plupart des Capitaines & gentilshommes habitans à Cochim, en presence desquels Soufe & Mirande nommerent les onze specifiez entre eux pour vider ce proces du gouuernement, lesquels presterent le serment, ensemble leur secretaire avec les ceremonies obseruees par les autres. Cela fait Mirande tira Soufe à part, & lui dit que pour fermer du tout la bouche à Sâpajo, si les iuges le condânoient, il seroit bõ d'adiouster aux onze le moine Daluin & Biage de Sylues. Du commencement Soufe en fit refus, sachant que ces deux portoyent mauuaise affection à Mascaregne, tellement qu'ils fauoriseroient Sâpajo. Apres assez lōgue contestation, Mirande le pria de ne craindre ces deux iuges, pource qu'en cōtrepois lui & Iean Deze tiendroyent bon pour Mascaregne, lequel auoit si bon droit de son costé que les iuges ne le lui pourroyēt oster. Que toute ceste ceremonie de iuges n'estoit que pour appaiser Sâpajo, afin qu'il ne luy semblast que de primfaut & de volonte absolue on le despouillast du gouuernement, pour en reuestir Mascaregne. Comme ils continuoyent leur dispute, suruint Iean Deze qui conferma le dire de Mirande, tellement que Soufe s'y accorda, sans en auertir Mascaregne ni autre, afin d'eûiter nouveau trouble, & voulant bien tost voir la fin de toutes ces querelles, sans considerer autrement l'esprit de Mirande, lequel auoit dressé ceste derniere partie par le mandement de Sampaio & de Messie, ausquels il s'estoit trop engagé. Ces deux nouueaux iuges ayans presté le serment, Messie promit aussi solennellement obseruer la sentēce des iuges : mais au prealable il pourueut en toutes sortes à la feutré

reté de sa vie, de son hōneur & de ses biens, au cas que Mascaregne fust Viceroy, & s'en fit bailler acte soussigné de tous les principaux de parti & d'autre. Tout ce que dessus expédié, les treize iuges commanderēt à Soufe de se retirer, & Mirande entre autres iustifia fort là dessus, tellement que les contestations furent si aigres que les officiers de Cochim y accoururent par le commandement de Messie, afin de chasser Soufe, lequel s'en alloit voyant sa presence ne servir de rien. Et lors il couut les fautes qu'il auoit commises en ceste procedure, que Mirade l'auoit affiné, que la pluspart des iuges, nōmément les deux derniers, estoient formellement contre Mascaregne: tellement qu'à l'entree de son logis, il dit à ses gens, Or sus troussons bagage & deslogeons, puis que tout est perdu. Il ne dit autre chose, & s'embarqua sur le soir, voyāt desia ce qui auint incōtinent apres. Le lendemain les iuges & leur secretaire s'assemblerent à part pour vacquer à la voidance du proces, & lors comparurent Vasque Deze & Simon Caier procureurs des parties, qui leur fournirent les lettres, actes & auertissemens de leurs droits, puis se retirerēt. Les officiers de la chambre de Cochim presenterēt incōtinent vne requeste au nom de toute la ville, à ce que sentence fust donnee au prouffit de Sampajo, pource que si Mascaregne demeroit Viceroy les habitans estoient deliberez de quitter leurs maisons, & aller demeurer parmi les Mores, plustost que se soumettre à la merci de leur ennemi capital auxquels ils ne se fieroyent iamais, quelque promesse qu'il peust faire pour les asseurer. Le conseruateur Messie, ayant fait ceste ouuerture par les officiers de la chambre, poursuiuit, & presenta de sa part des articles aux iuges par lesquels il chargeoit Mascaregne d'estre vindicatif, d'auoir menacé de mort ceux de Cochim, de s'estre iniquemēt porté es affaires de police & de iustice en Malaca, d'auoir protesté de casser de leurs estats les principaux officiers, d'estre fauteur & protecteur de meurtriers, larrons & mutins, de fauoriser à plusieurs Seigneurs & capitaines coupables du crime de peculat, lesquels aussi tenoyent son parti, afin de ne venir iamais à compte, & faire grand chere des deniers qu'ils deuoyent au Roy, si Mascaregne deuenoit gouverneur. Il le chargeoit aussi d'auoir relasché des prisonniers redeuables de grandes sommes, & d'estre cause que le Roy estoit demeuré en arriere de plus de trois cens mille ducats, & n'auoir argent ni marchandises. Pour conclusion il protestoit de quitter le seruice du Roy & se retirer hors de l'Inde, & d'auoir recours contre eux de tous ses despens, dommages & interets, en cas qu'ils iugeassent pour Mascaregne: d'autant que ce seroit faire tout ouuertement la guerre au Roy d'establir ce personnage son lieutenant es Indes. Pierre de Far capitaine de la citadelle de Goa fit vne autre remonstrance par escrit de mesme substance, & fut suivi de Jean Soire Auditeur general des Indes. Mesmes toute la nuit du premier iour que les iuges entrerent en conference, tous les habitans de Cochim allerent nus pieds en procession, avec leurs femmes & petis enfans, prians Dieu qu'il inspirast au cœur des iuges de debouter Mascaregne, pour la peur qu'ils auoyent d'estre chastiez, & cryoyent à chasque pas misericorde, tellement que c'estoit horreur & pitié d'ouir ce bruit. Quant à Mascaregne, personne

ne parla ni interceda pour lui, & ne fut son procureur appellé pour répondre aux charges de Messie, & proposer contre Sampajo beaucoup de maluerfations, desquelles nul ne le pouuoit iustifier. Ce ne fut d'oc pas de merueilles si le bon droit, sur lequel il demeueroit appuyé, fut rédu inutile par la mauuaise cause debatue avec tant d'artifices.

*Sentence des
iuges deleguez,
au prouis de
Sampaio: ce
qu'il fit apres
auoir esté con-
fermé au gou-
uernement, &
le retour de
Mascaregne
en Portugal.*

APRES que les iuges eurent employé quelque temps à fueilletter les 18. pieces produites de part & d'autre, chascun d'eux escriuiit & signa son auis en vn papier à part. Ces auis furent leus par le secretaire, & fut trouué que Sampajo auoit beaucoup plus de voix, tellemēt que d'un commun accord ils lui adiugerent le gouuernement, par vne sentēce donnee le vingtyvniesme de Decembre mil cinq cens vingtssept, d'or la teneur fut telle. Nous iuges ayās veu les actes, & ce qui a esté mis par deuers nous, ensemble les auis de chascun de nous patticulierement, disons par nostre ceste sentēce definitive, que le gouuernemēt demeure à Lopez de Sāpajo, lequel d'ores en auāt sera Viceroy des Indes: que Pierre Mascaregne s'en aille à la bonne heure au royaume de Portugal avec vaisseaux & equippage selon sa qualite, laissant à la volonte du Roy nostre Sire d'adiuger à chascun d'eux tel salaire que bon lui semblera, & autres choses qu'ils voudroyent pretendre en ses pays. Ceste sentence fut portee le mesme iour par Antoine Mirāde, Jean Deze, Biage de Sylues, & Tristan de Ga, embarquez en vn brigatin, à Mascaregne, les amis duquel estimoyent qu'on eust iugé en sa faueur. Mais ils furent extremement indignez oyans la lecture d'icelle: au contraire Mascaregne l'escouta paisiblement sans changer de contenance ni couleur de visage, ni dire parole autre que de seigneur sage & d'esprit bien rassis. Il demeura en son vaisseau iusques à ce qu'on lui eust fourni ce qui lui estoit necessaire pour son voyage. Sampajo fut ioyeux, comme lon peut presumer, de la lecture de son arrest, & remercia fort les iuges, demandant, avec contenance vn peu trop seruile, pardon à Mirāde de toutes les querelles passees. Or pource qu'il estoit desia tard il ne descendit pas en terre ce soir: ce pendant on fit des feux de ioye de tous costez, & deschargea-on tout l'artillerie. Les partisans de Mascaregne estoient en grand doute, craignans que Sampajo ne les recherchaſt à l'auenir. Lui au contraire se voulant fortifier & auoir tant plus de seruiteurs, le lendemain auant que gaigner le riuage, entra en vn petit basteau, courut au long de toute la flotte, & fit en chascun vaisseau vne petite harāgue, en laquelle il prioit les capitaines & soldats de se resiouir avec lui, & s'asseoir qu'il leur estoit ami à tous en general & à chascun en particulier, qu'il reconoiſtroit leurs seruitices, & en auertiroit le Roy, les priant de lui porter affection. Il declaira aussi auoir en tresbonne reputation tous les partisans de Mascaregne, & croire qu'ils n'auoyent rien fait que selon leur cōscience, & leur en sauoir aussi bon gré que s'ils eussent tenu son parti: adioustant que tout le passé demeueroit comme non auenu, & les prioit de faire bon deuoir à l'auenir pour le seruice du Roy. Ces propos de Sampaio asseurerēt tous ceux de la flotte, qui descēdirent apres lui, & fut receu en la ville avec grandes solleñnitez, puis conduit en la citadelle, où il deuoit loger. Estant là il deuſa patticulierement avec les gentilshommes

mes amis de Mascaregne, & leur fittant de promesses qu'ils demeurèrent en Inde. Tost apres il voulut se mettre en mer pour aller au deuant des Turcs: mais son conseil fut d'auis d'attendre que son gouuernement fust plus asseuré, & que son armee fust encores en meilleure e quippage. Pourtāt se contenta il pour lors d'enuoyer l' Amiral avec six gallions, vne galere basse, deux galliotes, & cinq brigātins en la coste de Calecut: item Simon Melio avec vne fregate & vne carauelle es isles de Maldiuar. Au mesme temps, asauoir sur la fin del'annee furent acheuees de charger quatre nauires pour venir en Portugal. Mascaregne entra en l'vne d'icelles sous la garde d'Antoine Britio, & fut suiui de plusieurs gentilshommes & autres siens amis. Auant que haussier les voiles il fit adiourner Sampajo à comparoir deuant le Roy de Portugal & son conseil, auquel il appelloit de la sentence donnee par les iuges de Cochim touchant le gouuernement des Indes: & outreplus il l'auertit que les Espagnols estoient en l'isle de Tidore, afin que Sampajo enuoyast secours à George de Meneséz, lequel y cōmandoit de par le Roy. Ceste flotte de quatre nauires arriuee en Portugal, Mascaregne fut gracieusement recueilli du Roy, lequel se monstra fāché des procedures & de la sentence susmentionnee. De fait il ordonna tost apres vn autre Viceroy au lieu de Sampajo, lequel estant de retour en Portugal ne fut gueres bien reconu, & Mascaregne le poursuiuit si roidement deuant le conseil du Roy, que Sampajo fut cōdamné à lui payer tous ses despens, dommages & interests, & les gages de l'estat de Viceroy pour tout le temps que Mascaregne eust exercé ceste charge, ascauoir l'espace de trois ans. Et quant à Messie & autres qui s'estoyēt tout ouuertement bandez contre Mascaregne, ils ne furent pas mieux recompensez que Sampajo, lequel ils auoyent soustenu par vne animosité trop apparente.

FIN DV DIXSEPTIESME LIVRE.



K K ij



LE DIXHVITIÈSME LIVRE.

SOMMAIRE.

1. *Estât des Moluques & ce que George de Menefez y fit à l'entree de son gouvernement.*
2. *Garsie Henriquez emprisonné par le commandement de Menefez: son eslargissement & leur reconciliation.*
3. *Pratiques contre George de Menefez, lequel Garsie fait enfermer & mettre en prison: ce qui auint de part & d'autre durâs ceste captivité iusques apres la deliurance de Menefez.*
4. *Portugallois desfaits par les Mores de Longu, d'où s'ils se vengerent depuis.*
5. *Les premiers exploits de Sampaio depuis qu'il fut déclaré Viceroy, & la victoire qu'un de ses lieutenans obtint contre les Calecutiens.*
6. *Nauvargio de Pierre de Far à Malaca, de Simon de Souze aux Moluques, & de Christofle Médoze à Ormus.*
7. *Courtes & exploits d'Antoine de Mirāde Amiral des Indes.*
8. *Prise de Iniques de Mezquite & d'autres Portugallois pressés & tourmentez, pour abuser le Christiañisme.*
9. *Rencontre de la flotte de Din & du gallien de Héri de Macedé.*
10. *Voyage par terre depuis Ormus iusques en Portugal fait par Antoine Ternier.*
11. *Ce qui auint entre Gonsalves d'Azevede & Garsie Henriquez, en l'isle de Rindan.*
12. *Alvarez Salsuadre capitaine Espagnol desfaits les Portugallois et Moluques & enuaine leur galliote.*
13. *Gonsalves d'Azevede fait voile en l'isle de Ternate, & ce qu'il negocia pour accorder les Espagnols & Portugallois ensemble.*
14. *Pratiques des Espagnols & Portugallois et Moluques pour s'entretenir en guerre.*
15. *Nauigation de Martin Alfonso Melo à Zuan de ses traverses & auantures estranges, & son retour en l'Inde basse.*
16. *Arrivée de Simi de Souze pres de Dachei, où il est desfaict & tué avec la plupart de ses gens.*
17. *Retraite de Garsie Henriquez à Malaca, & ce qu'il y fut traité.*
18. *Ce qui auint entre le Roy de Dneden & Pierre de Far gouverneur de Malaca.*
19. *Nemo de Cugne estien Viceroy des Indes son embarquement pour y aller, & ses auantures durant la nauigation.*
20. *Mombaze prise par Nemo de Cugne, où son armee passe l'hiver.*
21. *Ordre donné aux affaires de Gon par Lopez de Sampaio, & le naufrage de sa flotte en la coste de Calecut.*
22. *Courtes & victoires de Sampaio en ceste mesme coüte.*
23. *Deliberation de Sampaio pour s'emparer de Diur la victoire qu'il gagna sur l'armee navale du Roy de Cambaie, & ce qu'il fit puis apres.*
24. *Flotte de Calecut desfaite par Antoine de Mirande & Christofle Melo.*
25. *Guerre d'Heitor de Syluene au royaume de Cambaie.*
26. *Estât des Moluques & de Malaca au cōmencement de l'an mil cinq cens vingteuf.*
27. *Nouveaux efforts du Roy de Dachen contre les Portugallois, & ce qui s'en ensuiuit.*
28. *Arrivée de Nemo de Cugne au port d'Ormus, & l'emprisonnement de Raix Xerof.*
29. *Nauigation de Simon de Cugne à Baharen en la coste d'Arabie, où il est desfaict.*
30. *Ordre donné aux affaires de l'Inde basse par Sampaio, lequel reuint en Portugal, & Nemo de Cugne prend possession du gouvernement des Indes.*

Estât des Moluques, & ce que George de Menefez y fit à l'entree de son gouvernement.



GEORGE de Menefez, enuoyé de Malaca par Mascaregne pour gouverner les Moluques, fut contraint hyuerner es isles de Papue, comme dit a esté ci deuant. Or si tost que la nauigation se monstra cōmode il cingla vers l'isle de Ternate, & y estant arriué au mois de May de l'an mil cinq cēs vingtsept, entendit que les Portugallois estoient en guerre contre les Espagnols assistez des Insulaires de Tidore & de Gilolo: ce qui le

le mit en grand peine, pource que ses gens pour la pluspart estoient morts durant l'hiver, & les suruiuans auoyēt besoin de repos. Il laissa en mer deux vaisseaux bien armez, & entra dans quelques esquifs pour approcher de la citadelle. Incontinent Garfie Henriquez acourut au deuant, bien ioyeux qu'on le vinst desgager tant à propos du peril où il estoit, n'ayant gens ni moyens pour resister aux ennemis: & tout soudain remit la place es mains de Menefez, telle que Brittio l'auoit laissée, dont il eut acte par main de notaire. Martin Igniguez capitaine des Espagnols, entendant la venue de Menefez, l'enuoya bienueignier, & lui offrit paix & amitié, se plaignant fort de Garfie lequel n'auoit iamais voulu demeurer en bon mesnage avec les Espagnols, ains estoit cause de la perte de leur nauire, auoit tué vn des leurs & blessé trois autres. Menefez le remercia, promettant de demeurer ami: toutesfois il excusoit Garfie, & prioit Igniguez qu'il monstrast ceste amitié par effect, en se retirant du milieu des infideles pour venir loger en la citadelle de Ternate, où il seroit receu & accomodé à son contentement. Pource qu'il ne fit point de responce, Menefez lui enuoya vn escrit au commencement de Iuin, par lequel Igniguez & les siens estoient sommez de sortir promptemēt du pays & de toutes les isles Molucques, avec defenses d'y acheter aucune sorte d'espiceries. Igniguez renuoya vn escrit, par lequel il faisoit la mesme sommation à tous les Portugallois: & depuis ils perdirent du temps & beaucoup de papier apres telles contestatiōs, au bout desquelles ils accorderent vne trefue, iusques à ce que lon eust mandemēt d'Espagne ou de l'Inde, de ce que les vns & les autres auoyent à faire. Incontinēt les Portugallois & Espagnols commencerent à conuerfer & negocier paisiblement ensemble, les capitaines enuoyans des singularitez & presens les vns aux autres. Neantmoins Igniguez fut destourné d'entrer en la citadelle de Ternate par le Roy de Gilolo & Cachil d'Aroes, qui estoient contens que les affaires demeurassent en suspens, afin de se maintenir, ce qu'ils ne pouuoient si aisément faire en temps de paix. Depuis cela Menefez osta la chastellenie de la citadelle à Manuel Faucon, & en pourueut Simon de Vere par le commandement de Mascaregne, dont Faucon faignit estre content, mais il en garda vne haine en son cœur, laquelle il descouurit d'estrange façon puis apres. Au reste, Messie cōseruateur de la faculté royale es Indes auoit enuoyé des lettres par lesquelles il commandoit au facteur des Molucques d'achepter pour le Roy toutes les espiceries qui s'y pourroyent trouuer, & charger le plus de vaisseaux que lon trouueroit & les enuoyer à Cochim: que ce qui resteroit fust vëdu aux marchans demeurans en la citadelle, au plus haut pris que possible seroit, & que l'argēt seruiſt pour payer les officiers du Roy, souldoyer les gens de guerre, & acheter viures, afin que le Roy fust soulagé des grandes despenſes qu'il estoit cōtraint faire à raison de ceste citadelle: & sur tout qu'on auisast que l'achept se fist sans offenser les Mores & Portugallois de Ternate. Menefez fit publier ce mandement, à quoy les Portugallois delibererent s'opposer, & pour cest effect s'allierent avec Cachil Daroes, lequel leur tendit la main, estant bien aise de voir les Portugallois en nouueaux troubles, afin qu'ils eussent a-

faire de lui. Il déclara donc puis que les Insulaires estoient forclos de vendre leur marchandise au plus offrant, & quand bon leur sembloit, qu'aussi pour l'auenir ils ne vendroyent plus de viures pour l'entretien du gouverneur & de ses gens, & defendit aux Insulaires ceste vente: à l'occasion dequoy Menefez fut contraint se deporter, ne pouuant faire mieux, tellement que l'auarice des particuliers ietta le Roy en des despences excessiues. Apres cela suruint vne autre difficulté dont s'ensuiuirent de grands maux. Lors que Menefez partit de Malaca il eut charge de Mascaregne de renvoyer Garfie par la route de Burneo, dont il l'auertit comme icelui faisoit ses apprests pour partir. Garfie & quelques autres proposerēt tant d'excuses que Menefez fut content d'enuoyer quelque autre descouurir ceste route: ce que Garfie empescha de rechef, craignant quelque reproche à l'auenir, & là dessus y eut commencement de querelle & de soupçon entre eux, lequel se descouurit tost apres. Ce pendant Vasque Laurent fut enuoyé au lieu de Garfie par la voye de Burneo, où estant arriué il eut acces au Roy par le moyen d'Alfonse Perez, & demanda pour les Portugallois licence de trafiquer en l'isle. En faisant ceste requeste il presenta au Roy vne tresriche tapisserie, en laquelle estoit viuement representé le mariage du Roy d'Angleterre avec la tante de l'Empereur. Celui de Burneo demanda l'interpretation des figures, & entendant que c'estoit vn Roy couronné que celui d'Angleterre, soupçonna que les Portugallois voulussent lui iouer quelque meschant tour, & que par art magique ils donneroyent vie à ceste figure & aux autres, & tueroient lui & ses gens, pour prendre possession de son royaume: ce qui le troubla tellement qu'il fit emporter vistement ceste tapisserie, & eust mal traité les Portugallois, sans Alfonse Perez & quelques marchans Mores qui lui dirent la verité du fait. Neantmoins il leur commanda de sortir de l'isle. Alfonse Perez ne voulant s'envelopper en la guerre qu'il preuoyoit es Molucques, ne tint compte d'y retourner, ains print la route de Malaca, menant Vasque avec soy, lequel renuoya sa coracore es Molucques, avec auertissement à Menefez de ce qu'il auoit fait en l'isle de Burneo.

Emprisonnement de Garfie: Henriquez & ce qui s'en ensuiuit.

LORS que ceste coracore arriua, le Roy de Gilolo commençoit à faire guerre à Menefez, pource qu'il delayoit d'entrer en la trefue faite avec le Roy de Tidore, & faisoit quelques courses iusques en l'isle de Ternate: comme au contraire Cachil Daroes menoit ses troupes à Gilolo, & se nuisoyent ainsi de part & d'autre. Sur ces entrefaites Martin Igniguez vint à mourir, auquel succeda Fernad de la Tour: ce qu'entendant Menefez il enuoya gratifier Fernad & scauoirs'il vouloit entretenir la trefue faite entre lui & Igniguez, ce que Fernand refusa, tellement que les armes furent leuees de tous costez. Or pource que Fernand n'auoit aucun vaisseau de rame, il fit charpenter vne galliotte pour assaillir plus hardimēt les Portugallois: ce qui fut rapporté à Menefez, lequel tout à l'heure commanda qu'on en fist vne autre pour ses gēs, & pour cest effect arresta & mit en besongne tous les charpentiers que lon pūt trouuer en terre, quoy qu'ils fussent occupez à d'autres besongnes, mesmes ceux qui trauiilloyēt apres le basteau de Garfie, ceste

ste galliotte requerât prôpte despesche, pour faire teste aux Espagnols. Garfie auerti que sa besongne demeuroit à faire, sans cōsiderer pourquoy, courut vers la mer où Menefez regardoit ses ouuriers, & se plaignit en grande cholere de ce qu'on lui auoit fait. Menefez respond qu'il ne pouuoit faire de moins, les affaires du Roy le requerans ainsi : & pource que Garfie insistoit que lō ne deuoit ainsi emmener ses ouuriers, & Menefez soustenoit le cōtraire, ils s'eschaufferēt tellemēt que Menefez ayāt lasché quelques mots iniurieux & vſé de menaces, Garfie repliqua, Quittez vostre capitainerie pour ceste heure, & ie vous fetay sentir que ie suis meilleur gentilhōme & cheualier que vous. Disant cela il met la main à l'espee: mais tāt de gens accoururēt de tous costez, qu'il n'y eut cōbat que de paroles fâcheuses & picquātes. Garfie se retira en son logis avec ses partisans, qui l'estimoyēt beaucoup d'auoir ainsi braué Menefez, auquel plusieurs autres remōstroiyēt qu'il ne deuoit laisser telle rebellion impunie, ains faloit empoigner cest outrecuidé, pour l'en faire repentir. Manuel Faucon versoit de l'huile sur ce feu, voulāt mal de mort à Menefez & à Garfie, & desiroit les voir aux prinſes ensemble, s'assurāt qu'ils s'entruineroyēt. Menefez croyant ce cōseil enioignit à Thomas Nuguez de Fōsecque son Auditeur de saisir Garfie & ses adherās, qui ne voulurēt pas obeir à l'Auditeur. Alors Menefez fit soner le tocsain de la citadelle, tellemēt que tous ceux de l'isle cōmēcēt à venir vers lui, offrant lui aider à se faire obeir. Incōtinent Simon de Vere chastellain maior est enuoyé sommer Garfie & les siens de se venir rēdre prisonniers en la citadelle, autrement on les iroit querir en plus grande cōmpagnie. Garfie ayant respondu encores plus audacieusement qu'à l'Auditeur, Menefez fit braquer quelques canons contre la maison d'icelui, pour la renuerser: puis renuoya le chastellain pour la derniere fois, ensemble Tristan de Veire ami de Garfie, afin de l'amener à raison. Apres plusieurs remōstrances, Garfies'en alla seul en la citadelle, & ayant promis attendre resolution de iustice sur ce qui estoit passé, demeura prisonnier au logis d'Antoine Brittio, & commença-on à former son proces. Mais d'autre part ses amis sollicitèrent pour lui, entre autres Cachil Daroes, le facteur du Roy & autres des principaux: mais ils ne gaagnerent rien, Menefez alleguant tousiours qu'il vouloit que le conseil de Portugal fust auerti de tout, & enuoyeroit Garfie au Viceroy des Indes. Mesmes d'autant qu'il y auoit apparence qu'on le tiroit de ceste maison, en laquelle il estoit detenu sous promesse de se représenter, Menefez le fit enfermer & ferrer en la grosse tour de la citadelle, où il demeura huit iours, ayant esté prisonnier en la maison l'espace de trois semaines. Ceux qui soustenoient sa querelle, estans au nombre de cinquante, complotterent de le deliurer, & communiquerent leur entreprise à Cachil qui promit s'y employer: mais ils ne peurēt rien executer, pource qu'il y auoit grosse garde de iour & de nuit en la citadelle. Se voyans frustrez de ce costé, ils conclurent se ranger en vn lieu, d'où ils enuoyeroient sommer Menefez de relascher Garfie, & qu'en cas de refus ils se rendroient aux Espagnols, & leur persuaderoyent de courir sus à Menefez, tous les moyens duquel ils descouuriroyent à ses ennemis. Auant que rien executer ils vſe-

rent d'un tour de finesse, faïsans descouvrir leur ligue par l'entremise d'un soldat Castillan à Francisque Baldaje, lequel l'alla incontinent declairer à Menefez. Il falut lors entrer en nouvelle resolution, & pource que Menefez vouloit emprisonner les principaux de ces cinquante, Baldaje & Simon de Vere lui remonstrent le danger qu'il y auroit de garder tant de prisonniers l'espace de quatre ou cinq mois, auant la fin desquels on ne pouuoit nauiguer en Malaca: que ce pendant ils trouueroient moyen de sortir & feroient quelque desordre: pourtant lui conseilloyent d'elargir Garfie, & s'exempter de tous ces hazards, adioustans d'autres inductions ausquelles Menefez consentit, & fit mettre Garfie en liberté, à condition de ne lui estre ennemi ni prendre le parti des Espagnols, & que Menefez deschireroit les informations prinſes & autres actes dressez contre Garfie, lequel promit obseruer ce qu'on requeroit de lui. De là en auant ils furent grâds amis, & hantoyent fort priuément ensemble, autât que si iamais ils n'eussent esté en querelle l'un contre l'autre.

Pratiques contre Menefez, lequel est enſerré & mis en prison estroit: & ce qui a uins de part & d'autre durant ceste captiuité iusques apres l'elargissement de Menefez.

C'EST E hantise desplaisoit fort aux partisans de Garfie, lesquels craignoient qu'on ne les retinst aux Molucques pour resister aux Espagnols, & que Garfie ne les laissast à Menefez pour s'en seruir. Preuoyans donc que le seul moyen de se tirer loin des coups, estoit de rendre ennemis ces deux Seigneurs, afin que sous couleur de soutenir Garfie ils s'embarquassent avec lui, ils commencerent à ietter des propos à la traïuerſe à quelques vns de la citadelle, disans que Menefez n'estoit gueres bien auisê de se fier ainsi à un ennemi reconcilié, qui attendoit l'occalion de faire receuoir à Menefez la plus grande honte du monde. D'autrepart ils alloient soufflant aux oreilles de Garfie de telle sorte qu'ils l'induisirent à demander congé tant pour soy que pour eux: à quoy Menefez fit si honneste respôse que Garfie s'en contenta. Toutesfois ces calomniateurs le cheualerent tellement qu'ils lui persuaderent de ne dependre pas ainsi de la discretion de sa partie: & que s'il souffroit qu'eux le suiussent ordinairement, Menefez ne seroit pas si roide, ains accorderoit le congé qu'on lui auoit demandé. Garfie pensant se faire suivre, se laissa beffler par telles gens qui marchoyent autour de lui les espees aux costez: à quoy Menefez ne prit garde, tant il s'estoit revni avec Garfie. Les flatteurs craignans la touche, & que Menefez leur ressemblassent, c'est ascauoir qu'il faignist ne demander que leur commodité, attendant que Garfie s'embarquast pour les retenir & se venger d'eux: deliberrêt ne cesser qu'ils n'eussent ouuert la vieille playe, que la recôciliation, la hantise & le temps auoyent si dextrement fermee. Pourtant tascherent ils d'imprimer en l'entendement de Menefez que Garfie auertissoit les Espagnols & Tidoriens de tout ce qui se faisoit en la citadelle, & par dessous main incitoit ceux de Ternate à faire la guerre aux Portugallois. Aussi pour y prouoquer les Insulaires, ces boutefeux faisoient ietter de la poison dâs les puits, & enuoyoyêt de nuit les plus desbauchez de leur troupe par les loges de Ternate, où ils paillardoyent avec les femmes & filles du pays, ausquelles ils disoyent que Menefez leur commandoit faire telle violêce. Les insulaires despitez d'un si indigne traitement se retiroient de Ternate

en autres lieux: ce pendant les calomniateurs disoyent que tout le desir de ces insulaires estoit de massacrer Menefez & tous les siens, afin de rallumer la guerre par quelque bout que ce fust. Mais d'autant que le feu ne prenoit pas assez tost à leur gré, & pour trouuer moyen de couper la gorge à Menefez & au Roy de Bachian grand ami des Portugallois, lequel estoit lors en l'isle de Ternate avec deux cens hommes, vn soir Tristan Vieire, Alphonse Gentil, Louys Dias, & autres de la suite de Garfie, allerent au quartier de ce Roy, tuerēt quatre de ses seruiteurs, & en blefserent quelques autres, qui pensoyent estre en terre d'amis. Ce meurtre executé, Vieire & ses compaignons se retirerent sans auoir esté descouuerts: & le lendemain, ainsi que le Roy en alloit faire sa plainte à Menefez, les meurtriers, qui l'attendoient expressément, le preuindrent, & faignans entendre qui le menoit, dirent que c'estoit peine perdue à lui, d'autant que Menefez auoit commadé ce meurtre, duquel par consequēt il ne faisoit attendre aucune iustice: alleguās que Menefez auoit voulu veger la mort de son frere Tristan tué en l'isle de Bachian, avec perte d'un vaisseau chargé d'espiceries. Le Roy, croyant ce faux rapport, ne passa plus auant, & depuis ne voulut entrer en la citadelle, mesmes estoit sur le point de faire souleuer tous les insulaires des Molucques: mais il auint que Menefez descourrit la source de ce mescontentement, & en esclaireit le cœur de ce Roy qui en fut satisfait: puis fit prendre informations du cas, les auteurs duquel estans descouuerts s'enfuirent en des forêts espais, où ils demeurerent cachez pour quelque temps, & l'amitié entre le Roy de Bachian & Menefez se renoia cōme deuant. Apres quelques autres menées, ces faux rapporteurs semerent vn bruit que Menefez vouloit faire tuer Garfie, & subornerent vn More, nommé Michel Nugnez, vaillant homme, que Menefez auoit amené de Malaca, lequel dit, comme par grād secret, au facteur de la citadelle, que Menefez luy auoit commadé de despescher Garfie: ce qui lui sembloit tāt desraisonnable qu'il aimoit mieux se rendre aux Espagnols que commettre tel acte. Du cōmencement le facteur vouloit que Michel en auertist Garfie, ce qu'il refusa faire, protestāt toutesfois qu'il n'excuteroit nullement vne si meschante cōmission: & pource qu'il faignoit vouloir prendre parti avec les Espagnols le facteur le retint, avec promesses de le faire embarquer avec Garfie. Le facteur ayant considéré de plus pres ce fait, delibera le descourir: mais au lieu d'en parler à Menefez il s'adresse à Garfie, le suppliāt de tenir la chose en son esprit, sans la communiquer à personne pour lors. Garfie ayant oui ce rapport, en creut quelque chose, remercia grādement le facteur, & lui dit qu'il ne pouoit moins faire que de s'en descourir à certains de ses meilleurs amis: ce que le facteur ne trouua pas mauuais, priant neantmoins Garfie de ne faire grand estat d'un tel bruit qui pouoit estre plustost faux que vray. Mais Garfie s'en alla incōtinent communiquer avec les auteurs de ceste menée, lesquels lui conseillerent de couper la gorge à Menefez: dōt Manuel Faucon, qui estoit en la cōpagnie, ne fut nullement d'avis, remonstrant les dangereuses consequences d'un tel fait, & qu'il suffiroit se saisir dextremement de la personne de Menefez, former proces contre lui, & l'enuoyer pieds &

poings liez au gouuerneur de Malaca. Garfie considerant que s'il faisoit tuer Menefez, la charge des Molucques & la guerre des Espagnols lui deueniroit sur les bras, à laquelle il ne pourroit fournir, attendu mesmes que les partisans de Menefez pourroyent lui donner de grâdes traueses, & véger cét fois sur lui ce meurtre si mal fondé, suiuit l'avis de Fauco, auquel cependant il delibera deslors iouer vne trouffe, ascauoir le laisser capitaine en la citadelle de Ternate : concludant de sa part suiure Menefez à Malaca. Or ayas arresté de faire ceste capture, premierement ils trouuerent moyen de faire que Menefez enuoyast la pluspart de ses forces en l'isle de Machian avec Cachil Daroes : au contraire tous ceux qui soustenoyent Garfie demurerent. En apres, Francisque de Castrel l'un des cōiurez iauita Simon de Vere chastellain & autres officiers de la citadelle à vn banquet appresté à vne lieue loin de là, afin que Menefez n'eust gens pour se defendre. Ils allerent donc à ce banquet vn Dimanche, laissant Menefez presque seul : & comme il acheuoit de dîner, Manuel Faucon & Jacques de la Roque furent enuoyez par Garfie pour l'entretenir au ieu de tables. Durant leur ieu, Manuel Botel, Tristan Vieire & Alfonse Gentil (qui auoyent obtenu grace de leur crime) Francisque Perez, Jean Figueride, Andre Palaz, Francisque de Soto & autres de la faction de Garfie, ayans chascun sa commission, l'un pour fermer la porte, l'autre pour la garder, quelques vns pour mener les domestiques de Menefez pourmener hors de la citadelle, les autres pour se tenir pres de ceux qui demeureroient afin de les empescher de secourir leur maistre, entrerent dedans la citadelle, & furent suiuis de Garfie environ les deux heures apres midi, sans contredit de personne : tellement que Garfie venu dedans la grosse tour où estoit Menefez, la porte fut fermee incontinent, & Menefez ayant salué Garfie le fit seoir. Garfie le voyant entêté au ieu, se leue & le saisit fermement par derriere, disant ces mots, Vous estes prisonnier. Incontinent Manuel Faucon & plusieurs autres se ruèrent sur Menefez : quelques vns empoignerent deux seruiteurs restez pres de lui, leur estouppans la bouche de peur qu'ils criaissent à l'aide. Menefez voyant que ce n'estoit pas ieu commence à crier trahison, trahison : auquel cri son page courut sonner la cloche de la garde. Garfie & les autres luttèrent assez longuement, & eurent beaucoup de peine à ietter Menefez par terre pour l'enfermer : car il estoit grand & vigoureux, & le despit lui accroissoit le courage, tellement qu'avec les bras, les pieds & les dents il leur donna tant d'affaires, que s'ils l'eussent laissé aller, & qu'il eust loisir d'auoir quelques armes, ils eussent esté contrains s'enfuir. Mais estans dix ou douze sur lui, ils lui attacherent finalement vne grosse chaine de fer aux pieds, souffrās toutes les iniures qu'il vomissoit cōtre eux, leur disant, Traistres, tuez moy, & ne m'enchainez point. Cela fait, ils l'enfermerent en vne chambrette basse, d'où ils le temuerent puis apres en vn cachot sous la citadelle. Balthazar Roderic qui estoit le facteur, & par son indiscretion auoit reduit Menefez à ceste extremité, oyant le son de la cloche acourut avec plusieurs autres vers la citadelle laquelle ils trouuerent fermee. Incontinent Garfie se presenta sur la muraille & fit vn long discours pour iustifier son fait, alleguant que pour
preuenir

preuenir Menefez il l'auoit ferré prisonnier, & l'enuoyeroit en Inde avec son proces, protestant au reste de vouloir demeurer bon seruiteur du Roy de Portugal. Le faeteur reconnoissant lors sa lourde faute tascha de la radouber, en conseillant Garfie de ne proceder pas si rudemēt: mais il ne gaigna riē & fut cōtraint se retirer avec les autres. Or tandis qu'ils parlementoyēt ensemble vn nōmé Aluarez du Cay, seruiteur de Menefez, gisant malade, ouit le tumulte & conoissant le tort qu'on faisoit à son maistre se leua courageusement du liēt, & ferma la porte de la grosse tour à Garfie & à ses gēs, puis s'appuyant à l'vne des fenestres se print à crier de toute sa force, Ceste forterelle appartient au Roy nostre Sire, Dom George de Menefez en est capitaine maugré Garfie Henriquez. Lors Garfie & les siens coururent là, eschellerent la tour, battirent outrageusement ce malade, & le jetterent de la fenestre en l'estage de dessous: puis firent s'anter du haut des murailles en terre le page qui auoit sonné la cloche. Sur ces entrefaites arriuerent Simon de Vere & les autres banquetteurs, qui extremement cholerez d'vn si cher escot ramassèrent autant de gens qu'ils peurent, & tous ensemble approcherent de la citadelle pour enfoncer la portē, à quoy les partisans de Garfie & le Roy de Bachian avec grand nombre d'hommes s'opposèrent: & ainsi force fut à Simon de Vere de se retirer, laissant Garfie lequel demeura maistre l'espace de quelques iours. Les nouuelles de cest emprisonnement volerent aussi tost es isles voisines, mesmes en celle de Machian, où estoient plusieurs des amis de Menefez, qui quitterent tout pour venir voir que c'estoit. Simon de Vere les assembla, & se trouuerēt au nombre de quarante, qui firent Vere leur chef, promettās s'employer en toutes sortes pour afrāchir Menefez, & que si Garfie demouroit le plus forē ils se retiretoyent avec les Espagnols. Le dire & le faire fut tout vn: car apres auoir essayé diuers moyens, & conu que cestoit temps perdu, de cōtester de paroles avec Garfie, lequel on ne pourroit reprimer que par les armes, ils enuoyerent gens vers le Roy de Tidore & Fernand de la Tour capitaine des Espagnols, exposer les procedures de Garfie & demander secours contre lui. Le Roy de Tidore & le capitaine Fernand despescherent sur l'heure messagers expres, par lesquels Garfie fut sommé de lascher Menefez, à peine de s'en repentir. Ceste sommation mit Garfie en merueilleuse perplexité, & du commentement il tascha de couutir son fait au mieux qu'il fut possible: mais voyāt que Simon de Vere & les autres estoient sur le point de s'en aller rendre aux Espagnols, & que tost apres il auroit à soustenir vne guerre, en laquelle peut estre lui & ses adherāns seroyent payez de leurs mauuais deportemēs ioint qu'on lui vint dire que la flotte des Espagnols approchoit pour enleuer Vere & les siens, il baissa l'aile, craignant le choc, & enuoya querir Vere auquel il promit relascher Menefez. Ce propos entamé fut poursuui de telle sorte, qu'ils accorderent finalement que Menefez retourneroit en sa premiere autorité & liberté, & lairroit aller Garfie avec ses gens, sans les empēscher en rien, toutes informations & autre pieces de proces aneanties. Apres cest accord Garfie fit trousser bagage & deslogea bien tost, baillant les clefs de la prison à Vere pour deliurer Menefez, lequel indigné des torts

qu'on lui auoit procurez, commanda sur le champ à l'Auditeur de dresser vn acte des procédures de Garfie en ce dernier fait, notamment de ce que durant sa captiuité les Espagnols s'estoyent emparez de l'isle de Machian d'espourcue de garnison, & qu'en ceste prinse le Roy de Portugal auoit perdu grande quantité d'espiceries. Outreplus il enuoignit au capitaine Botel de demeurer en la citadelle, afin de seruir aux affaires de la guerre prochaine: ce que Botel refusa tout à plat, se sentant supporté de Garfie avec lequel il s'embarqua, dont Menefez se fit donner vn autre acte, & despescha homme expres pour porter ces actes en Malaca au lieutenant pour le Roy de Portugal, afin de chastier Garfie, Botel & les autres qui quittoient les Molucques au besoin, & pour demander secours.

*Portugallois
desfaits par
les Mores de
Longu, dont
ils se vengerēt
depuis.*

EN ceste mesme annee, & tādīs que George Capral estoit gouuerneur de Malaca, les Mores de Longu, port de mer en l'Inde haute, tuerent quelques Portugallois qui ne leur auoyent fait dommage quelconque. Capral ne voulant laisser telle audace impunie enuoya septante bōs soldats en vne galere sous la charge d'Aluarez Britio: mais ils furent desfaits & taillez en pieces avec leur capitaine par les mesmes ennemis, & la galere emmenée à Longu. Quinze iours apres les nouuelles de ceste desfaite Martin Correa se vint rendre au port de Malaca: & pource qu'il estoit vaillant & bien experimenté, Capral le fit chef d'vne petite armee nauale pour aller à Longu, ce qui fut executé, tellement qu'apres grande tuerie de Mores Longu fut prins & brulé, la galere ramenee à Malaca. Lors Capral entendit en quelle disette de viures & de gens estoient ceux des Molucques: pourtāt ordonna-il p̄romptement vn secours pour partir au commencement de Ianuier, sous la conduite de Gonfakie d'Azeuede, auquel furent baillez deux basteaux à voile, vn brigantin & vn ionc bien fournis de viures, & de deux mille ducats de marchandise, avec cent soldats Portugallois.

*Premiers ex-
ploits de Sam-
pajo depuis
qu'il fut de-
claré Viceroy,
& la victoire
que son lieute-
nant obtint cō-
tre les Calecu-
tiens.*

1 5 2 8.

Il faut entrer maintenant en l'annee mil cinq cens vingthuit, & voir ce que fit Lopez de Sampajo apres le depart de Mascaregne. Premièrement donc il enuoya Iean Deze prendre possession de la citadelle de Cananor, pour y cōmander au lieu de Menefez. Et dautant qu'il y auoit grand nombre de paraus de Calcut en toute la coste, qui molestoient les alliez du Roy de Portugal, il pria Deze de garder ceste coste avec quelques vaisseaux le reste de l'hiuer, ce que Deze accepta, & lui furent baillez pour cest effect seize caturis & brigantins, avec vne galere sur laquelle il monta. En apres Sampajo dōna charge à Martin Alfonse Melio d'aller à Zunde, afin d'y bastir vne citadelle, ce que Melio refusa, s'excusāt quē ce seroit fait tort à Frācisque de Sa qui auoit ceste commissiō: mais il fut pressé de ce faire, ayāt toutesfoiς protesté de ne faire que ce que Francisque lui cōmāderoit, au cas qu'il le trouuast en la coste de Malaca. Or pource que lon sauoit desia que Francisque auoit esté contrainct retourner de ce voyage sans aucun exploit, à cause de la resistāce du nouueau Roy de Zunde, les soldats ne vouloyent ouir parler de ce voyage: tellement que pour donner compagnie à Melio, le bruit fur qu'il alloit roder la coste de Tanazarin, d'oū il deuoit venir hyuerner à Paleacate. Ce faux donné à entendre amassa quatre cens hommes

hommes en neuf nauires & quelques autres vaisseaux plus legers. Melio eut charge d'aller par Zeilan, afin de secourir le Roy qui estoit molesté par vne flotte de Calecut, laquelle se retira si tost qu'elle entendit que Melio estoit en mer, & demeura l'isle de Zeilan en son repos & trafic acoustumé. De là Melio fit voile vers Calecare, qui est vn grand pays voisin de la mer, au Seigneur duquel appartient la pesche des perles. Icelui, pour s'asseurer contre les Calecutiens, se rendit tributaire du Roy de Portugal, lequel promit par Melio fournir gens de guerre pour assseurer la pesche des perles contre tous ennemis. Cela fait, Melio mena sa flotte hiuerner à Paleacate. Quant au capitaine Deze il tourmenta de toutes facons les Mores allans de Calecut à Cambaje porter du poyure, & en diuerfes rencontres print quarante huit paraus & barques de Malabares, qui perdirent grand nombre de gens en ces rencontres. Non content de cela, vn iour il print terre à Mangalor, où quelques Malabares estoient à l'anchre, lesquels s'enfuirent auant en terre ferme, laissant la bourgade vuide, en laquelle les Portugallois mirer le feu : & comme son terme de garder la coste expiroit, il fut assailli de China Cutial general de soixante paraus de Calecut, lequel pensoit desfaire les Portugallois : mais au ioindre il en auint autrement, car Deze & ses gens hrent tel deuoir que les ennemis furent mis en route, vne partie de leurs paraus coulez en fond, China Cutial blessé au visage & à vne iambe prins prisonnier. Apres ceste victoire, Deze fit voile à Cananor & renuoya presque toute son armee à Cochim : mais pour recompense de ses seruices Sampajo lui laissa China Cutial, duquel il tira grosse rançon.

6. SAMPATIO ne prenoit pas plaisir de voir George Capral & George de Menefez establis au gouvernement de Malaca & des isles Molueques par Pierre Mascaregne. Afin donc de mettre son esprit en repos il pria Pierre de Far capitaine de la citadelle de Goa d'aller seruir en la place de Capral, dont Far s'excusa, disant l'air de Malaca lui estre mal sain : toutesfois il acquiesça finalement pour complaire à Sampajo. Le gouvernement des Molueques fut donné à Simão de Souze, la chastellenie à Antoine de Castre, la faëcturerie à Antoine Caldeire, ensemble la capitainerie d'une galere : & septante soldats pour mener aux Molucques avec trente autres que Far deuoit fournir estant arriué au port de Malaca. Far se mit à la voile au mois d'Auril de l'an mil cinq cens vingthuit estant suivi par Simon de Souze, de la nauigation desquels nous parlerons plus amplement ci apres. Or auant que Sampajo partit de Cochim pour aller hyuerner en l'isle de Goa, il donna charge à Christofle Mendoze d'aller en Ormus commander en la citadelle, & renuoya quāt & lui Raix Xeraf, absous de tous les cas à lui imposez par sentence de Jean de Soire Auditeur general des Indes, avec permission d'exercer son estat de capitaine de iustice d'Ormuz, où estans arriuez Iacques Melio gouverneur de la citadelle quitta la place à Christofle Mendoze.

7. ANTOINE Mirande, Amiral des Indes, estant parti de Goa, fit voile vers le cap de Guardafu, où il arriua apres auoir esté rudement battu d'une tourmète. Puis diuisa sa flotte en trois bataillōs separez, afin de fermer tout passage aux nefes des ennemis. Comme il les espioit de tous costez suruint

Nauigatiō de Pierre de Far à Malaca, de Simon de Souze aux Molucques, & de Christofle Mendoze à Ormuz.

Courtesy & exploits d'Antoine Mirande Amiral des Indes.

vne autre tourmente qui escarta Henri de Macede de la flotte en laquelle estoit l'Amiral, tellement qu'il fut porté fort loin arriere, & vn iour de grâd matin descouurit vn grand gallion de Turcs, fourni de bons soldats bien munis, & qui commencerent le combat à coups de canon. Macede leur ayant respondu de mesme, ils approcherent les vns des autres, sans que lon peust iuger qui auoit l'auantage. Or ainsi que le vent cessa les Turcs dardèrent vne lance à feu dans le gallion des Portugallois, lequel se print à la plus grand' voile & l'embrasa: mais vn vent soudain s'estant leué rechaissa ceste lance encor ardante au gallion des ennemis, où le feu s'attacha tellement que les Turcs cesserent de combattre pour estaindre cest embrasement: mais ils ne peurent le garentir, ains vne partie d'eux furent bruslez avec le gallion, quelques autres se ietterent en mer où aucuns perirent, les suruiuens furent prins. Sur ce la saison de faire courses éstât passée, toute la flotte cingla vers Caxen en la coste d'Arabie, où estoient vingt voiles de Mores que les Portugallois conquirent. Et pource que Mirande entendit que quelques nefes estoient en mer avec intention de passer le destroit, il retourna pour les y attendre, laissant Roderic Pereire à Caxen pour vendre vne partie du butin conquis sur les Mores. Au reste, les autres nefes ne furent point descouuertes, à cause dequoy Mirande alla surgir au port d'Aden principale ville d'Arabie, lors reconciliée & non ennemie des Portugallois, où il trouua Roderic Pereire, auquel le gouuerneur fit entendre que le Roy estoit absent, & que les Turcs lui auoyent fait quelque dommage, puis apres la mort de Soleiman s'estoyent retirez en l'isle de Camaran. Sur cela fut consulté, si on iroit les trouuer, dont les capitaines ne furent d'avis, pource que la navigation estoit perilleuse: ains qu'il falloit seulement enuoyer vn catur qui pourroit passer aisément & sauoir de leurs nouuelles. Le grand pilote de l'armee y fut enuoyé: mais à cause des vents contraires il lui fut impossible de passer, & en chemin print deux barques de Mores, desquels il entendit qu'il y auoit trois mil cinq cens Turcs en l'isle de Camaran. Mirande entendant ces nouuelles trauersâ la mer depuis Aden iusques à Zeila ville d'Ethiopie pres de la mer, laquelle estoit desnuee de gens, & y mit le feu, puis alla au port de Mazcate, où il laissa l'armee sous la charge d'Antoine de Sylues, & se retira en Ormus pour y passer l'hiuer.

TANDIS que Mirande seiournoit en Ormus lon vendit le butin des 8. nefes Arabesques, lequel monta à soixante mille ducats: puis Mirande s'embarqua le vingtdeuxiesme iour d'Aoust pour aller vers Diu faire ses courses sur les ennemis. Mais il trouua la mer si courroucée que force lui fut se retirer à Chaul, où tous les autres capitaines le suiuirent, exceptez Antoine de Sylues & Henri de Macede qui tindrēt bon. Or cōme Mirade approchoit du port, vn vent de trauersē leué soudain donna de telle furie parmi la flotte, que Lopez de Mezquite capitaine d'un gallion fut chassé iusques pres de Diu, & rencontra vne nef d'ennemis au nombre de deux cens bien equippez. Lopez maugré les vagues, & quoy qu'il n'eust que trēte soldats, vogua droit à ceste nef, l'acrocha, puis saute dedans avec quelques autres, & commence vne escrime merueilleusement hazardeuse: car outre le combat des

hom-

Prise de Jacques de Mezquite & d'autres Portugallois pressés & tourmentés pour abuser le Chrestianisme.

hommes, la tourmente faisoit entreheurter la nef & le gallion ainsi accrochez, de telle roideur que l'un cassoit l'autre, & commençoient tous deux à puiser, prests à couler en fond, si les gumes ne se fussent rompues, tellement que le gallion fut poussé d'un costé & la nef de l'autre. Lopez demeurant avec ses gens dedans la nef, sans pouoir estre secouru de ceux qui restoyent au gallion, à cause de la fureur des vents & des vagues. Lors voyant que le moyen d'eschapper estoit de vaincre & de mourir, il print tel courage qu'après grand meurtre d'ennemis, les suruiuans blesez pour la pluspart se rendirent à sa merci. S'estant assuré d'eux, il fut question d'empeschier que la nef ne perist & ne noyast victorieux & vaincus tous ensemble. Lopez voyant le danger, recueillit tout l'or & l'argent qui estoit en la nef, & fit entrer Jacques de Mezquite son frere au bastéau de la nef avec seize autres afin de sauuer cest argent: puis on essayeroit de remedier à la nef s'il estoit possible. Les seize embarquez avec Jacques de Mezquite voyans que lon ne pouuoit espuiiser l'eau que faisoit ceste nef, en quelque sorte que ce fust, desesperent de la pouuoir sauuer, & d'autre part se iugerent perdus, pource que si ceux de la nef sautoient dans le bastéau ils le feroient perir, estant trop petit pour tant de gens. Aimans donc mieux leurs vies que celles d'autrui, ils tascherent se sauuer auant qu'attendre si la nef periroit ou nō, non obstant les remonstrances de Jacques de Mezquite, qui les prioit de patienter encores un peu. Mais ils tomberent de fieure en chaud mal, comme on dit: car pensans gagner le port de Chaul ils trouuerent la flotte de Diu, qui print le bastéau & mena Mezquite avec les seize à Diu, d'où ils furent enuoyez au Roy de Cambaje, lequel, bien ioyeux de tel present, sollicita Mezquite d'abiurer le Christianisme, avec promesses de le faire grād. Mezquite ne voulāt s'accorder à telle demande fut gehenné en diuerses façons, & finalement attaché à la bouche du canon, pour estre brisé par morceaux: toutesfois il demeura ferme, detestant tousiours l'impieté de Mahumet. Ce que voyans les seize autres ils prindrent courage à son exemple, & ne voulurent se faire Mahumetistes. Ceste constance des Portugallois mit le Roy de Cambaje en telle cholere qu'il fit reserrer estroitement tous ces prisonniers, & de fois à autre les faisoit torturer cruellement & tremper en telle misere qu'ils moururent les uns après les autres, perseuerans neantmoins de bonne volonté en la profession du Christianisme. Quant à Lopez de Mezquite resté dedans la nef, lui & ses gens s'employèrent si heureusement qu'ils surmonterēt l'effort de l'eau, & gagnerent le port de Chaul: puis des deniers preuenans de la vente des marchandises estans en la nef furent payez les soldats de l'armee, & demeura pour le Roy la somme de soixante mille ducats.

2. HENRI de Macede, qui estoit demeuré durāt la tourmente à la pointe de Diu, gouuerna si dextrement son gallion nommé le Zamorin, qu'il maistrifa les vagues: & comme la mer commençoit à se rendre bonasse, tascha de se retirer. Mais il fut descouuert & inuesti par trois fustes de Diu conduites par un vaillant capitaine nommé Halissa, lequel commença à battre furieusement de plusieurs pieces. Combien que Macede fist iouer

*Rencontre de
la flotte de
Diu & du
gallion de Hen-
ri de Macede.*

les siennes, ce n'estoit pas avec tel succes: car d'autant que les fustes estoient basses, leurs coups donnoient à fleur d'eau, & percerent le gallion en tant d'endroits, que sans secours d'ailleurs il perissoit avec tous ceux de dedans, ayant les masts rompus, les verges & voiles despecées, brief tout son equipage fracassé. Mais Antoine de Sylues, capitaine du gallion nommé les trois Rois, ayant ouï le bruit de l'artillerie se douta que c'estoit & vint au secours. A l'approcher du Zamorin il fit tirer quelques volées de canon, & sonner les trompettes, ce qui fit penser à ceus des fustes que l'Amiral des Indes venoit contre eux avec toute sa flotte, & se donnerent telle peur qu'ils s'enfuirent laschement, & contraignirent leur general d'aller apres. Sylues presumant à peu pres pourquoy ils se retiroient, suivit, les battit du canon: ce que voyant Halissa fit teste, & d'un coup de mousquet tiré de son vaisseau Sylues fut renversé mort, ce qui fit cesser la poursuite aux Portugallois, lesquels se retirerent à l'endroit où ils auoyent laissé le capitaine Macede. Halissa pensant que ce fust vne ruse pour l'attirer, ne voulut s'avancer, ains s'en alla apres ses fustes, au lieu que s'il fust retourné, les deux gallions estoient perdus: mais ayans eschappé tel danger ils gaignerent le port de Chaul, puis firent voile avec l'Amiral iusques à Goa, où ils mouillerent l'ancre sur la fin de Septembre, & rendirent compte à Sampajo de tout ce qui leur estoit auenu.

Voyage par terre depuis Ormus iusques en Portugal, fait par Antoine Ternier.

A v mesme temps, le capitaine Mendoze, gouverneur de la citadelle d'Ormus, desirant auertir le Roy de Portugal que les Turcs ne pouuoient encore venir es Indes, & lui donner auis d'autres choses touchant son seruice tant en Ormus qu'en l'Inde basse, resolut d'y enuoyer par terre, & choisit pour cest effect vn Portugallois nommé Antoine Ternier, habitant d'Ormus, lequel auoit fait le voyage de Perse avec Balthasar Personne, & allant de là en Ierusalem estoit tombé es mains des Turcs qu'il auoyent mené au Caire, où il fut racheté: puis fit voile du Caire iusques en Cypre pour gaigner Portugal, mais il changea d'opinion, & retourna en Perse par vn chemin de deserts, assez estrange & bien long, lequel toutesfois il marca soigneusement, avec la connoissance qu'il auoit du langage Persan. Mendoze lui communiqua son desir & les occasions d'un tel voyage, ce que Ternier entreprint alaigrement, apres auoir touché quelques deniers pour sa despence, & lettres de banque pour en receuoir ailleurs & y negotier selon la commodité. Il partit d'Ormus le vingtiesme de Septembre, & alla par mer iusques à Bazole ville d'Arabie au bout du goulfe de Perse, trêze lieues au dessus de l'Euphrate: & fut six semaines en ce chemin à cause des vents contraires. Il demeura vingt iours à Bazole, pource que la carauane avec laquelle il pensoit aller iusques à Damas estoit partie. Le gouverneur de la ville ne vouloit pas lui bailler vne guide pour trauerser le desert qui est entre Bazole & Alep, disant que deux hommes sans plus ne s'estoyent iamais hazardés à faire vn si grand chemin, de peur d'estre deuorez par les bestes sauvages, & que personne ne se fourroit en ce desert qu'avec compagnie de plusieurs centaines d'autres. Neantmoins Ternier estoit tousiours apres le gouverneur, afin d'obtenir son congé & guide. Le gouverneur estonné de

de ceste resolution, lui donna vn pilote pour le conduire: car en ce chemin les voyagers se gouernent par les vêts comme les matelots sur mer, pour ce qu'il n'y a sentier ni maison quelcôque, fors deux petis chasteaux où les Arabes se retirent au retour de leurs courtes. Ternier & son pilote deslogerent au cōmencement de Nouembre, à deux heures apres minuit, pour n'estre point descouverts, montez chascun sur vn dromedaire (beste de charge, dispostes pour expedier chemin, de petite despēse & de grand travail) & portoyent leurs prouisions pour vn mois. Ils entrerent en ce grand desert où l'on ne voyoit que des Tigres, Lyōs, Ours & semblables animaux, desquels ils s'elongoynent aussi soigneusement que des coureurs Arabes, qui voltigent par ce desert pour destrousser les passans, estās ces escumeurs de terre les plus grands voleurs du monde. Apres auoir cheminé trois semaines entieres, ils furent assaillis de deux lyons, dont les dromedaires s'effaroucherent iusques à courir plus de deux lieues sans s'arrester, tellement que celui de Ternier se tordit l'un des pieds, & furent contrains s'arrester six iours pour guerir leur monture, en fin desquels l'eau douce leur faillit: mais en recompense ils arriuerent pres d'un gros village d'Arabes, bien arrousee de fontaines, & peuplee de palmiers, où ils se refraischirent, & y trouuerent vne carauane prestee à partir pour aller à la ville d'Alep, qui est au bout de ce desert. Ternier se mit en ceste troupe, & son pilote retourna avec ses deux dromedaires à Bazore. La carauane se mit incontinent en chemin, & fit quarante lieues auant que sortir du desert, puis entra au territoire d'Alep, qui est vne ville close, peuplee d'Arabes suiets au Turc. En ce lieu Ternier pensoit trouuer vn riche marchand Venitien nommé André, auquel il portoit lettres de change pour recouurer argent, mais icelui estoit lors à Constantinople, & salut à cause de l'huiuer que Ternier seiournast la pres de deux mois, en fin desquels il se mit avec vne carauane qui alloit à Tripoli de Surie, où estant parueniu il s'embarqua & fit voile en l'isle de Cypre, & apres beaucoup de trauerses gaigna l'Italie, d'où il s'achemina par terre iusques au royaume de Portugal, & y arriua sain & sauf en la cour du Roy, auquel il presenta ses lettres & fit ample discours de son voyage au grand esbahissement de tous. Aussi estoit il le premier qui auoit fait ce chemin par terre avec vn seul pilote: & ce pendant il prouua par viues raisons au conseil du Roy, que l'on pouuoit aller aisement par terre en trois mois depuis Portugal iusques en Ormus.

11. I L a esté dit ci dessus que George Capral gouuerneur de Malaca auoit commandé à Gonçalues d'Azeuede de mener secours aux Molucques. Azeuede s'embarqua sur le commencement de Iāuier l'an mil cinq cens vingt-huit, & alla surgir en l'isle de Bandan, où il trouua Garfie Henriquez, arriué peu de tēps auparauant, & qui auoit dressé vne barriere en l'enclos de laquelle il s'estoit logé. Quelques iours apres suruint Vincēt de Fonsēcque avec lettres de Menēsez & les actes dressez contre Garfie, lequel fit vn ample discours au capitaine Azeuede de tout ce qui estoit auenu en la citadelle de Ternate, lui cōseillant d'arrester Garfie & ses gēs, & s'eparer de leur vaisseau. Quāt à l'emprisonnement Azeuede en fit refus, bien promit il de se saisir du

*Ce qui auint
entre Gonçalues
Azeuede &
Garfie Henriquez
en l'isle de
Bandan.*

vaisseau quād il en seroit tēps, Fōsecque voyāt cela, voulut enuoyer à Malaca les lettres & actes, par certains Portugallois qui deuoyēt partir biē tost: mais eux sachāns que c'estoit le proces de Garfie, lequel se trouueroit en personne aussi tost qu'eux en Malaca, ne s'en voulurent point charger: tellemēt que Fōsecque les reporta à Menefez. D'autre costē, Garfie se douta incōtinent de l'occalion de ceste venne de Fonsèque, & craignit qu'Azeuede ne cerchast les moyēns de l'empoigner. Manuel Faucon logē avec Garfie, ayant mesme soupçon, se retira vistemēt au logis d'Azeuede, estimant qu'il eust commission expresse de Menefez de les saisir tous, & se repentant d'auoir laissē les Molueques où il vouloit retourner, conseilla Azeuede d'emprisonner Garfie & lui oster son vaisseau. Azeuede faignit trouuer bon cest auis, & là dessus Faucon fit courir le bruit que Garfie seroit bien tost prisonnier & perdrait son vaisseau. Garfie n'appreheudoit aucunement la prison, ayant auis contraires par les espions qui estoient autour d'Azeuede: & quant à l'arrest du vaisseau, cela lui sembloit impossible, pource qu'il y auoit grande quantité d'espiceries pour le Roy. Or Azeuede asina en cest endroit Garfie & ses espions quant au vaisseau, tenant son intention si secrette qu'homme viuant n'en sentit vent quelconque iusques à l'executiō. Estant prest de partir, il alla par terre dire adieu à Garfie, lequel l'accompagna iusques au bastéau. Lors Azeuede eslongné de terre tira droit vers le vaisseau de Garfie, lequel creut alors ce qu'on lui auoit rapporté. Tost apres yint vn messager de la part d'Azeuede demander à Garfie les voiles de ce vaisseau que lon auoit portees en la barriere: & pource que Garfie en fit refus, Azeuede se saisit du ionc d'icelui, dedans lequel y auoit la somme de quatorze mille ducats en deniers monnoyez & dauantage. Cela fit enuoyer les voiles bien promptement: mais, pour contremine, Garfie esctiuit au patron du vaisseau & à quelques autres siens amis qu'ils donnassent ordre de partir les derniers, & puis faignissent estre empeschēz à radoubet quelques pieces de leur equippage, afin qu'Azeuede, qui auoit vent en poupe, s'elongnast tellement que Garfie peust aller rescourre son vaisseau. Manuel Loup, qui rendit les voiles & porta les lettres, s'estāt retiré à Bandan, Azeuede fit Roderie Figueire capitaine de ce vaisseau, puis haussa les voiles, estant suiui des autres capitaines de sa flotte. Figueire demouroit derriere, à cause que le patron vouloit executer le mandement de Garfie, & faisoit fort de l'empeschē à bien agencer son fait: mais apperceuant venir quelques paraus de Bandan, & se doutant de la menē, fit signe à Azeuede de venir au secours. Incontinent Azeuede conut que cela vouloit dire, & s'approchans lui & Manuel Faucon qui commandoit en vn des bastéaux de la flotte firent lascher quelques volees de canon contre les paraus, dont ils tuerent deux mariniers, & rompirent la iambe à Manuel Loup qui voguoit des premiers. Garfie perdant lors toute esperance de rauoir son bastéau se retira en son logis, & Figueire suiuit la route des autres.

*Aluarez Sa-
inuedra capi-
taine Espa-
gnol des suites* C E pendāt Menefez estoit en grāde perplexité: car Fernand de la Tour, ^{12.} les Rois de Tidore & de Gilolo, sachans que Garfie auoit laissē la citadelle de Ternate mal fournie de viures, de gēs, & de munitiōs de guerre, resolu-
rent

rēt ensemble de presser les Portugallois plus que deuât, sur tout le Roy de Gilolo qui vouloit cōquerir quelques terres occupees par les Portugallois, & tenoit vne armee preste pour couper les viures à ceux de Ternate, lesquels commençoient à auoir faim. Sur ces entrefaites arriua à Tidore vn bastean d'Espagnols sous la charge d'Aluarez Sajauredre, lequel estoit parti de la nouuelle Espagne avec trois vaisseaux (dont les deux se perdirēt en chemin) afin d'aider à ceux de Tidore. Il ne fut que trois mois sur mer, à cause des courantes impetueuses qui sont entre la nouuelle Espagne & les Molucques, & aussi à raison des vents qui donnent tousiours en poupe. Les Espagnols furent merueilleusement resiouis de l'arriuee de Sajauredre, & sur tout de ce qu'il auoit si peu tardé : s'assurens que par le moyē de nouveau secours qu'ils pourroyēt receuoir en peu de temps, ils chasseroyēt les Portugallois & s'empareroyēt de leur citadelle. Tost apres dōc, les Rois de Tidore & de Gilolo delibererent entrer à main armee en l'isle de Montel, les seigneurs de laquelle estoient vassaux du Roy de Ternate. Iceux ayās demandé secours à Cachil & à Menefez, Cachil dressa son armee avec laquelle il se mit en mer, & Menefez enuoya Fernand Baldaje avec trēte Portugallois en la galliote neufue : ce qu'entendu par le capitaine Fernand il despescha Sajauredre & trente Espagnols en la galliote. Ces deux galliottes se rencontrerent le quatriesme de May, & vindrent aux mains, tellement qu'il y eut huit Portugallois tuez d'une part & cinq Espagnols de l'autre : mais Fernand Baldaje ayant esté reuerſé mort, les vingtdeux qui restoyēt en la galliote se rendirēt à Sajauredre, qui les emmena avec leur vaisseau au port de Tidore, où il fut receu en grand ioye, & de là en auāt les Espagnols tindrent pour certain que les Portugallois estoient en leurs mains, comme il y en auoit aussi grande apparence, Menefez n'ayant que cinquante hommes de reste en la citadelle. Cachil despitē de ceste récontrē, en laquelle il auoit failli de se trouuer, laissa son armee à Montel, & se retira en l'isle de Ternate.

13. CE dernier accident avec la disette de viures & peu de soldats reduisit Menefez à l'extremité : & comme il estoit sur le point de quitter tout, Vincent de Fonsèque arriua le huitiesme iour de May, lequel apporta nouuelles du grand secours qui le suiuoit de pres sous la charge de Gonſalue d'Azeuede. Les Espagnols ayans entendu ces nouuelles, estimans tousiours demeurer victorieux enuoyerent Sajauredre avec les deux galliottes, vn brigantin & l'armee du Roy de Tidore, pour desfaire Azeuede & l'amener avec tous les siens, cōme il auoit fait les vingtdeux autres. Cepēdant Azeuede alla mouiller l'anchre au port de Bachian, ſeu du Roy de l'isle tout l'estat des affaires, & laissa illec Manuel Faucō mal voulu de Menefez, iusques à ce que la paix fust faite. Pourſuiuant de là ſa route vers Ternate, il descourit la flotte des Espagnols, & incontinent fit leuer les bandetolles en tous ſes vaisseaux en ſigne d'allegreſſe, & pour monſtrer qu'il ne craignoit Sajauredre ni ſes troupes. Aussi Sajauredre n'oſa venir aux mains, ains laissa paſſer Azeuede, lequel pour deſpiter encores dauantage les Espagnols fit ſonner toutes ſes trompettes, cōme ſa flotte vogueoit vis à vis de la leur, & s'en alla

*Portugallois
et Molucques
& emmenent
leur galliote.*

*Gonſalue de
Azeuede ſoit
venu en l'isle
de Ternate. &
ce qu'il nego-
tia pour accor-
der les Espa-
gnols & Por-
tugallois en-
semble.*

furgir au port de Talangame en Ternate, & se rendit en la citadelle, où il fut recueilli en grād ioye par Menefez, lequel l'establit tout à l'heure chastelain majeur & general de la mer, en vertu d'vnes lettres du Viceroy des Indes, lesquelles il exhiba en entrant. Or apres qu'Azeuede eut entendu plus particulieremēt les dommages receus en ceste guerre, il cōseilla Menefez de pacifier avec Fernād, ce que Menefez approuua, pourueu que son honneur demeurast sauf. Lors Azeuede obtint vn saufconduit, & enuoya vn gentilhomme faire diuerfes remonstrāces à Fernand pour entrer en accord, dont il lui presenta les articles quis'ensuiuent. Asauoir que George de Menefez estoit content de traiter vne bonne & ferme paix avec Fernād, en laquelle les Rois de Tidore & de Gilolo seroyent compris : à conditiō que les prisonniers seroyent renuoyez sans rançon de part & d'autre : que les Espagnols rendroyent la moitié de l'isle de Machian appartenant au Roy de Ternate, de laquelle ils s'estoyent emparez durāt ceste guerre : que Fernād promettrait sur sa foy de ne donner secours aux Rois de Tidore & de Gilolo s'ils vouldoyēt courir sus aux Portugallois : que les soldats de parti & d'autre pourroyent aller & venir ou bō leur sembleroit en ces isles, avec le congé de leurs capitaines : que Cachil Daroes & le Roy de Bachian demureroyent amis des Rois de Tidore & de Gilolo. Le gentilhomme qui portoit ces articles eut charge, en cas de refus, de protester contre Fernand de tous despens, dommages & interests, que l'Empereur & le Roy de Portugal pourroyent souffrir à raison de ceste guerre. Fernād accorda tous les articles, fors celui de la reddition de Machian, disant ne le pouuoir passer sans la licence de l'Empereur, à qui ceste isle appartenoit : & apres auoir respondu aux protestations renuoya le gentilhomme, tellement que ceste negociation ne seruit de rien.

Pratiques des Portugallois & Espagnols pour s'entretenir en guerre.

AZEUEDE & quelques autres estoient d'auis de laisser cest article de Machian, & faire signer les autres, à quoy Menefez ne se voulut ranger : & conoissant qu'Azeuede n'estoit fort eschaufé à la guerre, il resolut d'enuoyer querir secours de gens, de viures & de marchandise pour le trafic, tant en l'Inde basse, qu'en Malaca, ensemble le proces cōtre Garfie, afin de le faire saisir prisonnier auant qu'il gaignast le royaume de Portugal. Simon de Vere eut ceste commission, & s'embarqua dedans le vaisseau que lon auoit prius à Garfie en l'isle de Bandan, lequel estoit chargé d'especeries. Mais vne tourmēte le chassa pres de l'isle de Mindanao (qu'aucuns estiment estre l'une des Barusses) où lui & tous ses gens perirent, tellemēt que depuis lon n'ouit aucunes nouuelles d'eux ni du vaisseau. Fernand de la Tour sachant que Vere estoit parti pour amener secours de Malaca & de l'Inde, conclut que Menefez vouloit estre maistre entierement : & combien qu'il eust assez d'Espagnols & autres gens pour se defendre, neantmoins il delibera, par l'auis des autres capitaines, de demander renfort au Viceroy de la nouuelle Espagne, & des maçons pour bastir vne citadelle. Sajauedre eut ceste commission, & s'embarqua dedans sa galliotte, menant avec foy, pour tesmoignage de la conqueste de l'autre galliotte de Menefez, quelques vns des vingtdeux qui y furent prins, asauoir

uoir Fernand Romero patron, Jacques Ribier Comite, & vn secretaire de la citadelle, item Simon Patalin & Bernard Cordeire, qui auoyent prins le parti des Espagnols, & sollicité qu'on les laissast aller avec Sajauedre. Ils s'embarquerent le quatorzième iour de Iuin, & estans à huit vingts lieuës loin de Tidore, Patalin, Romero, & les autres Portugallois cōploterent de brusler la galliote, afin de rompre le coup de Sajauedre : mais n'ayans assez aisé moyen d'exccuter cela ils desroberēt le basteau & quatre esclaués, puis tournerent vers Ternate en telle diligence que Sajauedre ne les pût attrapper. Combien que ceste perte l'incommodast grandement, toutes fois il poursuiuit sa route. Quant à Patalin & aux autres, ils allerēt errant d'isle en isle avec grand trauail & misere, & furent contrains laisser trois d'entre eux fort malades en vne isle bien loin de Ternate. Patalin & Romero poursuiurent avec les quatre esclaués, & arriuerent à l'isle de Garmelin appartenant au Roy de Tidore, où ils furēt reclus pour Portugallois & enuoyez prisonniers à Tidore. Fernand sachant qu'ils estoient partis avec Sajauedre se douta de quelque trahison, & leur fit dōner si roide trait de corde qu'ils confesserent la verité : à raison doquoy Patalin eut la teste tranchee & Romero fut pēdu. Quant à Sajauedre, apres auoir esté battu des vents & courantes fort long temps il fut contraint regagner Tidore, où il se rendit au mois de Nouēbre. On remit sus alors la negociatiō de paix, mais sans rien resouldre, pource que Fernand ne vouloit rēdre la moitié de Machian : ce qui despitoit extremement Menesez, se voyant ainsi enfermé. Il eust volontiers assailli la ville de Tidore, mais Azeuede reculoit, & retenoit les gēs de guerre, disant n'estre venu aux Molucques que pour le trafic des espiceries : à quoy aussi les soldats s'accordoyēt, sans se soucier de Menesez, lequel n'osoit demāder personne pour l'utenir compagnie, ains s'assuiettissoit à Azeuede, craignant d'entrer en querelle & esmouuoir quelque sedition. Il suiuit donc autre chemin, & fit tant par gracieuses remonstres, qu'Azeuede poullé de honte tint cōpagnie à Cachil Daroes, pour aller faire la guerre en l'isle de Machian : mais il ne fit qu'aller & venir, sans rien exploiter, & depuis ne voulut bouger de Ternate iusques à ce qu'il falut s'embarquer pour le retour, se contentant d'auoir fait vne leuee de bouclier, comme on dit, & rien dauantage. Mesmes afin de n'en estre plus importuné il remit la chastellenie & l'estat de general es mains de Menesez, aussi n'estoit-il propre qu'à entasser des sacs d'espices & faire trafic. Menesez establit en son lieu Lionel de Leme, & pour l'encourager à son deuoir, lui fit toucher promptement les gages de l'annee commençant : mais il se porta encores plus mal qu'Azeuede. Vne chose seruit à Menesez, à sauoir que les Espagnols craignans que les Portugallois (qui estoient en plus grand nōbre qu'eux) ne les surprinsent en quelque endroit, faisoient la guerre assez lentement, & donnoient des trefues de fois à autre.

15. D I S O N S maintenant ce qui auint à Martin Alfonse Melio, qui auoit charge d'aller à Zunde pour y bastir vne citadelle. Tādīs qu'il hyuetoit à Paleacate, lō sceut en Inde le secret de ce voyage, dōt furēt incōtinēt avertis quelques vns de sa flotte, & de main en main tous les soldats (qui ne pen-

*Nauigation
de Martin Al
fonse Melio à
Zunde, ses tra
uerses & auer-*

*mes estran-
ges, & souve-
ront en l'Inde
basse.*

soyent nullement à si fâcheux voyage) receurent ce paquet. Incontinent tous commencent à murmurer, & dire qu'on les auoit trompez : aucuns s'escarterent çà & là pour ne point aller à Zunde, les autres conspirerent ensemble de mettre le feu es vaisseaux, ce qu'ils executerent tost apres, & si Melio n'eust esté diligent, il demeureroit à terre. Au reste, il ne pût iamais descouurir les boute-feux : bien entendit il de la bouche mesmes de plusieurs, qu'ils estoient deliberez le quitter : pourtant les retint il prisonniers & confisqua les biens des fugitifs. Il passa ainsi l'hiver, & sur le printemps entendit qu'entre Bengala & Pegu couroyent quelques fustes de Turcs, pourtant se mit il à la voile, & pour les attendre alla surgir à vne isle appelée Negamele à l'opposite d'Aracan. Mais vne tourmente suruint qui escarta toute la flotte, tellement que Melio demeuré seul, son vaisseau echoua, où lui & les siens se trouuerent en des dangers fort grands, & finalement furent contrains gagner terre en vne barque & laisser leur vaisseau avec quelques esclaves, lequel fut finalement couuert de sable & englouti des ondes. Melio ayant encouragé ses gens au moins mal qu'il lui fut possible, leur persuada de voguer au long de la coste pour voir s'ils descouuroient point les autres vaisseaux, afin de se retirer dedans, & que si personne n'apparoissoit, ils iroyent iusques à la ville d'Aracan, le Seigneur de laquelle estoit ami des Portugallois, puis de là se retireroient en l'Inde basse. Suiuuant cest auis ils voguerent deux iours pres de terre, sans oser manger de leur biscuit, dont ils auoyent quelque quantité, à faute d'eau douce : mais en fin ils descouurirent vn village assez auant en terre, où Melio enuoya incontinent deux hommes, afin d'apporter de l'eau, s'ils en pouuoient recouurer. Ces deux estans pres du village apperceurent quarante Indiens, qui les enuironnerent & menerent par force plus auant, sans que Melio ni les siens y courussent, estimans qu'on menoit ces prisonniers à la fontaine. Comme on attendoit leur retour, la mer se print à bruire comme deuant, à cause dequoy plusieurs vouloyent à toute force que lon prinst terre en ce lieu, ce que Melio ne trouuoit aucunement bon, alleguant puis qu'ils n'auoyent aucunes armes, & que les Indiens de ces quartiers estoient pauvres, il faloit s'attendre de mourir là, qu'au contraire allans à Aracan ils pourroyent trouuer quelque riuiera d'eau douce, & l'un des vaisseaux de la flotte, ioint que le Seigneur d'Aracan n'oseroit leur faire tort, quand mesmes il en auroit enuie, ayant beaucoup à perdre : & que les deux enuoyez en terre ne retournans point c'estoit mauuais presage pour les autres, s'ils vouloyent les aller chercher. Ils estoient soixante quatre personnes dans ceste barque, laquelle à tous coups sembloit deuoir couler en fond à cause de sa charge : toutesfois Melio leur remonstra tellement le danger & l'autorité qu'il auoit sur eux, que l'affaire estant remis à en delibérer entre les principaux de la compagnie, fut resolu que lon feroit la volonté du general, lequel ayant attendu vne partie du iour & voyant que les deux ne retournoyent point, continua de voguer pres de terre, n'osant descêdre à cause que lui & les gens auoyent perdu leurs armes avec le grâd vaisseau. Quât aux deux, qui estoient descendus en terre, ils trouuerent moyen d'eschapper,

per, & apres beaucoup de trauaux gaignerent l'Inde basse. Comme Melio costoyoit le riuage il descouurit vn fleuve qui s'engoulfoit en la mer, & enuoye promptement quatre hommes pour apporter vne grande cruche d'eau. Ainsi qu'ils la puisoyent au fleuve, suruindrent deux habitans du pays portans vn pot plain de riz cuit & encores chaud, que les quatre acheterent, & en firent present avec leur cruche d'eau au general Melio & à la compagnie. Encores que tous refusassent prendre du riz, si est-ce que Melio en fit part à chascun, & alla-on par plusieurs fois querir de l'eau douce, tellement que tous furent rassasiez, & emporterent leur cruche pleine. Pour la faire durer, Melio trempoit vn baston spongieux dedans, & le faisoit suc- cer à chascun à certaines heures du iour, & le reste du temps ils tenoyent des boules de fer en leurs bouches pour empescher la soif, mangéas quel- que morceau de biscuit pour se sustanter. Ils voguerent en telle diete l'espa- ce de cinq iours, en fin desquels ils se trouuerent pres du port d'Aracan: en laquelle Melio ne vouloit entrer, craignant tomber es mains du gouver- neur qui n'aimoit point les Portugallois. Afin donc de tirer ses gens plus loin de là s'as nul desordre, il les pria d'aller tous ensemble en quelques illet- tes voisines, pour voir s'ils descouuriroyent point quelques vaisseaux de leur flotte: ce qui fut trouué bon, mais ils cuiderent perir en chemin à cau- se des vagues dont leur barque se remplissoit, toutesfois ils gaignerent vne isle à la rade de laquelle furent trouuez deux sacs de biscuit tout mouillé, vne quaiße de bois plaine de hardes, laquelle seruit à refaire la barque. Ils conurent à ces enseignes qu'aucuns de leurs vaisseaux auoyent fait naufra- ge: ce pendant ils descendirent en l'isle, estroite & de forme ronde, en la- quelle ils trouuerent vn lac d'eau amere & de plus fâcheuse odeur que cel- le de la mer. Plus loin y auoit vne sorte de feues & quelques autres legumes, dont les plus afamez se hasterent de manger: mais cela les fit tant vomir que la plupart en furent griefuement malades, qui n'auoyét autre liêt pour reposer que le sable. Durant la nuit, la Lune estant au plain, quelques vns que la faim & la tristesse ne laissoyent dormir, virent sortir de l'eau vne tortue grande comme vne rondelle de guerre, & l'ayans prinse la porterent à Melio qui la fit despecer, & lui trouua-on plus de deux cens œufs au ven- tre, qui seruirent de medecine & nourriture à chascun malade, estant ces œufs cuits en vn pot sur le feu, & acoustrez comme le temps & le lieu per- mettoit. Ils rostirent & fricasserét la chair de la tortue, se repaissant de ceste viande avec du biscuit. Le lendemain ils prindrent vne autre tortue, qui a- uoit encores plus d'œufs que la premiere, tellement que les malades fu- rent remis sur les pieds. Alors estant question de se resouldre à gaigner quelque port, Melio descouurit franchement son cœur pour le regard d'A- racan, & fit en sorte que tous accorderét d'aller à Chetigan, ville & port de mer au royaume de Bengala, assez proche de leur isle, qu'ils y seroyét biē re- cueillis, à cause que les marchans du lieu trafiquoyent à Calcut, & auoyét besoin de l'amitié des Portugallois. En trauerfant la coste ils surgirent en vne isle où il y auoit grand' planté de palmiers, & ne voyās aucunes maisons approcherét de terre, & se rafraischirent illec deux iours entiers avec le re-

ste de leurs tortues, quelques œufs, du biscuit, des dattes & de l'eau douce qu'ils y trouuerent. Deux mariniers dormoyent de nuict dans la barque, & Melio se leuoit par fois pour faire le guet, & empescher que quelques soldats ne s'enfuissent avec, & laissassent les autres en l'isle. Comme Melio alloit à la garde durant la seconde nuict il trouua deux almadies pres de terre, & pensant que ce fussent courfaires qui voulussent emmener sa barque, se print à crier à l'aide: tellement que les pescheurs estans en ces almadies s'elongnerent de terre, & commencerent à parler en langage du pays. Melio leur fit demander par vn Portugallois qui auoit demeuré au royaume de Bengala, & sauoit la langue, s'ils estoient bien pres de Chetigan. Eux ayans respondu qu'oui, Melio leur donna vne somme d'argent pour l'y mener avec sa troupe, ce qu'ils promirent: mais ils mentoyent, car la ville prochaine se nommoit Cuqueire, en laquelle commandoit vn puissant seigneur More, appelé Codauaz Can, vassal du Roy de Bengala. Sur le matin les deux almadies & la barque se trouuerent en vne riuiera sur laquelle les pescheurs voguerent iusques à la nuict: & lors ils sauterent en terre, & firent dire à Melio qu'ils alloient auertir le gouuerneur de Chetigan de la venue des Portugallois, lesquels ils asseurerent d'estre fort pres de la ville. Ces pescheurs ne retournerent pas depuis: bien coururent-ils iusques à Cuqueire proche delà, & dirent à Codauaz Can ce qu'ils auoyent fait. Lui bien ioyeux de rencontrer telles gens pour s'en seruir en vne guerre contre vn sien voisin, leur enuoya dire par vn sien seruiteur, qui parloit le langage de Portugal, qu'ils se resiouissent ayans trouué vn seigneur bon ami de leur Roy. Ce seruiteur ne pouuant descourir la barque à cause de la nuict, prononça son message si haut que Melio l'entendit, ce qui l'asseura & resiouit grandement. Des le point du iour Codauaz Can monte à cheual, suiui d'une grosse troupe de pietons armez à la mode du pays, avec diuers instrumens de guerre qui sonnoyent en signe d'esiouissance. Les Portugallois voyans tant de monde penserent qu'on les venoit saisir prisonniers, & par l'auis de Melio mesme voguerent contre-mont pour regagner la mer. Les soldats de Codauaz Can voyans ceste retraite soudaine, commencerent à courir droit à la barque, la costoyans & criers que lon prinst terre. Or pource que les Portugallois se monstroyent de contraire auis, les autres se prindrent à descocher flesches & ruer des pierres pour les faire ranger. De l'autre costé de la riuiera apparurent des payfans avec leurs femmes & enfans qui tenoyent mesme contenace, tellement que des deux costez on n'oyoit que des huees estranges contre les Portugallois, ausquels le malheur seruit lors de quelque chose: car leur barque rencontrant de la vase s'arresta tout court, & salut lors que Melio dressast vne banderolle en signe qu'il cerchoit la paix, & à haute voix pria ce peuple de demeurer coy & de vouloir sauuer la vie tant à lui qu'à sa compagnie. Mais force fut à tous de gagner le bord à nage: quoy fait Melio alla incontinent trouuer Codauaz Can, lequel d'une face riante le pria ne prédre à la mauuaise part ce qui estoit auenu ce matin: qu'il s'asseuraist autant en ce pays qu'en Portugal mesme, pource que lui & tous les autres Portugallois y seroyent aussi bien traitez qu'en leurs propres maisons:

sons : qu'il les lairroit retourner en Inde, si tost que le temps seroit propre, ou bien les y feroit mener, s'ils n'auoyent vaisseaux & moyens de s'embarquer. Apres cest acueil, Melio & ses geus furent logez en vn grand palais, où quelques vns eurent du drap pour s'habiller, & les acommoda on de tout ce qui estoit requis pour leur viure & entretenement ordinaire. Tost apres arriuerent au port de Cuqueire Edouard de Vasconcel capitaine d'une galliote, & Iean Conil capitaine d'un brigantin, tous deux de la flotte de Melio, lequel ils alloient cerchant : & apres auoit entendu des pescheurs susmentionuez que les Portugallois estoient dedans ceste ville, ils enuoyèrent auertir Melio de leur venue, afin qu'il donnast ordre à ses affaires. Lors Melio alla demander son congé, suppliant Codauaz Can se souuenir de sa promesse. Sa responce fut qu'il ne pouuoit le licencier si tost, & lui en dit les raisons, le priant lui aider à mettre fin aux querelles qu'il auoit contre vn sien ennemi voisin : & que ceste guerre paracheuee (en laquelle il s'asseuroit d'obtenir victoire à l'aide des Portugallois) il ne les retiendrait point, offrant fournir à ceux qui estoient au port les viures dont ils auoyent faute. Le lendemain Codauaz Can se mit aux champs avec ses troupes, menant Melio à cheual, & les soixante quatre Portugallois à pied, bien equippez d'armes iusques furent baillees à Cuqueire, & marcherent en bonne deliberation iusques sur les terres de l'ennemi, lequel entendant qu'il y auoit des Portugallois en l'armee ne voulut venir aux mains, ains quitta tout à Codauaz Can, lequel demeura maistre du pays sans coup fetir. Mais la recompense de Melio & de ses gens fut que Codauaz Can leur refusa le congé promis, demadât rançon s'ils vouloyent s'en aller : ce qu'ils ne pouuoient fournir, ayans tout perdu avec leur vaisseau. Melio despité d'une telle perfidie delibera se sauuer, & de fait sortit vne nuit hors la ville, & gagna pays vers le riuage où quelques almadies l'attendoient. Or il auint qu'une partie de sa suite s'escarta, & furent quelques vns contrains se retirer en la ville dans leur logis, & se coucher, afin que lon ne ptesumast rien de leur fuite. Des qu'il fut iour Codauaz Can auerti par des payfans que ses prisonniers s'enfuyoyent, alla au palais, où ne trouuant Melio & quelques autres, enuoya vn capitaine avec quatre cens homes pour les ramener vifs ou morts. Melio & ses geus ne peurent gagner les almadies, pour s'estre fourvoyez la nuit : pourtant furent rattrains, & ne se mirēt en defense craignans plus grand inconuenient, ains retoutnerent vers la ville avec leurs gardes. Codauaz Can l'estança quelque peu, mais la cholete fut incontintēt appaisée, car il ne demandoit que rançon : ce que Melio conut bien, pourtant pria il Vasconcel & Conil de n'attendre pas dauantage, ains faire voile en Inde & prier le Viceroy (auquel aussi il mandoit par escrit tout le discours de ceste nauigation) de racheter les prisonniers. Ainsi que le capitaine les ramenoit dans la ville, quelques prestres ou Bramines Indiens le prièrent de leur dōner vn des Portugallois pour le sacrifier à leurs idoles (qu'ils appellent Pagodes) par la faueur desquels ces prisonniers auoyent esté re-
trouuez. Ce capitaine leur en donna vn nommé Gonfalue de Mele, auquel il vouloit mal, pource qu'allans à la guerre mentionnee ci deuant Vasque

l'auoit appellé chien renié : & se vengea de lui alors, tellement que les prestres l'esgorgerent & mirent en pieces avec grandes ceremonies, sans que Melio ni autres le peussent rescourre. Vasconcel & Conil estans paruenus en l'Inde basse presenterent leurs lettres à Sâpajo, lequel pria vn More d'Ormus, nommé Cojezabadin qui alloit à Bengala, de racheter Melio & tous les Portugallois suruiuans : ce que fit Cojezabadin, & paya trois mille ducats de rāçon à Codouaz Can, puis donna vne fuste bien equippee à Melio & à ses gens, qui firent voile en Inde, en la premiere annee du gouuernemēt de Nonio de Cugne.

*Armée de
Simō de Soufe
pres de Dachen,
où il est deffait
& tué avec
plusieurs au-
tres.*

PIERRE de Far & Simon de Soufe, partis de Cochim pour aller à Malaca, 16.
entrèrent au goulfe de Zeilan afin de gagner le port de Pacem en l'isle Taprobane : mais d'autant que ce destroit est perilleux en toute saison & que la galere de Soufe estoit trop chargée, il fit abatre toute l'artillerie tant grosse que menue. Or comme ils estoient presque hors du goulfe suruint vne toutteinte qui les separa, tellement que Far fut porté au port de Malaca, où Capral lui remit le gouuernement. Quant à Soufe il se rendit à la fosse de Dachen en la Taprobane, sans se reconnoistre, toutes les pieces basses, ses gens estoient rompus de trauail. Ayant entendu de ceux du pays en quel lieu sa galere estoit, il conclud de desloger si tost que la mer seroit accoïsee, sachant l'inimitié que le Roy de d'Achen portoit aux Portugallois. Mais la tourmente duroit encor : & par ainsi ce Roy entendāt qu'il y auoit vne galere si pres de sa ville enuoya voir que c'estoit, & le sachant delibera sen saisir. Mais pour n'y aller à faute, il despescha vn de ses domestiques pour visiter le capitaine de la galere, auquel il enuoye des fruits & autres rafraichissemens, & lui fit dire qu'il estoit bien ioyeux de l'arriuee de ceste galere au port de Dachen, pource que depuis quelque tēps il desiroit auoir alliance avec les Portugallois, & prioit Soufe d'entrer dans le canal, afin d'y estre à couuert & auoir meilleur moyen de se fournir de prouisions necessaires, que pour executer cela plus aisément il estoit prest d'enuoyer quelques lanchars pour lui aider. Soufe remercia le messager, le priant dire au Roy qu'il demeueroit en mer, pource que son intention estoit de partir si tost que la commodité se presenteroit. Le Roy ne voulāt perdre ceste proye, des la nuit suiuaute fit armer mille hommes de guerre qui s'embarquerēt en vingt lanchars pour aller prendre la galere & les Portugallois, l'estat desquels auoit esté descouuert par le porteur de presens. Des le matin le general de ces lanchars monta sur mer, avec charge d'amener Soufe & les siens par amour ou par force. Ce general voulāt euitier le cōbat, & attrapper Soufe sans coup ferir, lui enuoya vn homme avec vn calaluz, dedās lequel il le prioit entrer pour estre plus assuré, & que les lanchars aideroyēt à la galere pour gagner le canal. Le More du calaluz fit son message pres de la galere sans vouloir entrer dedans, & cōme Soufe s'amusoit à lui respondre, les lanchars cōmencerent à s'estendre afin de l'inuestir. Alors Soufe voyant tant de gens conut euidemment la mauuaise volonté du Roy, & commanda au More de se retirer, disant qu'il ne vouloit passer plus auant : puis tout à l'heure demanda ses armes, ses soldats se preparerent au combat, & Manuel

nuel de Soufe voyant que le calaluz ne vouloit s'eflongner, lui tira vn coup de fauconneau pour lui en faire venir l'enuie. Quand le general des lâchars vid fa trahifon defcouuerte, il commanda que lon acrochast la galere, ce que les Mores tafcherent faire avec leurs cris acoustumez, & apres force coups de mousquets & de harquebuzes trois lâchars acrocherēt en poupe, & plusieurs Mores sauterēt dedans la galere, fans qu'on les en peust empêcher: mais ils furēt si mal feruis, qu'apres auoir perdu vne partie de leurs cōpagnons ils deslogerēt auffi vifte qu'ils y estoyēt entrez. La bataille ayāt duré iufques à midi, au grand estonnement des assaillans, qui se voyoyent battus & repoussez par vne poignee d'hommes, Soufe demeura en paix le reste du iour, ayant toutesfois quarante soldats tant morts que blessez. Les ennemis en perdirent fix fois dauantage, & se retirerent dedans le canal: dont le Roy ayant eu les nouuelles par quelques vns qui disoyent merueilles de la vaillance des Portugallois, monta sur vn elephāt, & fit appeller son Amiral avec les gens de guerre de sa charge, & leur commanda d'amener la galere, jurant par Mahumet que ceux qui retourneroyent sans icelle seroyent leuez en l'air puis iettez par terre par la trompe de l'elephant. Tout à l'heure il les fit embarquer en cinquante lanchars, bien enuis pour la plupart, tant ils redoutoyent les Portugallois. L'Amiral estant assez pres de la galere faignit n'estre pas en mer pour combattre, ains dressa vne banderolle en signe de paix, disant vouloir parler au capitaine de la galere, lequel se presenta sur le tillac pour entendre ce More, la harangue duque fut que le Roy estoit bien fâché du tort fait aux Portugallois, & auoit emprisonné les mutins, avec deliberation de les chastier, priant Soufe d'entrer au canal pour en voir l'execution. Quelques vns qui costoyoyent Soufe lui conseil-lerent lors de se rendre, veu qu'il estoit impossible de plus combattre: ce qu'entēdu il craignit que ses soldats mesmes ne fissent du desordre, & pour-tant pria l'Amiral de Dâchen lui dōner loisir de se resouldre avec sa compagnie, & que lors il donneroit responce: ce que l'Amiral accorda, pour ne venir aux mains si possible estoit, & s'eflongna de la galere, laissant les Portugallois auiser à leurs affaires. Soufe ayant assemblé son conseil, les vns alleguerēt beaucoup de raisons pour l'induire à se rendre au Roy de Dâchen, lequel peut estre tiēdroit promesse, s'il voyoit que lon se fiast en lui. Ils proposoyent pour principale raison la foiblesse des Portugallois, qui seroyent contrains faire par force ce qu'on requeroit par amitié. Mais Soufe cōdamna cest auis, disant que chascun voyoit bien qu'il ne faloit attendre grace du Roy de Dâchen: & puis qu'il faloit mourir, c'estoit bien plus grand honneur d'expirer les armes au poing que se rendre ainsi laschement: qu'en faisant ce que bons Chrestiens & vaillans soldats doiuent faire, Dieu donneroit quelque moyen d'eschapper: & du moins s'ils ne pouuoient garentir le corps, Dieu feroit misericorde aux ames de ceux qui mourroyēt pour son seruiçe. Ceste brieue respōse les acouragea tous de telle sorte, qu'ils promirent à Soufe de faire ce qu'il leur commanderait. Apres les auoir remerciez il enuoya dire à l'Amiral que les Portugallois n'estoyēt pas deliberez d'entrer au canal, & que lui pouuoit se retirer quand bon lui sembleroit. Lors

icelui commanda aux lanchars de ceindre la galere & prendre les Portugallois vifs, si faire se pouuoit, adioustât que chascun eust à se souuenir des menaces du Roy. Incontinent les ennemis approcherent avec des hucées si effroyables qu'elles suffisoient pour estonner vn cœur bien asseuré, & se prindrent à descocher tant de fleches que l'air en estoit obscurci: puis les harquebuzades, dards, iauelots & cailloux voloyent espais comme gresse. S'estans vn peu marchandez de loin ils ioignirent & accrocherent la galere, en laquelle les plus eschaufez s'ingererent de sauter, mais ils furent incōtinent taillez en pieces par les Portugallois, qui n'estoyent pas vn contre vingt, & neantmoins se portoyē si vaillammēt, qu'en fin les bras commēcerent à defaillir à force de frapper & tuer, ayās combatu plus de trois heures sans relasche. Les ennemis estonnez d'vne si braue resistāce se retiroyēr, quand vn More forçat de la galere se ietta dās la mer, & nageāt entre deux eaux alla dire à l'Amiral qu'il faisoit vne grand' faute de se retirer, veu que les Portugallois estoyent morts pour la pluspart, les suruiuans si blesez & harassez qu'ils succomberoyent à la moindre charge, & lairroyent la galere vuide. Ce forçat fut enuoyé promptement vers le Roy avecques les blesez, afin que lon enuoyast quelque réfort de gēs & de munitiōs, que le Roy fit fournir à l'heure: & lors ils retournerent assaillir la galere, en laquelle ils entrerent, n'estant le nombre des assaillis suffisant pour garder les bords: car il n'y auoit gens de combat que Simon de Soufe, Antoine de Castre, Manuel de Soufe, Antoine Caldeire, George de Breu, & quatre autres, lesquels ralliez ensemble firent merueilles, iusques à ce qu'estans comme acabez, ils s'amasserent autour du masts, où d'un coup de fleche Antoine de Castre fut si griefuement blessé aux deux mains, desquelles il manioit vn espieu, qu'incontinēt apres il tomba par terre & rendit l'esprit. Simon de Soufe receut vn coup de iauelot, dardé de telle force que sa cuirasse fut percee, & cheut roide mort, ayant esté frappé droit au cœur. George, Manuel & Roderic Galuan freres, & fils d'Edouard Galuan, furent aussi tuez en combat. Restoyent alors vingt cinq Portugallois en tout, entre autres Antoine Caldeire & George de Breu qui se rendirent vies sauues, pource qu'ils estoyent hors d'halaine & de toute vigueur pour combattre: mais les Mores se voyans maistres vouloyent tout mettre au fil de l'espee, si leurs propres capitaines ne s'y fussent opposez. Toutesfois pour les appaiser ils leur donnerent le corps de Simon de Soufe, lequel (pour véger la mort de plusieurs parens & amis qu'ils auoyent perdus en ceste bataille) ils hacherent en mille morceaux & les donnerent pour pasture aux poissons. La galere fut menee dedans le canal, & les Portugallois presentez au Roy, qui leur fit bō traitement, pour couutir sa pensee: mesmes il faignit estre bien desplaisant de la mort de Soufe & des autres, disāt qu'il leur eust fait plaisir & hōneur, comme il desiroit faire à tous les Portugallois ses meilleurs amis: priant les vingt cinq, quand ils se porteroient mieux, de choisir vn de leur compaignie pour aller en Malaca, procurer vers le gouuerneur qu'il réuoyast querir la galere, l'artillerie & tout ce qui appartenoit aux Portugallois, car son intention estoit de rendre le tout bien volontiers. Nous verrons ci apres le

fond

fond de ceste intention , laquelle pour mieux couvrir il fit loger, medecament & acommoder les Portugallois, aussi proprement que s'ils eussent esté entre les plus grands Chrestiens du monde.

17. GARSIE Henriquez parti des Molucques avec les troubles & mescontentemens susmentionnez, ayant attēdu nauigation commode fit voile de Bandan à Malaca, & en chemin conquist vn basteau de Iauiens. Approchant de Malaca il obtint promesse de Pierre de Far gouverneur qu'on n'emprisonneroit ni lui ni aucun de sa suite, tellement qu'il y alla mouiller l'anchre : mais incontinent apres leur arriuee Far fit saisir tous leurs biens, disant n'auoir donné saufconduit que pour les personnes. Or auint sur ces entrefaites que quelques ambassadeurs de Panaruke, (c'est vn royaume & membre de la grande Iauē) estans venus pour traiter alliance avec Pierre de Far, s'esmut vne querelle entre leurs seruiteurs & les Malacans, laquelle fut cause que Garsie recouura ses biens, par le moyen qui s'ensuit. Ces ambassadeurs estans logez en la bourgade de Quelin, aucuns de leurs domestiques osterent vn iour certaine somme de deniers à vn Malacan, lequel s'escriant à l'aide, ceux de la ville proche de Quelin y acoururent : & comme ils contestoyent ensemble, passa le lieutenant de iustice en la citadelle, lequel voulant appaiser ce debat fut tué par les Iauiens. Lors courut vn bruit par la ville que ceux de Panaruke & autres de la grand' Iauē habitans en Malaca s'estoyent liguez ensemble pour changer l'estat : ce que'estant venu aux oreilles de Pierre de Far il y courut avec quelques soldats, craignant qu'il n'y eust de la trahison. En y allant il trouua la noise presques assoppie : d'autant que Garsie Henriquez & sept de sa troupe furent les premiers en place avec les armes, & empescherent les Iauiens de passer oultre, mesmes en tuerent douze. Par ainsi lors que Far arriua il n'eut autre chose à faire qu'à renvoyer les vns & les autres en leurs logis. Et pour recompense du bon deuoir fait par Garsie en telle necessité, ses biens lui furent relaschez, en baillant caution d'une somme de ducats, si George de Menesez vouloit rien quereller à l'auenir : & par ce moyen Garsie se maintint paisible en Malaca.

18. A v mesme temps s'esmut guerre entre les Rois de Dachen & d'Auru voisins. Celui d'Auru n'ignorant pas les grādes raisons que les Portugallois auoyent de ne desirer pas beaucoup la prosperité de son aduerser partie, enuoya son ambassadeur en Malaca demander secours à Pierre de Far, & remonstrer le moyen asseuré qui se presentoit de venger les torts receus du Roy de Dachen : lequel considerant de sa part le danger qui le menaçoit, proposa de rompre ceste alliance pratiquée par son ennemi, & faisant de necessité vertu rechercher d'amitié le gouverneur de Malaca, en offrant lui rēdre les prisonniers, la galere, & tout ce qu'il auoit prins aux Portugallois. Mais afin de ne perdre aucun de ses seruiteurs en ceste negotiation, & pour mieux persuader à Pierre de Far qu'il marchoit rondement en cest affaire, il donna ceste commission à deux Portugallois, dōt Antoine Caldeire estoit l'un. Deuant que les enuoyer, il leur fit de grandes caresses, outre l'ordinaire, & leur declaira pourquoy il n'enuoyoit autres gens qu'eux, avec charge

Retraite de Garsie Henriquez à Malaca, & cōme il y fut traué.

Ce qui auint entre le Roy de Dachen & Pierre de Far gouverneur de Malaca.

de dire au gouverneur de Malaca qu'il renuoyast querir les prisonniers, la galere, & l'artillerie trouuee tât en ceste galere, qu'en la nauire rompue en la fosse de Dachen, & en la citadelle de Pacem : qu'en recompense de la restitution de ces choses il ne demandoit sinon l'amitié des Portugallois. Lors que Caldeire surgit au port de Malaca, Pierre de Far auoit promis secours à l'ambassadeur du Roy d'Auru : mais oyant le discours de Caldeire, il chargea d'auis, pensant desia tenir les prisonniers, la galere & l'artillerie, ce qu'il estimoit (preferant l'utilité à l'honneur) de beaucoup plus grand auantage qu'enuoyer secours au Roy d'Auru. Cela estant trouué bon par les principaux de la citadelle, Jacques de Macede Amiral de Malaca, despesché pour aller secourir le Roy d'Auru, fut retenu iusques à ce que lon verroit quel train prendroit ceste nouvelle negociation. Mais telle façon de proceder desplaisoit fort à Martin Correa, lequel comme ami & familier de Pierre de Far l'exhorta de bien peser cest affaire, parce que toutes les offres du Roy de Dachen sembloient estre friuoles, & n'auoit enuoyé Antoine Caldeire sinon pour sauoir si lon secouroit le Roy d'Auru, ou s'ils ioignoient leurs forces pour le chassier de ce qu'il auoit fait à ceux de la galere, ce qu'il craignoit assez euidentement, ayant encores deuant les yeux la punition des Mores de Longu. Les raisons de cest auis estoient, qu'il conoissoit par experience que les Mores ne demandoient la paix, sinon quand ils n'en pouuoient plus. Que le Roy de Dachen couuoit quelque ordure en son cœur, veu que iusques alors il auoit poursuiui les Portugallois à toute ouurance, tefmoin la desfaite de George Britio, le siege de la citadelle de Pacem, la prinse de la galere de Soufe, & autres actes d'irrecôciliable hostilité. Pierre de Far goustant ceste remonstrance fit appeller Caldeire, & le pria bié fort en presence de Correa de dire s'il auoit point quelque finistre opinion du Roy de Dachen. Caldeire respondit que non, louant ce Roy iusques là, de protester que rien ne le destourneroit de porter telle response qu'il plairoit au gouverneur, pour la grande confiance qu'il auoit en vn si debonnaire Prince. Lors Pierre de Far se laissa persuader que le Roy de Dachen cheminoit de pied droit en ce pour parler, puis que Caldeire en disoit tât de bien, & estant libre ne faignoit de retourner sans craindre d'estre fait esclave : sur tout quand il entendit Caldeire declairer franchement, que si on le vouloit retenir dauantage & l'amuser à Malaca, il s'en iroit plustost sans response que rompre la promesse faite au Roy & aux autres Portugallois prisonniers de retourner vers eux. Ainsi donc il fut expédié avec lettres de Far au Roy de Dachen, par lesquelles il acceptoit son amitié pour & au nom du Roy de Portugal, qu'à l'auenir il lui en monsteroit les preuues au besoin, & que pour le present il l'asseuroit de ne donner secours au Roy d'Auru. Pour l'asseurer dauantage, Far enuoya vn Portugallois marié & habitué en Malaca, lequel scauoit la situation & le langage du royaume de Dachen, pour mener Caldeire & le rendre au port de Pacem, où le Roy de Dachen estoit lors, afin de remettre Caldeire entre ses mains. Mais estans partis de Malaca ils surgirent en vne isle, où cuidans faire aiguade ils furent surprins & tuez par les insulaires : au moyen dequoy

dequoy leur message & les lettres furent perdues. Apres le depart de Caldeire, Pierre de Far donna congé à l'Ambassadeur d'Auru, s'excusant qu'il falloit racheter les Portugallois esclaves, retirer la galere & grand nombre d'artillerie appartenante au Roy de Portugal: que sans cela il assisteroit treivolotiers au Roy d'Auru contre celui de Dachen & contre les autres ennemis. L'Ambassadeur fort indigné de telle réponse, contraire à ce qu'on lui auoit promis au commencement, sortit de Malaca fort secrettement, & de nuict, dont le gouverneur fut marri craignant l'indignation du Roy de Auru bon ami des Portugallois. Afin donc de l'adoucir & contenter, Fernand Morales lui fut enuoyé avec vn gallion & quelques gens, pour faire les excuses: mais l'Ambassadeur arriva plustost, tellement que ce Roy pensa que les Portugallois vouloyent secourir son ennemi: pourtant fit-il embarquer son armee pour aller combattre celle de Dachen, laquelle estoit à l'anchre au port de Pacem. En ceste route l'Amiral d'Auru surprit vn parau, dans lequel estoit vn des Portugallois prisonniers apres la mort de Soufe, lequel estoit enuoyé par le Roy de Dachen vers Pierre de Far lui dire qu'il renuoyast querir les prisonniers, l'artillerie & la galere: ce qu'il faisoit afin d'empescher que les Portugallois & le Roy d'Auru ne se ioignissent ensemble pour le desfaire, & au cōtraire apres les auoir desbandez trouuer moyen de les ruiner l'un apres l'autre. Ce messager fut enuoyé par l'Amiral au Roy d'Auru, lequel le retint, de peur que s'il alloit à Malaca Pierre de Far n'enuoyast gens au Roy de Dachen. Sur ces entrefaites Fernand Morales vint surgir au port où estoit le Roy d'Auru, qui ne voulut enuoyer ni souffrir que pas vn de ses gens allast vers le gallion de Fernand, tant il estoit despité contre les Portugallois. Morales ayant attendu quatre iours, resolut se mettre au hazard, & aller vers le Roy, ce qu'on lui desconseilla par beaucoup de raisons: ce nonobstant il se presenta au Roy duquel il fut bien veu & caressé, avec protestation de ne trouuer mauuais l'accord du gouverneur de Malaca avec le Roy de Dache, puis qu'il estoit question de recouurer bon nombre de prisonniers, vne galere & quantité d'artillerie: qu'il ne lairroit pour cela d'estre tousiours fidele ami des Portugallois. Mais c'estoit vne fainte, car il delibera retenir Fernand Morales & le gallion, si son armee estoit desfaite par celle du Roy de Dachen, afin de se venger sur Fernand du refus de Pierre de Far. Au contraire si son armee demeueroit victorieuse, il eust donné gracieusement congé à Fernand, afin de s'entretenir en l'amitié des Portugallois. Or l'un ni l'autre n'auint: car les deux armées s'estans heurtees en mer, se despartirent avec perte esgale, sans que l'une eust la victoire sur l'autre. Par ainsi le Roy d'Auru entendant que ses forces tournoyent en arriere, donna congé honnestement à Morales & au Portugallois venu de Dachen, & enuoya deuant vn messager dire à Pierre de Far les mesmes paroles qu'il auoit tenues à Morales, lequel arrivant à son gallion trouua le pilote & les soldats prests à hausser les voiles, pensans qu'on l'eust arresté prisonnier, & que les Mores se preparassent pour s'emparer du gallion. Au reste, ces Rois d'Auru & de Dachen ayans refroidi leur cholere, s'accorderent tout soudain ensemble, & deuiurent plus grands a-

mis que iamais. Quant à l'amitié des Portugallois que celui de Dachen recherchoit si curieusement, c'estoit vne pure dissimulation, & ne tendoit qu'à s'en preualoir contre le Roy d'Auru : car apres la paix conclue entre eux, il se repentit d'auoir laissé aller les trois Portugallois en Malaca, dont Pierre de Far ne sceut rien, à cause que personne des siens n'alloit à Dachen, & qu'il auoit toute autre opinion de ce Roy, par le rapport de Caldeire. Par faute donc de bié descouurir la verité des choses, le Roy de Dache demeura impuni, lequel eust esté ruiné du tout, si Pierre de Far & le Roy d'Auru eussent ioint leurs forces pour lui faire la guerre.

Nonio de Cugne estoit Viceroy des Indes, son embarquement pour y aller, & ses amours duuant la nauigation.

No v s'auons veu sur la fin du dixseptiesme liure, que le Roy de Portugal estoit mal content des procedures tenues contre Mascaregne. Dessors donc il delibera d'oster à Sampajo la charge de Viceroy qui lui auoit esté donnee par arrest des Iuges de Cochim. Et de fait auant mesmes que Mascaregne, fust arriué en Portugal, Nonio de Cugne conseruateur de la faculté royale, & gentilhomme de grande maison, fut nommé Viceroy des Indes, par la bouche du Roy Iean troisieme. Or pource que l'hiuer auoit esté fort aspre, il lui fut impossible s'embarquer si tost, ains attendit iusques au dixhuitiesme iour d'Auril de l'an mil cinq cens vingthuit, qu'il haussa les voiles, menant vne flotte d'onze vaisseaux, asauoir neuf nauires, vn gallion, & vn basteau de guerre, acompagné de Simô de Cugne son frere, designé Amiral des Indes, de Pierre de Cugne aussi son frere establi capitaine de Goa, de Carlie de Sa ordonné gouuerneur de Malaca, & Fernâd de Leme nommé general des nauires du trafic de Batticala en Ormus : item de Frâcisque Deze, Iean Freire, Frâcisque Mendoze & d'Antoine Saldaigne. Bernardin de Sylueire commandoit au gallion, & Alfonse Azambuge au basteau. Il y auoit en ceste flotte trois mille soldats, grand nombre de gentilshommes & seruiteurs domestiques du Roy, tous en tel equippage que iusques alors on n'auoit veu si belle troupe faire le voyage des Indes. Auant qu'ils approchassent des Canaries, la nauire de Ieã Freire coula en fond par l'accident qui s'ensuit. Elle estoit suiue de la nauire de Simon de Cugne, laquelle poussee d'un vent assez fort heurta par deux fois si rudement l'autre (sans que le pilote la destournast, comme il eust peu aisément faire) que la prouë s'entr'ouurit, & en moins d'une heure fut si pleine d'eau que lon ne pût mettre dehors le basteau, & eut-on beaucoup à faire à ietter l'esquif, dedans lequel Iean Freire avec quelques vns des principaux & plus habiles entrerent. Quant aux autres qui restoyent en grand nombre il fut question d'auiser aux moyens de se sauuer, l'un faisoit vn coffre, l'autre vne quaisse, & à coups d'espee charpentoyent dessus pour s'en acommoder, dont plusieurs furent blesez mortellement, tant ils se pressoyent, chascun s'estimât heureux de pouuoir tenir vne planche pour se mettre dessus à l'extremité qui estoit proche : cat finalement les vagues vindrent à couurir tellement la nauire qu'elle coula du tout en fond avec des cris horribles de cent cinquante personnes qui deualerent en la mer avec ce grand vaisseau. Entre autres ne sont à oublier vn mari & sa femme, qui menoyent quand & eux trois ieunes enfans. Le pere & la mere voyans la mort presente mirent leurs

leurs enfans au milieu & s'embrassans estroittement ces cinq ensemble, avec des clameurs qui perçoient les nues, perirent quand & le reste, sans que les autres nauires peussent en approcher à temps, pource qu'elles en estoient à vne lieue loin. Mais voyans la nauire baisser, chascun acourut promptement en des esquifs, & sauua-on cinquante personnes qui se tenoyent à des aix & autres pieces, attendans la volonté de Dieu par milles vagues. Le pilote, cause de tout le mal, se sauua à nage: & ne fut chastié d'une si malheureuse faure, pource que lon ne sauoit bonnemēt comme ce naufrage estoit auenu, & n'en descouurit-on rien que fort long temps apres. Le Viceroy suiuant sa route, alla faire aiguade en l'isle S. Iacques, où le gallion de Sylueire ne se trouua point: car des le premier iour du desembarkement il s'estoit escarté, & cinglant d'autre vent que la flotte alla surgir au long de Zofala, où il trouua de la vase qui l'atrelta, & les soldats voulans prendre terre furent taillez en pieces par certains Mores qui les attendoyent à la descente. Apres que le Viceroy eust fourni sa flotte d'eau douce & de victuailles, que deux carauelles porterent iusques en l'isle susnominee, il se remit à la voile, & en la coste de Guinee laissa derriere sa flotte la nauire d'Antoine Saldagne qui ne cueilloit vent si bien que les autres, lesquelles perdoient beaucoup de temps à l'attendre, disant qu'il y auoit moins d'inconuenient en la perte d'un vaisseau que de toute la flotte: puis fit deployer en chascue nauire la voile du trinquet, & laisserent Saldagne & les siens bien tristes. Or Saldagne prenant tourage en telle extremite fit changer tant de fois la charge de la nauire de proué en poupe, & au contraire, que finalement il donna tel contrepoids que son vaisseau commença à flotter de mesme viffesse que les autres. Dauantage, il donna tel ordre par tout, que le pilote, le maistre, les comites & matelots regagnerēt peu à peu le temps perdu, fortifiant les soldats à leur deuoir, & assistant aux malades de si bonne sorte, qu'il deuint l'un des meilleurs & plus estimez capitaines de marine que lon eust sceu trouuer. Le Viceroy fut battu de deux tourmentes auant que descouurir l'isle de Saint Laurent, laquelle il laissa à main gauche prenant droit la route de l'Inde basse: au contraire Francisque Deze, Azambuge & Mendoza firent voile entre l'isle & la coste d'Ethiophie, tellement qu'ils gaagnerent le port de Mozambique, excepté Azambuge lequel fit naufrage au bord d'une islette prochaine, mais toutes les personnes se sauuerent. Simon de Cugne estoit arriué à Mozambique quelques iours auparauant, & pource que l'hiuer commençoit en ce quartier ils demurerent la. Quant à Garfie de Sa, la premiere tourmēt l'escarta si loin de la flotte qu'il pensoit estre perdu: mais ayant du depuis vent assez propre il se vid pres de la coste del'Inde le dixseptiesme iour d'Octobre, apres auoir souffert beaucoup, & l'eau douce commençant à luy defaillir. Saldagne arriua au port de Batticala le vingtquatriesme du mesme mois, ayant perdu soixante hommes morts de disette & diuerses maladies. Il se refraischit quelques iours puis fit voile en Cochim, & y arriua le premier. Le Viceroy, Pierre de Cugne & Fernand de Leme surgirent ensemble, apres grandes difficultez, au port de saint Iacques en l'isle de S. Laurent, sur la fin d'Octobre, où ils

trouuerent vn Portugallois qui leur dit estre de la compagnie de Manuel Lacerde, la nauire duquel s'estoit rompue contre vn banc de sable, & auoit attendu l'espace d'un an, sans qu'aucun vaisseau Portugallois fust apparu, sinon celui de Saldagne, lequel ne s'estoit approché, craignant les insulaires: tellement que Lacerde se faschant auoir diuisé sa troupe en deux, pour aller voir si du costé de l'isle regardant l'Erhiopie il descouueroit rien d'auantage. Que quant à lui il estoit demeuré seul en ce port n'ayant peu suiure ses cōpagnons, se contentant fort des insulaires qui lui assitoient & tenoient bonne compagnie. Comme le Viceroy & les autres capitaines faisoient aiguade en ce port, suruint vne toutmente qui fit eschouer la nauire du Viceroy, tellement qu'elle perit, exceptez les gens, dont vne partie entra en la nauire de Pierre de Cugne, l'autre en celle de Leme, & partis de là le dixiesme de Nouembre surgirent pres l'isle de Zanzibar. Mais ils entroient de nuit en vn goulfe entre deux isles, tellemēt qu'au matin les pilotes n'eussent conoistre par où ils estoient entez, ni quelle issue ils pourroyent trouuer. Sur cela le Viceroy fit descendre le capitaine de ses gardes en terre, pour s'enquerir de quelque passage pour regagner le large: mais les insulaires le contrainquirent se retirer plus viste qu'il n'estoit venu. Pierre de Cugne y alla puis apres avec plus grandes forces, à la venue desquelles les insulaires s'enfuirent rous, tellement qu'il fut impossible de trouuer personne, à faute de quoy le Viceroy & ses gens fussent morts de disette auant que pouuoit sortir du goulfe. Mais par la hardiesse de Ieā & Tristan Melio avec Ieā Roderic leur seruiteur, qui se mirent en embusche pour attrapper de nuit quelqu'un du pays, ils surprindrent vn vieillard, lequel ils amenèrent dans l'esquif qui les attendoit au riuage. Pierre de Cugne le fit asseurer par vn trucheman qu'on ne lui feroit mal quelconque, seulement qu'il s'employast à donner ouuerture aux nauires pour eschapper de ce goulfe. Le vieillard promit s'y employer, estāt pilote de son estat: ce qui vint tres-à propos aux Portugallois, qui fussent demeurés là, sans ce pilote, car les autres insulaires n'eussent eu l'adresse de cestui-ci, lequel des le lendemain tira les nauires par vn canal fort estroit, au grand estonnement de tous. Estans dehors ils donnerent congé à leur pilote, & gaignerent le port de Zanzibar, où ils seiournerent quelque temps pour se rafraischir, estant le pays commode & fertile. Le Viceroy se voyant hors d'esperance d'arriuer bien tost en Inde, & craignant d'estre surpris du mauuais temps sur la mer, delibera de passer l'hiuer à Mombaze, assise à l'embouchure d'une riuere d'eau douce, avec vn bon haure pour les nauires: ce qui n'estoit pas en Melinde, au contraire il n'y auoit rade qui fust seure. Cela resolu il laissa deux cens malades à Zanzibar pour la charge d'Alexis de Souze, afin qu'il eussent loisir de se refaire en vn air meilleur qu'autre de ceste coste, & que lui aussi peust aller plus viste. Il surgit au port de Melinde, où il fut bien recueilli du Roy, & y trouua le capitaine Botel en vne batque, qui alloit cerchant Louys de Menefez au long de ceste mer. De Melinde le Viceroy enuoya demāder permission au Roy de Mombaze d'hiuerner au port de sa ville, rendāt raison pourquoy il n'auoit peu s'arrester à Melinde, avec promesse de reconoistre ce bien. Mais le

Roy

Roy de Mombaze croyant que ce fust quelque finesse pour le deposseder de son estat, ne voulut rien accorder : à cause duquel refus le Viceroy resolut d'y entrer par force & y hiverner, par l'avis de son frere, de Fernand de Leme & des autres capitaines qui le lui persuaderent.

10. P O U R l'execution de ceste entreprise il fit monstre & trouua huit cens *Mombaze prouvé par N^o 4* Portugallois & deux cens Indiens seiournans en Melinde, lesquels le suiui- *mo de Cugne, en son armet* rent avec six cens hommes, que le Roy de Melinde lui fournit. Sur vn soir ceste armee se mit à la voile, en quatre nauires, l'une du Viceroy, les trois autres de Leme, Botel, & des Indiens. Le lendemain matin ils arriuerent à la fosse de Móbaze, laquelle fut sondée par Pierre de Cugne, qui y alla avec vn basteau bien équipé & quarante soldats. A l'entree ils trouuerent vn boulevard de pierre de taille, garni de huit canons, lesquels furent incontinent laschez par les Mores qui gardoyent la place : mais le basteau qui vogoit de grande vistesse n'en fut endommagé, & s'en alla mettre au lieu ou les nauires deuoyent se rendre, sans en bouger. Et pourtant au leuer du vêt, le Viceroy fit tirer les anchres & hausser les voiles, comme firent aussi les autres capitaines, & entrerēt dās le canal maugré l'artillerie du boulevard, auquel le Viceroy ne voulut lors s'arrester, pour monstre aux Mores qu'il ne le soucioit pas d'eux, & ce pēdant leur faire pēser qu'il ne cherchoit point la guerre, ains seulement que le Roy permist aux Portugallois d'hiverner en son haure. Pour cest effect il attendit iusques au soir, sans tirer plus auāt vers la ville, attendant si personne viendrait de la part du Roy, lequel n'auoit veine qui y tendit, estant destourné aussi par ses conseillers, alleguans qu'il valoit mieux abandonner la ville que la rendre volontairement, & que les Portugallois en sortiroyent, y ayans passé l'hyuer. Suiuant cest auis ils vuidèrent la ville des biens & personnes inutiles au combat, & n'y laisserēt que les gens de guerre. Le Viceroy voyant le Roy arresté en son opinion, & qu'on ne lui apportoit autres nouuelles, conut bien qu'il falloit iouer des cousteaux : mais pour en estre mieux resolu, sur le soir Pierre de Cugne fut enuoyé pour reconoistre la ville, & sauoir en quel estat estoient les affaires. Si tost que les Mores le sentirent approcher, ils coururent en grand nombre vers le riuage, & descoucherent force flesches enuenimees, dont quelques Portugallois furent blesez, & furent cōtrains se retirer vers la flotte. Comme le Viceroy s'appresboit pour aller prendre terre au mesme endroit où ceste escarmouche s'estoit dressée, suruint vn Melindien qui demouroit à Mombaze, lequel lui monstra les dangers qu'il y auoit de tendre de ce costé, d'autant qu'il falloit entrer en l'eau iusques aux genoux, auant que toucher le bord, & que les ennemis l'attendoyēt de pied coy avec leurs flesches empoisonnees : mais qu'il seroit meilleur descendre pres d'une mosquee, où n'y auoit incommodité quelconque, estant le riuage plat, escarté, & aisé à gagner. Il adiousta que le Roy de Mombaze estoit acompagné de trois mille hommes, & que pour tous répars il n'auoit qu'un fort hors de la porte, garni de quatre ou cinq mortiers de fer gouuernez par un canōnier Portugallois : mais qu'au reste les ennemis estoient si mal asseurez, qu'à la premiere charge ils tourneroyent le dos. Le Viceroy conclud sur cela d'assail-

lir Mombaze le lendemain matin, & donna à son frere six cens Portugal-
lois harquebuziers pour la pluspart & trois cens Indiens pour l'auantgarde,
marchant avec le reste des troupes à l'arrieregarde. Il descendirēt de grand
matin vers la mosquee, à vn trait d'arbalestre loin de la ville, sans trouuer
aucune resistance, pource que les ennemis les attendoient d'un autre costé.
En approchant du fort, le canonnier se voyant visiter de si pres, & n'ayant
que deux pieces assez mal montees, quitta la place, comme firent aussi les
Mores qui la gardoyent & se retirerent dedans la ville. Le Roy voyāt qu'il
ne pourroit resister aux Portugallois s'enfuit avec son peuple en si grād' ha-
ste, qu'ils laisserent vne partie de leurs biens cachez en terre, en lascherent
quelques pieces par les chemins, & emporterēt ce qu'ils peurent: puis se re-
tirerent à demi lieue de là, où le Roy se retrancha avec tout son cap. Quād
le Viceroy apperceut Mombaze vuide, il ne voulut passer outre pour lors,
ains l'abandōna au pillage, dōt quelques vns s'enrichirēt, & s'en retourne-
rent en Portugal, sans aller plus auant. Mombaze prinse de ceste façon, sans
mort d'homme de part ni d'autre, le Viceroy fit fortifier les plus foibles en-
droits, barrant les auenues pour la pluspart, pource qu'il auoit trop peu de
gens pour garder tant d'entrees. Sur tout il se fortifia du costé de la mer,
puis se logea au palais du Roy, & au bout de quelques iours enuoya Rode-
ric de Leme assaillir le boulevard de la fosse, lequel fut forcé, la pluspart de
la garnison mise au fil de l'espee, & l'artillerie chargée es nauires. Roderic
& quelques autres y furent blesez de coups de fleches frottees de poison,
dont ils moururent tost apres. Depuis cela ceux du camp du Roy de Mom-
baze commencerent à faire leurs courses, & entrer de fois à autre dedans
la ville, cōtraignans les Portugallois d'estre en armes iour & nuict: toutes-
fois par la vaillance de Jaques & Tristan Melio les ennemis furent telle-
mēt effroyez qu'ils ne continuerent pas leurs courses si souuent. Vne autre
incommodité suruint, aſauoir la maladie qui se fourra parmi les Portugal-
lois, & dura iusques à la fin de Mars, dont moururent trois cens septante
hommes, entre autres Pierre de Cugne & bon nombre de noblesse.

EN ce temps Lopez de Sāpajo passoit l'hiuer en la ville de Goa, estāt lui
mesme gouuerneur de la citadelle, pour remedier à beaucoup de desor-
dres que les capitaines faisoient, comme de vendre iustice à beaux deniers
contans, imposer nouueaux tributs sur les marchādises, & autres exactions
à la grand foule du peuple. Sampajo mit bast tout cela, dont les Mores re-
ceurent tel contentement que les nauires arriuoyēt de tous costez au port
de Goa, au moyen dequoy les reuenus de la douanne acurent. Il reforma
l'estat en plusieurs autres dependances necessaires, pour le repos & embel-
lissēmēt de tout le pays. Or pource qu'il y auoit disette de viures en la ville,
que les garnisons posées en quelques gouuernemens circonuoisins tenus
par Zabaim Dalcam arrestoyent pour leur fourniture, Tristan de Ga fut
enuoyé en ambassade vers Zabaim, auquel il fit present d'un harnois com-
plet graué & fait à fueillages, deux masses d'argēt doré, vne charge de gros
coral, & l'asseura que les Portugallois seroyent rousiours prests à lui faire
seruice. Zabaim remercia bien fort Sampajo, & commanda par lettres aux capi-

capi-

*Ordre donné
aux affaires de
Goa par Lo-
pez de Sāpa-
jo & le nauis-
ge des Portu-
gallois en la
coste de Cal-
cut.*

capitaines des gouuernemens de donner passage aux viuandiers de Goa, & laissassent couper aux habitans tout le bois d'ot ils auroient faict : par ce moyé la ville fut pourueue. Au reste, pour empescher que ceux de Calecut & du pays voisin n'enuoyassent leur poyure dehors, Sampajo enuoya vne galere & cinq brigantins pour garder la coste sous la charge de Simô Melio, lequel y demeura attendant Antoine Mirande, qui se ioinct à lui sur la fin de Septembre. Lors ils receurent nouuelles de la part de Iean Deze capitaine de Cananor, qu'environ le vingtiesme du mesme mois vne flotte de treize brigantins & caturus avec vne galliotte partis de Cochim auoit esté poullée d'un vent de trauesse contre la coste de Calecut, à l'embouchure d'un fleue nommé Chatua, où tous les vaisseaux s'estoyent brisez, les soldats noyez ou tuez, ou menez prisonniers à Calecut, dont le Roy estoit deuenu si fier qu'il dressoit vne puissante armee, a cause dequoy les Mores de Cananor cōmençoient à leuer la teste, & pourtant estoit besoin d'y pouruoir, & reprimer l'ennemi de bonne heure.

22. SAMP AJ O auerti de ce naufrage partit de Goa le premier iour d'Octobre, laissant Mirande se rafraichir & commander en la ville. Il fut suivi de Fernand Roderic Barbe, Lopez de Mezquite, Henri de Macede & d'Antoine de Leme avec leurs gallions, outre sept brigantins & son grād galliō, nommé sainct Denis. Estât arriué au mont Deli il trouua Simon Melio, lequel l'auertit auoir receu lettres de Cananor que pres de Termapatan y auoit vne armee de cent trente voiles, asauoir soixante paraus de guerre, & le reste bastiaux de charge plains d'espiceries qu'ils portoyent à la Mecque. Les paraus faisoient compagnie à ces marchans, iusques à ce qu'ils fussent hors de l'Inde, & auoyent pour general de ceste flotte vn vaillant Seigneur More nommé Cutial de Tanor, estimé Sainct entre les Mahumetistes, pource que de nouueau il estoit reuenue de la Mecque, où il estoit allé en pelerinage visiter le corps du faux prophete Mahumet. Melio eut charge de tirer vers le Canal de Cananor, Sampajo ayant resolu en soy mesme d'y attirer Cutial, & lui donner bataille, en laquelle il esperoit obtenir le dessus, mais il vouloit que les Mores de Cananor fussent tesmoins du cōbat. Les brigantins furent enuoyez au long de la coste, & les gallions s'elargirent en mer. Sequeire, capitaine Indien, lequel auoit charge d'un Catur, fut enuoyé reconoistre l'ennemi, afin de le suiure avec toute la flotte s'ils esloignoient: mais Sequeire trouua les paraus en plaine mer, pource que Cutial ayât sceu que Melio tenoit la route du mont Deli avec si peu de vaisseaux, delibera de l'attrapper, estimât en venir aisément à bout avec tel nombre de paraus, & que cela fait il s'empareroit en moins de rien de la citadelle de Cananor. Avec ceste deliberation il fit voile vn matin, & descourant les gallions de Sampajo estima que ce fust celuy qu'il cherchoit, contre lequel tous les paraus commencerent à voguer. Incontinent que Sampajo les apperceut il se fit apporter ses armes, donna le signal du conseil, où se rendirent les capitaines & gentilshommes qui le trouuerent s'armant pour combattre: & lui tout debout commence à leur dire, qu'il deliberoit donner bataille ce iour là. Tristan Norogne, Lopez d'Azeuede & Hector de Sylueire dirent

*Causas & vi-
tiores de Sā-
pajo en cesti
mesme cōte.*

incontinent que c'estoit temerité de s'attacher à vne si puissante armee, ains faisoit rassembler tous les vaisseaux, afin de pouuoir soustenir le choc des ennemis, s'ils entreprenoyēt s'approcher de trop pres. La pluspart des voix panchoit de ce costé : quelques autres estoient d'avis contraire, fondé sur raisons bien pertinentes, notamment sur la commodité du combat. Comme les vns & les autres debatoyent pour maintenir leur dire, Sequeire survint, lequel conseilla d'assaillir Cutial avec les brigantins seulement & par les costez de sa flotte : puis les galliōs suruiēdroyēt pour enfoncer le milieu à coups d'artillerie. Sampajo trouuoit cest avis fort bon, mais il ne vouloit le suiure que du consentement des capitaines & gentilshommes. Dōcques comme il demouroit tout pēsis, Jean de Soire auditeur general, ayāt mesme desir, luy marcha sur le pied le regardant entre deux yeux, avec assez de signe qu'il suiuiſt l'avis de Sequeire. Lors sans plus lōg discours, Sāpajo tout ioyeux & de grand courage commence à dire, Or sus, freres & amis, quāt à moy ie veux combattre : donnons dedans au nō de nostre Seigneur : qui voudra acompagner le Viceroy & la banniere royale, me suiue. Disant cela, il charge vne harquebuzes sur son espaule, & saute dedans la fuste du capitaine Taful, n'estant suiui d'autres gentilshommes que de ceux de son galliō, car ceux qui auoyēt esté de cōtraire avis ne bougerēt, non pas qu'ils eussent peur, ains pource qu'ils ne vouloyent que Sampajo eust l'honneur d'auoir gaigné quelque bataille, estant encores despitez cōtre lui à cause de ce qui estoit auenu au fait de Mascaregne. Or apres que Sampajo se fust embarqué, faisant reueuē de ceux qui le suiuyoient il trouua quatorze brigantins & catur, avec trois qui arriuerent de Cananor : dequoy il fit deux bataillons, donnant l'auantgarde à Simon Melio, & retenant l'arrieregarde pour soy. Lors ils commencerent la bataille à coups de canon, & ioignās de plus pres en flanc tirerēt tāt de coups de mousquets & de harquebuzes que ils rompirent par deux fois les ennemis, enfondrans quelques paraus. Ils en acrocherēt sept qui furēt bruslez de feu artificiel, ensemble la pluspart des Malabares qui estoient dedans : brief en moins de deux heures les soixante paraus furent mis en route, & s'escarterent les vns vers Cananor, les autres en haute mer, laquelle estoit couuerte de corps, & tainte du sang des occis, au nombre de mil ou douze cens. Les Portugallois eurent plus de six cens prisonniers, vingt ou vingteing paraus, cinquante pieces d'artillerie, & ne firent aucune perte notable. Ceste bataille fut dōnce si pres de Cananor qu'on la pouuoit voir du riuage, ce qui contrista merueilleusement les Mores y trafiquans, pource qu'ils perdirent ceste iournee bon nombre de leurs parens & amis. Le Roy de Calecut craignant que ceste victoire n'encourageast Sampajo à entrer dedans son royaume du costé de Cranganor, y enuoya soudainement le Prince son successeur avec vne armee, au deuant de laquelle le conseruateur Messie despēcha des troupes, qui partirent de Cochim pour garder que ce Prince n'entraſt trop auant. Quant à Sampajo, ses capitaines lui ayās desconseillé de suiure les fuyards, il s'en retourna vers son gallion, & auant que d'y paruenir rencontra Tristan Norogne, Lopez d'Azeuede & Hector de Sylueire, qui depuis son embarquement en la fuste pour donner bataille, s'estoyent bien repentis de ne l'auoir

fuiui, tellement que certain temps apres ils entrerent en vn basteau pour s'y trouuer : mais ce fut trop tard, dont ils furent confus, & se retirerent en leur gallion, où (de crainte que Sampajo ne les accusast au conseil du Roy) ils dressèrent certains articles contre luy, lesquels ils enuoyerent au Roy l'année suiuite. Sampajo qui ne pensoit nullemēt à cela, les recueillit gracieusement, encores qu'ils fussent demeurez derriere, & leur fit autant d'honneur qu'aux autres gentilshōmes qui auoyent vaillamment combatu avec lui. Au reste, craignant que les ennemis ne se ralliasent il attēdit deux iours en haute mer, ne voulant prendre tētre à Cananor : & quand il vid qu'ils fuyoyent le combat, & s'estoyent (peut estre) retirez a couuert en quelque canal d'eaux douce, il les alla chercher, enuoyant Simon Melio avec neuf brigantins pour descouurir, lesquels il suiuit acompagné des gallions. Melio descouurit pres de terre douze paraus, desquels ceux de dedans s'enfuirent biē tost, ensemble les habitans du village prochain : tellement que les Portugallois bruslerent paraus & maisons, abatirent tous les palmiers d'a-l'entour : puis allerēt à Chatua, ou ils bruslerent dixsept paraus & le village, tuerent plusieurs des habitans, pour venger la mort de ceux qui auoyent esté sacmentez apres le naufrage de la flotte de Cochim, dont a esté parlé au chapitre precedent. Ils traiterent de mesme plusieurs autres endroits de terre ferme, Sampajo les suiuit en mer, pour donner secours au besoin. Cela fait il mouilla l'anchre à Cranganor où il trouua les troupes de Cochim, & sachant que le Prince de Calecut n'estoit là que pour garder le passage, il ioignit ces forces nouuellemēt venues à ses compagnies, pour aller a Porqua, & ruiner ceste ville ensemble le Seigneur d'icelle, qui estoit l'un des plus grands coursairez de l'Inde, ayant tousiours force caturz bien equippez & fourni de gens & d'artillerie, par le moyen de quoy il s'estoit fait riche. Sampajo donc resolut de saccager ce lieu, & en donner vne si bonne cūtte aux soldats, qu'ils eussent moyē d'estre plus à leur aise puis apres. Il en auertit les capitaines, afin de les rēdre plus deliberez & disposez à faire ce voyage. Pour mieux executer, ils partirent assez tard de Cranganor faignans aller à Cochim : mais sur le commencement de la nuit ils tournerent visage vers Porqua, pres de laquelle toutes les troupes se trouuerent au point du jour, & incontinent prindrent terre, & sur le champ Sampajo fit entendre aux soldats qu'il leur donnoit le pillage : ce qui leur haussa tellement le cœur, que maugré les fanges, où ils entroyent iusques aux genoux, & autres incommoditez du chemin, ils approcherent du lieu, sous la conduite de Melio qui menoit l'auantgarde. Mais ils ne trouuerent point de resistance, parce que le Seigneur estoit dehors avec ses gens de guerre : par ainsi les habitans, gens mal adroits, sans armes, & surprins, abandonnerent incontinent la place, & se sauuerent qui ça qui là. Les Portugallois entrez dans la ville coururent soudain au palais du seigneur, qu'ils saccagerent en vn instant, & y trouuerent grand somme de deniers, & y eut tel soldat qui eut à sa part plus de huit mille ducats, le moindre n'ayant pas eu moins de huit à neuf cens ducats, encores qu'ils fussent plus de mille hommes. Sampajo emporta lors deux cens mille escus, & les autres ca-

pitaines ne s'oublierent pas. Outre les deniers en or, il y eut grâd butin d'argent monnoyé & en masse, de pierres precieufes, de riches draps de Perse & des isles de Maldiuar. Les femmes & vne sœur de ce Seigneur de Porqua, pompeusement ornees de ioyaux de grand pris, de pendans d'oreilles, de bagues à col, de brassielets d'or es mains & es iambes, furent deschargees de tout ce bagage & retenues prisonnières. En apres la ville & tout le pays d'autour furent desolez d'estrange façon, toute l'artillerie enleuee, huit paraus & deux catur emmenez. Sampajo & ses gens s'en retournerent bien fourrez à Cochim, où ils se donnerent du bon temps, tādīs que le Seigneur de Porqua deplorait ses pertes, qui l'afoiblirent tant que depuis il n'osa rien entreprendre contre les Portugallois, auparavant molestez en diuerfes fortes par ses ruses & moyēs. Toutesfois il ne voulut iamais pacifier avec Sampajo, craignant que le Viceroy, que lon attendoit en Inde pour l'annee prochaine, n'annullast ce qui auroit esté accordé par son deuancier. Il attendit donc la venue de Nonio de Cugne, auquel il fournit vne grād' somme de deniers pour la rançon de ses femmes & de sa sœur. Tandis que Sampajo se reposoit, Garfie de Sa & Antoine Saldagne arriuerent au port de Cochim, & racontèrent à Sampajo ce qui leur estoit auenu en leur nauigation depuis l'embarquement du Viceroy, lequel estoit demeuré (comme tous le presumerent, à cause du temps incommode) en quelque port de la coste d'Ethiopie. Lors Sampajo delibera de recommencer la guerre contre les Calecutiens, & pour cest effect mena toutes ses forces par mer à Cananor, puis enuoya deuant Simon Melio, avec charge d'aller mettre le feu en douze paraus de Calecut anchrez pres du mont Deli en vn port nommé Marauié. Incontinent Melio s'embarqua menant soixante bons soldats en cinq brigantins, & assaillit trois cens Mores, lesquels apres quelque resistance furent mis en route & les paraus bruslez. Cela fait, Melio reprit la route de Cananor, où il fut pourueu du gouuement de la citadelle, Deze enuoyé pour commander en celle de Goa, & Mirande en la coste de Calecut, où il alla avec quelques vaisseaux & deux cens hommes.

*Deliberation
de Sampajo
pour s'emparer
de Diu : la vi
sion qu'il eut
sur la flotte
du Roy de
Cambai, &
ce qu'il fit puis
apres.*

SAMPALIO s'estant retiré au hault de Goa receut vne lettre de Francisque Pereire capitaine de Chaul, qui l'auertissoit que cinquante fustes de Diu venoyent d'ordinaire iusques à la fosse de Chaul, descendoient en terre & fourrageoyent le plat pays, tellement qu'il y auoit danger que la citadelle ne demeurast biē tost en leur puissance, si lon n'enuoyoit du secours. Cest auertissement esmut Sampajo de se mettre à la voile, contre l'avis de Antoine Saldagne, disant qu'un Viceroy des Indes ne se deuoit ainsi hazarder à tous coups en entreprises desquelles vn simple gētilhomme pourroit venir à bout. Mais Sampajo consideroit que ceste flotte de fustes auoit de grands moyēs, & qu'en la desfaillant ce seroit faire vn bon seruice au Roy. Pourtant il partit le cinquiesme iour de Ianuier mil cinq cens vingtneuf avec cinquante deux voiles, de gallions, galeres, galliotes, brigatins, & catur, chargez de deux mille Portugallois & de grand nombre d'Indiens. A son arriuee à Chaul il trouua que les fustes s'estoyent retirees. Or d'autant que plusieurs insistoient qu'on les deuoit poursuiure, il despescha vn capitaine de

de Catur pour aller descouvrir les ennemis, lesquels il descouvrit pres d'une riviére nommée Maim, ayans soixante trois vaisseaux bien fournis d'hommes & d'artillerie, sous la charge du general Haliffa, & en vint faire son rapport à Sampajo lequel estoit encorés en la fosse de Chaul. Sur cela Sâpajo descendit en terre, & entra dedâs la citadelle, pour se refouldre avec les capitaines. Le mesme iour arriuerent pres de Chaul treize fustes enuoyees par Haliffa pour conoistre l'intention de Sampajo. Encorés que les fustes visissent les gallions, si s'en approcherēt elles hardimēt, en faueur du temps qui empeschoit par vn vent de trauerse les Portugallois de sortir hors du fleuve: mesmes ceux des fustes tirerent quelques coups de canon, à cause de quoy Hector de Sylueire fut enuoyé pour les reprimer, à la venue duquel ils se retirerent viftement vers leur general, qui se douta lors que Sampajo lui presenteroit bataille. Le conseil des capitaines & gẽilshommes Portugallois assemblé en la citadelle de Chaul, Sâpajo leur dit: Seigneurs, vous sãvez bien que Diu est la plus forte place de toute la coste de Cambaje, & la clef de toute l'Inde, en laquelle le Roy de Cambaje peut entrer aisémēt: c'est là qu'aspirent les Turcs pour descendre plus bas puis apres. Pourtant quand ie considere ce dangereux voisinage & fascheux ennemi, ce seroit (ce me semble) faire beaucoup pour le seruice du Roy, que de s'emparer d'une telle ville. Dieu nous en ouure maintenant les moyēs, sans beaucoup hazarder les soldats, & avec peu de despẽse: c'est que la plupart des habitants de Diu sont embarquez sur leurs fustes avec leur meilleure artillerie. Melich Tocan qui commande en la ville n'a pas grand' experience, & est encorés tout neuf à la guerre, tesmoignages asseurez de mon opiniõ, à cause dequoy aussi ie suis venu iusques en ce haure, non point simplement pour chercher les fustes & les cõbatre, car l'un d'entre vous peut executer plus difficile entreprise, mais aussi pour m'approcher si pres de Diu, que l'espere, à l'aide de nostre Seigneur, vous y voir tous en bõne prosperité. Il me semble dõc que nous deuons laisser les fustes, & en nostre route faindre de cingler droit à Ormus, puis tout soudain faire voile à Diu, laquelle tendra incontinent les mains, estimant que sa flotte aura esté mise en route par nous, & n'osera iamais se mettre en defense. Des l'age de seize ans iusques à present i'ay porté les armes, & say à peu pres comment les affaires de la guerre se doiuent manier. Si donc vous m'estimez de quelque experience & iugement, ie vous prie me croire ceste fois. Là dessus Antoine Saldagne & Garfie furent priez de dire ce qui leur en sembloit, lesquels respondirēt ne pouuoir conseiller qu'on allast droit à Diu, ains falloit combattre l'armee nauale, parce que les soldats ennemis estans es vaisseaux se monstroyent si insolens que si les Portugallois s'adressoyēt ailleurs, ces ennemis, estimãs qu'on eust peur d'eux, approcheroyēt de Chaul, ruineroyent la ville & citadelle. Que d'aller à Diu ce n'estoit gueres biẽ aisé, n'estant croyable qu'une place de telle importance fust despourueue, & n'en deuoit-on ainsi presumer sans l'auoir veu: & qu'au contraire il falloit estimer les Mores assez prudēs pour conseruer une telle ville, & y faire bõne garde, tandis qu'ils verroyent les Portugallois si proches d'eux. Que d'aller heurter aux portes sans entrer

dedàs seroit se flestrir d'une hôte perpetuelle: ioint que telle navigation & entreprise deuoit estre plustost commise à vn simple capitaine qu'au Vice-roy des Indes. Presques tous les autres conseillers firent de ce mesme auis, excepté Hector de Sylueire qui suiuit celui de Sampaio, lequel dit alors resoluement son intention estre de combattre les fustes, & que ceux qui ne le voudroyent suiure demeurassent. Il partit incontinent avec toute la flotte, ayant donné la conduite des vaisseaux de rame à Hector de Sylueire, afin de costoyer le riuage, & lui s'eslargit en mer avec les gallions, afin d'enclorre les fustes & leur couper chemin & retraite de tous costez. Sur le soir du cinquiesme iour de feurier, on descourrit treize fustes au long de terre, tenans la route de Chaul, lesquelles ayans descouuert l'armee commencerēt à se retirer. Sampaio conut alors que leur flotte n'estoit pas loin, & pourtant se mit en vn brigantin avec deliberation de donner bataille: puis alla trouuer Sylueire, pour l'auertir de ce qui estoit requis pour le lendemain. Et afin d'encourager les capitaines, il fit publier par toute l'armee, que quiconque des capitaines acrocheroit le premier vne des fustes de Diu auroit cēt ducats pour loyer de sa vaillance. Le lendemain au point du iour l'armee se trouua pres de Bombain, où les soixante quatre fustes estoient derriere vne pointe de terre. Hector de Sylueire defendit à tous ses capitaines de tirer aucun coup de canon aux fustes, sinon quand il n'y auroit plus d'esperance de les pouuoir acrocher, qui fut vn stratageme profitable aux Portugallois: car s'ils eussent fait iouer leurs pieces des le commencement, les ennemis se fussent retirez sans riē perdre, à cause de la vistesse de leurs vaisseaux. Sylueire se doutant desia de leur fuite, & qu'ils se rengeroyent pres de l'embouchure d'une riuere vers le Septentrion, commanda à huit capitaines de gagner ceste embouchure si tost que les ennemis seroyent rompus. Cela fait il commence à voguer avec les capitaines & gentilshommes de sa fuite, qui estoient lors en bon nombre. Haliffa general des soixante quatre fustes les auoit disposees en trois bataillons, au dernier desquels il estoit. Voyant approcher Sylueire il fit descharger l'artillerie avec telle futie que le ciel, la mer & la terre trembloient: ce nonobstant les Portugallois auançoient chemin sans tirer vn seul coup: ce que voyāt Haliffa il conut qu'on le vouloit ioindre & venir aux mains, chose qu'il redoutoit. Pourtant tacha-il de se retirer à l'endroit d'où ses fustes estoient parties, mais le vent estoit contraire. Lors Haliffa se voyant à trois doigts pres de sa ruine, saute dans vne petite fuste, quittant la siene grande, & se retire des premiers, laissant vne partie de ses fustes au combat: car les Portugallois estans approchez, le brigantin d'Antoine Fernand chargé de bon nombre de gentilshommes donna de telle roideur contre la plus grande fuste qu'en l'acrochant il lascha incontinent prinse, en telle sorte neantmoins que Fracisque de Barros fut le premier qui entra dedàs la fuste, où il se trouua en merueilleux danger pour vn peu de temps. Mais le brigantin s'estant reioint ses cōpagnons le secoururent: & sur ce combat vn pot de feu artificiel tombé de la hune de ceste fuste en bas se creua pres de la pouppe, & prenant à quelques pouldres prochaines, fit vn estrange tintamarre, ietta dans la mer tout le

le couuert de ce costé avec ceux qui y estoient. Francisque de Barros fut enleué & porté au brigantin, ayant esté atteint d'un coup de iavelot à l'espaule, comme quelques autres furent blesez de fleches & de cailloux. Sylueire & les autres capitaines suruindrent qui serrent les ennemis de si pres que les vns se rendoyent, les autres se precipitoient en mer, les autres estoient tuez au combat. Brief apres grand meurtre, ils mirent le reste en route, & les suiurent de si pres, que quarante six fustes leur demurerent avec l'artillerie. Onze autres se sauuerent, dont Haliffa recueillit les sept avec la siene, & gaigna vn lieu nommé Tana, d'où il fit voile vers Baccain. Les quatre qui restoyent se sauuerent dans le fleue de Nagotane, où elles furent prinſes par ceux de Chaul. Apres ceste desfaite Sampajo mena ses galliôs au goult de Braim, & d'autre part Sylueire ioignit à sa galere les fustes cōquiles sur les ennemis & se retira vers Sampajo qui le receut en grande allegresse, & fit diuers honneurs & presens aux capitaines & gentilshommes qui s'estoyent trouuez en ceste braue rencontre, où les Mores receurent vne lourde bastonnade, pource qu'ils se reposoyent entieremēt sur ceste flotte. Tous les capitaines Portugallois assemblez, Sampajo remit en auant la deliberation d'aller à Diu, alleguant pour raison concluante la desfaite de ceste flotte du Roy de Cambaje, à l'occasion dequoy ceste ville demouroit desnuée, & seroit prinſe ou rendue en peu de iours, si lon en approchoit. Mais ceste victoire ne lui seruit de guerres, car Saldagne & Garſie de Sa furent d'avis contraire, estans suiuis de plusieurs: & la dispute s'eschaufa tellement que Garſie protesta d'empeschier que Sampajo ne rauiroit point l'honneur au Viceroy de Cugne, qui estoit enuoyé es Indes specialement pour s'emparer de Diu: & pourtant qu'il ne faisoit point parler de siege ni d'approche, autrement il demandoit acte de ce que Sampajo voudroit entreprendre dauantage. Saldagne & ceux de son parti dirent le mesmes, & y en auoit de si eschaufez par les nouuelles de la venue du Viceroy, qu'ils ne daignoient pas mesmes regarder Sampajo, tant ils l'auoyent à contrecœur. Lui de sa part craignant pis n'osa repliquer à leurs protestes, se sentant trop foible, & laissa en arriere son entreprise sur Diu: qui fut vne chose mal entendue, d'autant que si les Portugallois y fussent allez, la place leur tendoit les mains, & n'eust pas fait espandre tant de sang, ni despendre tant d'argēt, comme elle fit depuis. Mais force fut à Sampajo de dissimuler, & pour sa iustification il demanda au secretaire vn acte de ce qu'il auoit proposé au conseil deuant & apres la desfaite de Haliffa, pour faire conoistre au Roy qu'il auoit procuré de sa part la prise de Diu. Cest acte fut souſſigné de ceux qui auoyent assisté es deux consultations. Puis apres Sampajo voulut aller assaillir vne ville grande & riche en la coste de Cambaje, nommée Tana: mais par l'indiscretion d'Antoine Saldagne, qui voulut entrer dans la riuere de Maim (sur laquelle ceste ville est bastie) avec son galliô lequel fut arresté sur le sable, & salut que tous s'employassent à le tirer de là, ceste entreprise tourna en fumee, ioint que les soldats & capitaines mesprisoyent Sampajo avec vne insolence toute manifeste, quoy qu'il les amadouast & cherist en diuerſes sortes. Or pource que l'hiuer approchoit, & que l'inten-

tion de Sampajo estoit de se retirer en la ville de Goa, n'ayant plus rien à faire en ceste coste, à quoy vn de ses lieutenāns ne satisfit aisément, il laissa vne armee de vingt brigantins & de deux galliottes avec trois cens hōmes à Hector de Sylueire, pour continuer la guerre, & sur la fin de l'esté se retirer en Chaul: puis il fit voile & surgit au haure de Goa enuiron la fin du mois de Mars.

Flotte de Calecut desfruite par Antoine Mirande & Christofle Melio.

DE Goa Sāpajo despescha trois galliōs chargez de marchādise appartenāte au Roy, pour aller à Ormus, sous la charge de Fernād Deze, ayās pour capitaines Antoine de Leme & Lopez de Mezquite. Il leur commāda que au retour ils courussent la coste de Diu, & fit embarquer Garfie de Sa pour aller prendre possession du gouuernement de Malaca, lui recommandant sur toutes choses la deliurance de Martin Alfonse Melio prisonnier de Codouaz Cā, ainsi que nous l'auōs veu ci dessus. Christofle Melio fut enuoyé en la coste de Malabar avec vne galere & six brigātins, pour se ioindre avec Antoine Mirāde, & faire ce qu'icelui cōmāderoit. Estans ensemble, ils cinglerent vers le fleuve de Chiale, où il y auoit vne grande nef du Roy de Calecut, chargee de poyure pour la Mecque, & douze paraus qui l'accompnoyēt, fournis de mil ou douze cens Malabares, archers & harquebuziers pour la plufpart. Mirāde entra dedans le fleuve avec les brigantins & caturus qui voguoyent en rang de bataille aux deux riuages: & sans se soucier de l'artillerie des ennemis (qui estoient au milieu de l'eau, ayans attaché leurs paraus quatre à quatre autour de la nef) approcherent de si pres que quatre paraus furēt acrochez, & y eut vn cruel confict: mais apres grād meurtre de Mores, les Portugallois ietterent force engins à feu, dont les paraus furent incontinent embrasez, & ceux de dedans contrains se lancer en l'eau, où les vns furent tuez à coups de picques & d'harquebuzes, les autres gaignerent terre à bien nager & s'enfuirent fort loin, laissant la bourgade au commandement des Portugallois, qui y mirent le feu, & ruinerent tout le pays d'alentour. La nef & les huit paraus entiers furent enuoyez à Cochim, le poyure deschargé en la faicturerie, & les paraus furēt accommodez tellement qu'ils seruirēt depuis de brigātins. Apres ce premier exploit, Mirāde & Melio se departirēt pour guerroyer avec plus grand auantage, l'vn tendant au Midi, & l'autre au Septentrion. Vn iour sur le tard, Melio descourrit vne flotte de cinquante paraus de Calecut, & alla tout à l'heure trouuer Mirāde pour donner l'assaut à ceste armee: ce qu'ils firent le lendemain, tellement qu'ils conquirent quatorze paraus aux despens de ceux qui les gardoyent, & furent menez à Cananor, pour estre changez en brigantins. Cela fait, ces deux capitaines coururent encores l'espace de quelques iours ceste coste, laquelle ils laisserēt nette sur la fin d'Auril, que Melio fit sa retraite à Goa & Mirāde à Cochim.

Guerre d'Hector de Sylueire au Roy d'Ante de Cambout.

HECTOR de Sylueire laissé en la coste de Cambaje delibera se rendre maître d'une forteresse à deux lieues loin de la mer sur la riuere de Negotanc, où y auoit garnison de six cens cheuaux & de deux mil hommes de pied. Mais il ne pūt aller iusques là, pource qu'à vne lieue pres l'eau estoit si basse que les caturus ne pouuoyēt flotter dessus. En contr'eschange il brusla
six

six villageſes deux coſtez de l'embouchure de ceſte riuere, & tua grand nombre de gens, dôt les nouuelles portees en la fortereſſe, le capitaine & la garniſon ſe mirēt en campagne pour courir ſus aux Portugallois, qui acheuoyent de ruiuer le dernier village. Sylueire ſachant qu'il auroit trop d'ennemis ſur les bras ſ'il combatoit en campagne, n'eſtant ſuiui que de trois cens Portugallois, ſit retirer ſes gens vers la mer, ſe tenant à la queue pour auoir l'œil par tout. Incontinent il vid à ſes talons les ennemis, ſur tout ceux de cheual qui l'eſcarmouchoyent ſans ceſſe: mais il les ſouſtenoit brauement, & touſiours gaignoit chemin. Sur ce il auint qu'un de ſes picquiers ſ'eſcarta de la troupe, & lors vn homme de cheual acourut vers lui la iaueline au poing, pour le terraffer, à quoy il obuia ſi dextrement que du premier coup il lui perça l'eſpaule & le porta de ſon cheual en terre, puis empoigne la iaueline, monte ſur le cheual, & tue vn autre More qui acouroit au ſecours, le perçant de part en part, encores qu'il fuſt armé d'un bon iacque de maille. Ces deux beaux coups rēforcerent les autres ſoldats Portugallois, & retindrent en pied l'ennemi qui n'oſa paſſer plus auant. Pour recompenſe d'un ſi valeureux fait d'armes, ce ſoldat fut fait cheualier, & depuis eut grand credit & nom entre les capitaines. Sylueire ſ'eſtant rembarqué ſit voile au long de la coſte, & print la route de Bazain, à cinq lieues de là, & demie lieue auant en terre ſur vn fleuve: puis commir Chriſtoſte Correa pour aller avec ſon brigantin reconoiſtre l'eſtat de ce lieu. Icelui eſtant deſcendu en terre vid vne bourgade fermee de paliffades, munie de deux rempars & de trois bouleuards de terre, avec ſoixante groſſes pieces d'artillerie, ayant pour garniſon trois mille pietons & cinq cens hommes de cheual bien armez. Ce nonobſtant les ſoldats importunerent tant Sylueire qu'ils le contraignirent de les mener là, & gaignerent terre, maugré la reſiſtance de ceux qui gardoyent le riuage, puis marcherent vers la paliffade, où les ennemis combatarent vaillamment l'eſpace de quelques heures: mais en fin ils furent chaffeſz iuſques dedās la bourgade, où ils ſe rallierent, & firent teſte mieux que deuant, attendans le ſecours de Haliffa qui ſ'eſtoit mis en embuſche pour ſurprendre les Portugallois. De fait, il ſortit avec bonne compagnie pour les venir charger, ce qui ſit retirer Sylueire & ſes troupes en campagne, où il les diſpoſa pour ſouſtenir le choc, mettant les harquebuziers en front, qui du bruit de leurs baſtons à feu eſtonnerent tellement les cheuaux de Haliffa qu'impoſſible fut aux maiſtres de les retenir, tellement que de là ſ'enſuiuir leur route. Sylueire ne les voulut pas ſuiure à cauſe que ſes gens eſtoyent las, ains apres auoir ſaccagé & ruiné tout le plat pays, regaigna le riuage & emplit ſes vaiſſeaux du pillage de Bazain, eſtonnant de telle forte les habitans de ſix lieues à l'entour, que lon ne voyoit perſonne, nō plus que ſi c'euſt eſté quelque deſert. Le gouuerneur de Tana eſfroyé comme les autres enuoya demāder la paix à Hector de Sylueire, offrant payer tous les ans quatre mille ducats de tribut, & deſlors fournit vne demie annee, baillant oſtages pour ſeureté de l'autre moitié. Pource que la fin de l'eſté approchoit, Sylueire ſe retira au port de Chaul, où il deuoit hyuerner.

*Esbat des Mo-
lucques en lan
mil cinq cens
vingtneuf.*

CONSIDERONS maintenant l'estat des Molucques & de Malaca sur le commencement de ceste mesme année mil cinq cens vingtneuf. Nous auons veu ci deuant le peu d'assistance que Gonsalue d'Azeuede & ses gens firent à George de Menefez gouuerneur de la citadelle de Ternate, & qu'ils ne penloyent qu'à leurs affaires particuliers. Toutesfois leur presence & ombre brida les Espagnols & Tidoriens qui ne faisoient pas la guerre si hardiment: mesmes par fois les vns alloient banquetter avec les autres sans autre fauscôduit, sinon d'une bâderolle blanche qu'ils desployoyent à l'approcher, pour signal de leur vnion. Pour tout cela neantmoins le capitaine Fernand de la Tour ne voulut oncques rendre les Portugallois prins avec la galliotte de Baldaje, dont Menefez estoit fort mal cōtent. Sur ces entrefaites deux Espagnols se presenterent à la porte de la citadelle de Ternate, pensans y entrer pour boire & passer le tēps avec quelques soldats: mais ils furēt saisis par les gardes, & ferrez en prison par le cōmandemēt de Menefez, qui se doutoit de trahisō, pource que ces deux n'auoyēt demādē fauscôduit, ni ne pouuoient alleguer cause suffisante de leur venue. Fernand auerti de ceste detention, demāda licence à Menefez de lui enuoyer gens pour traiter de leurs affaires: & despescha tost apres vn ambassade, qui se fit acompagner autant que s'il eust esté enuoyé par quelque grand Roy: car il faisoit sonner des trōpettes & cornets, & marchoyēt deuant lui deux heraulds d'armes, & force gens deuant & derriere en riche equippage. Le sommaire de ceste magnifique legation fut, que Fernand trouuoit fort estrange l'emprisonnement des deux Espagnols, demandant qu'ils fussent relâchez. Auant que faire respōse, Menefez entretint l'Ambassadeur quelques iours, lui faisant bonne chere à sa table, & par fois lui enuoyāt des presens en son logis. Or vn iour entre autres, cest Ambassadeur estant sur la fin du dîner, Menefez voulant plaïsanter, lui enuoya vn grand pasté, dans lequel estoient enclos vn chien & vn chat vifs, avec charge au porteur de dire, puis que ces deux animaux si aduersaires estoient neantmoins de bō accord en ce pasté, que les Espagnols & Portugallois ne deuoyent s'entre-guerroyer, veu mesmes qu'ils estoient Chrestiens & seruiteurs de deux Princes parens, alliez & amis. L'Ambassadeur enuoya demander à Menefez, auquel des deux animaux il comparoit les Espagnols: la response fut qu'il les comparoit au chat qui de ses grifes auoit pigné le chien assez rudement, mais que le chien aussi pouuoit l'aualler à deux ou trois morceaux: qu'au reste l'ambassadeur allast dire à son maistre, qu'ō le prioit de rendre les Portugallois, sinon les Espagnols demeureroyent. Ce fut l'expedition de l'Ambassadeur, dont Fernand cuida creuer de despit, & ne voulut lâcher ses prisonniers. Quelques iours apres, George de Castre arriua en l'isle de Ternate, ayant passé par Burneo, & menant vn bastéau chargé de marchandises pour la facturerie, & des munitions pour la citadelle. Ce rafraichissement remit dessus Menefez, lequel enuoya Castre faire vne course cōtre la flotte des ennemis laquelle il mit en rōute, puis se retira au port de Ternate. Au cōmencement de l'an mil cinq cēs vingt neuf, Azeuede fit ses apprests pour retourner à Malaca, & nonobstāt les remonstrāces, prieres & offres

offres de Menefez lui & Lionel de Leme s'embarquerent : mais en petite compagnie, ceux de leur suite s'estans arrestez à Ternate, par le moyen des grandes esperances & belles promesses dont Menefez les entretint. George de Castre partit aussi pour aller querir secours es isles de Bandan : & quant à Azeuede il print la route de Bachian, pour recueillir & mener quand & soy Manuel Faucon qu'il y auoit laissé, lequel ne pût r'entrer en grace avecques Menefez qui se plaignoit merueilleusement de lui. Au reste, lors que les Espagnols & Portugallois estoient sur le point de s'entreguerroyer plus cruellement que iamais, specialement es Molucques, suruint vn accord entre l'Empereur & le Roy de Portugal qui assopit presques tout. Nous descrirons ici ce que les historiens Espagnols en recitent d'un cōmun accord. Apres la sentēce donnee sur le fait des Molucques par les deputez del'Empereur au proufit de leur maistre, le Roy Iean troisieme fit son possible d'empeschē que les Espagnols n'y allassent trafiquer : sans toutesfois pouuoir rien obtenir, comme les discours precedens le monstrent. Quelque temps apres l'Empereur espousa Isabelle sœur du Roy, lequel reciproquement print à femme Catherina sœur de l'Empereur. Par le moyen de telles alliances le negoce de l'espicerie se refroidit vn peu, & ce pendant le Roy poursuuiuoit vers son beau frere d'estre laissé paisible en la possession des Molucques, à quoy l'Empereur, par l'auis de quelques conseillers, ne vouloit pas entendre, ioint que quelques vns talchoyent par diuers rapports inciter l'Empereur à poursuivre ceste nauigation, & mesmes de faire quitter la place aux Portugallois, accusez d'y auoir rudemēt traité les Espagnols qu'ils auoyent peu attrapper à leur auantage. Le Roy nioit que ses suiets se fussent ainsi portez, au contraire alleguoit plusieurs exemples de l'insolence des Espagnols. Sur ces contestations, l'Empereur qui auoit vne infinité d'affaires sur les bras, à cause des guerres contre le Roy de Frāce, & pour l'estat d'Alemagne, & d'Italie où il vouloit aller en grand appareil pour se faire couronner, & setrouuant lors bien court de finances, engagea ce qu'il pretendoit aux Molucques, & tout le trafic de l'espicerie, pour la somme de trois cens cinquante mille ducats que le Roy Iean fournit l'an mil cinq cēs vingtneuf, sans adiouster à l'obligation aucun temps, laissant le proces en mesme estat qu'il estoit demeuré au pont de Caja. Le Roy chastia le docteur Azeuede de ce qu'il auoit promis les deniers, sans autremēt terminer l'obligation : qui sembloit lui preiudicier & tenir les choses en suspens, à l'auantage des Espagnols. Or cest engagement fut assez secret, & contre la volonté de plusieurs du conseil d'Espagne, qui fauoyent le proufit que le public & les particuliers pouuoient tirer de ce trafic des Molucques : mais l'Empereur passa oultre, sans que lon ait peu sauoir au vray qui l'a esmeu depuis à ne point restituer au Roy les trois cens cinquante mille ducats, & quereller son droit, ou en iustice, ou par les armes, comme lon auoit commencé : mesmes il fut plusieurs fois conseillé de le faire, & nommēmēt en l'an mil cinq cens quarante huit, les procureurs de la diette se trouuans à Valledolid le supplierēt de dōner à ferme pour trois ans au royaume d'Espagne ce trafic des espices, à la charge qu'ils rembourseroyent le Roy de

Portugal des trois cens cinquante mille ducats, & qu'ils descharge-
royent toute l'espicerie au port de la Corugna, designé par l'Empereur
des le commencement de ceste negociation, & les trois ans expirez il
disposeroit de ce trafic selon que bon lui sembleroit. La réponse de l'Em-
pereur (qui estoit lors en Flandres) fut de defendre qu'on ne lui parlât plus
de cest affaire: dont plusieurs furent estonnez & offensez, les autres estime-
rent qu'il y auoit quelque communication plus secrette entre l'Empereur
& le Roy de Portugal, & que les trois cens cinquante mille ducats auoyét
esté suiuis de plus grandes sommes, fournies puis apres par le Roy pour l'a-
chapt absolu des Molucques, l'Empereur ayant tant d'armes, de pésonnai-
res, garnisons, & seruiteurs à entretenir, que l'or d'Orient & d'Occident n'y
pouuoit suffire, pour les raisons que chascun fait assez remarquer de soymes-
me. Or deuant cela & depuis aussi plusieurs porterét grand' enuie aux Por-
tugallois pour ce trafic, dont la descharge est establie à Lisbone & Anuers:
ce neantmoins la iouissance leur en est demeurée iusques à present. Voila
quant à l'estat des Molucques. Reste à parler de celui de Malaca, duquel
George Capral auoit esté gouuerneur auant la venue de Pierre de Far en-
uoyé de Sapajo. Au comencement de Ianuier l'an mil cinq cens vingtneuf
Capral & Gasie Henriquez s'embarquerent en vn mesme ionc avec plu-
sieurs gentilshommes de leur suite, & arriuerent pres de Cochim où Ca-
pral delibera se retirer, n'osant passer plus outre à cause des vents de Nor-
dest qui lui donnoyent en proue. Gasie voulut faire du braue, & voguer
côtte vent pour gaigner le port de Goa: mais apres auoir eschappé le nau-
frage par deux ou trois fois, il tourna viftement voile vers Cochim. Or
pource que son bastteau estoit trop grand & trop chargé il ne pût entrer de-
dans le canal, tellement que Gasie fut contraint le laisser à l'anchre, tandis
qu'il print terre: mais le vent se renforça, & esmût la mer de telle sorte l'es-
pace de trois iours & de trois nuits, que le bastteau perit, & y eut perte de
cinquante mille ducats pour Gasie, lequel desmeura desuiué, n'ayant autre
chose que la cappe & l'espee. Encores pour l'acheuer de peindre, comme
on dit, le Viceroy de Cugne le fit emprisonner à cause de ses mauuais de-
portemens es Molucques, & l'enuoya l'année suiuite pieds & poings liez
en Portugal, où il eut prou d'affaires à garentir sa teste. Gasie de Sa estoit à
Cochim durant ceste tourmente laquelle appaisée il monta en sa nauire
suiuite d'un ionc qui portoit son bagage, & print la route de Malaca. Ce
ionc se brisa au sortir du haure, & falut charger le bagage dedans la na-
uire. Apres que Gasie fust arriué, Pierre de Far lui remit la capitaine-
rie de la citadelle, & fit seiour en la ville iusques au mois de Septem-
bre, qu'il se mit à la voile & gaigna l'Inde basse au mois de Novembre en-
suiuant.

*Nouveaux
efforts du Roy
de Dachen
contre les Por-
tugallois, & ce
qui s'en ensui-
uit.*

LE Roy de Dachen auoit enuoyé dire à Pierre de Far qu'il estoit prest
de rendre au premier gentilhomme, qui viendroit à son haure, la galere, l'ar-
tillerie & les prisonniers. Or voyant que personne ne venoit, & n'en'tendoit
aucunes nouuelles, il delibera d'en sauoir la raison, & despescha homme ex-
pres avec lettres à Sanaje Raie, Bandare ou iuge de Malaca, son ancien

ami

ami & pensionnaire, pour le prier de lui escrire & descouvrir l'intention des Portugallois & leur nombre : pource que toute sa pensee tēdoit à trouver les moyens de les destruire, & s'emparer de leur citadelle, sans coup ferir. Sanaje l'avertit que Caldeire auoit esté renuoyé par Pierre de Far avec bonne response, & que pour la bonne opinion que les Portugallois conceuoient de lui, le secours préparé pour le Roy d'Auru estoit demeuré à Malaca, & que sans la venue de Garfie de Sa, Far eust commis gens pour aller querir la galere, l'artillerie & les prisonniers. Ce Roy resolut incontinent de demander la paix à Garfie, afin d'attrapper quelques Portugallois sous ce pretexte, pour les massacrer à son aise puis apres, & pour y paruenir enuoya son ambassadeur, lequel entré par sauſconduit à Malaca, auant que se presenter à Garfie, se poutmena par toute la ville, monté sur vn elephant, avec vn bassin d'or en main, dedans lequel estoient les lettres de son maistre à Garfie, & enuironné d'une grosse troupe de gens de pied & de cheual faisoit marcher vn heraud deuant soy lequel touchoit vn bassin, & de fois à autre crioit à haute voix que le Roy de Dachen vouloit pacifier avec celui de Portugal. Ceste solennité est acoustumee en ces lieux, quand il est question de quelque paix que lon estime asseuree. Apres auoir ainsi tournoyé il alla faire son ambassade, dōt le sommaire fut d'excuser le Roy touchant ce qui estoit auenu à Simon de Souſe, faire l'offre acoustumee, & demander que Garfie enuoyast quelque homme d'autorité pour confermer la paix, dautant que le Roy ne seroit iamais en repos qu'il ne vist les Portugallois trafiquans en son pays : priant Garfie de faire response à ceste fois, puis que le Roy n'en auoit receu aucune à tant de messages enuoyez auparauāt. Garfie croyant tout cela tresveritable & mis en auant sans dissimulation, fit bonne chere à l'ambassadeur, & l'expedia ensemble vn de ses gentilshommes avec response accordante aux demandes du Roy de Dachen, lequel fit toutes les caresses du monde à ce deputé de Garfie, & pour l'attirer encores dauantage lui donna deux riches bracelets d'or, & à ceux qui l'accompagnoient chascun vn, dont les nouvelles volerent incontinent à Malaca, tellement que chascun desiroit aller à Dachen. Mais si tost que ce deputé & ses gens se furent embarquez pour retourner à Malaca, le Roy les fit suiure & esgorger tous, si secretement toutesfois que personne n'en sceut riē que lui & les bouchers qu'il auoit mis en besongne. Garfie voyant que ses gens ne retournoyent point estima qu'ils s'estoyent noyez au retour, & en parloit ainsi, dont Sanaje avertit le Roy, qui renuoya vn autre ambassadeur à Garfie, le priant instamment d'enuoyer quelque personnage de qualite à Dachen pour confermer la paix. Ceste recharge esmūt tellement Garfie que sans communiquer l'affaire au conseil, il commit Manuel Pacheco qui parloit bon Malacan, afin d'aller à ceste negociatiō, & pource qu'il y auoit apparence de pouuoir trafiquer à grand proufit avec ceux de Dachen, il lui donna vn gallion tout neuf chargé de marchandise propre, dont vne portio appartenoit à Garfie, l'autre à quatre vingts Portugallois, lesquels s'embarquerent alaigrement avec Pacheco, estimans se faire riches à ce coup. D'autre costé Sanaje donne auis de tout au Roy, le conseille de saisir ce gal-

lion, l'assurant qu'icelui prins, la citadelle de Malaca ne pourroit subsister, n'ayant plus gueres d'hommes de defense, qui ne fussent malades & cassez. Si tost que Pacheco fust arriué au port de Dachen, le Roy qui auoit ia receu l'auertissement de Sanaje, enuoya sur l'heure grand nombre de lanchars bien equippez pour inuestir ce gallion. Lors les Portugallois se doubterent de trahison & en auertirent Pacheco, le prians de commander que chascun prinst les armes pour se defendre. Pacheco leur respondit en cholere qu'ils gardassent bien de rien entreprendre, & qu'un tel Roy n'auoit garde de penser à telle meschanceté. Ce pendant il y auoit desia tant de lanchars autour du gallion, qu'un coup de fiesche fut descoché & passa si pres des oreilles de Pacheco, qu'il conut, mais trop tard, qu'on lui disoit vray, pourtant se fit il apporter ses armes, & comme il vestoit vne chemise de maille vne autre fiesche lui perça le col tout outre. Alors les Mores approcherent avec grandes huez, entrerent de tous costez dedans le gallion, & faquirent prisonniers tous les Portugallois, auant qu'ils eussent moyen de s'armer & mettre en defense, sans qu'aucun d'eux eschappast, puis furēt menez au Roy, qui les fit massacrer tous avec ceux de la galere de Simon de Souste, & retint le gallion tout neuf & bien armé, tellement qu'il auoit lors plus d'artillerie qu'il n'y en auoit en la citadelle de Malaca, cōtre laquelle il enuoya vne flotte incōtinent apres ceste trahison, & fit dire à Garfie qu'il le remercioit du gallion, & le prioit d'enuoyer encores un brigantin, sinon il trouueroit moyen de le lui enleuer biē tost des mains. Brief ce Roy deuint si orgueilleux qu'il pensoit tenir desia les Portugallois en sa puissance, pour les traiter comme ceux qu'il auoit si meschamment trahis & tuez. Il conclud donc d'employer toutes ses forces pour forcer la citadelle de Malaca, poussé à ce faire par les auertissemens de Sanaje, qui promit lui liurer la citadelle: ce qu'il eust assez aisément executé, selon l'apparece humaine, sans un accident qui rompit le coup & chastia Sanaje de sa desloyauté. Quelques capitaines de Dachen courans avec leurs basteaux au lōg de la coste, trouuerent certains Malacans qui les menerent baquetter en un lieu nommé l'estang du Roy, & firent si bonne chere, que ces capitaines estans bien yures comptèrent aux Malacans la verité des choses susmentionnees, que tout se manioit par le conseil de Sanaje, & qu'un tel iour, tandis que Garfie & ses gens seroyent au temple, la citadelle seroit saisie par gens qui estoient prests, & que cela fait, l'armee prendroit terre afin d'exterminer tout ce qui resteroit de Portugallois en Malaca & es enuirs. Garfie fut bien tost auerti de ce discours par quelques vns qui s'estoyent trouuez au banquet, & assemblant son conseil fut resolu que lon tueroit Sanaje, avec le moins de bruit qu'il seroit possible. Comme Garfie vouloit sortir pour donner ordre à ceste execution, Sanaje & son gendre Tuan Mahumet entroyent en la citadelle. Ils furent incōtinent appelez, & ne firent difficulté de se presenter à Garfie, Sanaje estimant que lon ne scauoit rien de ses menées. Mais Garfie adressa sa parole à Tuan (qui entendoit & parloit le langage Portugallois) lui dit qu'il retiendrait son beau pere prisonnier, à cause de trahison, à quoy Tuan fit responce, Chastiez-le, s'il est coupable. A l'instant Sanaje fut empoigné

empoigné & lié, les meschâcetez lui furent declairees, & sans le garder davantage on le ietta du plus haut d'une tour à cinq estages en bas sur le pavé, & finit ainsi ses iours. Tuan esperdu voyant ceste execution fut assuré & consolé par Garfie, lequel le fit reconduire seurement en son logis, & donna ordre aux affaires pour recueillir ceux de Dachen & les traiter selon leurs merites. Ce supplice de Sanaje effroya tous ceux de la ville, & leur ramener la mort d'Vtetimutaraja du temps d'Albuquerque : par ceste nouvelle occasion les Portugallois furent plus redoutez qu'auparavant. Quant au Roy de Dachen il demeura confus, & fut contraint se contéter des trahisons passées, & attendre que le téps lui offrît nouveaux moyens. La veufue de Sanaje & son gendre Tuan Mahumet se retirerent bié tost apres sous la protection du Roy de Dugentane voisin de Malaca.

18. N o v s auons dit que Nonio de Cugne hyueima dedans Mombaze, où il perdit grand nombre de gens emportez de maladie. Sur la fin de l'hyuer, Simó de Cugne, Francisque Deze, & Francisque Mendoze partirét de Mozambique, où l'hyuer les auoit arrestez, vindrent trouuer le Viceroy & lui conterent que quatre cens de leurs soldats estoient morts : qui fut vne nouvelle occasion de tristesse aux Portugallois amoindris de plus d'un tiers en ceste nauigation, comme il appert par le discours des dixneuf & vingtiesme chapitres de ce liure. Encores craignoit-on que Garfie de Sa & Antoine Saldagne n'eussent fait naufrage. Or d'autant que l'esté comméçoit lors à finir en l'Inde basse, & que la nauigation vers icelle deuenoit bié tost périlleuse pour les nauires, le Viceroy cōclud d'aller hyuerner à Ormus. Ainsi qu'il vouloit s'embarquer arriua en vn bastéau Sebastie Fereire, enuoyé de Goa par Sampajo pour le chercher & auertir de l'estat des affaires. Le Viceroy l'auertit de la prinse de Mombaze, & pourquoy il faisoit voile vers Ormus, le priant de tenir l'armee presté, pour s'en seruir si tost qu'il seroit arriué. Le Viceroy estant arriué au port d'Ormuz fut magnifiquement recueilli du Roy : mais Xeraf commença à craindre plus qu'auparavant d'estre chastié de ses tyrannies, pensant (selon l'ordinaire de telle gens, qui ne viuent iamais qu'en crainte) que le Viceroy ne fust venu là sinon pour lui former son procez, & l'enuoyer pieds & poings liez en Portugal. Quelques iours apres ceste arriuee du Viceroy, suruint Manuel de Macede avec son gallion, & charge expresse du Roy de Portugal d'emprisonner Xeraf, à cause des plaintes que lon auoit de ses iniques deportemens, & qu'il l'aménast dedans ce gallion iusques en Portugal. Macede estant à soixante lieues d'Ormuz entendit que le Viceroy y estoit, ce qui l'arresta, craignant qu'on lui rauist l'honneur qu'il pensoit acquerir à la prinse de Xeraf. Voulût donc courir son entreprise, il se mit en vne barque avec certains amis, & commanda à son lieutenant de se trouuer au port d'Ormuz à iour qui fut nommé, en dedans lequel temps il esperoit executer sa cōmission & mener Xeraf droit au gallion, puis enuoyer copie de ses lettres au Viceroy, afin de le contenter, & reprendre la route de Portugal. Estant arriué vn iour de bon matin pres d'Ormuz il descendit fort secrettement, & s'en alla droit au logis de Xeraf dedans le palais du Roy, ayant commadé à vn sien seruiteur,

Arriuee de Nonio de Cugne au port de Ormuz, & l'emprisonnement de Raux Xeraf.

si tost qu'il le verroit avec Xeraf, de porter vne lettre au Viceroy, par laquelle il le sommoit au nom du Roy de Portugal, que tout promptement il enuoyast gens au logis de Xeraf pour affaire d'importance. Xeraf qui estoit en son logis receut Macede fort courtoisement, pource qu'il le connoissoit de long temps. Si tost que le seruiteur les vid en propos il courut porter la lettre au Viceroy, lequel en la desployant fut salué de Simon de Cugne presques hors d'halaine, qui le venoit auertir que Macede auoit faisi prisonnier Xeraf, & que le bruit en estoit ia semé par la ville. Le Viceroy troublé de telles nouuelles enioignit à Simon de Cugne d'aller avec bonne troupe prendre Xeraf, ce qui fut executé, & le trouuerent desia entre les mains de Macede, auquel ils l'osterent, mirent tous ses biens par inuentaire, & le menerent au logis du Viceroy, sans aucun tumulte en la ville, encores que Xeraf eust de grands moyens, & beaucoup d'amis, lesquels n'oserent rien remuer, craignans estre battus des Portugallois. Au reste, le Viceroy indigné de la hardiesse de Macede, qui ne l'auoit auerti de sa deliberation, le fit emprisonner, nonobstant sa commission, & par ce trait aussi fut appaisé le Roy d'Ormus, fort mal content de ce qu'on auoit fait ceste capture en son propre palais. Ces choses auindrent au mois d'Aoust, & au mesme tēps, comme le Viceroy se preparoit pour aller en l'Inde basse, le Roy d'Ormus fut auerti pour certain que Raix Bardadin son lieutenant, & gouuerneur de Baharen, estoit reuolté, refusant fournir les quarante mille ducats de tribut qu'il payoit tous les ans: & ce à cause de l'emprisonnement de Xeraf, prins par le commandement ou consentement du Roy d'Ormus & dedans son palais, dequoy il deliberoit se venger. Cest affaire ayant esté debatue entre le Roy d'Ormus & le Viceroy, qui en communiqua au conseil, apres beaucoup de disputes, fut resolu, puis que le Roy d'Ormus offroit hausser le tribut, qu'il payoit à celui de Portugal, de quarante mille ducats par an, moyennant que lon remist Baharen sous son obeissance, que Simon de Cugne iroit faire la guerre à Bardadin, avec charge de s'en retourner, si en dedans vn mois il n'auoit executé sa commission. Cugne partit au commencement de Septembre avec trois bastaux de guerre (l'un desquels demeura derriere) deux gallions, vn brigantin & vne fuste, ayans pour capitaines Manuel Albuquerque, Fernand Deze, Alexis de Souze, Lopez de Mezquite & Tristan Ataide, qui conduisoient trois cens hommes, tous nobles, & cheualiers pour la pluppart, bien armez & richement equippez.

Nauigation de Simon de Cugne à Baharen en la coste d'Arabie, où il est despart.

SIMON de Cugne apres auoir combatu contre les vents en ceste nauigation, surgit finalement au port de Baharen, où il trouua le general de la mer de Perse avec six brigantins & catur, lesquels gardoyent le port, pres duquel y auoit vne forteresse close de bonne muraille, de tours & boulevards, & d'un large fossé, dans laquelle s'estoyent retirez Bardadin, ses femmes, enfans & soldats. Voyant arriuer la flotte de Portugal, & presumant à quelle intention ce voyage estoit entrepris, fit dresser vne banderolle blanche en la forteresse, qui esmūt Cugne à enuoyer son trucheman demander que cela vouloit dire. Bardadin respondit ne s'estre souleué sinon à raison de l'emprisonnement de Xeraf son cousin: qu'il ne vouloit toutesfois en-

tret

trer en querelle & combat avec les Portugallois, estant affectionné seruiteur du Roy lean, & prest de rendre paisiblement la forteresse, moyennant qu'on lui laissast emmener ses femmes, enfans & soldats avec leurs bagages & armes. Cugne vouloit accepter ceste offre, mais les gëtilshommes & capitaines furent de contraire avis, disans qu'on l'accuseroit de couardise, qu'il falloit chastier ce More, ou du moins retënier tout le bagage, & lui donner la vie seulement, compris ses femmes, enfans, & soldats, qu'autrement il auroit moyen des'esleuer vne autre fois contre le Roy d'Ormus. Encores que cela despleust à Cugne, toutesfois il faignit le trouuer bon, & enuoya ceste respõse à Bardadin, lequel comme valeureux ne fit aucune repliche, ains fit dresser sur la muraille deux banderolles, l'une blanche, l'autre rouge, proposant par ce signal aux Portugallois la paix ou la guerre. Les capitaines demanderent la guerre, tellemët que Cugne fit approches pour battre la forteresse. La batterie ne fut pas si tost commencee qu'on osta la banderolle blanche, ne restant que la rouge, pour monstrier que les assiegez ne craignoient point les assaillans : & de fait, incontinent que l'artillerie auoit fait quelque pertuis, il estoit estouppé si soudain qu'on ne l'eust sceu reconnoistre. Ceste resistance mit Cugne en grande perplexité, sur tout quand les pouldres commencerent à faillir, tant les vaisseaux estoient mal pourueus : & lors il conut sa faute d'auoir refusé la forteresse sans coup ferir. Or n'ayât autre remede il despescha vn brigantin pour aller en Ormus querir des pouldres, ce qui fut vne seconde faute : car les assiegez eurent loisir de se fortifier dauantage, & se mocquoyent des Portugallois, disans puis que le pays leur sembloit si bon qu'ils y demeurassent. Lon estime qu'ils auoyët empoisonné les fontaines, ou que les eaux estoÿët lors venimeuses : de fait l'air estoit si mal sain, & les Portugallois tellemët disposez à maladies à cause des trauaux, couruees & miseres precedentes, qu'ils commencerent à s'affoiblir de telle sorte, que le plus vigoureux ne se pouuoit soustenir sur ses iambes. Là dessus Bardadin enuoye dire à Cugne qu'il le conseilloit & prioit de se retirer, pource qu'en s'arrestant plus long temps autour de la forteresse il lui seroit impossible de partir quand il voudroit. Mais son conseil fut mesprisé des capitaines, qui s'en repentirent tost apres, aussi bien que Simon de Cugne : car auant que les pouldres fussent apportees d'Ormus, presques tous estoÿët malades, & le nombre des morts croissoit de iour en iour. Cugne voyant ses hommes perir ainsi les vns apres les autres, changea de logis, & mit les malades pres de la mer, pour les mettre plus aisément es vaisseaux, si les assiegez faisoÿët quelque sortie, ce que Bardadin ne voulut entreprendre, non qu'il ignoraist le miserable estat des Portugallois, ou redoutast leurs forces, mais il craignoit qu'en leur courant sus le Vice-roy ne füst mourir Xerax : pourtant se contenta-il de se tenir sur ses gardes, & attendre l'issue de la maladie, lui estant aisé de saccager Cugne & ses gens, qui n'estoient pas lors en estat pour le soustenir. Quant à Cugne, apres auoir accomodé ses malades d'une tranchee tout autour d'eux, il recommença la batterie, & fit bresche assez raisonnable, avec intention de donner vn assault, s'il eust eu gens de combat : mais

ne trouuât que trêtecinq hômes qui peussêt marcher, il leua les yeux & les mains au ciel, & dit ces mots, O Dieu, combië peu t'auroit-il cousté de me donner cent hommes disposés? ce me seroit assez pour emporter ceste place. Apres ces murmures & complaints inutiles, il delibera de charger l'artillerie & les malades es basteaux & gallions, à quoy les trentecinq s'employèrent avec telle peine, que leurs mains estoient sanglantes à force de trainer l'artillerie, & pource que les malades ne se pouuoient leuer ni soustenir ils leur attachoyent des chordes aux pieds, & les trainoyent iusques dedans les vaisseaux, avec des propos, cris & lamentations estranges. Simon de Cugne s'embarquant le dernier, faisi d'un mortel regret, dit au pilote de son gallion, Patron, quand il vous aduiendra d'entreprendre quelque affaire qui touche vostre honneur, ne prenez auis d'autrui, mais gouvernez-vous selon ce que vous estimerez le meilleur en vous-mêmes. Cela dit on haussa les voiles, & fut laissé Bardadin en sa forteresse sans auoir rien perdu de son costé. Trois iours apres l'embarquement, plusieurs malades commencerent à mourir, dont Cugne conceut vn tel ennuuy qu'il tomba malade, & s'enferma dedans la chambrette de son gallion sans vouloir voir ni ouir personne, ne cessant de souspirer & sanglotter l'espace de neuf iours, en fin desquels il mourut, & en son gallion septante autres expirerent incontinent apres, demeurant le vaisseau si desnüé que sans le secours de Fernand Aluarez, qui le remena au port d'Ormus, il eust fait naufrage, ceux qui restoyent n'estans en nombre suffisant pour le conduire. Brief de tant d'hommes acompagnans Cugne il n'en reuint pas la dixiesme partie: mais outre ce malheur il y eut vne incommodité, que le Viceroy fut arresté plus longuement à Ormus qu'il ne pensoit, & ne donna si tost ordre à la guerre de Diu. Sur son partement il relascha Manuel de Macede & lui mit en main Xera pour le mener en Portugal.

*Ordre donné
aux affaires de
l'Inde basse
par Sampao,
lequel reuint
en Portugal,
& Namo de
Cugne prend
possession du
gouvernement
des Indes.*

SAMPAYO auerti par Sebastian Fereire que le Viceroy arriuerait bien 30. tost en l'Inde basse fit faire vne procession solennelle dedäs la ville de Goa, pour remercier Dieu des bonnes nouuelles de la venue de ceste nouuelle flotte: car les Mores publioient par toute l'Inde que les Portugallois n'auroient plus de secours, & en faisoient grand feste. Mais ils changerent de contenance, & ce pädant Sampajo donna ordre que les forces fussent prestes à la venue du Viceroy, fit dresser & equipper plusieurs vaisseaux, outre les autres faits durant sa charge, auaoir six galeres, vn gallion, vne nauire, cinq galliottes, quatre caruelles, cinquante brigantins, quelques fustes, barques & caturus. Il se trouua que de son temps les Portugallois auoyent conquis cent cinquäte paraus Malabares, sans les fustes, & autres vaisseaux, tous bien armez & fournis d'artillerie, qui furent enuoyez en diuers ports de l'Inde, où le Roy de Portugal tenoit garnison. Somme, quand le Viceroy descendit d'Ormus en Inde, il trouua vne flotte de cent trente six voiles, auaoir quatorze gallions, six galeres royales, huit galliottes, six caruelles, avec force fustes & brigantins. Apres cela, Sampajo fit fortifier les citadelles d'Ormus, de Chaul & de Cananor, de bouleuards, terrasses, tours, fossez, murailles & rempars, es endroits necessaires. Il fit clorre la vil-
le

le de Goa depuis le bout où elle regarde la mer iusques à l'autre, & acheua le temple: & en Cochim fit dresser vne longue muraille, acheuer les tourrions autour de la ville. Puis il fournit les places de viures, de gens & d'armes, attendant le Viceroy, lequel arriua tost apres & fut receu à la maniere acoustumee: quoy fait, Sampajo se mit à la voile, & reuint en Portugal, où il ne fut gueres bien recompensé de ses seruices: car Mascaregne le fit condamner par arrest du conseil royal à lui payer tous despens, dommages & interests, & par ainsi les butins apportez des Indes lui seruirent bien alors, pour eschapper de ces nouuelles difficultez à son honneur.

* *
*

F I N D V D I X H V I T I E S M E L I V R E .



〇 〇 iiii



LE DIXNEUVIÈSME LIVRE.

SOMMAIRE.

1. Conquête de la ville & citadelle de Diu par Nomin de Cugne Viceroy des Indes.
2. Armée Turquesque envoyée en Inde pour en chasser les Portugallois, & ce qui elle fit eûre le Roy & la ville d'Aden.
3. Citadelle de Diu assiégée par les Turcs, & leurs premières escarmouches.
4. Moyens tenus par Antoine de Sylveire capitaine de la citadelle de Diu pour se défendre, & la brave résistance des Portugallois à faulxer les Turcs.
5. Gratian Nöragne est le Viceroy des Indes: ses aprests pour secourir Diu: le retour de Cugne en Portugal, & sa mort en chemin.
6. Ce que firent les Rois de Calcut & de Cochim à la venue des Turcs.
7. Divers assaux des Turcs vaillamment repoussez, & contrains de lever le siege de la citadelle.
8. Occasions de la seconde guerre de Diu commencée par le Roy de Cambaye.
9. Diverses ruses de Coje Sophar lieutenant du Roy de Cambaye pour surprendre les Portugallois, & comme Jean Mascaregne capitaine de la citadelle y pourment.
10. Pour parler entre le député de Mascaregne & Coje Sophar auant le siege.
11. Commencement du siege de la citadelle de Diu, & ce qui s'en fit de part & d'autre.
12. Arrivée du Roy de Cambaye, ce qui passa durant son séjour en l'armée, & sa retraite.
13. Continuation de ce siege, avec divers accidens, & la mort de Coje Sophar.
14. Rumecan fils de Coje Sophar succède à la charge de son pere, se secourut qu'il reçut, & ses efforts pour emporter la citadelle.
15. Divers assaux donnez par Rumecan, repoussez par les Portugallois.
16. Mojazea Conestable de Cambaye amène quatre mille hommes contre les Portugallois, & ce qui s'en ensuyvit.
17. Secours envoyé à Mascaregne par Jean de Castre Viceroy des Indes.
18. Effort & combat des Portugallois arrivez au secours de la citadelle pour repousser les Turcs.
19. Ordre donné par le Viceroy pour secourir & delivrer Mascaregne.
20. Arrivée du Viceroy au port de Diu, où il donne bataille, & desfaire les ennemis, reprend la ville, Rumecan tué, dont s'ensuyt la delivrance de la citadelle, & la domination du Roy de Portugal es Indes demeure plus affermee que jamais.

Conquête de la ville & citadelle de Diu par Nomin de Cugne Viceroy des Indes.



ONNO de Cugne ayant esté receu & proclamé Viceroy des Indes, du cōsentement de tous, il fut question d'auiſer en son conseil à ce qui estoit le plus expedient de faire, ayant vne si belle armee, bien fournie de toutes munitions de guerre, & resoluë de combattre. La cōclusion fut de s'emparer de la ville & citadelle de Diu, estant ceste place la clef des Indes, & de laquelle les Turcs auoyent deliberé se rendre maistres, pour chasser les Portugallois, & saisir leur negotiation. On entendoit de diuers lieux, que nonobstāt la route de leur armee, qui s'estoit desfaite soy-mesme, Solyman leur Empereur vouloit poursuiure sa pointe, & voir le bout de ce qu'il auoit fait commencer. Cela fit que le Viceroy, apres auoir employé le reste de l'année mil cinq cens trente à pouruoir à tout ce qui estoit requis pour la seurté des places que

que l'on tenoit en l'Inde haute & basse, à l'estat de Malaca & des Molucques, en l'an mil cinq cens trente vn se mit à la voile, tenant la route de Diu, avec la plus puissante armee que les Portugallois eussent oncques eu sur l'Océan. En cest endroit, nous sommes contrains d'estre brieves, les historiens ne disant rien des exploits de Cugne es commencemens & en la suite de sa charge, encorés qu'il ait esté Viceroy l'espace de dix ans : mais font mention en somme que Badur lors Roy de Cambaje, se sentant trop foible pour combattre les Portugallois, leur laissa prendre possession de la citadelle de Diu, & fit quelque accord avec le Viceroy, lequel establît Antoine de Sylueire gouverneur de ceste place. Edouard Barbose pilote Portugallois parlant de Diu, au traité qu'il a fait des Indes, dit qu'en la coste de mer, & assez pres de l'encouleure du fleuve Indus en l'Océan, se fait vne pointe entrant assez avant en l'eau, à laquelle est coniointe vne illette qui a vne grande & riche ville, que les Malabares appellent Diza, & les Indiens Diu, accommodee d'un bon port, de grand trafic entre tous les hautes d'Orient, d'autant que ceux de Malabar, de Bégala, des Molucques, d'Arabie & de Perse y portent leurs marchandises, du peage desquelles le Roy de Cambaje tiroit un merueilleux denier. Es liures precedens on a veu les diuerses pratiques dressées par les autres Viceroyes pour s'en saisir, mais cest honneur demeura finalement à Cugne, n'ayant pas tenu à Sâpajo qu'il n'en fust maistre, s'il eust esté mieux obeï. Depuis la prise de la citadelle, le Roy de Cambaje sollicité & fauorisé du Turc machina contre les Portugallois, & s'efforça les attrapper en la citadelle, & vint en personne l'assiéger, se persuadant d'en venir à bout. Mais la flotte du Viceroy estant venue au secours il y eut bataille donnée au port de Diu, en laquelle ce Roy se trouua, & apres la desfaite de sa flotte, l'on inuestit vne fuste en laquelle il s'estoit mis pour eschapper plus aisément, & apres un cruel conflict, les gens partie tuez, partie precipitez en mer, ou bruslez de feu artificiel, lui mesmes, n'osant se fier aux Portugallois, sauta dedans l'eau pour se sauuer à uage : mais il fut tué d'un coup de picque & perit en la mer. Ceste victoire, & sur tout la mort du Roy, rendit les Portugallois paisibles possesseurs de la ville, laquelle iusques alors auoit tousiours fait teste à la citadelle qui lui seruoit de bride, & qui fut de nouveau fortifiée, le Viceroy sachant bien que les conseillers du nouveau Roy de Cambaje ne le laïtroient longuement en paix, & que les Turcs seroyent bien aises d'empoigner ceste occasion pour esclorre ce qu'ils couuoient des longtemps auparavant.

2. IL en auint selon qu'il l'auoit pensé, car le Turc incité par les prieres de Badur auoit, avant la desfaite & mort d'icelui, commencé à dresser vne puissante armee au goulfe d'Arabie. Le Sultân d'Egypte, spécialement Campson, predecesseur de Tomumbei desfait & estranglé aux portes du Caire par le commandement de Selym, auoit résolu, comme les liures precedens l'ont monstté, de chasser les Portugallois hors de l'Orient, s'il lui estoit possible, pour attirer le trafic au Caire & en Alexandria. Selym perséuera en ceste volonté, mais il mourut incontinent apres la desfaite de Tomumbei, laissant son fils Solyman, qui à cause d'autres guerres en diuers endroits ne pût

*Armee des
Turcs en Inde
pour en chas-
ser les Portu-
gallois. Or ce
qu'elle fit com-
me le Roy de la
ville d'Aden.*

si tost redresser son armee, sur tout apres qu'elle se fut rompue soy mesmes comme dit & esté. L'accident de Badur l'enflamma dauantage, tellement qu'il fit bastir grand nombre de vaisseaux au port de Suez, ayant pour conducteur & maistre de tels ouurages vn Geneuois fort expert. Finalement la flotte se trouua composee de soixante trois galeres, six gallions, six fustes, deux houlques, vingt barques, & grand nombre de brigantins, sous la charge de Soleiman Bassa gouuerneur du Caire, acompagné de quatre mille Ianissaires, seize mille Turcs, de canonniers, pilotes & matelots à suffisance. Tous les vaisseaux estoient bien equippez, fournis de viures & munitions, sur tout d'artillerie, & y auoit quarante pieces, nommees basilies, portans boulet de nonante liures. Ceste armee desmara du port de Suez, prenant la route de l'Inde sur la fin du mois de Iuin l'an mil cinq cens trente huit, & le cinquiesme du mois suiuant arriua pres de la ville d'Aden, & le quinziemesme alla faire aiguade en lieu commode à vingt lieues de là. Incontinent le Bassa despescha gens pour porter au Roy d'Aden lettres plaines d'offres & d'amitié, avecques vne logue robbe de drap d'or: & charge aux ambassadeurs de dire au Roy que l'Empereur des Turcs lui enuoyoit ceste armee, pour y commander, & pour uoir qu'elle chassast hors de l'Inde les Portugallois ennemis de Mahumet: & que s'il ne pouuoit se trouuer en personne à ceste guerre, il lui pleust fournir la flotte de bois & de chairs dont elle auoit quelque faute, & non d'autre chose. Combien que ce Roy fust lors tributaire de Iean troisiemesme, & lui payast dix mille ducats par an, par accord fait avec Hector de Sylueire, deux ou trois ans auparauant, neantmoins il recueillit magnifiquement ces ambassadeurs, & leur promit franchement enuoyer ce dont l'armee auroit besoin. Sept iours apres toute la flotte surgit au port d'Aden, & fut receue avec grands signe de ioye, personne n'attendant que repos & commodité de ceste arriuee. Incōtinent le Roy enuoya des principaux de sa cour à Soleiman pour le bienueignier, & l'asseurer que s'il lui plaisoit descēdre & venir s'esbatre en la ville, il y seroit logé & traité cōme sa grādeur le meritoit. Soleimā leur fit response, qu'il ne desdaignoit pas la magnificence & bonne affection du Roy, mais qu'il estoit encores si estourdi de la nauigatiō & incommodité de la marine, que de deux iours on ne le verroit hors de sa capitainesse: mais que se trouuant plus disposé il iroit saluer le Roy. Si tost que les deputez du Roy furent partis lon enuoya trois cens hommes apres eux, faignans se vouloir esbattre & pourmener par la ville: & pour acheuer la trame, Soleimā fait descēdre l'un de ses domestiques, & aller dire au Roy que pour euitier que les trois cens qui se pourmenoyent es rues ne fissent quelque trouble, il enuoyeroit le lendemain cent soldats des vieilles bandes pour les ramener es galeres. Ces trois cens estoient des plus asseurez de la flotte, & le Roy procedoit si simplement en cest affaire qu'il les receut en son palais, afin qu'ils fussent ses gardes. Au lieu des cent qui deuoient les aller querir, on y enuoya deux mille Ianissaires, dont le Roy s'estonna, & comme il estoit apres à regarder aux moyens de sortir d'un tel labyrinthe, le lendemain auant iour le lieutenant de Soleiman suiui de plus grosse troupe que les precedentes entra dedans la

la ville, & d'un visage tiant exhorta le Roy d'aller avec quelques vns des principaux de sa cour visiter & saluer le Bassa qui estoit malade. Le Roy voyant le danger & l'embuscche dedans & dehors, n'osa reculer, ains se laissa conduire vers Soleiman, laissant la ville en la puissance des Turcs qui y estoient entrop grosse troupe. Apres qu'il fust entré en la capitaineffe il ne pût se contenir de dire avec vne grauité royale, Soleiman, ie te prie me dire pourquoy tu as fait ici venir prisonnier vn tel Prince que moy, ami de tō maistre & de toy aussi? faloit il m'attirer par fraudes & menees comme si i'estois quelque malfaiteur? Mais Soleiman appuyé sur l'armee qui l'environnoit lui respondit, Et toy, n'as tu point de honte d'auoir laissé trois iours entiers le lieutenant du grand Seigneur arresté deuant ta ville, sans le venir voir? Le Roy repliqua, Si l'Empereur des Turcs estoit ici, i'eusse fait mon deuoir, & lui aussi ne m'eust pas cauteleusement & outrageusement manié comme tu fais. Tu me tiens maintenant en tes mains, ce qui ne fust pas auenu, si ie n'eusse mis ma personne & mon royaume en ta puissance, me laissant piper par tes belles paroles. Adē est vne ville qui ne redoutoit ni toy ni ton armee: mais y a-il homme qui se puisse garantir de calomnie & de trahison? Homme vilain, esleué aux honneurs sans l'auoir merité, saoule toy du sang d'un Roy issu de race de Rois. Je voy que mon corps perira par la sentence d'un tyran infidele: mais la vertu des Adenôis & la race de leurs Princes viura mesmes apres ta mort. Soleiman presques enragé d'ouirtel langage fit tout à l'heure pendre & estrangler au mast de sa capitaineffe ce pauure Roy, & quatre grands Seigneurs qui l'auoyent suivi. Pour excuse il allegua que son maistre lui auoit enchargé de faire mourir ce Roy, pource qu'il estoit allié & tributaire des Portugallois, lesquels le Turc vouloit chasser des Indes avec tous leurs adherans. Apres ceste indigne & detestable trahison commise en la personne du Roy, la ville d'Aden fut saccagee & pillée, sans aucune resistance: puis Soleiman fit assembler le peuple, & leur remonstra qu'ils se deuoyent esioir de n'estre plus sous le ioug des Portugallois, les admonnestant d'estre obeissans & fideles au grand Seigneur, Prince debonnaire, leur legitime Roy, & de mesme religion Mahumetique qu'eux. Il laissa deux mil hommes en garnison dedans la ville, & reprit sa route vers l'Inde, mais en chemin il perdit neuf ou dix barques & fustes, & finalement surgir au port de Diu le quatriesme iour de Septembre. Estant à la portee du canon pres des murailles, il fit lacher vingt pieces d'artillerie, pour saluer les Portugallois, qui respondent de mesmes & mettent à fond deux galeres, ce qui fit retirer l'armee au long d'une rade à huit lieues de là, nommee Marasabar, où ils attendirent la flotte que le feu Roy de Cambaje auoit equippee en les attendant. La ville de Diu fut incontinent abandonnee des marchās & autres habitans: au moyē dequoy les Portugallois s'enfermerent dedans la citadelle, pouruoyans à tout ce qui estoit requis pour le soustenement de ce siege. Antoine de Sylueire leur capitaine faisant lors reueue trouua deux cens gētilshommes & cinq cens soldats, mais il n'y auoit que soixante milliers de pouldre à canō, & trois caques pour les harquebuziers, ce qui vint mal à point puis apres:

mais ils ne laisserent de s'aider si bien de leur moyens que les Turcs n'en receurent que perte & confusion.

*Citadelle de
Diu assiégée
par les Turcs,
& leurs prom-
esses écar-
mentées.*

D'VN autre costé, deux seigneurs de Cambaje suivis de quatre vingts 3. voiles se vindrent joindre à Soleiman. Aussi Coje Coffar, fils d'une Chrestienne de l'isle de Chio, calfeuteur de navires, & devenu depuis grand conseiller du Roy de Cambaje, amena par terre une armée de vingt mille hommes. Soleiman accompagné de tant de forces retourna vers Diu, & mouilla l'ancre à un trait de canon, puis fait descendre cinq mille hommes, & cent cinquante pièces de batterie, entre autres vingt des basilics susmentionnez. Ces cinq mille se joignirent incontinent à l'armée de Coffar. Le lendemain ils acourent en desordre pour piller certaines maisons proches de la citadelle, où y avoit quantité de bleds appartenans aux Portugallois. Sylueire fait braquer & tirer quelques pièces à travers ces troupes, de telle dextérité que cent cinquante en furent tuez, & les autres se retirèrent viftement. Ils commencent lors à se retrancher & lever une terrasse sur laquelle ils dresserent huit tourelles, dont la citadelle estoit ceinte du costé de terre, & y placerent force artillerie. Cela fait leurs pièces jouerent tant par mer que par terre, estans assaillis de mesme façon par les Portugallois. Sylueire avoit muni deux tours basties autour de la citadelle, dont l'une estoit sur les rochers du riuage, l'autre en la ville neufue nommée Rhomeum, à cause des lanissaires & soldats que les Rois de Cambaje y logeoient, laissant la grande ville aux marchans pour la seureté de leur trafic. En la tour du riuage y avoit cinquante soldats, & soixante en celle de la ville, de laquelle les ennemis estoient fort endommagés. Pour se garentir ils assaillirent furieusement la dernière, & après grande perte d'hommes firent en sorte que trente de ceux de dedans se rendirent, pensans recevoir gracieux traitement, mais ils furent enchaînez au sortir de la tour, & menés aux galeres pour y servir de forçats. Les trente autres continuerent en leur résistance, & après avoir soutenu quelques assauts, & tué grand nombre d'ennemis, moururent tous ensemble vaillamment & les armes au poing.

*Moyens tenus par An-
toine de Sylueire
pour se maintenir,
& la braver resis-
tance des Por-
tugallois à son
honneur les
Turcs.*

EN ces entrefaites, Sylueire despêche un brigantin avec lettres au Vi- 4. ceroy, résident lors en la ville de Goa, fort loin de Diu, pour lui faire entendre l'estat des affaires, & la disette des poudres. Ce brigantin fut suivi d'autres brigantins Turcs pour l'attrapper, & d'un entre autres qui precedoit ses compagnons d'environ huit lieues loin. Les Portugallois voyans ce brigantin seul tournent voile, & le vont rencôtrer, avec tel succès qu'ils saccagèrent tous les Turcs, & n'échappèrent de leur troupe qu'un Chrestien renié, natif de la Pouille, lequel ils emmenerent prisonnier, & mirent le brigantin à fond. Le Viceroy promit d'équiper au plus tost une puissante flotte pour aller au secours: mais d'autant que cela ne pouvoit estre si tost armé, il fit promettre rouler en l'eau seize fustes legeres, fournies de petit nombre d'hommes, mais bien résolus, qui ne portoyent avec leurs armes & viures que des chordes & poudres à canon. Le sixième jour d'Octobre, les Turcs donnerent un assaut par mer & par terre à la citadelle, & continuerent encores depuis: notamment leur batterie, tirans par fois quatre cens coups de canon du

du matin au soir, sans cesser pas vn iour. Ils se presentoyent aussi ordinairement à l'escarmouche : mais ils furent tousiours battus & repoussez. Ce pendant ils foudroyerent de leurs pieces toutes les tours & murailles de la citadelle, descourans les Portugallois en diuers lieux. Finalement ayans fait tomber tout à plat l'une des principales tours ils vindrent à l'assaut, d'où ils furent chassez comme deuant. Depuis, les assiegez inuenterent diuers artifices pour incommoder les assiegeés, qui sans cesse venoyent à l'escarmouche & tuoyent tousiours quelques Portugallois: neantmoins les Turcs perdirent depuis le commencement iusques alors plus de trois mil hommes, sans les blesez & bruslez. Or le vingtiesme iour d'Octobre, de grand matin, les guettes descoururent en mer quelques barques de rame assez pres de la tour de la marine, ensemble huit galeres, l'intention desquelles estoit d'escheller la tour, estans les Turcs fournis de tous engins propres pour cest effect. Sylueire auerti de cela, donna tel ordre sur le champ à la seureté de la tour que quatre barques furent enfondrees, & plusieurs Turcs occis par le renfort de deux cens harquebuziers enuoyez au secours des cinquante, qui apres ce combat se retrouuerent tous, excepté vn tué, & douze blesez. Les Turcs retournerent le lendemain, où ils gaignerent encores moins que le iour de deuant : car vne de leurs galeres & plusieurs nacelles furēt percees & mises à fond, la plupart de leurs eschelles & machines brisees, la mer tainte du sang des plus eschaufez, plusieurs nautez & gastez du feu artificiel: tellement que les suruiuans, hors d'esperance d'estre maistres de la tour, se retirerent plus viste que le pas. Ceux de la citadelle voyans la desroute, entrent en quelques esquifs pour recueillir les despouilles qui flottoyent sur l'eau, tuent quelques Turcs qui se sauuoient à nage, & en prenent trois prisonniers, desquels Sylueire sceut tout l'estat de l'armee. Turquesque, laquelle fut diminuee en ces deux iours de plus de huit cens hommes. Depuis ils recommencerent contre la citadelle, ne cessans de descoucher flesches & tirer harquebuzades, mais ils furent contrains se reposer, & comme vn iour on les apperceut à requoy, cent cinquante des plus asseurez de la citadelle firēt si heureuse sortie qu'ils entrerent iusques au camp, donnerent l'alarme bien chaude à tous les Turcs, en tuerent plus de deux cens cinquante, & firēt leur retraite sans danger, ne laissant que trois des leurs tuez en campagne, & six blesez reconduits dedans la citadelle. Le mesme iour Sylueire sachāt que dans le fossé paroissoient diuerses machines pour saper les murailles, enuoya incontinent quarante harquebuziers, qui à la faueur de quelques mâtelets endommagerent tellement l'ennemi qu'il n'osoit approcher du fossé.

5. COMBIEN que iusques alors les assiegez se fussent valeureusement maintenus, neantmoins Sylueire, preuoyant qu'à la longue il seroit impossible de subsister s'il n'auoit secours, despescha pour la seconde fois vn brigantin à Nonio de Cugne, l'asseurant auoir perdu cent hommes, & en garder deux cens blesez & offensez de feu artificiel: au moyen dequoy c'estoit chose du tout necessaire d'enuoyer gens au plustost, sinon la citadelle s'en alloit perdue.

Gratian Norogne est un *Viceroy des Indes*, & ses *affaires* pour *secourir* Dieu : la *revenue* de Cugne en *Portugale* : sa *mort* en *chemin*.

Viceroy des Indes, où il arriua l'onzième iour de Septembre, l'an mil cinq cens trente huit, estant là enuoyé par le Roy, non pour des fiance que lon eust de Cugne, ains pour le soulager & rappeler en Portugal, pour lui faire l'honneur que sa fidelité meritoit, à cause des grands seruices par lui faits en toute sa vie au royaume de Portugal, nommément en ceste dernière charge qu'il auoit sagement & heureusement administrée l'espace de dix ans. Lors que le brigantin de Sylueire arriua, Norogne estoit en possession du gouuernement, par l'auis de Cugne mesmes, & du consentement de tous. Ayant donc receu les lettres de Sylueire, il resolut de mener secours aux assiegez, tant des vaisseaux qu'il auoit amenez de Portugal, que de ceux que son predecesseur fit equipper peu auant sa venue, sans vouloir attendre la flotte qui estoit au goulfe de Perse, & qui deuoit bien tost arriuer. Suyuant ceste resolution il arme des vaisseaux en bon nombre, alcauoir douze houlques, seize grands gallions, vingt cinq carauelles, vingt neuf galeres, quinze barques de passage, vingt fustes & brigantins, avec les basteaux des viures. Auecques lui s'embarquerēt cinq mille Portugallois, & huit mille Naires des plus asseurez & meilleurs escrimeurs de toute la coste de Malabar, & firent voile vers Diu. Quelque temps apres cest embarquement, Nonio de Cugne, suiuant les lettres du Roy qui le rappelloit, & bien ioyeux aussi de se reposer apres tant de trauaux de corps & d'esprit, monta sur mer pour reuenir en Portugal. Mais comme il doubloit le cap de bonne esperance, vne maladie, qui l'auoit saisi peu de temps auparauant, se régregea de telle sorte qu'il rendit l'esprit à Dieu, & fut son corps enseveli en la mer, suiuant la coustume des gens de marine qui ne veulent point de corps morts en leurs vaisseaux. Telle fut l'issue de ce grand personnage, qui auoit eu tant de credit & de puissance en son temps: au decès duquel les Portugallois perdirēt beaucoup, pour la conoissance qu'il auoit des affaires de Portugal, de Barbarie & des Indes, estant si fort aimé de tous, qu'il n'y auoit homme au royaume, auquel on se fiasst dauantage qu'à cestui là.

*Ce que firent
les Rois de Ca
lecute & de Ca
chim à la ve
nue des Turcs.*

A V A N T que Norogne partist de Goa, il receut lettres de Manuel Britio gouuerneur de la citadelle de Chaul, l'auertissant que l'ambassadeur de Soleiman Bassa estoit arriué au port de Calecut, où il auoit esté recueilli en grande magnificence par les Mores Mahumetistes habitans au royaume, spécialement par vn des principaux capitaines nommé Patemarcas, qui le conduisit iusques deuant le Roy, auquel cest ambassadeur dit sans autre preface, Sire, le Bassa Soleimā, enuoyé par le trespuissant & inuincible Empereur des Turcs pour Viceroy des Indes, vous salue affectueusement, & vous fait scauoir qu'il viēdra iusques ici exterminer les Portugallois, & vous rendra le plus grand Prince de l'Orient, si vous voulez receuoir les armoiries de Turquie, & vous mettre sous la protection de l'Empereur Solyman, au nom duquel, & en signe d'alliāce, ie vous apporte vne longue robe, des chausses & vn bonnet de drap d'or. Alors le Roy changeant de cōtenance, & d'un regard selon, lui respondit, Les Empereurs de Calecut n'ont iamais receu ni ne receuront encores aucun present, ains en donnent: & nes'aident de forces estrangeres pour estendre leurs limites: ils ont assez

assez de suiets, & ont acoustumé de restablir les autres Rois en leurs royaumes. Pourtant (dit il aux Naires qui l'environnoyent) empoignez moy cest outrecuidé ci & le capitaine Patemarcas : qu'on les serre en basse fosse, & qu'ils portent la peine de la folie de ceux qui les enuoyent. Cela executé, le Roy enuoye ses deputez demander à Manuel Brittio la paix qu'il auoit enfreinte tant de fois auparavant & promit l'entretenir inuiolablement à l'auenir. L'ayant obtenue, elle fut publiee par toutes les villes & prouinces de son royaume : ce qui seruit biē aux Portugallois en vn tēps si dāgereux, & lors qu'ils auoyent occasion de redouter la flotte de Calecut autant que celle des Turcs. Quant au Roy de Cochim, si tost que les nouuelles furent apportees de l'arriuee des Turcs au port de Diu, il fit appeller tous les Naires de son royaume en vn tēple, & leur ramentut l'amitié des Portugallois, ensemble les grands plaisirs & secours que la ville & le royaume de Cochim auoyent receus de la nation Portugalloise, dont il les prioit mōstrer lors quelque bonne souuenance, en se joignant aux Portugallois pour les fauoriser en ceste guerre. Eux s'accordans à son dire presterent tous le serment sur vne certaine idole qu'ils adorent, & promirent s'employer de bon cœur pour le seruice du Roy de Portugal : quoy fait le Roy declaira aussi de sa part qu'il n'espargneroit rien en ceste guerre : autant en fit aussi le Roy de Cananor.

7. M A I S pour reuenir aux Turcs campez deuāt la citadelle de Diu, apres diuers efforts pour s'en rendre maistres, ils resolurent finalement de donner vn assaut general, & apres s'estre rangez en bataille, le premier iour de Nouēbre au point du iour cinquāte barques & douze galeres se presenterēt vers la tour de la mer, afin d'atraire les Portugallois celle part, & cepēdant les surprendre du costé de terre : mais Sylueire pourueut sagement à ceste incommodité, & receut le premier assaut donné par trois mille Turcs, lesquels il repoussa vaillamment. Incontinent apres deux mille autre suruindrent encores plus resolu que les premiers, & qui tuerent nombre de Portugallois, entre autres Roderic d'Arauge lieutenant de Sylueire, Antoine Mendez de Vasconcel, Martin & Gabriel Pacheco, ensemble quelques gentilshommes, mesmes le capitaine de la tour vers la mer. Ce nonobstāt les ennemis furent contrains reculer, ayās combatu pres de quatre heures. Mais vn autre bataillon des Ianissaires & soldats de vieilles bandes, montant à plus de cinq mille hommes, vint à teste baissée de telle furie, qu'ils gaignerent le rempar, & entrerent en la basse cour. Alors Sylueire, & ses capitaines & soldats, s'estans exhortez à vn extraordinaire deuoir, se portèrent lors si vaillamment qu'il n'est possible de mieux, & depuis midi iusques à cinq heures du soir combatirent les vns contre les autres en la basse court, les Turcs n'osans reculer, à cause que leurs colonnels, armez de routes pieces, les attendoyent avec le cimenterre au poing pres de la tour, pour tailler en pieces ceux qui s'eslongneroyent de la mellee. Les Portugallois n'auoyent autre refuge apres Dieu qu'à l'adresse & vigueur de leurs bras. Et se joignirent de si pres que les vns ayans lasché leurs harquebuzes, frappoyent leurs ennemis du manche d'icelles, & y eut vn sol-

*Diuers assaux
des Turcs
vaillamment
repoussez, &
contrains de
leuer le siege
de la citadelle.*

dat Portugallois qui tira plus de septante coups. La nuit commençant à venir, les Turcs furent contrains se retirer en leur camp, ayans perdu en ces trois assaux deux mil cinq cens hommes & dauantage, dont l'artillerie de la citadelle fit ce iour vne terrible boucherie. Tandis qu'ils s'amusoient à enseuelir leurs morts, Sylueire ayant donné ordre aux siens, fit sonner les trompettes en plaine nuit, & chanter les soldats, comme s'ils n'eussent rié perdu en ces assaux, afin d'espouuenter les Turcs. Mais c'estoit vne feste de gens qui pensoient à toute autre chose qu'à rire, & voyoyent la mort presente si les ennemis retournoient à l'assaut, dequoy se doutans ils iurerent tous de ne cesser de combattre qu'ils n'eussent repoussé l'ennemi, ou fussent morts les armes au poing. Sylueire fit mettre à point les feux artificiels, traiees de pouldre à canon, & autres engins propres pour receuoir les assailans, lesquels on attendoit le lendemain. Vne chose mettoit les assiegez en grande angoisse, auaoir la faute de pouldres, dont Sylueire n'auoit rié decouvert qu'à deux ou trois des principaux, craignant que les soldats ne perdissent courage, s'ils oyoyent le bruit de si mauuaise nouuelle. En ces difficultez, vn marinier Venitien se sauua de la flotte des Turcs, où il estoit comme prisonnier, & se rendit dedans la citadelle, declairant que l'intention du Bassa estoit de ne donner plus d'assaut, & decouruit plusieurs autres particularitez, que l'apprehension du danger prochain fit estimer supposees : mais l'euuenement les monstra veritables. Ainsi dōc les Portugallois continuerent de pouruoir à leurs affaires, mais le matin & iour suiuant ils furent laissez en repos, les Turcs s'occupans apres leurs morts & blesez. La nuit du mesme iour, les seize fustes legeres, enuoyees par Nonio de Cugne, arriuerent pres de Diu, & estans à deux lieues de la flotte Turquesque, lon alluma force flambeaux en chascue fuste, afin de faire estimer aux ennemis que c'estoit quelque puissante armee qui les venoit visiter. Auec ce stratageme les fustes approchent, font iouer toutes leurs pieces, & sans aucun dommage se rendent pres de la citadelle, au grand contentement des assiegez. Ce secours non attendu fit prendre resolution à Soleiman de leuer le siege, tellement que la mesme nuit il monta en sa capitainesse, laissant pavillōs, munitions & artillerie, tant la peur le talonnoit de pres. L'armee du Roy de Cambaje voyant ce desordre se retira d'un autre costé, & furent laissez plus de mille blesez au camp, & mille autres Turcs qui estoient allez au fourrage, lesquels furent puis apres tuez par les payfans en vengeance des maux que ces barbares auoyent commis durant ce siege. Le matin venu, ceux de la citadelle se virēt en liberté, & marchās droit au camp, enleuerent ce que les ennemis auoyent laissez, nommément cent cinquante diuerses pieces de canon, abandonnans les blesez à la merci des insulaires & Indiens. Sylueire despescha tout à l'heure vn de ses capitaines en vn brigantin, pour porter les nouuelles de tout ce que dessus au Viceroy, lequel auec sa grosse flotte estoit à soixante lieues de Diu. Vne si bonne nouuelle donna occasion à toute l'armee de louer Dieu, combien que le Viceroy eust bié desiré trouuer les ennemis en mer, pour leur donner bataille & remporter l'honneur d'auoir deliuré la citadelle. Ne pouuant donc regaigner cela, sa deliberatiō fut

fut de fuiure les ennemis iufques en la mer d'Arabie , afin de les combaire par mer ou par terre : mais Soleiman Baffa ne cerchoit pas telle rencontre, ains cassa bien toft fôn armee, & s'en alla rendre cõpte de fes exploits à fôn maiftre en Cõftantinople, & pour affouuir fa rage en quelque forte, emporta les nez & oreilles de tous les Portugallois vifs & morts que les Turcs auoyent peu attrapper durant toute ceste guerre, afin qu'on l'estimast tout autre qu'il n'estoit.

8. T E L L E fut l'iffue de la premiere guerre de Diu. Maintenant il nous faut defcrire la feconde, & en confiderer premierement les occafions. Apres la retraite des Turcs, les affaires de Diu fe redresserēt peu à peu, & en l'efpace de quelques annees la ville reprit fa premiere forme, tellement que tout le pays demouroit en repos. Mais il y auoit quelques capitaines & feigneurs du royaume de Cambaje, qui vouloyent mal de mort aux Portugallois, tāt à caufe de la diuerfité de religion, que pour autres confiderations, tellemēt qu'ils ne cesserēt durāt cest entrepofts de tramer vne autre guerre: nō moins dangereufe que la precedente. Celui qui manioit ceste entreprinfe s'appelloit Coje Sophar, Italien de natiō, qui auoit renōcé le Chriftianifme pour fe ranger à l'impietē Mahumetique, vieil capitaine alors, vaillant de fa perfonne, & qui auoit grand credit en la cour du Roy de Cābaje. Iceui ne cefoit de ramenteuoir au ieune Roy, nommé Mamud, la mort de fôn oncle Badur defait & tué au port de Diu, l'exhortant d'en faire vengeance, pour les raifons dōt tels cōfeillers ne font pas defgarnis. Auffi adiouftoit-il que la petite troupe des Portugallois gardans la citadelle de Diu feroit aifément defaite, & que c'estoit grand' honte à vn fi puiffant Roy de permettre que des eſtrangers lui miſſent le pied ſur la gorge, dedās ſon palais, en ſa ville capitale, au meſpris des loix du pays & de la religiō de ſes anceſtres : & que ſi le Roy ne ſe ſentoit aſſez de moyens, lui & autres y employeroient les leurs de bon courage. Ce ieune Prince, batu par les perſuaſiōs de Sophar & d'autres de meſme auis, delibera de faire la guerre aux Portugallois, & en donne la charge à Sophar, lequel commence par deſſous main à faire leuee de gens, ſans ſe ſoucier de l'alliance iuree par Badur avec le Viceroy Norogne. En apres il ſollicite les Rois & Princes voiſins d'ētrer en ligue avec celui de Cambaje, monſtrant les dangers qu'apporteroit le delay, & au contraire le grand bien dont tous ſeroient participans en prenant les armes. Les vns ſe liguèrent incōtinent, les autres promirent y entendre, & d'autres ſe cōtenterent de regarder le ieu, ſans adherer à perſonne.

9. D U R A N T ces menees, Sophar fit courir vn bruit que le Roy Mamud lui auoit donné la ville de Diu, ce qui eſtoit aſſez croyable, pource qu'au parauāt il auoit partie achetē, partie obtenu en don, pluſieurs lieux d'al'entour, entre autres Stirrate; ville maritime, bien munie & preſques imprenable: tellemēt que chaſcun preſumoit que Mamud reconoiſſant les ſeruices de Sophar auoir liberalemēt adiouſté ceste derniere piece aux precedētes, pour empeſcher que les Portugallois & Turcs ne debatiffent pas dauātage pour l'auenir à qui l'auroit, attendu que Sophar eſtoit fourni de moyens pour la bien garder. Ceste nouuelle ſemee par tout, Sophar enuoya lettres

Occaſions de la ſeconde guerre de Diu cōmencee par le Roy de Cambaje.

Diuerses ruiſes de Coje Sophar lieutenant du Roy de Cābaje pour ſurprendre les Portugallois: & comme Iceui Maſſaregne capitaine de la citadelle y pourueut.

expresse à leã Mascaregne gouverneur de la citadelle (avec lequel il auoit grande acointance, & estoient familiers amis) pour l'auertir de ceste donation, l'exhorter à en faire meilleure chere que de nulle autre nouuelle, veu que c'estoit vn moyen de nouer leur amitié plus fort que iamais, & de s'entrevoir fort souuēt à l'auenir, d'autāt qu'il deliberoit se retirer à Diu. Les porteurs de ces lettres eurent charge de bien considerer quelles gēs & forces Mascaregne auoit, & le prier au nō de Sophar, de permettre que quelques compagnies entrassent dedans la ville, afin de contenir le peuple en deuoir, & empescher tout desordre en ce changement de Seigneur. Ce pendant il amasse des troupes, & les fait glisser secrettement dedans la ville en des maisons propres, ensemble quelques pieces d'artillerie. Mascaregne qui se doutoit de trahison donnoit ordre de son costé à fournir la citadelle, & auertissoir les Portugallois habitans en la ville de trousser bagage & se retirer pres de lui. Tandis que les vns guettoient ainsi les autres, les espions de Mascaregne le viennent auertir que tout le royaume de Cambaje estoit en armes, & que desia quarante mil hommes Arabes, Abyssins, Turcs & autres, marchoyēt en campagne avec force canons pour battre la ciradelle. Mascaregne, faignant ne rien sauoir de tout cest apprest, escrit des lettres fort gracieuses à Sophar, adioustant sur la fin qu'il ne le vouloit pas empescher en ses droits, seulement le prioir-il de n'entreprendre rien au preiudice des Chrestiens. Toutes ces pratriques se manioient sur la fin de Mars, l'an mil cinq cens quarante six. Suiuant cela, Sophar fit entrer quelques compagnies en plain iour dedans la ville, mais les autres, en beaucoup plus grand nombre, s'y fourrerent de nuict & ne se monstrent qu'au temps assigné. Au mois d'Auril suruindrent des nouuelles bandes, de Turcs pour la plupart, l'intention de Sophar estant de commencer la guerre auant que l'hiver vinst, & pour empescher aussi que Jean de Castre, lors Viceroy, n'enuoyast secours aux Portugallois. Les choses se descouuroient tellement de iour à autre, que Mascaregne despescha messagers pour aller auertir le Vice roy, qui demeueroit en la ville de Goa, de l'estat des affaires, & lui demander secours, attendu qu'il n'y auoit que deux cens cinquante soldats dedans la citadelle. Il donna le mesme auertissement à Ierosme de Menefez & à Antoine de Soufe, gouverneurs de Bazain & de Chaul. Ce pendant Sophar acompagné de cinq mille Turcs & Abyssins fit son entree en Diu, suivi d'environ trente mille personnes, comme massons, charpentiers, pionniers, viuantiers, goujats & autres telles gens de bagage. Son fils Rumecan, grand maistre de l'artillerie, estoit aussi avec lui. Incontinent apres il enuoye vn sien seruiteur à Mascaregne, le prier de n'auoir sinistre opinion de sa venue si soudaine, ni de tant de troupes: que la necessité du temps le contraignoit à cela, veu que les habitans n'endureroyēt qu'on leur donnast vn nouueau Seigneur, si on ne les tenoit en bride du commencement: que c'estoyent gens reuefches, desloyaux, meschans & seditieux: partant supplioit Mascaregne de croire qu'il n'auoit amené ceste petite armee que pour se maintenir contre le peuple, & non pour faire tort à lui ni aux Portugallois, estimant l'vn de ses plus grans biens en ce monde d'auoir trouué le moyen de visiter

visiter de pres à l'aueuir vn si bon & familier ami que Mascaregne. Que si par mauuais rapports ils estoient empeschez de s'entreuoir & communiquer ensemble, le temps & l'experience feroient conoistre qu'il sauoit & vouloit s'entretenir avec ses anciens amis.

10. MASCAREGNE voyant le iour à trauers telles ruses, estima qu'il falloit pour lors n'en faire aucun semblant, & sous couleur de gratifier Sophar de sa nouvelle dignité lui enuoya vn gentilhomme de bon esprit, nommé Simon Phei, qui fit entendre à Sophar que Mascaregne approuuoit ces procédures, estant bien ioyeux que deormais ils eussent moyen de s'entreuoir plus familièrement. Sophar recueillit magnifiquement ce gentilhomme, & le renuoya avec telle responce que les Portugallois n'en pouoient recueillir autre conclusion que de guerre. Car Sophar mandoit que par l'alliance traictee entre Mamud. & Norogne, il estoit permis au Roy faire bastir vne muraille vis à vis de la citadelle, pour empescher que les Portugallois n'outrageassent ceux de Diu, & par tel moyen cōseruer les vns en paix avec les autres. Que lon auoit autresfois commencé ceste muraille, mais que le capitaine Manuel de Souze s'y estoit opposé: maintenant le Roy desiroit que ceste besongne s'acheuast, suiuant les articles de l'alliance, estant deliberé la faire hausser à force d'armes, si Mascaregne ne l'accordoit amiablement. Il adioustoit que le Roy entendoit que la navigation pour apporter & emporter marchandises fust libre, sans en demander congé ni passeport au capitaine de la citadelle: que ce Prince puisant entre les autres ne pouuoit plus demeurer esclau: & quoy que les Portugallois n'ignorassent pas ses moyens, toutesfois qu'il aimoit mieux obtenir cela de bonne grace que par violence, les priant accorder franchement ce que la necessité leur contraindroit de permettre s'il falloit passer plus outre. Que le Roy prisoit beaucoup les Portugallois, & les aimoit, pourueu qu'ils ne le voulussent brauer & asseruir, promettant leur assister de tous ses moyens en leurs necessitez: seulement desiroit-il qu'ils ne le cōtrainsissent de l'auoir par force ce qu'ils luy auoyent enleué des mains. Qu'ils craignissent de perdre tout en voulant retenir ce qui ne leur appartenoit pas, & considerassent les armées prestes à les enclorre, item la saison qui leur coupoit toute esperance de secours, & le petit nombre d'hommes qu'ils estoient en la citadelle. Que le Roy l'enchargeoit de dire ces choses, & que comme ami il prioit Mascaregne de n'allumer pas vne guerre, qui pourroit consumer les Portugallois & renuerser tout leur estat es Indes. Que si on refusoit se mettre à raison, il protestoit deuant Dieu & les hommes, que c'estoit par contrainte qu'il rompoit l'alliance pour cōmencer la guerre: & pourtant que Mascaregne auisast à faire responce resoluement, & croire le conseil de son ami. Alors Mascaregne assembla son conseil des plus vieux & sages capitaines & gentils-hommes qui fussent avecques lui, par l'auis desquels Simon Phei fut renuoyé, faire la responce qui s'ensuit. Que ce n'estoit à Mascaregne de conoistre ni de disposer des choses concernantes l'innouation ou changement des articles de pacification, & ne falloit lui demander congé de ce qu'il ne pouuoit octroyer, cela estant en la puissance du Viceroy, com-

*Pour parler en
tre le depar
de Mascare
gne & Ceje Sa
phar auant le
siège.*

me Sophar le fauoit bien : & pourtant on prioit le Roy d'enuoyer son ambassadeur à Goa, qui n'estoit pas loin de Diu, pour entendre la volonté du Viceroy, & cependant tenir les affaires en surseance. Quant au bastiment de la muraille, Mascaregne s'esbahissoit que Mamud y eust enuoyé tant de gés, veu que les officiers de Diu pouuoient faire cela sans foule aucune, & eussent esté assistez par ceux de la citadelle, en bastiffant es endroits accordez entre Mamud & Norogne. Si on vouloit encores bastir sur les limites marquez entre les parties, les Portugallois n'y donneroyent empeschement : mais ils estoient deliberez de repousser & Sophar & Mamud aussi, s'ils entreprenoyent de passer ces limites la largeur de trois doigts seulement. Au reste, pour monstrier combien ils desiroient le repos, Mascaregne enuoya copie des articles de pacification à Sophar, lequel la receut des mains de Phei, mais apres la lecture des articles, ne pouuant plus contenir sa cholere, il mit en pieces ceste copie, retint l'ambassadeur & le fit ferrer en prison, puis resolut d'assaillir la citadelle.

*Comencement
du siege de la
citadelle de
Diu, & ce qui
fut fait de
part & d'autre.*

S V I V A N T ceste deliberation il assiege la citadelle le vingtyneiesme : 1.
iour d'Auril, ceste place estant l'une des plus fortes de l'Inde haute & basse, presques inaccessible soit par mer, soit par terre, & couuerte d'une forte tour à l'entree d'un canal, qui à l'aide du canon peut empeschier tous vaisseaux d'entrer en la ville. Elle fut assaillie du costé de terre par Sophar, qui fit un boulevard bien haut vis à vis, reuestu de balles de cotton, pour rompre l'effort de l'artillerie : le tout ayant esté dressé en une nuit, si que le lendemain matin la citadelle fut saluée de toutes sortes d'engins & machines de guerre. Mascaregne, qui auoit l'œil par tout, enuoya premierement les esclaves, femmes, enfans & autres bouches inutiles, en des vaisseaux de marchans Portugallois iusques à Bazain & Chaul. Puis fit armer promptement deux catur, pour courir toute la coste, & couper les viures aux ennemis, dont les capitaines de ces catur s'acquitterent si bien, que les assiegeans furent fort incommodez, & prindrent au veu de leur armee quatorze barques qui y amenoyent des victuailles. En apres, Mascaregne distribua toutes les charges de la citadelle aux capitaines, suiuis chascun de vingt soldats. Iceux estoient Jean Almeida, Louys de Souze, Gilles Coutin, Antoine Pezane, Alphonse Boniface, Jean Verzean, Antoine Roderic, & Antoine Freire, lesquels se rangerent en leurs quartiers, & donnerent ordre à ce qui estoit requis pour la defense. Ce pendant les ennemis firent deux autres boulevards, & bastirent la muraille qu'ils auoyent entreprinse, à force d'ouuriers qui ne leur defailloyent pas, tellement que la citadelle estoit enclose de tous les costez de la terre. Ce pendât Mascaregne fut auerti que Sophar deliberoit de forcer la tour du canal, & que pour cest effect plusieurs vaisseaux s'assembloyent, entre lesquels y auoit une grosse nef, sur laquelle estoit dressé un bastimēt de charpēterie esgalant la hauteur du dernier estage de la tour, gabionné & muni de mantelets pour rompre l'effort & les traits des assiegez. Jacques Laiç, capitaine des deux catur susmentionnez, ayant charge de remedier à tel inconuenient, tira de nuit, le plus coyement qu'il pût, ces deux catur vers la ville, resolu de jetter le feu dedans

dedans la nef. Mais ayant esté descouuert, l'alarme fut dontee si chaude par tout le camp que chascun courut aux armes. Ce nonobstant les Portugallois lancent le feu dedās la nef, dōt n'ayant pas esté beaucoup endommagée, vingt soldats y entrèrent de force, couperent les chables des anches, & maugré toute résistance la tirerent pres de la citadelle, où elle fut reduite en cendres: ce qui effroya Sophar, car il esperoit venir à bout de la citadelle par la prinse de ceste tour. Se voyant donc frustré de cest endroit, ils'auisa d'autres expediens, faisant continuer la batterie plus rude qu'au parauā, afin que les assiegez pressez de l'huiuer, qui approchoit en ces quartiers Orientaux, & priez de secours, demandassent composition. Or comme ils estoient en grande angoisse à cause des mesmes considerations, le dixhuitiesme iour de May, Fernand de Castre, fils puisné du Viceroy, suiui de huit catur, arriua pres de la citadelle, & maugré la flotte des ennemis, lui, les capitaines, & soldats entrerēt par vne fauce porte qui leur fut ouuerte, & furent receus en la citadelle avec telles caresses que chascun peut estimer. Incontinent Mascaregne fait reueue, & trouue enuiron quatre cens cinquante hommes, tous bien resolus, armez, & assez bien fournis pour assuillir & se defendre, à chascun desquels il monstre ce qu'il falloit faire. Ce pendant les ennemis couppoyent les viures aux assiegez, tant par mer que par terre: mais la rigueur des vents & l'esmeute de la mer firent cesser leurs courses, & contraignirent les vaisseaux de se retirer au long des tades.

12. LE Roy de Cambaje auerti du bastiment de la muraille, selon le dessein de Sophar, voulut voir que c'estoit, & vint à Diu le vingtcinquiesme iour de Iuin, où il fut receu en pōper royale par toute l'armee. A sa venue la batterie redoubla, tellement que la tour de saint Thomas fut abatue, celle de saint Iacques bien esbranlee, mais au dommage des ennemis, qui y perdirent trois de leurs basilics ou mortiers. Ils auoyent vn canonnier qui fit beaucoup de maux aux assiegez par son adresse à manier vn de ces basilics: tellement que les Portugallois ne s'osoyent presenter en aucune place de la citadelle. Mais il auint qu'un coup de mousquet tua ce canonnier, par la mort duquel les Portugallois obtindrēt quelque relasche, pource qu'il ne se trouua homme qui le peust seconder en cest adresse de bien proportionner ses coups, & pourtant les ennemis furent contrains de laisser ceste batterie. De rechef ils dreslerent deux autres machines, pour battre depuis la tour de saint Iean iusques à celle de saint Iacques, & se remettent à canonner de grande furie. Les assiegez respondent de mesmes, & tuent tout aupres du Roy vn sien cousin: ce qui lui donna telles affres qu'il quitta le cāp, onze iours apres y estre arriué, & se retira en vne de ses principales villes nommee Madaba, pour enuoyer renfort de gens & de munitions. Depuis, soit par crainte, ou pour autre cause, il ne voulut plus se trouuer à ce siege. En partāt il commit la charge du regimen royal à vn Seigneur, des plus sages & vaillans de Cambaje, nomme Iuzarcā, sur lequel il se repositoit de la plupart des affaires du royaume, & ordonna, qu'icelui & Sophar auiseroient ensemble à tout ce qui seroit requis pour le patacheuement de ceste guetre.

*Arrivée du
Roy de Cam-
baje, ce qui
passa durant
son séjour en
l'armee, & sa
retraite.*

*Continuation
du siège, avec
diuers accidens,
& la mort de
Coje Sophar.*

APRÈS la retraite du Roy, les ennemis continuerent à battre de telle impetuosité que la tour de saint Jean fut mise par terre, & le fossé comblé de ruines d'icelle. Ils dressent tost apres vn rempar couuert de gabions, par le moyen dequoy ils battoient les assiegez à descouuert, tellement que personne n'osoit le descouvrir qu'avec manifeste danger. Pour remede à cela, Mascaregne fit hausser vne tourelle à la proportion du rempar des ennemis, & y logea quarante harquebuziers & mousquetaires, sous la charge d'Antoine Pezane, qui les entretenoit à ses despens. Iceux escarmoucherent tellement l'ennemi qu'ils le contraignirent de prendre nouuel aui, & essayer s'il pourroit estre plus heureux de nuit que de iour, à quoy Mascaregne obuia par le moyen des falots allumez en diuers lieux, à la clarté desquels on saluoit ceux qui entroyent trop auant. Ils commencerent puis apres à miner, mais ils furent cōtremines, & quoy que par diuers brocards ils taschassent d'attirer les assiegez au combat, Mascaregne ne voulut laisser faire aucune sortie: se contentant d'obuier à leurs ruses & efforts, ce qu'il fit si dextrement que lors qu'ils pensoient auoir fait ils se trouuerent à recommencer, & apperceurent que les assiegez s'estoyent retranchez mieux que deuant: ce qui les mit en telle fureur qu'ils s'ingererent d'entrer au fossé pour s'en faire maistres, ordonnerent vn assaut, où quelques Portugallois entre autres le capitaine Freire, furent tuez: mais force leur fut finalement se retirer en leur camp. La nuit suiuite Mascaregne fit acheuer vn ruelin s'estendât assez loin, & tellement accomodé que lon pouuoit empêcher les ennemis de combler le fossé comme ils pretendoyent: ce qui les estonna inerueilleusement le lendemain matin, & coururent aucuns d'entre-eux en auertir Sophar, lequel vint soudainement pour voir que c'estoit. Or cōme il regardoit attentiuement de dessus la muraille, tenant la teste appuyee sur la main droite, sans descouvrir autre chose du corps, il s'arresta si long temps qu'un mousquetaire le descourant mira si droit que d'un coup il emporta la main & la moitié de la teste, le corps tombant roide par terre. Ce fut vn heureux coup pour les Portugallois, car ce personnage estoit cauteleux, exercé en diuers affaires, sur tout tellement rusé en guerre, qu'il n'auoit gueres son semblable en ce temps là: au reste ennemi iuré des Chrestiens, à cause dequoy les Mahumetistes le respectoyent, voyãs qu'il tenoit si fermement leur parti. Et n'y a doute que, si il eust vescu plus long temps, les Portugallois eussent beaucoup plus souffert qu'ils ne firent depuis.

LA mort de Coje Sophar arresta la furie des ennemis qui n'estoyent pas d'accord pour la continuation du siege: car les vns estoyent d'auis que l'armee se retirast, aucuns debatoyent qui succederoit à Sophar, ne voulans point obeir à son fils Rumecan, les autres vouloyent que lon attendist le mandement du Roy, à quoy chascun acquiesça, & furent enuoyez gens pour entendre sa volonté. Suiuant icelle, Rumecan fut declairé lieutenant general de l'armee, lequel fit promptement faire diuerses mines iusques au nombre de cinq, lesquelles ayans esté esuentees, les ennemis recoururent à d'autres inuentions, & à force de pousser la terre gaignerent finalement le bord du fossé, rendans toutes les fortifications de Mascaregne inutiles. En

ces

*Rumecan fils
de Coje Sophar succede à
la charge de
son pere, le se-
cours qu'il re-
çut, & ses ef-
forts pour em-
porter la cita-
delle.*

ces approches & resistances il y eut grand nombre de Portugallois tuez & blesez : au moyen dequoy Mascaregne conut qu'il falloit auoir bien tost secours ou perir. Il enuoye donc auertir le Viceroy, le gouverneur de Bazain & celui de Chaul, de l'estat des affaires, & au mesme temps Rumecan receut vn secours de quatre mille homes d'ellitè que son Roy lui enuoyoit, lesquels, pour leur bienvenue, donnerent vn furieux assaut à la citadelle : mais ils ne gaignerent que des coups, & furent contrains continuer leurs leuees de terre, & combler le fossé, aprestans diuers engins pour monter à leur aise sur la bresche. Les assiegez les recueillirent & festoyerent de telle sorte avec feux artificiels en diuers assaux, qu'ils quitterent la montee. Ayât fait du pis qu'il leur estoit possible, avec tous moyens dont vn ennemi se peut auiser, ils ameinrent de nuit Simon Phei (qu'ils tenoyent prisonnier) & marchans iusques sur le bord du fossé, lui font dire à haute voix, au nom de Rumecan, que la citadelle ne pouuoit faillir d'estre bien tost forcee : mais que s'ils vouloyent se rendre, sans resister dauantage, il permettroit à tous de s'en aller en toute liberté, vies & bagues sauues, mesmes leur fourniroit gens & vaisseaux pour les cōduire où ils prétendroyent se retirer : menaçât, s'ils refusoÿent ceste cōdition, de leur dōner le lēdemain vn assaut general, & les auoir à quelque pris que ce fust. Mascaregne entendât ceste somation fit cōmander à Phei qu'il se retirast, protestât que sans sō respect on eust salué sa compagnie, mais que s'ils ne deslogeoyent, on les chasseroit de la place à coups de mousquets, & qu'ils auertissent Rumecan, que les assiegez estoient deliberez de lui faire bonne chere, s'il entreprenoit de les visiter. Sur ces propos les ennemis lascherent force coups de harquebuzes, dōt furent tuez deux soldats de la citadelle, qui s'estoyent trop descouuerts & auancez pour ouir les paroles de Phei. Rumecan tint promesse, car le lendemain (dixneufiesme iour de Iuillet) vne heure auant soleil couché, ses troupes donnerent vn si braue assaut, que trente des plus asseurez monterent sur la bresche, où ils combattirent long temps main à main, & furent finalement tuez, ce qui fit reculer les autres. Ce nonobstant ils continuerent & comblerent tellement le fossé, qu'il ne falloit plus monter pour auoir entree en la citadelle, & lors durant la nuit ils ne cesserent de trotter par les mosques de la ville, vouans à Mahumet qu'ils mourroÿt à l'assaut, où se verroyent maistres de la citadelle, si tost que le iour seroit venu. Ils allumerent tāt de cierges, torches & flambeaux par toutes les places & rues, qu'on les voyoit marcher en troupes, dont Mascaregne fut auerti, & lors, se doutant de la venue, disposa ses gens à leur deuoir.

15. LE lendemain les ennemis vindrent à l'assaut deux heures deuant iour, & y eut vn tref-aspre conflict, & comme chascun estoit attētif au combat, les soldats posez en garde dans la citadelle au costé de la marine, estimans leur presence inutile en tel endroit presque inaccessible, coururent se mesler avec leurs cōpagnons. Mais par leur inconfideree hardiessè ils cuiderēt tout perdre : car environ soixante soldats des troupes de Iuzarcan, voyans la mer basse, & pensans que cest endroit ne seroit gueres bien gardé, vindrent doucement planter leurs eschelles sur les escueils, montent sur le ro-

*Diuers assaux
donnez par
Rumecan, re-
poussez par les
Portugallois.*

cher, puis tirent leurs eschelles, & sans aucun bruit gaignent le dessus des murailles. Deux Portugallois, qui alloient & venoyēt par la citadelle, ayās descouuert ceste troupe aux mesches des harquebuziers, coururent incontinent auertir Mascaregne que l'ennemi estoit dedans. Lui acompagné d'un seruiteur seulement leur cōmande de parler bas, en retient l'un avec soy, & enuoye l'autre signifier à ceux qui estoient en la grād' place en quel estât estoit la citadelle. Ce pendant il marche vers ces soixante, vingt desquels estoient ia montez sur les toicts des maisonnettes, & y auoyent planté deux banderolles, les autres entrez en quelques logis commençoient à piller & demandoient de l'argent aux femmes, aucunes desquelles s'apprestoient à les combattre, quand Mascaregne & quelques Portugallois suruindrent qui chargerent de telle vigueur ces soixante que tout fut fracassé, & les suruiuans contrains se ietter par où ils estoient entrez, mais à leur cōfusion, d'autant qu'ils se deschirerent en pieces sur les rochers, & perirent tous de mort violente, excepté vn qui fut retenu prisonnier. Cela fait Mascaregne reuint à la bresche, & trouuant ses soldats recrus, les encouragea par le rapport de ceste nouuelle desfaite, tellement qu'il reprindrent nouuelle force & contreignirent l'ennemi de se retirer. Il n'estoit pas encores iour: mais au leuer du soleil les ennemis apperceuans le carnage de leurs compagnōs, entrerent en telle fureur qu'ils retournent à l'assaut, lequel dura iulques à neuf heures, où quelques femmes demeurees en la citadelle se porterent vaillamment. En ces deux assaux les ennemis perdirent mille hommes, & leur colonnel Iuzarcan, & les assiegez sept tant seulement, que Mascaregne fit enterrer en grand' pompe & plustost avec signes de ioye que de tristesse, à cause de l'heureux succes de ceste iournee. Deux iours apres, enuiron vne heure apres midi, les ennemis donnerēt vn troisieme assaut, qui fut soustenu par Fernand de Castre & Louys de Souze, si valeureusement que les ennemis laisserent plus de cent cinquante hommes sur la place, & ne s'en retournerent pas tous si disposés qu'ils estoient venus. Les assiegez y perdirent quelques vns des leurs, tellement que de iour à autre leur nombre décroissoit, sans grande apparence de renfort, à cause de quoy Mascaregne & les principaux estoient fort angoisiez. Mais en telle destresse suruint le catur enuoyé vers les gouuerneurs de Bazain & Dabul, lequel rapporta que le secours arriueroit biē tost. Les assiegez furēt tant resiouis de ces nouuelles que pensans ia estre deliurez ils se tindrent si peu sur leur gardes, que le lendemain on les cuida surprendre, & les ennemis en grand nombre monterent sur la bresche: mais vingt cinq soldats cōduits par François Almeida, qui gardoit la tour de S. Thomas, soustindrēt vaillamment le premier effort, tandis que les autres s'armoyent. Estans tous acourus à teste baissée, le combat dura plus de trois heures, de furie si obstinee qu'il est impossible de l'exprimer, & avec horrible carnage de part & d'autre, mais beaucoup plus sans comparaison du costé des ennemis, qui laisserent morts pres de huit cens hommes, & se retirerent en grand desordre dedans leur camp. Les assiegez estoient lors en petit nombre, & neantmoins auoyent si peu de viurés qu'une poule se védoit dix ducats, & les autres choses qu'on pouoit

voit trouver pour le soulagement des malades, à l'équipolent.

16. M A M V D Roy de Cambaje, averti du malheur de son armée, enuoye au secours son Cōestable nommé Mojatecan, avec quatorze mille cōbatans. Iceui s'estant joint au camp, les chefs resolurent de miner & renuerfer la citadelle, ce qu'ils firent avec tel stratageme & bruit des gens au dehors, que les assiegez n'entendirent le bruit sous terre, & ne s'en apperceurent que bien tard, à l'occasion dequoy deux tours firent le sault. L'une fut abandonnée de bonne heure par la garnison, & par ce moyen n'y eut mal qu'en la cheute du bastiment: mais les soldats de la tour de saint Iean, pour n'auoir voulu croire Mascaregne (lequel voyant les ennemis se retirer vistement loin des fosses & bresches, se douta de la mine, au lieu qu'ils faisoient semblant de sapper, & cria apres ces soldats qu'ils quittassent tout) furent esleuez en l'air & foudroyez par ceste tempeste, estans au nombre de septante, desquels on voyoit voler les pieces & morceaux de tous costez. Quelques vns furent portez par l'air tous entiers, & tombans par terre on leur trouuoit les espees & boucliers es mains, tant ils desiroient le combat. Vingt autres furent gastez du feu & réduits inutiles pour le reste de leur vie. Quant aux personnes de qualité, qui furent ainsi meurtris, lon conte Fernand de Castre fils puîné du Viceroy, ieune Seigneur de tresgrande esperance, Iean Almeida, Louys Melio, Iosse de Sotomajor, Antoine Roderic, Gilles Coutin, Iosse Reinose, Aluarez Ferreire, Roderic de Soufe, Laurent de Far, Iean Brandane, George Almeida, Tristan de Soufe, Francisque Lopez & Gratià Ferrace. Quant à Mascaregne il estoit au pied de l'autre tour, mais voyant venir la ruine, il se retira promptement avec quinze autres: puis, apres que la mine eust ioué, retourna voir ce qui estoit avenu, & vid cest horrible spectacle, non sans horreur & gémissement. Or comme les assiegez vouloyent pouruoir à la sepulture de ces corps despezés, ils furent contrains laisser tout pour soutenir & repousser les ennemis, lesquels sans la nuit eussent emporté la place. Mascaregne armé d'un courage inuincible ayant fait enterrer les morts, tant de la ruine que de ce dernier assaut, & medicamenter les blesez, à l'aide des suruiuans, suiuis des femmes & de quelques esclaves, fit leuer vne muraille assez pres de la vieille tour, des ruines d'icelle, de suffisante hauteur & espaisseur contre un premier effort. Les ennemis estonnez de ceste diligence dresserent aussi vne muraille, & continuerent leur mine, laquelle ne seruit pas tant que la premiere, car elle n'abatit qu'un quartier de la tour, ce pendant ils tiroient en bas les pierres avec des grands crochets de fer, au moyen dequoy Mascaregne fit remuer les pieces de ceste tour, craignant un renuerfement final d'icelle: mais pource qu'il n'auoit pas cent hommes en pied, il fut contraint y laisser deux des principales, qui ne seruoient de rien. En ces entrefaites, trois esclaves de la citadelle se sauuerent au camp des ennemis, firent entendre le petit nombre & la disette des assiegez: à l'occasion dequoy les ennemis reprenās courage firent iouer vne nouvelle mine qui renuerfa la tour de saint Iacques, puis acoururent promptement à l'assaut, & maugré la resistance des Portugallois, plantent leurs enseignes sur le rempar, entrent en la basse cour, & saisissent la nef du

Mojatecā Cōestable de Cābaia amene quatorze mille hommes contre les Portugallois, & ce qui s'en ensuiuit.

temple nommé saint Jacques: mesmes quelques iours durant il y eut tel combat qu'à par fois le temple demouroit aux Portugallois, & par fois aux ennemis. Or d'autant qu'il estoit question de la vie, de l'honneur & des biens, Mascaregne & ses gens trauaillerent de telle ardeur qu'ils bastirent vne muraille dedans le temple, laquelle separoit le chœur d'avec la nef, les Portugallois faïsans leur seruice en l'un, & les Cambajens le leur en l'autre.

*Secours en-
uoyé à Mas-
caregne par
Jean de Cas-
tre Viceroy
des Indes.*

IEROSME de Menefez gouverneur de Bazaim ayât enuoyé les lettres 17.
de Mascaregne à leã de Castre Viceroy des Indes, par lesquelles on l'auertissoit de la necessité des assiegez, laquelle estoit empiree beaucoup depuis ces lettres escrites, le Viceroy fit armer en peu de iours quatorze fregattes desquelles Aluarez de Castre son fils aîné fut esleu general, & se mit à la voile sur la fin de Iuillet, avec telle resolutiõ que maugré la rigueur de l'hyuer, lors tres-aspre en ces endroits, il gaigna le port de Bazaim, où il trouua Francisque de Menefez, & s'estans ioints ensemble furent contrains se separer à cause des vents, & prendre chascun vaisseau sa route à part, pour se rendre pres de la citadelle, au plustost qu'il seroit possible. Les premiers qui en approcherent furent Antoine Moniz & Gratian Roderic en vne fregatte, la venue desquels remit le cœur au ventre des assiegez. Tost apres, voici venir Louys Melio de Médoze, & Edouard de Menefez, qui pour leur bienvenue soustindrent vn furieux assaut, auquel les ennemis eurent l'auantage, pour quelques heures à cause de leur grand nombre: mais on ne les laissa gueres long temps iouir de ceste victoire, car Mascaregne leur courut sus incontinent, & les mit en route, tellement que par leurs huces estrâges ils donnerent l'alarme au camp, & ramenerent leurs compagnons, qui, nonobstât vne pluye espaisse soudainement suruenue, ne laisserent d'approcher, tellement que la meslee dura iusques au soir à coups de picques, de fiesches & cimeterres: puis si tost que la pluye fut cessée, le canon se print à foudroyer de part & d'autre, dont la conclusion fut que les ennemis quitterent la place, apres auoir combatu l'espace de sept heures. Au mesme temps Jean Ataïde & Francisque Guillaume arriuerent avec deux brigantins, tandis que les vns & les autres remparoyent. Roderic Fernand suruint en sa fregatte, qui portoit vingt soldats, & ainsi les capitaines venoyent à la file de iour en iour. Finalement Aluarez de Castre & Francisque de Menefez acõpagnés de la plupart des fregattes surgirent au port de Diu, le vingthuitiesme iour d'Aoust, & lors se trouuerent ensemble vingt cinq vaisseaux grands & petis, esquels n'y auoit pas plus de quatre cës hommes. Il en arriua encores d'autres au mois de Septembre, tellement que nul des vaisseaux partis de Goa ne perit.

*Effort & combat des Portu-
gallois armez
au secours de
la citadelle
pour repousser
les Turcs.*

APRES que tout le secours fut ramassé dedans la citadelle, les soldats 18.
nouveau-venus, apperceuans que les ennemis auoyent tellement descõbré avec leurs crochets les pierres de la derniere tour par eux abatus, que les deux pieces d'artillerie estoient aussi demeurees en leur puissance, ne peurēt supporter cela: & cõme ieunes estourdis ont acoustumé de faire, com mēcent à dire que les ennemis n'auoyent autre force que leur artillerie, que la crainte

crainte de Mascaregne estoit cause de la longueur de ce siege, que si lon eust fait des courses iusques au camp de l'ennemi, les choses seroyent en meilleur estat. Par telles calomnies ils corrompirent les vieux soldats, & les tirerent en leur opinion, qui fut aisément confirmee par la perte des deux pieces. Somme ils complotterent iusques la d'aller vers Mascaregne, & lui commander en paroles couuertes qu'il leur permist de faire vne sortie. Lui connoissant la sottise de ces importuns, & le danger où ils se precipitoient, leur declaira tout net que iamais on ne leur ouuriroit la porte de son consentement, & se garderoit bien d'estre d'un si perilleux auis. Il les prioit au reste d'estre prudens, non pas audacieux, sinon qu'ils voulussent tout perdre, & rabattit dextrement toutes leurs allegations, adioustant que lon deuoit premierement scauoir au vray en quelle disposition estoit l'armee des ennemis, & attendre renfort de gens, pour combatte avec asseurance de victoire. Ceste response les retint pour lors, & Mascaregne entra en son logis pour auiser avec Aluarez de Castre & autres à ce qui estoit le plus expedient. Ainsi qu'ils communiquoyent ensemble, les ennemis ietterent un chable sur l'une des pieces tombee parmi les ruines de la tour, afin de la tirer de là : ce qui mutina rellement les soldats de la citadelle, que tout à l'heure ils courent en troupe au logis de Mascaregne, se plaignent de la brauade des ennemis, crient & tempestent pour auoir congé de sortir, le demandans avec vne audace & insolence extreme. Mesmes l'un des plus seditieux se prend à dire aux autres, Souffrirons-nous qu'un tel capitaine nous commande tousiours? Vaudroit-il pas mieux obeir à vne idole qu'à ce poltron? Mascaregne dissimulant pour lors, respondit froidement & en souria du bout des leures, Soldat, peut estre que ie merite voirement d'estre estimé vne idole, & ie confesse auoir presque aussi peu d'adresse: mais ie scay bié vne chose, c'est que tu t'enfuiras des premiers arriere du combat, dedans lequel toy & tes semblables vous allez ietter à l'estourdie. Ceste predction fut veritable: car ce braue soldat fut le premier qui se tira loin des coups. Au reste, Mascaregne extremement despité de telle atrogance, laquelle il ne pouuoit reprimer, n'ayant personne de son costé, fut contraint lascher la bride à ceux qui cerchoyent malencontre, craignant qu'ils ne fissent quelque plus estrange mesnage dedans la citadelle mesme: & pourtāt il fit donner le signal pour sortir, laissant en garde cent soldats, & menant dehors tous les autres en trois troupes, Aluarez de Castre menant l'auantgarde, Frâcisque de Menefez la bataille, & Mascaregne l'arrieregarde, à son grand regret, & voyant desia le malheur qui en auint. Les ennemis qui les sentirent venir, donnerent tel ordre à leurs affaires que les Portugallois n'eurent pas l'honneur d'assaillir ni de combattre longuement, ains furent incōtinent enclos, & chargez par deux bataillons si forts, qu'ils retournerēt plus viste que le pas vers la citadelle, estans viuement poursuiuis par les Cambajens. Edouard de Menefez ieune & braue Seigneur fit tous ses efforts de retenir les fuyards, où il perdit ses pas & ses paroles: mais au lieu de leur ressembler, lui & quelques autres combattirent iusques à la derniere goutte de leur sang, aimans mieux mourir les armes au poing que se rēdre ou fuir.

Ainsi donc avec Edouard furent tuez Francisque de Menefez, Nonio Peireire, François Almeida, Lopez de Soufe, Roderic Fernand, François Guillerme, & environ cent de leurs soldats. Mascaregne tascha par tous moyens de rallier les troupes, afin de faire vne retraite moins honteuse, mais sa vertu ne pût rien à l'endroit de ceux que la peur priuoit de iugement, chascun s'efforçant de gagner son compagnon à bien courir. Comme Aluarez de Castre remontoit par les ruines d'une tour, il receut vn coup de pierre à la teste dont il tomba esvanoui, & eut-on toutes les peines du monde à le sauuer des mains de l'ennemi, que Mascaregne contraignit finalement se retirer en son camp. Les soldats tant eschaufez auant le combat perdirent lors toute leur audace, n'osans à peine hauffer le nez, quoy que Mascaregne leur monstra bon visage, en les encourageant à recompenser la perte passée. Au contraire les ennemis deuenus plus aspres acheuerent de ruiner les tours qui restoyent debout en la citadelle, & briserent la pluspart des bastimens avec leur artillerie : à quoy Mascaregne remedia selon sa resolution & dextérité acoustumee, tellement que la pluspart du dommage tomba sur les edifices.

*Ordre donné
par le Viceroy
pour secourir
& deliurer
Mascaregne.*

TANDIS qu'on se battoit ainsi deuant la citadelle, Ieâ de Castre Vice-roy des Indes receut nouuelles de la mort de son fils puisné Fernâd, accablé par la ruine d'une tour, comme dit a esté ci dessus. Encores que ceste playe le touchast iusques au fond du cœur, neantmoins il se contint si grauement que lon ne pouuoit remarquer changement quelconque en lui : mesmes il louoit hautement la mort de son fils, & ce pendant menaçoit d'en faire repentir l'armee du Roy de Cambaje, & chastier si roidement les ennemis, qu'il en seroit memoire. Pour executer sa pensee, au commencement de Septembre il donna cômmission au capitaine Aluarez de Cugne, de rassembler tous les vaisseaux flottans sur ceste mer Indoïse, & de les mener à Diu. Outreplus il lui bailla lettres adressantes à Mascaregne, portans defense de laisser sortir personne de la citadelle, sans expres commandement du Viceroy. Cugne acompagné de quatre cens soldats, & de quelques charpentiers & massons, en cinq fregattes, arriua au port d'Ormus, où cinq autres fregattes estoyent venues auparauant, tellement qu'en ceste flotte se trouuerent quinze ou seize cens hommes, lesquels firent des courses sur mer, & vne fois entre autres rencontrèrent le cousin de Coje Sophar, retournât du Caite, avec vne armee nauale qu'il menoit au secours de Rumecan. Apres vn long & furieux combat, Cugne demeura victorieux, mit à fond vne partie des vaisseaux ennemis, tuez ou noyez pour la pluspart, leur chef & quelques vns des principaux de leur armee retenus prisonniers. Ils furent menez à Diu, & serrez en la citadelle, mais on ne les y garda pas longuement, ains apres qu'on les eust esgorgez, les testes furent iettees au canal, afin que deualans vers ceux du camp, & reconues de leurs ennemis, ce fust pour les descourager, & leur trancher tout espoir de secours. Cugne perdit grand nombre de gens en ceste bataille nauale, & en remena encores dauantage de blessez, dont plusieurs moururent, les autres demurerent inutiles, ou malades fort long temps. Quant au Viceroy, si tost que le temps se mon-
stra

stra commode à la navigation il haussa les voiles, & partit de Goa suivi de septante vaisseaux grands & petis. Estât arriué à Bazaim, il resolut d'y attendre ceux qui estoient demeurez derriere à cause des vents, & tādīs enuoya Manuel Limice courir avec quelques fustes au lōg de Surrate, où il fit grād meurtre d'ennemis, & ramena force butin. A son retour, le Viceroy, qui auoit attendu sur mer l'espace de seize iours, sans mettre pied à terre, print la route de Diu, & enuoya Limice pour descourir & attrapper ce qu'il pourroit, dōt il s'acquitta vaillāmēt, & se reioignit à la flotte pres l'isle des morts. De ce lieu toute la flotte cingla droit à Diu, où elle arriua le septiesme iour de Novembre, y ayant en icelle seize cens hommes de guerre. Vn iour auparavant, Laurent Petrejo general de la flotte partie de Lisbonne en ceste annee (selō la coustume, qui est d'enuoyer tous les ans quelque rafraischissement d'hōmes & de nauires au Viceroy des Indes) s'estoit rendu au mēme port, ayant eu nouuelles à Cochim des apreſts du Viceroy, & de l'estat de Mascaregne.

10. LE Viceroy estant assez pres de la citadelle fit ietter les anches, & ranger les vaisseaux, puis enuoya querir Mascaregne avec lequel il communiqua de ce qui estoit à faire pour ruiner les ennemis. Le lendemain on planta deux eschelles du costé de la mer, afin qu'au reflux ceux de la flotte peussent entrer en la citadelle, & disposā-on les pieces es endroits commodes pour canōner sans cesse le camp des ennemis, lesquels, au lieu de s'estōner, s'appresterent alaigrement au combat, donnās ordre à tout ce qui estoit requis pour tel effect, & sur tout logerent bon nombre de mousquetaires & canonniers es tours basties sur le canal, pour empescher l'entree à la flotte, estimans que le Viceroy voulust les assaillir de ce costé, où ils ordonnerent vn bataillon de quinze mille hommes des plus assurez, qui iurerent tous de mourir sur la place plustost que de reculer. Mais le Viceroy, qui auoit autre dessein, entra secrettement dedans la citadelle, le neuſiesme iour de Novembre, avec toutes ses troupes : puis s'auisā d'un stratageme pour amuser les ennemis. Il fit entrer es vaisseaux tous les mariniers, massōns, viuandiers & goujats, commandant à ceux qui les conduisoient, qu'au signal qui leur seroit donné sur les trois heures de matin ils voguassent droit au riuage, avec chascun deux picques esleuees es mains : que ceux qui tiroient à la rame, maniasſent l'auiron d'une main & tinſſent en l'autre des mesches allumees : que tous ensemble huaſſent à plaine teste, fissent sonner tous leurs tabourins & trompettes, approchans doucement comme pour gagner le riuage. Cela ainſi disposé, Antoine de Correge fut commis pour garder la citadelle avec quelque garnison. Le lendemain tous les guichets des portes de la citadelle furēt abatus & emportez au loin par le cōmandement du Viceroy, afin que les soldats ne tournassent plus les yeux à ceste retraite, ains fissent leur compte de vaincre ou de mourir. Sur la pointe du iour il fait donner le signal aux vaisseaux, & met dehors enuiron deux mille cinq cens Portugallois qui montent sur les murailles des ennemis, & se rāgent à leurs enseignes, pour donner dedans les corps de garde. Ceux qui estoient sur mer, ayans receu le signal, & disposez selon l'intention du Vi-

Arrivee du Viceroy au port de Diu: bataille donnee, les ennemis desfaits, la volée prise d'assaut, Ramecā tui, la citadelle deliuree, la domination du Roy de Portugal establie es Indes plus fermement qu'auiā.

ceroy cōmencent à voguer avec enseignes desployees, & vn estrāge bruit lequel attira encores celle part nouuelles troupes d'ennemis, estimans que c'estoit là qu'il falloit combattre. Les autres quartiers afoiblis d'autant, il fut plus aisé aux Portugallois d'approcher du cap. Mascaregne, qui menoit le premier bataillon composé de quatre cens homes d'élite, dōna dedans de pied & de teste, & perdit cinquante soldats en ceste meslee, le reste demeurant engagé, sans le secours des autres Portugallois qui firent reculer les ennemis. Ceux qui attendoyent la flotte au riuage, descouurans le tour qu'on leur auoit ioué, enuoyerent incontinent la pluspart de leurs troupes vers le lieu où le combat estoit commencé, & lors force fut au Viceroy d'enuoyer vn autre bataillon pour soustenir le premier. D'vn autre costé, lui & Petrejo forcerent vne tour qui les endommageoit fort, & tuerent tous ceux qui la defendoyent. Rumecan de sa part monstra ce iour qu'il n'auoit faute de sens ni de courage, & donna tāt d'affaires aux Portugallois, que sans Mascaregne qui les encourageoit par viues remonstrances, & leur monstroient exemple en marchant des premiers parmi les coups, ils eussent tout perdu ce iour là. Or comme la meslee se renforçoit, le Viceroy & Petrejo suruindrent, & lors les soldats, animez tant par les propos de Mascaregne que par la presence de leur general, firent tel deuoir que finalement les ennemis tournerent le dos, les vns gaignās le pont, les autres passāns le canal à nage pour se sauuer hors de l'isle. La ville estant abandonnee & le camp mis en route, les Portugallois mirent tour à feu & à sang, le Viceroy faisant abatre les edifices que le feu auoit espargnez, tellement que la ville de Diu fut du tout ruinee. On trouua tant es maisons de la ville, qu'en diuers pauillons & logis du camp, les tables dressees, la viande au feu, & des viures mesmes par les places publiques, comme en temps de paix, pource que les ennemis ne se doutoyent point d'vn si estrange changement. Les Portugallois perdirent cent cinquante homes en ceste bataille, & quelques capitaines, asauoir George de Soufe, Iean Manuel, Francisque Azeuede, Baptiste Personne, Cosme Payua, Balthazar George, Edouard Roderic Nazin, Vasque Fernand; Arias Gomez Quadre, & Iulian Fernād. Du costé des ennemis moururent plus de trois mille homes. Rumecan, voyant les choses en tel desordre, ietta bas quelques acoustremens qui le faisoient paroître entre tous autres, & tascha se sauuer: mais estant reconu par quelques soldats il fut chargé, & apres assez longue resistance tué sur le champ, comme furēt aussi six autres des principaux chefs de l'armee. Iuzarcā le ieune, ayant fait merueilles ce iour, fut prins vif, & traité honnorablement, comme sa qualité le meritoit. Le Connestable Mojatecan monté sur vn viste coursier eschappa avec quelques capitaines, laissant l'enseigne royale & tous les autres estendards qui furēt portez au Viceroy. On ne sauroit exprimer les cruautez cōmises par les Portugallois contre les homes, femmes & enfans de la ville de Diu, lesquels passerent tous au ttanchant de l'espee, sans espargner femmes enceintes, ni enfans à la mamelle, non pas mesme les bestes brutes: tant la victoire les auoit acharnez pour venger la mort de leurs cōpagnons. Toute l'artillerie des ennemis fut gaignee, & leurs troupes restantes enco-

res en grand nombre se retirerent bien viste, & fōrt auant en terre ferme, puis s'escarterent en diuers lieux de Cambaje, laissant leur Roy confus & esperdu, iusques à ce qu'il fut contraint accepter telle composition que le Viceroy voulut: brief lui & son royaume demurerent comme asseruis aux Portugallois, qui firent bastir à neuf leur citadelle, si qu'en peu de tēps elle fut rendue plus forte que deuant. Quant à la ville, à cause du trafic, par succession d'annees on l'a remise au dessus, mais non telle que iadis. Les Portugallois perdirent es assaux & rencontres de ce siege pres de deux mille hommes. Apres que le Viceroy eust donné ordre aux affaires de ce quartier, il retourna vers l'Inde basse: & quant à Petrejo, estant arriué au port de Cochim, il fournit ses nauires, & reprit la route de Portugal, apportant au Roy les nouvelles de la victoire & le discours entier de ceste guerre, laquelle nous auōs descrite sommairement.

* *

FIN DV DIXNEVFIESME LIVRE.



QQ iiii



LE VINGTIESME LIVRE.

SOMMAIRE.

1. Division de l'Asie, & description des principales parties d'icelle par maniere de recapitulation, pour plus aisee intelligence des matieres traitees es livres precedens.
2. Nouveau moyen faict par le Roy Jean troisiesme, pour conseruer le trafic des Indes.
3. Ample discours de la felle & doctrine des Iesuites, de leur nauigation, deportemens & succés en diuers lieux des Indes Orientales.
4. Discours de quelques autres choses remarquables aduenues depuis la guerre de Dix usques à la mort du Roy Jean troisiesme.
5. Sebastian, premier du nom, & dixseptiesme Roy de Portugal, succede (bienicent) à son ayeul Jean troisiesme.
6. L'estat du Royaume de Portugal & autres pays appartenans au Roy Sebastian.
7. Recis de la guerre suruenue en Barbarie entre Muley Mahomet & Muley Abdelmelec, pour les royaumes de Fez & de Maroc.
8. Le Roy Sebastian embrasse le parti de Muley Mahomet, & passe en Barbarie pour le mettre en possession de ces royaumes.
9. Bataille remarquable, en laquelle perissent de diuerses morts Muley Mahomet, Abdelmelec, & le Roy Sebastian.
10. Ce qui s'ensuiuit apres ceste bataille, & conclusion de l'histoire de Portugal.

Division de
l'Asie, & des-
cription des
principales
parties d'icelle
par maniere
de recapitula-
tion & pour
plus grade in-
telligence de
ce qui a esté
traicté es livres
precedens.



OMBIEN qu'es liures precedens nous ayons veu 1. ça & là quelques descriptions des Indes Orientales & autres pays de l'Asie, où les Portugallois ont penetré de nostre temps: toutesfois il ne sera, peut estre, impertinent de proposer ici en vn seul chapitre toutes ces prouinces en rang propre, afin de représenter au lecteur tout à vn coup ce qu'il a peu imaginer en tant de parcelles susmentionnées, & graver mieux en sa memoire les choses memorables deu-
duites iusques à present. Vray est que les nauigations des Portugallois touchent la coste Orientale de l'Afrique, à laquelle appartiennent les royaumes de Zofala, Melinde, Quiloa, Mombaze, Mozambique & autres: mais cela se monstrant assez par les chartes, ioint que les principaux faits d'armes ont esté executez en l'Asie, c'est à icelle que nous nous voulons arrester, suiuant les discours qu'en a faits le seigneur Ieā de Barros en ses decades, & autres doctes geographes de nostre temps en leurs escrits. L'Asie, estimée par quelques vns la plus grāde portion de la terre habitable, est separee del'Europe par le fleuve Tanais, de l'Afrique par le destroit qui est entre la mer mediterrannee & le Sein d'Arabie. L'Océā l'environne des autres costez. Auiourd'hui nos Geographes sont de deux auis en la diuisiō d'icelle, aucuns la considerans en sa masse, les autres en ce qui est maritime & plus conu. Les vns donc la considerēt en cinq parts principales, dont la pre-
miere

miere & limitrophe d'Europe obeit au grand Duc de Moscovie, bornée de la mer glæce, du fleuve Obie, du lac de Kytaja, & du destroit entre la mer Caspie & Euxine. La seconde est la Tartarie suiuite au grãd Cham, ayant pour limites la mer Caspie, le mont Imaus & le fleuve Iuxarte au Midi, l'Océan au Leuant & au Septentrion, la Moscovie à l'Occidēt. Les Turcs tiennent la troisieme partie, laquelle contient ceste estendue de pays qui est entre la mer Euxine, Ægee & Mediterranee, l'Egypte, la mer rouge ou Arabique, la Perlique, le fleuve Tigris, la mer Caspie ou de Bachu, & le destroit qui est entre icelle & la mer Euxine ou mer majeur. Sous la quatrieme est compris le royaume de Perse, aboutissant à celui des Turcs vers Occident, au grand Cham vers Septentrion, au fleuve Indus à l'Orient, & au Midi à la mer des Indes. Quant à la cinquiesme partie, c'est celle que nous appellons les Indes Orientales, ainsi appellees à cause du fleuve Indus, & la haute distinguée de la basse par le Gange fleuve tresrenommé. Marc Paul Venitien en fait trois parties, ascavoir, la grande, la petite & la moitoyenne. Ces Indes sont gouvernees par vne infinité de Rois & Seigneurs, quelques vns desquels sont vassaux du grand Cham, du Sophi, & du Roy de Portugal. Pour le regard des ports & lieux maritimes depuis le goulfe de la mer rouge iusques au promotoire appelé cap de Lampo, au trentiesme degre de la latitude Septentrionnale, les Portugallois sont maistres de la pluspart, ou en tirent quelque tribut. Les isles d'Asie, specialemēt en la mer Indienne, sont Sumatra ou Taprobane, Zeilan, les deux Iauas, Burneo, Celebo, Palohan, Mindanao, Gilolo, les cinq Molucques, Iapan, & infinies autres petites, lesquelles on descouure aucunement es chartes vniuerselles, sur tout en celle du docte Mercator, excellent geographe de nostre temps. Voila quant à la premiere diuision : reste de considerer la seconde, laquelle on distribue en neuf portions, dont la premiere commence au goulfe de la mer rouge, & finit à celui de la mer Perlique : la seconde s'estend de ce goulfe de Perse iusques au fleuve Indus qui se desgorge en l'Océan, & costoye le royaume de Cambaje : la troisieme depuis la ville de Cambaje iusques au promontoire de Comori : la quatrieme commence à ce promontoire : la cinquiesme au Gange : la sixiesme au promontoire de Cincapura au dessus de Malaca : la septiesme au grand fleuve nommé Menam, que ceux du pays disent signifier la mere des eaux, & lequel traaverse le royaume de Siam : la huitiesme s'estēd de là iusques au cap de Lampo, promontoire renōmé & le plus Oriental de toute la terre ferme, au milieu de la coste maritime du grãd royaume de la China : la neuuesme peu hātee des Portugallois, (encores qu'ils soyent montez plus haut vers l'Oriēt iusques aux Leques & Iapanois) est si grāde qu'on ignore si c'est isle, ou terre ferme cōtinuée iusques à l'autre bout de la China. Or pour retourner à la premiere portion de ces neuf, depuis le goulfe de la mer rouge, qui est situé en latitude de douze degrez & deux tiers, iusques à la ville d'Aden, capitale du royaume, lon conte quarāte lieues : & d'Adē iusques au cap de Fartache, qui est à quatorze degrez & demi, cent lieues. Entre ces extremittez sont situez Abiam, Ar, Canacam, Brum, Argel, Sael ville capitale du royaume d'Herit, Cayem, &

Fartage, ville d'un autre royaume appelé de mesme nom, & le peuple Fartachin. D'illec iusques à Curia Maria, où Vincent Sodre fit naufrage, y a septante lieues, & au milieu du chemin se trouue Dualfar, ville fournie du meilleur encens de toute l'Arabie, & en plus grande quantité que nul autre lieu. De Curia Muria iusques au cap de Razalgate, qui est à vingt deux degrez & demi, lon conte six vingts lieues de pays desert & sterile. A ce cap commence le royaume d'Ormus, & de la ville d'Ormus, en trauerfant la mer, iusques au cap de Mocandan, y a quatre vingts & sept lieues. De ce royaume sont Calajate, Curiate, Mazcate, & autres isles, la derniere desquelles nommee Limma est à huit lieues de ce cap de Mocandan que Ptolemee nomme Afaborum, & le met à vingt trois degrez & demi, mais nos geographes le mettent à vingt six, & en cest endroit finit la premiere diuision. Tout le pays compris entre les deux limites d'icelle, que les Arabes appellent Hyaman, & nous l'Arabie heureuse, est la plus fertile & habitee des trois Arabies. Trauerfant du cap de Mocandan à l'autre qui est vis à vis nommé Iacquete, nous entrons en la seconde portion, qui est petite & peu habitee à cause de la nauigation qui y est perilleuse. Le pays est quasi desert, & iadis s'appelloit Carmanie, auioird'hui Herac Ajan, où sont les royaumes de Macran & Guadel, qui ont pour principales places Guadel, Calara, Calamete, & Diu à la premiere bouche du fleuve Indus vers l'Occident. On compte deux cens lieues depuis ce cap de Iacquete iusques au fleuve Indus. La troisieme portion contient cent cinquante lieues, a sauoir depuis la pointe de Diu iusques au cap de Iacquete trente huit lieues, & de là droit par mer iusques à Diu ville du royaume de Guzarate ou Cambaje, cinquante lieues, & de Diu, qui est à vingt degrez & demi iusques à la ville de Cambaje à vingt deux degrez sont cinquante trois lieues, & de Cambaje iusques à Goga dix ou douze lieues. En ceste estendue de pays est comprise vne grand' partie du royaume de Guzarate, ensemble la prouince des peuples nommez Rezbut, qui habitent es montagnes. Quant à la quatrieme portion elle commence à la ville de Cambaje & finit au cap de Comori, tirant en longueur environ deux cens nonante lieues de bon pays, qui est toute la fleur des Indes, & qu'on peut diuiser en trois parts avec deux grandes riuieres qui le trauerfent d'Occident en Orient: la premiere part separant le royaume de Decan d'avec celui de Guzarate qui le touche au Septentrion: la seconde, tranchant le mesme royaume de Decan d'avec celui de Bisnagar au Midi: la tierce, diuisant Decan & ce royaume de Bisnagar limite du goulfe de Bengala. Les deux riuieres sortent de deux fontaines en vne haute & longue montagne, nommee Gate, à l'Orient de Chaul, & sont à quinze lieues de largeur l'une de l'autre, la plus Septentrionale nommee Crusuar, & l'autre vers le Midi Benhora, lesquelles apres assez longue course se ioignent ensemble, & appelle-on ce fleuve vni Ganga, lequel se descharge en la fosse du Gange, entre deux ports nommez Angelij & Picholide, à vingt deux degrez ou environ. Ce Ganga ou Guenga est de merueilleuse largeur, à cause des riuieres qui entrent dedans, & l'eau en est estimee sainte par ceux du pays, tellement que les Seigneurs empeschent que
les

les habitans en puissent & n'y aillent se lauer qu'ils n'ayent payé quelque tribut. Il y a vne infinité de riuieres en ces trois parts de nostre quatriesme portion d'Asie. En la premiere part, qui est celle de Guzarate, lon conte depuis la ville de Cambaje iusques au fleuve Nogotana ou Mandoua septante lieues, où sont pour principales villes Machigam, Gandar, Baroche, Surrate & Rael: puis, en suiuant la coste, Noscari, Gandini, Daman, Danu, Tarapor, Quelmaim, Agacim, & Bazaim, où les Portugallois ont vne citadelle, & à Chaul qui est à treize lieues de là. Illec commence la seconde part iusques aux derniers bouts du royaume de Decan, ayât septâte cinq lieues d'espace, asauoir depuis Chaul iusques au fleuve de Zanguizar vingtcinq lieues, en l'espace desquelles sont Bande, Sifardam, Calanci & Dabul: de Zanguizar iusques à Sintacora derniere place de Decan cinquante lieues, esquelles se voyent Ceitapor, Carapatam, lamaga, Banda, Capora, & la fameuse ville de Goa. La troisieme part depuis le royaume de Decan iusques au cap de Comori contient cent quarante cinq lieues, & à force bourgades & petites villes, en l'espace de quarante cinq lieues, suiuettes au Roy de Bifnagar, comme Onor, Batticala, Bendor, Bracelor, Bracamor, Carcara, Carnate, Mâgalor, & autres. Le reste contenant cent lieues, qui s'appelle la coste de Malabar, est suiuet à plusieurs Rois, dont les principaux sont ceux de Calecut, Cananor, Cochim & Coulam, desquels & de leurs pays a esté amplement traité ci deuant. Quant au cap de Comori, c'est le bout de l'Inde dedans le Gange, qu'on appelle maintenant Indostan & Inde basse, vers le Midi, & là se terminēt les royaumes de la coste de Malabar, finissant aussi la quatriesme portion de l'Asie. Nous ne nous arresterons maintenant à la description des isles, cela n'estât du tout au propos que nous deduisons. Reste donc de toucher les autres portions, asauoir la cinquieme, qui comprend la coste du goulfe de Bengala, où il y a trois principaux royaumes, asauoir Bifnagar en longueur de deux cents lieues: Orixia, de cent & dix: & Bégala, de cēt soixante, & finit ceste portion à Chatigam port de mer, tout au fond du goulfe. De ce port iusques à Malaca se considere la sixiesme portion cōtenant trois cens quatre vingts lieues, & c'est l'autre coste du goulfe de Bégala, où se voyēt les royaumes de Verma, Aua, Pegu, Siam & Malaca. L'autre coste regardant l'Orient, en laquelle sont les royaumes de Cambaje, Campar & Cacuchin fait la septiesme portion. Les deux autres dernieres, asauoir la China, diuisee en quinze royaumes, de lōgue & large estēdue, & ce qui s'estend par de là iusques au Septentrion, n'ayât esté encores bien descouuert il suffira de le marquer pour le present. Or nous n'auons ici spécifié les villes & places notables de ces dernieres portions, ni toutes les bornes d'icelles, pour euitier prolixité, ioint que les chartes d'Asie & de l'Inde Orientale satisfont en cest endroit aux plus curieux. Mais le lecteur considerera qu'en ces deux opinions que nous auons proposees de la diuision de l'Asie, la premiere qui la reduit en cinq parties, asauoir Moschouie, Tartarie, Turquie, Perse & Inde, regarde tout le corps de l'Asie: & la seconde opinion, qui diuise l'Asie en neuf portions, considere seulement les costez de l'Ocean, sans entrer es pays du Moscouite, Tartare, Turc, ou Perse, qui sem-

blent auoir leur cas à part, & s'arreste plus à ce qu'on peut estimer Asie proprement auioird'hui, restrainant le mot à ce qui approche de la mer, & nommément aux Indes Orientales. En somme, on peut dire que la premiere opinion se rapporte à l'Asie terrestre, la seconde à l'Asie maritime, en laquelle les Portugallois ont fait quelques conquestes, basti des citadelles, & faisi certaines villes pour la seureté de leur trafic, le tout estant bien peu de chose, à comparaïson de ce surquoy ils n'ont droit aucun. Ce n'a pas esté faute de volonté, ains de puissance, ioint qu'ils ont trouué des gens courageux, belliqueux, subtils, & qui ne se sont pas laissé gourmander comme onr fait les Indiens Occidentaux, trescruellemēt traitez par la natiō Espagnole, qui d'un pays peuplé a fait un desert horrible. Mais quant à l'Orient, encores que les Portugallois ayent saccagé & butiné en quelques endroits: qu'aucuns particuliers se soyent monstrez barbares & farouches: si est-ce qu'auioird'hui il n'y en a presque point de marques, & les autres marchās trafiquent tellement à cause de la richesse des pays, qu'il y a assez pour les vns & pour les autres. Qui plus est, encores que nous ayons veu de grandes victoires obtenues par les Portugallois, si est-ce qu'à la fin ils se laisserent les premiers de faire la guerre, ayans aprins aux Indiens de combattre mieux qu'ils ne faisoient il y a cinquante ou soixante ans. A cause de quoy force fut au Roy de Portugal & à son conseil d'auiser à un autre moyen de maintenir l'estat des Indes que par les armes, veu que la guerre consūmoit peu à peu toutes les forces du royaume, qui estoient necessaires pour d'autres endroits, sur tout en Barbarie, où les Portugallois perdoient tous les ans quelque place. Doncques pour conseruer ce que lon auoit gaigné es Indes, un expedient se presenta, tel qui s'ensuit.

Nonnean moyē suui par le Roy de Portugal pour conseruer le trafic des Indes.

Les guerres en la coste de Malabar, es Molucques & ailleurs, auoyent tant harallé les Portugallois, qu'ils commēçoient à hair le mestier: & plusieurs des particuliers en s'afriandant au gain quitroyent peu à peu le train des armes, tellement que les soldats perdoient ceste ardeur, que lon auoit remarquee du temps des Vicerois Almeide & Albuquerque notammēt. Dauantage les Indiens estoient desia tant aguerris, qu'ils aprenoyent toutes les inuention de l'Europe, pour s'en preualoir contre ceux qui les leur auoyent enseignees. Il y auoit aussi cela, que les Princes & seigneurs des Indes s'entretenoyent ensemble, tellement que le conseil de Portugal apperceuoit bien qu'avec le temps suruiendroyēt des nouuelles tempestes: auxquelles l'espee ne remedieroit, n'estāt assez forte. D'y proceder par ambassades & belles promesses, les Indiens ne se laissoient pas affiner: au contraire, s'il estoit question de donner quelque venue, ils estoient fort habiles à tromper & surprendre, tesmoin entre autres le Roy de Dachen. Les nauigations ordinaires espuisoyent les finances du Roy: puis les perils & naufrages faisoient que la perte esgaloit le gain, tellement que (comme dit le prouerbe) le ieu ne valoit pas la chādelle: à quoy les capitaines & officiers aidoyent bien aussi, car pour la plupart ils ne pensoient qu'à emplir leurs coffres, tellement que si le Roy auoit quelque chose, il estoit tousiours le dernier, & faisoit-on la part au plus eslongné. Parmi telles incommoditez
il y

il y auoit cela de bien que le Roy estoit en bon mesnage avec l'Empereur, n'auoit guerre contre aucun Prince de l'Europe: & quât aux affaires de l'Afrique les garnisons ordinaires se maintenoient tellement qu'elles. Apres beaucoup de discours au conseil de Portugal, pour trouuer quelque entredeux qui à l'auenir adoucist & retinist aucunement les Indiens, il fut auisé de s'aider de la religion, quelques vns ramenant euans le fruit que lon en voyoit estre procedé au royaume de Congo. Il y a quare sectes es Indes, la premiere de demi Chrestiens, la seconde de Mahumetistes, la tierce de Iuifs, la quatriesme d'idolâtres de diuerses sortes. On estima d'oc qu'en gagnât les Mahumetistes & idolâtres, ou partie d'entre-eux, ce seroit l'appuy de l'estat & du trafic en ces quartiers. Il falloit seulement des instrumens pour entamer ceste besongne, & la poursuiure courageusement: où de recherche se presenterent nouuelles difficultez, à cause d'une si longue navigation, qu'il falloit gens de ceruelle & qui ne fussent pas du tout si gras que les prestres & moines ordinaires (amis de repos & de bonne table) mais plus contemplatifs, & de legere taille pour aller & venir en diuers lieux. Finalement les Iesuites, secte bien nouuelle pour lors, furent estimez les plus propres de tous, & enuoya-on memoires à Pierre Mascaregne ambassadeur de Portugal à Rome, pour en obtenir quelques vns, à quoy il s'employa tellement qu'aucuns d'entre eux firent le voyage, & par succession de temps se sont fort multipliez en l'Inde haute & basse, iusques à monter en l'isle de Japan, es royaumes de la China, & autres endroits tant des isles que de terre ferme.

3. M A I S il nous faut reprendre ce propos vn peu de plus loin, & le deduire au long, pour le contentement du lecteur. Vn gendarme Espagnol nommé Ignace Layola, estant dedans la ville de Pampelune, assiegee par les François l'an mil cinq cens treize, & defendue par le Duc d'Alue & quelques compagnies Espagnoles, eut vne iambe brisée, & l'autre fort endommagée d'un coup de canon. Il estoit lors aagé de vingt cinq ans ou enuiron, & se voyant inutile à la guerre par tel accident, quitta sa maison & quelques biens, & se fit moine, delibérant en son esprit d'establir vn nouuel ordre. Et d'autant qu'il n'auoit aucune connoissance des bonnes lettres & sciences, requises à l'exécution de ce qu'il pretendoit, il trouua moyen d'aller à Paris, où il estudia dix ans, & tira dix autres Espagnols à sa cordelle, avec lesquels il retourna en Espagne l'an mil cinq cens trente six. Vn an apres ils allerent à Rome pour obtenir permission du Pape d'aller en Ierusalem: mais à cause que la guerre esmue entre le Turc & les Venitiens fermoit les passages, ils changerent d'avis, & delibererent employer leur travail à enseigner la ieunesse, qui fut la marque principale laquelle les distingue d'avec les autres sectes de moines, occupez à chäter en leurs cloistres, & à faire des sermons es temples. Le legat du Pape à Venise fit prestres sept d'entre eux, & leur donna puissance d'instruire en particulier, de prescher publiquement, ouir les confessions secretes, administrer les sacremens, & faire autres actes de prestres en l'Eglise Romaine. L'an mil cinq cens quarante, ils prierent le Pape Paul troisieme, par l'entremise du Cardinal Contarin, de vouloir

Ample discours de la secte & doctrine des Iesuites: leur nauigation, desordres & desordres es Indes Orientales.

aprouuer leur ordre, ce qu'il accorda, pourueu que le nôbre de cest ordre ne môstât à plus de soixâte hômes en tout. Mais depuis, certains Cardinaux & autres officiers de la Cour de Rome, apperceuâs que ceste nouuelle secte estoit propre entre toutes les autres, ia surannees & presques pourries de vieillesse, pour soustenir le siege Romain, fort esbrâlê par les liures & disputes des Alemâs, & que si la ieunesse n'estoit enseegee de bône heure à retenir fermemêt les traditions de l'Eglise Romaine, tout le credit du Pape & des siês se perdoit de iour à autre, ils resolurêt de laisser croistre les Iesuites, au grâd regret & despit des autres ordres de moines, qui s'y opposerêt de pieds & de mains en diuers lieux de l'Europe. Dôcques il fut arresté à Rome, l'an mil cinq cens quarâte trois, que ceste secte, laquelle se fit appeller la Côpagnie de Iesus, ne seroit restrainte à certain nôbre ou pays, ains s'auâceroit & multiplieroit autât qu'il seroit possible. Leur habillemeût n'est pas si desguisé que celui de plusieurs autres moines, & ont vne cōuerfation plus attrayante & ciuile, sans lequel moyen ils n'eussent aisémêt obtenu en beau coup d'endroits le gouuernemêt de la ieunesse, laquelle ils instruisent pour neât, c'est à dire ne prenêt pas certain gage par mois ou par an. Mais si quelqu'un leur fôde vn college, ou dône les dix mille ou vingt mille frâcs, ou fournit leurs maisons des necessitez ordinaires, ils acceptent le tout par humilité. S'il y a quelque ieune homme de bô esprit & de riche maison qui leur preste l'oreille ils l'attirent tref-volontiers, & sont fort soigneux de se trouuer autour des malades, pour les consoler & donner ordre qu'ils fâcent testament. Brief, depuis l'an mil cinq cens quarante cinq ils se sont mis au monde comme lon void auioird'hui. Quant à leur suffisance, il y en a quelques vns d'entr'eux assez habiles & de grand travail. Leur principale profession est de Philosophie, sur tout de ceste partie que lon appelle Logique & sciēce de disputer. Car ils veulent estre tenus les premiers en cela, & en font môstre & gloire par dessus toutes les autres sectes, qui n'ont rien veu à cōparaison de ceste ci. Si c'est à tort ou à droit, i'en laisse le iugemêt à ceux qui fueilletêt leurs liures. Pour le regard de leur Theologie, ils suiuet & ensegnêt la doctrine de l'Eglise Romaine, laquelle ils ont rafinee & racoustree selon la subtilité de leurs entendemens, & auioird'hui sont les grâds piliers du siege Romain, soustenâs tous les articles de la doctrine d'icelui, & remplissans l'Europe d'une infinité de liures: tellemêt que depuis ces nouueaux venus, qui ne font que courir, disputer, escrire & solliciter, la pluspart des autres moines sont deuenus muets comme poissons. Mais à l'auanture ne fera-ce chose hors de propos de toucher vn mot de leur doctrine, selon que ie l'ay peu recueillir de leurs liures. Ils tiennent donc que l'Ecriture sainte est vne doctrine imparfaite, ne contenant pas tout ce qui appartient à salut, à l'edification de la foy, & à l'instruction pour bien viure, mais que ce defaut doit estre suppléé par les tradiôs. Que l'Ecriture sainte, en ce qu'elle propose & contient, est comme vn nez de cire, ne donnât resolution certaine, ains qui peut estre tournee en tel sens que lon veut. Que ceux qui desirerent voir la religion Chrestienne en son entier, doiuet defendre à toutes personnes (qui n'ôt point charge en l'Eglise) de lire la Bible, & que ceste lecture des

des particuliers nuist en beaucoup de sortes à l'Eglise. Voila leur opinion quant à l'Escripture sainte. En apres ils tiennent que tout ce qui repugne à la loy de Dieu n'est pas peché: qu'on appelle proprement peché ce qui est fait volontairement & sciemment contre Dieu & le prochain, & que s'il n'y auoit volonté au peché il ne le faudroit point appeller peché: qu'apres le Baptisme il ne demeure point de peché es regenez: que la concupiscence restant es regenez, quoy qu'elle repugne à la loy de Dieu, n'est toutesfois proprement, ni vrayement, ni en soy, ni de soy peché. Que les premiers mouuemens de la concupiscence du pecheur ne le rendent coupable: qu'il y a plusieurs pechez non condamnés par la loy de Dieu, lesquels sont plus enormes & damnales que ceux qui repugnent à la loy de Dieu, comme ceux qui sont commis contre les commandemens de l'Eglise. Que nous pouuons accomplir les commandemens de Dieu en ce monde, la misericorde de Dieu paroissant en cela, qu'il a promis la vie eternelle à ceux qui accompliroient les commandemens, & qu'en l'obseruation d'iceux cōsiste toute nostre vie & salut. Que le propre & naïf sommaire de l'Euangile est, si tu veux auoir vie eternelle, garde les commandemens. Que l'homme est disposé de sa nature à comprendre ce qui est de Dieu, & recevoir sa grace. Que la foy est croire non seulement ce qui est escrit es liures de la Bible, mais aussi ce qui a esté enseigné de vive voix, que l'on appelle tradition. Que la iustice des Chrestiens procede de leurs bonnes œuvres, & non de la foy qui embrasse Christ. Que les œuvres sont si necessaires & ont telle efficace, qu'elles font valoir la foy. Que la iustification d'un chascun particulier est fort incertaine: & que les particuliers ne doyent estre asseurez de leur salut. Que ce mot de iustification en theologie ne signifie autre chose qu'acquisition de iustice, ou mouuement & disposition à la vertu: & que la iustice chrestienne c'est se destourner du mal & faire le bien: item que la charité que nous auons enuers Dieu nous fait estre ses amis & enfans, & que par la iustice de Dieu reuelee en l'Euangile, est entēdue vne propriété en Dieu laquelle rend à chascun selon ses œuvres. Que Christ par sa mort a acquis ce bien à ceux qui le receurent pour sauueur, qu'ils serot ornez d'une vraye iustice, qui est vne sainteté, vertu & nouvelle qualité inherēte en eux mesmes, pour l'amour de laquelle Dieu se recōcilie à eux & les adopte pour estre ses enfans: item qu'il y a deux iustifications, la premiere, que Christ a meritē par sa mort à ceux qui croient en lui, qu'ils soyēt douez de charité & autres vertus: & la seconde, qu'apres auoir receu ces nouvelles qualitez par le merite de Christ; l'homme par la iustice inherente en lui merite plus grande, plus parfaite & plus exacte iustice, reconciliatiō, adoption, & finalement la vie eternelle. Que les regenez meritent par leurs œuvres plus parfaite & entiere iustification que ceste premiere qui leur est gratuitement donnee par le merite de Christ: & mesmes que nos œuvres sont necessaires ou de fait ou de volōté à ceste premiere iustification pour la rendre valable: item que la vie eternelle est duee comme iuste & deu faire aux bonnes œuvres des regenez, lesquels doyent par leur vertu meriter ceste eternité bien-heureuse. Que l'homme peut s'atisfaire pour ses pe-

chez à Dieu, par mesure de proportion, c'est adite en deduction & en payât tous les iours quelque chose, encores que la maiesté de l'offensé soit infinie, & nostre satisfactiō finie. Es autres points, comme de l'inuocation des Saints qui sont au ciel, de la veneration & adoration des images, des reliques, du purgatoire, des additions au Baptême & à la Cene, de la communion sous vne espee, de la presence corporelle de Christ, de la transsubstantiation, du sacrifice de la messe, des prieres en latin, & autres tels articles, ils s'en accordent avec l'Eglise Romaine. l'ay touché les autres au long, afin que lon voye la theologie & philosophie des Iesuites, en quoy faisant l'ay suiui leurs propres mots autant qu'il m'a esté possible, sans toutes fois entrer en examen ni explication de cela, poutce qu'il n'est ici question de disputer, ains proposer simplement les choses, selon qu'elles sont auenues. Quant à la discipline des Iesuites, elle a mesme fondement que celle des autres sectes de moines, & le sommaire d'icelle, descript par laques Andrade Portugallois, l'un de leurs plus affectionnez docteurs, est tel. Celui qui combattra sous l'enseigne de nostre cōpagnie, & voudra seruir au seul Seigneur & au Pape son vicaire en terre, apres auoir fait vœu solennel de perpetuelle chasteté, resolve en soy mesme qu'il est mēbre d'une cōpagnie dresse'e specialement pour auancer la foy par predications publiques, pour catechiser, & instruire les enfans, & pour consoler les affligez par le moyen de la confession auriculaire. Pour le regard des reigles, de l'ordre, & l'exercice qu'ils ont en leurs colleges & communicatiōs, cela requiert vn autre traité à part, & qui ne conuient proprement à ceste histoire. Or pour reuenir à Ignace Layola, tandis que lui & ses compagnons estoient à Rome, Pierre Mascaregne ayant consideré leur deportement, & conu que c'estoyent gens propres pour faire de grands seruices pour le bien des Pottugallois es Indes, obtint du Pape que certains de ces dix iroyent prescher aux Indiens, pour leur faire changer de religion. Ignace, à qui le Pape faignoist se remettre de cest affaire, n'en ottroya que deux, asauoir François Xauier Nauarrois, & Simon Roderic Portugallois, lesquels arriuerent à Lisbonne, l'an mil cinq cens quarante, & de là en auant furent communément appelez les Apostres. Toutesfois pource que le Roy auoit besoin de l'un d'eux pour dresser le college des Iesuites à Conimbrice (lequel a esté depuis comme la pepiniere des Indes, & fondé pour l'entretienement de cent ou six vingts escolliers ordinaires) Roderic demeura en Portugal, & Xauier, destiné seul Apostre des Indes, partit avec le Viceroy Martin Alfonse de Souse au commencement de l'an mil cinq cens quarante vn, & arriuerent en l'Inde basse au mois de May, où il y auoit des quelques anne'es auparauant assez grand nombre de prestres & moines, pour le seruice ordinaire, & de petite estoffe, à comparaisō de Xauier & des autres qui vindrent apres lui. Quant à la doctrine qu'ils ont enseignee & enseignent aux Indies, c'est la mesme que lon propose en l'Eglise Romaine: mais du commencement & presques iusques à ce iour, toute leur instructiō a esté & est, suiuant l'exēple de Xauier, d'assembler au son d'une clochette les petis enfans du village ou de la bourgade où ils vont, reciter à haute voix au langage du pays, ou faire dire par leur

leur trücheman, l'oraïſon dominicale, la ſalutation Angelique, & le ſymbole des Apoſtres, puis faire quelque ſommaire exhortation là deſſus. Cela fait & continué l'eſpace de quelques iours, ils baptiſent ceux qui ſont ſemblant de trouuer bonne telle nouueauté, puis ces baptiſez ſe trouuent à la meſſe, & entendent vn peu plus auant parler de la religion des Jeſuites. Or ce qui mouuoit le Roy à y enuoyer principalement telles gens, eſtoit pour reſpondre aux queſtions & demandes de pluſieurs Indiens, hommes aſſez ſubils, & qui ont diuerſes ſectes entr'eux, comme il a eſté parlé ci deſſus des Bramines ou Brachmanes, & maintenant faut dire vn mot de quelques autres, ſelon le rapport que les Jeſuites meſmes en ont fait. En l'iſle de Iapan y a certaine ſorte de gens nommez Iamambuxas, c'eſt adire genſ d'armes de valles, qui pour auoir reputation de ſaincteté ſe mortifiēt merueilleuſement, ſe tienent debout & veillent fort lōg temps, ſont grāds ieuneurs, & apres autres tels exercices ne ſont difficulté de mōter en vne nacelle, & la percer afin qu'elle coule en fond, pour imprimer en l'eſprit de leurs diſciples la ſuperſtition à laquelle ils adherent. Il y a auſſi force moïneries d'hommes & de femmes, veſtus de blanc, d'enfumé, & de noir, les plus violains qu'ils eſt poſſible de trouuer au monde. En ceſte meſme iſle y a vn Eueſque ſouuerain, chef de toutes les religions, par la volonté duquel toutes les affaires de l'iſle ſont maniees. Les preſtres ou ſacrificateurs Iaponiens, nommez Bonzies, ne peuuent eſtablir aucun ordre nouueau entre eux que par l'autorité de ce ſouuerain. Meſmes les Tūdes, qui ſont cōme Eueſques, ſont creez & cōfermez par lui, & puis apres ſont en grād credit parmi le peuple, & ſont les Bonzies. Il faut demander les priuileges & immunitiez à ce meſme ſouuerain, lequel eſt de grande maiſon, & au pays de la China c'eſt le plus ſauant. Quant aux Tundes, ils ont vne plus baſſe iuriſdiction, comme de permettre qu'on mange de la chair à certains iours de pelerinage, & autres telles circonſtances. Ce grād Eueſque eſt reueré des Inſulaires comme vn Dieu en terre, & fait ſa reſidence en vne ville nommee Meaco, ayant en ſon palais autant d'images qu'il y a de iours en l'an, & toutes les nuits il en fait coucher vne pres de ſoy cōme pour ſauuegarde. Au reſte le peuple eſtime ceſt Eueſque ſi ſacré, qu'on ne lui ſouffre aucunemēt toucher des pieds à terre, car le faiſant il ſeroit degradé. Il eſt nourri d'aumōſnēs, aſſez ruſtiquement, & a pour domeſtiques certains nommez Cungues, qui porrent reſte & barbe raſe, gens fort reſpectez en toute l'iſle, & qui ſeruent d'ambassadeurs & arbitres pour appaiſer les guerres & differens entre les Princes voiſins. Il eſt loiſible au peuple d'adherer à telle ſuperſtition qu'il veut, entre leſquelles y a deux idoles principales, aſauoir Amide, & Xaque: tellement qu'il y a force cōuēts de Bonzies & de Bonzienes, les vns veſtus de ſurpelis blācs, les autres de robbes noires, ou grifes. Les grifards ont vn patron qu'ils appellent Denichi, & ſont ennemis des Amidains. Les Bonzies pour la pluspart ſont magnifiquemēt logez, & ont de bōs reuenus: il leur eſt defendu de ſe marier, & ſont mis à mort, s'ils l'entreprenēt. Au milieu de leur réple y a vn autel, & ſur icelui vne image de bois, nommee Amide, ayāt le corps nud depuis la ceinture en haut, en forme de ſēme de belle repreſen-

tation & assise. Outre plus ils ont des bibliothèques fort amples, des refectoirs où ils prennent leurs repas ensemble, cloches pour sonner leurs vespres & matines. Sur le soir, leur supérieur ou abbé donne à chacun d'eux un argument pour méditer. Un peu après minuit ils récitent quelques prières en répondant les uns aux autres devant l'autel, & lisent en certains breviaires à leur mode. Au point du jour ils emploient une heure en contemplation, portant barbe & teste rase. Leurs temples sont grands, en bon nombre, & y a force chapelles dédiées à leurs saints, qu'ils appellent Fotoquies, & ont beaucoup de festes au long de l'année. Plusieurs de ces Bonzies sont de noble maison : car quand les Seigneurs & gentilshommes Japonois se voyent chargés d'enfants, pour faire plus riches les premiers ils mettent les autres en religion. Au demeurant, ces Bonzies sont extrêmement avarés, & sauvent mille ruses pour attirer deniers. Ils vendent au peuple certains billets, pour assurer ceux qui les portent que le diable ne les offenserait, & empruntent argent à rendre avec l'intérêt en l'autre monde, dont ils sont obligés au créancier, qui le fait serrer sur soi en sa mort, afin de plaider avec les Bonzies. Ces prestres ou moines Japonois ont aussi leurs torches, pompes funebres, clochettes, chappes, pardons, chandelles, bonnets triangulaires, & autres façons telles, qu'il ne se faut pas esbahir, si à la venue des Jésuites il y eut des disputes & de la résistance en l'isle de Japão & ailleurs, les uns se voyant désarçonner par les autres. Ce que je vien de reciter est recueilli du propre témoignage de Jésuites mêmes, les lettres desquels ont été imprimées à Cologne, depuis six ans. Pour revenir à Xavier, lequel mourut au mois de Decembre l'an mil cinq cens cinquante deux, es quartiers de la China, il fut incontinent suivi d'autres Jésuites qui coururent les uns en l'Inde basse, les autres en la haute, les autres aux Molucques, les autres à Japão, où ils ont fait leurs grands efforts : & si on les en croit, Xavier & quelques tels Apostres que lui ont fait beaucoup de miracles pour confirmer la religion Romaine entre ces peuples, qui, étonnés d'ouïr choses qu'ils n'auoyent entendues auparavant, se laisserent manier, comme il aduient en choses nouvelles & plausibles, & par ce moyen, tandis que les Jésuites trottoient, le trafic s'entretenoit. Par succession de temps ils ont basti quelques temples & colleges à Japão, Cagoximan, Malacca, aux Molucques, à Cochim & Goa, à Bazaim, Coulam, à Bongo, au royaume de la China & ailleurs : de sorte que maintenant en ces quartiers Orientaux il y a grand nombre de telles gens (non passant toutesfois qu'il seroit à désirer) & à mesure que les peuples embrassent la religion Romaine, c'est autant d'avancé pour les affaires des Portugallois, qui au lieu d'espées ont employé les lagues des Jésuites. Vray est que plusieurs d'iceux y ont été tués par les Indiens, & par les machinations des Bonzies, mais par le moyen de leurs colleges ils se maintiennent encor, non seulement en ces pays esloignés, ains aussi en plusieurs endroits de l'Europe. Quant à la description des pays & mœurs des Japonois & autres peuples, je n'y touche point, laissant cela aux Jésuites, s'ils veulent écrire leur histoire : me contentant de ce que dessus, pour monstrier le but de leurs voyages en Orient, où ils n'eussent été envoyés, si la commodité des affaires de Portugal ne l'eust

l'eust requis ainſi, & ne pouuoient y ſubſiſter auſſi ſans la faueur & puiſſance des Viceroyſ.

4. O R quant aux affaires de la guerre es Indes haute & baſſe, & ailleurs, depuis la victoire de Diu, combien que les Indiens ſe remuaſſent en quelque endroit, toutesfois ça eſté avec peu d'effect, & ſans perte notable de part ou d'autre, au moins que i'aye peu deſcouriſ, les choſes eſtans ou du tout oubliées, ou ſi brièvement traitées par les liures publiez, qu'autant vaut ſ'en taire que de diſcouriſ en l'air: ioint que les Ieſuites ont aſſoppi la pluſpart des guerres, pourceſ en faire vne autre à leur façon. Toutesfois nous deduirōs brièvement en ce chapitre ce qui ſe preſente de remarquable en l'hiſtoire de Portugal, depuis la guerre de Diu iuſques à la mort du Roy Iean troiſieſme. Iſabelle ſœur du Roy & femme de l'Empereur Charles cinquiemeſme mourut à Toledé le premier iour de May l'an mil cinq cens trenteneuf. L'an mil cinq cens quarante deux les Eſpagnols eſſayerēt de retourner aux Moluques, y eſtāſ enuoyez par Antoine de Mendoza Viceroy de la nouuelle Eſpagne, ſous la conduite du capitaine Villalobos, lequel arriué es iſles de Tidore & Gilolo fut bien receu des Rois d'icelles, ennemis des Portugallois. Mais vne tourmente ſuruint qui mit à fond les vaiſſeaux de Villalobos, tellement que lui & ſes ſoldats tomberent en la puiſſance des Portugallois, auſquels ce trafic eſt demeuré depuis, quelques entreprinſes que les Eſpagnols & autres ayēt faites pour l'attirer à eux. Deux ans apres le Roy donna ſa fille Marie aagée de dixſept ans pour femme à Philippe d'Autriche ſils de l'Empereur, Prince & heritier de Caſtille, lors aagé de dixſept ans & quatre mois. Les nopces furent ſolennizees en la ville de Salamāque, & l'an mil cinq cens quarante cinq au mois de Iuillet, Marie acoucha d'un ſils nommé Charles, mort en priſon, où il auoit eſté reſerré par le commandement de ſon pere, l'an mil cinq cens ſoixante huit au meſme mois de Iuillet. Depuis ceſte annee iuſques à ſa mort le Roy Iean demeura paiſible en tous ſes pays, excepté en Barbarie, où il perdit quelques places, & quatre carauelles, avec bon nombre de gens qu'il enuoyoit au ſecours d'un Prince More: leſquelles pertes il n'apprehendoit pas ſi fort qu'eult fait ſon pere, qui eſtoit plus ſpeculatif & actif. La principale intention de Iean troiſieſme eſtoit de ſe maintenir en bon meſnage avec l'Empereur ſon beau pere, & de conſeruer le trafic des Indes & Moluques à la courōne de Portugal, ce qu'il obtint auſſi, & de nouueau vn peu auant ſa mort il maria le Prince Iean ſon ſils ainſné à Ieanne Princeſſe de Caſtille & fille de l'Empereur Charles, au grand contentement des Eſpagnols & Portugallois, dont on fit de grandes demonſtrations de ioye à Liſbonne. Mais tout cela fut toſt apres conuerti en dueil, car au commencement de l'an mil cinq cens cinquante quatre ce ieune Prince mourut, n'ayant encores dixſept ans accomplis, laiſſant ſa femme enceinte, laquelle quinze ou dixhuit iours apres acoucha d'un ſils nommé Sebaſtiā, & toſt apres la Princeſſe ſe retira en Caſtille, pour gouverner le pays en l'abſence de ſon pere & de ſon frere, qui eſtoient es pays baſen guerre contre le Roy de France. L'onziemeſme iour de Iuin l'an mil cinq cens cinquante ſept, le Roy Iean aagé de cinquante cinq ans &

Ce qui auint depuis la guerre de Diu iuſques à la mort du Roy Iean troiſieſme.

quatre iours sortit de ce monde, & fut enterré en grande magnificence. Durât son regne la ville de Lisbonne fut embellie & enrichie à merueilles, & tout le pays de Portugal bié acômodé de toutes choses. Il y receut l'inquisition d'Espagne, & fauorisa grâdement les Iesuites, aidé à cela par son frere le Cardinal Henri primat du royaume. Aureste ce fut vn Prince tel que nous l'auons descrit ci deuant, asauoir de bône nature, mais non si vif que son pere, au moyen dequoy il ne conserua ni ne dóna pas vn pied si ferme à son estat qu'il estoit à desirer. Neantmoins iusques à sa mort les affaires se maintindrent assez bien: vne grande incômodité restant, asauoir vn trop ieune successeur, duquel il nous faut dire quelque chose maintenant.

Sebastian premier de ce nom, dixseptiesme Roy de Portugal, succéda à son oncle Iean troisieme.

SEBASTIAN, premier de ce nom, aagé de trois ans quatre mois & trois sepmaines, succéda à son ayeul le Roy Iean troisieme, & ne fut point marié, encores qu'au iour de sa mort il eust vingt cinq ans, ayât aspiré à diuers partis, desquels rien ne fut cōclud, tellement qu'en lui sont defaillis les Rois nez en Portugal. C'estoit vn beau Prince & de belle taille, des son enfance bien aimé de ses suiets, qui promettoit ie ne say quoy d'heroique & martial: car des qu'il commença tant soit peu à se conoistre, il ne prenoit plaisir qu'à ouir parler des armes & des affaires de guerre. Or cōme les choses de ce monde ont acoustumé d'aller à l'empire, la simplicité des Rois precedens mourut avec Iean troisieme, lequel sous bien peu d'apparence ne laissoit de môstrer vne maiesté royale, venerable, & redoutée de chascū. Au cōtraire on bailla incontinent à Sebastian vne forte garde, le nombre de ses domestiques fut augmēté, sa court deuint fort grosse, la vanité & les dissolutions s'y glisserent, tellement que la vigueur des predecesseurs & ceste magnanimité ancienne des Portugallois vint à s'aneantir. Cōbien donc qu'on fist grand bruit de paroles, toutesfois ce ieune Prince gouverné en son priué par ieunes seigneurs, cōme il auient ordinairement, les affaires n'amanterent pas durant son regne, encores que son oncle le Cardinal & autres anciens conseillers tinssent la main à tout, selon leur pouuoir, ce qui eut quelque poids durât l'enfance du Prince: mais venât en aage & sentant ses moyēs il se cōseilloit quelquesfois par sa teste, dōt mal lui print finalement.

Estât du Royaume & des autres pays appartenans au Roy Sebastian.

LE royaume de Portugal estoit alors plain de richesses, à cause du trafic de Indes qui auoit son cours ordinaire, & où plusieurs des grâds & petis se foutroyent avec grand auantage, le gain estant fort grâd, la nauigation deuenue aisée par continuelle hantise, & par la dexterité des gens de marine, dont ce royaume est bien fourni. Sur tout la ville de Lisbonne croissoit à veuë d'œil, estant l'vne des principales de l'Europe, & peut estre le plus beau port de mer de tout l'Ocean. L'inquisition d'Espagne receuë en Portugal, du viuant de Iean troisieme, estoit vne bride en la main du conseil pour retenir chascun en crainte, & dominer par tout le pays, sans que personne s'osast remuer. Quant aux Indes, les charges ordinaires estoient maniees selon l'ordre acoustumé, tellement qu'il y auoit assez de trāquillité, ioint que les affaires s'y traitoyent d'vne nouuelle façon par l'entremise des Iesuites, qui fauorisez des capitaines remuoyent mesnage en diuers lieux. Et ainsi le trafic cōtinuoit assez bien, les garnisons bien payees & entretenues des Portugallois

rugallois & de Naires gēns nez aux armes, & grands guerriers maintenant. Aussi toutes les citadelles s'estoyent redressées & remises en pied, spécialement depuis la desfaite du Roy de Cambaje, tellemēt que les Portugallois nauiguoient assez librement par toutes les mers & goulfes de l'Ocean. Quant aux marchandises, elles se distribuoyent à Anuers spécialement & à Lisbonne, avec vn grand gain pour le Roy, qui à conseil à part pour les negoces des Indes, comme aussi tel & si beau reuenu le merite bien. Il ne restoit que la coste de Barbarie, en laquelle les Mores estoyent vn peu plus au large que du temps d'Emmanuel: ce neantmoins les Portugallois auoyent dequoy se contenter, si lon peut trouuer contentement es grandeurs humaines. Mais ce royaume de Portugal estant venu comme au sommet de son bien, & ne pouuant y subsister par l'ingratitude des membres d'icelui, Dieu le visita d'une estrange façon, le priuant du Roy Sebastian tué en bataille, & le reduisant puis apres à l'extremité que lon a veue depuis.

7. M A I S pour entendre mieux l'accident de ce ieune Prince, retranché au printemps de son aage, il faut prendre ceste matiere de plus haut, afin de voir quel malheur c'est aux Princes d'estimer qu'ils feront bien leurs affaires, en se fourrant parmi les querelles d'autres princes aussi puissāns qu'eux. Le discours auquel nous enttons à esté publié ci deuant: mais il faudra le couper vn peu plus court, pour n'ennuyer les lecteurs, & faire fin à ce volume patuenu à quelque iuste grosseur. Muley Mahumet Roy de Fez & de Maroc, ayant trois fils, à sauoir Abdalla, Abdelmunen, Abdelmelec, & vn bastard nommé Hamed, tint vn parlement à Maroc, où, du consentement des Estats, fut arresté que ces quatre succederoyent l'un à l'autre en leur ordre, le bastard demeurant le dernier. Cest arrest passé en loy inuiolable, Abdalla fut deslors declairé Prince & successeur des royaumes de son pere, & receut les hommages des vassaux, puis demeura Roy absolu par la mort de sondit pere, tué quelque temps apres en sa tente par certains Turcs ses ennemis. Abdalla se voyant maistre voulut rompre la loy des Estats, contraignit ses deux freres de s'enfuir vers les Turcs, & fit couronner son fils Muley Mahumet. Quant à Abdelmunen il fut blessé d'un coup de fleche dedans vne mosquee de Tremissen, dont il mourut au bout de deux iours. Abdelmelec s'en alla iusques à Constantinople, & fut bien receu de Selym fils de Solymā & d'Amurath, qui regne auioürd'hui, & demeura là quelque temps durant lequel Abdalla mourut, & son fils Mahumet print possession des royaumes, faisant tuer vn sien frere, & emprisonner l'autre. Le bastard Hamed son oncle trouua moyen de se tirer de la presse, & se sauua dedans Tremissē gardee par les Turcs, & est pour le present Roy de Fez & de Maroc. Abdelmelec, ayant entendu la mort de son frere, vint promptement en Barbarie, avec mandement du Turc à ses capitaines en Arger de fournir à Abdelmelec tout ce qui seroit necessaire pour la guerre: par ainsi en moins de rien il amassa cinq mille harquebuziers & quelques troupes d'Alarbes à cheual. Son frere bastard Hamed s'estant ioint à lui leur armee se trouua monter à douze mille lanciers & quatre cens harquebuziers à cheual, avec les cinq mille pietons, qui marcherent bien deliberez avec douze

*Discours de la
guerre surue-
nue en Barba-
rie entre Mu-
ley Mahumet
& Muley Ab-
delmelec, pour
les royaumes
de Fez & de
Maroc.*

pieces de campagne vers la ville de Fez. Mahumet ne se soucioit des nouvelles de ceste armee iusques à ce qu'il la sentit assez près, & lors il amassa ses forces de quatre vingts mil hommes de cheual, quatre mille argoulets & treize mille pietons, avec trente six couleurines. Estant sur le point de partir & s'en aller contre Abdelmelec, vint à lui vn gentilhomme de la part du Roy Sebastian, lui offrir au nom de son maistre tout le confort & secours dont il auroit besoin en cest affaire : dont Mahumet ne tint compte, estimant auoir trop de forces pour ruiner son oncle, & renuoya ce gentilhomme avec maigre responce. Or les deux armees se rencontrerent entre Fez & Tremissen le dixseptiesme iour de Mars, l'an mil cinq cens septante, & apres quelque combat assez aspre du commencement, Mahumet, se voyant abandonné d'un capitaine de gens de pied qui se retira vers Abdelmelec & lui mena deux mil harquebuziers, se fit acroire que les autres capitaines le quitteroyent de mesme. Et pourtant abandonna son armee & le camp en proye, s'enfuyant vers Maroc avec cinq cens cheuaux seulement. Abdelmelec victorieux presques sans meurtre marcha vers la ville de Fez, où il fut bien receu & proclamé Roy, puis donna congé aux Turcs, aucuns desquels au nombre de quinze cens ne le voulurent abandonner. Mahumet ayant reprins ses esprits amassa vne nouuelle armee de dix mille pietons harquebuziers, mille argoulets, & trente mille lanciers, & receut lettres du Roy Sebastia qui lui offroit secours, qu'il refusa comme à la premiere fois, alleguant qu'il se sentoit assez fort, & donna vne seconde bataille à Abdelmelec, lequel se monstra si braue capitaine alors qu'apres vn cruel combat, ou moururent plus de six mille hommes, Mahumet fut mis en route, & poursuivi par Hamed iusques pres de Maroc. Estant entré dedas son palais il print de ses thesors autant que le temps lui permit d'en emporter, dont il chargea cinq mulets, & au bout de deux heures s'enfuit craignant d'estre attrappé par les troupes, & marcha bien viste avec quelques gens de cheual vers la montagne que ceux du pays nomment Montes Claros, qui est la retraite des bannis & voleurs de ceste contree, à six lieues de Maroc. Quant à Abdelmelec il fut receu en grand pompe & resiouissance par tout le peuple de Maroc, pource qu'il auoit la reputatiō d'estre bon, doux, afable, charitable & iuste, ioint que les insolences & tyrannies de Mahumet donnoient encores plus de lustre à telles vertus. Incontinent apres son entree il donna ordre aux affaires de ses royaumes, se monstrant en ses actions autāt sage & discret que vaillant & adroit aux armes. Et combien que du commencement quelques vns de ses suiets ne l'aimassent & fussent offensez des deportemens de ceste troupe de Turcs qui estoient à sa solde, lesquels, pour auoir acoustumé de viure sans discipline en la coste de Barbarie, faisoient beaucoup d'extorsions aux Mores : en peu de temps il se fit aimer de chacun, & se desist des Turcs peu à peu, les faisant esuanouir deux à deux & trois à trois, si bien qu'il ne lui en restoit plus haut de deux cens, lesquels il tenoit loin de sa cour, & les faisoit viure avec raison & paisiblement. Le bruit de ses valeurs fut cause que tous venoyent lui presenter seruite & obeissance, & de toutes ses prouinces on lui portoit de beaux presens & dons inesti-

inestimablement riches. Plusieurs Rois Chrestiens prindrent plaisir en son amitié, & lui les accepta pour amis, s'estimant heureux d'auoir leur acointance, tellemēt que de diuers endroits beaucoup de Chrestiens alloient en ses pays, où ils receuoyēt fort gracieux traitement, & lui leur mōstra meilleur visāge qu'à nuls autres hommes qui hantassent en ses terres, & leur aidoit liberalement en leurs necessitez. Au reste l'vne de ses premieres ordōnances fut de nommer vn successeur à ses royaumes, & confermer la loy establee par son pere: & pource il fit iurer foy & hōmage par tous les grāds à son frere Hamed, quoy qu'il eust vn fils en bas aage. Ce qui estonna tous les Seigneurs, & fit-on à cause de telle equité grands triumphes & esiuifances pour l'amour du nouueau Prince, & à cause de l'ordonnance qui renouueloit la memoire du pere, sous lequel le pays auoit prosperé. Quant à Mahumet, ayant fait le mestier de voleur l'espace de sept ou huit mois, avec quelques compagnies de gēs sans aueu, ils fut desfait par les troupes d'Abdelmelec & contraint ses retirer es plus inaccessibles endroits de la montagne, où il souffrit vn milion de miseres l'espace d'un an, viuant en transe & des fiance perpetuelle, pour la crainte qu'il auoit qu'on l'allast attrapper en ses cachettes. Brief la necessité le contraignit de desirer le secours qu'on lui auoit offert, & recourir au Roy de Portugal, auquel il enuoya vn messager expres, puis deux de ses capitaines, & cependant il trouua moyen de descēdre de la montagne par lieux escartez, & se sauua dedans Tingi, où il fut bien receu du gouuerneur qui conoissoit aucunement l'affection du Roy Sebastian, & fournit à ces deux capitaines vne carauelle bien armee pour aller faire leur ambassade en Portugal.

I l a esté dit ci dessus que le Roy Sebastian estoit fort adonné aux armes, à quoy la disposition de sa personne & son haut coutage l'aiguillonnoient incessammēt: & pource ne cerchoit il qu'une ouuerture pour aller en Afrique, prenant son pretexte sur le desir qu'il disoit auoir d'auācer sa religion & ruiner la Mahumetique. Il auoit essayé le mēme par deux fois, sans aucū auancement, poutce que Mahumet n'auoit voulu accepter son secours. Mais à ce troisieme coup, se voyant sollicité & prié de celui qu'il estoit allé chercher autresfois oultre mer, il presta bien tost l'oreille à tel ambassade, & apres auoir magnifiquement recueilli & traité les capitaines de Mahumet, fit responce aux lettres d'icelui, l'asseurant de le remettre en possession de ses royaumes. Le Roy d'Espagne, le Cardinal Henri, les Princes & Seigneurs de Portugal ne sceurent iamais destourner Sebastian de ceste entreprīse, quelques remonstrances qu'on lui fist & de son impuissance & des forces d'Abdelmelec, ains resolut passer en Barbarie, estimant auancer ses besongnes d'autre façon qu'il ne fit. Ceux qui le pousserent en ceste guerre furent quelques particuliers s'acomodans à son humeur, & certains Iesuites, qui auoyent grand credit autour de ce ieune Prince, & pensoient aller courir en Afrique cōme leurs cōpagnons es Indes. Il cōmença dōc à faire ses apreſts, fit vne leuee de cinq mille Lansquenets en Allemagne, escriuit à quelques capitaines d'Andalousie pour en tirer des vieilles bandes, & assembla aussi plusieurs nouuelles compagnies en Portugal, mais de gens tous neufs à la

Le Roy de Portugal embrasse le parti de Muley Mahumet, & passe en Barbarie pour le mettre en possession des royaumes de Fez, & de Maroc.

guerre, & quant aux Lansquenets qui n'estoyent pas soldats exercez de l'og
 teps, il en mourut plus de deux mille à Lisbonne. Six cens Italiens enuoyez
 par le Pape à la conqueste d'Irlande, en trois nauires de guerre, s'arrestèrent
 au port de Lisbonne & promirent passer en Barbarie. Outreplus il fit pu-
 blier par toutes les terres & seigneuries, que tout noble, gentilhomme &
 seigneur qui refuseroit d'aller en ceste guerre perdrait les rentes & censu-
 es, ensemble tous les priuileges que les autres Rois leur auoyent ottroyez.
 Abdelmelec, ayant eu nouuelles de tels preparatifs, en fut marri, non qu'il
 craignist les Portugallois, mais pource qu'il ay moit les Chrestiens, & pre-
 uoyoit que la Barbarie seroit le tombeau du Roy de Portugal, qui estoit
 par trop foible pour s'attacher à si puissant ennemi. Et sur ce propos il dit
 plusieurs fois, Le Roy Sebastian deuroit regarder qu'il n'y a ordre de se ve-
 nir perdre: car vouloir m'oster le royaume qui m'appartient par droit suc-
 cessif, pour le donner à vn Negre, sans que la Chrestienté en soit soulagée ni
 acommodee, ce n'est chose que Dieu, qui est iuste, doieue iamais permet-
 tre. Il commença donc aussi de son costé à donner ordre à ses affaires pour
 receuoir Mahumet & Sebastian, & fit assembler son armee, se mettant de
 bonne heure en campagne pour attendre ses ennemis sur la frontiere du
 royaume de Maroc. Quant à Sebastian, il se mit sur mer le vingtsixiesme
 iour de l'uin l'an mil cinq cens septante huit, acompagné entre autres du
 Legat du Pape lequel portoit de grands pardös pour tous ceux qui feroient
 ce voyage. Il y auoit treize cens voiles, tant gräds que petis vaisseaux en ce-
 ste flotte, la plus belle que lon eust veüe de long temps. Le Roy alla surgir
 au port de Cadiz, où il seiourna quinze iours, attendant quelques Espagnols
 d'Andalousie, & se remit à la voile le huitiesme de iuillet, & approchant le
 lendemain de la rade de Tingi, Mahumet lui enuoya au deuant vn sien fils
 aagé de dix ans nommé Muley Xeq, & arriua tost apres. Tous deux furent
 bien receus de Sebastian, auquel pour l'entree Mahumet fit vne harangue
 de ses droits, lui faisant ä croire que les Mores ne faisoient que chercher les
 occasions & moyens de trahir Abdelmelec, ou du moins l'abandonner,
 dont les principaux du pays l'asseuroient, promettans se ranger ä son ser-
 uice si tost qu'il auroit vne petite armee aux champs. Outre ceste bourde,
 Mahumet taschoit de persuader ä Sebastian de ne donner bataille, ains se
 camper seulement, pource que les troupes d'Abdelmelec viendroyent vers
 lui ä la file. Au reste il promit d'öner ä Sebastian deux ou trois ports de mer
 en Barbarie, & plusieurs terres pour le seruice & soustien d'icelles. Puis afin
 d'asseurer ceste promesse il donna son fils en ostage. Sebastian persuadé par
 telles promesses, ou plustost par son naturel, s'achemina vers Arzile, faisant
 conduire Muley Xeq son ostage vers Mazagan. Abdelmelec estät en cam-
 pagne pres de Tremissen fut incontinent enuironné d'vne grande armee:
 mais ä deux ou trois iours de lä il se sentit fort malade pour auoir mangé
 quantité de laiët, qui s'estoit caillé en son estomach. Pour s'en descharger
 il fit ses efforts l'espace de deux iours pour s'esmouuoir ä vomissement, tel-
 le estant sa coustume, & ä la parfin ietta vn gros morceau comme de fro-
 mage, qui afoiblit tellement l'estomach, que de lä en auant il ne pouuoit
 rien

rien digerer. Neantmoins tout malade qu'il estoit, il se fit mettre en litiere pour aller vers Arzile avec son armee, & se ioignit à son frere Hamed pres d'Alcassar, où il seiourna quelques iours pour se refaire, & fit monstre generale, en laquelle se trouuèrent quinze mille harquebuziers, dont les deux tiers ne seruoient que de nombre, avec deux mille argoulets, & quarante deux mille Alarbes lanciers à cheual & couuerts de leurs targes. Il auoit aussi vingt six bônes pieces de campagne, bien affustees & gouuernees par gens experts, son cāp pourueu de viures & autres munitiōs, ses soldats bien payez tous les mois. Entores qu'il eust telle troupe, toutesfois il ne se fioit qu'en cinq mille harquebuziers choisis d'entre ces quinze mil, auxquels il fit iurer de mourir tous à ses pieds. Quant au Roy de Portugal il fit aussi sa monstre, & oultre mille hommes laissez es vaisseaux, & deux mille enuoyez à Mazagan, il se vid quatorze mille pietons, deux mille cheuaux, la plus part d'hommes, & trois mille gastadours. Les goujats, charretiers, muletiers, viuandiers, esclauers & putains montoient à pareil nombre que l'armee mesme, & ce bagage fut en partie cause du desordre qui suruint puis apres. Outre ce, il auoit trente six pieces de campagne, onze cens charrettes de bagage pour la noblesse seulement. Il pouuoit mener beaucoup plus de gens tant d'Espagne que d'ailleurs, mais les belles promesses & assurances de Mahumet lui firent donner congé à plusieurs braues bandes Espagnoles qui estoient prestes à s'embarquer à Caliz, & à ceux de son camp qui sous couleur de maladie vouloyēt se tirer de la presse. Pour specifier les choses encotes mieux, Sebastian auoit pour pietons 3000 Lansquenets, 600 Italiens, 2000 Espagnols, 600 soldats de Tingj, & 2500 auanturiers, le reste estant de payfans Portugallois peu exercez aux armes, cinq cens cheuaux de Tingj, & quinze cens tant de l'arriereban de Portugal que de gentilshommes de sa maison. La pluspart des soldats estoient soudoyez à grand' difficulté, & plusieurs mouroyent de disette, tant les affaires estoient mal maniees sous ce ieune Prince. Le mal estoit qu'outre l'inexperiance de la meilleure partie de ceste armee, de ce nombre de pietons les huit mille estoient picquiers, gens inutiles es guerres de Barbarie. Apres ceste reuue, on eut nouuelles de l'armee d'Abdelmelec, sur quoy le conseil assemblé, les Seigneurs prièrent le Roy de ne s'exposer au hazard d'une bataille, puis qu'il auoit affaire à un si fort ennemi, ains mener son camp à l'Arache, & pouruoir aux necessitez des soldats, puis se resoudre du tout. Abdelmelec portāt quelque affection aux Chrestiens desiroit espargner Sebastian & ses troupes, & de fait par personnes interposees il donna sagement ordre de faire entendre les ruses de Mahumet à Sebastian, afin de le faire retirer en Portugal. Mais ce ieune Prince ne voulut croire conseil aucun, toutesfois par importunité des Seigneurs qui l'accompagnoient il partit d'Arzile le vingtneufiesme de Iuillet, & s'achemina vers l'Arache, où il se campa pres du fleuve Magazan entre Orient & Septentrion. Abdelmelec estoit cōtent de laisser prendre l'Arache aux Portugallois, esperāt qu'ils se contenteroient pour ce coup: mais entendant qu'ils s'avançoient il alla au deuant, & se campa à une lieue loin d'eux, au long de la

riuiere d'Alcassar entre Occidēt & Midi, ceste riuiere allant choir dās celle de Magazan, passāns ensemble à Larache : tellement que les deux armées auoyent chascune vn fleuve à dos, & vne fort large campagne rasée entre deux. Le cōseil ayant gaigné Sebastian iusques là, qu'il deliberoit de passer la riuiere, & gaigner Larache, Mahumet craignit demeurer desnudé, attendant que si Sebastian & son conseil auoient tant soit peu de loisir pour apprehender les forces d'Abdelmelec ils se retireroient sans combattre. Poutant alla-il trouuer Sebastian le samedi second iour d'Aoust, assez tard, & comme on deliberoit de passer la riuiere le lendemain, il fit tant qu'il rompit ce coup, tellemēt qu'au lieu de passer, l'armée marcha au long du fleuve. Abdelmelec sachant qu'on le vouloit attaquer, approcha aussi de demie lieuë, pour cōsiderer la cōtenance de ses parties, & en resolution de ne commencer, & se passa ainsi toute la iournee, sinon qu'il y eut quelque legere escarmouche. Quoy que les capitaines importunassent Abdelmelec de donner bataille, il n'y voulut entēdre, à cause qu'il estoit tard : ains commanda seulement qu'on sonnast la retraite, & que chascun se serrast en son paillon. Puis fit crier à son dē trompe que tous demeurassent armez ceste nuit, fit doubler les gardes & sentinelles, comme la nuit precedente, afin que personne ne peust s'enfuir vers ses ennemis. Ceste garde redoublée fut cause de la ruine de Mahumet, pource qu'il n'y auoit hōme qui osast sortir de son quartier apres la retraite sonnée. Neantmoins Abdelmelec ne vouloit commencer le combat : toutefois oyant dire que ce mesme iour quelques vns s'en estoient fuis de son camp, & que s'il ne donnoit bataille le lendemain la pluspart de ses gens se reuolteroyent, il conclud de passer outre, & assaillir Sebastian. Et ainsi le fit-il publier par tout son camp, afin que chascun se tint prest, & s'apprestast pour vaincre ou pour mourir. Sebastian print la mesme resolution en son cōseil, où Mahumet se trouua & fut d'avis de donner bataille sur le tard, afin que les soldats d'Abdelmelec se desbandassent & vinsent à loisir au camp de Portugal, afin aussi de remédier plus aisément par le moyen de la nuit aux desordres qui pourroyent auenir en l'armée. Cela fut trouué bon, & la nuit de ce Dimanche l'arrest du conseil fut publié par tout le camp.

OR auant que descrire ceste bataille memorable, il faut voir comme les vns & les autres s'y preparerent. Le lundi quatriesme iour d'Aoust mil cinq cens septante huit, de grād matin on fit passer l'artillerie & le bagage, de peur que l'ennemi n'y donnast quelque empeschement : ce qui fut cause que la bataille se dōna plustost. Toute l'armée s'auança puis après, & fut rangée pour combattre, le Roy allant & venāt pour voir placer ses pieces, & disposer ses bataillons, auxquels il fit vne belle harangue pour les encourager à leur deuoir. Les Euesques de Conimbrice & de Port, le Legat du Pape, quelques Iesuites, & autres moines s'y employerent aussi, estans meslez parmi les compagnies. Ainsi s'escoula le matin iusques à onze heures. Abdelmelec ayant sceu que ses parties marchoyēt fit donner l'alarme par tout son camp, commandant aux colonnels de ranger leurs troupes, selon l'ordre qu'il leur auoit designé. Et dautant qu'il estoit encores bien malade, &

ne se

Bataille remarquable, en laquelle perirent de diuerses morts Mahumet, Abdelmelec, & le Roy Sebastian.

ne se pouuoit aider des bras, on l'exhorta de se tirer arriere de la meslee, ce qu'il ne voulut: au cōtraire, encores qu'il n'eust bougé de sa litiere plus de trois semaines au parauāt, il s'efforça lors outre son naturel, se fit vestir d'une riche robe de drap d'or & parer d'une infinité de ioyaux precieux, puis on le monta sur vn beau cheual, & en cest equipage visita son armee encourageant chascun à bien combattre, & promettant grandes recompēses à ceux qui feroient bon deuoir. Le frōt de son armee marchoit en forme demi circulaire, & ce demi cercle cōposé des plus asseurez pietons, estoit l'auantgarde fauorisee de mille harquebuziers à cheual, à la teste du costé droit, & de deux mille argoulets à celle du costé gauche, & sur les ailes dix mille lanciers en l'une, & autant en l'autre. Abdelmelec estoit en la bataille au milieu de toute la force des harquebuziers à pied, & enuironné de sa garde de deux cens halebardiers Chrestiens reniez. L'arrieregarde estoit cōposée de plus de vingt mille cheuaux partis de deux en deux mille, & par bataillōs quarrez, assez pres les vns des autres, & en demi cercle autour de la bataille, l'artillerie estant au front de l'auantgarde. Quant au Roy Sebastian il diuisa son armee en quatre bataillōs disposez en figure quadrangulaire. Au costé droit estoit l'auāgarde defendue par les auenturiers & soldats de Tingi, ayans Alvaro Perez de Taura pour maistre de cāp: au bataillon de la main gauche estoient les Lansquenets & Italiē, cōduits par le Marquis d'Irlande: l'arrieregarde cōposée d'Espagnols & de quelques Italiē auoit pour colōnel Alonse d'Aguilar: & à costé droit vn bataillō de Portugallois, desquels Louys Cēsar estoit chef, chascun bataillon contenant trois mille hōmes, ayans pour general Edouard de Menezez gouverneur de Tingi. Outre plus il y auoit deux mille cheuaux biē armez, departis de cinq cēs en cinq cens, tant en auantgarde & arrieregarde, qu'es deux ailles de la bataille. Au milieu du cāp estoient tous les chariots, bagage, & gēs de seruice inutiles au cōbat. Muley Mahumet estoit à main droite de l'armee avec enuiron cinq cens harquebuziers & six cens lanciers. Les trēte six pieces de cāpagne estoient à la teste de l'auantgarde, & le Roy Sebastian au milieu de ses troupes. En cest equipage les deux armees resolues de se choquer, marcherēt par vne cāpagne rase & si vnice qu'il n'y auoit arbres, herbes, ronces ni pierres à plus de deux lieues à la rōde. Le cāp d'Abdelmelec estoit fermé à main gauche de la riuier d'Alcassar, & celui de Sebastian laissa derriere soy le fleuue de l'Arache, taschant de venir à celui d'Alcassar, tant pour oster le vent à l'ennemi, que pour s'en seruir de flāc & de muraille. Cōme les armees aprochoient, les troupes d'Abdelmelec s'arrestērent pour disposer leurs pieces, attendans que les Portugallois aprochassent, & incontinent firent iouer leur canon. Mais ils n'eurent pas tiré trois coups qu'on leur respōdit, & lors les deux auantgardes aprocherent à teste baissée, avec telle grelle & tēpeste d'harquebuzades & tonnerre d'artillerie que tout estoit esmeu & enflāmē. Incontinent les cinq cens hōmes d'armes de l'auangarde conduits par le Duc d'Anero se ruerent sur la pointe gauche des harquebuziers à cheual d'Abdelmelec, & les mirent en route, ensemble les dix mille cheuaux Alarbes qui les soustenoyent, &

quis'enfuirent à vingt lieux de là, portans nouuelles que les Chrétiens estoient demeurez victorieux. Les autres Alarbes de l'aile droite branlerent aussi, & telle route mit Abdelmelec en telle furie qu'il voulut aller combattre de ce costé gauche où la route estoit plus grande. Mais les soldats de sa garde voyas sa foiblesse, l'arrestèrent & empêcherent de passer outre, ce qui rengregea son mal de telle sorte qu'il tomba comme défaillant, sur l'arçon de la selle, & ne dit autre chose, sinon qu'ils marchassent plus auant, ce qu'ils firent, & cependât l'enfermerent en sa lictiere, où il mourut enuiron demi heure apres. Mais on cela sa mort, & fit-on courir le bruit qu'il reposoit. Apres ceste desroute d'une partie de l'auantgarde d'Abdelmelec, le Duc d'Auero ne se voyant fuiui, & craignant s'engager trop auant, fut contraint se retirer avec sa troupe. Ces Mores voyas que cinq cens cheuaux auoient embranlé toute leur armee, sans estre fauorisez d'aucun secours, reprindrent cœur, enuoyerent mille autres harquebuziers à cheual & force gens de pied donner en flanc & à dos du Duc d'Auero, de telle vigueur que lui & les siens furent batus & chassés iusques à courir à bride abatue à trauers leur infanterie, avec grand desordre & confusion. Sebastian voyant ce desordre, monta promptement à cheual, couuert d'un armes verdes, & courut à la charge, fuiui du Duc d'Auero & d'un bataillon de gens de cheual, & repoussa les Mores. Or pource qu'il n'auoit gueres plus de cinq cents hommes, il fut contraint de tourner bride, & en auint à ceste secôde retraite comme à la premiere. Ce fut lors que toute la masse du camp d'Abdelmelec, specialement de l'arrieregarde, vint fondre sur les troupes du Roy Sebastian, avec une furie telle qu'il est impossible la descrire, & à ceste charge furent tuez le Duc d'Auero & plusieurs braues gentilshommes, & l'artillerie perdue, au grand regret de Sebastian qui fut contraint prendre un cheual frais, le sien ayant esté abatu entre ses iambes. Quant au costé droit du camp d'Abdelmelec, des le commencement du conflict il ne cessa de harquebuzer, & marchât en son demi cercle donna sur l'arrieregarde de Sebastian, lequel voyant que l'arrieregarde auoit besoin de secours, fuiui de cinq cens cheuaux, chargea les Mores pour la troisieme fois au quartier de Muley Hamed, & les estonna tellement qu'ils fuirēt plus de demie lieuë loin. Mais faute d'estre fuiui il fut contraint se retirer vers le reste de son armee, pour voir de ses yeux sa perte & prochaine ruine: d'autant que les ennemis, qui s'estoient emparez de son artillerie, pour suiua leur victoire desfirent le bataillon qui estoit à senestre & du costé de la riuere, iusques à donner dedans les troupes de Muley Mahumet qui marchoit entre l'arrieregarde & la riuere, & firent un grand carnage des gens mesmes de Mahumet, lequel s'enfuit vers la riuere, pensant la passer à gué. Mais pource que c'est une eau boueuse, son cheual s'estant embourbé, s'eslança de telle roideur qu'il fit perdre les estriés à Mahumet, lequel ne sachant nager se noya, demeurant suffoqué en labourbe. De l'autre costé les Mores estoient en tel nombre qu'ils enuironnerent de tous costez le Roy Sebastian & ses troupes, & en tuerent la pluspart, les soldats n'ayans pas grand moyen de se defendre, pource que la pluspart des pouldres auoyent esté brulées ce iour mesme par mesgarde. Et si quelques

vns tiroient, c'estoit plustost contre leurs compagnons & avec intention de s'emparer des chariots, la multitude des fuyards accroissant le malheur, car les vns tōboyent sur les autres, puis les gens de cheual suruenans fouloyent & fracassoient tout. Les huit mille picquiers ne firent autre chose que laisser du bois aux ennemis, estans cause de la desfaite de Sebastian, qui ne pût auoir pareil nombre d'harquebuziers pour mettre en leur place. Ce non-obstāt il ne laissoit d'endommager ses ennemis, tantost d'un costé, tantost de l'autre, n'ayāt d'ordinaire autour de soy que sept ou huit hommes d'armes de Tingi qui iamais ne l'abandonnerent, les cheualiers Portugallois estant si recreus & auilis que plusieurs quittās leurs montures se mettoient à l'ombre des charrettes pour se rafraischir, iusques a ce que voyans tout perdu ils laisserent le Roy en la meslee, & s'enfuirent les vns à pied les autres à cheual vers Arzile. Mais ils furent chaudemēt poursuiuis & presques tous taillez en pieces. Tādis Sebastian combattoit avec quelques cheuaux, & abatoit tant de gens que ses ennemis n'osoyēt l'aborder. En fin soixante des plus hardis le vindrent enclore : tellemēt que lui se voyāt sans moyen de plus combattre, ni d'eschapper en vie, commanda à quelqu'un des siens de hausser vn linge blāc au bout de la lance, en signe qu'on se vouloit rendre. Or son malheur fut tel que ceux qui le tenoyent ainsi enclos, estoient Alarbes, lesquels n'entendans pas que vouloit dire ce signal, penserent tout au contraire, qu'il appelloit ses gens au secours. Pourtant lui coururent ils sus de toutes parts, tellement qu'ils le tuerent en la place. Les victorieux poursuiuirent les fuyards iusques à la nuit elose, tout estāt vaincu, rompu ou fait esclau, & ne restāt riē de l'armee de Portugal que les morts. Quant aux prisonniers ils montoyēt à plus de quatorze mille personnes, qui tost apres furēt departis, distribuez & emmenez en diuers lieux, où la pluspart sont demeurez esclaves. Par ainsi le Prince Muley Hamed faisant sonner la retraite, s'en alla en son camp, avec le corps de son feu frere Abdelmelec : y estant arriué sur le soir, on publia la mort d'Abdelmelec, & par mesme moyen Hamed fut reçu & reconu pour Roy, au grand regret de la pluspart, qui auoient perdu vn Prince vaillant & sage, & se voyoyent en mesme iour assuiettis à vn hōme de peu de vigueur soit de corps soit d'esprit. Le nombre des eschappez ne montoit pas à plus de deux cens, & quāt aux Chrestiens tuez il y en eut plus de douze mille, entre lesquels estoient comme principaux le Roy Sebastian, le Duc d'Auero, le Marquis d'Irlande, les Euesques de Conimbrice & de Port, le Legat du Pape, Christofle de Taore, son frere Aluaro Perez, & plusieurs autres capitaines, Cheualiers & gentilshommes en grand nombre.

10. Le mardi matin, cinquiēme iour d'Aoust, le nouveau Roy enuoya vn regiment de gens de pied en campagne pour reconoistre les morts, & y en trouuerent iusques à quinze cens des leurs, lesquels ils enterrerent au mesme lieu. Ils trouuerent aussi le corps de Muley Mahumet, cause de tant de meurtres, qui estoit sur le bord de la riuere où il se noya, comme aussi celui du Roy de Portugal pres d'un monceau de ses gens, & fut reconu par deux siens seruiteurs prisonniers, ausquels liberté fut promise, s'ils pou-

*Ce qui s'en-
suiuit apres
cette bataille,
auē la conclu-
sion de l'instab-
le de Portu-
gal.*

uoient le remarquer, comme ils firent, quoy que ce corps royal fust nud. Mais eux se despouillerent pour le couvrir & presenter à Hamed, comme fut aussi celui de Mahumet. Aucuns ont escrit que Sebastian tua de sa propre main Abdelmelec, mais le recit susmentionné est plus receu, comme plus certain aussi. Le corps d'Abdelmelec fut porté en la lictiere, & porté à vingt lieues d'Alcassar, pour y estre enterré avec ses ancestres, au mesme equipage qu'il estoit lors qu'il mourut. Le corps de Muley Mahumet fut escorché, la peau emplie de paille, & portée par tout le royaume de Fez & Maroc, pour plus grande ignominie, & afin de rendre sa memoire odieuse & execrable. Plusieurs des gentilshommes prisonniers tascherét de racheter le corps du Roy Sebastian, offrans grosse rançon : mais Hamed demanda quelques places en eschange, & en attendant responce de Portugal permit qu'on l'enterrast en la ville d'Alcassarquibir, faisant poser gardes autour du sepulchre, pour empescher que personne ne l'enleuast. La mort de ce ieune Prince retrâché par vne si effroyable visitation de Dieu mit tout son royaume en pleurs & desolation, à cause d'une perte si grande en toutes sortes, en laquelle les grâds & petis estoient frappez plus que d'une mort. Aussi combien que ceste horrible tragedie sembla en la ruine du chef estre venue à sa catastrophe & au dernier acte : toutefois plusieurs aperceurent bien que ç'en estoient seulement les commencemens. Et en cest eudroit le sage lecteur considerera le commencement & la fuite de l'estat des affaires de Portugal, specialement depuis quatre vingts ans, pour y remarquer en beaucoup de sortes & adorer les secrets & iustes iugemens de Dieu, de quoy n'est besoin de discourir, ains attendre le reste que le temps n'a encores descouvert entierement. Je ne feray aucune mention de la regence du royaume, ni de l'Estat des autres pays suiets à la couronne de Portugal : car puis que le chef est par terre, encores que le corps se remue, si n'ay-je entrepris de passer outre, sinon qu'un autre chef paroisse, ce qui n'estant encores asseuré, ou bien confirmé, & mesmes le successeur de Sebastian, qui qu'il soit, n'ayant fait choses memorables, que nous ayons veues en lumiere, il faut ici faire fin, & ensevelir avec Sebastian la maison d'Emmanuel : car combien qu'il y ait encores quelques Princes viuans & issus de ceste maison, toutesfois ils n'approchent de la couronne, sinon de loin. Mais de leur droit & de celui des Estats du royaume la dispute en soit à qui elle appartient, & es merueilles de la presente histoire soit le Roy des Roys reconu en ses faits admirables, pour estre glorifié de tout le monde, comme toute force, magnificence & gloire lui appartient à iamais.

FIN DV VINGTIESME ET
DERNIER LIVRE.

GENEALOGIE D'EMMANUEL ROY

DE PORTUGAL.

EMMANUEL
premier du nô,
14. Roy de Por-
tugal, né l'an
1468. comen-
ce à regner l'an
1492. espouse
Isabelle fille aî-
née de Fernand
Roy d'Espa-
gne puis Marie
sœur d'Isabelle;
& en troisiè-
mes nopces E-
leanor sa niep-
ce meurt à Lis-
bonne le tre-
zième Septem-
bre, 1521. a eu
12. enfans de
ses trois femmes,
les noms des-
quels s'ensui-
uent, avec leurs
descendans.

1. MICHEL, fils d'Emmanuel & d'Isabelle, né le 29. d'Aoust 1497. meurt du vivant de son pere, sans enfans.

2. IERAN, troisième du nô, quinzième Roy de Portugal, premier fils d'Emmanuel & de Marie, né le 7. de Juin 1501. commença à regner le 15. Decembre 1521. se marie le 5. de Septembre 1525. avec Catherine sœur de Charles cinquième, & en eut plusieurs enfans morts du vivant du pere. Luy decéda le 27. Juin 1557. Sa posterité est telle

IERAN, Prince de Portugal, né au mois de May 1537. espouse Jeanne fille de Charles cinquième & d'Isabelle l'11. 1553. meurt le 2. de Janvier, laissant sa femme enceinte de

MARIE, née en Juillet 1527. espouse Philippe Roy d'Espagne l'an 1544. meurt en 1560. accouchée de

SEBASTIAN, le du nom, 16. Roy de Portugal, né le 20. de Janvier 1554. tué en bataille contre les Mores de Barbarie le 7. d'Aoust, l'an mil cinq cés septuachuit, sans laisser enfans.

CHARLES, Prince d'Espagne, né l'an 1545. mort en prison, sans enfans, l'an 1568.

3. ISABELLE, fille aînée d'Emmanuel & de Marie, née le 5. d'Octobre 1502. mariée à Charles cinquième, meurt le 2. de May 1550. laisse trois enfans

4. BEATRIX, fille d'Emmanuel & de Marie, née le 1. Janvier 1505. mariée à Charles duc de Savoie l'an 1521. laisse deux fils

5. LOUVIS, fils d'Emmanuel & de Marie, né le 2. de Mars 1506. prieur de Malte, laisse vn fils

6. FERNAND, fils d'Emmanuel & de Marie, né le 15. Avril 1509. eût Cardinal, meurt sans enfans.

7. ALFONSE, fils d'Emmanuel & de Marie, né le 16. Janvier 1512. Cardinal & Primat de Portugal, suivit à ses freres & sœurs, vint à son petit neveu Sebastian, & meurt sans enfans, au commencement de l'an 1580.

9. ENOVARD, fils d'Emmanuel & de Marie, né le 16. Septembre 1515. espouse Isabelle sœur de Theodose duc de Bregents, & a trois enfans.

10. ANTOINE, fils d'Emmanuel & de Marie, né le premier iour de May 1517. meurt durant la couche de sa mere.

11. CHARLES, fils d'Emmanuel & d'Eleonor la troisième femme, né l'an 1519. meurt incontinent apres sa naissance.

12. MARIE, fille d'Emmanuel & d'Eleonor, née l'an 1522. meurt l'an 1577. étant encores à marier.

1. PHILIPPE, Roy d'Espagne, né le 27. de May 1517. marié quatre fois. 1. de Marie fille de Jean 3. naist CHARLES mort en prison. 2. de Marie d'Angleterre point d'enfans vivans. 3. d'Elizabeth de France deux filles, ISABELLE & CATHERINE. 4. d'Anne d'Autriche trois fils CHARLES, LAURENT, JACQUES & PHILIPPE. 2. MARIE, espousée à l'Empereur Maximilian 2. duquel elle a eu 6. masles & 4. femelles. 3. IRANNE, mariée l'an 1553. avec Jean Prince de Portugal, duquel elle a eu vn fils nommé Sebastian.

1. CHARLES, qui mourut en Espagne en la court de l'Empereur Charles cinquième son oncle. 2. EMMANUEL PHILIBERT, né l'an 1528. meurt l'an 1580. laisse vn fils de luy & de Marguerite de Valois, nommé CHARLES EMMANUEL.

1. MARIE, espousée à Alexandre Farnese Prince de Parme mort, duquel naissent

1. CATHERINE, mariée à Jean duc de Bregents vivant, & qui a 3. enfans.

2. ENOVARD, né depuis la mort de son pere, & decéde sans enfans.

1. MARGUERITE. 2. RAINCE vivant anjourd'hui. 3. ENOVARD. (d'huy.





INDICE DES NOMS ET MATIERES
PRINCIPALES CONTENUES EN
la presente histoire de Portugal.

Le nombre signifie la page.

A

ADELMELEC ayant deffait par deux fois Mahomet de maine paisible roy de Fez & de Maroc 734. ame les Chrestiens & tasche de desloigner le roy Sebastian de sa temeraire entreprise 736. sa maladie 736. desirre à donner bataille, & par quelle ruse maintient son armee entiere 738. accuse de desloy & de subtilite 760.

Abedalla Roy de Campar decapue en Malaca 381. 382.

Abrabens fils du Roy de Calicut tue en duel par Alfonso Nereque 192.

Abyssins quel peuple & leur pays 357. leur religion 358.

Accidens notables de ruse & de promesse de Pacheco 31.

Accord entre Siqueira & le Roy de Malaca 245.

Allie tragique de Jean Machade a l'endroi de ses enfans 295.

Adon & Eua en entree, selon l'opinion des insulaires de Zedon 168.

Aden ville renommee en Arabie brusquement deserte avec les meurs de ses habitants 328. assaillie par Albuquerque qui est repousse 330. assiegee par l'armee de Sultan d'Egypte se maintient, & est apres se venir rendre à Suez qui la refuse 405. sacquee par les Turcs 719.

Adultere, occasion de grands maux 411.

Affaires de Portugal. voyez l'Etat.

Affaires d'Afrique en quel estat 147.

Afrique en quel estat lors qu'Ennemaël mourut 29. (494)

Aiguille marine & sa description 31.

Alcobes turent le Roy Sebastian 761.

Albuquerque enuoye en Inde 103. sage & vaillant capitaine entre tous ceux de son temps, delibere s'opposer au Royaume d'Ormuz pour le Roy de Portugal & ce qui s'en ensuyuit 110. 111. &c. negocie avec le Roy d'Ormuz & ce qui s'en ensuyuit 113.

accorde la paix au Roy d'Ormuz & a quelles conditions 117. reboute les ambassadeurs du Sople 120. comment reprist ses capitaines 120. puis consulte de la guerre 121. recommence la guerre en Ormuz & les cruantez qu'il y exerça 122.

entreaine quitter la guerre d'Ormuz, & pourquoy 124. fait bruyet Calicut, & traite cruellement

les prisonniers 126. peu heureux en son voyage d'Arabie 332. 333. mal venin d'Almeide 335.

declaire viceroy des Indes 336. emprisonne par Almeida puis relasce & reconcilie avec lui 336.

337. entreprend la guerre contre le Prince de Goa 350. retarde en ses desseins par ceux qui le devoyent aider 353. comment pourroit aux affaires, apres la reddition de Goa 353. comment tasche de pourvoir a ses affaires 356. refuse par une singuliere prudence & grandeur de courage au bonheur de ses ennemis 357. apres la prise de Goa se jette en la forteresse & de la sur mer 358. conduit si sagement ses affaires qu'il maistrise centes firres d'ennemis 361. se prepare pour recommencer la guerre contre Zabara 365. se rend maistre de Goa, & quel ordre donne aux affaires apres ceste prise 370. fondateur de la dominion des Portugais en Inde 372. comment se comporta pour maintenir son autorite en Indes 379. ses preparatifs pour aller faire la guerre en Malaca & ce qui luy avint durant le voyage 381. traita paix avec le Roy de Poena 381. son arrivée en Malaca 385. commence la guerre & se rend maistre de la ville 384. 385. 388. quel ordre il y establit 389. parle avec le Roy de Siam & autres, estant leste & redonne de tous 389. 390.

en danger sur mer, & la petite qu'il fit 301. negocie avec plusieurs Princes a l'avantage des affaires de Portugal 308. pourquoy fait voile en Arabie 328. contrains leur le siege de devant

Aden 331. mis en grand peine par son secretaire 334. demande privilege au Roy de Cambay de baster une citadelle a Dui 361. fait voile en Ormuz & ce qu'il y negocia 365. comment pourroit en l'estat d'Ormuz au profit des Portugais 369. desmis de sa charge au conseil de Portugal par les menes de ses ennemis 380. donne ordre aux affaires d'Ormuz 384. sa maladie mortelle & comment il pourroit a ses affaires : ce qu'il dit & ormeu entendant les nouvelles que lui estoit subvenir 385. Ses lettres au Roy, sa mort, ses meurs & funeraillies 386. 387.

Alexandre grand Neger d'Ethiopie pourquoy enuoye son ambassadeur en Portugal 355.

Alfonse Albuquerque. Voyez Albuquerque.

Alfonse Cardinal de Portugal quand né 136.

INDICE.

Alfonse conquiste Tungi & Arzile 7.
 Alfonso *Maffie* outrage indignement *Maffaregne* au port de Cochim 641. ses mauuaises procedures 642. 643. &c. par quels artifices establit Sampaio vicerey 619.
 Alfonso *Norogne* tue en duel le fils du Roy de Caxem & est establi *capitaine* de la forteresse de Zacotera 192. 193.
 Alliance des Portugallois avec la royne de Coulam 106.
 Alliance d'Albuquerque avec le Roy de Pedir 281.
 Alliances de Gama avec les Reis de Cochim & de Cananor 85.
 Almandarim capitaine mere s'enfuit 310.
 Almedine quittee par ses habitants aux Portugallois 338. souuerage par le Roy de Mequinez 345.
 Almeida enuoyé vicerey aux Indes avec une nouvelle flotte 142. passe avec le Roy d'Onor, lequel rompt sa promesse, & ce qui en auint 156. rappellé en Portugal & le mal qui auint de la sa louise suruenus entre lui & Albuquerque 226. 227. traite cruellement ceux de Dabul 228. desfaist Miraboc & Medebau au port de Diu 130. reconcilié avec Albuquerque auquel il laisse le gouvernement des Indes 236. tui avec la plus part de ses gens pres du cap de bonne esperance 241.
 Aluar de castre engloué en la mer avec tout son butin 406.
 Aluar Norogne gouverneur d'Azamor obtient diuerses victoires sur les mores 433. 434. 435.
 Aluarez de Cagne desfaist la flotte de Cabage 736.
 Aluarez Neno ieune gentil-homme tue par sa fustie 486.
 Aluarez Saquandre capitaine Espagnol desfaist les Portugallois es Moluques 679.
 Aluauville d'Algarue port d'Hamulal 1.
 Ambassade des Chrestiens de Cranganor vers Vafque de Gama 85.
 Ambassade d'Ethiopie en Portugal 354.
 Ambassades de plusieurs Rois Indiens vers Albuquerque 289.
 Ambassades d'Ismael Septu & d'Albuquerque l'un vers l'autre 368.
 Ambassadeurs d'Ethiopie enuoyé en Portugal 309.
 Ambassadeurs de Perse en Ormus, comment receuillus par Albuquerque 219.
 Amide idole de Iapan 750.
 Ancoftam capitaine de Zabaim tranche la teste à un meurtrier & traistre 412. reduit Mowry gouverneur de Goa en grande extremite, & desfaist les Portugallois 413.
 Andrade Amiral de Malaca Jage & vaillant 323.
 Andrades ferres vaillans hommes 262.
 André Britto & ses gens desfaist au port de Patu 535. 536.
 Antoine Abrei courageux capitaine 287.
 Antoine Britto gouverneur es Moluques 510. 511. recommence la guerre contre le Roy de Tidore 542. ne tient promesse à Henriquez 612. fait la guerre au Roy de Tidore 514.
 Antoine Cornail braue canonier 581.
 Antoine Correa fait viuement la guerre du Roy de Buitam 453. 454.

Antoine Coutin vaillant cheualier 449.
 Antoine Falier euesque Portugallois & ses privileges 510. 521. &c.
 Antoine Leston commet un acte cruel à l'endroit d'une damoiselle morte dont il est chaste 433. 434.
 Antoine Miranda obtient une victoire sur les Mores de Sael 577.
 Antoine Miranda & Chrystofe Meho de font la flotte de Calecut 704.
 Antoine Miranda Amiral des Indes fait diuerses eueses 673. 674.
 Antoine Sala faiseur de Portugal tue avec autres par les Arabes de Coulam 162.
 Antoine Syluere gouverneur de la citadelle de Diu soustient le siege a son grand honneur & repousse les Turcs 710. 721.
 Antoine Ternier fait un voyage par terre depuis Ormus jusques en Portugal 676.
 Apostasie de septante Portugallois 297.
 Appareils diuers du Roy de Portugal pour maintenir sa domination es Indes 262.
 Aprests du Roy de Calecut pour une nouvelle bataille 126.
 Arabes se marient contre les Portugallois, & ce qui en auint 70. chaste de leur sedition 72. desfaist par Airade 314. desleues les Perles & porquoy 367.
 Aragonnois maintiennent constamment leurs anciens privileges 24.
 Aras Correa tue dedans Calecut avec cinquante autres 172.
 Armee du Roy de Calecut contre Pacheco & 71. Portugallois 118.
 Armee de mer du Sultan d'Egypte contre les Portugallois & leur venoindre 195.
 Armee navale du Prince de Iapone contre les Portugallois 322.
 Armee navale enuoyee de Portugal pour s'emparer d'Azamor 334.
 Armee du Sultan d'Egypte pour chasser les Portugallois hors des Indes 404.
 Armee navale de Siquere pour assieger Diu, & comme cela succeda 463. 464.
 Armee de Calecutiens au siege de la citadelle 602.
 Armee du Roy de Pam venant au secours des Buitamais desfaite par Maffaregne 637.
 Armee des Turcs en Inde pour en chasser les Portugallois 716.
 Armee d'Abdelmelec de quelles gens composee 757.
 Armee de Portugal mise en route & tallee en pieces pour la plus part peu auant que Sebastian fust tue 761.
 Arzile prise par les Mores & reprise par les Portugallois 202.
 Asie deserte & considerée en cinq parties principales 740.
 Assaut donné à Malaca en vertu duquel elle est prise 288.
 Assaut notable donné à Azamor 357.
 Assauts diuers donnez à la citadelle de Diu 370. 371. 372.
 Assauts donnez à la citadelle de Diu par les Turcs, repoussez par les Portugallois 721. 722.
 Ataide gouverneur de Sasin, ses vaillances & ex-

plous

INDICE.

- plaits 273. 274. & capitaine bien resolu 312.
redont de tous les plus grands Princes Mores
314. fait la guerre au Roy de Maroc 315. laisse
Ishabentafuf en beson & ce qui en auant 316.
desfont le Xerif 342. fait une course insigne aux
portes de Maroc & ce qui en ensuiuit 375. gai-
gne une belle victoire 394. mais sur sa retraite
il est assaili & tué par Benxamus & ses trou-
pes hachees en pieces par un estrange malheur
395.
- Auantures de Siquere es Indes 442. &c.
- Auanture de Melin voulant ruiner un village de
Tidira 543. 544.
- Auanture entre les Arabes ancorez au port de Can-
lum & les Portugallois 538.
- Auantures d'Almeide 529.
- Auarice & ambition conseillers d'entreprises peril-
leuses ont beson de beaux pretextes 30.
- Auarice malheureux conseiller 91.
- Auarice ambreux de Paul sous taxe 334.
- Auelar Chrestien veut faire la guerre aux Portuga-
lois en Malaca 540.
- Auertissemens utiles sont ordinairement mesprisés
246.
- Azamor ville de Barbarie deserte avec son territoi-
re 335. abandonnee des Mores & prise par les
Portugallois 337. assaillie par les Portugallois
qui se retirerent sans la prendre 200. 202.
- B —
- B** Ador comités parueni à la couronne de Cam-
boje 627.
- Badar Roy de Cambaie desfait & tué au port de
Diu 716.
- Bains d'Algarue 2.
- Bairimbouz ambassadeur de Persé vers Albuquer-
que 368.
- Balcacen capitaine de Calecut desfait par 17 Por-
tugallois en l'Isle de Zeilan 377.
- Baltazar personne ambassadeur en Persé & sa ne-
gociation 528.
- Bandan & ses Isles desertes 500.
- Bancans moines de Narsingue, quelles gens 139.
- Bardadin capitaine Arabe vaillans & resolu au
possible 715.
- Barraxa vaillant capitaine Mors 310.
- Barres sage & vaillant capitaine fait vinement la
guerre aux Mores 341.
- Barrique vaillant capitaine 312. 314.
- Barrique tue de sa main le general des Alarbes &
luy coupe la teste 314.
- Barrique desfait les Mores en diuerses rencontres
315. donne bataille aux Mores & les desfait 371.
desfont les troupes du Xerif & ses braves faits
d'armes 373. autres biens exploits notables 374.
- Bataille entre deux Princes freres, a cause de la reli-
gion 101.
- Bataille navale entre Pacheco & le Roy de Calecut
125.
- Bataille donnee entre les Calecutiens & Portuga-
lois 131.
- Bataille navale entre la flotte de Calecut & de Por-
tugal & ce qui en auant 169.
- Bataille navale entre les Calecutiens & les Por-
tugallois 192. 194.
- Bataille navale deuant Ormuz entre Albuquerque
& les vaisseaux de Zoradon 214.
- Bataille memorable entre Almeida & Mirhocem
au port de Diu 230.
- Bataille navale entre la flotte d'Albuquerque & de
Zabaim, & les plus remarquables occurrences d'i-
celle 261. 262.
- Bataille cruelle entre les Portugallois & mores de
Asrique 315.
- Bataille entre Ishabentafuf & le Roy de Maroc
316.
- Bataille donnee aux Rois de Fez & de Mequeuez
qui sont mis en route 344.
- Bataille contre les Mores de Barbarie desfaits par
Barrique & Ishabentafuf 371.
- Bataille navale de Begue entre les vaisseaux de
Cambaie 477.
- Bataille navale au port de Chaul entre Hagama-
hamed & les Portugallois 478.
- Bataille fécide pres de Chaul entre Hagamahamed
& les Portugallois 480.
- Bataille par mer & par terre pres de Conlette & l'if
sur 569. 570.
- Bataille navale des Portugallois contre les Turcs
& les succès d'icelle 575. 576.
- Bataille entre le viceroy Menfex & les Calecu-
tiens campez deuant la citadelle, & quelle en fut
l'issue 606. 607.
- Bataille navale entre George Albuquerque & le
gouverneur de Porquua 611.
- Bataille entre Sampaio & les Calecutiens 698.
- Bataille donnee au port de Diu, gaignee par les Por-
tugallois 737.
- Bataille remarquable en laquelle perissent trois
Rois de diuerses morts 758. 759. 760.
- Batailles & victoires admirables des Portugallois
contre les Calecutiens 119. 120. 121.
- Batailles & victoires remarquables des Portuga-
lois 127.
- Batailles navales entre Pateonoux & les Portuga-
lois au port de Malaca 323. 324.
- Barochin village bien fortifié & defendu contre les
Portugallois qui s'en rendent maistres 547.
- Beatrix fille d'Emmanuel, roy 110. mariee à
Charles duc de Sonoye 478.
- Begie capitaine Portugallois enuoyé en ambassade
vers le Roy de Cambaie 361. tue d'un coup de
fusil nouveau 479.
- Benaduxera voulant trahir les Portugallois recuit
son payement 461. 462. 465.
- Benagari fortteresse de l'Isle de Goa rendue à Albu-
querque 307.
- Benemotaparche Royaume en Ethiopie, & les par-
ticularitez remarquables au gouvernement d'i-
chey 166.
- Benitagorin capitaine mors & son fils, tués de deux
coups de machine lancee en machine beure par Barri-
que 375.
- Bintam ile yrraue du Roy de Malaca 305.
- Bintam ile & uille deserte avec ses fortteresses 636.
- Bintam prise d'assaut par Mascaregne 638.
- Bisnaga ville capitale du Royaume de Narsingue
159.

INDICE.

Bauffy estimer sacrez, entre les Mores 118.
 Bon-heur des Portugallois se change 378.
 Bonnets pliffiez, des Perses opposez aux turcs des
 Turcs 367.
 Bonzees prestres de Japon 749.
 Brachmans grand pontife de Calcut 40.
 Brana ville en la toise d'Erhupe rendue tributaire
 aux Portugallois 110. sercee pullee & bruslee
 par les Portugallois 190.
 Bresil terre de l'Amerique decouverte par les Por-
 tugallois 61. deserte avec les ments de ses ha-
 bitans 62.
 Burgos l'une des principales villes de Castille 33.
 Butin des Portugallois peris en mer 527. 528.

C

Cabil d'Arres, seigneur de Moluques, homme
 rasi & meschant 525.
 Calabaie ville du Royaume d'Ormuu appointe avec
 les Portugallois & comment 212. bruslee par les
 Portugallois 226.
 Calcut ville où finet, & sa commodité 45.
 Calcutiens & leur religion 45. cruellement trai-
 tez par V'asque de Gama 83. rompent la paix &
 envoient sui aux Portugallois 531. desfaits en trois
 grandes rencontres par Soule & Telio. 556. as-
 saillis dans leur ville reponnent les Portugallois
 567. 568. commencent a faire leurs approches de
 la citadelle, & avec quel succes 587. leurs efforts
 pour l'emporter 592. desfaits en bataille rangée
 avec merueilleuse perte d'hommes 607. desfaits
 sur mer par le lieutenant de Sampam 673.
 Calomnies des Arabes contre les Portugallois 70.
 Calomnies contre le Roy de Campar decouvertes Ma-
 laca 381.
 Calomnies dressées contre le Roy Emmanuel 425.
 Cambaie Royaume deserts 361.
 Camphre gomme où & comment croist 510.
 Campion Sultran d'Egypte fait la guerre aux Por-
 tugallois 195.
 Cananor ville, sa situation & commodité 74.
 Canelle comment cueillie & où 510.
 Cap de bonne esperance pourquoy & par qui ainsi ap-
 pelé 19. difficile a passer en certain teps de l'an-
 nee 28. où finet 507.
 Capitaine Portugallois perside & cruel 173.
 Capitaines Portugallois se resoluient en despit d'Al-
 buquerque, & le mal qui en auut 224.
 Capitaines du Sophi desfaits par Albuquerque 226.
 Capitaines Portugallois ambassadeurs 416. l'irent
 la guerre es Moluques 612.
 Capral gentil-homme Portugallois enuoyé en Cale-
 cut 53. arrive en Calcut & sa negotiation avec
 le Roy 68.
 Caravelles de Portugal & leur facon 81.
 Cardinaux en nombre de douze, assis au Pontife
 des Chrestiens d'Orient 338.
 Caserquidur ville de Barbarie 86.
 Castillans se resoluient a cause du tribut sur eux im-
 pose 458.
 Catual ruge de Calcut 39.
 Cephal, voyez Zofala.
 Ceremonies temples de Calcut 40.
 Ceremonies des Abyssins 358.

Charles cinquiesme en differens avec le Roy de Por-
 tugal touchant les Moluques 552. succede
 a Maximilian premier, & le tribut excessif qu'il
 empesait sur l'Espagne 457.
 Charles due de Sauoy épouse Beatrix fille d'Emma-
 nuel 478.
 Charles prinee d'Espagne emprisonné par le com-
 mandement de son pere, mort en prison 751.
 China pays de grande estendue, deserts avec les ments
 religion & police de ses habitans 418. 419.
 Cheualiers de Christ en Portugal quels, & discours
 sur leur institution 13.
 Chrestiens Indiens 74. de Cranganor leurs mœurs
 & ceremonies 138. de Coulam 106.
 Chrestiens d'Erhupe 358. en l'isle de Zaouera,
 & leurs ceremonies 191. au nombre de douze
 mille tuez en bataille avec le Roy Sebastien 761.
 Chrestiens de Congo en Erhupe quelle 100.
 Chrestosle Insarte arrive au secours de la citadelle,
 & ce qu'il fu 592. 593.
 Chrestosle Mendoza enuoyé pour gouverner la ci-
 tadelle d'Ormuu 673.
 Chrestosle Melo & Antoine Miranda desfont la
 flotte de Calcut 704.
 Cidaco vaillant capitaine mort en 336.
 Cide mancoz gouverneur d'Azamor, vaillant & sa-
 ge chef de guerre, tué sur la bresche 337.
 Cinquante Portugallois tuez en la ville de Calcut
 72.
 Citadelle de Cochim par qui bastie 104.
 Citadelle des Portugallois en Cananor 161. com-
 mencee par les Portugallois en Ormuu 217. ba-
 stie a Malaca 289. de Malaca destruite de la
 trahison de Maxelix 327. bastie a Calcut 332.
 rebastie en Ormuu 366. bastie en Coulam 409.
 bastie en l'isle de Zeilan 423. en l'isle de Terna-
 te qui est l'une des Moluques 511. 512. de Pa-
 cem abandonnee des Portugallois 532. 533. de
 Calcut rudement assaillie & bien desfaite 564.
 de Calcut assiegee & battue en diverses sortes
 587. 588. 590. &c. de Calcut desfaite par le com-
 mandement du viceroi 608. &c. de Din assie-
 gee par les Turcs 710. de Din assiegee pour la
 seconde fois 728. deliuree 738.
 Clemence d'Emmanuel 10.
 Cleux de girofle comment croissent 509.
 Cochim ville de Malabar en quel endroit assiee &
 sa commodité 73.
 Coscater principal conseiller du Roy d'Ormuu consi-
 re contre Albuquerque 220. empesche l'ambas-
 sadeur qu'Albuquerque enuoyoit en Persie 253.
 Courbuque sage & bien experimenté capitaine contre
 les Indiens 292. 293. tué a la bresche 294. 295.
 Colleges de Jesuites es Indes 750.
 Combats d'un vaisseau de Portugal contre une na-
 viere de Cochim 69. de Moyno contre la flotte de Ca-
 lecut 77. de la flotte de Portugal contre une
 navire du Sultran d'Egypte 82. entre les Por-
 tugallois & Ormuusins 223. entre Benxamut &
 les Portugallois 394. pres de Sepece remarquable
 entre les autres 444. d'une caravelle on n'y au-
 uoit que trois hommes de desense contre une fri-
 gate de corsaires 450. entre le capitaine Cosar
 & une navire d'Anglese 487. contre les Por-
 tugallois

INDICE.

gallois & Calcutiens 359.
 Comparaison d'Albuquerque & d'Almeida au gou-
 vernement des Indes 271.
 Complaijances contre les Portugallois en Coulam &
 ce qui s'en ensuyuit 409.
 Conseil donné au Roy de Portugal touchant la guerre
 d'Afrique 208.
 Conseil tenu pour savoir s'il devoit tenir ou quitter
 Goa 388.
 Conseils tenus par Henri de Meneses pour secourir
 la cadrelle de Calcut 602.
 Consideration que doit avoir un Prince 207.
 Conspiration des Capitaines Portugallois contre
 Albuquerque 220. en Malaca contre les Por-
 tugallois & ce qui en suivit 300. en Ormus con-
 tre les Portugallois 469. 470. contre Sebaben-
 tosch 472.
 Consularion d'Albuquerque pour recommencer la
 guerre en Ormus 321.
 Congo, Royaume d'Ethiopie sa description, & les
 choses memorables avenues en iceluy 97. com-
 ment reduit à la religion Romaine 317. 318. en
 quel estat sur la fin du regne d'Emmanuel 389.
 Cordelier, trompette de guerre 339.
 Couards comment retenu en denoir 115.
 Coulam ville maritime sa description & commodité
 106.
 Coulette principal & plus riche port du Royaume de
 Calcut assailli des Portugallois 368.
 Couronne d'or envoyee par Emmanuel au Roy de Co-
 chon 85.
 Courses de Pacheco 116. des Portugallois en la co-
 ste de Barbarie 274. des Portugallois autour du
 mont Fatohe 377. de Manuel Mascaregne
 418. des Portugallois & Mores en Barbarie,
 avec divers enchemens 485.
 Cosmographie & maniere de vivre des Bresiliens pen-
 sée d'Amérique 62.
 Cosmographie du pais de Cochon en la succession Royale
 265.
 Crainte est un mal-heureux conseiller 96.
 Cranganor ville proche de Calcut assaillie & brus-
 lée par les Portugallois 157. sa situation & es-
 tui 158.
 Croix eslevée par deux Moines pour enseigne de sé-
 dition & massacre 149.
 Cruauté barbare d'Albuquerque 222. des Por-
 tugallois en Dabul 228. d'Almeida 235. de cinq
 cents matins 249.
 Curiate ville du Royaume d'Ormus brûlée par les
 Portugallois 111.
 Cuinges domestiques des eusques de Japan 749.

—D

DAbul ville riche pillée & saccagée de façon
 étrange par Albuquerque 227.
 Damoselle contrageuse 273.
 Damoselle More cruellement traitée par un Por-
 tugallois 433.
 Danger le plus à craindre quel 130.
 David grand Négus d'Ethiopie, ami des Portuga-
 lois 355.
 Degré que c'est & que contiennent 18.
 Demande du Roy de Portugal au Pape 351.

Demands de l'ambassadeur de Portugal à Ismael
 Sophi 401.
 Deportemens des Portugallois es Indes 172. du
 gouverneur d'Aden & des Portugallois 329.
 Description particulière de l'Asie maritime 742.
 Desseigneur est un terrible conseiller 260.
 Desfaite de ceux de Cochon 95. des Portugallois
 au port de Chaul 198. 199. des Malabares au
 fleuve de Baccanor 615. des Portugallois au
 port de Dachen 686.
 Desseins d'Albuquerque retenez par ceux qui les
 devoient avancer 253.
 Devoir d'un bon Prince 2.
 Devoir des Roys 25. 207.
 Devoir d'usage chef de guerre 56.
 Dieu este le sens à ceux qui ont peur 96. mon-
 stre sa main es extremes dangers 128. destitue la
 fraude autant que l'innocence violente 130.
 Differens entre les Roys d'Espagne & de Portugal
 touchant leurs limites, appointés passablement
 210. entre l'Empereur & le Roy de Portugal
 touchant les Moluques 352. entre les capitai-
 nes Portugallois es Moluques 612.
 Diligence du Roy de Portugal à pourvoir aux af-
 faires d'Afrique 207.
 Discipline militaire requise 59.
 Discours monstrueux si les Juifs font supportables ou
 non entre les Chrestiens 14. touchant la guerre
 entre Trumampora & Pacheco 114. sur le fait
 des revenus ecclésiastiques 351. sur la situa-
 tion de Magellan aux Moluques 439. 450.
 Etc. de l'escarmouche des Portugallois mudi &
 des Mores 448. sur les fautes & sur la maniere
 de vivre du Roy Emmanuel 488. 489. Etc. tou-
 chant les Roys & Royaume de Portugal 495.
 496. de la navigation de Magellan 500. 501.
 Etc. sur la vie & sur les vertus de Henri de
 Meneses 617. de la felle des Jesuites de leurs
 navigations & deportemens es Indes 744. sur
 la guerre de Barbarie en laquelle mourut le Roy
 Sebastian 755.

De ville renommée au Royaume de Cambaye 361.
 conquise par Nemo de Cugne 716. saccagée de
 façon horrible par les Portugallois 738.
 Desir des Jesuites 746. 747.
 Domestiques du Roy de Calcut retenus prisonniers
 par les Portugallois 49.
 Drets des peuples n'enchourent point de prescrip-
 tion 24.
 Drets que les Portugallois se sent attribué en Inde,
 & comme ils en usent 137.
 Duc de Braggens lieutenant du Roy s'empare d'A-
 zamor & autres villes en Barbarie 334. 336.
 Etc. s'aventure à ceux qui vouloyent qu'en fût
 la guerre au Royaume de Maroc 339.

E

EAu bémite de Calcut 40.
 Ecclesiastiques mal accommodés en Portugal
 du temps d'Emmanuel 351.
 Edoard Ataide & autres font naufrage 515.
 Edoard de Leme naufrage en Ormus & ses exploits
 277.
 Edoard de Meneses, desfaite les Mores en Barben

INDICE.

vie 309. 312. 313.
Edouard de Menefez gouverneur de Tingo ruine
 les villages du mini Farrobe 377.
Edouard de Menefez viceroy des Indes 474. donne
 ordre aux affaires de Perse & des Indes 497.
 perd sa reputation en supportant le traistie Xerof
 519. se demet de sa charge de viceroy 557.
Edouard fils du Roy Emmanuel meurt jeune 381.
Edouard Galuan enuoyé en ambassade vers le grand
 Negus 381. meurt de vieillesse & de maladie
 en l'Isle de Camora 407.
Edouard Pacheco sage capitaine 115. ses courtes ex-
 ploits & vaillances 116. 117. 119. 120. 123. avec
 septante vn soldats fait tyste à toute l'armée du
 Roy de Calecut 117. sa pieté & prudence 129.
 remonst & reduit par toutes les Indes à cause
 de ses victoires 134. comment recompense de ses
 seruiets 146.
Efforts d'Albuquerque pour puenir à ses affaires
 156.
Efforts du Roy de Dachen contre les Portugallois
 515. 709.
Eleanor d'Autriche mariée au Roy Emmanuel 426
 accouche d'une fille 477.
Elephantines & salez pour la fourniture des navi-
 res 73.
Elephants de Malaca dangereux au combat 285.
 Elephants enuoyé de Portugal à Rome 349.
Embassade du Roy de Bontan contre son gendre &
 ce qui en auut 381.
Emmanuel nommé & declaré Roy 2. 3. debbre
 de secours les Indes 19. se marie en se-
 condes nopces avec sa belle seur 51. donne
 secours aux Venitiens contre le Turc 34. 36.
 enuoyé d'indes presens au Pape Leon dixiesme
 349. en bon mariage avec tous les Princes Chre-
 tiens, aduéré & aimé des natins estranges 390.
 finie & esposée la fleur de Charles cinquiesme
 426. Meurt 488.
Empresonnement de Mascaregne & ce qui s'en en-
 suit 644.
Enfant de Jean troisieme 497.
Engins dresser contre la citadelle de Calecut 595.
 596.
Enemis à craindre qui 147.
Enemis d'Albuquerque le font desmettre de sa
 charge 380.
Enseignes Royales du roy de Benemetapa en ethio-
 pie 166.
Enterpriees du Roy de Fez sur Arzile & Tingo
 317.
Enterpriees de Mascaregne sur l'Isle de Bont 636.
Escarmouche deuant Axamor 336. entre les Por-
 tugallois & les Mores 448. entre les Espagnols
 & Portugallois et Moluques 654.
Espagne en guerre civile à cause d'attribus excef-
 sif 458.
Espagnols arrivés et Moluques s'attachent aux
Portugallois 652. 654. desfont les Portugallois
 et Moluques 679.
Estandart de Portugal planté au plus haut du pa-
 lais du Roy d'Ormus 217.
Estat de Portugal 79. 97. 110.
Estat d'Espagne recouués le fils d'Emmanuel pour

leur Prince & lui font hommage 16.
Estat d'Espagne assemblez pour recouuer leur Roy
 & ordre tenu en cest endroit 22.
Estat assemblez à la requeste du peuple 80.
Estat de Gama capitaine enuoyé aux Indes 76.
Fusques Orientaux 138.
Fusques Abyssins 358.
Fusques souverain en l'Isle de Iapan 749.
Ethiopie descrite 166.
Ethiopie ou habitent les Abyssins descrite 357.
Ethiopie en quel estat lors qu'Emmanuel mourut
 494.
Ethiopiens & leurs armes 17. 28.
Exaltion des Portugallois 110.
Exercices d'Ismael Saphi 401. 401.
Exploits notables du capitaine Barrique 374. de
 Soarez viceroy des Indes 387. de quelques lieu-
 tenants du gouverneur de Goa 410.

F

Famine en la forteresse de Cananor 179.
Famine est un terrible conseil 260.
Faux tesmoin chassé par le iugement de Dieu 385.
Femmes Moresques prisonnières 88.
Femmes du Royaume de Narsingue comédies trai-
 tees apres la mort de leurs maris 159.
Fernand d'Andrade negocie en la China 416.
Fernand Coutin enuoyé en Inde avec quinze navi-
 res son armée & ses exploits 236. 237. me en
 Calecut 236.
Fernand de Castro arrive au secours de la citadelle
 de Dia 719.
Fernand fils du Roy Emmanuel & de la Reyne
 Marie né 185.
Fernand Gomez de Erme, ambassadeur de Portu-
 gal en Perse 399.
Fernand Magellan voyez Magellan.
Fernand Roy d'Espagne meurt 389.
Fen artificiel qui ne brasse point 281.
Fen nouveau donné par le Roy de Benemetapa à ses
 suiez pour signe de suzerain 167.
Fidelité & excellente responce du Roy de Cochim
 95.
Fidélité notable d'un Roy Mahumetiste 152.
Flauteurs 112. 5.
Flauteurs semant la haine entre Almeida & Albu-
 querque 235.
Flotte de Portugal arrive à Goa 31.
Flotte de Portugal enuoyée en Barbarie pour y ba-
 isir une citadelle 377. ravue avec perte de qua-
 tre mille hommes 379. enuoyée en Inde 428.
Flotte d'Espagne enuoyée aux Moluques & l'ar-
 rive d'icelle 651. 651. de Portugal perdue en
 la coste de Calecut. 697. de Calecut desfaite
 par Miranda & Melo 704. de treize cens voi-
 les menée par Selismur en la guerre contre Ab-
 delmelcer 756.
Folie d'un mes plusieurs ruses en print 27.
Folie de ceux qui se fient aux traistres 77.
Forteresse bastie à Quilua par les Portugallois
 151. bastie en l'Isle d'Anchedune 155. des Portu-
 gallois à Zofala 164. d'Anchedune rancee
 par les Portugallois 171.
Fortifications des Portugallois pour leur desense en
 la cita-

la citadelle de Calcut 396.
Fortifications des Calcutens 390. 397.
Fortagues fauſtes de Japan 750.
Foy doit eſtre gardée par ces hommes, ſpectialement par les Roys & Princes 7. ne doit eſtre jamais rompre par ceux qui commandent 85.
Franglut humaine parſſé en la mort d'Almeide 245.
François de Sa priuſ du gouuernement de Goa par Sampaio 622. fait voile à Zunde, & ce qui luy auent 639. 640.
François de Souſe & ſes gens deſſais par les Tidorens 344.
François Perreire vaillant capitaine 147. gouuerneur de Goa deſſeigné & choiſi de ſes ſauues 358. ſecours la citadelle de Calcut 399.
François Albuquerque rompt ſa foy 108. arreſté par le iugement de Dieu 109.
François Guay nauigant en Zefſala, & ce qui il y fu 164. il y meurt 165.
François, peuple beſigneux, renommez es Indes & en tous les pays du Levant 196.
François premier, Roy de France, ſolicite Emmanuel d'entrer en ligue 390.
François Xaver ieſuite Apôſtre du Pape en Inde 748.
Frands tant abominable deuant Dieu que l'inuſte violence 130.
Fuste du Roy de Malaca 288.
Fusterailes d'Albuquerque 386.

G

Ar d'ian des Cordeliers de Goa plaide en plain cour la cauſe de Sampaio 643.
Gaſſie Chango vaillaiſ capitaine ſe noye miſerablement 383.
Gaſſie Coutin gouuernement de la citadelle d'Ormuz, ſage & vaillant 483. 484 & c.
Gaſſie de Souſe tui d'un coup de ſiſche, apres auoir fait un excellent deſuoir 330. 331.
Gaſſie Henriquez, va aux Iſles de Bandan 500. perd deux carauelles priſes de Buntam 339. arriue aux Moluques & ce qui il y fu 384. 385. empoſché en ſon gouuernement par Brissio 612. fait empoſſonner le Roy de Tidore 631. empoſſonné & ce qui ſ'en ſuiuſſit 667. ſeruire à Melaca, & comment il y fut traui 689. perd ſon baſteau & tous ſes pillages au port de Cochum eſt empoſſonné & enuoyé pardi & poiré luez en Portugal 708.
Gaſſar de l'ortreuil & ſon frere nauigant en Septentrion 80.
Gaſſar Perreire ſecrtaire d'Albuquerque conſpire contre ſon maſtre 333.
Gaſſar Menroy gouuernement de Goa, par ſon aduſtere eſt cauſe de grands troubles & dangers 411.
Genealogie de Jean triſteſme 496.
Gentils-hommes Portugalliſ tuez en Calcut 240.
Gentils-hommes Portugalliſ paſſer dans aues des Indes priuſ, de leurs charges 261.
George Albuquerque eſtabli gouuernement de Malaca 339. ſeſuit par ſaux reſmonſ ſont mouir le Roy de Campar 382. 383. battu par l'Amiral de Buntam 481. deſſait le Gouuernement de Porqua

611.
George Aquihire capitaine Portugalliſ perit en mer 186.
George Brissio deſſait & tui aues les capitaines & principaux de ſa ſorte au port de d'Arben 473. 476.
George Coſte Cardinal de Portugal 11.
George de Menefez gouuernement des Moluques 664. ſonne les Eſpagnols d'emporter 664. fait empoſſonner Henriquez 667. calomnie 669. empoſſer & empoſſonné en un cachot 670. deliuré 671. cherche la paix aues les Eſpagnols 680. 681. ce qu'il eſt aues Fernand de la Tour capitaine Eſpagnol & le notable preſent qu'il luy fu 706.
George Maureſco & ſon frere tuez à coup de poignard empoſſonnez 612.
George Menefez ſe porte vaillant en la bataille navale de Chand 479.
George Puriſ & ſes gens deſſait au port de Tidore 343.
George Quadre voyage en Ethiopie, Arabu & Perſe 451.
George Tellis deſſait par d'ux ſeu les Calcutiens 336. deſſait les Malabares au ſeuue de Baccanor 615.
Glorie des Roys en quoy conſiſte 34.
Goaſſe & ſiſte deſſer 251. ſe rend à Albuquerque 253. aſſailie & priſe par Zabaim ſur Albuquerque 258. priſe par les Portugalliſ aues notables ſais d'armes de part & d'autre 268. reduite à l'excrement par Zabaim 294. auiſſaile & renforcee par le ſecours de pluſieurs capitaines Portugalliſ 296. en danger d'eſtre priſe par la miſericorde de ſon gouuernement 413. en extreme danger par les menes de Zabaim & comment deliurée 466.
Goſſalve Argenſe pille une partie du butin de Henriquez 678.
Goſſalve Vaſco capitaine infidèle & cruel 173. deſpoſe de ſa charge 174.
Goſſalve Vaſco cruellement traui & miſ à mort pour auoir renoué au Mahometiſme 358.
Gouuernement prudent ſiguré en Albuquerque 253.
Granat N'rogne eſten vicerey des Indes ſont ſes apreſſi pour ſecours Dieu 721.
Guerat tyran de Pacem tui aues ſes ſeruiteurs & domeſtiques 471.
Guerre des Breſiliens peuple de l'Americque 64. de Vaſco de Gama contre le Roy de Calcut 82. des Portugalliſ contre les Mores en Afrique 86. du Roy de Calcut contre le Roy de Cochum 91. 94. au royaume de Congo pour le changement de Religion 100. contre les Mores en Afrique 111. du Roy de Calcut contre les Portugalliſ pour quelle raiſon cōſuſme 122. renouuelle entre le Roy de Calcut & de Cochum 131. entre le Roy de Cananor & les Portugalliſ 171. d'Azamor en Afrique & les diuers accidents d'icelle 199. Guerre ſeconde d'Albuquerque contre le Roy d'Ormuz & les diuers enuennements d'icelle 221. d'Albuquerque contre ceux de Calicut & l'issue d'icelle 225. Guerre triſteſme d'Albuquerque au royaume d'Ormuz 226. de Fernand Couto en Calcut & l'issue d'icelle 238. Guerre pre-

INDICE.

miere de Goa & quelle en fut l'issue 352. Guerre
seconde de Goa & les occurrences d'icelle 354.
Guerre en Cochim & son issue 266. Guerre
troisième contre Goa 266. commencée par les Portu-
gais en Malaca 284. renouvelée en Goa
291. de Pateleur en Malaca contre les Portu-
gais 303. derrière de Goa & son issue 306.
307. de Safin & l'issue d'icelle 311. d'Alme-
da, les notables exploits & la fin d'icelle 312.
313. contre le Roy de Maroch 314. 315. contre
les Rois de Fez & de Mogomez 343. en Aca-
mor & les autres succès d'icelle 345. 346. de Se-
pe & l'issue d'icelle 347. Guerre entre les Rois
de Bintam & de Campar, en laquelle les Portu-
gais se mêlent, & dessous le Roy de Lin-
gue 359. d'Arade contre le Xerif & les di-
vers ennemis d'icelle 372. de Maroch
& quelle en fut l'issue 375. d'Arzale & les
plus remarquables ennemis d'icelle 390. 391.
de Maroch 395. du Xerif contre les Portu-
gais 414. 415. en Malaca par les meures du
Roy de Bintam & le succès d'icelle 421. contre
les Mores de Garabie 439. 440. 441. contre
le Roy de Pacim 452. contre le Roy de Bintam
453. en Effague à cause d'un tribut excessif 458
de Jehabentassuf contre les Mores de Dabide &
de Garabie 459. 460. de Zeilan & les ac-
cidents d'icelle jusques à la paix 468. 469. de Geor-
ge Albuquerque au Royaume de Pacim 474.
de Zabaim Dalcum contre les Portugais &
quelle en fut l'issue 512. du Roy de Bintam con-
tre les Portugais & les accidents d'icelle 533.
de Bruto contre le Roy de Tidore & le succès
d'icelle 542. d'Helior Sylveire au Royaume de
Cambaye 705. Guerre seconde de Dni pourquoy
commencée 725. entre Mahomes & Abdelme-
lec pour les Royaumes de Fez & Maroch 753.
Guillaume de Cronsfieur de Chonres, gouver-
neur de Charles cinquiesme homme auariceux
457. 458.

H

H Abraham Roy de Quilao pris prisonnier sa
delivrance & prison 81.
Hag-anahamed rist captain 464. endim-
mage fort les Portugais 477. empesche les
Portugais de demeurer maistres de Dni 628.
Haines entre Almeida & Albuquerque 235.
Hals gendre & disciple de Mahomet fait une
se-
ite à part 366.
Halladux gouverneur de Safin & ses deportemens
envers les Portugais 183. 184.
Hallisa general de l'armée navale de Cabaje des-
sus par Sampayo 702.
Hamed se range avec Abdelmelec contre Mahom-
et 753.
Harenque de Lacques Almeida au Roy Emmanuel
2. de Gama au Roy de Calecut 41. au Roy de
Calecut contre Gama & les siens 46. de
Nabecadorim prince de Calecut 91. de Pa-
thrice à ses captains & soldats 124. d'un gen-
tilhomme More à Iean de Menezes & Tarepô-
se 206. de Jehabentassuf au Roy de Portugal
396. de Henri de Menezes, conseiller de den-

ner bataille 605.

Helior Sylveire fait la guerre aux Calecutiens 562.
secours la citadelle de Calecut 598. 601. se sau-
se trémper, & fait à se sauver de la citadelle da
Dni 629. fait la guerre au Royaume de Cam-
baye 705.

Helaine Reyne d'Ethiopie & ses lettres au Roy de
Portugal 356.

Henri Cardinal de Portugal quand né 302.

Henri de Lens vallant captain & ses aventures
388. 389.

Henri de Menezes gouverneur de Tingy, des^{se} fait le
gouverneur de Ternan 486. declair viceroy
après la mort de Vesque de Gama 559. 560. dont
ordre aux affaires 561. des^{se} fait les Calecutiens
562. liberal & sage 572. 573. quel moien trient
pour secourir la citadelle de Calecut 602. ses ver-
tu 603. sa harenque 605. muri & est enterré
en Canaan 616. discours de sa vie & de ses
vertus 617.

Henri le T au macqueran recompense de ses ser-
vices 411.

Henri Prince de Portugal, premier des descendans da
la ciste d'Ethiopie 18.

Hercules estimé avoir esté en Inde 229.

Histoire facetieuse d'un enfant qui veut accorder
ceux qui debatoient du partage du monde 553.

Histoire facetieuse d'un present fait d'un Effagnol
et Molucques 706.

Histoire memorable de l'amour d'un mari envers sa
femme 394. & de la femme envers son mari 395.

Histoire notable de la promesse de deux freres 444.

Histoire tragique & pitoyable 692.

Homar disciple de Mahomet respeité des Prestres

Hommes prodigeux et Molucques 548. (367.)

Hote femme de Benxamut encourage son mari au
combat, & lui sau obtenir une belle victoire 394.
se fait mourir & pourquoy 395.

I

I Acques Azambuge gentilhomme de grand
esprit s'empare de Safin par ruses notables 180.
181. &c.

Acques Ceniz premier des descendans de la ciste d'E-
thiopie 97. et qu'il y negotia 98.

Acques de Mezquies & autres prestres & tourmen-
tez pour abuser le Christianisme 674. 675.

Acques de Portugal brave chevalier 147.

Acques Lopez, bertrand d'Arade brave soldat &
ses hardies executions 349.

Acques Melin vallant captain tut 226.

Acques Melin vouement prouvé à cause de son au-
rice 622.

Acques Sigueire envoyé aux Indes 186. voyez
Sigueire.

Albomazen le general des Arabes tut de la main
du captain Barrique 324.

Alauste entre Almeida & Albuquerque 227.

Alamambux au religieux de l'isle de Japan 749.

Une grande & petite ou suivies, leurs commoditez,
coustumes & habitans 322.

Idolatrie defendue au Royaume de Congo 101.

Iean Ceniz gouverneur d'Arzale des^{se} fait les Mores
372. ruins les villages du mont Ferrobo 377. bas
les

INDICE.

les Mores en diverses rencontres 437. 438.
 Jean de Castro viceroy des Indes ennuyé secouru à la citadelle de Diu 734. son arrivée à Diu & ce qui s'en ensuivit 737.
 Jean de Lame gouverneur de la citadelle de Calicut sage & vaillant capitaine 549. 551. souffrit un assaut des Calicutiens, puis entra en traité de paix avec le Roy de Calicut 564. 565. rembarra les Calicutiens 587. rompit leurs entreprises 588. ses divers exploits 589. demanda secours au viceroy 591. sa vaillance 593. commença le siège 596. secouru par plusieurs 592. 598. blesé en la jambe 599. souffrit un très bon courage 600. conseillé de donner bataille 603. delivré du siège & envoyé en Cananor 612.
 Jean de Meneses fuyt pris & renommé en Barbarie 107. fait vnement la guerre aux Mores 341. meurt 347.
 Jean Gomez tue Caldeure en trahison, & sur le chemin à la robe blanche 412.
 Jean L'homme capitaine & ses deportemens 358. priné de son estat 162.
 Jean Machado tue ses enfans & pourquoy 395. tué au combat 413.
 Jean Mascaregne gouverneur de la citadelle de Diu pourvu à la sûreté d'icelle 726. sa réponse aux avertissemens de Sopha 727. sa sagesse & vaillance à soutenir le siège de la citadelle 728. 829. 730. 731. 733. secouru par Alvarez de Castro 734. patient & prudent 735. delivré du tout & les ennemis desfaits 738.
 Jean Nôus envoyé aux Indes 75.
 Jean Prince de Portugal né, & les prodiges en sa naissance 76.
 Jean Prince de Portugal meurt tost apres son mariage avec la fille de Charles cinquiesme, de laquelle il eut un fils nommé Sebastian 751.
 Jean second Roy de Portugal, nommé Emmanuel son heritier 1. ses vertus & sa mort 2.
 Jean Souze de Limce envoyé de Portugal armé en Goa 335.
 Jean Sylvestre fait voile en Bengala, & ce qu'il y fit 420.
 Jean troisieme du nom fils d'Emmanuel, succede à son pere 495. confirme le gouvernement des Indes à Sampaio 631. meurt & laisse pour successeur son petit fils Sebastian 752.
 Icababentash & Haladux massacrèrent Rhaman prince de Sasin 185. courroux contre les Portugallois 181. demeure gouverneur, puis devient pensionnaire du Roy de Portugal 182. 183.
 Icababentash fidelité au Roy de Portugal 277. se porte vaillamment en diverses rencontres 335. gaigne une belle victoire 336. est élu gouverneur d'Almede 338. met le Xrif en fuite 342. desfait les Mores avec Henrique 371. donne ordre aux affaires de Barbarie apres la mort d'Almeida 397. fait la guerre aux Mores du Dabide & de Garabie 439. 460. transportement tué a table 472.
 Jesuites quelle felle, leur doctrine, leurs navigations & deportemens es Indes 745.
 Jerosime de Souze desfait les Calicutiens 556.
 Ignace Loyola pere des Jesuites 745.

Image d'or de saison monstrueuse 8p.
 Image d'un bon Prince 2.
 Image d'un sage gouverneur 253.
 Indes Orientales desertes 42.
 Indiens comment avertisissent les uns les autres es dangers 105.
 Indes en quel estat au jour du trespass d'Emmanuel 495.
 Incommodez de la flotte de Portugal en la mer d'Arabie 406.
 Infolence des Portugallois 108.
 Instrustion donnée par les Jesuites aux Indiens 748.
 Inventions des Calicutiens pour ruiner la citadelle 597.
 Ismael, moines Indiens 73.
 Isabelle de Castille peymise à femme à Emmanuel 17. 21. meurt 25.
 Isabelle femme de Charles le quint, en quel temps nee 97.
 Ismael Sophi Roy de Perse, prince fort renommé, mesprisé par Albuquerque 220. sa race, maniere de vivre, domination & exploits notables 366. en quelle maisonné demora au service à l'ambassadeur de Portugal 400. meurt 529.
 Isle de Buntam deserte 636.
 Isle de Goa reconquise par Zabaim 294.
 Isle de famille Helaine & ses commoditez 78.
 Isle de famille Helaine par qui acconnoice 307.
 Isle de saint Laurent par qui & quand decouverte & sa situation 163.
 Isles de Bandam quelles, & comment gouvernées 305.
 Isles de Maldivas en grand nombre 167.
 Isles Moluques desertes 509.
 Inde ville en la coste d'Arabie assiégée par les Portugallois, qui sont chassés de dedans 407.
 Jugement de Dieu sur Vincent Sadre 960. sur Almeida & les siens 244. sur un faux témoin 383.
 Jugement sur les batailles & villaines de Pacheco 129.
 Inge seduit par faux témoins ne veut admettre l'innocent en ses justifications 382.
 Inger deleguez pour régler le proces de Sampaio & de Mascaregne 660.
 Insi bannis de Castille, & leur estat en Portugal 6. 7. chassés de Portugal 14. 15. massacrés à Lisbonne 148. 149.
 Intercan lientenant du Roy de Cambaje au siège de Diu 729.

L

Ambrasin espiou du Roy de Calicut & sa negotiation avec Menes 587.
 Lapeximene Amiral du Buntam vaillant chef de guerre & ses exploits 481. desfait les Portugallois & par quel moyen 534. desfait Sance Henriquez au port de Faxo 336. 337. conquiesse deux caravelles de Henriquez 339. n'est combattu avec Martin de Souze 541. desfait & tue Martin Alfonso de Souze avec plusieurs autres 579. & tost apres desfait par les Portugallois 581. mis en route par le capitaine Serran 638.
 Lorache ville de Barbarie & ce que les Portugallois

lois yfrent 111.
La Jamaïca Amiral de Malaca est empestée par quelques oiseaux de se ranger au parti des Portugais 289. donne bataille aux Portugais & les desfait 304.
Laurent Almeida excellent capitaine gaigne une belle victoire navale sur les Calcutiens 170. tué en bataille navale 198. 199.
Laurent Britio tué auprès d'Almeida 244.
Letres d'Albuquerque montrant esrites au Roy de Portugal 386. d'Ismael Sepbs au Roy Emmanuel & à Albuquerque 403. du Roy d'Ethiopie à celui de Portugal 626.
Liberalité de Henri de Mençez 571. 572.
Lucence tres-dangereuse en guerre 59.
Ligne equinoctiale que c'est 18.
Livres comment esrites & reliez en Calcut 45.
Lopez de Sampaio. voyez Sampaio
Loup Suarez arrive en Inde avec une flotte de treiz. 22 navires 135. ce qu'il fit 136.
Loup Suarez. voyez Suarez
Louys de Mençez en Ormuz, & ses machinations contre Xerax 492. va au cap de Guardafu & de là en Ormuz 519. perit en mer 561.
Louys fils d'Emmanuel quand naist 148.
Louys Guzman capitaine Portugallois devient courtois 428.
Louys l'Arctoman de Boulouge grand voyageur se saccie de Calcut en la flotte de Portugal 169.

M

M Achinations du Roy de Bantam contre Geor ger Botel 383.
Madagascar en yle de S. Laurent par qui & quand decouverte 163. deserte 189.
Magellan gentil homme Portugallois quitte le parti de son Prince & se range à celui d'Espagne 429. son dessein pour trouver les Moluques 430. sa navigation hardie & memorable 432. le destruit par luy trouvé, & sa mort 433. ses exploits des crits bien au long 501. 502. &c.
Mahomet Ancien establi Roy de Qulisa 111.
Mahomet mis en route plusieurs fois par Abdelmelec 754. induit le Roy Sebastien à donner bataille 758. s'ensuit & se noye en la ruere de Larache 761.
Mahometistes ennemis des Perses disciples de Hale 567.
Malabares quels peuples & leur religion 43. desfaits au siege de Baccanor 615.
Malaca royaume & ville 245.
Malaca assailie & prise par Albuquerque 285. 286. &c. assiegee par mer & par terre puis delivree 540. demeure paysee par la prise de Ram & deuis l'un des plus riches hautes de l'Orient 619.
Malacais confirent contre Sigueire 246.
Malade & mort d'Albuquerque 385. 386.
Malade du Roy Emmanuel 488.
Malais comment sont attrappez 49.
Malipur ville au Royaume de Narsingue ou est la sepulchre de S. Thomas Apôstre 119.
Mamelux More renommé estrangé dedans la citadelle de Canavar 562.

Mammeluchs tués en la bataille de Diu 235.
Mamours oiseaux admirables 509.
Mamud Roy de Cambaye recommence la guerre contre les Portugais 725.
Manuel de Cugne brave soldat 481.
Manuel de Souze capitaine Portugallois tué avec 40. soldats 428.
Manuel Lacerde vaillant capitaine 269.
Manuel Pazaze repousse l'armée du Prince de Goa de devant la forteresse d'Anebedi &c 174. vieux & sage capitaine tué à Calcut 240.
Marias place principale de Tidore prise par les Portugais 545. 546.
Mari aimant ardemment sa femme pour la delivrer gaigne une belle victoire 395.
Mariage d'Emmanuel avec Isabelle de Castille 17. de Charles due de Savoye avec Beatriz fille d'Emmanuel 478.
Mariage reclaimé des Calcutiens 40.
Mari Roine de Portugal meurt 415.
Mari fille d'Emmanuel & d'Eleonor, pe 477.
Mari princesse de Portugal mariée à Philippa d'Autriche 751.
Martin Alfonse Melia fait voile en la China où il est contrainct se retirer 512. 513. repoussé par les momagnars 544. contrainct le Roy de Parane de venir à apoinement 584. faisant voile à Zunde souffre une infirmité de maux & revient en l'Inde basse 681. 682. 683.
Martin Alfonse de Souze Amiral de Malaca guerroye vivement le Roy de Bantam & ses allies 541.
Martin Alfonse de Souze desfait & tué par Laynez 778.
Martin Coeillo tué pres d'Almeida 244.
Martin Correa fait vivement la guerre aux Tidorens 545. 546.
Martin Igniquez general des Espagnoles Moluques 612.
Masfear ville du Royaume d'Ormuz saccagee & brulée par les Portugais 213.
Maurbun ambassadeur d'Ethiopie renvoyé de Portugal avec Suarez 301.
Maurus general des Cordeliers & Moines du mûe Smai, ambassadeur du Sultan d'Egypte 143.
Maxeliz voulant lever la citadelle de Malaca au Roy de Bantam est tué 327.
Maximilian premier du nom, decedé, a pour successeur Charles cinquieme 457.
Medecin Luisseri aux Portugais à s'emparer de Sufin 181.
Medichuz gouverneur de Diu sage & vaillant capitaine 295. demande la paix à Almeida 234.
Melichfai gouverneur de Diu, rusé capitaine 463. 464. entre en intelligence avec les Portugais & à quelque occasion 627. est contrainct s'enfuir de dans une fuite 630.
Melinde Royaume & ville avec sa description & comme les Portugais y furent reçus 56.
Mencez pour attrapper les Portugais 84.
Meridian que c'est 431.
Mesamures de la flotte de Portugal continue par Suarez 406.
Moschanevez estranges du Roy de Dachen 709.

Moscon-

INDICE.

Attestentement survenu entre les Portugallois sur l'aggravation du nouveau viceroy ; & ce qui s'en ensuyvit 631.
Michel Frere ambassadeur d'Albuquerque vers le Sophi 368.
Michel Prince de Portugal & d'Espagne naist 25. meurt 33.
Michel Vaisseau jeune gentil-homme vaillant & merueilleux 444-445.
Milamais renoulez 96. executez & mort à Calicut 169.
Miracle faux cause de grande massacre 148.
Mirboem lieutenant general de l'armee d'Egypte & des Indes contre les Portugallois 196.
Mirboem & Melichiaz desfaits par Almeida au port de Diu 120.
Mirboem tué par les embuscades de Soleiman 405.
Miriamam gouverneur d'Aden refuse viures aux Portugallois & se moque d'eux 408.
Mochin Prince de la Mecque assailli par les Portugallois ; & desfaits ; & sa teste apportee en Ormuz 470-471-472.
Mozes d'Albuquerque 386.
Afojatecan conestable de Camboie ameine quarante mille hommes contre les Portugallois ; & ce qui s'en ensuyvit 733.
Moine plaudent en chaire la cause de Sampaio 632.
Moine Portugallois prescheur seductueux, cause de grands maux 149.
Moine preschant la guerre en plaine assemblee, & quelle response lui fut faite sur le champ 339.
Moures Abrins 358.
Moures de Perse viennent en estat de persellien 451.
Moures Indiens grands imposteurs 73.
Moures seductueux executez & mort 150.
Molucques isles renommées à qui s'apartientement 431. 432. desfermes avec leurs singularitez 509. troubles de guerre par les Portugallois 514. en quel estat sous le gouvernement de Gaspé Henriquet 650. engagees par l'Empereur du Roy de Portugal 707.
Mombaze isle & ville avec sa situation & communée recuie les Portugallois 35. assaillie, forcee & pillée par Almeida 152. 153. 154. prise par Nemio de Cugne, où son armee passe l'hiver 695.
Moutdragon confesseur François prius & relaxé par Emmanuel 156.
Mores desfaits par les Portugallois 910. se rasent la teste & la barbe par devotion 194. desfaits par Edouard de Menezes 309. se rendent tributaires au Roy de Portugal 348. au nombre de cinq cens meurent de froid en une nuit 375. desfont les Portugallois par un accident merueilleux 394. 395. de Sael en Arabie desfaits par les Portugallois 577. de Langue desfont les Portugallois 672.
Mort tragique d'Almeida 121. 122. du Roy de Cochin 169. d'un chef de une ville oste le courage à tous les soldats & habitants 337. de leao de Menezes vaillant & sage seigneur 346. 347. de Nuachetuen & les mercurables particularitez d'icelle 360. de Fernand Roy d'Espagne 387. Mors cruelle de Gaspas Vasco pour a-

nir abuser le Mahometisme 398. Mort & enterrement du Roy Emmanuel 488. de Henri de Menezes viceroy 616. du Roy leao troisieme 752.
Morts en la bataille où fut tué le Roy Sebastian 761.
Moyen nouveau faict par le Roy de Portugal pour confondre le trafic des Indes 744.
Mozambique isle, sa situation & ses habitants 31.
Murmures contre les Portugallois par toutes les Indes 389. contre Sopere de ce qu'il s'entreprend rira contre Diu 465.

N

N Autres gentils-hommes de Calicut 39. leur vaillie & ordre 44-45. estiment c'est estre sacrilege de goustir de la chair de bœuf 118. comme pour tuer leao de Leme gouverneur de la cite d'icelle de Calicut 350. vaillans & resolu 568. promettent secours les Portugallois contre les Tures 723.
Naramahim prince de Cochin tué au combat 94. 95.
Narasingu Royaume de grande estendue descript, avec les particularitez notables de la Religion & mœurs des habitants 159.
Naturel d'un bon Roy 4. des Portugallois 47. des moines & soldats Portugallois 60. des tyrans 81.
Nambecador successeur de Trinumpare Roy de Cochin recompense de ses services par Almeida 162. 163.
Nambecadorim prince de Calicut moyenne la paix 379. devenu Roy de Calicut offre la paix avec le Roy de Portugal 333. meurt & laisse son successeur grand ennemy des Portugallois 531.
Naufrage de quatre navires de Portugal 65. d'Alfonse Nerogue 166. d'Edouard Almeida 515. de cent cinquante personnes 692. de plusieurs vaiffeaux Portugallois en la coste de Calicut 697.
Naufrage moyen propre pour avancer la religion Chrestienne, & dequoy s'ensuyvit 18 de Copral en Calicut & son arriere en la terre du Bresil 60. 61. de leao Nemio aux Indes 76. de Gaspard Correia en Septentrion & ce qui ensuyvit 79. 80. de Vincent Sodre en Arabie, & sa mort 96. des Portugallois en Congo pour convertir le royaume à la religion 99. d'Antoine Saldagne es Indes 109. de Lamp Saare & ce qu'il fu en Calicut & en Craugant 135. d'Almeida 150. d'Edouard de Leme 177. d'Albuquerque en Ormuz 364. de leao Sylveira en Bengala & ce qu'il y fu 420. de Fernand Andrade en la China 416. hardy & mercurable de Magellan aux Molucques 431. 433. de Henriquet aux isles de Biscan 500. de Magellan descript bien au long 501. 502. &c. de Melo en la China, où luy & les Portugallois sont chassiez 512. 513. 514. des Portugallois au port de Coulerio 568. de Francisque de Sa à Zuande & ce qui luy avint 639. 640. de Martin Alfonse Melo & ses aventures 681. 682. 683.
Negociation d'Albuquerque avec le Roy d'Ormuz 213. &c. avec plusieurs Roys & Princes 308. de Balthazar Perse au Royaume de Perse 528. 529.
Negus d'Ethiopie envoie son ambassadeur en Por-

I N D I C E.

• tural & pour quelle occasion 354. 355.
*N*unachetien de son illé de son estat en Malaca 319. sa mort tragique 360.
*N*oblesse de Calcut & ses privilèges 44.
*N*oblesse comment acquies en Moluques 546.
*N*ux Mascades comment traisent 500.
*N*ouis de Cagne s'en troyer des Indes s'en embour quement pour y aller & ses amours durant le naufrage 692. prend Mombaze & y hiverne 695. arrive au port d'Ormu 711. conquise la ville & la citadelle de Diu 716. retournent en Portugal meurt pres du cap de bonne esperance 722.
*N*ouis Mascaregne successeur d'Araide de meurt ord. aux affaires de Barbare 397. guerroye vainement les Mores 415. chasse les Mores de Garabie 439. 440. ses louanges 442.
*N*oumami de Pegu qu'elle 451.

O

*O*ffination malicieuse à un capitaine 136.
 Occasions de perilleuse guerre en Goa 411. de la seconde guerre de Diu 715.
*O*piman des Zeulandais touchant la sepulture d'Adam & Eve 168.
*O*r en abondance au Royaume de Rememotapa 166.
 Ordonnance des troupes des Roys de Portugal & de Fez en leur dernière bataille 759.
*O*rdre mis par Emmanuel aux affaires politiques & ecclésiastiques de son Royaume 10. 11. 12. aux affaires de Goa apres la prise d'icelle 170. establi par Albuquerque en Malaca 189. aux affaires de Perse & des Indes par Edouard de Meneses 497. aux affaires de Malaca & des Indes 557.
*O*rdres de l'Eglise Romaine desconuertes & conuertes par Emmanuel 25.
*O*rta à la ville du Royaume d'Ormu pillée & bruslée par les Portugallois 213.
*O*rgueil fuist de honte & de confusion 239.
*O*rmu isle, ville, & Royaume, descrite avec les mœurs de ses habitans 110. 211.
*O*uvans Saouages, hommes-diables, & leurs prodigieux exploits 548.

P

*P*Acbeo. voyez Edouard Pacheco.
 Paillardises de certains Portugallois avec des Indiens comment reprimes par Albuquerque 261.
*P*aix entre le Roy de Calcut & les Portugallois, par qui rüpe & cömée 107. entre le Roy de Cananor & les Portugallois 178. accordée par Albuquerque au Roy d'Ormu & à quelles conditions 216. 217. entre Melichiaz & Almeida 234. faite avec le Roy de Calcut 309. entre Meneses & Melichiaz 481.
*P*anane ville rache bruslée par les Portugallois 194. raïnée par les Portugallois 166. 467.
*P*aniberra acoustumée à la chasse courue de Portugal à Rome 349.
*P*ape supplié de renuier les princes Chrestiens 145.
*P*aroles douces & rüpproches de mal ausiez 49.
*P*arole grane de Melichiaz qui fait le proces à

plusieurs Chrestiens 234.
*P*articularitez notables de la guerre entre le Roy de Cananor & les Portugallois 174. 175.
*P*aste d'un chat & chien visé presenté à un ambassadeur Espagnol 706.
*P*aucetier successeur de Vitimut arria cüssure contre les Portugallois & ce qui en auist 300. sa guerre 303.
*P*ateaux prince de Iapere fait la guerre aux Portugallois 322. 323. &c. rünné par ses propres conseils 315. deüst entièrement 237.
*P*atriarches Orientaux 238.
*P*aul de Gama mort & enterri en l'isle Tierce 52.
*P*aul Ioue tixé 224.
*P*aysans accourus à Laibonne pour massacrer & piller 149.
*P*ays du grand Négus surnommé prestre Jean, descrite 357.
*P*ean du renard cüsse à celle du lüen 150.
*P*edar Royaume en la Taporane 281.
*P*egu grand Royaume, duquel le Roy fait alliance avec les Portugallois 190. l'alliance du Roy avec les Portugallois 451.
*P*elage de Soufe capitaine Portugallois tüt 228.
*P*erfes sectateurs de Hato disciple de Mahomet 366.
*P*este par tout le Royaume de Calcut 147. 148.
*P*euuples cöwageux & ennemis de fermande 25.
*P*euuples du cap de bonne esperance, quels 29.
*P*euuples Septentrionaux & leurs mœurs 85.
*P*euuples de Barbarie se rendent tributaires du Roy de Portugal 348.
*P*hilippe d'Autriche depuis Roy d'Espagne épouse Marie fille du Roy de Portugal 711.
*P*ierre Albuquerque en Arabie & en Ormu, & son retour en Goa 362.
*P*ierre de Far enuoyé gouverneur à Matäta 673. trompé par le Roy de Dachen 689.
*P*ierre de Meneses desäus les Mores 347.
*P*ierre de merueilleuse propriété pour arrester le sang 282.
*P*ierre de Nauarre capitaine renommé meurt du secours aux Portugallois 205. 206.
*P*ierre de Soufe succede à leon de Meneses 347. vaillant & desirieux d'honneur 375.
*P*ierre de Sylus perit en mer avec ses soldats 477.
*P*ierre Mascaregne establi gouverneur de Goa 328. establi gouverneur de Malaca, & ses premiers exploits 583. 584. comment pouruist aux affaires emédant qu'il estoit viceroy des Indes 624. fait entreprendre sur l'isle de Biniam 636. desäus l'armée du Roy de Pam venant au secours des Biniamois 637. emporte d'assaut la ville de Buntä, & rend le mouleur Roy tributaire à celui de Portugal 638. 639. son arrivée au port de Cachim, où il est indignement traité par Messie 640. 641. emprisonné par Sylus, qui lui fait naistre les fers aux pieds 644. ses pratiques pour se de liuer & faire deür comme viceroy & l'issue d'icelles 648. est content que son droie soit com en iustice & ce qui Ten ensuist 655. son proces voidé lequel il perd, & s'en retournant en Portugal où il est bien receuill, & fait commander Sampao son compereur à tou deßs, Añ mages

INDICE.

mages & interets 662. 663.
Pierre Nomo excellent Mathématicien 432.
Pierre Personne fauteur du *Roy* qui dedans la ca-
delle de Malaca 327.
Pierre Queroué vaillant soldat 480.
Pierre l'Asque de l'Veine perit en mer 103.
Pieré de Pacheco 129.
Pilote par terre et deserts d'Arabie 677.
Poisson manfrueux 61. 421.
Police de ceux de la Chine 419.
Polonois viennent voir le Roy Emmanuel 390.
Pontife des Chrétiens Opprimés 138.
*Porquena pillée par Sampayo & les siens qui s'y font ri-
 ches* 699.
Port de Samilo Holano 27.
*Port de mer du Royaume d'Ormuz assuettis par
 les Portugallois* 112.
Portugal en quel estat lors qu'Emmanuel mourut
 494.
*Portugallois detestent l'ambition & l'avarice de
 leurs compagnons qui vont aux Indes* 20. Por-
 tugallois quel peuple 47. affectant les autres
 vœux pour leur à leurs affaires pour l'autre 105.
 mal voulu des Arabes 67. exigent tribus de
 celui qu'ils ont pillé & ravagé 110. descomens
 de quelle affection ont entrepris leurs voyages
 109. au nombre de 71. conduits par Pacheco
 sont resté à l'armée de Calicut 117. avec quelle
 de vœux se forment en pays étranger 161.
*Poursuites du Roy de Portugal pour mettre paix
 entre les princes Chrétiens* 171.
Portugallois estiment François & portugais 196.
 desfaits avec grande perte au port de Chaul 197.
 traitent cruellement ceux de Dabul 228. de-
 puits en peu de temps 247. villoireux en la
 coste de Barbarie 274. pillent la terre pour en-
 richir la mer 302. devenus Mahumetistes com-
 mencent chasser 307. font ombre de devienir se-
 font emparez de divers lieux 319. ravassent
 au voyage d'Arabie 331. mal voulu par tou-
 tes les Indes 386. desfaits par leur propre or-
 gueil & par la révolte de leurs allies 395. vou-
 lent brider les Mores par le moyen d'une es-
 tade de desfaits. & perdent quatre mille hom-
 mes 377.
*Pour parler entre l'ambassadeur de Portugal & le
 Sophi* 400.
*Portugallois nuds souffrent une escarmouche de
 Mores* 448. demeurans au Royaume de Pa-
 cem 451. mal traités par le Roy de Dabul
 476. mal traités en Ormuz 482. chassés des
 ports du Royaume de la Chine 513. recourent
 une honte & lourde bastonnade en la coste de
 Din 518. font la guerre es Isles Molucques 524.
 secourent le Roy de Zanzibar contre celui de
 Mombaze 526. au nombre de cinq pris au
 port de Pam. & mis à mort pour n'avoir voulu
 abuser le Chrétiensme 535. brassez en leur ba-
 steau 539. ennuellent peure à Calicut 549.
 mal traités par les Calicutiens 550. assaillent
 Conlète principal port du Royaume de Calicut
 568. 569. desfont Laqueixime & le Roy de Dra-
 gain 581. 582. prêts à s'entretenir & perdre tout
 ce qu'ils toirgent es Indes 639. desfaits par les

Mores de Longu, dont ils se vengerent depuis
 672. desfaits es Molucques par les Espagnols
 679. desfaits au port de Dabul 686. riches
 de pillage de Porquena 699. chassés de leur ar-
 rance au siege de la cadelle de Din 735.
*Pratiques de Mascaregne pour se delivrer & faire
 obier comme vicerois & l'issue d'icelles* 648. con-
 tre George de Meneses, lequel est serri en un ca-
 chot puis delivré 668. des Portugallois & Espa-
 gnols pour s'entretenir en guerre es Isles 680.
*Preparatifs d'Albuquerque pour aller faire la guéri-
 re es Malaca* 281.
*Prescription nulle contre les droits & franchises des
 peuples* 24.
*Presens du Pape au Roy de Portugal témoins de
 la reformation de l'Eglise* 26.
*Presens magnifiques du Roy d'Ormuz à Albu-
 querque* 217.
*Presens envoyez au Pape Leon dixiesme par le Roy
 de Portugal* 249.
Presens envoyez d'Ethiopie à Emmanuel 356.
*Prestre Jean, nom donné au grand Negus d'Ethiopie
 mal à propos* 354.
Proffres Abyssins & leurs ceremonies 358.
Proffres de Cranganor & leurs manieres de vivre
 138.
Prince sage quel 34. trop liberal repris 5.
*Princes sages ne s'embolent en guerre legeremēt
 ni ne souffrent la foy promise* 25.
*Princes d'ont s'annuissent de flateurs pour excuser
 leurs fautes* 16.
Prince equitable qui 79.
*Prince de Bantam pacifique avec Mascaregne &
 se rend tributaire du Roy de Portugal* 639.
Prise & pillage de Malaca 288.
*Prise de quelques Portugallois couramment pour
 abuser le Chrétiensme* 674.
*Prisonniers commencent traitez des Bresiliens peuple
 de l'Amerique* 64.
*Prisonniers en nombre de 14. mille apres la des-
 faite du Roy Sebastian* 761.
*Privileges estranges & infames de la noblesse de Ca-
 lecut* 44.
Profession des Jesuites quelle 746.
Promesse reciproque des Rois & de leurs sujets 23.
*Promesses & obligations reciproques entre le Prin-
 ce & ses sujets* 26.
Prophete merueilleux d'un pierre 282.
Promesse de Pacheco 321. 322.
Prudence requise es Rois pour contenter chacun 10.
Prudence de Pacheco 129. d'Albuquerque 252.
 de Bratia & d'Andrada en la guerre de Ma-
 laca 324.
*Pulercam lieutenant du prince de Goas fait la guéri-
 re à Albuquerque* 255. desfont Melras & Ti-
 maria 261. desfont & ruinent par une ruse estrange
 294.

Q

Veixime est pillée par Albuquerque 224.
 Querelles commences entre le Roy de Cal-
 cut & les Portugallois 48. entre Bratia & Men-
 riques es Molucques 612.

INDICE.

Quilua isle & royaume décrit avec ses commoditez 66.
 Quilua ville en la coste d'Ethiopie prise par les Portugallois 151.
 Quinte Roy d'Ormu prince de leur veue, meurt en Inde 384. —

R

Rabel gouverneur de Goa tué en une sortie 292. 293.
 Rabbenxamut vaillant capitaine Mores obtient une belle victoire pour rescourre sa femme 394. est tué puis après 395.
 Rapports de meschans combien sans à craindre 146.
 Rausque capitaine Portugallois pille ceux de Zan Zibar & ce qui en suit 109.
 Rebelle de ceux de Coulam & ce qui s'en ensuit 454.
 Reglement notable d'Emmanuel 22.
 Religion ne doit estre forcée 16.
 Religion des Calcutiens 43. des Chrestiens de Craganor pres de Calecut 43. des Nasringues 159. maintenu doree se servant les Portugallois pour faire leurs besognes 319.
 Religion des Abyssins 338. de ceux de la China 418.
 Rencontre des Mores & Portugallois en Barbarie 424. de la flotte de Din & du gallien de Henri de Macédo 675.
 Repeler s'il se peut par les Portugallois 105.
 Responce excellente du Roy de Cochim 96.
 Responce du Roy de Portugal aux lettres du Pape & du Sultan d'Egypte 144. d'Albuquerque aux ambassadeurs du Sople 219. d'Ismael Sople aux demandes de l'ambassadeur de Portugal 401. de Meneses aux lettres du Roy d'Ormu & de Xerof 573.
 Retraire du Roy de Calecut apres avoir esté desfaict par Pacheco 429.
 Revenu eclesiastiques demandé par le Roy de Portugal au Pape 322.
 Revolt de quelques capitaines Portugallois contre Albuquerque 214.
 Ruere de S. Jacques 27. des bons Signes 30.
 Roys sages & bons quels 4. de Portugal ennemis mortz des Mores 7. de Nasringue & leur magnificence 160. d'Ormu comment traitez par leurs gouverneurs 384.
 Roys & royaume de Portugal décrits 495. 496.
 Roderic Brito gouverneur de Malaca, sage au besoin 313.
 Roderic de Leme ambassadeur de Portugal en Ethiopie, retourne de là en Ormu puis en Portugal 625. &c.
 Rôles prestres de Pegu 451.
 Roy de Portugal alreche l'alliance & l'amitié de celui de Calecut 39.
 Roy de Calecut & sa magnificence 40.
 Roy vertueux se moivre pere de ses sujets 79.
 Roy de Cochim fidelle envers les Portugallois 90.
 de Congo se fait baptiser 100. de Calecut qui te le Royaume par dessus 134. de Quilua tributaire de celui de Portugal 151. de Benemotapa & ses enseignes royales 166. de Zeilan se rend

tributaire de celui de Portugal 168. de Cananor fait la guerre aux Portugallois 174. d'Ormu demande la paix qui luy est accordée par Albuquerque, & a quelles conditions 216. de Pedro fait alliance avec Albuquerque 281. de Malaca sache de tromper & surprendre Albuquerque 283. de Vengapor traite alliance avec celui de Portugal 308. de Maroc desfaict & mis en fuite 315. de Maroc desfaict par Lebentafis 316. de Mequinez tué & mis en fuite par ses propres troupes 346. d'Ethiopie, surnommé prestre Jean, & sa magnificence 357. de Lingue desfaict par les Portugallois 360.
 Raubamed cyran d'Ormu tué par le commandement d'Albuquerque 369. 370.
 Roy de Bistam transfere & meschamment par quels artifices fait mourir son gendre 380. canteloux 411. adulateur 422. de Zeila pacifié & se rend tributaire de celui de Portugal 427. de Pacem tué 451. d'Ormu estranglé par le commandement de Xerof 485. de Daeben ennemi juré des Portugallois hors de la T aprouave 515. de Tadore et Malucques en guerre contre les Portugallois 524. de Daeben ennemi juré des Portugallois 532. 533. de Calecut fait tous ses efforts pour ruiner les Portugallois 549. de Lingue secouru par les Portugallois 581. de Calecut s'embrouille de paix se dispose à une nouvelle guerre contre les Portugallois 586. de Bistam s'ensuit & meurt de regret ayant perdu son pays & son estat 618. 619. de Burnes apour d'une capistrure 666. de Daeben cruel & malheureux 689. de quelles malices use pour ruiner les Portugallois 709. d'Aden perdu à un mast de navire 719. de Calecut pourquoy fait emprisonner l'ambassadeur des Turcs 723.
 Rozaicam beau frere & lieutenant de Zabaim trépe les Portugallois, & sefert d'eux puis les veut ruiner 294.
 Rozaicam desfaict par les troupes d'Albuquerque 306. quier l'isle de Goa 307.
 Rumecan fils de Saphar succède à son pere, & donne divers affaux à la citadelle de Din 730. 731. 732. tué en combats 738.
 Rumis nom donné par les Indiens aux soldats de l'Europe & pourquoy 196.
 Rufes diverses des Malacques pour surprendre les Portugallois 283. 284. —

S

Safon ville de Barbarie tombe par moiens adulateurs en la main des Portugallois 179. &c.
 Sageffe d'Emmanuel des son auement à la couronne 3.
 Sageffe d'un chef de guerre 9.
 Sageffe merueilleuse d'Albuquerque 261.
 Saint Helaine terre d'Ethiopie 27.
 Sainte Helaine isle par qui accomodee 307.
 Saint Laurent isle des plus grandes du monde, sa situation ses commoditez, & ses habitans 189.
 Saint Raphael terre descouverte par les Portugallois 29.
 Sampao declare vice-roy apres Meneses, & ses premiers actes 619. 620. confirmé vice roy par lettres

INDICE.

tres envoyez de Portugal 631. bannus les amis de Mascaregne 632. de quel artifice se pour arriuer les gens de guerre 633. ses manuyes & uniques procederes contre Mascaregne 642. 643. &c. contre les aduersus d'iceluy 648. 649. obtient sentence par faueur contre Mascaregne, auquel il paye puis apres tous despens, dommages & interress 662. emporte deux cens mille escus du pillage de Porqu 699. veut s'emparer de Diu 700. desaut la flotte du Roy de Cambaje 702. malheureux en beaucoup d'entreprises à cause de l'audace de ses soldats 703. venant en Portugal où il perd ses biens, estant condamné à payer les despens, dommages & interress de Mascaregne 714. 715.
 Sanaue Rax traistre esloigné de ses forfaits en Malacca 710. 711.
 Sance Henriquez & son frere desaut au port de Patu 316. 317.
 Sauvages du Bresil s'accroissent des Portugallois 61. leurs costumes & façons de vivre 62.
 Sebastião premier du nom succede à son ayeul Jean troisième 752. embrasse le parti de Muley Mahomes & passe en Barbarie pour y faire la guerre 755. pris par amis & ennemis de ne donner bataille, ne veut euvre conseil 757. tué en chæp de bataille 761.
 Secours envoyé de Portugal aux Venitiens contre le Thre 54. 56.
 Secours des mofebans n'auanté iamais les affaires des Roys, aus les recule & remuerse 350.
 Secours envoyé à la citadelle de Calcut 394.
 Seile des Iesuites autorisée du Pape, & depuis quand en vogue 746.
 Seduicieux de Lisbonne executé à mort 350.
 Sedition entre les soldats Portugallois & Venitiens 60. entre les Portugallois & les Arabes 70. à Lisbonne, monstrent quels sont les fruits d'un zele sans science 148. des Arabes de Coulam contre les Portugallois, & ce qui en auint 161. au Royaume de Pacem 451. entre les gentils-hommes Portugallois à cause de l'emprisonnement de Pierre Mascaregne 647. en Ormus contre les Portugallois, & ce qui en auint 481. 482. &c.
 Sefim Thre desaut le Sultan d'Egypte 414.
 Sentence au proust de Sampaio touchant le gouuernement des Indes 662.
 Septante Portugallois se font Mahometistes 295.
 Septe par qui conquisse 7.
 Septentrionaux & leurs mœurs 80.
 Serran vaillant capitaine 637. 638.
 Siam Royaume 245. puissant & de grande estendue 290.
 Siege d'Azamor & le succès d'iceluy 336. de Safin 273. premier & second d'Aden, & quelle en fut l'issue 330. 331. 332.
 Simon Andrade traite mal ceux de Ta China, & ce qui s'en ensuyuit 419. 420.
 Simô de Bren & ses soldats bruliez, en leur bastean 538. 539.
 Simon de Cugne desaut en l'isle de Baharen dont il meurt de despit 712.
 Simon de Meneses, desaut sixzans barques de Ma-

labores 574.
 Simô de Souze envoyé pour gouuernement aux Malabques 673. est desaut & tué au port de Dabehn avec plusieurs autres 686.
 Siqueira fut appoinctement avec le Roy de Malacca 245. se retire en Inde 246. envoyé viceroy es Indes 422. fait divers voyages & ses auantures 442. 443. 444. persant s'emparer de Diu est contrainct se retirer 464. induit à faire la guerre au prince Machri, & le succès de cela 470. 471. 472. quitte le gouuernement des Indes à Edouard de Meneses 480.
 Son ville du royaume d'Ormus se rend aux Portugallours 213.
 Soares, esleu viceroy des Indes au lieu d'Albuquerque 380. ses premiers altes 387. refuse de prendre possession de la ville d'Aden 405. est en danger de perir 406. perd son temps au siege de Inde 407. prend & pille Zeila 408. son imprudence, ses malheurs & incommoditez 409.
 Soleiman lieutenant du Sultan d'Egypte assiege Aden & en est repensé 405.
 Soleiman capitaine Thre fait pendre le Roy d'Aden & quatre grands Seigneurs 718. 719.
 Soleiman bassaye retire en grande confusion du siege de Diu 724.
 Sopher Chrestien rent fait la guerre aux Portugallois à Diu 725. tué d'un coup de mouquet 730.
 Sophi. voyez Ismael.
 Sordicaires esleux estranges 29.
 Stratagemes des Mores 59. de Meneses contre les Mores 112. en la guerre d'entre le Roy de Cananor & les Portugallois 175. 176. des Portugallois pour se rendre maistres de Safin 181. de tyranniques 223. auanté par la prudence d'Albuquerque 235. stratageme d'Albuquerque 256. du Conton gouuerneur de la citadelle d'Ormus 483.
 Sultan d'Egypte se plains au Pape contre les Roys d'Espagne & de Portugal 143.

T

T Aprobane isle renommée deserte 245.
 Terneret des Portugallois de la citadelle de Diu saluée 735. 736.
 Tempeste dans les nauires aussi perilleuse que dehors 28.
 Temple de S. Thomas en la ville de Coulam comment reconré 106.
 Temples des Calcutiens & leur ceremonies 39.
 Temples de Narsingue quels 159.
 Terre de Coterreal en Sepeentrion, pourquoy ainsi appelée 80.
 Terrouxa Roy d'Ormus 362. sa negociation avec Albuquerque 365.
 Theologie des Iesuites 746.
 St Thomas Apôtre reuert par les Chrestiens de Coulam 107. preche aux Indes, & ce qu'ils disent encores auourd'hui, de sa vie de sa mort & sepulture 119.
 Tidore prise & pillée par les Portugallois 651.
 Tidorent oppressez de guerre par les Portugallois 547. demandent la paix 348.

INDICE.

Tinaja conſeille Albuquerque de faire la guerre au Prince de Goa 150. recut le. uis fort gracieu ſer du Roy de Portugal 165. tui en trahiſon par le commandement du Roy de Narsingue 192.
 Tingo par qui conquis 7.
 Tierce. iſle 52.
 Une ville de Barbarie prinſe par les Portugallois 338.
 Toleda maintenant ſes priuileges 32.
 Trahiſtres vinrent depaues 48. en vendent les autres ſe vendent les premiers 94. comment retenu en deſoir 115. ſont gens en qu'on ne doit ſe fier 128. ſemez en tous lieux 130. n'ont ſa-mais ſaute d'inuention & d'exceſſes 248-249.
 Trahiſon horrible du Roy de Bistam 181. de Benaduxira comment recompensee 461. 462. 463. du Roy de Calcut contre les Portugallois 84. du Roy de Dachen 709.
 Traité de paix entre le Roy de Pacem & Albuquerque 182.
 Tribus exceſſif impoſé par Charles cinquieſme ſur l'Eſpagne 457.
 Triumphant Roy de Cochim ſidele ennemy les Portugallois 90. recienſe de ſa fidelité 103. craint d'eſtre trahi par les Portugallois 114. comment aſſuré 115.
 Trinité des perſonnes en une ſeule nature diuine co-mment repreſentee par ſes priſtes de Calcut 43.
 Triflan de Cygne enuoyé en Inde, & ſes auantures 187. ſes exploits 190. renuient en Portugal 195. ambassadeur de Portugal à Rome 350.
 Trifſſe meſſee parmi les playſirs des princes 21.
 Trébiles en Ormuz comment appaiſez par le viceroy 516. 517. &c. en la ville de Din, laquelle eſt ſauſie pour le Roy de Cambaje 650. ſuruenus entre les Portugallois à cauſe de l'emprisonnement de Pierre Meſſamegne 644. 645.
 Troupes de Pacheco comment diſtribuees & conduites. 117.
 Troupes du Roy Sebaſtian en la bataille ou il mourut 757.
 Turcs priſonniers & leur terrible exploit 477.
 Turcs en Inde pour en chaffer les Portugallois 717. aſſiege la citadelle de Din 720. contrains le uer le ſiege de deuant la citadelle de Din 723.
 Tumulte en Coulam & l'ordre que Pacheco y mit 135. ſuruenus entre les Indes 349. en Malaca par l'ambicion de deux capitaines Portugallois 416. en l'iſle de Zeilan 467.
 Tandis enſeques de Iapan 749.
 Turqueſque ville gaignee ſur les Mores par les Portugallois 451.
 Tyrans de quel naturel 81.

V

Vallance admirable de cinq Portugallois 452. de Chriſtoſte Inſarte 595.
 Vaſconcel gouuerneur de Goa aſſiné par le lieutenant de Zabato 294.
 Vaſque de Gama enuoyé le premier aux Indes. 20. ſes voyages, accidents & exploits 27. 35. 35. 38. enuoyé pour la ſeconde fois aux Indes 75. eſten viceroy des Indes en il arrive, & donne ordre aux affaires 554. 555. meurt eſt apres 558.

Vaſque de Sylueire brave gentil homme tué en Calcut 240.
 Vaſque Fernand Ceſar vaillant capitaine & ſes exploits 435. obtient diuerſes victoires ſur mer 460. combat une nouue Angloſe, laquelle il amena à rayſon 487.
 Vieux marins au nombre infini au cap de bonne eſperance 29.
 Vierge captaine valetoureux entre tous autres 485.
 Vezagor rymane 308.
 Venturi ſecours par le Roy de Portugal enuoyé le Turc 54. 561.
 Vertu de Pacheco comment reconnue & recompensee en Portugal 146.
 Vertu comment reconnue par un Barbare 283.
 Ville de Menſez ſur les Mores 9.
 Victoire notable 10. des Portugallois ſur ceux de Goa 269. de Ichabentafus 316. des Portugallois ſur Rabbenxamut 395. de Selym ſur le Sultan d'Egypte 414. des Portugallois en l'eſte de Zeilan 576. du captaine Dierze ſur les Calcutiens 673. des Portugallois ſur les Mores d'Afrique 55. Victoires des Portugallois ſur le Roy de Calcut 104. de Pacheco 119. 120. 121. de Pacheco & des Portugallois 126. des Portugallois au port de Din 230. des Portugallois en la coſte de Barbarie 274. d'Aluar Nor-gue 435. 436. de George Teſſo ſur les Calcutiens 556. de Saampago 697. 698.
 Vigilance de Pacheco 126.
 Vincent Seide captaine de cinq nauires ſait voile aux Indes 75. porté en Arabie 96.
 Van de Mores 194.
 Voyage de Fernand Ceruin en Inde 236.
 Voyage par terre depuis Ormuz iuſques en Portugal 676.
 Voyages & accidents diuers de Gama 27. de l'ambassadeur de Portugal pour ſe rendre en la cour du Sephi 399. de George quadre 415.
 Vicimutaraia eſtabli iuge en Malaca 189. promet obeſſance à Albuquerque 285. emprisonné & decapité en Malaca avec ſon fils & ſon gendre 298.

X

X Etaiſ cauſe du maſſacre des Portugallois en Ormuz 482. ſont eſtranglez le Roy 485. en danger de mort par quels artiſices ſe garantit 577. & eſe plaint du rude traitement des Portugallois 573. eſchappe la main des hommes en payant 622. 623. abſout ſes meſchantez, par l'auditeur general des Indes 673. emprisonné pour eſtre meurt en Portugal 711.
 Xerxiſmis en route par Ichabentafus 342. eſt enſuit deuant Barrigoe 373.

Z

Z Abaim prince de Goa en voulant ruiner les Portugallois eſt ruiné par Albuquerque 251. 252. &c. ſait tout ſes efforts de ruiner Albuquerque, & comme le vint ſucceda 259. recouure une partie de ſes pays eſurpet par les Portugallois 512.
 Zabato Seigneur de Goa 51. ſait la guerre aux Portu-

INDICE.

- Portugallois en Anchedane, & le succès d'une 170.
 Zaccutia isle notable descrite, & la guerre que les Portugallois y firent 191.
 Zanzibar isle descrite 52.
 Zesam prince d'Azamor trompe le Roy de Portugal & ce qui en suivit 334.
 Zeila ville d'Ethiopie assaiée, prise & pillée par Searez 407.
 Zeilon isle renommée, divisée en sept provinces, sa description & ses richesses 167. rendue tributaire aux Portugallois 423.
 Zeilandois se soulèvent contre les Portugallois 467. leur font la guerre, & qu'elle en fut la fin 468. 469.
 Zelo incouffidant souventefois cause de grandes cruautés 15. Zesfaden Roy d'Ormuz se rend tributaire de celui de Portugal 227.
 Zofa le pays abondant en or 31.
 Zofalar, m. lieutenant de Zabaim 262.
 Zofe Roy de Zofala tué par les Portugallois 164. 165.
 Zunde isle abondante en poivre 322.
 Zunde ville, en Sumatra, & ses commodités 639.

FIN DE LA TABLE.

Fautes notables à corriger.

- Page 1. 8. 9. & en plusieurs autres, jusques au 5. liure, au lieu de Jean Menes, lisez, Jean de Menesfez.
 Page 27. bigarrez de couleurs par la face & par le corps L. de couleur noirâtre.
 Page 93. & que les armées L. & crain que les armées.
 Page 163. 164. 191. bigarrez de couleurs L. de couleur bazanée.
 Page 499. Il en auint aussi 1, il en auint ainsi.
 Le nombre des années n'a esté exactement remarqué par tout: mais pour suppléer à ce défaut nous en avons mis un repertoire vis à vis de la première page.
 Le lecteur notera aussi qu'Oforius ayant exprimé le plus souvent par un même mot Latin les vaisseaux de marine, le traducteur n'en a pas si longneusement remarqué les diversitez es 12. premiers liures, comme es suivans: ce qui se pourra faire en une seconde édition, laquelle sera augmentée & reduite à la perfection, si Dieu le permet.





